

儒

藏



精華編一〇八冊
經部四書類

儒藏

北京大學《儒藏》編纂與研究中心

圖書在版編目(CIP)數據

儒藏. 精華編. 一〇八 / 北京大學《儒藏》編纂與研究中心編. —北京: 北京大學出版社, 2012. 2

ISBN 978-7-301-11826-9

I. ①儒… II. ①北… III. ①儒家 IV. ①B222

中國版本圖書館 CIP 數據核字(2012)第 007044 號

書 名: 儒藏(精華編一〇八)

著作責任者: 北京大學《儒藏》編纂與研究中心 編

責任編輯: 魏奕元

標準書號: ISBN 978-7-301-11826-9/B·0512

出版發行: 北京大學出版社

地 址: 北京市海澱區成府路 205 號 100871

網 址: <http://www.pup.cn>

電子郵箱: dianjiwenhua@163.com

電 話: 郵購部 62752015 發行部 62750672 編輯部 62756449

出版部 62754962

印 刷 者: 北京中科印刷有限公司

經 銷 者: 新華書店

787 毫米×1092 毫米 16 開本 56 印張 830 千字

2012 年 2 月第 1 版 2012 年 2 月第 1 次印刷

定 價: 500.00 元

未經許可,不得以任何方式複製或抄襲本書之部分或全部內容。

版權所有,侵權必究 舉報電話: 010—62752024

電子郵箱: fd@pup.pku.edu.cn

教育部哲學社會科學研究重大課題攻關項目

「十一五」國家重點圖書出版規劃項目·重大工程出版規劃
國家社會科學基金重大項目
北京大學「九八五工程」重點項目

《儒藏》精華編第一〇八冊

首席總編纂 季羨林

項目首席專家 湯一介

總編纂 湯一介 龐樸 孫欽善 安平秋
(按年齡排序)

本冊主編 孫欽善

《儒藏》精華編凡例

一、中國傳統文化以儒家思想爲中心。《儒藏》爲儒家經典和反映儒家思想、體現儒家經世做人原則的典籍的叢編。收書時限自先秦至清代結束。

二、《儒藏》精華編爲《儒藏》的一部分，選收《儒藏》中的精要書籍。

三、《儒藏》精華編所收書籍，包括傳世文獻和出土文獻。傳世文獻按《四庫全書總目》經史子集四部分類法分類，大類、小類基本參照《中國叢書綜錄》和《中國古籍善本書目》，於個別處略作調整。凡單書已收入入選的個人叢書或全集者，僅存目錄，並注明互見。出土文獻單列爲一個部類，原件以古文字書寫者一律收其釋文文本。韓國、日本、越南儒學者用漢文寫作的儒學著作，編爲海外文獻部類。

四、所收書籍的篇目卷次，一仍底本原貌，不選編，不改編，保持原書的完整性和獨立性。

五、對入選書籍進行簡要校勘。以對校爲主，確定內容完足、精確率高的版本爲底本，精選有校勘價值的版本爲校本。出校堅持少而精，以校正誤爲主，酌校異同。校記力求規範、精煉。

六、根據現行標點符號用法，結合古籍標點通例，進行規範化標點。專名號除書名號用角號（《》）外，其他一律省略。

七、對較長的篇章，根據文字內容，適當劃分段落。正文原已分段者，不作改動。千字以內的短文一般不分段。

八、各書卷端由整理者撰寫《校點說明》，簡要介紹作者生平、該書成書背景、主要內容及影響，以及整理時所確定的底本、校本（舉全稱後括注簡稱）及其他有關情況。重複出現的作者，其生平事蹟按出現順序前詳後略。

九、本書用繁體漢字豎排，小注一律排爲單行。

鳴謝

《儒藏》精華編惠蒙善助，共襄斯文；謹列如左，用伸謝忱。

本煥法師

壹佰萬元

智海企業集團董事長 馮建新先生

壹佰萬元

NE·TIGER 時裝有限公司董事長 張志峰先生

壹佰萬元

馮學智先生

壹萬元

本冊責任編委

沙志利

《儒藏》精華編第一〇八冊

經部 四書類

孟子之屬

孟子正義〔清〕焦循

.....

孟子正義

〔清〕焦循撰

王小婷校點

目錄

校點說明	一
孟子正義目錄識語(焦徵)	一
通儒揚州焦君傳(阮元)	一
孟子正義卷一	一
孟子題辭	一
孟子正義卷二	二五
孟子卷第一	二五
梁惠王章句上	二五
孟子見梁惠王章	二八
王立於沼上章	三六
梁惠王曰章	四一
寡人願安承教章	五〇
晉國章	五二

孟子正義卷三	五六
孟子見梁襄王章	五六
齊宣王問曰章	六〇
孟子正義卷四	八〇
孟子卷第二	八〇
梁惠王章句下	八〇
莊暴章	八〇
齊宣王問章	八六
交鄰國章	八九
雪宮章	九五
明堂章	一〇六
孟子正義卷五	一一五
王之臣章	一一五
所謂故國章	一一六
湯放桀章	一一八
爲巨室章	一一九
齊人伐燕勝之章	一二二

齊人伐燕取之章	一二四	子路人告之以有過章	一九六
鄒與魯闕章	一二八	伯夷非其君不事章	一九八
滕文公問滕小國也間於章	一三〇	孟子正義卷八	二〇五
齊人將築薛章	一三一	孟子卷第四	二〇五
滕文公問滕小國也竭力章	一三三	公孫丑章句下	二〇五
魯平公章	一三七	天時不如地利章	二〇五
孟子正義卷六	一四〇	孟子將朝王章	二〇八
孟子卷第三	一四〇	陳臻問章	二一四
公孫丑章句上	一四〇	平陸章	二一五
公孫丑問章	一四〇	蚺龜章	二一八
不動心章	一五一	爲卿於齊章	二二三
孟子正義卷七	一八〇	孟子正義卷九	二二六
以力假仁章	一八〇	自齊葬魯章	二二六
仁則榮章	一八一	沈同章	二三二
尊賢使能章	一八四	燕人畔章	二三七
人皆有章	一九〇	孟子致爲臣章	二四二
矢人章	一九三	留行章	二四六

尹士章	二四九
充虞章	二五二
居休章	二五四
孟子正義卷十	二五七
孟子卷第五	二五七
滕文公章句上	二五七
滕文公爲世子章	二五七
滕定公章	二六三
問爲國章	二七一
孟子正義卷十一	二九七
許行章	二九七
墨者章	三二六
孟子正義卷十二	三三三
孟子卷第六	三三三
滕文公章句下	三三三
陳代章	三三三
景春章	三三八

周霄章	三四二
彭更章	三四八
萬章問章	三五〇
戴不勝章	三五七
孟子正義卷十三	三六〇
不見諸侯章	三六〇
戴盈之章	三六三
好辯章	三六四
陳仲子章	三七九
孟子正義卷十四	三八六
孟子卷第七	三八六
離婁章句上	三八六
離婁章	三八七
規矩章	四〇〇
三代之得天下章	四〇一
愛人章	四〇二
人有恒言章	四〇二

孟子正義卷十五

爲政不難章	四〇三
天下有道章	四〇四
不仁者章	四〇六
桀紂章	四一〇
自暴者章	四一三
道在邇章	四一四
居下位章	四一四
伯夷辟紂章	四一七
求也爲季氏宰章	四二〇
存乎人者章	四二二
恭儉章	四二三
淳于髡曰男女授受不親章	四二四
君子之不教子章	四二六
事孰爲大章	四二七
人不足與適章	四二八
有不虞之譽章	四二九

孟子正義卷十六

人之易其言章	四三〇
人之患章	四三一
樂正子章	四三一
孟子謂樂正子章	四三二
不孝章	四三四
仁之實章	四三四
天下大悅章	四三六
孟子卷第八	四三九
離婁章句下	四三九
舜生於諸馮章	四三九
子產章	四四三
孟子告齊宣王章	四四六
無罪而殺士章	四四九
君仁莫不仁章	四五〇
非禮之禮章	四五〇
中也章	四五一

人有不爲章	四五二	逢蒙章	四七三
言人之不善章	四五三	西子章	四七六
仲尼章	四五三	天下之言性章	四七七
大人者章	四五三	公行子章	四八五
赤子之心章	四五四	君子所以異於人章	四八六
養生者章	四五六	禹稷顏子章	四八八
君子深造章	四五六	匡章章	四八九
博學章	四五八	曾子子思章	四九一
以善服人章	四五九	儲子章	四九四
言無實章	四五九	齊人章	四九五
徐子曰章	四六〇	孟子正義卷十八	四九八
人之所以異於禽獸章	四六三	孟子卷第九	四九八
禹惡旨酒章	四六五	萬章章句上	四九八
王者之迹熄章	四六七	舜往于田章	四九八
君子之澤章	四七二	詩云娶妻章	五〇五
孟子正義卷十七	四七三	象日以殺舜爲事章	五一四
可以取章	四七三	咸丘蒙問章	五一八

孟子正義卷十九……………五二六

堯以天下與舜章……………五二六

人有言至於禹章……………五二九

伊尹以割烹要湯章……………五三三

或謂孔子章……………五三七

百里奚章……………五四二

孟子正義卷二十……………五四七

孟子卷第十……………五四七

萬章章句下……………五四七

伯夷目不視惡色章……………五四七

北宮錡章……………五五二

問友章……………五六四

孟子正義卷二十一……………五七〇

交際章……………五七〇

仕非爲貧章……………五七八

不託諸侯章……………五八一

不見諸侯章……………五八八

一鄉之善士章……………五九三

問卿章……………五九五

孟子正義卷二十二……………五九七

孟子卷第十一……………五九七

告子章句上……………五九七

告子曰性章……………五九八

湍水章……………六〇〇

生之謂性章……………六〇二

食色章……………六〇六

孟季子章……………六〇八

公都子曰告子曰章……………六一〇

富歲章……………六一九

孟子正義卷二十三……………六三二

牛山章……………六三二

無或乎章……………六三五

魚我所欲章……………六三九

仁人心也章……………六四一

無名之指章	六四二	淳于髡曰先名實者章	六七五
桐梓章	六四三	孟子正義卷二十五	六八四
人之於身也章	六四三	五霸者章	六八四
鈞是人也章	六四六	魯欲使慎子章	六九三
天爵章	六四九	今之事君者章	六九六
欲貴章	六五〇	白圭章	六九七
仁之勝不仁章	六五三	丹之治水章	七〇〇
五穀者章	六五三	君子不亮章	七〇一
羿之教人射章	六五五	魯欲使樂正子章	七〇二
孟子正義卷二十四	六五六	陳子章	七〇四
孟子卷第十二	六五六	舜發章	七〇五
告子章句下	六五六	教亦多術章	七一二
任人章	六五六	孟子正義卷二十六	七一四
曹交章	六六〇	孟子卷第十三	七一四
小弁章	六六五	盡心章句上	七一四
宋牼章	六七一	盡心章	七一五
居鄒章	六七三	莫非命章	七一一

求則得之章 七一九

萬物皆備章 七二〇

行之章 七二一

人不可章 七二二

耻之於人章 七二二

古之賢王章 七二四

宋句踐章 七二五

待文王章 七二七

附之以韓魏章 七二八

以佚道章 七二九

霸者之民章 七二九

仁言章 七三一

人之所不學章 七三二

舜之居深山章 七三五

無爲其所不爲章 七三五

人之有德慧章 七三六

有事君人章 七三七

孟子正義卷二十七

三樂章 七三八

廣土衆民章 七三九

善養老章 七四四

易其田疇章 七四五

孔子章 七四六

雞鳴章 七四七

楊子章 七四七

飢渴章 七五二

柳下惠章 七五二

有爲者章 七五三

堯舜性之章 七五四

伊尹曰章 七五五

不素餐章 七五六

王子墊章 七五六

仲子章 七五七

桃應問章 七六〇

孟子正義卷二十八	七六二	盡信書章	七八三
孟子卷第十四	七六三	有人曰章	七八五
盡心章句下	七六五	梓匠輪輿章	七八八
梁惠王章	七六五	舜之飯糗章	七八八
春秋章	七六五	吾今而後章	七九〇
	七六七	古之爲闢章	七九一
	七六九	身不行道章	七九一
	七七〇	周于利章	七九二
	七七二	好名章	七九二
	七七三	不信仁賢章	七九三
	七七三	不仁章	七九三
	七七四	民爲貴章	七九四
	七七六	聖人章	七九六
	七七六	仁也者章	七九七
	七七八	孔子之去魯章	七九八
	七七八	扈於陳蔡章	七九八
	七七九	貉稽章	七九九

賢者章	八〇〇	曾皙章	八三一
孟子謂高子章	八〇一	孔子在陳章	八三六
禹之聲章	八〇二	由堯舜章	八四四
齊饑章	八〇五	孟子正義卷三十	八四九
口之於味章	八〇八	孟子篇叙	八四九
浩生不害章	八一		
孟子正義卷二十九	八一三		
逃墨必章	八一三		
有布縷章	八一五		
諸侯之寶章	八一七		
盆成括章	八一七		
孟子之滕章	八一九		
人皆有所不忍章	八二一		
言近章	八二四		
堯舜性者章	八二五		
說大人章	八二七		
養心章	八三〇		

校點說明

焦循（一七六三—一八二〇），字理堂，一字里堂，清代江蘇揚州甘泉黃珏鎮（今屬揚州市邗江區）人，阮元的族姊夫。嘉慶六年（一八〇一）舉人，首應會試不第，即以母病絕意仕進，潛心著述，後託足疾，十餘年不入城市。（阮元《通儒揚州焦君傳》）焦循長於算學，又用算學解《易》，代表作爲《雕菰樓易學三書》——《易通釋》、《易圖略》、《易章句》——計四十卷，提出旁通、相錯、時行的易學精神。焦循曾做戴震《孟子字義疏證》作《論語通釋》。又喜作「補疏」，刊行者有《周易》、《尚書》、《毛詩》、《禮記》、《春秋左傳》和《論語》六種二十卷，未刊者有《孟子補疏》二卷。焦循於文學、戲曲亦有著述，其詩文編爲《雕菰集》二十四卷。

《孟子正義》三十卷是清儒十三經新疏中較早的一部，梁啟超贊爲「後此新疏家模範作品」（《中國近三百年學術史》）。清代疏《孟》者至少六家，唯焦疏傳世。焦循因深惡孫奭《孟子疏》「踳駁乖謬，文義俚鄙，未能發明其萬一」，嘉慶二十一年冬或二十二年冬，開始與其子廷琥博採清人三十餘家著作中有關《孟子》之論，成長編十四帙；《正義》成書時更增至六十五家以上，具有突出的「集疏」性質。二十三年歲末至二十四年七月，就長編以己意貫串推行，草稿粗畢。又以半年之力博覽群書。二十五年春起開始謄錄，只謄清了十二卷，焦循就因「用思太猛」而於七月突然病歿。未清之稿先由子廷琥（止道光元年二月），後由弟徵及族孫授齡謄校，於道光三年（一八二三）末開雕，五年八月行世（以上據焦循《撰孟子正義日課記》及《孟子正義》目錄後焦徵識語）。《孟子》七篇，東漢趙岐作注時各分上下，南宋孫奭疏再各分上下成二十八卷。焦循新疏分卷沿舊疏，又以趙岐《孟子題辭》和《孟子篇敘》各爲一

卷，成三十卷六七十萬言的巨著。其經注文字與乾隆間孔繼涵刊經注善本最接近，並據阮元《孟子注疏校勘記》作了校訂，堪稱完善。

焦循生前謄清的是先自卷二至書末，再從卷一開始錄。心性論最爲集中的《告子》、《盡心》皆其手定。《孟子正義》揚戴震之波，發展了以智力可能性爲基礎的性善學說，並融入其易學思想。《孟子正義》仍以考據爲主，廣泛佔有原始資料和以清人爲主的前人成果，輯錄了漢晉各家《孟子注》的逸文，立論堅實，是研究《孟子》的首要參考書之一。焦疏特別重視對趙岐注的闡發，所謂「即或不得本文之意，而趙氏之意焉可誣也」，但又不守「疏不破注」之陋習，「於趙氏之說或有所疑，不惜駁破以相規正」（《孟子正義》卷三十）。由於各種原因，焦疏對趙注之意的理解時有偏差，訓詁過分拘泥成訓，部分資料轉據《經籍纂詁》，而承襲其誤，因音求義時凡涉入聲者常不可靠。凡此皆需留意。

《孟子正義》稿本現存南京圖書館。刻本有兩

大系統。一是道光五年焦氏半九書塾家刻單行本，嘉慶至道光間焦氏家刻《焦氏叢書》、道光間翁氏、光緒二年衡陽魏倫先《焦氏遺書》和民國十八年受古書店俱用同板重印；二是道光九年《皇清經解》本，有咸豐十一年補刻及各種翻刻本、石印本。此外尚有光緒十六年邵氏望式益齋鉛印《四書古注群義匯解》本及單行本。

由於稿本不便利用，《皇清經解》本除經注外翻刻草率，也偶有妄改，本次校點取《續修四庫全書》影印道光間《焦氏叢書》本爲底本，取上海書店一九八八年影印之《皇清經解》本爲校本（簡稱「經解本」）。他校用書一般據影印《文淵閣四庫全書》和《續修四庫全書》，阮元《孟子注疏校勘記》（簡稱「阮校」）兼用中華書局影印《十三經注疏附校勘記》本和嘉慶文選樓刻單行本；阮校所謂「宋十行本」現多以爲元刻，姑沿阮稱。校點中參考了一九八七年中華書局《新編諸子集成》沈文倬點校本和民國間世界書局《諸子集成》句讀本（一九八六年河北人民出

版社影印），沈文倬校記有可取者標明「沈校」，只撮其意，不引原文；經文標點還參考了楊伯峻《孟子譯注》，經注標點還參考了《天祿琳琅叢書》影印元明郡覆宋本《孟子》的句讀，經注文字有誤者亦據此本校正（沿阮校簡稱「廖本」）。經文標點凡焦疏與趙注理解有歧者，倘疏明言則從注，倘疏未明言則從疏。

原目錄只揭卷第，今另為新編，參照趙佑《四書溫故錄》所附《重輯孟子章指》的做法為各章派製簡稱，《溫故錄》所用簡稱有重複者，添續經文以予區分。底本目錄未刪去了焦徵識語，而校點者所見諸本的識語皆缺末一頁，今據沈文倬點校本補足並獨立成篇。避諱字逕行回改，如「玄」作「元」、「曆」作「秝」、「胤」作「允」、「旻」闕筆、「丘」作「邱」（「孔丘」經注文闕筆，疏文作「某」）等。

校點者 王小婷

孟子正義目錄識語

焦徵

先兄壬戌會試後閉門注《易》。癸酉二月，自立一簿，稽考所業。戊寅春，《易學三書》成。又以古之精通《易》理，深得伏羲、文王、周公、孔子之旨者，莫如趙氏；生孟子後而能深知其學者，莫如趙氏。惜僞疏踏駁乖謬，文義鄙俚，未能發明其萬一，思作《正義》一書。於是博採經史傳注以及本朝通人之書凡有關於《孟子》者一一纂出，次爲長編十帙。逐日稽考，殫精研慮。自戊寅十二月起稿，逮己卯七月，撰成《孟子正義》三十卷。又復討論羣書，刪煩補缺。庚辰之春，修改乃定。手寫清本未半而病作矣。自言用思太猛。知不起，以膳校囑廷琥而歿。廷琥處

苦塊中，且校且膳，急思付梓，又以病歿。徵以事身羈旅舍，膳校先兄書未敢少怠。更深人靜，風雨淒淒，寒柝爭鳴，一燈如豆，憶及兄姪，涕泗交橫，廢書待旦，非復人境矣。

一年之中，迭遭喪病。先兄著述待刻者多，寒素之家，力難猝辦。徵衰病無能，營謀事拙，謹與家人相約，各減衣食之半，日積月累以待將來。癸未歲終，總計田租所入、衣食之餘約積七百餘金，急以《孟子正義》付刻。乙酉八月，刻工告竣，庶使廷琥苦心稍慰泉壤也。徵校是書難免錯誤，有能檢出者，乞即詳指郵寄，以便改正，受惠多矣。先兄稿本每一篇末自記課程如注《易》時，書之成僅八閱月耳。徵爲膳校，又有族孫授齡相助，曠日彌久，以至於今。先兄下世已六易寒暑矣，遷延之罪，實所難辭。其他二百餘卷急思盡刻，所需約數千金，非蓄積二十年

又無他故，不能完全。徵雖未老，衰病日增，恐難目覩其成，然必竭力勉爲，不敢少怠也。至於著書之義，末一卷已詳盡言之，茲第述所以刻書之始末云爾。道光五年乙酉中秋日弟徵謹識。

通儒揚州焦君傳

阮元撰

焦君名循，字里堂，世居江都北湖黃珏橋，分縣爲甘泉人。曾祖源，江都縣學生，爲《周易》之學。祖鏡，父葱，皆方正有隱德，傳《易》學。君生三四歲即穎異。八歲，至公道橋阮氏家，與賓客辨壁上「馮夷」字曰：「此當如《楚辭》讀皮冰切，不當讀如縫。」阮公廣堯大奇之，遂以女字之。

年十七，劉文清公取補學生員。年二十二，補廩膳生。次年，丁父暨嫡母謝艱，自殮及葬八閱月，未櫛沐，食臥不離喪次，甚哀毀。弟徵讀書，自教之。興化顧超宗傳其父文子之經學。超宗與君幼同學，君始用力於經。超宗歿，君理其喪，作《招亡友賦》哭之。

歲乙卯，元督學山東，招君往遊，遂自東昌至登州，有《山左詩鈔》一卷。嘉慶歲丙辰，元督學於浙，復招君遊浙東，有《浙江詩鈔》一卷。歲庚申，元撫浙，招君復遊浙。辛酉春歸揚州，秋應鄉試，中式舉人。人都謁座師英煦齋先生，先生曰：「吾知子之字曰里堂，江南老名士，屈久矣。」歲壬戌，復招君遊浙，冬歸揚州。歲乙丑，有勸君應禮部試且資之者，君以書辭之，曰：「生母殷病雖愈而神未健，此不北行之苦心，非樂安佚輕仕進也。」殷竟以夏病冬卒。君哀毀如初，克盡其孝。除喪後小有足疾，遂託疾居黃珏橋村舍，閉戶著書。葺其老屋曰「半九書塾」，復構一樓曰「雕菰樓」，有湖光山色之勝，而讀書著書恒在樓，足不入城市者十餘年矣。歲庚辰夏，足疾甚且病瘡，以七月二十七日卒，距生於乾隆癸未二月三日得年五十有八。妻阮

氏。子廷琥，廩生。孫三：授易、授書、授詩。

君善讀書，博聞強記，識力精卓，於學無所不通。著書數百卷，尤邃於經，於經無所不治，而於《周易》、《孟子》專勒成書。君於《易》本有家學，嘗疑：一「號咷」也，何以既見於《旅》，又見於《同人》；一「拯馬壯」也，何以既見於《復》，^①又見於《明夷》；「密雲不雨」之象，何以《小畜》與《小過》同辭；「甲」「庚三日」之占，何以《蠱·象》與《巽·象》相例？丁父憂後，乃徧求說《易》之書閱之，撰述成帙。甲子後，復精研舊稿，悟得洞淵九容之術實通於《易》，乃以數之比例求《易》之比例，於是擬撰《通釋》一書。丁卯病危，以《易》未成爲憾。病瘳，誓於先聖先師，盡屏他務，專治此經，遂成《易通釋》二十卷。自謂所悟得者，一曰「旁通」，二曰「相錯」，三曰

「時行」。「旁通」者，在本卦初與四易，二與五易，三與上易，本卦無可易，則旁通於他卦，亦初通於四，二通於五，三通於上。先二五後初四、三上爲當位，不俟二五而初四、三上先行爲失道。易之道惟在變通。二五先行而上下應之，此變通不窮者也。或初四先行、三上先行，則上下不能應，然能變而通之，仍大中而上下應。如《乾》四之《坤》初成《小畜》、《復》，失道矣，變通之，《小畜》二之《豫》五，《姤》二之《復》五。《復》初不能應，《姤》初則能應；《小畜》四不能應，《豫》四則能應。《坎》四之《離》上成《井》、《豐》，失道矣，變通之，《井》二之《噬嗑》五，《豐》五之《渙》二。《豐》上不能應，《渙》上則能應；《井》三不能應，《噬嗑》三則能應。此所謂

①「復」，按引文見《渙》卦。

「時行」也。「比例」之義出於「相錯」。如《睽》二之五爲《无妄》，《井》二之《噬嗑》五亦爲《无妄》，故《睽》之「噬膚」即《噬嗑》之「噬膚」。《坎》三之《離》上成《豐》，《噬嗑》上之三亦成《豐》，故《豐》之「日昃」即《離》之「日昃」，《豐》之「日中」即《噬嗑》之「日中」。《漸》上之《歸妹》三，《歸妹》成《大壯》，《漸》成《蹇》，《蹇》、《大壯》相錯成《需》，故《歸妹》「以須」之即「需」也。^①《歸妹》四之《漸》初，《漸》成《家人》，《歸妹》成《臨》，《臨》通《遯》，相錯爲《謙》。《履》故「眇能視」，^②跛能履，《臨》二之五即《履》二之《謙》五之比例也。《易通釋》即成，復提其要爲《圖略》八卷，凡圖五篇，原八篇，發明旁通、相錯、時行之義，論十篇，破舊說之非。復成《章句》十二卷。總稱《雕菰樓易學三書》，共四十卷。君《易》學既成，數年中有隨筆記錄之書，編次

之，得二十卷，曰《易餘籥錄》。凡友朋門弟子所問答及於《易》者，取入《三書》外多有所餘，復錄而存之，得二卷，曰《易話》。自癸酉立一簿，自稽所業，得三卷，曰《注易日記》。又有《易廣記》三卷。君之《易》學不拘守漢魏各師法，惟以卦爻經文比例爲主。「號咷」、「密雲」蹤跡甚顯，「蒺藜」、「樽酒」假借有據，如郭守敬之以實測得天行也。

既，又著《孟子正義》三十卷，疏趙岐之注，兼採近儒數十家之說，而多下己意，合孔孟相傳之正指。君又著《六經補疏》，說曰：說漢《易》者每屏王弼之說。然弼之解「箕子」乃用趙賓說，孔穎達不能申明之；他如讀「彭」爲「旁」，借「雍」爲「甕」，通「孚」爲

① 「以須之」，據上下文例當作「之以須」。

② 「履故」，據文意當互乙。

「浮」而訓爲「務躁」，解「斯」爲「厮」而釋爲「賤役」，蓋以六書通借解經之法尚未遠於馬鄭諸儒，惟貌爲高簡，故疏者視爲空論耳。因作《周易王氏注補疏》二卷。說《尚書》者多以孔傳爲僞，然《堯典》以下至《秦誓》，其篇固不僞也，即魏晉人作傳亦何不可存？因舉其說之善者，如《金縢》「我之不辟」訓「辟」爲「法」，「居東」即東征，「罪人」即管、蔡；《大誥》周公不自稱王而稱成王之命；皆非馬鄭所能及。作《尚書孔氏傳補疏》二卷。毛鄭義有異同，然正義往往雜鄭於毛，比毛於鄭，而聲音訓詁疏略亦多，因撰《毛詩鄭氏箋補疏》五卷。《春秋》成而亂臣賊子懼。《左氏傳》云「稱君，君無道；稱臣，臣之罪」，杜預且揚其詞而暢衍之，與《孟子》之說大悖。預爲司馬懿女壻，目見成濟之事，將有以爲昭飾，且有以爲懿、師飾，即用以爲己

飾，此《左氏春秋集解》所以作也。萬氏充宗斥《左氏》之頗，惠氏半農、顧氏棟高糾杜氏之失，然未有摘其姦而發其覆者，撰《左氏春秋傳杜氏集解補疏》五卷。謂禮以時爲大，蔽千萬世制禮之法而訓詁名物亦所宜究，撰《禮記鄭氏注補疏》三卷。《論語》一書，所以發明伏羲文王周公之旨，其文簡奧，惟孟子闡發最詳最鬯。《論語》一書之中，參伍錯綜，引申觸類，其互相發明者亦與易例同，撰《論語何氏集解補疏》二卷。合之爲《六經補疏》二十卷。君游浙，因元考浙江原委以證《禹貢》三江歸揚州，撰《禹貢鄭注釋》二卷，專明班氏、鄭氏之學。君謂王伯厚《詩地理考》繁雜無所融貫，作《毛詩地理釋》四卷。君又仿東原戴氏《孟子字義疏證》撰《論語通釋》一卷，凡十二篇，曰聖，曰大，曰仁，曰一貫，曰忠恕，曰學，曰知，曰能，曰權，曰義，曰禮，

曰仕，曰君子小人。君又撰《羣經宮室圖》二卷，爲圖五十篇，《毛詩鳥獸草木蟲魚釋》十卷，《陸璣疏考證》一卷。君錄當世通儒說《尚書》者四十一家，書五十七部，仿衛湜《禮記》之例，以時之先後爲序，得四十卷，曰《書義叢鈔》。

君思深悟銳，尤精於天學算術，謂梅徵君《弧三角舉要》、《環中黍尺》撰非一時，鯨複無次，戴庶常《勾股割圓記》務爲簡奧，變易舊名，撰《釋弧》三卷。錢辛楣先生稱是書於正弧、斜弧、次形、矢較之用，理無不包，法無不備。君上書於錢辛楣先生論「七政」諸輪，辛楣先生復書云：「推闡入微，以實測之數假立法象，以求其合，尤爲洞徹根原。」君以弧線之生緣於諸輪，輪徑相交乃成三角，輪之弗明，法無從附也，撰《釋輪》二卷。君又謂康熙甲子律書用諸輪法，雍正癸卯律書

用橢圓法，實測隨時而差，則立法亦隨時而改，撰《釋橢》一卷。君又謂劉徽之注《九章算術》猶許氏慎之撰《說文解字》，講六書者不能舍許氏之書，講九章者亦不能舍劉氏之書。九章不能盡加減乘除之用，而加減乘除可以通九章之窮。作《加減乘除釋》八卷。君與吳縣李君尚之、歙汪君孝嬰商論算學。是時，李仁卿、秦道古之書兩君未之見也。乙卯，君在元署中得《益古演段》、《測圓海鏡》二書，急寄尚之，尚之爲之疏通證明。君又得秦氏所爲《數學大略》，因撰《天元一釋》二卷，《開方通釋》一卷以述兩家之學。尚之敘云：「此書於帶分寄母同數相消之故條分縷析，發揮無餘蘊。自李樂城、郭邢臺之後，爲此學者未如此妙也。」又教子廷琥曰：「李樂城之學，余既撰《天元一釋》以闡明之，而《測圓海鏡》、《益古演段》兩書不詳開方之

法，以常法推之不合，讀者依然溟滓黯黠。余得秦道古《數學九章》，有正負開方法，因作《開方通釋》詳述其義，汝可列《益古演段》六十四問，用正負開方法推算之。」因以同名相加異名相消、用超用變之法詳示廷琥，廷琥乃知以秦氏之法讀李氏之書，布策推算一符合。六十四問每問皆詳畫其式，君喜曰：「得此而《演段》可以讀矣。」即命名曰《益古演段開方補》，且曰：「可附《里堂學算記》之末。」

君又善屬文，最愛柳州文，習之不倦，謂唐宋以來一人而已。後人多斥柳州爲王叔文黨，君爲雪之，且曰：「田山藴《古歡集》，馮山公、王西莊兩先生，於叔文事皆立論平允，足洗不讀書者隨聲附和之陋習。」君於治經之外，如詩詞、醫學、形家、九流之書，無不通貫。又力彰家鄉先哲，勤求故友遺書，孜孜不倦。

黃珏橋有老屋一區，爲前明忠臣梁公于涖之故宅，君買脩之，扁曰「北湖耆舊祠」。設木主三十位，祀嘗居北湖，忠孝行誼載于史志足爲鄉人表率者。復揭三十人事實于壁。里人頗觀感焉。復理採舊聞，搜訪遺籍，成《北湖小志》六卷。又因分撰《揚州府志》，收拾雜文舊事，次第爲目錄一卷，名曰《揚州足徵錄》。又以隨筆考錄揚事者，成《邗記》六卷。君每得一書，必識其顛末。或朋友之書，無慮經史子集，即小說詞曲亦必讀之至再，心有所契則手錄之。如是者三十年，命子廷琥編寫成《里堂道聽錄》五十卷。又舉國朝人著述三十二家作《讀書三十二贊》。又著《貞女論》二篇、《愚孝論》一篇，皆有補於世教。君之文集手自訂者曰《雕菰集》二十四卷，《詞》三卷，《詩話》一卷，種痘、醫說等書不具錄。

君性誠篤直樸，孝友最著，恬淡寡欲，不干仕祿。居恒布衣蔬食，不入城市，惟以著書爲事，湖山爲娛。壯年即名重海內，先輩中如錢辛楣、王西莊、程易田諸先生皆推敬之，煦齋先生見君《易》學，敘之，以爲發千古未發之蘊，且集蘇文忠句書贈之，曰：「手植數松今偃蓋，夢吞三畫舊通靈。」子廷琥能讀書，傳父學，端士也。

評曰：焦君與元年相若，且元族姊夫也。弱冠與元齊名，自元服官後，君學乃精深博大，遠邁於元矣。今君雖殂，而學不朽。元哀之切，知之深，綜其學之大指而爲之傳，且名之爲「通儒」，諡之史館之傳儒林者曰：「斯一大家，曷可遺也！」

孟子正義卷一

江都縣鄉貢士焦循撰集

孟子題辭疏正義曰：《音義》云：「張鑑云：『即序也。』

趙注尚異，故不謂之序而謂之題辭也。」阮氏元《校勘記》云：「十行本、閩本無此篇，監、毛本有，山井鼎《考文》所謂『孟子題辭』，注疏本或無之者是也。」**趙氏疏**正義曰：《校勘記》云：「《音義》『孟子題辭』下出『趙氏』字，今本無之，蓋失其舊。」按《後漢書》本傳云：「趙岐，字邠卿，京兆長陵人也。初名嘉。生於御史臺，因字臺卿。後避難，故自改名字，示不忘本土也。岐少明經，有才藝，娶扶風馬融兄女。融外戚豪家，岐嘗鄙之，不與融相見。仕州郡，以廉直疾惡見憚。年三十餘，有重疾，卧蓐七年，自慮奄忽，乃為遺令，勅兄子曰：『大丈夫生世，遯無箕山之操，仕無伊、呂之勳。天不我與，復何言哉！』

可立一員石於吾墓前，刻之曰：「漢有逸人，姓趙名嘉，有志無時，命也奈何！」其後疾瘳。永興二年辟司空掾，議二千石得去官為親行服，朝廷從之。其後為大將軍梁冀所辟，為陳損益求賢之策，冀不納。舉理劇，為皮氏長。會河東太守劉祐去郡，而中常侍左悺兄勝代之，岐耻疾宦官，即日西歸。京兆尹延篤復以為功曹。先是，中常侍唐衡兄玆為京兆虎牙都尉，郡人以玆進不由德，皆輕侮之。岐及從兄襲又數為貶議，玆深毒恨。延熹元年，玆為京兆尹，岐懼禍及，乃與從子戡逃避之。玆果收岐家屬宗親，陷以重法，盡殺之。岐遂逃難四方，江淮海岱，靡所不歷。自匿姓名，賣餅北海市中。時安丘孫嵩年二十餘，遊市見岐，察非常人，停車，^①呼與共載。岐懼失色，嵩乃下帷，令騎屏行人，密問岐曰：「視子非賣餅者，又相問而色動，不有重怨，即亡命乎？我，北海孫賓石，闔門百口，勢能相濟。」岐素聞嵩名，即以實告之。遂以俱歸，藏岐複壁中數年。岐作《屯屯歌》二十三章。後諸唐死滅，因赦乃出。三府聞之，同時並辟。九年，乃應司徒胡廣之命。會南匈奴、烏桓、鮮卑反叛，公

①「停」，原誤作「渟」，今據經解本改。

卿舉岐，擢拜并州刺史。岐欲奏守邊之策，未及上，會坐黨事免，因撰次以爲《禦寇論》。靈帝初，復遭黨錮十餘歲。中平元年，四方兵起，詔選故刺史、二千石有文武才用者，徵岐，拜議郎。車騎將軍張溫西征關中，請補長史，別屯安定。大將軍何進舉爲燉煌太守。行至襄武，岐與新除諸郡太守數人俱爲賊邊章等所執，欲脅以爲帥，岐詭辭得免，展轉還長安。及獻帝西都，復拜議郎，稍遷太僕。及李傕專政，使太傅馬日磾撫慰天下，以岐爲副。日磾行至洛陽，表別遣岐宣揚國命。所到郡縣，百姓皆喜曰：「今日乃復見使者車騎！」是時，袁紹、曹操與公孫瓚爭冀州，紹及操聞岐至，皆自將兵數百里奉迎。岐深陳天子恩德，宜罷兵，安人臣之道。又移書公孫瓚，爲言利害。紹等各引兵去，皆與期會洛陽，奉迎車駕。岐南到陳留，得篤疾。經涉二年，期者遂不至。興平元年，詔書徵岐。會帝還洛陽，先遣衛將軍董承修理宮室。岐謂承曰：「今海內分崩，唯有荊州境廣地勝，西通巴蜀，南當交趾，年穀獨登，兵人差全。岐雖迫大命，猶志報國家，欲自乘牛車，南說劉表，可使其身自將兵來衛朝廷，與將軍并心同力，共獎王室，此安上救人之策也。」承即表遣岐使荊州督租糧。岐至，劉表即遣兵詣洛

陽助修宮室，軍資委輸前後不絕。時孫嵩亦寓於表，表不爲禮，岐乃稱嵩素行篤烈，因共上爲青州刺史。岐以老病，遂留荊州。曹操時爲司空，舉以自代，光祿勳桓典、少府孔融上書薦之，於是就拜岐爲太常。年九十餘，建安六年卒。先自爲壽藏，圖季札、子產、晏嬰、叔向四像居賓位，又自畫其像居主位，皆爲讚頌。勅其子曰：「我死之日，墓中聚沙爲牀，布簾白衣，散髮其上，覆以單被，即日便下，下訖便掩。」岐多所述作，著《孟子章句》、《三輔決錄》傳於時。劉攽《兩漢刊誤》云：「《趙岐傳》『要子章句』，『要』當作『孟』。古書無《要子》，而岐所作《孟子章句》傳至今，本傳何得反不記也？」惠氏棟《後漢書補注》云：「劉氏既有刊誤，明國子監本遂刊去『要』字，改爲『孟子章句』。」

《孟子題辭》者，所以題號《孟子》之書本末指義文辭之表也。

疏正義曰：劉熙《釋名·釋書

契》云：「書稱題。題，諦也，審諦其名號也。亦言第。因其第次也。」《周禮·春官·司常》：「官府各象其事，州里各象其名，家各象其號。」注云：「事、名、號者，徵識，所以題別衆

臣，樹之於位，朝各就焉。《士喪禮》曰：「爲銘各以其物，亡則以緇長半幅，頽末，長終幅，廣三寸，書名於末。」此蓋其制也。徵識之書則云某某之事、某某之名、某某之號。襄公十年《左傳》「舞師題以旌夏」，注云：「題，識也。」趙氏自釋稱題辭之義，稱述孟子氏名事實之本末，所以著書之指義，以表其文辭，猶徵識題號之在旌常，故謂之題辭也。孟，姓

也。子者，男子之通稱也。此書孟子之所作

也，故總謂之《孟子》。

疏正義曰：此題識《孟子》名

書之義。孟，氏也。如下云「出自孟孫」，則與魯同姓。後世

姓氏不分，氏亦通稱姓。《文選·楮淵碑文》注引劉熙注云：「子，通稱也。」《論語·學而》篇「子曰」，《集解》引馬

曰：「子者，男子通稱也，謂孔子也。」孟子稱子猶孔子稱子。

何異孫《十一經問對》云：「《論語》是諸弟子記諸善言而成

編集，故曰《論語》而不號「孔子」，《孟子》是孟軻所自作之

書，如《荀子》，故謂之「孟子」。」其篇目則各自有名。

疏正義曰：如《梁惠王》、《公孫丑》、《滕文公》、《離婁》、《萬

章》、《告子》、《盡心》。孟子，鄒人也。名軻，字則

未聞也。鄒本春秋邾子之國，至孟子時改曰

「鄒」矣。國近魯，後爲魯所并。又言邾爲楚所并，非魯也。今鄒縣是也。

疏正義曰：《史記》

列傳云：「孟軻，騶人也。」騶與鄒通，騶衍，《漢書·古今人

表》作「鄒衍」是也。王應麟《困學紀聞》云：「孟子字未聞。

《孔叢子》云：「子車——注：一作子居——居貧坎軻，故名

軻字子居。亦稱字子與。」《聖證論》云：「《子思》書、《孔叢

子》有孟子居，即是軻也。」《傳子》云「孟子與」。疑皆傳會。」

史記《三遷志》云：「孟子字自司馬遷、班固、趙岐皆未言及。

魏人作《徐幹中論序》曰：「孟軻、荀卿懷亞聖之才，著一家

之法，皆以姓名自書，至今厥字不傳。原思其故，皆由戰國

之士樂賢者寡，不早記錄耳。」是直以孟子爲逸其字矣。」按

王肅、傅玄生趙氏後，趙氏所不知，肅何由知之？《孔叢》偶

書不足證也。王氏疑其傳會是矣。《說文》邑部云：「鄒，魯

縣，古邾婁國，帝顓頊之後所封。」段氏玉裁《說文解字注》

云：「魯國騶，一《志》同。周時或云「鄒」或云「邾婁」者，語

言緩急之殊也。周時作「鄒」，漢時作「騶」，古今字之異也。

《左》、《穀》作「邾」，《公羊》作「邾婁」。「邾婁」之合聲爲

「鄒」。《國語》、《孟子》作「鄒」。三者「鄒」爲正，「邾」則省

文。漢時縣名作「騶」，如《韓勅碑》陰「騶章仲卿」足證。《鄭

語》曰「曹姓鄒、莒」，韋云：「陸終第五子曰安，爲曹姓，封於鄒。」杜《譜》云：「邾，曹姓。顓頊之後有六終，產六子，其第五子曰安。邾即安之後也。周武王封其苗裔俠爲附庸，居邾。」《前志》曰：「騶，故邾國，曹姓，二十九世爲楚所滅。」按《左傳》顓頊氏有子曰黎爲祝融，祝融之後八姓，姁、曹其二也。然則上文「鄒，祝融之後，姁姓所封」，此云「帝顓頊之後」，互文錯見也。今山東兗州府鄒縣東南二十六里，有古邾城。趙氏岐曰「邾本春秋邾子之國，至孟子時改曰鄒」，此未知其始本名鄒也。周氏廣業《孟子出處時地考》云：「邾有二，皆顓頊後所封國。一早著於幽王之世，《國語》史伯謂鄭桓公曰「當成周者，東有齊、魯、曹、宋、滕、鄒、莒」，又曰「黎爲高辛氏火正，命曰祝融，其後以姓存者，姁姓：鄒、路、偃、陽，曹姓：鄒、莒，皆爲采衛」，此鄒人春秋不復見，^①惟《晏子》載「景公爲鄒之長塗，晏子諫而息」。疑爲齊所滅。《漢志》濟南郡有鄒平、梁鄒二縣。《水經注》謂「鄒平，古鄒侯國，^②舜後姚姓」，蓋即今濟南府鄒平縣地也。其一即邾。《大戴記》：「顓頊子老童，產重黎及吳回，吳回產陸終，陸終六子，其五曰安，是爲曹姓。」曹姓者，邾氏也。俠以下，至儀父始見春秋。十四世文公遷於繹，今兗州鄒縣北嶧山是也。《漢志》屬魯國，今爲兗州府鄒縣。其改「邾」爲

「鄒」，《齊乘》謂始文公。但遷繹在魯文公十三年，而終春秋不聞有鄒，至戰國更無邾名，故趙氏以謂至孟子時改也。《藝文類聚》引劉蒼《騶山記》云：「騶山，古之嶧陽，魯穆公改爲騶。」徐鉉《說文》亦云：「魯穆公改邾爲鄒。」改名不應出魯，或謂「鄒穆公」爲「魯穆公」耳。按：邾即邾，不開更改，段氏說是也。杜預《春秋釋例·世族譜》云：「邾國，春秋後八世而楚滅之。」此自本《漢書·地理志》，趙氏又言是也。春秋時魯與邾爲仇，哀公時無歲不與爲難，二年取鄒東田及沂西田，三年城啓陽，六年城邾瑕，七年入邾，處其公宮，以邾子益來獻於亳社。趙氏言「邾爲魯并」或指此，然吳、齊救之，邾子益得歸，則邾未滅也。哀公七年《左傳》云「魯擊柝聞於邾」，是國近魯。或曰：孟子，魯公族孟孫之後，故孟子仕於齊，喪母而歸葬於魯也。三桓子孫既以衰微，分適他國。疏正義

曰：魯桓公生同，爲莊公。次慶父，爲仲孫氏；次叔牙，爲叔孫氏；次季友，爲季孫氏：是爲「三桓」。仲孫氏即孟孫

① 「入」，原誤作「人」，今據《孟子四考》改。

② 「鄒」，原脫，今從沈校據《水經注》補。

氏。慶父生公孫敖，即孟穆伯，穆伯生文伯惠叔，文伯生仲孫蔑，即孟獻子，獻子生仲孫速，即孟莊子，莊子生孺子秩，秩生仲孫獲，即孟僖子，僖子生仲孫何忌，即孟懿子，懿子生孟孺子洩，即孟武伯，武伯生仲孫捷，即孟敬子。入春秋後，其獻子次子懿伯生仲孫羯。杜預《世族譜》以懿伯即子服仲叔它，生孟椒，椒生子服回，回生子服何，是爲子服景伯，別爲子服氏。孟氏之族有孟公綽，孟之反，孟懿子之弟有南宮敬叔，孟武伯之弟有公期。孟獻子，賢大夫，固嘗爲孟子所稱矣；莊子之孝，公綽之不欲，之反之不伐，爲孔子所稱。僖子，懿子，武伯皆知欽敬孔子，敬子則受教於曾子。孟氏尊師重道，其後宜有達人。孟子既以孟爲氏，宜爲孟孫之後；但世系不可詳，故趙氏以「或曰」疑之耳。閻氏若璩《孟子生卒年月考》云：「孟子蓋魯公族孟孫之後，不知何時分適鄒，遂爲鄒人。猶葬歸於魯者，太公孫反葬周之義也。然考今孟母墓碑，墓在鄒縣北二十里馬鞍山陽，又非魯地。疑古爲魯地，猶魯鄒邑今亦在鄒縣界內，一國密邇，《左傳》『魯擊柝聞於邾』是也。」周氏廣業《孟子出處時地考》云：「劉昭注《續漢志》『驪本邾國』，引劉蕡《驪山記》：『邾城在山南，去山二里，北有繹山。』《左傳》文十三年：『邾遷於繹。』郭璞云：『繹山連屬地，北有牙山，牙山北有唐口山，

唐口山北有陽城，北有孟軻冢焉。」此葬鄒之確證。宋孫復《兗州鄒縣建孟廟記》云：「景祐丁酉，龍圖孔公爲東魯之二年，謂有功於聖門者無先於孟子，且鄒爲孟子之里，今爲所治之屬，吾當訪其墓而表之，新其祠而祀之，以旌其烈。於是符下官吏博求之，果於邑之東北三十里有山曰四基，^①四基之陽得其墓焉。遂命去其榛莽，肇其堂宇，以公孫、萬章之徒配。明年春，廟成。」其序地域、墓山尤爲明切。又《齊乘》：「尼邱山在滕州鄒縣東北六十里，有宣聖廟。其東顏母山，有顏母廟，南有昌平山，夫子所生之鄉，又南馬鞍山，有孟母墓，又南唐口山，有孟子墓。」然則鄒邑當金元時亦隸鄒縣。而唐口之墓，孫明復云「東北三十里」，于容思云「馬鞍之南」，^②孟衍泰《三遷志》又謂「孟母墓在今縣北二十里，與孟子墓不甚遠」，要之，不越三十里內外也。自是而北，爲昌平，爲防風，^③又三十里。蓋不特思近聖人之居，而墓亦接壤焉。」又云：「係孟孫之後，則祖墓自當在魯。」《論

① 「四基」，原作「四墓」，合於孫復原文，周廣業校改作「基」，今從沈校據《孟子四考》改。下句「四基」同。

② 「于容思」，按《齊乘》作者于欽字思容。

③ 「防風」，《孟子四考》同，沈本改作「防山」，於地理是。

語·季氏篇云「故夫三桓之子孫微矣」，《集解》引孔曰：「至哀公皆衰。」

孟子生有淑質。夙喪其父，幼被慈母三

遷之教。**疏**正義曰：「淑，善也。夙，早也。《列女傳》·

母儀篇云：「鄒孟軻之母也號孟母。其舍近墓。孟子之少也，嬉遊爲墓間之事，踴躍築埋。孟母曰：『此非吾所以居處子。』乃去，舍市旁。其嬉戲爲賈人銜賣之事，孟母又曰：

『此非吾所以居處子也。』復徙，舍學宮之傍。其嬉遊乃設俎豆，揖讓進退。孟母曰：『真可以居吾子矣。』遂居。及孟子

長，學六藝，卒成大儒之名。君子謂孟母善以漸化。」此三遷之事也。周氏廣業《孟子出處時地考》云：「趙氏《題辭》

云：『孟子生有淑質，夙喪其父，幼被慈母三遷之教。』及注「後喪踰前喪」云：『孟子前喪父約，後喪母奢。』前後雖無定

時，然以士大夫三鼎五鼎之言推之，相隔必不甚久遠。《禮》

曰：「喪從死者，祭從生者。」祭以三鼎，則孟子喪父在爲士

之後甚明，其時年蓋四十餘矣。《題辭》所謂夙喪者，亦以父

先母沒耳，非必幼孤也。陳鎬《闕里志》、薛應旂《四書人物

考》遂謂孟子三歲喪父。考《韓詩外傳》、《列女傳》俱無此

說。且《列女傳》載孟母斷機事云：「績織而食，中道廢而不

爲，寧能衣其夫子，而長不乏糧食哉？」觀此言則非贅恤可知。後人殆因孟父無聞，妄爲說耳。夫士及三鼎，斷非襁褓間事，且去喪母五六十年，魯人亦何從知其前後豐儉懸絕，而臧倉得以行其毀鬲邪？王復禮曰：「若前喪在三歲則豐嗇非所自主，倉安得譖之？」蓋孟父實未嘗卒，其三遷、斷機，或者父出遊，慈母代嚴父耳。」長師孔子之孫子思，治儒術之道。通五經，尤長於《詩》《書》。

疏正義曰：《列女傳》云：「孟子旦夕勤學不息，師事子思，

遂成天下之名儒。」《漢書·藝文志》儒家：「《孟子》十一篇。

名軻，鄒人，子思弟子，有列傳。」《風俗通·窮通》篇云：「孟

子受業於子思，既通。」與趙氏同。《史記》列傳云：「受業子

思之門人。」《索隱》云：「王劭以『人』爲衍字。」則以軻親受

業孔伋之門也，今言「門人」者，乃受業於子思之弟子也。毛

氏奇齡《四書廣言》云：「王草堂謂《史記》世家子思年六十

二。孔子卒在周敬王四十一年，伯魚先孔子卒已三年，向使

子思生於伯魚所卒之年，亦止當在威烈王三十四年之間。乃

孟子實生於烈王四年，其距子思卒時已相去五十年之久。

又謂魯繆公曾尊禮子思，然繆公即位在威烈王十九年，則

《史記》所云「子思年六十二」者或是「八十二」之誤。若孟子

則斷不能親受業也。予祇以《孟子》本文計之。梁惠王三十年齊虜太子申，則孟子遊梁自當在三十年之後。何則？以本文有「東敗於齊，長子死焉」之語也。然孟子居梁不及二三年而惠王已卒，襄王已立。何則？以本文有「見梁襄王」之語也。乃實計其時，梁惠王即位之年距魯繆公卒年亦不過四十零年，然而孟子已老，本文有「王曰叟」是也，則受業子思，或未可盡非者與？」按：《史記·魯世家》：哀公十六年孔子卒，二十七年卒於有山氏。悼公立，三十七年卒。子元公立，二十一年卒。子顯立，是為穆公，穆公立三十三年卒。自穆公元年上溯至孔子卒之年，當有六十八年。孔子未卒子思已生，而孟子明言子思當穆公時，則子思之年不止六十二明矣。穆公子共公立，二十二年卒。子康公立，九年卒。子景公立，二十九年卒。子叔立，是為平公。平公元年上溯穆公卒之年當有六十年，再溯穆公初年則九十年矣。則孟子不能親受業於子思又明矣。草堂之說是也。乃《六國表》魯穆公元年即周威烈王十九年，魏惠王元年當周烈王六年，相距三十八年。惠王三十五年孟子來大梁，上溯魯穆公時已有七十餘年，如以親受業子思言之，則子思年必大耋，而孟子則童子時也。劉向、司馬遷皆西漢人，一以為受業子思，一以為受業子思之門人。而《史記》紀年多不可據。大

抵異同不過此兩端，識者察之。《列女傳》言「通六藝」，《史記·滑稽傳》云：「孔子曰：『六藝於治，一也。禮以節人，樂以發和，《書》以道事，《詩》以達意，《易》以神化，《春秋》以義。』」《漢書·藝文志》以六經為六藝，一百三家，趙氏以為「通五經」。七篇中言《書》凡二十九，言《詩》凡三十五。《史記》列傳云：「序《詩》《書》，述仲尼之意。」故以為「尤長於《詩》《書》」。然孟子於《春秋》獨標「亂臣賊子懼」，為深知孔子作《春秋》之旨。至於道性善，稱堯舜，則於通德類情，變通神化，已洞然於伏羲、神農、黃帝、堯舜、文王、周公、孔子之道，獨《詩》《書》云乎哉？周衰之末，戰國縱橫，用兵爭強以相侵奪。當世取士，務先權謀以為上賢。先王大道，陵遲墮廢，疏正義曰：《史記》列傳云：「當是之時，秦用商君富國強兵，楚魏用吳起戰勝弱敵，齊威王、宣王用孫子、田忌之徒而諸侯東面朝齊。天下方務於合縱連衡，以攻伐為賢。」劉向《校戰國策書錄》云：「仲尼既沒之後，田氏取齊，六卿分晉，道德大廢，上下失序。至秦孝公捐禮讓而貴戰爭，棄仁義而用詐譎，苟以取強而已矣。晚世益甚，萬乘之國七，千乘之國五，敵侔爭權，蓋為戰國爭強，勝者為右，兵革不休，詐偽並起。當此之時，

雖有道德，不得施謀。故孟子、孫卿儒術之士棄捐於世，而游說權謀之徒見貴於俗。是以蘇秦、張儀、公孫衍、陳軫、代、厲之屬生縱橫短長之說，左右傾側。蘇秦爲縱，張儀爲橫。橫則秦帝，縱則楚王。所在國重，所去國輕。《荀子·有坐》篇云：「今夫世之陵遲亦久矣。」楊倞注云：「遲，慢也。陵遲言邱陵之勢漸慢也。」《文選·難蜀父老》「反衰世之陵夷」，李善注云：「陵夷即陵遲也。」《史記·張釋之》曰「秦陵遲而至於二世，天下土崩」，《漢書》作「陵夷至於二世」。《漢書·司馬相如傳》，注云：「陵夷謂弛替也。」墮，《說文》自部作「陸」，云「敗城自曰陸」。篆文作「墮」。《淮南子·修務訓》「故名立而不墮」，高誘注云：「墮，廢也。」《禮記·月令》「毋有墮壞」，《釋文》云：「墮，本作墮。」墮，俗字也。異端並起。若楊朱、墨翟放蕩之言以干時惑衆者非一。

疏正義曰：《論語·爲政》篇云：「攻乎異端，斯害也已。」何爲「異端」？各持一理，此以爲異己也而擊之，彼亦以爲異己也而擊之，未有不咸其害者。楊、墨各持一說，不能相通，故爲「異端」。孟子之學，通變神化，以時爲中，易地皆然，能包容乎百家，故能識持一家之說之爲害也。苟不能爲通人以包容乎百家，持己之說而以異己者爲異端，

則闢異端者即身爲異端也。《漢書·藝文志》言道家云：「及放者爲之，則欲絕去禮學，兼棄仁義。」注云：「放，蕩也。」《廣雅·釋詁》云：「放，妄也。」《呂氏春秋·審分》篇云「無使放悖」，悖亦妄也。《論語·陽貨》篇「好知不好學，其蔽也蕩」，《集解》引孔曰：「蕩，無所適守也。」又「今之狂也蕩」，《集解》引孔曰：「蕩，無所據也。」楊墨之言虛妄無據，故云「放蕩」。孟子閔悼堯舜、湯文、周孔之業將遂湮微，正塗壅底，仁義荒怠，佞僞馳騁，紅紫亂朱，於是則慕仲尼周流憂世，遂以儒道遊於諸侯，思濟斯民。然由不肯枉尺直尋，時君咸謂之迂闊於事，終莫能聽納其說。

疏正義曰：《說文》水部云：「湮，沒也。」《小爾雅·廣詁》云：「沒，滅也。」昭公元年《左傳》云「勿使有所壅蔽湮底」，注云：「底，滯也。」《釋文》引服虔云：「底，止也。」「底，止」，《爾雅·釋詁》文。止而不行故爲滯。則，法也。慕，習也。以孔子爲法而習之也。「周流」二字見《禮記·仲尼燕居》。《文選·甘泉賦》云「據軫軒而周流兮」，李善注云：「周流，流行周遍也。」《史記·列傳》云：「道既通，游事齊宣王。宣王不能用，適梁。梁惠王不果所言，則見以爲迂遠而闊於事

情。《風俗通·窮通》篇云：「游於諸侯，所言皆以爲迂遠而闕於事情。然終不屈道趣合，枉尺以直尋。」孟子亦自知遭蒼姬以訖錄，值炎劉之未奮，進不得佐興唐虞雍熙之和，退不能信三代之餘風。耻没世而無聞焉，是故垂憲言以詒後人。

疏正

義曰：《音義》云：「信音伸，謂三代遺風鬱塞不伸也。」《史記·孔子世家》云：「子曰：『弗乎弗乎！君子病沒世而名不稱焉。吾道不行矣，吾何以自見於後世哉？』」乃因史記作《春秋》。《爾雅·釋詁》云：「憲，法也。」《漢書·揚雄傳》云：「雄見諸子各以其知舛馳，大氏詆訾聖人即爲怪迂，析辯詭辭以撓世事，雖小辯，終破大道。故人時有問雄者，常用法應之，誤以爲十二卷，象《論語》，號曰『法言』。」憲言猶法言也。仲尼有云：「我欲託之空言，不如載之行事之深切著明也。」**疏正義**曰：《春秋繁露·俞序》篇云：「孔子曰：『吾因其行事而加乎王心焉。』」①以爲見之空言，不如行事博深切明。《史記·太史公自敘》亦云。於是退而論集所與高弟弟子公孫丑、萬章之徒難疑答問，又自撰其法度之言，著書七篇，

疏正義曰：《史記》列傳云：「孟軻所如不合，退與萬章之徒

序《詩》《書》，述仲尼之意，作《孟子》七篇。」是七篇爲孟子所自作。故趙氏前既云「此書孟子之所作也」，此又云「自撰法度之言」。閻氏若璩《孟子生卒年月考》云：「七篇爲孟子自作，至韓昌黎故亂其說。《論語》成於門人之手，故記聖人容貌甚悉。七篇成於己手，故但記言語或出處耳。」又云：「卒後書爲門人所敘定，故諸侯王皆加謚焉。」趙氏注弟子十五人：萬章、公孫丑、樂正子、陳臻、公都子、充虞、徐辟、高子、咸邱蒙、陳代、彭更、屋廬子、桃應、季孫、子叔；學於孟子者四人：孟仲子、告子、滕更、盆成括。《呂氏春秋·樂成》篇「盡難攻中山之事也」，高誘注云：「難，說也。」《史記·五帝本紀》「死生之說，存亡之難」，《索隱》云：「難猶說也。凡事是非未盡，假以往來之辭，則曰難。所以韓非著書有《說林》、《說難》。」難疑者，有疑則解說之也，答問者，有問則答之也。平日與諸弟子解說之辭諸弟子各記錄之，至是孟子聚集而論次之，如篇中諸問答之文是也，其不由問答，如《離婁》、《盡心》等章，則孟子自撰也；又有與齊、魏、鄒、滕

①「王」，原誤作「主」，今據《春秋繁露》改。

諸君所言，景子、莊暴、淳于髡、周霄、景春、宋慳、宋勾踐、夷之、陳相、貉稽、戴盈之、戴不勝、儲子、沈同、陳賈、慎子、王驩等相問答，蓋亦諸弟子錄之，而孟子論集之矣。二百六十一章，三萬四千六百八十五字。

疏正義

曰：《音義》標《梁惠王上》七章，《下》十六章，《公孫丑上》九章，《下》十四章，《滕文公上》五章，《下》十章，《離婁上》二十八章，《下》三十二章，《萬章上》九章，《下》七章，《告子上》二十章，《下》十六章，《盡心上》四十七章，《下》三十九章：共爲二百五十九章。今以《章指》計之，《盡心》下篇止得三十八，則共爲二百五十八章，校此《題辭》所云少三章。《崇文總目》謂陸善經刪去趙岐《章指》。邵武士人作疏依用陸本，《章指》既刪，章數遂不可定。戴氏震得朱氏文游校本二，云：「一爲虞山毛扆手校。何杞瞻云『毛斧季從真定梁氏借得宋槧本影鈔』，今未見其影鈔者。而此本《盡心》下『梓匠輪輿』章有《章指》，餘並缺。一爲何仲子手校。末記云：『文注用盱郡重刊廖氏善本校。』而《盡心上》『有事君人』者一章、『孔子登東山』以下三章，《盡心》下『吾今而後知』以下七章，並缺《章指》。二校各有詳略，得以互訂。外有章邱李氏所藏北宋蜀大字《章句》本毛斧季影鈔者，並得

趙岐《孟子篇敘》，於是臺卿之學，殘失之餘，合之復完。然則今孔氏所刻《章指》亦拾掇於殘缺之餘，焉保無分合之譌？然欲傳會於二百六十一之數而強分以足之，則亦非後學所敢矣。陳士元《孟子雜記》云：「趙氏謂三萬四千六百八十五字，今計字數《梁惠王》篇上下共五千三百六十九，《公孫丑》篇上下共五千一百四十四，《滕文公》篇上下共五千零四十五，《離婁》篇上下共四千七百八十九，《萬章》篇上下共五千一百二十五，《告子》篇上下共五千二百五十五，《盡心》篇上下共四千六百八十三：統之實有三萬五千四百一十字，較趙說多七百二十五字。詳考趙注《孟子》文與今本不差，趙蓋誤算也。周氏廣業《孟子異本考》云：「趙注《孟子》三年乃成，謂『可寤疑辨惑』。字數易明，豈復疏於布算？但舊書古簡，脫漏居多。唐宋本固應減於漢，否亦不能加多。今茲臚字，得毋有後人所屬人者乎？」按：今以孔本經文計之，《梁惠王》共五千二百六十四字，《公孫丑》共五千一百四十二字，《滕文公》共四千九百八十字，《離婁》共四千七百八十九字，《萬章》共五千一百五十四字，《告子》共五千二百二十三字，《盡心》共四千六百七十四字：七篇共三萬五千二百二十六字，校趙氏所云實多五百四十一字，別詳見《篇敘》正義中。

包羅天地，揆敘萬類，仁義道

德、性命禍福，粲然靡所不載。帝王公侯遵之則可以致隆平、頌清廟，卿大夫士蹈之則可以尊君父、立忠信，守志厲操者儀之則可以崇高節、抗浮雲。有風人之託物，二《雅》之正言。可謂直而不倨，曲而不屈，命世亞聖之大才者也。**疏**正義曰：命世即名世也，詳見《公孫丑下》篇。亞，次也。「命世亞聖」即所謂名世次聖也。「包羅天地」至「曲而不屈」，皆發明所以名世之實。孔子自衛反魯，然後樂正，《雅》《頌》各得其所，乃刪《詩》《定》《書》，繫《周易》，作《春秋》。**疏**正義曰：《論語·子罕》篇云：「吾自衛反魯，然後樂正，雅頌各得其所。」《集解》引鄭曰：「反魯，魯哀公十一年冬也。是時道衰樂廢，夫子來還乃正之也。」《史記·孔子世家》云：「孔子之去魯凡十四歲而反乎魯，然魯終不能用孔子，孔子亦不求仕。孔子之時，周室微而禮樂廢，《詩》《書》缺。追述三代之禮，序《書傳》，上紀唐虞之際，下至秦繆，編次其事。語魯太師：『樂其可知也。始作翕如，從之純如，嘒如，繹如也，以成。吾自衛反魯，然後樂正，《雅》《頌》各得其所。』古

者《詩》三千餘篇，至孔子去其重，取其可施於禮義三百五篇，皆弦歌之以求合韶武、雅頌之音。晚而喜《易》，序《彖》、《繫》、《象》、《說卦》、《文言》。乃因史記作《春秋》，筆則筆，削則削，子夏之徒不能贊一辭。」孟子退自齊、梁，述堯舜之道而著作焉，此大賢擬聖而作者也。

疏正義曰：擬聖即所謂「述仲尼之意」也。七十子之疇會集夫子所言以爲《論語》。《論語》者，五經之鎔鑄，六藝之喉衿也。**疏**正義曰：何晏《論語

敘》云：「漢中壘校尉劉向言《魯論語》二十篇，皆孔子弟子記諸善言也。」《漢書·藝文志》有論語家，列六藝之中，次五經之後，故云「五經之鎔鑄，六藝之喉衿」也。《音義》出「鎔鑄」，丁云：「上音管，《方言》作「轄」，車釭也，下音點，車轄也。」按：「鎔鑄」當作「轄轄」。《說文》車部云：「轄，轂耑鑄也。」轄，鍵也。「轄與牽通。舛部云：「牽，車軸耑鍵也。」戴氏震《考工記釋車》云：「轂空壺中，所以受軸，以金裹轂中謂之釭。轂端沓謂之轄，以鐵爲管，約轂外兩端。軸端之鍵以制轂者謂之牽，亦作轄。行車者脂釭中以利轉，又設牽以制轂。」《邶風》「載脂載牽」，《小雅》「間關車之牽兮」，《淮南子》「車之能轉千里者，其要在三寸牽」，蓋車之轉運在軸

轂，而輶如環約於轂，轄如筭約於軸，非此則軸與轂不可以運。五經非《論語》則無以運行，故爲「五經之輶轄」也。《說文》口部云：「喉，咽也。」衿與襟通。任氏大椿《深衣釋例》云：「《爾雅》『衣皆謂之襟』，孫炎曰：『襟，交領也。』《文選·魏都賦》『不以邊陲爲衿也』，注引《聲類》曰：『衿，衣交領也。』《曲禮》『天子視不上於衿』，注云：『衿，交領也。』衿屬於襟，即與襟同體。襟交則衿交，故衿謂之交領，與襟謂之交領一也。《說文》曰：『襟，交衿也。』《戰國·齊策》『輒以頸血濺足下之衿』，注云：『衿，交衿也。』《方言》：『襟謂之交。』襟無不交，則衿無不交矣。小兒擁咽領，則即服虔《廣川王傳》注云「頸下施衿，領正方直」者也。詁訓諸書多以襟言領，亦以領統於襟，遂名曰襟。《玉篇》云：「衿，衣領也。」《詩》「青青子衿」傳：「青衿，青領也。」正義云：「衿，領一物。」然則衿爲交領、交衿之通名。此與「喉」並言，則正以爲領人之一身。內則轄之以喉，外則鍵之以領，謂《論語》爲六藝之總領也。孟子之書則而象之。疏正義曰：《易·繫辭傳》云：「象也者，像也。」像之言似也。謂以孔子爲法則而似續其道也。衛靈公問陳於孔子，孔子答以俎豆；梁惠王問利國，孟子對以仁義。

宋桓魋欲害孔子，孔子稱「天生德於予」；魯臧倉毀鬲孟子，孟子曰「臧氏之子焉能使予不遇哉」。旨意合同若此者衆。疏正義曰：衛

靈公、桓魋事俱見《論語》。《音義》出「毀鬲」云：「丁音隔，蓋譌毀之使情隔耳。又音歷。」按鬲爲鼎屬，其音歷，此「鬲」自當讀如隔。《說文》自部云：「隔，障也。」《漢書·五行志》引京房《易傳》云：「上下皆蔽，茲謂之隔。」是也。按以孟子似續孔子，自趙氏發之。其後晉咸康三年，國子祭酒袁瓌、太常馮懷上疏云：「孔子恂恂，道化洙泗，孟軻皇皇，誨誘無倦。是以仁義之聲於今猶存，禮讓之風千載未泯。」見《宋書·禮志》。韓愈《原道》云：「斯道也，堯以是傳之舜，舜以是傳之禹，禹以是傳之湯，湯以是傳之文武周公，文武周公傳之孔子，孔子傳之孟軻。」皆本諸趙氏。又有《外書》四篇：《性善》、《辯文》、《說孝經》、《爲政》。其文不能宏深，不與內篇相似，似非孟子本真，後世依放而託之者也。疏正義曰：《漢書·藝文志》：「《孟子》十一篇。」《風俗通·窮通》篇云：「作書中外十一篇。」是七篇爲中，餘四篇爲外。王應

麟《困學紀聞》云：「漢《七略》所錄，若《齊論》之《問王》、《知道》、《孟子》之《外書》四篇，今皆無傳。」孫奕《履齋示兒篇》云：「昔嘗聞前輩有云親見館閣中有《孟子外書》四篇，曰《性善辯》，曰《文說》，曰《孝經》，曰《爲政》。」劉昌詩《蘆浦筆記》云：「予鄉新喻謝氏多藏古書，有《性善辯》一帙。」翟氏《源考異》云：「趙氏不爲《外書》章句，嗣後傳《孟子》者悉以《章句》爲本，《外書》悉以廢閣致亡。南宋去趙氏時千有餘歲，不應館閣中能完然如故也。孫氏僅得耳聞，當日在館閣諸公未有以目擊詳言之者。道聽塗說，必不足爲按據。新喻謝氏所藏一帙，劉氏似及見之。」《隋書·經籍志》錄有梁蔡母《孟子注》九卷，他家注俱七卷，獨蔡母氏多出二卷。豈所謂「四篇」者在梁時嘗得其二，至宋乃僅存劉氏所見之一篇邪？但蔡母氏書李善注《文選》猶引用之，似流行於唐世。而其有無《外書》，唐人絕無片言論及，則又難以質言。且《外書》之篇目，自宜以《性善》爲一，《辯文》爲一，《說孝經》爲一。劉氏以所見之《性善辯》遂以「辯」字上屬，而謂《文說》一篇，《孝經》一篇。據《論衡·本性》篇但云孟子作《性善》之篇，不綴「辯」字，疑新喻謝氏所藏《性善辯》又屬後人依放而作，非《外書》本真也。」周氏廣業《孟子逸文考》云：「《史記·十二諸侯表》云：『荀卿、孟子、韓非之徒各往

往捃摭《春秋》之文以著書，不可勝記。』今考《孟子》內書，言《春秋》者止「迹熄詩亡」及「知我罪我」，「無義戰」三章，亦未嘗捃摭其文。至若《列女傳》「擁楹之歎」、《韓詩外傳》「輟織殺豚」及「不敢去婦」二條中所載孟子之言，皆瑣屑不足述。明季姚士粦等所傳《孟子外書》四篇云是熙時子注，友人吳騫板行。丁杰爲之條駁甚詳，顯屬僞托，概無取焉。」按照時子相傳以爲劉貢父，此書前有馬廷鸞敘。夫《外書》四篇趙氏斥爲依托，其亡已久，孫奕所聞、新喻所藏已難信據，況此又贗之尤者乎？顧氏炎武《日知錄》云：「《史記》、《法言》、《鹽鐵論》等所引孟子，今《孟子》書無其文，豈俱所謂「外篇」者邪？」是則然矣。

孟子既沒之後，大道遂絀。逮至亡秦，焚滅經術，坑戮儒生，孟子徒黨盡矣。其書號爲諸子，故篇籍得不泯絕。**疏**正義曰：《史記》秦始皇三十四年，丞相李斯言曰：「臣請史官非《秦紀》皆燒之。非博士官所職，天下敢有藏《詩》、《書》、百家語者，悉詣守尉雜燒之。所不去者，醫藥、卜筮、種樹之書。」三十五年，「使御史案問諸生四百六十餘人，皆坑之咸陽」。《漢書·藝文志》云：「秦燔書，而《易》爲筮卜之事，傳者不絕。」又云：

「諸子之言，紛然殽亂，至秦患之，乃燔滅文章，以愚黔首。」是時所最忌者學古道之士，所坑者皆誦法孔子，長子扶蘇之言可證。不知《孟子》何得與《周易》同不焚？逢行珪注《鬻子》敘云：「遭秦暴亂，書記略盡。《鬻子》雖不與焚燒，編帙由此殘缺。」此亦以諸子不焚也。翟氏灝《考異》云：

「《漢書·河間王傳》稱《孟子》為獻王所得，似亦遭秦播棄，至漢孝武世始復出者。然孝文已立《孟子》博士，而韓氏《詩外傳》、董氏《繁露》俱多引《孟子》語，則趙氏所云「書號諸子，得不泯絕」定亦不虛。」漢興，除秦虐禁，開延道德。孝文皇帝欲廣遊學之路，《論語》、《孝經》、《孟子》、《爾雅》皆置博士。後罷傳記博士，獨立五經而已。

疏正義曰：王應麟《五經通義

說》云：「熾哉，漢之尊經乎！儒五十三家莫非賢傳也，而《孟子》首置博士。」翟氏灝《考異》云：「《孟子》尊立最久。時《論語》、《孝經》通謂之「傳」，而《孟子》亦謂之「傳」。如《論衡·對作》篇曰：「楊墨不亂傳義，則孟子之傳不造。」《劉向傳》引傳曰：「聖人不出，其間必有名世者。」《後漢書·梁冀傳》引傳曰：「以天下與人易，為天下得人難。」《越絕書·序外傳記》引傳曰：「於厚者薄，則無所不薄矣。」《說

文解字》引傳曰：「簞食壺漿。」《詩·邶風》正義引傳曰：

「外無曠夫，內無怨女。」《中論·天壽》篇引傳曰：「所好有甚於生者，所惡有甚於死者。」又《法象》篇曰：「傳稱大人正己而物自正。」皆可為證。故趙氏以《論語》、《孝經》、《孟子》、《爾雅》博士統言之曰「傳記博士」。錢氏大昕《潛研堂答問》云：「問：劉子駿《移太常博士書》言：「孝文帝時，

天下衆書往往頗出，皆諸子傳說，猶廣立於學官，為置博士。」據趙邵卿《孟子題辭》，則《論語》、《孝經》、《孟子》、《爾雅》孝文時皆立博士，所謂「傳記博士」也。此等博士未識罷於何時？曰：《漢書·贊武帝云：「孝武初立，卓然罷黜百家，表章六經。」以《本紀》考之，建武五年置五經博士，則傳記博士之罷當在是時矣。」按：《禮記正義》引盧植云：「漢文皇帝令博士諸生作此《王制》之書。」今《王制》篇中制祿爵、關市等文多取諸《孟子》，則孝文時立《孟子》博士審矣。迄今諸經通義得引《孟子》以明事謂之「博文」。

疏正義曰：《後漢書·儒林傳》云：「建初中，大會

諸儒於白虎觀，考詳同異。連月乃罷。肅宗親臨稱制，如石渠故事。顧命史臣，著為《通義》。」注云：「即《白虎通義》是。」觀趙氏此文，《孟子》雖罷博士，而論說諸經得引以為

證。如《鹽鐵論》載賢良文學對丞相御史，多本孟子之言，而鄭康成注《禮》、《詩》，許慎作《說文解字》，皆引之。其見於《史記》、兩《漢書》、兩《漢紀》，如鄒陽引「不含怒，不宿怨」，終軍引「枉尺直尋」，倪寬引「金聲玉振」，王褒引「離婁公輪」，貢禹引「民飢馬肥」，梅福引「位卑言高」，馮異稱「民之飢渴，易爲飲食」，李淑引「緣木求魚」，鄧暉言「強其君所不能爲忠，量君所不能爲賊」，馮衍言「臧倉」言「泰山北海」，班彪引「橈杓春秋」，崔駰言「登牆樓處」，申屠蟠言「處士橫議」，王暢言「貪夫廉，懦夫有立志」，傅燮言「浩然之氣」，亦當時引以明事之證。

孟子長於譬喻，辭不迫切而意已獨至。

其言曰：「說《詩》者不以文害辭，不以辭害志。以意逆志，爲得之矣。」斯言殆欲使後人深求其意以解其文，不但施於說《詩》也。今諸解者往往摭取而說之，其說又多乖異不同。**疏**正義曰：《方言》云：「摭，取也。陳宋之間曰摭。」《說文》手部云：「拓，拾也。陳宋語。或从庶。」拾取而說之，謂未能通其全書，悉其指趣，僅拾取一章一句而解說之。

既不能貫通其義，自然乖異矣。孟子以來五百餘載，傳之者亦已衆多。**疏**正義曰：閻氏若璩《孟子生卒

年月考》云：「孔子生卒出處年月具見《史記》·孔子世家」，而孟子獨略，於是說者紛紜。余嘗以七篇爲主，參以《史記》等書，然後歷歷可考。蓋生爲鄒人，卒當是赧王之世。萬氏斯同《羣書疑辨》云：「山陽閻百詩著《孟子生卒年月考》，究不知生卒在何年，蓋實無可考也。《孟子世譜》言孟子生於周烈王四年己酉，卒於赧王二十六年壬申，年八十四。其言似可信。」今姑以萬氏此言推之：赧王立五十九年，則歷三十四年至乙巳而卒。又八年壬子周亡，爲秦莊襄王元年。三年卒，始皇立，三十七年卒。二世立，三年秦亡。又五年，天下爲漢。漢高帝至平帝十二主，共二百十年。新莽十八年，更始立。三年光武中興，至獻帝十二主，共一百九十五年。自孟子沒至漢末五百十三年。趙氏卒於建安六年，而出亡著書則尚在延熹時。自周赧王二十六年至漢桓帝延熹間，僅四百五十年耳。此云「五百餘載」，蓋趙氏以孟子親受業於子思，則其生、卒之年必前於烈王四年、赧王二十六年也。故趙氏注「由周而來七百有餘歲」必推自太王、文王以來。然則孟子謂「由孔子而來至於今，百有餘歲」，蓋謂孔子

沒後至孟子著書之年，非謂孔子沒之年至孟子生之年也。趙氏言「孟子以來五百餘載」，謂孟子沒後至趙氏著書之年，非謂孟子沒之年至趙氏生之年也。孟子後徵引《孟子》者如荀卿、韓嬰、董仲舒、劉向、揚雄、王充、班固、張衡、鄭康成、許慎、何休等，皆所謂「撫取而說之」。漢文時立孟子博士，必有授受之人，惜不可考。河間獻王所得先秦舊本，不詳得自何人。至《東觀漢紀》言「章帝以《孟子》賜黃香」，則香能傳之讀之與否，不可知。劉陶復孟軻，其所以復者不傳。惟《後漢書·儒林傳》云：「程曾，字秀升，豫章南昌人，作《孟子章句》。建初三年舉孝廉，遷海西令。」建初為章帝年號，則生東漢之初，在趙氏前專為孟子之學者，自此始著。乃其章句不傳，莫可考究。高誘《呂氏春秋敘》自言「正《孟子章句》」。誘，涿郡人，從盧植學，建安十年辟司空掾，除東郡濮陽令。十七年遷監河東。所注《戰國策》、《呂氏春秋》、《淮南子》皆存，惟《孟子章句》亡。誘於建安十年始舉孝廉，趙氏卒於建安六年，年已九十餘，是誘為趙氏後輩。《隋書·經籍志》有「漢鄭康成《孟子注》七卷，漢劉熙《孟子注》七卷」。鄭康成本傳詳列所著書，不言《孟子》。《隋志》所載未知所據。熙嘗撰《釋名》。畢氏沅《釋名疏證敘》云：「《隋書·經籍志》：『《釋名》八卷，劉熙撰。』又『《大戴禮記》十三

卷」下注云：「梁有《謚法》三卷，後漢安南太守劉熙注，亡。」後漢無安南郡，惟「漢陽郡」注引《秦州記》曰：「中平五年分置南安郡。」則「安南」或「南安」之誤。晉李石《續博物志》云「漢博士劉熙」。宋陳振孫《書錄解題》、馬端臨《文獻通考》並云「漢徵士北海劉熙，字成國」，不知何本。《三國·吳志》韋昭言「見劉熙所作《釋名》，信多佳者」。《程秉傳》言「秉避亂交州，與劉熙考論大義」。又《薛綜傳》言「綜避地交州，從劉熙學」。交州，孫吳之地也。」按：程秉逮事鄭康成，避亂交州，與熙考論，遂博通五經，其後士燮乃命為長史。然則程秉、薛綜與劉熙在交州，乃士燮為交趾太守時。燮附孫權在建安十五年，時秉、綜俱已為權所得，是其師事劉熙時仍遠在建安十五年以前。秉為太子太傅，黃武四年太子登親迎秉進說，病，卒官。登以赤烏四年卒，秉當卒於登前。自建安十五年至此止二十餘年，蓋秉已老矣。而薛綜卒於赤烏六年，距建安十五年亦止三十二年。其師事熙蓋少時，當在獻帝初年，則是時交州仍為漢地，劉熙為漢人無疑。士燮附孫權時熙蓋已前沒。何也？秉、綜，權尚以其名儒而禮徵之，況所師事者乎？或謂熙及魏受禪後，非也。其相傳為安南太守者，亦以其在交州而謬，非「南安」之誤也。劉熙、高誘皆與趙氏先後同時。劉熙注見於《史記》、《漢書》、

《後漢書》、《文選》等注所引，今散著各經文之下。高誘《章句》無引之者，而所注諸書多及《孟子》，尚可考見。《呂氏春秋·至忠》篇「人主無不惡暴劫者，而日致之，惡之何益」，注云：「日致爲暴劫之政也。《孟子》曰：『惡溼而居下。』故曰『惡之何益』也。」《論太》篇「及匡章之難，惠子以王齊王也」，注云：「匡章乃孟軻所謂『通國稱不孝』者。」《本味》篇「已成而天子成」，注云：「已成仁義之道而成爲天子。」《孟子》曰：「得乎邱民爲天子。」《慎人》篇「百里奚之未遇時也，亡號而虜晉」，注云：「號當爲虞。」《孟子》曰：「百里奚，虞人也。晉人以垂棘之璧假道于虞，以伐虢。宮之奇諫之。百里奚知虞公之不可諫也而去之秦。」此云亡號，誤矣。《去私》篇「堯有子十人」，注云：「《孟子》曰：『堯使九男二女事舜。』此曰十子，殆丹朱爲胄子，不在數中。」《當染》篇「湯染於伊尹、仲虺」，注云：「《孟子》曰：『王者師臣也。』」《盡數》篇「故凡養生，莫若知本。知本則疾無由至矣」，注云：「傳曰：『人受天地之中以生，所謂命也。』《孟子》曰：『人性無不善。』本其善性，閉塞利欲，疾無由至矣。」《論人》篇「凡論人，通則觀其所禮」，注云：「通，達也。」《孟子》曰：「達則兼善天下。」故觀其所賓禮。」《用衆》篇「令使楚人長乎戎，戎人長乎楚，則楚人戍言，戎人楚言矣」，注云：「《孟子》曰：『有

楚大夫欲其子之齊言也，使一齊人傳之，衆楚人咻之，雖日撻而求其齊也，不可得矣，引而置之莊嶽之間數年，雖日撻而求其楚，亦不可得矣。」此之謂也。《懷寵》篇「誅國之民望之若父母。行地滋遠，得民滋衆」，注云：「所誅國之民睇望義兵之至若望其父母，滋益衆多也。」《孟子》曰：「百姓簞食壺漿以迎王師，奚爲後予？」此之謂也。《驕恣》篇「齊宣王爲大室，大益百畝」，注云：「宣王，齊威王之子，孟子所見易轡鍾之牛者也。」《開春》篇「魏惠王死，葬有日矣」，注云：「孟子所見梁惠王也。秦伐魏，魏徙都大梁，梁在陳留浚儀西大梁城是也。」《壹行》篇「彊大之國誠可知，則其王不難矣」，注云：「《孟子》曰：『以齊王猶反手也。』故曰不難矣。」《自知》篇「鑽茶、龐涓、太子申不自知而死」，注云：「鑽茶、龐涓，魏惠王之將。申，魏惠王之太子也。與龐涓東伐齊，戰於馬陵，齊人盡殺之。故惠王謂孟子曰：『晉國，天下莫強焉，叟之所知也。及寡人身，東敗於齊，長子死。』此之謂也。」《樂成》篇「賢者得志則可，不肖者得志則不可」，注云：「賢者得志則忠，故曰可也，不肖得志則驕，驕則亂，故曰不可。公孫丑曰：『伊尹放太甲於桐宮，太甲賢，又反之。賢者之爲人臣，其君不賢則可放與？』孟子曰：『有伊尹之志則可，無伊尹之志則篡也。』又「中主以之，啍啍也止善，賢

主以之，陶陶也立功」，注云：「孟子見梁襄王，出語人曰：『望之而不似人君，就之而不見所畏焉。何能決善哉？』此言復謬也。」《審應》篇「魏惠王使人謂韓昭侯」，注云：「惠王，魏武侯子也。孟子所見梁惠王也。」《不屈》篇「齊威王幾弗受」，注：「威王，田和之孫，孟子所見宣王之父。」又「匡章謂惠子於魏王之前」，注云：「匡章，孟子弟子。」《淮南子·俶真訓》：「若夫墨、楊、申、商之於治道」，注云：「墨，墨翟也，其術兼愛非樂，摩頂放踵而利國者爲之。楊，楊朱，其術全性保真，雖拔釵一毛而利天下弗爲也。」又「是故聖人之學也，欲以返性於初」，注云：「人受天地之中以生。孟子曰：性無不善，而情欲害之。故聖人能返其性於初也。」《修務訓》：「今夫毛嬙、西施，天下之美人，若使之銜腐鼠，蒙蜚皮，衣豹裘，帶死蛇，則布衣韋帶之人過者莫不左右睥睨而掩鼻」，注云：「言雖有美姿，人惡聞其臭，故睥睨掩其鼻。」《孟子》曰：「西子蒙不潔則人皆掩其鼻而過之。」是也。」《主術訓》：「故握劍鋒以離北宮子」，注云：「北宮子，齊人，孟子所謂北宮黝也。」《繆稱訓》：「魯以偶人葬而孔子歎」，注云：「偶人，相人也。歎其象人而用之。」《齊俗訓》：「豈必鄒魯之禮」，注云：「鄒，孟軻邑。」《說山訓》：「此全其天器者」，注云：「器猶性也。孟子曰人性善，故曰全其天性。」《汜論訓》：「舜不告

而娶，非禮也」，注云：「堯知舜賢，以二女妻舜。不告父，父頑，常欲殺舜，舜知告則不得娶也。不孝莫大於無後。故《孟子》曰『舜不告猶告』耳。」又「全性保真，不以物累形，楊子之所立也，而孟子非之」，注云：「全性葆真，謂不拔釵毛以利天下弗爲。不以物累己身形也。孟子受業於子思之門，成唐虞三代之德，敘《詩》《書》孔子之意，塞楊墨淫辭，故非之也。」又「堯無百戶之郭，舜無置錫之地，以有天下，禹無十人之衆，湯無七里之分，以王諸侯，文王處岐周之間，地方不過百里，而立爲天子者，有王道也」，注云：「堯、舜、禹、湯，文王皆王有天下。」《孟子》曰：「以德行仁者王，王不待大。」是也。」又「夏桀殷紂之盛也，人跡所至，舟車所通，莫不爲郡縣。然而身死人手而爲天下笑者，有亡形也。」注云：「《孟子》曰：『惡死亡，樂不仁。』不仁必死亡，故曰有亡形也。」又「故溺則梓父，祝則名君」，注云：「《孟子》曰：『嫂溺而不拯，是豺狼也。』而況父兄乎？」又「季襄、陳仲子立節抗行，不人洿君之朝，不食亂世之食，遂餓而死。」注云：「季襄，魯人，孔子弟子。陳仲子，齊人，孟子弟子，居於陵。」《戰國策·齊策》：「威王薨，宣王立」，注云：「宣王，孟軻所見以羊易鬻鍾之牛者也。」又「田忌爲齊將，係梁太子申，禽龐涓」，注云：「申，梁惠王太子也。龐涓，魏將也。田忌與戰

於馬陵而係獲之也。故梁惠王謂孟子曰：「寡人東伐，敗於馬陵，太子死，龐涓禽。」此之謂也。」又「攻燕三十日而舉燕國」，注云：「《孟子》曰：『子噲无王命而與子之國，子之无王命擅受子噲國，故齊宣王伐而取之也。』」《秦策》「四國爲一，將以攻秦，秦王召羣臣賓客六十人而問曰」，姚賈對曰「云云」，注云：「姚賈譏周公誅管、蔡不仁不知者，在《孟子》之篇也。」其訓詁有與《孟子》可參考者亦藉以窺見其概，故正義引高氏《呂氏春秋》、《淮南子》注爲多。

余生西京，世

尋丕祚，有自來矣。

疏正義曰：趙氏爲京兆長陵人。

長陵前漢屬馮翊，後漢屬京兆。京兆爲西漢所都，故云「西京」。張衡有《西京賦》。《說文》寸部云：「尋，繹理也。」《文選·東都賦》「漢祚中缺」，注引《國語》賈注云：「祚，位也。」《史記·趙世家》云：「趙氏之先與秦共祖，至中衍爲帝大戊御。」《秦本紀》云：「秦之先帝，顓頊之苗裔。」《潛夫論·志氏姓》云：「皋陶事舜。其子伯翳能議百姓以佐舜，禹，擾馴鳥獸，舜賜姓嬴。後有仲衍，爲夏帝大戊御。嗣及費仲，生惡來，季勝。季勝之後有造父，以善御事周穆王，封造父於趙城，因以爲氏。」至於趙夙，仕晉卿大夫，十一世而爲列侯，五世而爲趙靈王。趙世之先爲列卿、諸侯王，溯其始原，出

帝顓頊，故尋繹其丕祚，有自來也。少蒙義方，訓涉

典文。

疏正義曰：傳稱生於御史臺，李賢注云：「以其祖

爲御史，故生於臺。其祖、父之名不詳。」傳有從兄襲、從子戡，注引《決錄》注云：「襲字元嗣。先是，杜伯度，崔子玉以工草書稱於前代，襲與羅暉拙書畫於張伯英。英頗自矜高，與朱賜書云：『上比崔、杜不足，下方羅、趙有餘。』」又云：

「岐長兄磐，州都官從事，早亡。次兄無忌，字世卿，部河東從事。」《王允傳》：「允及宗族十餘人皆見誅害，莫敢收允尸者。惟故吏平陵令趙戡棄官營喪。趙戡字叔茂，長陵人，性質正，多謀。初平中爲尚書，典選舉。董卓數欲有所私授，戡輒堅拒不聽，言色強厲。卓怒，召將殺之。衆人悚慄，而戡辭貌自若。卓悔，謝釋之。長安之亂，客於荊州，劉表厚禮焉。及曹操平荊州，乃辟之，執戡手曰：『恨相見晚。』」卒相國鍾繇長史。」此即與岐同避難者也。從兄襲，《三國志·閻溫傳》云引《魏略·孫賓碩傳》作「趙息」。①息、襲音同，息即襲也。云：「唐衡弟爲京兆虎牙都尉，不修敬於京兆

①「云」，或衍，或依沈校當作「注」。

尹，^①人門不持版。郡功曹趙息呵廊下曰：「虎牙儀如屬城，何故放臂入府門？」促收其主簿。衡弟顧促取版。既入見尹，尹欲修主人，勅外爲市買。息又啓曰：「左悺子弟來爲虎牙，非德選，不足爲特酤買，宜隨中舍菜食而已。」及其到官，遣吏奉牋謝尹，息又勅門，言「無常見此無陰兒輩子弟邪！用其牋記爲通乎？」晚乃通之，又不得即令報。衡弟皆知之，甚悲，欲滅諸趙，因書與衡，求爲京兆尹。旬月之間得爲之。息自知前過，乃逃走。時息從父仲臺見爲涼州刺史，於是唐衡爲詔徵仲臺遣歸。遂詔中都官及郡都督郵捕諸趙尺兒以上及仲臺，皆殺之。時息從父岐爲皮氏長，聞有家禍，因從官舍逃走，之河間，變姓名，又轉詣北海，著絮巾布袴，常於市中販胡餅。趙氏兄弟族屬可考者，附錄於此。知命之際，嬰戚於天。邁屯離蹇，詭姓遁身。經營八紘之內十有餘年，心勦形瘵，何勤如焉！

疏正義曰：謂延熹元年逃難四方事也。趙氏年九十餘，卒於建安六年辛巳，上溯延熹元年戊戌四十四年。是年五十，然則趙氏年九十四卒也，蓋生於安帝永初二年。邁，遇也。離，麗也。屯，蹇，皆謂難也。《列子·湯問》篇「八紘九野之水」，張湛注云：「八紘，八極也。」《淮南子·地

形訓》云：「八殯之外而有八紘。」高誘注云：「紘，維也。」「經營八紘之內」即所謂「江淮海岱靡所不歷也」。傳云「數年乃出」，此云「十有餘年」，或連靈帝時禁錮言與？《音義》云：「勦，子小切，絕也。」按：《說文》刀部云：「勦，絕也。《夏書》曰：『天用勦絕其命。』」力部云：「勦，勞也。《春秋傳》曰：『安用勦民？』」天用勦絕其命，今在《尚書·甘誓》，作「勦」。曹憲《博雅音》云：「勦從刀而勦從力。」此云「心勦」，乃從力之「勦」，當訓勞，謂心勞也。《音義》訓絕，則是從刀之「勦」，爲「勦」字矣。心不可言絕也，失之矣。《爾雅·釋詁》云：「瘵，病也。」《詩·大雅·瞻印》篇「邦靡有定，士民其瘵」，箋云：「天下騷擾，邦國無有安定者，士卒與民皆勞病。」勦、瘵義皆爲勞，故以「勦」字總承之。嘗息肩弛擔於濟岱之間，^②或有溫故知新雅德君子，**疏**正義曰：謂安丘孫嵩也。《漢書·地理志》北海郡安丘，其地在濟岱之間。「息肩弛擔」謂藏複壁中。矜我劬瘁，睠我皓首，訪論稽古，慰以大道。**疏**正義

① 「敬」，原脫，今從沈校據《三國志》裴松之注補。

② 「濟」，原誤作「海」，今從沈本據廖本改。

曰：「睠，《說文》作「眷」，云：「顧也。《詩》曰「乃眷西顧」。人經困瘁則毛髮易白，故趙氏五十而皓首也。」「訪論稽古」謂孫嵩與之論學也。《後漢書·鄭康成傳》云：「及黨事起，乃與同郡孫嵩等四十餘人俱被禁錮。」《三國志》注引《邴原別傳》云：「欲遠遊學，詣安丘孫崧。」崧即嵩。嵩在當時與鄭、邴等交，則亦讀書稽古之士也。

漂，靡所濟集，

疏正義曰：《說文》是部云：「遶，行難

也。《易》曰「以往遶」。今《易》作「吝」，則吝之義爲難行。

《說文》水部云：「漂，浮也。」《易·雜卦傳》云：「既濟，定

也。」《毛詩·邶風·載馳》篇「不能旋濟」，傳云：「濟，止

也。」止與定義同。集猶聚也。精神遐遠而漂浮，故無所定

止而斂聚也。聊欲係志於翰墨，得以亂思遺老

也。**疏**正義曰：《音義》云：「張云：「亂，治也。」思，去

聲。」按：「思」謂憂思也。著書明道則可治其憂思。《說文》

是部云：「遺，亡也。」亡即忘。《禮記·鄉飲酒義》「知其能

弟長而無遺矣」，注云：「遺猶脫也，忘也。」「遺老」謂忘其

老。《論語·述而》篇云：「發憤忘食，樂以忘憂，不知老之

將至云爾。」惟六籍之學，先覺之士釋而辯之者

既已詳矣，**疏**正義曰：備見《漢書·儒林傳》《藝文志》、

《後漢書·儒林傳》。儒家惟有《孟子》閱遠微妙，
緼奧難見，宜在條理之科。**疏**正義曰：《禮記·月

令》「其器圓以閎」，注云：「閎讀如紘，紘謂中寬，象土含

物。」閎與宏通。《考工記·梓人》「其聲大而宏」，注云：

「宏讀如紘，紘之紘，謂聲音大也。」閎，宏通借字。《漢書·藝

文志》「昔仲尼沒而微言絕」，注引李奇云：「微言，隱微不顯

之言也。」妙與眇同。《揚雄傳》「閱意眇旨」。《儒林·張山拊

傳》「嚴然總五經之眇論」，注皆云：「眇讀曰妙。」《方言》

云：「眇，小也。」蓋言其大閎而且遠，言其小微而且妙。《禮

記·玉藻》「緼爲袍」，注云：「緼，今之緼及故絮也。」《爾

雅·釋宮》云：「西南隅謂之奧。」緼在袍之裏，奧在室之內，

故不易見。《條理》見《萬章下》篇。《說文》木部云：「條，小

枝也。」自根發而爲幹，自幹分而爲枝，枝又分而爲條，故條

之義爲分。分則暢達，故義又爲暢爲達。《韓非子·解老》

云：「凡理者，方圓短長麤靡堅脆之分也。」《荀子·儒效》篇

云：「井井乎其有理也。」楊倞注云：「有條理也。」《廣雅·

釋言》云：「科，條也。」又云：「科，品也。」蓋當時著書之法

各有科等，《孟子》之意指既緼奧難見，則宜條分縷析，使之

井井著明，故「宜在條理之科」如下所云是也。

於是乃述

己所聞，證以經傳，爲之章句。具載本文，章別其指。分爲上下，凡十四卷。

疏正義曰：趙

氏自述少蒙義方，則所學授諸祖父，別無師傳。子孫述祖父往往諱其名字，久而轉致無聞，此其憾也。本傳注引《三輔決錄》注云：「岐娶馬敦女宗姜爲妻，敦兄子融嘗至岐家問趙處士所在。岐厲節，不以妹壻之故屈志於融。與其友書曰：『馬季常雖有名當世而不持士節，三輔高士未嘗以衣裾撇其門也。』岐曾讀《周官》二義不通，一往造之。」然則岐雖鄙融之爲人，而義有不通亦往請問，則其虚心取善可知。雖無常師，而非不知而作者矣。故聲音訓詁之學不殊馬、鄭。「證以經傳」，注中所引是也。《毛詩正義》云：「漢初爲傳訓者皆與經別行。三傳之文不與經連，故石經書《公羊傳》皆無經文。《藝文志》云：『《毛詩經》二十九卷，《毛詩故訓傳》三十卷。』是毛爲詁訓亦與經別也。及馬融爲《周禮》之注，乃云『欲省學者兩讀，故具載本文』，然則東漢以來始就經爲注。」按：趙氏用馬融之例，故具載本文，然漢世說經諸家各有體例，如董仲舒之《春秋繁露》、韓嬰之《詩外傳》、京房之《易傳》，自抒所見，不依章句。伏生《書傳》雖分篇附著矣，而不必順文理解。然其書殘缺，不覩其全。《毛詩傳》全在

矣，訓釋簡嚴，言不盡意，鄭氏箋之，則後世「疏義」之濫觴矣。鄭於三禮詳說之矣，乃《周禮》本杜子春、鄭司農而討論，則又後人「集解」之先聲也。何休《公羊學》專以明例，故文辭廣博，不必爲本句而發。蓋經各有義，注各有體。趙氏於《孟子》，既分其章，又依句敷衍而發明之，所謂「章句」也，章有其指，則總括於每章之末，是爲「章指」也。疊詁訓於語句之中，繪本義於錯綜之內，於當時諸家，實爲精密而條暢。文多，故分七篇爲十四，爲上下而不以十四爲次第者，不敢紊七篇之舊目也。究而言之，不敢以當達

者；**疏**正義曰：《史記·孔子世家》云：「孟釐子曰：『吾

聞聖人之後，雖不當世，必有達者。今孔丘年少好禮，其達者與？』」《莊子·齊物論》云：「惟達者知通爲一。」施於

新學，可以寤疑辯惑。**疏**正義曰：《廣雅·釋言》

云：「新，初也。」新學即初學也。《毛詩·周南·關雎》篇

「寤寐求之」，傳云：「寤，覺也。」《說文》心部云：「悟，覺也。」寤與悟通。愚亦未能審於是非，後之明者

見其違闕，儻改而正諸，不亦宜乎！**疏**正義

曰：趙氏後爲《孟子》注者，梁《七錄》有綦毋邃《孟子注》九卷。周氏廣業《孟子古注考》云：「綦毋，複姓。《左傳》有晉

大夫綦毋張，見《廣韻》「毋」字注，戰國有綦毋子，見劉向《別錄》；後漢有東莞綦毋君，見謝承《書》；劉表在荊州時有儒士綦毋闡。遼世次行事無考，《隋志》載其《列女傳》七卷在皇甫謐後，又云：「《二京賦》二卷，李軌、綦毋邃撰。」邃又注《三都賦》三卷，撰《誠林》三卷，並梁有今亡。宋裴駟注《史記》嘗兩引其說，知爲晉人。《正義》不考，但云在梁時又有綦毋邃注九卷，疏也。《唐志》作「綦毋邃注《孟子》七卷」，又「陸善經注《孟子》七卷，張鎰《孟子音義》三卷」。《崇文總目》云：「善經，唐人，以軻書初爲七篇，因刪去趙岐《章指》與其注之繁重者，復爲七篇。」《舊唐書》：「張鎰，蘇州人，朔方節度使齊邱之子也。大曆五年除濠州刺史，爲政清靜，州事大理，乃招經術之士講訓生徒，撰《三禮圖》九卷，《五經微旨》十四卷，《孟子音義》三卷。尋拜中書侍郎平章事，集賢殿學士。盧杞忌鎰名重道直，無以陷之，以方用兵，因薦鎰以中書侍郎爲鳳翔隴右節度使。李楚琳作亂，鎰出鳳翔三十里，爲候騎所得，楚琳殺之。贈太子太傅。」《新唐書》鎰傳在第七十七，言其字季權，一字公度。《宋史·藝文志》：「張鎰《孟子音義》三卷。」①丁公著《孟子手音》一卷。」「張鎰」蓋「鎰」之譌。《手音》不載《唐志》。《唐書》列傳八十九：「丁公著字平子，蘇州吳人。三載喪母。甫七歲，見鄰

媼抱子，哀感不肯食，請於父緒，願絕粒學老子道。父聽之。稍長，父勉勅就學，舉明經高第，校集賢校書郎。不滿秩輒去，侍養於家。父喪，負土作冢，貌力癯瘠，見者憂其死孝。觀察使薛苹表上至行，詔刺史弔問，賜粟帛，旌闕其間。淮南節度使李吉甫表授太子文學兼集賢校理。會入輔政，擢爲右補闕，遷直學士，充皇太子諸王侍讀。因著《太子諸王訓》十篇。穆宗立，擢給事中，遷工部侍郎，知吏部選事。辭疾求外遷，授浙西觀察使。徙爲河南尹，治以清靜聞。四遷禮部尚書，翰林侍講學士。長慶中浙東災癘，拜觀察使，詔賜米七萬斛，使賑饑捐。久之，入爲太常卿。太和中以病丐身還鄉里，卒，年六十四，贈尚書右僕射。」按作《孟子手音》者蓋即其人。宋孫奭《孟子音義敘》云：「自陸善經已降，其所訓說雖小有異同而共宗趙氏。張氏徒分章句，漏略頗多，丁氏稍識指歸，譌謬時有。與尚書虞部員外郎同判國子監臣王旭、諸王府侍講太常博士國子監直講臣馬龜符、鎮寧軍節度推官國子學說書臣吳易、前江陰軍江陰縣尉國子學說書臣馮元等，推究本文，參考舊注，集成《音義》二卷。」《宋史·儒林傳》云：「孫奭，字宗古，博州博平人。幼與諸

①「鎰」，原作「鎰」，今據下文文義及《宋史》改。

生師里中王徹。徹死，有從奭問經者，奭爲解析微指，人人驚服。於是門人數百，皆驚服奭。後徙居須城。九經及第，爲莒縣主簿。上書願試講說，遷大理評事，爲國子監直講。太宗幸國子監，召奭講書，賜五品服。真宗以爲諸王府侍讀。會召百官轉對，奭上十事，判太常禮院、國子監、司農寺。累遷工部郎中，擢龍圖閣待制。大中祥符初得天書於左承天門，帝將奉迎，召問奭。奭對曰：「臣愚，所聞『天何言哉』？豈有書也？」仁宗即位，宰相請擇名儒以經儒侍講讀，乃召爲翰林侍講學士，知審官院，判國子監。丁父憂。起復，兼判太常寺及禮院。三遷兵部侍郎、龍圖閣學士。每講讀至前世亂君亡國，必反覆規諷。仁宗意或不在書，奭則拱默以俟，帝爲竦然改聽。嘗書《無逸圖》上之，帝施於講讀閣。三請致仕，召對承明殿，敦諭之，以不得請求近郡，優拜工部尚書。復知兗州，改禮部尚書。既而累表乞歸，以太子少傅致仕，卒贈左僕射，謚曰「宣」。常掇五經切於治道者爲《經典微言》五十卷，又撰《崇祀錄》、《樂記圖》、《五經節解》、《五服制度》。嘗奉詔與邢昺、杜鎬校定諸經正義，《莊子》、《爾雅釋文》，考正《尚書》、《論語》、《孝經》、《爾雅》謬誤及《律》音義。此皆生趙氏後治趙氏學者也。陸善經刪削，實爲趙氏之蠹，若孫氏，其有裨於趙氏矣。

孟子正義卷一終

姪廷琮廷弼校字

孟子正義卷二

江都縣鄉貢士焦循撰集

孟子卷第一

疏正義曰：周氏廣業《孟子古注考》云：

「山井鼎《考文》詳說古本，足利篇題：古本首行『孟子卷第一』，次行『梁惠王章句上』，三行低二格『趙氏注』，下夾注『梁惠王者，魏惠王也』云云，四行『孟子見梁惠王』。足利本前二行同古本，第三行低一格夾注『梁惠王』云云，第四行低三格『後漢太常趙岐郊卿注』，五行『孟子見梁惠王』。與今孔氏、韓氏新刻本不同。」按：今孔氏刻本首行以『梁惠王章句上』六字頂格，而此行之下繫之以『孟子卷第一』五字，次行『趙氏注』。今依古本提『孟子卷第一』在前。**趙氏注疏**正義曰：阮氏元《校勘記》云：「閩監毛三本並作『漢趙氏注』，足利本作『後漢趙岐郊卿注』，與各本皆不合，非也。廖瑩中經注本作『趙

岐』，亦非。」《毛詩正義》云：「不言名而言氏者，漢承滅學之後，典籍出於人間，各專門命氏以顯其家之學，故諸為傳訓者，皆云『氏』不言名。」

梁惠王章句上凡七章。

注梁惠王者，魏惠王

也。魏，國名。惠，謚也。王，號也。時天下有七王，皆僭號者也，猶春秋之時吳、楚之君稱「王」也。魏惠王居於大梁，故號曰「梁王」。聖人及大賢有道德者，王公侯伯及卿大夫咸願以為師。孔子時，諸侯問疑質禮，若弟子之問師也，魯衛之君皆尊事焉，故《論語》或以弟子名篇，而有《衛靈公》、《季氏》之篇。孟子亦以大儒為諸侯所師，是以《梁惠王》、《滕文公》題篇，與《公孫丑》等而為一例也。**疏**「梁惠王章句上」○正義曰：《文心雕龍》云：「夫設情有宅，置言有位。宅情曰章，位言曰句。章者，明也；句者，局也。局言者，解字以分疆；明情者，總義以包體。道畛相異而衢路交通矣。」《漢書·藝文志》：《易》章句有施、孟、梁丘各二篇，《書》有《歐陽章句》三十一卷，《大小夏侯章句》各二十九卷，《春秋》有《公

羊章句》三十八篇，《穀梁章句》三十三篇。《漢書·張禹傳》：「禹爲《論語章句》。」《後漢書·儒林傳》包咸人授太子《論語》，又爲其章句。趙氏以「章句」命名，其來尚矣。周氏廣業《孟子古注考》云：「《意林》云：『蜀郡趙臺卿作《章句》，章句曰指事。』」廣按：臺卿京兆人而稱蜀郡者，蓋因避難改籍也。章句曰指事者，謂斷章而揭其大指，離句而證以實事也。《意林》錄自梁庾仲容《子抄》，當是庾所見舊本標題如此。或云：《史記》稱莊周善「屬書離辭，指事類情」，「指事」之名本此。案：指事爲六書之一，許慎《說文敘》云：「視而可識，察而可見，上下是也。」趙意蓋兼取顯著之義。《後漢書·儒林傳》云：「程曾，字秀升，著書百餘篇，又作《孟子章句》。」高誘《呂氏春秋序》云：「誘正《孟子章句》。」程、高生趙氏先後，均有《章句》，而今不傳。孔氏繼涵、韓氏岱雲所刻趙氏《章句》本無「凡七章」三字，然則此三字非趙氏之舊。山井鼎《考文》占本亦無此三字。孫氏《音義》有之。○注「梁惠」至「王也」○正義曰：《史記·魏世家》云：「魏之先，畢公高之後也。其苗裔曰畢萬，事晉獻公。十六年，趙夙爲御，畢萬爲右，以伐霍、耿、魏，滅之，以魏封畢萬爲大夫，從其國名爲魏氏。生武子，治於魏。生悼

子，徙治霍。生魏絳，徙治安邑。卒，謚爲昭子。生魏嬴。嬴生魏獻子，爲國政，與趙簡子、中行文子、范獻子並爲晉卿。生魏侈。侈之孫桓子與韓康子、趙襄子共滅智伯，分其地。桓子之孫曰文侯都。魏二十一年，魏、趙、韓列爲諸侯。二十五年，子擊生子罃。文侯卒，子擊立，是爲武侯。武侯卒，子罃立，是爲惠王。《六國表》：周威烈王二十三年韓、趙、魏始列爲諸侯，安王二年太子罃生，二十六年魏、韓、趙滅晉。烈王元年爲魏惠王元年，距始列爲侯凡三十四年，距分晉僅六年。《詩·魏譜》云：「魏者，虞舜、夏禹所都之地，在《禹貢》冀州雷首之北析城之西，周以封同姓焉。其封城南枕河曲，北涉汾水。至春秋閔公元年晉獻公竟滅之，以其地賜大夫畢萬。」是魏爲國名也。《周書·謚法解》云：「謚者，行之迹也。號者，功之表也。仁義所在曰王。柔質慈民曰惠，愛民好與曰惠。」是惠爲謚，王爲號也。周氏廣業《孟子出處時地考》云：「《史》序列國稱王之年多舛出。詳考之，則魏最先，齊次之，秦又次之。然惟齊大書於《田完世家》，云：『威王二十六年，擊魏，大敗之桂陵。於是齊最強於諸侯，自稱爲王以令天下。』」魏、秦或晦或顯，二

國史亦不公言之。^①蓋以魏先強後弱，秦先弱後強，其王號皆數稱而後定也。何以明之？《魏世家》稱王始惠王，其後乃云：「襄王元年，與諸侯會徐州，相王也。」追尊父惠王爲王。「追尊固無是理。」《國策》蘇秦說齊閔王曰：「昔者魏王擁土千里，帶甲三十六萬，恃其強，拔邯鄲，西圍定陽。又從十二諸侯朝天子，以西謀秦。秦王恐，爲戰具守備。衡鞅曰：『魏氏功大而令行於天下，有十二諸侯而朝天子，其與必多。』乃見魏王曰：『大王有伐齊楚，從天下之志，不如先行王服，然後圖之。』魏王悅其言，廣公宮，制丹衣柱，建九旂之旗。此天子之位也而魏王居之，於是齊、楚怒，伐魏，殺其太子，覆其十萬之衆。當是時，秦王垂拱而得西河之外。」是魏之僭號早在商鞅用事秦孝公之日，故杜平之會儼然稱王也。顯王二十六年致伯於秦孝公，三十三年賀秦惠王，三十五年致文武胙於秦惠王，四十四年秦惠君立王。其後諸侯皆稱王。《秦本紀》：「孝公卒，子惠文君立。」又云：「惠文君二年，天子賀。三年，王冠。四年，天子致文武胙，齊、魏爲王。十三年四月戊午，魏君爲王，韓亦爲王。」夫《周紀》之不先齊魏，以秦之王爲代周之漸，特以首惡歸之。獨計賀及致胙之日去致伯未遠，何遽改稱王？而《秦紀》

上兩稱惠文君，下忽書曰「王冠」，殊不可解。及觀《始皇紀》後序秦世系云：「惠文王二年初行錢，有新生嬰兒曰「秦且王」。然後知秦應識稱王即在受天子賀之年也。是時魏已寢弱，方改元與民更始，聞秦稱王，欲厚結以爲援。既與議婚，復遠涉齊境，藉其威力以脅諸侯，名爲自王，實欲王秦。《史》於會徐州相王，《魏》《齊世家》及《年表》備書之，蓋其事雖未愜衆心，而魏固以名震河山以東，秦亦侈然自肆於國中矣。秦史特變文曰：「齊、魏爲王。」意蓋謂齊、魏皆奉之爲王，故與天子致胙連書以爲榮。而《年表》復書「魏夫人來」以見魏實爲之謀主，蘇秦所謂「有西面事秦稱東藩」者也。特以崛起西陲，又值六國從親，兵不敢闕函谷，旋自輜晦耳。及滅巴蜀，取河西，益富厚，輕諸侯，而王號遂達於周京焉。《張儀傳》：「秦惠王十年，以儀爲相。儀相秦四年，立惠王爲王。」與《周紀》正合，是再稱而後定也。魏是杜平之後兵敗子虜，國威日替，中間頗示貶損，故其爲王，一見於秦孝公之初，再見於徐州之會，最後《秦紀》所云「魏君爲王」，凡三稱而後定也。魏終稱王殆亦張儀所爲。儀魏人而相

①「史」，原無，今從沈校據《孟子四考》補。

秦，其還魏蒲陽，公子繇出質，欲魏先事秦而諸侯效之，因使與秦並立爲王。《史》獨書日月者，欲自詡其功耳，否則魏王久矣，何尚稱君？且亦何與於秦而必詳書之哉？「七王者，魏、齊、秦、韓、趙、燕、楚也。」《說文》云：「僭，假也。」隱公五年《穀梁傳》云：「下犯上謂之僭。」《史記·楚世家》云：「三十七年，楚熊通怒曰：『吾先鬻熊，文王師也。早終，成王舉我先公，乃以子男田，令居楚蠻夷皆率服而王不加位，我自尊耳。』乃自立爲武王。」《吳太伯世家》云：「壽夢立而吳始益大稱王。稱王壽夢、王諸樊、王餘昧、王僚、王閭閻、王夫差。」此吳、楚之君稱王之事也。○注「魏惠王」至「梁王」○正義曰：《魏世家》云：「秦用商君，地東至河，而齊、趙數破我，安邑近秦，於是徙治大梁。」徐廣云：「今浚儀。」《水經注》云：「浚儀縣大梁城，本春秋之陽武高陽鄉，於戰國爲大梁。周梁伯之故居，魏惠王自安邑徙都之，故曰梁。」《戰國策》稱「魏惠王」，又稱「梁王魏嬰」，是當時亦號「梁王」也。趙氏佑《溫故錄》云：「《孟子》獨稱梁，不一言魏，則是時必有因遷都而並改國號之事。」○注「聖人」至「例也」○正義曰：周氏廣業《孟子出處時地考》云：「《史》稱孟子『困於齊、梁』，而揚雄《解嘲》有云：『孟子雖連

蹇，猶爲萬乘師。』蓋以齊宣稱『夫子明以教我』，梁惠言『寡人願安承教』，皆以師道尊之，故也。」孟子言「五教」，而答問居其一，故諸侯質疑問禮即是以師道尊之。乃《論語》名篇但舉篇首以爲之目，其稱《衛靈公》以篇首有「衛靈公問陳」，其稱《季氏》以篇首有「季氏將伐顓臾」，與《學而》、《述而》等篇同。《孟子》以《梁惠王》、《滕文公》名篇亦如是耳，非謂例衛靈公、季氏於子路、顏淵，例梁惠王、滕文公於公孫丑、萬章也。趙氏所云恐未盡然。

孟子見梁惠王。

注 孟子適梁，魏惠王禮請

孟子見之。

疏 注「孟子」至「見之」○正義曰：《魏世家》

云：「惠王數被軍旅，卑禮厚幣以招賢者，鄒衍、淳于髡、孟軻皆至梁。」《六國表》云：「魏惠王三十五年，孟子來，王問

利國。」王曰：「叟不遠千里而來，亦將有以利

吾國乎？」**注**曰，辭也。叟，長老之稱也，猶父也。

孟子去齊，老而之魏，故王尊禮之。曰：父不遠千里之路而來至此，亦將有可以爲寡人興利除害乎？

疏 注「曰辭」至「父也」○正義曰：《說文》曰部云：「曰，詞

也。」司部云：「詞，意內而言外也。」辛部云：「辭，訟也。從
鬲。鬲，猶理辜也。鬲，理也。」曰宜訓詞，此注作辭，通借字
也。《方言》云：「倭、艾，長老也。東齊魯衛之間凡尊老謂
之倭，或謂之艾；周晉秦隴謂之公，或謂之翁，南楚謂之
父，或謂之父老。」戴氏震《疏證》云：「倭本作『妄』，《說文》
云『老也』，俗通作『叟』。《史記·馮唐列傳》云：『文帝輦
過，問唐曰：『父老，何自爲郎？』後又曰：『父知之乎？』」
《廣雅》云：「倭、艾，長，老也。翁、妄，父也。」《史記集解》
引劉熙《孟子注》云：「叟，長老之稱，依皓首之言。」○注「孟
子」至「害乎」○正義曰：《史記·孟子列傳》云：「孟子，騶
人也，受業子思之門人。道既通，游事齊宣王。宣王不能
用，適梁。」此趙氏所本也。周氏柄中《辨正》云：「孟子於齊
梁先後，當以《六國年表》及《魏世家》爲據，不當以《孟子列
傳》爲據。《年表》魏惠王三十五年，齊宣王之七年也，是年
特書曰『孟子來』。若孟子於齊宣王七年以前先已游齊，《年
表》何以不書？則《孟子傳》所謂『游事齊宣王，宣王不能用而
後適梁』者，乃史公駁文，非事實也。以本書觀之，篇首即載
見梁惠王諸章及見襄王有『出語』云云，自此以下十數章皆
在齊與宣王問答事，此其先後蹤跡較然可知，不必如《通鑑》
移下宣王十年以合伐燕殺噲之事。然後見孟子先游梁後至

齊也。」江氏永《羣經補義》云：「孟子見梁惠王當在周慎
王元年辛丑，是年爲惠王後元之十五年。至次年壬寅，惠王
卒，子襄王立，孟子一見即去梁矣。蓋魏罃於周顯王三十五
年丁亥與齊威王會於徐州以相王，是年爲惠王即位後三十
七年，於是始稱王而改元稱一年也。」二說與趙氏異，未知孰
是。時秦用商君，富國強兵，惠王所以遷梁，故曰「亦將有以
利吾國」，謂亦如商君之於秦，俾富國強兵也。《論衡·刺孟》
篇述此文作「將何以利吾國乎」。孟子對曰：「王何必
曰利？亦有仁義而已矣。」注孟子知王欲以富
國強兵爲利，故曰：「王何必以利爲名乎？亦惟有
仁義之道者可以爲名，以利爲名則有不利之患矣。
因爲王陳之。」疏注「孟子」至「陳之」○正義曰：孟子謂
宋牼云：「先生之號則不可。」名猶號也。「曰利」即是以利
爲號。《廣雅·釋言》云：「曰，言也。」《國語·周語》云：「有
不祀則脩言」，韋昭注云：「言，號令也。」名、言義皆爲號，故
用以解「曰利」之義。惟以利爲號令，故大夫、士、庶人應之。
《洪範》：「初一日五行：一曰水，二曰火，三曰木，四曰金，

五曰土。」隱公二年《左傳》：「以條之役生太子，命之曰仇，其弟以千畝之戰生，命之曰成師。」又：「嘉耦曰妃，怨耦曰仇。」曰之爲詞所以標名號，故趙氏以名釋曰。王曰

「何以利吾國」，大夫曰「何以利吾家」，士庶人曰「何以利吾身」，上下交征利而國危矣。

注征，取也。從王至庶人，故云「上下交爭」。各欲利其身，必至於篡弑，則國危亡矣。《論語》曰：「放於利而行，多怨。」故不欲使王以利爲名也。又言交爲俱也。**疏**注「征取也」○正義曰：《盡心》篇下「有布縷

之征」，注云：「征，賦也。」哀公十二年《公羊傳》何休注云：

「賦者，斂取其財物也。」僖公二十七年《左傳》「賦納以言」，杜預注云：「賦猶取也。」《荀子·富國》篇「其於貨財取與」，

楊倞注云：「取謂賦斂。」是征、賦、取三字轉注，故趙氏訓征爲賦，又訓征爲取也。○注「從王」至「名也」○正義曰：從，

自也。自王取於大夫，大夫取於士庶人，爲上征下，士庶人又取利於大夫，大夫取利於王，爲下征上，是交征也。云「交爭」者，《魏世家》云：「孟子至梁，梁惠王曰：『叟不遠千里幸辱敝邑之庭，將何以利吾國？』」孟軻曰：「君不可以言利。若是夫君欲利則大夫欲利，大夫欲利則庶人欲利，上下爭

利，國則危矣。」司馬遷每以改易字代解詁，上下交取，勢則必爭，故以「爭利」解「交征」，趙氏所本也。征無爭訓，故先以取訓之，而後本《史記》言交爭。惟爭而國乃危。《國策·秦策》云：「王攻其南，寡人絕其西，魏必危。」高誘注云：

「危，亡也。」以亡訓危，與趙氏此注同。監本、毛本脫「亡」字。引《論語》者，《里仁》第四篇文。○注「又言交爲俱」○正義曰：前言上下交爭，是以交爲交互之交。交又訓俱，高誘注《齊策》、韋昭注《國語》皆如此訓。趙氏兼存之，故云「又言」。謂天子以至庶人俱惟利是取，不必上取下，下取

上。此別一義也。萬乘之國，弑其君者必千乘之

家；**注**萬乘，兵車萬乘，謂天子也；千乘，兵車千乘，謂諸侯也。夷羿之弑夏后，是以千乘取萬乘也。

疏注「萬乘兵車」至「侯也」○正義曰：《漢書·刑法志》云：「因井田而制軍賦：地方一里爲井，井十爲通，通十爲成，成方十里，成十爲終，終十爲同，同方百里，同十爲封，封十爲畿，畿方千里。有稅有賦：稅以足食，賦以足兵。故四井爲邑，四邑爲丘，丘十六井也，戎馬一匹，牛三頭，四丘

①「隱」，按引文在桓公二年，參沈校。

爲甸，甸六十四井也，有戎馬四匹，兵車一乘，牛十二頭，甲士三人，卒七十二人，干戈備具，是謂乘馬之法。一同百里，提封萬井，除山川、沈丘、城池、邑居、園囿、術路，三千六百井，定出賦六千四百井，戎馬四百匹，兵車百乘，此卿大夫采地之大者也，是謂百乘之家，一封三百一十六里，提封十萬井，定出賦六萬四千井，戎馬四千匹，兵車千乘，此諸侯之大者也，是謂千乘之國，天子畿方千里，提封百萬井，定出賦六十四萬井，戎馬四萬匹，兵車萬乘，故稱萬乘之主。《論語》「道千乘之國」，《集解》：「馬氏云：『《司馬法》六尺爲步，步百爲畝，畝百爲夫，夫三爲屋，屋三爲井，井十爲通，通十爲成，成出乘車一乘。然則千乘之賦，其地千成，居地方三百一十六里有奇，惟公侯之封乃能容之。雖大國之賦，亦不是過焉。』」包氏曰：「千乘之國者，百里之國也。古者井田，方里而井，十井爲乘。百里之國適千乘也。」融依《周禮》，包依《王制》、《孟子》。疑，故兩存焉。「毛氏奇齡《經問》云：「古千乘之國，地方百里，出兵車千乘，故稱千乘之國。方里而井。百里之國爲萬井，而出千乘。是十井出一乘，不問可知。《周禮》乃謂九夫爲井，四井爲邑，四邑爲丘，四丘爲甸，甸六十四井，出車一乘，則是百里之國，止出兵車一百五十六乘，何名「千乘」乎？」曰：《周禮·小司徒》職惟有

「九夫爲井，四井爲邑，四邑爲丘，四丘爲甸」四句，其下「甸出一乘」云云皆《司馬法》文。杜預引此注《左傳》不注明「司馬法」三字而混并在《周禮》文下，或遂以之詬《周禮》。特所謂《司馬法》者原非周制。《史記》：「齊景公時有司馬穰苴曾著兵法，至戰國時齊威王使大夫追論古司馬兵法，而附穰苴於其中，名《司馬法》。」今其書不傳久矣，然且有兩《司馬法》，兩言出車之制，其一又曰「六尺爲步，步百爲畝，畝百爲夫，夫三爲屋，屋三爲井，井十爲通，通十爲成，成出革車一乘」。此馬融引之注《論語》，鄭康成引之注《周禮》，然皆非是。大抵侯國以百里爲斷，百里之地以開方計之，實得萬里。《孟子》方里而井。萬里者萬井也。乃以甸出一乘計之，甸方八里，實得六十四井。以成出一乘計之，成方十里，實得百井。百井出一乘，則萬夫止百乘，六十井出一乘，則萬夫止出一百五十有六乘矣。雖爲之說者曰：成之十里即是甸之八里，以甸八里外有治溝洫之夫各受一井，得二里，不出車賦，仍是十里。然其與千乘之賦則總不合。於是馬融謂侯封不止百里，當有方三百一十六里有奇，而鄭康成則直據《周禮》，謂公五百里，侯四百里，伯三百里，子二百里，男一百里，以求合於成甸出車之數。夫列爵惟五，分土惟三，真周制也。公侯百里，伯七十里，子男五十里，《王制》

之等也。故《易》曰「震驚百里」，言建侯象雷震地，止百里；而《春秋傳》曰「列國一同」，一同者，百里之地；孟子謂周公、太公，其始封俱止百里，非地有不足而限制如此。此在漢後五經諸家，如何休、張苞、包咸、范甯輩，皆歷爲是說，而乃以五等班祿亂周家三等之制，以一人之書盡反《易》、《春秋》、《尚書》、《孟子》、《王制》諸經傳之文，豈可訓也？」王氏鳴盛《周禮軍賦說》云：「大國三軍，車五百乘，若計地出賦，則得千乘。千乘出賦之法，則服虔注《左傳》所引《司馬法》，載《詩正義》，所謂「甸六十四井，出車一乘，士卒共七十五人」者是。馬、鄭注《論語》引之，欲見邦國疆域實數，故改甸爲成，其實一耳。《孫子》云：「興師十萬，日費千金，怠於操事者七十萬家。」蓋謂七家而賦一兵也。今以此法推，六十四井、五百七十六家可出八十二人，尚餘二夫。今祇出七十五人，則是七家又十之五強出一人也。此說本無可疑。自何休注《公羊傳》「初稅畝」云：「聖人制井田之法，十井共出兵車一乘。」包咸因之，亦謂十井爲乘，百里之國應千乘也。何楷辨之，謂使十井出一甸之賦，則其虐又過於成公之丘甲矣，此說最精。顧後儒猶有惑於其說者，則以邦國疆域諸國參差不合也。《王制》云：「公侯田方百里，伯七十里，子男五十里。」《孟子》云：「諸侯之地方百里，不百里不足以守宗

廟之典籍。周公之封於魯，爲方百里也，地非不足而儉於百里；太公之封於齊也，亦爲方百里也，地非不足而儉於百里。」今考《王制》云云，康成以爲夏制五等之爵，三等受地，至殷變爵爲三等，合子男與伯以爲一，其地亦三等不變。則《白虎通》詳言之，武王克商，復增子男爵爲五等，其受地則與夏、殷三等同。齊、魯之封皆在武王之世，《孟子》所謂「地非不足而儉於百里」者，大都據初制而言。賈公彥「職方氏」疏申鄭意，謂其時九州之界尚狹，至武王崩，成王幼，周公攝政，致太平，制禮樂，成武王之意，斥大九州，於是五等之爵以五等受地，則《周禮·大司徒》云「凡建邦國：諸公之地封疆方五百里，諸侯之地封疆方四百里，諸伯之地封疆方三百里，諸子之地封疆方二百里，諸男之地封疆方百里」是也。《左氏傳》言「不過半天子之軍」，《坊記》言「不過千乘」，「不過」云者，謂軍賦以是爲限，非地止三百一十六里，故馬云「大國亦不是過」。《史記》云：「周封伯禽於魯地，方四百里。」《明堂位》則以成王欲廣魯於天下，故封周公於曲阜，地方七百里。然其言魯之賦，亦不過革車千乘而已。若孟子對北宮錡曰：「周室班爵祿，公侯皆方百里，伯七十里，子男五十里。不能五十里不達於天子，附於諸侯，曰附庸。」此以夏制爲周制者。其言曰「軻也嘗聞其略」，則爲傳聞約略之

詞而非載籍之明據可知。王與之云：「孟子見戰國爭雄，壤地廣袤，遂援百里、七十里、五十里之制以抑當時並吞無厭之心。若今之偏州下邑，奚啻百里？」《周禮》所載不爲過也。」此說得之。蓋千乘其地千成，則九萬井有餘，其爲百里已九有奇矣，尚得以爲百里乎？《左傳》襄二十五年，鄭子產適晉獻捷，晉人責之何故侵小，子產對曰：「昔天子之地一圻，列國之地一同。今大國多數圻矣，若無侵小，何以至焉？」此亦救時之譚，非核實之論也。」謹按：說者多以千乘三百一十六里爲長，乃孟子說公侯百里，則孟子言「千乘」當自以百里矣。錄毛氏、王氏兩說以俟識者參之。○注「夷羿」至「乘也」○正義曰：襄公四年《左傳》云：「昔有夏之方衰也，后羿自鉅遷於窮石，因夏民以代夏政，不脩民事而淫於原獸，棄武羅、伯因、熊髡、龍圉而用寒浞。寒浞，伯明氏之讎子弟也。伯明后寒棄之，夷羿收之。」杜預注云：「夷氏也。」哀公元年《左傳》云：「昔有過澆，殺斟灌以代斟鄩，滅夏后相。」然則羿代夏政，不言弑君，其滅相者自是澆，非羿也。《書序》稱「太康失邦，昆弟五人，須於洛汭」。《周書·嘗麥》云：「其在夏之五子忘伯禹之命，假國無正，用胥興作亂，遂凶厥國。皇天哀禹，賜以彭壽，思正夏略。」五子，武觀也，彭壽者，彭伯也。是太康失國由於五觀。惟僞《古

文尚書》言「羿距於河」，某氏傳以爲「羿廢太康，立其弟仲康」。趙氏所據未聞。千乘之國，弑其君者必百乘之家。注天子建國，諸侯立家。百乘之家，謂大國之卿食采邑有兵車百乘之賦者也，若齊崔、衛甯、晉六卿等是。以其終亦皆弑其君，此以百乘取千乘也。上千乘當言「國」而言「家」者，諸侯以國爲家，亦以避萬乘稱國，故稱家，君臣上下之辭。疏注「天子建國諸侯立家」○正義曰：《春秋》桓公二年《左傳》文。《周禮·地官·載師》「以家邑之田任稍地」，注云：「家邑，大夫之采地。」《夏官·大司馬》「家以號名」，注云：「家謂食采地者之臣也。」○注「若齊崔」至「乘也」○正義曰：齊崔謂崔杼，衛甯謂甯喜。《春秋》襄公二十五年夏五月乙亥，「齊崔杼弑其君光」；二十六年春王二月辛卯，「衛甯喜弑其君剌」，是其事。馬氏驥《釋史》云：「晉三卿韓、魏、趙氏起於獻公之世，卒分晉國。」夫晉自三郤之亡，七族並盛，知瑩、范匄、荀偃、韓起、欒黶、范魴、魏絳、趙武，襄八年《傳》稱悼公之「八卿」也。其後欒氏復亡，韓起、趙成、荀吳、魏舒、范鞅、知盈，五年《傳》稱平公之「六卿」也。至於定公而范、荀亡，晉止四卿矣。至於哀公而知伯滅，晉又止三卿矣。○注「上

千「至」之辭」○正義曰：諸侯稱國，大夫稱家。上云「千乘之家」，故趙氏說之。太史公以吳太伯以下凡諸侯目爲世家，《索隱》引董仲舒云：「王者封諸侯，非官之也，得以代代爲家者也。」是諸侯以國爲家也。按：孟子言天子之卿受地視侯，大夫受地視伯，元士受地視子男。然則天子之卿大夫其采地同於侯，則千乘之家正指畿內之卿。如王孫蘇殺毛，召而王室亂，尹氏召伯立王子朝而王室亂，雖無弑君之迹，而爭奪之釁起自王臣矣。萬取千焉，千取百焉，不爲不多矣。

注周制：君十卿祿。君食萬鍾，臣食千鍾，亦多矣，不爲不多矣。

疏注「周制」至「多矣」○

正義曰：「君十卿祿」，《萬章下》篇文。《王制》亦云，故以爲周制也。《王制》：「諸侯之下士祿食九人，中士食十八人，上士食三十六人，下大夫食七十二人，卿食二百八十八人，君食二千八百八十人。」《周禮·廩人》：「凡萬民之食食者，人四鬴，上也；人三鬴，中也；人二鬴，下也。」注云：「此皆謂一月食米也。六斗四升曰鬴。」賈氏疏云：「此雖列三等之年，以中年是其常法。」以是推之，人一月三鬴，一歲十二月食三十六鬴，二百八十八人則每歲食一萬零三百六十八鬴。《考工記·栗氏》：「量之以爲鬴」，注云：「四升曰豆，四

豆曰區，四區曰鬴。鬴，六斗四升也。鬴十則鍾。」然則一萬零三百六十八鬴爲鍾一千零三十六八，總其整數，是爲千鍾，君食二千八百八十人，是歲食十萬零三千六百八十鬴，爲一萬零三百六十八鍾，總其整數是爲萬鍾。云「君食萬鍾」者指諸侯千乘也，云「臣食千鍾」者指大夫百乘也。經文承上「萬乘」、「千乘」、「百乘」，則「萬」、「千」、「百」仍指乘言。是諸侯於天子萬乘中取其千，大夫於諸侯千乘中取其百。趙氏以祿言之，則君臣實取之數。諸侯於千乘中食萬鍾，大夫於百乘中食千鍾，推之天子於萬乘中食十萬鍾。其千乘之家即於萬乘中食萬鍾。食萬鍾者非一家，食千鍾於千乘者亦非一家，分各定，不容更溢，故不爲不多也。苟爲後義而先利，不奪不饜。

注苟，誠也。誠令大臣皆

後仁義而先自利，則不篡奪君位不足自饜飽其欲矣。

疏注「苟誠」至「欲矣」○正義曰：「苟，誠」，《論語》

「苟志於仁矣」孔注，《詩·采芣》「苟亦無信」毛傳皆如此訓。

《白虎通·誅伐》篇云：「篡猶奪也，取也。」《說文》△部云：「逆而奪取曰篡。」故以篡訓奪。《國語·晉語》云：「屬厭而已。」韋昭注云：「厭，飽也。」饜與厭通，故以飽訓饜。未有

仁而遺其親者也，未有義而後其君者也。

注

仁者親親，義者尊尊。人無行仁而遺棄其親，行義而忽後其君者。

疏「未有」至「者也」○正義曰：篡奪則

不止遺其親，後其君矣。以利爲名，其弊至此。行仁義，則愛其親，敬其君，不遺不後，詎至篡奪乎？○注「忽後」○正

義曰：《論語》「忽焉在後」，忽之故後之也。監本、毛本作「無行義而忽後其君長」。

王亦曰仁義而已矣，何必曰利！」

注孟子復申此者，重嗟歎其禍。

疏注

「孟子」至「其禍」○正義曰：監本、毛本無「嗟」字，《音義》有之。

章指：言治國之道明，當以仁義爲名，然後上下和親，君臣集穆。天經地義，不易之道。故以建篇立始也。

疏「章指言」○

正義曰：《漢書·藝文志》：《詩》有《魯故》二十五卷。顏

師古云：「故者，通其指義也。」又《春秋左氏微》二篇，顏

師古云：「微謂釋其微指。」今《毛詩·關雎》篇後云：

「《關雎》，五章，章四句。故言三章，一章章四句，二章章八句。」《釋文》云：「五章是鄭所分，故言是毛公本意。」

然則名「故」者即分章句之指也。錢氏大昕《養新錄》云：「趙岐注《孟子》，每章之末括其大旨，間作韻語，謂

之《章指》。《文選》注所引趙岐《孟子章指》是也。南宋後偽《正義》出，託名孫奭所撰，盡刪《章指》，正文仍剽掠其語，散入正義。明國子監刊十三經承用此本，世遂不復見趙氏原本矣。考《崇文總目》載陸善經注《孟子》七卷，稱善經刪去趙岐《章指》與其注之繁重者，復爲七篇。是刪去《章指》始於善經，邵武士人作疏蓋用善經本也。」周氏廣業《孟子古注考》云：「章句者，櫟括一章之大指也。董生言《春秋》文多數萬，其指數千，知文必有指。趙氏因舉以爲例。」又云：「《考文》言古本「章旨」當作「章指」。旨，意也，《易·繫》「其旨遠」是也，指，歸趣也，《孟子》「願聞其指」是也。傳記用「意指」、「事指」、「經指」等字間有通借，其實非也。顏師古《漢書》注：「指謂義之所趨，如人以手指物也。」周氏有《疏證孟子章指》一卷，今依用其原文而稍增損之。山井鼎《考文》云：「古本、足利本每章注末有《章指》。」^①孔本、韓本注末別行載《章指》。宋本《章指》下皆有「言」字，《考文》亦然，蓋謂此章大旨所言如此也。孔本作「章指曰」，無「言」字，恐非趙氏之舊。○「治國」至「始也」○正義曰：

①「每」，原誤作「無」，今據《七經孟子考文補遺》補。

《史記·漢興以來諸侯年表》云：「形勢雖強，要當以仁義爲本。」魏武帝《秋胡行》云：「仁義爲名，禮樂爲榮。」《禮記·樂記》云：「禮義立則貴賤等矣，樂文同則上下和矣。仁以愛之，義以正之。」又云：「樂在宗廟之中，君臣上下同聽之，則莫不和敬，在閨門之內，父子兄弟同聽之，則莫不和親。」《音義》云：「集穆，張鑑云：『當爲輯穆。』」《左傳》隨武曰「卒乘輯穆」，季武子曰「其天下輯睦」。黃公紹《韻會》云「穆通作睦」，引此及《史記·司馬相如傳》「肢肢睦睦」《漢書》作「改改穆穆」爲證。《大戴記·虞戴德》篇云：「衆則集，寡則繆。」孔氏廣森《補注》云：「繆，古通以爲『穆』字，『集』、『繆』，皆和也。《孟子》章指：『上下和親，君臣集穆。』」昭公二十五年《左傳》子太叔曰：「禮，天之經也，地之義也。」禮樂必本仁義，故爲不易之道。《孟子》七篇主明仁義，以此立首也。

孟子見梁惠王。王立於沼上，顧鴻鴈麋鹿，曰：「賢者亦樂此乎？」**注**沼，池也。王好廣苑囿，大池沼。與孟子遊觀，顧視禽獸之衆多，心以爲娛樂，夸詫孟子曰：「賢者亦樂此乎？」**疏**注「沼

池也」○正義曰：《毛詩》傳文。○注「王好」至「此乎」○正義曰：《國策·魏策》云：「梁王魏嬰觴諸侯於范臺，魯君興，避席擇言曰：『楚王登強臺而望峴山，左江而右湖，其樂忘死，遂盟強臺而弗登，曰：『後世必有以高臺陂池亡其國者。』』今主君前來林而後蘭臺，強臺之樂也。」是惠王好廣苑囿、大池沼也。《毛詩·小雅·鴻雁》篇傳云：「大曰鴻，小曰雁。」《說文》鳥部云：「鴻，鵠也。」鴈，鵠也。佳部云：「雁，鳥也。」雁、鴈字異物異，此「鴻鴈」連文，「鴈」宜是「雁」，古字通也。又鹿部云：「麋，鹿屬。」鹿，獸也。言雁又言鴻，言鹿又言麋，以見禽獸衆多，餘可例也。《音義》云：「詫，丁丑嫁切，誇也。《玉篇》作『詫』。」《史記·司馬相如傳》云「子虛過詫烏有先生」，《集解》引郭璞云：「誇也。」《潛夫論·浮侈》篇云：「驕侈僭主，轉相誇詫。」又《述赦》篇云：「令惡人高會而夸詫。」《後漢書·王符傳》注云：「詫，誇也。」詫與詫通。詫，《說文》訓「叱怒」。與「夸」連文，故亦爲誇。夸亦誇也。孟子對曰：「賢者而後樂此，不賢者雖有此不樂也。」**注**惟有賢者然後乃得樂此耳，謂脩堯舜之道，國家安寧，故得有此以爲樂也；不賢之人亡國破家，雖有此當爲人所奪，故不

得以爲樂也。**疏**注「謂脩堯舜之道」○正義曰：孟子道

性善，言必稱堯舜，故知孟子之意在脩堯舜之道。堯舜通其變，使民不倦，神而化之，使民宜之。神化民宜，即文王有靈德也。《詩》云：「經始靈臺，經之營之，庶民

攻之，不日成之。」**注**《詩》、《大雅·靈臺》之篇

也。言文王始經營規度此臺，衆民並來治作之，而不與之相期日限，自來成之也。**疏**注「詩大」至「之也」

○正義曰：《詩序》云：「靈臺，民始附也。文王受命，而民

樂其有靈德，以及鳥獸昆蟲焉。」毛傳云：「神之精明曰靈，

四方而高曰臺。經，度之也。攻，作也。不日有成也。」箋

云：「文王應天命，度始靈臺之基趾，營表其位。衆民則築

作，不設期日而成之。觀臺而曰靈者，文王化行，以神之精

明，故以名焉。」趙氏此注與毛、鄭同。云「規度此臺」，本毛

以度訓經也；云「並來治作之」，本毛以作訓攻也。又以規

明度義，以治明作義，《說文》夫部云：「規，有法度也。」《考

工記》「攻木之工」，注云：「攻猶治也。」云「不與之相期日

限」，即「不設期日」也。《國語》引此詩，韋昭注云：「不課程

以時日。」趙氏佑《溫故錄》云：「古者工必計日。」《左傳》宣

十一年「薦艾獵城沂，量功命日」，杜預注云：「命作日數。」

昭二十三年「士彌牟營成周，量事期」，注云：「知事幾時成。」皆於事前預爲期限。「文王使民不勞，不急於成功，故曰「不日成之」。宋本作「不與期日限」，廖本作「不與期日」。經始勿亟，庶民子來。」**注**言文王不督促使之

疏注

「言文」至「使也」○正義曰：督，《音義》云：「丁作督。」阮氏

元《校勘記》云：「督疑疑之誤。古製與督義同音同。」《毛

詩》箋云：「亟，急也。度始靈臺之基趾非有急成之意，衆民

各以子成父事而來攻之。」疾猶急也。云「子來爲父使」即是

「子成父事」。「經始勿亟」申「不日」意，「庶民子來」申「攻

之」「成之」意也。王在靈囿，麀鹿攸伏。麀鹿濯

濯，白鳥鶴鶴。**注**麀鹿，牝鹿也。言文王在此囿

中，麀鹿懷任，安其所而伏，不驚動也。獸肥飽則濯

濯，鳥肥飽則鶴鶴而澤好。**疏**注「麀鹿」至「澤好」○正

義曰：鶴鶴，《詩》作「鵲鵲」，《毛詩》傳云：「囿，所以域養禽

獸也。天子百里，諸侯四十里。靈囿，言靈道行於囿也。

麀，牝也。濯濯，娛遊也。鵲鵲，肥澤也。」箋云：「攸，所也。

文王親至靈囿，視牝鹿所遊伏之處，言愛物也。鳥獸肥盛喜

樂。」趙氏解與傳、箋有同有異。「牝鹿」，毛本作「牝鹿」，牝

亦牝也。攸伏，箋以「所遊伏」解之，遊指下濯濯，伏與遊對，則遊言其動，伏言其靜耳。趙氏云：「懷任安其所而伏」，以伏爲懷任者：任亦作「妊」，孕也。「伏」古與「包」通，「伏羲氏」一作「包羲氏」。伏，包皆訓藏。《說文》包部云：「包，象人裹妊也。已在中，象子未成形也。」《夏小正》：「雞孚粥」，傳云：「嫗伏也。」《方言》云：「北燕、朝鮮、洌水之間謂伏雞曰抱。其卵伏而未孚，始化謂之涅。」禽鳥之伏卵猶獸畜之懷任，故《詩》言「伏」，趙氏以「懷任」解之。《國語·楚語》引《詩》，韋昭注亦云：「視牝鹿所伏息，愛特任之類。」此或齊、魯、韓三家所傳也。《廣雅·釋訓》云：「濯濯，肥也。嚕嚕，白也。」王氏念孫《疏證》云：「《釋器》云：「嚕，白也。」重言之則曰「嚕嚕」。何晏《景福殿賦》：「嚕嚕白鳥」，並與嚕嚕同。」按：從霍、從雀、從高古多通用。《釋名》云：「臙，蒿也。」《說文》手部云：「推，敲也。」《爾雅·釋器》云：「簞謂之箬。」《說文》匕部云：「卓，高也。」《易》「家人嗃嗃」，《釋文》云：「苟作確。」《一切經音義》：「確，《埤蒼》作塙，又《字書》作塙。」哀公四年《左傳釋文》引郭璞《解詁》云：「鄒者，臙。」《漢書·韓信傳》注引李奇云：「鄒音羹臙之臙。」《史記·秦始皇紀》《索隱》云：「鷁，古鶴字。」《說文》門部云：「雀，高至也。」鶴之名鶴以高至，望及於高，故「嚕」爲望亦取

義於高。「鷁」亦作「鷁」，從雀與從霍同。《詩》作「鷁鷁」，《孟子》引作「鷁鷁」，其字通也。趙氏云：「肥飽則濯濯鷁鷁」，非以「濯濯鷁鷁」爲肥飽，其以「澤好」申之，仍用毛傳「肥澤」之訓。因肥而澤，因澤而白也。「濯濯」未訓娛遊，蓋以「澤」申「鷁鷁」，以「好」申「濯濯」。《詩·文王有聲》：「王公伊濯」，《釋文》引《韓詩》云：「美也。」美即好也。王在靈沼，於切魚躍。**注**文王在池沼，魚乃跳躍喜樂。言其德及鳥獸魚鼈也。**疏**注「文王」至「鼈也」○正義曰：《毛詩》傳云：「靈沼，言靈道行於沼也。切，滿也。」箋云：「靈沼之水，魚盈滿其中，皆跳躍，亦言得其所。」《音義》云：「切，丁公著本作切。」吳氏玉搢《別雅》云：「《史記·殷本紀》：「充仞宮室」，《司馬相如傳》：「充仞其中者不可勝紀」，仞皆與切通。」按《文選·上林賦》：「虛館而勿仞」，郭璞注云：「仞，滿也。」云「德及鳥獸魚鼈」，即毛傳所謂「靈道行於沼」、「靈道行於沼」也。文王以民力爲臺爲沼而民歡樂之，謂其臺曰「靈臺」，謂其沼曰「靈沼」，樂其有麋鹿魚鼈。**注**孟子爲王誦此詩，因曰：文王雖以民力築臺鑿池，民由歡樂之，謂其臺沼若神靈

之所爲，欲使其多禽獸以養文王者也。

疏注「孟子」

至「所爲」○正義曰：爲，治也。故以築臺解爲臺，以鑿沼解爲沼。「由」，毛本作「猶」，猶，由通也。臧氏琳《經義雜記》云：「宋孫氏《音義》云：『歡樂，本亦作勸樂。』」案，《左傳》昭九年叔孫昭子引《詩》曰「經始勿亟，庶民子來」，杜注：「《詩·大雅》言。文王始經營靈臺，非急疾之，衆民自以爲子義來，勸樂爲之。」正義云：「衆民以爲子成父事而來，勸樂而早成之耳。」是可知晉唐時本皆作「勸樂」，故杜注、孔疏據之，與孫宣公《音義》正合。蓋經言「庶民子來」，孟子以「而民勸樂」釋之，猶《禮記·中庸》謂「子庶民則百姓勸」也。因「歡」與「勸」形相近，故經注皆譌爲「歡」。《漢書·王莽傳上》《詩》之靈臺，師占曰：「始立此臺，兆庶自勸就其功作，故《大雅·靈臺》之詩云云。」當亦本《孟子》云「謂其臺沼若神靈之所爲」者。《周氏柄中》《辨正》云：「《詩小序》：『民樂文王有靈德。』」據此則靈臺因文德命名。《說苑·脩文》篇云：「積恩爲愛，積愛爲仁，積仁爲靈。靈臺之所以爲靈者，積仁也。」其義與《小序》合。《趙氏佑《溫故錄》云：「趙注：『神靈之所爲』殆乎託意鬼神然者，然靈之訓善，《書》傳「於弔由靈」、「丕靈承帝事」、「惟我周王靈承於旅」、「苗氏弗用靈」，皆云「善也」，《詩》「靈雨」箋亦云「善」，蓋猶好雨之

謂。其兼「神」言之者，如「黃帝生而神靈」之類，則與明同義。故《序》云「民樂文王有靈德」，傳云「神之精明者稱靈」，箋云「文王化行若神之精明」，則皆以文王之德言，初不繫乎臺成之速，有歸諸冥冥不可得知之意，後世始有以靈爲鬼神奇異之稱者。又《謚法》「靈若厲」之靈，不可與文王之「神靈」相出入也。」謹按：靈訓善，此說是也。靈德即善德也，靈道即善道也，則靈臺即善臺，靈沼即善沼。《漢書·地理志》：「濟陰成陽有堯冢靈臺。」《水經注》：「成陽城西二里有堯陵，陵南一里有堯母慶都陵，稱曰「靈臺」。此陵墓稱「靈臺」，當以鬼神之義言之。文王之「靈臺」、「靈沼」自以善稱。《詩》云「經始靈臺」，則名自此始，故箋云本「觀臺而曰靈臺」，非堯冢靈臺之例也。趙氏與毛、鄭異。○注「欲使」至「者也」○正義曰：《呂氏春秋·務大》篇「然後皆得其所樂」，高誘注云：「樂，願也。」願猶欲也，故以「欲」解「樂」。《易·雜卦傳》云：「大有，衆也。」《繫辭傳》云：「富有之謂大業。」有之義爲衆、爲富，衆富即多，故以「多」解「有」，「樂其有麋鹿魚鼈」即欲其多麋鹿魚鼈也。古之人與民偕樂，故能樂也。**注**偕，俱也。言古之賢君與民共同其所樂，故能樂之。**疏**注「偕俱」至「樂之」○正義

曰：「偕，俱也。」《毛詩》傳文。《說文》人部云：「俱，皆也。」偕與皆通，皆亦同也。故又以「共同」申言之。監本、毛本作「與民同樂，故能得其樂」。《湯誓》曰：「時日害喪，

予及汝偕亡！」**注**《湯誓》，《尚書》篇名也。時，是

也。日，乙卯日也。害，大也。言桀爲無道，百姓皆欲與湯共伐之。湯臨士衆而誓之，言是日桀當大喪亡，我及女俱往亡之。**疏**注「湯誓」至「亡之」○正義

曰：《書序》云：「伊尹相湯伐桀，升自陲，遂與桀戰於鳴條之野，作《湯誓》。」其書今存，作「時日曷喪，予及汝偕亡」。伏生《大傳》云：「夏人飲酒，醉者持不醉者，不醉者持醉者，相和而歌曰：『盍歸乎，盍亦大矣。』」故伊尹退而間居，深聽樂聲，更曰：「覺兮較兮，吾大命假兮！去不善而就善，何樂兮！」伊尹入告於王曰：「大命之去，有日矣。」王憫然歎，啞然笑，曰：「天之有日，猶吾之有民也。日亡，吾亦亡矣。」鄭康成本此注《湯誓》云：「桀見民欲叛，乃自比於日，曰：『是日何嘗喪乎？日若喪亡，我與汝亦皆喪亡。』引不亡之徵以脅恐下民也。」孟子引此文而申之云「民欲與之皆亡」，則伏、鄭之解乖於孟子矣。江氏聲《尚書古文集注音疏》云：「桀自比於日，民即假日以諭桀，言『是日何時喪

乎？我將與汝皆亡」，甚欲桀之亡也。予者，民自予也。及，與也。汝，汝日也。假日以諭桀，實則汝，桀也。」謹按：趙氏以此爲湯諭民之言，以「予及汝偕亡」爲「我及汝俱往亡之」，則我爲湯自我，汝謂民。乃《書》文於此下云「夏德若茲，今朕必往」，語爲重沓矣。孟子引《詩》稱文王之德，全在「而民勸樂之」，引《書》言桀之失德，全在「民欲與之皆亡」。若作湯諭民往亡桀之辭，無以見桀之失德矣。趙氏之旨，既殊孟子，亦違伏鄭，未知所本。其訓「時」爲「是」，《爾雅·釋詁》文。「日」爲「乙卯日」者，《禮記·檀弓》杜黃飲師曠曰「子卯不樂」，注云：「紂以甲子死，桀以乙卯亡。」《左傳》昭公十八年春王二月乙卯，「周毛得殺毛伯過而代之，甚宏曰：『毛得必亡，是昆吾稔之日也。』」杜預注云：「以乙卯日與桀同誅。」是桀以乙卯日亡也。「害，大」者，《音義》云：「害，如字。張音曷。」如字則讀傷害之害，傷害字無訓大之義。蓋曷與盍通，《說文》皿部云：「盍，覆也。」《爾雅·釋詁》云：「曷，盍也。」趙氏讀書爲曷，而通其義於覆。覆何以有大義？覆義與奄同，《說文》大部云：「奄，覆也，大有餘也。」《詩·皇矣》「奄有四方」，傳云：「奄，大也。」是奄、覆有大義也。覆亦通於曷，《說文》巾部云：「幪，覆也。」《爾雅·釋詁》云：「幪，大也。」是幪、覆有大義也。阮氏元《校勘記》

云：「宋本、孔本『日乙卯日』上『日』作『時』，非，當作『是日，乙卯日』也。」民欲與之皆亡，雖有臺池鳥獸，豈能獨樂哉？」**注**孟子說《詩》、《書》之義以感喻王。言民皆欲與湯共亡，桀雖有臺池禽獸，何能復獨樂之哉？復申明上言「不賢者雖有此不樂」也。**疏**注「何能復獨樂之哉」○正義曰：始侈而獨樂，既民欲與之皆亡，則不能獨樂矣。《章指》言「不能保守其所樂」，故云「何能復獨樂哉」。閔、監、毛三本無「復」字，非也。

章指：言聖王之德，與民共樂，恩及鳥獸，則忻戴其上，太平化興。無道之君，衆怨神怒，則國滅祀絕，不得保守其所樂也。**疏**「恩及」至「化興」○正義曰：「恩及鳥獸」即《章

句》言「德及鳥獸魚鼈」也。《白虎通·封禪》篇云「王者德至鳥獸」是也。「忻戴」者，忻與欣同。《國語·周語》云：「祭公謀父諫穆王曰：『商王帝辛大惡於民，庶民弗忍，欣戴武王，以致戎於商牧。是先王非務武也，勤恤民隱而除其害也。』」韋昭注云：「戴，奉也。」《晉語》：「史蘇朝告大夫曰：『昔者之伐也，起百姓以爲百姓也，是以民

能欣之。」韋昭注云：「欣，欣戴也。」又：郭偃曰：「夫人美於中，必播於外而越於民，民實戴之。」韋昭注云：「戴，欣戴也。」《音義》云：「大平，丁音泰。」○「衆怨神怒則國滅祀絕」○正義曰：《國語·周語》：「內史過曰：『國之將亡，其君貪冒辟邪，淫佚荒怠，麇穢暴虐，其政腥臊，馨香不登，其刑矯誣，百姓攜貳。明神弗蠲，而民有遠志。民神怨恫，無所依懷，故神亦往焉，觀其苛慝而降之禍。昔夏之興也，融降於崇山，其亡也，回祿信於聆隧。』」《湯誓》言衆怨，趙氏兼言神怒者，以文王「靈臺」、「靈沼」所以稱「靈」，是爲神所佑。衆樂則神佑，衆怨則神怒矣。

梁惠王曰：「寡人之於國也，盡心焉耳矣。」**注**王侯自稱「孤」、「寡」。言寡人於治國之政，

盡心欲利百姓。焉耳者，懇至之辭。

疏注「王侯自稱

孤寡」○正義曰：《禮記·曲禮下》云：「庶方小侯，人天子之國曰『某人』，於外曰『子』，自稱曰『孤』。」又云：「諸侯與

①「朝」，原誤作「明」，今從沈校據《國語》改。

民言，自稱曰「寡人」。注云：「謙也。於臣亦然。」《呂氏春秋·君守》篇云：「君名孤寡而不可障壅。」高誘注云：「孤寡，人君之謙稱也。」○注「言寡」至「百姓」○正義曰：「下言移民移粟，皆是利百姓之事，故知「盡心」指「欲利百姓」。○注「焉耳者懇至之辭」○正義曰：「焉耳」當作「焉爾」。《禮記·三年問》云：「然則何以三年也？」曰：「加隆焉爾也。」○隱公二年《公羊傳》云：「託始焉爾。」何休注云：「焉爾猶於是也。」然則此言「盡心焉爾」者猶云「盡心於是」矣。河內凶則移其民於河東，移其粟於河內，河東凶亦然。注言凶年以此救民也。魏舊在河東，後為強國，兼得河內也。疏「河內」至「亦然」○正義曰：「凶謂荒年。移民之壯者就食於河東，移河東之粟以賑河內之老稚也。亦然，則移河東之壯者於河內，而移河內之粟於河東也。」○注「魏舊」至「內也」○正義曰：《漢書·地理志》：「河東郡安邑，魏絳自魏徙此，至惠王徙大梁也。」是魏舊在河東。又云：「河內本殷之舊都，周既滅殷，分其畿內為三國，《詩·風》邶、庸、衛國是也。周公誅之，盡以其地封弟康叔。至十六世懿公亡道，為狄所滅。齊桓公帥諸侯伐狄而更封衛於河南曹楚邱，而河內殷墟更屬於晉。」魏分晉，則河內為魏得，故云：「後為強國，兼得河內。」閻氏若璩《四書釋

地又續》云：「梁河東，今之安邑等縣，梁亦有河西，《六國表》：「魏人河西地於秦」是也，梁河內，今之河內、濟源等縣，梁亦有河外，《蘇秦傳》：「大王之地，北有河外」，注云：「謂河南地。」是也。河東、西亦謂之河內、外。《左傳》：「僖十五年：「賂秦伯以河外列城五，內及解梁城。」《魏世家》：「無忌曰：「所亡於秦者，河外、河內。」是也。至河內、外，則梁之河北、河南地。蘇代曰：「秦正告魏，我陸攻則擊河內，水攻則滅大梁。」是也。然則梁之地，自河西逶迤而至河南，幾將二千里。蘇秦曰：「魏地方千里。」蓋從長而橫不足，絕長補短算耳。」察鄰國之政，無如寡人之用心者。注言鄰國之君用心憂民無如己也。疏注「用心憂民」○正義曰：「用心」即「盡心」，「憂民」即「欲利百姓」。鄰國之民不加少，寡人之民不加多，何也？注王自怪為政有此惠而民人不增多於鄰國者，何也？疏注「王自」至「何也」○正義曰：「加多是增多，則加少是增少。鄰國之民歸附於我，則鄰之民少而益增其少，我之民多而益增其多矣。孟子對曰：「王好戰，請以戰喻。」注因王好戰，故以戰事喻解王意。疏注「喻解王意」○正義曰：《廣雅·釋言》云：「喻，曉也。」《漢書》：「翼奉上封事云：「何聞而不諭？」顏師古云：「諭謂曉解之。」論與喻

通。填然鼓之，兵刃既接，棄甲曳兵而走，或百步而後止，或五十步而後止，以五十步笑百步，則何如？」**注**填，鼓音也。兵以鼓進，以金退。孟子問王曰：「今有戰者，兵刃已交，其負者棄甲曳兵而走五十步而止，足以笑百步止者不？」**疏**

注「填鼓」至「金退」○正義曰：《說文》土部云：「填，塞也。」《荀子·非十二子》云「填填然」，楊倞注云：「填填然，滿足之貌。」聲之滿足爲填填，猶貌之滿足爲填填。僖公十六年《公羊傳》云：「賁石記聞，聞其填然。」填然亦填然也。《楚辭·九歌》云：「雷填填兮雨冥冥。」鼓聲之滿盛猶雷聲也。云「兵以鼓進，以金退」者，《荀子·議兵》篇云：「聞鼓聲而進，聞金聲而退。」哀公十一年《左傳》云：「吾聞鼓而已，不聞金矣。」杜預注云：「鼓以進軍，金以退軍。」亦本《荀子》也。此兵刃交接之時，鼓聲督戰，故填填充塞而盛也。李文仲《字鑑》云：「鼓，《說文》從支，從支，從之支。《五經文字》云：「作鼓，非。」鼓，《說文》：「擊鼓也。」《孟子》「填然鼓之」，從支從豆。支音撲。」○**注**「今有」至「者不」○正義曰：既即已也，接即交也。趙氏以「已交」解「既接」。曳，拖也。棄甲拖兵，是奔敗也，故云「其負者」。閔、監、毛三本作「足以笑百步者否」，《音義》出「者不」，是舊作「不」。不，否字通。

也。曰：「不可。直不百步耳，是亦走也。」**注**

王曰：「不足以相笑也。是人俱走，直爭不百步耳。」

疏注「不足」至「步耳」○正義曰：「不足以相笑」解「不可」，

「是人」解「是」字，指五十步而止之人。云「直爭不百步」者，

謂爭衡其輕重也。王氏引之《經傳釋詞》云：「直猶特也，但

也。直，特古同聲。《史記·叔孫通傳》云「吾直戲耳」，《漢

書》「直作特」。曰：「王如知此，則無望民之多

於鄰國也。」**注**孟子曰：王如知此不足以相笑，王

之政猶此也。王雖有移民轉穀之善政，其好戰殘民

與鄰國同，而猶望民之多，何異於以五十步笑百步

者乎？**疏**注「孟子曰」○正義曰：趙氏凡於經文但稱

「曰」字，必實指何人曰，如前云「王曰」，此云「孟子曰」。推

之稱「樂正子曰」、「丑曰」、「薛君曰」、「大夫曰」、「賈曰」、「相

曰」、「周霄曰」、「彭更曰」、「不勝曰」、「匡章曰」、「髡曰」、「克

曰」、「萬章曰」、「告子曰」、「公都子曰」、「桎曰」、「白圭曰」、

「高子曰」皆然。惟云「某某以爲」、「某某以」者，原其意，

與云「某某曰」者爲異。又有云「某某言」、「某某問」，亦猶

「某某曰」也。○**注**「王雖」至「者乎」○正義曰：閔、監、毛三

本「穀」作「粟」，無「以」字。

「不違農時，穀不可勝食也」，**注**從此以下，

爲王陳王道也。使民得三時務農，不違奪其要時，則五穀饒穰不可勝食。

疏注「爲王陳王道也」○正義

曰：胡氏煦《篝燈約旨》云：「春秋時五霸迭興，臣強君弱，漸有驅制同儕，決裂臣道，渺視周君之意。是君權將替而臣道已亢，故孔子作《春秋》，寓意於尊周，所以維持臣道也。孟子時七國雄據其地，强悍自用，君道亦已不振，而草菅人命，各圖恢擴，故孟子遊齊、梁，說以王道，所以維持君道而已。與孔子非有異也。」○注「使民得三時務農」○正義曰：

《荀子·王制》篇云：「以春耕、夏耘、秋收、冬藏，四者不失時。」趙氏云「三時」者，《春秋》莊公三十一年「秋，築臺于秦」，《穀梁傳》云：「不正罷民三時。」桓公六年《左傳》云：

「謂其三時不害而民和年豐也。」杜預注云：「三時，春、夏、

秋。」數罟不入洿池，魚鼈不可勝食也；

注數

罟，密網也。密細之網所以捕小魚鼈者也，故禁之不得用。魚不滿尺不得食。

疏注「數罟」至「得用」○

正義曰：《毛詩·豳風》「九罟之魚」，傳云：「九罟，緩罟，小魚之網也。」《釋文》云：「緩又作總。」《小雅》「魚麗于罟」，毛傳云：「庶人不數罟，罟必四寸然後入澤梁。」《釋文》云：

「數，七欲反，又所角反。陳氏云：『數，細也。』孔氏正義

云：「庶人不總罟，謂罟目不得總之使小，言使小魚不得過也。集本「總」作「緩」，依《爾雅》，定本作「數」，義俱通也。」

按：《詩·召南》「素絲五總」，毛傳云：「總，數也。」《陳風》「越以輿邁」，毛傳云：「輿，數也。」《商頌》「輿假無言」，毛傳云：「輿，總也。」輿、緩同聲，緩、總、數三字同。趨數即迫促。文公十六年《左傳》云「無日不數於六卿之門」，杜預注云：「數，不疏。」不疏是密也。《說文》糸部云：「總，聚束也。」聚束即促速，促束即趨數也。倪氏思寬《二初齋讀書記》云：「《周禮》言「羅襦」猶《孟子》言「數罟」。蜡則作羅襦，明非蜡則不用羅襦矣。《周禮》取禽，《孟子》取魚，其實是一例。」韓非子·說林云：「君聞大魚乎？網不能止，繳不能絀也。」是繳所以取小魚。《鹽鐵論·散不足》篇：賢良曰：「鳥獸魚鼈不中殺不食，故繳網不入於澤。」《說文》糸部云：「繫，生絲縷也。」蓋以生絲縷作網則其目小，繳網即數罟也，今俗猶以細密者爲「絲網」是也。○注「魚不滿尺不得食」○正義曰：《呂氏春秋·具備》篇云：「宓子賤治亶父三年，巫馬旗往觀化。見夜漁者得則舍之，巫馬旗問焉，對曰：「宓子不欲人之取小魚也，所舍者小魚也。」高誘注云：「古者魚不尺不升於俎。宓子體聖人之化爲盡類也，故不欲人取小魚。」《淮南子·主術訓》云：「魚不長尺不得取，

歲不期年不得食。」斧斤以時入山林，材木不可勝用也。**注**時，謂草木零落之時。使林木茂暢，故有餘。

疏注「時謂」至「有餘」○正義曰：《禮記·王制》云：

「草木零落然後入山林。」《毛詩·小雅》「魚麗于罟」，傳云：

「太平而後，微物衆多，取之有時，用之有道，則物莫不多矣。」

古者草木不折不操斧斤，不入山林。」翟氏灝《考異》云：

《鹽鐵論·通有》章引《孟子》曰：「不違農時，穀不可勝食，蠶麻以時，布帛不可勝衣也；斧斤以時入，材木不可勝用；佃魚以時，魚肉不可勝食。」《荀子·王制》篇云：「春耕、夏耘、秋收、冬藏，四者不失時，故五穀不絕而百姓有餘食也；網罟、毒藥不入澤，洿池淵沼，謹其時禁，故魚鼈優多而百姓有餘用也；斬伐養長，不失其時，故山林不童而百姓有餘材也。」《逸周書·大聚解》云：「禹之禁：春三月，山林不登斧斤以成草木之長，夏三月，川澤不入網罟以成魚鼈之長，且以并農力，執成男女之功。夫然則有生而不失其宜。」孟、荀之言並本如此。」穀與魚鼈不可勝食，材木不可勝用，是使民養生喪死無憾也；**注**憾，

恨也。民所用者足，故無恨。**疏**注「憾恨也」○正義

曰：《論語》「敝之而無憾」孔氏注：《淮南子·本經訓》高誘

注皆如此訓。養生喪死無憾，王道之始也。**注**

王道先得民心，民心無恨，故言「王道之始」。

「五畝之宅樹之以桑，五十者可以衣帛

矣；**注**廬井、邑居各二畝半以爲宅，冬人保城二畝

半，故爲五畝也。樹桑牆下。古者年五十乃衣帛

矣。**疏**注「廬井」至「畝也」○正義曰：《漢書·食貨志》

云：「六尺爲步，步百爲畝，畝百爲夫，夫三爲屋，屋三爲井。

井方一里，是爲九夫。八家共之，各受私田百畝，公田十畝，

是爲八百八十畝，餘二十畝以爲廬舍。春令民畢出在墜，冬

則畢入於邑。」趙氏所本也。毛氏奇齡《四書賸言補》云：

「廬井、邑居各二畝半」，則已五畝，又云「冬人保城二畝

半」，何解？《漢書·食貨志》云「在野曰廬」，則「廬井」者井

間之廬也；又云「在邑曰里」，則「邑居」者里邑之居也。《爾

雅》：「里，邑也。」鄭康成稱「里居」與趙稱「邑居」並同。蓋

廬井二畝半在公田中，一名廬舍。何休云：「一夫受田百

畝，又受公田十畝，廬舍二畝半。」謂一夫受田一百十畝，又

分受公田之二十畝，各得二畝半作廬居也，此易曉也，至在

邑之二畝半以國城當之，則大謬不然。《管子·內政》云：

「四民勿使雜處：處工就官府，處商就市井，處農就田野。」

而韋昭謂「國都城郭之域惟士工商而已，農不與焉」，則二畝半在邑只在井邑，與國邑無涉。蓋古王量地制邑，其在國邑外，如公邑、家邑、邱邑、都邑，類凡所屬井地皆可置宅，然且諸井邑中亦惟無城者可處農民，若有城如費邑、邱邑所稱都邑者則農不得入。管子與韋氏之言稍可據。然而趙邠卿乃有「冬入保城」之說，或係衍文，或有脫簡，且或原有師承。如《周禮》「夫一廛」鄭康成所謂「城邑之居」者，則或諸邑有城者亦置里居，事未可知。若在國城，則《周禮·載師氏》明有「國宅無征，園廛二十而一」之文，鄭司農注云：「國宅，國城中宅也。」而鄭康成即云：「國宅者，凡官所有之宮室與吏所治者，又名國廛。」與園宅、園廛農民所居者正相分別，安可以農民園廛溷當之官吏之國宅乎？則此二畝半當云「在井邑」，不問有城與無城並得人保。此舉近地井里而言。如四井爲邑，則必邑中有里居可爲保守之地，故其居名「里居」，又名「邑居」。

倪氏思寬《二初齋讀書記》云：「《晉語》：尹鐸請於趙簡子曰：『以爲繭絲乎，抑爲保郭乎？』韋昭注：『小城曰保。』引《禮記》遇入保者以爲證。然則趙注當亦指井邑中小城言之。若既無城，何云「入保」？毛氏說未免於率。」周氏柄中《辨正》云：「季彭山《讀禮疑圖》言農民所宅必是平原可居之地，別以五畝爲一處，不占公田，取

於便農功適，饋餉去田亦不宜遠。其所聚居，或止八家，或倍八家以上，各隨便宜，聚爲一邑，置堡以相守望。故舉成數言，則有十室之邑、千室之邑，非必都邑然後爲邑，而都邑亦豈可寓農民哉？農民之宅，鄉里也，即制里以導其妻子養老者也，國中之廛，市廛也，但爲士旅寄居之所，工商懋遷之區而已。」段氏玉裁《說文解字注》云：「《說文》：『廬，寄也。秋冬去，春夏居。』廛，二畝半也，一家之居。《大雅》「于時廬旅」，毛傳云：「廬，寄也。」《小雅》「中田有廬」，箋云：「中田，田中也。農人作廬焉以便其田事。」《春秋》宣十五年《公羊傳》注云：「一夫受田百畝，公田十畝，廬舍二畝半，凡爲田一頃十二畝半。八家而九頃，共爲一井。在田曰廬，在邑曰里。春夏出田，秋冬入保城郭。」按，許「廬」義與下「廛」義互相足。在野曰廬，在邑曰廛，皆二畝半也，趙注尤明。里即廛也。《詩·伐檀》毛傳云：「一夫之居曰廛。」《遂人》「夫一廛」，先鄭云：「廛，居也。」後鄭云：「廛，城邑之居。」《載師》「以廛里任國中之地」，後鄭云：「廛里者，若今云邑居。廛，民居之區域也；里，居也。」毛、鄭皆未明言二畝半，要其意同也。許於「廬」不曰「二畝半」，於「廛」曰「二畝半」，以錯見互足。○注「古者年五十乃衣帛」○正義曰：任氏大椿《深衣釋例》云：「《大司徒》「六曰同衣服」

注：「民雖有富者，衣服不得獨異。」按《雜記》注：「麻衣，白布深衣。」《深衣》注：「庶人吉服深衣。」《管子·立政》篇云：「刑餘戮民，不敢服絲。」然則非刑餘戮民可以服絲矣。《春秋繁露·服制》篇：「散民不敢服采，刑餘戮民不敢服絲。」然則散民不敢服采耳，絲得服也。又《繁露·度制》篇：「古者庶人衣縵。」縵，無文帛也。《尚書大傳》：「命民得乘飾車駟馬，衣文駟錦。未有命者不得衣，不得乘。庶人墨車單馬，衣布帛。」然則命民亦得衣文，不命之民亦得衣帛，與鄭注「庶人白布深衣」異說。今考《士昏禮》注：「士而乘墨車，攝盛。」蓋士庶人往往有攝盛之事。鄭注深衣為庶人之服，言其常服皆布也；若行盛禮，或當攝盛，則衣絲也。刑餘、戮民並不得攝盛矣。《周禮·間師》：「凡庶民不蠶者不帛」，疏引《孟子》曰：「五十可以衣帛。」以不蠶，故身不得衣帛。然則不蠶雖五十不得衣帛，蠶而未五十亦不得衣帛。則庶人布深衣，其常也。《鹽鐵論》：「古者庶人耄老而後衣絲，其餘則麻枲而已，故命曰布衣。」雞豚狗彘之畜無失其時，七十者可以食肉矣；**注**言孕字不失時也。七十不食肉不飽。**疏**注「七十不食肉不飽」○正義曰：《禮記·王制》云：「五十始衰，六十非肉不飽，七十非

帛不煖。」此云「七十不食肉不飽」者，六十宿肉已非肉不飽矣，至七十益可知；五十可以衣帛，或不衣帛尚可煖，至七十則非帛不煖矣。《詩·無羊》正義引《孟子》曰「七十者可以食雞豚」，蓋撮《孟子》之文。如《遂人》注引《孟子》：「五畝之宅，樹之以桑麻。」古人引經不拘，往往增損，非《孟子》經文有作此本也。百畝之田勿奪其時，數口之家可以無飢矣；**注**一夫一婦耕耨百畝。百畝之田不可以徭役奪其時功，則家給人足。農夫上中下所食多少各有差，故總言「數口之家」也。**疏**「可以無飢矣」○正義曰：監本、毛本作「無饑」。阮氏元《校勘記》云：「飢饑之字當作飢，饑乃饑饉字。此經當以「飢」為正。」按：下文「黎民不飢不寒」，毛本正作「飢」。謹庠序之教，申之以孝悌之義，頒白者不負戴於道路矣。**注**庠序者，教化之宮也。殷曰序，周曰庠。謹脩教化，申重孝悌之義。頒者，班也，頭半白班班者也。壯者代老，心各安之，故曰「頒白者不負戴於道路」也。**疏**注「庠序」至「之義」○正義曰：《爾雅·釋宮》云：「宮謂之室，室謂之宮。」劉熙《釋名·釋宮室》云：「宮，穹

也。屋見於垣上，穹隆然也。」凡有屋皆通稱宮，故云「教化之宮」。教化不脩則弛廢。謹，嚴也。振起其廢弛而謹嚴之，故云「謹脩教化」。「申，重」，《爾雅·釋詁》文。○注「頒者」至「路也」○正義曰：阮氏元《校勘記》云：「『頭半白班班者也』，閩、監、毛三本同。宋本『白』下有『曰』字。岳本、廖本、韓本『者』上並有『然』字。孔本作『頭半白曰頒，班班然者也』。以『班』爲『班』，古字假借。毛本、孔本、韓本『班』作『斑』，非也。」段氏玉裁《說文解字注》云：「《說文》：『單，須髮半白也。』此《孟子》『頒白』之正字也。趙注云：『頒者，斑也，頭半白斑斑者也。』『卑』與『斑』雙聲，是以《漢·地理志》『卑水縣』孟康音『斑』。蓋古『單』讀如『斑』，故亦假大頭之『頒』。《藉田賦》『士女頒斌』，李注：『頒斌，相雜之貌也。』其引申之義也。《禮記·王制》云：『道路輕任并，重任分，斑白不提挈。』注云：『皆謂以與少者。雜色曰斑。』《祭義》云：『斑白者不以其任行乎道路。』注云：『斑白者，髮雜色也。任，所擔持也。不以任，少者代之。』負謂負於背，戴謂戴於首。《漢書·東方朔傳》顏師古注云：『簪戴，戴器也，以盆盛物戴於頭者則以簪數薦之。』此戴之謂也。提挈以手。頒白之老一身俱宜安佚，可互見矣。毛本作：『故頒白者不負戴也。』周氏廣業《古注考》云：『宋本作『故斑白

者』。七十者衣帛食肉，黎民不飢不寒，然而不王者，未之有也。」**注**言百姓老稚溫飽，禮義脩行，積之可以致王也。孟子欲以風王何不行此，可以王天下，有率土之民，何但望民多於鄰國？**疏**

「然而不王者」○正義曰：王氏引之《經傳釋詞》云：「然，詞之轉也。然而者，亦詞之轉也。《孟子·公孫丑》篇：『夫二子之勇未知其孰賢，然而孟施舍守約也。』今人用『然而』二字皆與此同義。然而者，詞之承上而轉者也，猶言『如是而』也。《梁惠王》篇『然而不王者，未之有也』，謂『如是而』也。今人用『然而』二字則與此異義矣。」○注「有率土之民」○正義曰：《詩·小雅·北山》：「率土之濱，莫非王臣。」天下之民皆歸附於梁，何止鄰國？

「狗彘食人食而不知檢，塗有餓莩而不知發，**注**言人君但養犬彘使食人食，而不知以法度檢斂也。塗，道也。餓死者曰莩。《詩》曰：『莩有梅。』莩，零落也。道路之傍有餓死者，不知發倉廩以用振救之也。」**疏**注「言人」至「斂也」○正義曰：《漢

書·食貨志》贊云：「《孟子》亦非狗彘食人之食不知斂，野

有餓莩而弗知發。」應劭云：「養狗彘者使食人之食，而不知以法度斂之也。」顏師古云：「《孟子》，孟軻之書。言歲豐孰，菽粟饒多，狗彘食人之食，此時可斂之也。」趙氏之義同於應氏。師古不從者，《食貨志》云：「李悝爲魏文侯作盡地力之教，云糴甚貴傷民，甚賤傷農。民傷則離散，農傷則國貧。善平糴者必謹觀歲有上中下孰，上孰其收自四餘四百石，中孰自三餘三百石，下孰自倍餘百石。小飢則收百石，中飢七十石，大飢三十石。故大孰則上糴三而舍一，^①中孰則糴二，下孰則糴一，使民適足，賈平則止。小飢則發小孰之所斂，中飢則發中孰之所斂，大飢則發大孰之所斂而糴之。故雖遇飢饉水旱，糴不貴而民不散，取有餘以補不足也。」此「斂」、「發」正用《孟子》，則斂指豐年，發指凶歲。《管子·國蓄》篇云：「歲適美則市糴無與而狗彘食人食，歲適凶則市糴釜十鎰而道有餓民。故人君斂之以輕，散之以重。」《食貨志》贊既引《孟子》，即承云管氏之輕重、李悝之平糴，固以《孟子》與管、李之義同也。羅大經《鶴林玉露》云：「《孟子》『狗彘食人食而不知檢』，『檢』字一本作『斂』，蓋狗彘食人食，粒米狼戾之歲也，法當斂之；塗有餓莩，凶歲也，法當發之。」此皆用《管子》以明《孟子》。趙氏雖以「斂」釋「檢」而義同於應，則與管、班不合。閻氏若璩《釋地二續》

云：「古雖豐穰，未有以人食予狗彘者。『狗彘食人食』即下章『庖有肥肉』意，謂厚斂於民以養禽獸者耳，不必泥班《志》也。」錢氏大昕《養新錄》則從《漢書》之說云：「發斂之法，豐歲則斂之於官，凶歲則糴之於民，《記》所謂『雖遇凶旱水溢，民無菜色』者，用此道也。惠王不修發斂之制，豐歲任其狼戾，一遇凶歉，食廩空虛，不得已爲移民移粟之計，自以爲盡心，惑矣。」閻、監、毛三本「犬彘」作「狗彘」。《陸宣公奏議》云「犬彘厭人之食而不知檢」，蓋用注以參經文。○注「塗道」至「之也」○正義曰：《論語·陽貨》篇「遇諸塗」，《集解》孔氏云：「塗，道也。」高誘注《呂氏春秋》、王逸注《楚辭》皆以塗爲道。《漢書·食貨志》贊引《孟子》「莩」作「莩」，注引鄭氏云：「莩音『藁有梅』之『藁』。莩，零落也。人有餓死零落者，不知發倉廩貸之也。」此注頗與趙同。顏師古云：「莩音頻小反。諸書或作『殍』字，音義亦同。」《說文》「受部」云：「受，物落上下相付也。讀若《詩》『標有梅』。」《毛詩》傳云：「標，落也。」《爾雅·釋詁》云：「落，死也。」然則「餓莩」猶云「餓落」。《楚辭·離騷》「惟草木之零落兮」，王逸注云：「零，落，皆墜也。」人生則縱立，死則橫墜。方其行於道，尚

①「則」，原誤作「以」，今據經解本改。

能縱立，以餓而橫墜於地，故云「餓莩」。趙既以「餓死者」釋「莩」字，又以「莩」爲零落之名，因連「餓」字乃爲餓死，故引《詩》以明莩字本義也。段氏玉裁《說文解字注》云：「《毛詩》『標』字正『莩』之假借。《孟子》作『莩』者，莩之字誤。丁公著云：『《莩有梅》，《韓詩》也。』」阮氏元《校勘記》云：

「以用賑救之也」，廖本、《考文》古本、足利本同。宋本、孔本、韓本「賑」作「振」，閩、監、毛三本「用」作「周」。按「振」即古之「賑」字，作「賑」者非。「人死則曰『非我也，歲也』，是何異於刺人而殺之，曰『非我也，兵也』？」**注**人死謂餓疫死者也。王政使然，而曰非

我殺之，歲殺之也，此何以異於用兵殺人，而曰非我也，兵自殺之也？**疏**注「用兵殺人」○正義曰：顧氏炎

武《日知錄》云：「古之言兵非今日之兵，謂五兵也。故曰『天生五材，誰能去兵』。《世本》：『蚩尤以金作兵：一弓，二殳，三矛，四戈，五戟。』《周禮·司右》『五兵』，注引《司馬法》云：『弓矢圍，殳矛守，戈戟助。』是也。『詰爾戎兵』，詰此兵也；『踊躍用兵』，用此兵也；『無以鑄兵』，鑄此兵也。秦漢以下始謂執兵之人爲兵，五經無此語也。以執兵之人爲兵，猶之以被甲之人爲甲。」王無罪歲，斯天下之

民至焉。**注**戒王無歸罪於歲，責己而改行，則天下之民皆可致也。**疏**注「皆可致也」○正義曰：致猶至也，故以致明至。

章指：言王化之本，在於使民。養生送死之用備足，然後導之以禮義，責己矜窮，則斯民集矣。**疏**「導之」至「矜窮」○正義曰：《國語·晉語》云：「禮賓矜窮，禮之宗也。」

梁惠王曰：「寡人願安承教。」**注**願安意承受孟子之教令。孟子對曰：「殺人以梃與刃，有以異乎？」**注**梃，杖也。**疏**注「梃杖也」○正

義曰：《呂氏春秋·簡選》篇云：「鋤耰白梃，可以勝人之長銚利兵。」高誘注云：「梃，杖也。」阮氏元《校勘記》云：「閩本經、注並作『挺』。按，《音義》云從木，則閩本誤也。」曰：「無以異也。」**注**王曰：梃刃殺人無以異也。「以刃與政，有以異乎？」**注**孟子欲以政喻王。曰：「無以異也。」**注**王復曰：政殺人無以異也。

曰：「庖有肥肉，廐有肥馬，民有飢色，野有餓莩。此率獸而食人也。」**注**孟子言人君如此爲率禽獸以食人也。獸相食且人惡之，爲民父母行政，不免於率獸而食人，惡在，其爲民父母也？**注**虎狼食禽獸，人猶尚惡視之，牧民爲政乃率禽獸食人，安在，其爲民父母之道也？**疏**「庖有」至「母也」○正義曰：毛氏奇齡《四書臆言》云：「《漢·王吉傳》：『今民大饑而死，死又不葬，爲犬豬所食，而廐馬食粟，苦其太肥。王者受命於天，爲民父母，固當若是乎？』此借《孟子》語疏而爲言。」乃吉言犬豬所食，則是實有獸食人。揆趙氏義，蓋以人君以人之食養禽獸，故禽獸肥，不以食養百姓，故民之生者有飢色，其死者莛於野，不異率獸食人，非真使禽獸食人也。《鹽鐵論·園池》章云：「厨有腐肉，國有飢民，廐有肥馬，路有餓人。」《古文苑》揚雄《太僕箴》云：「孟子蓋惡夫廐有肥馬而野有餓殍。」皆同趙義。仲尼曰：「始作俑者，其無後乎！」爲其象人而用之也。如之何其使斯民飢而死也？」**注**俑，偶人也，用之送死。仲尼重人類，謂秦穆公時以

三良殉葬本由有作俑者也。夫惡其始造，故曰：此人其無後嗣乎？如之何其使此民飢而死邪？孟子陳此以教王愛民。**疏**注「俑偶」至「送死」○正義曰：

《說文》人部云：「偶，桐人也。」《淮南子·繆稱訓》云：「魯以偶人而孔子歎。」高誘注云：「偶人，相人也。」《說文》「桐人」疑是「相人」之誤。相人即象人也。《禮記·檀弓》云：「塗車芻靈，自古有之，明器之道也。孔子謂爲芻靈者善，謂爲俑者不仁，不殆於用人乎哉？」注云：「芻靈，束茅爲人馬。謂之靈者，神之類。俑，偶人也。有面目機發，似於生人。」《周禮·春官·冢人》「及葬，言鸞車象人」，注云：「鄭司農云：『象人，謂以芻爲人。』」玄謂孔子謂爲芻靈者善，謂爲俑者不仁，非作象人者，不殆於用生乎？後鄭不用先鄭，以俑與芻人異。蓋以芻爲人，但形似而不能轉動，俑則能轉動，象生人。以其象生人，故即名「象人」。「冢人」之「象人」即俑之名也，孟子言爲其象人，則所以名象人之故也。《說文》人部云：「俑，痛也。」足部云：「踊，跳也。」《廣韻》引《埤蒼》云：「俑，木人送葬，設關而能跳俑，故名之。」然則「俑」爲「踊」之假借，以其能跳踊，斯名爲「俑」，則爲其「象人」者，謂爲其象人之轉動跳踊也。《春秋》僖公十九年：

「己酉，邾婁人執鄫子，用之。」《公羊傳》云：「惡乎用之？用之社也。」《左傳》司馬子魚曰：「古者六畜不相爲用。小事不用大牲，而況敢用人乎？」此用生人，故《春秋》惡之。象人而用之送葬，雖非生人，其用之云者，猶執鄫子用之之用也。○注「謂秦」至「者也」○正義曰：《文子·微明》篇云：「魯以俑人葬而孔子歎，見其所始即知其所終。」終謂至於以生人爲殉也，故趙氏引三良殉死事。事見《詩·秦風·黃鳥》篇。文公六年《左傳》云：「秦伯任好卒，以子車氏之三子奄息、仲行、鍼虎爲殉。」是其事也。推孟子之意，蓋謂木偶但象人耳，用之，孔子尚歎其無後，況真是人而使之飢而死，其爲無後，更當何如？趙氏推孔子之意，以其始於作俑，終至用生人爲殉，此孔子歎「無後」之意，非孟子引以況使斯民飢死之意也。○注「夫惡」至「愛民」○正義曰：閩、監、毛三本無「夫」字，「邪」作「也」。阮氏元《校勘記》云：「《音義》出「夫惡」，山井鼎《考文》云：「古本」本由有作俑者也」下有「夫」字。」以「夫」字屬上讀，非也。《音義》出「死邪」。毛本作「愛其民也」。

章指：言王者爲政之道，生民爲首。以政殺人，人君之咎。猶以白刃，疾之甚也。

梁惠王曰：「晉國天下莫強焉，叟之所知也。」

注韓、魏、趙本晉六卿，當此時號「三晉」，故惠王言「晉國天下強」也。

疏注「韓魏」至「強也」○正

義曰：《史記·六國表》云：「六卿擅晉權，征伐會盟，威重於諸侯。終之，卒分晉。量秦之兵，不如三晉之強也。」《楚世家》云：「宣王六年，三晉益大，魏惠王尤強。」《戰國策·楚策》張子曰：「王無求於晉國乎？」《魏策》王鍾云：「此晉國之所以強也」，是當時稱魏爲「晉國」。及寡人之身，東敗於齊，長子死焉，西喪地於秦七百里，南辱於楚。寡人耻之，願比死者壹洒之，如之何則可？」

注王念有此三耻，求策謀於孟子。

疏「東

敗」至「死焉」○正義曰：《史記·魏世家》：「惠王十七年，圍趙邯鄲。十八年，拔邯鄲。趙請救於齊，齊使田忌、孫臏救趙，敗魏桂陵。二十八年，齊威王卒，中山君相魏。三十年，魏伐趙，趙告急齊，齊宣王用孫子計，救趙擊魏。魏遂大興師，使龐涓將而令太子申爲上將軍，與齊人戰，敗於馬陵。齊虜魏太子申，殺將軍涓，軍遂大破。」周氏柄中《辨正》云：「齊救趙敗魏者，桂陵之役，救韓敗魏者，馬陵之役。」《魏世

家俱以爲救趙，與《國策》異；而《孫臏傳》又以爲救韓，則自相矛盾矣。又《國策》「蘇代說齊閔王」篇曰：「昔魏王擁土千里，帶甲三十六萬，恃其強而拔邯鄲，西圍定陽，又從十二諸侯朝天子以西謀秦。秦王用衛鞅之謀，說魏王先行王服，然後圖齊、楚。魏王悅於衛鞅之言，故身廣公宮，制丹衣柱，建九旂，從七星之旗。此天子之位也，而魏王處之，於是齊、楚怒，諸侯奔齊。齊人伐魏，殺其太子，覆其十萬之軍。」此又與前《策》不同。戰國時紀載之異如此。「曹氏之升《四書撫餘錄》云：「梁惠王曰：『及寡人之身，東敗於齊，長子死焉。』此，經文也。然《魏世家》云：『魏伐趙，趙告急齊。』《田齊世家》云：『魏伐趙，趙與韓親，共擊魏。趙不利，韓請救於齊。』《孫子列傳》云：『魏與趙攻韓，韓告急於齊。』史載異辭，以經證之。《孟子》曰：『梁惠王以土地之故，糜爛其民而戰之，大敗，將復之。恐不能勝，故驅其所愛子弟以殉之。』按周顯王十五年，魏圍趙邯鄲。十六年，邯鄲降齊，齊伐魏，敗魏桂陵。惠王初立即與二家不和，後遂相仇靡已。曩者邯鄲垂拔，中北於齊，固無時不圖報復。至三十年，爲周顯王之二十八年，又令太子申爲上將軍以伐趙。惟其爲趙也，故曰「復」。惟其在桂陵之敗之後也，故曰「大敗將復之」。此《孟子》經文之明注也。然則《魏世家》魏伐趙之說

不爲無據。因趙與韓親，共擊魏不利，致韓有南梁之難而請救於齊，故又曰「齊起兵救韓、趙以擊魏」也。《列傳》謂魏與趙攻韓，誤矣。閻百詩《釋地》謂：「惠王九年己未，秦、魏戰於少梁，《六國表》秦云「虜其太子」，魏云「虜我太子」，此太子即名申後死於齊者。中相距二十二年，必虜後復歸魏爲太子，復令之將龐涓兵。」余以爲不然。《秦本紀》：「獻公二十三年，與魏、晉戰少梁，虜其將公孫痤。」《魏世家》：「九年，與秦戰少梁，虜我將公孫痤。」痤是魏相，即衛公孫鞅所事者，故明年痤卒而鞅乃奔秦。《表》誤爲太子耳。且即是太子，亦是痤不是申，《趙世家》所謂「秦獻公使庶長國伐魏少梁，虜其太子痤」是也。閻說誤。」○「西喪」至「百里」○正義曰：《魏世家》云：「三十一年，秦、趙、齊共伐我。秦將商君詐我將軍公子卬而襲奪其軍，破之。秦用商君，東地至河，而齊、趙數破我。安邑近秦，於是徙治大梁。」《商君列傳》云：「齊敗魏軍於馬陵，虜其太子，殺將軍龐涓。其明年，衛鞅說孝公，孝公使衛鞅將而伐魏，魏使公子卬將而擊之。軍既相距，鞅遺魏將公子卬書，與公子面相見盟，樂飲而罷兵。鞅伏甲士而襲虜公子卬，因攻其軍，盡破之，以歸秦。魏惠王兵數破於齊、秦，國內空，日以削，恐，乃使割河西之地獻於秦以和。而魏遂去安邑，徙都大梁。」閻氏若璩

《釋地》又續云：「班固曰：『魏界自高陵以東。』此距安邑，指東西言。張守節曰：『自華州北至同州，並魏河西之地。』此指南北言。其地四至固可按。又有上郡，襄王七年癸巳始入秦。守節曰：『今丹、鄜、延、綏等州，北至固陽，並其地。』又即惠文君十年『魏納上郡十五縣』者也。蓋至是而魏河西濱洛之地，築長城以界秦者，盡失之矣。自屬兩截事。」

○「南辱於楚」○正義曰：周氏柄中《辨正》云：「《史記·魏世家》及《楚世家》，惠王在位三十六年未嘗與楚構兵。故『南辱於楚』趙注闕其事。惟《戰國策》載魏圍趙邯鄲，楚使景舍救趙，取魏睢澁之間，乃惠王時事，『南辱』指此無疑。《史記》楚將昭陽攻魏在梁襄十二年，《魏世家》所稱『楚敗我襄陵』者，而在《楚世家》則云：『懷王六年，楚使柱國昭陽將兵而攻魏，破之於襄陵，得八邑。』此襄王時事而說者引之，亦據《竹書》惠王改元又十六年之說也。」○「願比死者壹洒之」○正義曰：《廣雅·釋詁》云：「比，代也。」洒，洗古通。《說文》水部云：「洒，滌也。」《音義》云：「洒之，丁音洗，謂洗雪其耻也。」死者，舊疏謂死不惜命者，蓋即「長子死」之死。太子申之死，西河之喪，睢澁之辱，三者俱宜洗雪。死重於喪辱，舉死者以互見耳。謂願代死者專壹洗雪之。或謂「比」讀「比方」之「比」，蓋將不顧其生，願效前之戰死者與

敵決戰，以雪其耻也。閩、監、毛三本「壹」作「一」。孟子對曰：「地方百里而可以王。」**注**言古聖人以百里之地以致王天下，謂文王也。**疏**注「謂文王也」○正義曰：「文王以百里」，《公孫丑上》篇文。王如施仁政於民，省刑罰，薄稅斂，深耕易耨，壯者以暇日修其孝弟忠信，人以事其父兄，出以事其長上，可使制梃以撻秦、楚之堅甲利兵矣。

注易耨，芸苗令簡易也。制，作也。王如行此政，可使國人作杖以捶敵國堅甲利兵，何患耻之白雪也？

疏注「易耨」至「易也」○正義曰：《爾雅·釋器》云：「斲副謂之定。」《廣雅·釋器》云：「定謂之耨。」《說文》木部云：「耨，薅器也。或作耨。」《呂氏春秋·任地》篇云：「耨，柄尺，此其度也。其耨六寸，所以間稼也。」高誘注云：「耨，所以芸苗也。刃廣六寸，所以入苗間也。」耨，耨、鐮字同。芸苗之器名耨，因而即稱芸苗爲耨。《盡心》篇「易其田疇」，**注**訓「易」爲「治」，本《詩》「禾易長畝」毛傳也。此耨爲芸苗，若訓易爲治，「治耨」於辭爲不達。且上云「深耕」謂耕之深，此云「易耨」則爲耨之易也。禾中有草雜之則煩擾矣，故芸之

使簡易。閻氏若璩《釋地三續》云：「即朱虛侯劉章爲高后言田立苗欲疏之意。」○注「制作」至「利兵」○正義曰：《楚辭·招魂》云：「晉制犀比。」王逸注云：「制，作也。」制，作古多連文，故以作釋制。然備乃弓矢，鍛乃戈矛，礪乃鋒刃，無敢不善，王者以弧矢威天下，豈容自損其兵？謂使民作梃，言近於迂。按劉熙《釋名·釋姿容》云：「掣，制也。制，賴之使順己也。」制，宜讀爲「掣」，謂可使提掣木梃以撻其堅甲利兵。若誠自恃施仁，造作此梃，即宋公不禽二毛之智矣。《廣雅》撻、捶皆訓擊，故以捶釋撻。《禮記·文王世子》云：「成王有過，則撻伯禽。」《說文》手部云：「捶，以杖擊也。」撻人用杖，其義一也。「省刑罰」以下八句，趙氏以「行此政」括之。未詳注，以其易明也。惟省刑罰、薄稅斂，使得深耕易耨所以得有暇日。《潛夫論·愛日》篇云：「國之所以爲國者，以有民也；民之所以爲民者，以有穀也；穀之所以豐殖者，以有人功也；功之所以能建者，以有日力也。治國之日舒以長，故其民間暇而力有餘；亂國之民促以短，故其民困務而力不足。《詩》云：『王事靡盬，不遑將父。』言在古間暇而得行孝，今迫促不得養也。」迫促不得養，則「尊其農時，使不得耕耨」之謂也。「富而後教」民有暇日以養其父母及其兄弟妻子，乃可脩其孝弟忠信也；民知孝弟忠信，

則人以事其父兄，出以事其君上矣。此所以可以以梃撻強也。彼奪其民時，使不得耕耨以養其父母，父母凍餓，兄弟妻子離散。彼陷溺其民，王往而征之，夫誰與王敵？**注**彼謂齊、秦、楚也。彼困其民，願王往征之也。彼失民心，民不爲用，夫誰與共禦王之師，爲王敵乎？**疏**注「彼謂齊秦楚也」○正義曰：惠王所問，舉齊、秦、楚三國，孟子對僅稱「秦、楚」，便文耳。其實制梃撻秦、楚，亦兼撻齊，故趙氏申明之。○注「爲王敵乎」○正義曰：閻、監、毛三本作「而爲王之敵乎」。故曰：仁者無敵。王請勿疑！**注**鄰國暴虐，已脩仁政，則無敵矣。王請行之，勿有疑也。章指：言以百里行仁，天下歸之；以政傷民，民樂其亡。以梃服強，仁與不仁也。

孫授易授詩校字

孟子正義卷二終

孟子正義卷三

江都縣鄉貢士焦循誤集

孟子見梁襄王。出，語人曰：「望之，不似人君，**注**襄，謚也，梁之嗣王也。望之，無儼然之威儀也。」**疏**注「襄謚」至「王也」○正義曰：《周書·謚法

解》云：「辟地有德曰襄，甲冑有勞曰襄。」是襄爲謚也。《史記·魏世家》《集解》：「荀勗曰：『和嶠云：『《紀年》起自黃帝，終於魏之今王。』今王者，魏惠成王子。』按，《太史公書》惠成王但言惠王，惠王子曰襄王，襄王子曰哀王。惠王三十二年卒，襄王立，十六年卒。并惠、襄王爲五十二年。今按古文：惠成王立三十六年改元稱一年，改元後十七年卒。《太史公書》爲誤分惠成之世以爲二王之年數也。《世本》：惠王生襄王而無哀王。然則今王者，魏襄王也。」《索隱》辨之云：「按，《系本》襄王生昭王，無哀王，蓋脫一代耳。而

《紀年》說惠成王三十六年又稱後元，一十七年卒。今此文分惠王之祧以爲二王之年，又有哀王凡二十三年，^①紀事甚明，蓋無足疑。而孔衍敘《魏語》亦有哀王。蓋《紀年》之作失哀王之代，故分襄王之年爲惠王後元，即以襄王之年包哀王之代耳。」近時顧氏炎武《日知錄》主古文之說，以「襄」、「哀」字相近，《史記》誤分爲二人。江氏永《羣經補義》申其說云：「魏瑩於周顯王三十五年丁亥與齊威王會於徐州以相王，是年爲惠王即位後三十七年，於是始稱王而改元稱一年。司馬溫公《通鑑考異》既從《紀年》書「魏惠王薨，子襄王立」於慎觀王二年壬寅，又載孟子一見而出語，是矣。乃於顯王三十三年乙酉書「鄒人孟軻見魏惠王」，豈孟子在魏十八年乎？誤矣。蓋惠王卑禮厚幣以招賢在後元之末年，而《史記》誤謂在惠王即位之三十五年也。此年尚未稱王，孟子何得稱之爲王？」依顧氏、江氏之說，《史記》襄王之年仍惠王之後元，則襄王五年予河西之地，六年秦取汾陰、皮氏、焦，七年盡人上郡於秦，秦降我蒲陽，皆在「七百里」中，而十二年楚敗我襄陵，則所云「辱於楚」也。然近所行之《竹書

① 「二」，原作「一」，今從沈校據《史記·魏世家》及《索隱》改。

紀年《固淺人僞托，即和嶠所引，亦魏晉間贗書，不足徵信。《西京雜記》記廣川王發古冢，有魏襄王冢、哀王冢，然則襄、哀二冢漢時尚存，顯然可考，故《世本》雖失紀哀王，而司馬公則核實言之。和嶠所引又何庸議？閻氏若璩《孟子生卒年月考》云：「《魏世家》云：『惠王三十一年辛巳徙都大梁，三十五年乙酉卑禮厚幣以招賢者，孟軻等至梁。』故《六國表》於三十五年特書『孟子來，問利國，對曰君不可言利』。三十六年丙戌惠王卒，子嗣立，是為襄王。孟子人而見王，出而告人有『不似人君』之語。蓋儲君初即位之辭。不然，如《通鑑》五十二年壬寅惠始卒而襄王立，孟子人見，豈孟子竟久淹於梁如是邪？不然，以襄王之庸，豈能以禮聘孟子而復至梁邪？不以禮聘孟子而孟子肯枉見邪？果受其禮聘至而初見時即譏議之邪？此《史記》所以可信也。或曰：《竹書紀年》彼既魏史，所書魏事，司馬公以為必得其真，故從焉。余曰：不然。《紀年》云：『惠成王九年四月甲寅徙都大梁。』不知是年秦孝公甫立，衛公孫鞅來相，魏公子卬未虜，地不割，秦不偪，魏何遽徙都以避之邪？即一徙都事如此，尚謂其生卒年月盡足信邪？此余所以信《史記》以信《孟子》也。閻、監、毛三本作『魏之嗣王』。○注『望之』至『儀也』○正義曰：《論語》云『望之儼然』，又云『儼然人望而

畏之』。就之而不見所畏焉。注就與之言，無人

君操秉之威。知其不足畏。疏注「就與」至「足畏」○

正義曰：望之既指威儀，則就之當指言論，故云「與之言」。

「秉」，閻、監、毛三本作「柄」。「柄」《說文》重文作「棟」，通於

秉。《儀禮·大射儀》有「柄」，《釋文》云：「劉本作『秉』。」

《文選·六代論》注云：「秉即柄字。」是也。《詩·定之方

中》毛傳云：「秉，操也。」《禮運》注云：「柄，所操以治事。」

《莊子·天道》篇司馬彪注云：「棟，威權也。」故趙氏云「操

柄之威」。卒然問曰：「天下惡乎定？」注卒暴

問事，不由其次也。問天下安所定？言誰能定之。

疏注「卒暴」至「次也」○正義曰：《漢書·成帝紀》云「興卒

暴之作」，注云：「卒，謂急也。」《師丹傳》云「卒暴無漸」，注

云：「卒，讀曰『猝』。」《說文》犬部云：「猝，犬從草暴出逐人

也。」古「卒」、「暴」二字連文，故趙氏以「卒暴」明「卒然」。

「不由其次」即無漸也。○注「問天」至「定之」○正義曰：惡

猶安也、何也，字亦作「烏」。高誘注《呂氏春秋·本生》篇

曰：「惡，安也。」昭三十一年《公羊傳》曰「惡有言人之國賢

若此者乎」，何注曰：「惡有猶何有。」又莊二十年《公羊傳》

曰「魯侯之美惡乎至」，注曰：「惡乎至猶何所至。」由《公羊

傳》注及《孟子》注推之，蓋「惡」本訓何，「惡乎」猶言「何所」。

吾對曰：「定于一。」**注**孟子謂仁政爲一也。**疏**

注「孟子」至「一也」○正義曰：《易·文言傳》云：「元者，善之長也。君子體仁，足以長人。」董子《繁露·重政》篇云：

「唯聖人能屬萬物于一而繫之元也。終不及本所從來而承之，不能遂其功，是以《春秋》變「一」謂之「元」。元即仁，仁即一，故趙氏以仁政爲一。孟子對滕文公亦云：「夫道，一而已。」趙氏《章指》：「言定天下者，一道而已。」謂孟子對梁

襄王之「定于一」，即對滕文公之「道一」也。趙氏之說正矣，然下云「能一之」，又云「民歸之」，則謂時無王者，不能統一，故天下爭亂而不能定，惟有王者布政施教於天下，天下皆遵奉之而後定。孔子作《春秋》，書「王正月」，《公羊傳》云：

「大一統也。」孟子當亦謂此。「孰能一之？」**注**言孰能一之者？對曰：「不嗜殺人者能一之。」**注**

嗜猶甘也。言今諸侯有不甘樂殺人者，則能一之。

疏注「嗜猶」至「殺人」○正義曰：《說文》口部云：「嗜，嗜欲，喜之也。」《呂氏春秋·誣徒》篇高誘注云：「嗜猶樂也。」

《淮南子·覽冥訓》高誘注云：「甘猶善也。」「嗜」與「嗜」同。《一切經音義》引《廣雅》云：「甘，樂也。」是嗜、甘、樂三字義

同。「孰能與之？」**注**王言誰能與不嗜殺人者乎？**疏**「孰能與之」○正義曰：《齊語》云「桓公知天下諸

侯多與己也」，韋昭注云：「與，從也。」《呂氏春秋·執一》篇高誘注云：「與猶歸也。」對曰：「天下莫不與也。」

注孟子曰：時人皆苦虐政，如有行仁，天下莫不與之。王知夫苗乎？七八月之間，旱，則苗槁矣；天油然作雲，沛然下雨，則苗浡然興之矣。其如是，孰能禦之？**注**以苗生喻人歸也。

周七八月，夏之五六月。油然，興雲之貌。沛然下雨以潤槁苗，則浡然已盛，孰能止之？**疏**注「以苗」

至「六月」○正義曰：《夏小正》「偃之興」，傳云：「其不言生而言興，何也？不知其生之時，故曰興。」《廣雅·釋詁》云：「興，生也。」「苗生」即下「苗浡然興」，以生釋興，故下云

「浡然已盛」，不復解「興」義也。《白虎通·三正》篇云：「正朔有三，何？本天有三統，謂三微之月也。明王者當奉順

而成之，故受命各統一正也。《禮三正記》曰：「十一月之時，陽氣始養根株，黃泉之下萬物皆赤。赤者，盛陽之氣也。

故周爲天正，色尚赤也。十二月之時，萬物始芽而白。白

者，陰氣，故殷爲地正，色尚白也。十三月之時，萬物始達，孚甲而出，皆黑，人得加功，故夏爲人正，色尚黑。」《尚書大傳》云：「夏以孟春月爲正，殷以季冬月爲正，周以仲冬月爲正。夏以十三月爲正，色尚黑，以平旦爲朔，殷以十二月爲正，色尚白，以雞鳴爲朔，周以十一月爲正，色尚赤，以夜半爲朔。」《後漢書》陳寵奏云：「夫冬至之節，陽氣始萌，故十一月有蘭、射干、芸、荔之應。《時令》曰：『諸生蕩，安形體。』天以爲正，周以爲春。十二月，陽氣上通，雉雊雞乳。地以爲正，殷以爲春。十三月，陽氣已至，天地已交，萬物皆出蟄，蟲始振。人以爲正，夏以爲春。」《春秋》昭公十七年「夏六月朔，日有食之」，《左傳》：太史曰：「當夏四月，是謂孟夏。」又「冬有星孛于大辰」，《左傳》：梓慎曰：「火出，于夏爲三月，于商爲四月，于周爲五月。」推之周之七八月爲夏之五六月。夏之五月建午，六月建未，周之七月建午，八月建未也。說者或以《孟子》「七八月爲夏正，趙氏佑《溫故錄》云：『若是夏正之月，則《邠風》「八月其穫」，《月令》「七月登穀」，是時安得尚言苗邪？』」○注「油然」至「之貌」○正義曰：《大戴記·文王官人》篇云「喜色由然以生」，注云：「由當爲油。油然，新生好貌。」《禮記·祭義》云「則易直子諒之心油然生矣」，注云：「油然，物始生好美貌。」又《樂記》

注云：「油然，新生好貌也。」油與由通，由與𣎵通。《說文》𣎵部云：「𣎵，木生條也。古文𣎵由𣎵。」惠氏棟《九經古義》云：「《經傳》由字皆訓爲生。《毛詩序》云：『《由儀》，萬物之生，各得其宜』，是由訓爲生，儀訓爲宜。《春秋傳》云：『吉凶由人』，言吉凶生乎人也。」段氏玉裁《說文解字注》云：「《左傳》史趙云：『陳，顓頊之族也。歲在鶉火，是以卒滅，陳將如之，今在析木之津，猶將復由。』此以生滅對言，由即𣎵之假借。」由訓爲生，故雲之新生、木之新生以及喜色之新生，易直子諒之心新生，其自未生而始生之狀皆爲「油然」，故趙以「興雲之貌」解之。○注「沛然下雨」至「止之」○正義曰：《文選·思立賦》「凍雨沛其灑塗」，舊注云：「沛，雨貌也。」文公十四年《公羊傳》云「力沛若有餘」，注云：「沛，有餘貌。」《音義》云：「沛，字亦作霈。」《初學記》、《太平御覽》俱引作「霈」。《華嚴經音義》引《文字集略》云：「霈，謂大雨也。」大雨亦有餘意。《詩·信南山》云：「益之以霡霂，既優既渥，既霑既足。」箋云：「冬有積雪，春而益之以小雨，潤澤則饒洽。」沛有澤義，澤有潤義。趙氏以潤釋沛，與《詩》箋同。苗當枯槁之時，非小雨所能生。劉熙此注云：「霈然，注雨貌。」惟大雨傾注，枯苗乃得潤澤，義乃備也。《廣雅·釋詁》云：「淳，盛也。」又《釋訓》云：「勃勃，盛也。」莊公十

一年《左傳》「其興也悖焉」，注云：「悖，盛貌。」《釋文》云：「悖，本亦作勃。」悖、勃、淳字通。《爾雅》云：「禦，禁也。」禁義同止，鄭康成注《書大傳》、高誘注《呂氏春秋》、張揖《廣雅》皆以禦訓止。今夫天下之人牧，未有不嗜殺人者也。如有不嗜殺人者，則天下之民皆引領而望之矣。誠如是也，民歸之由水之就下，沛然誰能禦之？」**注**「今天下牧民之君誠能行此仁政，民皆延頸望欲歸之，如水就下，沛然而來，誰能止之？」**疏**注「今天下」至「止之」○正義曰：

《書·堯典》「觀四岳羣牧」，《立政》「宅乃牧」，鄭氏注云：「殷之州牧曰伯，虞夏及周曰牧。」《周禮·大宰》「一曰牧，以地得民」，《大司馬》「建牧立監」，注皆云：「牧，州牧也。」《曲禮》云：「九州之長，人天子之國曰牧。」是「天下之人牧」即天下之人君也。《說文》支部云：「牧，養牛人也。」牧之義爲養，每一州之中，天子選諸侯之賢者以養一州之人，即以名之爲「牧」，故趙氏云「牧民之君」，即養民之君也。君所以養民而反嗜殺人，失其爲君之道。趙氏探孟子稱「人牧」之義而說之也。趙氏以「一」爲仁政，故云「行此仁政」。《呂氏春秋·順說》篇云「莫不延頸」，高誘注云：「延頸，引領也。」

引、延義皆爲長而引申也。望則伸其頸，故爲引領也。《音義》云：「由與猶同，古字通用。」猶即如也，故趙氏云「如水就下」。翟氏灝《考異》言「宋九經本由作如」。經已作「如」，注不必以如釋之，宋本非也。《廣雅·釋訓》：「沛沛，流也。」劉熙《釋名·釋水》云：「水從河出曰雍沛。」言在河岸限內時見雍出，則沛然也。水之壅出與雨之下注同，故皆云沛然。趙氏解兩沛然不同者，經以「沛然下雨」比不嗜殺人者以仁恩及民，故以潤澤解之，此「水之就下」比天下來歸，故云「沛然而來」，謂民之來如水之湧也。

章指：言定天下者一道，仁政而已。

不貪殺人，人則歸之。是故「文王視民如傷」，此之謂也。**疏**「言定」至「而已」○正義曰：孟

子言道二：仁與不仁而已。以仁定天下，故爲「一道」。韓本、足利本無「一道」二字。○「不貪」至「謂也」○正義曰：鄭氏《檀弓》注、《廣雅》、韋昭注《楚語》皆云：「嗜，貪也。」故前既以甘、樂釋之，此又云「貪」也。「文王視民如傷」，《離婁下》篇文。

齊宣王問曰：「齊桓晉文之事，可得聞

乎？」**注**宣，謚也。宣王問孟子，欲庶幾齊桓公小白、晉文公重耳。孟子冀得行道，故仕於齊，齊不用而去，乃適於梁。建篇先梁者，欲以仁義爲首篇，因言魏事，章次相從，然後道齊之事也。**疏**注「宣謚也」

○正義曰：《周書·謚法解》云：「聖善周聞曰宣。」又云：

「施而不成爲宣。」○注「宣王」至「重耳」○正義曰：齊桓公名小白，晉文公名重耳，見《春秋》。「欲庶幾」，謂心慕桓、文之所爲，思有以近之。○注「孟子」至「之事」○正義曰：周氏廣業《孟子出處時地考》云：「孟子書先梁後齊，此篇章之次，非遊歷之次也，趙氏注可謂明且核矣。後儒不喜趙注，見其展卷即云「孟子見梁惠王」，遂斷爲歷聘之始。今考《田完世家》，桓公六年，威王三十六年，宣王十九年，湣王四十年。《索隱》「桓公卒」注云：「《紀年》梁惠王十三年當齊桓公十八年，後威王始見，則桓公十九年而卒也。」宣王二年田忌議蚤救韓，敗魏馬陵」，注云：「《紀年》威王十四年，田盼伐梁，戰馬陵。」又《孟嘗君傳》「宣王二年殺魏將龐涓」，注云：「《紀年》當梁惠王二十八年，至三十六年改爲後元。」又「七年韓昭侯與魏惠王會齊宣王東阿南，明年復與梁惠王會甄，是歲梁惠王卒」，注云：「宣王七年《紀年》當惠王後元十

一年，作平阿。又云十三年會齊威王于甄。與此齊宣王與梁惠王會甄文同，但齊之威、宣二王文舛互不同也。」又「湣王三年封田嬰於薛」，注云：「《紀年》以爲梁惠王後元十三年四月齊威王封田嬰於薛，十五年齊威王薨，皆與此文異。」按，此五引《紀年》，**①**今本所無，又字多錯午，無可覆核。就其言考之，爲威爲宣，必有一誤。《戰國策》蘇子謂秦王曰：

「齊威宣者，古之賢王也。德博而地廣，國富而民用，將武而民強。宣王用之，後破韓威魏，以南伐楚，西攻秦。」上言「威宣」，下言「宣王」。又曰：「今富非齊威宣之餘也。」鄒陽書：「齊用越人蒙而強威宣。」《史記》「威宣」連稱者非一。

則「威宣」是兩謚，如魏「惠成」、「安釐」，韓「宣惠」，秦「惠文」、「莊襄」之例。周自考王以下皆兩謚。《呂氏春秋·問春論》「韓昭釐侯」，注：「覆謚也。」或先謚威，後改謚宣，《國策》因誤分之，實非有兩人也。據《紀年》，桓公之立在《年表》威王之四年，而桓公十九年卒，與《世家》宣王卒年正同。《秦紀》本無年月，《史》蓋因其錯簡而倒置之，又以桓公附見康公之表，故讀者愈不可曉。今誠以桓公之元當魏武侯十二年，至惠十三年適得十八年，明年十九年卒，宣王之元當

①「五」，《孟子四考》作「六」，本書略去一條未引，故云。

惠十四年，盡前元二十五年加後元十五年始卒，適得三十六年。是《史》所云威王乃桓公，宣王即威王。《戰國·趙策》魯仲連曰：「昔齊威王嘗行仁義矣，率天下諸侯朝周，居歲餘，周烈王崩，諸侯皆弔，齊侯往」云云。按，烈王之崩，《史表》齊威王十七年。考其實為桓公午七年，此威王為桓公之證也。而滑王前三年實屬宣王。桓公未稱王，故《國策》但稱「田侯」及「陳侯」。宣有複謚，故亦稱「威王」，淳于髡所謂「威行三十六年」者是也。而《世家》所載鄒忌以鼓琴見威王事見劉向《新序》，威王與魏惠論實事見《韓詩外傳》，俱明指宣王。參錯不同，皆由於此。更有證者，《莊子·胠篋》篇及《索隱》引《鬼谷子》俱云「田成子十二世而有齊國」，今由田完數至威宣王，正得十二世。《史記·田完世家》：敬仲生穉孟夷，穉孟夷生滑孟莊，滑孟莊生文子須無，須無生桓子無宇，無宇生釐子乞，乞生成子常，常生襄子盤，盤生莊子白，白生太公和，篡齊，自立為齊侯，和生桓公午，午生威王因齊，因齊生宣王辟疆。共十三世。并威、宣為一人，恰十二世。此後惟滑王、襄王，至王建為秦所滅。莊子與宣王同時，《鬼谷書》蘇秦所述，言必不謬，使分威宣為二，則當云十三世矣。又威王名因齊，尤可疑。名不以國，既名之，子孫臣庶不聞避諱，或作「嬰齊」，則又與庶子田嬰同名：皆

必無之事。《漢書·人表》闕而不書，蓋亦疑之。《莊子釋文·則陽》篇：「『魏瑩與田侯』，一本作「田侯牟」。司馬云：「齊威王也。名牟，桓公子。」按，《史記》威王名因不名牟。齊事莫詳於《孟子》，史公嘗自言讀《孟子》書，而作《田完世家》終不敢采錄一字，雖足用為善如宣王，亦止以用淳于髡等當之，非因素其昭穆世次，兼誤以梁惠王卒繫諸宣王八年，與《孟子》中事實百無一合，有不得不盡行割棄者哉？《通鑑》、《大事記》等書徒增損威、滑年代以曲從《孟子》之書，而終未知《史》之誤分威宣為二也。今亦未敢臆斷，伐燕總在宣王三十年內外，如是則不特《國策》「儲子請宣王伐燕，王令章子將兵」與《孟子》「幣交與游」相合，而「吾慍」之言適當「倦勤」之日。宣王三十年當顯王四十二年，去孔子百五十二年，①去武王克商七百二十三年，②與「去聖未遠，數過時可」亦合，而游梁之歲乃得而定之矣。」又云：「建篇之首梁惠王也，趙氏之說肆矣。《風俗通·窮通》篇首敘孟

①「二」，《孟子四考》作「五」。

②此句《孟子四考》作「去文武受命七百五十八年」，詳沈校。

子仕齊爲卿，^①去之鄒、薛，作書中外十一篇終言梁惠王復聘請之爲上卿，庶爲得實。其體依仿《論語》，不似諸子自立篇目。大率起《齊宣王》至《滕文公》爲三冊，記仕宦出處，《離婁》以下爲四冊，記師弟問答雜事。迨歸自梁，而孟子已老，于行文既絕少，又暮年所述，故僅與魯事分附諸牘末。其後門人論次遺文，分篇列目，以齊宣王舊君不可用以名篇，而「仁義」兩言爲全書綱領，孟子所謂「願學孔子」以直接堯舜禹湯、文武周公之心法治法，無出乎此。因割其六章冠首而以梁惠王題篇，又特變文曰「孟子見梁惠王」以尊其師，今《盡心》卷下尚有「梁惠王」一章，可證也。」孟子對曰：「仲尼之徒無道桓文之事者，是以後世無傳焉。臣未之聞也。」**注**孔子之門徒頌述宓戲以來至文武周公之法制耳，雖及五霸，心賤薄之，是以儒家後世無欲傳道之者。故曰「臣未之聞」也。

疏注「孔子」至「之者」○正義曰：孔子贊《易》，《繫辭傳》云：「包羲氏之有天下也，始作八卦以通神明之德，以類萬物之情。」又云：「包羲氏沒，神農氏作，神農氏沒，黃帝、堯、舜氏作。通其變，使民不倦，神而化之，使民宜之。」治天下之道關於包羲，備于堯舜，故刪《書》首《堯典》、《舜典》、

禹湯、文武、周公之法制，皆法堯舜者也。孔子以《易》、《書》、《詩》、《禮》教門弟子，故所頌述惟「宓戲氏以來至文武周公之法制」也。《春秋》大文王之統而書桓文之事，是及五霸也。書齊桓救邢、城楚丘，實與而文不與，盟葵丘，書日以危之，伐鄭，書「圍」以惡之。書晉文盟踐土，書日以著其謫，書「天子狩于河陽」爲不與再致天子。是「心賤薄之」也。《漢書·藝文志》云：「儒家者流蓋出于司徒之官，助人君順陰陽明教化者也。游文於六經之中，留意於仁義之際，祖述堯舜，憲章文武，宗師仲尼，以重其言。」其五十三家八百三十六篇，《孟子》十一篇列于內。今存者，《荀卿子》、《陸賈》、《新語》、《賈誼》、《新書》、《董仲舒》、《春秋繁露》、《桓寬》、《鹽鐵論》、《劉向》、《說苑》、《新序》、《列女傳》、《揚雄》、《太玄》、《法言》。《新語·道基》篇首述宓戲圖畫乾坤以定人道。賈山言治亂之道，稱述文王好仁。《荀子·仲尼》篇云：「仲尼之門人，五尺之豎子言羞稱乎五伯，是何也？」曰：然。彼非本政教也，非致隆高也，非慕文理也，非服人之心也。鄉方略，審勞佚，畜積修闕而能顛倒其敵者也，詐心以勝矣。彼以讓飾爭，依乎仁而蹈利者也，小人之傑也。彼固曷足稱乎大君子之門哉？」

①「窮通」，原無，今從沈校據《孟子四考》補。

董子對膠西王云：「《春秋》之義貴信而賤詐。詐人而勝之，雖有功，君子弗爲也。是以仲尼之門，五尺之童子言羞稱五伯，爲其詐以成功，苟爲而已也。故不足稱於大君子之門。」揚雄《解嘲》云：「五尺童子羞稱晏嬰與夷吾。」凡此皆後世儒家稱述必義以來至文王周公之法，而賤薄桓、文，不欲傳道之也。頌與誦通，頌述即誦述。閩、監、毛三本作「宓義」。無以，則王乎？」**注**既不論三皇五帝，殊無所問，則尚當問王道耳。不欲使王問霸事也。**疏**注「不論

三皇五帝」○正義曰：《周禮·春官·外史》：「掌三皇五帝之書」。丘光庭《兼明書》云：「鄭康成以伏羲、女媧、神農爲三皇，宋均以燧人、伏羲、神農爲三皇，《白虎通》以伏羲、神農、祝融爲三皇，孔安國以伏羲、神農、黃帝爲三皇。明日：女媧、燧人、祝融事，經典未嘗以「帝」、「皇」言之，蓋霸而不王者也。且祝融乃顓頊之代火官之長，可列於三皇哉？則知諸家之論唯安國爲長。鄭康成以黃帝、少昊、顓頊、帝嚳、唐堯、虞舜爲五帝。六人而云「五帝」者，以其俱合五帝座星也。司馬遷以黃帝、顓頊、帝嚳、唐堯、虞舜爲五帝，孔安國以少昊、顓頊、高辛、唐、虞爲五帝。明日：康成以女媧爲皇，軒轅爲帝。按，軒轅之德不劣女媧，何故不爲稱皇而淪

之人帝，仍爲六人哉？考其名迹，未爲允當者也。司馬遷近遺少昊而遠收黃帝，其爲疎略一至于斯。安國精詳，可爲定論。按《尚書》說：「皇者皆天德也。皇王，人也。帝，諦也，公平通達，舉事審諦也。人主德周天覆，故德優者謂之皇，其次謂之帝。」然則「皇」者「帝」者皆法天爲名。或曰：子以軒轅爲皇，何故謂之「黃帝」？答曰：凡言有通、析，析而言之，則皇尊于帝，通而言之，則帝、皇一也。《月令》云「其帝太昊」，則伏羲亦謂之「帝」也，《呂刑》云「皇帝清問下民」，則堯亦謂之「皇」也。按：趙氏以則「王」之「王」指三王，故云「不論三皇五帝」。《慈湖家記》云：「孟子凡與齊宣王言王，皆如字耳。後儒讀者多轉爲去聲，非也。」○注「殊無」至「事也」○正義曰：「殊無所問」解「無以」二字，蓋謂孔子之徒所道者三皇五帝及王道也，所不道者五伯也，王乃問桓、文之事，豈舍此遂無所問乎？縱不問三皇五帝，亦當問王道，而不當問桓、文霸者之事。元人《四書辨疑》云：「無以，無以言也。桓、文之事既無以言，則言王道可乎？」此以「無以」二字屬上，解「以」爲用，謂桓、文之事儒者不道，無用言之。與趙氏義異。曰：「德何如則可以王矣？」**注**王曰：德行當何如而可得以王乎？**疏**注「德行」

至「王乎」①○正義曰：陸賈《新語》云「齊桓公尚德以霸」，然則霸功亦不離乎德，但德之用於霸與用於王自有別。

曰：「保民而王，莫之能禦也。」**注**保，安也。

禦，止也。言安民則惠，黎民懷之。若此以王，無能止也。**疏**注「保安也」○正義曰：《周禮·大司徒》「以保

息六養萬民」，注云：「保息，謂安使蕃息也。」《毛詩》傳多以安訓保。○注「言安」至「懷之」○正義曰：《尚書·皋陶謨》

文。曰：「若寡人者，可以保民乎哉？」**注**王自

恐懷不足以安民，故問之。曰：「可。」**注**孟子以爲

如王之性，可以安民也。曰：「何由知吾可也？」**注**王問孟子：何以知吾可以安民？曰：

「臣聞之胡齧曰：王坐於堂上。有羣牛而過

堂下者，王見之，曰：「牛何之？」對曰：「將

以釁鐘。」王曰：「舍之！吾不忍其觳觫，若

無罪而就死地。」對曰：「然則廢釁鐘與？」

曰：「何可廢也？」以羊易之。」不識有諸？」

注胡齧，王左右近臣也。觳觫，牛當到死地處恐貌。

新鑄鐘，殺牲，以血塗其釁郤，因以祭之，曰「釁」。

《周禮·大祝》曰：「墮釁，逆牲逆尸，令鐘鼓。」《天

府》：「上春，釁寶鐘及寶器。」孟子曰：臣受胡齧言

王嘗有此仁，不知誠有之否？**疏**注「胡齧」至「臣也」

○正義曰：《周禮·天官·寺人》注云：「寺之言侍也。」賈

氏疏云：「取親近侍御之義。」《夏官·司士》：「正朝儀之

位：王族故士，虎士在路門之右，南面東上，大僕、大右、

大僕從者在路門之左。」惠氏士奇《禮說》云：「春秋時周禮

未改，列國猶重大僕一官。位雖下大夫，而正王服位，出入

王命，王眡朝則前，王燕飲則相，王射則贊，王眡燕朝則擯，

而上士小臣、中士祭僕、下士御僕皆其僚屬，爲羣僕侍御之

臣。《荀子》曰：「便嬖左右者，人主之所以窺遠收衆之門戶

牖嚮也。」故人主必將有便嬖左右足信者然後可。秦武王令

甘茂擇僕與行事，則親近之臣自古重之。賈誼《官人》篇

曰：「修身正行，道語談說，服一介之使能合兩君之驢，執戟

居前能舉君之失過，不難以死持之者，左右也；事君不敢有

二心，居君旁不敢泄君之謀，君有失過憔悴有憂色，不勸聽

①「德行」，原誤倒，今據注文改。

從者，侍御也。」蓋古親近之臣若此。」諸侯無大僕，而《儀禮》小臣、小臣正、小臣師、僕人正、僕人師、僕人士，皆左右親近之官。胡齠所居未知何職，然堂上堂下，羣牛問答，非左右近臣無以知之，故趙氏注之如此。○注「穀觶」至「恐貌」○正義曰：《廣雅·釋訓》云：「跼蹐，畏敬貌。」又《文選·東京賦》薛綜注云：「跼蹐，恐懼之貌。」趙氏蓋以「穀觶」音近「跼蹐」，故以為恐貌。王氏念孫《廣雅疏證》云：「《廣韻》云：『殯殮，死貌。』出《廣雅》。」又殯、殮、殯、殯、殯五字，諸書並訓為死。《玉篇》：「殯殮，死貌。」《孟子·梁惠王》篇：「吾不忍其觶觶，若無罪而就死地。」義與「殯殮」同。《荀子·王霸》篇云：「出若人若。」《史記·禮書》云：「若者必死，」若皆訓為如此。此云「若無罪而就死地」，猶云「如此無罪而就死地」也。○注「新鑄」至「寶器」○正義曰：「鑄」本間隙之名，故殺牲以血塗器物之隙即名為「鑄」。「隙」即「郤」字。《漢書·高帝紀》「鑄鼓」，注：「應劭云：『鑄，祭也。殺牲以血塗鼓鑄呼為鑄。』」「呼」同「鑄」，「鑄」猶言「鑄隙」。今人以瓦器有裂迹者為鑄，讀若悶，即鑄也；以木之有裂縫者為鑄，讀若呵，呵，乎，音之轉也。《周禮》大祝天府俱屬春官。大祝作「隋鑄」，鄭氏注云：「謂薦血也。凡血祭曰鑄。」疏引賈氏云：「鑄，鑄宗廟。」馬氏云：「血以塗鐘鼓。」「鄭

不從。」然則血祭之「鑄」與鑄器之「鑄」自是兩事。趙氏合為一事，與應劭同。《天府》：「上春，鑄寶鎮及寶器。」趙氏引作「鑄寶鐘」。阮氏元《校勘記》云：「當依《周禮》作『鎮』，形相涉而誤。」趙氏佑《溫故錄》云：「古人用鑄之禮不一。定四年《左傳》：『君以軍行，拔社鑄鼓。』《文王世子》：『始立學者，既興器用幣。』注：『興讀為鑄。』《月令》：『孟冬，命太史鑄龜筮。』《雜記》下：『成廟則鑄之，其禮：雍人舉羊，升屋自中，中屋南面剖羊，血流于前，乃降。門夾室皆用雞，其鉅皆於屋下。割雞，門，當門，夾室，中室。』又云：『路寢成，則考之而不鑄。鑄屋者，①交神明之道也。凡宗廟之器，其名者成，則鑄之以貍豚。』《大戴禮》亦有「鑄廟」，獨為篇。其具在《周官》者，《大祝》、《天府》而外，《春官》則有《肆師》「以歲時序其祭祀，及其祈珥」，《小祝》「大師掌鑄祈號祝」，《龜人》「上春鑄龜」，《雞人》「凡祭祀饗鑄，共其雞牲」。《夏官》則《大司馬》「若大師，帥執事涖鑄主及軍器」，《小子》「掌珥于社稷，祈于五祀，鑄邦器及軍器」，《羊人》「凡祈珥鑄積，共其羊牲」，《圉師》「春除蓐鑄廐」。《秋官》則《士師》「凡剋鉅，則奉犬牲」，《犬人》「凡幾鉅，用駝可也」，《司約》「若有

①「屋」，原無，今從沈校據《禮記》補。

訟者，則珥而辟藏」。康成注皆以祈即刳字，珥即崣字。用毛牲者刳，用羽牲者崣，皆取血以鬯之事，鬯之者，神之也。先鄭則「鬯」讀曰「徽」，謂「飾美之也」。是凡器物皆用鬯，龜玉亦鬯之，廟社皆用鬯，主亦鬯，馬廐亦鬯之，蓋非止爲塗其郤。其牲則以羊爲大，亦用豚、犬與雞，獨未有言牛者。牛爲牲之最大，不輕用也。此以一鐘而用牛，明非禮之正經定制，亦見古禮失之一端。孟子則第就事論事而已。周氏柄中《辨正》謂：「鬯之義有三：一是拔除不祥，一是彌縫罅隙，使完固之義，一是取其膏澤護養精靈。鐘爲邦器，鬯鐘是塗其罅隙。」按：塗其罅隙即是鄭司農讀「徽」、賈疏以爲取飾義也，亦康成所不從。曰：「有之。」**注**王曰：有之。曰：「是心足以王矣。百姓皆以王爲愛也，臣固知王之不忍也。」**注**愛，嗇也。孟子曰：王推是仁心，足以至於王道。然百姓皆謂王嗇愛其財，臣知王見牛恐懼不欲趨死，不忍，故易之也。**疏**注「愛嗇也」○正義曰：《周書·謚法解》云：「嗇於賜予曰愛。」《漢書·竇嬰傳》云：「豈以爲臣有愛」，集注云：「愛猶惜也。」惜亦各嗇之義，故下注云「愛惜」。王曰：「然，誠有百姓者。齊國雖褊小，吾何愛一

牛？即不忍其觳觫，若無罪而就死地，故以羊易之也。」**注**王曰：亦誠有百姓所言者矣。吾國雖小，豈愛惜一牛之財費哉？即見其牛哀之，鐘又不可廢，故易之以羊耳。曰：「王無異於百姓之以王爲愛也。以小易大，彼惡知之？王若隱其無罪而就死地，則牛羊何擇焉？」**注**異，怪也。隱，痛也。孟子言無怪百姓之謂王愛財也，見王以小易大故也。王如痛其無罪，羊亦無罪，何爲獨釋牛而取羊？**疏**注「異怪也隱痛也」○正義曰：昭公二十六年《左傳》云「然據有異焉」，賈氏注云：「異猶怪也。」《史記·魯世家》「有異焉」，《集解》引服虔云：「異猶怪也。」是異之義與怪同也。王氏念孫《廣雅疏證》云：「《逸周書·謚法解》云：『隱，哀之方也。』《檀弓》云：『拜稽顙，哀戚之至隱也。』隱與慇通，隱，哀，一聲之轉。哀之轉爲慇，猶憂之轉爲隱矣。」王笑曰：「是誠何心哉？我非愛其財。而易之以羊也，宜乎百姓之謂我愛也。」**注**王自笑心不然而不能自免爲百姓所非。乃責己之以小易大，故曰：宜乎其非我

也。**疏**注「王自」至「我也」○正義曰：「自笑心不然」解首

二句，「不然」二字解「我非愛其財」，謂我之心果何心哉？自信非愛財也。「乃責己之以小易大」解「而易之以羊也」句，故曰宜乎其非我也」解末句，於其間隔以「而不能自免為百姓所非」一句，明「我非愛其財」斷句，不與下「而」字連，「而易之以羊也」不斷句，與「宜乎」一氣接下。趙氏此書名「章句」，故其分析明白如此，舉此以例其餘。曰：

「無傷也，是乃仁術也，見牛未見羊也。君子之於禽獸也，見其生不忍見其死，聞其聲不忍食其肉，是以君子遠庖廚也。」**注**孟子解王自責之心曰：無傷於仁，是乃王為仁之道也。時未見羊，羊之為牲次於牛，故用之耳。是以君子遠庖廚，不欲見其生，食其肉也。**疏**「君子」至「庖廚也」○正義曰：賈子《新書·禮》篇云：「禮，聖王之於禽獸也，見其生不忍見其死，聞其聲不忍嘗其肉，故遠庖廚。仁之至也。」《大戴禮·保傳》篇云：「於禽獸，見其生不食其死，聞其聲不嘗其肉，故遠庖廚，所以長恩且明有仁也。」翟氏灝《考異》云：「《大戴禮·保傳》篇即自賈子採錄，而篇置不同，文亦

小異。『君子遠庖廚』本《禮記·玉藻》文，孟子述之，故加有『是以』二字。」○注「無傷」至「道也」○正義曰：賈子《新書·道術》篇云：「道者，所從接物也，其末者謂之術。」《說文·行部》云：「術，邑中道也。」鄭康成注《禮記》、高誘注《淮南子》、呂氏春秋、韋昭注《國語》皆以道釋術，故趙氏以「仁道」解「仁術」。○注「羊之」至「之耳」○正義曰：《周禮·宰夫》注云：「三牲，牛羊豕具為一牢。」桓公八年《公羊傳》注云：「牛羊豕凡三牲曰大牢，羊豕凡二牲曰少牢。」《王制》云：「天子社稷皆太牢，諸侯社稷皆少牢。諸侯無故不殺牛，大夫無故不殺羊。」是羊之為牲次於牛也。

王說，曰：「《詩》云：『他人有心，予忖度之。』夫子之謂也。夫我乃行之，反而求之，不得吾心；夫子言之，於我心有戚戚焉。此心之所以合於王者，何也？」**注**《詩》、《小雅·巧言》之篇也。王喜悅，因稱是《詩》以嗟歎孟子忖度知己心，戚戚然心有動也。寡人雖有是心，何能足以王也？**疏**注「詩小」至「己心」○正義曰：《詩》小序云：「《巧言》，刺幽王也。大夫傷於讒，故作是詩也。」箋云：「因己能忖度讒人之心。」王引此蓋斷章取義。《毛詩釋

文》云：「付，本又作寸。」《漢書·律曆志》云：「寸者，付也。」付與寸義同。前此詰駁，王意不能解，孟子以仁術言之，王乃解悅，解悅則喜矣，喜故歎美孟子，以爲知己心。○注「戚戚」至「王也」○正義曰：王氏念孫《廣雅疏證》云：「《方言》：『衝、倣，動也。』」衝倣與《廣雅》「衝休」同。衝亦動也，方俗語有輕重耳。《釋訓》：「衝衝，行也。」《說文》：「憧，不定也。」《咸》九四：「憧憧往來。」皆動之貌也。聲轉爲倣。《爾雅》：「動、倣，作也。」是倣與動同義。《說文》：「堀，氣出于土也。」義亦與倣同。《孟子》：「於我心有戚戚焉。」趙氏注云：「戚戚然心有動也。」戚與倣亦聲近義同。合與洽義同。《說文》水部云：「洽，霑也。」霑有足義，故趙氏以「足以王」解「合於王」。閩、監、毛三本作「何能足以合於王也」，非是。曰：「有復於王者曰：『吾力足以舉百鈞而不足以舉一羽，明足以察秋豪之末而不見輿薪。』則王許之乎？」**注**復，白也。許，信也。人有白王如此，王信之乎？百鈞，三千斤也。**疏**注「復白也許信也」○正義曰：《曲禮》云「願有復也」鄭氏注，《國語》「正月之朔，鄉長復事」韋昭注，《呂氏春秋·勿躬》篇「管子復於桓公」高誘注，皆訓復爲白。《周

禮·宰夫》「諸臣之復」，注云：「復謂奏事也。」《說文》言部云：「許，聽也。」《呂氏春秋·首時》篇「王子信」，高誘注云：「許諾。」惟信之，故諾之、聽之也。○注「百鈞三千斤也」○正義曰：《說苑·辨物》篇云：「三十斤爲一鈞。」百鈞故三千斤。曰：「否。」**注**王曰：我不信也。「今恩足以及禽獸而功不至於百姓者，獨何與？然則一羽之不舉爲不用力焉，輿薪之不見爲不用明焉，百姓之不見保爲不用恩焉。故王之不王，不爲也，非不能也。」**注**孟子言王恩及禽獸而不安百姓，若不用力、不用明者也。不爲耳，非不能也。曰：「不爲者與不能者之形，何以異？」**注**王問其狀何以異也。曰：「挾太山以超北海，語人曰『我不能』，是誠不能也；爲長者折枝，語人曰『我不能』，是不爲也，非不能也。故王之不王，非挾太山以超北海之類也；王之不王，是折枝之類也。」**注**孟子爲王陳爲與不爲之形若是，王則不折枝之類也。折枝，案

摩，折手節，解罷枝也。少者耻見役，故不爲耳，非不能也。太山、北海皆近齊，故以爲喻也。**疏**「挾太

山以超北海」○正義曰：《墨子·兼愛》篇云：「挾太山以超江河，生民以來未嘗有也。」蓋當時有此語。《墨子》之書，孟子未必引之。○注「折枝」至「見役」○正義曰：毛氏奇齡

《四書臆言》云：「趙氏注「折枝」：「案摩，折手節，解罷枝。」

此卑賤奉事尊長之節。《內則》：「子婦事舅姑，問疾痛疴癢

而抑搔之。」鄭注抑搔即按摩。屈抑枝體與「折義」正同。以

此皆卑役，非凡人屑爲，故曰是不爲，非不能。《後漢》張皓

王龔論云：「豈同折枝於長者，以不爲爲難乎？」劉熙

注：「按摩，不爲，非難爲。」可驗。若劉峻《廣絕交論》「折枝

舐痔」，盧思道《北齊論》「韓高之徒，人皆折枝舐痔」，《朝野

僉》載薛稷等「舐痔折枝，阿附太平公主」，類皆明作媮諂之

具。」○《音義》引陸善經云：「折枝，折草樹枝。」趙氏佑《溫

故錄》云：「《文獻通考》載陸筠解爲「罄折腰枝」，蓋猶今拜

揖也。元人《四書辨疑》以枝與肢通，謂斂折肢體，爲長者作

禮，與「徐行後長」意類，正竊其意而衍之。」○注「太山北海

皆近齊」○正義曰：閻氏若璩《四書釋地》云：「《禹貢》海岱

惟青州，故蘇秦說齊宣王「齊南有太山，北有渤海」，司馬遷

言「吾適齊，自泰山屬之琅邪，北被於海」。降至漢景帝，猶置北海郡於營陵。營陵，舊營邱地。《左傳》云「君處北海」，是也。高帝置泰山郡，領博縣，縣有泰山廟，岱在其西北。《禮記》云「齊人將有事泰山」，是也。以知「挾泰山以超北海」皆取齊境內之地設譬耳。」老吾老以及人之老，

幼吾幼以及人之幼，天下可運於掌。**注**老猶

敬也，幼猶愛也。敬吾之老亦敬人之老，愛我之幼

亦愛人之幼，推此心以惠民，天下可轉之掌上，言其

易也。**疏**注「老猶」至「易也」○正義曰：《禮記·大學》篇

云：「上老老而民興孝，上長長而民興弟。」注云：「老老長

長，謂尊老敬長也。」此「老吾老，幼吾幼」，猶云「老老長長」。

老無敬訓，幼無愛訓，故云「猶敬」「猶愛」也。《廣雅·釋詁》

云：「運，轉也。」故以轉解運。《詩》云：「刑于寡妻，

至于兄弟，以御于家邦。」言舉斯心加諸彼而

已。**注**《詩》，《大雅·思齊》之篇也。刑，正也。

①「論」，原誤作「倫」，今從沈校據《後漢書》及《四書臆言》改。

②「明」，原誤作「朋」，今據《四書臆言》改。

寡，少也。言文王正己適妻，則八妾從，以及兄弟御，享也。享天下國家之福，但舉己心加於人耳。

疏注「刑正」至「妾從」○正義曰：《詩釋文》引《韓詩》云：

「刑，正也。」《毛詩》傳云：「寡妻，適妻也。」《白虎通·嫁娶》篇云：「天子諸侯一娶九女，一爲適妻，餘爲八妾。」○注「御享」至「之福」○正義曰：享之義爲獻，御之義爲進。進，獻同。《詩·六月》：「飲御諸友」，傳云：「御，進也。」謂飲享諸友也。《獨斷》云：「所至曰幸，所進曰御。」又云：「御者，進也。」凡衣服加於身，飲食入於口，妃妾接於寢，皆曰御。天下國家之福皆進於天子，故御享天下國家之福也。○注「但舉」至「人耳」○正義曰：阮氏元《校勘記》云：「監、毛本心作以，形近而誤。」故推恩足以保四海，不推恩無以保妻子。古之人所以大過人者無他焉，善推其所爲而已矣。**注**大過人者，大有爲之君也，善推其心所好惡以安四海也。今恩足以及禽獸而功不至於百姓者，獨何與？**注**復申此，言非王不能，不爲之耳。權然後知輕重，度然後知長短。物皆然，心爲甚。王請度之。**注**權，銓

衡也，可以稱輕重，度，丈尺也，可以量長短。凡物皆當稱度乃可知，心當行之乃爲仁。心比於物，尤當爲之甚者也。欲使王度心如度物也。**疏**注「權銓」

至「長短」○正義曰：《漢書·律曆志》云：「衡，平也。權，重也。衡所以任權而均物，平輕重也。」《廣雅·釋器》云：「鍾謂之權。」又云：「稱謂之銓。」《呂氏春秋·仲秋紀》：「平權衡」，高誘注云：「權，秤衡也。」《說文》金部云：「銓，衡也。」韋昭注《國語》云：「銓，稱也。」是銓衡即稱衡。權爲鍾。衡之輕重視乎鍾之進退，而所以銓衡輕重，全視乎鍾。故孟子舉權，趙氏以銓衡明之。《漢書·律曆志》云：「度者，分、寸、尺、丈、引也，所以度長短也。」舉丈、尺以概其餘。《尚書·堯典》「同律度量衡」，鄭氏注亦云：「度，丈尺也。」阮氏元《校勘記》云：「閩、監、毛三本量作度。按，《音義》云：「度之待各切。注「稱度」、「度心」、「度物」皆同。」不云「度長短」，是《音義》本亦當作量。改爲度者，閩本之誤。監、毛二本因而不革也。」○注「凡物」至「物也」○正義曰：趙氏之意，謂凡物皆有輕重長短，必宜以權度度之，故云「物皆然」。以「行」字解「爲」字，讀「心」爲一頓。心之所爲即心之所行，故云「心當行之」，又云「尤當爲之甚者也」。蓋以「心

爲之「爲」即上「善推其所爲」之「爲」。「善推其所爲」之「爲」既解作「心所好惡」，則此云「度心」即度心之所好惡，如度物之輕重長短也。乃近人通解以「心」字一頓，「爲甚」二字連讀。按：物有輕重長短，以權度度之，心之輕重長短，即以心度之。物之輕重長短不度，猶可，心之輕重長短不度，則不知推恩以保四海，故「爲甚」也。心愛禽獸，心之輕短者也；心愛百姓，心之重長者也。不以心度心，則不知愛禽獸之心輕於愛百姓之心也。抑王興甲兵，危士臣，構怨於諸侯，然後快於心與？」**注**抑，辭也。孟子問王：抑亦如是乃快邪？**疏**注「抑辭也」

○正義曰：《禮記·中庸》「抑而強與」注、宣公十一年《左傳》「抑人亦有言」注，皆以抑爲辭。《詩·十月之交》「抑此皇父」箋云：「抑之言噫。」《釋文》引《韓詩》云：「抑，意也。」《國語》「敢問天道抑人故也」，賈子《新書·禮容語下》作「意人」，是抑即意。意其如此，辭之未定者也。故昭公八年《左傳》「抑臣又聞之」，注云：「抑，疑辭。」《論語》「抑亦先覺者是賢乎」，王氏引之《經義述聞》云：「《繫辭傳》「噫亦要存亡吉凶，則居可知矣」，噫亦即抑亦也。《大戴禮·武王踐祚》篇云：「黃帝、顓頊之道存乎，意亦忽不可得見與？」《荀

子·脩身》篇云：「將以窮無窮、逐無極與，意亦有所止之與？」《秦策》云：「誠病乎，意亦思乎？」《史記·吳王濞傳》：「願因時循理，棄軀以除患害於天下，億亦可乎？」《漢書》億作意字。並與抑亦同。趙以「抑亦」猶「抑」，故云「抑亦如是」。

王曰：「否，吾何快於是？將以求吾所大欲也。」**注**王言不然，我不快是也。將欲以求我心所大欲者耳。曰：「王之所大欲可得聞與？」**注**孟子雖心知王意而故問者，欲令王自道，遂緣以陳之。王笑而不言。**注**王意大而不欲正

言。曰：「爲肥甘不足於口與？輕煖不足於體與？抑爲采色不足視於目與？聲音不足聽於耳與？便嬖不足使令於前與？王之諸臣皆足以供之，而王豈爲是哉？」**注**孟子復問此五者，欲以致王所欲也，故發異端以問之也。**疏**注「孟子」至「之也」○正義曰：《漢書·公孫宏傳》云「致利除害」，注云：「致謂引而至也。」王笑而不肯言，孟子以言引之，故云「欲以致王所欲也」。「異端」者，《論語》云「攻乎

異端」，何晏注云：「異端，不同歸也。」又以小道爲異端，皇侃《義疏》以異端爲諸子百家之書，謂其與聖經大道異也。漢《賢良策問》云：「良玉不瑑，^①又云非文無以輔德，一端異焉。」《韓詩外傳》云：「序異端，使不相悖。」異端之云，第謂說之不同耳。故諸葛長民《貽劉敬宣書》云：「異端將盡，世路方夷。」則凡異己者通稱爲異端。《禮記·大學》篇云「斷斷兮無他技」，注云：「他技，異端之技也。」異即他也。此與彼異，是爲「他端」。《後漢書》尚書令韓歆上疏，欲立費氏《易》、左氏《春秋》，范升以爲異端。杜預《春秋序》云：「簡二傳而去異端。」范升習二傳，故以左氏爲異端，杜預注左氏，故以二傳爲異端。袁紹客多豪俊，並有才說。見鄭康成儒者，未以通人許之，競設異端，百家互起。儒者必拘守舊說，故競違異前儒之說以難之也。康成依方辨對，咸出問表，則《韓詩外傳》所謂「序異端」矣。王之大欲，本在辟土地，朝秦楚，蒞中國而撫四夷，而故舉肥甘、輕煖、采色、聲音、便嬖五者。此五者非王之所大欲，則爲所大欲外之他端，故云「發異端以問之也」。曰：「否，吾不爲是也。」**注**王言我不爲是也。曰：「然則王之所大欲可知已。欲辟土地，朝秦楚，蒞中國而撫

四夷也。**注**蒞，臨也。言王意欲庶幾王者，蒞臨

中國而安四夷者也。**疏**注「蒞臨」至「者也」○正義曰：

蒞即蒞。蒞之爲臨，經典傳注不勝舉數。《爾雅·釋詁》

云：「臨、蒞，視也。」《說文》手部云：「撫，安也。」《周禮·

大行人》云「王之所以撫邦國諸侯者」，《淮南子·原道訓》云

「以撫四方」，鄭康成、高誘皆以撫訓安。閩、監、毛三本作

「臨蒞中國」。以若所爲求若所欲，猶緣木而求

魚也。**注**若，順也。順嚮者所爲，謂搆兵諸侯之

事，求順今之所欲蒞中國之願，其不可得，如緣喬木

而求生魚也。**疏**注「若順」至「魚也」○正義曰：「若，

順」，《爾雅·釋言》文。按：「若」宜同「若無罪而就死地」之

「若」。若，如此也。謂以如此所爲求如此所欲。解爲順，於

辭不達。《管子·形勢解》云：「緣高出險，猱蜃之所長而人

之所短也。」此云「緣木」，故知其爲喬木。緣木求魚，或小木

或枯魚，猶或有之；若喬木生魚，則必無可求之理，故趙氏

申明之。王曰：「若是其甚與？」**注**王謂比之緣

①「瑑」，原誤作「琢」，今據《漢書》改。

木求魚爲大甚。曰：「殆有甚焉。緣木求魚，雖不得魚，無後災；以若所爲求若所欲，盡心力而爲之，後必有災。」**注**孟子言盡心戰鬪，必有殘民破國之災，故曰殆有甚於緣木求魚者也。

疏「殆有甚焉」○正義曰：王氏引之《經傳釋詞》云：「有猶又也。」言殆又甚焉。曰：「可得聞與？」**注**王欲知其害也。

疏注「王欲知其害也」○正義曰：《易·復》上六「有災眚」，《釋文》引《子夏傳》云：「傷害曰災。」隱公五年《公羊傳》云「記災也」，注云：「災者，有害於人物，隨事而至者。」是災即害也。曰：「鄒人與楚人戰，則王以爲孰勝？」**注**言鄒小楚大也。曰：「楚人勝。」

注王曰：楚人勝也。曰：「然則小固不可以敵大，寡固不可以敵衆，弱固不可以敵強。海內之地方千里者九，齊集有其一。以一服八，何以異於鄒敵楚哉？」**注**固，辭也。言小弱固不如強大。集會齊地，可方千里，譬一州耳。今欲以一州服八州，猶鄒欲敵楚。**疏**「海內」至「者九」○

正義曰：《王制》云：「凡四海之內九州，州方千里。」注云：

「大界方三千里，三三而九，方千里者九也。其一爲縣內，餘八各立一州，此殷制也。周公制禮，九州大界方七千里，七七四十九，方千里者四十有九也。其一爲畿內，餘四十八八州，各方千里者六。」又云：「夏末既衰，夷狄內侵，諸侯相并，土地減，國數少。殷湯承之，更制中方三千里之界，亦分爲九州。周公復唐虞之舊域。」《尚書·皋陶謨》云：「弼成五服，至于五千。」《釋文》引鄭氏注云：「五服已五千，又弼成爲萬里。」《王制》疏亦引此。鄭注云：「輔五服而成之，至于面方各五千里，四面相距爲方萬里。堯初制五服，服各五百里。要服之內，方四千里，曰九州，其外荒服曰四海。此禹所受地。記書曰「昆侖山東南，地方五千里，名曰神州」者，禹弼五服之殘數。亦每服者合五百里，故有萬里之界，萬國之封焉。猶用要服之內爲九州，州更方七千里，七七四十九，得方千里者四十九。其一以爲圻內，餘四十八，八州分而各有六。」然則唐、虞與殷海內之地方三千里，夏、周海內之地方七千里。孟子所說，唐、虞及殷之制也。古者內有九州，外有四海。《爾雅·釋地》云：「九夷、八狄、七戎、六蠻謂之四海。」此「海內」即指四海之內，謂要服之內也。○**注**「固辭」至「強大」○正義曰：高誘注《國策》及《呂氏春秋》

皆訓固爲必。固然者，必然之辭，固不如强大，即必不如强大。《禮記·投壺》注云：「固之言如故也。」如故即不可遷移之辭也。○注「集會」至「州耳」○正義曰：「集，會」，《爾雅·釋言》文。凡方千里，則爲積一百萬里。《國策》蘇秦爲趙合從說齊宣王曰：「齊南有泰山，東有琅邪，西有清河，北有渤海，此所謂四塞之國也。」齊地方二千里，蘇秦侈言齊之强大，孟子言齊地小弱，故一言「方二千里」，一言「方千里」，大抵俱約略之辭。太山至渤海，南北不足千里，自清河至琅邪，東西不止千里。絕長補短，計其積數，約方千里，故云「集會」也。蓋亦反其本矣。注王欲服之之道，蓋當反王道之本。疏注「蓋當」至「之本」○正義曰：蓋與盍古通。周氏廣業《孟子異本考》云：①《增修禮部韻略》盍韻蓋字引《孟》爲證。《韻會》合韻「盍或作蓋」，亦引《孟》。按，《史記·孔子世家》「夫子蓋少貶焉」，《檀弓》「子蓋慎諸」，並以盍爲蓋。此從閩、監、毛、孔諸本作「蓋」，韓本、足利本作「盍」，「蓋」與「盍」同也。趙氏以「當」明「蓋」，《爾雅·釋詁》云：「盍，合也。」《史記·司馬相如傳》《索隱》引文穎云：「蓋，合也。」趙氏讀「蓋」爲「合」，故以「當」釋「蓋」。「蓋當」猶「合當」也。下文「則盍反其本矣」與此義同，故趙

氏不複注。或謂此文「蓋」字乃「盍」字之誤，或謂下文「蓋」字該改「盍」字，說者又謂蓋是疑辭，盍是決辭，皆非是。王氏引之《經傳釋詞》云：「凡言『盍亦』者，以亦爲語助。」《左傳》僖二十四年「盍亦求之」，盍求之也。昭元年「子盍亦遠績禹功而大庇民乎」，盍遠績禹功而大庇民也。《吳語》「王其盍亦鑑於人」，盍鑑於人也。《孟子》「盍亦反其本矣」，盍反其本也。今王發政施仁，使天下仕者皆欲立於王之朝，耕者皆欲耕於王之野，商賈皆欲藏於王之市，行旅皆欲出於王之塗，天下之欲疾其君者皆欲赴愬於王。其若是，孰能禦之？注反本道、行仁政若此，則天下歸之，誰能止之者？

王曰：「吾惛，不能進於是矣。願夫子輔吾志，明以教我。我雖不敏，請嘗試之。」注王言我情思惛亂，不能進行此仁政，不知所當施

①「異本考」，原誤作「逸文考」，今從沈校據《孟子四考》改。

行也。欲使孟子明言其道以教訓之。我雖不敏，願嘗使少行之也。

疏注「王言」至「惛亂」○正義曰：《說文》心部云：「惛，不憶也。」《國策》「皆惛于教」，高誘注云：

「惛，不明也。」「不明」猶「不憶」。《廣雅·釋訓》云：「惛惛，

亂也。」《詩·民勞》「以謹惛惛」，毛傳云：「惛惛，大亂也。」

「惛」與「昏」同。《呂氏春秋·貴直》篇云：「先生之老與昏與？」高誘注云：「昏，亂也。」《楚辭·涉江》篇「固將重昏而

終身」，王逸注云：「昏，亂也。」《國語》「僮昏不可使謀」，韋

昭注云：「昏，闇亂也。」故趙氏以「亂」解「惛」。○注「不能」

至「之也」○正義曰：《周禮·大司馬》「徒銜枚而進」，注

云：「進，行也。」《考工記·輪人》「進而行之」，注云：「進猶

行也。」故趙氏以「進」為「行」。《廣雅·釋詁》云：「試，嘗

也。」《檀弓》注云：「嘗，試也。」「嘗」、「試」二字義同。《文

選·思元賦》「非余心之所嘗」，舊注云：「嘗，行也。」則

「嘗」、「試」亦訓為行。桓公八年《公羊傳》注云：「嘗者，先

辭也。秋穀成者非一，黍先熟可得薦，故曰嘗。」《一切經音

義》引《廣雅》云：「嘗，暫也。」嘗試之義，謂未即全行，先暫

行之，如飲食未大歡，先以口嘗之，故《說文》旨部云：「嘗，

口味之也。」趙氏云：「嘗使少行之」，「少行」即「暫行」，解

「試」字，謂先使暫行之也。曰：「無恒產而有恒心

者，惟士為能；若民，則無恒產因無恒心。

注孟子為王陳其法也。恒，常也。產，生也。恒產，

則民常可以生之業也。恒心，人所常有善心也。惟

有學士之心者，雖窮不失道，不苟得耳，凡民迫

於飢寒則不能守其常善之心。

疏注「恒常」至「業也」

○正義曰：「恒，常」，《爾雅·釋詁》文。服虔注《左傳》、韋

昭注《國語》，皆以「生」訓「產」。《詩·谷風》「既生既育」，箋

云：「生謂財業也。」《漢書·嚴助傳》云「民生未復」，注云：

「生謂生業。」《大宗伯》「天產」謂六牲之畜，「地產」謂土地之

性。《呂氏春秋·上農》篇高誘注云：「地產，嘉穀也。」然則

恒產者，田里樹畜，民所恃以長養其生者也。苟無恒

心，放辟邪侈，無不為已。及陷於罪，然後從

而刑之，是罔民也。**注**民誠無恒心，放溢辟邪，

侈於姦利，犯罪觸刑，無所不為。乃就刑之，是由張

羅罔以罔民者也。**疏**注「放溢」至「姦利」○正義曰：《漢

書·五行志》引京房《易傳》云：「君樂逸人茲謂放。」《韋賢

傳》集注引臣瓚云：「逸，放也。」《說文》兔部云：「逸，失

也。逸、洩、失、溢音同義通，故趙氏以「溢」釋「放」，謂縱洩放蕩也。《淮南子·精神訓》「而不僻矣」，高誘注云：「僻，邪也。」《漢書·晁錯傳》云「使主內無邪僻之行」，《董仲舒傳》云「邪僻之說息」，《杜欽傳》云「反因時信其邪辟」，《谷永傳》云「蕩滌邪僻之惡志」，《佞倖石顯傳》云「知顯專權邪辟」，辟即僻。《文選·登徒子好色賦》注云：「邪，僻也。」邪、辟二字可互注。趙以邪釋辟，即以辟釋邪，明辟、邪二字義同。《音義》云：「侈，丁作移。」阮氏元《校勘記》云：「《考工記·鳧氏》『侈弇之所由興』，注云：『故書侈作移。』又《儀禮·少牢》篇『侈袂』，又《禮記》『衣服以移之』，是移爲侈之假借。」按：《禮記·表記》注云：「移，讀如水汜移之移。移猶廣大也。」「水汜移」猶云「水汜溢」。《儀禮·少牢饋食》注云：「侈者，蓋半士妻之袂以益之。」以益訓侈，益猶溢也。趙氏以溢釋放，則放義同侈，故侈不訓其義而云「侈於姦利」。「姦利」二字統承「放辟邪侈」而言。罔與網同。《說文》網部云：「罔，庖犧所結繩以漁。罔，或從亡。闕，或從系。」「罔」即「罔羅」之「罔」也。《音義》云：「罔民，張如字。丁作『司民』，不同。」①阮氏元《校勘記》：「丁本作『司』，讀爲『伺』。司，伺古通用。依趙注則是『罔』字。丁作『司』者，非趙本也。」焉有仁人在位，罔民而可爲

也？**注**安有仁人爲君，罔陷其民，是政何可爲

也？是故明君制民之產，必使仰足以事父母，俯足以畜妻子，樂歲終身飽，凶年免於死亡。然後驅而之善，故民之從之也輕。**注**

言「衣食足，知榮辱」，故民從之，教化輕易也。**疏**注

「言衣」至「榮辱」○正義曰：《管子·牧民》篇云：「倉廩實，知禮節，衣食足，知榮辱。」《說苑·說叢》亦引此。○注「故民」至「易也」○正義曰：《漢書·賈誼傳》集注引蘇林云：

「輕，易也。」高誘注《呂氏春秋·知接》篇亦云：「輕，易也。」故趙氏以「易」釋「輕」。

今也制民之產，仰不足以

事父母，俯不足以畜妻子，樂歲終身苦，凶年

不免於死亡。此惟救死而恐不贍，奚暇治禮

義哉？**注**言今民困窮，救死恐凍餓而不給，何暇

修禮行義也？**疏**「今也」至「身苦」○正義曰：趙氏佑

①「不同」，《孟子音義》作「下音同」。或此屬焦疏敘述文字。

②「樂」，原誤作「歲」，今據廖本改。

《溫故錄》云：「或問明君制民之產，如下『五畝之宅』云云是也。迨古法既壞，但有奪民之產，未有能制民之產者也，孟子何以於今無異辭？蓋凡古法變易之初，未嘗不託於權時制宜之說。是故齊作內政，晉作輟田，魯作丘甲，用田賦，鄭作丘賦，固皆以爲制民之產也；李悝之盡地力，商鞅之開阡陌，莫不以爲制民之產也。而適使民仰不足以事，俯不足以畜，爲其本不從民起見也。夫彼即不爲民，亦何樂使至此而不知其必使至此也？爲夫制之非其制也。後世井法既萬無可復，限民名田之議亦有不能行，民生田宅一切皆民自營之，上之人聽其自勤自惰，自貧自富，自買自賣於其間，而惟征科之是計，安問所謂制民之產？民亦無取乎上之制。何也？立一法反增一擾也。宋之營田制置諸使，其已事也。然則善長民者又將以何爲知本乎？」○注「今民」至「義也」○正義曰：仰不足事，俯不足畜，樂歲苦，凶年死亡，所謂「困窮」也。《漢書·食貨志》《東方朔傳》《趙充國傳》集注皆云：「贍，給也。」《說文》系部云：「給，相足也。」凶年死於凍餓，有衣食則不凍餓，可救其死，故「救死」者，「恐凍餓」也。恐凍餓而不足，尚不能免於凍餓也。治猶理也。脩之行，即是「治禮義」也。王欲行之，則盍反其本矣。五

畝之宅，樹之以桑，五十者可以衣帛矣；雞豚狗彘之畜，無失其時，七十者可以食肉矣；百畝之田，勿奪其時，八口之家可以無飢矣，謹庠序之教，申之以孝悌之義，頒白者不負戴於道路矣。老者衣帛食肉，黎民不飢不寒，然而不王者，未之有也。」**注**其說與上同。八口之家，次上農夫也。孟子所以重言此者，乃王政之本，常生之道，故爲齊梁之君各具陳之。當章究義，不嫌其重也。**疏**注「其說」至「重也」○正義曰：此節與第三章末節同，但彼言「數口」此言「八口」，彼言「七十者」此言「老者」，故趙氏以次上農夫解之。雖隨意立文，然以老者與七十者互明，謂不獨七十，凡六十及八十以上例此也，以八口與數口互明，謂不獨八口，凡九人及七人以下例此也。「王政」即「仁政」，「常生」即「恒產」。上兩言「反其本」，至此詳言之，故云「王政之本，常生之道」也。《列子·天瑞》篇云：「常生常化者無時不生，無時不化。」義各異而大指則同。

章指：言典籍攸載，帝王道純；桓文

之事，譌正相紛。撥亂反正，聖意弗珍。故曰「後世無傳未聞」。仁不施人，猶不成德；釁鐘易牲，民不被澤。王請嘗試，欲踐其跡，答以反本，惟是爲要。此蓋孟子不屈道之言也。

疏「典籍」至「未聞」○正義曰：此言首兩節之指也。「典籍」謂《易》《尚書》《詩》《禮》《春秋》也。《淮南子·原道訓》云「純德獨存」，高誘注云：

「純，不雜糅也。」《文選·西京賦》薛綜注云：「紛，雜也。」純與紛相反。帝王之道專一於正，故純；桓文之事

譌正相雜，故紛。紛亦亂也。哀公十四年《公羊傳》云：

「君子曷爲爲《春秋》？」撥亂世，反諸正，莫近諸《春秋》。何休注云：「撥猶治也。聖人治桓文之紛亂，反乎堯舜之正道。」《爾雅·釋詁》云：「珍，美也。」《廣雅·釋

詁》云：「珍，重也。」謂孔子之意不重桓文之事也。

○「仁不」至「言也」○正義曰：此言「德何如」以下至末之指也。仁但施於禽獸不施於人，猶不可成其爲德。

「易性」，《考文》古本作「易性」，誤也。易性則澤及於牛未至於民也。澤即恩也。被猶及也。周氏廣業作「飲

澤」，云：「按，王者德澤如膏雨，故曰飲。」《舊唐書·音

樂志》云：「百蠻飲澤，萬國來王。」本此。「跡與迹同。《楚辭·天問》王逸注云：「迹，道也。」「踐其跡」猶言「履其道」也。《考文》古本「跡」作「路」。《史記·孟子列傳》云：「天下方務合從連橫，以攻伐爲賢，而孟軻乃述唐虞之德，是以所如者不合。」又云：「孟軻困於齊梁。」故趙氏以崇王黜霸爲「不屈道之言」。

姪廷琮廷弼校字

孟子正義卷三終

孟子正義卷四

江都縣鄉貢士焦循撰集

孟子卷第二

梁惠王章句下凡十六章。

莊暴見孟子，曰：「暴見於王，王語暴以好樂，暴未有以對也。」曰：「好樂何如？」**注**莊暴，齊臣也。不能決知之，故無以對，而問曰王好樂何如。**疏**注「莊暴齊臣也」○正義曰：此章承上章。上章為齊宣王，此章之王亦宣王也。王為齊王，知莊暴為齊臣矣。下注以世俗之樂為鄭聲，^①則趙氏以「好樂」為好音樂也。孟子曰：「王之好樂甚，則齊國其庶幾乎？」

乎？**注**王誠能大好古之樂，齊國其庶幾治乎？**疏**注「王誠」至「治乎」○正義曰：趙氏以甚訓大，故以誠能大好解好樂甚。云古之樂者，探下文言之。

他日見於王，曰：「王嘗語莊子以好樂，有諸？」**注**孟子問，王有是語不。**疏**「王嘗」至「有

諸」○正義曰：閻氏若璩《釋地》又續云：「莊暴，齊臣。君前臣名，禮也。莊子對孟子猶三稱名，而孟子於王前不一斥其名，曰「莊子」，此為記者之誤。」○注「有是語不」○正義曰：阮氏元《校勘記》云：「《考文》古本不作否。按，古可否字祇作不。」王變乎色，曰：「寡人非能好先王之樂也，直好世俗之樂耳。」**注**變乎色，慍恚莊子道其好樂也。王言我不能好先王之樂也，直好世俗之樂，謂鄭聲也。曰：「王之好樂甚，則齊其庶幾乎？」今之樂，由古之樂也。**注**甚，大也。謂大要與民同樂，古今何異也？**疏**「由古之樂也」○正義曰：由與猶通用。阮氏元《校勘記》云：「石經、宋本、岳

①「下注」上，依疏例當標「○注好樂○」五字。

本、咸淳衢州本、孔本、《考文》古本由作猶。」○注「甚大」至「異也」○正義曰：《後漢書·樊準傳》注云：「大猶甚也。」大甚之大，讀若泰，與廣大之大古通。《素問·標本病傳論》云「謹察間甚，以意調之」，注云：「甚謂多也。」①《禮記·郊特牲》云「大報天而主日也」，注云：「大，猶徧也。」徧與多義亦相近。「然則王之好樂甚」，即謂王之好樂徧，徧則充滿廣衆，合人已、君民而共之矣。《漢書·陳咸傳》注云：「大要，大歸也。」無論古樂今樂，俱要歸於與民同樂，故云大要。趙氏以大訓甚不屬於前「齊國其庶幾」之下，而屬於此下，「大要」二字承而言之，似以前之「好樂甚」謂大好古樂，此之「好樂甚」謂大要與民同樂，甚之爲大同，而前後義異。前渾言好樂，則自宜古不宜今，王既自明爲世俗之樂，則孟子順其意而要歸於與民同樂。乃揆經文，前後兩稱「好樂甚」，皆謂好樂能徧及於民，不宜殊異。趙氏「大要」之大，不必即訓甚爲大之大。「大要」二字自解今樂猶古樂之義，惟「甚大」之訓誤係於此，轉令學者惑耳。曰：「可得聞與？」注王問，古今同樂之意寧可得聞邪？曰：「獨樂樂，與人樂樂，孰樂？」注孟子復問，王獨自作樂樂邪，與人共聽樂樂也？曰：「不若與人。」注王

曰獨聽樂，不如與衆共聽之樂也。曰：「與少樂樂，與衆樂樂，孰樂？」注孟子復問，王與少人共聽樂樂邪，與衆人共聽樂樂也？曰：「不若與衆。」注王言不若與衆人共聽樂樂也。「臣請爲王言樂：注孟子欲爲王陳獨樂與衆人樂之狀。疏曰獨」至「言樂」○正義曰：《音義》云：「獨樂樂，丁上音岳，下音洛，下文及注樂樂皆同。孰樂音洛，此章內孰樂、樂邪、樂也、同樂、樂其，字皆同。餘並音岳。」趙氏解獨樂樂、與人樂樂、與少樂樂、與衆樂樂，凡上樂字爲作樂、聽樂，則上音岳、下音洛是也。閻氏若據《釋地》又續云：「宋陳善《捫蝨新語》云：『莊暴一章皆言悅樂之樂，而世讀爲禮樂之樂，誤矣。惟鼓樂當爲禮樂，其他獨樂樂、與衆樂樂，亦悅樂之樂也。不然，方言禮樂，又及田獵，無乃非類乎？』真通人之言也。蓋孟子告齊宣以先王無流連之樂，荒亡之行，一旦語及其心病，故不覺變色，答以云云。若果爲好禮樂，莊暴庸臣，縱不能對其所以，亦何至向孟子而猶諮詢何如乎？」

①「甚謂多也」，《素問》作「間謂多也，甚謂少也」，本書當轉據《經籍纂詁》卷八十六而誤。

正緣好歡樂，與好貨、好色一例事耳。今樂、古樂之異，子夏對魏文侯辯之甚悉。即齊音放辟喬志，與《韶》樂之在齊者，可比而同邪？不可比而同，豈孟子之言，先順其君以非道，而後轉之於當道邪？應不至此。必讀為悅樂字，文義方協。郝氏《孟子解》亦云：「樂樂猶言樂其樂，上樂謂好，下樂謂所樂之事也。至所樂之事，下文鼓樂其一也，田獵又其一也，故曰臣請為王言樂。」《釋地》三續云：「或謂子解『今之樂由古之樂』為歡樂之樂，但『古之樂』三字別未見。愚曰：《左傳》昭公二十年，晏子曰『古而無死，則古之樂』，非與？」翟氏灝《孟子考異》云：「儀禮·鄉射禮『請以樂樂賓』《釋文》音義云：『下樂音洛，又皆如字。』舊注讀上樂如字。《儀禮》堪為證。《後漢書·臧宮傳》引《黃石公記》云：『有德之君，以所樂樂人；無德之君，以所樂樂身。』《晏子春秋·雜上》篇：『樂者上下同之，故天子與天下，諸侯與境內，自大夫以下各與其僚，無有獨樂。今上樂其樂，下傷其費，是獨樂也。』《說苑》載晏子語同。陳氏欲讀諸樂字盡為悅樂，觀《晏子春秋》與《後漢書》，亦不為無因。舊注所倚，既屬有經傳大典，其他子史中依稀之說，終恐難為據。」

「今王鼓樂於此，百姓聞王鐘鼓之聲，管

籥之音，舉疾首蹙頰而相告曰：『吾王之好鼓樂，夫何使我至於此極也？父子不相見，兄弟妻子離散。』**注**鼓樂者，樂以鼓為節也。管，笙。籥，簫。或曰籥若笛，短而有三孔。《詩》云「左手執籥」，以節衆也。疾首，頭痛也。蹙頰，愁貌。言王擊鼓作樂，發賦徭役皆出於民，而德不加之，故使百姓愁。**疏**「舉疾首蹙頰」^①○正義曰：《音義》云：「丁云：舉，猶皆也，屬下句。」舉，俱音近，假借與俱同，故猶皆。《左傳》注、《漢書》集注、《荀子》注、《莊子》注、《史記索隱》多如此訓。丁氏特標屬下，然則當時固有屬上者。○注「鼓樂」至「節也」○正義曰：《周禮·地官·鼓人》：「掌教六鼓四金之音聲，以節聲樂。」是樂以鼓為節也。《禮記·學記》云：「鼓無當於五聲，五聲弗得弗和。」《荀子·樂論》云：「鼓，其樂之君邪？」《周禮·大司樂》以下皆屬春官，惟鼓人屬地官，標異於衆樂之外，故衆樂統謂之樂，而鼓專謂之鼓，與樂相配稱為鼓樂。趙氏以擊鼓解鼓字，以作樂解樂字。○注「管笙」至「衆也」○正義曰：《爾雅·釋樂》云：

①「頰」，原誤作「頰」，今據經、注文改。

「大管謂之箛，其中謂之篴，小者謂之篴。大箛謂之產，其中謂之仲，小者謂之筇。」又：「大笙謂之巢，小者謂之和。大箛謂之言，小者謂之筇。」笙與管別，箛與箛別。趙氏以笙釋管，以箛釋箛者，《說文》竹部云：「箛，管三十六簧也。笙，十三簧。《廣雅·釋樂》云：「笙以瓠爲之，十三管，官管在左方。」「箛，象笙，三十六管，官管在中央。」段氏玉裁《說文解字注》云：「箛管三十六簧也，管下當有樂字。凡竹爲者皆曰管。笙十三簧，蒙上管樂而言。」然則箛、笙，《說文》並以管字冠之。管之三十六簧者爲箛，管之十三簧者爲笙，是笙爲管也。《說文》竹部云：「箛，三孔箛也。大者謂之笙，其中謂之箛，小者謂之筇。」又云：「筇，小箛也。」《廣雅·釋樂》云：「箛謂之箛，大者二十四管，小者十六管，有底。」《淮南子·齊俗訓》云：「若風之過箛」，高誘注云：「箛，箛也。」箛之中者名箛，與箛名箛同，故趙氏以箛釋箛也。又引或說者，《周禮·笙師》注云：「箛如箛，三空。」《說文》竹部云：「別爲書僮竹筇。」①《箛部》：「箛，樂之竹管，三孔，所以和衆聲也。」箛、箛古通用，三孔即三空，和衆聲即節衆，箛即箛也。引《詩》左手執箛，《邶風·簡兮》篇文。毛傳云：「箛六孔。」箋云：「碩人多材多藝，又能箛舞。」《周禮·箛師》：「掌教國子舞羽吹箛」，注云：「文舞有持羽吹箛者，所謂箛舞

也。《文王世子》曰「秋冬學羽箛」，《詩》曰「左手執箛，右手秉翟」。趙氏以箛舞之箛，即此節衆音之箛，故引《詩》耳。唯毛以爲六孔，與鄭氏、趙氏俱異。按，《說文》以箛爲三孔，箛管爲如箛六孔，箛爲七孔箛。《廣雅·釋樂》云：「箛謂之箛，有七孔。管象箛，長尺圍寸，六孔，無底。箛長尺四寸，八孔，一孔上出寸三分。」然則箛八孔最長，箛七孔次之，管六孔又次之，箛三孔最小，四物同類，以長短異名。毛傳以箛爲六孔，蓋以管爲箛也；《廣雅》以箛有七孔，蓋以箛爲箛也。杜子春注《笙師》讀箛爲蕩滌之滌，「今時所吹五空竹箛」，則箛有五孔，爲漢時所有也。《史記索隱》以箛爲今之橫笛，七孔，一孔上出，則以箛爲箛矣。鄭司農以管如箛，六孔。康成則謂管如箛而小，「併兩而吹之，今大予樂官有焉」，此據當時所見，與司農異，蓋別一管也。要之，管之名有二：其一爲笙竿箛箛等器之統名，此趙氏以笙釋管者也；其一爲六孔之名，與箛同類而小別者也。箛爲如箛三孔之器，箛七孔，箛故短於箛，其名箛與箛同，故趙氏直以箛爲箛。而箛編管參差，象鳳翼，與三孔之箛實別，故趙氏以

①「別爲書僮竹筇」，《說文》作「箛，書僮竹筇也」，倘「別爲」不誤，則其上「云」字衍，或其上脫「箛」字。

若笛短而有三孔者爲或說，與簫別也。○注「疾首」至「愁貌」○正義曰：《詩·衛風》云：「願言思伯，甘心首疾。」因憂思而頭爲之病。《說文》疒部云：「疾，病也。」「痛，病也。」疾、痛義同。《周禮·天官·疾醫》「春時有瘡首疾」，注云：「瘡，酸削也。首疾，頭痛也。陽氣爲憂愁所鬱，猶春木爲金沴也。」《說文》頁部云：「頰，鼻莖也。顴，^①或從鼻、曷。」《廣雅·釋親》云：「頰，頰也。」王氏念孫《疏證》云：「頰爲鼻頰之頰，頰通作準，《漢·高帝紀》「隆準而龍顏」，服虔曰：「準，音拙。」李斐曰：「準，鼻也。」文穎曰：「音準的之準。」李說，文音是也。」段氏玉裁《說文解字注》云：「鼻謂之準，鼻直莖謂之頰。《史記》唐舉相蔡澤曰：「先生曷鼻巨肩，顴顏顴顴。」既言鼻又言頰者，曷同過，過鼻言其內不通而顴，顴顴則言在外鼻莖也。鼻有中斷者，蔡澤、諸葛恪之相是也；有憂愁而蹙縮者，孟子言「顴頰」是也；有病而辛頰者，此言其內酸辛，《素問》所言是也。」今王田獵於此，百姓聞王車馬之音，見羽旄之美，舉疾首蹙頰而相告曰：「吾王之好田獵，夫何使我至於此極也？父子不相見，兄弟妻子離散。」此無他，不與民同樂也。注田獵無節，以

非時取牲也，羽旄之美，但飾羽旄，使之美好也；發民驅獸，供給役使，不得休息。故民窮極而離散奔走也。疏注「田獵」至「牲也」○正義曰：《周禮·夏官·大司馬》：「中春教振旅，遂以蒐田，中夏教芟舍，遂以苗田，中秋教治兵，遂以獮田，中冬教大閱，遂以狩田。」隱公五年《左傳》臧僖伯曰：「春蒐、夏苗、秋獮、冬狩，皆於農隙以講事也。」是田獵有時也。桓公四年《穀梁傳》云：「春日田，夏曰苗，秋日蒐，冬曰狩，四時也，四用三焉。」^②何休注《公羊》謂夏但去害苗，不田獵。^③《禮記·月令》：「季春，田獵，置罟，羅網，畢翳，餒獸之藥，毋出九門。」孟夏之月，驅獸毋害五穀，毋大田獵。」《王制》云：「獮祭魚，然後虞人入澤梁。豺祭獸，然後田獵。鳩化為鷹，然後設罝羅。」則田獵有節，不可以非時取也。《詩·齊風》序云：「《還》，刺荒也。哀公好田獵，從禽獸，而無厭。」《盧令》，刺荒也。襄公好田獵，畢弋而不修民事，百姓苦之。」此謂田獵無節者也。《天

①「顴」，原無，今從沈校據《說文》補。

②「也四」，《穀梁傳》作「之田」。

③「何休」至「不田獵」，何休注無明文，疑出秦惠田《五禮通考》。

官·太宰：「以八則治都鄙。八曰田役，以馭其衆。」《地官·大司徒》：「大田役，以旗致萬民，而治其徒庶之政令。」《鄉師》：「凡四時之田，出田法於州里，簡其鼓鐸旗物兵器，修其卒伍。」其州長、黨正、族師、縣師、遂人、遂師、縣正、稍人等，皆掌作民起衆。是田獵必「發民驅獸，供給役使」也。○注「羽旄」至「好也」○正義曰：《禹貢》荊州「厥貢羽毛」，《史記·夏本紀》作「羽旄」。旄，毛二字通也。僖公二十二年《左傳》重耳對楚子曰：「羽毛齒革，則君地生焉。」《楚語》王孫圉亦云：「楚之所寶，齒角、皮革、羽毛，所以備賦用。」襄公十四年《左傳》云：「范宣子假羽毛於齊」，注云：「析羽爲旄，王者游車之所建。齊私有之，因謂之羽毛。」《定公四年》《左傳》云：「晉人假羽旄於鄭」，注亦云：「析羽爲旄，王者游車之所建。鄭私有之，因謂之羽旄。」《爾雅·釋天》云：「注旄首曰旌，錯革鳥曰旗。」《詩》疏引孫炎云：「析五采羽注旄上也。其下亦有旒縵。」又引李巡云：「旄，牛尾，注干首。」鄭氏注《明堂位》云：「綏爲注旄牛尾於杠首，所謂大麾。」《周禮》：「大麾以田也。」《曲禮》云：「前有水則載青旌，前有塵埃則載鳴鳶，前有車騎則載飛鴻，前有士師則載虎皮，前有摯獸則載貔貅。」注云：「載謂舉於旌首以警衆也。」鴻鳶則載其羽，虎貔則載其皮，是皆「飾羽毛，使之美好」也。

晉既假於齊，又假於鄭，必齊、鄭所飾精美異常，惟晉人所欲見矣。

「今王鼓樂於此，百姓聞王鐘鼓之聲，管籥之音，舉欣欣然有喜色而相告曰：『吾王庶幾無疾病與？何以能鼓樂也？』」注「百姓欲令王康強而鼓樂也。今無賦斂於民而有惠益，故欣欣然而喜也。今王田獵於此，百姓聞王車馬之音，見羽旄之美，舉欣欣然有喜色而相告曰：『吾王庶幾無疾病與？何以能田獵也？』此無他，與民同樂也。」注「王以農隙而田，不妨民時，有愍民之心，因田獵而加撫恤之，是以民悅也。」疏注「有愍民之心」○正義曰：閩、監、毛二本「愍」作「憫」。《說文》心部云：「愍，痛也。」昭公元年《左傳》云「吾代二子愍矣」，服虔注云：「愍，憂也。」《廣雅·釋詁》「一訓憂，一訓愛。惟其愛故憂之，義亦相備。僖公二十年《穀梁傳》云「是爲閔宮也」，《漢書·五行志》作「愍宮」。《毛詩》序，《禮記·儒行》《釋文》並云：「閔，本作愍。」是愍或通閔。惟《淮南子·主術訓》云「年衰志憫」，高誘注云：「憫，憂

也。」慙之作憫，非其舊也。今王與百姓同樂，則王矣。」**注**孟子言王何故不大好樂，效古賢君與民同樂，則可以王天下也，何惡莊子之言王好樂也？

章指：言人君田獵以時，鐘鼓有節，發政行仁，民樂其事，則王道之階在於此矣。故曰「天時不如地利，地利不如人和」矣。**疏**「故曰」至「和矣」○正義曰：《考文》古本矣作也。周氏廣業云：「按，《尉繚子·兵議》篇引「天時」二句作「古語」，陸機《辨亡論》引稱「古人之言」。意孟子自有所本。《史記》引「親之欲其貴，愛之欲其富」，亦以為古人之言。」

齊宣王問曰：「文王之囿方七十里，有諸？」**注**王言聞文王苑囿方七十里，寧有之？**疏**

注「王言」至「有之」○正義曰：《說文》口部云：「囿，苑有垣也。一曰禽獸曰囿。」艸部云：「苑，所以養禽獸也。」《國語·周語》云「囿有林池」，《楚辭·愍命》篇云「熊羆羣而逸囿」，韋昭、王逸皆注云：「囿，苑也。」《淮南子·本經訓》云

「侈苑囿之大」，高誘注云：「有牆曰苑，無牆曰囿。」《一切經音義》引呂忱《字林》同。然則《說文》言「苑有垣」，三字連屬，明囿無垣也。《呂氏春秋·重己》篇高誘注云：「畜禽獸所，大曰苑，小曰囿。」《周禮·天官·閭人》「王宮每門四人，游亦如之」，注云：「囿，御苑也。游，離宮也。」《地官·囿人》「掌囿游之獸禁」，注既云「囿，今之苑」，又云：「囿游，囿之離宮小苑觀處也，養鳥獸以宴樂觀之。」賈氏疏云：「《孟子》：「文王之囿七十里，芻蕘者往焉。」天子之囿百里，并是田獵之處。又《書傳》云：「鄉之取於囿，是勇力取。」是為蒐狩之常處也。今此云「禁」，故知非大囿，是小苑觀處也。離宮小於御苑，故小為囿，此囿方七十里，則即苑也。蓋散文則通耳。孟子對曰：「於傳有之。」**注**於傳文有是言。**疏**注「於傳文有是言」○正義曰：劉熙《釋名·釋典藝》云：「傳，傳也，以傳示後人也。」傳述為文，故云「傳文」。《毛詩》疏引作「書傳有之」。曰：「若是，其大乎？」**注**王怪其大。曰：「民猶以為小也。」**注**言文王之民尚以為小也。曰：「寡人之囿方四十里，民猶以為大，何也？」**注**王以為文王在岐、豐時，雖為西伯，土地尚狹，而囿已大矣，今我

地方千里而囿小之，民以爲寡人囿大，何故也？

疏

注「王以」至「故也」○正義曰：閻氏若璩《釋地》云：「從來說者皆以文王七十里之囿爲疑。《三輔黃圖》云：『靈囿在長安縣西四十二里。』王伯厚以『文王之囿方七十里』注於下。余謂今鄠縣東三十里，正《漢·地理志》所謂『文王作鄠，有鄠杜竹林，南山檀柘，號稱陸海，爲九州膏腴』者。文王當日弛以與民，恣其芻獵以往，但有物以蕃界之，遂名之曰囿云爾。此實作邑于豐時事，非初岐山事也。豐去岐三百餘里。說者不察乎囿之所在，徒執以岐山國僅百里，不知文王由方百里起耳，豈終於是者哉？」閻氏據閻、監、毛三本趙注作「岐山之時」，故辨囿在豐不在岐也；宋本、廖本、《考文》古本、孔本、韓本並作「岐豐時」，則趙氏已兼豐言之。《詩·大雅·靈臺》篇「王在靈囿」，毛傳云：「囿，所以域養禽獸也。天子百里，諸侯四十里。」孔氏正義云：「解正禮耳。其文王之囿則七十里，故《孟子》云：『文王之囿方七十里，寡人之囿方四十里。』是宣王自以爲諸侯而問，故云諸侯四十里。以宣王不舉天子，而問及文王之七十里，明天子不止七十里，故宜以爲百里也。」《毛詩》舉百里、四十里明靈囿，則文王七十里之囿即靈囿無疑，閻氏說是也。《穀梁》成公十八年「築鹿囿」，疏引《毛詩》傳作「天子百里，諸侯三十

里」，此「三十」自是誤文。乃揚雄《羽獵賦》云：「文王囿百里，民尚以爲小，齊宣王囿四十里，民以爲大。」袁宏《後漢紀》樂松云：「宣王之囿五十里，民以爲大；文王百里，民以爲小。」《後漢書·楊震傳》樂松等言「齊宣五里」，則脫落「十」字也。然則文王之囿百里，古有此說。故毛氏以爲天子百里，非因孟子言七十里而約言之也。唐陸贄《奏罷瓊林庫狀》云：「周文王之囿百里，時患其尚小；齊宣王之囿四十里，時病其太大。」此本揚雄說也。惟樂松言宣王囿五十里，與《孟子》異，亦與毛傳殊。臧氏琳《經義雜記》云：「《穀梁》成十八年「築鹿囿」，疏云：『《毛詩》傳云：『囿者，天子百里，諸侯三十里。』《詩》傳蓋據《孟子》稱文王囿七十里，寡人囿三十里，故約之爲天子百里，諸侯三十里耳。」琳案，袁、范《漢書》皆言文王囿百里，宣王囿五十里。楊疏引《毛詩》傳「諸侯三十里」，三即五字之譌。古本《孟子》蓋作「文王之囿方百里，寡人之囿方五十里」，故毛公據之以分天子、諸侯之制。」按：《周禮·天官·閻人》疏引《白虎通》云：「天子百里，大國四十里，次國三十里，小國二十里。」成公十八年《公羊傳》注云：「天子囿方百里，公侯十里，伯七里，子男五里，皆取一也。」意者《公羊傳》所指爲離宮，《毛詩》傳、《白虎通》所指爲御苑與？乃天子則皆云百里，而《白虎通》自四

十里以下析言之，無五十里者，則樂松「五十里」之說未足爲「三十里」之證。《公羊傳》疏以「天子囿方百里，公侯十里，伯七里，子男五里」爲「《孟子》文，《司馬法》亦云」，今《孟子》固無此文也。趙氏佑《溫故錄》云：「文王必不得有七十里之囿。孟子以爲『於傳有之』，非正答也。」閻本已作以，阮氏元《校勘記》云：「以，已古通用，此處自作已爲長。」曰：

「文王之囿方七十里，芻蕘者往焉，雉兔者往焉，與民同之。民以爲小，不亦宜乎？」

注芻

蕘者，取芻薪之賤人也。雉兔，獵人取雉兔者。言文王聽民往取禽獸，刈其芻薪。民苦其小，是其宜也。

疏注「芻蕘」至「人也」○正義曰：《毛詩·板》篇「詢

于芻蕘」，傳云：「芻蕘，采薪者。」《說文》艸部云：「芻，刈草

也。象包束草之形。」蕘，薪也。「薪，蕘也。」蓋芻所以飼牛

馬，蕘所以供燃火。芻義易明，故以「芻薪」釋「芻蕘」。《月

令》「收秩薪柴」，注云：「大者可析謂之薪，薪施炊爨。」是

也。揚雄《羽獵賦》云：「麋鹿芻蕘，與百姓共之。」芻，芻之

俗字。臣始至於境，問國之大禁，然後敢入。

注言王之政嚴刑重也。臣聞郊關之內有囿方

四十里，殺其麋鹿者如殺人之罪，**注**郊關，齊四境之郊皆有關。

疏注「郊關」至「有關」○正義曰：《周

禮·地官·司關》注云：「關，界上之門。」《儀禮·聘禮》：

「賓及竟，乃謁關人。」是關在界上。趙氏謂「四境之郊皆有

關」，似即指此。閻氏若璩《釋地續》云：「杜子春日：『五十

里爲近郊，百里爲遠郊。』《白虎通》：『近郊五十里，遠郊百

里。』則《孟子》「郊關」之「郊」自屬遠郊。苟近郊，何能容四

十里之囿？趙氏注却說得遼闊，云：「齊地四境之郊皆有

關。」齊地方二千里，以二千里之地爲陷阱者四十里，民亦不

以病。古天子九門，此爲第八層門，又外此則第九層，曰關

門。」按：趙氏以經文云「始至於境」，又云「郊關」，故合稱

「四境之郊」，然境與郊不同也。襄公十四年《左傳》云：「蘧伯

玉從近關出」，注云：「欲速出竟。」此，界上之關也；哀公十

四年《左傳》云：「豐丘人執子我，殺諸郭關。」此，郊上之關

也。《爾雅·釋地》云：「邑外謂之郊，郊外謂之牧，牧外謂

之野，野外謂之林，林外謂之坰。」坰，《說文》作「冢」，云：「象

遠界也。」然則四境分界之地爲坰。如王畿千里，每面五百

里，則竟上之關遠在五百里矣。《說文》邑部云：「距國百里

爲郊。」牧在郊外。鄭氏注《尚書·君陳》序云：「天子之國，

近郊半遠郊，去國五十里。《禮記·大傳》云：「牧之野，武王之大事也。既事而退，柴於上帝，祈於社，設奠於牧室。」注云：「牧室，牧野之室也。古者郊關皆有館焉。」「牧室」而鄭以爲「郊關」之館，蓋牧通謂之郊，分言之，則近郊爲郊，遠郊爲牧。郊關在此，則去城百里也。國之稱有三。其一，大曰邦，小曰國。如「惟王建國」、「以佐王治邦國」是也。其一，郊內曰國。《齊語》云「參其國而伍其鄙」，韋昭注云「國郊以內，鄙郊以外」，是也。其一，城中曰國。《小司徒》「稽城中及四郊都鄙之夫家」，《質人》「國中一句，郊二句，野三句」，是也。合天下言之，則每一封爲一國，就一國言之，則郊以內爲國，外爲野；就郊以內言之，又城內爲國，城外爲郊。此經云「臣始至於境」，始至界上也；「問國之大禁」，此國指一國而言，「然後敢入」，謂人竟也。是時尚未至郊，而聞郊關之內有囿方四十里也。「爲阱於國中」，此國中指郊以內。囿在郊關之內，故爲阱於國中。周廣業《孟子逸文考》云：「《後漢紀》靈帝作靈泉畢圭苑，司徒楊賜上書曰：『六國之際，取獸者有罪，傷槐者被誅。』孟軻爲梁惠王極陳其事。『傷槐事見《晏子春秋》，取獸有罪亦非梁惠王，此誤引也。』則是方四十里爲阱於國中。民以爲

大，不亦宜乎？」**注**設陷阱者不過丈尺之間耳，今

王陷阱乃方四十里。民苦其大，不亦宜乎？**疏**注

「設陷」至「宜乎」○正義曰：《說文》自部云：「阱，陷也。

穿，或從穴。」《世說·政事》篇注引《孟子》此文作「穿」，穿、

阱同也。《尚書·費誓》云「獲斂乃穿」，鄭氏注云：「山林之

田，春始穿地爲穿，所以陷墜之。」《周禮·雍氏》：「春令爲阱，

獲溝瀆之利于民者」，鄭氏注云：「阱，穿地爲塹，所以禦禽

獸。其或超踰則陷焉，世謂之陷阱。」阱可斂塞，其度狹小，

故云「不過丈尺之間」也。阮氏元《校勘記》云：「閩、監、毛

三本苦作言，誤。」

章指：言譏王廣囿專利，嚴刑陷民也。

齊宣王問曰：「交鄰國有道乎？」**注**問與

鄰國交接之道。孟子對曰：「有。」**注**欲爲王陳古

聖賢之比。**疏**注「欲爲」至「之比」○正義曰：阮氏元《校

勘記》云：「閩、監、毛三本比作交，誤。」按：比如文公元年

《左傳》亦其比也」之「比」，謂比例以況之也。《釋名·釋言

語云：「事類相似謂之比。」監、毛本聖賢作聖王，亦非。下舉勾踐，不可爲聖王也。惟仁者爲能以大事小。

是故湯事葛，文王事混夷。**注**葛伯放而不祀，

湯先助之祀。《詩》云「混夷兇矣，唯其喙矣」，謂文王也。是則聖人行仁政，能以大事小者也。**疏**注

「詩云」至「王也」○正義曰：引《詩》者，《大雅·緜》第八章文。今《詩》作：「混夷駢矣，維其喙矣。」毛傳云：「駢，突也。喙，困也。」箋云：「混夷見文王之使者，將士衆，過己國，則惶怖驚走奔突，入此柞棫之中而逃，甚困劇也。是之謂「一年伐混夷」。又《皇矣》詩云「串夷載路」，**①**箋云：「串夷即混夷，西戎國名也。」串同患，與混一音之轉。串亦與犬一音之轉，故《書大傳》、《說文》作「吠夷」。依鄭箋，此言文王伐昆夷，不可爲「以大事小」之證。《詩正義》引《帝王世紀》云：「文王受命四年，周正丙子，混夷伐周，一日三至周之東門。文王閉門脩德而不與戰。」王肅同其說以申毛義，

以爲柞棫生柯，葉拔然時混夷伐周。」推此則《詩》言「肆不殄厥愠，亦不隕厥問」，謂昆夷伐周奔突而周爲之困如此。文王雖不絕愠怒，然且使聘問而不廢交鄰之禮，是正「文王事昆夷」之事，故趙氏引《詩》以證。若鄭箋則謂文王使將士聘

問他國，過昆夷之地，昆夷見之而驚困，與趙氏引《詩》義殊也。阮氏元《校勘記》云：「《音義》、石經作混夷，閩、監、毛三本作昆，非也。」惟智者爲能以小事大。故大王事獯鬻，句踐事吳。**注**獯鬻，北狄彊者，今匈奴

也。大王去邠避獯鬻，越王句踐退於會稽，身自臣事吳王夫差。是則智者用智，是故以小事大而全其國也。**疏**注「獯鬻」至「獯鬻」○正義曰：《史記·周本紀》

云：「古公亶父修后稷、公劉之業，薰育戎狄攻之，欲得財物，予之。」又《匈奴列傳》云：「匈奴，其先祖夏后氏之苗裔，曰淳維。唐虞以上有山戎、獫狁、葷粥，居於北蠻，隨畜牧而轉移。夏道衰，而公劉失其稷官，變於西戎，邑於豳。其後三百有餘歲，戎狄攻太王亶父，亶父亡走岐下。」《集解》引晉灼云：「堯時曰葷粥，周曰獫狁，秦曰匈奴。」《漢書》作「薰粥」。葷、薰與獯通，粥、育與鬻通也。《毛詩·采薇》序云：「文王之時，西有昆夷之患，北有獫狁之難。」是時周已拓大，尚以天子命命將帥，遣戍役以守衛之，則在太王時彊大可知。《詩》稱「獫狁」，《孟子》稱「獯鬻」者，舉古名也。《音義》

①「載」，原誤作「在」，今從沈校據《毛詩》改。

作大王，閔、監、毛三本作太。阮氏元《按勘記》云：「經文皆大，^①作太者非。」北狄強者，監、毛本作疆。「按，唐人「疆弱」字通作疆、強，「勉強」字作強。宋人避所諱，多作疆。疆乃「疆界」字，非也。」○注「越王」至「夫差」○正義曰：句踐，越王允常子。夫差，吳王闔廬子。哀公元年《左傳》云：「吳王夫差敗越於夫椒，遂入越。越子以甲楯五千保於會稽，使大夫種因吳太宰嚭以行成。」此「退於會稽」之事也。《史記·越王句踐世家》云：「越王乃以餘兵五千人保棲於會稽。吳王追而圍之，乃令大夫種行成於吳，膝行頓首曰：『君王亡臣，句踐使陪臣種敢告下執事：句踐請爲臣，妻爲妾。』」《國語》云：「越人飾美女八人納之太宰嚭，卑事夫差，宦士三百人於吳，其身親爲夫差前馬。」此「身自臣事」之事也。閔、監、毛三本作「身自官事」，按：《國語》「人宦于吳」，韋昭注云：「宦爲臣隸也。」則「官事」或作「宦事」，亦通。以大事小者，樂天者也；以小事大者，畏天者也。樂天者保天下，畏天者保其國。《詩》云：「畏天之威，于時保之。」^②聖人樂天行道，如天無不蓋也，故保天下，湯、文是也；智者量時畏天，故保其國，大王、句踐是也。《詩》、《周頌》。

我將之篇。言成王尚畏天之威，於是時故能安其太平之道也。^③疏「以大」至「其國」○正義曰：《易·繫辭傳》云：「樂天知命，故不憂。」此以「知命」申明「樂天」之義。聖人不忍天下之危，包容涵畜，爲天下造命，故爲知命，是爲樂天。天之生人，欲其並生並育。仁者以天爲量，故以天之並生並育爲樂也。天道又虧盈而益謙，不畏則盈滿招咎，戮其身即害其國，智者不使一國之危，故以天之虧盈益謙爲畏也。而究之，樂天者無不畏天，故引周公之頌申明之。畏天爲「畏天之威」，則樂天爲樂天之德也。○注「聖人」至「是也」○正義曰：天生萬物無不蓋，聖人道濟天下無不容，行道者所以樂天也。不知時不可爲，則將以所養人者害人，「量時」者所以「畏天」也。《國語》范蠡對句踐云：「聖人隨時以行，是謂守時。天時不作，弗爲人客。今君王未盈而溢，未盛而驕，不勞而矜其功，天時不作而先爲人客。此逆於天而不和於人，將妨於國家。」此謂不量時則不保其國也。其後卑辭尊禮，身爲之市，蠡又戒王勿早圖，謂人事必與天地相參然後乃可以成功，此亦能「量時」者矣。○注「詩周」

①「大」上，阮校有「作」字，於義爲顯。

至「道也」○正義曰：《毛詩·我將》箋云：「于，於，時，是也。早夜敬天，於是得安文王之道。」趙氏以是釋時，以安釋保，與鄭氏同。《周頌·我將》承《維天之命》後，序云：「維天之命，太平，告文王也。」《我將》，祀文王於明堂也。鄭解「我其收之，駿惠我文王」，引《洛誥》「考朕昭子刑，乃單文祖德」二句，鄭解《洛誥》云：「成我所用明子之法度者，乃盡明堂之德。」《詩正義》云：「文王之德，我制之以授子，是用文王之德制作之事。彼注直以文祖爲明堂，不爲文王。彼上文注云：「文祖者，周曰明堂，以稱文王。」是文王德稱文祖也。」然則周公成文王之德以制禮作樂，成王時乃克致太平，是太平由文王之道也。能保安文王之道，即能保安太平之道。趙氏於《我將》言「太平」，鄭氏於《維天之命》引「文祖」，同一互見之義也。成王爲天子，祇宜樂天保天下，乃周公欲其保太平之道而以畏天戒之。天子且然，況諸侯乎？故云「成王尚畏天之威」也。

王曰：「大哉，言矣！寡人有疾，寡人好勇。」**注**王謂孟子之言大，不合於其意。答之云：寡人有疾，疾在好勇，不能行聖賢之所履也。

疏注「王謂」至「其意」○正義曰：大如《表記》「不自大其

事」之大。王問交鄰，孟子比以古聖賢之所履，故以爲誇大也。對曰：「王請無好小勇。夫撫劍疾視曰：『彼惡敢當我哉！』此匹夫之勇，敵一人者也。」**注**疾視，惡視也。撫劍瞋目曰：「人安敢當我哉？」此一夫之勇，足以當一人之敵者也。**疏**注

「疾視」至「者也」○正義曰：鄭康成注《少儀》、王逸注《楚辭·惜誦》皆云：「疾，惡也。」《說文》目部云：「瞋，張目也。」張目其狀不善，故爲惡視。《說文》又云「瞋，目疾視也。」瞋，恨張目也。《詩》曰「國步斯瞋」。今《詩》瞋作頻，毛傳云：「急也。」張目有急疾義，是疾視與張目可互見也。《說文》手部云：「撫，安也。」《儀禮·士喪禮》「君坐撫當心」，注云：「撫，手案之。」案與安通，撫劍即按劍。蓋手按下其劍而張其兩目也。趙氏每以安釋惡，故以「惡敢」爲「安敢」。僖公三十三年《公羊傳》注云：「匹馬，一馬也。」趙氏解輕身先於匹夫爲一夫，此注云「一夫」，以一解匹也。《史記·項羽本紀》云「劍一人敵」，故《孟子》云「敵一人」，趙氏以「當一人之敵」解之。《爾雅·釋詁》云：「敵，當也。」閩、監、毛三本作「一匹夫」，阮氏元《校勘記》云：「以一夫釋匹夫，不得云一匹。」王請大之。《詩》云：「王赫斯

怒，爰整其旅，以遏徂莒，以篤周祜，以對于天下。」此文王之勇也。文王一怒而安天下之民。

注《詩》、《大雅·皇矣》之篇也。言文王赫然斯怒，於是整其師旅，以遏止往伐莒者，以篤周家之福，以揚名於天下。文王一怒而安民。願王慕其大勇，無論匹夫之小勇。

疏注「詩大」至「天下」○正義

曰：《詩》毛傳云：「旅，師。按，止也。旅，地名也。對，遂也。」箋云：「赫，怒意，斯，盡也。五百人爲旅。對，答也。文王赫然與羣臣盡怒曰：整其軍旅而出，以却止徂國之兵衆，以厚周當王之福，以答天下鄉周之望。」《釋文》云：「斯，毛如字，此也。鄭音賜。」趙氏不破解斯字之義而云「赫然斯怒」，蓋以斯爲此。赫然者，此怒也，即以怒解「赫然」是赫爲怒意，與鄭同也。鄭以曰解爰，趙氏以于是解爰，與鄭異，蓋用毛義。「師旅」，亦用毛義也。遏，今《詩》作按，《釋文》云：「按，本又作遏。此二字俱訓止也。」莒，《詩》亦作旅。毛以爲地名，趙氏言「遏止往伐莒者」，是亦以莒爲國名。國名、地名，義亦相近。鄭以阮、徂、共爲三國，故以徂旅爲徂國之兵衆。孔氏廣森《經學卮言》云：「《毛詩》雖作「徂旅」，其傳曰：「旅，地名也。」則亦與莒同義。占書音同相借者

多。莒字從呂，即音呂可耳，未可遂易爲「師旅」之旅也。依鄭君說，徂爲國名。遏徂之事，古書散軼不可復考，遏莒之事，見於《韓非子》，云「文王侵孟克莒」是已。」王氏念孫《廣雅疏證》云：「旅即莒字。《衆經音義》云：「莒，又作旅。」古者莒、旅同聲。《周禮·掌客》注云：「莒，讀如棟栢之栢。」《大雅》「以遏徂旅」，《孟子》作「徂莒」，皆其證也。」「以篤周祜」，《詩》作「以篤于周祜」。以福解祜，與鄭同。鄭以厚解篤，趙氏不破者，以其易識也。鄭以對爲答，毛以對爲遂，孔氏《詩正義》申毛，謂「遂天下心」，則義與「答天下嚮周之望」義近。《廣雅·釋詁》云：「對，揚也。」《詩·江漢》「對揚王休」，《禮記·祭統》「對揚以辟之」，以揚連對，而毛傳、鄭注皆訓對爲遂。「對揚」乃疊字，對即遂，遂即揚。趙氏用毛義，「以遂于天下」爲「揚名于天下」，不用鄭義。孔氏申毛，殊于趙也。《月令》「遂賢良」，注云：「遂，進也。」「進賢良」即「舉賢良」。《說文》手部云：「揚，飛舉也。」是揚、遂之義相疊也。《月令》「慶賜遂行」，注云：「遂，達也。」此「遂行」亦猶云「舉行」、「達行」猶云「通行」，亦相疊爲義。或以「遂揚」爲已遂稱揚君命，是以遂爲因事之辭。時孔惺方稽首，詎突冠虛助之辭乎？爲不然矣。《祭統》云：「福者，備也。百順之名也。」注云：「世所謂福者謂受鬼神之祐助也，賢者

之所謂福者謂受大順之顯名也。」「揚名于天下」乃爲「篤祜」，趙氏之說長也。《書》曰：「天降下民，作之君，作之師，惟曰其助上帝寵之。四方有罪無罪惟我在，天下曷敢有越厥志？」**注**《書》，《尚書》逸篇也。言天生下民，爲作君，爲作師，以助天光寵之也。四方善惡皆在己，所謂「在予一人」，天下何敢有越其志者也？

疏注「書尚書逸篇也」○正義曰：惠氏棟《古文尚書考》云：「孔安國古文五十八篇，漢世未嘗亡也。三十四篇與伏生同，二十四篇增多之數，篇名具在。劉歆造《三統曆》，班固作《律曆志》，鄭康成注《尚書序》，皆得引之。特以當日未立於學官，故賈逵、馬融等雖傳孔學，不傳逸篇。融作《書序》，亦云「逸十六篇，絕無師說」，蓋漢重家學，習《尚書》者皆以二十九篇爲備，於時雖有孔壁

之文亦止謂之逸《書》，無傳之者。然其書已入中秘，是以劉向校古文得錄其篇，著于《別錄》。至東京時，雖亡《武成》一篇，而《藝文志》所載，五十七篇而已。其所逸十六篇，當時學者咸能案其篇目，舉其遺文。雖無章句訓故之學，翕然皆知爲孔氏之逸《書》也。今世所傳古文乃梅賾之書，非壁中之文。」按：此孟子所引《書》在梅賾《泰誓》上篇，江氏聲

《尚書集注音疏》云：「《太誓》上、中、下三篇，孔氏古文亦有之，不在二十四篇逸《書》之數。以當時列於學官，博士所課，不目之爲逸《書》也。」按《泰誓》不爲逸《書》而此趙氏以逸《書》目之，則非《泰誓》之文矣。臧氏琳《經義雜記》云：

「孟子所引爲《尚書》逸篇，趙氏亦未言所屬，今見於《泰誓》，不知其何本也。」○注「言天」至「者也」○正義曰：趙氏讀「惟曰其助上帝寵之」八字句，「四方」二字連下「有罪無罪惟我在」九字句。《易·師》九二傳云「承天寵也」，《釋文》引鄭注云：「寵，光耀也。」《詩·蓼蕭》「爲龍爲光」，毛傳云：

「龍，寵也。」趙氏以光解寵。《論語·堯曰》篇言「百姓有過，在予一人」，「有過在予」與「有罪惟我在」相近，故趙氏引以證之。《尚書集注音疏》云：「趙氏以助天光寵之」者，謂以其能助天，故光寵之。作兩句解，義了明白，趙氏聯言「助天」「光寵」，意旨不明。又，「惟我在之言」非在我之謂，而乃引「在予一人」以況，殊不合。故聲不取，而自爲解：「寵，尊居也。言天降生下民，爲作之君，爲作之師者，惟曰其助天牧民，故尊寵之，使居君師之任。我，我君師也。在，察也。四方有罪無罪，惟我君師司察焉。天下何敢有踰越其志者乎？」襄十四年《左傳》云：「天生民而立之君，使司牧之，勿使失性。」是作君師爲牧民也。云「故尊寵之，使居君師之

任者，從趙氏讀「寵之」絕句也。」一人衡行於天下，

武王耻之。此武王之勇也。**注**衡，橫也。武王

耻天下一人有橫行不順天道者，故伐紂也。**疏**「一

人」至「耻之」○正義曰：王氏鳴盛《尚書後案》云：「《孟

子》所引，自「天降下民」起，直到「一人衡行於天下，武王耻之」，皆《書》詞，皆史臣所作，故孟子從而釋之曰：「此武王

之勇也。」亦猶上文引《詩》畢，然後從而釋之曰：「此文王之勇也。」臧氏琳《經義雜記》云：「趙注讀「四方有罪無罪」爲句，與孟子釋《書》意「一人衡行於天下」句正合。或云《書》

詞至「武王耻之」止，非也。趙注亦斷「天下曷敢有越厥志」

住。」○注「衡橫」至「紂也」○正義曰：《考工記·玉人》注云：「衡，古文橫，假借字也。」《周禮·野廬氏》「禁野之橫行

徑踰者」，注云：「橫行，妄由田中。」是橫行爲不順。紂不順

天道，故亦以爲橫行。《史記·周本紀》《集解》引瓚云：「以威勢相脅曰橫。」是也。《曲禮》：「天子自稱「予一人」。故

以「一人」指紂。「越厥志」，故「橫行」也。而武王亦一

怒而安天下之民。今王亦一怒而安天下之

民，民惟恐王之不好勇也。」**注**孟子言武王好

勇，亦則文王一怒而安天下之民也。今王好勇，亦

則武王一怒而安天下之民，民恐王之不好勇耳。王何爲欲小勇而自謂有疾也？**疏**注「孟子」至「勇耳」○

正義曰：《國語·周語》云「奕世載德」，韋昭注云：「奕，亦前人也。」謂前人如是，後人效法之。故趙氏以則解亦，謂

「武王亦一怒」爲武王效法文王，「今王亦一怒」爲今王效法武王。

章旨：言聖人樂天，賢者知時，仁必有勇。勇以討亂而不爲暴，則百姓安之。

齊宣王見孟子於雪宮。王曰：「賢者亦

有此樂乎？」**注**雪宮，離宮之名也。宮中有苑囿

臺池之飾，禽獸之饒，王自多有此樂，故問曰：賢者亦能有此樂乎？**疏**注「雪宮」至「之饒」○正義曰：《文

選·雪賦》云「臣聞雪宮建於東國」，注引劉熙《孟子注》云：

「雪宮，離宮之名也。」與趙氏同。離宮即閭人、閭人所掌也。

《禮記·雜記》云：「公館者，公宮與公所爲也。」注云：「公

①「王鳴盛尚書後案」，按引文出閭若璩《尚書古文疏證》。

所爲，君所作離宮別館也。」多謂誇大也。閻氏若璩《釋地》云：「解者謂雪宮，孟子之館，宣王就見於此，因誇其禮遇之隆。賢者指孟子，與梁惠王賢者指人君不同。果爾，孟子當正色而對，以明不屑。漢章帝祀闕里，大會孔氏弟子六十二人，謂孔僖曰：「今日之會，其於卿宗有光榮乎？」對曰：

「臣聞明王聖主莫不尊師貴道。今陛下親屈萬乘，辱臨敝里，此乃崇禮先師，增輝聖德。至於光榮，非所敢承。」僖尚能爲斯言，況巖巖之孟子耶？賢者指人君言。《元和郡縣志》：「齊雪宮故址在青州臨淄縣。縣即齊都東北六里。

《晏子春秋》所謂齊侯見晏子於雪宮。」蓋齊離宮之名，遊觀勝跡。宣延見孟子於其地，非就見之謂。管、晏、孟子羞稱。茲詳及晏子，蓋亦以其地曾爲先齊君臣共游觀，以近事爲鑒則言易及。」曹氏之升《摭餘說》云：「閻氏說非也。趙氏注『孟子將朝王』章亦云：「寡人就孟子之館相見也。」蓋雪宮如漢甘泉、唐九成之屬。齊宣尊禮孟子，館之離宮，不使儕於稷下，故景丑氏以爲「丑見王之敬子」也。齊宣以孟子爲賓師，極致尊禮，其問隱然自表其優遇之至意。」趙氏佑《溫故錄》亦云：「此蓋齊王館孟子於雪宮而來就見也。賢者即謂孟子，與梁惠王之問不同。」按孟子見梁惠王與宣王見孟子於雪宮，文順逆不同。謂孟子在雪宮，宣王就見，義似爲

長。齊宣有此雪宮之樂，今館孟子於此，則賢者亦有此雪宮之樂，見能與賢者共此樂也。趙氏下云：「非其矜夸雪宮，而欲以苦賢者。」則此賢者即陰指孟子，非指賢君也。翟氏灝《考異》云：「齊侯見晏子於雪宮，今《晏子春秋》無此語。當因下文述晏子事，《元和志》遂訛『孟子』爲『晏子』也。」孟子對曰：「有人不得，則非其上矣。不得而

非其上者，非也；爲民上而不與民同樂者，亦非也。」**注**有人不得，人有不得志者也。不責己

仁義不自脩而責上之不用己，此非君子之道。人君適情從欲，獨樂其身而不與民同樂，亦非「在上不驕」之義也。**疏**注「有人」至「義也」○正義曰：何異孫

《十一經問對》云：「『有』字是句，『人不得則非其上矣』是句。或曰『有人』當作『人有』。」韓愈《送徐皞下第序》云：

「吾觀於人，有不得志則非其上者衆矣。」蓋趙氏解「有人」爲「人有」，韓氏本趙氏也。「不得志」爲「上不用己」，故以指下第。齊宣館孟子，自以能用孟子，孟子之志得，乃能亦有此樂。孟子推及於凡人，以爲不特賢者得志有此樂，凡人皆得志乃有此樂。有此樂則不非其上，不與民同樂則民不得志也。《音義》云：「從欲，丁音縱，本亦作縱。」樂民之樂

者，民亦樂其樂；憂民之憂者，民亦憂其憂。

注言民之樂，君與之同，故民亦樂使其君有樂也；

民之所憂者，君助憂之，故民亦能憂君之憂，爲之赴難也。樂以天下，憂以天下，然而不王者，未之有也。

注言古賢君樂則以己之樂與天下同之，

憂則以天下之憂與己共之，如是，未有不王者。孟子以是答王者，言雖有此樂，未能與人共之。

疏注

「言雖」至「共之」○正義曰：齊宣王自多以己有此樂，能與賢者共之，孟子推及於人，謂其有此樂，未與人共之。小人即民也。賢者亦有此樂，民未嘗亦有此樂也。

「昔者齊景公問於晏子曰：『吾欲觀於

轉附、朝儻，遵海而南，放於琅邪。吾何修而

可以比於先王觀也？』」**注**孟子言往者齊景公嘗

問其相晏子若此也。轉附、朝儻，皆山名也。又言

朝，水名也。遵，循也。放，至也。循海而南，至于

琅邪。琅邪，齊東南境上邑也。當何修治，可以比

先王之遊觀乎？先王，先聖之王也。

疏注「孟子」至

「王也」○正義曰：王逸《離騷》注云：「昔，往也。」《爾雅》·

釋詁云：「遵，循也。」高誘注《淮南子·汜論訓》云：「循，

遵也。」《禮記·祭義》云：「推而放諸東海而準」，注云：「放，

至也。」《論語》「敢問崇德、脩慝、辨惑」，《集解》引孔注云：

「脩，治也。」高誘注《呂氏春秋·季春紀》「禁婦女無觀」云：

「觀，遊也。」故趙氏用以爲釋。閻氏若璩《釋地》云：「趙

注：『琅邪，齊東南境上邑。』《漢·郊祀志》作『在齊東北』，

非也。今諸城縣東南一百五十里有琅邪山，山下有城，即其

處。余曾備考轉附、朝儻二山，杳不知所在。惟趙氏德，南

宋人，有「轉附，附作鮒，屬萊州」之說，殊無依據。意此二山

當在海之東盡頭，如成山、召石山之類，登之可以觀海。然

後回轍，循海之濱西行，以南至琅邪，亦可觀海焉。」按：《史

記·秦始皇紀》：二十八年，並渤海以東，過黃、腫，窮成山，

登之罘，立石頌秦德焉而去。南登琅邪，大樂之。三十七

年，自琅邪北至榮成山，至之罘。《漢書·郊祀志》：「後五

年，東幸琅邪，禮日成山，登之罘，浮大海。」司馬相如《子虛

賦》云：「且齊東陬巨海，南有琅邪，觀乎成山，射乎之罘。」

晉灼曰：「之罘山在東萊腫縣。」蓋「之罘」即「轉附」也。之

與轉，一聲之轉。之之爲轉，猶之之爲旃也。罘與附，古音

通。罘之爲附，猶不之爲拊也。山川之名，古今更變，乃以

聲音求之，尚可得。秦皇、漢武所游，自琅邪而北，則至之

果、成山，自之果，成山而南，則至琅邪。齊景欲觀乎轉附、朝儻，轉附即之果也，朝儻即成山也。于欽《齊乘》云：「召石山在文登之東。」《三齊略》云：「始皇造石橋渡海，觀日出處，有神人召石山下，城陽一山石岌岌相隨而行。石去不駛，神人鞭之見血。今召石山石色皆赤。」伏琛《齊記》云：「始皇造橋觀日，海神爲之驅石豎柱。今驗成山東入海道，水中有豎石，往往相望，似橋柱之狀。又有柱石二，乍出乍沒。」又云：「召石山與成山相近，因始皇會海神，故後世遂呼成山曰神山。」然則召石即成山也。劉向《九歎·遠逝篇》云「朝四靈于九濱」，王逸注云：「朝，召也。召四方之神，會於大海九曲之涯也。」董子《繁露·朝諸侯篇》云：「朝者，召而問之也。」《左傳》《蔡朝吳》，《公羊傳》作「昭吳」，是朝、召古通。朝宜讀「朝夕」之朝，俗讀爲「朝廷」之朝，非也。「朝儻」即「柱」之緩聲。蓋以石形似柱而緩呼之爲「朝儻」。古儻、石聲近。顧氏炎武《唐韻正》云：「石，上聲常主切。」《漢書·楊王孫傳》：「口含玉石，與棺槨朽腐，乃得歸土。」通腐、土爲韻。「段氏玉裁《六書音均表》所立十七部，舞聲、石聲同第五部。孔氏廣森《詩聲類》，從無、从石同陰聲第三魚類。古讀石爲上聲，聲近於舞，是「朝儻」即「召石」。海神鞭石，則後人附會之妄也。閻氏疑此二山當如成山、召石山之

類，未以聲音轉借求之，故不能定爾。或謂轉附、朝儻即華不注。乃華不注在今濟南歷城之西，去齊都不遠，無煩欲觀。毛氏奇齡《四書臆言補》引《管子·戒篇》，謂「轉附朝儻」即「猶軸轉斛」。按《傳子》謂《管子》乃後之好事者所加，刺取《孟子》之文人之。是「猶軸轉斛」爲「轉附朝儻」之譌，不得謂「轉附朝儻」即「猶軸轉斛」之譌也。然即其斛字，益知儻字爲石字之聲。何也？《聘禮》記「十斗曰斛」，《說苑·辨物篇》「十斗爲一石」，《周語》單穆公引《夏書》云「閼石鉢鈞」，韋昭注云：「石，今之斛也。」《莊子·田子方篇》「缺斛不敢入於四竟」，《釋文》：「斛音庚，司馬本作「缺斛」，缺讀曰鍾，斛讀曰夷。」斛爲十六斛，與斛自異，而與石之音則近，斛即石，石古讀若暑，故斛一作斛。以《孟子》之「朝儻」而《管子》用之作「斛」，則儻字當時或本與石字通借，而好事者乃變石爲斛，以加入《管子》也。其文云：「桓公將東游，問於管子曰：『我游，猶軸轉斛，南至琅邪。』」「我游」二字句，謂我之東游也。猶與由通，謂由轉附、朝斛南至於琅邪也。軸字衍文，因轉字而誤也。轉、軸二字之間缺「附朝」二字，幸存斛字，可知《孟子》之儻字即斛字之借，而斛字則石字之轉注，亦即斛字之近音也。細繹《管子》之文，益信「朝儻」爲「召石」矣。房玄齡注「猶軸轉斛」，謂「猶軸之轉載

斛石」，乃望文生意，失之矣。趙氏雖未詳，而以為皆山名則是，「又言朝，水名」者，存異說也。《淮南子·修務訓》云「耳未嘗聞先古」，高誘注云：「先古謂聖賢之道也。」《文選·東京賦》「憲先靈而齊軌」，薛綜注云：「先靈，先聖之神靈。」是凡稱先，皆謂先古聖賢。先王為先聖之王，猶先靈為先聖之神靈也。晏子對曰：「善哉，問也。天子適諸侯曰巡狩。巡狩者，巡所守也。諸侯朝於天子曰述職。述職者，述所職也。無非事者。春省耕而補不足，秋省斂而助不給。」

注

言天子諸侯出，必因王事有所補助於民，無非事而空行者也。春省耕，問耒耜之不足，秋省斂，助其力不給也。

疏注「春省耕」至「給也」○正義曰：《管子·

戒》篇云：「春出，原農事之不本者，秋出，補人之不足者。」朱長春云：「不本，春從不足於耕稼者，原省助之。春種為本，秋穫為利。今田家諺「下工用本」是也。」耒耜用於耕，「耒耜不足」即謂耕稼之本不足也。房玄齡云：「秋謂西成尚有不足者，當補之。秋稼已斂而力仍有不給於衣食，故云力不給也。力即力田之力，謂雖力田而所穫不足以養其父母妻子。」又《國蓄》篇云：「春以奉耕，夏以奉芸，耒耜械器，

種饌糧食，畢取贍於君。」又《輕重丁》云：「使吾萌春有以傳耜，夏有以決芸。」夏諺曰：「吾王不遊，吾何以休？吾王不豫，吾何以助？一遊一豫，為諸侯度。」

注晏子道夏禹之世民之諺語也。言王者巡狩觀民，其行從容，若遊若豫。豫，亦遊也。

《春秋傳》曰：魯季氏有嘉樹，晉范宣子豫焉。吾王不遊，我何以得見勞苦、蒙休息也？吾王不豫，我何以得見振贍、助不足也？王者一遊一豫，行恩布德，應法而出，可以為諸侯之法度也。

疏注「晏子」至

「語也」○正義曰：《說文》言部云：「諺，傳言也。」《廣雅·釋詁》云：「諺，傳也。」然則「夏諺」謂夏世相傳之語。《國語》「諺有之」，韋昭注云：「諺，俗之善謠也。」俗所傳聞，故云「民之諺語」，而其辭如歌詩，則謠之類也。○注「言王」至「度也」○正義曰：《易·觀》《象傳》云：「先王以省方觀民設教。」是巡狩所以觀民也。游為優游，豫為暇豫。《詩·都人士》序云「從容有常」，箋云：「從容謂休燕也。」《史記·留侯世家》云「良嘗閒從容步游下邳圯上」，《索隱》云：「從容，閒暇也。」故以「其行從容」解「遊豫」也。引《春秋傳》者，昭公二年傳文。其文作「宴于季氏，有嘉樹焉，宣子譽之」，彼

正義引服虔云：「譽，游也。宣子遊其樹下。夏諺曰：『一遊一譽，爲諸侯度。』」惠氏棟《左傳補注》云：「《周易·序卦傳》『豫必有隨』，鄭康成注引《孟子》『吾君不豫』以爲證，則知此傳譽字本作豫，故服虔互引爲證。《孫子兵法》云：『人效死而上能用之，雖優游暇譽，令猶行也。』《外傳》作『暇豫』，李善云：『譽與豫古字通。』《爾雅·釋詁》云：『休，息也。』《說文》云：『度，法制也。』故以『息』釋『休』，以『法』釋『度』。孔氏廣森《經學卮言》云：『《晏子春秋》曰：『春省耕而補不足者謂之遊，秋省實而助不給者謂之豫。』故於遊言休，謂休息耕者，於豫言助，所謂助不給也。《東京賦》云：『既春遊以發生，啓諸蟄於潛戶；度秋豫以收成，觀豐年之多稔。』薛綜注：『秋行曰豫。』是漢人舊說猶以遊、豫分春秋也，趙氏《章句》始混爲一。《管子》云：『先王之遊也，春出，原農事之不本者謂之遊；秋出，補人之不足者謂之夕。』變豫言夕，古音之轉注也。古讀夕如樹，《詩》曰：『三事大夫，莫肯夙夜。邦君諸侯，莫肯朝夕。』是也。古讀豫亦如樹，故《儀禮·鄉射禮》『豫則鉤楹內』，通作『宣樹』之樹。樹、豫並音序。『爲諸侯度』者，言諸侯法之，亦以春秋行其境內，歲舉不過再。『倪氏思寬《讀書記》云：『春爲發生，生氣可觀，故曰遊；秋爲收成，成功可喜，故曰豫。秋行曰豫，

則春行曰遊可知。蓋先王之觀惟以物成爲可樂，他無所樂也。翟氏灝《考異》云：『《管》《晏》二書俱有後人附托，或反從《孟子》襲人之，蓋百家之書尤多竄易。』今也不然。師行而糧食，飢者弗食，勞者弗息，眊眊胥讒，民乃作慝。**注**今也者，晏子言今時天下之民，人君興師行軍，皆遠轉糧食而食之，有飢不得飽食，勞者致重，亦不得休息。在位者又眊眊側目相視，更相讒惡。民由是化之而作慝惡也。**疏**注「人君」至「惡也」○正義曰：《周禮·夏官·序官》云：「二千有五百人爲師，萬有二千五百人爲軍。」師、軍亦通稱。《國語·魯語》「天子作師」，韋昭注云：「師謂六軍之衆也。」《小司徒》「五人爲伍，五伍爲兩，四兩爲卒，五卒爲旅，五旅爲師，五師爲軍」，注云：「伍、兩、卒、旅、師、軍皆衆之名。」是也。《論語·子路》曰「則禮樂不興」，皇侃《義疏》云：「興猶行也。」趙氏此注以「軍」釋「師」，以「興」釋「行」。閩、監、毛三本作「行師興軍」，按：經先師後行，趙氏以師行猶軍興而互明之也。毛氏奇齡《贖言補》云：「《管子·戒》篇云：『夫師行而糧食其民者謂之亡。』予幼讀「師行糧食」句，疑「糧食」二字難通，似有脫誤。今始知「糧食其民」爲確不可易也。」錢氏

大昕《潛研堂答問》云：「《周禮·廩人》職云：『凡邦有會同師役之事則治其糧食。』」注：「行道曰糧，謂糒也；止居曰食，謂米也。」鄭鏐云：「遠者治其糧，《莊子》『適百里者宿春糧，適千里者三月聚糧』，蓋言遠也；近者治其食，《詩》『朝食于株』，《左傳》『食時而至』，蓋言近也。予按，《說文》訓糒爲乾，《詩》『乃裹餼糧，于橐于囊』，《孟子》謂『居者有積倉，行者有裹糧』，此糧與食之辨。一按：趙氏云『遠轉糧食而食之』，此以「食」釋「糧」，「而食之」三字解「食」字。《說文》云：「糧，穀食也。」《國策·西周策》云「而藉兵乞食于西周」，注云：「食，糧也。」糧、食二字亦可通稱，故以食釋糧。「糧食」與「師行」對言，謂軍師之興以糧米爲食。糧既是行道所治之名，則以糧爲食必須「遠轉」。轉即運也。遠行轉運則必負重，不得休息矣。《晏子春秋·問下》篇云：「今君不然，師行而糧食。」與《孟子》同，則《孟子》「糧食」之下非有脫誤，亦非食于民之義也。《音義》云：「眊，古縣切，字亦作眊。」王氏念孫《廣雅疏證》云：「眊，眊，視也。《說文》：『眊，視貌。』重言之則曰眊眊。」然則趙氏不單言視而云「側目相視」者，《漢書·鄒陽傳》云：「太后怫鬱泣血，無所發怒，切齒側目於貴臣矣。」然則側目者，忿恨之貌。《說文》心部云：「眊，忿也。」《後漢書·陳蕃傳》云「至于陛下，有何悁

悁」，注：「悁悁，恚忿也。」蓋趙氏以眊眊與悁悁通，合言之。《爾雅·釋詁》云：「胥，相也。」《鄒陽傳》云「羊勝、公孫詭疾陽，惡之孝王」，下云「陽客遊以讒見禽」，是惡之即讒，故顏師古注云：「惡謂讒毀也。」《樊噲愛盜等傳》注亦多以惡爲讒，語言人罪惡。更，代也。互相讒短，則其目亦互相忿視，故知「眊眊」爲「側目相視」。下言「民乃作慝」，知此「胥讒」者爲在位之人矣。閔、監、毛三本「在位」下有「在職」二字。《詩·大雅·民勞》篇云「無俾作慝」，毛傳云：「慝，惡也。」是「作慝」即「作惡」也。《周禮·秋官·小行人》云：「其悖逆、暴亂、作慝、猶犯令者爲一書。」注云：「慝，惡也。猶，圖也。」然則作惡謂悖逆、暴亂、希圖犯令之謂也。方命虐民，飲食若流。流連荒亡，爲諸侯憂。注方猶放也。放棄不用先王之命，但爲虐民之政。恣意飲食，若水流之無窮極也，謂沉湎于酒，熊蹯不熟，怒而殺人之類也。流連荒亡，皆驕君之溢行也。言王道虧，諸侯行霸，由當相匡正，故爲諸侯憂也。疏注「方猶」至「行也」○正義曰：「方猶放」者，假借字也。《堯典》云「方命圯族」，《漢書·傅喜傳》《朱博傳》並作「放命」。

《尚書正義》鄭康成注云：「方，放。謂放棄教命。」趙氏與之同。閔、監、毛三本作「方猶逆也，逆先王之命」，非是。引「沉湎于酒」者，《尚書序》云：「義、和、泚、廢時亂日。」《酒誥》云：「罔敢湎于酒。」又云：「殷之迪諸臣，惟工乃湎于酒。」鄭氏注云：「飲酒齊色曰湎。」《詩·大雅·蕩》云：「天不泯爾以酒」，箋云：「天不同女顏色以酒，有沉湎于酒，是乃過也。」《論衡》云：「紂沉湎于酒，以糟爲邸，以酒爲池，牛飲者三千人。」《說文》水部云：「湎，湛于酒也。」湛與沈同。「熊蹯不熟怒人」，晉靈公事，見《左傳》宣公四年。溢與泆通。「溢行」謂淫佚之行也。「驕君」指夏之義、和、殷紂之臣工，周之晉靈公之屬。○注「言王」至「憂也」○正義曰：憂，思也，慮也，亦勞也。由與猶通。趙氏之意，謂驕君流連荒亡，王道既虧廢，天子雖不能討，而諸侯之行霸如齊桓、晉文者，思匡救其惡，猶將問罪而伐之。匡即正也，即「一匡天下」之義。行霸之諸侯不能置此驕君于度外，而加之師旅，則國且危矣，故云「猶當相匡正」。「當相匡正」解「憂」字，如《公羊傳》「桓公有憂中國之心」之憂也。蓋指當時晉、楚將加兵於齊。不質言者，對君之體，宜如此也。全氏祖望《經史問答》云：「爲諸侯憂」，古注以爲列國諸侯。試觀僖公四年，桓公欲循海而歸，輟宣仲謂申侯曰：「師出陳，鄭之

間，供其資糧屨屨，國必甚病。」哀公時，吳爲黃池之會，過宋、鄭，殺其丈夫，囚其婦人。霸者之世，役小役弱，不可勝道，豈但徵百牢、索三百乘而已？春秋之晚，雖魯亦困于征輪，願降而與邾、滕爲伍，而杞至自貶爲子，則其與附庸之君相去不遠。」此申趙氏之說，則以驕君之流連荒亡即指行霸之君，而爲諸侯憂之諸侯則事霸國之諸侯，非行霸之諸侯。乃趙氏稱「諸侯行霸」，是以行霸解爲諸侯憂之諸侯也，云「當相匡正」，似不謂驕君矣。或云：如同盟或姻國，皆憂其國之將亡。從流下而忘反謂之流，從流上而忘反謂之連，從獸無厭謂之荒，樂酒無厭謂之亡。先王無流連之樂，荒亡之行，惟君所行也。注言驕君放遊，無所不爲。或浮水而下，樂而忘反，謂之流，若齊桓與蔡姬乘舟於囿之類也。連者，引也。使人徒引舟船上行而忘反，以爲樂，故謂之連。《書》曰：「罔水行舟。」丹朱慢遊，無水而行舟，豈不引舟於水而上行乎？此其類也。從獸無

①「正義」下，依本書文例當有「引」字。

厭，若羿之好田獵無有厭極，以亡其身，故謂之荒亂也。樂酒無厭，若殷紂以酒喪國也，故謂之亡。言聖人之行無此四者，惟君所欲行也。晏子之意，不欲使景公空遊於琅邪而無益於民也。

疏注「或浮」至

「類也」○正義曰：浮水而下謂順流而下也。齊桓與蔡姬乘舟於囿，見僖公三年《左傳》。其下文云「蕩公，公懼變色」，杜氏注云：「蕩，搖也。囿，苑也，蓋魚池在苑中。」推其義，蓋蔡姬搖動桓公。趙氏引為流之證者，流猶放也，放猶蕩也。《管子·宙合》篇云「君失音則風律必流」，注云：「流謂蕩散。」以蕩與流義合，取為流之證也。○注「連引」至「類也」○正義曰：連訓引者，段氏玉裁《說文解字注》云：「連，負車也。各本作員連，今正。連即古文輦也。《周禮·鄉師》『輦輦』，故書輦作連，大鄭讀為輦。《巾車》『連車』，本亦作『輦車』。負車者，人輦車而行，車在後如負也。《說文》云：「輦，輓車也。从車，扶，扶在車前引之也。」又云：「輓，引車也。」連、輦同字，而輦為輓，輓為引，是連訓引也。逆水而上必用徒役輓引之，如負車然，故其名曰連。引《書》者，見《虞書·皋陶謨》。其文云：「無若丹朱傲，惟慢遊是好，傲虐是作，罔晝夜頌頌。」「罔水行舟」一句是《書》辭，「丹朱

慢遊，無水而行舟」是趙氏申釋《書》辭，謂無水行舟必用人輓引，引以為名連之證也。鄭氏注《書》此文云：「丹朱見洪水時人乘舟，今水已治，猶居舟中頌頌使人推行之。」王氏鳴盛《尚書後案》云：「鄭云云者即《孟子》『從流忘反』也。傳以《論語》『具盥舟』孔安國云『陸地行舟』，遂取以解此經。陸地行舟，事之所無，孔彼注失之。」孔氏廣森《經學卮言》云：「《論語》『具盥舟』即所謂『罔水行舟』也。舊說以為夏時澆，非是。」按：無水行舟即陸地行舟。孔安國注《論語》以陸地行舟為寒浞之子豳，而《說文》齊部云：「豳，嫚也。《虞書》曰：『若丹朱豳。』讀若傲。《論語》『具盥舟』。」是當時有以盥舟即「丹朱傲」之事，故趙氏以「罔水」為無水，即陸地行舟。鄭氏謂水已治，則以水由地中，前此氾濫已平，亦是以「罔水」為無水。鴻水氾濫，人居舟中，今水已落，仍為陸地，而丹朱猶居舟中，使人推行。鄭雖不言陸地行舟而其意可見也。趙氏以陸地地方使人推引，其在水使人推引可知，故以為類例也。○注「從獸」至「亂也」○正義曰：《易·屯》六三「即鹿无虞」，傳云：「以從禽也。」從禽猶「從獸」也。厭，足也。引「羿之好田獵」者，襄公四年《左傳》云：「后羿自鉏遷於窮石，因夏民以代夏政。恃其射也，不修民事而淫于原獸。棄武羅、伯因、熊髡、龙圉而用寒浞以為己相。浞

行媚于內，施賂于外，愚弄其民而虞羿于田，樹之詐慝以取其國家，外內咸服。羿猶不悛，將歸自田，家衆殺而亨之。」此羿好田亡身之事也。《詩·魏風·蟋蟀》「好樂無荒」，箋云：「荒，廢亂也。」廢亂者，荒忽迷亂。羿好于田，遂忽于泥之謀己，是爲田所迷也。故引以爲名「荒」之證。○注「樂酒」至「之亡」○正義曰：引殷紂者，《史記·殷本紀》云：「帝紂好酒淫樂，以酒爲池，縣肉爲林，使男女倮，相逐其間，爲長夜之飲。百姓怨望而諸侯有畔者。」是「以酒喪國」事也。《翼孟音解》讀「樂酒」若樂山、樂水，樂酒即好酒也。《論語·雍也》篇「亡之命矣夫」，孔安國注云：「亡，喪也。」《白虎通·崩薨》篇云：「喪者，亡也。」故引以爲名「亡」之證。《管子·戒》篇云：「夫師行而糧食於民者謂之亡，從樂而不反者謂之荒。」《晏子春秋·問下》篇云：「夫從南歷時而不反謂之流，從下而不反謂之連，從獸而不歸謂之荒，從樂而不歸謂之亡。」《管》、《晏》書刺取《孟子》而文有不同。○注「言聖」至「民也」○正義曰：聖人即先王也。先王但有春遊秋豫，一休一助，爲民而出，無此從上、從下、從獸、樂酒之事也。先王既非無事空行，故晏子欲效法，亦不無事空行也。對其「何修以比先王之觀」如此。

「景公說，大戒於國，出舍於郊。於是始

興發，補不足。」**注**景公說晏子之言也。戒，備也。大脩戒備於國，出舍於郊，示憂民困。始興惠政，發倉廩，以振貧下不足者也。**疏**注「戒備」至「者也」○正

義曰：鄭康成注《禮記·曾子問》篇、高誘注《淮南子·精神訓》，皆云：「戒，備也。」「大脩戒備」謂預備補助之事，即《晏子春秋》所謂「命吏計公掌之粟，籍長幼貧氓之數」是也。景公將身親振給，故出舍於郊，示憂民困也。興與發義同，並言則有別。《周禮·地官·遂大夫》「則帥其吏而興厖」，注云：「興，舉也。」故謂舉行惠政。《廣雅·釋詁》云：「發，開也。」《月令》「雷乃發聲」，注云：「發，出也。」故謂開發倉廩而出其粟。閩、監、毛三本作「以振貧困不足者也」。振即古賑字。《晏子春秋》云：「吏所委發倉廩出粟以予貧民者三千鐘，公所身見癯老者七十人，賑贍之然後歸也。」召大師曰：「爲我作君臣相說之樂。」蓋《徵招》、《角招》是也。**注**大師，樂師也。《徵招》、《角招》，其所作樂章名也。**疏**注「大師」至「名也」○正義曰：《周禮·春官》：「大司樂，中大夫二人，樂師，下大夫四人。大師，下大夫二人。」天子之官，樂師與大師自別。趙氏以太師爲樂師，蓋以諸侯之官，大師爲之長，即樂師也。胡氏匡

衷《儀禮釋官》云：「僕人正徒相大師，僕人師相少師，^①僕人士相上工。」注云：「大師、少師，工之長也，凡國之瞽矇正焉。杜蒧曰：曠也，大師也。」按，《論語》有大師摯、少師陽，是諸侯亦有大師、少師之官。凡言工，皆瞽矇也。大師、少師亦瞽者爲之，故通稱工。大師，樂工之長，非樂官之長。《周禮·春官》有大司樂、樂師、同官，其職掌教國子，與《尚書》典樂官同，非瞽者爲之。」劉氏台拱《經傳小記》云：「《國語》：『細鈞，有鐘無鐃，昭其大也；大鈞，有鐃無鐘，甚大無鐃，鳴其細也。大昭小鳴，和之道也。』按，細大有以聲音者，上章言『大不踰宮，細不過羽』是也，有以調言者，此言『細鈞』、『大鈞』是也，有以器言者，此言『昭其大』、『鳴其細』是也。鈞亦作均，《春秋》昭二十年服注云：「黃鐘之均：黃鐘爲宮，大族爲商，姑洗爲角，林鐘爲徵，南呂爲羽，應鐘爲變宮，蕤賓爲變徵。」《續漢志》云：「天子常以日冬至陰氣應，則樂均濁。」西京郊祀宗廟樂，惟用黃鐘一均。章帝時，太常丞鮑業始旋十二宮，旋宮以七聲爲鈞。蓋古所謂均即今所謂調。五聲十二律旋相爲宮，爲六十調，皆具五聲，故有五均。而韋注「細鈞爲徵羽角，大鈞爲宮商」者，古人以聲命調，若孟子「徵招」、「角招」，師曠言《清商》、《清徵》、《清角》，皆是調名。韋氏之意或亦爾也。」其詩曰：「畜君

何尤？」畜君者，好君也。」^②注其詩，樂詩也。言臣說君，謂之好君。何尤者，無過也。孟子所以道晏子、景公之事者，欲以感喻宣王，非其矜夸雪宮而欲以苦賢者。

疏

注「言臣」至「過也」○正義曰：王氏念

孫《廣雅疏證》云：「《說文》：『嬀，媚也。』孟康注《漢書·張敞傳》云：『北方人謂媚好爲嬀。』畜與嬀通。《說文》：

「媚，說也。」故媚好謂之畜，相悅亦謂之畜，又謂之好。《孟子·梁惠王》篇「畜君者，好君也」，本承上「君臣相悅」而言，故趙氏注云：「言臣悅君謂之好君。」好、畜古聲相近，「畜君何尤」即「好君何尤」。《祭統》云：「孝者，畜也。順於道不逆於倫，是之謂畜。」《孔子問居》及《坊記》注並云：「畜，孝也。」《釋名》云：「孝，好也。愛好父母如所悅好也。」畜、孝、好聲並相近。「畜君者，好君也」，「澤水者，洪水也」，皆取聲近之字爲訓。後世聲轉義乖，而古訓遂不可通矣。「阮氏元《毛詩王欲玉女解》云：「許氏《說文》『金玉』之玉無一點，其加一點者解云：『朽玉也。從王有點。讀若『畜牧』之畜。』《毛詩》玉字皆『金玉』之玉，惟《民勞》篇『王欲玉女』玉字專

① 「師」上，原衍「正」字，今從沈校據《儀禮》刪。

是加點之玉。《詩》言「玉女」者，畜女也，畜女者，好女也；好女者，臣悅君也。召穆公言王乎！我正惟欲好女畜女，不得不用大諫也。《孟子》曰：「爲我作君臣相悅之樂，其詩曰：畜君何尤？畜君者，好君也。」《孟子》之「畜君」與《毛詩》召穆公之「玉女」無異也。後人不知玉爲假借字，是以鄭箋誤解爲「金玉」之玉矣。段氏玉裁《說文解字注》云：「訖，罪也。《邶風》毛傳：『訖，過也。』亦作郵，《釋言》：『郵，過也。』亦作尤，《孟子》引詩『畜君何尤』。」○注「孟子」至「賢者」○正義曰：道，言也。閩、監、毛三本作「導晏子、景公之事者」。阮氏元《校勘記》云：「道，導古今字。古書多用道。『矜夸雪宮』，閩、監、毛三本夸作誇，誤增言旁。『而欲以苦賢者』，閩、監、毛三本同。廖本、孔本、《考文》古本苦作若，形相涉而誤也。」按：苦有困辱之義，《漢書·馮奉世傳》「爲外國所苦」是也。《廣雅·釋詁》云：「苦，窮也。」謂宣王言「賢者亦有此樂乎」是自矜夸其雪宮而用以困辱賢者，故孟子言晏子、景公之事以感喻而非斥之。

章指：言與天下同憂者不爲慢遊之樂，不循肆溢之行。是以「文王不敢盤于

遊田」也。

疏「與天」至「之行」○正義曰：賈子《新

書·道術》篇云：「反敬爲慢。」慢與慢同。《說文》心部云：「慢，惰也。」先王因助給而遊，非無事而空行也，無事空行，是爲「慢遊」矣。肆，古本作四。周氏廣業云：「注云『流連荒亡』皆暴君之溢行，則『四溢』爲是。董子《繁露》云：『桀紂驕溢妄行。』」阮氏元《校勘記》云：「孔本、韓本作肆是也。」○「是以」至「田也」○正義曰：「文王不敢盤于遊田」，《周書·無逸》篇文。

齊宣王問曰：「人皆謂我毀明堂，毀諸？已乎？」注謂泰山下明堂，本周天子東巡狩，朝諸侯之處也，齊侵地而得有之。人勸宣王，諸侯不用明堂，可毀壞，故疑而問於孟子，當毀之乎？已，止也。

疏「謂泰」至「毀壞」○正義曰：閻氏若璩《釋地》云：「《封禪書》：『初，天子封太山，太山東北陞，古時有明堂處。』是古明堂至漢武帝時猶有遺蹤。」《釋地》續云：「《左傳》隱八年：『鄭伯使宛來歸柩，不祀泰山也。』注云：『鄭桓公封鄭，有助祭泰山湯沐邑，在柩。』柩在琅邪國費縣

①「肆」，原誤作「事」，今據阮校改。

東南，鄭以天子不能復巡狩，故欲以昉易於魯，以從魯所宜。計爾時距東遷五十六年，泰山下湯沐邑，鄭尚能守之，則明堂仍爲周天子所有，齊焉敢侵？不知幾何時而爲齊得。又至宣王時，不復東巡者四百四十年矣，人咸謂齊毀明堂，無王愈可知。」孔氏廣森《經學卮言》云：「此非如國中明堂爲五室十二堂之制。《荀子》曰：『築明堂于塞外而朝諸侯。』楊倞注云：『明堂，壇也。謂巡狩至方嶽之下，會諸侯，爲宮方三百步，四門，壇十有二尋，深四尺，加方明于壇上。』蓋其堂祀方明，故以『明堂』名之。而朝事義言方明之下，公侯伯子男覲位亦並與明堂位同。漢時公玉帶上《明堂圖》，中有一殿，四面無壁，近泰山明堂之遺象。」金氏榜《禮箋》云：「巡狩則方岳之下覲其方之羣后，亦曰『明堂』。《孟子》書齊宣王曰『人皆謂我毀明堂』，《左氏傳》『爲王宮於踐土』，亦其類也。」宋吳仁傑《兩漢刊誤補遺》並主斯說。此皆用趙氏義。毛氏奇齡《四書臆言》云：「明堂在魯地，而後爲齊有，不知所始。若謂泰山明堂因巡狩而設，則西南諸嶽，其有無明堂，不見經傳。且欲行王政而但以文王治岐爲言，其於立言之意亦多不合。不知此即出王配帝所也。古明堂之制原爲饗帝而設，自黃帝以來，唐虞夏商俱有之。但饗帝必有配，后稷既配天於郊，而文王則配天於明堂。且天子繼祖爲

宗必有宗祀，而周制以文王當之。《孝經》所云『宗祀文王於明堂』者是宗祖之祭，《周頌·我將》詩小序所云『祀文王於明堂』則配帝之祭也。特魯本侯國，諸侯不敢祖天子，則祖文宗武非魯宜有，而獨文王以出王之故，大宗之國不祖而宗，因特立周廟在祖廟之外，而又以文當配帝，特設明堂爲出王配帝之所。蓋天子二郊既祭昊天上帝，而於明堂則兼及五帝，原是殺禮，故明堂九室祇以中央太室與東西南北之太廟合名五室，而祀方明於其中。故天子祖文王於明堂而魯則得以大宗宗之，天子以歲祭饗上帝於明堂而魯亦得以四時迎氣，五方饗帝，十二月聽朔降及之。蓋周郊在二至而魯郊祇在孟春祈穀，季秋報享。鎬京明堂並祀文武，而泰山明堂則祇祀文王。《孝經》所謂『嚴父配天，則周公其人』者專指此泰山明堂爲言。若然，則其舉文王治岐亦即因祭文王而推本及之。以治岐者亦宗祀所自來也。《春秋》文公十六年『毀泉臺』，注云：「毀，壞之也。」故趙氏以「壞」釋「毀」。○注「已止也」○正義曰：《毛詩》傳箋、鄭氏《禮》注、韋昭《國語》注、高誘《戰國策》、呂氏春秋《淮南子》注皆然，不勝數。孟子對曰：「夫明堂者，王者之堂也。王欲行王政，則勿毀之矣。」**注**言王能行王道者，

則可無毀也。

疏「夫明堂者王者之堂也」○正義曰：阮

氏元《明堂論》云：「粵惟上古，水土荒沈，槽穴猶在，政教朴略，宮室未興。神農氏作，始爲帝宮。上圓下方，重蓋以茅，外環以水，足以禦寒暑，待風雨，實惟明堂之始。明堂者，天子所居之初名也。是故祀上帝則於是，祭先祖則於是，朝諸侯則於是，養老、尊賢、教國子則於是，饗射、獻俘馘則於是，治天文、告朔則於是，抑且天子寢食恒於是，此古之明堂也。

黃帝堯舜氏作，宮室乃備，洎夏商周三代，文治益隆。於是

天子所居在邦畿王城之中，三門三朝，後曰「路寢」，四時不遷。路寢之制，準郊外明堂四方之一，鄉南而治，故路寢猶襲古號曰「明堂」。若於祭昊天上帝則有圓邱，祭祖考則有

應門內左之宗廟，朝諸侯則有朝廷，養老、尊賢、教國子，獻俘馘則有辟雍、學校。其地既分，其禮益備，故城中無明堂也。然而聖人事必師古，禮不忘本，於近郊東南別建明堂，

以存古制，藏古帝治法冊典於此，或祀五帝、布時令、朝四方諸侯，非常典禮，乃於此行之，以繼古帝王之蹟。譬之上古衣裳未成，始有韍皮；椎輪初制，惟尚越席。後世聖人采備繪繡，無廢赤芾之垂；車成金玉，不增大路之飾。此後世之明堂也。自漢以來，儒者惟蔡邕、盧植實知異名同地之制，尚昧上古、中古之分。後之儒者，執其一端以蔽衆說，分合

無定，制度鮮通。蓋未能融治經傳，參驗古今，二千年來遂成絕學。試執吾言以求之經史百家，有相合無相戾者。別勒成書以備稽覽，括其大指著於斯篇。」

王曰：「王政，可得聞與？」**注**王言王政當

何施，其法寧可得聞？對曰：「昔者文王之治

岐也，耕者九一，仕者世祿，關市譏而不征，澤梁無禁，罪人不孥。**注**言往者文王爲西伯時

始行王政，使岐民脩井田。八家耕八百畝，其百畝者以爲公田及廬井，故曰九一也。紂時稅重，文王

復行古法也。仕者世祿，賢者子孫必有土地。關以譏難非常，不征稅也。陂池魚梁不設禁，與民共之也。孥，妻、子也。《詩》云：「樂爾妻孥。」罪人不

孥，惡惡止其身，不及妻、子也。**疏**注「言往」至「王政」

○正義曰：往即昔也。《史記·周本紀》云：「公季卒，子昌

立，是爲西伯。西伯曰「文王」。自岐下而徙都豐。明年，西伯崩。」然則文王爲西伯，治豐未久，故孟子以爲治岐，趙氏

以爲爲西伯時也。○注「使岐」至「法也」○正義曰：《史記·殷本紀》言「紂厚賦稅以實鹿臺之錢而盈鉅橋之粟」。

《淮南子·要略訓》云：「紂爲天子，賦斂無度。」是紂時稅重也。趙氏佑《溫故錄》云：「《王制》：『古者公田藉而不稅，市廛而不稅，關譏而不征，林麓川澤以時入而不禁，夫圭田無征。』與《孟子》此文脗合。鄭氏注謂古者爲殷時，則正是紂廢其法而文獨脩行之。」○注「賢者」至「土地」○正義曰：《王制》云：「天子之縣內，諸侯祿也；外，諸侯嗣也。」注云：「選賢置之於位，其國之祿如諸侯不得位。有功乃封之，使之世也。」《冠禮記》曰：「繼世以立諸侯，象賢也。」孔氏正義云：「得采國爲祿而不繼世，故云祿。下云『大夫不世爵』是也。此謂畿內公卿大夫之子，父死之後，得食父之故國采邑之地，不得繼父爲公卿大夫也。畿外諸侯世世象賢，傳嗣其國。公卿大夫輔佐于王，非賢不可，故不世也。」然則世、祿兩分，世謂繼世爲諸侯，祿謂但食采地。此「仕者世祿」比例天子之內諸侯，不可世爵，祇可世祿。則「世祿」謂世食其采地，故云「賢者子孫」，解「世」字也，「必有土地」，解「祿」字也。昭公三十一年《公羊傳》云：「賢者，子孫宜有地也。」趙氏所本也。《五經異義》引古《春秋》左氏說：「卿大夫得世祿，不世位。父爲大夫，死，子得食其故采地。如有賢才，則復父故位。」《毛詩·大雅·文王》篇「凡周之士，不顯亦世」，傳云：「世者，世祿也。」○注「關以」至「稅也」○

正義曰：《廣雅·釋詁》云：「譏，問也。」問亦難也。《周禮·地官·大司徒》「制天下之地征」，注云：「征，稅也。」○注「陂池」至「之也」○正義曰：《毛詩·陳風》「彼澤之陂」，傳云：「陂，澤障也。」《周禮·雍氏》注云：「池謂陂潭之水道也。」是澤爲陂池也。《毛詩》「無逝我梁」，傳云：「梁，魚梁也。」《周禮·鼈人》「掌以時鼈爲梁」，鄭司農注云：「梁，水堰也。堰水爲關空，以笱承其空。」《王制》云「然後漁人入澤梁」，注云：「梁，絕水取魚者。」此云「澤梁」，故知爲魚梁也。○注「孥妻」至「子也」○正義曰：孥與奴同，假借作帑。《國語·鄭語》「寄孥與賄焉」，《楚語》「見藍尹亹載其孥」，注皆云：「妻，子曰孥。」《晉語》「以其孥適西山」，注云：「孥，妻，子也。」文公六年《左傳》「宣子使臾駟送其帑」，注云：「孥，妻，子也。」引《詩》者，《小雅·常棣》第八章。毛傳云：「帑，子也。」《禮記·中庸》引此詩，鄭氏注云：「古者謂子孫曰帑。」《詩正義》云：「上云『妻子好合』，子即此帑也。」《左傳》曰「秦伯歸其帑」，《書》曰「子則帑戮汝」，皆是子也。《周禮·秋官·司厲》：「其奴，男子入于罪隸，女子入于春槀。」鄭司農云：「謂坐爲盜賊而爲奴者，輸于罪隸，春人，槀人之官也。由是觀之，今之爲奴婢，古之罪人也。故《書》曰「予則奴戮汝」，《論語》曰「箕子爲之奴」，罪隸之奴也。故

《春秋傳》曰：「斐豹隸也，著於丹書。請焚丹書，我殺督戎。」耻爲奴，欲焚其籍也。」玄謂：「奴，從坐而没人縣官者，男女同名。」賈氏疏云：「先鄭引《尚書》『予則奴戮汝』及《論語》『箕子爲之奴』，皆與此經奴爲一。若後鄭義，《尚書》奴爲子，若《詩》『樂爾妻奴』，奴即子也。後鄭不破者，亦得爲一義。玄謂奴男女從坐没人縣官者，謂身遭大罪合死，男女没人縣官。漢時名官爲『縣官』，非謂州縣也。」按：《說文》女部云：「奴，奴婢，皆古之罪人也。」《周禮》曰：「其奴，男子入于罪隸，女子入于春蠶。」《呂氏春秋·開春》篇云：「叔嚮爲之奴」，高誘注云：「奴，戮也。律，坐父兄，没人爲奴。」然則凡父兄妻子從坐没人之罪，名爲奴。「罪人不孥」，謂罪及本身，不没人其父兄妻子爲奴也。故賈氏謂先鄭、後鄭義同。不罪其妻子即是不以其妻子爲奴。《說文》別無孥字，是罪人爲奴婢爲此奴，因而妻子子孫通稱爲奴。古者大罪坐其妻子，亦僅沒爲奴婢，殊于秦人族誅之法。而文王猶除之，僅及本身，非謂本身奴婢亦除之也。《潛夫論·述赦》篇云：「養稊稗者傷禾稼，惠姦軌者賊良民。」《書》曰：「文王作罰，刑茲無赦。」先王制刑非好傷人肌膚，斷人壽命，乃以威姦懲惡，除民害也。」又《論榮》篇云：「堯，聖父也，而丹朱傲；舜，聖子也，而叟頑惡。鯀殛而禹興，管、蔡爲戮，周公

枯王。故《書》稱『父子兄弟不相及』也。」僖三十三年《左傳》晉季白引《康誥》云：「父不慈，子不祗，兄不友，弟不恭，不相及也。」昭公二十年《傳》苑何忌引《康誥》曰：「父子兄弟，罪不相及。」此正文王「罪人不孥」之事也。「罪人」謂加罪于人。即不慈不孝不友不恭，文王作罰，刑茲無赦也，不孥謂本身惡宜加罪，其父子兄弟不從惡則不坐也。若從惡即是本身有罪，當不止奴戮。故王符引丹朱有聖父，鯀有聖子，管、蔡有聖兄，不當因其本身之罪概及其父子兄弟也。孫氏星衍《罪不相及論》云：「《康誥》云『元惡大憝，矧惟不孝不友』者，《說文》：『矧，詞也。』字作攷。言此元惡大憝，其惟不孝不友之人，所爲大惡必不謀於骨肉親戚。下云『子不祗厥父事』等是也。云『惟弔茲不于我政人得罪』者，弔，善也。『弔茲』猶『茲弔』，言惟慈善者不爲政人所罪。『政人』即下文『惟厥正人』若大正、少正之屬也。下云『天惟與我民』，當斷句，言有常之民爲天意所與。下云『大泯亂』，曰乃其速由，又當斷句，言大泯亂彝常之人乃其召罪也。曰同爰。速，召也。由同鄉，過也，謂罪也。『速由』即《酒誥》『自速辜』之義。《書》意言大惡之人，所聽父兄教誨，子弟勸阻，而其父兄子弟亦有善者，不可株連坐罪。此善人有彝常，爲天所與，惟泯亂彝常之人乃自取罪，尤應加以文王不教之

罰耳。』老而無妻曰鰥，老而無夫曰寡，老而無子曰獨，幼而無父曰孤。此四者，天下之窮民而無告者。文王發政施仁，必先斯四者。

注言此四者皆天下之窮民，文王常恤鰥寡、存孤獨也。**疏**「文王」至「四者」○正義曰：《書·無逸》：「文王懷

保小民，惠鮮鰥寡。」是其事也。《詩》云：「嗇矣富

人，哀此鰥獨。」**注**《詩》、《小雅·正月》之篇。

嗇，可也。詩人言居今之世可矣，富人但憐憫此鰥獨羸弱者耳。文王行政如此也。**疏**注「詩小」至「此

也」○正義曰：引《詩》在《正月》篇第十三章，鰥作憊。毛傳

云：「嗇，可，獨，單也。」箋云：「此言王政如是，富人猶可，憊獨將困也。」《說文》云：「哀，閔也。」憊即閔，閔亦憐也。

單則弱，困則羸，趙氏本毛傳而申之也。王氏念孫《廣雅疏

證》云：「鄭注《大司寇》云：『無兄弟曰憊。』」《洪範》云「無虐

鰥獨」，《小雅·正月》篇云「哀此憊獨」，《唐風·杕杜》篇云

「獨行畏畏」，《周頌·閔予小子》篇云「嬛嬛在疚」，《說文》

「趨，獨行也」，並字異而義同。《孟子·梁惠王》篇：「老而

無妻曰鰥，老而無夫曰寡，老而無子曰獨，幼而無父曰孤。」

襄二十七年《左傳》：「齊崔杼生成及彊而寡」，則無妻亦謂之寡。鰥、寡、孤，一聲之轉，皆與獨同義，因事而異名耳。」王曰：「善哉，言乎！」**注**善此王政之言。曰：「王如善之，則何爲不行？」**注**孟子言王如善此王政，則何爲不行也？

王曰：「寡人有疾，寡人好貨。」**注**王言我有疾，疾在好貨，故不能行。對曰：「昔者公劉好貨。《詩》云：『乃積乃倉，乃裹糗糧，于橐于囊，思戢用光。弓矢斯張，干戈戚揚，爰方啓行。』故居者有積倉，行者有裹囊也，然後可以『爰方啓行』。王如好貨，與百姓同之，於王何有？」**注**《詩》、《大雅·公劉》之篇也。乃積穀於倉，乃裹盛乾食之糧於囊囊也。思安民，故用有寵光也。戚，斧，揚，鉞也。又以武備之四方，啓道路。孟子言公劉好貨若此，王若則之，於王何有不可也？**疏**「行者有裹囊也」○正義曰：阮氏元《校勘記》云：「宋本、孔本同。石經、閩監毛三本、韓本囊作糧。」

按，《鹽鐵論》：「公劉好貨，居者有積，行者有囊。」與裏囊合。臧氏琳《經義雜記》云：「孟子以積與裏對，倉與囊對，謂積穀於倉，裏糧於囊也。《詩》云：『乃積乃倉，乃裹餼糧，于橐于囊。』有三乃字，二于字，曰餼又曰糧，曰橐又曰囊，皆重文以助句。至孟子釋《詩》，止『積』倉『裏』囊『四言也。』俗本改『裏囊』爲『裏糧』，則《詩》『于橐于囊』句似贅矣。舊疏釋孟子之言云：「故居者有穀積于倉，行者有糧裹于囊。」則北宋作疏時尚作「行者有裏囊」。○注「詩大」至「光也」○正義曰：《詩》在《公劉》篇首章。乃，《詩》作迺，古字通也。《音義》作餼，《詩》作餼。《詩釋文》云：「字或作餼。」《說文》無餼字，食部：「餼，乾食也。」毛本作餼。戰，《詩》作輯。毛傳云：「公劉居於郃而遭夏人亂，迫逐公劉。公劉乃辟中國之難，遂平西戎而遷其民，邑於豳焉。迺積迺倉，言民事時和，國有積倉也。小曰橐，大曰囊。思輯用光，言民相與和睦，以顯於時也。」箋云：「郃國乃有積委及倉也。安安而能遷，積而能散，爲夏人迫逐己之故，不忍鬪其民，乃裹糧食於橐囊之中，棄其餘而去，思在和其民人用光大其道，爲今子孫之基。」《詩》以「積」倉與上「場」疆對。場、疆是二事，故鄭以積爲委積，與倉對，亦爲兩事。趙氏謂「積穀于倉」，與鄭異也。《爾雅·釋詁》云：「輯，和也。」故毛、鄭皆以和

釋之。《說文》戈部云：「戢，藏兵也。《詩》云『載戢干戈』。」藏兵不戰，所以安民，故趙氏以安釋之。惟和則安，亦惟安則和，二義可相備。以「寵」釋「光」，《詩·長發》箋云：「寵，榮名之謂。」榮名「即毛傳『顯於時』之義。鄭云『光大』，則讀光爲廣，與毛、趙異也。○注『戚斧揚鉞也』○正義曰：程氏瑶田《通藝錄·考工創物小記》云：「斧屬之器，《說文》云：『斧，斫也。』『戊，大斧也。』『戚，戊也。』余謂斧斤異於戈戟者。戈戟銳鋒，斧斤濶鋒也，故用之爲斫擊。戈戟之鋒銳，同於矛之刺，但矛直刺而戈戟則橫擊以刺之也。《公劉》之詩云『干戈戚揚』，毛傳云：「戚，斧也。揚，戊也。」正義云：「《廣雅》：『鉞，戚，斧也。』則戚、揚皆斧鉞之別名。傳以戚爲斧，以揚爲鉞，鉞大而斧小。太公《六韜》云：『太阿斧重八斤，一名大鉞。』是鉞大於斧也。」戚之言蹙也，其刃蹙狹。對戊名揚者言之，彼爲發越飛揚，故其刃侈張。蹙之張之，顧名思義，曰戚曰揚，弗可易也。戊今俗名月斧，以爲象形，然實戊聲之譌也。」趙氏不釋「干戈」。箋云：「干，盾也。戈，句矛戟也。」《考工創物小記》云：「冶氏爲戈，廣二寸，內倍之，胡三之，援四之。倨句外博，重三錡。戟，廣寸有半寸，內三之，胡四之，援五之。倨句中矩，與刺重三錡。戈、戟並有內有胡有援，二者之體大略同矣，其不同者，戟獨有

刺耳。故《說文》云：「戈，平頭戟也。」「戟，有枝兵也。」然則

戈爲戟之無枝者矣。《說文》言枝，《考工》言刺，枝、刺一物也。是故戈之制有援。援，其刃之正者，橫出以啄人，其本即內也。內橫貫于柲之鑿而出之，故謂之內。援接內處下垂謂之胡。胡上不冒援而出，故曰「平頭」也。《方言》：「凡戟而無刃，秦晉之間謂之鈡，或謂之鑕，吳揚之間謂之戈。」此言內之無刃者謂之戈也。《說文》：「矛，無右臂也。」戈右無刃謂之子者，假借會意而象其形以名之也。又云：「三刃枝，南楚、宛、郢謂之匿戟。」此言戈內之有刃者謂之戟也。戈之刃在援與胡，其用主於援；戟則刃之在援在胡依然一戈，而復有刺之刃，則其用主於刺。三刃者，一援一胡一刺也。○注「又以」至「道路」○正義曰：閩、監、毛三本作：「又以武備之，曰方啓行道路。」按：毛傳云：「張其弓矢，束其干戈戚揚，以方開道路，去之幽。」箋云：「爰，曰也。公劉之去邠，整其師旅，設其兵器，告其士卒曰：『爲女方開道而行。』」鄭釋爰爲曰，用《爾雅·釋詁》文。毛但云「方開道路」，則不釋爰爲曰，第作于是而已。《爾雅·釋詁》又云：「爰，于也。」是也。趙氏云「又以武備」，解「弓矢斯張，干戈戚揚也」，云「之四方」，之字釋行，四方釋方，謂「爰方啓行」爲于四方啓行，參用毛傳，與鄭不同。以趙推毛，毛傳「以

方」疑是「四方」之譌。

王曰：「寡人有疾，寡人好色。」**注**王言我有疾，疾在好色，不能行也。對曰：「昔者太王好色，愛厥妃。《詩》云：『古公亶甫，來朝走馬。率西水滸，至于岐下。爰及姜女，聿來胥宇。』當是時也，內無怨女，外無曠夫。王如好色，與百姓同之，於王何有？」**注**《詩》、《大雅·緜》之篇也。亶甫，太王名也，號稱古公。來朝走馬，遠避狄難，去惡疾也。率，循也。滸，水涯也。循西方水滸，來至岐山下也。姜女，太王妃也。於是與姜女俱來相土居也。言太王亦好色，非但與姜女俱行而已也，普使一國男女無有怨曠。王如則之，與百姓同欲，皆使無過時之思，則於王之政何有不可乎？**疏**注「詩大」至「古公」○正義曰：《詩》在《緜》篇第二章。甫，《詩》作父，古字通也。毛傳於首章云：「古公，幽公也。古言久也。亶父，字，或殷以名言，質也。」爲名爲字，毛氏不定，趙氏以爲名者，如《春秋》齊侯祿父、季孫行父皆以父爲名，不必字也。按：古猶昔也，當謂古昔公

宣甫。「公宣甫」三字稱號猶公劉、公非、公祖，類加公於名上而已。○注「來朝」至「疾也」○正義曰：箋云：「來朝走馬，言其辟惡早且疾也。」「早」解「來朝」，「疾」解「走馬」，「辟惡」解其早且疾之故。劉熙《釋名·釋姿容》云：「疾行曰趨，疾趨曰走。」趙氏云「疾」，解「走」字也，來朝爲早，易明，故不釋耳。○注「率循」至「下也」○正義曰：毛傳云：「率，循也。澍，水厓也。」箋云：「循西水厓，沮，漆水側也。」「率，循」，《爾雅·釋詁》文。「澍，水厓」，《釋水》文。涯，厓，字通也。閻氏若璩《釋地》云：「太史公《周本紀》云：『遂去幽，渡漆，沮，踰梁山，止於岐下。』將自邠抵岐，東南二百五十餘里，登山涉水，敘次如畫。然程大昌《雍錄》謂渭水實在梁山之下之南，循渭西上可以達岐，則《詩》水字又與漆、沮無涉，似益精確矣。」○注「姜女」至「居也」○正義曰：毛傳云：「姜女，太姜也。胥，相也。宇，居也。」箋云：「爰，於。及，與。聿，自也。於是與其妃太姜自來相可居者。著太姜之賢智也。」太姜爲太王妃，與太任、太姒爲周室三母，詳見《列女傳》。趙氏以「於是」釋「爰」，以「與」釋「及」，以「相」釋「胥」，以「居」釋「宇」，與毛、鄭同，惟不用「自來」之訓，而以「聿來」爲「俱來」。聿猶律，《說文》彳部云：「律，均布也。」蔡邕《月令章句》云：「律，率也。」《漢書·宣帝紀》杜注云：「率

者，總計之言也。」均、總即俱。趙氏以自來之義不協，故讀聿爲律爲率也。「相土居」即《詩正義》云「相土地之可居也」。《管子·樞言》篇「與人相胥」，注云：「胥，視也。」《說文》云：「相，省視也。」胥之爲視，即相之爲省視也。

章指：言夫子恂恂然善誘人，誘人以進於善也。齊王好貨、好色，孟子推以公劉、太王，所謂「責難於君，謂之恭」者也。

疏「夫子」至「誘人」○正義曰：《論語·子罕》篇文。《論語》作「循循」。《後漢書·趙壹傳》云「失恂恂善誘之德」，《三國志·步騭傳》云「《論語》言夫子恂恂然善誘人」，並作「恂恂」，與此《章指》同。

孫授易授詩校字

孟子正義卷四終

孟子正義卷五

江都縣鄉貢士焦循撰集

孟子謂齊宣王曰：「王之臣有託其妻子於其友而之楚遊者，**注**假此言以爲喻。比其反也，則凍餒其妻子，則如之何？」**注**言無友道，當如之何？**疏**「比其反也」○正義曰：《音義》云：「比，

丁必二切，及也。」高誘注《呂氏春秋·達鬱》篇云：「比猶致也。」致即密。推之，致爲至，故《論語》「比及三年」，皇侃《義疏》云：「比，至也。」孫氏以比、及連文，故以比有及義。按：比之義爲方，「比方」猶言「譬如」。孟子謂託孥於友而友諾之矣，設若其反，則其友未嘗顧恤而致凍餒其妻子。今人設言，尚云「比方」，正其義也。《論語》「比及三年」當亦云「比方及於三年」爾。王曰：「棄之。」**注**言當棄之，絕友道也。**疏**注「絕友道也」○正義曰：哀公十五年《左

傳》云「絕世于良」，注云：「絕世猶言棄也。」曰：「士師不能治士，則如之何？」**注**士師，獄官吏也。不能治獄，當如之何？**疏**注「士師獄官吏也」○正義曰：

見《周禮·秋官》。王曰：「已之。」**注**已之者，去之也。**疏**注「已之者去之也」○正義曰：《詩·陳風·墓門》

篇「知而不已」，箋云：「已猶去也。」按：「去之」謂罷退其職。《禮記·學記》云：「古者仕焉而已者。」《論語》：「令尹子文三已之。」曰：「四境之內不治，則如之何？」**注**境內之事，王所當理。不勝其任，當如之何？孟子以此動王心，令戒懼也。王顧左右而言他。**注**王慙，而左右顧視，道他事。無以答此言也。**疏**注「王慙」至「言也」○《說文》頁部云：「顧，還視也。」《詩·晉風》「顧瞻周道」，箋云：「回首曰顧。」左右立王少後，視之必回首，故云「左右顧視」，即回旋視之也。《周禮·訓方氏》「掌道四方之政事」，《檀弓》「道國之政事」，注並云：「道猶言也。」故以道解言。

章指：言君臣上下，各勤其任。無墮其職，乃安其身也。**疏**「無墮其職」○正義曰：

「墮」，許規切，亦音隋。墮，《廣韻》在四支，俗作墮。《呂氏春秋·必已》篇「愛則墮」，高誘注云：「墮，廢也。」《禮記·月令》「毋有壞墮」，《釋文》云：「墮，本作墮。」《周禮·守桃》「既祭則藏其隋」，《儀禮·士虞禮》注作「既祭則藏其墮」，①是墮又讀隋也。此當為「墮敗」之墮。

孟子見齊宣王，曰：「所謂『故國』者，非謂有喬木之謂也。有世臣之謂也。」**注**故者，

舊也。喬，高也。人所謂是「舊國」也者，非但見其有高大樹木也。當有累世脩德之臣常能輔其君以道，乃為舊國可法則也。**疏**注「故者」至「高也」之○正

義曰：《國策·秦策》「寡人與子，故也」，《楚辭·招魂》「樂先故些」高誘、王逸注並云：「故，舊也。」「喬，高」，《爾雅·釋詁》文。○注「人所」至「則也」○正義曰：《尚書·君奭》

云：「則商實百姓，王人罔不秉德明恤。小臣，屏侯甸剗咸奔走。」惟茲惟德稱，用又厥辟。」江氏聲《集注音疏》云：

「百姓，異姓之臣。王人，王之族人，同姓之臣也。无不秉持其德，明恤政事。又讀當為艾。艾，相也。辟，君也。惟此群臣各稱其德以輔相其君。」此指上伊尹、伊陟、臣扈、巫咸、

巫賢、甘盤等，所謂「累世修德之臣，常能輔其君以道也」。王無親臣矣！**注**今王無可親任之臣。**疏**注「今

王」至「之臣」○正義曰：《詩·邶風》「仲氏任只」，箋云：「任，以恩相親信也。」《大戴記·文王官人》篇云「觀其任廉」，注云：「任，以信相親也。」是「親臣」為「親任之臣」。

昔者所進，今日不知其亡也。**注**言王取臣不詳審。往日之所知，今日為惡當誅亡，王無以知也。

疏注「言王」至「知也」○正義曰：「往日」解「昔者」，「所知」解「所進」。進者，引也，登也。知其人乃登進之，使為臣也。誅，責也。亡，喪，棄也。始不詳審而登進之，固以為知其賢也，久而為惡，至于誅責而棄去之，則是始以為知之者原未嘗知之也。「今日不知其亡」謂不知其今日之亡，經文倒言之也，故下王問何以先知其不才。閔、監、毛作「我無以名之」，**非**。王曰：「吾何以識其不才而舍之？」

注王言我當何以先知其不才而舍之不用也？

①「虞」，原誤作「儀」，按《儀禮》無「士儀禮」，今從沈校改。

②「咸」，原誤作「惟」，今從沈校據《尚書》改。

③「毛」下，經解本有「三本」二字。

曰：「國君進賢，如不得已，將使卑踰尊，疏踰戚，可不慎與？」**注**言國君欲進用人當留意考

擇。如使忽然不精心意，如不得已而取備官，則將使尊卑親疏相踰，豈可不重慎之？**疏**注「如使」至

「慎之」○正義曰：忽之言迷忘也。《荀子·正名》篇云：

「故愚者之言，苟然而粗。」苟然即「忽然」，粗即「不精心意」。

精猶靜也，靜其心意乃能詳審。今忽忽若迷若忘，解「如不

得已」之狀也。已，止也。「不得已」者，本不當用，因無人充

職，姑且用之，故云不得已而取備官。不得已而取備官乃是

明知其不才而姑且用之，今原非明知其不才，但以不精心

意，若迷若忘，昏昏忽忽，故言「如不得已」。如者，擬而形容

之之詞也。經以「如不得已」形容不詳審之狀，趙氏以「忽然

不精心意」形容「如不得已」之狀。《國語·魯語》：「使僮子備

官而未之聞耶？」注云：「僮，僮蒙，不達也。」正「忽然不精心

意之謂。左右皆曰賢，未可也；諸大夫皆曰

賢，未可也。國人皆曰賢然後察之，見賢焉

然後用之。**注**謂選大臣，防比周之譽，核鄉愿之

徒。《論語》曰：「衆好之，必察焉。」**疏**注「選大」至「察

焉」○正義曰：累世修德，輔君以道，是「大臣」也。文公十

八年《左傳》云：「昔帝鴻氏有不才子，掩義隱賊，好行凶德，

醜類惡物，頑嚚不友，是與比周。」《漢書·谷永傳》云：「無用

比周之虛譽」，注云：「比周言阿黨親密也。」「鄉愿之徒」，若

漢之胡廣、晉之王祥。以虛名而登上位，宜核其實。引《論

語》者，《衛靈公》篇文。左右皆曰不可，勿聽；諸

大夫皆曰不可，勿聽。國人皆曰不可然後察

之，見不可焉然後去之。**注**「衆惡之，必察焉。」

惡直醜正，實繁有徒。防其朋黨，以毀忠正。**疏**注

「衆惡之必察焉」○正義曰：亦《論語·衛靈公》篇文。○注

「惡直」至「忠正」○正義曰：昭公二十八年《左傳》云：「鄭

書》有之：惡直醜正，實繁有徒。」《文選·上林賦》注云：

「蕃與繁古字通。」《管子·參忠》篇云：「行邪者不變則群臣

朋黨，才能之人去亡。」《荀子·臣道》篇云：「不卹公道通

義，朋黨比周，以環主圖私爲務，是篡臣者也。」注云：「環

主，環繞其主，不使賢臣得用。」此「朋黨毀忠正」也。《春秋

繁露·五行相勝》篇云：「司農爲姦，朋黨比周以蔽主明，退

匿賢士，絕滅公卿。」左右皆曰可殺，勿聽；諸大夫

皆曰可殺，勿聽。國人皆曰可殺然後察之，

見可殺焉然後殺之。故曰「國人殺之」也。

注言當慎行大辟之罪，五聽三宥。古者刑人於市，與衆棄之。

疏注「言當」至「三宥」○正義曰：《尚書·呂刑》云：「大辟之罰，其屬二百。」《禮記·文王世子》云：

「其死罪，則曰某之罪在大辟。」《周禮·秋官·掌戮》：「掌斬殺罪五百」，注云：「殺以刀刃，若今棄市也。」《司刑》：「掌五刑之法，

殺罪五百」，注云：「殺，死刑也。」經言「可殺」，故知爲「大辟之罪」也。「五聽」者，《周禮·秋官·小司寇》：「以五聲聽

獄訟，求民情：一曰辭聽，二曰色聽，三曰氣聽，四曰耳聽，

五曰目聽。」是也。「三宥」者，《司刺》：「掌三刺三宥三赦之

法，以贊司寇聽獄訟：壹宥曰不識，再宥曰過失，三宥曰遺忘。」是也。○注「刑人於市與衆棄之」○正義曰：《禮記·

王制》文。如此，然後可以爲民父母。」**注**行此三

慎之聽，乃可以子畜百姓也。

章指：言人君進賢退惡，翔而後集。

有世賢臣，稱曰「舊國」，則四方瞻仰之，以

爲則矣。**疏**「人君進賢退惡」○正義曰：《白虎通》

云：「進善乃以退惡。」○「翔而後集」○正義曰：《論

語·鄉黨》篇文。周氏廣業《孟子古注考》云：①後，古

本作后。《韓詩外傳》載楚王使人齎金請接與治河南，辭

不受，其妻曰：「不如去之。」乃變姓名，莫知所之。《論

語》曰：「色斯舉矣，翔而後集。」接輿之妻是也。《詩·

卷阿》：「鳳凰鳴矣，于彼高岡」，鄭箋云：「喻賢者待禮乃

行，翔而後集。」趙引此，見人君當審慎用人之意。「其進

銳者其退速」，注云：「不審人而過進不肖，越其倫，退而

悔之必速矣。當翔而後集，慎如之何？」正與此同。」

齊宣王問曰：「湯放桀，武王伐紂，有

諸？」**注**有之否乎？孟子對曰：「於傳有之。」

注於傳文有之矣。曰：「臣弑其君，可乎？」**注**

王問臣何以得弑其君？豈可行乎？曰：「賊仁

者謂之「賊」，賊義者謂之「殘」。殘賊之人，

謂之「一夫」。聞誅一夫紂矣，未聞弑君也。」

①「周氏廣業《孟子古注考》，按引文非出此書，疑出周廣業《孟子章指考證》。」

注言殘賊仁義之道者，雖位在王公，將必降爲匹夫，故謂之「一夫」也。但聞武王誅一夫紂耳，不聞弑其君也。《書》云「獨夫紂」，此之謂也。**疏**注「書云獨夫

紂」○正義曰：《荀子·議兵》篇云：「誅桀紂若誅獨夫，故《太誓》云「獨夫紂」，此之謂也。」趙氏引《書》蓋即謂此。又《正論》篇云：「誅暴國之君若誅獨夫。湯、武非取天下也，修其道，行其義，興天下之同利，除天下之同害，而天下歸之也。天下歸之之謂「王」，天下去之之謂「亡」。故桀紂無天下而湯武不弑君，由此效之也。」《漢書·劉向傳》：「以蕭望之、周堪、劉向爲三獨夫」，顏師古云：「獨夫猶言匹夫。」

章指：言孟子言紂以崇惡失其尊名，不得以君臣論之。欲以深寤齊王，垂戒於後也。

孟子謂齊宣王曰：「爲巨室則必使工師求大木，工師得大木則王喜，以爲能勝其任也。匠人斲而小之則王怒，以爲不勝其任矣。」**注**巨室，大宮也。《爾雅》曰：「宮謂之室。」工

師，主工匠之吏；匠人，工匠之人也。將以此喻之也。**疏**注「巨室」至「人也」○正義曰：《廣雅·釋詁》云：

「巨，大也。」引《爾雅》者，《釋宮》文也。《春秋》隱公五年「考仲子之宮」，《公羊傳》云：「考宮者何？考猶入室也。」《詩·鄘風》「作于楚宮」，又「作于楚室」，毛傳云：「室猶宮也。」此皆宮、室通稱之證也。《呂氏春秋·驕恣》篇云：「齊宣王爲大室，大益百畝，堂上三百戶。以齊之大，具之三年而未能成。」翟氏灝《考異》云：「孟子「巨室」之言疑即觀斯而發。」《月令》「季春之月，命工師令百工審五庫之量」，注云：「工師，司空屬官也。」又「孟冬之月，命工師效功」，注云：「工師，工官之長也。」爲司空屬官，故爲「主工匠之吏」，吏即官也。莊公二十二年《左傳》云「陳公子完奔齊，齊侯使爲工正」，注云：「掌百工之官。」胡氏匡衷《儀禮釋官》云：「工正，工官之長，總掌百工，如《月令》工師之職。」然則工師又名工正也。《攷工記》攻木之工有匠人，爲百工中之一工。《禮記·雜記》云「匠人執羽葆」，注云：「匠人，工人也。」是匠亦通稱工。此經上言「工師」，下言「匠人」，故趙氏於「工師」互稱「主工匠之吏」，於「匠人」互稱「工匠之人」。《國語·魯語》云：「嚴公丹桓公之楹而刻其桷，匠師慶言於

公」，注云：「匠師慶，掌匠大夫御孫之名。」《周禮·地官·鄉師》：「及葬，執纛以與匠師御匱而治役，及窆，執斧以涖匠師」，注云：「匠師，事官之屬。其於司空若鄉師之於司徒。由鄉師主役，匠師主衆匠。」《儀禮釋官》云：「據《國語》則匠師之官，諸侯亦有之。鄉師，下大夫，匠師與鄉師同。諸侯之官降於天子，匠師蓋士爲之。」趙氏以「工師」爲「主工匠」，然則匠師即工師。《月令》以其令百工稱「工師」，《周禮》、《國語》以其專主攻木稱匠師歟？抑主百工者自有工師，專主攻木者別有匠師歟？夫人幼而學之，壯而欲行之，王曰「姑舍女所學而從我」，則何如？**注**

姑，且也。謂人少學先王之正法，壯大而仕，欲施行其道。而王止之曰，且舍置汝所學而從我之教命。此，何如也？**疏**注「姑且」至「如也」○正義曰：《詩·卷耳》「我姑酌彼金罍」，毛傳云：「姑，且也。」姑，且，疊韻字也。定公五年《左傳》云「吾未知吳道」，**①**注云：「道猶法術。」法即是道。《呂氏春秋·仲春》《上農》等篇，高誘皆注云：「舍，置也。」又《必己》篇云「舍故人之家」，高誘注云：「舍，止也。」故以「置」釋「舍」而云「王止之」。《說文》教部云：「教，上所施下所效也。」《易·象傳》「習教事」，虞氏注

云：「巽爲教令。」令猶命也。下文言「何以異於教玉人」，則此「姑舍女所學而從我」即下所云「教」也，故預於此以命釋教。《爾雅·釋詁》云：「使，從也。」此云「使工師求大木」，下云「使玉人彫琢之」，皆任使之義。求木琢玉必從工匠，玉人爲之，能勝任與不能勝任，王董其成而喜之怒之可也。今不從彼而從我所以求之斲之雕琢之法，豈能之？故云「從我之教命」。今有璞玉於此，雖萬鎰，必使玉人彫琢之。至於治國家則曰「姑舍女所學而從我」，則何以異於教玉人彫琢玉哉？**注**

二十兩爲鎰。彫琢，治飾玉也。《詩》曰「彫琢其章」。雖有萬鎰在此，言衆多也，必須玉人能治之耳。至於治國家而令從我，是爲教玉人治玉也。教人治玉不得其道，則玉不得美好，教人治國不以其道，則何由能治者乎？**疏**注「二十兩爲鎰」○正義曰：《禮記·喪大記》云「朝一溢米，莫一溢米」，注云：「二十兩爲溢。於粟米之法，一溢爲米一升二十四分升之一。」《儀禮·既夕》注同。《史記·平準書》「黃金以溢名」，孟康云：「二

①「吳」，原誤作「吾」，今從沈校據《左傳》改。

十兩爲溢。《漢書·張良傳》「賜良金百溢」，服虔云：「二十兩爲溢。」《呂氏春秋·異實》篇「金千鎰」高誘注云：「二十兩爲一鎰。」漢儒解鎰字皆與趙氏同。《國語·晉語》「黃金四十鎰」，韋昭注亦云：「二十兩爲鎰。」惟《文選·詠懷詩》「黃金百溢盡」，注引賈逵《國語》注云：「一鎰，二十四兩。」又《吳都賦》「金鎰磊砢」，劉淵林注云：「金二十四兩爲鎰。」二者皆見《文選》注，當是李善誤義「四」字。賈公彥《既夕》疏云：「二十四兩曰溢。」亦義「四」字。按：《孫子算經》云：「稱之所起，起於黍。十黍爲一象，十象爲一銖，二十四銖爲一兩，十六兩爲一斤，三十斤爲一鈞，四鈞爲一石。」四鈞爲一百二十斤，故一百二十斤爲一石。以每斤十六兩通之，是一石爲一千九百二十兩，一斗爲一百九十二兩，一升爲一十九兩二錢。古以二十四銖爲兩，不以十錢爲兩。以一十九兩二錢乘二十四銖，得四百六十銖零八象。於四百八十銖減去四百六十銖零八象，餘一十九銖零二象。置一升四百六十銖零八象，以二十四除之，確得一十九銖零二象。是一升二十四分升之一爲四百八十銖，即是二十兩。甄鸞《五經算術》云：「置一斛米重一百二十斤，以十六乘之，爲積一千九百二十兩。以溢法二十兩除之，得九十六溢。爲法，以米一斛爲百升爲實，實如法，得一升，不盡四

升，與法俱再半之，名曰二十四分升之一。」此不用銖法而用石法，以九十六溢除百升，每溢一升，除去九十六升尚餘四升，故云「不盡四升」。半其四升爲二升，再半其二升爲一升，半其九十六爲四十八，再半其四十八爲二十四。二十四分升之一即九十六分升之四以九十六分升之四約爲二十四分升之一，所謂「可半則半」之術也。鄭氏以爲粟米法本溢法，石法言之，則明其爲二十兩。賈氏作疏不致違背之。以爲「二十四」，知「二十四」之四必爲義字。推之《文選》注，蓋亦義也。阮氏元《校勘記》云：「經注中鎰字皆俗字也，當依《儀禮》作溢。溢之言滿也，滿於十六兩，爲一斤之外也。」○注「彫琢」至「其章」○正義曰：《爾雅·釋器》云：「玉謂之雕。」又云：「玉謂之琢。」《說文》云：「雕，琢文也。」「琢，治玉也。」則雕、琢同。《禮記·少儀》注云：「雕，畫也。」《禮器》注云：「琢當爲篆。畫者，分界之名，篆者，文飾之名。」是雕第治之，而琢則飾之。《說文》蓋互見之。散文則通，故雕亦爲琢，琢亦爲治也。《攷工記》玉人之事所掌圭、璧、冒、璜、琮、璋等，有終葵首、羨、好、射、勺、鼻、衡等篆飾，別有雕人，文闕，蓋言雕琢之事也。璞猶樸也。玉之未治者爲璞，必治之飾之而後成器，故趙氏以「治飾」解之。引《詩》者，《大雅·棫樸》第五章也。《詩》作「追琢其章」，毛傳云：

「追，彫也。金曰彫，玉曰琢。」毛以下言「金玉」故以彫屬金，與《爾雅》異。孔氏正義以為對文則別，是也。鄭氏箋云：「追琢玉，使成文章。」趙氏以彫易追，本毛氏也，用以證治玉飾玉，專指玉言，則同鄭氏矣。○注「雖有」至「治乎」①。○正義曰：萬鎰為一萬二千五百斤，故「衆多」。言玉雖衆多，不能不委任於人，猶國雖廣大，不能不委任於人也。蓋玉人學治玉之道乃能治。以其衆多而矜重之，既不能自治，而又不委任之而掣其肘，雖有良工，弗能善其事矣。「教人治玉」謂舍其彫琢之正法而從己之教命，所教違其所學，烏能得其道哉？

章指：言任賢使能，不違其學，則功成而不墮；屈人之是，從己之非，則人不成道，玉不成圭。善惡之致，何可不察哉？**疏**「人不成道玉不成圭」○正義曰：《禮記·學記》云：「玉不琢不成器，人不學不知道。」趙氏語本此。古本作「玉不成器」，周氏廣業云：②「依韻當作圭。」

齊人伐燕，勝之。宣王問曰：「或謂寡

人勿取，或謂寡人取之。以萬乘之國伐萬乘之國，五旬而舉之，人力不至於此，不取必有天殃。取之，何如？」**注**萬乘非諸侯之號。時燕國皆侵地廣大，僭號稱王，故曰「萬乘」。五旬，五十日也。《書》曰「替三百有六旬」。言五旬未久而取之，非人力，乃天也。天與不取，懼有殃咎。取之，何如？**疏**注「五旬」至「六旬」○正義曰：《說文》勺部云：「旬，徧也。十日為旬。」鄭康成注《儀禮》、《禮記》，高誘注《呂氏春秋》、《淮南子》，皆以旬為十日。故五旬為五十日。《戰國策·齊策》云：「張儀以秦魏伐韓，齊王曰：『韓吾與國也。秦伐之，吾將救之。』田臣思曰：『王之謀過矣，不如聽之。』子噲與子之國，百姓不戴，諸侯弗與。秦伐韓，楚、趙必救之，是天下以燕賜我也。」王曰：「善。」因起兵攻燕，三十日而舉燕國。」此三字當是五字之譌。引《書》者，《堯典》文。王肅注《堯典》云：「期，四時也。一替，三百六

①「治乎」，合於宋十行、閩、監、毛等本，據本書及阮校所述廖、孔、韓等本注文，「治」下當有「者」字。
②「廣業」，原誤倒，今據經解本改。

十五日四分日之一，又入六日之內。舉全數以言之，故云三百六十六日也。」引此以明旬爲十日之證。○注「天與不取懼有殃咎」○正義曰：《說文》步部云：「殃，咎也。」《國語·越語》云：「得時無怠，時不再來。天與不取，反爲之災。」《史記·張耳陳餘列傳》云：「臣聞天與不取，反受其咎。」《淮陰侯列傳》云：「天與弗取，反受其咎，時至不行，反受其殃。」《說苑·說叢》引作「時至不迎」。孟子對曰：

「取之而燕民悅，則取之。古之人有行之者，武王是也。」

注武王伐紂而殷民喜悅，筐厥玄黃而來迎之，是以取之也。取之而燕民之不悅，則勿取。古之人有行之者，文王是也。**注**文王以

三仁尚在，樂師未犇，取之懼殷民不悅，故未取之也。**疏**注「三仁尚在樂師未犇」○正義曰：《論語》云：「微

子去之，箕子爲之奴，比干諫而死。孔子曰：「殷有三仁焉。」《史記·殷本紀》云：「西伯既卒，周武王之東伐，至盟津，諸侯叛殷會周者八百。諸侯皆曰：「紂可伐也。」武王曰：「爾未知天命。」乃復歸。紂愈淫亂不止。微子數諫不聽，乃與太師、少師謀，遂去。比干曰：「爲人臣者，不得不以死爭。」乃強諫紂。紂怒曰：「吾聞聖人心有七竅。」剖比

干，觀其心。箕子懼，乃佯狂爲奴，紂又囚之。殷之太師、少師乃持其祭樂器犇周。周武王遂率諸侯伐紂。」《周本紀》云：「諸侯不期而會盟津者，八百諸侯。諸侯皆曰：「紂可伐矣。」武王曰：「女未知天命未可也。」乃還師歸。居二年，聞紂昏亂暴虐滋甚，殺王子比干，囚箕子，太師疵、少師強抱其樂器而犇周。」樂師「即所云太師疵、少師強也。當武王會盟津時，且以天命未去，未可伐紂。必俟三仁既喪，樂師既去，乃率諸侯伐紂。然則在文王時，其未可伐益可知也。《燕策》云：「孟軻謂齊宣王曰：「今伐燕，此文武之時，不可失也。」孟子言「文武之時，不可失」即《孟子》所謂「取之而燕民悅則取之，武王是也，取之而燕民不悅則勿取，文王是也。」而《策》不達其辭耳。以萬乘之國伐萬乘之國，簞食壺漿以迎王師，豈有他哉？避水火也。如水益深，如火益熱，亦運而已矣。」**注**燕人所以持簞食壺漿來迎王師者，欲避水火難耳。如其所患益甚，則亦運行犇走而去矣。今王誠能使燕民免於水火，亦若武王伐紂殷民喜悅之時，則可取之。**疏**注「則亦運行犇走而去矣」○正義曰：《爾雅·釋詁》云：「運，徙也。」《淮南子·原道》《終身》《覽冥》

等篇，高誘注皆云：「運，行也。」故以行釋運。以行字未了，以奔走申之。奔走而去是行，亦即是避也。

章指：言征伐之道，當順民心。民心

悅則天意得，天意得然後乃可以取人之國也。**疏**「征伐」至「國也」○正義曰：《呂氏春秋·順

民》篇云：「先王先順民，故功名成。」古本無複「天意得」三字。

齊人伐燕，取之。諸侯將謀救燕。宣王

曰：「諸侯將謀伐寡人者，何以待之？」**注**宣

王貪燕而取之。諸侯不義其事，將謀伐齊救燕。宣

王懼而問之。孟子對曰：「臣聞七十里為政於

天下者，湯是也，未聞以千里畏人者也。」**注**

成湯修德，以七十里而得天下。今齊方千里，何畏

懼哉？《書》曰：「湯一征，自葛始。」天下信

之。東面而征，西夷怨；南面而征，北狄怨。

曰：「奚為後我？」民望之若大旱之望雲霓

也。歸市者不止，耕者不變，誅其君而弔其

民，若時雨降。民大悅。《書》曰：「徯我后，

後來其蘇。」**注**此二篇皆《尚書》逸篇之文也。言

湯初征，自葛始，誅其君，恤其民，天下信湯之德。

面者，嚮也。東嚮征西夷怨者，去王城四千里夷服

之國也，故謂之「四夷」。言遠國思望聖化之甚也，

故曰：何為後我？霓，虹也。雨則虹見，故大旱而

思見之。徯，待也。后，君也。待我君來，則我蘇息

也。**疏**注「此二至」息也○正義曰：逸篇義見前。王氏

鳴盛《尚書後辨》云：「《書序》云：『湯征諸侯，葛伯不祀，湯

始征之。作《湯征》。』則「葛伯仇餉」及「湯一征，自葛始」云

云，正《湯征》中語。江氏聲《尚書集注音疏》云：「天下信

之」之言不似《尚書》之文。又《滕文公》篇云「湯始征，自葛

載。十一征而無敵於天下，東面而征」云云，云「湯始征，自

葛載」與《梁惠王》篇所引小異，而《梁惠王》篇明稱「書曰」，

《滕文公》篇則否。言「十一征而無敵於天下」與「天下信之」

之文絕殊，信乎皆非《尚書》文也。僖四年《公羊傳》云：「古

者周公東征則西國怨，西征則東國怨。」按：《荀子·王制》

篇云：「周公南征而北國怨，曰：『何獨不來也？』東征而西

國怨，曰：「何獨後我也？」《後漢書》班固奏記：「古者周公一舉則三方怨，曰奚爲而後己。」然則「東西而征」云云乃本周公事，孟子引以釋《書》耳。襄公十四年《左傳》云：「有君不弔」，注云：「弔，恤也。」《史記》·宋微子世家云：「魯使臧文仲往弔水」，《集解》引賈逵云：「問凶曰弔。」恤即問凶也。鄭氏注《周禮》·擇人、《考工記》·匠人、《禮記》·玉藻，皆云：「一面猶鄉也。」鄉同嚮，亦同向。鄭氏注《皋陶謨》云：

「禹弼成五服：去王城五百里曰甸服，其弼當侯服，去王城千里。其外五百里爲侯服，當甸服，去王城一千五百里。其弼當男服，去王城二千里。又其外五百里爲綏服，當采服，^①去王城二千五百里。其弼當衛服，去王城三千里。又其外五百里爲蠻服，^②與周要服相當，去王城五千五百里。四面相距爲七千里，是九州之內也。要服之弼當其夷服，去王城當四千里。又其外五百里曰荒服，當鎮服，其弼當蕃服，去王城五千里。」趙氏此注云「去王城四千里夷服之國」，本「禹弼成五服」而言也。臧氏琳經義雜記云：「西夷、北狄，嘗見前明翻刻北宋板趙注本，上下皆作「夷」字。趙注《梁惠王》篇云：「東向征西夷怨者，去王城四千里夷服之國也，故謂之四夷。」又注《盡心》云：「四夷怨望。」《滕文公》正義云：「湯之十一征而天下無敵者，故東面而征其君則西夷

之國怨之，以爲不先征其我君之罪，^③南面而征其君則北夷之國怨之，^④以爲不征其我君之罪而先於彼。」《盡心》正義云：「故南面而征則北夷怨，東面而征則西夷怨，曰奚爲後我？」惟《梁惠王》正義引《仲虺之誥》「乃葛伯仇餉，初征自葛，東征西夷怨，南征北狄怨」，次釋孟子「西夷」、「北夷」之言亦同。《書》作「西夷」、「北狄」，《孟子》三處皆作「西夷」、「北夷」。魏晉間采《孟子》作《尚書》始改「北夷」爲「北狄」，以與「西夷」儷句。北宋時爲正義者猶未誤作狄字。《爾雅》·釋天云：「蟬蜋，虹也。霓爲挈貳。」注云：「雙出色鮮盛者爲雄曰虹，闇者爲雌曰霓。」《說文》雨部云：「霓，屈虹，青赤或白色。」蓋青赤，所謂雙色也，白色，所謂闇也。虹青赤而彎曲，故云屈也。《詩》·蝃蜋云：「朝隴于西，崇朝其雨。」《周禮》·視稷注云：「隴，虹也。」故云「雨則虹見」。當

①「服」，原脫，今從沈校據《禮記》·王制《孔疏》引鄭注補。
②「蠻」，原涉下文誤作「要」，今從沈校據《禮記》·王制《孔疏》引鄭注補。
③「先」，原脫，今據《孟子》注疏、《經義雜記》補。
④「北」，原誤作「西」，今據經解本、《孟子》注疏及《經義雜記》改。

其望也，雨猶未降，及誅君弔民，乃若時雨降也。《呂氏春秋·慎大》篇云：「湯立爲天子，夏民大悅，朝不易位，農不去疇，商不變肆。」《大戴禮·主言》篇云：「孔子曰：『明主之所征，必道之所廢也。』彼廢道而不行，然後誅其君，致弔其民。故曰：『明主之征也，猶時雨也。』則民悅矣。」孟子釋《書》之辭，蓋當時傳聞如是也。「俟，待」，「后，君」，皆《爾雅·釋詁》文。《漢書·武帝紀》《集注》引應劭云：「蘇，息也。」王氏念孫《廣雅疏證》云：「蘇，生也。鄭注《樂記》云：『更息曰蘇。』《孟子·梁惠王》篇引《書》『後來其蘇』，蘇與蘇通。」今燕虐其民，王往而征之，民以爲將拯己於水火之中也，簞食壺漿以迎王師。若殺其父兄，係累其子弟，毀其宗廟，遷其重器，如之何其可也？**注**拯，濟也。係累猶縛結也。燕民所以悅喜迎王師者，謂濟救於水火之中耳。今又殘之若此，安可哉？**疏**「今燕」至「王師」○正義曰：

《戰國策·燕策》云：「燕王噲既立，蘇秦死於齊，齊宣王復用蘇代。燕噲三年，子之相燕。蘇代爲齊使於燕，燕王問之曰：『齊宣王何如？』云云，王因收印，自三百石吏而效之子之。子之南面行王事，而噲老不聽政，顧爲臣，國事皆決子

之。子之三年，燕國大亂，百姓恫怨。儲子謂齊宣王：「因而仆之，破燕必矣。」孟軻謂齊宣王曰：「今伐燕，此文武之時，不可失也。」王因令章子將五都之兵，以因北地之衆以伐燕。士卒不戰，城門不閉，燕王噲死，齊大勝燕，子之亡。此齊往征燕，燕民迎王師之事也。○「遷其重器」○正義曰：

《戰國策》望諸君《報燕書》曰：「奉令擊齊，大勝之。輕率銳兵，長驅至國。齊王逃遁走莒，僅以身免。珠玉財寶，車甲珍器，盡收入燕。大呂陳於元英，故鼎反乎歷室。」高誘注云：「子噲亂，齊伐燕，殺噲，得鼎。」鮑彪注云：「故鼎，齊所得燕鼎。」然則重器即指歷室之鼎也。昭七年《左傳》云：

「齊侯次於號，燕人行成，曰：『敝邑知罪，敢不聽命，先君之敝器，請以謝罪。』二月戊午，盟于濡上，燕人歸姬，賂以瑤璆，玉櫜，鉦耳，不克而還。」此亦燕器之可考者。○注「拯濟」至「可哉」○正義曰：《易·渙》初六「用拯馬壯吉」，《釋文》引伏曼容注云：「拯，濟也。」《文選·思立賦》「蒙厖櫬以拯民」，舊注同。《周禮·大司徒》注云：「拊，捋天民之窮者也。」拊同拯，捋同救。趙氏既以「濟」釋「拯」，又云「濟救」，義詳備也。閩、監、毛三本作「拯捋也」，十行本作「拯所也」，誤。《國語·吳語》「係馬舌」，注云：「係，縛也。」《禮記·儒行》「不累長上」，注云：「累猶繫也。」繫與係通。《說文》

云：「係，繫束也。」繫猶結，束即縛。《漢書·張釋之傳》：「跪而結之」，注云：「結讀曰繫。」《儀禮·士喪禮》注云：「組繫爲可結也。」是「係累」爲「縛結」也。《國策·秦策》云：「張儀之殘樗里疾也」，高誘注云：「殘，害也。」又云：「昔智伯瑤殘范中行」，注云：「殘，滅也。」《史記·樊鄴滕灌傳》云：「凡二十七縣殘」，《集解》引張晏云：「殘，有所毀也。」《列子·說符》篇云：「遂共盜而殘之」，注云：「殘，賊殺之。」是殘兼殺害、毀滅之名，故統括「殺其父兄，係累其子弟，毀其宗廟，遷其重器」而謂之「殘」。天下固畏齊之彊也，今又倍地，而不行仁政。是動天下之兵也。**注**言天下諸侯素畏齊彊，今復并燕一倍之地，以是行暴則多所危，是動天下之兵共謀齊也。**疏**注「言天」至「齊也」○正義曰：《禮記·投壺》注云：「固之言如故也。」《國策·魏策》注云：「固，久也。」《儀禮·喪服傳》「飯素食」，注云：「素猶故也。」《後漢書·呂布傳》注云：「素，舊也。」舊即久也。是素、固同義，故趙氏以「素」解「固」。不仁則爲暴，故以「行暴」解「不行仁政」，即上所謂「殘」也。《國策》云：「齊破燕，趙欲存之，乃以河東易齊。楚魏憎之，令淖滑、惠施之趙，請伐齊而存燕。」又云：「楚許魏六城，與之伐

齊而存燕。」此天下諸侯謀齊救燕之事也。王速出令，反其旄倪，止其重器，謀於燕衆，置君而後去之，則猶可及止也。**注**速，疾也。旄，老耄也。倪，弱小繫倪者也。孟子勸王急出令，先還其老小，止勿徙其實重之器，與燕民謀，置所欲立君而去之歸齊，天下之兵猶可及其未發而止之也。**疏**注「疾速」至「老小」○正義曰：「速，疾」，《爾雅·釋詁》文。《禮記·曲禮》云：「八十九十曰耄。」《射義》「旄期」，注云：「八十九十曰旄。」是旄即耄也。劉熙《釋名·釋長幼》云：「人始生日嬰兒，或曰嬰倪。嬰，是也，言是人也。倪，其啼聲也。」《說文》儿部云：「兒，孺子也。」女部云：「妮，嬰倪也。」《禮記·雜記》云：「中路嬰兒失其母焉，何常聲之有？」注云：「嬰猶驚彌也。言其若小兒亡母啼號，安得常聲乎？」驚即嬰，繫爲嬰字聲之轉。繫、妮疊韻字，爲小兒啼聲。「繫倪」即「嬰兒」，《釋名》解嬰爲「是人」，非也。王氏念孫《廣雅疏證》云：「《釋親》：「妮，兒子也。」妮亦兒也，方俗語有輕重耳。凡物之小者謂之倪，嬰兒謂之妮，鹿子謂之麋，小蟬謂之蜺，老人齒落更生細齒謂之齲齒，義並同也。」阮氏元《校勘記》云：「弱小倪倪者也」，閩、監、毛三本同。《音義》

出繫字，旄倪下云：「詳註意，倪謂繫倪，小兒也。」作倪倪者誤也。《說文》云：「返，還也。《商書》曰：『祖甲返。』」返與反同，故以「還」釋「反」。《史記·燕世家》云：「燕人共立太子平，是為燕昭王。」是燕所立君也。

章指：言伐惡養善，無貪其富，以小王大，夫將何懼也？

疏「伐惡」至「懼也」○正義曰：宣公十一年《左傳》：「申叔時曰：『夏徵舒弑其君，其罪大矣。討而戮之，君之義也。今縣陳，貪其富也。以討召諸侯而以貪歸之，無乃不可乎？』」伐惡無貪富，義本此。《考文》古本作「以小至大」，足利本作「以大王小」。

鄒與魯閔。穆公問曰：「吾有司死者十三人而民莫之死也。誅之則不可勝誅，不誅則疾視其長上之死而不救，如之何則可也？」

注閔，鬪聲也，猶構兵而鬪也。長上，軍率也。鄒穆公忿其民不赴難而問其罰當謂何也。

疏「閔」至「鬪也」○正義曰：《音義》云：「閔，張胡弄切，注：『鬪聲。從門下者下降切，義與巷同，此字從門，丁豆云：『鬪聲。從門下者下降切，義與巷同，此字從門，丁豆

切，與門不同。』丁又胡降切。劉熙曰：「閔，構也。構兵以鬪也。」《說文》云：「鬪也。」王氏念孫《廣雅疏證》云：「字亦作閔。《呂氏春秋·慎行》篇：『崔杼之子相與私鬪』，高誘注云：『鬪，鬪也。』閔讀近鴻，緩氣言之。《大雅·召旻》篇『蟊賊內訌』，鄭箋云：『訌，爭訟相陷人之言也。』義與閔相近。」○注「長上軍率也」○正義曰：《音義》本作率，率與帥通，監本、毛本誤作師，非也。《周禮·夏官·敘官》云：「凡制軍，萬有二千五百人為軍。王六軍，大國三軍，次國二軍，小國一軍。軍將皆命卿。二千五百人為師，帥皆中大夫。五百人為旅，旅帥皆下大夫。百人為卒，卒長皆上士。二十五人為兩，兩司馬皆中士。五人為伍，伍皆有長。」注云：「軍、師、旅、卒、兩、伍，皆衆名也。伍一比，兩一間，卒一旅，旅一黨，師一州，軍一鄉，家所出一人。將、帥、長、司馬者，其師吏也。言軍將皆命卿，則凡軍帥不特置，選於六官、六鄉之吏，自卿以下德任者使兼官焉。」賈氏疏云：「六軍之將，還選六卿中有武者為軍將。又別言六鄉之吏者，據六鄉大夫及州長、黨正、族師、閭胥，比長中有武者，今出軍之爵，還遣在鄉所管之長為軍吏也。兼官者，在鄉為鄉官，在軍為軍吏。若無武德不堪任為軍吏者，則衆屬他軍吏，身不得為軍吏。」此穆公以小國一軍所云「長上」，蓋合指軍、

師、旅、卒、兩、伍等帥而言，故有三十三人之多，趙氏但舉軍帥以例其餘也，若以一軍言之，僅有一帥矣。以此時之軍吏即平時之鄉官，故凶年饑歲有救民之責，宜上告也。雖臨時選擇，有兼官，有不爲軍吏，不必皆所屬之鄉官，而有司平日不能愛民，不必所屬而皆疾視不救，其情勢有然矣。孟

子對曰：「凶年饑歲，君之民老弱轉乎溝壑，壯者散而之四方者，幾千人矣，而君之倉廩實，府庫充，有司莫以告。是上慢而殘下也。」

注言往者遭凶年之阨，民困如是，有司諸臣無告白於君，有以振救之。是上驕慢以殘賊其下也。**疏**注

「有司」至「下也」○正義曰：《呂氏春秋·贊能》篇云「敢以告于先君」，高誘注云：「告，白也。」白乃明顯之義，民間困苦達之于君，使之明顯，不使壅於上聞，故以「白」釋「告」也。《戰國策·秦策》云「王兵勝而不驕」，高誘注云：「驕，慢也。」《呂氏春秋·期賢》篇云「吾安敢驕之」，高誘注云：「驕，慢之也。」《說文》少部云：「殘，賊也。」故以「驕」釋「慢」，以「賊」釋「殘」。賊之言害也。曾子曰：「戒之戒之！出乎爾者，反乎爾者也。」**注**曾子有

言，上所出善惡之命，下終反之。不可不戒也。夫民今而後得反之也，君無尤焉。**注**尤，過也。

孟子言百姓乃今得反報諸臣不哀矜耳，君無過責之也。**疏**注「尤過也」○正義曰：《毛詩·鄘風》「許人尤之」，傳云：「尤，過也。」《爾雅·釋言》作「郵」，古字通。襄

公十五年《左傳》云「尤其室」，注云：「尤，責過也。」君行

仁政，斯民親其上，死其長矣。**注**君行仁恩，憂民困窮，則民化而親其上，死其長矣。**疏**「君行」至

「長矣」○正義曰：「夫民今而後得反之」，謂出命而惡，以惡反之也，「行仁政斯民親上死長」，謂出命而善，以善反之也。故前趙氏兼善惡之命言之。「憂民困窮」則是「哀矜」，

「不哀矜」即是不「行仁政」，注亦互明之。周氏廣業《孟子出處時地考》云：「穆公行仁政，見於賈誼《新書》。有云：『鄒穆公有食鬼廩者必以糲，毋得以粟，于是倉無糲而求易于民，二石粟得一石糲。吏以爲費，請以粟食廩，公曰：『粟，

人之上食也，奈何以養鳥也？』君者，民之父母。取倉中之粟移之於民，此非吾子粟乎？粟在倉與在民，與我何擇？」鄉民聞之，皆知私積之與公家爲一體也。」又《新序》稱「穆公食不重味，衣不雜采，自刻以廣民，親賢以定國，親民如子。

鄒國之治，路不拾遺，臣下順從。故以鄒子之細，魯衛不能輕，齊楚不能脅。穆公死，鄒之百姓若失慈父，行哭三日。四境之鄰於鄒者，士民嚮方而道哭。」據其言，與孟子所謂「上慢而殘下」者迥異。豈墮於上聞，罪固專在有司，而孟子一言悟主，乃側身修行，發政施仁，以致此歟？」

章指：言上恤其下，下赴其難，惡出乎己，害及其身，如影響自然也。

疏「如影響

自然也」○正義曰：《管子·心術》篇云：「若影之象形，響之應聲也。」語亦見《任法》篇。《列子·天瑞》篇引《黃帝書》云：「形動不生形而生影，聲動不生聲而生響。」又《說符》篇云：「言美則響美，言惡則響惡。身長則影長，身短則影短。」董子《繁露·保位權》云：「有聲必有響，有形必有影。聲出於內，響報於外，形立於上，影報於下。」賈子《新書·大政》篇云：「君鄉善於此，則佚佚然協民皆鄉善於彼矣，猶景之寫形也，君為惡於此，則咄咄然協民皆為惡於彼矣，猶響之應聲也。」《漢書·天文志》云：「政失於此則變見於彼，如景之象形，響之應聲，自然之符也。」《論衡·寒溫》篇云：「虎嘯而谷風至，龍興而景雲起。同氣共類，動相招致。故曰以形逐影，以

龍致雨。雨應龍而來，影應形而去。」

滕文公問曰：「滕，小國也，間於齊楚。

事齊乎，事楚乎？」**注**文公言我居齊楚之間，非其所事，不能自保也。

疏注「非其所事」○正義曰：言

非其所當事也。孟子對曰：「是謀，非吾所能及也。無已，則有一焉。鑿斯池也，築斯城也，

與民守之，效死而民弗去，則是可為也。」**注**

孟子以二大國之君皆不由禮，我不能知誰可事者也。不得已，有一謀焉。惟施德義以養民，與之堅守城池，至死使民不畔去，則可為矣。

疏「無已」○正

義曰：《管子·大匡》篇云：「公汗出，曰：『勿已，其勉霸乎？』」又《戒》篇云：「勿已，朋其可乎？」《呂氏春秋·尊師》篇云：「勿已者，則好學而不厭，好教而不倦。」《勿已》即「無已」。《史記》魯仲連說燕將曰：「亡意，亦捐燕棄世，東游於齊乎？」「亡意」即「無已」。

章指：言事無禮之國，不若得民心，與之守死善道也。

滕文公問曰：「齊人將築薛，吾甚恐。」

如之何則可？」**注**齊人并得薛，築其城以偏於滕，

故文公恐也。**疏**注「齊人」至「恐也」○正義曰：杜預《春

秋釋例·世族譜》云：「薛國任姓，黃帝之苗裔。奚仲封爲

薛侯，今魯國薛縣是也。奚仲遷於邳，仲虺居薛，以爲湯左

相。武王復以其胄爲薛侯。齊桓霸諸侯，黜爲伯，獻公始與

魯同盟。小國無記，世不可知，亦不知爲誰所滅。」按：《孟

子》言「齊人築薛」，則薛已屬齊，故以爲齊人所并，抑趙氏有

所據，今不詳耳。江氏永《羣經補義》云：「齊威王以薛封田

嬰，爲靖郭君，齊人將築薛，其時薛已滅也。《史記正義》：

「薛故城在徐州滕縣南四十四里，與滕切近。」是也。」閻氏若

璩《釋地》依《田齊世家》、《孟嘗君傳》，謂湣王三年庚子封田

嬰於薛。今考《戰國策·齊策》：「靖郭之交，大不善於宣

王，辭而之薛。齊貌辨見宣王曰：「靖郭君曰薛受於先王，

且先王之廟在薛。」此云「先王」，謂威王也。又，「齊王夫人

死，有七孺子皆近，薛公欲知王所欲立。」高誘注云：「齊威

王子宣王也。」又，「孟嘗君在薛，齊王制其顏色。」高誘注

云：「齊宣王也，威王之子。」《淮南子·人間訓》云：「唐子

孟嘗君聞之，使人以車迎之。」然則田嬰封於薛在威王時無

疑。此「築薛」即田氏築之。孟子於薛，薛饒兼金七十鎰，亦

田氏也。周氏廣業《孟子出處時地考》云：「《國策》靖郭君

將城薛，客多陳戒，謁者勿通。後有諫者曰：「君失齊，雖隆

薛之城到於天，猶無益也。」乃輟城薛。薛本有城，靖郭君欲

更築而崇隆之，故諫者甚多而客言如是。滕文公言「齊人將

築薛」，築即「築斯城也」之築，曰「將」，則固其初議也。」孟

子對曰：「昔者大王居邠，狄人侵之，去之岐

山之下居焉。非擇而取之，不得已也。」**注**大

王非好岐山之下擇而居之。迫不得已，困於强暴，

故避之。**疏**「居邠」○正義曰：顧氏炎武《日知錄》云：

「《唐書》言邠州故作邠，開元十三年以字類幽，故改爲邠。

今惟《孟子》書用邠字。蓋唐以後傳錄之變也。」翟氏灝《考

異》云：「《說文》邠字下云：「周大王國。」重文作邠。是邠

實古字。《漢書·匡衡傳》疏：「大王躬仁邠國，貴恕己用

之。」師古注云：「邠即今邠州。」師古尚在開元前，得云傳錄

變乎？」段氏玉裁《說文解字注》云：「邠，周大王國，在右扶

風美陽，^①从邑，分聲。幽，美陽亭即幽也。民俗以夜市有幽山，从山，从豕，闕。按，此二篆說解可疑。幽者，公劉之國，《史記》云「慶節所國」，非大王國，疑一。《漢·地理志》、《毛詩》箋、《郡國志》，皆云「幽在右扶風枸邑」，不在美陽，疑二。《地理》、《郡國》二志皆云枸邑有幽鄉。徐廣曰：「新平漆縣之東北有幽亭。」疑三。從山，豕聲，非有闕也，而云「从豕闕」，疑四。假令許果以幽合邠，當云「或邠字」，而不言及，疑五。蓋古地名作邠，山名作幽，而地名因於山名同音通用，如郊、岐之比。是以《周禮·籥章》經文作幽，注作邠。漢人於地名用邠不用幽，經典多作幽，惟《孟子》作邠；唐開元十三年始改幽州為邠州，見《通典》、《元和郡縣志》。郭忠恕云：「因如幽而易誤也。」按：顧氏謂《孟子》多近今字，於幽之作邠外，又舉強之作彊，知之作智，辟之作避，女之作汝，說之作悅。《說文》虫部云：「強，蛭也。」「蛭，強也。」是強為蟲名。弓部「彊，有力也。」與強字異。其力部云：「彊，迫也。從力，強聲。」重文作勞，云：「古文從彊。」然則「彊而後可」之彊當作勞，《孟子》作彊，為勞之省。勞省作彊，猶勞省作強也。《說文》矢部云：「知，詞也。」曰部云：「智，識詞也。」智乃智省，禮智、小智解作智識者，皆宜作智；他書作知者，通用也。《說文》辵部云：「避，回也。」尸部云：「辟，

法也。從尸，從辛，節制其罪也。」然則辟為刑辟之辟，大王避狄之避，正宜作避，他書作辟者，省文也。《說文》汝為水名，女為婦人名，其為爾汝之汝，本屬假借。《書·盤庚》「格汝眾」，《康誥》「汝為小子」，亦作汝，則女之為汝不特《孟子》也。悅字，《說文》所無。言部之說為詞說之說。而《爾雅·釋詁》云：「悅，樂也。」亦從心。《孟子》諸字，皆非近今字也。顧氏失之。苟為善，後世子孫必有王者矣。
注誠能為善，雖失其地，後世乃可有王者，若周家也。君子創業垂統，為可繼也；若夫成功，則天也。君如彼何哉？彊為善而已矣。**注**君子造業垂統，貴令後世可繼續而行耳，又何能必有成功？成功，乃天助之也。君豈如彼齊何乎？但當自強為善法以遺後世也。**疏**注「君子」至「世也」○正義曰：《說文》云：「勑，造法勑業也。從井，刃聲。讀若創。」蓋創之義為懲艾，經典多借創為勑，故此經作創，趙氏以「造」釋之。《國語·周語》云「以創制天下」，注云：「創，造也。」亦勑作創矣。《說文》云：「繼，續也。」故以「續」釋「繼」。毛本經作

①「在」，原誤作「左」，今據《說文解字注》及經解本改。

彊，注作強，石經經作彊，宋本經亦作彊。翟氏灝《考異》云：「注文以平聲讀，則爲有力之彊。」按《爾雅·釋詁》云：「彊，勤也。」《淮南子·修務訓》云「功可彊成」，高誘注云：「彊，勉也。」自彊爲善法，即自勉爲善法也。

章指：言君子之道，正己任天，強暴之來，非己所招。謂「窮則獨善其身」者也。**疏**「正己任天」○正義曰：古本作「在天」。

滕文公問曰：「滕，小國也，竭力以事大國，則不得免焉。如之何則可？」**注**問免難全國於孟子。孟子對曰：「昔者大王居邠，狄人侵之。事之以皮幣，不得免焉；事之以犬馬，不得免焉；事之以珠玉，不得免焉。」**注**皮，狐貉之裘；幣，繒帛之貨也。**疏**注「皮狐」至「貨也」○正義曰：《毛詩·豳風·七月》篇云：「一之日于貉，取彼狐狸，爲公子裘。」傳云：「于貉，謂取貉。貉，貉皮。狐狸，狐狸皮也。狐、貉之厚以居。」是狐、貉爲豳地所有，故趙氏以「皮」爲「狐貉之皮」也。《周禮·太宰》「九貢」有「幣

貢」，鄭氏注云：「幣貢，玉馬皮帛也。」《小行人》：「合六幣，圭以馬，璋以皮，璧以帛，琮以錦，琥以繡，璜以黼。」然則皮、馬、玉帛，皆通名爲幣。乃此「皮」「幣」對舉，下別言「犬馬」「珠玉」，則幣非統名，故以「帛繒」釋之。《說文》云：「幣，帛也。」《戰國策·齊策》云：「請具車馬皮幣」，高誘注云：「幣，束帛也。」《淮南子·時則訓》云「用圭璧更皮幣」，高誘注云：「幣，謂元纁束帛也。」《儀禮·士昏禮記》云「皮帛必可制」，注云：「皮帛，儷皮束帛也。」此皮帛即皮幣。《秦策》云「約車并幣」，高誘注云：「幣，貨也。」故趙氏釋「幣」爲「繒帛之貨」。《說文》云：「繒，帛也。」「帛，繒也。」《大宗伯》云「孤執皮帛」，注云：「帛如今璧色繒也。」是繒、帛一物。《毛詩·七月》篇云「八月載績，載玄載黃，我朱孔陽」，**①**爲公子裳，傳云：「玄，黑而有赤也。朱，深纁也。陽，明也。祭服玄衣纁裳。」然則玄纁束帛亦豳地所有矣。乃屬其耆老而告之曰：「狄人之所欲者，吾土地也。吾聞之也，君子不以其所以養人者害人。二三子何患乎無君？我將去之。」去邠，踰梁山，

①「陽」，原誤作「揚」，今據疏文及《毛詩》改。

邑于岐山之下，居焉。

注屬，會也。土地生五

穀，所以養人也。會長老，告之如此而去之。

疏「踰

梁」至「居焉」○正義曰：閻氏若璩《釋地續》云：「雍州有二

梁山，一在今韓城、邵陽兩縣境，《書》「治梁及岐」，《詩》「奕

奕梁山」，《春秋》「梁山崩」，《爾雅》「梁山，晉望也」，皆是，於

《孟子》之梁山無涉。《孟子》梁山則在今乾州西北五里，其

山橫而長，自郃抵岐二百五十餘里，山適界乎一百三十里之

間，太王當日必踰此山然後可遠狄患，營都邑，改國曰周。」

○注「屬會」至「去之」○正義曰：伏生《尚書大傳略說》云：

「狄人將攻大王亶父，召耆老而問焉，曰：「狄人何欲？」耆

老對曰：「欲得菽粟財貨。」大王曰：「與之。」每與之至無而

攻不止，大王贅其耆老而問之曰：「狄人又何欲乎？」耆老

對曰：「欲君之土地。」大王曰：「與之。」耆老曰：「君不為社

稷乎？」大王曰：「社稷所以為民也，不可以所為民者亡民

也。」耆老曰：「君縱不為社稷，不為宗廟乎？」大王曰：「宗

廟，吾私也，不可以吾私害民也。」遂策杖而去，過梁山，邑岐

山。國人之束修奔走而從之者三千乘，一止而成三千戶之

邑。《翟氏灝》《考異》云：「按，《桑柔》詩「具贅卒荒」，傳訓贅

為屬，疏云「謂繫綴而屬之」，故《書大傳》述為贅其耆老。」王

氏念孫《廣雅疏證》云：「《說文》：「贅，最也。」隱元年《公羊

傳》「會猶最也」，何休注云：「最，聚也。」《漢書·武帝紀》

「毋贅聚」，如淳注云：「贅，會也。」會、最、聚並同義。《說

苑·奉使》篇「梁王贅其群臣」即屬其群臣也。」又云：「《孟

子》曰「大王屬其耆老」，《書傳》曰「贅其耆老」，是贅為屬也。

襄十六年《公羊傳》注云：「贅，繫屬之辭。」若今俗名「就壻」

為「贅壻」矣。劉熙《釋名》說「贅，肫」之義云：「贅，屬也。橫

生一肉屬着體也。」並事異而義同。」然則趙氏以「會」釋

「屬」，正以贅釋屬也。經上言「土地」，下言「養人」，土地何

以能養人？以其能生五穀，供人飯食，故趙氏申言之。《列

子·說符》篇：「牛缺謂盜曰：君子不以所養害其所養。」

《鹽鐵論·刑德章》云：「聞以六畜禽獸養人，未聞以所養害

人者也。」然則「不以其所以養人者害人」，蓋古有此語，不必

專指土地。邠人曰：「仁人也，不可失也。」從之

者如歸市。**注**言樂隨大王如歸趨於市，若將有得

也。**疏**注「言樂」至「得也」○正義曰：《史記·孟嘗君傳》

云：「君獨不見夫朝趨市者乎？」《淮南子·汜論訓》云「故

終身而無所定趨」，《倣真訓》云「若周員而趨」，高誘注並

云：「趨，歸也。」歸市即趨市，故趙氏以「趨」釋「歸」。凡赴

市者以所有易所無，交易而退，各有所得，日用之需，皇皇求利，故樂趨之。邠人樂隨大王而趨，故云「若將有所得」也。孟子所述亦見《莊子·讓王》篇，云：「大王賈父居邠，狄人攻之。事之以皮帛而不受，事之以犬馬而不受，事之以珠玉而不受，狄人之所求者，土地也。大王賈父曰：『與人之兄居而殺其弟，與人之父居而殺其子，吾不忍也。子皆勉居矣。爲吾臣與爲狄人臣，奚以異？』且吾聞之，不以所用養害所養。」因杖策而去之。民相連而從之，遂成國於岐山之下。《呂氏春秋·審爲》篇、《淮南子·道應訓》俱錄《莊子》之文。高誘注《呂氏春秋》云：「所以養者，土地也。所養者，謂民人也。連，結也。民相與結櫓隨之衆多，復成爲國也。」《莊》與《孟》小異，而事略同。《史記·劉敬傳》說高帝云：「大王以狄伐故去邠，杖馬箠居岐，國人爭隨之。」馬箠即策，所謂「來朝走馬」也。《毛詩·大雅·綿》篇傳云：「古公處邠，狄人侵之，事之以皮幣不得免焉，事之以犬馬不得免焉，事之以珠玉不得免焉。乃屬其耆老而告之曰：『狄人之所欲，吾土地。吾聞之，君子不以其所以養人而害人。二三子何患乎無君？』去之，踰梁山，邑乎岐山之下。邠人曰：『仁人之君，不可失也。』從之如歸市。」孔氏正義云：「皆孟子對滕文公之辭也。唯彼云『太王居邠』，此因古公之下即云『處邠』爲異耳。」《莊子》與《呂氏春秋》、《書傳略說》與此，大意皆同。此言「不得免焉」，《略說》云「每與之不止」，《呂氏春秋》言「不受」，異人別說，故不同耳。此言「犬馬」，《略說》言「菽粟」，明國之所有莫不與之，故鄭於《稷起》及《易》注皆云「事之以牛羊」，明當時亦有之。《史記·周本紀》云：「古公賈父復修后稷、公劉之業，積德行義，國人皆戴之。薰育戎狄攻之，欲得財物，與之，已。復攻，欲得地與民，民皆怒，欲戰，古公曰：『有民立君，將利之。今戎狄所爲攻戰，以吾地與民。民之在我與其在彼何異？民欲以我故戰，殺人父子而君之，予不忍爲。』乃與私屬遂去邠，渡漆沮，踰梁山，止于岐下。邠人舉國扶老攜弱，盡復歸古公於岐下。及他旁國聞古公仁，亦多歸之。」《說苑·至仁》篇云：「大王有至仁之恩，不忍戰其百姓，故事勳育戎氏以犬馬珍幣，而伐不止。問其所欲者，曰：『土地也。』於是屬其群臣耆老而告之曰：『土地者，所以養人也。不以其所以養人而害其養也。吾將去之。』遂居岐山之下。邠人負幼扶老從之，如歸父母。」《吳越春秋·太伯傳》云：「古公賈甫修公劉、后稷之業，積德行義，爲狄人所慕，薰鬻戎妬而伐之。古公事之以犬馬牛羊，其伐不止，事之以皮幣金玉重寶，而亦伐之不止。古公問所欲，曰：『欲其土地。』古公曰：『君子

下即云「處邠」爲異耳。」《莊子》與《呂氏春秋》、《書傳略說》與此，大意皆同。此言「不得免焉」，《略說》云「每與之不止」，《呂氏春秋》言「不受」，異人別說，故不同耳。此言「犬馬」，《略說》言「菽粟」，明國之所有莫不與之，故鄭於《稷起》及《易》注皆云「事之以牛羊」，明當時亦有之。《史記·周本紀》云：「古公賈父復修后稷、公劉之業，積德行義，國人皆戴之。薰育戎狄攻之，欲得財物，與之，已。復攻，欲得地與民，民皆怒，欲戰，古公曰：『有民立君，將利之。今戎狄所爲攻戰，以吾地與民。民之在我與其在彼何異？民欲以我故戰，殺人父子而君之，予不忍爲。』乃與私屬遂去邠，渡漆沮，踰梁山，止于岐下。邠人舉國扶老攜弱，盡復歸古公於岐下。及他旁國聞古公仁，亦多歸之。」《說苑·至仁》篇云：「大王有至仁之恩，不忍戰其百姓，故事勳育戎氏以犬馬珍幣，而伐不止。問其所欲者，曰：『土地也。』於是屬其群臣耆老而告之曰：『土地者，所以養人也。不以其所以養人而害其養也。吾將去之。』遂居岐山之下。邠人負幼扶老從之，如歸父母。」《吳越春秋·太伯傳》云：「古公賈甫修公劉、后稷之業，積德行義，爲狄人所慕，薰鬻戎妬而伐之。古公事之以犬馬牛羊，其伐不止，事之以皮幣金玉重寶，而亦伐之不止。古公問所欲，曰：『欲其土地。』古公曰：『君子

不以養害所養。國所以亡也而爲身害，吾所不居也。」古公乃杖策去邠，踰梁山而處岐周，曰：「彼君與我何異？」邠人父子兄弟相帥負老攜幼，揭釜甑而歸古公。居三月，成城郭，一年成邑，二年成都，而民五倍其初。周氏廣業《孟子逸文考》云：「趙注『交鄰』章云：『獯鬻，北狄強者，今匈奴也。』大王去邠，避獯鬻，此章『狄人』無注，是獯鬻即狄也。《吳越春秋》似狄與獯鬻爲二種。」按：《吳越春秋》後漢趙氏所撰，蓋刺取《史記》、《說苑》等書爲之。其書視諸說最後，而獯鬻妬狄之說，前此無之，未足爲據也。或曰：「世守也，非身之所能爲也。效死勿去。」君請擇於斯二者。」**注**或曰：土地乃先人之所受也，世世守之，非己身所能專爲。至死不可去也。欲令文公擇此二者，惟所行也。**疏**注「非己」至「去也」○正義曰：《爾雅·釋詁》云：「身，我也。」趙氏注《盡心》篇「楊子取爲我」云：「爲我，爲己也。」是身、己、我三字轉注也。《呂氏春秋·貴生》篇云「譬之若官職，不得擅爲」，高誘注云：「爲，作也。」專爲猶擅爲。作者，自我作之，不繼述也，中本有專擅之義，故以「專」釋「爲」也。《淮南子·主術訓》云「以效其功」，又云「所以效善也」，高誘注皆云：「效，致也。」《戰國策》西周、

齊、秦諸策，高誘注皆云：「效，致也。」致即至，故以致釋效。

章指：言太王去邠，權也；效死而守業，義也。義、權不並，故曰「擇而處之」也。

疏「太王」至「之也」○正義曰：《毛詩·大雅·緜》正義云：「《曲禮下》曰：『國君死社稷。』《公羊傳》曰：『國滅君死之，正也。』則諸侯爲人侵伐，當以死守之，而公劉、太王皆避難遷徙者，《禮》之所言謂國正法，公劉、太王則權時之宜。《論語》曰：『可與適道，未可與權。』《公羊傳》云：『權者，反經合義。權者，稱也。稱其輕重，度其利害而爲之。太王爲狄人所攻，必求土地，不得其地，攻將不止。戰以求勝，則人多殺傷，故棄戎狄而適岐陽，所以成三分之業，建七百之基。雖於禮爲非，而其義則是。此乃賢者達節，不可以常禮格之。』按：《梁惠王》上、下篇，至此二十二章，皆對時君之言，而結之以「君請擇於斯二者」，趙氏以「權」解之，是也。權之義，孟子自申明之。聖人通變神化之用，必要歸於《巽》之行權。「請擇」者，行權之要也。孟子深於《易》，七篇之作，所以發明伏羲、神農、黃帝、堯、舜之道，疏述文王、周公、孔子之言，端在于此。儒者未達其指，猶沾沾於井田、封建而

不知變通，豈知孟子者哉？

魯平公將出，嬖人臧倉者請曰：「他日

君出則必命有司所之。今乘輿已駕矣，有司未知所之，敢請。」**注**平，謚也。嬖人，愛幸小人也。

疏注「平謚」至「人也」○正義曰：《史記·魯世家》

云：「悼公之時三桓勝，魯如小侯，卑於三桓之家。三十七年，悼公卒，子嘉立，是爲元公。元公二十一年卒，子顯立，是爲穆公。穆公三十三年卒，子奮立，是爲共公。共公二十二年卒，子屯立，是爲康公。康公九年卒，子隱立，是爲景公。景公二十九年卒，子叔立，是爲平公。是時六國皆稱王。二十二年，平公卒。」《漢書·律曆志》魯平公名旅，與《史記》異。《周書·謚法解》云：「治而無咎曰平，執事有制曰平，布綱治紀曰平。」《說文》女部云：「嬖，便嬖，愛也。」隱公三年《左傳》「公子州吁，嬖人之子也」，注云：「嬖，親幸也。」此嬖人指妃妾之寵愛者。《禮記·緇衣》云「毋以嬖御人疾莊后，毋以嬖御士疾莊士大夫卿士」，注云：「嬖御人，愛妾也。嬖御士，愛臣也。」然則男女之賤而得幸者通稱嬖人。《史記》有《佞幸列傳》，云：「非獨女以色媚，而仕官亦

有之。昔以色幸者多矣，高祖至暴抗也，然籍孺以佞幸，孝惠時有閼孺。此兩人非有才能，徒以婉佞貴幸，與上卧起。」

嬖人臧倉，籍孺、閼孺之類也。公曰：「將見孟子。」

注平公敬孟子有德，不敢請召，將往就見之。曰：

「何哉，君所爲輕身以先於匹夫者？以爲賢乎？禮義由賢者出，而孟子之後喪踰前喪，

君無見焉。」**注**匹夫，一夫也。臧倉言君何爲輕千

乘而先匹夫乎？以爲孟子賢故也。賢者當行禮

義，而孟子前喪父約，後喪母奢，君無見也。公

曰：「諾。」**注**諾，止不出。**疏**注「諾止不出」○正義

曰：《說文》言部云：「諾，應也。」宣公十五年《公羊傳》注云：「諾者，受語辭。」臧倉云「君無見焉」，戒止平公之出見

孟子也。平公諾之，即受其無見之言，故以「止不出」解之。

樂正子人見，曰：「君奚爲不見孟軻也？」**注**

樂正，姓；子，通稱。孟子弟子也，爲魯臣。問公何

爲不便見孟軻。**疏**注「樂正」至「孟軻」○正義曰：《禮

記·王制》云「樂正崇四術」，注云：「樂正，樂官之長。」樂正蓋以官爲氏者。魯人曾子弟子有樂正子春，是也。《論語·

學而篇「子曰」，《集解》引馬注云：「子者，男子之通稱也。」《白虎通》云：「子者，丈夫之通稱也。」云「不便見孟軻」也，便猶利也，利猶快也。謂其遲滯不即見。曰：「或告寡

人曰孟子之後喪踰前喪，是以不往見也。」

公言以此故也。曰：「何哉，君所謂踰者？」前

以士，後以大夫，前以三鼎而後以五鼎與？」

注樂正子曰，君所謂踰者，前者以士禮，後者以大夫。禮，士祭三鼎，大夫祭五鼎，故也。

疏注「禮士」

至「五鼎」○正義曰：《儀禮·士虞禮》云：「陳三鼎於門外之右，北面北上，設扃扉。」是士用三鼎也。《少牢饋食禮》

云：「雍人陳鼎五，三鼎在羊鑊之西，二鼎在豕鑊之西。」是

大夫用五鼎也。《禮記·郊特牲》云「鼎俎奇而籩豆偶」，孔

氏正義云：「少牢陳五鼎：羊一，豕二，膚三，魚四，腊五。

特牲三鼎：牲鼎一，魚鼎二，腊鼎三。」楊復《儀禮旁通鼎數

圖》云：「三鼎：特豕而以魚腊配之也。羊豕曰少牢。凡五

鼎皆用羊豕而以魚腊配之。少牢五鼎，大夫之常事，又有殺

禮而用三鼎者，如《有司徹》乃升羊豕魚三鼎，腊爲庶羞，膚

從豕，去腊膚二鼎，陳於門外如初，以其繹祭殺於正祭，故用

牢者，如《既夕》遣奠，陳鼎五於門外，是也。」桓二年《公羊傳》注云：「禮祭，天子九鼎，諸侯七，卿大夫五，元士三。」徐氏疏云：「《春秋》、《說文》、《士冠禮》、《士喪禮》皆一鼎者，士冠、士喪略於正祭故也。」曰：「否，謂棺槨衣衾之美也。」**注**公曰，不謂鼎數也，以其棺槨衣衾之美惡也。曰：「非所謂踰也，貧富不同也。」**注**樂正子曰：此非薄父厚母，令母喪踰父也。喪父時爲士，喪母時爲大夫。大夫祿重於士，故使然，貧富不同也。樂正子見孟子，曰：「克告於君，君爲來見也。嬖人有臧倉者沮君，君是以不果來也。」**注**克，樂正子名也。果，能也。曰，克告君以孟子之賢，君將欲來。臧倉者沮君，故君不能來也。**疏**「君爲來見也」○正義曰：《禮記·檀弓》注云：「爲猶行也。」「君爲來見」猶云君行來見也。今人稱事之將然者，每云「行將」。《毛詩》傳多以行訓將，《廣雅·釋詁》云：「將，欲也。」是將、欲、爲三字轉注互訓。「君爲來」即君行將來，君行將來即君將欲來，故趙氏以「將欲」釋「爲」字也。王氏引之《經傳釋詞》云：「爲猶將也。趙氏注「君將欲來」是也。

《史記·盧縮傳》：「盧縮妻子亡降漢，會高后病，不能見。舍燕邸，爲欲置酒見之，高后竟崩，不得見。」言高后將欲置酒見之，會高后崩，不得見也。《衛將軍驃騎傳》曰：「驃騎始爲出定襄當單于，捕虜。虜言單于東，乃更令驃騎出代郡。」言始將出定襄，後更出代郡也。○「沮君」○正義曰：《音義》出沮字，云：「本亦作阻。」按：《毛詩·巧言》篇「亂庶遄沮」，傳云：「沮，止也。」《呂氏春秋·至忠》篇「人不知不爲沮」，高誘注云：「沮，止也。」又《知士》篇云「故非之弗爲阻」，高誘注亦云：「阻，止也。」是沮、阻同訓止，其字可通也。○注「果能也」○正義曰：王氏念孫《廣雅疏證》云：「『果，能也』，見《西征賦》注。《孟子·梁惠王》篇「君是以不果來也」，《離婁》篇「果有以異於人乎」，趙氏注並云：「『果，能也』。《晉語》『是之不果奉而暇晉是皇』，韋昭注云：「『果，克也』。『克亦能也』。」

曰：「行，或使之；止，或尼之。」行止，非人所能也。吾之不遇魯侯，天也，臧氏之子焉能使予不遇哉？」**注**尼，止也。孟子之意以爲，魯侯欲行，天使之矣；及其欲止，天令嬖人止之耳。行止天意，非人所能爲也。如使吾見魯侯，冀得行道，天欲使濟斯民也。故曰，吾之不遭遇魯侯，

乃天所爲也，臧倉小人何能使我遇哉？**疏**注「尼止也」○正義曰：《爾雅·釋詁》文。《音義》云：「尼，女乙切。」丁本作「尼」，云「居字」。按《呂氏春秋·慎人》篇云「胼胝不居」，高誘注云：「居，止也。」義亦同。周氏廣業《孟子逸文考》云：「顏元孫《千祿字書》平聲有尼二字。注云：「上俗下正。」疑屈是尼之譌。」○注「吾之不遭遇魯侯」○正義曰：《呂氏春秋·長攻》篇云「必有其遇」，注云：「遇猶遭也。」《說文》是部云：「遭，遇也。」遭、遇二字轉注。

章指：言讒邪構賢，賢者歸天，不尤人也。**疏**「讒邪構賢」○正義曰：《漢書》劉向上封事

云：「讒邪進則衆賢退。」周氏廣業《逸文考》云：「劉峻《辨命篇》云：『孟子與困臧倉之訴。』李師政《辨惑論》云：『孟軻于魯，不憾臧倉之蔽。』夫孟子既非于魯，亦何嘗爲臧倉所困哉？」按：治平之要，歸之於權，出處之命，歸之於天。此《梁惠王》一篇之大旨，亦即七篇之大旨也。

姪廷琮廷弼校字

孟子正義卷五終

孟子正義卷六

江都縣鄉貢士焦循譯集

孟子卷第三

公孫丑章句上凡九章。

注公孫丑者，公孫

姓，丑，名。孟子弟子也。丑有政事之才，問管、晏之功，猶《論語》子路問政，故以題篇。

疏注

「公孫」至「題篇」○正義曰：魯公孫茲爲叔孫氏，公孫敖爲仲孫氏，公孫歸父爲東門氏，公孫嬰齊爲叔氏。鄭公孫舍之爲罕氏，公孫申爲孔氏，公孫黑公孫夏爲駟氏，公孫僑爲國氏，公孫蠆爲游氏。此如「公子」、「王子」之稱，非氏也。齊有公孫氏，未知所出。董子《繁露》云：「公孫之養氣曰：禮義泰實則氣不通，泰虛則氣不足，泰勞則氣不入，泰佚則氣宛，至怒則氣高，喜則氣衰，憂則氣

狂，懼則氣懾。凡此皆氣之害。」陶淵明《聖賢羣輔錄·八儒》篇云：「**①**公孫氏傳《易》爲道，爲潔淨精微之儒。樂正氏傳《春秋》爲道，爲屬辭比事之儒。」說者謂即公孫丑、樂正克。趙氏謂丑有政事之才，未詳所出。《齊乘·人物》篇云：「公孫丑，滕州北公村有墓。」

公孫丑問曰：「夫子當路於齊，管仲、晏子之功可復許乎？」**注**夫子謂孟子。許猶興也。

如使夫子得當仕路於齊而可以行道，管夷吾、晏嬰之功寧可復興乎？**疏**注「許猶興也」○正義曰：《毛

詩·大雅》「昭茲來許」，傳云：「許，進也。」興亦進義，故以興釋許。○注「當仕路於齊」○正義曰：《文選》阮嗣宗《詠懷詩》注引晉綦毋邃《孟子注》云：「當路，當仕路也。」孟子

曰：「子誠齊人也，知管仲、晏子而已矣。」**注**

誠，實也。子實齊人也，但知二子而已，豈復知王者之佐乎？**疏**注「誠實也」○正義曰：《呂氏春秋·論威》

①「賢」，原誤作「聖」，今據《陶淵明集》及經解本改。

篇云「此之謂至威之誠」，《淮南子·主術訓》云「抱德推誠」，高誘注並云：「誠，實也。」或問乎曾西曰：「吾子與子路孰賢？」曾西蹙然曰：「吾先子之所畏也。」**注**曾西，曾子之孫。蹙然猶蹙蹙也。先子，曾子也。子路在四友，故曾子畏敬之，曾西不敢比。**疏**注「曾西」至「敢比」○正義曰：毛氏奇齡《四書賸言》云：「《經典序錄》：『曾申字子西，子夏以《詩》傳曾申。左丘明作傳以授曾申。』則是曾西即曾申，爲曾子之子，非孫也。其以申字西者，或以申枝爲西方之辰，如《春秋》楚鬬宜申、公子申皆字子西可驗。」江氏永《羣經補義》云：「曾西即曾申，曾子之子，非曾子之孫。稱『先子』者謂父，非謂祖父也。」閻氏若璩《釋地》亦同。周氏柄中《辨正》云：「曾子二子元、申，見《禮記·檀弓》。而《大戴禮》云：『曾子疾病，曾元持首，曾華抱足。』華即申之字也。申既字華，不當又字子西。《曲禮》孔疏亦以曾西爲曾子之孫。疑趙注爲是。」趙氏佑《溫故錄》云：「以楚鬬宜申字子西，公子申字子西例之，申、西止爲一人名字近是。但必謂曾西是曾子子孫，則未見其確。何者？第言曾元養曾子，《檀弓》所記曾子寢疾病，曾元、曾申坐於足者，安見其非子孫並侍？曾子以老壽

終，自宜有孫也。」翟氏灝《四書考異》云：「《禮記·曲禮》注引曾子曰：『吾先子之所畏』，《檀弓》『穆公之母卒，使人問於曾子』，時稱曾申爲『曾子』也。《史記》『吳起事曾子』。其曾子亦是曾申。記述曾子語獨多，未必皆子與子矣。」王氏念孫《廣雅疏證》云：「《釋訓》：『跽，畏敬也。』《論語·鄉黨篇》『跽，如也』，馬融注云：『跽，恭敬之貌。』《孟子·公孫丑》篇『曾西蹙然』，趙氏注云：『蹙然猶蹙蹙也。』蹙，蹙並與跽同。伏生《尚書大傳》云：『周文王胥附、奔輶、先後、禦侮，謂之『四鄰』，以免乎牖里之害。懿子曰：『夫子亦有四鄰乎？』孔子曰：『吾有『四友』焉：自吾得回也，門人加親，是非胥附乎？自吾得賜也，遠方之士日至，是非奔輶乎？自吾得師也，前有光，後有輝，是非先後乎？自吾得由也，惡言不至於門，是非禦侮乎？』曰：『然則吾子與管仲孰賢？』曾西蹙然不悅，曰：『爾何曾比予於管仲？』**注**蹙然，愠怒色也。何曾猶何乃也。**疏**注「蹙然」至「乃也」○正義曰：王氏念孫《廣雅疏證》云：「《說文》蹙字注引《論語》『色蹙如也』，今本作『勃』。《玉篇》、《廣韻》、《類篇》蹙字並音勃。《集韻》、《類篇》引《廣雅》『蹙，頰色也』。頰與蹙同。凡人敬則色變，若《論語》『色

勃如」，是也；怒則色變，若《孟子》「曾西蹵然不悅」，「王勃然變乎色」，是也。《說文》「字字注又引《論語》「色字如也」，《秦策》云「秦王悖然而怒」，《楚策》云「王佛然作色」，《淮南子·道應訓》云「欬非瞋目敦然」，並字異而義同。」段氏玉裁《說文解字注》云：「曾之言乃也。《詩》「曾是不意」，「曾是在位」，「曾是在服」，「曾是莫聽」，《論語》「曾是以爲孝乎」，「曾謂泰山不如林放乎」，《孟子》「爾何曾比予於管仲」，皆訓爲乃。」按：《爾雅·釋詁》云：「仍，乃也。」仍從乃聲，乃聲古與仍同，與曾爲疊韻，故曾、乃義同。管仲得君如彼其專也，行乎國政如彼其久也，功烈如彼其卑也。爾何曾比予於是？」**注**曾西答或人，言管仲得遇桓公使之專國政如彼，行政於國其久如彼，功烈卑陋如彼。謂不帥齊桓公行王道而行霸道，故言卑也。重言「何曾比我」，耻見比之甚也。

疏注「得遇桓公」○正義曰：《莊子·大宗師》注云：「當所遇之時，世謂之得。」《淮南子·精神訓》云：「故事有求之於四海之外而不能遇」，高誘注云：「遇，得也。」《易·小過》「弗過遇之」，注云：「過而得之謂之遇。」故趙氏以「遇」釋「得」。曰：「管仲，曾西之所不爲也，而子爲我

願之乎？」**注**孟子心狹曾西，曾西尚不欲爲管仲而子爲我願之乎？非丑之言小也。**疏**曰：「管」至「之乎」○正義曰：《四書辨疑》云：「自「子誠齊人也」下，連此乎」○正義曰：此處不當又有孟子發語之辭。曰本衍字無疑。王氏引之《經傳釋詞》云：「此述古語既畢而更及今事也。」《呂氏春秋·驕恣》篇李悝述楚莊王之言畢，則云「曰此霸王之所憂也，而君獨伐之」，文義與此同。「而子爲我願之」者，《國語·晉語》云「爲後世之見之也」，《魯語》云「其爲後世昭前之令聞也」，韋昭注並云：「爲，使也。」此爲字同之，蓋謂子乃使我願之乎。《經傳釋詞》云：「家大人曰：爲猶謂也，言子謂我願之也。宣二年《穀梁傳》曰：「天乎天乎，子無罪，孰爲盾而忍弑其君者乎？」《公羊傳》曰：「吾不弑君，誰謂吾弑君者乎？」是其證。」廷琥云：《史記·殷本紀》曰：「帝乙崩，子辛立，是爲帝辛，天下爲之紂。」按，「爲之紂」即謂之紂也。亦爲、謂可通之證。」○注「孟子心狹曾西」○正義曰：《說文》阜部云：「陝，隘也。」陝與狹同。《文選·東京賦》云「狹三王之赳起」，薛綜注云：「狹謂陋也。」狹隘即小，故云「非丑之言小」。

曰：「管仲以其君霸，晏子以其君顯。」

管仲、晏子猶不足爲與？」**注**丑曰：管仲輔桓公

以霸道，晏子相景公以顯名。二子如此，尚不可以爲邪？」**疏**「晏子以其君顯」○正義曰：馬氏驥《經史》

云：「晏平仲之在齊也，歷事三君，皆暗主也。崔、慶既亡，陳氏得政，所際之時，則季世也。方莊公之弑，晏子伏尸成禮，大宮之畎，舍命不渝，是可謂仁者之勇矣。景公嗣位，若能委權任用，承霸國之餘烈，晉失諸侯，齊國之興，日可俟也。乃景公固非能大有爲之君也。所寵任者，梁丘據、裔款之流，所好者，宮室臺榭之崇，聲色狗馬之玩。嬰也隨事補救，以諷諫匡君心者，朝夕不怠。危行言孫，故能身處亂世，顯名諸侯，而齊國賴之。」曰：「以齊王，由反手也。」

注孟子言以齊國之大而行王道，其易若反手耳。故譏管、晏不勉其君以王業也。**疏**「由反手也」○正義

曰：《音義》云：「由，義當作猶，古字借用耳。」按：趙氏以「若」字釋「由」字，則由讀爲猶矣。曰：「若是則弟子

之惑滋甚。且以文王之德，百年而後崩，猶未洽於天下；武王、周公繼之，然後大行。今言王若易然，則文王不足法與？」**注**丑曰：

如是言則弟子惑益甚也。文王尚不能及身而王，何謂王易然也？若是則文王不足以爲法邪？」**疏**「今

言王若易然」○正義曰：翟氏灝《考異》云：「或讀然屬下文，後文「今時則易然也」，知此然字必不當屬下。」按：趙氏云「何謂王易然也」，斷「然」字句，甚明。曰：「文王何

可當也？由湯至於武丁，賢聖之君六七作。天下歸殷久矣，久則難變也。武丁朝諸侯，有天下，猶運之掌也。」**注**武丁，高宗也。孟子言

文王之時難爲功，故言「何可當」也。從湯以下，賢聖之君六七興，謂太甲、太戊、盤庚等也。運之掌，言易也。**疏**「武丁高宗也」○正義曰：《史記·殷本紀》

云：「武丁修政行德，天下咸驩，殷道復興。帝武丁崩，子帝祖庚立，祖己嘉武丁之以祥雉爲德，立其廟爲高宗。」是武丁爲高宗也。○注「孟子」至「當也」○正義曰：此當字與下「當今之時」當字相應。趙氏注下「是以難也」云：「文王當此時，故難也。」與此注互明。近通解謂文王之德，何可敵也，與趙氏異。○注「從湯」至「等也」○正義曰：《殷本紀》云：「湯崩，太子太丁未立而卒，立太丁之弟外丙。帝外丙

即位三年崩，立外丙之弟中壬。帝中壬即位四年崩，伊尹乃立太丁之子太甲。帝太甲稱「太宗」，太宗崩，子沃丁立。沃丁崩，弟太庚立。帝太庚崩，子帝小甲立。帝小甲崩，弟雍己立。殷道衰，諸侯或不至。帝雍己崩，弟太戊立，殷復興，諸侯歸之，故稱「中宗」。中宗崩，子帝仲丁立。帝仲丁崩，弟外壬立。帝外壬崩，弟河亶甲立，殷復興。河亶甲崩，子帝祖乙立，殷復興。祖乙崩，子帝祖辛立。帝祖辛崩，弟沃甲立。帝沃甲崩，立沃甲兄祖辛之子祖丁。帝祖丁崩，立弟沃甲之子南庚。帝南庚崩，立帝祖丁之子陽甲，殷衰。帝陽甲崩，弟盤庚立。渡河南，復居成湯之故居，殷道復興。帝盤庚崩，弟小辛立，殷復興。帝小辛崩，弟小乙立。帝小乙崩，子帝武丁立，修政行德，天下咸驩，殷道復興。然自湯興以來，若太甲，若太戊，若祖乙，若盤庚，若武丁，皆當殷衰而復興之君共六人。《尚書序》：「湯、武丁之間太甲、沃丁、太戊、仲丁、河亶甲、祖乙、盤庚七君皆有所紀述，則「六七作」者，或離湯、武丁，即指其間之六七君。乃《史記》稱河亶甲時殷復興，則不得與于賢聖之君矣。趙氏僅數太甲、太戊、盤庚，以太甲、盤庚，《尚書》詳之。而太戊爲中宗，見稱于《無逸》，亦明有可徵，故略舉此耳。趙氏佑《溫故錄》云：「注謂自湯以下，太甲、太戊、盤庚等，脫去祖乙。然以四君連湯、武丁，

亦止六而非七，豈孟子「七」字虛設邪？竊以《書·無逸》明言及高宗及祖甲，祖甲爲武丁後一代賢君，自《史記》以爲帝甲淫亂，殷復興，蓋因《國語》「帝甲亂之，五世而隕」之文，于是二孔皆以太甲當祖甲。鄭氏注：「祖甲，武丁子帝甲也。有兄祖庚賢，武丁欲廢兄立弟，祖甲以爲不義，逃之民間，故曰不義惟王，舊爲小人。」以經證史，亦可見《殷紀》之疏。是「六七作」宜兼數祖甲。或曰：然則孟子何以獨言「由湯至于武丁」，「紂之去武丁」，皆不及祖甲？曰：子統於父也。祖甲即武丁子，且其兄亦賢，兩世皆承武丁之烈，則以武丁統之可矣。惟由武丁歷祖甲皆能以賢嗣賢，享年又長，有深仁厚澤，以綿殷道，故益見其久而難變。不然，僅至武丁而止，則紂之去武丁，中間更無接續，相越且百年，亦不得言「未久」也。按：此說是也。「六七」非約略之辭，湯、太甲、太戊、祖乙、盤庚、武丁六作，及祖甲則七作，不直云「七作」「六作」，連云「六七作」，正以祖甲在武丁後，故如此屬文也。馬融《無逸》注云：「祖甲有兄祖庚，而祖甲賢，武丁欲立之。祖甲以王廢長立少不義，逃之民間。」此是也。惟祖庚不甚賢，祖甲賢，故武丁欲廢長立少。鄭氏注：「有兄祖庚賢，武丁欲廢兄立弟。」豈武丁而有此？鄭注已殘，當是傳寫者有缺誤。不然，則鄭不及馬。若祖庚亦賢，則是賢聖之君不止

六七，惟祖庚不甚賢，不能承武丁之化，祖甲復振興之，與太戊、祖乙、盤庚、武丁同，乃爲六七作也。《呂氏春秋·義賞》篇高誘注云：「興，作也。」《周禮·舞師》注云：「興猶作也。」故以「興」釋「作」。紂之去武丁未久也，其故家遺俗、流風善政猶有存者，又有微子、微仲、王子比干、箕子、膠鬲，皆賢人也，相與輔相之，故久而後失之也。尺地莫非其有也，一民莫非其臣也，然而文王猶方百里起，是以難也。**注**紂得高宗餘化，又多良臣，故久乃亡也。微仲、膠鬲，皆良臣也，但不在三仁中耳。文王當此時，故難也。**疏**「紂之去武丁未久也」○正義曰：

《史記·殷本紀》云：「帝武丁崩，子帝祖庚立。帝祖庚崩，弟祖甲立，是爲帝甲。帝甲崩，子帝廩辛立。帝廩辛崩，弟庚丁立。帝庚丁崩，子帝武乙立。武乙無道，震死，子帝太丁立。帝太丁崩，子帝乙立。帝乙長子曰微子啓，啓母賤，不得嗣；少子辛，辛母正后，辛爲嗣。帝乙崩，子辛立，是爲帝辛，天下爲之紂。」蓋武丁之後，祖甲愛知小人之依能保惠于庶民，故高宗嘉靖殷邦之化，雖歷武乙之無道，餘化猶存。

- 今文《尚書》「高宗饗國百年」，《漢書·五行志》及《劉向》《杜欽》二傳，王充《論衡·無形》《異虛》二篇，皆本今文，則以高宗百年，加以祖甲三十三年，百餘年深仁厚澤，其下歷五世至紂。《無逸》固云：「或十年，或七八年，或五六年，或四三年。」此即指廩辛、庚丁、武乙、太丁、**①**帝乙而言，故孟子言「未久」。晉人僞作《竹書紀年》謂武乙三十五年，太丁十三年，顯與《無逸》相悖，是不足議也。○「其故」至「存者」○正義曰：故家，勳舊世家，謂臣也；遺俗，敦龐善俗，謂民也；流風之播，恩澤之政，謂君上也。《尚書·微子》篇云：「殷罔不小大好草竊姦宄，卿士師師非度，凡有辜罪，乃罔恒獲，小民方興，相爲敵讐。」馬融注云：「非但小人學爲姦宄，卿士以下轉相師效，爲非法度。」鄭氏注云：「羣臣皆有是罪，其爵祿又無常得之者，言屢相攻奪。」又云：「天毒降災荒殷邦，方興沉酗于酒，乃罔畏畏，咈其耆長舊有位人。今殷民乃攘竊神祇之犧牷牲，**②**用以容，將食無災。」按：卿士爲非，羣臣相奪，則故家不存矣。小民姦宄，竊攘以容，則遺俗
- ①** 「太」，原誤作「文」，今據上文引《史記》及經解本改。下「太丁」字同。
- ②** 「牷」，原誤作「牲」，今據經解本及《尚書》改。

無存矣。顧氏炎武《日知錄》云：「自古國家承平日久，法制廢弛而上之令不能行於下，未有不亡者也。紂以不仁而亡天下，人人知之，吾謂不盡然。紂之爲君，沉湎於酒，而逞一時之威，至於剝孕斲脛，蓋齊文宣之比耳。商之衰也久矣，一變而《盤庚》之書，則卿大夫不從君令，再變而《微子》之書，則小民不畏國法，至於攘竊神祇之犧牲，用以容，將食無災」，可謂民玩其上而威刑不立者矣。即以中主守之猶不能保，而況以紂之狂醜昏虐，又祖伊奔告而不省乎？文宣之惡未必減於紂而齊以強，高緯之惡未必甚於文宣而齊以亡者，文宣承神武之餘，紀綱粗立，而又有楊愔輩爲之佐，主昏於上而政清於下也。至高緯而國法蕩然矣，故宇文得而取之。」按：小民草竊，至于盜犧牲而容之不問，此遺俗之所以不存而姦民無忌畏矣。《酒誥》云：「在昔殷先哲王，自成湯咸至於帝乙，不敢自暇自逸，矧曰其敢崇飲。越在外服，侯、甸、男、衛、邦伯，越在內服，百僚庶尹，惟亞惟服宗工。越百姓里居，罔敢湎于酒。」周續之《詩序義》云：「由我化物，則謂之風。上不崇飲，則下不湎酒，此遺風之善也。自紂酣身，荒腆于酒，于是庶羣自酒，至《康誥》尚諄諄以羣飲民湎于酒爲戒，此流風不存而愚民無懲戒矣。至於重刑辟有炮烙之法，厚賦稅以實鹿臺之錢，盈鉅橋之粟，則祖宗

之善政乃無存而良民皆盡盡矣。」云「猶有存」者，文王時尚未盡喪也。故家與國同休戚，與民相係屬，故盤庚遷殷，民因在位之言不樂從，盤庚必再三告誡，反復於乃祖乃父，以馴服其心。然則故家存則君有所顧忌，不即妄作，民有所係屬，不即離心。於《盤庚》之誥，正見陽甲時亂雖九世，而故家大臣尚存，故盤庚藉是而興，此孟子所以以「故家之存」冠乎「遺俗」、「流風善政」之首也。○「又有」至「相之」○正義曰：微子、箕子、比干，孔子稱三仁，其賢可知。微仲、膠鬲，非孔子所稱，故趙特表云：「皆良臣也，但不在三仁中耳。」《呂氏春秋·當務》篇云：「紂之同母三人，其長曰微子啓，其次曰仲衍，其次曰受德，受德乃紂也。紂之母生微子啓與仲衍也，其時尚猶爲妾。已而爲妻而生紂。」《史記·宋微子世家》云：「微子故能仁賢，微子開卒，立其弟衍，是爲微仲。」是皆以微仲爲微子弟。唯鄭氏注《禮記·檀弓》「舍其孫腓而立衍」云：「微子適子死，立其弟衍，殷禮也。」似是以衍爲微子適子之弟。閻氏若璩《釋地續》云：「微，畿內國名。微子既國於此，其長子應曰微伯，早卒，有子名腓。次子曰微仲，名衍，即後國於宋者。以周禮適子死立適孫，次子不得干焉。微子則從其故殷之禮，舍己之長子之子腓而立己次子衍。故微仲實微子之第二子，非其弟也。此與子

服伯子引以況公儀仲子者，脂合。其證一。班固《古今人表》於「微子」下注云「紂兄」，「宋微仲」下注云「啓子」。其證二。啓既殷帝乙之元子，衍果屬次子。王畿千里，豈少間土？斷無兄弟並封一國之理。其證三。則知微仲也者，子襲父氏，上有伯兄，字降而次。氏者，昨之土而命之氏；字者，五十以伯仲之字也。顧氏炎武《日知錄》云：「微子之於周，但受國而不受爵。受國所以存先王之祀，不受爵所以示不臣之節，故終身稱『微子』也。微子卒，立其弟衍，是爲微仲。然繼宋非繼微也，而稱『微仲』者，猶微子之心也。至于衍之子稽則遠矣，於是始稱宋公。後之經生不知此義，而抱器之臣，倒戈之士，接跡於天下矣。」毛氏奇齡《經問》云：「《檀弓》所謂舍孫膺而立衍者，固是微仲。然是微子之弟，非微子子也。其云舍孫立衍者，謂微子之子死，不立孫膺而立弟微仲也。自鄭氏注《禮記》，遂有疑衍是庶子，爲適子之弟者。此終是誤解。考殷代傳弟之法，先傳及而後傳世。及者，兄終弟及，如微子傳弟衍是也；世者，父子相繼，謂傳弟之後，弟即傳己子，而不傳兄子兄孫，如微仲傳己子稽而不傳微子之孫膺是也。此是殷法。至微仲傳子宋公稽後，始不稱微而稱宋，始遵周法。若微仲是微子之子，則微子舍適立庶，非殷法亦非周法，于禮家何取焉？且微子之子不得

稱「微伯」與「微仲」也。微是畿內國名，紂以封其兄，而其後武王伐紂，仍使居微，故仲以微君介弟稱爲微仲，猶季札以吳君之弟稱吳季也。若微子之子，則長世子，次公子也。雖蔡叔之子亦稱「蔡仲」，然彼仍封於蔡，故仍以蔡名，微子之子未嘗再封微也。即周初立國，尚有襲殷遺法傳弟者，魯伯禽之子考公傳弟煬公是也，然斷無魯公之子稱魯伯、魯仲者。此必見《衛世家》康叔之子即名康伯，謂國號可襲稱，而作《系本》、《世記》及《古史考》諸書者遂僞造此名，不知康叔國號，康伯者謚也。且孟子稱微子、微仲、王子比干、箕子、膠鬲輩，同時並稱，且稱爲賢人，又稱相與輔相之，又稱久而後失，則直是商辛老臣，何微子之子之有？」又辨《日知錄》云：「微子存國抱器是實，若封微又封宋，則直受爵矣。微，商畿內國號，商所封也。至武王伐紂，微子持祭器造于軍門，史稱武王乃釋微子，復其位如故，則在周已仍封微矣。至成王黜武庚，封微子於宋，則初以武庚續殷祀，微子不過具臣備子爵耳，至是改封宋爲公，承殷祀以守三恪，則既爲周臣，復爲周賓。《詩》稱「侯服于周，裸將于京」者，其始終臣周之心，極其明白。若其終身稱微子而不稱宋公，康叔初封康，亦畿內國也，及成王封康叔于衛，則衛侯矣，然而《尚書》、《春秋傳》皆稱《康誥》不稱《衛誥》，叔亦終其身稱「康

叔「不稱「衛侯」，豈康叔受國不受爵邪？抑亦倒戈之士有不臣之心邪？然則弟衍稱微仲，則衍未嘗封微也。何也？周有同封而同稱者，號仲、號叔是也。仲、叔皆封號而兩分其地，遂以並稱，微仲不同封也。有先後立國而亦同稱者矣，吳太伯、吳仲雍是也。太伯、仲雍先後君吳國而亦以並稱。微仲同宋國，未嘗同微國也。然而稱「微仲」者，其稱「微」則以國君介弟原得稱兄之國號以爲號，《春秋》書吳季是也，其稱「仲」則以既爲國君，仍得稱己之字以爲字，《詩序》美秦仲是也。皆史例也。」周氏柄中《辨正》云：「《檀弓》鄭注：『微子適子死，立其弟衍，殷禮也。』北齊刁柔云：『然則殷適子死，立適子之母弟。』按，《詩·大明》疏引鄭康成《書序》注云：『紂母本帝乙之妾，生啓及衍，後立爲后，生受德。』是鄭本以衍爲微子之弟，非謂立適子之弟也。刁柔誤解鄭注，不可爲據。」膠鬲之事見於《呂氏春秋》者二：一《誠廉》篇云：「武王即位，使叔旦就膠鬲於次四內而與之盟曰：『加富三等，就官一列。』爲三書同辭，血之以牲，埋一於四內，皆以一歸。」其一《貴因》篇云：「武王至鮪水，殷使膠鬲候周師，武王見之，膠鬲曰：『西伯將何之？無欺我也。』」武王曰：「不子欺，將之殷也。」膠鬲曰：「竭至？」武王曰：「將目甲子至殷郊，子目是報矣。」膠鬲行，天雨，日夜不休，

武王疾行不輟，軍師皆諫曰：「卒病，請休之。」武王曰：「吾已令膠鬲目甲子之期報其主矣。今甲子不至，是令膠鬲不信也。膠鬲不信也，其主必殺之，吾疾行以救膠鬲之死也。」《國語·晉語》云：「妹喜有寵，於是乎與伊尹比而亡夏，姐已有寵，^①於是乎與膠鬲比而亡殷。」注云：「比，比功也。伊尹欲亡夏，妹喜爲之作禍，其功同也。膠鬲，殷賢臣，自殷適周，佐武王以亡殷也。」《韓非子·喻老》篇云：「周有玉版，紂令膠鬲索之，文王不予。費仲來求，因子之。是膠鬲賢而費仲無道也。」《音義》出「輔相」二字，云：「丁作押，音甲，《廣雅》云「輔也」。義與夾同。」王氏念孫《廣雅疏證》云：「《說文》云：「挾，押持也。」古通作夾。押，挾聲相近。」齊人有言曰：「雖有智慧，不如乘勢；雖有鎡基，不如待時。」今時則易然也。**注**齊人諺言也。乘勢，居富貴之勢。鎡基，田器，耒耜之屬。待時，三農時也。今時易以行王化者也。**疏**注「鎡基」至「之屬」○正義曰：王氏念孫《廣雅疏證》云：「《釋器》：「鎡，鎡也。」鎡之言除也。《說文》：「鎡，立薨斫也。」又

①「姐」，原誤作「姐」，今據《國語》及經解本改。

云：「斫，齊謂之茲其。」《衆經音義》引《倉頡篇》云：「鉏，茲其也。」《孟子》：「雖有鎡基，不如待時。」《漢書·樊鄴滕灌傅靳周傳》贊作「茲其」，《周官·薙氏》注作「茲其」，《月令》注作「鎡鎡」，並字異而義同。程氏瑶田《通藝錄·磬折古義》云：「《考工》車人之事，半矩之倨句謂之宜。宜之爲物，未知其審也。又判其宜爲半宜以加於半矩之宜，其倨句謂之櫛。櫛之爲物，鉏屬也。鄭注云：「櫛，斫斤。」引《爾雅》「句櫛謂之定」。《爾雅》字作「斫斫」。《說文》：「櫛，斫也。齊謂之鎡鎡。」按，《說文》有櫛字，又有斫字，並訓斫。斫訓擊。吾於櫛從木當爲鉏，斫從斤則斤屬，一以起土，田器之句而斫之者也，故曰鎡鎡；一以攻木，今木工斧劈之後，木已粗平，然後用濶斤向懷句斫之，俗呼「綳子」。二者同名異實，然皆擊而用之，故同訓斫也。蓋曰櫛曰斫，皆言其器之爲曲體，無論治田攻木，並向懷而斫擊之。其倨句之度，則皆一宜有半。元人王楨《農書》載三器，一曰鎡，櫛別名也。《良耜》詩曰：「其鎡斯趙，以薙茶蓼。」《釋名》：「鎡，迫也。迫地去草也。」二曰櫛，除草器。《呂氏春秋》曰：「櫛柄尺，此其度也。其櫛六寸，所以間稼也。」三曰纒鉏，古云斫斫，一名定，纒爲鉏柄也。《齊民要術》曰：「其刃如半月，比木壠稍狹，上有短釜，以受鉏鉤，鉤如鵝頂，下帶深袴，皆以鐵爲

之，以受木柄。鉤長二尺五寸，柄亦如之。」上三事皆鉏屬，倨句形之已句者而有淺深之殊。又云「車人爲耒，庇長尺有一寸，中直者三尺有三寸，上句者二尺有一寸。自其庇緣其外以至於首以弦，其內六尺有六寸，與步相中也。」瑶田謹謂注「內」「外」二字誤解。「其內六尺有六寸」七字連讀爲一句。「自其庇緣其外以至於首以弦」十二字連讀爲一句。內謂本體之實數，耒木三折之，六尺有六寸也；外謂空中之虛數，所弦中步之六尺也。此持表弦之之法以示人，謂欲据其內之六尺有六寸而弦之，其法當如何，只須自其庇緣其外以至於首，如是以弦之，則得其弦之數爲六尺，以與步相中也。後鄭注：「庇讀爲棘刺之刺。刺，耒下前曲接耜。」則耜爲耒頭金，上有釜以貫耒末，庇即耒末之木以納於耜釜者。先鄭以庇爲耜之異文，謂耒下岐。耒下岐者，後鄭「耜廣五寸」注所謂「今之耜岐頭兩金」也。今指庇爲木材，故宜與耜金材異也。程氏所說鎡基耒耜，分別精詳。趙氏以皆田器，故以相貺耳。○注「待時三農時也」○正義曰：《周禮·天官·大宰》「以九職任萬民，一曰三農生九穀」，注：「鄭司農云：「三農，平地、山、澤也。」玄謂：三農，原、隰及平地。」三農時，謂此原隰平地之農所種九穀，各有其時。夏后、殷、

周之盛，地未有過千里者也，而齊有其地矣；雞鳴狗吠相聞而達乎四境，而齊有其民矣。地不改辟矣，民不改聚矣，行仁政而王，莫之能禦也。**注**三代之盛，封畿千里耳，今齊地土民人已足矣，不更辟土聚民也。雞鳴狗吠相聞，言民室屋相望而衆多也。以此行仁而王，誰能止之也？

疏注「不更辟土聚民也」○正義曰：《說文》云：「改，更也。」此經言「地不改辟」即是地不更辟，「民不改聚」即是民不更聚，故趙氏以「更」釋「改」。○注「雞鳴」至「多也」○正義曰：《莊子·胠篋》篇云：「昔者，齊國鄰邑相望，雞狗之音相聞。」翟氏灝《考異》云：「此必時俗語，故《老子》亦云：「樂其俗，安其居，鄰里相望，雞犬之聲相聞。」百家之書，凡非孟子後時而其辭有同者，如「挾山超海」、「杯水車薪」、「絕長補短」、「過化存神」之類，均當持此論觀。」且王者之不作未有疏於此時者也，民之憔悴於虐政未有甚於此時者也。飢者易爲食，渴者易爲飲。孔子曰：「德之流行速於置郵而傳命。」**注**言王政不興久矣，民患虐政甚矣。若飢者

食易爲美，渴者飲易爲甘，德之流行疾於置郵傳書命也。**疏**注「言王」至「甚矣」○正義曰：作，興也。故以「不興」釋「不作」。《淮南子·汜論訓》云「體大者節疏」，高誘注云：「疏，長也。」長與久同義，故以「久」釋「疏」。《說文》云：「頓，顛頓也。」顛頓與憔悴古字通。《楚辭·離世》篇云「身憔悴而考旦」，王逸注云：「憔悴，憂貌也。」憂與患同義，故以「患」釋「憔悴」。○注「疾於置郵傳書命也」○正義曰：《爾雅·釋詁》云：「速，疾也。」閻氏若璩《釋地續》云：「顏師古《漢書》注云：「傳若今之驛。古者以車，謂之傳車。其後單置馬，謂之驛騎。」字書曰：「馬遞曰置，步遞曰郵。」馬遞指駕車之馬，非徒馬也。」周氏廣業《孟子異本考》云：「毛晃《禮部增韻》：「馬遞曰置，步遞曰郵。」《漢·烏孫傳》有「便宜因騎置以聞」，師古曰：「即今鋪置也。」《黃霸傳》「郵亭鄉官」，師古曰：「行書舍，傳送文書所止處，如今驛館。」引《孟子》爲證。」此解置郵甚明。王氏念孫《廣雅疏證》云：「郵，置驛也。《方言》：「驛，傳也。」郭璞注云：「傳，宣語也。」《爾雅》「駟，遽，傳也。」注云：「皆傳車驛馬之

①「異本」，原誤作「逸文」，今從沈校據《孟子四考》改。

名。《玉篇》云：「驛，譯也。」三者皆取傳遞之義，故皆謂之驛。置郵者，①《說文》：「郵，竟上行書舍也。」「驛，置騎也。」《孟子》：「速於置郵而傳命。」段氏玉裁《說文解字注》云：「《釋言》：『郵，過也。』按，經過與過失，古不分平去，故經過曰郵，過失亦曰郵。」按：置、郵、傳三字同為傳遞之稱。以其車馬傳遞，謂之置郵，謂之驛，其傳遞行書之舍，亦即謂之置郵，謂之驛。自竟上行書之舍而傳，亦即傳遞所行之書于舍止之處。「置郵」即「傳命」之名，經文「傳命」二字已足申明「置郵」二字，故趙氏於「置郵」二字不復解，「置郵」本亦名「傳」，而經文「傳命」之傳則言其傳遞，故以「而」字間之。《周禮·春官·典命》注云：「命謂王遷秩羣臣之書。」是書謂之命，故以「書」釋「命」。《呂氏春秋·上德》篇云：「三苗不服，禹請攻之。舜曰：『以德可也。』行德三年而三苗服。孔子聞之曰：『通乎德之情，則孟門、太行不為險矣。』故曰：德之速，疾乎目郵傳命。」此為孟子引孔子言之證。當今之時，萬乘之國行仁政，民之悅之猶解倒懸也。故事半古之人，功必倍之，惟此時為然。②倒懸喻困苦也。當今所施恩惠之事半於古人，而功倍之矣。言今行之易也。疏「民之悅之」

○正義曰：《文選·論盛孝章書》注引《孟子》作「民悅而歸之」，又《馬汧督誅》注作「民悅之」。按李善注《文選》與李賢注《後漢書》每引《孟子》不與今本同，當是唐人以意增損，或據以為別本，非也。陸機《豪士賦序》云：「故曰才不半古，而功已倍之，蓋得之於時勢也。」用《孟子》語，以事為才。按：趙氏自是「事」，機文士，亦不足為《孟子》解矣。

章指：言德流之速，過於置郵。君子得時，大行其道。是以呂望觀文王而陳王圖，管、晏雖勤，猶為曾西所羞也。疏「呂望觀文王而陳王圖」○正義曰：觀，見也。圖，謀也。《史記·齊太公世家》云：「周西伯政平，及斷虞、芮之訟，而詩人稱西伯受命曰『文王』。伐崇、密須、大夷，大作豐邑。天下三分，其二歸周者，太公之謀計居多。」《漢書·藝文志》：「《太公》二百三十七篇：《謀》八十一篇，《言》七十一篇，《兵》八十五篇。」

公孫丑曰：「夫子加齊之卿相，得行道

①「置郵」，原誤作「郵置」，今從沈校據注文改。

焉，雖由此霸王，不異矣。如此，則動心否乎？」**注**加猶居也。丑問孟子，如使夫子得居齊卿

相之位，行其道德，雖用此臣位而輔君行之，亦不異於古霸王之君矣。如是寧動心畏難，自恐不能行否邪？丑以此為大道不易，人當畏懼之，不敢欲行也。**疏**注「加猶居也」○正義曰：《淮南子·主術訓》云

「雖愚者不加體焉」，高誘注云：「加猶止也。」《呂氏春秋·

慎人》篇云「胼胝不居」，高誘注云：「居，止也。」加，居並有止義，故轉注加亦猶居也。《說文》云：「家，居也。」家通嘉，

桓公《公羊》、《左傳》「家父」，《漢書·古今人表》作「嘉父」，

是也。嘉亦通加，《詩·行葦》箋云「以脾函為加，故謂之嘉」是也。加之猶居，又家之假借也。○注「行其」至「君矣」○

正義曰：《大戴禮·王言》篇云：「道者，所以明德也。」又

《盛德》篇云：「冢宰之官以成道，司徒之官以成德。」賈誼

《新書·道德》篇云：「道者，德之本也。」故經言「行道」，趙

氏以「行其道德」解之。《毛詩》「君子陽陽，右招我由房」，傳云：「由，用也。」趙氏斷「雖由此」三字為句，以此字指卿相

之位，故云「用此臣位輔君行之」，「行」即「行道」也。云「不異於古霸王之君」，是解異為「同異」之異。公孫丑倒言之，

注順解之也。近解「不異」謂雖從此而成霸王之業，不足怪異。與趙氏異。孟子曰：「否，我四十不動心。」

注孟子言，禮，四十強而仕。我志氣已定，不妄動心有所畏也。**疏**注「禮四十強而仕」○正義曰：「四十曰強

而仕」，《禮記·曲禮上》篇文。孔氏正義云：「強有二義，一

則四十不惑，是智慮強，一則氣力強也。」《呂氏春秋·知分》篇云「有所達則物弗能惑」，高誘注云：「惑，動也。」然則

強即不惑，不惑即不動，故引以釋「不動心」也。惟智慮氣力未能堅強則有所疑惑，疑惑則生畏懼，故以動心為畏難自恐

也。顧氏炎武《日知錄》云：「凡人之動心與否，固在其加卿相行道之時也。枉道事人，曲學阿世，皆從此而始矣。『我

四十不動心』者，不動其「行一不義，殺一不辜而得天下，有不為也」之心。」曰：「若是則夫子過孟賁遠矣。」

注丑曰，若此，夫子志意堅勇過孟賁。賁，勇士也。

孟子勇於德。**疏**注「賁勇士也」○正義曰：《呂氏春秋·

用衆》篇云：「故以衆勇無畏乎孟賁矣。田駢謂齊王曰：

『孟賁庶乎患術而邊境弗患。』」注云：「孟賁，古之大勇士。」

《必己》篇云：「孟賁過於河，先其五。船人怒而以楫撻其頭，顧不知其孟賁也。中河，孟賁瞋目而視船人，髮植目裂

鬢指，舟中之人盡揚播入於河。使船人知其孟賁，弗敢直視，涉無先者，又況於辱之乎？此以不知故也。」高誘注云：「船人不知孟賁爲勇士故也。」《史記·范雎列傳》《集解》引許慎曰：「孟賁，衛人。」《史記·袁盎傳》《索隱》引《尸子》云：「孟賁水行不避蛟龍，陸行不避兕虎。」《漢書·東方朔傳》注引《尸子》云：「人問孟賁：『生乎？勇乎？』曰：『勇。』『賁乎？勇乎？』曰：『勇。』『富乎？勇乎？』曰：『勇。』三者人之所難能而皆不足以易勇，此其所以能攝三軍、服猛獸之故也。」毛氏奇齡《逸講箋》云：「夫子過孟賁，非借之贊不動心之難，正以氣強之人，心有捍護，易於不動，故勇者多桀傲自逞，遺落一切，此正與養勇、養氣相接人。」

○注「孟子勇於德」○正義曰：《音義》引《揚子》曰：「請問孟軻之勇，曰：勇於義而果於德，不以貧富貴賤死生動其心，於勇也其庶乎！」曰：「是不難，告子先我不動心。」**注**孟子言是不難也，告子之勇未四十而不動心矣。曰：「不動心有道乎？」**注**丑問不動心之道云何？曰：「有。」**注**孟子欲爲言之。北宮黝之養勇也，不膚撓，不目逃，思以一豪挫於人若撻之於市朝，不受於褐寬博，亦不受於萬

乘之君，視刺萬乘之君若刺褐夫，無嚴諸侯；惡聲至，必反之。**注**北宮，姓；黝，名也。人刺其肌膚，^①不爲撓卻；刺其目，目不轉精逃避之矣；人拔一毛，若見撻撻於市朝之中矣。褐寬博，獨夫被褐者。嚴，尊也。無有尊嚴諸侯可敬者也。以惡聲加己，己必惡聲報之。言所養育勇氣如是。

疏注「北宮」至「中矣」○正義曰：錢氏大昕《潛研堂答問》云：「問《孟子》書有北宮黝、北宮錡，趙氏注以錡爲衛人，而黝獨未詳，亦可考否？」曰：黝事固不可考，然《淮南子》有云：「握劍鋒以离北宮子、司馬蒯賁，不使應敵。操其觚，招其末，則庸人能以制勝。」高誘注：「北宮子，齊人也。孟子所謂北宮黝也。」誘生於漢世，所見書籍尚多，以黝爲齊人，宜可信。春秋之世，衛亦有北宮氏，世爲正卿。《戰國策》趙威后問齊使云：「北宮之女，嬰兒子無恙？」則齊亦有北宮氏也。《翟氏灝《考異》云：「《韓非子·顯學》篇云：『漆雕之議，不色撓，不目逃，行曲則違於臧獲，行直則怒於諸侯，世主以爲廉而禮之。』按韓非所稱漆雕之議，上二語與此

①「肌」，原誤作「飢」，據經解本改。

文同，下二語與曾子謂子襄意似。其「漆雕」爲北宮黝字歟？抑子襄之出於漆雕氏也？韓言儒分爲八，有漆雕氏之儒，《漢志》儒家有《漆雕子》十二篇，其書久亡，無能案驗矣。《春秋繁露·度制》篇云「肌膚血氣之情也」。劉熙《釋名·釋形體》云：「肌，慎也。膚，幕堅慎也。」故以「肌」釋「膚」。《音義》云：「撓，丁奴効切。《五經文字》云：「枉撓之撓，女絞反。俗從手者，撓擾之撓，火刀反。」」阮氏元《校勘記》云：「閩、監、毛三本撓作撓。按，《音義》出撓字，作撓非也。」《易·大過》「棟撓」，《釋文》云：「曲折也。」成公二年《左傳》云「師徒撓敗」，注云：「撓，曲也。」曲猶屈也。卻同却，《廣雅·釋言》云：「卻，退也。」《史記·魯仲連鄒陽傳》云：「勇士不却死而滅名」，《索隱》云：「却死猶避死也。」《廣雅·釋詁》云：「逃，避也。」畏其刺則必退却逃避。黝不畏其刺，是不因膚被刺而屈，不因目被刺而避也。「撓卻」、「逃避」互明。《文選》注引《聲類》云：「豪，長毛也。」故以「毛」釋「豪」。挫之訓爲撓，《素問·五常政大論》云「其變振拉摧拔」，是挫亦撓也。《說文》手部云：「撓，《鄉飲酒》：「罰不敬，撓其背。」」遽，古文撓。《周書》：「遽以記之。」「捶同筆，司馬遷《報任安書》云：「其次關木索，被箠楚受辱。」《漢書·吾丘壽王傳》云：「民以撓鉏捶挺相撓擊。」捶本馬

杖之名，用以撓擊，故撓亦謂之捶矣。顧氏炎武《日知錄》云：「若撓之於市朝」即《書》所言「若撓於市」。古者朝無撓人之事，市則有之。《周禮·司市》：「市刑，小刑憲罰，中刑徇罰，大刑扑罰。」又曰：「胥執鞭度而巡其前，掌其坐作出入之禁令，凡有罪者撓戮而罰之。」是也。《禮記·檀弓》：「遇諸市朝，不反兵而鬪。」兵器非可入朝之物。奔喪哭辟市朝，奔喪亦但過市，無過朝之事也。其謂之「市朝」者，《史記·孟嘗君傳》「日莫之後，過市朝者掉臂不顧」，《索隱》云：「言市之行列，有如朝位，故曰市朝。」閻氏若璩《釋地續》云：「『市朝』二字，見《論語》者，乃殺人陳尸之所。《左傳》殺三郤，皆尸諸朝；董安于縊而死，趙孟尸諸市是也。見《孟子》者，僅得一市字，蓋古者撓人各有所容，有於市，於市則辱之極矣，是以斷斷無撓之於朝者。或曰：『市朝』乃連類而及之文，若躬稼本稷，而亦稱禹；三過不入本禹，而亦稱稷，以紂爲兄之子本指王子比干，而亦及微子啓，善哭其夫而變國俗本指杞梁之妻，而亦及華周之妻。皆因其一而並言其一，古文體則有然者。」趙氏佑《溫故錄》云：「朝市雙言，朝也，市也；朝市單言，市之朝也。『若撓之於市朝』，正是司市之朝耳。古者朝之名通於上下。冉子退朝，周生烈云『君之朝』，鄭康成云『季氏朝』，則有司聽事

之處言朝，猶是公所矣。今京城內外衢市，多立堆撥，設員役以備巡徼，其大者謂之官廳，漢唐謂之街彈室。」○注「褐寬」至「褐者」○正義曰：《詩·七月》篇「無衣無褐，何以卒歲」，箋云：「人之貴者無衣，賤者無褐。」是褐為賤者所服。上言「褐寬博」，下言「褐夫」，則褐寬博即是衣褐之匹夫，故云「獨夫被褐」者。「褐寬博」蓋當時有此稱也。《老子》云：「聖人被褐懷玉。」○注「嚴尊」至「如是」○正義曰：《呂氏春秋·審應》篇高誘注云：「嚴，尊也。」《禮記·學記》云：「嚴師為難」，注云：「嚴，尊敬也。」《廣雅·釋詁》云：「尊，敬也。」尊、嚴、敬三字義同。嚴字連諸侯，謂可尊敬之諸侯。黜心目中蔑視之，無有可尊敬之諸侯，故云「無尊嚴諸侯可敬者也」。先以「尊」釋「嚴」，又申言「可敬」，謂無尊嚴即可敬也。「惡聲」猶惡言也。《史記·仲尼弟子列傳》云：「自吾得由，惡言不入於耳。」《集解》引王肅云：「子路為孔子侍衛，故侮慢之人不敢有惡言。」惡猶過也，指斥過惡之言也。至猶來也。「惡聲至」即惡言來矣。《漢書·外戚傳》云「為致惇」，注云：「致謂累也。」又《酷吏傳》云「致令辟為」，郭注云：「致謂積累之也。致，至也；積累，加也。」是至亦有加義，故云「加己」。《國語·晉語》云「反使者」，注云：「反，報也。」「必反之」是必報之也。《爾雅·釋詁》云：「育，

養也。」故以「育」釋「養」。《禮記·中庸》「萬物育焉」，注云：「育，生也，長也。」養育勇氣即是生長勇氣，養勇即是養氣。但孟子之氣以直養而無害，則為善養，黜等之氣不以直養，則不善也。善在直其養，所以不同也。孟施舍之所養勇也，曰：「視不勝猶勝也。量敵而後進，慮勝而後會，是畏三軍者也。舍豈能為必勝哉？能無懼而已矣。」**注**孟，姓，舍，名，施，發音也，施舍自言其名則但曰「舍」。舍豈能為必勝哉？要不恐懼而已也。以為量敵少而進，慮勝者足勝乃會。若此，畏三軍之衆者耳，非勇者也。**疏**「慮勝而後會」○正義曰：《詩·大明》篇「會朝清明」，箋云：「會，合也，合兵以清明。」《詩》又云「殷商之旅，其會如林」，箋云：「殷盛合其兵衆，陳于商郊之牧野。」此云「慮勝而後會」，謂合兵也。○注「孟姓」至「曰舍」○正義曰：閻氏若璩《釋地》又續云：「原趙氏之意，以古人二字名，無單稱一字者。今曰舍，則舍其名也。古未見有複姓孟施者，則孟

①「如是」，原作「是也」，合於宋十行、閩、監、毛等本，今據本書注文及阮校所述孔、韓等本改。

其姓也。遂以發音當施字。不知發聲在首，如吳曰勾吳，越曰於越。若在中，則語助詞多用之字，未聞以施字者。且孔子時魯有少施氏，安知孟施非少施一例乎？「翟氏灝《考異》云：「古人二字名或稱一字。如紂名受德，《書》但稱商王受。曹叔名振鐸，《國語》但稱叔振。晉文公名重耳，《左傳》但稱晉重。魯叔孫氏名何忌，《春秋》經定六年但稱忌。孟施舍不嫌其自稱「舍」也。」○注「舍豈」至「而已也」①○正義曰：孔本、韓本、《考文》古本無「舍」字，閩、毛、監三本有之。經言「能無懼」，趙氏言「要不恐懼」者，要，約也，以下言「孟施舍守約」，豫言之也。孟施舍似曾子，北宮黝似子夏。夫二子之勇未知其孰賢，然而孟施舍守約也。」**注**孟子以為曾子長於孝。孝，百行之本。子夏知道雖衆，不如曾子孝之大也，故以舍譬曾子，黝譬子夏。以施舍要之以不懼為約要也。**疏**注「孟子」至「要也」○正義曰：《史記·仲尼弟子列傳》云：「曾參，南武城人，字子輿。孔子以其能通孝道，故受之業，作《孝經》。」陸賈《新語》云：「曾子孝於父母，昏定晨省，調寒溫，適輕重，勉之於糜粥之間，行之於衽席之上，而德美重於後世。」是「曾子長於孝」也。《孝經》云：「孝，德之本也。」

《論衡·書說》篇云：「實行為德。」《周禮·師氏》注云：「德行，內外之稱。在心為德，施之為行。百行之本即是德之本。」《後漢書·江革傳》云：「夫孝，百行之冠，衆善之始也。」《顏氏家訓·勉學》篇云：「孝為百行之首。」是也。《說苑》言子夏讀《易》，《尚書大傳》言子夏讀《書》，《韓詩外傳》言子夏讀《詩》，《新序》稱其論五帝師，《大戴禮記》稱其言《易》之生人，是「知道衆」也。《大戴記·曾子大孝》篇云：「夫孝者，天下之大經也。」是道雖衆，不如孝之大也。北宮黝事事皆求勝人，故似子夏知道之衆，孟施舍不問能必勝與否，但專守己之「不懼」，故似曾子得道之大。約之訓為要。於衆道之中得其大，是得其要也。下言「大勇」，是知其要為得其大也。昔者曾子謂子襄曰：「子好勇乎？吾嘗聞大勇於夫子矣：自反而不縮，雖褐寬博，吾不憚焉；自反而縮，雖千萬人，吾往矣。」孟施舍之守氣，又不如曾子之守約也。」**注**子襄，曾子弟子也。夫子謂孔子也。縮，義

①「也」，原作「矣」，合於宋十行、閩、監、毛、孔等本，今據本書注文及阮校所述韓本等本改。

也。惴，懼也。《詩》云：「惴惴其慄。」曾子謂子襄，言孔子告我大勇之道：人加惡於己，己內自省有不義不直之心，雖敵人被褐寬博一夫，不當輕驚懼之也；自省有義，雖敵家千萬人，我直往突之。言義之強也。施舍雖守勇氣，不如曾子守義之爲約也。

疏注「子襄」至「約也」○正義曰：子襄，薛應旂《人物考》以爲南武城人，未知所本。《禮記·投壺》篇注「奇則縮諸純」，**①**《釋文》云：「縮，直也。」《廣雅·釋詁》云：「直，義也。」縮之爲義，猶縮之爲直。蓋縮之訓爲從，從故直。從亦順也，順故義，義者，宜也。趙氏既以「義」訓「縮」，又申之云「不義不直」，明義即直也。引《詩》者，《秦風·黃鳥》篇傳云：「惴惴，懼也。」是「惴」即「懼」也。《易傳》言「驚遠而懼邇」，是驚、懼義同。褐，夫易於驚懼之，「不惴」是「不驚懼之」也，謂不以氣臨之，使之惴惴也。王若虛《孟子辨惑》云：「不字爲衍，不然則誤爾。」閻氏若璩《釋地三續》云：

「不，豈不也。猶經傳中「敢」爲「不敢」，「如」爲「不如」之類。」此以惴爲自己驚懼，與趙氏異。王氏引之《經傳釋詞》云：「不，語詞。不惴，惴也。言雖被褐之夫吾懼之。」趙氏前引《禮記》以不動心爲強，強猶勇也。勦以必勝爲強，不如

施舍以不懼爲強。然施舍之不懼但以氣自守，不問其義不義也；曾子之強則以義自守，是爲義之強也。推勦之勇，生于必勝，設有不勝，則氣屈矣，施舍之勇，生於不懼，則雖不勝，其氣亦不屈，故較勦爲得其要。然施舍一以不懼爲勇而不論義不義，曾子之勇則有懼有不懼，一以義不義爲斷。此不獨北宮黝之勇不如，即孟施舍之守氣亦不如也。

曰：「敢問夫子之不動心與告子之不動心，可得聞與？」**注**丑曰：不動心之勇，其意豈可得聞與？「告子曰：『不得於言，勿求於心；不得於心，勿求於氣。』」不得於心，勿求於氣，可；不得於言，勿求於心，不可。**注**不得者，不得人之善心善言也。求者，取也。告子爲人勇而無慮，不原其情。人有不善之言加於己，不復取其心有善也，直怒之矣，孟子以爲不可也；告子知人之有惡心，雖以善辭氣來加己，亦直怒之矣，孟子以爲

① 「注」，原無。「縮」，原作「直」。按引文出《禮記·投壺》鄭注，今從沈校補、改。

是則可，言人當以心爲正也。告子非純賢，其不動心之事，一可用一不可用也。

疏「告子」至「不可」○正

義曰：「不得於言」、「不得於心」與「不得於君」、「不得於親」句同。不得於君親爲失意於君親，則此不得於言、不得於心亦指人之言、人之心，謂人以惡言加己而已受之，人以惡心待己而已受之也。成公三年《公羊傳》注云：「得曰取。」淮南子·說山訓《高誘注》云：「求猶得也。」然則求、得、取三字可同義。蓋人有惡心而詐善其辭氣以欺我，我之心不爲之動，則能知其心而不惑於其詐，故可也；若人本有善心而言語之間不免暴戾，如鬻拳之諫、先軫之唾是矣，我則但怒其言，不復能知其心，故不可也。若是則告子所言「勿求於心」、「不得於心」皆人之心，而告子之「不動心」第於兩「勿求」見之。毛氏奇齡《逸講箋》云：「告子惟恐求心即動心，故自言『勿求於心』。心焉能不動？裁說不動，便是道家之『嗒然若喪』，佛氏之『離心意識參』，儒者無是也。孟子平日亦以『存心』、『求放心』爲主，未嘗言『不動』。存心是工夫，不動心是效驗。心之本體不能不動。學人用功，則不使不動，此不過以卿相王霸不撓於心，直是得失不瞞，寵辱不驚，一鎮定境界，故孟子自言『不動心有道』，則明有前事矣。」

卿相王霸，有何恐懼？孟子生平何許學問，而慮其恐懼？在公孫弟子並無此意。此「不動心」祇是老子所云「寵辱不驚」，孟子所云「大行不加」，孟子自言「將降大任，必動心忍性」，豈有大任是身而尚可侈言無懼，肆然稱不動心者？又云：「不動心有『養勇』一道，皆以氣制心而使之不動，此即告子所云『求氣』也，有『直養』一道，則專以直道養其心，使心得憊然而氣不餒，此即孟子所云『持志』，告子所云『求心』也。是不動心之道有直從心上求者，自反是也；有轉從心之所制上求者，養勇是也。曾子自反祇求心，北宮黝、孟施舍養勇則但求氣，惟告子則不求心，并不求氣。大抵生人言行皆從心出，言行得失即與心之動不動兩相關合。假如心不得於言，則當求心。何則？言之陂淫邪遁皆由心之蔽陷離窮所生，所云『生於其心』是也。則言有不得，毋論人之言與己之言，皆當推其所由生而求之於心，此所貴乎知言也。而告子則惟恐動心而強而勿求。又如行不得於心，則仍當求心。何則？志與氣本不相持而轉相爲用，故以直養者言之，則自反而縮，使氣常不餒，則不問得心與不得心而心自不動，此曾子與孟子求心不求氣也。以養勇者言之，則稍不得於心，惟恐心動，當急求之氣以強制其心，此黝、舍之所養勇也，求於氣也。而告子則又但力制其心而并不求氣，是既

不能反又不能養，舉凡心所不得與不得於心皆一概屏絕，而更不求一得心與心得之道，徒抱此冥頑方寸謂之不動，此其所以卿相不驚，霸王不怪，有先於孟子者。蓋其自言有如此，不得心而勿求氣，則合當如是，故曰可也。生平既不能自反，直養無害，而一有不得則又借此虛矯之氣以爲心之制，此黜、舍之學，豈可爲法？且養氣能得心，不能強之制不得之心。自反而端，行不慊於心，則動心已耳，焉得有急求氣之理？若心不得於言，則言爲心聲，心有所害則正當在心上求。於此不急求，當復何待？故猶是心之不得與不得於心，而不求氣則可，不求心則不可，此斷斷然者。」**夫志，氣之帥也；氣，體之充也。****注**志，心所念慮也；氣，所以充滿形體爲喜怒也。志帥氣而行之，度其可否也。**疏**「夫志」至「充也」○正義曰：《毛詩序》云：「在心爲志。」《儀禮·聘禮記》注云：「志猶念也。」《大射儀》注云：「志，意所擬度也。」故趙氏以「心所念慮」爲志，又云「度其可否」。《禮記·祭義》云：「氣也者，神之盛也。」《淮南子·原道訓》云：「夫形者，生之舍也，氣者，生之充也，神者，生之制也。夫舉天下萬物蚊虻貞蟲蠕動蚊作，皆知其所喜憎利害者，何也？以其性之在焉而不離也。忽去

之，則骨肉無論矣。今人之所以眊然能視，眊然能聽，形體能抗而百節可屈伸，察能分白黑，視醜美而知能別同異，明是非者，何也？氣爲之充而神爲之使也。」《論衡·無形》篇云：「形、氣、性，天也。生之舍，生之充，生之制，生即性也。性情神志，皆不離乎氣。以其能別同異，明是非，則爲志以帥乎氣。萬物皆有喜憎利害而不能別同異，明是非，則第爲物之性而非人之性，僅爲氣而已。故喜憎利害，視聽屈伸皆氣也，骨肉則形體也。」趙氏言氣專指喜怒，以上勿求於心，勿求於氣作以怒言，**①**故於此言之耳。人有志而物無志，故人物皆有是性，皆有是氣，而人能以志帥則能度其可否，而性乃所以善也。阮氏元《校勘記》云：「《音義》出『之帥』，云：『本亦作師。』按：據《干祿字書》，唐人帥字多作師，乃俗字也。既又譌師。」夫志至焉，氣次焉。**注**志爲至要之本，氣爲其次。**疏**注「志爲」至「其次」○正義曰：趙氏以至爲至極，次爲《說文》「不前」之義，謂次于志也。毛氏奇齡《逸講箋》云：「此次字如《毛詩》傳「主人人

①「作」，據文意疑誤。

②「其」，原無，今從沈校據全書體例及注文補。

次」，《周禮》「官正掌次」之次，言舍止也。」若然，則至爲「來至」之至，志之所至，氣即隨之而止，正與趙氏下注「志嚮氣隨」之意合。故曰：持其志，無暴其氣。」**注**暴，亂也。言志所嚮，氣隨之。當正持其志，無亂其氣，妄以喜怒加人也。**疏**注「暴亂」至「人也」○正義曰：《淮南子·主術訓》高誘注云：「暴，虐亂也。」《呂氏春秋·慎大》篇高誘注云：「持，守也。」持其志即曾子之「守義」，異乎孟施舍之「守氣」矣。直即正也。自反而縮，故爲「正持其志」。可喜則喜，可怒乃怒，即義也，即不「妄以喜怒加人」也。毛氏奇齡《逸講箋》云：「心爲氣之主，氣爲心之輔，志與氣不相離也；然而心之所至，氣即隨之，志與氣又適相須也。故但持其志，力求之本心，以直自守，而氣之在體，則第不虐戾而使之充周已耳。是不求於心者謂之不持志，無一而可。」既曰「志至焉，氣次焉」，又曰「持其志，無暴其氣」者，何也？」**注**丑問暴亂其氣云何？曰：「志壹則動氣，氣壹則動志也。今夫蹶者趨者，是氣也而反動其心。」**注**孟子言，壹者，志、氣閉而爲壹也。志閉塞則氣不行，氣閉塞則志

不通。蹶者，相動。今夫行而蹶者，氣閉不能自持，故志氣顛倒。顛倒之間，無不動心而恐矣。則志、氣之相動也。**疏**「志壹」至「其心」○正義曰：趙氏讀

「壹」爲「噎」。《說文》口部云：「噎，飯室也。」《一切經音義》引《通俗文》：「塞喉曰壹。」《史記·賈誼傳》云：「子獨壹鬱其誰語？」段氏玉裁《說文解字注》云：「《易》曰「天地壹壹」，虞翻以《否》之閉塞解綢緼，^①趙岐亦以閉塞釋志壹氣壹，其轉語爲抑鬱。」《淮南子·精神訓》云「形勞而不休則蹶」，高誘注云：「蹶，顛也。」《荀子·富國》篇注云：「蹶，顛倒也。」《國語·越語》云「蹶而趨之」，注云：「蹶，走也。」《呂氏春秋·慎小》篇云「人之情不蹶於山」，^②則蹶由於行。《廣雅·釋詁》云：「趨，行也。」經云「蹶者趨者」，趙氏以「行而蹶者」解之，則「蹶者趨」猶云「蹶而趨」矣。志壹則動氣，氣壹則動志，故云「相動」。按：《說文》壹部云：「壹，專壹也。」文公三年《左傳》云「與人之壹也」，注云：「壹，無貳心。」持其志，使專壹而不貳，是爲「志壹」；守其氣，使專壹而

①「緼」，原誤作「溫」，今據《說文解字注》改。

②「情」，原誤作「行」，當誤據《經籍纂詁》，今據《呂氏春秋》改。

不貳，^①是爲「氣壹」。黜之氣在「必勝」，舍之氣在「無懼」，是氣壹也；曾子「自反而縮，雖千萬人吾往」，是志壹也。毛氏奇齡《逸講箋》云：「志一動氣，自然之理。且志亦不容不一者，不一則二三，安所持志？」此所謂一正志至之解。惟志一能動氣，故志帥而氣即止也。若氣一動志，則帥轉爲卒所動，反常之道。故須善養，使不一耳。」按：毛氏此說，陳組綬《近聖居燃犀解》已言之，云：「志至」之至是至到之至，^②「氣次」之次是次舍之次。至如行，次如止。曰「氣之帥」，「體之充」，是帥其氣以充體者，志也。曰至曰次，言至其處即次其處。且問，志、氣既不相離，持志即是養氣，何必又無暴其氣？志本不動，不壹則渙散無其帥，氣本周流，不動則枯槁無其充。故志可壹而氣不可壹，氣可動而志不可動。如無心而蹶，是所壹之氣也而反動其心，非氣壹動志之明驗歟？此告子勿求氣可也。但既不得於心，則全不知持志之道耳。」按：且問夫子之不動心與告子之不動心，孟子述告子之言以明告子之不動心有可有不可也。「志至氣次」，所以申言可不可之故。志帥氣以充體，志至而氣即隨之而止，此勿求氣所以可，而勿求心所以不可也。「求於心」即「持其志」也，「毋暴其氣」，似是又當求氣，故丑又問之，趙氏言「丑問暴亂其氣云何」，是也。故孟子發明之，仍申明勿

求於氣之可也。不得於心，有所逆于心也。斯時能持其志，則度其可否而知其直不直、義不義，義則伸吾氣以往矣，不義則屈吾氣以退矣，此持志以帥氣之道也，志壹則動氣也，若不能持志，不度其可否，不問其直不直、義不義，而專以伸吾氣爲主，是氣壹也，此孟施舍守氣之道也，是不持志而暴其氣也。彼不論直義而徒暴其氣，固以此爲不動心，而不知氣壹心轉不能不動，故云「氣壹則動志」也。因舉一行而顛蹶者以例之。行而顛蹶，是不持志而暴其氣也。當其蹶也，心且因之動矣，則可知徒任氣者不能不動其心，此告子「不得於心，勿求於氣」所以爲可也。然告子勿求於氣，並不求於心，雖不暴其氣，而亦不持其志。則是屏心與氣於空虛寂滅，雖直與義所在而亦却而不前，視曾子自反而持守其志者殊矣。雖不求氣而不可不善養氣。求氣以爲養氣，是黜之養勇、舍之守氣，不如告子之勿求於氣也；不求氣而求心以爲養氣，是曾子之「自反」，孟子之「持志」，乃爲善養氣也。施舍有氣無志，告子無志無氣，曾子孟子以志帥氣，則有志

①「使」，原誤作「便」，今據上句「使專壹而不貳」及經解本改。

②中「至」字，原誤作「志」，今據文義改。

有氣。施舍，養氣而不善者也；告子，不善養氣者也。以氣養氣，則不善養；以心志養氣，乃為善養。所養者，氣；所以善養者，心；心之所以善養者，在直與義。此孟子所以為善養浩然之氣也。此上但言告子之不動心，未明孟子之不動心，故下文丑又問孟子何以長於告子也。

「敢問夫子惡乎長？」**注**丑問孟子才志所長何等？曰：「我知言，我善養吾浩然之氣。」

注孟子云，我聞人言能知其情所趨，我能自養育我之所有浩然之大氣也。**疏**注「我能」至「氣也」○

正義曰：《淮南子·墜形訓》高誘注云：「浩亦大也。」故以「浩然之氣」為「大氣」。臧氏琳《經義雜記》云：「《文選》班孟堅《答賓戲》：『仲尼抗浮雲之志，孟軻養浩然之氣。』」李善注：「孟子曰：我善養吾浩然之氣。項岱曰：皓，白也。如天之氣皓然也。」《後漢書·傅燮傳》：「世亂，不能養浩然之氣。」李賢注：「孟子曰：養吾浩然之氣。趙岐曰：浩然，天氣也。」按，《春秋繁露·循天之道》云：「陽者，天之寬也；陰者，天之急也。中者，天之用也；和者，天之功也。舉天地之道而美於和，是故物生皆貴氣而迎養之。孟子曰：我養吾浩然之氣者也。」則董子以養浩然之氣為養天之和氣，

班孟堅以浩然與浮雲相對，亦是以浩然為天氣，趙、項之釋有所本矣。今本趙注作「浩然之大氣」，當是俗人所改。《漢書·敘傳上》注，師古曰：「浩然，純一之氣也。」《文選》五臣注劉良曰：「浩然，自放逸也。」與古義異。「敢問何謂浩然之氣？」**注**丑問，浩然之氣，狀何如？曰：

「難言也。其為氣也，至大至剛。以直養而無害，則塞於天地之間。」**注**言此至大至剛正直

之氣也。然而貫洞纖微，洽於神明，故言之難也。養之以義，不以邪事干害之，則可使滋蔓塞滿天地之間，布施德教無窮極也。**疏**注「言此」至「極也」○正

義曰：云「至大至剛正直之氣」者，惟正直故剛大。下言「養之以義」解「以直養」三字，直即義也。緣以直養之，故為正直之氣，為正直之氣，故至大至剛。或謂趙氏以「至大至剛以直」為句，非也。《淮南子·原道訓》云：「故植之而塞于天地，橫之而彌於四海，施之無窮，而無所朝夕。」高誘注云：「塞，滿也。施，用也。用之無窮竭也。」又云：「約而能張，幽而能明，甚淖而滯，甚纖而微。」高誘注云：「言道能小能大，能昧能明。」《精神訓》云：「夫靜漠者，神明之宅也。」趙氏云「貫洞纖微，洽於神明」，謂其微而未著，虛而未彰，故

難於言也。《說文》干部云：「干，犯也。」《國語·周語》云「水火之所犯」，注云：「犯，害也。」故以「干」釋「害」，謂「以邪事干害之」也。既以「滿」釋「塞」，又云「滋蔓」者，隱公元年《左傳》云「無使滋蔓」，謂如草之由小而蔓延也。當其纖微靜漠，難於言之；及其養以直而無干害以邪，則蔓延由微而著，由靜而動，則用之德教無窮渴也。毛氏奇齡《逸講箋》云：「以直養者，集義所生，自反而縮也，無害者，不助長也。以助長則非徒無益而又害之也。」其爲氣也，配義與道。無是，餒也。**注**重說是氣。言此氣與道、義相配偶俱行。義謂仁義，可以立德之本也；道謂陰陽大道，無形而生有形，舒之彌六合，卷之不盈握，包落天地，稟授群生者也。言能養此道氣而行義理，常以充滿五藏。若其無此，則腹腸飢虛，若人之餒餓也。**疏**注「重說」至「餓也」○正義曰：《易·豐》初九「遇其配主」，《釋文》云：「鄭作妃。」桓公二年《左傳》云：「嘉耦曰妃。」耦通作偶。《周禮·掌次》「射則張耦次」，注云：「耦，俱升射者。」故以「偶」釋「配」，又申之以「俱行」也。賈誼《新書·道德說》云：「義者，理也。」又云：「義者，德之理也。」《禮記·禮運》云：「義者，仁之節也。」《祭統》云：

「夫義者，所以濟志也，諸德之發也。」故以「義」兼言「仁」，又以「理」釋「義」，而爲「立德之本」也。道謂陰陽大道者，阮氏元《校勘記》云：「漢人皆以陰陽五行爲天道。《易》曰：『一陰一陽之謂道。』趙氏用此語。」按：《列子》云：「昔者，聖人因陰陽以統天地。夫有形者生於無形。」有形生於無形，故云「無形生有形」也。疏本作「生於無形」，非是。《淮南子·原道訓》云：「包裹天地，稟受無形。」又云：「舒之輒於六合，卷之不盈於一握。」趙氏本此。以上言「無形」，故改云「群生」。落與絡古字通。絡爲纏繞，亦裹之義也。道既爲陰陽，陰陽是氣，故云「道氣」。陰陽分之爲五行，五行各屬於五藏。《白虎通·性情》篇云：「人本含五行六律之氣而生，而內有五藏六府，此情性之所由出入也。五藏：肝仁，肺義，心禮，腎智，脾信也。」《淮南子·精神訓》云：「血氣者，人之華也，而五藏者，人之精也。夫血氣能專於五藏而不外越，則胸腹充而嗜欲省矣。胸腹充而嗜欲省，則耳目清，聽視達矣。耳目清，聽視達謂之明。五藏能屬於心而無乖，則敦志勝而行不僻矣。敦志勝而行之不僻，則精神盛而氣不散矣。」又云：「使耳目精明元達而無誘慕，氣志虛靜恬愉而省嗜欲，五藏定安充盈而不泄。」此趙氏所本也。《說文》食部云：「餒，飢也。」餒同餒，飢即餒也。不能以直養而

邪或干害之，則氣以誘慕嗜欲而散，五藏外越而不能充滿，故腸腹飢虛，若人之不飲食而餒餓也。毛氏奇齡《逸講箋》云：「配義與道」正分疏「直養」。無論氣配道義，道義配氣，總是氣之浩然者藉道義以充塞耳。「無是」者是無道義，「餒」者是氣餒，道義不能餒也。」李氏紱《配義與道解》云：

「心之裁制爲義，因事而發，即羞惡之心也，身所踐履爲道，順理而行，即率性之謂也。未嘗集義，養氣之人，自反不縮。嘗有心知其事之是非而不敢斷者，氣不足以配義也，亦有心能斷其是非而身不敢行者，氣不足以配道也。吾性之義，遇事而裁制見焉，循此裁制而行之，乃謂之道。義先而道後，故曰「配義與道」，不曰「配道與義」也。」全氏祖望《經史問答》云：「配義則直養而無害矣。苟無是義，便無是氣，安能免於餒？然配義之功在集義。集義者，聚於心以待其氣之生也。曰生，則知所謂配者非合而有助之謂也，蓋氤氲而化之謂也。不能集而生之以而襲而取之，則是外之也。襲則偶有合，仍有不合而不慊於心，氣與義不相配，仍不免於餒矣。」是**集義所生者，非義襲而取之也。****注**

集，雜也。密聲取敵曰襲。言此浩然之氣與義雜生，從內而出，人生受氣所自有者。**疏**注「集雜」至

「有者」○正義曰：雜從集，《方言》云：「雜，集也。」古雜，集二字皆訓合。「與義雜生」即與義合生也；與義合生，是即配義與道而生也。生即育也，育即養也。氣因配義而生，故爲善養，與徒養勇、守氣者異矣。莊公二十九年《左傳》云：「凡師有鐘鼓曰伐，無曰侵，輕曰襲。」《淮南子·汜論訓》云「秦穆興兵襲鄭」，高誘注云：「以兵伐國，不擊鼓密聲曰襲。」僖公三十三年《公羊傳》注云：「輕行疾至，不戒以入，曰襲。」行有不慊於心，則餒矣。**注**慊，快也。自

省所行仁義不備，干害浩氣，則心腹飢餒矣。**疏**注「慊快也」○正義曰：《呂氏春秋·本生》篇云「耳聽之必慊」，又《知接》篇云「以慊寡人」，高誘注並云：「慊，快也。」慊與謙同。《國策·魏策》「齊桓公夜半不慊」，高誘注云：「慊，快也。」我故曰「告子未嘗知義」，以其外之也。**注**孟子曰仁義皆出於內，而告子嘗以爲仁內義外，故言其未嘗知義也。**疏**注「孟子」至「義也」○正

義曰：趙氏以「密聲取敵」解「襲」字，而未詳「義襲而取」之意。推其解「集義而生」爲「從內而出」，則「義襲而取」乃自外而取矣。氣合義而生，則有此氣即有此義，故爲人生受氣所自有者；義襲而取，則義本在氣之外，取以附於氣耳。若

然，則義不關於內，即所行義有不附，將於心無涉矣。乃自省所行，仁義不具備，而邪事干之則心必不快。可見義在於內，關係於心，不與氣配，氣則餒矣。告子勿求於氣，並不求於心，是不知義在於內，與氣俱生，故造爲外義之說。不知義，故不知持志，即不知善養浩然之氣也。趙氏佑《溫故錄》云：「告子固譏孟子之集義爲襲而取之也，由其不知在內，妄疑爲徒取於外。取如『色取仁而行違』之取，加一襲字，如表裘、襲裘之襲，言其多事增益掩蓋之勞，孟子特辨正之。此『非義襲而取之也』句意與『非由外鑠我也』皆反覆揭示。講者以『義襲而取之』屬告子說。告子本外義，安肯取義？彼全是助長，與襲取亦殊。」按：以直養，則氣合義，自內而生，不以直養而邪事干害之，則氣不與義合，即是暴其氣，無所爲義襲也。『義襲而取』自指言義外者之說如此，故直非斥之。一事合義即是以直養，一事不合義即是事害之。集爲雜，雜爲合，合爲配，一也；生爲育，育爲養，一也；義爲直，直爲縮，一也；取爲求，一也。趙氏訓詁能貫通其脉。集合在內，襲取在外，是集非襲，則是內非外。集之訓未明，則襲之說遂窒，六書訓詁所關於道義者深矣。必有事焉而勿正，心勿忘，勿助長也。言人行仁義之

事，必有福在其中，而勿正但以爲福故爲仁義也。但心勿忘其爲福，亦勿汲汲助長其福也。汲汲則似宋人也。疏注「言行」至「福也」○正義曰：經言「必有事」，趙氏以「必有福在其中」解之，是以「福」釋「事」，乃事無福訓也。翟氏灝《考異》云：「通段凡十見福字。古文福但作畐，中筆引長，形便類事。舊本《孟子》當作『必有畐焉』，故趙氏注之如此。」「而勿正但以爲福故爲仁義也」者，①蓋以但字解正字。趙氏於訓詁，每以二字相疊爲釋，此常例也。《詩·終風》序箋云：「正猶止也。」《莊子·應帝王》篇云：「不正。」《釋文》云：「正，本作止。」正之義通於止也。「爲仁義」即上云行仁義之事，自然得福；不可止以得福之故，始行仁義之事。「而勿正但以爲福故爲仁義也」十二字一氣。「正但」連下，此趙氏之義也。《淮南子·精神訓》云「非直夏后氏之璜也」，高誘注云：「直，但也。」直，正義同，正之爲但猶直之爲但也。趙氏以「必有事焉」爲「必有福焉」，故「而勿正」是不可止爲此福也，「心勿忘」是心不忘其

①「仁」，原脫，合於閏、監、毛等本，今據經解本及本書、阮校所述岳、廖、孔、韓等本注文補。

爲福也，「勿助長」是不可助長其福也。隱公元年《公羊傳》云：「及猶汲汲也。及，我欲之。」此云「汲汲助長其福」，謂心急欲其長而助之也。按：趙氏讀「事」爲「福」，其所本不可詳，其讀正爲止而以「心勿忘」爲句，則經義可明。蓋正之爲止即是「已止」之止，「必有事焉而勿止」謂必有事於集義而不可止也。何以不止？心勿忘則不止也。心何以勿忘？時時以不得於言者求諸心，即時時以不得於心者求諸心，使行無不慊於心，則心勿忘而義集也。凡事求諸心，即曾子之「自反而縮，雖千萬人吾往」。往者氣也，然自反而縮乃往，自反而不縮則不往，是不徒恃氣而以心帥氣。以心帥氣，則能善養氣而不暴其氣；若不求諸心而但求諸氣，則無論縮不縮而皆往，務以氣勝人，是爲北宮黝、孟施舍之養勇也，是暴其氣也。能自反，則持其志，不致暴其氣。凡氣之所往，皆自反而縮。自反而縮，則配義與道；配義與道，則以直養而無害其氣。緣集義而生，乃浩然充塞於天地之間而不餒矣。北宮黝、孟施舍，不求諸心但求諸氣者也。故告子不得於心勿求於氣，孟子以爲可也。不得於言勿求於心，^①即是不得於氣勿求於心。蓋告子以外其義者忘其心，以忘其心者制其氣。北宮黝、孟施舍一味用氣，告子一味不用氣，而皆不求心，皆不持志，即皆不能集義。在黝、舍則暴

其氣，在告子則餒其氣，惟孟子之學在自反以求心，持志以帥氣。縮而合乎義道則氣不餒，不縮而乖乎義道則氣不暴，全以「心勿忘」爲要而已。忘通妄，即《易》「无妄」之妄，事即「通變之謂事」之事。正通止，即「終止則亂」之止。通變則爲道爲義，勿止則自彊不息，勿妄則進德修業，此孟子發明《周易》之旨。故深於《易》者，莫如孟子也。無若宋人然。宋人有閔其苗之不長而揠之者，芒芒然歸，謂其子曰：「今日病矣，予助苗長矣。」其子趨而往視之，苗則槁矣。^注揠，挺拔之，欲亟長也。病，罷也。芒芒，罷倦之貌。其人，家人也。其子，揠苗者之子也。趨，走也。槁，乾枯也。以喻人助情邀福也必有害，若欲急長苗而反使之枯死也。^疏注「揠挺」至「死也」○正義曰：《方言》云：「揠、擢、拂、戎，拔也。自關而西或曰拔，或曰擢。自關而東，江淮南楚之間或曰戎。東齊海岱之間曰擢。」郭璞注云：「今呼拔草心者爲擢。」《說文》手部云：「挺，拔也。」《呂氏春秋·仲

① 下「於」字，原脫，今據經文及經解本補。

冬紀》云「荔挺出」，高誘注云：「挺，生出也。」拔或連根拔起，云「挺拔」則但拔之使高出，如荔之挺生，不出其根也，故云「挺拔之欲亟長」。《禮記·少儀》云「師役曰罷」，注云：「罷之言罷勞也。」《春秋傳》曰「師還曰疲」。孔氏正義引莊公八年《公羊傳》云：「此滅同姓，何善爾？病之也。」何休云：「慰勞其罷病也。」是鄭用《公羊》爲注也。罷與疲同，《廣雅·釋詁》疲、罷皆訓勞，《國語·齊語》云「罷士無伍，罷女無家」，注云：「罷，病也。」今日病謂今日勞苦疲憊也。趙氏以「芒芒」爲「罷倦之貌」，《音義》云：「丁音忙。」則讀若茫茫。《方言》云：「茫，遽也。」急遽所以致罷倦，罷倦則怠緩不急遽矣。《詩》「僕夫況瘁」，《楚辭·憂苦》篇作「僕夫慌悴」。《廣雅·釋言》云：「慌，夢也。」《釋詁》云：「忽，慌忘也。」《文選·歎逝賦》「何視天之芒芒」，注云：「芒芒猶夢夢也。」《爾雅·釋訓》云：「夢夢訥訥，亂也。僂僂，昏也。」孫炎注云：「夢夢昏昏，昏亂也。」《釋文》引顧野王云：「夢夢訥訥，煩憊亂也。」《楚辭·九章》云：「中閔瞢瞢。」賈誼《新書·先醒》篇云：「不知治亂存亡之所由，惛惛然猶醉也。」云「煩憊」，云「閔瞢」，云「如醉」，皆倦罷之狀。趙氏蓋讀芒芒爲夢夢，慌之訓爲夢與芒芒爲夢夢同。慌悴謂慌忽憔悴，慌忽者疲其神，憔悴者疲其形，此「芒芒」所以爲倦罷

之貌也。《詩·桃夭》「宜其家人」，毛傳云：「一家之人。」箋云：「猶室家也。」趙氏以「其人」爲「家人」，蓋即謂一家之人也。若《國語·齊語》云「罷女無家」，注云：「夫稱家。」是婦以夫爲家。《楚辭·離騷》云「泥又貪夫厥家」，注云：「婦謂之家。」是夫亦以妻爲家。《周禮·小司徒》注云：「有夫有婦，然後爲家。」故《周易·家人》卦統言男女父子夫婦兄弟，而《詩》箋以家人猶室家，亦男女夫婦統稱。此宋人爲男子，其握苗而歸，不必專告一人，則「其人」之爲「家人」，概指一家而言耳。「其子」亦家人中之一人也。《說文》走部云：「趨，走也。」高誘注《呂氏春秋》、《淮南子》皆以走釋趨。《說文》木部云：「槁，木枯也。」《周禮·小行人》注云：「故書槁爲槁。」《國語·魯語》云「稽魚鼈以爲夏稿」，注云：「稿，乾也。」是乾、枯、槁義同。閔、監、毛三本作「喻人之情邀福者必有害」，者與也義同，俱連下之詞。《列子·黃帝》篇「邀於郊」，《釋文》云：「邀，抄也，遮也。」情非中節而發，則氣不由直養而生，助其喜怒之情以要求呵護之福，勢敗援緩，身名俱喪，是反使有害也。趙氏義如此。天下之不助苗長者，寡矣。以爲無益而舍之者，不耘苗者也；助之長者，握苗者也。非徒無益，而又

害之。」**注**天下人行善皆欲速得其福，恬然者少也。

以爲福祿在天，求之無益，舍置仁義，不求爲善，是由農夫任天，不復耘治其苗也。其邀福欲急得之者，由此攫苗之人也，非徒無益於苗，而反害之。言告子外義，常恐其行義欲急得其福，故爲丑言，人之行當內治善，不當急欲求其福。**疏**注「天下」至「者矣」

○正義曰：「邀福」，閩、監、毛三本作「遲福」。阮氏元《校勘記》云：「遲是也。讀如遲容之遲。」「常恐其行義」，《考文》古本作「常恐其作義」。又閩、監、毛三本注末多「亦若此攫苗者矣」七字。按：《孟子》經文辭句明達，不似《詩》《書》艱奧，而趙氏注順通其意亦極詳了，不似毛、鄭簡嚴，待於申發。故但疏明訓詁典籍，則趙氏解經之意明而經自明，而趙氏有未得經義者，以經文涵泳之，亦可會悟而得其真，固無取乎強經以從注也。此注既讀「必有事」爲「必有福」，故皆以邀福、得福、求福言之。《說文》心部云：「恬，安也。」《老子》云「恬澹爲上」，謂不求福也。由即猶也。《毛詩·甫田》「或耘或耔」，傳云：「耘，除草也。」《禮記·曲禮》云「馳道不除」，注云：「除，治也。」故以「治」釋「耘」。「言告子外義，常恐其行義欲急得其福」，蓋謂告子既以義爲外，則必不

行義，故惟恐其行義也。行義，福不可必得，故不行義而別有以助之，以急求其福。行義即是內治善，內治善則福不能急得。欲急得福，故告子不內治善，且惟恐其行義以碍其急求福也。孟子與之相反，故言「當內治善，不當急求其福」。此趙氏義也。乃以《孟子》經文核之：告子者，「不得於言，勿求於心，不得於心，勿求於氣」者也。勿求心、勿求氣，正《老子》所謂「恬澹」，《淮南子》所謂「恬愉」，豈尚有急求其福之事？則是以急求其福擬告子者，誣也。若謂勿求心、勿求氣即是助長，長即生也，亦即養也。告子勿求心則不集義，因不能如孟子之善養氣；告子勿求氣則不守氣，亦並不似孟施舍之養勇。告子本不欲氣之生長，又何用助長？且告子之學雖偏，而其勿求心、勿求氣，自造爲義外之說，亦當時處士之傑出者。使助長即指告子，則孟子明云「天下之不助苗長者寡矣」，然則天下皆助長之人，豈天下皆爲告子之勿求心、勿求氣？則趙氏以攫苗助長比急求其福，以急求其福爲告子之惟恐行義，於《孟子》經文殊難脗合矣。試即經文涵泳之：「不得於言，勿求於心」，忘其爲心者也。忘其心而勿求則無事，此告子外義、不善養浩然之氣之說也。孟子既辨明義非外襲，必事內集，故云「必有事焉而勿正」。必有事則必求於心，而勿止則非一求而已，且「心勿忘」矣。此

辨明告子之不動心與孟子之不動心已畢，以下「勿助長」則推勸、舍之養勇而言之，謂不可爲告子之必無事而餒，亦不可爲勸、舍之守氣以養氣也。守氣以養氣，是助長也。長即養也，亦即生也。「以直養而無害」，則氣由義生，爲善養即爲善長而非助長助養；以守氣爲養勇，則氣由氣生，爲不善養，即不善長，而爲助長助養。天下能自反持志，直養集義者，能有幾人？大抵多暴其氣以生長其氣，故云「天下之不助苗長者寡矣」。「以爲無益而舍之」，是不有事而止而不求氣者也，此不芸苗者也，是告子之「不得于心，勿求其氣」而「可」者也，故無害也；助之長者，氣本不能從義直而生而助之生，此振苗者也，是勸、舍之守氣以暴其氣者也。暴其氣則不能自反，不能持志，不能集義。凡無義無道，雖不慊於心，而一以其氣行之。以直長養之而無害者，以不直長養而有害必矣，故「非徒無益，而又害之」也。此害字即申明「以直養而無害」之害。以直養則氣自生長於義而無容助之，然則助長者，不能以直養之謂也。治田者，培其苗之根，除其非種，苗自生于根矣，無以擾爲也。總之，以持志自反爲要，則「心勿忘」三字爲善養浩然之學。忘其心爲勸、舍之暴氣，非也；爲告子之勿求氣，亦非也。勿求氣雖較暴氣爲無害，然勿求氣即不復求心以生氣，雖無害而實無益。譬如不擾

苗亦不耘苗，苗之槁雖不自我害之，而苗亦莫能長矣，安用此枯槁寂寞之學爲哉？程氏瑤田《通藝錄·論學小記》云：「人於日用之間，無時無地之非事，即無時無地之非動。聖人之言敬也，道國曰敬事，事君曰敬其事，論仁曰執事敬，論君子曰執事敬，又曰事上敬、交久敬、行篤敬、敬鬼神、祭思敬，蓋悉數之不能終其物。靜時涵養以收斂放心，是敬之一事。蓋人生日用之間，動處多，靜處少。以三達德行五達道，處處是動，處處當用敬。其或有少間靜時，亦須以敬聯屬之，故曰「君子不動而敬」，「君子戒慎乎其所不睹，恐懼乎其所不聞」。言其用功於動，用功於睹聞，已無絲毫之不及，而于萬動中或有一靜，于萬睹聞中或有一不睹不聞，亦以敬聯屬之。如此言敬，始謂之「修己以敬」，始謂之「敬而無失」。以靜時繼續其動時之敬，非主於靜而以動時繼續其靜時之敬也。孟子不動心有道，以能養氣也。氣何以得養？以集義也。義何以集？以格物而致其知也。能致其知，則心有主而義以集，然後見之於行事，事皆合於義，《易》所謂「義以方外」。如此義方外者，必敬直內。敬義相須，無舍敬而能義，亦無舍義而能敬者。故義雖方外，而實謂之內。行吾敬，故謂之內。告子未嘗知義，以其外之也。此孟子之論義，即孟子之論敬也。敬也者，用其心焉而已矣。夫

子曰「無所用心」，心不用則於不可已者而亦已，故斥之曰難。孟子之不動心，非釋氏之專一寂守以主靜得以冒其號而謂之曰不動心也。而告子之不動心，所以異於孟子之不動心，一在動處用功，一在靜處用功，烏得不相背而馳哉？」

「何謂知言？」**注**丑問知言之意謂何？曰：「諛辭知其所蔽，淫辭知其所陷，邪辭知其所離，遁辭知其所窮。」

注孟子曰：人有險諛之言，引事以褒人，若賓孟言雄雞自斷其尾之事，能知其欲以譽子朝、蔽子猛也。有淫美不信之辭，若驪姬勸晉獻公與申生之事，能知其欲以陷害之也。有邪辟不正之事，若豎牛勸仲任賜環之事，能知其欲行譖毀以離之於叔孫也。有隱遁之辭，若秦客之廋辭於朝，能知其欲以窮晉諸大夫也。若此四者之類，我聞能知其所趨者也。

疏注「人有」至「猛也」○正義曰：王氏念孫《廣雅疏證》云：「諛，諛也」，見《集韻》、《類篇》。諛，《玉篇》音虛儉、息廉二切。《說文》引《立政》「勿以諛人」，徐鍇傳云：「諛猶險也。」今本諛作儉，馬融注云：「儉利，佞人也。」《說文》：「儉，儉諛也。儉利於上，佞人也。」

「慝，疾利口也。」引《盤庚》「相時慝民」。今本慝作儉。馬融

注云：「儉利，小小見事之人也。」《韓非子·說使》篇云：

「損仁逐利，謂之疾險。」並字異而義同。《文選》顏延之《和

謝監靈運詩》，注引《倉頡篇》云：「諛，佞諂也。」《孟子·公

孫丑》篇「諛辭知其所蔽」，趙岐注云：「險諛之言。」《荀子·

成相》篇云：「讒人罔極，險諛傾側。」①《詩序》云：「內有進

賢之志，而無險諛私謁之心。」並字異而義同。「賓孟言雄雞

自斷其尾」之事，見昭公二十二年《左傳》。《廣雅·釋詁》

云：「蔽，障也。」景王太子壽卒，既立子猛，又欲立王子朝，

故賓起因雄雞斷尾以說王。《國語·周語》賓起云：「吾見

雄雞自斷其尾，而人曰憚其犧也。吾以為信畜矣，人犧實

難，已犧何害？抑其惡為人用也乎？則可也。人異于是，

犧者實用人也。」注云：「人犧，謂雞也，為人作犧實難。」言

將見殺也，已謂子朝，已自為犧，當何害乎？雞惡為人所

用，自斷其尾，可也，人之美，則宜君人事宗廟也。」人自作

犧則能治人，此譽子朝欲王立之，不必毀子猛。子朝立，猛

①「傾側」，原誤作「顛倒」，今從沈校據《荀子》及《廣雅疏證》改。

②「為」，原誤作「謂」，今據《國語》改。

自廢矣，故云「蔽」也。賓起爲子朝傳，謀立子朝以廢子猛，是爲「諛諂」。○注「有淫美」至「之也」○正義曰：《說文》水部云：「淫，浸淫隨理也。」浸猶漸也。由漸而入，隨其脉理則不違逆，故云「淫美」。《毛詩·雨無正》「巧言如流」，箋云：「巧猶善也。」善即美也。淫美猶云淫巧。《詩·小雅》「僭始既涵」，箋云：「僭，不信也。」驪姬勸晉獻公與申生之事，見莊公二十八年《左傳》。驪姬本欲廢申生，而先言「曲沃，君之宗也，不可以無主。若使大子主曲沃，則可以威民而懼戎，且旌君伐。」晉侯說之。是巧言不信，欲殺之先與之也。惟其與之，使居曲沃，而乃由是得罪，是「陷害之」也。《周禮·雍氏》注云：「穿地爲塹，所以禦禽獸，其或超踰則陷焉，世謂之陷阱。」禽獸不知有坑阱，人巧設以害之，驪姬欲害申生，故先爲此巧美之言，使之墜入，如禽獸之陷於阱，故爲「陷害」也。○注「有邪」至「孫也」○正義曰：邪，辟也。邪則不正，故云「邪辟不正」。「豎牛勸仲任賜環」之事，見昭公四年《左傳》。豎牛者，叔孫穆子在庚宗所私婦生也；仲壬，穆子在齊娶國姜所生也。壬與公御萊書私遊于公宮，昭公與仲壬玉環。壬使牛人告穆子，牛人不告而詐傳穆子命使壬佩之，乃譖於叔孫曰：「不見而自見矣，公與之環而佩之矣。」遂逐仲壬。仲壬被逐，是父子相離也。○注「有隱」

至「夫也」○正義曰：《淮南子·繆稱訓》云「不身遁，斯亦不通人」，高誘注云：「遁，隱也。」故「遁辭」爲「隱遁之辭」。「秦客廋辭於朝」，事見《國語·晉語》。韋昭注云：「廋，隱也。謂以隱伏詭譎之言聞於朝也。東方朔曰：『非敢試也，乃與爲隱耳。』是也。」大夫莫之能對，故云「欲以窮晉諸大夫」也。○注「若此」至「趨也」①○正義曰：「知其所趨」謂知其趨向所在也。按：賓孟、驪姬、豎牛同一譖詐，無以分其爲諛、淫、邪，且當時晉獻公、周景王雖惑之，而史蘇、劉盆輩皆能知之，不必孟子大賢也。至秦客廋辭，即所謂「隱」。《漢·藝文志》有《隱書》八十篇，劉向《別錄》云：「《隱書》者，疑其言以相問，對者以慮思之，可以無不論。」《呂氏春秋·重言》篇言「荆莊王好隱」，《韓非子·難》篇言「人有設桓公隱者」，古人托言譎諫，與詩人比興正同，無所爲窮知之，尤無足爲難，故晉大夫莫能對，范文子且知其三也，豈遂爲孟子之知言乎？《鶡冠子·能天》篇云：「諛辭者，革物者也，聖人知其所離，淫辭者，因物者也，聖人知其所合，詐辭者，沮物者也，聖人知其所飾，遁辭者，請物者也，聖人

①「趨也」，合於宋十行、閩、監、毛等本，本書注文及阮校所述廖、孔、韓等本「趨」下有「者」字。

知其所極。」陸佃注云：「諛辭，蓋若告子之類。告子外義，聖人無之，故曰革物者也。淫辭，蓋若墨子之類。兼愛，聖人有之，故曰因物者也。詐猶邪也。飾又從而爲之辭。極猶窮也。」鵲冠之說與孟子小異。以諛辭聖人知其所離，蓋此「諛辭」即孟子所云「邪辭」，其別云「詐辭」，則孟子所未言也。《說文》言部云：「諛，辨論也。古文以爲頗字。」頗，《廣雅》訓邪，《說文》訓偏，《書·洪範》云「頗僻」即邪僻，故鵲冠以諛即邪。又「無偏無頗，遵王之義」，此頗與偏並舉，頗即偏也。段氏玉裁《說文解字注》云：「凡從皮之字皆有分析之意。」分則偏，偏則各持一說，則辨論，此諛之正義也。聖人變通神化，不執於一，孔子稱六言六蔽，雖仁、知、信、直、勇、剛，不學以通之，則有所蔽而爲愚、蕩、賊、絞、亂、狂。《荀子·解蔽》篇云：「凡人之患，蔽于一曲而闇於大理。」又云：「凡萬物異則莫不相爲蔽。墨子蔽於欲而不知得，慎子蔽於法而不知賢，申子蔽於執而不知知，惠子蔽於辭而不知實，莊子蔽於天而不知人。」即諛辭之由於有所蔽也。淫爲浸淫隨理，鵲冠以爲因，陸佃證以墨子之兼愛是也。班固《漢書·藝文志》言九流之學：「儒家出於司徒之官，道家出於史官，陰陽家出於羲和之官，法家出於理官，名家出於禮官，墨家出於清廟之守，從橫家出於行人之官，雜家出於議

官，農家出於農稷之官。」所謂「因」也。然各引一端，崇其所善：儒則違離道本，五經乖析，道則獨任清虛，兼棄仁義，陰陽則舍人事而任鬼神，法則傷恩薄厚，名則鈎鉅析亂，墨則不知別親疏，從橫則上詐譖而棄其信，雜則漫羨而無所歸，農則欲使君臣並耕，諄上下之序：蓋水循理隙而入，浸漸其中，不能復出。《荀子·非十二子》所謂「持之有故，言之成理」，是淫辭之有所陷入也。至於「邪辟之辭」，則顯然悖謬於倫理道義，鵲冠所謂「革」是也。萬氏斯大《學春秋隨筆》云：「《春秋》弑君有稱名、稱人、稱國之異。《左氏》定例以爲「稱君君無道，稱臣臣之罪」，甚矣其說之頗也。孟子曰：『世衰道微，邪說暴行有作。』所謂「暴行」，即弑父、弑君是也；所謂「邪說」，即亂臣賊子與其儕類，將不利於君，必飾君之惡，張己之功，造作語言，誣惑衆庶是也。有邪說以濟其暴，遂若其君真可弑而已可告無罪然者。相習既久，政柄下移，群臣知有私門而不知有公室。且鄰封執政，相倚爲姦，凡有逆節，多蔽過於君，鮮有罪及其臣者，如魯、衛出君，師曠、史墨之言可證也。《左氏》之例亦猶是耳。於弑君而謂君無道，是《春秋》非討亂賊而反爲之先導矣。邪說之惑人，一于是乎！」蓋邪說直造爲悖道之言，其甘於爲此說者則心久離於倫理道義，乃至於是，故邪辭由於有所離也。沮

之言止，請之言乞。止之使去，乞之使來。若明白直質言之，未能售也，故曲言之，亦隱言之。鶡冠合邪辭于諛辭，而分遁辭爲詐辭，陸佃以詐爲邪，非也。何則？所憎者欲其止，所好者欲其來。不能必其止與來也，故以諛詐行之。在本意則隱而不明，是爲遁；在所言則妄而不實，是爲詐。遁即詐也。離謂離於道義，窮謂窮於道義。心中本無義無道，惟恃此諛詐隱藏以爲鈎致，此遁辭所以由於窮也。戰國時張儀、蘇代等之言大多如是也。此四者，非通於大道，明於六經，貫乎伏羲、神農、黃帝、堯、舜、文王、周公、孔子之學，鮮克知之。孟子聞而能知其趨，則好古窮經之學深矣。生於其心，害於其政；發於其政，害於其事。聖人復起，必從吾言矣。」**注**生於其心，譬若人君有好殘賊嚴酷心，必妨害仁政，不得行之也；發於其政者，若出令欲以非時田獵、築作宮室，必妨害民之農事，使百姓有飢寒之患也。吾見其端，欲妨而止之。^①如使聖人復興，必從吾言也。**疏**「生於」至「言矣」○正義曰：按：此與《滕文公下》篇「好辯」章互相發。彼云：「吾爲此懼，閑先聖之道，距楊墨，放淫辭，邪說者不得作。作於其心，害於其事；作於其事，害於其政。聖

人復起，不易吾言矣。」又云：「我亦欲正人心，息邪說，放淫辭。」則是諛、淫、邪三者，楊、墨兼有之。蓋楊偏執於爲我，墨偏執於兼愛，是諛也。楊之爲我有合於曾子居武城，墨子兼愛有合於禹、稷三過其門而不入，各浸淫失其本，則淫也。至於無父無君，則邪也，特不似儀、秦之詐飾耳。此「生於其心」四句承上。蔽、陷、離、窮皆心也，諛、淫、邪、遁生於心之蔽陷離窮，是「生於其心」也。此諛淫邪遁之言，造之自下，大有礙乎聖人治天下之法，故「害於政」也。若將此諛淫邪遁之言見之於政，則天下效之，三綱由是淪，百行由是壞，故「害於事」也。政謂法教也，事謂事爲也。「吾言」指「以直養而無害」以下，至「必有事焉而勿正，心勿忘，勿助長」之言。告子義外之言不免諛邪，聖人復起，必從吾「配義」、「集義」之言也。注以政爲仁政，故指人君言之。

「宰我、子貢善爲說辭，冉牛、閔子、顏淵善言德行，孔子兼之。曰：我於辭命則不能也。」**注**言人各有能。我於言辭命教則不能如二

①「妨」，廖本作「防」。

子。**疏**注「言辭命教」①○正義曰：《禮記·表記》注云：

「辭謂解說也。」說亦言也。上言「說辭」，則「辭」即「言」也。

《詩·下武》「永言配命」，箋云：「命，教令也。」是「命」爲

「教」。然則夫子既聖矣乎？**注**丑見孟子但言

不能辭命，不言不能德行，謂孟子欲自比孔子，故

曰，夫子既已聖矣乎？**疏**注「丑見」至「矣乎」○正義

曰：趙氏以上節仍孟子之言，「曰我於辭命則不能也」爲孟

子自言其不能此，「然則」乃丑問之言。然「必從吾言矣」已

結上文。近時通解以「幸我」以下皆丑問之言，「曰我於辭命

則不能也」乃孔子之言，是也。曰：「惡，是何言也？」

昔者子貢問於孔子曰：「夫子聖矣乎？」孔

子曰：「聖則吾不能，我學不厭而教不倦

也。」子貢曰：「學不厭，智也；教不倦，仁也。

仁且智，夫子既聖矣。」夫聖，孔子不居。是

何言也？**注**惡者，不安事之歎辭也。孟子答丑，

言往者子貢、孔子相答如此。孔子尚不敢安居於

聖，我何敢自謂爲聖？故再言「是何言」也。**疏**注

「惡者」至「辭也」○正義曰：葉夢得《避暑錄話》述此文，惡

作烏，云：「烏蓋齊魯發語不然之辭，至今用之，作鼻音，亦

通於汝、穎。」周氏廣業《孟子逸文考》云：「《音義》惡音烏，

非作烏也。《韓詩外傳》、《新序》載楚邱先生答孟嘗君曰：

「惡，何君謂我老？」則烏、惡信齊音。」王氏引之《經傳釋詞》

云：「惡，不然之詞也。《莊子·人間世》篇曰：「惡，惡

可？」上惡字不然之詞，下惡字訓爲安。《荀子·法行》篇

云：「惡，賜，是何言也？」《韓子·難》篇云：「啞，是非君人

者之言也。」啞與惡同。按：啞、惡二音今皆有之，實一聲之

轉。意不然而驚咤之則云啞，意不然而直拒之則云惡。○

注「言往者孔子子貢相答如此」○正義曰：《呂氏春秋·尊

師》篇云：「子貢問孔子曰：『後世將何以稱夫子？』孔子

曰：『吾何足以稱哉？勿已者，則好學而不厭，好教而不

倦，其惟此耶？』翟氏灝《考異》云：「《論語》『爲之不厭，誨

人不倦』，是向公西華言之，此向子貢言之。《日知錄》謂《孟

子》書所引孔子之言，其載於《論語》者八，「學不厭而教不

倦」一也。今據《呂氏春秋》，則此實別一時語。」「學不厭」，

《論衡》引作「厭」。昔者竊聞之：子夏、子游、子張

①「命教」，原作「教命」，合於韓本，今從沈本據本書注文

及阮校所述孔本改。

皆有聖人之一體，冉牛、閔子、顏淵則具體而微。**注**體者，四枝股肱也。孟子言昔日竊聞師言

也。丑方問欲知孟子之德，故謙辭言「竊聞」也。一

體者，得一枝也；具體者，四枝皆具。微，小也，比聖人之體微小耳。體以喻德也。**疏**「昔者」至「而微」

○正義曰：近通解以爲丑問之言，是也。○注「體者四枝股

肱也」○正義曰：《文選》注引劉熙注云：「體者，四支股腳

也。具體者皆微者也，皆具聖人之體微小耳。體以喻德

也。」與趙氏此注同。《毛詩·相鼠》「人而無體」，傳云：

「體，支體也。」《禮記·喪大記》注云：「體，手足也。」《周

書·武順》篇云：「左右手各握五，左右足各履五，曰四枝。」

肱屬手，股屬足，故云「四枝股肱」。枝與支通，《說文》作𣎵，

亦作肢。敢問所安？**注**丑問孟子所安比也。**疏**

注「所安比也」○正義曰：趙氏讀安爲案。《周禮·縣正》

「各掌其縣之政令徵比」，注云：「比，案比也。」按安猶處也，

處猶居也。謂夫子於諸賢，欲何居也。曰：「姑舍是。」

注姑，且也。孟子曰，且置是。我不願比也。**疏**注

「姑且」至「比也」○正義曰：《毛詩·卷耳》傳云：「姑，且也。」

《呂氏春秋·貴生》《上農》等篇高誘注並云：「舍，置也。」

曰：「伯夷、伊尹何如？」**注**丑曰，伯夷之行何

如？孟子心可願比伯夷不？**疏**注「可願比伯夷

不」○正義曰：阮氏元《校勘記》云：「盧文弨《抱經堂文

集》云：「依趙氏注，經文但云伯夷何如，無「伊尹」二字。」

按，此說極確，趙注本儼然，丑問伯夷一人，孟子乃及伊尹。」

曰：「不同道。」**注**言伯夷之行不與孔子、伊尹同

道也。非其君不事，非其民不使，治則進，亂

則退，伯夷也；**注**非其君，非己所好之君也；非

其民，不以正道而得民，伯夷不願使之，故謂之非其

民也。何事非君？何使非民？治亦進，亂

亦進，伊尹也。**注**伊尹曰，事非其君者，何傷也？

使非其民者，何傷也？要欲爲天理物，冀得行道而

已矣。**疏**注「要欲」至「已矣」○正義曰：《五經通義》云：

「荷天命以爲王，使理群生。」此所謂「爲天理物」也。可以

仕則仕，可以止則止，可以久則久，可以速則

①「不」，原作「否」，今據本書及廖本注文改。

速，孔子也。**注**止，處也。久，留也。速，疾去也。

疏注「止處」至「去也」○正義曰：《說文》几部云：「處，**①**止也。」重文作處。是「止」即「處」也。莊公八年《公羊傳》云

「何言乎祠兵爲久也」，注云：「爲久，稽留之辭。」《說文》是部云：「速，疾也。」久屬仕言，故云留，速屬止言，故云去。

皆古聖人也，吾未能有行焉。乃所願，則學

孔子也。**注**此皆古之聖人，我未能有所行。若此

乃言我心之所庶幾，則願欲學孔子所履，進退無常，量時爲宜也。**疏**注「乃言」至「宜也」○正義曰：《爾雅·

釋詁》云：「幾，近也。」《淮南子·要略》云「所以使學者孳孳以自幾也」，高誘注云：「幾，庶幾也。」然則「庶幾」即幾也，

「我心之所庶幾」，言我心之所近也。「進退無常，量時爲宜」，即集義矣。義之所在，即仕即久，是進也，義之所不在，即止即速，是退也。《禮記·學記》云：「當其可之謂

時。」仕止久速，皆視其可，是爲「量時」。「伯夷、伊尹

於孔子，若是班乎？」**注**班，齊等之貌也。丑嫌

伯夷、伊尹與孔子相比，問此三人之德班然而等乎？**疏**注「班齊」至「等乎」○正義曰：《方言》云：「班，列

也。北燕曰班。」《儀禮·既夕》注云：「班，次也。」《文選·東京賦》云「次和樹表」，薛綜注云：「次，比也。」《禮記·服問》注云：「列，等比也。」《淮南子·精神訓》高誘注云：

「齊，等也。」《原道訓》高誘注云：「齊，列也。」是班、列、次、比、等，齊同義轉注，故趙氏以「齊等」解「班」，又以「相比」解之。《說文》女部云：「嫌，疑也。」謂丑疑三人相等也。

曰：「否。自有生民以來，未有孔子也。」**注**孟

子曰，不等也。從有生民以來，非純聖人，則未有與孔子齊德也。曰：「然則有同與？」**注**丑曰，然

則此三人有同者邪？曰：「有。得百里之地而

君之，皆能以朝諸侯，有天下。行一不義，殺一不辜而得天下，皆不爲也。是則同。」**注**孟

子曰，此三人君國，皆能使鄰國諸侯尊敬其德而朝之。不以其義得之，皆不爲也。是則孔子同之矣。

疏「行一」至「爲也」○正義曰：《荀子·王霸》篇云：「故用國者，義立而王，信立而霸。行一不義，殺一無罪而得天下，

①「處」，原誤作「處」，今據《說文》及經解本改。

仁者不爲也。」又《儒效》篇云：「行一不義，殺一無罪而得天下，不爲也。」與《孟子》同。不義則自反而不縮也，不爲則不慍也。曰：「敢問其所以異。」**注**丑問孔子與二人異謂何？曰：「宰我、子貢、有若，智足以知聖人，汙不至阿其所好。」**注**孟子曰，宰我等三人之智足以識聖人。汙，下也。言三人雖小汙不平，亦不至阿其所好以非其事，阿私所愛而空譽之，其言有可用者。欲爲丑陳三子之道孔子也。**疏**注

「汙」至「用者」○正義曰：《說文》水部云：「窟，窠也。」穴部云：「窠，汙衺下也。」《音義》云：「丁音蛙，不平貌。趙氏讀汙爲窟也。」按：汙本作污，孟子蓋用爲夸字之假借。夸者，大也。謂言雖大而不至於阿曲。成公綏《嘯賦》云：「大而不可泔。」蘇洵有《二子知聖人汙論》，以汙屬上讀，則「智足以知聖人汙」亦是智足以知聖人之大也。宰我曰：「以子觀於夫子，賢於堯舜遠矣。」**注**予，宰我名也。以爲孔子賢於堯舜。以孔子但爲聖，不王天下而能制作素王之道，故美之。如使當堯舜之處，賢之遠矣。**疏**注「如使當堯舜之處」○正義曰：阮氏元《校勘

記》云：「如使當堯舜之世觀其制度」，閔、監、毛三本，足利本同。廖本、孔本、韓本，《考文》古本世作處，無「觀其制度」四字。按，無者是。「子貢曰：『見其禮而知其政，聞其樂而知其德。由百世之後等百世之王，莫之能違也。自生民以來，未有夫子也。』」**注**見其制作之禮，知其政之可以致太平也，聽聞其《雅》《頌》之樂，而知其德之可與文武同也。《春秋外傳》曰「五聲昭德」，言五音之樂聲可以明德也。從孔子後百世，上推等其德於前百世之聖王，無能違離孔子道者。自從生民以來，未有能備若孔子也。**疏**「子貢」至「子也」○正義曰：趙氏佑《溫故錄》云：

「李文貞《讀孟子劄記》云：『夫子所以超於群聖者，以其祖述堯舜，憲章文武，使先王之道傳之無窮也。宰我、子貢、有若推尊之意，蓋皆以此，而子貢獨顯言之。如能言夏殷之禮，知《韶武》之美善，告顏子爲邦之類，皆所謂「見禮知政，聞樂知德，等百王而莫違」者也。孟子引之，以是爲孔子所

①「處」，原作「世」，合於宋十行、閔、監、毛等本，今據本書及阮校所述廖、孔、韓等本注文改。

以異者，蓋聖則同德，孔子則神明天縱，有以考前王而不謬，俟後聖而不惑，非列聖所可同也。」○注「春秋」至「德也」○正義曰：引見《國語·周語·隨會聘周》篇。韋昭《國語解敘》云：「昔孔子發憤於舊史，垂法於素王。左丘明因聖言以摠意，託王義以流藻，以爲《國語》。其文不主於經，故號曰《外傳》。宋庠《國語補音敘》云：「魏晉以後書錄所題皆曰『春秋外傳國語』，是則《左傳》爲內，《國語》爲外。」按：趙氏生後漢，已稱《外傳》，則「外傳」之題不始魏晉矣。韋昭注云：「昭德謂政平者其樂和也。」亦謂見其樂知其德。○注「從孔」至「道者」○正義曰：《呂氏春秋·貴公》篇云「而莫知其所由始」，注云：「由，從也。」《毛詩·谷風》傳及《說文》走部皆云：「遼，離也。」故以「從」釋「由」，以「離」釋「遼」。孔子無可無不可，其道大備，故從孔子百世後上推孔子，又比孔子之德於百世前之聖王，皆莫能越孔子之範圍。「上推」即「推而放諸東海而準」之推。有若曰：「豈惟民哉？麒麟之於走獸，鳳凰之於飛鳥，泰山之於丘垤，河海之於行潦，類也；聖人之於民，亦類也。出於其類，拔乎其萃，自生民以來，未有盛於孔子也。」

傍流潦也。萃，聚也。有若以爲，萬類之中各有殊異，至於人類卓絕，未有盛美過於孔子者也。若三子之言孔子，則所以異於伯夷、伊尹也。夫聖人之道，同符合契，前聖後聖，其揆一也，不得相踰。云生民以來無有者，此三子皆孔子弟子，緣孔子聖德高美而盛稱之也。孟子知其言太過，故貶謂之「汙下」，但不以無爲有耳。因事則褒辭在其中矣，亦以明師徒之義得相褒揚也。

疏注「垤蟻」至「聚也」○正義曰：《詩·豳風》「鸛鳴于垤」，毛傳云：「垤，蟻冢也。」《方言》云：「垤，封場也。楚郢以南蟻土謂之封。垤，中齊語也。」蟻同蟻。《禮記·樂記》云「封比干之冢」，注云：「積土爲封。」《廣雅·釋丘》云：「封，冢也。」是「蟻封」即蟻冢也。《法言·問神》篇云：「太山之於蟻垤。」《詩·召南》「于彼行潦」，《大雅·洞酌》「彼行潦」，毛傳皆云：「行潦，流潦也。」孔氏正義云：「行者，道也。」《說文》水部云：「潦，雨水也。」然則行潦，道路之上流行之水。《漢書·司馬相如傳》注引應劭云：「潦，流也。」此云「道旁流潦」，以「道」釋「行」，以「流」釋「潦」也。「萃，聚也」，《周易·彖傳》文。阮氏元《校勘記》云：「『泰山之於丘垤』，咸淳衢州本泰作太。」○注

「有若」至「尹也」○正義曰：《呂氏春秋·論人》篇云「人同類而智殊」，高誘注云：「殊，異也。」《文選·薦禰衡表》云「英才卓犖」，注云：「卓犖，絕異也。」「萬類」，統人物而言。麒麟與衆獸異，鳳凰與衆鳥異，泰山、河海與丘垤、行潦異，聖人與凡民異，是「萬類各有殊異」也。聖人在人類之中，本是卓然絕異於凡俗，是「出於其類，拔乎其萃」也。而孔子在卓絕之中尤為盛美，此所以異于伯夷、伊尹也。蓋以黜、舍、告子之不知求心，不知集義，必要之於曾子之「自反」。自反而縮，則得百里之地而君，皆能朝諸侯，有天下，自反不縮，則行一不義，殺一不辜，得天下，皆不為。是伯夷、伊尹與孔子皆自反而配道義矣。乃伯夷之「非其君不仕，非其民不使」，尚專於清，伊尹之「何仕非君，何使非民」，尚專於任。任之不已，則流於黜、舍、清之不已，則流於告子。故雖能「集義」，又必「量時合宜」，而要之於孔子之「可仕可止，可久可速」。《易》之道，大中而上下應之，此志帥氣之學也。分陰分陽，迭用柔剛，通其變使民不倦，神而化之使民宜之，此「可仕可止，可久可速」之學也。至於通變神化，而「集義」之功極於精義，求心之要妙於先心。此伏羲、神農、黃帝、堯、舜、文王、周公相傳之教，孔子備之而孟子傳之。惟得乎此，而誠、淫、邪、遁之言乃不致以似是而非者惑亂而昧所從也。

○注「夫聖」至「揚也」○正義曰：趙氏佑《溫故錄》云：「此章舊注特多違失，如以子夏不如曾子孝之大，以告子之言心氣皆屬人言，「宰我、子貢善為說辭」一節、「昔者竊聞之」一節皆為孟子自言，於「有若曰」節注「此三人皆孔子弟子」云云，①直說成阿其所好，全相觸背。此漢注之所以不可廢而有可廢也。」

章指：言義以行勇，則不動心；養氣順道，無效宋人。聖人量時，賢人道偏。是以孟子究言情理，而歸之學孔子也。

孫授易授詩校字

孟子正義卷六終

①「於」上，原有「莫不善」三字，乃節略《四書溫故錄》「賴《集註》始正之，莫不善」而未盡者，今刪去。

孟子正義卷七

江都縣鄉貢士焦循撰集

孟子曰：「以力假仁者霸，霸必有大國；以德行仁者王，王不待大。湯以七十里，文王以百里。」**注**言霸者以大國之力假仁義之道，然後能霸，若齊桓、晉文等是也；以己之德行仁政於民，小國則可以致王，若湯文王是也。**疏**「湯

以「至「百里」○正義曰：顧氏炎武《日知錄》云：「湯以七十里，文王以百里」，孟子爲此言以證王之不待大爾。其實文王之國不止百里。周自王季伐諸戎，疆土日大，文王自岐遷豐，其國已跨三四百里之地，伐崇伐密，自河以西，舉屬之周。至於武王而西及梁、益，東臨上黨，無非周地。紂之所有不過河內殷墟，其從之者亦但東方諸國而已。一舉而克商，宜其如振槁也。《書》之言文王曰「大邦畏其力」，文王何

嘗不藉力哉？」按：孟子前言「文王由方百里起，是以難也」，謂其起自百里，非謂遷豐之後仍止百里也。孟子之文彼此互見，貫而通之乃見其備。湯、文始小而終大，由能行仁政而諸侯歸之，謂文王藉力，當未必然。《史記·平原君列傳》毛遂曰：「遂聞湯以七十里之地王天下，文王以百里之地而臣諸侯。」《荀子·仲尼》篇云：「文王載百里地而天下一。」《韓詩外傳》云：「客有說春申君者曰：湯以七十里，文王以百里，皆兼天下，一海內。」陸賈《新語·明誠》篇云：

「湯以七十里之封而升帝王之位。」《史記·三代世表》後，褚先生答張夫子問云：「堯知稷、契皆賢人，天之所生，故封之契七十里；後十餘世，至湯王天下，堯知后稷子孫之後王也，故益封之百里，其後世且千歲，至文王而有天下。」以力服人者，非心服也，力不贍也；以德服人者，中心悅而誠服也，如七十子之服孔子也。

注贍，足也。以己力不足而往服從於人，非心服也；以己德不如彼而往服從之，誠心服者也。如顏淵、子貢等之服於仲尼，心服者也。**疏**注「贍足」至

「者也」○正義曰：贍，古作濟。《呂氏春秋·順民》篇云「愁悴不贍者」，高誘注云：「贍猶足也。」又《先己》篇云「期年而

有扈氏服」，注云：「服，從也。」閔、監、毛三本作「服就於人」。《廣雅·釋詁》云：「就，歸也。」「非心服」承「以力服人」，則以力服人即指此非心服者而言，故云「以己力不足而往服從於人」。上但言「以力」，未言以力不贍，故下以「力不贍也」補明之。「以力服人」既是以力不贍而從人，則「以德服人」即是以德不贍而從人，故云「以己德不如彼而往服從之」。顏淵、子貢於孔子，無力可言，其從之惟心悅於德耳。若「以力服人者」即上「以力假仁」之人，則與下「非心服也」不貫，且以德行仁者豈用以服人乎？《詩》云：「自西自東，自南自北，無思不服。」此之謂也。」**注**《詩》、《大雅·文王有聲》之篇。言從四方來者，無思不服武王之德。此亦「心服」之謂也。**疏**注「詩大」至「謂也」○正義曰：《詩》在《大雅·文王有聲》篇第六章。箋云：「自，由也。武王於鎬京行辟廱之禮，自四方來觀者皆感化其德，心無不歸服者。」是《詩》謂服武王之德也。自訓由，亦訓從。東、西、南、北謂自鎬京之四方來也。「無思不服」猶云無不心服，故鄭箋謂「心無不歸服」，趙氏亦云「此亦心服之謂」。

章指：言王者任德，霸者兼力。力服

心服，優劣不同。故曰：「遠人不服，修文德以懷之。」**疏**「王者任德」○正義曰：《漢書·禮樂志》云：「天任德不任刑。」○「遠人」至「懷之」○正義曰：《論語·季氏》篇文。足利本懷作來，韓本同。

孟子曰：「仁則榮，不仁則辱。今惡辱而居不仁，是猶惡濕而居下也。」**注**行仁政則

國昌而民安，得其榮樂；行不仁則國破民殘，蒙其耻辱。惡辱而不行仁，譬猶惡濕而居卑下近水泉之地也。**疏**注「行仁」至「地也」○正義曰：《國語·晉語》云：

「非以翟爲榮」，注云：「榮，樂也。」濕宜作溼，《素問·生氣通天論》云「秋傷於溼」，注云：「溼謂地溼氣也。」卑，閔、監、毛三本作卑，卑、埤通。《管子·水地》篇云：「人皆赴高，已獨赴下，卑也。卑也者，水以爲都居。」注云：「都，聚也。水聚居於下，卑也。」《荀子·宥生》篇云：「其流也埤下，裾拘必循其理。」注云：「埤讀爲卑。裾與倨同，方也。拘讀爲鉤，曲也。其流必就卑下，或方或曲，必循卑下之理。」是卑下爲近水泉之處，爲水漸洳，不免於溼也。如惡之，莫如貴

德而尊士。賢者在位，能者在職，**注**諸侯如惡辱之來，則當貴德以治身，尊士以敬人，使賢者居位得其人，能者居職任其事也。**疏**注「使賢」至「事也」○

正義曰：《廣雅·釋詁》云：「在，冗也。」《說文》几部云：

「冗，處也。」今通作居，故以兩「居」釋兩「在」。《禮記·文王世子》云：「記曰：虞夏商周，有師保，有疑丞，設四輔及三公，不必備，唯其人。」注云：「無則已，小人處其位不如且闕。」今賢者處位，是有其人，故云「得其人」。《淮南子·俶真訓》云：「大夫安其職，高誘注云：「職，事也。」居職」故「任其事」。國家間暇，及是時明其政刑，雖大

國必畏之矣。**注**及無鄰國之虞，以是間暇之時，明修其政教，審其刑罰，雖天下大國必來畏服。**疏**

注「及無」至「畏服」○正義曰：《國語·晉語》：「平公謂陽畢曰：『自穆侯以至於今，亂兵不輟，民志無厭，禍敗無已，離民且速寇，恐及吾身，若之何？』」陽畢對曰：「今若大其柯，去其枝葉，絕其本根，可以少間。」注云：「間，息也。」「間暇」謂安息，此以除去欒氏內亂為「少間」，則不獨無敵國之虞。「國家間暇」謂不用兵戈，無論外患內亂，戰攻則不得休息。趙氏舉其外以概其內也。《國語·晉語》注云：「明，

著也。」「《說文》彡部云：「修，飾也。」《廣雅·釋詁》云：「飾，著也。」是明、著、修三字義通。《管子·宙合》篇云：「見察之謂明。」《淮南子·本經訓》云：「審於符者」，高誘注云：「審，明也。」明之義一為修明，一為明審。趙氏以政教宜修，刑罰宜審，故分釋之。畏之訓亦有二，一為畏懼，《廣雅·釋詁》「畏，懼也」是也，一為畏服，《曲禮》「畏而愛之」，注云：「心服曰畏」是也。大國無容畏懼，故以「畏服」言之。《詩》云：「迨天之未陰雨，徹彼桑土，綢繆牖戶。」今此下民，或敢侮予？」孔子曰：「為此詩者，其知道乎？能治其國家，誰敢侮之？」

注《詩》《邶風·鴟鴞》之篇。迨，及；徹，取也。桑土，桑根也。言此鴟鴞小鳥尚知及天未陰雨，而取桑根之皮，以纏緜牖戶；人君能治其國家，誰敢侮之？刺邠君曾不如此鳥。孔子善之，故謂此詩知道也。**疏**注「詩邠」至「道也」○正義曰：《詩》在今《毛詩·鴟鴞》篇第二章。傳云：「迨，及。徹，剥也。桑土，桑根也。」箋云：「綢繆，言纏緜也。」趙氏注與傳、箋同。王肅云：「鴟鴞及天之未陰雨，剥取彼桑根，以纏緜其牖戶。」桑根之皮，必須剥而取之，故毛傳訓徹為剥。趙氏訓徹為取，

《廣雅·釋詁》云：「撤，取也。」撤，徹字通。《毛詩釋文》云：「土音杜，《韓詩》作杜。《方言》云：『東齊謂根曰杜。』」《大雅》「自土沮漆」，《漢書·地理志》注云：「《齊詩》作自杜。」《荀子·解蔽》篇所言「乘杜」即「相土」，是土、杜古字通也。「綢繆」即「纏繆」之轉聲，《廣雅·釋詁》云：「綢繆，纏也。」謂以桑根之皮絞結束縛之成巢也。《爾雅·釋鳥》云：「鷓鴣，鷓鴣。」陸璣《詩疏》云：「鷓鴣，似黃雀而小。」是鷓鴣爲「小鳥」也。「今此下民」，今《毛詩》作「今女下民」。《詩序》云：「《鷓鴣》，周公救亂也。成王未知周公之志，公乃爲詩以遺王，名之曰《鷓鴣》焉。」事見《周書·金縢》篇。①趙氏則以爲刺邠君曾不如此鳥，此蓋三家之說與毛異者。今國家間暇，及是時般樂怠敖，是自求禍也。禍、福無不自己求之者。注般，大也。孟子傷今時之君，國家適有間暇，且以大作樂，怠惰敖遊，不修政刑，是以見侵而不能距，皆自求禍者也。疏

注「般大也」○正義曰：段氏玉裁《說文解字注》云：「伴，大貌。《方言》、《廣雅》、《孟子》注皆云：『般，大也。』亦謂般即伴。」○注「怠惰敖遊」○正義曰：《禮記·少儀》云「怠則張而相之」，注云：「怠，惰也。」《毛詩·小雅》「嘉賓式燕以

敖」，傳云：「敖，遊也。」《說文》出部云：「敖，出遊也。」敖同遨。《詩》云：「永言配命，自求多福。」注《詩》，《大雅·文王》之篇。永，長；言，我也。長我周家之命，配當善道，皆內自求責，故有多福也。疏注

「詩大」至「福也」○正義曰：詩在《文王》篇第六章。毛傳云：「永，長。言，我也。」趙氏訓詁與毛同，皆《爾雅·釋詁》文。《廣雅·釋詁》云：「配，當也。」箋云：「常言當配天命而行，則福祿自來。」亦以當釋配。分於道謂之命，「配當善道」則配當天命矣。莊公二十五年《公羊傳》云「求乎陰之道也」，注云：「求，責求也。」故「自求」即是「自責」。《易·雜卦傳》云：「大有，衆也。」衆與多義同，故以「有」釋「多」，謂能自責則有福也。太甲曰：「天作孽，猶可違；自作孽，不可活。」此之謂也。注殷王太甲言天之妖孽尚可違避，譬若高宗雉雉、宋景守心之變，皆可以德消去也；自己作孽者，若帝乙慢神震死，是爲不可活也。疏注「殷王」至「活也」○正義曰：《尚書·

①「滕」，原誤作「滕」，今據經解本改。

太甲三篇，今文、古文皆不傳，不在逸《書》之列，故趙氏但云「殷王太甲言」，不言「逸《書》」也。周氏廣業《孟子逸文考》云：「《說文》：『螢，从虫，辭聲。衣服歌謠草木之怪謂之萩，禽獸蟲蝗之怪謂之螢。』」又：「孽，庶子也。从子，薛聲。」《玉篇》：「螢或作孽。」江氏聲《尚書集注音疏》：「云『高宗雉雉』者，經云『高宗融日，越有雉雉』。敘云：『高宗祭成湯，有飛雉升鼎耳而雉。』《史記》云：『武丁祭成湯，明日有飛雉登鼎耳而雉。』武丁懼，祖己曰：『王勿憂，先修政事。』武丁修政行德，天下咸驩，殷道復興。」是其事。云「宋景守心」者，《呂氏春秋·制樂》篇云：「宋景公之時，災惑在心。公懼，召子韋而問焉。子韋曰：『災惑者，天罰也。心者，宋之分野也。禍當於君。雖然，可移於宰相。』公曰：『宰相，所與治國家也，而移死焉，不祥。』子韋曰：『可移於民。』公曰：『民死，寡人將誰為君乎？』寧獨死。子韋曰：『可移於歲。』公曰：『歲害則民饑，民饑必死。為人君而殺其民以自活，其誰以我為君乎？』是寡人之命固盡矣。子毋復言矣。子韋還走，北面再拜曰：『臣敢賀君，天處高而聽卑，君有至德之言三，天必三賞君。』今夕災惑其徙三舍，君延年二十一歲。公曰：『子何以知之？』對曰：『有三善言必有三賞。』災惑三徙舍，舍行七星，星一徙當一年，三七二十一，臣故曰君

延年二十一歲。臣請伏於陛下以司候之。災惑不徙，臣請死。公曰：『可。』是夕，災惑果徙三舍。」是其事也。高宗、宋景皆以德弭災，故云「皆可以德消去也」。云「帝乙慢神震死」者，《史記》云：「帝武乙無道，為偶人謂之天神，與之搏，令人為行，天神不勝，乃僇辱之。為革囊盛血，仰而射之，命曰射天。武乙獵於河渭之間，暴雷，武乙震死。」是其事也，故云「是為不可活」。聲謂活或為道。《禮記·緇衣》引《太甲》曰「天作孽，可違也；自作孽，不可以道」。與《孟子》所引字雖有異而大旨無殊，惟道之與活義訓不同。鄭康成曰：「道，逃也。」

章指：言國必修政，君必行仁。禍福由己，不專在天。言當防患於未亂也。疏

「言當防患於未亂也」○正義曰：《易·既濟》《象傳》云：「君子以思患而豫防之。」老子《德經》云：「其安易持，其未兆易謀，其脆易泮，其微易散。為之於未有，治之於未亂。」

孟子曰：「尊賢使能，俊傑在位，則天下之士皆悅而願立於其朝矣。」注俊，美才出眾者

也。萬人者稱傑。

疏注「俊美」至「稱傑」○正義曰：《鵠

冠子·能天》篇云：「德萬人者謂之俊，德千人者謂之豪，德百人者謂之英。」《史記·屈原賈生傳》《索隱》引《尹文子》云：「千人曰俊，萬人曰傑。」《春秋繁露·爵國》篇云：「故萬人者曰英，千人者曰俊，百人者曰傑，十人者曰豪。」《淮南子·泰族訓》云：「故智過萬人者謂之英，千人者謂之俊，百人者謂之豪，十人者謂之傑。明於天道，察於地理，通於人情，大足以容衆，德足以懷遠，信足以一異，知足以知變者，人之英也。德足以教化，行足以隱義，仁足以得衆，明足以照下者，人之俊也。行足以爲儀表，知足以決嫌疑，廉足以分財，信可使守約，作事可法，出言可道者，人之豪也。守職而不廢，處義而不比，見難不苟免，見利不苟得者，人之傑也。英俊豪傑，各以小大之材處其位，得其宜。」《白虎通·聖人》篇引《禮別名記》云：「五人曰茂，十人曰選，百人曰俊，千人曰英，倍英曰賢，萬人曰傑，萬傑曰聖。」《禮記·月令》正義引《蔡氏辯名記》，宣公十五年《左傳正義》亦引《辯名記》：「辯名」即「別名」也，惟作「倍人曰茂」，「倍選曰俊」。所說各異。東漢人注書：《說文》人部云：「俊，材過千人也。」傑，執也。材過萬人也。高誘注《呂氏春秋·孟秋》《孟夏》兩紀皆云：「才過萬人曰桀，千人曰俊。」而注《功名》

篇則云：「才過百人曰豪，千人曰桀。」注《國策·齊策》又

云：「才勝萬人曰英，千人曰傑。」王逸注《楚辭·大招》云：

「千人才曰豪，萬人才曰傑。」注《九章·懷沙》篇云：「千人

才曰俊，一國高曰傑焉。」鄭注《尚書·皋陶謨》云：「才德過

千人爲俊，百人爲乂。」均無定說。大要皆才美出衆者之名，

故典籍隨舉爲稱，或言「俊傑」，或言「俊乂」，或言「豪傑」，或

言「英傑」。趙氏雖以「萬人者稱傑」，而俊則不言千人，而但

云「美才出衆」也。市廛而不征，法而不廛，則天

下之商皆悅而願藏於其市矣。**注**廛，市宅也。

古者無征，衰世征之。《王制》曰：「市廛而不稅。」

《周禮·載師》曰：「國宅無征。」法而不廛者，當以

什一之法征其地耳，不當征其廛宅也。**疏**注「市廛」

至「宅也」○正義曰：《王制》，《小戴禮記》篇名。鄭氏注

云：「廛，市物邸舍。稅其舍不稅其物。」《載師》，《周禮》地

官之職。注云：「征，稅也。鄭司農云：『國宅，城中宅也。』

無征，無稅也。」玄謂：國宅，凡官所有宮室，吏所治者也。」

《載師》職云：「以廛里任國中之地。」注云：①鄭司農云：

①「注云」，原無，今從沈校據前引《王制》鄭注文例補。

「廛，市中空地未有肆，城中空地未有宅者。」玄謂：廛里者，若今云邑里居矣。廛，民居之區域也。里，居也。「蓋商與民居於國中，皆有廛。商賈所居之廛在市，《王制》：「市廛而不稅」是也。此「國宅」不專指市中之宅，凡民之居與官吏之居，皆可統稱。趙氏以市宅亦在其中，故引以為證。然則「廛而不征」謂商賈居此宅不征其稅，與鄭氏「稅其舍不稅其物」之說不同，故云「古者無征，衰世征之」，謂古者並此舍亦不征稅，稅其舍者，衰世也。《地官·廛人》：「凡珍異之有滯者，斂而入於膳府。」注云：「故書滯或作廛。鄭司農云：

「謂滯貨不售者，官為居之。」①貨物沉滯於廛中不決，民待其直以給喪疾，而不可售賈賤者也。廛謂市中之地未有肆而可居以蓄藏貨物者也。《孟子》曰：市廛而不征，法而不廛，則天下之商，皆悅而願藏於其市矣。謂貨物儲藏於市中而不租稅也，故曰廛而不征；其有貨物久滯於廛而不售者，官以法為居取之，故曰法而不廛。」玄謂：不售而在廛久則將瘦靡腐敗，為買之入膳夫之府，所以舒民事而官不失實。」此先鄭解說「廛而不征」謂貨物藏於此而不征稅，與後鄭異。趙氏蓋本先鄭。《廛人》：「掌斂布、紵布、總布、質布、罰布、廛布而入於泉府」，注云：「廛布者，貨賄諸物邸舍之稅。」後鄭據此，故注《王制》以廛為「稅其舍」，即此「貨賄諸物邸舍之稅」也。但明曰「廛而不征」，是不征即不征此廛之稅。賈公彥疏云：「周則廛有征，上文「廛布」是也，云「不征」者非周法。」蓋趙氏以《周禮》非文王之法，文王治岐，關市不征，故不依《周禮》也。趙氏謂「法而不廛者，當以什一之法，征其地耳，不當征其廛宅」，則是「法而不廛」乃申明上「廛而」所以「不征」之故，謂當以什一之法征其一夫百畝之地，不當征其市中之舍，與先鄭所說亦不同。先鄭以貨物有滯而不售，以法出之，使不久滯于市廛，趙氏所不用也。《序官》：「廛人」注云：「故書廛為壇。杜子春讀壇為廛，說云「市中空地」。

玄謂：廛，民居區域之稱。」賈氏疏云：「《遂人》云「夫一廛，田百畝」及《載師》：「廛里任國中之地」，皆是民之所居區域。又其職有廛布，謂貨賄停儲邸舍之稅，即市屋舍名之為廛，不得為市中空地。」按：杜子春仍兼顧「壇」之義，故以市中空地解之，司農與之同。然廛非壇也。星之次舍為廛，廛猶廛也。故後鄭以為民居區域市物邸舍，商賈貨物宜藏居舍之中，不得諸於空地。趙氏不用空地之說，以為市宅，是也。關譏而不征，則天下之旅皆悅而願出

①「為」，原誤作「而」，今從沈校據《周禮》鄭注改。

於其路矣。**注**言古之設關但譏禁異言、識異服

耳，不征稅出入者也。故《王制》曰：「古者關譏而不征。」《周禮·大宰》曰：「九賦，七曰關市之賦。」

《司關》曰：「國凶札則無關門之征，猶譏。」《王制》謂文王以前也。文王治岐，關譏而不征。《周禮》有征者，謂周公以來。孟子欲令復古去征，使天下行旅悅之也。**疏**注「言古」至「之也」○正義曰：《王制》注

云：「譏，譏異服，識異言。征，亦稅也。《周禮》：『國凶札，則無門關之征，猶譏也。』孔氏正義云：『關，境上門也。譏謂呵察。公家但呵察非違，不稅行人之物。此夏殷法，周則

有門關之征，但不知稅之輕重。若凶年則無稅也，猶須譏禁。』大宰，天官冢宰也。司關，地官職，司貨賄之出入者，掌其治禁與其征廛」，注云：「征廛者，貨賄之稅與所止邸舍也。」關下亦有邸客舍，其出布如市之廛，是《周禮》關市有征也。《周禮》相傳以爲周公所作，故以爲「周公以來」也。「猶

譏」，《周禮》作「幾」，古字通。賈氏疏云：「孟子陳正法，與周異。」閩、監、毛三本「關市之賦」作「之征」，「去征」作「之

征」，並非。耕者助而不稅，則天下之農皆悅而願耕於其野矣。**注**助者，井田什一，助佐公家治

公田。不橫稅賦，若履畝之類。**疏**注「助者」至「之類」

○正義曰：《王制》云「古者公田藉而不稅」，注云：「藉之言借也。借民治公田，美惡取於此，不稅民之所自治也。孟子

曰：『夏后氏五十而貢，殷人七十而助，周人百畝而徹。』則所云古者謂殷時。「借民力，則藉即是助。」「履畝」者，《春秋》宣公十五年「初稅畝」，《公羊傳》云：「初者何？始也。稅

畝者何？履畝而稅也。占者什一而藉。」注云：「時宣公無恩信於民，民不肯盡力於公田，故履踐按行，擇其善畝穀最好者稅取之。」《左傳》云：「初稅畝，非禮也。穀出不過藉，

以豐財也。」注云：「公田之法，十取其一，今又履其餘畝，復十收其一，故哀公曰『二吾猶不足』，遂以爲常。」按：何休、

杜預二說不同，然因民不力於公田，因踐其私田而收其善畝之穀，仍是什一，不爲橫征。若民因有懲，明年加力於公田，

使公田之穀好於私田，則仍收公田之穀，不踐其私田矣。惟於公田之外又收其私田之什一，乃是加賦。趙氏以爲「橫」，

則當如杜說矣。廛無夫里之布，則天下之民皆悅而願爲之氓矣。**注**里，居也。布，錢也。夫，

一夫也。《周禮·載師》曰：「宅不毛者有里布，田不耕者出屋粟。凡民無職事者，出夫家之征。」孟子

欲使寬獨夫，去里布，則人皆樂爲之民矣。氓者，謂其民也。**疏**注「里居」至「民也」○正義曰：《載師》注：

「鄭司農云：『宅不毛者謂不樹桑麻也。布，泉也。孟子曰：『塵無夫里之布，則天下之民皆說而願爲其民矣。故曰宅不毛者有里布，民無職事，出夫家之征。欲令宅樹桑麻，民就四業，則無稅賦以勸之也。』」玄謂：宅不毛者，罰以一里二十五家之泉。空田者，罰以三家之稅粟。民雖有間無職事者，猶出夫稅家稅也。夫稅者，百畝之稅；家稅者，士徒車輦給繇役。」鄭氏注《禮記·檀弓》云：「古者謂錢爲帛布。」韋昭注《國語·周語》云：「錢者，金幣之名，古曰泉，後轉曰錢。」是布爲錢，即爲泉也。江氏永《羣經補義》云：

「凡民居區域闢市邸舍通謂之塵，上文『塵而不征，法而不塵』之塵是市宅，此塵謂民居，即《周禮》『上地夫塵』，『許行願受一塵』之塵，非市宅也。布者，泉也，亦即錢也，非布帛之布。夫布見《周禮·閭師》『凡無職者出夫布』，謂間民爲民傭力者不能赴公旬三日之役，使之出一夫力役之泉，猶後世之僱役錢也。里謂里居，即孟子『收其田里』之里，非二十五家也。里布見《地官·載師》：『凡宅不毛者有里布。』謂有宅不種桑麻，或荒其地，或爲臺榭游觀，則使之出里布，猶

後世凡地皆有地稅也。此皆民之常賦。戰國時一切取之。非傭力之間民，已有力役之征而仍使之別出夫布。宅有種桑麻，有孀婦布縷之征而仍使之別出里布。是額外之征，借大布、里布之名而橫取者。今皆除之，則居塵者皆受惠也。」周氏柄中《辨正》云：「《周禮·閭師》『凡民無職者出夫布』，《載師》『凡宅不毛者有里布』，即此『夫里之布』是已。注中止據《載師》而不及《閭師》。《載師》之『無職事』者是游手浮泛之人，夫家之征所以罰之也。《閭師》之『無職』者則九職中之間民，非游手也。夫布乃其常賦，非罰也。太宰九職，一曰閭民無常職，轉移執事。《載師》之『無職事』者，無職而並不事事也；《閭師》之『無職』者，無常職也，而轉移執事則猶有事也，故但曰『無職』而不曰『無職事』。《閭師》疏：劉氏問：『夫家之征與夫布，其異如何？』鄭答云：『夫家之征者田稅，如今租矣；夫布者，如今算斂在凡賦中者也。』按，鄭氏解兩夫字不同。解夫字不當用一夫百畝之稅之說。夫布者，論丁出錢以爲賦，猶漢口稅之法。漢口率出泉，概施之有職，周則惟施之間民而已。」趙氏佑《溫故錄》云：「夫家之征乃夫稅、家稅二事，本非經所及。趙氏注廣言之也。」段氏玉裁《說文解字注》云：「氓，民也。从民，亡聲。讀若盲。《詩》『氓之蚩蚩』，傳云：『氓，民也。』《方言》亦云：『氓，民

也。《孟子》：「則天下之民皆悅而願爲之氓矣。」趙注：「氓者，謂其民也。」按，此則氓與民小別，蓋自他歸往之民則謂之氓，故字从民亡。《阮氏元《校勘記》云：「《音義》出氓字，云：『或作萌，或作毗。』按，作萌最古，漢人多用萌字。經典內萌多改氓，改毗，如《說文》引《周禮》以興鋤利萌是也。『氓者謂其民也』，閩、監、毛三本同，廖本、孔本、韓本、《考文》古本無『者謂其』三字。按，尋謂字，則經文當本作萌。」翟氏灝《考異》云：「一讀以『天下之民皆悅』斷句。上士商旅農，悉連下『皆悅』二字句，似亦可通。」王氏引之《經傳釋詞》云：「《呂氏春秋·音律》篇注云：『之，其也。』故『爲之氓』《周官·載師》注引作『爲其民』。之可訓爲其，其亦可訓爲之。」信能行此五者，則鄰國之民仰之若父母矣。率其子弟攻其父母，自有生民以來未有能濟者也。**注**今諸侯誠能行此五事，四鄰之民仰望而愛之如父母矣。鄰國之君欲將其民來伐之，譬率勉人子弟使自攻其父母。生民以來，何能以此濟成其所欲者也？**疏**注「今諸」至「者也」○正義曰：《說文》言部云：「信，誠也。」故以誠「釋」信。「仰」之義爲向。自卑向高，自近向遠，皆望也。《孟子·離婁》篇言「仰望而

終身」，則仰之義同於望，故云「仰望」。《廣雅·釋詁》云：「愛，仁也。」仁之於父子云「若父母」，是愛之也。《小爾雅·廣詁》云：「率，勸也。」勸之義與勉同，故以「勉」釋「率」。《爾雅·釋言》云：「濟，成也。」故以「成」釋「濟」。如此，則無敵於天下。無敵於天下者，天吏也。然而不王者，未之有也。**注**言諸侯所行能如此者，何敵之有？是爲天吏。天吏者，天使也。爲政當爲天所使，誅伐無道，故謂之天吏也。**疏**注「言諸」至「吏也」○正義曰：使從吏聲，故吏之義通於使。襄公二十一年《左傳》「使走問於朝」，《釋文》云：「使，本作吏。」段氏玉裁《說文解字》人部注云：「水部：『沮，水吏也。』吏同使。」

章指：言修古之道，鄰國之民以爲父母；行今之政，自己之民不得而子。是故衆夫擾擾，非所常有。命曰「天吏」，明天所使也。**疏**衆夫擾擾○正義曰：《國語·晉語》

云：范文子謂厲公曰：「唯有諸侯，故擾擾焉。」《廣雅·釋詁》云：「擾擾，亂也。」

孟子曰：「人皆有不忍人之心。」

注言人

人皆有不忍加惡於人之心也。先王有不忍人之心，斯有不忍人之政矣。以不忍人之心行不忍人之政，治天下可運之掌上。

注先聖王推

不忍害人之心以行不忍傷民之政，以是治天下，易於轉丸於掌上也。

疏注「易於轉丸於掌上」○正義曰：

《說文》丸部云：「丸，圓也。傾側而轉者。」置丸掌上，其轉

易易也。所以謂人皆有不忍人之心者，今人乍

見孺子將入於井，皆有怵惕惻隱之心。非所

以內交於孺子之父母也，非所以要譽於鄉黨

朋友也，非惡其聲而然也。

注乍，暫也。孺子，

未有知小子也。所以言人皆有是心，凡人暫見小小

孺子將入井，賢愚皆有驚駭之情。情發於中，非為

人也，非惡有不仁之聲名，故怵惕也。

疏注「乍暫」至

「怵惕也」○正義曰：僖公三十三年《公羊傳》云「詐戰不

日」，注云：「詐，卒也。」《廣雅·釋詁》云：「暫，猝也。」《釋

言》云：「乍，暫也。」乍與詐通，卒與猝通。乍、暫、卒三字轉

注也。《說文》子部云：「孺，乳子也。」劉熙《釋名·釋長幼》

云：「兒始能行曰孺子。孺，濡也，言濡弱也。」《禮記·內則》云：「孺子蚤寢晏起」，注云：「孺子，小子也。」始能行而尚無知識，不知井之溺人，故將入井也。《國語·周語》芮良夫云：「猶日怵惕，懼怨之來也。」注云：「怵惕，恐懼也。」《文選·東京賦》云「猶怵惕於一夫」，薛綜注云：「惕，驚也。」驚即駭，「驚駭」猶恐懼也。趙氏解《梁惠王上》篇「隱其無罪」為「痛」。《說文》心部云：「惻，痛也。」《漢書·鮑宣傳》云「豈有肯加惻隱於細民」，注云：「惻，隱，皆痛也。」然則「怵惕惻隱」謂驚懼其人井又哀痛其人井也。以「隱」之義已見前，經文下亦自申明之，言惻隱為仁，故略之耳。《音義》云：「內，本亦作納。」納交於孺子之父母，要譽於鄉黨朋友，皆為人之事，故統之云「非為人」。孔本作「發於中，非為其人也」，無情字，有其字。《呂氏春秋·過理》篇云「臣聞其聲」，《淮南子·修務訓》云「聲施千里」，高誘注並云：「聲，名也。」《禮記·表記》云「先王謚以尊名」，注云：「名者，謂聲譽也。」故以「名」釋「聲」。由是觀之，無惻隱之心，非人也；無羞惡之心，非人也；無辭讓之心，非人也；無是非之心，非人也。**注**言無此四者當若禽獸，非人心耳。為人則有之矣，凡人但

不能演用爲行耳。

疏注「言此」至「行耳」○正義曰：孟

子道性善，謂人之性皆善，禽獸之性則不善也。禽獸之性不善，故無此四者。禽獸無此四者，以其非人之心也。若爲人之心，無論賢愚，則皆有之矣。孟子四言「非人」，乃極言人心必有此四者。趙氏此注，深得孟子之旨，不愧通儒。《三國志·鍾繇傳》注引《先賢行狀》，李膺謂鍾繇曰：「孟子以爲，人無好惡是非之心，非人也。」《禮記·曲禮》注引《孟子》「人無是非之心，非人也」，孔氏正義兼引「人無惻隱之心，非人也」，人無是非之心，非人也」，於句首俱加人字，則四稱「非人」竟爲指斥罵詈之辭，非孟子義。趙氏云「人但不能演用爲行」，正申明人必有此心，惟禽獸無之耳。惻隱之心，仁之端也；羞惡之心，義之端也；辭讓之心，禮之端也；是非之心，智之端也。**注**端者，首也。人皆有仁義禮智之首，可引用之。

疏注

「端首」至「用之」○正義曰：《儀禮·鄉射禮》注云：「序端，東序頭也。」頭，首也。故端爲首。端與耑通。《說文》耑部云：「耑，物初生之題也。」題亦頭也，故《考工記》「輪人鑿端」，注云：「內題方有頭，可由此推及全體。」惠氏士奇《大學說》云：「《大學》致知，《中庸》致曲，皆自明誠也。《中庸》

謂之曲，《孟子》謂之端，在物爲曲，在心爲端。致者，擴而充之也。」戴氏震《孟子字義疏證》云：「仁者，生生之德也。

「民之質矣，日用飲食。」無非人道所以生生者。一人遂其生，推之而與天下共遂其生，仁也。言仁可以賅義，使親愛長養不協於正大之情，則義有未盡，亦即仁有未至。言仁可以賅禮，使無親疏上下之辨，則禮失而仁亦未爲得。且言義可以賅禮，言禮可以賅義。先王之以禮教，無非正大之情；君子之精義也，斷乎親疏上下，不爽幾微。而舉義舉禮可以賅仁，又無疑也。舉仁舉禮可以賅智，智者，知此者也。《易》曰：「立人之道，曰仁與義。」而《中庸》曰：「仁者，人也，親親爲大；義者，宜也，尊賢爲大。親親之殺，尊賢之等，禮所生也。」益之以禮，所以爲仁至義盡也。語德之盛者，全乎智仁而已矣，而《中庸》曰：「智仁勇三者，天下之達德也。」益之以勇，蓋德之所以成也。就人倫日用究其精微之極致，曰仁，曰義，曰禮。合三者以斷天下之事，如權衡之於輕重。於仁無憾，於禮義不愆，而道盡矣。自人道邇之天道，自人之德性邇之天德，則氣化流行，生生不息，仁也。由其生生有自然之條理，觀其條理之秩然有序，可以知禮矣；觀於條理之截然不可亂，可以知義矣。在天爲氣化之生生，在人爲生生之心，是乃仁之爲德也，在天爲氣化推行

之條理，^①在人爲其心知之通乎條理而不紊，是乃智之爲德也。惟條理，是以生生。條理苟失，則生生之道絕。凡仁義對文及智仁對文，皆兼生生、條理而言之者也。」程氏瑤田《通藝錄·論學小記》云：「仁主於愛，與忍相反，故言仁政則曰『以不忍人之心，行不忍人之政』也。凡視聽言動之人於非禮者，皆生於己心之忍，忍則己去仁，己去仁則己去禮，故曰『克己復禮爲仁』。」按：賈誼《新書·道術》篇云：「惻隱憐人謂之慈，反慈爲忍。」不忍人之心即是惻隱之心。惻隱爲仁之端，仁義禮智，四端一貫，故但舉惻隱而羞惡、辭讓，是非即具矣，但有仁之端而義禮智之端即具矣。人之有是四端也，猶其有四體也。有是四端而自謂不能者，自賊者也。**注**自謂不能爲善，自賊害其性，使不爲善也。**疏**「人之」至「體也」○正義曰：四端之有於心，猶四支之有於身，言必有也。毛氏奇齡《贖言補》云：「惻隱之心，仁之端也，言仁之端在心，不言心之端在仁。四德是性之所發，藉心見端，然不可云心本於性。觀性之得名。專以生於心爲言，則本可生道，道不可生本明矣。」**謂其君不能者，賊其君者也。****注**謂君不能爲善而不匡正者，賊其君使陷惡也。凡有四端於我

者，知皆擴而充之矣。若火之始然，泉之始達。苟能充之，足以保四海；苟不充之，不足以事父母。**注**擴，廓也。凡有端在於我者，知皆廓而充大之，若水火之始微小，廣大之則無所不至，以喻人之四端也，人誠能充大之，可保安四海之民，誠不充大之，內不足以事父母。言無仁義禮智，何以事父母也？**疏**注「擴廓」至「母也」○正義曰：

《音義》云：「擴，音郭，字亦作擴，音霍。」王氏念孫《廣雅疏證》云：「《說文》：『擴，滿弩也。』《孫子·兵勢》篇云：『勢如擴弩。』《太平御覽》引《尸子》云：『扞弓轉弩。』《漢書·吾邱壽王傳》：『十賊擴弩』，顏師古注云：『引滿曰擴。』並字異而義同。《孟子·公孫丑》篇『知皆擴而充之矣』，趙氏注云：『擴，廓也。』《方言》云：『張小使大謂之廓。』義亦與擴同。」按：《說文》弓部云：「擴，讀若郭。」郭即廓，《釋名》云：「郭，廓也。廓落在城外。」是也。趙氏本作「擴」，以滿弩之訓於此文不切，故以廓解之，即《說文》「讀若郭」之義。《淮南子·原道訓》云「廓四方」，高誘注云：「廓，張也。」《說文》弓部

① 「天」，原誤作「人」，今據戴震《孟子字義疏證》改。

云：「引，開弓也。」開弓與滿弩義同。趙氏上注云「可引用之」，「引用」即此彊矣。彊亦廣也，下注云「廣大之」即謂「彊而充之」。《淮南子·說山訓》云「近之則鍾聲充」，高誘注云「充，大也。」故以「大」釋「充」，「彊而充之」即引而大之也。《說文》火部云：「然，燒也。」火始燒泉始通，其勢不可遏止，故由微小而無所不至，猶人之有四端，既知擴而充之，則亦無所不至也。惟無所不至，故放諸四海而民皆安保也。《論語·里仁》篇「苟志於仁矣」孔氏注、《毛詩·秦風》「苟亦無信」傳，皆云：「苟，誠也。」《毛詩·小雅》「保艾爾後」，傳云：「保，安也。」「保四海」即安四海之民也。人不能事父母，即是不仁不義，無禮無智。雖愚蒙，豈不知父母之當事？惟賊害其性，遂至不能順於父母。趙氏言「無仁義禮智，何以事父母」，不能事父母，豈尚能保安四海？此言性善之切，可謂通儒矣。

章指：言人之行當內求諸己，以演大
四端，充廣其道。上以匡君，下以榮身也。

孟子曰：「矢人豈不仁於函人哉？矢
人惟恐不傷人，函人惟恐傷人，巫、匠亦然。

故術不可不慎也。**注**矢，箭也。函，鎧也。《周禮》曰：「函人爲甲。」作箭之人其性非獨不仁於作鎧之人也，術使之然。巫欲祝活人。匠，梓匠，作棺欲其蚤售，利在於人死也。故治術當慎，脩其善者也。**疏**注「矢箭」至「爲甲」○正義曰：《方言》云：「箭，自

關而東謂之矢，江淮之間謂之鏃，關西曰箭。《爾雅·釋地》云：「東南之美者，有會稽之竹箭焉。」《太平御覽》引《字林》云：「箭，矢竹也。」箭爲竹名，可爲矢，故矢即名箭也。閩、監、毛三本作「函甲也」，《音義》出鎧字，則鎧是也。武氏億《釋甲》云：「鎧爲甲之通名。《釋名》：『鎧猶塏，堅重之言也。』《禮記》注：『甲，鎧也。』《廣雅》：『函、甲、介，鎧也。』自《周禮·司甲》注「甲，今之鎧也」，世乃有以金制鎧之名。《禮記》疏言古用皮謂之甲，今用金謂之鎧。《書·費誓》正義：「古之作甲用皮，秦漢以來用鐵。鎧、塏二字皆從金，蓋用鐵爲之而因以爲名。《儀禮·既夕禮》「甲冑干箠」，疏：「甲鎧冑兜塏者，古者用皮，故名甲、冑，後代用金，故名鎧、兜塏，隨世爲名故也。」億考之，獨不謂然。鄭氏注「甲今之鎧」者，今蓋以漢制況之，謂漢名甲爲鎧。《詩正義》云：「經典皆謂之甲，後世乃名爲鎧，箋以今曉古。」此疏所指亦謂以

漢制況也。其實用皮用金，在古並有此制。《管子·地數》篇：「葛盧之山發而出水，金從之，蚩尤受而制之，以爲劍鎧矛戟。」蚩尤，造兵之始者，已以金作鎧。鎧所由來遠矣，非自後世爲然。春秋時，此制益廣，車馬被甲，皆得用金。《鄭風·駟介旁旁》，傳云：「介，甲也。」《秦風·猋猋孔羣》，箋云：「猋，淺也，謂以薄金爲介之札。介，甲也。」僖二十八年《傳》：「駟介百乘」，成二年《傳》：「不介馬而馳之」，注：「介，甲也。」是馬亦用金爲鎧。定八年《傳》：「主人焚衝」，注云：「衝，戰車。」考《淮南子·覽冥訓》：「大衝車」，高氏注云：「衝車，大鐵著其轅端。馬被甲，車被兵，所以衝於敵城也。」是車亦用金爲鎧。昭二十五年《傳》：「季氏介其雞，邱氏爲之金距。」《呂氏春秋·察微》篇注：「介，甲也。作小鎧著雞頭。」鄭衆亦云：「介，甲。爲雞著甲。」見《儀禮·疏》。按，此介與金距對，則小鎧亦以金爲之。此又可爲證，以見當時鬪雞之戲尚如此，蓋必有所仿效爲然。其人得用金爲鎧者，《吳越春秋》：「王僚乃被棠鐵之甲。」又《戰國策》：「當敵則斬堅甲盾鞬鑿鐵幕」，劉氏云：「謂以鐵幕爲臂腫之衣。」《呂氏春秋·貴卒》篇：「趙氏攻中山，中山之人多力者，曰：吾兵鴻衣鐵甲，操鐵杖以戰，而所擊無不碎，所衝無不陷。」此又自春秋至戰國，世變益甚，所備益密。則甲用金與革，古蓋

兼之，而諸說妄爲區分，其義非也。「函人爲甲」，見《考工記》。○注「巫欲」至「死也」○正義曰：《周禮·春官·男巫》：「掌望祀、望衍、授號，旁招以茅，冬堂贈，無方無算；春招弭以除疾病。」注云：「衍讀爲延。望祀謂有牲粢盛者。延，進也，謂但用幣致其神。二者詛祝所授類造攻說禴祭之神號，男巫爲之招。杜子春云：「堂贈謂逐疫也。」招，招福也。弭，讀爲敕。敕，安也，安凶禍也。招，敕皆有祀衍之禮。」祝號掌於大祝小祝而授男巫，是祝之事巫爲之也。逐疫，祝於未病時；除疾病，祝於已病時。皆所以求活人也。惠氏士奇《禮說》云：「古者巫彭初作醫，故有祝由之術，移精變氣以治病。《春官》大祝、小祝、男巫、女巫皆傳其術焉。大祝言句讀禱，代受眚戕；小祝將事候禳，求遠羣疾；男巫祀、衍、旁招，弭寧疾病；女巫歲時釁浴，祓除不祥；故曰病者寢席，醫之用針石，巫之用糝藉，所救鈞也。」梓人、匠人並見《考工記》，皆不言作棺，而官室屬之匠人，棺槨亦官室之類。《地官·鄉師》：「及葬，執蠹以與匠師御匱而治役。及窆，執斧以涖匠師。」注云：「匠師主衆匠。」又云：「匠師主豐碑之事。」《檀弓》云：「公室視豐碑，三家視桓楹。」注云：「豐碑，天子斲大木爲之，形如石碑，於槨前後四角樹之。桓楹，斲之形如大楹耳，四植謂之桓。」窆內之碑，匠師主之，則

棺槨亦匠人所爲明矣。故《儀禮·既夕記》云：「既正柩，賓出，遂匠納車于階間。」注云：「遂匠，遂人、匠人也。匠人主載柩。」《雜記》云：「匠人執羽葆御柩。」襄公四年《左傳》：「定姒薨。初，季孫爲己樹六檟於蒲圃東門之外，匠慶請木。」請木則棺爲匠所作。惟匠人作棺，故載柩、御柩之事，皆匠人主之。此國之職事，而士大夫之棺亦必匠人所作，故孟子爲母治棺，使虞敦匠事。此云「作棺欲其蚤售」者，則主買棺者而言。蓋士庶之家不能自治，必市於匠人；而匠人即以棺爲售。閻氏若璩《釋地三續》云：「《漢書·刑法志》引諺曰：『鬻棺者欲歲之疫，非憎人欲殺之，利在於人死也。』即《孟子》『巫匠亦然』意。」孔子曰：「里仁爲美。擇不處仁，焉得智？」注里，居也。仁，最其美者也。夫簡擇不處仁爲不智。疏注「簡擇不處仁」○正義曰：《爾雅·釋詁》云：「東，擇也。」《說文》手部云：「擇，東選也。」東部云：「東，分別簡之也。」東，古簡字。夫仁，天之尊爵也，人之安宅也。莫之禦而不仁，是不智也。注爲仁則可以長天下，故曰天所以假人尊爵也，居之則安。無止之者而人不能知人是仁道者，何得爲智乎？疏注「爲仁」至「智乎」○

正義曰：《易·文言傳》云「元者，善之長也」，「體仁足以長人」，故爲仁可以長天下也。假，如《漢書·儒林傳》「假固利兵」之假，顏師古注云：「給與也。」謂天以仁給與人，使得長人也。《爾雅·釋言》云：「宅，居也。」「安宅」是安居，故云「居之則安」。禦，止也。「莫之禦」是「無止之者」也。智屬知，此言「不仁，是不智」，故云「不能知人是仁道」也。不仁不智，無禮無義，人役也。注若此，爲人所役者也。人役而耻爲役，由弓人而耻爲弓，矢人而耻爲矢也。注治其事而耻其業者，惑也。疏注「惑也」○正義曰：智者不惑，上云「不仁，是不智」，故云「惑」。阮氏元《校勘記》云「矢人而耻爲矢也」，各本同，孔本上有由字。按《音義》「由反手」下云：「下文由弓人由矢人義同。」是《音義》本此文上有由字。如耻之，莫如爲仁。注如其耻爲人役而爲仁，仁則不爲役也。仁者如射。射者正己而後發。發而不中，不怨勝己者，反求諸己而已矣。注以射喻人爲仁，不得其報，當反責己仁恩之未至。疏「仁者」至「己矣」○正義曰：《禮記·射義》云：「射者，仁之道也。射求

正諸己，己正而後發。發而不中則不怨勝己者，反求諸己而已矣。《孟子》此文蓋有所本。首言術不可不慎，術承上矢、函、巫、匠，則指藝術而言。藝術，人之所習也。習於爭戰則糜爛其民，如矢人之不仁矣。所以習於爭戰者，以欲勝人也。故此以射爲喻而戒其不怨勝己也。不特諸侯之習爭戰也，推之士庶人，惟知利己損人，則時以伎害爲心以爭勝於人，此不能勝，必多方乞助於他人。役於彼以求伸於此，心日益刻，氣日益卑。苟始以正己，繼以反求，本無傾軋之心，無事屈身之辱。儒者求勝以學，市人求勝以利，朋黨阿比，托一人以爲庇，其趨同也。

章指：言各治其術，術有善惡；禍福之來，隨行而作。耻爲人役，不若居仁，治術之忌，勿爲矢人也。

孟子曰：「子路人告之以有過則喜，禹聞善言則拜。」**注**子路樂聞其過，過而能改也。

《尚書》曰：「禹拜讜言。」**疏**注「尚書」至「讜言」○正義曰：段氏玉裁《說文解字注》云：「咎繇謨」曰「禹拜昌言」，

今文《尚書》作「黨」。趙注《孟子》引《尚書》「禹拜黨言」，《逸周書·祭公解》「拜手稽首黨言」，《張平子碑》「黨言允諧」，《劉寬碑》「對策嘉黨」，皆「昌言」，字之假借也。至於「讜言」，亦見漢人文字。《字林》「讜言，美言也」。此又因「黨言」而爲之言傍，謂之正俗字可。盧氏文弼校《逸周書·祭公解》云：「黨，讜古字通。」荀子·非相篇「博而黨正」，**注**：「謂直言也。」大舜有大焉，善與人同。舍己從人，樂取於人以爲善。**注**大舜，虞帝也。孔子稱曰「巍巍」，故言「大」。舜有大焉，能舍己從人，故爲大也。於子路與禹同者也。**疏**注「大舜」至「者也」○正義曰：阮氏元《校勘記》云：「虞帝也」，閻、監、毛三本，孔本、韓本同。廖本、《考文》古本作「虞也」。按，當本作「虞舜也」，淺人或刪舜，或改爲帝。《論語·子罕》篇云：「巍巍乎，舜禹之有天下也而不與焉！」又云：「大哉堯之爲君也，巍巍乎！」是孔子稱舜「巍巍」，而巍巍則爲大也。云「於子路與禹同」者，趙氏以「善與人同」之人指子路與禹。謂舜之善在舍己從人，而舍己從人，此舜之善與子路、禹同者也。經文「善與人同」在上，注倒言之耳。按：《周易·同人》《彖傳》云：「同人，柔得位得中而應乎乾，曰同人。惟君

子惟能通天下之志。《序卦傳》云：「物不可以終否，故受之以同人。與人同者，物必歸焉。」同即通也。上下交而其志同，所謂「善與人同」也。《禮記·中庸》云：「舜其大知矣乎！舜好問而好察邇言，隱惡而揚善。執其兩端，用其中於民。」其兩端，人之兩端也。執兩而用中，則非執一而無權。執一無權則與人異，執兩用中則與人同。執一者，守乎己而不能舍己，故欲天下人皆從乎己，通天下之志者，惟善之從，故舍己從人，樂取於人以爲善。《意林》引《尸子》云：「見人有善如己有善，見人有過如己有過；此虞氏之盛德也。」《禮記·大學》篇引《秦誓》云：「斷斷兮無他技，其心休焉，其如有容焉。人之有技，若己有之；人之彥聖，其心好之；不啻若自其口出。」注云：「他技，異端之技也。若己有之，不啻若自其口出，皆樂人有善之甚也。」樂人有善，則無他技；無他技，是不爲異端；不爲異端，是善與人同也。「舍己」即子路之「改過」；「從人」即禹之「拜昌言」。聖賢之學，不過「舍己從人」而已。孟子闢楊墨，以其執一，此章發明專己執一之非也。自耕稼陶漁以至爲帝，無非取於人者。取諸人以爲善，是與人爲善者也。故君子莫大乎與人爲善。」**注**舜從耕於歷

山及其陶漁，皆取人之善謀而從之，故曰莫大乎與人爲善。**疏**注「舜從」至「爲善」○正義曰：《史記·五帝本紀》云：「舜耕歷山，歷山之人皆讓畔；漁雷澤，雷澤上人皆讓居；陶河濱，河濱器皆不苦窳。一年所居成聚，二年成邑，三年成都。」此舜「耕稼陶漁」之事也。《爾雅·釋詁》云：「謨，謀也。」《書序》云：「皋陶矢厥謨，禹成厥功，帝舜申之，作《大禹》、《皋陶謨》、《棄稷》。」今《大禹》、《棄稷》篇不存，唯存《皋陶謨》。禹既拜皋陶之言，帝乃命「禹亦昌言」，又曰「迪朕德，時乃功惟敘」，及「皋陶拜手稽首颺言」，廣元首叢脞之歌，而帝且拜而俞之，可爲舜取善謀之證，乃此其「爲帝」時也。孟子則邇言「自耕稼陶漁以至於帝，無非取於人者」，然則舍己從人之道，自天子以至庶人，無不當如是。「取諸人以爲善，是與人爲善者也。」「與人爲善」猶云「善與人同」。上言「善與人同」，而下申言其所以同者爲「舍己從人」。舍己從人即是「樂取于人以爲善」，是取人爲善，即是與人同爲此善也。「莫大乎與人爲善」，此舜之「舍己從人」所以大也。

章指：言大聖之君，由采善於人，故曰「計及下者無遺策，舉及衆者無廢功」

也。**疏**「由采善於人」○正義曰：董子《春秋繁露》云：「《春秋》采善不遺小。」○「故曰」至「功也」○正義曰：桓寬《鹽鐵論·刺驕》篇云：「謀及下者無失策，舉及衆者無頓功。」周氏廣業云：「《文選》注有「計及下」句，豈此二語皆《外書》之文，而趙稱之歟？」

孟子曰：「伯夷非其君不事，非其友不友。不立於惡人之朝，不與惡人言，立於惡人之朝，與惡人言，如以朝衣朝冠坐於塗炭。推惡惡之心，思與鄉人立，其冠不正，望望然去之，若將浼焉。」**注**伯夷，孤竹君之長子，讓國而隱居者也。塗，泥；炭，墨也。浼，污也。思，念也。與鄉人立，見其冠不正，望望然，慙愧之貌也，去之，恐其污己也。**疏**注「伯夷」至「己也」○正義曰：

《史記·伯夷列傳》云：「伯夷、叔齊，孤竹君之二子也。父欲立叔齊。及父卒，叔齊讓伯夷，伯夷曰『父命也』，遂逃去。叔齊亦不肯立而逃之。國人立其中子。於是伯夷、叔齊聞西伯昌善養老，盍往歸焉。及至，西伯卒，武王載木主，號爲

「文王」，東伐紂。伯夷、叔齊叩馬而諫曰：「父死不葬，爰及干戈，可謂孝乎？以臣弑君，可謂仁乎？」左右欲兵之。太公曰：「此異人也。」扶而去之。武王已平殷亂，天下宗周，而伯夷、叔齊耻之，義不食周粟，隱於首陽山，采薇而食之，及餓且死。此「讓國而隱居」之事也。《毛詩·角弓》：「如塗塗附」，傳云：「塗，泥也。」《說文》火部云：「炭，燒木未灰也。」灰，死火餘灰也。从火又。又，手也。火既滅，可以執持。「炰，燭炰也。」炰，火餘也。《廣雅·釋詁》云：「炭，炰也。」然則炭爲燒木已炰之名，但未成死灰而已無火矣。木經火燒未灰，其黑能污白，故趙氏以「墨」釋之。《滕文公上》篇「面深墨」，注云：「墨，黑也。」王氏鳴盛《尚書後辨》云：「炭與塗聯言，是無火之黑炭，非如《左傳》『廢於爐炭』之炭。」周氏柄中《辨正》云：「若是炭火，豈必朝衣朝冠而後不坐哉？趙氏云『塗，泥；炭，墨』，則非炭火明矣。」王氏念孫《廣雅疏證》云：「醜，污也。《方言》：『汜，浼，潤，汙，汙也。自關而東或曰汙，或曰汙。東齊海岱之間或曰浼，或曰潤。』汙與汙同。《孟子·公孫丑》篇『若將浼焉』，趙岐注云：「浼，污也。」丁公著音漫。《莊子·讓王》篇云：「欲以辱行漫我。」《呂氏春秋·離俗覽》：「不漫於利」，高誘注云：「漫，污也。」漫，浼並與醜通。《莊子·讓王》篇云：「其並乎

周以塗吾身也，不如避之以絜吾行。」《呂氏春秋·誠廉》篇塗作漫。《漢書·王尊傳》云：「塗污宰相，摧辱公卿。」污、塗、漫義相同，故污謂之漫，亦謂之塗。塗牆謂之墁，亦謂之圻矣。《爾雅·釋詁》云：「念，思也。」是「思」爲「念」也。《禮記·問喪》云：「其送往也，望望然，汲汲然，如有迫而弗及也。」注云：「望望，瞻望之貌也。」此云「慚愧」，趙氏蓋讀爲「惘惘」。惘惘即罔罔，《文選·西征賦》注云：「惘猶罔罔，失志之貌。」失志故慚愧也。按：《毛詩·大雅》「思皇多士」，傳云：「思，辭也。」此「思與鄉人立」，思當亦語辭，非有義也。是故諸侯雖有善其辭命而至者，不受也。不受也者，是亦不屑就已。**注**屑，絜也。《詩》云：「不我屑已。」伯夷不絜諸侯之行，故不忍就見也。殷之末世，諸侯多不義，故不就之，後乃歸西伯也。**疏**注「屑絜」至「伯也」○正義曰：絜與潔通。《楚辭·招魂》篇云「朕幼清以廉潔兮」，注云：「不污曰潔。」引《詩》者，《邶風·谷風》第三章，已作以，古已，以通。《毛傳》云：「屑，潔也。」箋云：「言君子不復潔用我。」蓋，不我屑以，謂不以我爲潔而用我也，此「不屑就」謂不以諸侯爲潔而就之也。言「不忍就見」者，《說文》心部云：「忍，能也。」

能即耐，故《廣雅·釋言》云：「忍，耐也。」既以爲汙，故不耐就之矣。《毛詩·大雅·蕩》篇云：「文王曰咨，咨女殷商，如蜩如蟴，如沸如羹，小大近喪，人尚乎由行，內艱於中國，單及鬼方。」此言商紂失道，其艱然惡行延及中國之外，至於遠方諸侯。是當時諸侯皆化于紂之不善，多黨紂而爲暴亂大惡，所謂詢爾仇方，如虞、芮未質成之先，則爭田而訟，此不義之小者。文王所伐有犬戎、密須、阮徂、共、耆、邶、孟莒等，皆不義之國，不獨崇侯虎蔑侮父兄，不敬長老，聽獄不中，分財不均，百姓盡力，不得衣食也。故云：殷之末世，諸侯多不義。」柳下惠不羞汙君，不卑小官。進不隱賢，必以其道；遺佚而不怨，阨窮而不憫。故曰：「爾爲爾，我爲我。」雖袒裼裸裎於我側，爾焉能浼我哉？」**注**柳下惠，魯公族大夫也。姓展，名禽，字季，柳下是其號也。進不隱己之賢才，必欲行其道也。憫，憊也。二云善己而已，惡人何能汙我也？**疏**遺佚而不怨，阨窮而不憫。○正義曰：阮氏元《校勘記》云：「《音義》出『遺佚』，云：『或作迭，或作失，皆音逸。』《音義》出『阨窮』，云：『本亦作厄。』按：《說文》兔部云：「逸，失也。」人部云：「佚，佚民也。」逸、佚、失

三字古通。此云「遺佚」，即遺失也。柳下惠賢人，而魯不能得之，是遺失之也。《一切經音義》引《蒼頡篇》云：「厄，困也。」《漢書·翟義傳》《集注》引晉灼云：「厄，古厄字。」「厄窮」即困窮，由遺佚至於困窮也。《文選》嵇康《絕交書》注引《孟子》「厄字作「厄」。○「袒楊裸程」○正義曰：段氏玉裁《說文解字注》云：「但，楊也。衣部曰：「楊者，但也。古「但楊」字如此。袒則訓衣縫，今之綻裂字也。今經典凡「但楊」字皆改爲「袒楊」矣。衣部又云：「羸者，但也。」「程者，但也。」《釋訓》、毛傳皆曰：「袒楊，肉袒也。」肉袒者，肉外見無衣也。引申爲徒。凡曰徒曰但，皆一聲之轉，空也。」王氏念孫《廣雅疏證》云：「羸、程、徒、楊、袒也。羸者，《說文》：「羸，袒也。」僖公二十二年《左傳》「欲觀其裸」，《王制》「羸股肱」，《釋文》「羸本又作羸」，《大戴禮·天圓》篇「唯人爲僕匈而生也」，《史記·陳丞相世家》「裸身而佐刺船」，並字異義同。羸之言露也，《月令》「中央土，其蟲裸」，鄭注云：「物象露見不隱藏，虎豹之屬恒淺毛。」《荀子·蠶賦》「有物於此，儼儼兮其狀」，楊倞注云：「儼儼，無毛羽之貌。」義並與羸同。程者，《說文》「程，袒也。」《孟子·公孫丑》篇云：「雖袒楊裸程於我側。」程之言呈也，《方言》：「褌衣無袍者，趙魏之間謂之程衣。」義亦相近也。徒與袒一聲之轉也。《韓非子·

初見秦《篇》云：「頓足徒楊。」《韓策》云：「秦人捐甲徒程以趨敵。」楊者，《說文》：「楊，袒也。」凡去上衣見楊衣謂之楊，或謂之袒楊。《玉藻》「裘之楊也，見美也」，《內則》「不有敬事，不敢袒楊」，是也。其去衣見體，亦謂之袒楊。《鄭風·太叔于田》篇「檀楊暴虎」，《爾雅》云「檀楊肉袒，是也。檀與袒同。」毛氏奇齡《經問》云：「沈玉亮問：《內則》云：「不有敬事，不敢袒楊。」夫「袒楊裸程」見於《孟子》，此大不敬之事，乃以袒楊屬敬事。鄭康成注則云「父黨無容」，謂居父之側不事容飾。則袒與楊有何容飾？經與注皆不可解。曰：往讀《樂記》云「周旋裼襲，禮之文也」，又《玉藻》云「不文飾也不裼」，又云「裘之裼也，見美也。君在則裼者，盡飾也」。此所爲裼，謂裼衣裼裘，使美見於外，正文飾之事，與《孟子》袒楊穢褻截然不同。袒楊見美，本爲文飾，而即以之爲敬君之事，此正與「不有敬事，不敢袒楊」兩相發明。蓋袒楊者，事君之敬，不敢袒楊者，事父母之情也。然則何以同一袒楊，而一以爲褻，一以爲敬？曰：袒楊本不同，有去衣之袒楊，有加衣之袒楊。去衣之袒楊，如《射禮》「袒決」，《喪禮》「袒括髮」，《鄭詩》「袒楊暴虎」，《郊特牲》「肉袒割牲」，《左傳》「鄭伯肉袒羣羊」，《史記·微子世家》「面縛肉袒」，俱是也。此脫衣見體，不必皆敬事也。若加衣之袒楊，則《衛

風《衣錦綢衣》、「裳錦綢裳」，謂夫人衣錦，必加單衣於其上，謂之楊衣。但又加一衣，袒而不襲，則其美見焉。又有楊裘，如狐白加錦衣，狐青加緇衣，狐黃加黃衣，羔裘加緇衣，皆加單衣於裘上。但外又加一衣，袒則楊之而美見，襲則揜之而美不見。《檀弓》所云「襲裘而弔」、「楊裘而弔」是也。去衣之袒楊爲襲，加衣之袒楊爲敬，明有分別矣。」○注「柳下」至「我也」①○正義曰：《春秋釋例·世族譜》云：「展氏，司空無駭，公子展之孫。魯公族夷伯，展氏祖父。展禽食邑柳下。」隱公八年《左傳》云：「無駭卒，公命以字爲展氏。」注云：「無駭，公子展之孫，故爲展氏。」僖公十五年《左傳》云：「震夷伯之廟，罪之也。於是展氏有隱惠焉。」注云：「夷伯，魯大夫展氏之祖父。」二十六年《左傳》云：「公使展喜犒師，使受命於展禽。」注云：「柳下惠。」《國語·魯語》云：「齊孝公來伐，臧文仲欲以辭告，問於展禽，對曰：『獲聞之。』」注云：「展禽，魯大夫展無駭之後柳下惠也。字季禽。獲，展禽之名也。」是「爲魯公族大夫」也。又《魯語·海鳥爰居》篇云「文仲聞柳下季之言」，注云：「柳下，展禽之邑。季，字也。」《莊子·盜跖》篇稱「孔子與柳下季友」，《國策·齊策》顏觸對齊宣王亦稱「秦攻齊，令有敢去柳下季壘五十步而樵採者」，則季爲字也。《文選·陶徵士誄》注引鄭

氏《論語》注云：「柳下惠，魯大夫展禽。食采柳下，謚曰惠。」《淮南子·說林訓》「柳下惠見鉞」，高誘注云：「柳下惠，魯大夫展無駭之子，名獲。字禽。家有大柳樹，惠德，因號柳下惠。一曰：柳下，邑。」柳下有此二說，趙氏同高前說，以爲號也。號如《史記》「呂尚號曰太公望」，《荀子》「南郭惠子居南郭，因以爲號」，是也。惟名獲字季，而趙氏以爲名禽字季，未知所本。孔氏《左傳正義》云「季是五十字，禽是二十字」，是也。隱，藏也。以，②用也。「不隱己之賢才」謂不肯自藏晦其賢才也，「必以其道」是必用其道，即是必欲行其道也。《韓非子·難三》云：「故羣公公正而無私，不隱賢，不進不肖。」《鹽鐵論·刺權》篇云：「受祿以潤賢，非私其利；見賢不隱，食祿不專；此公叔之所以爲文，③魏成子之所以爲賢也。」《潛夫論·明闇》篇云：「且凡驕臣之好隱賢也，既患其正義以繩己矣，又耻居上位而明不及下，尹其

①「也」，原作「邪」，合於宋十行、閩、監、毛等本，今據本書及阮校所述廖、孔、韓等本注文改。

②「以」，據注文當作「行」，下「必以其道」同。然焦疏確依「以」字疏釋，未詳所本。

③「叔」，原誤作「祿」，今從沈校據《鹽鐵論》改。

職而策不出於己。」此「隱賢」謂隱蔽賢人，與趙氏義異。《淮南子·主術訓》云「年衰志憊」，注云：「憊，憂也。」《漢書·佞幸·石顯傳》「憂滿不食」，注云：「滿，讀曰懣。」《說文》心部云：「懣，懣也。」《鬼谷子》云：「憂者，閉塞而不泄也。」然則懣即憂悶，凡憂悶不能泄則憤，故懣又訓憤也。「善己而已」解「我爲我」，「惡人何能污我」，①以「惡人」解「袒楊裸裎」之人。故由由然與之偕而不自失焉，援而止之而止。援而止之而止者，是亦不屑去已。」**注**由由，浩浩之貌。不憚與惡人同朝並立。偕，俱也。與之儷行於朝何傷？但不失己之正心而已耳。援而止之，謂三紂不暫去也。是柳下惠不以去爲潔也。**疏**注「由由」至「潔也」○正義曰：《廣雅·

釋訓》云：「浩浩，油油，流也。」由與油通，故以「由由」爲「浩浩」。趙氏解「浩然之氣」爲「大氣」，注「予然後浩然有歸志」云：「浩然，心浩浩有遠志也。」遠與大義同。《楚辭·懷沙》云「浩浩沅湘」，王逸注云：「浩浩，廣大貌。」是也。此「由由」爲「浩浩」，亦謂其不似伯夷之隘，而寬然大而能容也。乃油油，本新生之狀，詳見前「油然作雲」。而《禮記·玉藻》云「三爵而油油然」，注云：「油油，悅敬貌。」《史記·微子世

家》云「禾黍油油」，《索隱》云：「油油，禾黍之苗光悅貌。」「油油」爲悅，故《韓詩外傳》引《萬章》「由由然不忍去也」作「愉愉然不去也」。《大戴記·文王官人》云：「喜色由然以生。」由爲生，亦爲喜。喜悅，生之象也；流動，生之機也。水生則流，物生則悅。禾黍之油油，猶云木欣欣而向榮也。《列女傳·賢明》篇云：「柳下惠處魯，三黜而不去，憂民救亂，妻曰：『無乃瀆乎？』」柳下惠曰：「油油之民將陷於害，吾能已乎？且彼爲彼，我爲我，彼雖裸裎，安能污我？」油油然與之處，仕於下位。其妻誅曰：「夫子之不伐兮，夫子之不竭兮！夫子之信誠而與人無害兮！屈柔從俗，不强察兮！蒙耻救民，德彌大兮！雖遇三黜，終不蔽兮！愷悌君子，永能厲兮！嗟乎惜哉，乃下世兮！庶幾遐年，今遂逝兮！嗚呼哀哉，魂神泄兮，夫子之謚，宜爲惠兮！」門人從之以爲誄。此與《孟子》相表裏。兩言「油油」，其云「油油之民」即謂此「生生之民」，與下「將陷於害」相貫。害則將戕其生矣，故憂之而救之。惟憂民救亂之心切，故不憚委蛇容忍，周旋補救於其間，所謂「進不隱賢，必行其道」，謂不藏此憂民救

①「污」下，原有「於」字，合於宋十行、閩、監、毛等本，今據本書及阮校所述廖、孔、韓等本改。

亂之才，欲行此蒙耻救民之道也。推此，裸裎之人即害民之人，彼自害民，我自救民，所爲「爾爲爾，我爲我」也。因其人害民而潔身遠去，則不與之偕；因其人害民而詭隨阿附，則與之偕而自失。惟惠則油油然救斯民，全其生者。與此害民之人並處於朝，彼焉能挽我？蓋我染其所爲而附之，則彼能挽我，我以救民者補救挽回其害，則與之偕而不自失，彼焉能挽我哉？不自失，所以不能挽，必行其道，所以三黜不去。以兩「油油」相例，則油油即由由，由由即生生矣。趙氏不解「袒褐裸裎」四字而云「與惡人同朝」。即使脫衣露體，何致遂爲惡人？且惡人居朝，亦豈脫衣露體？則趙氏明本《列女傳》爲說，以此袒褐裸裎即指陷害斯民之人，故以一「惡」字明之。《管子·七臣七主》篇云：「春無殺伐，無割大陵，保大衍。」注云：「保謂焚燒，令蕩然俱盡。」《周禮·大司徒》「以虎豹爲羸物」，《列子》「以豹爲羸」，裎即裸裎也。然則柳下惠所云「裸裎」，假借脫衣赤體以喻害民者之割剝，猶《管子》以焚燒爲保也。《荀子·議兵》篇云：「仁人之兵，不可詐也。彼可詐者，怠慢者也，路賈者也。」注云：「路，暴露也。賈讀爲袒，謂上下不相覆。」「露袒」與「怠慢」並言，亦假借之言矣，故爲惡人也。若徒以赤體之人在側而以爲「焉能挽我」，此即尋常之人，亦豈見有爲赤體之人

挽者？無救民行道之心，援之即止，黜之不去，何以爲柳下惠哉？後世秉國者，一言未合，乞骸而退，以爲潔身去亂，不知執一己倖直之名而以軍國生民之重一任諸羣小之爲，莫或救止，則亦豈得爲潔哉？故惠不以去爲潔，而悠游下位，足爲以矯潔爲高者示之鵠也。孟子舉一伯夷以戒人之輕進，舉一柳下惠以戒人之輕退，豈徒然哉？阮氏元《校勘記》云：「謂三黜」，閩、監、毛三本同。廖本、孔本、韓本黜作紕，是。《音義》出紕字。孟子曰：「伯夷隘，柳下惠不恭。隘與不恭，君子不由也。」**注**伯夷隘，懼人之污來及己，故無所含容，言其太隘狹也，柳下惠輕忽時人，禽獸畜之，無欲彈正之心，言其大不恭敬也。聖人之道，不取於此，故曰「君子不由」也。先言二人之行，孟子乃評之。**疏**注「伯夷」至「評之」○正義曰：《禮記·禮器》云「君子以爲隘矣」，注云：「隘猶狹陋也。」《音義》云：「隘，或作阨，或作阨，並烏懈切。」《文選·吳都賦》「邦有湫阨」，劉逵注云：「阨，小也。」「湫阨」即「湫隘」，小猶狹也。《文選》注引晉綦母邃《孟子》注云：「隘謂疾惡太甚，無所容。不恭謂禽獸畜人是不敬。然此不爲褊隘，不爲不恭。」此解「隘」、「不恭」與趙氏同。而其不同趙

氏者，趙氏謂伯夷之不屑就爲「隘」，柳下惠之不屑去爲「不恭」，以「君子不由」爲聖人不取。由，用也。取，亦用也。然孟子以夷爲聖之清，惠爲聖之和，夷、惠既是聖人，則隘、不恭聖人不由，不得謂夷、惠爲隘、不恭，故綦母邃易趙氏義云：「此不爲褊隘，不爲不恭。」此字指夷之「不屑就」、惠之「不屑去」，謂如是爲隘如是爲不恭，若謂伯夷隘、柳下惠不恭，則伯夷、柳下惠皆君子也，隘與不恭君子所不爲，則夷不爲隘，惠不爲不恭也。《後漢書·黃瓊傳》李固《遺瓊書》云：「君子謂伯夷隘，柳下惠不恭，故傳曰：『不夷不惠，可否之間。』」趙氏之義固有所本矣。

章指：言伯夷、柳下惠，古之大賢，猶有所闕。介者必偏，中和爲貴，純聖能然。君子所由，堯舜是尊。

疏

「介者必偏」○正義

曰：《文選》注引者作然，《音義》云：「介者，丁云：『字多作分，誤也。』」

姪廷琮廷弼校字

孟子正義卷八

江都縣鄉貢士焦循撰集

孟子卷第四

公孫丑章句下凡十四章。

孟子曰：「天時不如地利，地利不如人和。三里之城，七里之郭，環而攻之而不勝。夫環而攻之，必有得天時者矣。然而不勝者，是天時不如地利也。」**注**天時謂時日支干、五行王相、孤虛之屬也；地利，險阻城池之固也；人和，得民心之所和樂也。環城圍之，必有得天時之善處者。然而城有不下，是不如地利。**疏**「天時」至

「人和」○正義曰：《尉繚子·戰威》篇云：「故曰天時不如地利，地利不如人和。聖人所貴，人事而已。」又《武議》篇引此二句，亦斷之曰「古之聖人，謹人事而已」。翟氏灝《考異》云：「尉繚與孟子同時，兩述斯言，皆以聖人稱之。《荀子·王霸》篇亦云：『上不失天時，下不失地利，中得人和。』斯言也，孟子之前應見古別典。」○「三里」至「利也」○正義曰：臧氏琳《經義雜記》云：①「《晉書·段灼傳》云：『臣聞天時不如地利，地利不如人和。三里之城，五里之郭，圓圍而攻之，有不剋者，此天時不如地利。城非不高，池非不深，殺非不多，兵非不利，委而去之，此地利不如人和。然古之王者非不先推恩德，結固人心。人心苟和，雖三里之城，五里之郭，不可攻也；人心不和，雖金城湯池，不能守也。』此本《孟子》。今《公孫丑下》作『三里之城，七里之郭』，疑誤也。郭爲外城，猶棹爲外棺，開廣二里已不爲狹，若城三里而郭七里，是外城反過倍於內城矣。外城既有七里，內城又當不止三里。段兩言『五里之郭』，必非誤。」按：《戰國策·齊策》貂勃云「三里之城，五里之郭」，田單又云「五里之城，七里之郭」，皆指即墨而言。其城郭之小，七里五里，固未可拘

①「琳」，原作「玉林」，今從沈校據全書文例改。

也。閻氏若璩《釋地》又續云：「《左傳》疏曰：『天子之城方九里，諸侯禮當降殺，則知公七里，侯伯五里，子男三里。』」《尚書大傳》云：「古者七十里之國，三里之城。」然則孟子蓋謂伯子男之城也。《尉繚子·天官》篇云：「今有城，東西攻不能取，南北攻不能取。四方豈無順時而乘之者耶？不能取者，城高池深，兵器備具，財穀多積，豪士一謀者也。若城下池淺守弱，則取之矣。由是觀之，天官時日不若人事也。」此言東西攻，南北攻，即所云「環而攻之」。《呂氏春秋·愛士》篇云：「晉人已環繆公之車矣」，高誘注云：「環，圍也。謂周旋圍繞之也。」周氏柄中《辨正》云：「《周禮·春官·箬人》『九曰箬環』，註：『謂箬可致師不也。』《孟子》『環而攻之』之環即《周禮》『箬環』之環。『環而攻之』謂箬而攻之也。」張氏爾岐《蒿菴問話》云：「趙注似長兵家。言天時多言向背，如『背孤擊虛』、『背亭亭擊白奸』之類。每日每時各有其宜背宜向之方，環而攻之，則四面必有一處合天時之善者。」○注「天時」至「屬也」○正義曰：時，十二辰，地支也。日即十日，天干也。《太玄·玄數》篇云：「五行用事者王。王所生相，故王廢，勝王囚，王所勝死。」《淮南子·地形訓》云：「木壯，水老，火生，金囚，土死。火壯，木老，土生，水囚，金死。土壯，火老，金生，木囚，水死。金壯，土老，水生，

火囚，木死。水壯，金老，木生，土囚，火死。」《論衡·難歲》篇云：「立春，艮王震相，巽胎離沒，坤死兌囚，乾廢坎休。王之衝死，相之衝囚。王相衝位，有死囚之氣。」此「王相」之說也。《史記·龜策列傳》云：「日辰不全，故有孤虛。」《集解》云：「甲乙謂之日，子丑謂之辰。六甲孤虛法：甲子旬中無戌亥，戌亥即為孤，辰巳即為虛。甲戌旬中無申酉，申酉為孤，寅卯為虛。甲申旬中無午未，午未為孤，子丑為虛。甲午旬中無辰巳，辰巳為孤，戌亥即為虛。甲辰旬中無寅卯，寅卯為孤，申酉即為虛。甲寅旬中無子丑，子丑為孤，午未即為虛。劉歆《七略》有《風后孤虛》二十卷。」此「孤虛」之說也。《周禮·春官·太史》職：「太師，抱天時，與太師同車。」鄭司農云：「大出師，則太史主抱式，以知天時，處吉凶。史官主知天道，故《國語》曰：『吾非瞽史，焉知天道？』」《春秋傳》云：「楚有雲如衆赤鳥，夾日以飛。楚子使問諸周太史。」太史主天道。「周時術士以七政占驗為天道，故神龜云：『天道多在西北。』子產雖正斥之云：『天道遠，人道邇，龜焉知天道？』然其時則混以天時為天道。至孔子贊《易》，明元亨利貞為天之道，言『天道虧盈而益謙』，言『立天之道曰陰與陽，立地之道曰柔與剛，立人之道曰仁與義』，而天道乃明。孟子以『天道』與『仁義禮智』並言，而此五行時日之

術別之爲「天時」，而天時、天道乃曉然明於世也。城非

不高也，池非不深也，兵革非不堅利也，米粟非不多也，委而去之，是地利不如人和也。

注有堅強如此而破之走者，不得民心，民不爲守。

衛懿公之民曰：「君其使鶴戰，余焉能戰？」是也。

疏注「有堅」至「是也」○正義曰：「破之走者，解「委而去之」，「走」字釋「去之」矣。委無破義，阮氏元《按勘記》云：

「岳本破作被。」《淮南子·精神訓》云「委萬物而不利」，高誘

注云：「委，棄也。」《漢書·地理志》「千乘郡被陽」，注引如

淳云：「一作疲，音罷軍之罷。」罷即疲，《國語·周語》注

云：「棄，廢也。」《禮記·中庸》「半途而廢」，注云：「廢猶罷

止也。」《表記》「中道而廢」，注云：「廢，喻力極罷頓，不能復

行，則止也。」趙氏當作「疲之走者」，通疲爲被，傳寫誤作破

也。罷而去之即棄而去之也，岳本得之。引「衛懿公」之事，

見閔公二年《左傳》，云：「狄人伐衛。衛懿公好鶴，鶴有乘

軒者。將戰，國人受甲者皆曰：「使鶴。鶴實有祿位，余焉能

戰？」是其事也。故曰：域民不以封疆之界，固

國不以山谿之險，威天下不以兵革之利。**注**

域民，居民也。不以封疆之界禁之，使民懷德也；

不依險阻之固，恃仁惠也；不馮兵革之威，仗道德也。

疏注「域民居民也」○正義曰：《荀子·禮論篇》云：「是君子

之壇宇宮廷也。人有是，士君子也。」《史記·禮書》云：「是

以君子之性，守宮廷也。人域是域，士君子也。」《毛詩》「正

域彼四方」，傳云：「域，有也。一有是即域是。」《索隱》云：

「域，居也。言君子之行，非人居亦弗居也。」上言宮廷，下言

域，故知域是居。與趙氏同也。閻氏若璩《釋地》云：

「《漢·地理志》言齊初封地烏鹵，寡人民，迺勸業通商，而人

物始輻湊。先發端云「古者有分土，無分民」，顏師古注：

「無分民者，謂通往來，不常厥居也。」最是。所以《碩鼠》之

詩「逝將去女」，《論語》之書「襁負而至」。若至七國便不然。

「域民不以封疆之界」，則當時封疆之界固以域其民矣。」

按：《呂氏春秋·慎人》篇云「胼胝不居」，高誘注云：「居，

止也。」以法禁之，使民止於此居也；以德懷之，未嘗禁之，

而民自止於此，亦居也。居民不以封疆之界，謂止民不以法

①「毛詩」至「域是」，疑當在上句「史記禮書」前，於前後文
意爲順。

禁之，以德懷之也。居此民則止此民，止此民即有此民矣。得道者多助，失道者寡助。寡助之至，親戚畔之；多助之至，天下順之。以天下之所順，攻親戚之所畔，故君子有不戰，戰必勝矣。**注**得道之君，何嚮不平？君子之道，貴不戰耳；如其當戰，戰則勝矣。**疏**「得道」至「勝矣」○正義曰：《音義》云：「寡助之至」，至或作主。「按：『多助之至』亦當作『多助之主』。趙氏云『得道之君』，即解『多助之主』。上言『得道者多助』，則多助之主即是得道之君也。『有不戰』，不當戰也，當戰則戰矣。當戰則戰，所以必勝。」

章指：言民和爲貴，貴於天地。故曰「得乎丘民爲天子」也。

孟子將朝王。王使人來曰：「寡人如就見者也，有寒疾，不可以風。朝，將視朝，不識可使寡人得見乎？」**注**孟子雖仕於齊，處賓師之位，以道見敬。或稱以病，未嘗趨朝而拜也，王欲見之，先朝使人往謂孟子云：寡人如就見者，若言

就孟子之館相見也。有惡寒之病，不可見風。儻可來朝，欲力疾臨視朝，因得見孟子也。不知可使寡人得相見否？**疏**注「王欲」至「見否」○正義曰：「云寡人如就見者，若言就孟子之館相見也」，此以「若言」釋「如」字。《儀禮·鄉飲酒禮》云「如大夫」，註云：「如，讀若今之若。」《廣雅·釋言》云：「如，若也。」云「若言」者，《爾雅·釋詁》云：「圖、如、猷，謀也。」《釋言》云：「猷，圖也。」猷，若也。然則如與若義同，而如之爲謀、爲圖、爲猷，與若之爲猷、爲圖同。「寡人如就見者也」即寡人圖就見者也。《釋詁》又云：「猷，言也。」趙氏疊「若言」二字釋如字，謂如者若也，言也。若之爲如，不必爲圖猷之義，必疊「言」字，則其爲猷爲圖，了然明白。此趙氏訓釋之精也。或訓如爲往，不及趙氏遠矣。王氏引之《經傳釋詞》云：「如字亦與將同義。」閻氏若璩《釋地三續》云：「古者雞鳴而起，朝辨色始入，君日出而視之。以知孟子將朝王蓋雞鳴之後，辨色之前；朝將之朝，則日出時也。愚初解如此，復閱趙注云：『儻可來朝，欲力疾臨視朝。』『視朝』內仍帶有力疾不得已之意，頗妙。不然，既惡寒，大廷之上與道塗奚別焉？『朝將視朝』，上朝字當讀住。齊王以孟子肯來朝，方視朝，不然，

仍以疾罷，語頗婉切。」按：張仲景《傷寒論》云：「太陽之爲病，脈浮，頭項強痛而惡寒。」又云：「太陽中風，齎齎惡寒，淅淅惡風。」此云「不可以風」，則是惡風，惡風而云寒疾，蓋是太陽中風，寒水之經疾也。趙以云「寒疾不可以風」，故以爲惡寒之疾。高誘注《呂氏春秋》、《淮南子》，多云：「識，知也。」故以「不知」解「不識」。對曰：「不幸而有疾，不能造朝。」**注**孟子不悅王之欲使朝，故稱有疾。明日，出弔於東郭氏。公孫丑曰：「昔者辭以病，今日弔，或者不可乎？」**注**東郭氏，齊大夫家也。昔者，昨日也。丑以爲不可。**疏**注「東郭」至「日也」○正義曰：《史記·平準書》「東郭咸陽」，《索隱》引《風俗通》云：「東郭牙，齊大夫。咸陽，其後也。」是齊有東郭氏爲大夫家也。翟氏灝《考異》云：「孟子所重，賢而已矣，何必定大夫？」《韓詩外傳》云：「齊有東郭先生梁石君，不詘身下志以求仕，世之賢也。」孟子所弔，梁石君應其人耳。」按：東郭先生蓋住居東郭，未必即東郭氏，此明稱「氏」，爲大夫家，是也。《文選·悼亡詩》，注引《蒼頡篇》云：「昨，隔日也。」《廣韻》云：「昨，隔一宵也。」昔之訓，爲久，爲舊，爲往，則通隔日以前俱謂之昔。孟子辭疾僅隔一宵，故

云明日出弔。下計隔日爲明日，上計隔日爲昨日，故以「昔者」爲「昨日」也。《莊子·齊物論》云「今日適越而昔至也」，《釋文》引向秀注云：「昔者，昨日之謂也。」與趙氏此注同。阮氏元《校勘記》云：「今日弔」，閩、監本、孔本、韓本同。廖本、毛本日作以，形近之譌。《考文》引作「今以弔」，云「今下古本有日字」。足利本同。尤非。」曰：「昔者疾，今日愈，如之何不弔？」**注**孟子言我昨日病，今日愈，我何爲不可以弔？王使人問疾，醫來。**注**王以孟子實病，遣人將醫來，且問疾也。孟仲子對曰：「昔者有王命，有采薪之憂，不能造朝。今病小愈，趨造於朝。我不識能至否乎？」**注**孟仲子，孟子之從昆弟學於孟子者也。權辭以對如此。憂，病也。《曲禮》云：「有負薪之憂。」**疏**注「孟仲」至「者也」○正義曰：孟仲子之名，兩見《毛詩》傳所引。《維天之命》傳云：「孟仲子曰：大哉，天命之無極，而美

①「韓詩外傳云」，原誤在上句「考異云」下，今從沈校據《四書考異》改。

周之禮也。」一《閔宮》傳云：「孟仲子曰：是謀官也。」孔氏正義云：「《孟子》云：『齊王以孟子辭病，使人問醫來，孟仲子對。』趙岐云：『孟仲子，孟子從昆弟學於孟子者也。』《譜》云：『孟仲子者，子思弟子。蓋與孟子共事子思，後學於孟軻，著書論《詩》。』毛氏取以爲說。」曹氏之升《摭餘說》云：

「孟子且不親受業於子思之門，何有仲子？以趙氏從昆弟之說爲信，而《告子》篇之孟季子又當爲仲子之弟也。至《序錄》所稱子夏傳曾申，申傳魏人李克，①克傳魯人孟仲子者，當別是一人。」按：《東萊讀詩記》引陸璣《草木鳥獸蟲魚疏》云：「子夏傳魯人申公，申公傳魏人李尅，李尅傳魯人孟仲子，孟仲子傳趙人孫卿。」陸德明《釋文序錄》既引徐整說，謂子夏授高行子，高行子授薛倉子，薛倉子授帛妙子，帛妙子授河間人大毛公，又引一說云：「子夏傳曾申，申傳魏人李克，克傳魯人孟仲子，孟仲子傳根牟子，根牟子傳趙人孫卿子，孫卿子傳魯人大毛公。」後一說同於陸氏，而仲子於孫卿中間多一根牟子，皆不言孟仲子受學於子思、孟子。趙氏謂爲孟子從昆弟，必有所出，今未詳矣。《禮記·樂記》云「病不得其衆也」，注云：「病，憂也。」是「憂」即「病」也。引《曲禮》者，見《禮記·曲禮下》篇，云：「君使士射，不能則辭以疾，言曰：『某有負薪之憂。』」是也。

使數人要於路，曰：

「請必無歸而造於朝！」**注**仲子使數人要告孟子，君命宜敬，當必造朝也。不得已而之景丑氏，宿焉。**注**孟子迫於仲子之言，不得已，而心不欲至朝，因之其所知齊大夫景丑之家而宿焉，且以語景子。**疏**「景丑氏」○正義曰：翟氏灝《考異》云：「《漢

書·藝文志》有《景子》三篇，列儒家者流。此稱景丑爲景子，其言「父子主恩，君臣主敬」，及引禮「父召」「君召」諸文，頗有見於儒家大意，景子似即著書之景子也。孟子宿於其家，蓋亦以氣誼稍合往焉。」○注「而心不欲至朝」○正義曰：《儀禮·鄉飲酒禮》賈氏疏云：「齊王召孟子，不肯朝，後不得已而朝之，宿於大夫景丑氏之家。」此解「不得已」爲不得已而朝，是也。趙氏言「迫於仲子之言不得已」，已止也。不得止者，不得不往朝也。但身雖至朝而心不欲至朝，蓋是時王未視朝，或已視朝而退，孟子雖造朝而未見王，故宿於景丑氏，而以所以辭疾之故告也。《考文》古本心作必，非。景子曰：「內則父子，外則君臣，人之大倫也。父子主恩，君臣主敬。丑見王之敬子

①「李」，原誤作「季」，今據《經典釋文》及經解本改。

也，未見所以敬王也。」**注**景丑責孟子，不敬何義也？曰：「惡，是何言也？齊人無以仁義與

王言者，豈以仁義爲不美也？其心曰，「是何足與言仁義也」云爾，則不敬莫大乎是。

注曰惡者，深嗟嘆。云景子之責我，何言乎？今人皆謂王無知，不足與言仁義。云爾，絕語之辭也。人之不敬無大於是者也。**疏**注「云爾絕語之辭也」○正

義曰：云、爾分言之，皆語詞也。《文選·古詩》：「故人心尚爾」，注引《字書》云：「爾，詞之終也。」疊「云爾」兩字，是終竟無疑之詞，故爲語絕也。我非堯舜之道不敢以陳

於王前，故齊人莫如我敬王也。」**注**孟子言我每見王，常陳堯舜之道以勸勉王。齊人豈如我敬王者邪？景子曰：「否，非此之謂也。禮曰：

「父召無諾，君命召不俟駕。」固將朝也。聞王命而遂不果，宜與夫禮若不相似然？」**注**

景子曰：非謂不陳堯舜之道，謂爲臣固自當朝也。今有王命而不果行。果，能也。禮，父召無諾，無諾

而不至也；君命召，輦車就牧，不坐待駕。而夫子若是，事宜與夫禮若不相似然乎？愚竊惑焉。**疏**

注「景子」至「惑焉」○正義曰：「非謂不陳堯舜之道」解「否，非此之謂也」句，「謂爲臣固自當朝也」解「固將朝也」，以「自當」二字釋「將」字。自當，將之緩聲。近時通解謂「將朝」即指「孟子將朝王」而言。《禮記·曲禮》云：「父召無諾，先生

召無諾，唯而起。」《玉藻》云：「父命呼，唯而不諾。」又云：

「君召以三節：二節以走，一節以趨。在官不俟屨，在外不俟車。」《曲禮》注云：「應辭，唯恭於諾。」《論語·鄉黨》篇云

「君命召，不俟駕行矣」，《集解》云：「鄭曰：急趨君命，行出而車駕隨之。」趙氏言「無諾而不至」，與「唯而不諾」義異。

云「輦車就牧」者，《荀子·大略》篇云：「諸侯召其臣，臣不俟駕，顛倒衣裳而走，禮也。」《詩》曰：「顛之倒之，自公召之。」天子召諸侯，輦輿就馬，禮也。《詩》曰：「我出我車，于

彼牧矣，自天子所，謂我來矣。」**注**云：「輦謂人挽車。言不暇待馬至，故輦輿就馬也。」出車就馬于牧地，趙氏撮其辭。

《音義》云：「宜與」，丁音餘。下「是與」、「死與」、「言與」、「伐與」、「殺與」、「之與」、「過與」皆同。此「宜與」亦如字。

翟氏灝《考異》云：《書齋夜話》曰：「宜與」之與音歟。古者

歟字皆作與字，「宜歟」即可乎之謂，當以與字絕句，不當連下文。《爾雅·釋詁》云：「宜，事也。」故以「事」釋「宜」。「宜與夫禮」謂夫子之事，與禮所云若不相似。趙氏讀與如字，孫奭謂「宜與」如字是也；丁讀宜與爲句，非也。王氏引之《經傳釋詞》云：「家大人曰：宜猶殆也。成二年《左傳》：『宜將竊妻以逃者也』，《孟子·公孫丑》篇『宜與夫禮若不相似』，《滕文公》篇『不見諸侯，宜若小然』，又『枉尺而直尋，宜若可爲也』，《離婁》篇『宜若無罪焉』，《盡心》篇『宜若登天然』，《齊策》『救趙之務，宜若奉漏甕，沃焦釜』，宜字並與殆同義。」曰：「豈謂是與？」曾子曰：「晉楚之富，不可及也。彼以其富，我以吾仁；彼以其爵，我以吾義。吾何慊乎哉？」夫豈不義而曾子言之？是或一道也。**注** 孟子答景丑云：我豈謂是君臣招呼之間乎？謂王不禮賢下士。故道曾子之言，自以不慊晉楚之君。慊，少也。曾子豈嘗言不義之事邪？是或者自得道之一義，欲以喻王猶晉楚，我猶曾子，我豈輕於王乎？**疏** 注「慊少也」○正義曰：王氏念孫《廣雅疏證》云：「歟，少也。《說文》『歟，食不滿也。』襄二十四年《穀梁傳》『一穀不升謂

之慊」，范甯注云：「慊，不足貌。」《韓詩外傳》作謙，《廣雅·釋天》作歉。《孟子·公孫丑》篇「吾何慊乎哉」，趙岐注云：「慊，少也。」《逸周書·武稱解》云：「爵位不謙，田宅不虧。」並字異而義同。翟氏灝《考異》云：「《呂氏春秋》魏文侯曰：『段干木光乎德。寡人光乎地，段干木富乎義，寡人富乎財。吾安敢驕之？』」與此語意相同。文侯嘗受經義於子夏，宜得聞曾子言也。天下有達尊三：爵一，齒一，德一。朝廷莫如爵，鄉黨莫如齒，輔世長民莫如德。惡得有其一以慢其二哉？**注** 三者，天下之所通尊也。孟子謂賢者長者有德有齒，人君無德，但有爵耳。故云：何得以一慢二乎？**疏** 注「賢者長者有德有齒」○正義曰：《儀禮·鄉飲酒禮》注云：「凡鄉黨飲酒，必於民聚之時，欲其見化，知尚賢尊長也。《孟子》曰：『天下有達尊三：爵也，德也，齒也。』」德是尚賢，齒是尊長，故云「賢者長者」。故將大有爲之君，必有所不召之臣。欲有謀焉，則就之。其尊德樂道，不如是不足與有爲也。**注** 言古之大聖大賢有所興爲之君，必就大賢臣而謀事，不

敢召也。王者師臣，霸者友臣也。

疏注「有所興爲之

君」○正義曰：爲，作也；興，亦作也。故以「興」釋「爲」。

○注「王者師臣霸者友臣」○正義曰：《荀子·王制》篇云：

「臣諸侯者王，友諸侯者霸，敵諸侯者亡。」又《堯問》篇引中

歸之言云：「諸侯自爲得師者王，得友者霸，得疑者存，自爲

謀而莫己若者亡。」《白虎通·王者不臣》篇引《韓詩內傳》

云：「師臣者帝，友臣者王，臣臣者霸，魯臣者亡。」故湯之

於伊尹，學焉而後臣之，故不勞而王；桓公

之於管仲，學焉而後臣之，故不勞而霸。

注

言師臣者王。桓公能師臣而管仲不勉之於王，故孟

子於上章陳其義，譏其烈之卑也。今天下地醜德

齊，莫能相尚。無他，好臣其所教而不好臣

其所受教。

注醜，類也。言今天下之人君土地相

類，德教齊等，不能相絕者，無他，但好臣其所教教

役使之才可驕者耳，不能好臣大賢可從受教者。

疏

注「醜類」至「教者」○正義曰：《禮記·哀公問》云「節醜其

衣服」，注云：「醜，類也。」是「醜」之義爲「類」。戴氏震《方

言疏證》云：「《方言》：「掩、醜、搯、綽，同也。江淮、南楚之

間曰掩，宋衛之間曰綽，或曰搯，東齊曰醜。」按，掩、奄古通

用，《詩·周頌》「奄有四方」，毛傳：「奄，同也。」醜訓類，類

亦同也。《孟子》「今天下地醜德齊，莫能相尚」，趙岐注云：

「醜，類也。」以《方言》證之，於義尤明。」高誘注《呂氏春秋》、

《淮南子》皆云：「齊，等也。絕，過也。」故以「等」釋「齊」。

相類、相等，則不能相過矣。《廣雅·釋詁》云：「教，敕語

也。」是教與敕義同。劉熙《釋名·釋書契》云：「敕，飭也。

使自警飭，不敢廢慢也。」教敕之使不敢慢，是我所「使役

之才」也。《禮記·內則》云「降德於衆兆民」，注云：「德猶

教也。」當時諸侯，無德可言，故「德齊」亦謂其所教敕於臣民

者同也。湯之於伊尹，桓公之於管仲，則不敢

召。管仲且猶不可召，而況不爲管仲者

乎？

注孟子自謂不爲管仲，故非齊王之召己，己

是以不往也。

章指：言人君以尊德樂義爲賢，君子

以守道不回爲志。

疏

「君子」至「爲志」○正義

曰：《毛詩·大雅》「厥德不回」，傳云：「回，違也。」《小

雅》「其德不回」，傳云：「回，邪也。」

陳臻問曰：「前日於齊，王餽兼金一百而不受；於宋，餽七十鎰而受；於薛，餽五十鎰而受。前日之不受是，則今日之受非也；今日之受是，則前日之不受非也。夫子必居一於此矣。」

注陳臻，孟子弟子。兼金，好金也，其價兼倍於常者，故謂之兼金。一百，百鎰也。古者以一鎰爲一金。鎰，二十兩也。**疏**注「古者」至「兩也」

○正義曰：《國策·秦策》云「黃金萬鎰」，高誘注云：「萬鎰，萬金也。」二十兩爲一鎰，是一鎰爲一金也。閩、監、毛三本誤作「二十四兩」，阮氏元《校勘記》云：「廖本、《考文》古本、孔本、韓本作「鎰二十兩也」。作二十兩乃與「爲巨室」章合。」孟子曰：「皆是也。當在宋也，予將有遠行。行者必以贐，辭曰『餽贐』，予何爲不受？」**注**贐，送行者贈賄之禮也。時人謂之贐。

疏注「贐送」至「之贐」○正義曰：臧氏庸述其高祖琳《經義雜記》云：「《論衡·刺孟》引《孟子》云：『行者必以贐，辭曰歸贐。』《文選·魏都賦》『極負責贐』，劉淵林注：『贐，禮贐也。』《孟子》曰：『將有遠行，行者必以贐。』《蒼頡篇》曰：『贐，」

財貨也。』《楮白馬賦》『或踰遠而納贐』，李善注：『《孟子》曰：有遠行者必以贐。』知《孟子》本作贐，今作贐乃俗字。」段氏玉裁《說文解字注》云：「贐，會禮也。以財貨爲會合之禮也。或假進爲之，如《漢高紀》曰『蕭何爲主吏主進』是也。」當在薛也，予有戒心。辭曰「聞戒」，故爲兵餽之，予何爲不受？」**注**戒，有戒備不虞之心也。時有惡人欲害孟子，孟子戒備。薛君曰：聞有戒，此金可鬻以作兵備，故餽之。我何爲不受也？

疏「當在薛也」○正義曰：周氏廣業《孟子出處時地考》云：「孟子所在之薛，乃齊靖郭君田嬰封邑，非春秋之薛也。《左傳》隱十一年「薛侯」，注云：『魯國薛縣。』《公羊》哀四年注云：『滕薛俠穀。』此春秋之薛也。《史記·孟嘗君列傳》：『湣王三年，封嬰於薛。嬰卒，子文代立。』《續漢志》「魯國薛縣」，本注云：『本國六國時曰徐州。』《補注》引《皇覽》曰：『靖郭君冢在城中東南隅。』此戰國之薛也。其時薛爲齊有，地鄰於楚，故《國策》載齊將封嬰於薛，楚王聞之大怒，將伐齊。公孫閒往見楚王曰：『齊削地以封嬰，是以所

以弱也。」楚王乃止。後昭陽又請以數倍之地易薛，^①嬰不可。時嬰以宣王庶弟相齊十數年，得於薛立先王之廟，至田文直稱薛公，蓋不特大都耦國，其名數亦儼同列侯，故孟子過此亦受其餽也。薛與滕近，文公聞築薛而恐是也。齊湣王將之薛，假途於鄒；而太史公言吾嘗過薛，其俗與鄒、魯殊，則地近鄒、魯又可知矣。方孟子在宋而有遠行，其欲遊梁無疑。但梁宋接境，《史記·貨殖傳》：「自鴻溝以東，芒碭以北，屬鉅鹿，此梁宋也。陶睢陽，亦一都會也。」徐廣曰：「梁爲今陶之浚儀。陶睢陽，今之定陶。」又《國策》：「魏太子申之攻齊也。過宋外黃。」高誘曰：「今陳留外黃，故宋城也。後徙睢陽。」然則自梁至齊必先過宋，孟子之遊梁，固宜由睢陽西達大梁，否亦徑歸鄒。而反折而東，自薛歸鄒者，有戒心故也。趙岐言「時有惡人欲害孟子」，應劭云：「又絕糧於鄒，薛，困殆甚。」薛之俗在孟嘗未招致任俠奸人之前，其子弟已多暴桀，異於鄒、魯，故惡孟子，欲害之耶？抑上下無交，有如孔子之阨於陳蔡者耶？是皆未可知。而孟子設兵戒備，則非尋常剽掠明矣。孟子在齊，東郭、公行輩皆所往還，寧獨遺一田嬰？是其取道於薛，固因避禍，而餽金以其困乏，亦東道主之義也。」江氏永《羣經補義》云：「孟子過薛，薛君餽五十鎰，當宣王時，即孟嘗君田

文也。」○注「戒有」至「受也」○正義曰：襄公三年《左傳》云「不虞之不戒」，又十三年《左傳》云「吳乘我喪，謂我不能師也，必易我而不戒」，注並云：「戒，備也。」《說文》云：「戒，警也。從升持戈，以戒不虞。」爲猶作也。趙氏以「作兵」釋「爲兵」。若於齊，則未有處也。無處而餽之，是貨之也。焉有君子而可以貨取乎？^②注我在齊時無事，於義未有所處也。義無所處而餽之，是以貨財取我，欲使我懷惠也。安有君子而以貨財見取乎？

章指：言取與之道，必得其禮。於其可也，雖少不辭；義之無處，兼金不顧。^③疏「義之無處兼金不顧」○正義曰：《後漢書·張衡傳》衡作《應問》云：「意之無疑，則兼金盈百而不嫌辭，孟軻以之。」

孟子之平陸。謂其大夫曰：「子之持戟

義》云：「孟子過薛，薛君餽五十鎰，當宣王時，即孟嘗君田

①「易」，原脫，今從沈校據《戰國策》及《孟子四考》補。

之士，一日而三失伍，則去之否乎？」**注**平陸，

齊下邑也。大夫，治邑大夫也。持戟，戰士也。一

日三失其行伍，則去之否乎？去之，殺之也。戎昭

果毅。**疏**注「平陸」至「果毅」○正義曰：《毛詩·鄘風》

「在浚之都」，傳云：「下邑曰都。」下言「王之爲都者」，平陸是

都，故云「下邑」也。《秦風·無衣》云：「王于興師，修我矛

戟。」《序》云：「秦人刺其君好攻戰，亟用兵。」宣二年《左傳》

云：「靈輒爲公介，倒戟以禦公徒。」《韓非子·勢難》篇云：

「地方數千里，持戟數千萬。」《戰國策·秦策》云：「楚地持

戟百萬。」是「持戟」爲「戰士」也。「戎昭果毅」，亦見宣二年

《左傳》，云：「戎昭果毅以聽之之謂禮。殺敵爲果，致果爲

毅。易之，戮也。」軍法以殺敵爲令，故宜聽之常存於耳，若

易之則戮。此「失伍」是不聽政令，故當殺戮之。《國語·吳

語》云：「明日徙舍，斬有罪者以徇，曰：『莫如此不從其伍

之令。』」是失伍者當殺也。閻氏若璩《釋地》云：「讀《史

記·商君列傳》「持矛而操闔戟者」，旁車而趨」，《聶政列

傳》「韓相俠累方坐府上，持兵戟而衛侍者甚衆」，因悟《孟

子》「持戟之士」亦然。蓋爲大夫守衛者，非指戰士，伍亦非

行間。七國時尚武備，多姦變生於不測，而平陸又屬齊邊

邑，故雖治邑大夫，亦日日陳兵自衛，孟子即所見以爲喻。

郝京山曰：「伍，班次也。失伍，不在班也。去之，罷去也。」

亦指守衛者言。或問：平陸之爲齊邊邑者，何也？余曰：

《六國表》、《田齊世家》康公貸十五年，「魯敗我平陸」，徐廣

曰：「東平陸縣。」余謂漢屬東平國，爲古厥國，孔子時爲魯

中都邑地，爾時屬齊，即今汶上縣是。又「有陶平陸，則梁門

不開」，張守節云：「平陸，唐兗州縣。」即中都，在大梁東界。

故曰：平陸，齊邊邑也。」周氏柄中《辨正》云：「《史記·封

禪書》、《漢書·郊祀志》云：「蚩尤在東平陸監鄉，齊之西

竟。」《水經注》：「汶水又西南逕東平陸故城北。」應劭曰：「古

厥國也。」又西南逕致密城，《郡國志》曰：「須昌縣有致密

城，古中都也。即夫子所宰之邑。」則東平陸爲厥國，須昌爲

中都，其地相近。後漢省平陸入須昌，遂合而爲一耳。」

曰：「不待三。」**注**大夫曰：一失之則行罰，不及

待三失伍也。「然則子之失伍也，亦多矣。凶

年饑歲，子之民，老羸轉於溝壑，壯者散而之

四方者，幾千人矣。」**注**轉，轉尸於溝壑也。此則

①「讀」，原脫，今從沈校據《四書釋地》補。

子之失伍也。

疏注「轉轉」至「壑也」○正義曰：《淮南

子·主術訓》云「生無乏用，死無轉尸」，高誘注云：「轉，棄也。」劉熙《釋名·釋喪制》云：「不得埋曰棄，謂棄之於野也。」《國語·吳語》云「子有父母者老，而子爲我死，子之父母將轉於溝壑」，註云：「轉，人也。」人於溝壑，亦謂無以送死，與「轉尸」之義同耳。《周書·大聚解》「則生無乏用，死無轉尸」，注云：「傳於溝壑。」惠氏棟云：「傳尸猶轉尸也。」《淮南子》「鬱而無轉」，高誘注云：「轉讀作傳。」《鹽鐵論·通有》篇云：「今吳越之竹、隨唐之材不可勝用，而曹、衛、梁、宋采棺轉尸。」盧氏文弼《羣書拾補》云：「當即近世以舊用之棺賣與人者。」按：《文學對》云：「是以生無乏資，死無轉尸。」即用《周書》，與《淮南·主術》同。曰：「此非距心之所得爲也。」**注**距心，大夫名。曰：此乃齊王之大政，不肯賑窮，非我所得專爲也。曰：「今有受人之牛羊而爲之牧之者，則必爲之求牧與芻矣。求牧與芻而不得，則反諸其人乎？抑亦立而視其死與？」**注**牧，牧地。以此喻距心不得自專，何不致爲臣而去乎？何爲立視民之死

也？

疏注「牧牧地」○正義曰：《周禮·天官·大宰》「以

九職任萬民，四曰藪牧，養蕃鳥獸」，注云：「牧，牧田，在遠郊，皆畜牧之地。」賈氏疏云：「《載師》云「牧田賞田任遠郊之地」，鄭注云：「牧田，畜牧者之家所受田也。」非畜牧之地。但牧六畜之地無文，鄭約與家人所受田處即有六畜之地，故云在遠郊也。」《國語·周語》云：「周制有之曰，國有郊牧」，注云：「國外曰郊牧，放牧之地。」曰：「此則距心之罪也。」**注**距心自知以不去位爲罪也。他日，見於王，曰：「王之爲都者，臣知五人焉。知其罪者惟孔距心。」爲王誦之。王曰：「此則寡人之罪也。」**注**孔，姓也。爲都，治都也。邑有先君之宗廟曰都。誦，言也。爲王言所與孔距心語者也。王知本之在己，故受其罪。**疏**注「孔姓」至「其罪」○正義曰：前自稱「距心」是名，此加「孔」字，知是姓也。爲，治也。「爲都」猶《論語》言「善人爲邦，能以禮讓爲國」，《呂氏春秋·舉難》篇言「說桓公以爲天下」，《淮南子·俶真訓》言「與造物者爲人」，是即「治都」也。莊二十八年《左傳》云：「凡邑有宗廟先君之主曰都，無曰邑。」《說文》邑

部云：「有先君之舊宗廟曰都。」閻氏若璩《釋地續》云：「都與邑，雖有大小，君所居，民所聚，有宗廟及無之別，其實古多通稱。如『商邑翼翼，四方之極』，『即伐于崇，作邑于豐』，此都稱邑之明徵也。趙良曰『君何不歸十五都』，孟子曰『王之爲都者』，此邑稱都之明徵也。」《釋地》又續云：「向謂都與邑可通稱，今不若直以曲沃證。莊二十八年『宗邑無主』，閔元年云『分之都城』。更證以費。昭十二年云『誰與居邑』，定十二年云『將墮三都』，是非《爾雅》『官謂之室，室謂之宮』一例乎？」以「言」釋「誦」者，亦見《廣雅·釋詁》。《漢書·呂后紀》云：「勃尚恐不勝，未敢誦言誅之。」注引鄧展云：「誦言，公言也。」《說文》言部云：「諷，誦也。」「誦，諷也。」《周禮·春官·大司樂》：「以樂語教國子：興、道、諷、誦、言、語」，注云：「倍文曰諷，以聲節之曰誦，發端爲言，答述曰語。」蓋諷、誦、言、語四字，分言之義別，單舉之義通。誦可訓諷，亦可訓言矣。《毛詩·公劉》傳云：「直言曰言。」直言即公言。「爲王誦之」，爲王直言之，與孔距心語爲王述之，即是倍誦之也。

章指：言人臣以道事君，否則奉身以退。《詩》云：「彼君子兮，不素餐兮。」言不

尸其祿也。疏「人臣」至「祿也」○正義曰：《論語·

先進》篇云：「所謂大臣者，以道事君，不可則止。」襄公二十六年《左傳》云：「臣之祿，君實有之。義則進，否則奉身而退。專祿以周旋，戮也。」哀公六年《左傳》云：「義則進，否則退。」引《詩》者，《魏風·伐檀》篇文。毛傳云：「素，空也。」《文選》注引薛君《韓詩章句》云：「何謂『素餐』？素者，質也。人但有質樸而無治民之材，名曰素餐。『尸祿』者，頗有所知，善惡不言，默之不語，苟欲得祿而已，譬若尸焉。」《漢書·鮑宣傳》上書云「以拱默尸祿爲智」，顏師古注云：「尸，主也。不憂其職，但言食祿而已。」又《貢禹傳》上書云：「所謂素餐尸祿，沔朝之臣。」「尸祿」猶云「專祿」也。

孟子謂蚺鼃曰：「子之辭靈丘而請士師，似也，爲其可以言也。今既數月矣，未可以言與？」注蚺鼃，齊大夫。靈丘，齊下邑。士師，治獄官也。《周禮·士師》曰：「以五戒先後刑

①「言」，原誤作「官」，今據《文選》注改。

罰，毋使罪麗於民。」孟子見蜺鼃辭外邑大夫，請爲士師，知其欲近王以諫正刑罰之不中者。數月而不言，故曰「未可以言與」以感責之也。**疏**注「蜺鼃」至

「之也」○正義曰：楊桓《六書統》引石經《孟子》作「蜺鼃」。

周氏廣業《孟子逸文考》云：「此石經當是蜀中所刻。《說文》蜺字重文有三，其籀文从氏从虫，疑鼃爲蜺字之譌也。」

閻氏若璩《釋地》云：「靈丘亦屬齊邊邑。《趙世家》：「敬侯二年，敗齊於靈丘，《六國表》：「敬侯九年，魏武侯九年，韓文侯九年，因齊喪共伐之，至靈丘」，又《趙世家》：「惠文王十四年，樂毅將趙、秦、韓、魏攻齊，取靈丘，明年，燕獨深入，取臨淄」。加以蜺鼃去王遠，無以箴王闕，特辭靈丘，請士師，足徵爲邊邑。實不知其所在。爾時趙別有靈丘，以葬武靈王得名，即今靈丘縣。孝成王以靈丘封黃歇。絳侯擊破陳豨於靈丘，皆其地。注《史記》者以此之靈丘爲齊之靈丘，無論齊境不得至代北，而敬侯時安得國有靈丘？胡三省注齊靈丘又以漢清河郡之靈縣當之，抑出臆度，毋寧闕疑。」江氏永《羣經補義》云：「蜺鼃辭靈丘，趙岐注云「齊下邑」，胡三省注《通鑑》謂即漢清河郡之靈縣，今之高唐、夏津皆其地，疑此說是。楚、魏皆嘗伐齊至靈丘，正是漢清河郡，今之東昌

府地也。于欽《齊乘》則云：「今滕縣東三十里明水河之南有靈丘故城。」未知何據。」「士師」爲刑官之屬，在大司寇、小司寇下，是爲「治獄官」。「五戒」者，「一曰誓，用之於軍旅。二曰誥，用之於會同。三曰禁，用諸田役。四曰糾，用諸國中。五曰憲，用諸都鄙。」注云：「先後猶左右也。」五戒皆告語於民，使不犯刑罰，則士師得掌刑獄之言語。但五戒下告於民，推之則刑罰不中亦可上諫於君，故引以爲「可言」之證也。蜺鼃諫於王而不用，致爲臣而去。**注**三

諫不用，致仕而去。**疏**注「三諫」至「而去」○正義曰：

《禮記·曲禮下》云：「爲人臣之禮，不顯諫。三諫而不聽，則逃之。」莊公二十四年《公羊傳》云：「三諫不從，遂去之。故君子以爲得君臣之義也。」何休注云：「諫必三者，取月生三日而成魄，臣道就也。不從得去者，仕爲行道，道不行，義不可以素餐。」齊人曰：「所以爲蜺鼃，則善矣；所以自爲，則吾不知也。」**注**齊人論者譏孟子爲蜺鼃謀，使之諫而去，則善矣；不知自諫，又不去，故曰「我不見其自爲謀者」。**疏**注「我不見其自爲謀者」○正義曰：《呂氏春秋·自知》篇云「知於顏色」，注云：

「知猶見也。」蓋調之云：①孟子既為蜺蜺謀如是，則亦必自為謀，特吾未見之耳。

公都子以告。**注**公都子，孟

子弟子也。以齊人語告孟子也。

疏注「公都」至「子

也」○正義曰：《廣韻》公字注云：「漢複姓八十五氏。孟子

稱公都子有學業。楚公子食邑於都，後氏焉。」曰：「吾

聞之也：有官守者，不得其職則去；有言責

者，不得其言則去。我無官守，我無言責也，

則吾進退，豈不綽綽然有餘裕哉？」**注**官守，

居官守職者。言責，獻言之責，諫爭之官也。孟子

言人臣居官，不得守其職，諫正君不見納者，皆當致

仕而去。今我居師賓之位，進退自由，豈不綽綽

乎？綽，裕，皆寬也。

疏注「官守」至「寬也」○正義

曰：《漢書·谷永傳》永對曰：「臣為大中大夫，備拾遺之

臣，從朝者之後。進不能盡思納忠，輔宣聖德，遷至北地太

守。臣聞事君之義：有言責者盡其忠，有官守者修其職。

臣永幸得免於言責之辜，有官守之任。當畢力遵職，^②養綏

百姓而已，不宜復闕得失之辭。」《淮南子·俶真訓》云：「大夫

安其職」，高誘注云：「職，事也。」「師賓之位」者，《禮記·文

王世子》云：「記曰：虞夏商周，有師保，有疑丞。」《學記》云：「君之所不臣於其臣者二。當其為師則弗臣也。」注云：「尊師重道，不使處臣位也。武王踐阼，召師尚父而問焉。曰：「昔黃帝、顓頊之道有乎？意亦忽不可得見與？」

師尚父曰：「在丹書。王欲聞之，則齊矣。」王齊三日，端冕，

師尚父亦端冕，奉書而入，負屏而立。王下堂，南面而立，師

尚父曰：「先王之道，不北面。」王行西折而南，東面而立，師

尚父西面，道書之言。《史記·齊太公世家》云：「周西伯遇

太公於渭之陽，載與俱歸，立為師。」此不臣而「師」之事也。

《周禮·地官·鄉大夫》：「三年則大比，考其德行道藝，而

興賢者能者。鄉老及鄉大夫帥其吏，與其衆寡，以禮禮賓

之。」注云：「鄭司農云：③「賓，敬也。敬所舉賢者能者。」玄

謂：合衆而尊寵之，以鄉飲酒之禮，禮以賓之。」《呂氏春

秋·高義》篇云：「墨子曰：「若越王聽吾言，用吾道，翟度

身而衣，量腹而食，比於賓萌，未敢求什。」高誘注云：「賓，

①「調」，疑為誤字。

②「畢」，原誤作「果」，今從沈校據《漢書》改。

③「鄭司農云」，原脫，今從沈校據本書文例及《周禮》鄭注

補。

客也。萌，民也。」《莊子·徐無鬼》篇云：「徐無鬼見武侯，武侯曰：『先生居山林，食芋栗以賓寡人，久矣。』」《釋文》引李氏云：「賓，客也。」然則凡賢能盛德之士，未食君祿，俱爲賓。此「賓」之事也。孟子之盛德足爲諸侯師，而仕不受祿，所以爲師賓也。周氏廣業《孟子出處時地考》云：「山東之國，號齊強大，其地勢雄於天下。宣王侈然有撫蒞華夷之意，招徠文學游學之士，以爲圖王不成，猶可以霸也。孟子見天下大亂，民生憔悴，冀王可爲湯武，跋涉千里。始至境，問禁而入，然未即見王也。過平陸，與大夫孔距心善處焉。齊相儲子以幣交，且言於王。王疑其必有異，使人覘之，而孟子終守不見之義。萬章、陳代之徒並疑之。既而王求見甚迫，乃由平陸之齊，屋廬子以季任故事，度必一往報儲子，孟子卒不往。三見齊王，未嘗言事。適從胡齮聞易牛之事，喜曰：『是心可以王矣。』他日，王問桓文，孟子即語以王道。王雖自言惛不能進，而敬禮有加，奉爲賓師，班視列大夫。前後進說甚多，所陳必堯舜之道，王稍稍厭之，甚至語以「境內不治」，顧左右而言他。而孟子亦以母喪去職。自齊葬魯，棺槨衣衾之美殆過父喪時，後竟因此爲臧倉所毀。事畢，反于齊，止于贏。既免喪，自范之齊，見王于崇，退，有去志。王命孟子爲卿，致祿十萬，辭不受祿，號爲客卿。蓋不

欲變其初心，且可爲進退地也。時弟子日益進，公孫丑、公都子、陳臻、咸邱蒙、盆成括、高子等，皆齊人來學者。因材施教，引而不發，躍如也。顧孟子志在行道以王齊，而國無親臣，都無良牧，蓋大夫王驩方嬖幸用事，進爵右師。舉朝視其君如國人，絕無以仁義與王言者。王怠於政事，或數日不視朝，諫言不用。孟子進見固罕，而王之意且欲孟子舍所學而從之。會燕王噲讓國子之，齊伐燕，勝之。王謂天與不可不取，于是毀其宗廟，遷其重器，盡有其地。諸侯多謀伐齊，孟子言急爲燕置君，則諸侯之師可及止也。王勿聽，未幾，燕人畔，王甚慚悔，有陳賈者乃從爲之辭。而當時且有譌傳孟子勸齊伐燕者，齊人之虛詐不情，好議論如此。初，孟子無意仕齊，有以師命不可以請，然非有官守言責之得失也。齊人不知，漫以蜚蜮之義繩之，而公孫丑亦以素餐爲疑。不知君子居國，爲功於君及子弟者甚大，即有故而去，亦豈小丈夫之悻悻哉？孟子知難與有爲，不得已致爲臣而歸。王卒不改，猶欲以授室萬鍾，餽金一百，爲虛拘貨取之計，齊人亦卒無善於留行者。及出晝而終不追，然後浩然有歸志。此則愛君澤民之深意，固非尹士所知，而淳于髡一名實未加」之謂，尤不識君子所爲矣。孟子在齊最久，先後凡數載。時年已六十內外，去齊之日，計自周以來七百餘歲。

方孟子在齊，自王子以及卿大夫皆願見顏色，承風旨。子敖驟膺寵任，尤以得見親比為幸，然出弔于滕，朝夕進見，欲一與言行事而不可得。至公行之喪，朝士爭趨，孟子獨否，卒亦不能加惡焉。同寮則莊暴、時子、景子、東郭、公行，雖嘗往來，不必莫逆。至若不孝之匡章，獨與之遊，巨擘之仲子，則不之信；則更有察之衆好衆惡者。初至日少，繼至日多，初至為大夫，繼至加卿相。七篇中紀齊事者凡四十六章，稱宣王者十四章，亦可見其久居於齊也。《毛詩·小雅·角弓》：「綽綽有裕」，傳云：「綽綽，寬也。」《禮記·表記》引此詩，注云：「綽綽，寬裕貌也。」《周易·蠱》六四「裕父之蠱」，《釋文》引馬注云：「裕，寬也。」是「綽，裕皆寬」也。閔、監、毛三本作「豈不綽綽然舒緩有餘裕乎」，舒緩亦寬也。

章指：言執職者劣，藉道者優。是以

臧武仲雨行而不息，段干木偃寢而式間。

疏「臧武仲雨行而不息」○正義曰：臧武仲，魯大夫臧孫紇也。襄公二十二年《左傳》云：「臧武仲如晉，雨。過御叔，御叔在其邑，將飲酒，曰：『焉用聖人？』我將飲酒而已。雨行，何以聖為？」穆叔聞之曰：「不可使也，而傲使人。」注云：「言御叔不任使四方。」此引以為「執職者劣」

證也。武仲有官守，當使四方，故雖遇雨，不敢止息，所以為劣。《廣雅·釋言》云：「劣，鄙也。」猶云「食肉者鄙」也。○「段干木偃寢而式間」○正義曰：《呂氏春秋·尊師》篇云：「段干木，晉國之大隍也。學於子夏。」高誘注云：「隍，僧人也。」《期賢》篇云：「魏文侯過段干木之間而軾之。其僕曰：『君胡為軾？』曰：『此非段干木之間與？段干木蓋賢者也，吾安敢不軾？』且吾聞段干木未嘗肯以己易寡人也，吾安敢驕之？」段干木光乎德，寡人光乎地，段干木富乎義，寡人富乎財。其僕曰：「然則君何不相之？」於是君請相之，段干木不肯受，則君乃致祿百萬而時往館之。於是國人皆喜，相與誦之曰：「吾君好正，段干木之敬。吾君好忠，段干木之隆。」居無幾何，秦興兵欲攻魏。司馬唐諫秦君曰：「段干木，賢者也，而魏禮之，天下莫不聞。無乃不可加兵乎？」秦君以為然，乃按兵輟，不敢攻之。高誘注云：「間，里也。軾，伏軾也。」又《順說》篇云：「田贊可謂能立其方矣。若夫偃息之義，則未之識也。」高誘注云：「段干木偃息以安魏，田贊辯說以服荆，比之偃息，故曰未知。」《淮南子·修務訓》云：「段干木閭門不出，以安秦魏。」所述事與《呂氏春秋·期賢》篇同。《文選》班孟堅《幽通賦》云：「木偃息以蕃魏

今。『左太冲《魏都賦》云：「間居隘巷，室邇心遐。富仁寵義，職競弗羅。千乘爲之軾廬，諸侯爲之止戈，則干木之德，自解紛也。」又《詠史詩》云：「吾希段干木，偃息藩魏君。」趙氏云「偃寢」，即「偃息」也。引此以爲「藉道者優」之證也。謂段干木無官守之職，故優裕而間居，偃息於隘巷之間，致魏文侯過而軾之也。

孟子爲卿於齊。出弔於滕，王使蓋大夫王驩爲輔行。王驩朝暮見，反齊、滕之路，未嘗與之言行事也。

注孟子嘗爲齊卿。出弔滕

君。蓋，齊下邑也。王以治蓋之大夫王驩爲輔行。輔，副使也。王驩，齊之諂人，有寵於王，後爲右師。孟子不悅其爲人，雖與同使而行，未嘗與之言行事。不願與之相比也。

疏注「孟子」至「滕君」○正義曰：「告

子下」篇淳于髡曰：「夫子在三卿之中。」是孟子嘗爲齊卿也。閻氏若璩《釋地》云：「予少時習《孟子》，疑「蓋大夫王驩」與「兄戴蓋祿」之蓋當是一邑。後讀《左氏春秋傳》「趙衰爲原大夫」，於時先軫亦稱原軫，子趙同爲原同，於時先穀亦稱原穀，唐孔氏云：「蓋分原邑而共食之。」僖二十五年「狐

溱爲溫大夫」，文六年「陽處父至自溫」，故成十一年劉子、單子曰：「襄王勞文公而賜之溫，狐氏、陽氏先處之。」亦共食一邑者。因悟蓋一也，以半爲王朝之下邑，王驩治之，以半爲卿族之私邑，陳氏世有之。」按：《漢書·地理志》泰山郡有蓋，本注云：「臨樂于山，洙水所出，西北至蓋入池水，又沂水南至下邳入泗。」即此蓋也。毛氏奇齡《改錯》云：「明稱齊卿，且云位不小。占侯國卿有左師、右師，故趙有左師觸龍，宋有右師華元，皆是正卿。驩是右師，侯國上卿多以邑冠，如楚司馬沈氏以食葉名葉公，晉卿趙氏以守原名原大夫，不止邑宰專稱也。趙岐謂右師在後，總疑右師必不當與蓋大夫作同時稱耳。宋向戌以左師而食采於合，《春秋傳》名合左師。則此蓋大夫即直云蓋右師，何不可焉？」周氏柄中《辨正》云：「《左傳》凡大夫加邑號者，皆治邑之大夫。僖二十五年《傳》「晉趙衰爲原大夫」，二十七年《傳》「命衰爲卿」，則當其守原之日未爲卿也。楚僭號，縣尹俱稱公，如申公、鄖公、白公之類，皆邑大夫，惟葉公嘗爲令尹司馬，以老於葉，故始終稱葉公，此固不可爲例者。王驩爲蓋大夫，猶距心爲平陸大夫也。」陳組綬《燃犀解》引徐伯璩云：「經文明言孟子爲卿，驩爲大夫，則公孫丑所言之卿蓋孟子也。」按：此說是也。趙氏言「王以蓋邑之大夫王驩爲輔行」，輔

是副使，是時孟子以卿爲正使，驩以大夫副之，副使原不必攝卿。且卿遂可與言，大夫遂不可與言乎？惟是時，孟子以卿爲正使，驩以大夫爲副使，凡一切使事，驩宜聽命於孟子，乃驩則自專而行，此丑所以問也。言夫子以卿爲正使，位不爲小，何得聽其自專而不與言？故孟子所答云云。趙氏於「齊卿之位」二句不注者，正以此卿位即孟子爲卿之卿，不必更注。而下言驩「專知自善」，則孟子之不與言，正非徒以不悅其爲人而不與相比而已也。「出弔於滕」，趙氏云「出弔滕君」，按：滕定公薨，孟子時居鄒，非此爲齊卿時也。季本《孟子事蹟圖譜》云：「其與王驩使滕，爲文公之喪也。非大國之君，無使貴卿及介往弔之禮。此固重文公之賢而隆其數，亦孟子欲親往弔以盡存沒始終之大禮也。」事雖無據，可存以備參考。或謂即滕定公之喪，則謬矣。公孫丑曰：「齊卿之位不爲小矣，齊、滕之路不爲近矣。反之而未嘗與言行事，何也？」**注**丑怪孟子不與驩議行事也。曰：「夫既或治之，予何言哉？」**注**既，已也。或，有也。孟子曰：夫人既自謂有治行事，我將復何言哉？言其專知自善，不知諮於人也。**疏**注「既已」至「人也」○正義曰：《毛詩·周

南》「既見君子」，傳云：「既，已也。」王氏念孫《廣雅疏證》云：「《微子》：殷其弗或亂正四方，《史記·宋世家》作「殷不有治政，不治四方」。《洪範》：「無有作好」，《呂氏春秋·貴公》篇作「無或作好」。高誘注云：「或，有也。」《小雅·天保》篇：「無不爾或承」，鄭箋云：「或之言有也。」此「或」訓「有」之證。《禮記·曲禮》：「若夫坐如尸」，注云：「言若欲爲丈夫也。」《檀弓》云：「夫猶賜也見我」，《釋文》云：「夫，舊音扶，皇如字，謂丈夫，即伯高。」又云：「二夫人相爲服」，注云：「二夫人猶言此二人也。」昭公十年《左傳》云：「喪夫人之力」，注云：「夫人謂子尾。」又三十一年《左傳》云：「則不能見夫人，已所能見夫人者，有如河」，注云：「夫人謂季孫。」此孟子稱王驩爲「夫」，趙氏以「夫人」解之，其義一也。驩原爲副使而自專行事，孟子若與之言，謙卑則轉似爲驩所帥，高亢則又似忌其攬權而爭之，故爲往反千里，一概以默而不言處之。既不啻彼司其職，我統其成；又不致以伺問之嫌陰成疑隙，孟子與權臣共事，所處如此。若驩果以孟子爲之主，事事諸問而行，則孟子豈拒之不言乎？丑因驩自專行事，疑孟子當言，孟子因驩已自專行事，而以爲又何言。丑以孟子卿位不小於驩，疑孟子當言，孟子正以卿位不小於驩而不必言。至驩爲諂人，孟子不悅與比，此丑所知之。苟孟子

徒以其諂人，不悅與比而不言，則亦狹隘者所有，非大賢之學矣。

章指：言道不合者，不相與言。王驥之操，與孟子殊。君子處時，危行言遜，故不尤之，但不與言。至於公行之喪，以禮爲解也。**疏**「道不」至「解也」○正義曰：「道不同，不相爲謀」、「邦有道，危言危行；邦無道，危行言遜」，皆《論語》文。閩本以「道不合者不相與言」誤入注中。

孫授易授詩校字

孟子正義卷八終

孟子正義卷九

江都縣鄉貢士焦循撰集

孟子自齊葬於魯。反於齊，止於嬴。充

虞請曰：「前日不知虞之不肖，使虞敦匠。

事嚴，虞不敢請，今願竊有請也：木若以美

然。」**注**孟子仕於齊，喪母，歸葬於魯。嬴，齊南邑。

充虞，孟子弟子。敦匠，厚作棺也。事嚴，喪事急。

木若以泰美然也。**疏**注「孟子」至「然也」○正義曰：顧

氏炎武《日知錄》云：「孟子自齊葬於魯，言葬而不言喪，此

改葬也。禮，改葬總，事畢而除。故反於齊，止於嬴，而充虞

乃得承間而問。若曰奔喪而還，營葬方畢即出赴齊卿之位，

而門人未得發言，可謂「三月無君則皇皇如也」。而身且不

行三年之喪，何以教滕世子哉？」閻氏若璩《釋地》云：「京

山郝氏解孟子爲行三年之喪云：「或問：孟子歸葬於魯，時

未幾也。充虞治木言前日耳。輒反於齊，豈不終喪而遂復爲齊卿乎？按，喪禮三日成服，杖拜君命及衆賓，不拜棺中之賜。禮，凡尊者有賜則明日往拜，喪則孝子不忍遽死其親，故贈槨之賜拜於葬後。孟子奉母仕於齊，母卒，王以卿禮含槨。及歸魯三月而葬，反於齊，拜君賜也。其止於嬴，何也？禮，衰絰不入公門。大夫去國，踰竟爲壇位，鄉國而哭，此喪禮也，故自魯越國至齊境上爲壇位，成禮於嬴。畢，將遂反也。」郝氏可爲精矣，少錯解「止於嬴」句。嬴，齊南邑。《春秋》桓三年「公會齊侯於嬴」，杜注云：「嬴，今泰山嬴縣。」按，嬴縣故城在萊蕪縣西北四十里，北汶水之北，去齊都臨淄尚三百餘里，安有拜君賜於三百餘里之外者？且衰絰不入公門，未聞不入國門也。爲壇位而哭乃出亡禮，非喪者所用。蓋孟子母歿於齊，及奉喪來歸，皆哀戚匆遽，無暇可語，惟至往齊拜賜，舍於逆旅，始得以一論匠事耳。」又曰：「或問：子以孟子奉母仕於齊，亦有徵乎？余曰：徵之劉向《列女傳》，云「孟子處齊，有憂色，擁楹而歎，孟母見之」云云，則知母蓋同在齊，自齊葬於魯，則知母即歿於齊也。然則既歿而葬，宜終喪於家，曷爲而遽反於齊？余曰：此蓋終三年喪，復至齊而爲卿，非遽也。果爾，何以爲「前日」解？余曰：《孟子》之書，有以昔與今對言，昔似在所遠而

亦有指昨日者，「昔者辭以疾」是也，「以前日與今日對言，前日似在所近而亦有指最遠者，「前日願見而不可得」是也。夫孟子久於齊而後去，去齊之日上溯其未游齊之日，猶目之爲「前日」，安在僅三年者而不可目以「前日」耶？或訝曰：充虞蓄一疑於心，至三年始發之與？余曰：此尤足見孟門弟子之好問也。陳臻從於齊、於宋、於薛辭受之後而問，屋廬子從居鄒、處平陸，以至見季任、不見儲子之後而問，其事之相距誠非止一二年，而歷歷記憶，反覆以究其師之用心者，猶一日也。夫充虞亦猶是耳。且尤可證者，孝子之喪親，言不文。今也援古論今，幾於文矣。三年之喪，言而不語。語，爲人論說也。後魏孝文帝以與公卿往復追用慟絕，曰：「朕在不言之地，不應如此喋喋。」然則孟子反喋喋邪？故充虞問答，斷自於免喪之後者爲得其實。」毛氏奇齡《經問》云：「孔子要經而赴季氏之饗，孟子甫葬即來齊，聖賢行事有不可以憑臆斷者。先仲氏嘗謂：自齊葬魯，則必喪在齊而葬於魯者，若母喪在魯，則其文當云『孟子自齊奔喪於魯』。戰國游士多家於齊。以孟母嫠婦，孟子孤兒，則出必偕出，處必偕處，未有拋母居魯而可獨身仕齊者。故《列女傳》云：『孟子處齊，有憂色。孟母見之。』是孟母與孟子同在齊國，有明據矣。特以墳墓在魯，不得不至魯合葬。而究

之，魯翻無家而齊有家，故記曰「反於齊」。反者，反哭之反也。且本文序事，原有文法。其云「自齊」者謂葬自齊也，非謂孟子自齊而還魯也。若謂孟子自齊還魯，則葬需三月，未有甫還魯即葬者，亦未有在齊聞赴，至三月而始還葬於魯者。是必斂尸殯堂，獻材井椁諸節行之在齊，至三月而歸葬於魯，故甫葬而即反齊，以亡者噫歆尚在齊也。近儒閻潛丘云葬魯反齊，當是終三年喪後復至齊爲卿云云。吾仍以《孟子》本文解之。其曰止嬴而充虞問者，謂充虞之問在止嬴時也。然則何故止嬴以反於齊也？何以反齊以葬於魯也？然則此止嬴接葬魯時矣。若在三年後，則直以「充虞問曰」記作起句，與「陳臻問曰」正等，何必序自齊反齊諸來歷乎？且充虞明曰「嚴，虞不敢請，今願有請」，兩請相接，正頂嚴字，謂大斂時也。三年後，不嚴久矣。其所以不敢請者，以三年不言故，初非以三年嚴故，何必又接此句？若以孝子喪親言不文，三年之喪言而不語爲據，則居喪不言不對之說，言人人殊。《孝經》云「言不文」，謂不飾語詞耳，非不言也。若曲禮「居喪不言樂」，第不言作樂之事而他事皆可言，《雜記》云「三年之喪，言而不語，對而不問」，則他事自可言而不得告語，可對人之問而不得問人，非謂言事與答問皆當絕也。至《問傳》與《喪服四制》皆云「斬衰唯而不對，齋

衰對而不言」，此則又稍刻者。然孟子齋衰，亦尚在對之之列，雖在他事尚可對，而況祇問喪。而三年之間，竟不置對，並無此禮。況人第知居喪不言，而不知居喪則必言。喪事重大，正須言說講論以求其故。故《既夕禮》云「非喪事不言」，謂喪事必言，非喪事故不言耳。蓋論議喪事，古分貴賤。天子諸侯不自言喪事，臣下得代言之。《四制》所云「百官備，百官具，不言而事行」者，此天子諸侯禮也。若大夫與士，則必身為論議然後得備物具禮。《四制》所云「言而後事行」者，此大夫士禮也。至庶人則不止言之，論議之，且必身執其事，故曰「身自執事而後行」。則在大夫與士，正當論議，而以大對不言之例律之，是戒諫官以緘口，於禮悖矣。是以《曲禮》「居喪未葬讀喪禮，既葬讀祭禮」。所謂讀者，謂講說而討論之。則孟子此時可講祭禮，而況棺槨厚薄之間乎？「周氏廣業《孟子出處時地考》云：『孟子居母憂三年，非喪事不言，獨充虞一答為喪葬盡禮之大者，故記之。』「自齊」至「止嬴」十一字括數年行止，藏無限心事。後人誤認「止」為舍於逆旅，遂使異說紛起，可歎也。夫止嬴非即至齊也。止如《綿》詩「曰止曰時」之止，留也，留於此而終喪也。誠使既至於齊，則言反足矣，①何必復言止於嬴？若云因充虞敦匠事於此，故繫之，則後有路問之例，亦不必詳其地。

況往送如慕，其反如疑，當此時而信宿中途，何為乎？蓋嬴去臨淄尚遠，《史記正義》：「故嬴縣在兗州博城縣東北百里。」乃齊之邊境近魯與鄒者也。或謂：孟子葬母於魯，乃不即廬於魯或徑歸鄒，而必反齊止嬴，何也？古無廬墓之說。蓋葬以藏體魄，其魂氣每於居常遊息之地有餘戀焉，故送形而往，迎精而反。葬日必速反而虞，孟子所以不廬於魯而反也。遭喪去國，未嘗致為臣，安得遽旋故里？孟子所以不反於鄒而反於齊也。反齊矣，於嬴是止者，孟子之自齊葬魯，以孟母之生就養於齊也。《列女傳》載：孟子處齊，有憂色，孟母問之，對曰：「道不用於齊，願行而母老，是以憂也。」孟母曰：「夫死從子，禮也。子行乎子禮，吾行乎吾禮。」揆當日情事，孟子之久留齊固由王足為善，實因母老待養。而又不欲藉口祿仕，故特不受其田里，亦不拘於職守，因得優游終養以終母餘年。《晉書》劉長盛曰：「子輿所以辭大夫，良以色養無主故耳。」斯言深得其意。迨葬母而反，終喪之禮，又可以義起。《喪服小記》云：「遠葬者，②比反

①「反」，原誤作「及」，今據《孟子四考》改。

②「遠」，原誤作「速」，今從沈校據《禮記》及《孟子四考》改。

哭者皆冠，及郊而後免反哭。」此言本國臣民墓在四郊之外者也。孟子居師賓之位，不與在朝廷諸臣一律。且已奉喪越竟而葬，其去始死纔三月餘。方哀親之在外而居於倚堊，^①哀親之在土而寢苦枕塊。豈忍遽加冠飾，遠入人國都之理？於是權其所止。羸爲齊地而介鄒、魯之間，可以展墳墓，望宗廟，銜恤以待喪畢，因爲五虞卒哭練祥之所。此實孟子有望弗至之至情，權而不失其經者也。《毛詩·邶風》「王事敦我」，傳云：「敦，厚也。」故以「敦」爲「厚」。匠爲作棺，事爲喪事，嚴爲急，急者謂不暇也。趙氏讀「敦匠」句，「事嚴」句。孔氏廣森《經學卮言》云：「敦，治也。讀如「敦商之旅」之敦。」曰：「古者棺槨無度。中古棺七寸，槨稱之，自天子達於庶人。非直爲觀美也，然後盡於人心。」**注**孟子言古者棺槨厚無尺寸之度。中古謂周公制禮以來。棺厚七寸，槨薄於棺，厚薄相稱相得也。從天子至於庶人，厚薄皆然，但重累之數，牆翬之飾有異，非直爲人觀視之美好也。厚者難腐朽，然後能盡於人心所不忍也。謂一世之後，孝子更去辟世，是爲人盡心也；過是以往，變化自其理也。

疏注「中古」至「理也」○正義曰：

《周易·繫辭傳》云：「古之葬者，厚衣之以薪，葬之中野，不封不樹，喪期無數。後世聖人易之以棺槨，蓋取諸《大過》。」《禮記·檀弓》云：「有虞氏瓦棺」，注云：「始不用薪也。」又云「夏后氏聖周，殷人棺槨，周人牆置翬」，注云：「有虞氏上陶。火熟曰聖。燒土，治以周於棺也。或謂之土周，由是也。槨，大也，以木爲之，言槨大於棺也。殷人上梓。牆，柳衣也。」然則棺始於唐虞而槨始於殷人。殷雖備棺槨，尚無尺寸之度，是古者指殷以前，而周乃有尺寸，是中古指「周公制禮以來」也。孔氏廣森《經學卮言》云：「中古尚指周公以前。周公制禮，則自天子至於庶人皆有等。故《喪大記》曰：『君大棺八寸，屬六寸。下大夫大棺六寸，屬四寸。士棺六寸。』夫子制於中都，亦爲四寸之棺，五寸之槨，是庶人不得棺槨同七寸矣。《易·繫辭》「後世聖人易之以棺槨」，大抵通言黃帝堯舜。墨子偏主節葬之說，然已云「禹有桐棺三寸」，則木槨代瓦不始於殷，而《檀弓》特舉殷人棺槨，似殷正始定棺槨尺寸之度者也。孟子多言殷法。分田則取助不取徹，分國則言三等不言五等。《春秋》變周之文，從殷之質。孟子學長《春秋》，每於此見之。」趙氏云「重累之數，牆

①「親」，原脫，今從沈校據《孟子四考》補。

嬰之飾」者，《檀弓》云：「天子之棺四重。水兕革棺被之，其厚三寸，柁棺一，梓棺二。四者皆周。」注云：「諸公三重，諸侯再重，大夫一重，士不重。以水牛兕牛之革以爲棺，被革各厚三寸，合六寸。此爲一重。柁棺，所謂裨棺也。梓棺，所謂屬與大棺。」《喪大記》於天子言屬六寸，裨四寸，上大夫屬六寸，下大夫屬四寸，注云「大棺，棺之在表者也。」《檀弓》曰「天子之棺四重」云云，此以內說而出也。然則大棺及屬用梓，裨用柁，以是差之。上公革棺，不被三重也；諸侯無革棺，再重也；大夫無裨，一重也；士無屬，不重也。《禮器》云：「天子七月而葬，五重八襲；諸侯五月而葬，三重六襲；大夫三月而葬，再重四襲。」注云：「五重者，謂抗木與茵也。葬者抗木在上，茵在下土。」《喪禮》下篇陳器曰：「抗木橫三縮二，加抗席三，加茵用疏布，緇剪有幅，亦縮二橫三。」此士之禮一重者。以此差之，上公四重。正義引皇氏云：「下棺之後，先加折於壙上以承抗席。折猶廢也，方整連木爲之，蓋如牀。縮者三橫者五，無簣，於上加抗木，抗木之上加抗席三，此爲一重。如是者五則爲五重。」然則棺有重數在棺內，椁有重數在棺外，所謂「重累之數」也。《周禮·天官·縫人》：「掌王宮之縫線之事，縫棺飾焉，衣嬰柳之材。」注云：「孝子既啓見棺，猶見親之身。既載飾而以

行，遂以葬。若存時居於帷幕而加文繡。」《喪大記》所云諸侯禮也。《禮器》曰：「天子八襲。」漢禮器制度：飾棺，天子龍火黼黻，皆五列，又有龍襲二，其戴皆加璧。柳之言聚，諸飾之所聚。《喪大記》云：「飾棺，君龍帷，三池，振容，黼荒，火三列，黻三列，素錦褚，加僞荒，纁紐六，齊五采五貝，黼襲二，黻襲二，畫襲二，皆戴圭。魚躍拂池。君纁戴六，纁披六。大夫畫帷，二池，不振容，畫荒，火三列，黻三列，素錦褚，纁紐二，玄紐二，齊三采三貝，黼襲二，畫襲二，皆戴綬。魚躍拂池。大夫戴前纁後玄，披亦如之。士布帷布荒，一池，揄絞，纁紐二，緇紐二，齊三采一貝，畫襲二，皆戴綬。士戴前纁後緇，二披用纁。」注云：「飾棺者，以華道路及壙中，不欲衆惡其親也。荒，蒙也。在旁曰帷，在上曰荒。皆所以衣柳也。士布帷布荒者，白布也，君大夫加文章焉。黼荒，緣邊爲黼文；畫荒，緣邊爲雲氣，火黻爲列於其中耳。『僞』當爲『帷』。大夫以上有褚，以襯覆棺，乃加帷荒於其上。紐，所以結連帷荒者也。池，以竹爲之，如小車苓，衣以青布。柳象宮室，縣池於荒之瓜端，若承露然。云君大夫以銅爲魚，縣於池下。揄，揄翟也。青質五色，畫之於絞，繪而垂之，以爲振容，象水草之動搖，行則又魚上拂池。《雜記》云：「大夫不揄絞，屬於池下。」是不振容也。士則去魚。齊

象車蓋，葵縫合雜采爲之，形如瓜分然，綴貝絡其上及旁。戴之言值也，所以連繫棺束與柳材，使相值，因而結前後披也。漢禮：娶以木爲筐，廣三尺，高二尺四寸，方兩角高，衣以白布。畫者，畫雲氣，其餘各如其象。柄長五尺，車行使人持之而從，既窆，樹於壙中。《檀弓》曰「周人牆置娶」，是也。綬當爲綬，讀如冠葵之葵，蓋五采羽注於娶首也。此所謂「牆置娶之飾」也。①「孝子更去辟世」，「辟世」猶歿世也。父死子繼曰世，終己之身，不可使父母棺槨腐朽，己身後以往，其腐朽原不能免，但及人子之身不腐朽爲盡人心所不忍也。不得，不可以爲悅；無財，不可以爲悅。得之爲有財，古之人皆用之，吾何爲獨不然？**注**悅者，孝子之欲厚送親，得之則悅也。王制所禁，不得用之，不可以悅心也。無財以供，則度而用之。禮，喪事不外求，不可稱貸而爲悅也。禮得用之，財足備之，古人皆用之，我何爲獨不然？然，如是也。**疏**「不得」至「不然」○正義曰：翟氏灝《考異》云：「《檀弓》子思與柳若論喪禮曰：『吾聞：有其禮無其財，君子弗行也，有其禮有其財，②無其時，君子弗行也。』孟子此言乃即受之於子思者。」「得之爲」猶云「有其禮」。

《禮記·檀弓》上云「不仁而不可爲也」，注云：「爲猶行也。」《方言》云：「用，行也。」爲，用皆訓行，故《荀子·富國》篇云「仁人之用國」，注云：「用，爲也。」《郊特牲》云「以爲稷牛」，注云：「爲，用也。」趙氏云「禮得用之」，解得之爲「句」，「財足備之」解「有財」句，以「用」釋「爲」，以「足備」釋「有」也。《大傳》云「其義然也」，注云：「然，如是也。」《淮南子·主術訓》云「治國則不然」，高誘注亦云：「然，如是也。」《呂氏春秋·應言》篇云「墨者師曰然」，高誘注云：「然，如是也。」趙氏以「如是」釋「然」字，與鄭氏、高氏同。閩、監、毛三本作「不然者不如是也」，意亦同。王引之《經傳釋詞》云：「家人曰：爲猶與也。《管子·戒》篇「自妾之身之不爲人持接也」，尹知章注云：「爲猶與也。」《孟子》「得之爲有財」，言得之與有財也。」○注「喪事不外求」○正義曰：隱公三年《公羊傳》云：「武氏子來求賻，何以書？譏。何譏爾？喪事無求。求賻，非禮也。」注云：「禮本爲有財者制。有則送之，無則制哀而已，不當求。求則主傷孝子之心。」即趙氏「不外求」之說也。莊公二十八年《穀梁傳》云：「古者稅什

①「置」，據疏例及注文當衍。

②下「有」字，原誤作「無」，今據《禮記》改。

一，豐年補敗，不外求而上下皆足。」此「不外求」謂糞田已足，不煩稱貸益之。且比化者，無使土親膚，於人心獨無忤乎？**注**忤，快也。棺槨敦厚，比親體之變化，且無令土親肌膚，於人子之心獨不快然無所恨乎？**疏**注「忤快」至「恨乎」○正義曰：《方言》云：

「逞、曉、忤、苦、快也。自關而東或曰曉，或曰逞，江淮陳楚之間曰逞，宋鄭周洛韓魏之間曰苦，東齊海岱之間曰忤，自關而西曰快。」戴氏震《方言疏證》云：「《孟子》於人心獨無忤乎」，趙氏云：「忤，快也。」義本此。高誘注《呂氏春秋》、《淮南子》皆云：「化，變也。」《淮南子·精神訓》云：「故形有摩而神未嘗化者，以不化應化，千變萬糝而未始有極。化者復歸於無形也。」高誘注云：「化猶死也。」不化者，精神，化者，形骸。死者形為灰土，為日化也。」《說文》肉部云：

「肌，肉也。」《廣雅·釋詁》云：「膚，肉也。」劉熙《釋名·釋形體》云：「體，第也。骨肉毛血表裏大小相次第也。」是膚即肌，肌膚即體。比猶至也。親，近也。棺槨不厚則木先腐，肌膚尚存，必與土近。惟棺槨敦厚則肌膚先木而化，故至肌膚不存而木猶足以護之，不使近於土。化雖有死訓而不言死言化者，以形體變化言也。成公二年《左傳》臧宣叔言「知難而有

備，乃可以逞」，注云：「逞，解也。」亦本《方言》。逞之訓為快亦為解，忤之訓為快即為逞，「獨無忤乎」猶云乃可以逞。知齊楚之同我而有以備之，則難可解免，知親體之將親於土而先厚其棺槨以護之，則恨可解免。倘無財，不可以厚，則一思及泉壤之間，終身大恨，何日解乎？吾聞之：君子不以天下儉其親。**注**我聞，君子之道，不以天下人所得用之物儉約於其親。言事親竭其力者也。

章指：言孝必盡心，匪禮之踰。《論語》曰：「生，事之以禮；死，葬之以禮。」可謂孝矣。**疏**「論語」至「孝矣」○正義曰：「生事之以禮，死葬之以禮」，見《為政》篇第二，「可謂孝矣」見《學而》篇第一。閩、監、毛三本以此屬入注中。

沈同以其私問曰：「燕可伐與？」孟子曰：「可。子噲不得與人燕，子之不得受燕於子噲。」**注**沈同，齊大臣。自以其私情問，非王命也，故曰「私」。子噲，燕王也；子之，燕相也。孟子曰「可」者，以子噲不以天子之命而擅以國與子

之，子之亦不受天子之命而私受國於子噲，故曰其罪可伐。

疏「沈同」至「子噲」○正義曰：《史記·燕世家》

云：「易王立十二年卒，子燕噲立。燕噲既立，齊人殺蘇秦。

蘇秦之在燕，與其相子之爲婚，而蘇代與子之交。及蘇秦

死，而齊宣王復用蘇代。燕噲三年，與楚、三晉攻秦。不勝

而還。子之相燕，貴重主斷。蘇代爲齊使於燕，燕王問曰：

「齊王奚如？」對曰：「必不霸。」燕王曰：「何也？」對曰：

「不信其臣。」蘇代欲以激燕王以尊子之也。於是燕王大信

子之。子之因遺蘇代百金而聽其所使。鹿毛壽謂燕王不如

以國讓相子之，燕王因屬國於子之。子之南面行王事而噲

老不聽政，願爲臣，國事皆決於子之。」此燕王子噲讓國與其

相子之之事也。《史記》此文全本《戰國策·燕策》，明云「齊

宣王復用蘇代」，與《策》同也。惟《策》云「儲子謂齊宣王：

「因而仆之，破燕必矣。」孟子謂齊宣王曰：「今伐燕，此文武

之時，不可失也。」《燕世家》則改云：「諸將謂齊湣王曰：

「因而赴之，破燕必矣。」孟子謂齊王曰：「今伐燕，此文武之

時，不可失也。」閻氏若璩《孟子生卒年月考》云：「《史記》

與《孟子》不同者，惟伐燕一事。《史記》以爲湣王，《孟子》以

爲宣王。然就《史記·燕世家》載噲初立，有「齊宣王復用蘇

代」之文，是噲與宣王同時，與《孟子》合而與《六國表》異。

《六國表》燕王噲五年乙巳讓國於子之，當湣王八年。七年

丁未，噲及子之死，當湣王十年。後年己酉，燕立太子平，是

爲昭王，當湣王十二年。若移此五年事置於宣王八年丙戌

後丁酉前，以合孟子游齊之歲月，則《戰國策》載儲子謂宣王

宜仆燕而儲子正爲相者也，王令章子將五都兵以伐燕而章

子正與游者也。」王氏懋竑《白田雜著·孟子敘說考》云：

「《通鑑》據《孟子》以伐燕爲齊宣王，而宣王卒於周顯王之四

十五年，又三年慎靚王元年，燕王噲始立，又七年，齊人伐

燕，則不可以爲宣王之事也。於是上增齊威王之十年，下減

湣王之十年，以就伐燕之歲，其增減皆未有據。而又以伐燕

爲宣王時，燕人畔爲湣王時，與《孟子》亦不合。齊湣王初年

彊於天下，與秦爲東西帝，其所以自治其國者亦必有異矣，

末年驕暴以至於敗亡。此則唐玄宗、^①秦苻堅之比。玄宗

開元之治幾於貞觀，苻堅始用王猛，有天下大半，其初豈可

不謂之賢君哉？故孟子謂「以齊王由反手」，「王由足用爲

善」，皆語其實，而湣王之「好色」、「好貨」、「好樂」、「好勇」

卒不能以自克，末年之禍亦基於此。後來傳《孟子》者乃改

①「則」，原誤作「時」，今從沈校據《白田雜著》改。

「湣王」爲「宣王」以爲孟子諱，蓋未識此意。今以宣王爲湣王則處處相合，而《通鑑》之失亦可置而不論矣。」周氏廣業《孟子出處時地考》云：「孟子事齊宣王始末，本書甚明。自《史記》誤以伐燕一事繫之湣王十年，以致諸家聚訟。《通鑑》割湣王十年以屬宣王，似矣，而錄其文不計其世。赧王元年逆推至武王有天下已八百有九年，可云「由周以來七百有餘歲」乎？《古史》直云先事齊宣王，後見梁惠、襄，又事齊湣。《黃氏日抄》據《史記》伐燕有二事：一爲宣王，即《梁惠王》篇所載；一爲湣王，即《公孫丑》篇所載。時湣王尚在，故不稱謚，止稱齊王。皆泥《史記》而變亂孟子之遊歷者也。《史記》於攻伐靡不詳記，獨齊之伐燕，《世家》、《年表》俱絕不道一字。惟《燕表》書君噲及相子之皆死，其年當湣王十年耳，然亦不言爲齊所破。至《燕世家》，本極疎略，如惠侯以下皆失名，又不言屬，桓、獻二公爲他書所無，而伐燕事則摶摶《國策》之文云：「易王初立，齊宣因喪伐我，取十城。蘇秦說，使復歸。」又云：「噲既立，齊人殺蘇秦，齊宣王復用蘇代。」夫復用蘇代者爲齊宣王，則噲立、秦死俱不在湣王初，明矣，而其下又言湣言齊，何也？且秦惠王十一年，燕王讓其臣子之。據《表》，是年子之死，是較遲二年。《趙世家》武靈王十年，齊破燕，燕相子之爲君，君反爲臣。據

《表》，在十二年。十一年，王召公子職於韓，立爲燕王，使樂地送之，是較早二年。而立職即在明年，則燕之畔齊亦不待二年矣。同在一書而前後背馳若此！試以《國策》考之。《燕策》「燕王噲既立」篇，其用蘇代及儲子勸齊宣王伐燕、孟軻謂齊王等語俱明指宣王，與《孟子》悉合。《史》乃取其文而改「儲子」爲「諸將」，於宣王之字一改爲「湣王」以曲護《年表》之失，一改爲「齊王」以影附《孟子》之書，此其當從《策》而棄《世家》，不待智者，決矣。又其前「蘇秦死」一篇載蘇代見燕王噲曰：「臣聞王居處不安，飲食不甘，思報齊，有之乎？」王曰：「我有深意積怒於齊，欲報之，二年矣。齊者，我讎國也，寡人所欲報也。」代又言「齊王，長主也。南攻楚，西攻秦，又舉五千乘之勁宋」云云。《大事記》謂此說昭王之辭，《策》誤爲噲，是也，然此齊王決非湣王。何也？湣王即位未久，其對齊貌辨，自言「寡人少，殊不知此」，①何得遽稱「長主」，其所稱「舉宋」者，據《宋策》，康王前兩言「齊攻宋」，又言「拔宋五城」，即其事也。如依《田完世家》以湣王三十八年滅宋事當之，則燕昭王已立二十六年，與「欲報二年」更不合。則知是時宣王尚在也。宣王年老，故稱「長主」也。

①「殊」，原誤作「殆」，今據《戰國策》及《孟子四考》改。

《齊策》曰：「張儀以秦、魏伐韓，齊王將救之。田臣思曰：『王之謀過矣。子噲與子之國，百姓勿戴，諸侯勿與。秦伐韓、楚，趙必救之。是天以燕賜我也。』齊因起兵攻燕。三十日而舉燕。」所謂「三十日舉燕」者，非即《孟子》稱「五旬而舉」者乎？《策》係之閔王即湣王，固誤。《史》則刪却「子噲」句，輒舉其詞，雜入邯鄲之難、南梁之難二篇，繫之桓公五年，又係之威王二十六年，又係之宣王二十二年。文雖三見，終不及伐燕子噲一語，大可怪也。按，田臣思，《索隱》謂即田忌。《史》謂其與鄒忌不善，亡之楚，宣王召而復之。其說王伐燕爲宣王甚明。又《趙策》武靈王首篇云：「齊破燕，趙欲存之。樂毅請以河東易燕地於齊王，從之。楚、魏憎之，令淖滑、惠施之趙，請伐齊而存燕。」武靈元年《史表》當齊宣王十八年，《策》係於首，則知破燕在其前矣。《魏策》襄王記云：「楚許魏六城，與之伐齊而存燕。張儀欲敗之，謂魏王曰：『齊畏三國之合也，必反燕地以下楚。』」據《史》，儀相魏在襄十三年。《張儀傳》魏人上郡，少梁於秦，又在其前數年。則知敗魏伐齊之事必在相秦惠王時。約其年，亦宣王時也。夫《史》之踳駁既如彼，《策》之明白又如此，伐燕之斷非湣王十年而在宣王三十年內外，灼然無疑矣。至謂伐燕前事即《梁惠王》篇所載，尤非。夫易王初立，何至虐民而

謀置君？乘喪伐人，豈得云「拯之水火」？取僅十城，旋因蘇秦之說歸之，何云「倍地」，且欲出令反旄倪、止重器也？若以稱謚與否爲斷，則「莊暴」章終篇不見「宣」字，將亦謂之湣王邪？林希元《四書存疑》云：「宣王曾以取燕問，不用孟子言而致燕畔，此所以慙於孟子也。若湣王，何慙之有？不曰宣王而曰王，亦偶然致辭不同耳。」○注「沈同齊大^臣」○正義曰：沈同無考。知爲齊大臣者以下云「彼然而伐之」，則同必齊王左右之臣，能主軍國大事。是大臣也。有仕於此而子悅之，不告於王而私與之吾子之祿爵，夫士也，亦無王命而私受之於子。則可乎？何以異於是？」^注子謂沈同也。孟子設此以譬燕王之罪。^疏「有仕於此」○正義曰：《論

衡·刺孟》篇述此文，仕作士。《四書辨疑》云：「仕當作士，傳寫之差也。」翟氏灝《考異》云：「《禮記·曲禮》『士載言』，注云：『士或爲仕。』《周禮·載師》『以宅田、士田、賈田任近郊之地』，注云：『士，讀爲仕。』《後漢書·趙壹傳》『昔人或思士而無從』，注以『思士』爲孟軻，蓋亦以士讀仕。仕與士

①「臣」，原誤作「夫」，今據注文及疏文改。

古多通用，不必定傳寫差也。」○「夫士也」○正義曰：「夫士」猶言「夫人」。王氏引之《經傳釋詞》云：「夫猶此也。」

《禮記·檀弓》曰：「夫夫也，爲習於禮者」，鄭注曰：「夫夫猶言此丈夫也。」僖三十年《左傳》曰：「微夫人之力不及此。」

成十六年曰：「夫二人者，魯國社稷之臣也。」襄二十六年曰：「君淹恤在外十二年矣，而無憂色，亦無寬言，猶夫人也。」言猶然如此之人也。《魯語》曰：「鼈於何有而使夫人怒也？」《論語·先進》篇曰：「夫人不言，言必有中。」《孟子·公孫丑》篇曰：「夫士也，亦無王命而私受之於子。」夫皆此也。」齊人伐燕。」

注沈同以孟子言可，因歸勸其王伐燕。或問曰：「勸齊伐燕，有諸？」**注**有人問，孟子勸齊王伐燕，有之？曰：「未也。」沈

同問燕可伐與，吾應之曰可，彼然而伐之也。

注孟子曰：我未勸王也。同問可伐乎，吾曰可，彼然而伐之。彼如曰：「孰可以伐之？」則將應之曰：「爲天吏則可以伐之。」**注**彼如將問我

曰：誰可以伐之？我將曰：爲天吏則可以伐之。

天吏，天所使，謂王者得天意者也。彼不復問孰可，

便自往伐之。今有殺人者，或問之曰：「人可殺與？」則將應之曰：「可。」彼如曰：「孰可以殺之？」則將應之曰：「爲士師則可以殺之。」今以燕伐燕，何爲勸之哉？」**注**今有殺人者，問此人可殺否？將應之曰可。爲士官主獄則可以殺之矣。言燕雖有罪，猶當王者誅之耳。譬如

殺人者雖當死，士師乃得殺之耳。今齊國之政猶燕政也，不能相踰，又非天吏也，我何爲當勸齊伐燕乎？**疏**注「問此人可殺否」○正義曰：問人可殺，不得應之曰可，惟殺人者死，則可殺也。故「人可殺」之人指此殺人之人。○注「我何爲當勸齊伐燕乎」○正義曰：《國語·晉語》云「非德不當讎」，注云：「當猶任也。」謂沈同等勸王伐燕，何爲以我爲任此勸齊伐燕之事乎？《文選·甘泉賦》

注引鄭氏注云：「當，主也。」意亦與任同。《論衡·刺孟》云：「夫或問孟子勸王伐燕，不誠是乎？沈同問燕可伐與，此挾私意欲自伐之也。知其意嫌於是，宜曰：「燕雖可伐，須爲天吏乃可以伐之。」沈同意絕，則無伐燕之計矣。不知有此私意而徑應之，不省其語，是不知言也。孟子，知言者

也，又知言之所起之禍，其極所致之禍，見彼之問則知其措辭所欲之矣。」按：燕噲之事，君臣易位，其亂極矣。觀燕民簞食壺漿以迎齊師，則燕民望救如望雲霓矣。例以孔子沐浴而朝，則爲齊贊畫出師，固孟子之心也。而不遽發者，特以握權主事別自有人，萬一齊師既出，未必終其拯救之心，將有如儲子之破燕必矣。田臣思云「天以燕賜我」者，溯厥所由，倡謀有在，形迹已著，分辨未能。迨至沈同私問，未必非陰承王旨，將假大賢一語以爲戡克借端。斯時孟子豈不知之？阻之，非拯亂之心，詳之，失進言之體。第以「可」應之，言子噲子之當伐，誠立言之當矣。自是匡章將五都之兵，因北地之衆，士卒不戰，城門不閉，雖湯武之舉，誠未過此，所謂「齊人伐燕，勝之」也。是時宣王以齊師之出，端由孟子，故質之以諸臣之議，告之以「天與」之機。孟子是時慨然陳文王、武王之事，戒之以「益深益熱」之虞，是即明告以天吏之爲與所以可伐之故。使宣王是時聽而從之，則以德行仁之道於齊見之，而勸齊伐燕之策，孟子亦何不可當之乎？乃廟毀器遷，諸侯兵動，王又咨焉。孟子是時固又反覆詳明，陳其利害，顯告以王速出令，反旄倪、止重器，謀于燕衆，爲之置君，則仍天吏之所爲也。乃至王終不悟而諸侯之謀定，燕人立太子平，此王所以慙也。而時人不知，仍以

勸伐之謀惟孟子當之，此孟子所以以「天吏」明之而以爲「燕伐燕」也。蓋沈同之私問在未伐燕之先，斯時誠無容阻而絕之。既兩對宣王之問，則燕所以可伐，所以須爲天吏，孟子非不琅琅言之。而時人勸齊伐燕之疑則在取燕之後。方伐燕未取燕，王師也，拯民水火也，非「燕伐燕」也，可勸也；既取燕，則水益深也，火益熱也，是乃「燕伐燕」也，不可勸也。至于以燕伐燕而以勸齊疑孟子，孟子所不受矣。《梁惠王》篇所載皆對齊王之言，故與梁惠王、滕文公、鄒穆公、魯平公等相次。《公孫丑》篇所載皆對齊臣之言，故與景丑氏、孔距心、軻肅王謹等相次。其互見之旨，思之自著。孟子兩對宣王，皆明燕雖可伐，須爲天吏之說，豈必沈同私問之時不耐而預刺刺言之乎？王充淺學，詎足知大賢哉？

章指：言誅不義者必須聖賢。禮樂征伐自天子出，王道之正也。**疏**禮樂征伐自天子出（○正義曰：見《論語·季氏》篇第十六）。

燕人畔。王曰：「吾甚慙於孟子。」**注**燕人畔，不肯歸齊。齊王聞孟子與沈同言爲未勸王，今竟不能有燕，故慙之。**疏**注「燕人」至「慙之」（○正義

曰：宣王欲取燕，孟子告以置君。及燕人立公子平，則燕人自立君，不肯歸附於齊矣。此所謂「燕人畔」也。畔與叛同，違背之意，故以不肯歸齊爲畔。此皆宣王事。至燕昭王用樂毅下齊城，乃潛王事耳。陳賈曰：「王無患焉。王自以爲與周公孰仁且智？」王曰：「惡！是何言也？」**注**陳賈，齊大夫也。問王曰：自視何如周公仁智乎？欲爲王解孟子意，故曰：王無患焉。王歎曰：是何言？言周公何可及也？**疏**

注「陳賈齊大夫」○正義曰：《國策·秦策》：「四國爲一，將以攻秦，秦王召羣臣賓客六十人而問焉。姚賈對曰：『云云。』高誘注云：『姚賈譏周公誅管蔡不仁不智者，在《孟子》之篇也。』鮑彪注云：『高誘，妄人也。此策以姚賈爲陳賈，初不考其歲月。賈乃與李斯同時，安得見於《孟子》之書？』《魏策》：『周最入齊，秦王怒，令姚賈讓魏王。』鮑彪注云：『按，此姚賈與始皇所問之人相去八十餘年，高誘欲以爲陳賈，若此人者可也。蓋陳，舜後，得爲姚姓，而孟子與秦武、魏哀時猶得相及，獨以最、韓非相毀之人爲此人，則年時相絕太遠矣。』按：高誘嘗注《孟子》。其以陳賈即秦臣姚賈，當時必有書可證。《趙策》又有姚賈，趙使約韓、魏，茅舉以爲趙

之忠臣，吳師道以爲時不可考。顧韓非以賈爲梁之大盜，趙之逐臣而不言其仕齊，此陳賈爲齊王說，則齊臣也。趙氏注《孟子》，訓詁多與高氏同，而此但云「齊大夫」，其言慎矣。曰：「周公使管叔監殷，管叔以殷畔。知而使之，是不仁也；不知而使之，是不智也。仁、智，周公未之盡也，而況於王乎？賈請見而解之。」**注**賈欲以此說孟子也。**疏**注「賈欲以此

說孟子也」○正義曰：《詩·衛風·氓》：「猶可說也」，**注**《淮南子·道應訓》：「以說於衆」高誘注，皆云：「說，解也。」故以「說」釋「解」。見孟子，問曰：「周公，何人也？」

注賈問之也。曰：「古聖人也。」**注**孟子曰：周公，古之聖人也。曰：「使管叔監殷，管叔以殷畔也，有諸？」**注**賈問有之否乎？曰：「然。」

注孟子曰：如是也。曰：「周公知其將畔而使

①「最」，原誤作「毀」，今從沈校據《戰國策》鮑注改。

②「也」下，據全書文例當脫「一箋」字，或焦疏誤以此處亦屬高誘注，故下云「皆」。

之與？」**注**賈問之也。曰：「不知也。」**注**孟子

曰：周公不知其將畔也。「然則聖人且有過與？」**注**過，謬也。賈曰：聖人且猶有謬誤。**疏**注

「過謬」至「謬誤」○正義曰：《國策·秦策》云「王之料天下過矣」，高誘注云：「過，謬也。」又「過聽於張儀」，高誘注云：「過，誤也。」曰：「周公，弟也；管叔，兄也。」

周公之過，不亦宜乎？**注**孟子以為，周公雖知

管叔不賢，亦不必知其將畔。周公惟管叔弟也，故

愛之；管叔念周公兄也，故望之，親親之恩也。周

公於此過謬，不亦宜乎？**疏**注「周公」至「恩也」○正

義曰：《周書·金縢》云「管叔及其羣弟乃流言於國」，某氏

傳云：「周公攝政，其弟管叔及蔡叔、霍叔乃放言於國以誣

周公。」孔氏正義云：「《孟子》曰：『周公，弟也；管叔，兄

也。』《史記》亦以管叔為周公之兄。」孔似不用《孟子》之說，

或可；孔以其弟謂武王之弟，與《史記》亦不違也。乃下「公

將不利於孺子」，傳云：「三叔以周公大聖，有次立之勢。」然

則孔自以周公為武王弟，管叔為周公弟，乃為有「次立」之勢。「其弟管叔」承「周公攝政」之下，自指為周公弟，非承上

為武王弟也。蓋漢時原有二說。《史記·管蔡世家》：「武王

同母兄弟十人，其長子曰伯邑考，次曰武王發，次曰管叔鮮，

次曰周公旦。此以管叔為周公之兄也。《列女傳·母儀》篇

云：「太姒生十男，長伯邑考，次武王發，次周公旦，次管叔

鮮。」「白虎通·姓名》篇「文王十子」引《詩》傳云：「伯邑考，

武王發，周公旦，管叔鮮。」此以周公為管叔之兄也。盧氏文

昭校《白虎通》引孫侍御云：「此所引《詩》傳疑出《韓詩內

傳》，以周公為管叔之兄，與趙岐注《孟子》合。」按：《白虎

通·誅伐》篇云：「《尚書》曰『肆朕誕以爾東征』，誅弟也。」

又云：「誕以爾東征」，誅祿甫也。誅弟正指管、蔡，不可以

蔡統管。若管是周公兄，則宜以管統蔡云「誅兄」。今云「誅

弟」，則管、蔡皆周公弟也。高誘注《淮南子·汜論訓》云：

「管叔，周公兄也。」此用《史記》；注《呂氏春秋·開春》篇

云：「管叔，周公弟。」又注《察微》篇云：「管叔，周公弟也；

蔡叔，周公兄也。」誘亦嘗注《孟子》者也。《後漢書·樊儵

傳》儵云「周公誅弟」，注云：「周公之弟管蔡二叔流言於

國。」又《張衡傳·思玄賦》云：「旦獲譴於羣弟兮，啓金縢而

乃信。」注云：「成王立，周公攝政。其弟管叔、蔡叔等謗言

云：『公將不利於孺子。』周公乃誅二叔。」《魏志·毋丘儉》討

司馬師表云：「《春秋》之義，大義滅親。故周公誅弟。」嵇

康《管蔡論》云：「按記，管、蔡流言，叛戾東都。周公征討，誅凶逆。頑惡顯著，流名千里。且明父聖兄曾不鑒凶愚於幼穉，覺無良之子弟，而乃使理亂殷之弊民。」下云：「文王列而顯之，發，旦二聖舉而任之。」又云：「三聖未爲不明，則聖不佑惡而任頑凶，不容於時世，則管、蔡無取私於父兄。」此論正本《孟子》發之，而以文、武、周公爲管、蔡之父兄，與趙氏同。李商隱《雜記》云：「周公去弟。」此皆以周公爲兄者。毛氏奇齡《四書臆言》云：「予嘗以此質之仲兄及張南士，亦云此事有可疑者三。周公稱公而管叔以下皆稱叔，一；周公先封周，又封魯，而管叔並無畿內之封，二；周制立宗法以嫡弟之長者爲大宗，周公、管、蔡皆嫡弟而周公爲大宗，稱魯宗國，三。趙氏所注，非無據也。」周氏柄中《辨正》云：「趙氏以周公爲兄，管叔爲弟，《列女傳·母儀》篇數太姒十子，亦以管、蔡爲周公弟。《鄧析子·無厚》篇云：「周公誅管、蔡，此於弟無厚也。」《傳子·通志》篇云：「管叔，蔡叔弟也，爲惡，周公誅之。」又《舉賢》篇云：「周公誅弟而典型立。」漢晉諸儒固有以管叔爲周公弟者，不特臺卿此注也。」按：趙氏自有所本，但孟子直云：「周公，弟也，管叔，兄也。」自是以管叔爲周公之兄。程氏瑤田《通藝錄·論學小記》云：「父子相隱，是事已露而私之也；周公使管叔

監殷，是事未形而私之也。周公之爲不知而使，不待言。然自陳賈言之，以爲不智，何說之辭？自孟子言之，則曰「周公，弟也，管叔，兄也」，故私其兄而不疑之。此乃天理人情之至，斷無疑其兄畔之理。故曰：「周公之過，不亦宜乎？」惟孟子爲能善道聖人。天下無於兄弟而動畔之念者，則無疑於兄弟畔之人也。一切「不仁」「不智」皆以私心測聖人，而不知聖人之公，不過自遂其私而已。故可以使之，可以過而過之。陳賈何知焉！且古之君子，過則改之；今之君子，過則順之。古之君子，其過也，如日月之食，民皆見之；及其更也，民皆仰之。今之君子豈徒順之，又從爲之辭！注古之所謂君子，真聖人賢人君子也。周公雖有此過，乃誅三監，作《大誥》，明勅庶國，是周公改之也。今之所謂君子，非真君子也。順過飾非，就爲之辭。孟子言此，以譏賈不能匡君而欲以辭解之。疏注「乃誅」至「之也」○正義曰：《尚書序》云：「武王崩，三監及淮夷畔。周公相成王，將黜殷，作《大誥》。」《毛詩正義》引鄭氏注云：「三監，管叔、蔡叔、霍叔三人，爲武庚監於殷國者也。」王氏鳴盛《尚書後案》云：「《逸周書·作雒解》云：「武王克殷，立王子

祿父，俾守商祀。建管叔於東，蔡叔、霍叔於殷，俾殷監臣。」是管、蔡、霍爲三監之明文。《金縢》云：「武王既喪，管叔及其羣弟乃流言於國曰：『公將不利於孺子。』」周公乃告二公曰：「我之弗辟，我無以告我先王。」周公居東二年，則罪人斯得。」《列子·楊朱》篇云：「四國流言，周公居東三年，誅兄放弟。」《史記·周本紀》云：「管叔、蔡叔羣弟疑周公，與武庚作亂畔周。周公奉成王命伐誅武庚、管叔，放蔡叔。」此周公「誅三監」之事也。《大誥》云：「王若曰：『猷大誥爾多邦，越爾御事。』」又云：「肆予告我友邦君，越尹氏、庶士、御事曰：『予得吉卜，予惟以爾庶邦于伐殷逋播臣。』」是「明敕庶國」之事也。劉氏台拱《周公居東論》云：「武庚席勝國之餘業，地方千里，連大國以窺周室。而管、蔡以骨肉至親爲之陰伺虛實，相機舉事，表裏相應，動出百全。然猶以周公之故，不敢遽發。故以流言之謗爲反間之謀，意欲先陷周公而後逞志於成王。」《詩》曰：「相彼雨雪，先集爲霰。」禍亂之萌見於此矣。而周公於此顧乃懵然而不察，坦然而無疑，引嫌畏罪去，不旋踵以墮於敵人之術中。直至四國並起，猖獗中原，然後倉皇奔命，僥倖於一日之成功。則周公之智，何遠出管、蔡下哉？論者必曰：「周公，弟也，管叔，兄也。豈忍料其將變哉？」此以施於使監之時則至言也，施之於流言之後則妄說也。今有人

聞謗而不辨者，是君子也，無故加己以篡弑之名而安然不問，則冥頑不靈之人而已矣。況其爲反間之謀，覬覦之漸，豈有安然受之而不究所從來者乎？是故流言之初起也，周公萬萬不料其爲管、蔡而心識其爲商人之間己，則不敢以不察。察而得之，必且始而駭，中而疑，終則痛哭流涕，引以爲終身之大惑。此天理人情之至，以義推之而可見者也。而謂周公必當守不忍料之意以終身，則舜何以知象之將殺己哉？「鴟鵂鴞，既取我子，無毀我室。」迨天之未陰雨，徹彼桑土，綢繆牖戶。」成王二公未始以爲憂而公獨識之，^①此所謂「罪人斯得」者也。鴟鵂取子以喻管、蔡爲武庚之所脅從。「恩斯勤斯，鬻子之閔斯」，所以未減其倡亂之罪而不忍盡其辭，親親之道也。至於閔王業之艱難，懼覆亡之無日，情危辭蹙，幾於大聲而疾呼，自書契以來，哀慟迫切，未有若此詩之甚者。而說者紛紜顛倒，致使周公救亂之志闇而不章，豈不惜哉？一按：三監之建在武王時，賈以爲周公使之，已非其實。至於東征破斧，零雨心悲，公自行其所當然，原非謂先此誤使，爲斯救敗之舉也。惟孟子不爲周公辨過而轉爲周公任過，且謂其能改過，特以取燕之舉過於前不能改於後，假周公之事以

① 「而」下，經解本有「周」字。

貶齊耳。必謂誅三監、作《大誥》爲周公改過之徵，尚非孟子之指矣。○注「順過飾非」○正義曰：《荀子·成相》篇云：「拒諫飾非，愚而上同。」

章指：言聖人親親，不文其過；小人順非，以諂其上也。**疏**「聖人」至「上也」○正義曰：

《論語·子張》第十九云：「小人之過也，必文。」《禮記·王制》云「順非而澤」，《荀子·宥坐》篇孔子論少正卯亦云「順非而澤」。按：澤即釋，謂順其非而爲之解釋。或云潤澤，失之。

孟子致爲臣而歸。

注辭齊卿而歸其室也。

疏注「辭齊」至「室也」○正義曰：《禮記·王制》云：「七十致政」，注云：「致政，還君事。」《明堂位》云「七年致政於成王」，注云：「致政，以王事歸授之。」宣公元年《公羊傳》云「退而致仕」，注云：「退，退身也。致仕，還祿位於君。」然則「致」之義爲還。孟子爲卿於齊，是爲齊之臣也。致爲臣，是還此爲臣於齊，不爲其臣也。還此爲臣於齊，即是辭齊卿也。下「王就見」則孟子尚在齊，故非歸鄉，是不立朝而退歸其室也。王就見孟子，曰：「前日願見而不可

得，**注**謂未來仕齊也，遙聞孟子之賢而不能得見之。得侍同朝，甚喜。**注**來就爲卿，君臣同朝，得相見，故喜也。**疏**注「來就」至「喜也」○正義曰：孔氏廣森《經學卮言》云：「《章句》言來就爲卿，君臣同朝，得相見，故喜之也。然則「得侍同朝」者，謙辭，言與孟子得爲君臣而同朝也。」「甚喜」，王自言甚喜也。俗讀「得侍」絕句者，謬。」按：《說文》人部云：「侍，承也。」手部云：「承，奉也，受也。」惟孟子來就齊王，乃得承受之，與之同朝。《禮記·喪大記》云「大夫之喪，大胥侍之」，注云：「侍猶臨也。」或趙氏解侍爲臨，謂孟子來臨於齊，故云「來就爲卿」。今又棄寡人而歸，**注**今致爲臣，棄寡人而歸也。不識可以繼此而得見乎？**注**不知可以續今日之後，遂使寡人得相見否？對曰：「不敢請耳，固所願也。」**注**孟子對王，言不敢自請耳，固心之所願也。孟子意欲使王繼今當自來謀也。他日，王謂時子曰：「我欲中國而授孟子室，養弟子以萬鍾，使諸大夫、國人皆有所矜式。子盍爲我言之？」**注**時子，齊臣也。王欲於國中央爲孟子築

室，使養教一國君臣之子弟，與之萬鍾之祿。中國者，使學者遠近鈞也。矜，敬也；式，法也。欲使諸大夫國人皆敬法其道。盍，何不也。謂時子何不爲我言之於孟子，知肯就之否？

疏注「時子」至「之否」

○正義曰：薛應旂《人物考》云：「齊大夫時子，《古今姓纂》：『齊有賢人時子著書，見《孟子》、《新論》。』」《荀子·大略》篇云：「欲近四旁，莫如中央。」趙氏以中央解「中國」，謂中於國也。鈞，閩、監、毛三本作均。均，鈞字通。《論語·衛靈公》篇云「君子矜而不爭」，包氏注云：「矜，莊也。」《呂氏春秋·孝行》篇云「居處不莊」，高誘注云：「莊，敬也。」以此通之，是「矜」爲敬也。「式，法也」，見《周書·謚法解》。《禮記·檀弓》云「盍嘗問焉」，《論語·公冶長》篇云「盍各言爾志」，注皆云：「盍，何不也。」時子因陳子而以告孟子。**注**陳子，孟子弟子陳臻。陳子以時子之言告孟子，孟子曰：「然，夫時子惡知其不可也？」如使子欲富，辭十萬而受萬，是爲欲富乎？」**注**孟子曰：如是，夫時子安能知其不可乎？時子以我爲欲富，故以祿誘我。我往者饗十萬鍾之

祿，以大道不行，故去耳。今更當受萬鍾，是爲欲富乎？距時子之言也。**疏**注「孟子」至「一言也」○正義

曰：以「如是」釋「然」字，以「安」釋「惡」。王氏引之《經傳釋詞》云：「范望注《太玄·務測》云：『然猶是也，常語也。』」

《廣雅》：「然，詹也。」《禮記·檀弓》有子曰：「然。然則夫子有爲言之也。」《論語·陽貨》篇：「然，有是言也。」《孟子·公孫丑》篇曰：「然，夫時子惡知其不可也？」此三然字但爲應詞而不訓爲是。《呂氏春秋·忠廉》《謹聽》《務本》《遇合》《慎大》《權勳》《長利》《求人》等篇，高誘注皆云：「惡，安也。」惡與烏，焉通。《荀子》多言「案」，即「安」也；《漢書》多言「烏」，即「惡」也。襄公二十九年《公羊傳》云「僚焉得爲君乎」，《釋文》：「焉，本又作惡。」《廣雅·釋詁》云：「焉，安也。」閻氏若璩《孟子生卒年月考》云：「或問於余曰：『養弟子以萬鍾，齊宣亦自侈其厚矣，而孟子又云『曾辭十萬鍾』，然則齊卿之祿厚至此與？』余應之曰：此蓋孟子通計仕齊所辭之數，非一歲有也。晏子曰：『齊舊四量，豆、區、釜、鍾。四升爲豆，各自其四以登於釜，釜十則鍾。然則區，一斗六升也；釜，六斗四升也；鍾，六石四斗也。萬鍾則六萬四千石矣，十萬鍾則六十四萬石矣。此豈齊卿

一歲所能有哉？以孟子所云陳戴「蓋祿萬鍾」，戴爲齊公族，祿所入如此，而孟子在三卿之中，使其祿同於陳戴，則仕齊當十年矣；倍於陳戴，則仕齊當五年矣；或少倍於陳戴，當亦不下六七年矣。夫燕噲讓國，君臣被戮，太子復興，俱孟子仕齊所見聞者，則固已歷五年矣，又況於崇見王，喪母後歸，又必有一二年，故曰：「當不下六七年也。」周氏廣業《孟子出處時地考》引馮氏景少作《論萬鍾》云：「六石四斗曰鍾，則六萬四千石足以食其徒一萬八千餘人。蓋古量甚小，漢二斗七升當今五升四，合六萬四千石，今猶得一萬二千八百石。乃歎崇儒重道之風，雖戰國，不替也。」弟子爲一國君臣之子弟，使孟子教養之，則讀「養弟子」二字爲句屬上。《爾雅·釋詁》云：「應，當也。」《廣雅·釋言》云：「應，受也。」《毛詩·周頌》「我應受之」，當受即應受也。故以「當」釋「受」。季孫曰：「異哉！」子叔疑。**注**二子，孟子弟子也。季孫知孟子意不欲而心欲使孟子就之，故曰：「異哉，弟子之所聞也！」子叔心疑，亦以爲可就也。**疏**注「二子」至「就也」○正義曰：周氏廣業《孟子出處時地考》云：「魯有季孫氏、子叔氏，並見《左傳》。二子當是其後，氏而不名，與公都子同例。孟門從遊

者，趙氏注弟子十五人：樂正子、公孫丑、陳臻、公都子、充虞、季孫、子叔、高子、徐辟、咸丘蒙、陳代、彭更、萬章、屋廬子、桃應，學於孟子四人：孟仲子、告子、滕更、盆成括。見《漢書·古今人表》者五人：公孫丑、萬章、告子、樂正子、高子。宋政和五年從祀孟廟，視趙注無盆成括，爲十八人，詳《宋史·禮志》。吳萊《孟子弟子考序》稱十九人，則與趙注同。張九韶《羣言拾唾》載孟門十七弟子，去季孫、子叔、滕更、盆成括而益以孟季子、周霄。《經義考》亦去季孫、子叔而謂告子與浩生不害是二人，因去告子而列浩生不害。竊謂從者數百，彭更既明言之，則弟子之姓名湮沒者何可勝數？季孫、子叔、盆成括等幸附見七篇，尚何去取之紛紜乎？**①**「使己爲政，不用則亦已矣，又使其子弟爲卿。人亦孰不欲富貴？而獨於富貴之中有私龍斷焉。」**注**孟子解二子之異意疑心，曰：齊王使我爲政，不用則亦自止矣，今又欲以其子弟故使我爲卿而與我萬鍾之祿。人亦誰不欲富貴乎？是猶獨於富貴之中有此私登龍斷之類也。我

①「紜」，原誤作「紛」，今據《孟子四考》改。

則耻之。**疏**注「孟子」至「耻之」○正義曰：趙氏以季孫、

子叔爲孟子二弟子。「子叔疑」猶論語「言門人惑」也。此則孟子解之之辭。「又使其子弟爲卿」，「子弟」即上「弟子」，使教養其子弟。「使我爲卿」，則讀「爲卿」二字不屬上。趙氏佑《溫故錄》云：「以季孫、子叔爲孟子弟子，不應但書氏而絕無名稱。不合一也。『異哉』一語既不了，疑字更未有言，遽接以孟子自解語，與上節全不相屬。不合二也。就注文「齊王使我爲政，不用則亦自止矣，今又欲以其子弟故使我爲卿」云云，孟子正因王不使爲政而去，何忽云爾？本文「使其子弟爲卿」，忽倒換「使我爲卿」，上文「養弟子以萬鍾」自當指孟子之弟子，忽易爲齊王子弟。不合三也。」按：今通解以此皆季孫譏子叔疑之言。周氏廣業《孟子出處時地考》云：「以子叔疑爲名，莫知其爲何人。惟《左傳》昭二十九年經「叔詣卒」，《公羊》、《穀梁》俱作「叔倪」。《釋文》倪有五計、五兮二音，五兮頗與疑音相近，意即其人。此子叔敬子之孫，嘗欲納昭公，故季孫意如曰：「叔倪無疾而死，此皆無公也，是天命也，非我罪也。」以是推之，龍斷之說或出愛憎之口歟？然趙岐熟於《左傳》，不應忘之。」古之爲市也，以其所有易其所無者，有司者治之耳。

有賤丈夫焉，必求龍斷而登之，以左右望而罔市利。人皆以爲賤，故從而征之。征商自此賤丈夫始矣。**注**古者市置有司，但治其爭訟，不征税也。賤丈夫，貪人可賤者也。入市則求龍斷而登之。龍斷謂堦斷而高者也。左右占望，見市中有利，罔羅而取之。人皆賤其貪，故就征取其利。後世緣此，遂征商人。孟子言我苟貪萬鍾，不耻屈道，亦與此賤丈夫何異也？古者謂周公以前。《周禮》有關市之賦也。**疏**「古之」至「無者」○正義曰：

《易·繫辭傳》云：「日中爲市，致天下之民，聚天下之貨。交易而退，各得其所。蓋取諸《噬嗑》。」《交易》即「以所有易所無」。彼此各有所有，各有所無，一交易而無者皆有，故各得其所。《虞書·皋陶謨》云：「賁遷有無化居。」《史記·夏本紀》云：「食少，調有餘補不足，徙居。」是也。周氏廣業《逸文考》云：「古之爲市也」，石經、宋本同，《白帖》引作者。《翟氏灝《考異》云：「古之爲市者」，宋本、宋石經「者」俱作「也」。張南軒本、《孟子集疏》本亦俱作「也」。《文選·魏都賦》注引作「也」。《阮氏元《校勘記》云：「古之爲市也」，石經、閩、監、毛三本、韓本同。孔本「也」作「者」。○注

「古者」至「稅也」○正義曰：《周禮·地官》有司市、質人、廛人、胥師、賈師、司虢、司稽，皆市官。司市以質劑結信而止訟，以賈民禁偽而除詐，以刑罰禁虢而去盜，凡市人胥執鞭度守門，市之羣吏平肆，展成莫賈，上旌于思次以令市，市師涖焉而聽大治大訟。胥師、賈師涖于介次而聽小治小訟。此「有司治爭訟」也。廛人掌斂布、斂布、總布、質布、罰布、廛布而人于泉府，是周時有征稅，不征稅是周公以前也。詳見上篇。《音義》出「龍斷」云：「丁云：『案，龍與隆聲相近。隆，高也。蓋古人之言耳，如胥、須之類也。』」張云：「斷，如字。或讀如斷割之斷，非也。」陸云：「龍斷謂岡壘斷而高者。」如陸之釋，則龍音壘。」又出「堞」字云：「丁云：『《廣雅》音課，《開元文字》音塊。』」翟氏灝《考異》云：「《列子·湯問》篇說愚公移山事云：『自此冀之南，漢之陰，無隴斷焉。』可為陸善經說龍斷之確證。《說文》「賈」字下引下文直作「登壘斷」。三家之釋，要惟陸氏為長。」段氏玉裁《說文解字注》云：「賈，市也。从网、貝。《孟子》曰「登壘斷而网市利」。①此引以證從网、貝之意也。壘，《孟子》作龍，丁公著讀為隆，陸善經乃讀為壘，謂岡壘斷而高者。按，趙注釋為「堞斷而高者也」。堞，廛座也。高誘云：「楚人謂廛為堞。」趙本蓋作「龍斷」。龍，廛雜之貌，鬻廛不到地勢畧高之處也。古書

龍、龍二字多相亂，許書亦當作「龍斷」，淺人以陸善經說改為壘耳。《方言》云：「占猶瞻也。」《毛詩·邶風》「瞻望弗及」，此以占釋望，占望即瞻望也。罔，《說文》作网，重文罔，今作網。《毛詩·王風》「雉離于羅」，傳云：「鳥網曰羅。」是「罔市利」為「罔羅而取利」也。《禮記·檀弓》云「從而謝焉」，注云：「從猶就也。」故以「就」釋「從」。

章指：言君子正身行道。道之不行，命也。不為利回，創業可繼。是以君子以龍斷之人為惡戒也。疏「道之不行命也」○正義

曰：《論語·憲問》第十四云：「道之將行也與？命也。」○「不為利回」○正義曰：昭公二十年《左傳》云「不為利疚於回」，注云：「疚，病也。回，邪也。以利故不能去，是病身於邪。」又三十一年《左傳》云：「君子動則思禮，行則思義。不為利回，不為義疚。」注云：「回正心也。」

孟子去齊，宿於晝。有欲為王留行者，

①「子」，原脫，據《說文解字注》補。

注畫，齊西南近邑也。孟子去齊，欲歸鄒，至畫地而宿也。齊人之知孟子者追送見之，欲爲王留孟子之行。**疏**「孟子」至「行者」○正義曰：閻氏若璩《孟子生卒年月考》云：「繫」致爲臣，章於「燕畔王慙」之後，蓋君臣之隙既開，有不可以復合者矣。故孟子決然請去。《釋地》又續云：「當日爲王留行者，豈有不通姓名之理？爲其可略，作七篇時遂從而略之。」○注「畫齊」至「宿也」○正義曰：周密《齊東野語》云：「高郵黃彥利謂孟子去齊宿畫讀如「畫夜」之畫，非也。《史記·田單傳》「畫邑」，注云：「齊西南近邑，音獲。」故孟子三宿而出，時人以爲濡滯也。」毛氏奇齡《經問》云：「齊固有畫邑，然焉知無畫邑？」趙岐云：「畫，齊西南近邑。」是明有畫邑矣。且趙岐注《孟子》正在齊郡，其地有畫邑，城在臨淄縣西南，相傳孟子出宿處，故鑿然注此。此真身歷其地，見之真，故言之確者。若畫邑，在臨淄西北三十里，即戟里城。戰國燕破齊時將封王蠋以萬家，即此地。是燕從西北至齊，當是畫邑；孟子從西南至滕，當是畫邑。一南一北，字形雖相蒙，地勢無可混也。」阮氏元《按勘記》云：「宿於畫」，各本同。孔本、韓本畫作畫，注同。按，此當是采用舊說。《廣韻》四十九有「畫」字下云：

「又姓。畫邑大夫之後，因氏焉。出《風俗通》。《孟子》「畫」字不當改爲「畫」字。」按：《史記·田單列傳》：「燕之初入齊，聞畫邑人王蠋賢。」《集解》引劉熙云：「齊西南近邑。畫音獲。」此劉熙云云蓋即其《孟子注》。裴駟引以爲畫邑之注，則是駟所見《孟子》本固作畫字邪？坐而言。不應，隱几而卧。**注**客危坐而言留孟子之言也。孟子不應答，因隱倚其几而卧也。**疏**注「客危」至「而卧」○正義曰：劉熙《釋名·釋姿容》云：「跪，危也。兩膝隱地，體危倪也。」《禮記·曲禮》「授立不跪，授坐不立」，《釋文》云：「跪，本又作危。」昭公二十七年《左傳》云「坐行而入」，注云：「坐行，膝行。」《禮記·曲禮》云：「先生書策，琴瑟在前，坐而遷之」，孔氏正義云：「坐亦跪也。坐通名跪，跪名不通坐。」趙氏以「危坐」解「坐」字，謂此坐爲跪也。《白虎通·衣裳》篇云：「衣者，隱也。」《說文》衣部云：「衣，依也。」受部云：「𦏧，所依據也。」𦏧即隱。《毛詩·商頌》「依我磬聲」，傳云：「依，倚也。」隱、依、倚三字義同，故以「倚」釋「隱」。段氏玉裁《說文解字注》云：「卧，伏也。从人、臣，

「而卧」，據疏例當作「卧也」，蓋涉經文而誤。

取其伏也。伏，大徐作休，誤。卧與寢異。寢於牀，《論語》「寢不尸」是也，卧於几，《孟子》「隱几而卧」是也。卧於几，故曰「伏」。統言之則不別，故六部云：「寢者，卧也。」《曲禮》云「寢毋伏」，則謂寢於牀者毋得俯伏也。「客不悅，曰：『弟子齊宿而後敢言，夫子卧而不聽，請勿復敢見矣。』」**注**齊，敬；宿，素也。弟子素持敬心來言，夫子慢我，不受我言。言而遂起，退欲去，請絕也。**疏**注「齊敬」至「我言」○正義曰：《音義》云：

「齊字亦作齋。」今孔氏本作齋，經典通作齊。《毛詩·召南》「有齊季女」，傳云：「齊，敬也。」是「齊」爲「敬」也。《禮記·禮器》云「三日宿」，注云：「宿，致齊也。」趙氏釋爲「素」者，宿，素一聲之轉。《小爾雅·廣詁》云：「宿，久也。」《漢書·霍去病傳》注云：「宿，舊也。」桓公元年《公羊傳》注云：「宿，先誠之辭。」《論語》「子路無宿諾」，注云：「宿，預也。」《後漢書·呂布傳》注云：「素，舊也。」《禮記·喪大記》正義引皇氏云：「素，先也。」《文選·關中詩》注引《國語》賈逵注云：「素，預也。」是宿、素二字之義本得相通。「素持敬心」謂預持敬心，亦久持敬心也。《周禮·地官·鄫長》「凡歲時之戒令皆聽之」，注云：「聽之，受之而行也。」《國策·秦策》

云「則王勿聽其事」，注云：「聽，從也，受也。」隱几而卧，《禮記·樂記》云：「吾端冕而聽古樂，則惟恐卧；聽鄭衛之音，則不知倦。」是卧爲倦怠。心愛之，故不倦；心厭之，故卧。《說文》心部云：「慢，惰也。」惰猶倦也。是倦怠疏慢之也。不聽，是不受其言也。○注「言而」至「絕也」○正義曰：閻氏若璩《釋地》又續云：「兩膝著地，伸腰及股而勢危者爲跪，兩膝著地，以尻著蹠而少安者爲坐。趙氏於「坐而言」曰「危坐」，於「坐，我明語子」單曰「坐」。蓋危坐者，客跪而言留孟子之言，迨不聽然後變色而起，孟子於是命之以安坐以聽我語。此兩「坐」字殊不同，趙氏注於「勿敢見」下先云「言而遂起，退欲去，請絕也」，爲下文「坐」字張本。郝氏解亦云：「請勿復敢見矣，起而告退之辭。」曰：「坐，我明語子。」**注**孟子止客曰：且坐，我明告語子。**疏**

注「我明告語子」○正義曰：《周禮·春官·大司樂》「諷誦言語」，注云：「答述曰語。」《呂氏春秋·節喪》篇云「傳以相告」，高誘注云：「告，語也。」昔者，魯繆公無人乎子思之側則不能安子思，泄柳申詳無人乎繆公之側則不能安其身。**注**往者，魯繆公尊禮子思。子思以道不行則欲去，繆公常使賢人往留之，說以

方，且聽子爲政，然後子思復留。泄柳申詳，亦賢者也。繆公尊之不如子思。二子常有賢者在繆公之側，勸以復之，其身乃安也。

疏注「往者」至「復留」○正義曰：以「往」釋「昔」。《爾雅·釋詁》云：「安，止也。」

《說文》田部云：「留，止也。」安，留皆訓止，故以「留」釋「安」。○注「泄柳」至「安也」○正義曰：《禮記·雜記》「泄柳之母死」，注云：「泄柳，魯繆公時賢人也。」孔氏正義云：

「《孟子》云魯繆公之時，公儀子爲政，子柳，子思爲臣，魯之削也滋甚。若是乎，賢者之無益於國也？彼「子柳」即此

「泄柳」也，故云「魯繆公時賢人」。《檀弓》云：「子張病，召申詳而語之。」注云：「申詳，子張子。太史公《傳》曰子張姓

顓孫。今日申詳，周秦之聲二者相近。未聞孰是。」又「申詳之哭言思也亦然」，注云：「說者曰：言思，子游之子，申詳妻之昆弟。」故閭氏若璩《釋地》又續云：「申詳，子張之子，

子游之壻。是陳之顓孫氏與吳之言氏遠爲婚姻。」《檀弓》又云：「季子皋葬其妻，犯人之禾。申詳以告，曰：『請庚之。』」注云：「申祥，子張子。」祥，詳古字通。《說文》力部

云：「勸，勉也。」《文選》注云：「勸者，進善之名。」《周禮·夏官·大僕》注云：「復謂奏事也。」《呂氏春秋·勿躬》篇云

「管仲復於桓公」，高誘注云：「復，白也。」「勸而復之」，謂有

賢者在繆公之側以善言勸勉而奏白之，泄柳、申詳乃留止于魯而不去。子思之賢，魯人無過之者，故必聽子思之言爲

政，乃不去。二子賢不及子思，不必聽二子之言，必有賢如子思進言於君，而君聽之，二子乃留。二子視子思之留爲留

也，非虛言所能止。子爲長者慮而不及子思。子

絕長者乎，長者絕子乎？」**注**長者，老者也。孟

子年老，故自稱長者。言子爲我慮，不如子思時賢人也。不勸王使我得行道，而但勸我留。留者，何

爲哉？此爲子絕我乎，又我絕子乎？何爲而愠恨也？**疏**注「長者」至「長者」○正義曰：《儀禮·鄉飲酒

禮》《鄉射禮》皆云「衆賓之長升」，注皆云：「長，其老者。」是「長者」爲「老者」也。

章指：言惟賢能安賢，智能知微。以

愚喻智，道之所以乖也。

孟子去齊。尹士語人曰：「不識王之不可以爲湯武，則是不明也；識其不可，然且至，

則是干澤也。千里而見王，不遇故去。三宿而後出晝，是何濡滯也？士則茲不悅。」**注**尹

士，齊人也。干，求也，澤，祿也。尹士與論者言之，云：孟子不知，則為求祿。濡滯猶稽也。既去，近留於晝三日，怪其猶久，故云：士於此事不悅也。**疏**注

「干求」至「悅也」○正義曰：「干，求也」，《爾雅·釋言》文。澤無祿訓。《風俗通·窮通》篇云：「孟子嘗仕於齊，位至卿。後不能用，孟子去齊。尹士曰：『不識王之不可以為湯武，則是不明也，識其不可，然且至，則是干祿也。』」此亦以祿代澤。

《說文》水部云：「澤，光潤也。」干求人君光寵以得祿位，故「干澤」亦即「干祿」也。阮氏元《校勘記》云：「濡滯，淹久也。閩、監、毛三本，足利本同。廖本、孔本作『猶稽也』，韓本作『孰稽也』，《考文》古本作『熟稽也』，《考文》一本作『淹留』。」按：《史記·平準書》《集解》引李奇云：「稽，貯滯也。」貯滯猶濡滯。

《說文》稽部云：「稽，留止也。从禾，从尤，旨聲。」《淮南子·時則訓》云：「流而不滯，高誘注云：『滯，止也。』」《楚辭·涉江》篇云：「淹回水而凝流」，注云：「滯留也。」滯與稽義同。滯從帶聲，帶聲與旨聲同韻。段氏玉裁《六書音均表》同列十五部，孔氏廣森《詩聲類》六脂、十二齊、五十二霽同屬陰聲脂類第

十二，則滯、稽音近。故以「濡滯猶稽」也。《爾雅·釋詁》云：「佇，久也。」《國語·魯語》云：「敢告滯積，以舒執事」，注云：「滯，久也。」故又以「久」解之。云「猶久」者，對下孟子以三宿為「猶速」也。茲之義為此，故解「茲」為「此事」。悅之義為解，「士則茲不悅」謂士於此事不解也。高子以告。**注**

高子，亦齊人，孟子弟子。以尹士之言告孟子也。曰：「夫尹士惡知予哉？千里而見王，是予所欲也，不遇故去，豈予所欲哉？予不得已也。」**注**孟子曰：夫尹士安能知我哉？我不得已

而去耳，何汲汲而驅馳乎？予三宿而出晝，於予心猶以為速。王庶幾改之！王如改諸，則必反予。**注**我自謂行速疾矣。冀王庶幾能反覆，招還我矣。**疏**注「我自」至「我矣」○正義曰：速之義為疾，即上所云「汲汲驅馳」也。《毛詩·周頌》「福祿來反」，傳云「反，復也」。《說文》又部云：「反，還也。」支部云：「改，更也。」《呂氏春秋·慎人》篇云「反瑟而弦」，高誘注云：「反，更也。」此經文云「王庶幾改之。王如改諸，則必反予」，趙氏以「冀王庶幾能反覆招還我」解之，以「反復」釋「改」字，以「招還」釋「反」字

也。夫出晝而王不予追也，予然後浩然有歸志。

注浩然，心浩浩然有遠志也。予雖然，豈舍

王哉？王由足用爲善。王如用予，則豈徒齊

民安？天下之民舉安。王庶幾改之，予日望

之。

注孟子以齊大國，知其可以行善政，故戀戀望

王之改而反之，是以安行也。豈徒齊民安，言君子

「達則兼善天下」也。

疏注「孟子」至「下也」○正義曰：

用，以也。爲猶行也。故「足用爲善」是「可以行善政」也。

《易·小畜》「有孚攣如」，《釋文》云：「《子夏傳》作戀。」《漢

書·外戚李夫人傳》云「上所以攣攣顧念我者」，注云：「攣音

力全反，又讀曰戀。」此經云「豈舍王哉」，趙氏解云「戀戀」，即

攣攣，謂係念於王，不忍舍也。襄公七年《左傳》云「吾子其少

安」，注云：「安，徐也。」《後漢書·崔駰傳》駰作《達旨》，云「繫

余馬以安行」，注云：「安行，不奔馳也。」三宿而後出晝，故爲

徐行，即不汲汲驅馳也。「達則兼善天下」，見下《盡心》篇。

而宿，懼其不遠者哉？《論語》曰：「悻悻然，小人哉！」言己志大，在於濟一世之民，不爲小節也。

疏注「我豈」至「節也」○正義曰：《說文》心部云：「惛，忿也。」

急，《說文》作急，云：「惛也。」《淮南子·繆稱訓》云「惛於不已

知者」，注云：「惛，急也。」惛急，趙氏爲「怒」字解也。所以

爲「小丈夫」者，緣其諫君不受則怒也。因怒而小，故以「惛

急」加「小丈夫」上，謂其因忿惛而小也。怒即志也。窮之言

極也。《音義》云：「悻悻，丁云：『字當作倅，形頂切，很也，直

也。又胡耿切。字或作悻悻然，《論語》音鏗。』今《論語·子

路》篇作「鏗鏗然小人哉」。《禮記·樂記》「石聲鏗」，《史記·

樂書》作「石聲鏗」，《集解》引王肅《禮記》注云：「鏗，聲果勁。」

《說文》石部「磬」，古文從缶。磬即磬字。劉熙《釋名·釋樂

器》云：「磬，磬也。其聲磬磬然堅緻也。」《離騷》云：「絳倅直

以亡身兮。」《說文》女部云：「倅，很也。」《楚辭》曰「絳倅直」。

果勁與很直義近。蓋堅執不回，不知通變，故鄭氏注《論語》

云：「鏗，倅，小人之貌也。」倅倅、磬磬，聲近相通借也。閩、監、

毛三本作「論曰」。阮氏元《校勘記》云：「趙注多稱『論』。」趙

氏不解是字，蓋以是字爲語助，無所指實。王氏引之《經傳釋

禮論篇作「今夫」。《宥坐》篇「今夫世之陵遲，亦久矣」，《韓詩外傳》作「今是」。是小丈夫，夫小丈夫也。是訓爲夫，故夫亦訓爲是。「尹士聞之，曰：『士，誠小人也。』」**注**尹士聞義則服。

章指：言大德洋洋，介士察察。賢者志其大者，不賢者志其小者。此之謂也。

疏「大德」至「謂也」○正義曰：《史記·禮書》云「洋洋美德乎」，《索隱》云：「洋洋，美盛貌。」《老子》云「俗人察察」，**注**云：「察察，疾且急也。」《論語·子張》第十九「賢者識其大者，不賢者識其小者」，漢石經「識」作「志」，《漢書·劉歆傳》讓太常博士引亦作「志」，與此同。《周禮·保章氏》**注**云：「志，古文識。」

孟子去齊。充虞路問曰：「夫子若有不豫色然。前日虞聞諸夫子曰：『君子不怨天，不尤人。』」**注**路，道也。於路中問也。充虞謂孟子去齊有恨心，顏色不悅也。**疏**「路道」至「悅也」○正義曰：「路，道也」，《爾雅·釋宮》文。《論衡·刺孟》篇

以「塗」代「路」，路亦塗也。《易·豫卦》鄭氏**注**云：「豫，喜豫悅樂之貌也。」是「不豫」即「不悅」也。《說文》心部云：「恨，怨也。」心有怨恨則顏色不悅。曰：「彼一時，此一時也。五百年，必有王者興，其間必有名世者。由周而來，七百有餘歲矣。以其數則過矣，以其時考之則可矣。」**注**彼前聖賢之出，是有時也。今此時亦是其一時也。五百年有王者興，有興王道者也。名世，次聖之才，物來能名正一世者。生於聖人之間也。七百有餘歲，謂周家王迹始興，大王、文王以來。考驗其時，則可有也。**疏**「彼前」至「有也」○正義曰：趙氏以「彼一時」爲以前聖賢興王道之時。聖指王者，賢指名世者，彼即前也。謂前此聖賢之出，是應此五百年之運而出，是聖賢之出有時也。此即今也。「此一時」爲孟子之時，謂今時已是聖賢當出之時也。《論衡》引此作「彼一時也，此一時也」，《文選·答客難》《五等諸侯論》**二**注引《孟子》亦云「彼一時也，此一時也」。觀趙氏**注**，則「彼一時」下當有「也」字。近通解以「彼一時」爲充虞所聞「君子不怨天，不尤人」之時，時爲暇豫之時，則論爲經常之論也，「此一時」爲今孟子去齊之時，爲行藏治亂關

係之時也，則憂天憫人之意不得不形諸顏色也。《國語·魯語》云：「黃帝能成命百物，以明民共財。」注云：「命，名也。《尹文子》云：「大道無形，稱器有名。名也者，正形者也。形正由名，則名不可差。故仲尼曰：『必也，正名乎？』名不正則言不順也。」名有三科：一曰命物之名，方圓白黑是也；二曰毀譽之名，善惡貴賤是也；三曰況位之名，賢愚愛憎是也。今萬物具存，不以名正之則亂。」《荀子》有《正名》篇，云：「聖王沒，名守慢，奇辭起，名實亂，是非之形不明，則雖守法之吏，誦數之儒亦皆亂也。若有王者起，必將有循於舊名，有作於新名。貴賤不明，同異不別，如是則志必有不喻之患而事必有困廢之禍。故知者爲之分別，制名以指實。上以明貴賤，下以別同異。貴賤明，同異別，如是則志無不喻之患，事無困廢之禍。此所爲有名也。物來能以名正於一世，則貴賤明而同異別。」《漢書·古今人表》列九等之敘：上上爲聖人，上中爲仁人，上下爲智人。此明貴賤，別同異之人爲智者，故爲「次聖之才」。《漢書·楚元王傳》贊云：「仲尼稱材難，不其然歟？自孔子後，轅文之士衆矣，唯孟軻、孫況、董仲舒、司馬遷、劉向、揚雄，此數公者，皆博物洽聞，通達古今，其言有補於世。傳曰：『聖人不出，其間必有命世者焉。』豈近是乎？」「命世」即「名世」，謂前聖

既沒，後聖未起之間，有能通經辨物，以表章聖道，使世不惑者也。江氏永《羣經補義》云：「孟子去齊在燕人畔之後，蓋當周赧王三年己酉。孟子言『由周而來七百有餘歲』。以邵子《皇極經世》、金吉甫《通鑑綱目前編》考之，①周武王伐殷己卯距赧王己酉八百一十一年，與孟子言不合。蓋周初自共和庚申以前有誤衍之年，其誤衍始於劉歆《曆譜》也。共和庚申以前之年，史遷不能紀，惟《魯世家》自考公以下有其年。考公四年，煬公六年，幽公十四年，魏公五十年，厲公三十七年，獻公三十二年，真公三十年。真公之十四年，厲王出奔歲，共和行政，爲共和前年己未。自考公至真公十四年凡一百五十七年，魯公伯禽《史記》未著卒年，《曆譜》謂成王元年爲命魯公之歲，魯公四十六年，至康王六年而薨。以四十六加一百五十七，則成王元年至厲王己未二百零二年耳，而《曆譜》累推七十六年之朔旦、冬至，數諸公之年，謂《世家》煬公即位六十年，是得《史記》誤本以六年爲六十年也。又謂獻公即位五十年，是又誤以三十二年爲五十年也。煬公衍五十四年，獻公衍十八年，共衍七十二年，則自成王元年至厲王己未有二百七十五年。今《經世》諸書成王立於乙

①「以」，原脫，今據江永《羣經補義》補。

酉，至厲王己未二百七十五年，正承劉歆之誤也。前計武王己卯至赧王己酉八百一十一年，除去七十二年，實得七百三十九年，正與孟子語「七百有餘歲」合矣。否則孟子生於周，豈不知其年數，乃缺去七十餘年邪？」按：趙氏解七百有餘歲，推本太王文王以來，於劉歆《曆譜》之年尤義矣。趙氏蓋以孟子去齊在顯王時。閻氏若璩《孟子生卒年月考》云：「孟子在齊不獨不在赧王時，亦不在慎靚王時，當在顯王四十五年。乃趙氏謂孟子去齊後至梁。既以顯王三十三年乙酉至梁，則去齊在三十三以前。於武王己卯至赧王己酉七百三十九年，又除去赧王己酉上溯顯王甲申共二十五年，止存七百一十四年，加以太王、文王之年，仍是七百有餘歲也。」《周禮·大司馬》「以待考其誅賞」，注云：「考謂考校其功。」《呂氏春秋·察傳》篇云「必驗之以理」，高誘注云：「驗，效也。」《淮南子·主術訓》云「驗在近」，高誘注云：「驗，效也。」効、效、校通。是「考」即「驗」也。夫天未欲平治天下也。如欲平治天下，當今之世，舍我其誰也？吾何為不豫哉！」**注**孟子自謂能當名世之士，時又值之，而不得施此，乃天自未欲平治天下耳，非我之愆。我固不怨天，何為不悅豫

乎？**疏**「夫天」至「豫哉」○正義曰：趙氏佑《溫故錄》

云：「此正申所以不豫之故。上言數已過，時已可，而未有王者興，是天未欲平治天下也。我所以有不豫，為此也。否則天誠厭亂而興王者，使我得如古之名世，大展其堯舜君民之素，何不豫之有？蓋舊解如此。」按：趙氏之意，云「我固不怨天，何為不悅豫哉」，乃是辨其未嘗怨天、未嘗不豫，謂是天不欲平治天下，非我之愆，我自不必怨天而不悅也。故章指言「知命者不憂不懼」。

章指：言聖賢興作，與時消息。天非

人不因，人非天不成。是故知命者不憂不

懼也。**疏**「天非人不因人非天不成」○正義曰：揚子

《法言·重黎》篇云：「兼才尚權，右計左數，動謹於時，人也。天不人不因，人不天不成。」《管子·勢》篇云：「天因人，聖人因天。」揚氏所本也。

孟子去齊，居休。公孫丑問曰：「仕而

不受祿，古之道乎？」**注**休，地名。丑問，古人之

道，仕不受祿邪？怪孟子於齊不受其祿也。**疏**注

「休地名」○正義曰：閻氏若璩《釋地續》云：「孟子致爲臣而歸，歸於鄒也。中間經過地名休者，少憩焉，與丑論在齊事，故曰「居休」。故休城在今兗州府滕縣北一十五里，距孟子家約百里。」曰：「非也。於崇，吾得見王，退而有去志。不欲變，故不受也。」**注**崇，地名。孟子言，不受祿，非古之道也。於崇，吾始見齊王。知其不能納善，退出，志欲去矣。不欲即去，若爲變詭，見非泰甚，故且宿留。心欲去，故不復受祿。**疏**

注「崇地名」○正義曰：周氏廣業《孟子古注考》云：「宋本作『崇齊地』，今作『地名』。」○**注**「不欲」至「即受祿」**①**○正義曰：趙氏云「不欲即去，若爲變詭」，以「詭」字釋「變」字也。《禮記·曾子問》「日有食之則變乎」，**注**云：「變謂異體。」《荀子·禮論》云「懔懔」，**注**云：「懔，變也；詭，異也。」《呂氏春秋·孟春紀》云「無變天之道」，高誘**注**云：「變，戾也。」《文選·長笛賦》「窅隆詭戾」，**注**云：「詭戾，乖違之貌。」又《幽通賦》云「變化故而相詭兮」，曹大家**注**云：「詭，反也。」是變與詭義同。始見於王，退而即去，形迹近似乖戾詭異，變動不常。非猶責也。爲此詭異，人必以太甚見責矣。不欲即去，是不欲跡似詭異，致見譏讓爲太甚也。閻、監、毛三

本泰作太。太，泰字通也。不欲迹似詭異，致見譏讓爲太甚，故宿留不即去也。《音義》云：「宿留，上音秀，下音雷。」孔氏廣森《經學卮言》云：「《易·需》彖傳『鄭君注云：「需讀爲秀。」』古語遲延有所俟曰宿留。《封禪書》「宿留海上」，《漢·五行志》「其宿留告曉人，具備深切」，《李尋傳》「宿留瞽言」，《來歷傳》「此誠聖恩所宜宿留」，何氏《春秋》僖元年解詁「宿留城之」，趙氏《孟子·萬章下》章句「宿留以答之」，並上音秀，下音溜。《東觀漢記》「和帝詔且復宿留」，《後漢書》作「須留」。需與須同，故讀爲秀也。漢世訓詁皆音義相將，即六書轉注之學。」按：《風俗通·過譽》篇亦云「何敢宿留」。繼而有師命，不可以請。久於齊，非我志也。」**注**言我本志欲速去。繼見之後，有師旅之命，不得請去，故使我久而不受祿耳。久，非我本志也。**疏****注**「言我」至「志也」○正義曰：知「師命」是「師旅之命」者，聖賢之道不爲太甚，旁通以情，故孟子於始見王，志雖不合，必宿留而後去，既宿留，可以去矣，而仍不去者，既居其國，被其欺遇，惟此軍戎大事即當休戚相關，豈容度

①「即」，據注文當衍，或爲「復」字之訛。

外置之，飄然遠引？此所以不可以請也。說者不察，徒以孟子爲巖巖難近。舊疏以不欲變爲不欲遽變其欲去之心，^①又以師命爲賓師之命。顧命以賓師，有何不可請之有？中國授室，養弟子以萬鍾，使諸大夫國人有所矜式，此正命之爲師矣，何以辭而不就邪？孟子之學，惟趙氏知之深矣。

章指：言祿以食功，志以率事。無其事而食其祿，君子不由也。

姪廷琮廷弼校字

孟子正義卷九終

①「欲」，原誤作「可」，今從沈校據經文改。

孟子正義卷十

江都縣鄉貢士焦循撰集

孟子卷第五

滕文公章句上凡五章。

注滕文公者，滕，國

名，文，謚也；公者，國人尊君之稱也。文公於當時尊敬孟子，問以古道，猶衛靈公問陳於孔子，《論語》因以題篇。

疏注「滕文」至「題篇」○正義

曰：《春秋》隱公七年「滕侯卒」，始見於經。《漢書·地理志》「沛郡公丘」，注云：「故滕國，周懿王子錯叔繡所封，三十一世爲齊所滅。」師古云：「《左氏傳》云：『郕、雍、曹、滕，文之昭也。』《系本》亦云：『錯叔繡，文王子。』此志云懿王子，未詳其義。」《春秋釋例·土地名》云：「沛國公丘縣東南有滕城。」《世族譜》云：「自叔繡及宣公十七世，乃見《春秋》隱公以下。春秋後六世而齊滅滕

矣。《周書·謚法解》文之謚有六：一「經緯天地」，二「道德博聞」，三「學勤好問」，四「慈惠愛民」，五「愍民惠禮」，六「錫民爵位」。又云「施爲文也」。乃宣公嬰齊之孫，昭公毛伯之子文公繡亦謚文公，名與叔繡相犯。而《孟子》之文公又複謚「文」，未可考也。《爾雅·釋詁》云：「公，君也。」國君有公、侯、伯、子、男五等，公之爵最尊。自侯以下，國人統稱爲公，是尊之也。

滕文公爲世子，將之楚，過宋而見孟子。

孟子道性善，言必稱堯舜。

注文公爲世子，使

於楚而過宋。孟子時在宋，與相見也。滕侯，周文王之後也。《古紀世本》錄諸侯之世，滕國有考公廩，與文公之父定公相直；其子元公宏，與文公相直。以後世避諱，改「考公」爲「定公」，以元公行文德，故謂之文公也。孟子與世子言人生皆有善性，但當充而用之耳，又言堯舜之治天下，不失仁義之道，欲勸勉世子也。

疏「滕文」至「孟子」○正義曰：莊公

三十二年「子般卒」，《公羊傳》云：「君存稱世子。」注云：

「明當世父位爲君。」僖公五年「春，晉侯殺其世子申生。夏，會王世子于首戴」，《公羊傳》云：「世子貴也，猶世世子也。」《禮記·喪服小記》注云：「世子，天子諸侯之適子也。」是時滕定公在位，故文公稱爲世子。則其之楚，是君命之也。閻氏若璩《釋地續》云：「余向主孟子游宋當在慎靚王三年癸卯後，宋稱王故也。是時楚地久廣至泗上，泗上十二諸侯者，宋、魯、滕、薛、邾、莒，在淮泗之上國。滕南與楚鄰，苟有事於楚，一舉足則已入其境，何必迂而西南行三百五十餘里過宋都乎？過宋都者，以孟子在焉。往也如是，反也如是，不憚假道於宋之勞，其賢可知。」周氏柄中《辨正》云：「頃襄王二十一年，始徙都陳。是時楚都於郢，在今湖北襄陽府宜城縣西南九十里；宋都商丘，在今河南歸德府商丘縣。滕在今山東兗州府滕縣西南十四里。自滕之楚而取道商丘，路稍回遠。謂非迂道固謬，謂一舉足即入其境，亦未明悉。」周氏廣業《孟子出處時地考》云：「孟子去齊居休，旋歸於鄒，年六十餘矣。聞宋王偃將行仁政，往游焉。時滕文公爲世子，將之楚，過宋來見，蓋孟子嘗以齊卿出弔於滕，稔知其賢故也。」○「孟子道性善言必稱堯舜」○正義曰：孟子生平之學在道性善，稱堯舜，故於此標之。太史公以孟子、荀子合傳，乃孟子道性善，荀子則言性惡，孟子稱堯舜，荀子則法

後王。其言云：「今人之性，生而離其朴，離其資，必失而喪之。所謂性善者，不離其朴而美之，不離其資而利之也。人之性惡明矣，其善者僞也。」此駁孟子道性善也。又云：「略法先王而不知其統，案往舊造說，謂之五行，甚僻違而無類，幽隱而無說，閉約而無解。」此譏孟子稱堯舜也。爲荀氏之學者調和而文飾之云：「孟子言性善，欲人之盡性而樂於善，苟言性惡，欲人之化性而勉於善。僞即爲也，乃作爲之爲，非詐僞之僞。孟、荀生於衰周之季，閱戰國之暴，欲以王道救之。孟子言先王，苟言後王，皆謂周王，與孔子從周之義不異也。」按：孟子之學，述孔子者也。孔子之學，述伏羲、神農、堯、舜、文王、周公者也。陸賈《新語·道基》篇云：「先聖仰觀天文，俯察地理，圖畫乾坤，以定人道。民始開悟，知有父子之親、君臣之義、夫婦之道、長幼之序，於是百官立，王道乃生。」《白虎通》暢其說云：「古之時未有三綱六紀，民人但知其母不知其父，能覆前不能覆後，卧之誅法，起之吁吁，飢即求食，飽即棄餘，茹毛飲血而衣皮葦。於是伏羲觀象於天，俯法於地，因夫婦，正五行，始定人道，畫八卦，以治天下。」《繫辭傳》云：「以通神明之德，以類萬物之情。」神明之德，即所謂「性善」也。善即靈也，靈即神明也。荀子云：「今人之性，飢而欲飽，寒而欲煖，勞而欲休，此人

之情性也。」是也。人如此，禽獸亦如此也。荀子又云：「今人飢，見長而不敢先食者，將有所讓也。勞而不敢求息者，將有所代也。」夫子之讓乎父，弟之讓乎兄；子之代乎父，弟之代乎兄；此正人性之善之證也，而荀子乃以爲性惡之證焉。試言之，人之有男女猶禽獸之有牝牡也。其先男女無別，有聖人出，示之以嫁娶之禮，而民知有人倫矣。示之以耕耨之法，而民知自食其力矣。以此教禽獸，禽獸不知也。禽獸不知，則禽獸之性不善；人知之，則人之性善矣。聖人何以知人性之善也？以己之性推之也。己之性既能覺於善，則人之性亦能覺於善，第無有開之者耳。使己之性不善，則不能覺，己能覺，則己之性善。己與人同此性，則人之性亦善，故知人性之善也。人之性不能自覺，必待先覺者覺之。故非性善無以施其教，非教無以通其性之善。「教」即荀子所謂「偽」也，「爲」也。爲之而能善，由其性之善也。如鳥獸，則性不善者也。故同此飲食男女，嫁娶以別夫婦，人知之，禽獸不知之；耕鑿以濟飢渴，人知之，禽獸不知之。禽獸既不能自知，人又不能使之知，雖爲之亦不能善。然人之性爲之即善，非由性善而何？人縱淫昏無耻，而己之妻不可爲人之妻，固心知之也；人縱貪饕殘暴，而人之食不可爲己之食，固心知之也。是性善也。故孔子論性，以「不移」

者屬之上知下愚，愚則仍有知，禽獸直無知，非徒愚而已矣。世有伏羲，不能使禽獸知有夫婦之別；雖有神農，不能使鳥獸知有耕稼之教。善豈由爲之哉？文學技藝，才巧勇力，有一人能之，不能人人能之；惟男女飲食，則人人同此心。人不能孝其父，亦必知子之當孝乎己，不能敬其長，亦必知卑賤之當敬乎己。子讓食於父而代勞於兄，此可由教而能之，所謂爲之者，善也。然荀子能令鳥讓食乎？能令獸代勞乎？此正「率性」之明證，乃以爲「悖性」之證乎？故孟子之道性善，由讀書好古，能貫通乎伏羲、神農、堯、舜、文王、周公、孔子之道而後言之者也，非荀子所知也。義農之前，人苦於不知，既人人知有三綱六紀，其識日開，其智日深，浸而至於黃帝、堯、舜之世，則民不患其不知，轉患其太知。許氏《說文解字敘》云：「庶業其繁，飾僞萌生，黃帝之史蒼頡，初造書契。」是知黃帝之時，民情飾僞矣。於是堯舜時有「靜言庸違，象恭滔天」之人，於是有「方命圯族」之人。當義農之前，人苦於不知，故義農盡人物之性以通其神明，其時善不善顯然易見，積之既久，靈智日開，凡仁義道德忠孝友悌，人非不能知，而巧僞由以生，奸詐由以起，故治唐虞以後之天下異於治義農以後之天下。夫謀而能言，以方自命善也，而實則「庸違」「滔天」「圯族」，「續用弗成」，朝士如

是，庶民可知，固義農以來所未有，亦堯舜以前之人所未知。故聖人治天下之道至堯舜而一變。《繫辭傳》云：「黃帝、堯、舜氏作，通其變，使民不倦；神而化之，使民宜之。」又云：「易窮則變，變則通，通則久。」「黃帝、堯、舜，垂衣裳而天下治。」蓋堯舜以變通神化治天下，不執一而執兩端，用中於民，實為萬世治天下之法。故孔子刪《書》首唐虞，而贊《易》特以「通變」「神化」詳著於堯舜。孟子稱堯舜，正稱其通變神化也。荀子云：「逢衣淺帶，解果其冠，略法先王而足亂世術，呼先王以欺愚者而求衣食焉。」此正不知通變神化之道者也。夫通變神化之道，堯舜所以繼義農而開萬世，故「稱堯舜」，欲天下後世法其通變神化，不執一而執兩端以用中於民，非徒以其揖讓都俞，命義、和、咨二十二人之迹也。若云「法後王」，後王，無定之稱也。荀子固云「有治人無治法」矣，治人即能通變神化之人也。後王而如是，則是能法堯舜者，法後王仍法堯舜矣。故「稱堯舜」即法後王之能通變神化者，若但云「法後王」，則後王不皆能通變神化如堯舜，其說為謬矣。蓋孟子之稱堯舜即孔子刪《書》首唐虞，贊《易》特以通變神化歸於堯舜之意也，又非荀子所知也。孟子學孔子之學，惟此「道性善」、「稱堯舜」兩言盡之。提其綱於此篇之首，其後申言之，可按而得也。○注「古紀」至

「公也」○正義曰：《漢書·藝文志》：《春秋》二十三家，有《世本》十五篇，注云：「古史官記黃帝以來訖春秋時諸侯大夫。」此云《古紀世本》是也。《禮記·檀弓》「邾婁考公之喪」，注云：「考或為定。」高誘注《呂氏春秋》、《淮南子》皆云：「定，成也。」隱公五年《穀梁傳》云：「考之者，成之也。」是考與成字義皆通，此考公所以為定公也。翟氏灝《考異》云：《春秋傳》：「成十六年夏四月，滕文公卒。」滕之先君已有謚文者，後世不應犯同，信乎文非本謚，而但以行文德稱也。同時魯文公見於《史記》，在《世本》乃云湣公；宋康王見於《國策》，在《荀子》乃云獻王。微弱之國，垂至於亡，故臣民各懷舊德，私謚不獨一滕君矣。趙氏佑《溫故錄》云：「滕文公為周末弟一賢君，孟子深取其人，故一見即舉生平所得於聖教者教之。惜其國小而偏，終以不振，至今廟食在滕，猶與鄒國鄰並相望。誰謂賢愚？千古知誰是也。」注據《古紀世本》以文公當元公宏，則文公名宏。然「元」亦「文」之譌耳，未必既謚元又謚文也。世子自楚反，復見孟子。注從楚還，復詣孟子，欲重受法則也。孟子曰：「世子疑吾言乎？夫道，一而已矣。」注世子疑吾言有不盡乎？夫天下之道，一言

而已，惟有行善耳。復何疑也？**疏**「夫道一而已矣」

○正義曰：戴氏震《孟子字義疏證》云：「孟子答公孫丑曰：『大匠不爲拙工改廢繩墨，羿不爲拙射變其穀率。』言不因人之聖智不若堯舜文王，有二道也。蓋才質不齊，有生知、安行，有學知、利行，且有困知及勉強行。《中庸》曰：『及其知之一也，及其成功一也。』成覲謂齊景公曰：『彼，丈夫也；我，丈夫也。吾何畏彼哉？』**注**成覲，勇果者也。與景公言曰：尊貴者與我同丈夫耳，我亦能爲之，何爲畏之哉？」**疏**注「成覲

勇果者也」○正義曰：《音義》云：「覲，古覲切，一音閑。」古覲切是覲字。《說文》云：「戴目也。江淮之間謂眡曰覲。」「王使人覲夫子」，是此字也。音閑則當作觀。《說文》云：「觀，很視也。齊景公之勇臣有成觀者。」《廣韻》云：「觀，人名，出《孟子》。」段氏玉裁《說文解字注》云：「成觀，淮南子·齊俗訓作『成荆』。觀爲荆，猶《考工記》故書顧或作輕也。」按：《淮南子·齊俗訓》云「孟賁成荆無所行其威」，注云：「成荆，古勇士也。」《漢書·廣川王傳》「其殿門有成慶畫，短衣大袴長劍」，師古云：「成慶，古之勇士，事見《淮南子》。」成慶即成荆。《戰國策·趙策》鄭同云「內無孟賁之

威，荆、慶之斷」，鮑彪注云：「荆，成荆。」《史記·范雎傳》云「成荆，孟賁、王慶忌、夏育之勇焉而死」，《集解》引許慎云：「成荆，古勇士。」荆、慶、觀古字通也。趙氏以「彼」爲「尊貴者」，蓋指景公言，即所爲「無嚴諸侯」也。顏淵曰：

「舜，何人也？予，何人也？」有爲者亦若是。**注**言欲有所爲，當若顏淵庶幾，成覲不畏，乃能有所成耳。又以是勉世子也。**疏**注「欲有」至「子

也」○正義曰：趙氏以「舜何人也，予何人也」二句爲顏淵之言。「有爲者亦若是」乃總上成覲顏淵兩言，爲孟子勉世子之言。經文「是」字指顏淵庶幾，成覲不畏。《鹽鐵論·執務章》引顏淵曰「舜獨何人也，回何人也」，亦不連下句。近通解以「有爲者亦若是」爲顏淵之言，謂有爲者亦如舜。公

明儀曰：「文王，我師也。周公豈欺我哉？」

注公明儀，賢者也。師文王，信周公，言其知所法則也。**疏**注「公明」至「則也」○正義曰：《禮記·檀弓》云：

「子張之喪，公明儀爲志焉。」《祭義》云「公明儀問於曾子曰，夫子可爲孝乎」，注云：「公明儀，曾子弟子。」儀學於曾子而得聞其道，當時稱賢者，故子張卒乞其爲志。孔穎達謂是子

張弟子，則注無文也。趙氏言「師文王，信周公」，下云「言其知所法則」，則是知法文王、周公兩人。今滕絕長補短，將五十里也，猶可以為善國。**注**滕雖小，其境界長短相補，可得大五十里子男之國也，尚可以行善者也。

疏「今滕」至「善國」○正義曰：翟氏灝《考

異》云：「《墨子·非命》篇云：『古者湯封於亳，絕長繼短，方地百里，文王封於岐周，絕長繼短，方地百里。』《戰國策》韓非說秦王曰：『今秦地形斷長續短，方數千里。』又莊辛對楚王曰：『今楚雖小，絕長續短，猶以數千里。』「絕長補短」乃當時通言，故諸家俱言之。」○《周禮·醫師》疏引《孟子》：「滕文公為世子，將之楚，過宋見孟子而謂之云：今滕絕長補短，將五十里，猶可以為善國乎？」以此為文公問辭。」按趙氏不以為問辭，賈氏未知何本，當有誤也。○「注可得大五十里」○正義曰：《爾雅·釋詁》云：「將，大也。」趙氏以「大」釋「將」，故云「大五十里」。《廣雅·釋詁》云：「方，大也。」大五十里即方五十里也。《書》曰：「若藥不瞑眩，厥疾不瘳。」**注**《書》，逸篇也。瞑眩，藥攻人疾，先使瞑眩憤亂，乃得瘳愈也。喻行仁當精熟，德惠乃洽。

疏注「書逸」至「乃洽」○正義曰：《國

語·楚語》云：「武丁於是作書曰：『以余正四方，恐余德之不類，茲故不言。』如是而又使以象夢求四方之賢聖，得傳說以來，升以為公而使朝夕規諫，曰：『若金，用汝作礪；若津水，用汝作舟；若天旱，用汝作霖雨。啓乃心，沃朕心。若藥不瞑眩，厥疾不瘳，若跣不視地，厥足用傷。』」江氏聲《尚書集注音疏》云：「賈逵、唐因皆以武丁所作書為《說命》，韋昭曰：『非也，其時未得傳說。』」聲按，「以余正四方」云云不類《尚書》之文，蓋是白公子張說武丁求傳說之意，「若金」以下則皆傳說之辭。《孟子·滕文公》篇引「若藥不瞑眩」，明稱「《書》曰」，自是《說命》之文矣。」按：《說命》三篇，今文、古文皆無，此云「逸篇」，未知所屬也。《音義》云：「瞑眩，莫甸切，下音縣。又作「眠眴」，音同。」《周禮·天官·醫師》「聚毒藥以共醫事」，注云：「毒藥，藥之辛苦者。藥之物恒多毒，《孟子》曰：『若藥不瞑眩，厥疾不瘳。』」《方言》云：「凡飲藥傳藥而毒，南楚之外謂之痢，北燕朝鮮之間謂之癆，東齊海岱之間謂之瞑，或謂之眩，自關而西謂之毒。」韋昭注《楚語》云：「瞑眩頓脅，攻己急也。」《金匱·痙瘓喝病脉》篇「白朮附子湯」下云：「一服覺身痺，

①「家」，原脫，今據經解本補。

半日許再服。三服都盡，其人如冒狀，勿怪。」如冒狀即頓瞽也。一服、再服、三服都盡，藥乃充滿而得此狀，故喻仁當精熟，德惠乃洽。《史記·司馬相如傳》《大人賦》云「視眩眠而無見兮」，《漢書·揚雄傳·甘泉賦》云「目冥眴而亡見」，凡冒者眩亂目視不明，憤亂亦猶是也。《毛詩·鄭風》云「胡不瘳」，傳云：「瘳，愈也。」《方言》云：「愈，或謂之瘳。」

章指：言人當上則聖人，秉仁行義。

高山景行，庶幾不倦。《論語》曰「力行近仁」，蓋不虛云。疏「人當」至「虛云」○正義曰：阮

氏元《校勘記》云：「韓本人下有主字。」《音義》云：「『力行近仁』，《論語》無此語，是《禮記·中庸》篇。趙氏以爲《論語》，文之誤也。」

滕定公薨，世子謂然友曰：「昔者孟子嘗與我言於宋，於心終不忘。今也不幸至於大故，吾欲使子問於孟子，然後行事。」注定公，文公父也。然友，世子之傳也。大故謂大喪也。

疏注「然友世子之傳也」○正義曰：《說文》人部云：「傳，相

也。《禮記·文王世子》云：「太傅在前，少傅在後。」是世子有傳相也。○注「大故謂大喪也」○正義曰：《禮記·曲禮》云「君無故，玉不去身」，注云：「故謂災患喪病。」《周禮·春官·大宗伯》「國有大故」，注云：「故謂凶裁。」然友之鄒，問於孟子。注孟子歸，在鄒也。疏注「孟子歸

在鄒也」○正義曰：孟子蓋自宋歸鄒也。《史記正義》云：「今鄒縣去徐州滕縣四十餘里。」蓋往反不過大半日，故可問而後行事。孟子曰：「不亦善乎？親喪，固所自盡也。注不亦者，亦也。問此，亦其善也。疏

注「不亦」至「善也」○正義曰：亦，重也。世子本善，今又問此，不重見其善乎？曾子曰：「生事之以禮，死葬之以禮，祭之以禮，可謂孝矣。」注曾子傳孔子之言，孟子欲令世子如曾子之從禮也。時諸侯皆不行禮，故使獨行之也。疏注「曾子」至「之也」○正義

曰：曾子之言見《論語·爲政》第2，乃孔子對樊遲之言，故云傳孔子之言也。翟氏灝《考異》云：「《四書辨疑》言曾字本是孔字，蓋後人傳寫之誤。按，《大戴禮·曾子本孝》篇：『孝子之於親也，生則有義以輔之，死則哀以蒞焉，祭祀則蒞

之以敬。」曾子固嘗誦此告門人矣。下文「齊疏」數語亦明出自曾子。《祭義》：「樂正子春云：吾聞曾子，曾子聞諸夫子。」彼原其詳，此從其省。孟子學由曾子遞傳，據所及聞，曾字何足疑焉？「曾子從禮，故欲世子亦如曾子之從禮。云「諸侯皆不行禮，故使獨行之」，解上「故所自盡」之意。「自盡」即獨行也。諸侯之禮，吾未之學也，雖然，吾嘗聞之矣。三年之喪，齊疏之服，飭粥之食，自天子達於庶人，三代共之。」**注**孟子言我雖不學諸侯之禮，嘗聞師言。三代以前，君臣皆行三年之喪。齊疏，齊衰也。飭，糜粥也。**疏**注「嘗聞師言」

至「粥也」○正義曰：《禮記·檀弓》云：「穆公之母卒，使人問於曾子曰：『如之何？』」對曰：「申也聞諸申之父曰：哭泣之哀，齊斬之情，饘粥之食，自天子達。」是孟子亦述曾子之言，蓋嘗聞諸師者也。阮氏元《校勘記》云：「『齊疏之服』，**①**閩、監、毛三本、孔本齊作齊，韓本作齋。按，《音義》出齋。作齊，經典假借字也；作齋者，正字也；作齋者，齋之誤。」《儀禮·喪服》首章云「斬衰裳，苴絰、杖、絞帶、冠繩纓、**②**菅屨者」，次章云「疏衰裳齊、牡麻絰、冠布纓、削杖、布帶、疏屨三年者」，三章云「疏衰裳齊、牡麻絰、冠布纓、削杖、

布帶、疏屨期者」，傳云：「斬者何？不緝也。齊者何？緝也。」**注**云：「凡服，上曰衰，下曰裳。疏猶羸也。」按：此自齊衰三年以下，皆用疏衰，故趙氏以「齊衰」釋「齊疏」也。襄公十七年《左傳》云：「齊晏桓子卒，晏嬰羸縗斬，其老曰：『非大夫之禮也。』」曰：「唯卿為大夫。」《禮記·雜記》云：

「大夫為其父母兄弟之未為大夫者之喪服如士服，士為其父母兄弟之為大夫者之喪服如士服。」**注**引晏嬰羸衰斬以證云：「言已非大夫，故為父服士服耳。羸衰斬者，其縗在齊斬之間，謂縗如三升半而三升不緝也。斬衰以三升為正，微細焉，則屬於羸也。然則士與大夫為父服異者，有羸衰斬、枕草矣。其為母五升縗而四升，為兄弟六升縗而五升乎？惟大夫以上乃能備儀盡飾，士以下則以臣服君之斬衰為其父，以臣從君而服之齊衰為其母與兄弟，亦勉人為高行也。」按：斬衰不稱疏，齊衰以下乃稱疏，此天子諸侯大夫之禮。士既降於大夫，則斬亦用疏，此晏嬰用士禮，所以稱羸衰斬也。孟子言未學諸侯之禮，則所言乃士禮，其稱齊疏內原包

① 「齊」，原作「齊」，據阮校改。按阮刻《孟子注疏》經注均作「齊」，出文當作「齊疏之服」。

② 「冠」，原脫，今從沈校據《儀禮》及下二段引文補。

有斬衰。孟子言齊疏，猶曾申言齊斬耳。孔氏《雜記》正義云：「士與大夫爲父異，大夫以上斬衰，枕草，^①士則疏衰，枕草。」是也。《檀弓》《釋文》云：「饋，本作飭。」是飭、饋字通。《說文》食部云：「饋，糜也。周謂之饋，^②宋衛謂之饋。」又弼部云：「饗，饗也。」重文「飭」、「飭」、「饋」。又云：「饗，饋也。」「饗，饋也。」《爾雅·釋言》云：「餽，饋也。」餽即饗，粥即饗。劉熙《釋名·釋飲食》云：「糜，煮米使糜爛也。粥，濁於糜，粥粥然也。」蓋今俗以整米煮爲粥，粉米煮爲餽。古之饋即今之粥，古之粥則今之餽。饋爲糜，飭爲粥，而糜亦通稱餽，粥亦通稱饋。趙氏釋飭爲糜粥，則粥之清而稀者異於餽之濁而膏者，是飭宜爲饋也。趙注「飭糜粥也」，汲古本作糜，孔本作糜，《音義》出糜，云：「字亦作糜，音義與糜同。」按：《說文》有糜字，無糜、糜字。

然友反命，定爲三年之喪。父兄百官皆不欲，曰：「吾宗國魯先君莫之行，吾先君亦莫之行也。至於子之身而反之，不可。」^注父兄百官，滕之同姓異姓諸臣也。皆不欲使世子行三年。滕、魯同姓，俱出文王。魯，周公之後；滕，叔繡之後。敬聖人，故宗魯者也。^疏「定爲」至「之喪」○

正義曰：毛氏奇齡《臆言》云：「滕文公問孟子，始定爲三年之喪，豈戰國諸侯皆不行三年喪乎？若然，則齊宣欲短喪，何與？」然且曰「吾宗國魯先君不行，吾先君亦不行」，則是魯周公、伯禽、滕叔繡，並無一行三年之喪者。往讀《論語》，子張問高宗三年不言，夫子曰：「何必高宗？古之人皆然。」遂疑子張此問，夫子此答，其周制當必無此事可知。何則？子張以高宗爲創見，而夫子又言古之人，其非今制昭然也。及讀《周書·康王之誥》，成王崩方九日，康王遽即位冕服，出命令，誥諸侯，與「三年不言」絕不相同。然猶曰此天子事耳。後讀《春秋傳》，晉平公初即位，改服命官，而通列國盟戒之事。始悟孟子所定三年之喪，引「三年不言」爲訓，而滕文奉行，即又曰「五月居廬，未有命戒」，是皆商以前之制，並非周制。周公所制禮，並未有此，故侃侃然曰：「周公不行，叔繡不行，悖先祖，違授受。」歷歷有辭。而世讀其書而通不察也。蓋其云「定三年之喪」，謂定三年之喪制也。然則孟子何以使行商制？曰：使滕行助法，亦商制也。顧氏棟高《春秋大事表》云：「滕文公欲行三年之喪，父兄百官

①「草」，阮刻本《禮記注疏》作「由」，參沈校。

②「周」，原誤作「同」，今從沈校據《說文》改。

羣然駭怪。孟子去孔子之世未百年，而當日之習尚如此，則其混焉廢墜，豈一朝一夕之故哉？余嘗詳考《左氏傳》，而知天子諸侯喪紀已廢絕於春秋時無疑也。蓋自周道陵遲，皇綱解紐，有以諸侯不奔天子之喪，不會天王之葬，而甘僕僕於晉楚者矣。有以天子貧乏，不備喪具，至七年乃葬，於魯求賻求金，甚至景王三月而葬，以天子而用大夫之禮者矣。逮子朝作亂，王室如沸，奉周之典籍以奔楚，而周天子之禮遂亡。列國不守侯度，其侈者如宋文公之椁有四阿，棺有輪檜，儼然用王禮。而苟簡不備者，如晉樂書以車一乘葬公於東門之外，齊崔杼葬莊公，四嬰不踴，鄰封不與知，公卿不備位，魯號秉禮，而葬昭公於墓道之南，《檀弓》載孟敬子之言，明知食粥為天下之達禮，而居然食食。其餘列國，尤放肆不軌。由是惡其害己而皆去其籍，而諸侯之禮亦亡。孔子以大聖人而不得位，退與門弟子講習於杏壇之上，故孺悲曾學士喪禮於孔子，而天子諸侯之禮無由釐正。三《傳》之所記僅存什一於千百，至孟子時，有土之君，視焉人面，以三年之喪之達禮而怪駭為不經，杞、宋之無徵，豈獨為夏殷之禮嘆哉！」○「吾宗國魯先君莫之行」○正義曰：閻氏若璩《釋地續》云：「漢梅福有言『諸侯尊宗』，如淳曰：『尊宗，始封之君尊為諸侯，則尊其舊為宗子之事也。』蓋大

小宗法，大夫士有之，諸侯則絕。然亦間有見於諸侯者，如魯與邢、凡、蔣、茅、胙、祭同出於周公，故稱六國為同宗。襄十二年：「凡諸侯之喪，同宗臨於祖廟。」是管、蔡、鄭、霍、衛、毛、昞、郕、雍、曹、滕、畢、原、鄆、郕，與魯同出於文王，皆稱魯為宗國。滕父兄百官所謂「吾宗國魯先君」，是。趙氏注云：「魯，周公之後。滕，叔繻之後。敬聖人，故宗魯。」真得其旨矣。」毛氏奇齡《經問》云：「古者立宗法，國君無宗，祇以相傳之諸君為宗，故除一祖外，餘皆為宗，不立小宗。若天子諸侯之弟，則不敢與天子諸侯為一宗而別為宗族，使天子諸侯之嫡弟一人立為大宗，而諸兄弟之為小宗者宗之。如魯，周公之弟皆宗周公而稱魯國為宗國。然人孰無父？周公不敢祖王季而可立文王之廟於魯國，鄭桓公不敢祖夷王而可立厲王之廟於鄭國。不敢祖，非不敢父也。故《大傳》云：『宗其繼別子之所自出者，百世不遷者也。』夫別子，宗子也。別子所自出，則宗子之父也。繼宗子之父而可有百世不遷之廟，則父君矣。趙氏注云滕與魯皆出自文王，此據《春秋》魯以文王名「出王」，以文王之廟名「出王廟」而言，此正是宗法。特其稱「宗聖」則不可解。或者周公以宗子而為聖人，當時或原有宗聖之稱，亦未可知。或曰：「宗國者，同宗之稱。滕可稱魯，魯亦可稱滕。」則不然。《國語》舟之

僑曰：「宗國既卑，諸侯遠己，內外無親，其誰救之？」專以宗國指魯言，宗在故也。哀八年，公山不狃對叔孫輒曰：「以小惡而覆宗國，不亦難乎？」哀十五年，子貢見公孫成曰：「利不可得而喪宗國，將焉用之？」皆指魯國言，宗在故也。宗法，自天子諸侯外，固以庶子宗嫡子。倘皆庶，則以長庶爲別子，而諸庶子皆宗之；倘皆嫡，則祇以次嫡爲別子，而其餘諸嫡皆宗之。周公爲武王母弟之第二人，不當爲宗，無如長伯邑考早卒，次武王爲天子，次管叔已辟，則周公升爲次嫡，即別子矣。」程氏瑤田《通藝錄·宗法小紀》云：

「宗法載《大傳》及《喪服小記》，列其節目，明其指歸。大宗小宗之名，有遷與不遷之別，又爲之通宗道之窮，究立宗之始，此所謂宗法也。宗法者，大夫士別於天子諸侯者也。公子不得禰先君，公孫不得祖諸侯矣。使無宗法，則支分派衍無所統，諸侯將無以治其國，天子將無以治其天下。故宗法者爲大夫士立之，以上承夫天子諸侯而治其家者也。若夫太戊之稱中宗，傳以爲殷家中世，尊其德也；武丁之稱高宗，傳以爲德高可尊也。皆與宗法無與。至於《公劉》之詩，雖毛氏傳以謂「爲之大宗」，而鄭箋則曰「羣臣尊之」。所以易傳者，以國君尊族人，不敢以其戚戚君，不當有大小宗之名也。故毛氏於《板》之詩亦曰「王者，天下之大宗」，而鄭氏

亦易之以爲「大宗，王同姓之適子」。同姓之適子，所謂「繼別爲宗」者也。若天子諸侯，則固絕其宗名矣。維「宗子維城」，鄭氏以爲「王之適子」。蓋宗者，主也，即《震·彖傳》所謂「守宗廟社稷以爲祭主」，《春秋傳》里克所謂「太子奉冢祀社稷之粢盛」，而士蔭以爲「修德以固宗子」者也。皆非宗法之謂。《祭法》：「有虞氏宗堯，夏后氏宗禹，殷人宗湯，周人宗武王。」此祭上帝於明堂，尊之以配食，《孝經》所謂「宗祀文王於明堂以配上帝」是也。蓋宗之言尊也，凡有所尊，皆可以宗。《孟子》稱滕之父兄百官曰「吾宗國魯先君」，亦謂兄弟之國尊之，豈得以宗法例之哉！且志曰：「喪祭從先祖。」曰：「吾有所受之也。」注父兄百官且復言也。志，記也。《周禮》「小史掌邦國之志」。曰喪祭之事各從其先祖之法，言我轉有所承受之，不可於己身獨改更也。一說「吾有所受之」，世子言我受之於孟子也。

疏注「父兄百官且復言也」○正義曰：阮氏元《校勘記》云：「且志曰」，此與《左傳》「且諺曰」「匪宅是卜，惟鄰是卜」，文法正同。依注，疑且字下奪曰字，《左傳》亦然。○注「志記」至「子也」○正義曰：劉熙《釋名·釋典藝》云：「記，紀也。紀識之也。」《周禮·保章

氏》注云：「志，古文識。」志之爲記，即記之爲識也。小史屬天官，^①鄭司農云：「志謂記也。《春秋傳》所謂《周志》、《國語》所謂《鄭書》之屬是也。」小史所掌之志，記世系昭穆之事，容有「喪祭從先祖」云云，故趙氏引以爲證，實不知爲何書也。《儀禮·喪服》云「受以小功衰」，注云：「受猶承也。」故以「承」釋「受」。承受則遵而從之，故不改更也。閻氏若璩《釋地》又續云：「吾有所受之也」爲世子答父兄百官語。「吾」與下「謂然友曰吾」字，正一人。此解首發於趙氏。按：趙氏前說以此言父兄百官之言，受是承受先祖，然則句上不應加「曰」字。加「曰」字則自明其爲世子答言。言定爲三年之喪，非我臆見，吾受之於孟子，孟子則聞之於師說也。故下「謂然友曰」上，更不加「世子」，否則謂然友竟似父兄百官謂然友矣。趙氏不以前說爲安，故稱「一說」，蓋前說當時相傳之說，一說則趙氏所折衷也。謂然友曰：「吾他日未嘗學問，好馳馬試劍。今也父兄百官不我足也，恐其不能盡於大事。子爲我問孟子。」^注父兄百官見他日所行，謂我志行不足，似恐我不能盡大事之禮，故止我也。爲我問孟子當何以服其心，使信我也。^疏「恐其不能盡於大事」○正義

曰：趙氏以「其」字乃指他人之辭。若世子自恐，不當用「其」字，直云「恐不能盡於大事」可矣。今云「恐其不能」，是連上句一貫。乃父兄百官恐世子且不我足也，連下意乃足也。然友復之鄉問孟子。孟子曰：「然，不可以他求者也。孔子曰：『君薨，聽於冢宰。』歠粥，面深墨，即位而哭，百官有司莫敢不哀，先之也。」^注孟子言，如是，不可用他事求也。喪尚哀，惟當以哀戚感之耳。國君薨，委政冢宰大臣。嗣君但盡哀情，歠粥不食，顏色深墨。深，甚也；墨，黑也。即喪位而哭，百官有司莫敢不哀者，以君先哀故也。^疏注「孟子」至「故也」○正義曰：以「如是」釋「然」字，以「用」字釋「以」字。「他」爲「他事」，虛言之以起下文也。《論語·子張》篇云「喪思哀」，爲政篇云「喪與其易也寧戚」，《禮記·少儀》云「喪事主哀」，《莊子·漁父》篇云「處喪以哀爲主」，是「喪尚哀」也。《論語·憲問》篇云：「子張曰：『《書》云：『高宗諒陰，三年不言。』何謂也？』」

①「天官」，按小史屬春官，參沈校。

子曰：「何必高宗？古之人皆然。君薨，百官總己，以聽於冢宰三年。」《集解》孔氏云：「冢宰，天官卿，佐王治者也。三年喪畢，然後王自聽政也。」《禮記·檀弓》云：「子張問曰：『《書》云：「高宗三年不言，言乃譴。」有諸？』仲尼曰：『胡爲其不然也？古者天子崩，王世子聽於冢宰三年。』」注云：「冢宰，天官卿，貳王事者。三年之喪，使之聽朝。」《尚書大傳》亦引《書》曰：「高宗梁闇，三年不言。子張曰：『何謂也？』」孔子曰：「古者君薨，世子聽於冢宰三年，不敢服先王之服，履先王之位而聽焉。」是「君薨，聽於冢宰」爲孔子之言也。《禮記·曲禮》云「食居人之左」，注云：「食，飯屬也。」《說文》飲部云：「飲，飲也。」重文映。「飲粥不食」謂但飲粥不飯也。深，甚音近相通。《國策·秦策》云「三國之兵深矣」，高誘注云：「深猶盛也。」盛，甚義皆爲多。《呂氏春秋·禁塞》篇云「害莫深焉」，高誘注云：「深，重也。」惟其甚，故重，義亦同也。哀十三年《左傳》云：「肉食者墨，今吳王有墨，國勝乎？」《國語·吳語》云：「臣觀吳王之色，類有大憂。」注引《左傳》云：「墨，黑氣也。」蓋心憂痛不舒，則色形於面。居喪，哀戚之甚，故面上晦黑深重也。《士喪禮》云：「有大夫，則特拜之。即位如西階下，庶兄弟綖，使人以將命於室，主人拜於位。設明衣裳，主人人即位。奉尸俛於

堂。男女如室位，踊無算，主人拜賓，即位，踊。卒塗，祝取銘置於殯，主人復位，踊，襲。闔門，主人揖就次。三日成服，朝夕哭，不辟子卯。婦人即位於堂，南上，哭。丈夫即位於門外，西面北上。辟門。」是自始死以至朝夕哭皆有位，所謂「喪位」也。是時父兄百官俱在，故主人即位哭，則衆主人、衆兄弟、衆賓無不感而哭矣。上有好者，下必有甚焉者矣。君子之德，風也；小人之德，草也。草尚之風，必偃。是在世子。」**注**上之所欲，下以爲俗。尚，加也。偃，伏也。以風加草，莫不偃伏也。是在世子以身師之也。**疏**注「上之」至「之也」○正義曰：《禮記·緇衣》篇云：「子曰：『下之事上也，不從其所令，從其所行。上好是物，下必有甚者矣。』」注云：「甚者，甚於君也。」《論語·顏淵》篇云：「孔子曰：『子欲善而民善矣。君子之德，風；小人之德，草。草上之風，必偃。』」《集解》孔氏曰：「偃，仆也。加草以風，無不仆者，猶民之化於上也。」《釋文》云：「尚，本或作上。」是陸德明所見《論語》作「草尚之風」，與《孟子》同。趙氏以「加」解「尚」，與孔氏同也。《說文》人部云：「偃，僵也。」《淮南子·說山訓》云「致釋駕而僵」，注云：「僵，仆也。」趙氏以僵仆乃僨斃之

義，於小人向化之義不合，故改訓爲「伏」。《易·繫辭》釋文引孟喜、京房云：「伏，服也。伏地猶仆地。」伏爲服，則從化之象也。「必偃」以上皆孟子述孔子之言，「是在世子」爲孟子勉世子之言。然友反命。世子曰：「然，是誠在我。」**注**世子聞之，知其在身，欲行之也。五月居廬，未有命戒。百官族人可謂曰知。**注**諸侯五月而葬。未葬，居倚廬於中門之內也。未有命戒，居喪不言也。異姓同姓之臣可謂曰：「知世子之能行禮也。」**疏**「百官族人可謂曰知」○正義曰：《說文》可部云：「可，肯也。」《爾雅·釋言》云：「肯，可也。」始而云「至於子之身而反之，不可」，是不肯謂之曰知也；至是乃肯謂曰知，心服而首肯之也。○**注**「諸侯」至「禮也」○正義曰：隱公元年《左傳》云：「天子七月而葬，同軌畢至，諸侯五月，同盟至，大夫三月，同位至，士踰月，外嬖至。」是「諸侯五月而葬」也。《儀禮·喪服》「斬衰」章《傳》云：「居倚廬，寢苦枕塊，哭晝夜無時。歠粥，朝一溢米，夕一溢米。寢不脫絰帶。既虞，翦屏柱楣，寢有席。」**注**云：「楣謂之梁，柱楣所謂梁闇。舍外寢於中門之外，屋下壘塹爲之，不塗墍，所謂聖室也。」《既夕記》云「居倚廬」，**注**云：「倚木爲廬，

在中門外，東方北戶。」賈氏疏云：「北戶者，以倚東壁爲廬，一頭至北，明北戶鄉陰。至既虞之後，柱楣翦屏，乃西鄉開戶也。」按：既虞之後始有楣有柱。謂之「聖室」，以其雖有梁楣，而冥闇不高明，故亦謂之「梁闇」，即「諒陰」也。其未葬之前無柱無楣，但用兩木斜倚於東壁，作塹堵形。向西順斜倚之木，以草爲屏，故名「倚廬」。高宗三年不言，謂既葬居梁闇中，故云高宗諒陰。滕文五月居廬，謂未葬居倚廬中。在高宗三年居梁闇，則未葬之七月居倚廬可知；滕文既定三年之喪，則未葬居倚廬，其既葬亦居梁闇可知。何以知之？方父兄百官不可時，且必使然友之鄰，反復咨問，至是百官族人無不感悅，則孟子之言已驗，世子之心益堅，五月既葬，豈反自怠乎？或謂文公僅能五月未葬前守諒陰之制，洵坐井之見耳。「可謂曰知」，趙氏增成其義云「可謂曰知世子之能行禮也」，是「知」謂百官族人自謂其知。始時皆不欲其行三年之喪，以爲不可，至是首肯而謂之曰吾今乃知。知猶覺也，亦解也。若曰吾始聞其定行三年之喪，不以爲可者，不解其義也，今則解矣。「知」如字，平聲；或讀若智，非也。《孟子》之文微奧通神，每同《左傳》、《檀弓》。「可謂曰知」，「曰」字是矣。及至葬，四方來觀之。

顏色之戚，哭泣之哀，弔者大悅。**注**四方諸侯之賓來弔會者，見世子之憔悴哀戚，大悅其孝行之高美也。

章指：言事莫大於奉禮，孝莫大於哀慟。「從善如流」，文公之謂也。**疏**「從善如

流」○正義曰：昭公十三年《左傳》文。

滕文公問爲國。孟子曰：「民事不可緩也。」**注**問治國之道也。民事不可緩之使怠惰，當以政督趣，教以生產之務也。**疏**「問治」至「務也」○

正義曰：高誘注《呂氏春秋》、《淮南子》，皆云：「爲，治也。」是「爲國」即「治國」也。《易·序卦傳》云：「解者，緩也。」解即懈，義爲怠惰。「不可緩」即「不可使怠惰」也。何以不使怠惰？故又申言之云：「以政督趣，教以生產之務。」如下所云。《詩》曰：「晝爾于茅，宵爾索綯，亟其乘屋，其始播百穀。」**注**《詩》，《邶風·七月》之篇。言教民晝取茅草，夜索以爲綯。綯，絞也。及爾閒暇，亟而乘蓋爾野外之屋。春事起，爾將始播百穀

矣。言農民之事無休已。**疏**「詩邶」至「休已」○正義曰：《詩》在《七月》第七章。毛傳云：「宵，夜。綯，絞也。

乘，升也。」箋云：「爾，女也。女當晝日往取茅，歸，夜作絞索，以待時用。亟，急；乘，治也。十月定星將中，急當治野廬之屋。」其始播百穀，謂祈來年百穀於公社。」趙氏與之略同。《毛詩·周南》「之子于歸」，傳云：「于，往也。」鄭氏以往釋于，以取茅釋茅，趙氏不言往者，以于之爲往易知也。取茅謂之茅，猶搏貉謂之貉也。「綯，絞也」，《爾雅·釋言》文。李巡云：「綯，繩之絞也。」《方言》云：「車紂，**②**自闕而東，周、洛、韓、鄭、汝、潁而東，謂之緇，或謂之曲綯。」郭氏注云：「綯亦繩名。」《儀禮·喪服傳》云：「絞帶者，繩帶也。」是絞即繩。綯是絞，即是繩矣。《易·說卦傳》云：「一索而得男」，馬融注云：「索，數也。」《毛詩·陳風》「越以覈邁」，**③**傳云：「覈，數也。」箋云：「覈，總也。」蓋以兩股摩而交之，總爲一繩。以其絞之索之而成，故亦名爲索爲絞。猶繩爲

①「屋」，原誤從毛本《毛詩注疏》作「外」，今從沈校據阮刻本改。

②「車紂」，原誤作「當查」，今據《方言》及經解本改。

③「詩」，原誤作「傳」，今從沈本據文義改。

定名，而彈正之即謂之繩，《爾雅·釋器》：「繩之謂之縮之」是也。此又絢是繩，索是索此絢，故云「夜索以爲絢」。鄭云「夜作絞索」，則以絞釋索，以索釋絢，其義同也。以茅蓋屋，用繩固之，故云「乘蓋爾野外之屋」。農至冬月，可以閒暇，猶督趣其取茅，索絢以治屋，晝夜不緩，恐妨來春田事，所以終歲無休已也。箋以「播百穀」爲祈穀於公社，與趙氏說異。民之爲道也，有恒產者有恒心，無恒產者無恒心。苟無恒心，放辟邪侈，無不爲已。及陷乎罪，然後從而刑之，是罔民也。焉有仁人在位，罔民而可爲也？**注**義與上篇同。孟子

子既爲齊宣王言之，滕文公問，復爲究陳其義，故各自載之也。是故賢君必恭儉禮下，取於民有制。**注**古之賢君身行恭儉，禮下大臣，賦取於民不過什一之制也。陽虎曰：「爲富不仁矣，爲仁不富矣。」**注**陽虎，魯季氏家臣也。富者好聚，仁者好施。施不得聚，道相反也。陽虎非賢者也，言有可采，不以人廢言也。**疏**注「陽虎」至「言也」○正義

曰：《春秋》定公九年「盜竊寶玉大弓」，**①**《公羊傳》云：

「盜者孰謂？謂陽虎也。陽虎者，曷爲者也？季氏之宰也。季氏之宰，則微者也。」九年《左傳》齊鮑文子曰：「夫陽虎有寵於季氏，而將殺季孫以不利魯國而求容焉。親富不親仁，君焉用之？」《論語·陽貨》篇「陽貨欲見孔子」，《集解》孔氏曰：「陽貨，陽虎也。季氏家臣，而專魯國之政。」家臣即宰也。專政，《春秋》以「盜」書，是「非賢者」也。虎親富不親仁，則重在富，孟子引之，則重在仁。仁人不爲罔民之政，則不爲富而爲仁矣。「不以人廢言」，《論語·衛靈公》篇文。《鹽鐵論·地廣》章引楊子云「爲仁不富，爲富不仁」，誤以陽虎爲楊子。

「夏后氏五十而貢，殷人七十而助，周人百畝而徹，其實皆什一也。徹者，徹也；助者，藉也。」**注**夏禹之世號「夏后氏」。后，君也。禹受禪於君，故夏稱「后」；殷、周順人心而征伐，故言「人」也。民耕五十畝，貢上五畝；耕七十畝者，以七畝助公家；耕百畝者，徹取十畝以爲賦。雖異名而多少同，故曰「皆什一」也。徹猶人徹取物也。

① 「九」，按引文在八年。

藉者，借也，猶人相借力助之也。

疏注「夏禹」至「人

也」○正義曰：《禮記·檀弓》正義引《白虎通》云：「夏稱后者以揖讓受於君，故稱后；殷周稱人者，以行仁義，人所歸往，故稱人。」此趙氏所本也。皇侃《論語義疏》謂：「夏以揖讓受禪爲君，故褒之稱后。后，君也。又重其世，故氏係之也。殷周以干戈取天下，故貶稱人也。」以稱人爲貶，非趙氏義矣。○注「民耕」至「一也」○正義曰：顧氏炎武《日知錄》云：「古來田賦之制實始於禹。水土既平，咸則三壤，後之王者不過因其成蹟而已。故《詩》曰：『信彼南山，維禹甸之。』」○注「夏后氏五十而貢，殷人七十而助，周人百畝而徹。」夫井田之制，一井之地畫爲九區，故蘇洵謂萬夫之地。蓋三十二里有半，而其間爲川爲路者一，爲澮爲道者九，爲洫爲涂者百，爲溝爲畛者千，爲遂爲經者萬。使夏必五十，殷必七十，周必百，則是一王之興，必將改畛涂，變溝洫，移道路以就之，爲此煩擾無益於民之事也，豈其然乎？蓋三代取民之異在乎貢、助、徹，不在乎五十、七十、百畝。其五十、七十、百畝特丈尺之不同，而田未嘗易也，故曰其實皆什一也。《王制》曰：「古者以周尺八尺爲步，今以周尺六尺四寸爲步。」而當日因時制宜之法，亦有

可言：夏時土曠人稀，故其畝特大；殷周土易人多，故其畝漸小。以夏之一畝爲二畝，其名殊而實一矣。」錢氏塘《溉堂述古錄·三代田制考》云：「三代田制曷以異？曰：無異也。無異則孟子何以言五十畝、七十與百畝？曰：名異而實不異。非不欲異其制，固不能異也。其不能異，奈何？曰：井田始於黃帝，洪水之後，禹修而復之，孔子所謂『盡力乎溝洫』也。溝洫既定，不可復變，殷周遵而用之耳。《考工記》匠人爲溝洫，始於廣尺深尺之畎，田首倍之爲遂，爲井間之溝，倍其溝爲成間之洫，倍其洫爲同間之澮。賈公彥繪一成之圖，謂畎縱遂橫，溝縱洫橫，澮縱自然川橫。然則見畎知畝，見遂知夫，見溝知井，見洫知成，見澮知同也。一同之田，川與澮爲方，一成之田，洫與溝爲方，一井之田，溝與遂爲方，一夫之田，遂與畎爲方。畎，伐也。不爲夫田限，故夫三爲屋，遂與溝遇也。至溝與洫遇，則爲通矣；洫與澮遇，則爲終矣。屋者，三分夫之一；通者，十分成之一；終者，十分同之一；皆不爲方，水道有縱橫故也。禹自言『濬畎澮距川』，明畎澮縱而川則橫，周制本乎夏制矣。使周異於殷，殷異於夏，必盡更夏后氏之制。更其畎遂固易也，溝

①「述」，原誤作「考」，今從沈校據原書名改。

洫則難矣，川澮抑又難矣。我因川澮溝洫之不能更而知周用夏制也，我因周用夏制而知殷與周之未嘗各異也。然則畝數之不同，何歟？曰：所謂異其名也。其名何以異？曰：以度法之各異也。蔡邕謂夏以十寸爲尺，殷以九寸爲尺，周以八寸爲尺。夫殷之尺非遂得夏之九寸也，蓋九寸則不足，周之尺非止得夏之八寸也，蓋八寸而有餘。何則？夏之百分，殷以爲百一十二分，周以爲百二十分，通其率，則五十之爲五十六與六十也，而夫田之廣長與其步法俱得矣。是故同此一夫之田：夏以廣十尺長五百尺爲畝，殷以廣八尺長五百六十尺爲畝，周以廣六尺長六百尺爲畝。如其畝法，而五十、七十與百畝之數立矣。步則夏以五尺，殷以五尺六寸，周以六尺。一畝同長百步，而夏廣二步，殷廣一步五十六分步之二十四，周廣一步。推之一里，則廣長皆三百步，其積皆九萬步也。夫如是，則自遂以上，殷周皆不必更，而獨更其畝，豈不甚易也哉？夫三代步法與其夫田之廣長皆與率數相應，故夫有異畝，畝無異步，是之謂名異而實同。少康有田一成，即《考工》之十里，其明證也。曰：井與夫皆方，畝何以不方？曰：畝之水注於遂，遂在田首，故不能方。猶溝之水注於洫，洫在通首，亦不能方。即《詩》所謂「南東其畝」，而韓嬰謂之「長一步，廣一步」者也。南畝之長

即東畝之廣，分言之則皆一步。而或者疑之，則畝必廣長皆十步邪？曷爲晉欲令齊盡東其畝也？孟子又謂皆什一，奈何？曰：此殷周侯國之制也。康成所謂「公田不稅夫」，故其名曰助與徹；夏則稅夫，無公田而名爲貢。貢爲什一，助與徹爲九一。九一之與什一，盈朒異名耳，故曰皆什一。《禹貢》賦有九等，果什一歟？曰：禹以九州爲等，非一井也，烏得言非什一？「錢氏大昕《潛研堂答問》云：『鄭康成注《周禮》，嘗引《孟子》『野九夫而稅一，國中什一』之文，孔穎達《詩正義》申其旨云：『周制有貢有助：助者，九夫而稅一夫之田，貢者，什一而貢一夫之穀。通之二十夫而稅二夫，是爲什中稅一也。九一而助，爲九中一。知「什一自賦」非什中一者，以言「九一」即云「而助」，明九中一助也，「國中」言「什一」，乃云「使自賦」，是什一之中使自賦之，明非什中一爲賦也。《孟子》又云：「方里而井，井九百畝。其中爲公田，八家皆私百畝同養公田。公事畢，然後敢治私事，所以別野人也。」言「別野人」者，別野人之法，使與國中不同也。《爾雅》云「郊外曰野」，則「野人」爲郊外也，野人爲郊外，則「國中」爲郊內也。郊內謂之國中者，以近國，故繫國言之亦可。地在郊內，居在國中故也。』郊外國中人各受田百畝，或九而取一，或什一而取一，通內外之率則

爲什而取一，故曰徹。徹之爲言通也。康成之義，得孔氏而益明。若分公田爲廬舍，八家各二畝半，其說始於班固，而何休注《公羊》、趙岐注《孟子》、范甯注《穀梁》、宋均注《樂緯》皆因之，非鄭義也。」段氏玉裁《說文解字注》云：「耨，殷人七十而耨。耨，藉稅也。从耒，助聲。《周禮》曰：『百與耨利萌。』今《孟子》作助，《周禮》注引作助。耨即以藉釋之。藉稅者，借民力以食稅也。《遂人》注云：『鄭大夫讀耨爲藉。杜子春讀耨爲助，謂起民人令相佐助。』按鄭意，耨者，合耦相助，以歲時合耦於耨，謂於里宰治處合耦，因謂里宰治處爲耨也。許意以《周禮》證七十而耨，謂其意同。」王氏念孫《廣雅疏證》云：「《大雅·韓奕》篇『實畝實藉』，鄭箋云：『藉，稅也。』宣十六年《左傳》『穀出不過藉』，杜預注云：『周法，民耕百畝，公田十畝，借民力而治之，稅不過此。』《王制》『古者公田藉而不稅』，鄭注云：『藉之言借也，借民力治公田，美惡取於此，不稅民之所自治也。』《說文》：『殷人七十而耨。耨，藉稅也。』耨字亦作助，又作助，助與藉古同聲，《孟子·公孫丑》篇『耕者助而不稅』，即藉而不稅也。《論語·顏淵》篇『盍徹乎』，鄭注云：『周法什一而稅謂之徹。徹，通也。爲天下之通法。』《孟子·滕文公》篇：『夏后氏五十而貢，殷人七十而助，周人百畝而徹，其實皆什一

也。徹者，徹也；助者，藉也。」趙氏注云云。鄭氏注《匠人》云：「貢者，自治其所受田，貢其稅穀。助者，借民之力以治公田，又使收斂焉。徹者，通其率以什一爲正也。」按：趙氏注「徹彼桑土」，釋「徹」爲「取」，此注同之。《孝經正義》引劉熙《孟子注》云：「家耕百畝，徹取十畝以爲賦也。」亦以徹爲取，與鄭氏義異。姚氏文田《求是齋自訂稿》云：「徹之名義，嘗屢求其說而不得，因考《公劉》、《崧高》兩詩，毛傳皆訓徹爲治。鄭氏《公劉》箋云：『什一而稅謂之徹。』又於《匠人》注云：『周之畿內，稅有輕重，諸侯謂之徹者，通其率以什一爲正。』《論語》注云：『徹，通也。爲天下之通法。』趙氏《孟子》注：『耕百畝者，徹取十畝以爲賦。徹猶人徹取物也。』賈氏《匠人》疏引之。孔氏《公劉》疏亦云：『徹取此隰原所收之粟，以爲軍國之糧。』是又以徹爲取。以他處「徹俎」、「徹樂」之類證之，皆是收取之義。《孟子》亦言「徹者徹也」，不煩更增一解，似「徹取」之義尤爲了當。然其制度何若，終不能明。惟《周官·司稼》云：「巡野觀稼，以年之上下出斂法。」是知徹無常額，唯視年之凶豐，此其與貢異處。助法正是八家合作，而上收其公田之人，無須更出斂法，然其弊必有如何休所云「不盡力於公田者」，故周直以公田分授八夫，至斂時則巡野觀稼，合百一十畝通計之，而取其什

一，其法亦不異於助，故《左傳》云「穀出不過藉」。然民自無公私緩急之異，此其與助異處。至魯宣公因其舊法而倍收之，是爲什而稅二矣。謂之徹者，直是通盤核算，猶徹上徹下之謂，並非「通融」之義。於此求之，則徹法亦可想見。故孟子既分釋徹助之義，而又據《大田》之詩以證其與助同法。先儒以貢助兼用爲詞，殆未然矣。」倪氏思寬《讀書記》云：

「『徹者徹也』二句承上文言之。不及貢法者，有龍子云云在也。商助周徹，乃先說徹後說助者，孟子意在行助，徹爲賓，助爲主。謂徹之爲徹，其法固良，而助之爲藉，其法尤美也。」龍子曰：「治地莫善於助，莫不善於貢。」

貢者，校數歲之中以爲常。**注**龍子，古賢人也。

言治土地之賦無善於助者也。貢者，校數歲以爲常類而上之，民供奉之，有易有不易，故謂之「莫不善」也。**疏**「校數歲之中以爲常」○正義曰：翟氏灝《考異》

云：「舊趙注本校字從手作校，與下學校字不同。《釋文》

云：「校，戶教反，从木。若从手，是比校字，今人多亂之。」

《五經文字》云：「校，音教，又音效，皆從木。」《字鑑》云：

「校字元有二音，借爲比校字，明末避諱，校省作校。」汲古閣注疏本此校與下學校，俱作校。」○注「龍子古賢人也」○正

義曰：《列子·仲尼》篇有龍叔，謂文摯云：「吾鄉譽不以爲榮，國毀不以爲辱，得而不喜，失而弗憂，視生如死，視富如貧，視人如豕，視吾如人。處吾之家，如逆旅之舍；觀吾之鄉，如戎蠻之國。」或其人與？樂歲粒米狼戾，多取

之而不爲虐，則寡取之；凶年糞其田而不足，則必取盈焉。**注**樂歲，豐年。狼戾猶狼藉

也。粒米，粟米之粒也。饒多狼藉，棄捐於地。是

時多取於民不爲暴虐也，而反以常數少取之。至於

凶年飢歲，民人糞治其田尚無所得，不足以食，而公

家取其稅必滿其常數焉。不若從歲飢穰以爲多少，

與民同之也。**疏**注「樂歲」至「之也」○正義曰：《鵠冠

子·學問》篇云：「所謂樂者，無菑者也。」年豐無菑，故稱樂

歲。《淮南子·覽冥訓》云「孟嘗君爲之增歛歎阨，流涕狼戾

不可止」，高誘注云：「狼戾猶交橫也。」《廣雅·釋詁》云：

「狼，盤也。」盤即戾。狼，戾一聲之轉。《國策·燕策》云「趙

王狼戾無親」，《漢書·嚴助傳》「狼戾不仁」，以其遺棄不甚

愛恤，故爲不仁無親之名。而涕之零落於地與粟之拋棄於

地，其名不同而義實相引也。《告子》篇「狼疾」，趙氏亦以

「狼籍」釋之。《漢書·燕刺王旦傳》云「首籍籍兮亡居」，注

云：「籍籍，縱橫貌。」縱橫猶交橫，故狼戾猶狼籍也。段氏玉裁《說文解字注》云：「今俗語謂米一顆爲一粒，《孟子》『樂歲粒米狼戾』，趙注云：『粒米，粟米之粒也。』《皋陶謨》：『烝民乃粒。』《周頌》『立我烝民』，鄭箋：『立當作粒。』《詩》《書》之粒，皆《王制》所謂粒食。」按：「粒米狼戾」，言米之粒不愛恤而縱橫於地也。因豐年饒多，故不愛恤而棄捐之也。《鹽鐵論·未通》篇云：「樂歲粒米梁糲而寡取之」，此即本之《孟子》，梁糲即狼戾之同聲。張之象注本依《孟子》改作「狼戾」，不知古人聲音通借之例也。《周書·金縢》「遭厲虐疾」，某氏傳云：「虐，暴也。」高誘《淮南子》注訓虐爲害，《說文》訓虐爲殘，殘害亦暴也。《周禮·地官·司關》「國凶札」，鄭司農注云：「凶謂凶年饑荒也。」《孟子》亦言凶年飢歲，是凶年即飢歲也。《禮記·月令》：「季夏大雨時行，燒薶行水，利以殺草，如以熱湯，可以糞田疇，可以美土疆。」孔氏正義云：「糞，壅苗之根也。」蔡云：「穀田曰田，麻田曰疇，言爛草可以糞田使肥也。」是糞其田即是治其田，故云「糞治其田」。《說文》皿部云：「盈，滿器也。」「取盈」是取其稅而滿其常數，如器定受若干，如其量以盈之也。從歲飢穰以爲多少，則助是矣。孔氏廣森《經學卮言》云：「均是田也，糞之則收自倍，然未有不費而食利者也。羊麋犬豕之骨

汁，所以爲糞種之具者，孰非待粟而易之？歲凶則粟不足食，幸而足食，亦無餘粟以易其所無，於是來歲所以糞其田者無以爲資矣。又凶之甚者，其所穫不足以償今歲糞田之費矣，遑供稅乎？且來歲之田糞既不足，則土疆不美，雖自天降康，亦將不逮其平歲之穫，故一歲遇凶廬，三歲而後其力可復，此稼穡之艱難，有國所當知也。」爲民父母，使民盼盼然將終歲勤動不得以養其父母，又稱貸而益之，使老稚轉乎溝壑。惡在，其爲民父母也？

注盼盼，勤苦不休息之貌。動，作，稱，舉也。言民勤身動作，終歲不得以養食其父母。公賦當畢，有不足者，又當舉貸子倍而益滿之。至使老小轉尸溝壑。安可以爲民之父母也？

疏注「盼盼」至「母也」○正義曰：《音義》云：「盼，《說文》五禮切，亦四莧切。丁作「盼盼然」，許乙切。」阮氏《元·校勘記》云：「盼字見《說文》，云「恨視貌」。但趙注以「勤苦不休息」爲訓，趙作盼不作盼也。《說文》：「盼，蠻布也。」「月，振也。」盼、月古通用。盼盼猶屑屑，《方言》云：「屑屑，不安也。」「動，作也。」《爾雅·釋詁》文。《周禮·天官·小宰》「以官府之八成經邦國，四曰聽稱責以傳別」，鄭司農云：「稱責謂貸子。」

賈氏疏云：「稱責謂舉責生子，彼此俱爲稱意，於官於民，俱是稱也。」段氏玉裁《說文解字注》云：「再，并舉也。从爪，萇省。萇爲二爪者，手也。一手舉二，故曰并舉。」趙注《孟子》稱貸曰：「稱，舉也。」凡手舉字當作再，凡偶揚當作偶，凡詮衡當作稱，今字通用稱。《禮記·郊特牲》云：「食養，陰氣也。」淮南子·說山訓云「幸善食之而勿苦」，高誘注云：「食，養也。」養其父母即「食其父母」。貸，借也。《周禮·地官·泉府》「凡民之貸者，與其有司辨而授之，以國服爲之息」，鄭司農云：「貸者，謂從官借本賈也，故有息使民弗利。」玄謂以國服爲之息，受園廛之田而貨萬泉者，則替出息五百。《禮記·月令》注云：「火出而畢賦。」此言賦冰。此「公賦當畢」謂公家之稅當完納也。稅盡賦猶冰盡賦矣。當盡賦則不敢虧缺，無如田之所出不足，故假借於人而舉債焉。子即息也。《史記·貨殖傳》云：「子貸金千貫。」又云：「吳楚七國兵起，時長安中列侯封君，行從軍旅，齎貸子錢，子錢家以爲侯邑國在關東，關東成敗未決，莫肯與唯無鹽氏出捐千金貸，其息什之。三月，吳楚平。一歲之中，則無鹽氏之息什倍。」蓋每歲萬息二千，此常息也。至窘急時，則利息必加倍於常，如無鹽氏之利所以什之矣。萬息二千，二其子也。什之，則貸萬息亦萬爲倍，故云「子倍」。

益之言加也，即上「取盈」之義。因畢賦不足，又稱貸於子錢家以益滿此不足之數，而所貸子錢乃倍於所不足之數。由此積累，至使父母妻子飢寒而死矣。閻氏若璩《釋地三續》云：「胡牖明曰：『龍子言貢者校數歲之中以爲常。樂歲粒米狼戾，多取之而不爲虐則寡取之，凶年糞其田而不足則必取盈焉。此貢之所以不善也。某謂貢異於助，惟無公田耳。其取民之制，雖云於一夫受田五十畝之中，稅其五畝之所收，然亦每歲各視其豐凶以爲所入之多寡，與助法無異，非上之人科定此五畝者出穀若干斗斛以爲常也。藉令樂歲不多取，凶年必取盈，賦何以有上上錯乎？然則龍子之言非與？』曰：龍子蓋有爲言之也。夏氏僕曰：『戰國諸侯重斂倍克，立定法以取民，不因豐凶而損益，且托貢法以文過，故孟子有激而云。其所謂不善者，特救戰國之失耳，禹法實不然也。』蓋自魯宣公稅畝以後，諸侯廢公田而行貢法，取民數倍於古，樂歲猶可勉供，凶年則不勝其誅求之苦，而皆藉口於夏后氏以文其貪暴，龍子所以痛心疾首而爲是言。孟子方勸滕君行助，以革當時之弊，意在伸助，不得不抑貢，故舉龍子之言以相形，而未暇深求其義理。其實龍子所謂莫不

①「民」，原脫，今從沈校據《四書釋地》改。

善者，乃戰國諸侯之貢法，非夏后氏之貢法也。」夫世祿，滕固行之矣。**注**古者諸侯卿大夫士有功德，則世祿賜族者也。官有世功者，其子雖未任居官，得世食其父祿。賢者子孫必有土之義也。滕固知行是矣。言亦當恤民之子弟，閔其勤勞者也。**疏**注

「古者」至「義也」○正義曰：隱公八年《左傳》云：「天子建德，因生以賜姓，胙之土而命之氏。諸侯以字爲謚，因以爲族。官有世功則有官族，邑亦如之。」《白虎通·封公侯》篇云：「大夫功成未封子得封者，善之及子孫也。」《春秋傳》曰：「賢者子孫宜有土地也。」趙氏本此爲說也。詳見《梁惠王下》篇。阮氏元《校勘記》云：「其子雖未任居官」，閔、監、毛三本、韓本同。孔本、《考文》占本作士。《音義》出「未任」，音壬。作任是也。《詩》云：「雨我公田，遂及我私。」惟助爲有公田。由此觀之，雖周亦助也。**注**《詩》，《小雅·大田》之篇。言太平時民悅其上，願欲天之先雨公田，遂以次及我私田也。猶殷人助者，爲有公田耳。此周詩也而云「雨公田」，知雖周家時亦助也。**疏**注「詩小」至「助也」○正

義曰：《詩》在《小雅·大田》第三章。箋云：「古者陰陽和，風雨時，其來祈祈然而不暴疾，其民之心先公後私。今天主雨於公田，因及私田爾。此言民怙君德，蒙其餘惠。」趙氏言「太平時」，本上「興雨祈祈」言也。萬氏斯大《學春秋隨筆》云：「孟子言三代田制莫善於助，言助法之形體曰：『方里而井，井九百畝，其中爲公田，八家皆私百畝，同養公田。』非謂成周之徹法如此也。《漢書·食貨志》直本此以言周制，後儒多相因不變。若是，則周人乃百畝而助矣，何名爲徹哉？惟趙岐《孟子》注云：『周人耕百畝者，徹取十畝以爲賦。』斯言得之矣。《司馬法》云：『畝百爲夫，夫三爲屋，屋三爲井。』《小司徒》亦云：『九夫爲井。』據此二文，是周人井九百畝，分之九夫，每夫百畝，中以十畝爲公田，君取其人而不收餘畝之稅。宣公於公田之外，更稅餘畝之十一，故曰稅畝也。」周氏柄中《辨正》云：「充宗之說良不誣也。徹本無公田，故《孟子》云『惟助爲有公田』，言惟助有則徹無，以明其制之異。言『雖周亦助』，見助豐凶相通，徹亦豐凶相通，明其意之同。若徹原是助，則人人共知，孟子何用辭費？徹無公田，《詩》曰『雨我公田』者，商家同井，公田在私田外，周九夫爲井，公田在私田中。《夏小正》云：『三農服於公田。』公田之稱可施於貢，獨不可施於徹乎？然則周何以

變八家爲九夫，此則任鈞臺嘗言之矣。蓋自商至周歷六百餘年，生齒必日繁，無田可給，不得不舉公田授之民。及列國兵爭，殺戮過甚，民數反少於周初，而徹法之壞已甚，故孟子欲改行助法，所謂「與時宜之」者，此真通人之論也。」鍾氏懷《啟厓考古錄》云：「孟子論井田之制，以夏爲貢，殷爲助，周爲徹，顯分其制。及引《大田》之詩，又謂雖周亦助，可知助、徹乃通名也。夏后氏五十而貢，其實亦是什一，獨不得通助、徹之名者，蓋因諸侯去籍，孟子末由考之耳。《夏小正》：「正月，農及雪澤，初服于公田。」傳云：「占有公田焉者。古言先服公田，而後服其田也。」可知公田之制自夏已然，公劉雖由夏居戎，亦循有郇之舊而不改也。然則貢即助即徹，皆不離乎什一而稅。誤以公劉創什一之稅，可乎？大抵周家一切典禮多夏殷之制，特其斟酌損益少有不同耳。」阮氏元《校勘記》云：「猶殷人助者」，宋本、孔本、《考文》古本、足利本同。閩、監、毛三本、韓本猶作惟。按猶當獨字之誤，閩本改爲惟，非也。」

「設爲庠序學校以教之。」**注**以學習禮教，化於國。庠者，養也；校者，教也；序者，射也。夏曰校，殷曰序，周曰庠，學則三代共

之。皆所以明人倫也。**注**養者，養耆老；教者，

教以禮樂；射者，三耦四矢以達物導氣也；學則三代同名，皆謂之學。學乎人倫。人倫者，人事也，猶《洪範》曰「彝倫攸敘」，謂常事所敘也。**疏**「庠者」至

「倫也」○正義曰：《史記·儒林傳》：「公孫宏乃謹與太常臧、博士平等議曰：「聞三代之道，鄉里有教。夏曰校，殷曰序，周曰庠。」《漢書·儒林傳》則作「殷曰庠，周曰序」，《說文》與《漢書》同，未知孰是也。閻氏若璩《釋地》又續云：

「陳氏《禮書》曰：「孟子論井田而及夏曰校，商曰序，周曰庠，蓋校、庠、序者，鄉學也。《鄉飲酒》：主人迎賓於庠門之外，鄉簡不帥教，耆老皆朝於庠。則庠，鄉學名也。《周官》州長會民射於州序，黨正屬民飲酒於序，則序，亦鄉學名也。鄭人之所欲毀者謂之鄉校，則校亦鄉學名也。然鄉曰庠，《記》言黨有庠，州曰序，《記》言遂有序，何也？古之致仕者教子弟於閭塾之基，則家有塾云者，非家塾也。合二十五家而教之閭塾，謂之家有塾，則合五黨而教之鄉庠，謂之黨有庠可也。《周禮》遂官各降鄉官一等，則遂之學亦降鄉一等矣。降鄉一等而謂之州長，其爵與遂大夫同，則遂之學，其名與州序同可也。」《小戴》本雜記之書，陳氏能將《儀禮》、

《周官》、《左氏》及《孟子》融會於一，無少抵牾，真經術之文也。」周氏柄中《辨正》云：「孟子言夏曰校，殷曰序，周曰庠，此鄉學也，而《王制》所載虞曰庠，夏曰序爲國學之稱。考之《周禮》，則州黨之學皆曰序，而庠、校不見於經。《學記》云：「黨有庠」者，庾氏謂夏殷制，非周法，其說皆與《孟子》不合。讀《孟子》書當就孟子求其義，不得又以他說汨亂之。安溪李文貞公云：「立太學以教於國，設庠序以化於邑，董子雖言之而莫行也。故在漢代，辟雍太學之制，博士弟子員之設，僅於京師而已。自後天下州邑亦徒廟事孔子而無學。宋之中世始詔天下有州者皆得立學，而縣之學士滿二百人始得爲之，少則不能中律。今荒州僻縣無不設之學矣。意三代相承亦如此。夏之時，鄉爲置校而已；殷之時，州莫不有序焉；周人修而兼用之，而黨庠以偏；此自占及今，其制浸廣也。黨近於民，故主於上齒尊長而以養爲義；鄉近於國，故總乎德行道藝，而以教爲義；州則自黨而升而將賓於鄉，故修乎禮樂容節而以射爲義；此則自上而下，其法浸備也。」文貞此說最善。蓋黨統於州，州統於鄉，故序以承校，庠以承序，制以漸而始大備。俗說謂三代之鄉學各一而惟遞變其名，不可通矣。」王氏念孫《廣雅疏證》云：「《孟子·滕文公》篇：「庠者，養也；校者，教也；序者，射也。」《廣雅》

卷四云：「校，教也。」卷五云：「序，射也。」皆本《孟子》。引之云：《說文》：「庠，禮官養老也。」《王制》有虞氏養國老於上庠，鄭注云：「庠之言養也。」趙岐注《孟子》云：「養者，養耆老；射者，三耦四矢以達物導氣。」此皆緣辭生訓，非經文本意也。養國老於上庠謂在庠中養老，非謂庠以養老名也；《州長》職云「春秋以禮會民而射於州序」，謂在序中習射，非謂序以習射名也。《王制》：「耆老皆朝於庠，元日習射上功。」而庠之義獨取義於養老，何也？《文王世子》：「適東序養老。」而序之義獨取於習射，何也？庠、序、學、校，皆爲教學而設，養老習射偶一行之，不得專命名之義。庠訓爲養，序訓爲射，皆是教導之名，初無別異也。《文王世子》：「立太傅少傅以養之，欲其知父子君臣之道也。」鄭注云：「養猶教也。」言養者，積浸養成之。《保氏》職云：「掌養國子以道。」此庠訓養之說也。射，釋古字通。《爾雅》云：「繹，陳也。」《周語》云：「無射，所以宣布哲人之令德，示民軌儀也。」則射者陳列而宣示之，所謂「謹庠序之教，申之以孝弟之義」也。此序訓爲射之說也。養、射皆教也。教之爲父子，教之爲君臣，教之爲長幼，故曰「皆所以明人倫」也。徹者，徹也；助者，藉也；庠者，養也；校者，教也；序者，射也。皆因本事以立訓，豈嘗別指一事以名之

哉？」○注「養者」至「敘也」○正義曰：趙氏以「養」爲「養耆老」，即本《王制》「養國老於上庠」。《說文》亦以庠爲「禮官養老」也。《鄭風》詩序云：「《子衿》，刺學校廢也。亂世則學校不修焉。」其三章「一日不見，如三月兮」，毛傳云：「言禮樂不可一日而廢。」趙氏本此，故以「教禮樂」言之。其實不僅教以禮樂，故鄭箋云：「鄭國謂學爲校，言可以校正道藝。」道藝則不止禮樂也。《儀禮·鄉射》云「豫則鉤楹內」，注云：「豫者，謂州學也。讀如『成周宣榭災』之榭，《周禮》作序，今文豫爲序。」序即榭，榭，射聲通，是榭因鄉射而立名。《鄉射禮》云「三耦俟於堂西」，^①注云：「選弟子之中德行道藝之高者以爲三耦。」^②又云「兼挾乘矢」，又云「三耦皆執弓，搯三而挾一个」，注云：「乘矢，四矢也。」《白虎通·鄉射》篇云：「天子所以親射，何？助陽氣達萬物也。春氣微弱，恐物有窒塞，不能自達者。夫射，自內發外，貫堅入剛，象物之生，故以射達之也。」是所云「達物導氣」之義也。學謂大學也，庠、序、校皆鄉學，在郊。《禮記·王制》云：「耆老皆朝於庠，元日習射上功，習鄉上齒，大司徒帥國之俊士與執事焉。不變，命國之右鄉簡不帥教者移之左，命國之左鄉簡不帥教者移之右。不變，移之郊。不變，移之遂。」此由鄉下移於郊、遂，皆鄉學也。又云：「命鄉論秀士升之司徒

曰選士，司徒論選士之秀者而升之學。」此學即大學，在城中王宮之左者也。三代同名爲學，無異名也。《文王世子》云：「春夏學干戈，秋冬學羽籥，皆於東序。春誦夏弦，大師詔之瞽宗。秋學禮，執禮者詔之，冬讀書，典書者詔之。禮在瞽宗，書在上庠。」又云：「凡祭與養老、乞言、合語之禮，皆小樂正詔之於東序。」《周禮·大司樂》：「掌成均之法，以治建國之學政而合國之子弟焉。凡有道有德者使教焉，死則以爲樂祖，祭於瞽宗。」又有「成均」、「東序」、「瞽宗」、「上庠」等名者，蓋統名爲學而分爲四：其東爲東序也。其西爲瞽宗，瞽宗即西學，故《祭義》云「祀先賢於西學」，即「祭有道德者於瞽宗」也。其北爲上庠，秋學禮在瞽宗爲西學，則冬學書在上庠爲北學矣。東序、瞽宗、上庠分列東、西、北三方，則成均爲南學。青陽、總章、玄堂統其名於明堂，則東序、瞽宗、上庠統其名於成均。故《大司樂》分言之則云東序、瞽宗，統言之則言掌成均之法也，雖分有四名，而實統謂之學。《祭義》云：「天子設四學。」《大戴記》云：「帝人東學，帝人南學，帝人西學，帝人北學。」但仍僅謂之學也。吳

① 「西」，原誤作「東」，今從沈校據《儀禮》改。

② 「選」，原誤作「遷」，今從沈校據《儀禮》鄭注改。

氏鼎《易堂問目》云：「今考定五學：東學，周名東膠，又名東序，本夏學總名；西學，周名瞽宗，又名右學，本殷學總名；北學，周名上庠，本虞學總名；南學，周名成均，舊說五帝學名，蓋陶唐以前，學之總名；大學，周名辟雍。魯兼四代之學，序在東，瞽宗在西，米廩在北，類宮在南。」《文王世子》：「王乃命公侯伯子男及群吏曰：反養老幼於東序。」則諸侯國學疑皆同此制。」鄭氏注《禮記·曲禮》《樂記》皆以倫爲類，高誘注《呂氏春秋·達鬱》、《淮南子·說林》等篇，皆以類爲事。趙氏注《告子》篇「此之謂不知類也」，亦云「類，事也」。此以「倫」爲「事」，即以倫爲類也。《洪範》、《周書》篇名。「惟十有三祀，王訪於箕子，王乃言曰：『嗚呼箕子，惟天陰騭下民，相協厥居，我不知其彝倫攸敘。』」王肅注云：「言天深定下民，與之五常之性，王者當助天和合其居所，行天之性。我不知常道倫理所以次敘。」《漢書·五行志》引《洪範》此文，應劭注云：「陰，覆；陽，升；相，助；協，和；倫，理；攸，所也。言天覆下民，王者當助天居，我不知居天常理所次敘也。」《禮記·樂記》云「理之不可易者也」，注云：「理猶事也。」倫之爲事，即倫之爲理，與應劭、王肅義同。顧氏炎武《日知錄》云：「彝倫者，天地人之常道，如下所云五行、五事、八政、五紀、皇極三德、稽

疑庶徵、五福、六極，皆在其中，不止孟子之言人倫而已。能盡人之性，盡物之性，則可以贊天地之化育，而彝倫敘矣。」按：趙氏引《洪範》「彝倫」以證《孟子》之「人倫」，謂其常事有敘，則正以孟子此言「人倫」即《洪範》之「彝倫」。蓋國學、鄉學爲王太子、王子、羣后之太子、卿大夫元士之適子、國之俊選，皆由此出。樂正崇四術，立四教，順先王《詩》《書》禮樂以造士，雖「申之以孝弟之義」，而一切人事常理無不講明也。人倫明於上，小民親於下。有王者起，必來取法，是爲王者師也。**注**有行三王之道而興起者，當取法於有道之國也。《詩》云：『周雖舊邦，其命惟新。』文王之謂也。子力行之，亦以新子之國！**注**《詩》、《大雅·文王》之篇。言周雖后稷以來舊爲諸侯，其受王命，惟文王新復修治禮義以致之耳。以是勸勉文公，欲使庶幾新其國也。**疏**注「詩大」至「國也」○正義曰：《詩》在《文王》篇首章。閔、監、毛三本惟作維。閔氏若璩《孟子生卒年月考》云：「《春秋公羊傳》君存稱世子，君薨稱子某，既葬稱子，踰年稱公。《左氏》例則未葬稱子，既葬稱君，不待踰年始稱

君。此二《傳》之同異也。及以《孟子》證則又有異，君存稱世子，「滕文公爲世子」是，君薨亦稱世子，「滕定公薨，世子謂然友」是。未葬稱子，不獨既葬爲然，「至於子之身而反之」是。若孟子所稱「子力行之」則在既葬之後，但未踰年耳。何以驗之？滕文公既定爲三年之喪，五月屋廬，未有命戒，則亦無禮聘賢人之事可知。惟至葬後，始以禮聘孟子至滕而問國事焉，故孟子猶稱之爲「子」。直至踰年改元，然後兩稱爲君，曰「君如彼何哉」，曰「君請擇於斯二者」，然則孟子於滕行蹤歲月亦略可觀矣。」按：《禮記·坊記》云：「未沒喪不稱君，示民不爭也。故魯《春秋》記晉喪曰：『殺其君之子奚齊及其君卓。』」注云：「沒，終也。《春秋傳》曰『諸侯於其封內三年稱子』，至其臣子，踰年則謂之君矣。」孟子未臣於齊，恐其稱君在終喪之後，未必既葬即聘賢人。蓋滕文行三年之喪，喪將終，乃聘孟子，孟子至，未幾即終喪。故此仍在三年之內，則稱子，既三年喪畢，則稱君也。

使畢戰問井地。

注畢戰，滕臣也。問古井

田之法。時諸侯各去典籍，人自爲政，故井田之道不明也。**疏**注「畢戰」至「明也」○正義曰：畢戰爲文公所使，知爲滕臣也。《考工記·匠人》注引「滕文公問爲國於孟

子」云云，「文公又問井田」，賈氏疏云：「彼是文公使畢戰問，今以爲文公問者，畢戰，文公臣。君統臣功，亦得爲文公問也。鄭氏以井田代井地，是井地即井田也。」毛氏奇齡《經問》云：「滕文公使畢戰問井地，豈戰國時無井地與？」曰：

據《春秋》有「井衍沃」之文，則晉亦尚作井地，但惟坦衍而沃膏者間一行之，他無是也。若戰國則未必有矣。《史記》秦孝公四十一年，爲田開阡陌，正在戰國，與魏惠王、齊威王同時，則此時方改阡陌，廢井地之際，雖間或有是，亦將毀棄，況未必有也。孟子曰：「子之君將行仁政，選擇而使子，子必勉之。夫仁政，必自經界始。經界不正，井地不鈞，穀祿不平。」**注**子，畢戰也。經亦界也。必先正其經界，勿侵鄰國，乃可鈞井田，平穀祿。穀，所以爲祿也。《周禮·小司徒》曰「乃經土地而井牧其田野」，言正其土地之界，乃定受其井牧之處也。**疏**注「子畢」至「處也」○正義曰：

畢戰來問，此云「子之君」，君指文公，則子指畢戰也。《周禮·地官·司市》「以次敘分地而經市」，注云：「經，界也。」趙氏以此「經界」即各國之疆界。封建與井田相表裏，故先不相侵奪，而井田乃可鈞也。阮氏元《校勘記》云：「井地

不鈞」，石經、岳本、咸淳衢州本、廖本、孔本、韓本、《考文》古本、足利本同。閩、監、毛二本鈞作均。按均、鈞古字通也。」
「穀，祿也」，《爾雅·釋言》文。《周禮·天官·冢宰》「以八柄詔王馭羣臣，二曰祿以馭其富」，注云：「班祿所以富臣下。《書》曰：『凡厥正人，既富方穀。』」是以「穀」釋「祿」。
《天府》「祭天之司民司祿」，注云：「祿之言穀也。」《詩·小雅》「藪藪方有穀」，箋亦云：「穀，祿也。」祿奉以穀，故穀即祿矣。《小司徒》、《地官》職也，云：「乃經土地而井牧其田野，九夫爲井，四井爲邑，四邑爲丘，四丘爲甸，四甸爲縣，四縣爲都，以任地事而令貢賦。凡稅斂之事。」注云：「此謂造都鄙也。采地制井田異於鄉遂。重立國，小司徒爲經之，立其五溝、五塗之界，其制似井之字，因取名焉。」《孟子》曰：「夫仁政必自經界始。經界不正，井地不均，穀祿不平。是故暴君姦吏必慢其經界。經界既正，分田制祿可坐而定也。」九夫爲井者，方一里九夫所治之田也。此制小司徒經之，匠人爲之，溝洫相包乃成耳。」鄭氏以小司徒所經即井田之界，「經土地」之經爲「經始靈臺」之經，謂小司徒經度之，與趙氏說異。是故暴君汙吏必慢其經界。經界既正，分田制祿可坐而定也。**注**暴君，殘虐之

君；汙吏，貪吏也。慢經界，不正本也。必相侵陵，長爭訟也。分田，賦廬井也；制祿，以庶人在官者比上農夫，轉以爲差。故可坐而定也。**疏**注「暴君」至「定也」○正義曰：《周禮·地官·大司徒》：「辨其邦國都鄙之數，制其畿疆而溝封之。凡建邦國，以土圭土其地而制其域，凡造都鄙，制其地域而封溝之。」邦國爲公侯伯子男附庸，各有界矣；都鄙爲王子弟公卿大夫采地，亦各有界矣。蓋建邦國，造都鄙，必審井田之形勢以爲之界，各滿其爲通、爲成、爲終、爲同、爲封、爲畿以界之。邦國都鄙之界視井田之界而定，則井田之在各國各采邑者乃均。自諸侯之殘虐者侵奪鄰國，而邦國之界不正，自卿大夫之貪汙者侵占鄰邑，而采地之界不正；於是爲成、爲通、爲井者將不能滿其數，合其度，而亦不均矣。惟外而邦國之大界正，內而都鄙采邑之小界正，而井田乃正。以之分授於夫，以之制諸臣之祿，皆可定也。此趙氏以「正經界」爲「勿侵鄰國」之義也。《荀子·性惡》篇云：「所見者，汙慢淫邪貪利之行也。」《列女傳·貞順》篇云：「且夫棄義從欲者，汙也；見利忘死者，貪也。夫貪汙之人，王何以爲哉？」是「汙」即「貪」也。劉熙《釋名·釋言語》云：「慢，漫也。漫漫，心無所限

忌也。」心輕慢之，不以先王所定爲制。在邦國必相侵陵，即所云「侵鄰國」也；在都鄙則「長爭訟」，如卻錡奪夷陽五田，卻棼與長魚矯爭田是也。前但言「侵鄰國」，此兼言之也。

廬謂二畝半在田，井謂一夫百畝也。「以庶人在官者比上農夫，轉以爲差」者，《禮記·王制》篇云：「諸侯之下士祿食九人，中士食十八人，上士食三十六人，下大夫食七十二人，卿食二百八十人，君食二千八百八十人。」是也。夫滕，壤地褊小，將爲君子焉，將爲野人焉。無君子，莫治野人；無野人，莫養君子。**注**褊小，謂五十里也。爲，有也。雖小國亦有君子，亦有野人。言足以爲善政也。**疏**注「爲有也」○正義曰：《梁惠王》篇

「善推其所爲而已矣」，《說苑》引作「善推其所有而已」。《詩·大雅》「婦有長舌」，《大戴記·本命》注作「婦爲長舌」。是有、爲二字古通。請野九一而助，國中什一使

自賦。**注**九一者，井田以九頃爲數而供什一，郊野之賦也。助者，殷家稅名也，周亦用之，龍子所謂「莫善於助」也。時諸侯不行助法。國中什一者，《周禮》：「園廩二十而稅一。」時行重賦，責之什一

也。而，如也；自，從也。孟子欲請使野人如助法，什一而稅之，國中從其本賦，二十而稅一，以寬之也。**疏**注「九一」至「之也」○正義曰：宣公十五年《公羊

傳》云：「古者什一而籍，什一者，天下之中正也。」注云：

「夫饑寒並至，雖堯舜躬化，不能使野無寇盜，貧富兼井，雖皋陶制法，不能使彊不凌弱。是故聖人制井田之法而口分之。一夫一婦受田百畝，以養父母妻子。五口爲一家，公田十畝。即所謂什一而稅也。廬舍二畝半，凡爲田一頃十二畝半，八家而九頃共爲一井。」蓋百畝爲一頃，九頃者九百畝也。郊野在郊外，自百里至五百里，通都鄙言之也。《地官·載師》：「園廩二十而一。」又云：「以廩里任國中之地，以場圃任園地。」是園廩在國中，故以此「國中」爲園廩，二十有一也。而與汝通，故亦與如通，《詩·小雅》「垂帶而厲」，箋云：「而，如也。」是也。鄭康成箋《毛詩》、高誘注《呂氏春秋》、《淮南子》，皆以自爲從。趙氏以當時郊野之稅不止什一，孟子欲其什一而藉，如殷人之行助。其國中園廩之稅本二十取一，當時則什取一，是爲行重賦。民不能什一而以什一誅求之，故云「責之什一」也。野宜什一，則不止什一，國中不宜什一，乃重賦而責其什一，是國中什一也非郊野什一

也。國中不可什一而什一，孟子則欲其仍從舊賦二十取一，故云「寬之」也。趙氏義如此。程氏瑤田《通藝錄·周官畿內經地考》云：「王畿千里，自王城居中視之，四面皆五百里。五十里爲近郊，百里爲遠郊，二百里爲甸地，三百里爲稍地，四百里爲縣地，五百里爲疆地。《大司徒》之職：『令五家爲比，五比爲閭，四閭爲族，五族爲黨，五黨爲州，五州爲鄉。』鄉凡萬二千五百家。如此者六，綜計之，受地者凡七萬五千家也。六鄉之地在郊。《遂人》：『掌邦之野，造都鄙形體之法：五家爲鄰，五鄰爲里，四里爲鄣，五鄣爲鄙，五鄙爲縣，五縣爲遂。』六遂亦受地者凡七萬五千家，數如六鄉，但異其名耳。其地在甸。六遂之授地也，亦遂人掌之。其職云：『辨其野之土上地中地地下地，以頒田里：上地夫一廛，田百畝，萊五十畝，餘夫亦如之；中地夫一廛，田百畝，萊百畝，餘夫亦如之；下地夫一廛，田百畝，萊二百畝，餘夫亦如之。其治溝洫以制地也，亦遂人掌之。其職云：『凡治野，夫間有遂，遂上有徑，十夫有溝，溝上有畛，百夫有洫，洫上有涂，千夫有澮，澮上有道，萬夫有川，川上有路，以達於畿。』此六遂之田制也。而六鄉田制不見於經。經獨見鄉之軍法，故鄭氏注云：『鄉之田制與遂同，遂之軍法如六鄉。』六鄉軍法在《小司徒》之職：『五人爲伍，五伍爲兩，四

兩爲卒，五卒爲旅，五旅爲師，五師爲軍。』軍萬二千五百人，出於鄉，家一人也。六鄉六軍，《夏官·大司馬》之職所謂「王六軍」也。此郊甸經地之法，在二百里內者也。其外則稍地、縣地、疆地，謂之都鄙。都鄙者，王子弟及公卿大夫之采地，其界曰都，而鄙則其所居者也。《大司徒》之職：「凡造都鄙，制其地域而封溝之，以其室數制之。不易之地家百畝，一易之地家二百畝，再易之地家三百畝。」其造都鄙也，則小司徒經之。其職云：「乃經土地而井牧其田野：九夫爲井，四井爲邑，四邑爲丘，四丘爲甸，四甸爲縣，四縣爲都。」鄭氏注云：「隰皋之地，九夫爲牧，二牧而當一井。今造都鄙，授民田，有不易，有一易，有再易，通率二而當一，是之謂井牧。」據此，是鄭氏以都鄙授井田，爲不易、一易、再易之地，與經所謂「以室數制之」者無異義矣。乃其注《載師職》之「任地」，則又以易不易之田歸之六鄉，以上中下有萊之田歸之甸稍縣都，且云：「郊內謂之易，郊外謂之萊，善言近。」①「六遂之民奇受一廛，②上地有萊，爲所以饒遠也。」不但與經相戾，即與其自注亦不相蒙。豈謂遂人所掌之野

①「善」上，原衍「爲」字，今從沈校據《周禮》鄭注刪。

②「一」，原脫，今從沈校據《周禮》鄭注補。

得包甸、稍、縣、都，授以有萊之地爲從其類，而易不易之田在大司徒，司徒主六鄉，因以所制田授之與？井田溝洫之制，在《考工記》：「匠人爲溝洫，耜廣五寸，^①二耜爲耦。一耦之伐，廣尺深尺謂之畛。田首倍之，廣二尺深二尺謂之遂。九夫爲井，井間廣四尺深四尺謂之溝。方十里爲成，成間廣八尺深八尺謂之洫。方百里爲同，同間廣二尋深二仞謂之澮。專達於川。」鄭氏所謂「井牧之制，小司徒經之，匠人爲之，溝洫相包乃成」者，是也。此都鄙經地之法也。《載師職》云：「以廛里任國中之地，以場圃任園地，以宅田、士田、賈田任近郊之地，以官田、牛田、賞田、牧田任遠郊之地，以公邑之田任甸地，以家邑之田任稍地，以小都之田任縣地，以大都之田任疆地。」按，六鄉之田在郊，宅田、士田、賈田、官田、牛田、賞田、牧田，則六鄉之餘地也。六遂之田在甸，公邑則六遂之餘地也。家邑之田在稍，小都之田在縣，大都之田在疆，稍、縣、疆皆有餘地，亦謂之公邑。今於甸言餘地，於稍、縣、疆言其正田，既互相足，亦以鄉遂形體詳《司徒》、《遂人職》中，不煩復言其正田也。家邑方二十五里，凡四甸，大夫之采地也；小都方五十里，凡四縣，卿之采地也；大都方百里，凡四都，公之采地也。王母弟、王之庶子，與公同食百里地於疆；王子弟稍疏者，與卿同食五十里地

於縣；其又疏者與大夫同食二十五里地於稍。其人稅於王也，皆四之一，四甸入一甸，四縣入一縣，四都入一都。四都者，一同之地，故曰大都；四縣者，一都之地，故曰小都；四甸者，一縣之地，故曰家邑。」王氏鳴盛《周禮軍賦說》云：「鄭康成以《遂人》所言爲溝洫之法即夏之貢法，鄉遂公邑用之；《匠人》所言爲井田之法，即殷之助法，都鄙用之。其溝洫與井田之異，則正義：『《遂人》云：夫間有遂，十夫有溝，百夫有洫，千夫有澮，萬夫有川，方三十三里少半里。九而方一同，九澮而川周其外，則百里之內，九九八十一澮。井田則一同惟一澮。』一溝澮稠多，一溝澮稀少。其異一。《匠人》井田之法，畝縱遂橫，溝縱洫橫，澮縱川橫。其夫間縱者，分夫間之界耳，無遂；其遂注入溝，溝注入洫，洫注入澮，澮注入川，略舉一成，以三隅反之，一同可見矣。《遂人》云『夫間有遂』，以南畝圖之，則遂縱而溝橫。《匠人》不云夫間有遂，云『田首倍之謂之遂』，遂則橫，溝縱也。自餘洫澮川依此遂溝縱橫參之可知。其異二。《遂人》云『九澮而川周其外』，川是人造之。《匠人》百里有澮，澮水注入川，相去逆，宜爲自然大川，非人所造。其異三。溝洫之法祇就夫稅

①「五」，原誤作「二」，今從沈校據《周禮》改。

之十一而貢，井田之法，九夫爲井，井稅一夫，美惡取於此，不稅民之所自治。其異四。」倪氏思寬《讀書記》云：「鄭氏《匠人》注云：『野九夫而稅一。』《甫田》箋云：『井稅一夫，其田百畝。』竊嘗據鄭旨核分數，八家九百畝而公田百畝，通公私之率，無異家別一百一十二畝半。於一百一十二畝半抽其十二畝半，則於九分之中而稅其一分，正合九一之旨。其數甚明，不待持籌而知也。馬端臨謂《遂人》之十夫特姑舉成數言之，不必拘以十數。此言殊謬。十夫有溝，明係古人成法。蓋國中行鄉遂之法，皆五五相連屬，而五倍之則十也。如五家爲比，二比則十夫，五家爲鄰，二鄰則十夫。十夫有溝，當起義於此，豈得謂姑舉成數言之？至謂行貢之地，無問高原下隰，截長補短，所爲溝洫者，不過隨地高下而爲之蓄洩，異於井田之溝洫，^①有一定之尺寸。此言也，適足以啓慢其經界之弊矣。古人於高原下隰，別有通融之法，如楚薦掩所書者。既言鄉遂用貢法，十夫有溝，則經界森列，有條不紊，庸詎得如馬說也？『其實皆什一也』，聖賢立言，文無虛設。假令貢助果皆什一，則『其實』一語爲贅文矣。唯立法『九一』、『什一』不同，而論其實，則於中正之準，初無不合。鄭注《載師》云：『周稅輕近而重遠，近者多役也。』則是國中什一而役多，野九一而役少，會而通之，總

皆什一，其理易明。孟子特立此文，以明助法九一之善。若鄭氏又謂孟子言『其實皆什一』據通率而言耳，則經文『九一』、『什一』，文聯義對，鄭說雖巧而近於鑿，不得從之。」按：趙氏以「國中」爲城中，野爲鄉遂都鄙通稱，則九一之制自國門外皆然。依鄭氏則以國中當鄉遂用貢，野當都鄙用助。乃鄭氏又以周制畿內用夏之貢法，稅夫無公田，邦國用殷之助法，制公田不稅夫。既以都鄙井田異於鄉遂，《遂人》注又謂野爲甸、稍、縣都，甸是六遂，則遂亦通爲野，與都鄙異於鄉遂之說異。蓋又以郊內六鄉爲國中，遂以外皆野矣。一人之說已參差不一，其與趙氏之異，又何若矣？備載之以俟考。卿以下必有圭田，圭田五十畝，餘夫二十五畝。^②古者卿以下至於士，皆受圭田五十畝，所以共祭祀。圭，繫也。士田，故謂之圭田。所謂「惟士無田則亦不祭」，言紕士無繫田也。井田之民，養公田者受百畝，圭田半之，故五十畝。餘夫者，一家一人受田，其餘老小尚有餘力者受二十五畝，半於圭田，謂之餘夫也。受田者，田萊多少有上

① 「於」，原誤作「日」，今據《二初齋讀書記》改。

中下，《周禮》曰「餘夫亦如之」，亦如上中下之制也。《王制》曰「夫圭田無征」，謂餘夫、圭田皆不出征賦也。時無圭田、餘夫，孟子欲令復古，所以重祭祀、利民之道也。

疏注「古者」至「十畝」○正義曰：《周禮·

地官·載師》以士田任近郊之地」，注云：「鄭司農云：『士田者，士大夫之子得而耕之田也。』」玄謂士讀爲仕，仕者亦受田，所謂圭田也。《孟子》曰：「自卿以下必有圭田，圭田五十畝。」圭田既是仕田，則「卿以下」通大夫士而言，即《載師》之士田也。《毛詩·小雅·天保》篇「吉蠲爲饍」，傳云：

「蠲，絜也。」《秋官·蜡氏》「凡國之大祭祀，令州里除不蠲」，注云：「蠲讀爲「吉圭惟饍」之圭。圭，潔也。」《儀禮·士虞禮記》云「圭爲而哀薦之饗」，注亦云：「圭，絜也。」《詩》曰：

「吉圭爲饍。」《呂氏春秋·尊師》篇云「必蠲絜」，高誘注云

「蠲讀曰圭」，是「圭」之義爲「絜」也。《禮記·王制》云「夫圭田無征」，注云：「夫猶治也。征，稅也。」《孟子》曰：「卿以

下必有圭田。」治圭田者不稅，所以厚賢也。此則《周禮》之士田，以任近郊之地稅什一。」孔氏正義云：「圭，潔也。言德行潔白也而與之田。殷所不稅者，殷政寬厚，重賢人。周則稅之。」士以潔白而升，則與以圭田，使供祭祀，若以不潔

白而黜，則收其田里，故士無田則不祭。有田以表其潔，無田以罰其不潔也。《說文》田部云：「畦，田五十畝曰畦。从田，圭聲。」段氏玉裁《說文解字注》云：「《離騷》『畦留夷與揭車』，^①王逸注：『五十畝曰畦。』《蜀都賦》劉注云：『《楚辭》倚沼畦瀛，王逸云：瀛，澤中也。班固以爲畦田五十畝也。』《孟子》曰：『圭田五十畝。』然則畦从圭田，會意兼形聲與。」孫氏蘭《輿地隅說》云：「《孟子》『圭田』，或以圭訓潔，非也。《九章·方田》有圭田求廣從法，有直田截圭田法，有圭田截小截大法，凡零星不成井之田，一以圭法量之。圭者，合二句股之形。井田之外有圭田，明係零星不井者也。」此上二說與趙氏異。按：鄭司農以士田爲士大夫之子所耕，《荀子·王制》篇云：「雖王公士大夫之子孫，不能屬於禮義，則歸之庶人。」然則士大夫之子孫，其不能嗣爲士大夫者，即授之田，正與餘夫一例。若然，則圭田不以潔取義，正指不能成井者而言。不能成井則以五十畝爲一畦，畦之數又即由圭形而稱焉者也。《史記·貨殖傳》云「千畦薑韭」，《集解》引徐廣云：「一畦二十五畝。」《文選》注引劉熙注「病於夏畦」云：「今俗以二十五畝爲小畦，以五十畝爲大畦。」

①「離騷」，原脫，今從沈校據《說文解字注》補。

然則「餘夫二十五畝」亦即蒙上圭田而言。○注「餘夫」至「制也」①。○正義曰：宣公十五年《公羊傳》注云：「多於五口，名曰餘夫，以率受田二十五畝。」此趙氏義也。多於五口則不拘何人，故趙氏兼言老小也。《漢書·食貨志》云：「民受田，上田夫百畝，中田夫二百畝，下田夫三百畝。歲耕種者爲不易上田，休一歲者爲一易中田，休二歲者爲再易下田，三歲更耕之，自爰其處。農民戶人已受田，其家衆男爲餘夫，亦以口受田如比。士工商家受田，五口乃當農夫一人。」此云「如比」，則如一夫百畝之例，與《孟子》「餘夫二十五畝」之餘夫不同。《地官·遂人》：「辨其野之土上地中地下地，以頒田里：上地夫一廛，田百畝，萊五十畝，餘夫亦如之，中地夫一廛，田百畝，萊百畝，餘夫亦如之，下地夫一廛，田百畝，萊二百畝，餘夫亦如之。」注云：「萊，休不耕者。鄭司農云：『戶計一夫一婦而賦之田，其一戶有數口者，餘夫亦受此田也。廛，居也。揚子雲有田一廛，謂百畝之居也。』」後鄭此處不注，而注於《載師》，云：「餘夫在遂地之中如比，則士工商以事人在官，而餘夫以力出耕公邑。」賈氏疏云：「六鄉七萬五千家，家以七夫爲計，餘子弟多，三十壯有室，其合受地，亦與正夫同。《孟子》云：『圭田五十畝，餘夫二十五畝。』彼餘夫與正夫不同者，彼餘夫是二十九已下未

有妻，受口田，故二十五畝。若三十有妻，則受夫田百畝。故鄭注《內則》云：「三十受田，給征役。」士與工商之家，丈夫成人，受田各受一夫，則云半農夫者是也。其家內無丈夫，其餘家口不得如成人，故五口乃當農夫一人。百里內置六鄉，以九等受地，皆以一夫爲計，其地則盡。至於餘夫無地可受，則六鄉餘夫等並出耕在遂地之中，百里之外，其六遂之餘夫，並亦在遂地之中受田矣。」如是則《遂人》之餘夫不同於《孟子》之餘夫。乃趙氏引《周禮·遂人》「餘夫」以證《孟子》，則是以《遂人》所云「餘夫亦如之」，即此「餘夫二十五畝」之餘夫也。彼注者因上言「夫一廛，田百畝」，下言「餘夫亦如之」，故以爲此三十授田之餘夫，所授亦如一夫之百畝。趙氏解《遂人》，謂一夫所受田萊多少有上中下，餘夫亦如上中下之等，非亦如百畝也。陳詳道《禮書》云：「先王之於民，受地雖均百畝，然其子弟之衆或食不足而力有餘，則又以餘夫任之。此《載芟》詩所謂「侯彊」，《周禮》所謂「以彊予任毗」者也。然餘夫之田不過二十五畝，以其家既受田百畝而又以百畝予之，則彼力有所不逮矣。故其田四分農夫

① 「制」，原誤作「等」，合於閩、監、毛等本，今據本書及阮校所述宋、孔、韓等本注文改。

之一而已。上地田二十五畝，萊半之，中地二十五畝，萊亦二十五畝，下地二十五畝，萊五十畝。所謂「如之」者，如田萊之多寡而已，非謂餘夫亦受百畝之田如正農夫也。」此得趙氏義矣。○注「王制」至「道也」○正義曰：趙氏佑《溫故錄》云：「《王制》『夫圭田無征』，注云云。依鄭注，則《王制》夫字直下讀，而夫之訓治，既少證佐，依趙注，則以夫爲餘夫，當讀夫字斷，與圭田爲二事，而餘夫獨省去餘字，以何明之？或讀夫音扶，則本文上承「古者，公田藉而不稅，市廛而不稅，關譏而不征，林麓川澤以時入而不禁」，皆以次銜接，不應別用助辭。今按，《周禮》每言夫受田征稅，皆必計夫爲率，故有「夫家之征」，注謂「夫稅家稅」。夫稅者，百畝之稅，家稅者，出土徒車輦給繇役。《考工記·匠人》注以《載師職》云「園廩二十而一，近郊十一，遠郊二十而三，甸、稍、縣、都，皆無過十二」謂「田稅也，皆就夫稅之近輕遠重耳」，下即引《孟子》此章文，云：「以《載師》職及《司馬法》論之，則周制畿內用夏之貢法，稅夫無公田，以《詩》、《春秋》、《論語》、《孟子》論之，周制邦國用殷之助法，制公田不稅夫也。」則此圭田在畿內，當稅夫而謂無征，正言圭田不稅夫，倒「夫」字於句上也。蓋井田計夫，畝百爲夫，圭田半之，不合計夫，故不稅夫，以優恤卿士之子孫，使得專力於祭祀也。

是《王制》原可作夫字一句讀，與上市、關等一例，不必訓治，更無餘夫在內。餘夫二十五畝，又半於圭田，其人老弱，或當亦不計夫。」死徙無出鄉，**注**死謂葬死也，徙謂爰土易居，平肥磽也。不出其鄉，易爲功也。**疏**注「死謂至「功也」○正義曰：《荀子·禮論》云：「死，人之終也。夫厚其生而薄其死，是敬其有知而慢其無知也。」此但云「死」，則送死也。送死惟葬則有出鄉不出鄉之別，故云「葬死」也。《周書·大聚解》云：「墳墓相連，民乃有親。」是也。阮氏元《校勘記》云：「謂受土易居也肥磽也」，閩、監、毛三本如此。廖本、孔本、韓本受作爰，上也字作平。作爰作平是。爰土即《國語》之轅田。賈侍中云：「轅，易也。爲易田之法。」《左傳》作「爰田」。《食貨志》云：「三歲更耕之，自爰其處。」《公羊傳》注云：「三年一換土易居。」然則爰者，換也。平肥磽者，謂一易之地家百畝，再易之地家二百畝，三易之地家三百畝，無偏枯不均也。」按：「晉於是作爰田」見僖公十五年《左傳》，孔疏引服虔、孔晁皆云：「爰，易也。」賞衆以田，易其疆畔，易亦換也。古爰音與換近，故畔換即畔援也。《說文》走部云：「超田，易居也。」段氏玉裁《說文解字注》云：「《周禮·大司徒》：『不易之地家百畝，一易之地

家二百畝，再易之地家三百畝。」大鄭云：「不易之地，歲種之，美，故家百畝。一易之地，休一歲乃復，地薄，故家二百畝。再易之地，休二歲乃復種，故家三百畝。」《遂人》：「辨其野之土上地中地下地，以頒田里：上地夫一廛，田百畝，萊五十畝。中地夫一廛，田百畝，萊百畝。下地夫一廛，田百畝，萊二百畝。」注：「萊謂休不耕者。」《公羊》何注云：「司空謹別田之高下美惡，分爲三品：上田一歲一墾，中田二歲一墾，下田三歲一墾。肥饒不得獨樂，墾墾不得獨苦，故三年一換主易居，財均力平。」《漢書·食貨志》云：「民受田，上田夫百畝，中田夫二百畝，下田夫三百畝。歲耕種者爲不易上田，休一歲者爲一易中田，休二歲者爲再易下田。三歲更耕，自愛其處。」《地理志》云：「秦孝公用商君制轅田」，張晏云：「周制三年一易，以同美惡。商鞅始割列田地，開立阡陌，令民各有常制。」孟康云：「三年爰土易居，古制也。末世浸廢。商鞅相秦，復立爰田。上田不易，中田一易，下田再易。爰自在其田，不復易居也。」按，何云「換主易居」，班云「更耕自愛其處」，趙云「爰土易居」，許云「超田易居」，爰、轅、超、換四字音義同也。古者每歲易其所耕，則田廬皆易。云三年者，三年而上中下田徧焉。三年後一年仍耕上田，故曰「自愛其處」。孟康說古制易居爲爰田，商鞅自在其

田不復易居爲轅田，名同實異，孟說是也。依孟，則商鞅田分上中下而少多之。得上田者百畝，得中田者二百畝，得下田者三百畝，不令得田者彼此相易。其得中田二百畝者，每年耕百畝，二年而徧。得下田三百畝者，亦每年耕百畝，三年而徧。故曰上田不易，中田一易，下田再易，爰自在其田，不復易居。《周禮》之制，得三等田者彼此相易，今年耕上田百畝，明年耕中田二百畝之百畝，又明年耕下田三百畝之百畝，又明年仍耕上田之百畝，如是乃得有休一歲、休二歲之法，故曰「三歲更耕，自愛其處」。與商鞅法雖異而同也。鞅之害民，在開阡陌。鄉田同井，出入相友，守望相助，疾病相扶持，則百姓親睦。注同鄉之田，共井之家，各相營勞也。出入相友，相友耦也。《周禮·太宰》曰：「八曰友，以任得民。」守望相助，助察姦也。疾病相扶持，扶持其羸弱，救其困急。皆所以教民相親睦之道。睦，和也。疏注「同鄉」至「和也」○正義曰：《說文》墾部云：「鄉，國離邑，民所封鄉也。」○齊夫別治。从邑，自聲。封圻之內六鄉，六卿治之。」

①「鄉」，原脫，今從沈校據《說文解字注》補。

段氏玉裁《說文解字注》云：「離邑，如言離宮別館。國與邑，名可互稱。析言之，則國大邑小，一國中離析爲若干邑。封猶域也。所封謂民域其中，所鄉，謂歸往也。劉熙《釋名·釋州國》云：「鄉，向也。衆所向也。」以同音爲訓也。耆夫別治，言漢制，六鄉六卿治之，謂周禮。」按：此分別鄉之名甚析。畿內六鄉，別乎六遂都鄙而言，此鄉之專名也，凡民所向往，國之別邑，皆謂之鄉，此鄉之通名也。《逸周書·大聚解》云：「以國爲邑，以邑爲鄉，以鄉爲閭。禍災相恤，資喪比服，合閭立教，以威爲長，合族同親，以敬爲長，飲食相約，興彈相庸，耦耕曰耘，男女有婚，墳墓相連，民乃有親。」《孟子》此文略同。「同鄉之田」即同國同邑之謂，非專指六鄉也。《韓詩外傳》云：「古者八家而井。田方里而爲井，廣三百步，長三百步，一里其田九百畝。八家爲鄰，家得百畝，餘夫各得二十五畝。家爲公田十畝，餘二十畝共爲廬舍，各得二畝半。八家相保，出入更守，疾病相憂，患難相救，有無相貸，飲食相召，嫁娶相謀，漁獵分得，仁恩施行。是以其民和親而相好。」此本《孟子》而衍之。「共井之人」即此八家爲鄰之謂也。《呂氏春秋·辨土》篇云：「所謂今之耕也，營而無獲者。」《廣雅·釋地》云：「營，耕也。」《爾雅·釋詁》云：「勞，勤也。」「各相營勞」謂各耕治其田而

各盡其勤苦也。《周禮·天官·大宰》：「以九兩繫邦國之民，八曰友，以任得民。」注云：「友謂同井相合耦耨作者。」引《孟子》此文。趙氏以「耦」釋「友」，故引《大宰》職證之。《說文》又部云：「同志爲友。」《淮南子·時則訓》云「令農計耦耕事」，高誘注云：「耦，合也。」農夫同志合耕，亦是友也。《廣雅·釋詁》云：「望，候視也。」視同伺，《一切經音義》引《字林》云：「伺，候也，察也。」伺亦通作司，《秋官·禁殺戮》「掌司斬殺戮者」，注云：「司，察也。」是也。故趙氏解「守望相助」云「助察姦」，^①以察釋望也。《楚辭·招魂》云：「天地四方，多賊姦些。」《淮南子·汜論訓》「姦符節」，高誘注云：「姦私，亦盜也。」是姦指盜賊而言。守者，防備所已知，望者，伺察所未形。守之義易明，故略之，專言察。伺察之，又戒備之，言察而守在矣。《鬼谷子·捭闔》篇云：「是故望人一守司其門戶，審察其所先後。」守司即守望。上兼言守，司而以「審察」自解之，則「審察」明司亦兼明守矣。《漢書·食貨志》引《孟子》云：「出入相友，守望相助，疾病相救，民是以和睦，而教化齊同，力役生產，可得而平也。」以

① 「姦」下，原有「惡」字，合於宋十行、閩、監、毛等本，今據本書及阮校所述廖、孔、韓等本文刪。

救字代扶持。《方言》云：「扶，護也。」護亦救也。《荀子·榮辱》篇云：「以相羣居，以相持養」，注云：「持養，保養也。」扶、持二字義同。人有疾病則羸弱困急，保養之，即救護之矣。凡此皆由有以教化之本。《食貨志》言之。《志》言「民是以和睦」，①是睦即和也。方里而井。井九百畝，其中爲公田，八家皆私百畝，同養公田。公事畢，然後敢治私事，所以別野人也。**注**方一里者，九百畝之地也，爲一井。八家各私得百畝，同共養其公田之苗稼。公田八十畝，其餘二十畝以爲廬井宅園圃，家二畝半也。先公後私，「遂及我私」之義也。則是野人之事所以別於士伍者也。**疏**注「方一」至「伍者也」○正義曰：方者，開方也。「方一里」謂縱橫皆一里。畫爲九，則積九百畝者，其方三百畝也。其形如井字，故爲一井也。或云：方是法，不是形。占九數，一曰方田。若其田本方，安用算？山水之性，皆以曲而善走，即廣野平疇，其脈必自山出。大約中出者必中高，邊出者必邊高，斷無百十里直如繩、平如砥者。《孟子》方里云云，亦舉一方者以爲例耳。阮氏元《校勘記》云：「『以爲廬井宅園圃家一畝半也』，閩、監、毛三本同，廖本、孔本、韓本、《攷文》

古本無井字，一作二。無井字非也。《穀梁傳》云：「古者公田爲居，井竈蔥韭取焉。」一作二，是也。此二畝半合城保二畝半，是爲五畝之宅。《徹法》九夫爲井，則每家受田一頃一十二畝半，稅其一十二畝半，是九分取一也，無所爲公私也。助法八家皆私百畝，同養公田，則每以二畝半爲廬井宅園圃，餘八十畝八家同養，是八百八十畝稅其八十畝，名爲九一，實乃什一之一也。此助法所以善也。惟是公私之田既分，而先後之期乃定也。「野人」謂都鄙之人。《國語·齊語》云「罷士無伍」，注云：「無行曰罷。無伍，無與爲伍也。」然則「士伍」猶云士列也，即謂食祿之君子。公田，君子所食，先之；私田，野人所食，後之；是「別野人於君子」也。又《地官·小司徒》：「乃會萬民之卒伍而用之：五人爲伍，五伍爲兩，四兩爲卒，五卒爲旅，五旅爲師，五師爲軍。」《尚書·費誓》云：「魯人三郊三遂。」孔氏正義云：「天子六軍，出自六鄉。」則諸侯大國三軍亦當出自三鄉也。《周禮》又云：「萬二千五百人爲遂。」《遂人》職云：「以歲時稽其人民，簡其兵器，以起征役。」則六遂亦當出六軍，鄉爲正，遂爲副也。設百里之國，去國十里爲郊，則諸侯之制亦當鄉在郊

①「志言之志言」，據文意，疑衍「之志言」三字。

內，遂在郊外。然則軍伍屬鄉郊。《毛詩·小雅·采芣》傳云：「宣王能新美天下之士。」箋云：「士，軍士也。」《荀子·王制》篇云：「故王者富民，霸者富士。」注云：「士，卒伍也。」則「士伍」指鄉遂之人。鄉遂什一自賦，無公田私田之分，則無先公後私之法，是「別都鄙之人於鄉遂之人」也。二者未知孰是。《校勘記》云：「韓本、《考文》古本伍作位。」此其大略也。若夫潤澤之，則在君與子矣。」

注略，要也。其井田之大要如是。而加慈惠潤澤之，則在滕君與子共戮力撫循之也。**疏**注「略要」至

「如是」○正義曰：《淮南子·本經訓》云「其言略而循理」，高誘注云：「略，約要也。」約之義爲要，略，約音近義通也。

○注「而加」至「循之也」^①○正義曰：《風俗通·山澤》篇云：「澤者，言其潤澤萬物以阜民用也。」井田大要如是。

此法也，若無慈惠之心行之，則法雖立而民仍不被其澤。《荀子·富國》篇云：「垂事養民，拊循之，吮嘔之。」注云：

「拊與撫同。撫循，慰悅之也。」無井田之法而徒撫循吮嘔之，則爲小惠，井田之法立而無撫循慈惠之意，則法亦槁餒而無光澤，所謂「有治人無治法」也。注「而加慈惠潤澤之」，孔本無而字。

章指：言尊賢師，知采人之善，善之至也；修學校，勸禮義，勅民事，正經界，均井田，賦什一，則爲國之大本也。**疏**「知采人之善」○正義曰：《史記·太史公自序》云：「《春秋》采善貶惡。」又《禮書》云：「悉內六國禮儀，采擇其善。」韓本無「善之至也」四字。

孫授易授詩校字

孟子正義卷十終

①「而」，原無，今據疏例及注文補。

孟子正義卷十一

江都縣鄉貢士焦循撰集

有爲神農之言者許行，自楚之滕，踵門而告文公曰：「遠方之人聞君行仁政，願受一廛而爲氓。」**注**神農，三皇之君，炎帝神農氏也。許，姓，行，名也。治爲神農之道者。踵，至也。廛，居也。自稱「遠方之人」。願爲氓，氓，野人之稱。**疏**注「神農」至「之稱」○正義曰：以神農氏爲「三皇」者，《白虎通·號篇》云：「三皇者，何謂也？謂伏羲、神農、燧人也。或曰：伏羲、神農、祝融也。」按：《易·繫辭傳》首稱伏羲，次神農，次黃帝、堯、舜並稱；《淮南子》以伏羲、神農爲「太古二皇」，是也。女媧、祝融，孔子所未言，何足以配義、農哉？《漢書·藝文志》云：「農家者流，《神農》二十篇，六國時諸子疾時怠於農業，道耕農事，託之神農。」顏師

古云：「劉向《別錄》云：『疑李悝及商君所說。』」《商子·畫策》篇云：「神農之世，公耕而食，婦織而衣，刑政不用而治。」《呂氏春秋·愛類》篇云：「神農之教曰：士有當年而不耕者，則天下或受其饑矣；女有當年而不績者，則天下或受其寒矣。故身親耕，妻親績，所以見致民利也。」神農之教即所謂「神農之言」也。《太平御覽·皇王部》引《尸子》云：「神農氏夫負妻戴以治天下。堯曰：朕之比神農，猶旦之與昏也。」《北堂書鈔·帝王部》引《尸子》云：「神農氏並耕而食以勸農也。」尸佼，魯人，其書屬雜家，商鞅師之，其言「並耕而治」，與許行同。許行之學，蓋出於尸佼。《呂氏春秋·審時》篇「夫稼爲之者人也」，高誘注云：「爲，治也。」《禮記·大學》篇「道學也」，注云：「道，言也。」是「爲神農之言」即「治神農之道」也。古之人民食鳥獸羶蠅之肉，多疾病毒傷之害，故神農因天時，分地利，制耒耜，教民播種五穀，久而耒耨之利，民皆粒食；黃帝堯舜垂衣裳而天下治，通變神化，定尊卑，辨上下，爲萬世法，故孟子言必稱堯舜。尸、商之徒，仍託神農之言以惑天下，許行從而衍之，猶墨者之於翟耳。《國策·齊策》「軍重踵高宛」，高誘注云：「踵，至也。」《毛詩》「胡取禾三百廛兮」，傳云：「一夫之居曰廛。」是廛即居也。氓與甿同，《周禮·地官·遂人》「凡治野，以下

劑治𡩇」云云，注云：「變民言𡩇，異外內也。𡩇猶憎。憎，無知貌也。」賈氏疏云：「大司徒、小司徒主六鄉，皆云民不言𡩇，此變民言𡩇，直是異內外而已。」然則鄉遂稱民，都鄙稱𡩇。𡩇屬都鄙，故爲「野人」。《國策·秦策》云「而不憂民氓」，《淮南子·脩務訓》云「以寬民氓」，高誘注皆云：「野民曰氓。」《史記·三王世家》《索隱》出「邊𡩇」，云：「《三蒼》云邊人云𡩇。」邊人亦即都鄙之民也。文公與之處，其徒數十人皆衣褐，捆屨織席以爲食。**注**文公與之居處，舍之宅也。其徒，學其業者也。衣褐，貧也。捆猶叩掾也。織屨欲使堅，故叩之也。賣屨席以供食飲也。**疏**注「文公與之居處舍之宅也」○正義曰：《呂氏春秋·功名》篇云「故民無常處」，高誘注云：「處，居也。」文公與之處，即文公與之居，故以「居」解「處」。《毛詩·羔裘》箋云：「舍猶處也。」《爾雅·釋言》云：「宅，居也。」《荀子·王制》篇云：「定廛宅。」趙氏既以「居」釋「宅」，仍以其意未明，故又以「舍之宅」申明之，謂與之居處者，止舍之以廛宅也。○注「捆猶」至「叩之也」○正義曰：《音義》出「捆屨」，云：「丁音闕。案，許叔重曰：「捆，織也。」《埤倉》曰：「捆，傲也。」從才。從木者誤也。張作捆，

音同。」又出「叩掾」，云：「丁音卓，擊也。從才旁豕。」此所引許說蓋《淮南子》注。《淮南子·脩務訓》云：「蔡之幼女，衛之稚質，捆纂組。」高誘注云：「捆，叩掾。纂，織。」**①**組，邪文，如今之綬，沒黑見赤，亦其巧也。謂織組而叩掾之也。《毛詩·大雅》「室家之壺」，箋云：「壺之言捆也。室家先以相捆緻。」孔氏正義云：「捆逼而密緻。」傲即緻。「叩之使堅」，堅亦緻也。高注《淮南》同於許，趙注《孟子》同於高矣。捆屨織席，何以爲食？知其「賣之以供飲食」也。陳良之徒陳相與其弟辛，負耒耜而自宋之滕，曰：「聞君行聖人之政，是亦聖人也，願爲聖人氓。」**注**陳良，儒者也；陳相，良之門徒也；辛，相弟。聖人之政，謂仁政也。陳相見許行而大悅，盡棄其學而學焉。**注**棄陳良之儒道，更學許行神農之道也。**疏**注「棄陳良之儒道」○正義曰：《漢書·藝文志》云：「儒家者流，游文於六經之中，留意於仁義之際，祖述堯舜，憲章文武，宗師仲尼，以重其言，於道爲最

①「織」，原脫，今從沈校據《淮南子》高注補。

高。《荀子·儒效》篇言大儒之效，首推周公，其對秦昭王，則以仲尼爲歸。陳良「悅周公仲尼之道」，是儒家者流也。

陳相見孟子，道許行之言曰：「滕君，則誠賢君也。雖然，未聞道也。」

注陳相言許行以爲滕君未達至道也。賢者與民並耕而食，饗飧而治。今也滕有倉廩府庫，則是厲民而以自養也，惡得賢？**注**相言許子以爲古賢君當與民並耕而各自食其力。饗飧，熟食也。朝曰饗，夕曰飧。當身自具其食，兼治民事耳。今滕賦稅有倉廩府庫之富，是爲厲病其民以自奉養，安得爲賢君乎？三皇之時質樸無事，故道若此也。

疏注「饗飧」

至「事耳」○正義曰：《說文》食部云：「饗，熟食也。」「飧，餽也。从夕食。」餽，申時食也。」段氏玉裁《說文解字注》云：

「《小雅》傳云「熟食曰饗」，《魏風》傳云「熟食曰飧」，然則饗、飧皆謂熟食，分別之則謂朝食夕食。許於饗不言朝，於飧不言孰，互文錯見也。趙注《孟子》曰：「朝食曰饗，夕曰飧。」此析言之。《公羊傳》「趙盾食魚飧」，《左傳》「僖負羈饋盤飧，趙衰以壺飧從」，皆不必夕時，渾言之也。《司儀》注云：

「小禮曰飧，大禮曰饗。」《掌客》：「上公飧五牢，饗九牢，侯伯飧四牢，饗七牢，子男飧三牢，饗五牢。」此饗飧與常食不同，且多腥，不皆熟食。王氏念孫《廣雅疏證》云：「《釋器》：「熟食謂之餽饗。」餽讀若飧。《小雅·祈父》篇「有母之尸饗」，毛傳云：「熟食曰饗。」《大東》篇「有饁簋飧」，**傳**云：「飧，熟食也。」合言之則曰飧饗，《周禮·外饗》云「賓客之飧饗饗食之事」是也。昭二十五年《公羊傳》「餽饗未就」，何休注云：「餽，熟食。饗，熟肉。」餽饗即飧饗。《淮南子·道應訓》「釐負羈遺之壺餽而加璧焉」，壺餽即壺飧。是飧餽古通用。倒言之則曰饗飧，《孟子·滕文公》篇「饗飧而治」是也。」○注「是爲至」君乎」○正義曰：《毛詩·大雅·思齊》篇「烈假不瑕」，箋讀烈爲厲，云：「厲，病也。」《論語·子張》篇云「信而後勞其民，未信則以爲厲己也」，王肅云：「厲，病也。」此「厲民」正《論語》所云「厲己」，故以「病」釋之也。昭公六年《左傳》云「奉之以仁」，注云：「奉，養也。」《說文》食部云：「養，供養也。」《周書·謚法》「敬事供上曰恭」，注云：「供，奉也。」是「養」爲「奉養」也。上云「滕君則誠賢君」，此又云「惡得賢」，「賢」即指上賢君。

①「有」，原誤作「可」，今從沈校據《毛詩》改。

惡之言安也。孟子曰：「許子必種粟而後食乎？」**注**問許子必自身種粟乃食之邪？曰：

「然。」**注**相曰：然，許子自種之。「許子必織布而後衣乎？」**注**孟子曰：許子自織布然後衣之乎？曰：「否，許子衣褐。」**注**相曰：不自織布，

許子衣褐。以毳織之，若今馬衣者也。或曰：褐，臬衣也。一曰：粗布衣也。**疏**注「以毳」至「衣也」○正義曰：《周禮·春官·司服》鄭司農注云：「毳，屬衣也。」

《天官·掌皮》「共其毳毛爲氈」，注云：「毳毛，毛細縛者。」《淮南子·覽冥訓》云「短褐不完」，注云：「短褐，處器物之人也。褐，毛布，如今之馬衣也。」定公八年《左傳》云「侵齊，攻廩丘之郛，主人焚衝，或濡馬褐以救之」，注云：「馬褐，馬衣。」《說文》衣部云：「褐，編臬韞，一曰粗衣。」趙氏云「馬衣」，本《左傳》及高注也；云「臬衣」，本《說文》「編臬韞」也；云「粗布衣」，本《說文》「粗衣」也。段氏玉裁《說文解字注》云：「取未績之麻，編之爲足衣，如今草屨之類。臬衣亦謂編臬爲衣。」按：《說文》云「編臬韞」，此云「衣褐」非韞，故

趙氏不言韞但言衣也。任氏大椿《深衣釋例》云：「《說文》：「褐，編臬韞，一曰粗衣。」《急就篇》：「鞞鞞印角褐韞

巾」，注：「褐，毛爲衣，或曰麤衣也。」按，《詩·七月》箋，《孟子》注，《急就篇》注，並以褐爲毛布，《孟子》注又以褐爲編臬衣，又以褐爲粗布衣。《淮南子·齊俗訓》注：「楚人謂袍爲短褐大布。」潘岳《籍田賦》「被褐振裾」，注：「褐，麤布也。」然則褐一衣耳，而毛、臬、布各異。《說文》曰「粗衣」，蓋統毛、臬、布而言之也。《詩·七月》「無衣無褐」，箋云：「貴者無衣，賤衣無褐。」則別褐於衣。《史記·劉敬曰「臣衣褐，衣褐見，衣帛，衣帛見」，則別褐於帛，即《說文》所云「粗衣」也。褐爲粗衣，又爲短衣，《晏子·諫上》篇：「百姓老弱凍寒，不得短褐而欲竊。」《荀子·大略》篇「衣則豎褐不完」，注：「豎褐童豎之褐，亦短褐也。」《淮南子·齊俗訓》：「必有管籥跣跣短褐不完者。」《覽冥訓》：「霜雪亟集，短褐不完。」《新序》：「無鹽乃拂短褐，自請宣王。」《史記·秦始皇帝紀》「夫寒者利短褐」，《索隱》曰：「謂褐布豎裁爲勞役之衣，短而且狹，故謂之短褐，亦曰豎褐。」凡此言褐者，必曰短褐。師古《貢禹傳》注以褐爲布長襦，《演繹露》又以褐爲「裾垂至地」，豈褐之長短亦有古今之異與？「許子冠乎？」**注**孟子問相。曰：「冠。」**注**相曰：冠也。曰：「奚冠？」**注**孟子問許子何冠也？曰：「冠

素。」**注**相曰：許子冠素。曰：「自織之與？」**注**

孟子曰：許子自織素與？曰：「否，以粟易之。」

注相言許子以粟易素。曰：「許子奚爲不自

織？」**注**孟子曰：許子何爲不自織素乎？曰：

「害於耕。」**注**相曰：織妨害於耕，故不自織也。

疏注「織妨害於耕」○正義曰：阮氏元《校勘記》云：「織妨

害於耕」，閩、監、毛三本、孔本、韓本同，廖本紡作妨。按，作

「妨」是也。《說文》女部云：「妨，害也。」故以「妨」釋「害」。

曰：「許子以釜甑爨，以鐵耕乎？」**注**爨，炊

也。孟子曰：許子寧以釜甑炊食，以鐵爲犁用之耕

否邪？**疏**注，爨炊也。○正義曰：《說文》火部云：「炊，

爨也。」又爨部云：「爨，齊謂炊爨。」段氏玉裁《說文解字注》

云：「齊謂炊爨者，齊人謂炊曰爨。古言謂則不言曰，如毛

傳「婦人謂嫁歸」是也。《特牲》、《少牢禮》注皆曰：「爨，竈

也。」此因爨必於竈，故謂竈爲爨。《楚茨》傳云：「爨，雍爨、

廩爨也。」此謂竈。又曰：「踏踏，爨竈有容也。」此謂炊。」

按：此言以釜甑爨，釜甑作竈，則爨不得又爲竈，故是「炊」

矣。《說文》牛部云：「犁，耕也。」段氏玉裁《說文解字注》

云：「犁、耕二字互訓，皆謂田器。」故云「以鐵爲犁」。爨本

竈名，用以炊即以炊爲爨，猶犁本田器，用以耕即以耕爲犁

也。曰：「然。」**注**相曰：用之。「自爲之與？」

注孟子曰：許子自冶鐵陶瓦器邪？**疏**注「冶鐵陶瓦

器」○正義曰：《攷工記》：「槩氏爲量，改煎金錫則不耗，量

之以爲罍，深尺，內方尺而圓其外，其實一罍。」《說文》鬲部

云：「罍，鍑屬也。」重文：「釜，或從父金聲。」是釜屬金冶

爲之也，故云「冶鐵」。《攷工記》：「陶人爲甗，實二罍，厚半

寸，脣寸。甗實二罍，厚半寸，脣寸，七穿。」鄭司農云：「甗，

無底甗。」《說文》瓦部云：「甗，甗也。」甗，甗也，一穿。」段

氏玉裁《說文解字注》云：「無底即所謂一穿。蓋甗七穿而

小，甗一穿而大。一穿而大，則無底矣。」其底七穿，故必以

算蔽甗底而加米其上，而饒之而饒之。」甗屬瓦陶爲之也，故

云「陶瓦器」。按：占釜有足如鼎，今釜無足，別以土爲鑪承

其下，《說文》言「秦名土罍曰甗」是也。甗讀若過，今俗作

鍋。然土其下仍鐵其上，俗猶呼其上之鐵爲鍋，其下土爲鍋

臺耳。甗今以木爲之，其下亦以木爲樞，則七穿之遺制矣，

或以竹爲之，俗呼蒸籠，亦甗之類也。曰：「否，以粟

易之。」**注**相曰：不自作鐵瓦，以粟易之也。「以

粟易械器者不爲厲陶冶，陶冶亦以其械器易粟者，豈爲厲農夫哉？且許子何不爲陶冶，舍皆取諸其宮中而用之？何爲紛紛然與百工交易？何許子之不憚煩？」**注**械，器之總名也。厲，病也。以粟易器，不病陶冶，陶冶亦何以爲病農夫乎？且許子何爲不自陶冶？舍者，止也。止不肯皆自取之其宮宅中而用之。何爲反與百工交易，紛紛爲煩也？」**疏**注「械器之總名也」○正義曰：

《說文》木部云：「械，桎梏也。一曰器之總名。」桎梏爲刑罰之器。莊三十二年《公羊傳》以攻守之器爲械，而實非桎梏兵甲之專名，故《荀子·王制》篇言「喪祭械用」，《禮記·王制》云「器械異制」，注云：「謂作務之用。」《孟子》此文，又指釜甑耕犁而言，是凡器皆得稱械，故云「器之總名」也。○注「舍止也」至「用之」○正義曰：舍爲「居止」之止，此爲「禁止」之止，故又申解止爲「不肯」。《爾雅·釋宮》云：「宮謂之室，室謂之宮。」邵氏晉涵《正義》云：「《春秋》隱五年：『考仲子之宮。』《穀梁》文十三年傳云：『伯禽曰大室，』羣公曰宮。」是宮廟通稱宮室也。《左氏》莊二十一年傳云：

「號公爲王宮於珪。」《鄘詩》：「定之方中，作于楚宮。」又

云：「作于楚室。」是天子諸侯所居通稱宮室也。《左氏》僖二十八年傳云：「令無入僖負羈之宮。」《檀弓》云：「季武子成寢，杜氏之喪在西階之下，請合葬焉。許之。人宮而不敢哭。」是大夫通稱宮室也。《士昏禮》云：「請吾子之就宮。」《喪服傳》云：「所適者，以其貨財爲之築宮廟。」《大戴禮·千乘》篇云：「百姓不安其居，不樂其宮。」是士庶人通稱宮室也。《釋文》云：「古者貴賤同稱宮，秦漢以來惟王者所居稱宮焉。」按：宮是貴賤通稱，此許行所居即塵宅，故以「宅」解「宮」也。毛氏奇齡《四書賸言》云：「舍皆取諸其宮中而用之」，舍，止也。言止取宮中，不須外求也。趙注「舍」止，又以「不肯」爲止，謂不肯皆自取宮室之中，則猶是止字而解又不同。曰：「百工之事，固不可耕且爲也。」**注**相曰：百工之事固不可耕且爲，故交易也。

「然則治天下獨可耕且爲與？」**注**孟子言

百工各爲其事，尚不可得耕且兼之，人君自天子以下當治天下政事，此反可得耕且爲邪？欲以窮許行之非滕君不親耕也。孟子謂五帝以來有禮義上

①「大」，原從邵書誤作「世」，今從沈校據《穀梁傳》改。

下之事，不可復若三皇之道也。言許子不知禮也。有大人之事，有小人之事。且一人之身而百工之所爲，備如必自爲而後用之，是率天下而路也。**注**孟子言人道自有大人之事，謂人君行教化也，小人之事，謂農工商也。一人而備百工之所作，作之乃得用之者，是率導天下之人以贏路也。**疏**注「一人而備百工之所作」○正義曰：《爾雅·釋言》云：「作，爲也。」諸經注或以爲釋作，或以作釋爲，二字轉注。此以「百工之所作」解「百工之所爲」，以備字倒加句上，明爲字斷，不與備字連也。「作之乃得用之」解「自爲而後用之」，作即爲也。《荀子·富國》篇云：「故百技所成，所以養一人也。而能不能兼技，人不能兼官。」○注「是率導」至「路也」○正義曰：《禮記·中庸》云：「率性之謂道。」《管子·君臣》篇云：「道也者，上之所以導民也。」道爲導，而以「率性」解之，是「率」即「導」也。《音義》出「路也」，云：「丁、張並云：『路與露同。』」又出「贏路」，云：「力爲切，字亦作贏，卽果切。」各本作「是率天下之人以羸困之路也」。阮氏元《校勘記》云：「《音義》出『羸路』，云：『字亦作羸。』則宣公所見本無『困之』二字。路與露古通用。『露羸』見於古書者

多矣。《大雅》『串夷載路』，鄭箋以瘠釋路，俗人乃改瘠爲應。此添「困之」二字，其謬同也。力爲切，瘦也。羸路謂瘦瘠暴露也。《音義》前說是，亦作者非。」翟氏灝《攷異》云：「趙注謂『導人羸困之路』，丁、張覺其未安而欲改字爲露，不若奔走道路爲得。《管子·四時》篇云『不知五穀之故，國家乃路』，房氏注曰：『路謂失其常居。』可爲此路字之證。」故曰：「或勞心，或勞力。」勞心者治人，勞力者治於人。治於人者食人，治人者食於人。天下之通義也。**注**勞心者，君也；勞力者，民也。君施教以治理之，民竭力治公田以奉養其上。天下通義，所常行也。**疏**故曰「至」義也」○正義曰：襄公九年《左傳》知武子云：「君子勞心，小人勞力，先王之制也。」《國語·魯語》公父文伯之母云：「君子勞心，小人勞力，先王之訓也。」是勞心勞力，古有此法。孟子上言大人小人，此云「或勞心」，即君子勞心也，云「或勞力」，即小人勞力也。以先王之法，是以加「故曰」二字。「勞心者治人」以下，則孟子申上之辭也。○注「君施」至「其上」○正義曰：《荀子·修身》篇云「少而理曰治」，《淮南子·說山訓》云「幸善食之而勿苦」，注云：「食，養也。」前章言「無君子莫治野人，無野

人莫養君子」。此云「勞心者治人，治人者食於人」，即君子治野人也；此云「勞力者治於人，治於人者食人」，即野人養君子也。彼云養云食，正是食即是養，故以「理」釋「治」而以「奉養」釋「食」。「施教化以治理之」，即使之同鄉共井，相友相助相扶持以親睦也；「民竭力治公田」，則八家同養公田，公事畢然後敢治私事也。戰國時諸侯卿大夫但知多取於民，故不樂分別公私之界。不知助法行則先公後私之分定而君子野人之辨明，不特小人之利，正君子之福也。許行以孟子分別尊卑貴賤，持其並耕之說，同君子於小人，思有以破之，故孟子復引先王「勞心勞力」之辨以申明君子治野人、野人養君子之義。「義」而「通」，非一人之私言矣，故云「所常行」者也。

「當堯之時，天下猶未平。洪水橫流，汜濫於天下。草木暢茂，禽獸繁殖。五穀不登，禽獸偪人，獸蹄鳥迹之道交於中國。堯獨憂之，舉舜而敷治焉。」
注遭洪水，故天下未平；水盛，故草木暢茂；草木盛，故禽獸繁息衆多也。登，升也。五穀不足升用也。猛獸之迹當在山林而反交於中國。懼害人，故堯獨憂念之。敷，治

也。《書》曰「禹敷土」，治土也。**疏**「當堯之時」○正義曰：孟子舉堯舜之事，明通變神化，必法堯舜。神農之言，非其時也。○注「遭洪」至「害人」○正義曰：洪與鴻通。《呂氏春秋·執一》篇「神農以鴻」，高誘注云：「鴻，盛也。」《說文》水部云：「濫，汜也。」「汜，濫也。」二字轉注。以疊韻，故連稱之。《楚辭·九辯》云「何汜濫之浮雲兮」，注云：「浮雲晦翳。」晦翳，雲之盛也。《史記·韓非傳》云：「汜濫博文，則多而久之。」博多，說之盛也。劉向《九歎·憂苦》篇云「折銳摧矜，凝汜濫兮」，注云：「汜濫猶浮沉也。」水盛，故浮沉於中國。經先言「天下未平」，注先言洪水，明「洪水橫流」二句申上「天下猶未平」也。凡事縱則順，橫則逆。橫行，水逆行也。天下所以未平，緣洪水，水所以盛，緣逆流。惟逆流則浮沉於天下，而天下所以未平也。《毛詩·秦風·小戎》傳云：「暢，輶，長輶也。」《呂氏春秋·知度》篇「此神農之所以長」，高誘注云：「長猶盛也。」《說文》艸部云：「茂，草豐盛。」是「暢茂」為「草木之盛」也。《毛詩》「正月繁霜」，傳云：「繁，多也。」《淮南子·汜論訓》「當市繁之時」高誘注：《楚辭·離騷》「佩繽紛其繁飾兮」王逸注，皆云：「繁，衆也。」繁通作蕃。《周禮·地官·大司徒》「以蕃鳥獸」，注云：「蕃，蕃息也。」《國語·晉語》「惡不殖也」，注云：「殖，蕃

也。《魯語》云「所以生殖也」，注云：「殖，長也。」昭公十八年《左傳》云「夫學殖也」，注云：「殖，生長也。」《史記·孔子世家》云「自大賢之息」，《索隱》云：「息者，生也。」然則繁殖二字義同，「繁殖」即「繁息」，「繁息」即「衆多」也。隱公五年《左傳》「不登於俎」，^①服虔注云：「登爲升。」是登即升也。《爾雅·釋詁》云：「登，成也。」《淮南子·時則訓》云：「農始升穀」，高誘注云：「升，成也。」其義亦同。《呂氏春秋·明理》篇云「五穀萎敗不成」，又《貴信》篇云「則五種不成」，高誘注並云：「成，熟也。」「五穀不登」則五穀不成，故登即成。《禮記·檀弓》云「是故竹不成用」，《毛詩·齊風》「儀既成兮」，箋云：「成猶備也。」「成用」猶「備用」，「備用」猶「升用」也。鄭氏解不成用爲不可善用，竹無邊滕則不可善用，猶穀不秀實則不足升用也。偁，古逼字。《爾雅·釋言》云：「逼，迫也。」猛獸與人相迫近則害人，惟害人故堯獨憂念之，謂堯懼其傷害人，故憂念之也。經言「禽獸」注單言「猛獸」者，舉獸以見鳥也。見於《山海經》者，多猛獸，亦多怪鳥矣。《爾雅·釋詁》云：「憂，思也。」「念，思也。」是「憂」亦「念」也。王氏念孫《廣雅疏證》云：「傳，治也。」《孟子·滕文公》篇「堯獨憂之，舉舜而敷焉」，趙岐注云：「敷，治也。」引《禹貢》「禹敷土」。敷與傳同，故《史記·夏本紀》作

「傳土」。今本《孟子》敷下有治字，後人取注義加之也。」按：《禹貢》「禹敷土」，《史記集解》引馬氏注云：「敷，分也。」敷之訓布，布，散也，散亦分也。然則「敷治」即「分治」，堯一人獨憂，不能一人獨治，故使舜分治之。下文使益掌火，使禹疏河，舜又使益、禹等分治之也。趙氏以「治」釋「敷」，則趙本似無「治」字，乃今各本皆無無「治」字者。《儀禮·喪服傳》云「故名者，人治之大者也」，注云：「治猶理也。」《淮南子·原道訓》「夫能理三苗」，高誘注云：「理，治也。」二字轉注。《毛詩·小雅》「我疆我理」，傳云：「理，分也。」《禮記·樂記》云「樂者，通倫理者也」，注云：「理，即以理釋敷，亦正以分釋敷。趙氏注經，每有此例，無碍經之有治字也。舜使益掌火。益烈山澤而焚之，禽獸逃匿。」**注**掌，主也。主火之官，猶古火正也。烈，熾也。益視山澤草木熾盛者而焚燒之，故禽獸逃匿而遠竄也。**疏**注「掌主」至「正也」○正義曰：《周禮·天官》「凌人掌冰」，杜子春讀掌冰爲主冰，是「掌」爲

①「登」，原誤作「升」，今據《左傳》改。

「主」也。掌火猶掌冰，故「掌火」即「主火之官」。云「猶古之火正」者，襄公九年《左傳》晉士弱對晉侯曰：「古之火正，或食於心，或食於昧，以出內火。陶唐氏之火正閼伯居商丘，祀大火而火紀時焉。相土因之，故商主大火。」唐時有此官，蓋先使益爲之，後命益爲虞，閼伯乃代益爲火正，其後又相土代之也。《說文》火部云：「烈，火猛也。」《呂氏春秋·盡數》篇「無以烈味重酒」，高誘注云：「烈猶酷也。」趙氏以益焚草木乃焚所當焚，不可謂之酷猛。以烈之從火與熾同，《爾雅·釋言》：「熾，盛也。」《毛詩·商頌》「如火烈烈」，箋云：「其威勢如猛火之炎熾。」是烈可訓熾。熾爲盛，烈亦爲盛，即上所云「草木暢茂」也。故以烈屬草木，謂「視山澤艸木熾盛」者，以「熾」釋「烈」，又以「盛」釋「熾」也。視山澤爲熾，故云「熾山澤」；猶視以爲陋則云陋之，視以爲美則云美之。此視以爲烈，則云「烈山澤」也。胡氏渭《禹貢錙指》云：「《書》言「刊木」，而《孟子》云「舜使益掌火，益烈山澤而焚之」，其說不同。蓋刊乃常法，間有深林窮谷，舊蔚蒙龍，斧斤不可勝除者，則以炬空之，殊省人力。」按：《皋陶謨》「隨山刊木」，江氏聲《尚書集注音疏》云：「《史記·夏本紀》作「行山茱木」，又錄《禹貢》「隨山茱木」作「行山表木」。《說文》：「茱，槎識也。」《國語·魯語》云「山不槎櫟」，賈逵注

云：「槎，袞斫也。」《說文》木部亦云：「槎，袞斫也。」「槎識」謂袞斫其木以爲表識也。「段氏玉裁《說文解字注》云：「斫之以爲表識，如孫臏斫大樹白而書之曰「龐涓死此樹下」，是其意也。」然則刊木自爲表識道里，與此焚草木、驅禽獸不同，非《孟子》異於《尚書》也。《楚辭·大招》云「魂無逃只」，注云：「逃，竄也。」《淮南子·說林訓》云「清則見物之形，弗能匿也」，高誘注云：「匿猶逃也。」《說文》穴部云：「竄，匿也。」三字轉注，故以「竄」釋「逃匿」。逃竄，則遠去，故加「遠」字也。閩、監、毛二本「遠竄」上多「奔走」二字。禹疏九河，淪濟、漯而注諸海，決汝、漢，排淮、泗而注之江，然後中國可得而食也。當是時也，禹八年於外，三過其門而不入，雖欲耕，得乎？**注疏**，通也。淪，治也；排，壅也。於是水害除，故中國之地可得耕而食也。禹勤事於外，八年之中三過其家門而不得入。《書》曰：「辛壬癸甲，啓呱呱而泣，予弗子。」如此，寧得耕乎？**疏**「禹疏九河」○正義曰：《禹貢》：「濟、河爲兗州，九河既道。」又云：「導河積石，至于龍門，南至于華陰，東至于底柱，又東

至于孟津，東過洛汭，至于大伾，北過泝水，至于大陸，又北播爲九河，同爲逆河，入于海。」《毛詩正義》引鄭氏注云：

「河水自上至此，流盛而地平無岸，故能分爲九以衰其勢。壅塞，故通利之也。九河之名：徒駭、太史、馬頰、覆釜、胡蘇、簡、絮、鉤盤、鬲津。周時齊桓公塞之，同爲一河。今河間、弓高以東，至平原、鬲津，往往有其遺處焉。」又云：「播，散也。」謝氏身山《黃河圖說》云：「水降土升，則河底日低而地日高，水升土降，則河底日高而地日低。凡水過寒涼，則反凝結堅實而成冰；土過寒涼，則反融化柔虛而爲塵。黃河之水出積石之西，寒涼之甚者也。但水雖堅，流於衆石之間則不能濁，此積石以西之水所以最清；至積石東，漸遇柔虛之土，所以漸濁。水降土升，隨之而去，則溝底漸下。今觀底柱以上，地高河低，則水降土升，確然可見；滎陽以下，則水復上升，土復下降，此河底所以日高。在西北寒涼之地，則水反堅實，土反柔虛，此滎武以上所以水降土升也；至東南溫暖之地，則水復柔虛，土復堅實，此滎武以下所以水升土降也。且汾、洛、涇、渭之源皆出西北寒涼之地，故水上容土，土下容水，彼此相混而皆爲濁河，此滎武以上所以水降土升也；濟、伊、洛、瀍、澗、池、沁之源皆出東南溫暖之地，故水不容土，土不容水，彼此相拒而皆爲清河焉，此滎武以下所以水升土降也。夫濁河之水，容土者也，清河之水，不容土者也。清河之水入於濁河之中，則濁河之土必不容於清水之上，自必漸降於下而河底漸高以致水行地上，左右衝決也。鯀之治河，績用弗成，固宜罪之，然九載河事，所行雖錯，亦未必非大禹八年於外之一助。蓋大禹兩世於此，熟悉水土之性，故深以水由地上行爲憂，故掘地注海，使水由地中行，又何汜濫衝決之有？而聖人猶憂深慮遠，惟恐日後之水升土降，水復行於地上，乃思惟有濬去河底之淤。然黃河之水，萬里奔濤，直趨而下，又何能使之暫停於上以取其泥哉？聖人於此再四躊躇，乃於河外加河而作逐一遞濬之法，遂將一河播爲九道，每至夏秋水涸之後，乃以八河通流注海，一河開斷上流之口，使河底之淤盡露，然後濬而去之。則此一河之內無淤塞之泥，因而二河三河以及八九河，復至一二河，輪流更替，一歲必深濬一河，九歲必各濬一次，周而復始，永濬勿廢，萬載千年，可無患焉。後世不明其意，乃誤解之曰，播九河者，殺水勢也。是豈知水之勢者哉？」○「瀹濟漯」○正義曰：《禹貢》云：「導沅水，東流爲濟，入于河，溢爲滎，東出于陶丘北，又東至于荷，又東北會于汶，又北東入于海。」兗州云：「浮于濟、漯，達于河。」段氏玉裁《說文解字注》云：「沅，沅也。東入于海。从水，弗聲。四瀆之沅字」

如此，而《尚書》、《周禮》、《春秋》三傳、《爾雅》、《史記》、《風俗通》、《釋名》皆作濟。《毛詩·邶風》有洧字，而傳云「地名」，則非水也。惟《地理志》引《禹貢》、《職方》作洧，然以濟南、濟陰名郡，《志》及漢碑皆作濟，則知漢人皆用濟，班《志》、許書僅存古字耳。」胡氏渭《禹貢錙指》云：「《孟子》曰『禹疏九河，濬濟漯』，皆在兗域。而經於濟、漯不言施功，以貢道見之，曰『浮于濟、漯』，則二水之治可知矣。『濟漯』之漯，《說文》本作濕，燥溼之溼，《說文》本作溼。隸改日爲田，又省一系，遂作漯，而濕轉爲溼。濕、溼二字混而無別。」王氏鳴盛《尚書後案》云：「《漢志》言漯水所經，除東武陽，尚有四縣：一，平原郡高唐，桑欽言漯水所出，二，漯陰；三，千乘郡千乘；四，漯沃。所過郡三者，謂東郡、平原、千乘也。高唐之水當爲漯水別支，《河渠書》云：『禹導河，至大伾，於是禹以爲河所從來者，高水湍悍，數爲敗，乃斷二渠以引其河。』孟康曰：『二渠，其一出貝丘西南南折者，即河之經流也，其一則漯川也。河自王莽時遂定，惟用漯耳。』孟康言河徙惟用漯，雖似小誤，其以禹釀二渠，一爲漯川，此用古義，不可改也。以《水經注》、《元和志》、《寰宇記》諸書考之，濟水最南，漯水在中，河水最北。今小清河所經，自歷城以東，如章丘、長山、新城、高苑、博興、樂安諸縣，皆古濟水所行，

而大清河所經，自歷城以上至東阿，固皆濟水故道，而自歷城東北，如濟陽、齊東、青城諸縣，則皆古漯水所行，蒲臺以北則古河水所經。蓋宋時河嘗行漯濱，及河去則大清河兼行河、漯二濱，其小清河則斷爲濟水故道也。」○「決汝漢」○正義曰：《禹貢》云：「嶧冢導濊，東流爲漢，又東爲滄浪之水，過三澨，至于大別，南入于江。」而汝水，《禹貢》無之。《漢書·地理志》汝南郡定陵云：「高陵山，汝水出，東南至新蔡，入淮，過郡四，行千三百四十里。」南陽郡魯陽縣注云：「有魯山，汝水所出，東北至定陵，入汝。又有昆水，東南至定陵入汝。」潁川郡亦有定陵，《續郡國志》潁川郡有定陵，汝南郡無定陵。劉昭注於潁川定陵引《地道記》云：「高陵山，汝水所出。」汝南定陵蓋即潁川定陵，前漢有一縣分隸兩郡者，定陵在汝南、潁川之間，故分屬之。光武時省併爲一，僅存爲一，故《續志》屬潁川耳。」班氏於魯陽序汝水至定陵入汝，於定陵序汝入淮，定陵以西統汝於汝，汝亦汝也。連汝水數之，歷南陽、河南、潁川、汝南，故有四縣。杜預《春秋釋例》、郭璞《山海經》注並云：「汝出南陽魯陽縣大孟山東北，至河南梁縣東南，經襄城、潁川、汝南，至汝陰襄信縣入淮。」襄城晉置，汝陰魏置，在晉則歷六縣也。《說文》言汝水出宏農盧氏還歸山，班《志》：盧氏縣熊耳在東，伊水出東

北，然則漢時盧氏縣在伊水之南，與魯陽爲接壤，酈氏目驗之，故《水經注》言汝出魯陽大孟縣山蒙栢谷西，即盧氏界。許氏雖與班氏異，而其指則同。若《水經》言出河南梁縣勉鄉西天息山，此本《山海經》，非班、許義也。酈注於淮、汝分流，始言汝水趣狼皋山。狼皋在梁縣西南六十里，見《寰宇記》。蓋汝自魯陽，越百餘里始至梁縣，《元和志》謂出魯山縣是矣。謂出魯山縣之天息山，是又以魯陽大孟混入勉鄉之天息也。《淮南子·地形訓》云：「汝出猛山。」猛與蒙栢長短讀，蒙谷即猛山，而猛與孟形近而譌，大孟山即猛山也。高誘注云：「猛山，一名高陸也。在汝南定陵縣，汝水所出，東南至新蔡入淮。」此據班氏而未知其指。○「排淮泗而注之江」○正義曰：《禹貢》云：「導淮自桐栢，東會于泗、沂，東入于海。」揚州云：「沿于江海，達于淮、泗。」孫氏蘭《輿地隅說》云：「淮水發源胎簪，至桐栢流百里而伏，溢爲一潭。又見流千里會泗，至清江浦入海。揚州地勢散漫，不能約束淮流，禹則開清江一渠，堰其下流入揚之處，一自清江浦入海，其餘波之流散不盡者，又導之由廬州巢湖、胭脂河以入江，又導之由天長、六合以入江，所謂「排淮泗」者也。久而入江之口漸淤，今故蹟猶存也。或曰高堰始於陳登，是不然。若禹不築堰，則下流散漫，何以入海？蓋高堰創於神

禹，修補或登耳。」蘭字滋九，居吾鄉北湖，順治、康熙時人，於天算地圖研究極精，此說實能羽翼《孟子》。近時則有陽湖孫氏星衍作《分江導淮論》，大略與蘭同而加詳，其言云：「《孟子》言「排淮、泗而注之江」，今不得其解，或以爲誤，或以爲據吳溝通江、淮之後言之。不知《禹貢》揚州已云「沿于江海，達于淮泗」，解者又謂沿江入海，自淮入泗，此僞孔之言，本不足信。貢道迂回海運，古無是法。又有泥四瀆各獨入海，以爲淮必不注江者。不知各獨入海，言入海處與江分道，不謂上游支流也。《孟子》言排者，通其上游支流以殺淮之勢。《水經注》：「淮水與泚水、泄水、施水合。」泄水注濡須口，施水受肥東南流，逕合肥縣城，又東注巢湖，謂之施口。而應劭《漢書注》並以夏水爲出城父東南，至此與肥合，故曰合肥。合肥壽春之間有芍陂、船官湖、東臺湖、逍遙津，見於《水經注》。王象之《輿地紀勝》云：「古巢湖水北合於肥河，故魏窺江南則循渦入淮，自淮入肥，由肥而趨巢湖。吳人撓魏，亦必由此。」又引《貨殖傳》「合肥受南北湖」，今《史記》湖誤作潮也。歐陽忞《輿地廣記》、王存元《豐九域志》：「合肥有肥水、淮水，宋時廬州有鎮淮樓。」蓋肥合於淮，淮水盛則被於肥，此淮水至合肥之証。孫叔敖時開芍陂，當因舊迹爲渠。《方輿勝覽》引《合肥舊志》「肥水北支入

淮，南支入巢湖，合於《爾雅》歸異同出之說。合肥城在四水中，故梁韋叡堰水破城。近世水利不修，淮、肥流斷，然巢湖之水，夏間猶達合肥，古迹可尋求也。且古說大別在安豐，爲今霍丘地，禹迹至此排淮，故導江有「至大別」之文，此又淮流與江通之證矣。然則夏時貢道，正可由巢湖溯施、泄、肥水之流通淮，達於荷澤，荷澤合沛、泗之流，故云「達于淮、泗」。從此達河，則至禹都矣。江、淮、泗通流，不必在吳王溝通之後也。淮之上游壽春，東則有施、肥通流，西則有芍陂宣洩，盛夏水漲，則逕合肥入巢湖以達於江，故宋以前淮流不爲洪澤湖之患。上言「注諸海」，此言「注之江」，之、諸異者，王氏引之《經傳釋詞》云：「之猶諸也。之、諸一聲之轉，互文耳。《詩·伐檀》篇「實之河之側兮」，《漢書·地理志》作「實諸」。襄二十六年《左傳》「棄諸堤下」，《五行志》作「棄之」。○注「疏通」至「壅也」○正義曰：《說文》疋部云：「疏，通也。」《國語·周語》云「疏爲川谷，以導其氣」是也。《說文》水部云：「濬，漬也。」字同於濬。《一切經音義》引《通俗文》云：「以湯煮物曰濬。」皆與此文不合。《莊子·知北遊》云：「汝齊戒疏瀹其心。」濬與疏連文，當與疏同義。《廣雅》云：「疏，治也。」趙氏以「治」釋之，仍以爲疏耳。按：《淮南子·原道訓》高誘注云：「疏，分也。既醞爲二，

又播爲九。」醞、播皆分，疏、濬亦皆分也。開通亦分義。趙氏上以「治」釋「敷」，此以「治」釋「濬」，皆兼有分義也。《說文》手部云：「排，擠也。」「擠，排也。」「抵，擠也。」「推，排也。」排、抵、擠、推，皆拒而退去之名，與通相反，故趙氏以「壅」解之。壅與雍同，《周禮·雍氏》注云：「雍，謂隄防，止水者也。」淮將南溢，蔽塞其南以拒之，壅即抵之推之使東去也。趙氏蓋指高堰與？且說者疑淮、泗不入江，乃汝入淮，亦不入江。而《孟子》以汝、漢並稱爲決，下承「注江」，豈孟子不知淮，並不知汝邪？嘗細推之，有精義焉。淮自桐栢而東，在上則汝、潁、沙、渦等水入之，在下則泗挾沂人之。以一淮受諸水，泗口以東，地勢散漫，難於專流入海，故在上則決之，在下則排之。趙氏以壅解排，義爲至精。何爲壅？於泗口之下築隄以束之，不使其流漲洩於樊良、射陽之間，推抵之，偪令東入於海。有此排而淮乃挾泗入海，而不致南漲於江矣。乃壅障之功，施於泗入淮以下，可以壅泗，而汝、潁諸流之入於淮者，不可以此壅之，故於泗口以西，決之使注於江。此地泗未入淮，所決者淮，實決汝也，泗既入淮，所壅者淮，實壅泗也。言「排泗」而沂在其中，言「決汝」而潁、渦等水在其中。下以泗與淮並言，明泗入淮，此汝即入淮之汝，不可云「決淮、汝」，致與下句沓複，故云「決汝、

漢」。是時漢在安豐之間入江，汝人淮而決之入江，蓋與漢合，故云「決汝、漢」，謂決汝以合於漢，而南注之江也。蓋注江者，汝、漢之決也，注海者，淮、泗之排也。以上文言「注諸海」，故此但言「注江」，此占人屬文互見之法也。以今推之，汝水至汝寧、鳳陽之間汝口入淮，至霍丘西決出會於巢湖入江，淮決即汝決，而汝入淮之勢洩矣。又東則潁水自潁上縣入淮，沙水、渦水自懷遠縣入淮，而淮勢又盛。至盱眙又決出，由天長、六合入江，而潁、沙、渦諸水入淮之勢又洩矣。又東，沂、泗乃自宿遷入淮，而淮勢又盛，遂不決之人江，轉壅障入江之路，排之使專由安東注海。汝人淮則決之使合漢水以注之江，泗人淮則壅之使並入於海，故云「決汝漢，排淮泗而注之江」。自漢不至安豐而汝、漢之合遂莫可解。於《孟子》稱「決汝、漢」，可以考見當時之地勢，益知杜預、鄭元疑大別不在安豐之非也。宣王命召公平淮夷而《詩》言「江漢浮浮」，孔氏正義引大別在廬江安豐縣界，則江漢合處在揚州之境。漢近淮，故淮水之決出者與之合。不言「決淮」而言「決汝」，明決淮所以決汝人淮之勢也；不言「決汝、淮」而言「決汝、漢」，明淮決於六安、安豐間入漢，與漢合入江也。孟子此文，至精至妙，補《禹貢》所未詳。趙氏以壅釋排，《孟子》之義益顯。班固撰《漢書·地理志》，其言

水道多用互見，最為奇奧，而為地理之學者，尚不能識之，況《孟子》乎？○注「書曰」至「弗子」○正義曰：《皋陶謨》文。

「后稷教民稼穡，樹藝五穀。五穀熟而民人育。」**注**棄為后稷也。樹，種；藝，殖也。五穀

謂稻、黍、稷、麥、菽也。五穀所以養人也，故言「民人育」也。**疏**注「棄為后稷也」○正義曰：《尚書·堯典》

云：「帝曰：棄，黎民阻飢，汝后稷播時百穀。」是棄為后稷也。○注「樹種藝殖也」。○正義曰：《呂氏春秋·任地》篇

云「而樹麻與菽」，《淮南子·本經訓》「益樹蓮菱」，高誘並注云：「樹，種也。」《方言》云：「樹植，立也。」《禮記·中庸》

「地道敏樹」，注云：「樹，殖也。」《毛詩·齊風》「藝麻如之何」，傳云：「藝，樹也。」《說文》「𣎵」部云：「藝，種也。」木部

云：「樹，生植之總名也。」是樹、藝、種、植四字義通，故樹可訓種亦可訓植，藝可訓植亦可訓種也。○注「五穀謂稻黍稷麥菽也」○正義曰：《素問·金匱真言論》云：「東方青色，

其穀麥；南方赤色，其穀黍；中央黃色，其穀稷；西方白色，其穀稻；北方黑色，其穀豆。」《周禮·夏官·職方》：「揚

①「謂」，原誤作「為」，今據廖本改。

州、荊州宜稻，豫州、并州宜五種，青州宜稻麥，兗州宜四種，雍州、冀州宜黍稷，幽州宜三種。」注云：「三種，黍、稷、稻。四種，黍、稷、稻、麥。五種，黍、稷、菽、稻、麥。」趙氏所本也。程氏瑶田《九穀攷》云：「鄭康成氏注《周官·大宰》職之「九穀」：黍、稷、稻、粱、麻、大豆、小豆、麥、苽。南方無黍，而稷、粱二者，言人人殊。鄭氏注三禮及箋《詩》，獨不詳稷之形狀，呂氏、淮南子，其所著書，往往言諸穀之得時，及太歲所值之年，穀之或昌或疾，東西南朔之地，地各有所宜種矣，而獨不及於稷；而鄭衆、班固、服虔、孫炎、韋昭、郭璞之流，其言稷者，類皆冒粟之名。唐以前，以粟爲稷，唐以後或以黍之黏者爲稷，或以黍之不黏者爲稷。今讀《說文》，較然不可相冒。及搜尋鄭氏說，稷、粱兼收，黍、稷不濶，足正諸家之謬。」其攷梁云：「《說文》：「禾，嘉穀也。二月始生，八月而孰，得時之中，故謂之禾。禾，木也。木王而生，金王而死。」粟，嘉穀實也。」「米，粟實也。」「粱，米名也。」「聘禮》米禾，皆兼黍、稷、稻、粱言之。以他穀連稷者，不別立名，假借通稱，抑以事難件繁，有足相包者，屬文之法耳，非謂禾爲諸穀大名也。《七月》詩云「禾麻菽麥」，禾爲諸穀中之一物明矣。納稼專言禾者，稼以禾爲主，故重見於上以目之也。《周官·倉人職》「掌粟人之藏」，注：「九穀盡藏焉，以粟爲

主。」鄭氏注《大宰職》「九穀」中無粟，此言九穀以粟爲主，則是粱即粟矣。《史記索隱》載《三蒼》云：「粱，好粟。」其証也。《內則》言飯有粱，又有黃粱，是粱者白粱也，今北方猶呼粟米之純白者曰粱米。先鄭注「九穀」有稷無粱，然於「六穀」則稷、粱並錄。韋昭注《國語》，直曰「稷，粱也」。顯與《禮經》相畔，及其注「百穀」，於稷之外又復舉粱。稷、粱二穀見於經者判然兩事，秦漢以後濶而一之，舉粱輒逸稷，舉稷又逸粱。後鄭知稷、粱之不可相無也而毅然改司農九穀之說，吾於是服康成氏之識之卓也。其注《疾醫職》之「五穀」曰「麻、黍、稷、麥、豆」，據《月令》之文；《膳夫》「王用六穀」，从司農說「稌、黍、稷、粱、麥、苽」，蓋據《食醫》「會膳食之宜」而知之；於九穀必入粱者，據《食醫》「六穀」有粱而入之也。五穀於六穀中缺一，不知宜缺何穀，不能據六穀意爲增損。且五穀養疾，宜與藏氣相應，故直據《月令》配五行者爲之注。其注《職方》「宜五種」不據《月令》者，以本經他州所見有稻、黍、稷、麥四種，四種有稻，而《月令》五穀無稻，故據所已見之四種而益之以菽。諸家言五穀者，《月令》曰「麻、黍、稷、麥、豆」，鄭氏據之注《疾醫》。《史記·天官書》與《月令》同物。顏師古注《漢書·食貨志》之「五種」，盧辨《大戴禮》注，亦皆同之。《素問》論五方之穀曰：「麥、黍、

稷、稻、豆。」鄭氏注《職方氏》之「五種」曰「黍、稷、菽、麥、稻」，《漢書·地理志》引《職方氏》，師古注之，全同後鄭。《管子·地員》：「五土所宜，曰黍、稷、菽、麥、稻。」《淮南子》「五穀」注：「菽、麥、黍、稷、稻。」《漢書音義》韋昭曰：「五種：黍、稷、菽、麥、稻也。」《五帝大論》又進麻爲「木穀」，至「火穀」則麥、黍互用。以上言五穀者十二事，皆有稷無梁。《楚辭·大招》「五穀六仞，設菰梁只」，王逸注：「五穀：稻、稷、麥、豆、麻也。」《大招》於五穀外明言有菰有梁，而王逸則以梁爲菰米之美稱，是亦有稷無梁。《汲冢周書》言五方之穀曰麥、黍、稻、粟、菽。粟，梁也，是爲有梁無稷。《漢書·平當傳》注如淳曰：「律：稻米一斗得酒一斗爲上尊，稷米一斗得酒一斗爲中尊，粟米一斗得酒一斗爲下尊。」稷、粟二穀，兩不相冒，亦可以爲諸經之左證矣。」其攷稷云：「《說文》：『稷，齋也，五穀之長。』」齋，稷也。案，齋重文。「林，稷之黏者。」稷，齋大名也。黏者爲林，北方謂之高梁，或謂之紅梁，通謂之林。林又謂之蜀黍，蓋標之類而高大似蘆。《月令》：「孟春行冬令，首種不入。」鄭氏注：「舊說首種謂稷。」今以北方諸穀播種先後攷之：高粱最先，粟次之，黍糜又次之，則首種者高粱也。諸穀惟高粱最高大而又先種，謂之五穀之長，不亦宜乎？《周官·食醫職》宜

稌，宜黍，宜稷，宜粱，宜麥，宜苽，見稷則不見林。《內則》「菽、麥、蕡、稻、黍、粱、林，惟所欲」，見林則不見稷。故鄭司農說九穀，稷、林並見，後鄭不從，入粱去林，以其闕粱而林重稷也。《良耜》之箋云：「豐年之時雖賤者猶食黍。」疏云：「賤者食稷耳。」今北方富室食以粟爲主，賤者食以高粱爲主，是賤者食稷，不可以冒粟爲稷也。」其攷黍云：「《說文》：『黍，禾屬而黏者也。以大暑而種，故謂之黍。』」糜，稌也。「稌，糜也。」《說文》以禾況黍，謂黍爲禾屬而黏者，非謂禾爲黍屬而不黏者也。禾屬而黏者黍，則禾屬而不黏者糜，對文異，散文則通。飯用不黏者，黏者釀酒及爲餌饗醕粥之屬，故簠簋實糜爲之以供祭祀，故異其名曰稌。黍之不黏者獨有異名，祭尚黍也；不黏者有糜與稌之名，於是黏者得專稱黍矣。《說文》糜、稌互釋，稷、齋互釋，其爲二物甚明。」程氏攷「九穀」精確不移，見載《通藝錄》中，略錄其粱、稷、黍三條，其麥、稻、菽、苽等攷不具錄。○注「五穀所以養人也」○正義曰：《說文》去部云：「育，養子使作善也。」是育即養，故以「五穀養」解「民人育」。人之有道也，飽食、煖衣、逸居而無教，則近於禽獸。聖人有憂之，使契爲司徒，教以人倫：父子有親，君臣有

義，夫婦有別，長幼有敘，朋友有信。**注**司徒

主人，教以人事。父父子子，君君臣臣，夫夫婦婦，兄弟弟弟，朋友貴信，是爲契之教也。**疏**「人之」至

「有信」○正義曰：《虞書·堯典》云：「帝曰：契，百姓不親，五品不遜，汝作司徒，敬敷五教，在寬。」此「使契爲司徒」之事也。戴氏震《孟子字義疏證》云：「人道，人倫日用，身之所行皆是也。在天地則氣化流行，生生不息，是謂道；在人物則凡生所有事，亦如氣化之不可已，是謂道。《易》曰：「一陰一陽之謂道。繼之者，善也。成之者，性也。」言有天道以有人物也。《大戴禮記》曰：「分於道謂之命，形於一謂之性。」言人物分於天道，是以不齊也。《中庸》曰：「天命之謂性，率性之謂道。」言日用事爲皆由性起，無非本於天道然也。《中庸》又曰：「君臣也，父子也，夫婦也，昆弟也，朋友之交也，五者天下之達道也。」言身之所行，舉凡日用事爲，其大經不出乎五者也。孟子稱「契爲司徒，教以人倫，父子有親，君臣有義，夫婦有別，長幼有序，朋友有信」，此即《中庸》所言「脩道之謂教」也。曰性曰道，指其實體實事之名，曰仁曰禮曰義，稱其純粹中正之名。人道本於性，而性原於天道。天地之氣化流行不已，生生不息。然而生於陸者入

水而死，生於水者離水而死；生於南者習於溫而不耐寒，生於北者習於寒而不耐溫。此資之以爲養者，彼受之以害生。天地之大德曰生，物之不以生而以殺者，豈天地之失德哉！故語道於天地，舉其實體實事而道自見，「一陰一陽之謂道」、「立天之道曰陰與陽，立地之道曰柔與剛」是也；人之心知有明闇，當其明則不失，當其闇則有差謬之失，故語道於人，人倫日用，咸道之實事，「率性之謂道」、「脩身以道」、「天下之達道五」是也。此所謂「道不可不脩」者也，「脩道以仁」及「聖人脩之以爲教」是也。其純粹中正，則所謂「立人之道曰仁與義」，所謂「中節之爲達道」是也。中節之爲達道，純粹中正，推之天下而準也。君臣父子夫婦昆弟朋友之交，五者爲達道，但舉實事而已，智仁勇以行之而後純粹中正，然而即謂之達道者，達諸天下而不可廢也。《易》言「天道」而下及「人物」，不徒曰「成之者性」，而先曰「繼之者善」，繼謂人物於天地，其善固繼承不隔者也。善者，稱其純粹中正之名；性者，指其實體實事之名。一事之善，則一事合於天，成性雖殊而其善也則一。善，其必然也；性，其自然也。歸於必然，適完其自然，此之謂自然之極致，天地人物之道於是乎盡。在天道不分言，而在人物分言之始明。《易》又曰：「仁者見之謂之仁，智者見之謂之智，百姓日用而不知，

故君子之道鮮矣。」言限於成性而後，不能盡斯道者，衆也。」程氏瑤田《通藝錄·論學小記》云：「吾學之道在有，釋氏之道在無。有父子，有君臣，有夫婦，有長幼，有朋友。父子則有親，君臣則有義，夫婦則有別，長幼則有序，朋友則有信。以有倫故盡倫，以有職故盡職。誠者，實有焉而已矣。」毛氏奇齡《四書臆言補》云：「契所教人倫，在《尚書》舊傳，極是明白。總見《春秋》文十八年傳季文子引臧文仲之言，使史克告曰：「高辛氏舉八元，使布五教於四方，父義，母慈，兄友，弟恭，子孝，謂之五教。」而杜預注云：「契作司徒，五教在寬。」是當時五倫只父母兄弟子五者，而其爲教則又與《春秋》「義方」，《大學》「慈孝」，《康誥》「友恭」相左證。《五帝紀》述五教亦無異辭。因之《虞書》「慎徽五典」，傳云：「五典者，五常之教，父義，母慈，兄友，弟恭，子孝，五者是也。」至「五品不遜」，正義謂「五品即父母兄弟子五者」，「敬敷五教」，正義謂「五教即教之義、慈、友、恭、孝五者」。漢唐儒者不以五達道爲五倫，不使《孟子》「人倫」闡入一字。孟子所言，必戰國相傳別有如此。大來曰：孟子所言「人倫」在春秋時已有之。《論語》子路曰：「長幼之節，不可廢也。君臣之義，如之何其廢之？」欲潔其身而亂大倫。」則亦以君臣、長幼爲人倫之二矣。曰：古經極重名實，猶是君臣父子諸

倫而名實不苟，偶有稱舉，必各爲區目，如《管子》稱「六親」是父、母、兄、弟、妻、子，衛石碣稱「六順」是君義、臣行、父慈、子孝、兄愛、弟敬，《王制》稱「七教」是父子、兄弟、夫婦、君臣、長幼、朋友、賓客，《禮運》稱「十義」是父慈、子孝、兄良、弟弟、夫義、婦聽、長惠、幼順、君仁、臣忠，齊晏嬰稱「十禮」是君令、臣恭、父慈、子孝、兄愛、弟敬、夫和、妻柔、姑義、婦聽，《祭統》稱「十倫」是事鬼神、君臣、父子、貴賤、親疎、爵賞、夫婦、政事、長幼、上下，《白虎通》稱「三綱六紀」是君臣、父子、夫婦、兄弟、諸父、族人、諸舅、師長、朋友。雖朝三暮四，總此物數，而十倫非十義，五道非五常，《中庸》「三德」斷非《洪範》之「三德」，則五達道必非五倫也。」按：《史記集解》引鄭氏注《堯典》云：「五品，父母兄弟子也。」又云：「五典，五教也。」蓋試以司徒之職。馬融注《堯典》云：「五教，五品之教。」王肅注云：「五品，五常也。」鄭氏自本文十八年《左傳》，以所云「五教」之目如是，乃取以爲《堯典》「五教」注耳。然史克所舉不必即爲《尚書》疏義，《書》命契，此舉八元，已不相合。如《管子·五輔》篇言「聖王飭八禮以道民」，八者，君中正無私，臣忠信不黨，父慈惠以教，子孝弟以肅，兄寬裕以誨，弟比順以敬，夫敦悫以固，妻勸勉以貞。夫然，則下不倍上，臣不殺君，賤不踰貴，少不陵長，遠不間親，新

不間舊，小不加大，淫不破義。隱公三年《左傳》石碻言「六逆」「六順」，則省「下倍上」「臣殺君」，但言「君義」「臣行」「父慈」「子孝」「兄愛」「弟敬」。惠氏棟《九經古義》云：「石碻止舉六者，爲君陳古義，倍弑之事非所宜言。又公方暱嬖人，夫婦之際，所宜深諱。」然則古人議事，原無一定，史克所說，烏知非石碻一例？孟子深於《詩》、《書》，所目「五教」，宜得其真。《禮記·樂記》云：「道五常之行。」《論衡·問孔》篇云：「五常之道，仁義禮智信也。」王肅以五常爲五品，亦不同於鄭氏。司徒五教，宜以《孟子》爲定論，未可據《左傳》以疑《孟子》也。王氏引之《經傳釋詞》云：「家大人曰：『人之有道也』，言人之爲道如此也，若言人之爲道也。『有恒產者有恒心，無恒產者無恒心。』爲、有一聲之轉。『聖人有憂之』，言聖人又憂之也。又字承上文憂洪水而言。」○注「司徒」至「教也」○正義曰：《禮記·祭法》云：「契爲司徒而民成。」民即人也。《白虎通·封公侯》篇云：「司徒主人：不言人言徒者，徒，衆也。重民衆。」趙氏所本也。趙氏前解明「人倫」爲「人事」，此「教以人事」，亦以人事解人倫也。《易·家人》《彖傳》云：「父父、子子、兄兄、弟弟、夫夫、婦婦而家道正。」《論語·顏淵》篇：「孔子對齊景公曰：君君、臣臣、父父、子子。」《家人》專以門內言之，故不及君臣朋

友；①對齊景切其時事，故僅舉君臣、父子，亦立言各有其當。乃《序卦傳》云：「有夫婦而後有父子，有父子而後有君臣。」《兌》《象傳》言「朋友講習」，則君臣、夫婦、朋友與父子、兄弟五者，自不可缺一，故趙氏合《易》、《論語》而言父父、子子、君君、臣臣、夫夫、婦婦、兄兄、弟弟，又益以「朋友貴信」也。是爲契之所教，則五教之中不得偏指父子、兄弟而缺君臣、夫婦、朋友矣。放勳日勞之來之，匡之直之，輔之翼之，使自得其，又從而振德之。**注**放勳，堯號也。遭水災，恐其小民放辟邪侈，故勞來之，匡正直其曲心，使自得其本善性，然後又復從而振其羸窮，加德惠也。**疏**「放勳日」○正義曰：臧氏琳《經義雜記》云：「孫宣公《音義》引丁音日音駟，或作曰，誤也。按，趙注云云，意不以爲堯之言，則今讀日爲越者，誤。自上文「當堯之時天下猶未平」至此，皆敘事之辭也。蓋曰、日二字形近易譌，唐石經日字皆作曰，《釋文》於曰字每加音別之，亦有不能別而具越、實兩音者。無識者橫取此「勞之來之」以下竄入《尚書》「敬敷五教在寬」之後，妄甚。」按：孔

①「臣」，原誤作「原」，今據經解本改。

本作「放勳日」，與《音義》同，他本俱作曰。作日是也。言既命益、禹、稷、契而不自已也，日日勞來，匡直輔翼，所以然者，使自得之也而未已也，又從而振德之。日字與又字相應，與《大學》「日日新又日新」同。下云「聖人之憂民如此」緊承此數語。不然，徒使益、禹等勤勞，放勳轉有暇矣。「而暇耕乎」四字正從「日」字一貫。○注「放勳堯號也」○正義曰：閻氏若璩《釋地》又續云：「古帝王有名有號，如堯、舜、禹，其名也；放勳、重華、文命，皆其號也。」《孟子》引古《堯典》曰「放勳乃殂落」，許氏《說文》正同。《屈原賦》二十五篇最近古，《離騷》云「就重華而陳詞」，《九章·涉江》云「吾與重華遊乎瑤之圃」，《懷沙》云「重華不可悟兮」，重華凡三見，皆實謂舜，豈本史臣贊舜之詞，屈子因以為舜號乎？江氏聲《尚書集注音疏》云：「《大戴禮·帝系》篇云：『少典產軒轅，是為黃帝。』又『昌意產高陽，是為帝顓頊』。又『蟠極產高辛，是為帝嚳。帝嚳產放勳，是為帝堯。』是放勳與軒轅、高陽等同稱也。」《漢書·古今人表》云黃帝軒轅氏，帝顓頊高陽氏，《左傳》亦稱高陽氏、高辛氏，軒轅、高陽等既皆是氏，則放勳當同。」按：古之稱氏，如宓犧氏、神農氏、女媧氏、共工氏、夏后氏，是其號，如斟灌氏、斟尋氏，皆國號而係以氏。以軒轅、高陽例之，放勳之為號信矣。《堯典》稱

「允子朱」，稱「鯀」，皆名，其云「有鰥在下曰虞舜」，鄭氏注云「虞氏舜名」，是也。《史記·五帝本紀》云：「黃帝者，名曰軒轅。虞舜者，名曰重華。夏禹，名曰文命。」名號通稱。《淮南子·原道訓》云「則名實同居」，高誘注云：「勢位爵號之名也。」《周書·謚法解》云「大行受大名，細行受細名」，注云：「名謂號謚。」是也。○注「遭水」至「惠也」○正義曰：趙氏讀「放勳日」，故如是解也。遭水災，民為不善，故堯勞來之，不罰責之也。王氏念孫《廣雅疏證》云：「《說文》：「勅，勞勅也。」《爾雅》：「勞，來，勑也。」《大雅·下武》篇「昭茲來許」，鄭箋云：「來，勑也。」《史記·周紀》武王曰「日夜勞來，定我西土」，《墨子·尚賢》篇云「垂其股肱之力而不相勞來」，皆謂勑也。《孟子·滕文公》篇「放勳日勞之來之」，亦謂聖人之勑民也。」又云：「輕，盤也。戾與盤通。《說文》：「輕，車戾也。」字通作匡。《攷工記·輪人》：「則輪雖敝不匡」，鄭衆注云：「匡，枉也。」枉亦匡也，《說文》云：「獸皮之韋，可以束枉戾相違背。」是也。《管子·輕重甲》篇云：「弓弩多匡輕者。」枉謂之匡，故正枉亦謂之匡，《孟子·

①「惠」，原作「德」，合於宋十行、閩、監、毛等本，今據本書及阮校所述廖、孔、韓等本注文改。

滕文公篇云：「匡之直之。」義有相反而實相因者，皆此類也。趙氏以「正」釋「匡」。「匡，正也」，《爾雅·釋言》文。「直其曲心」，則匡爲正其邪心也。人性本善，遭水災則心曲而不直，邪而不正，放勳不憚其勤而匡之直之，使有以開牖其蒙而復歸於善焉。「匡正」而必申以「使自得」者，此聖人無爲而治，無一日息其勤民之念，實無一日見其勤民之迹，通其變使民不倦，神而化之使民宜之，所以匡之直之者，如有所爲使自得之也。《大戴記·子張問人官》篇云：「枉而直之，使自得之。」孟氏所本歟？《呂氏春秋·季春紀》：「振乏絕」，高誘注云：「振，救也。」昭公十四年《傳》云：「分貧振窮」，此振義同。「窮」即乏絕貧窮也。《呂氏春秋·報恩》篇云：「張儀所德於天下者」，高誘注云：「德猶恩也。」《論語·憲問》篇云：「何以報德」，注云：「德，恩惠之德也。」又從而振救其窮而加以恩德，皆孟子稱述放勳勤民之事也。阮氏元《校勘記》云：「堯號也」，廖本，《攷文》古本號作名。「遭水災恐其小民放僻邪侈」，宋本恐作愆。閩、監、毛三本「災恐」作「逆行」。「聖人之憂民如此，而暇耕乎？」**注**重喻陳相。

「堯以不得舜爲己憂，舜以不得禹、皋陶

爲己憂。夫以百畝之不易爲己憂者，農夫也。分人以財謂之惠，教人以善謂之忠，爲天下得人者謂之仁。**注**言聖人以不得賢聖之臣爲己憂，農夫以百畝不易治爲己憂。**疏**「舜以不得禹皋陶爲己憂」○正義曰：《大戴禮·主言》篇云：「昔者舜左禹而右皋陶，不下席而天下治。」孟子本曾子之言，故於舜所得賢聖之臣，舉禹、皋陶也。○注「農夫以不易治爲己憂」○正義曰：《毛詩·甫田》「禾易長畝」，傳云：「易，治也。」故以「治」釋「易」。是故以天下與人易，爲天下得人難。**注**爲天下求能治天下者難得也，故言以天下傳與人尚爲易也。孔子曰：「大哉，堯之爲君！惟天爲大，惟堯則之，蕩蕩乎民無能名焉。君哉，舜也！巍巍乎有天下而不與焉。」堯舜之治天下，豈無所用其心哉？亦不用於耕耳。**注**天道蕩蕩乎大無私，生萬物而不知其所由來。堯法天，故民無能名堯德者也。舜得人君之道哉！德盛乎，巍巍乎有天下之位，雖貴盛

不能與益。舜巍巍之德，言德之大，大於天子位也。堯舜蕩蕩、巍巍如此，但不用心於躬自耕也。

疏注

「天道」至「耕也」○正義曰：引孔子之言見《論語·泰伯》第八。其云「巍巍乎舜禹之有天下也而不與焉」，與此小異。《集解》引包云：「蕩蕩，廣遠之稱。」廣遠亦大也。所以大者以其無私，故趙氏既以「大」釋「蕩蕩」，又以「無私」申大之義也。《方言》云：「巍，高也。」《楚辭·遠遊》「貌揭揭以巍巍」，注云：「巍巍，大貌。」高、大亦盛，故趙氏以「盛」釋之。《禮記·射義》云「與爲人後者」，注云：「與猶奇也。」《儀禮·士昏禮記》「我與在」，注云：「與猶兼也。」奇、兼皆加多之義，故以「益」釋「與」。《音義》出「不與」，云：「下音預，又如字。」如字則讀「與之庾」「與之釜」之與，有所施於人，亦有所滋益於人也。《周書·謚法解》云：「民無能名曰神。」孟子言「聖而不可知之謂神」，「殺之而不怨，利之而不庸，民日遷善而不知爲之者，故君子所過者化，所存者神」。不可知，故無能名；無爲而治，故不可知。《論語》：「爲政以德，譬如北辰，居其所而衆星共之。」包氏注云：「德者無爲。」天以寒暑日月運行為道，聖人以元亨利貞運行為德，用中而不執一，故無爲。民運行於聖人之元亨利貞，猶衆星運行於天

之寒暑日月，故黃帝堯舜承伏羲神農之後，以通變神化立萬世治天下之法。《論語》凡言堯舜，皆發明之也。孟子述孔子之言而申明之云「豈無所用心哉」，蓋惟恐說者誤以「民無能名」「有天下而不與」爲屏棄一切，無所用心。蓋堯舜之「無爲」，正堯舜之「用心」。曰「爲政以德」，曰「恭己正南面」，曰「脩己以敬」，曰「使民不倦」，曰「使民宜之」，非用心，何以爲德？何以爲恭爲敬？何以能使民不倦，使民宜之？故堯舜治天下，非不以政不以法，其政逸而心以運之則勞，其法疏而心以聯之則密。非運以心，聯以心，不能「無爲而治」，即不能「民無能名」，亦即不能「有天下而不與」，是爲「爲政以德」。執其兩端，用其中於民，此堯舜所以通變神化，此堯舜之「用其心」也。「用心」即「勞心」，勞心如此，何能勞力以躬耕乎？

「吾聞用夏變夷者，未聞變於夷者也。」

注當以諸夏之禮義化變夷蠻之人耳，未聞變化於夷蠻之人，則其道也。**疏**注「則其道也」○正義曰：則，法

也。謂效法夷蠻之道。閩、監、毛三本作「同其道」。陳

良，楚產也，悅周公仲尼之道，北學於中國。北方之學者未能或之先也。彼，所謂豪傑之

士也。子之兄弟事之數十年，師死而遂倍之！

注陳良生於楚，北游中國，學者不能有先之者也，可謂豪傑過人之士也。子之兄弟，謂陳相、陳辛也。數十年師事陳良，良死而倍之，更學於許行。非之也。

疏「師死而遂倍之」○正義曰：《音義》出「倍之」，云：「丁云：『義當作倍，古字借用耳。』」下「子倍」同。

按：《荀子·大略》篇云：「教而不稱師，謂之倍。」《禮記·大學》云：「而民不信」，注云：「倍，或作倍。」劉熙《釋名·釋形體》云：「背，倍也。在後稱也。」《楚辭·招魂》云：「工祝招君，背行先些」，注亦云：「背，倍也。」倍、背、倍三字通。倍字見《禮記·坊記》。昔者孔子沒，三年之外，門

人治任將歸，人揖於子貢，相嚮而哭，皆失聲，然後歸。子貢反築室於場，獨居三年，然後歸。

注任，擔也。失聲，悲不能成聲。場，孔子冢上祭祀壇場也。子貢獨於場左右築室復三年，「慎終追遠」也。

疏注「任擔也」○正義曰：《毛詩·大雅·生民》篇云「是任是負」，箋云：「抱負以歸。」《國語·齊語》云「負任儋何，服牛輶馬，以周四方」，注云：「背曰負，肩

曰儋。任，抱也。何，揭也。」《毛詩·小雅》「我任我輦，我車我牛」，傳云：「任者，輦者，車者，牛者。」箋云：「有負任者，有輦輦者，有將車者，有輦傍牛者。」《淮南子·道應訓》云：

「甯越欲干齊桓公，困窮無以自達，於是為商旅，將任車以商於齊。」高誘注云：「任，載也。」按：婦人懷子為任子，《禮記·樂記》注云：「孕，任也。」《郊特牲》注云：「孕，任子也。」孕懷抱在前，則任之為抱，其本義也。因而擔於肩者，

載於車者，通謂之任，散言之則通也。○注「失聲悲不能成聲」○正義曰：《方言》云：「自關而西秦晉之間，凡大人小兒泣而不止謂之噉，哭極音絕，亦謂之噉，平原謂啼極無聲謂之噉。」哭極音絕，啼極無聲，此趙氏所云「悲不能成聲」也。按：失亦與佚通，佚之言放，「失聲」或亦謂「放聲」也。

《禮記·檀弓》云：「文伯卒，朋友諸臣未有出涕者，而內人皆哭失聲。」此失聲正謂放聲。《太平御覽》引《漢名臣奏》云：「王莽斥出王閔，太后憐之，閔伏泣失聲，太后親自以手巾拭閔泣。」此言先伏地而泣，繼而至於放聲也。○注「場孔」至「三年」○正義曰：《爾雅·釋宮》云：「場，道也。」《說文》土部云：「場，祭神道也。」《國語·楚語》云「壇場之所」，

注云：「除地曰場。」蓋於冢墓之南，築地使平坦以為祭祀，揚子《法言》謂之「靈場」，《說文》謂之「祭神道也」，後人樹碑

於此，謂之神道碑。神道在冢前，未可當正中而室，故知在偏左偏右，猶倚廬、聖室之偏倚東壁也。《毛詩·周頌》「福祿來反」，傳云：「反，復也。」趙氏以「復」釋「反」，故云「復三年」，讀「子貢反築室於場」爲一句，「反」字連「築室」也。閻氏若璩《釋地續》云：「反云者，子貢送諸弟子各歸去，已獨還次於墓所。或曰反，復也。」他日，子夏、子張、子游以有若似聖人，欲以所事孔子事之。彊曾子，曾子曰：「不可。」江漢以濯之，秋陽以暴之，皜皜乎不可尚已！**注**有若之貌似孔子，此三子者思孔子而不可復見，故欲尊有若以作聖人，朝夕奉事之，如事孔子，以慰思也。曾子不肯，以爲聖人之潔白如濯之江漢，暴之秋陽。秋陽，周之秋，夏五六月，盛陽也。皜皜，甚白也。何可尚？而乃欲以有若之質放聖人之坐席乎？尊師道，故不肯。

疏注「有若」至「孔子」○正義曰：《史記·仲尼弟子列傳》云：「孔子既沒，弟子思慕，有若狀似孔子，弟子相與共立爲師，師之如夫子時也。」趙氏所本也。《禮記·檀弓》云：「子游曰：『甚哉，有子之言似夫子也！』」然則有子之似夫子，

不特狀貌然矣。○注「秋陽」至「陽也」○正義曰：段氏玉裁《說文解字注》云：「暘，日出也。《洪範》「八庶徵，日雨日暘」，某氏傳云：「雨以潤物，暘以乾物。」《祭義》「夏后氏祭其間，殷人祭其陽，周人祭日，以朝及闇」，鄭云：「闇，昏時也。陽讀爲「日雨日暘」之暘，謂日中時也。朝，日出時也。」暘之義當從鄭。《孟子》「秋陽以暴之」亦當作「秋暘」。周正建子，改時改月，故周之秋乃夏之夏，周之七八月乃夏之五六月，又當日中，最能乾物。《文選》注引綦母邃《孟子注》云：「周之秋，於夏爲盛陽也。」亦仍趙氏也。○注「皜皜甚白也」○正義曰：王氏念孫《廣雅疏證》云：「《釋訓》：「皜皜，白也。」《漢書·司馬相如傳》云：「皜然白首。」皜與皜同，字又作皜，重言之則曰皜皜。」又云：「皜之言皎皎也。《說文》：「皜，明也。」《衛風·伯兮》篇：「皜皜出日。」《管子·內業》篇云：「皜乎如登乎天。」《孟子·滕文公》篇「皜皜乎不可尚已」，趙氏注云：「皜皜，甚白也。」義與皜相近。」毛氏奇齡《四書索解》云：「江漢以濯之，秋陽以暴之」，從來訓作潔白。夫道德無言潔白者，惟志行分清濁，則有是名。故夫子稱「丈人欲潔其身」，孟子稱「西子蒙不潔」，又稱狷者爲「不屑不潔之士」，司馬遷稱屈原「其志潔」，大抵獨行自好者始有高潔之目，此非聖德也。夫子自云「不曰白乎」，

涅而不淄」。祇以不爲物污，與《屈原傳》之「皜然泥而不滓」語同。豈有曾子擬夫子，反不若子貢之「如天如日」，宰我之「超堯越舜」，而僅云「潔白」，非其旨矣。況潔白二字，曾見之《詩序》《白華》，孝子之潔白，此但以物言，並不以德言也。」按：毛氏說是也。《列子·湯問》篇云「皜然疑乎雪」，《釋文》云：「皜，又作皓。」《文選·李少卿與蘇武詩》云「皓首以爲期」，注云：「皓與顙，古字通。」《說文》頁部云：「顙，白兒。《楚詞》曰：『天白顙顙。』」皜皜即是顙顙。《爾雅·釋天》云：「夏爲昊天。」劉熙《釋名·釋天》云：「其氣布散皜皜也。」然則皜皜謂孔子盛德如天之元氣皜皜。尚即上也，「不可上」即子貢云「猶天之不可階而升也」。以此推之「江漢以濯之」，以江漢比夫子也；「秋陽以暴之」，以秋陽比夫子也。「皜皜乎不可上」，以天比夫子也。同一水，池沼可濯也，不能及江漢之濯也；同一火，燂燎可暴也，不能及秋陽之暴也。乃以江漢擬之猶未足也，以秋陽擬之猶未盡也，其如天之皜皜不可上矣，此曾子之推崇比擬尤逾於宰我、子貢也。徒以爲潔白，良非矣。○注「放聖」至「席乎」○正義曰：《史記·仲尼弟子列傳》云：「他日弟子進問曰：『云云，有若默然無以應。弟子起曰：『有子避之，此非子之座也。』』趙氏意本此。阮氏元《校勘記》云：『於聖人之坐席

乎」，閩、監、毛三本同。廖本、孔本、韓本、《攷文》古本於作放。《音義》出「質放」。放是也。放者，今之倣字。今也南蠻馱舌之人，非先王之道。子倍子之師而學之，亦異於曾子矣。吾聞出於幽谷遷于喬木者，未聞下喬木而人於幽谷者。注今此許行乃南楚蠻夷，其舌之惡如馱鳥耳。馱，博勞也。《詩》云「七月鳴馱」，應陰而殺物者也。許子托於太古，非先聖王堯舜之道，不務仁義而欲使君臣並耕，傷害道德，惡如馱舌，與曾子之心亦異遠也。人當出深谷，上喬木，今子反下喬木，入深谷。疏注「其舌」至「物者也」○正義曰：《爾雅·釋鳥》云：「鶡，伯勞也。」引《詩》在《豳風·七月》篇第二章，亦云「七月鳴鶡」。《禮記·月令》云：「仲夏之月，鶡始鳴。」《大戴禮·夏小正》云：「五月馱則鳴。馱者，百鶡也。」百鶡即伯勞，是鶡通作馱，故趙氏以「馱」爲「博勞」。鄭氏《月令》注亦云：「鶡，博勞也。」高誘注《呂氏春秋·仲夏紀》云：「鶡，伯勞也。是月，陰作於下，陽發於上，伯勞夏至後，應陰而殺蛇，磔之於棘而鳴其上。」注《淮南·時則訓》云：「五月，陰氣生於下，

伯勞夏至應陰而鳴。「伯勞即博勞，伯、博一聲之轉也。《幽風》獨云七月者，王肅謂古五字如七，則《詩》亦本是五月鳴鵙。鄭氏謂「幽地晚寒」，幽極西北，寒當早於中國，晚寒之說恐未然也。曹植《惡鳥論》云：「伯勞以五月鳴，應陰氣而動。陽爲生仁養，陰爲殺殘賊。伯勞蓋賊害之鳥也。」趙氏謂許子「傷害道德，惡如缺舌」，正以缺應陰氣而鳴，鳴則傷害天地之生氣。堯舜仁義之道，亦天地之生氣也。許子以並耕之說害之，故惡如伯勞之舌，非謂其聲之嘵嘵噪也。《禮記·王制》云：「南方曰蠻。」許行楚人，故稱「南蠻」。趙氏明以「夷」釋「蠻」，非謂其音之蠻與缺舌同也。南蠻不皆缺舌，缺舌不必南蠻。南蠻言其地，缺舌言其賊害也。○注「與曾子」至「入深谷」○正義曰：《說文》異部云：「異，分也。」《呂氏春秋·知接》篇「願君之遠易牙」，高誘注云：「遠猶疏也。」《淮南子·道應訓》「襄子疏隊而擊之」，高誘注云：「疏，分也。」以是通之，則異有遠義，故以「遠」釋「異」。孟子謂陳相之倍陳良而從許行，異於曾子之尊孔子而不事有若。趙氏注「惡如缺舌」以上斥許行，「與曾子之心亦遠異也」貫下斥陳相。《爾雅·釋言》云：「幽，深也。」故解「幽谷」爲「深谷」。下云「下喬木」，則「遷」是「上喬木」矣。俗本作「止喬木」，非是。《魯頌》曰：「戎狄是膺，荆舒

是懲。」周公方且膺之，子是之學，亦爲不善變矣。」**注**《詩》、《魯頌·閟宮》之篇也。膺，擊也；懲，艾也。周家時擊戎狄之不善者，懲止荆、舒之人，使不敢侵陵也。周公常欲擊之，言南夷之人難用，而子反悅是人而學其道，亦爲不善變更矣。孟子究陳此者，深以責陳相也。**疏**注「詩魯」至「相也」○

正義曰：引詩在《魯頌·閟宮》第三章。毛傳云：「膺，當也。」箋云：「懲，艾也。」《爾雅·釋詁》云：「應，當也。」毛氏讀膺爲應，故以當訓之。《史記·建元以來侯者年表》引作「戎狄是應」。**②**《音義》出「膺擊」，云：「丁本作應，云：

「按，古訓應訓當，此注訓擊，蓋以當對是擊敵之義，故轉訓耳。」《呂氏春秋·察微》篇「宋華元帥師應之大棘」，又《處方》篇「荆令唐蔑將而應之」，高誘注並云：「應，擊也。」《淮南子·主術訓》云「不使應敵」，高誘注云：「應猶擊也。」是應有擊義，趙氏亦讀膺爲應矣。《國策·齊策》云「車聲擊」，注云：「擊，相當。」是當與擊義亦相近。下文「周公方且膺

① 「詰」，原誤作「詩」，今據《爾雅》改。

② 「年」，原誤作「王」，今從沈本據《史記》改。

之，不可云「方且當之」，故以「擊」釋之也。《毛詩·小雅·沔水》篇「寧莫之懲」，傳云：「懲，止也。」趙氏既釋以「艾」，又釋以「止」，明艾之即所以止之。《禮記·內則》云「方物出謀發慮」，注云：「方猶常也。」故以「常」釋「方」。鄭氏以此爲僖公與齊桓舉義兵之事。閻氏若璩《釋地》又續云：「《左氏》僖十三年秋，爲戎難故，諸侯戍周，齊仲孫湫致之。十六年秋，王以戎難告於齊，齊徵諸侯而戍周。齊桓舉義兵，僖公無役不從，況勤王戍周尤爲第一義，豈有兩諸侯無魯在其中者？」周氏柄中《辨正》云：「《春秋》宣八年楚滅舒蓼，成十七年滅舒庸，襄二十五年滅舒鳩。當僖公從齊桓伐楚時，舒尚未滅。正義云：「舒，楚之與國，故連言荆、舒。」此說得之。」翟氏灝《攷異》云：「《詩序》云：「閟宮」，頌僖公能復周公之宇也。」首二章止陳姜嫄、后稷、太王、文武之勳。三章言成王封魯，魯子孫率由不愆，祭則受福。「戎狄是膺，荆舒是懲」，第四章文也。上三章未暇序及周公，所云「周公之宇」者，非於此章頌之而孰頌哉？故自「公車千乘」至「莫我敢承」皆周公而不屬僖公也。「俾爾昌而熾，俾爾壽而富」，周公俾之也。五章六章，繼周公而頌伯禽，所謂「淮夷來同，遂荒徐宅」，顯係伯禽事，見諸《尚書·費誓》者也。七章八章，方頌僖公復宇。如此說之，則《詩》、《書》、《春秋》、《孟

子》彼此悉無疑義，而《詩》簡亦未嘗有錯。孟子兩引此文，皆確指爲周公，必有自聖門授受師說，不得以漢儒箋注之訛反疑孟子。「子是之學」，子字一頓，是指許行，故云「子反悅是人而學其道」。「反悅」者，應上「方且」之詞也。

「從許子之道，則市賈不貳，國中無僞。」

雖使五尺之童適市，莫之或欺。布帛長短同則賈相若，麻縷絲絮輕重同則賈相若，五穀多寡同則賈相若，履大小同則賈相若。」**注**陳

相復爲孟子言此。如使從許子淳樸之道，可使市無二賈，不相僞誕，不相欺愚小也。長短謂丈尺，輕重謂斤兩，多寡謂斗石，大小謂尺寸，皆言其同賈，故曰「無二賈」者也。**疏**注「可使市無二賈」○正義曰：《禮

記·王制》「喪事不貳」，注云：「貳之言二也。」故經言「市價不貳」，趙氏云「無二賈」也。閩、監、毛三本賈作價。○注

「不相僞誕」○正義曰：《說文》人部云：「僞，詐也。」趙氏注

《萬章》篇「然則舜僞喜者與」亦云：「僞，詐也。」《淮南子·

本經訓》「其心愉而不僞」，高誘注云：「僞，虛詐也。」詐兼以

虛，《國語·楚語》「是言誕也」，注云：「誕，虛也。」《呂氏春

秋·應言》篇云「令許綰誕魏王」，高誘注云：「誕，詐也。」故

趙氏此注以「誕」釋「偽」。閩、監、毛本作「偽詐」，義同；十行本作「爲詐」，爲即偽也。○注「不相欺愚小也」○正義曰：閩、監、毛三本作「不相欺愚小大」，阮氏元《校勘記》云：「孔本、韓本作『不欺愚小民也』，《考文》《古本作『不相欺愚小也』。愚小謂五尺之童也，《考文》《古本得之。」○注「大小謂尺寸」○正義曰：布帛長至數丈，故云「丈尺」；屨大極尺，無至丈者，故云「尺寸」。曰：「夫物之不齊，物之情也。或相倍蓰，或相什百，或相千萬，子比而同之，是亂天下也。巨屨小屨同賈，人豈爲之哉？從許子之道，相率而爲僞者也，惡能治國家？」**注**孟子曰：夫萬物好醜異賈，精粗異功，其不齊同，乃物之情性也。蓰，五倍也；什，十倍也。至於千萬相倍。譬若和氏之璧雖與凡玉之璧尺寸厚薄適等，其賈豈可同哉？子欲以大小相比而同之，則使天下有爭亂之道也。巨，粗屨也；小，細屨也。如使同賈而賣之，人豈肯作其細者哉？時許子教人僞者耳，安能治國家者也？**疏**

注「其不齊同乃物之情性也」○正義曰：《楚辭·雲中君》

「與日月兮齊光」，注云：「齊，同也。」是「不齊」即「不同」也。《呂氏春秋·上德》篇「此之謂順情」，《淮南子·本經訓》「人愛其情」，高誘注並云：「情，性也。」性，情有陰陽之分而實一貫。《荀子·正名》篇云：「性之好惡喜怒哀樂謂之情。」《易·文言傳》云：「利貞者，性情也。」亦性情並稱。故趙氏以「性」釋「情」。長短、輕重、多寡、大小，此形也；形同而情或不同，則好醜、精粗是也。○注「蓰五倍也什十倍也」○正義曰：《音義》出「倍蓰」，云：「丁音師，云『從竹下徙』。《開元禮文字音義》曰：『倍謂半倍而益之。』又音麗，山綺切。《史記》作「倍灑」，徐廣云：「一作五倍曰蓰。」按，倍爲半倍而益者，即一倍也。如本有三，倍之爲六，得六而三爲半矣。主原數則益數爲倍，主益數則原數爲半，故云「半倍而益之。」「徙」字《說文》所無。「竹下徙」《說文》訓「筵簞，竹器也。所綺切」。丁音師，則宜是簞。《說文》竹器可以取麤去細，簞亦通蓰也。蓰通簞，故亦作灑。《爾雅·釋樂》「大瑟謂之灑，大琴謂之離」，離亦麗也。麗者，連也。蓋五弦相麗則離也，由琴之五弦，五倍之爲二十五弦而爲灑。以其數五五而稱灑，故凡五倍即通稱爲灑。灑通簞，又通於蓰，蓰則傳寫之譌也。《周書·大聚》篇云：「十夫爲什。」《管子·立政》篇云：「十家爲什。」由一夫一家數之，皆十倍也。○注

「譬若和氏」至「同哉」○正義曰：《史記·藺相如傳》云：「趙惠文王時得和氏璧，秦昭王聞之，使人遺趙王書，願以十五城請易璧。」璧之尺寸等耳，此璧值十五城，不已千萬相倍乎？○注「則使天下有爭亂之道也」○正義曰：《大戴禮記·曾子事父母》篇云：「爭辨者，作亂之所由興也。」故以「爭」釋「亂」。○注「巨粗屨也小細屨也」○正義曰：《呂氏春秋·蕩兵》篇云「有巨有微而已矣」，高誘注云：「巨，櫛略也。」櫛同粗，即麤字。《淮南子·主術訓》云「而枹鼓爲小」，高誘注云：「小，細也。」《漢書·揚雄傳》《集注》引應劭云：「精，細也。」《禮記·樂記》云「凝是精粗之體」，注云：「精粗謂萬物大小也。」是「精粗」通謂之「大小」。巨爲大，即爲麤也；小爲精，即爲細也。粗疏易成，細巧功密，此物情之迥異。許子屨大小以形論，此巨小以情論。治國家以情不以形，此堯舜所以用心而通變神化也，豈特一屨之微哉！

章指：言神農務本，教於凡民；許行蔽道，同之君臣。陳相倍師，降於幽谷，不理萬情，謂之敦樸。是以孟子博陳堯舜上下之敘以匡之也。

疏「神農務本」○正義曰：《呂

氏春秋·上農》篇云：「古先聖王之所以導其民者，先務

於農。民農非徒爲地利也，貴其志也。民農則樸，樸則易用。」又云：「民舍本而事末則不令，后稷曰：『所以務耕織者，以爲本教也。』」○「不理萬情謂之敦樸」○正義曰：萬，《攷文》古本作万，足利本、韓本作「物情」。敦樸者，老子云：「敦兮其若樸。」趙氏所本也。《攷文》引足利本作「淳樸」。敦通純，純亦通淳也。○「博陳堯舜上下之敘以匡之」○正義曰：《漢書·藝文志》云：「農家者流，及鄙者爲之，以爲無所事聖王，欲使君臣並耕，諄上下之序。」又云：「儒家者流，祖述堯舜。」君臣並耕，即所爲「同之君臣」也。①諄亂上下之敘，故以「上下之敘」匡正之。

墨者夷之因徐辟而求見孟子。**注**夷之，

治墨家之道者；徐辟，孟子弟子也。求見孟子，欲以辯道也。

疏注「夷之治墨家之道者」○正義曰：《漢

書·藝文志》云：「墨家者流，蓋出於清廟之守。茅屋采椽，是以貴儉；養三老五更，是以兼愛；選士大射，是以上賢；

①「爲」，沈校據文義改作「謂」。

宗祀嚴父，是以右鬼，順四時而行，是以非命，以孝視天下，是以上同：此其所長也。及蔽者爲之，見儉之利，因以非禮，推兼愛之意，而不知別親疏。」共六家：《尹佚》二篇、《田俅子》三篇、《我子》一篇、《隨巢子》六篇、《胡非子》三篇、《墨子》七十一篇。隨巢、胡非皆墨翟弟子，我子爲墨子之學。《韓非子·顯學》篇云：「自墨子之死也，有相里氏之墨，有相夫氏之墨，有鄧陵氏之墨。儒分爲八，墨分爲三。」《呂氏春秋》墨者有鉅子腹綽居秦，又墨者鉅子孟勝，又東方之墨者謝子。《淮南子》墨者有田鳩者。田鳩亦見《韓非子》。馬氏驢《釋史》云：「田鳩蓋即田俅子。」《論衡》「墨家之役纏子」。皆所謂「墨者」也。孟子曰：「吾固願見，今吾尚病。病愈，我且往見。」**注**我常願見之，今值我病，不能見也，病愈將自往見。以辭卻之。夷子不來。他日，又求見孟子。**注**是日夷子聞孟子病，故不來，他日復往求見。**疏**「夷子不來」○正義曰：趙氏以「夷子不來」是記其實事，近時通解謂亦孟子言，謂我病愈，往見夷子，夷子不必來。王氏引之《經傳釋詞》云：「不，毋也，勿也。言我將往見夷子，夷子勿來也。」孟子曰：「吾今則可以見矣。不直，則道

不見。我且直之。」**注**告徐子曰：今我可以見夷子矣。不直言攻之，則儒家聖道不見。我且欲直攻之也。吾聞夷子墨者。墨之治喪也，以薄爲其道也。夷子思以易天下，豈以爲非是而不貴也？然而夷子葬其親厚，則是以所賤事親也。」**注**我聞夷子爲墨道。墨者治喪貴薄而賤厚，夷子思欲以此道易天下之化使從己，豈肯以薄爲非是而不貴之也？如使夷子葬其父母厚也，是以所賤之道奉其親也；如其薄也，下言「上世不葬」者又可鄙，足爲戒也。吾欲以此攻之也。**疏**「墨之治喪以薄爲其道也」○正義曰：《墨子》有《節葬》二篇，上中亡，下篇尚存。其言云：「古聖王治爲葬埋之法，曰棺三寸，足以朽體，衣衾三領，足以覆惡。以及其葬也，下毋及泉，上毋通臭。壘若參畊之畝，則止矣。」此以薄爲道也。孫氏星衍《墨子後序》云：「其節葬，亦禹法也。《尸子》稱禹之喪法：死於陵者葬於陵，死於澤者葬於澤，桐棺三寸，制喪三月。見《後漢書》注。《韓非子·顯學》稱墨者之葬也，冬日冬服，夏日夏服，桐棺三寸，服喪三月。然則三月之喪，夏有

是制，墨始法之矣。」汪氏中《述學》云：「古者喪期無數。黃帝堯舜垂衣裳而天下治，則五服精粗之制立矣。放勳殂落，百姓如喪考妣，其可見者也。夏后氏三年之喪，既殯而致事，則禹之爲父三年矣。禹崩，三年之喪畢，益避禹之子於箕山之陰，則夏之爲君三年矣。《土喪禮》自小斂奠，朔月半薦，遣奠，大遣奠，皆用夏祝。使夏后氏制喪三月，祝豈能習其禮以贊周人三年之喪哉？若夫「陵死陵葬，澤死澤葬」，此爲天下大水不能具禮者言之，荒政殺哀，周何嘗不因於夏禮以聚萬民哉？墨子者，蓋學焉而自爲其道者也。故其節葬曰：「聖王制爲節葬之法。」又曰：「墨子制爲節葬之法。」則謂墨子自製者是也。故曰「墨子之治喪，以薄爲其道」也。」○「然而夷子葬其親厚」○正義曰：趙氏「如使」云云，則是說辭。近時通解以「夷子葬其親厚」乃是夷子實事，孟子因其有此實事，異乎墨子之道，故直指爲「以所賤事親」，攻其隙所以激發其性也。此說爲得。

徐子以告夷子。夷子曰：「儒者之道，古之人『若保赤子』，此言何謂也？之則以爲愛無差等，施由親始。」**注**之，夷子名也。言儒家曰：「古之治民若安赤子。」此何謂乎？之以

爲當同其恩愛，無有差次等級相殊也，但施愛之事先從己親屬始耳。若此，何爲獨非墨道也？**疏**注

「若安赤子」○正義曰：「若保赤子」，《周書·康誥》文。《毛詩·魏風》「他人是保」，傳云：「保，安也。」故以「安」釋「保」。○注「之以爲」至「始耳」○正義曰：《毛詩·鸛鳴》篇云「恩斯勤斯」，傳云：「恩，愛也。」是「愛」即「恩」也。《廣雅·釋詁》云：「差，次也。」《呂氏春秋·召類》篇「土階三等」，高誘注云：「等，級也。」《禮記·樂記》「然後立之樂等」，注云：「等，差也。」是差、等二字義同。有階級即有次第也。《國語·晉語》「夫齊侯好示務施」，注云：「施，惠也。」《周書·謚法解》云：「惠，愛也。」《爾雅·釋詁》同。故趙氏以「愛」釋「施」，恩、施、愛三字義通。「愛無差等」即「施無差等」，「施由親始」即「愛由親始」。孔本、韓本作「施厚之事」。徐子以告孟子。孟子曰：「夫夷子信以爲人之親其兄之子爲若親其鄰之赤子乎？彼有取爾也。赤子匍匐將入井，非赤子之罪也。」**注**親，愛也。夫夷子以爲人愛兄子與愛鄰人之子等邪？彼取赤子將入井，雖他人子亦

愛救之，^①謂之愛同也。但以赤子無知，非其罪惡，故救之耳。夷子必以此況之，未盡達人情者也。

疏

「赤子」至「罪也」○正義曰：江氏聲《尚書集注音疏》云：

「赤子無知，或觸陷於死地，惟在保之者安全之，小民亦猶是也。保民如保赤子，則民其安治矣。《孟子·滕文公》篇墨者夷之求見孟子，稱儒者之道，古之人「若保赤子」，以為「愛無差等，施由親始」。孟子解之曰：「彼有取爾也。赤子匍匐將入井，非赤子之罪也。」詳孟子之意，謂愚民無知，與赤子同其或入於刑辟，猶赤子之入井，非其罪也。保赤子者必能扶持防護之，使不至於入井，保民者當明其政教以教道之，使不陷於罪戾，是之謂「若保赤子」。此孟子說《書》之意。」○注「親愛也」○正義曰：《論語》：「樊遲問仁，子曰愛人。」《禮記·中庸》云：「仁者，人也。親親為大。」《一切經音義》引《蒼頡篇》云：「親，愛也。」親之為愛，猶愛之為仁也。《康誥》此言主用刑，言民無知而將犯罪罰，不必為吾之親近始保救之，猶赤子無知而將入井，不必為吾兄之子始保救之。故云若。若之言同也。故趙氏云：「雖他人子亦愛救之，謂之愛同也。」蓋赤子唯保救其將入井，愚民惟保救其將犯罪罰。至於平時親愛之，則鄰之赤子終不若兄之子，

愚民終不若己之父兄。是以鄰里有喪非不助之殯葬，然斷不必厚如葬其親也，此人情也。夷子不知此，是為不達人情。孔本、韓本「亦愛救之」作「驚救之」。且天之生物

也使之**一本**，而夷子**二本**故也。**注**天生萬物，

各由**一本**而出。今夷子以他人之親與己親等，是為**二本**，故欲同其愛也。蓋上世嘗有不葬其親者。

其親死，則舉而委之於壑。**注**上世，未制禮之

時。壑，路旁坑壑也。其父母終，舉而委棄之壑中

也。**疏**注「上世未制禮之時」○正義曰：②《易·繫辭傳》

云：「古之葬者，厚衣之以薪，葬之中野。」翟氏灝《考異》

云：「此云「上世」，乃上古也，故與《易》所言古事不同。然

二事相因，自有藁裡之掩遂漸成衣薪葬野之世。」○注「壑

路」至「中也」○正義曰：《爾雅·釋詁》云：「壑、阡，虛

也。」注云：「壑，谿壑也。阡，阡謂阡壑也。」阡即坑字。《禮

記·郊特牲》「水歸其壑」，注云：「壑，猶坑也。」趙氏以「坑」

①「愛」，原作「驚」，合於廖、孔、韓等本，今據疏文複舉注文及對孔、韓本之交代改。

②「正」，原脫，今據經解本補。

釋「壑」而云「路旁」者，以下云「他日過之」，過則偶然行路過此，是壑在路旁也。《楚辭·離騷》云「委厥美以從容兮」，注云：「委，棄也。」故以「棄」釋「委」。他日過之，狐狸食

之，蠅蚋姑嘬之。其類有泚，睨而不視。夫泚也，非為人泚，中心達於面目。蓋歸，反藁裡而掩之。掩之誠是也，則孝子仁人之掩其親亦必有道矣。」**注**嘬，攢，共食之也。類，類也。

泚，汗出泚泚然也。見其親為獸蟲所食，形體毀敗，中心慙，故汗泚泚然出於額。非為他人而慙也，自出其心。聖人緣人心而制禮也。藁裡，籠舌之屬，可以取土者也。而掩之實是其道，則孝子仁人掩其親有以也。

疏「狐狸食之」○正義曰：阮氏元《校勘記》

云：「石經狸作狸。案，《詩》『取彼狐狸』，《釋文》、唐石經皆作狸。」○「蠅蚋姑」○正義曰：《音義》出此三字，云：「張音訥，云：『諸本或作蠅，誤也。』」丁云：「蠅，未詳所出。或以蠅與集蜺同，謂蜺蜺也。音由。」又一說云：「蠅姑即螻蛄也。」趙氏佑《溫故錄》云：「姑，螻蛄也。南人謂之地蝮。穀讀為狗。北人謂之喇喇姑，亦曰螻狗。初生鳴土中，食穀

種，最在螻蛄蟲賊先。東俗每於布穀後，候苗將發，則以小石輪周塋左右壓治之。及秋飛出，趁燈光，能咬人起瘡，蟲之毒者。《音義》一說蚋或作蠅，一說蠅姑即螻蛄也，則似以「蚋姑」為一物。予在山東，一老門子為予言甚詳，因及《月令》「孟夏螻蛄鳴」，即此物也。螻與姑聲相亂耳。」王氏念孫《廣雅疏證》云：「螻蛄，疊韻字，聲轉為螻蛄，倒言之則為蛄螻。《方言》：『螻蛄謂之螻蛄，或謂之螻蛄。』南楚謂之杜狗，或謂蛄螻。」今人謂此蟲為土狗，即杜狗也。順天人謂之拉拉古，即螻蛄之轉聲也。其單言之則或為螻，《呂氏春秋·應同》篇「黃帝之時，天先見大螻大螻」，**①**高誘注云：「螻，螻蛄也。」《慎小》篇云「巨防容螻」，注云：「隄有孔穴，容螻蛄也。」或又謂之蛄蛄，《埤雅》引《廣志·小學》篇云：「螻蛄，會稽謂之蛄蛄。」《孟子音義》：「蛄，諸本或作蛄。」一說云：螻蛄即螻蛄也。「蛄與螻聲正相近矣。螻蛄，短翅四足，穴土而居，至夜則鳴，聲如蚯蚓。」按：趙氏無訓，但以一蟲字括之。為蛄，為蛄蛄，則二物；為蛄，為蛄，為蛄，則三物。《說文》虫部云：「蛄，秦晉謂之蛄，楚謂之蛄。」阮氏元

①「螻」，原誤作「蛄」，今據經解本及《廣雅疏證》、《呂氏春秋》改。

《釋且》云：「且字加口爲咀。《春秋左傳》僖二十八年「晉侯夢楚子伏己而鹽其腦」，鹽與咀同，謂咀噬其腦。故《方言》云：「鹽，且也。」且與姑同音，故姑亦有咀義。《孟子·滕文公》「蠅蚋姑嘬」之姑，與《方言》鹽同，即咀也。謂蠅與蚋同咀嘬之也。」○注「嘬攢共食之也」○正義曰：《禮記·曲禮》云「毋嘬炙」，注云：「嘬謂一舉盡嚙。」蓋獸食之餘，諸蟲又盡之也。趙氏謂「攢共食之」者，嘬從最，隱公元年《公羊傳》云「會猶最也」，注云：「最，聚也。」最之爲言聚。《文選·西都賦》注引《蒼頡篇》云：「攢，聚也。」趙氏讀嘬爲聚，故以「攢共」解之。○注「類額」至「出於額」○正義曰：《方言》云：「中夏謂之額，東齊謂之類。」額即類也。《考工記》「車人爲末，庇長尺有一寸」，注云：「庇，讀爲「其類有疵」之疵。」賈氏疏云：「俗人謂類額之上有疵病，故從之也。」《爾雅·釋詁》云：「疵，病也。」是《孟子》本有作「疵」者。「其類有疵」謂頭領病，猶云「疾首」也。趙氏本作「泚」，《毛詩·邶風》「新臺有泚」，傳云：「泚，鮮明貌。」《說文》作「玼」，而訓泚爲清。蓋顏色鮮明，必爲汗漬，故以爲汗出泚泚然。《說文·心部》云：「慙，媿也。」人媿則汗出於額，故以爲「慙」。然以爲慙不如以爲哀痛而疾首，泚宜爲疵之借耳。○注「藁裡」至「取土者也」○正義曰：段氏玉裁《說文解字注》云：

「相，甬也。從木，呂聲。一曰徙土華，齊人語也。裡，或從里。《周禮》注引《司馬法》曰：「輦，一斧一斤一鑿一裡。」疏云：「裡，或解作甬，或解作鋤。鋤，甬亦不殊。」《孟子》「蓋歸反藁裡而掩之」，趙曰：「藁裡，籠甬之屬，可以取土者也。」藁即標之假借，可以昇土者，裡同相，可以甬地掘土者。一曰徙土華，此別一義，謂相即標。孫奭《孟子音義》云：「裡，土輦也。」本此。」王氏念孫《廣雅疏證》云：「《爾雅》「斛謂之隄」，郭注云：「皆古鑿鋪字。」《管子·度地》篇云「籠甬版築各什六」，《齊策》云「坐而織簣，立而杖插」，並字異而義同。」按：籠簣即藁甬，插即裡，故云「籠甬之屬」。

○注「而掩之實是其道」○正義曰：高誘注《呂氏春秋》、《淮南子》皆云：「誠，實也。」徐子以告夷子。夷子慙然，爲問，曰：「命之矣。」**注**孟子言是以爲墨家薄葬不合道也。徐子復以告夷子。夷子慙然者，猶悵然也；爲問者，有頃之間也。「命之」猶言「受命教矣」。

疏注「夷子慙然者猶悵然也」○正義曰：《一切經音義》引《三蒼》云：「慙然，失意貌也。」失意則悵悵，故以爲「猶悵然」也。按：《論語·微子》篇「子路行以告，夫子慙然」，《集解》云：「謂其不達己意。」與趙氏此注義同。乃

《說文》心部云：「慄，愛也。韓鄭曰慄。一曰不動。」《爾雅·釋言》云：「慄，撫也。」《廣雅·釋詁》既訓撫爲安，又訓撫爲定，安、定皆不動之義。蓋夫子聞子路述沮、溺之言，寂然不動，久而乃有「鳥獸不可同羣」之言，此夷之聞徐辟述孟子之言，寂然不動，久而乃有「命之」之言。是「夷子慄然」四字絕句，「爲問」二字絕句，謂不動聲色者良久也。《後漢書·文苑·禰衡傳》云：「表嘗與諸文人共草章奏，並極其才思。時衡出，還見之，開省未周，因毀以抵地。表慄然爲駭。」蓋是時劉表必正稱譽歡笑，衡突將章奏擲諸地，表乃寂然不動。揣其心，以爲此時所以不動者，爲駭之也。《蔡邕傳》：「邕在陳留，其鄰人有以酒食召邕者。客有彈琴於屏，邕至門，試潛聽之，曰：『愜！以樂召我而有殺心，何也？』遂反。主人遽自追問其故，邕具以告，莫不慄然。」此「慄然」亦謂衆聞邕言，莫知所謂，都寂然不動也。《孔融傳》：「曹操激厲融云：『當收舊好，而怨毒漸積，志相危害，聞之慄然，中夜而起。』」大凡聞人之言，見人之事，與己所期所見不同，往往靜默不動。躊躇既久，有以見其說之非，則夫子之辨沮、溺是也，有以見其說之是，則夷之從孟子是也，亦有躊躇不解其故，或蓄怒而未形，或懷疑而莫決，如劉表之於禰衡、陳留賓客之於蔡邕是也。《說文》以「不動」二字括

之，精矣。○注「爲問者有頃之間也」○正義曰：《呂氏春秋·去私》篇云「居有間」，高誘注云：「間，頃也。」《國策·秦策》云「乃留止間曰」，高誘注云：「間，須臾也。」《列子·黃帝》篇云「立有間，不言而出」，《釋文》云：「間，少時也。」○注「命之猶言受命教矣」○正義曰：《禮記·坊記》云「命以防欲」，注云：「命謂教命。」

章指：言聖人緣情，制禮奉終；墨子元同，質而違中。以直正枉，慄然改容，蓋其理也。疏「墨子元同質而違中」○正義曰：《墨子》

有《尚同》三篇，同即「無差等」之謂也。《老子》云：「和其光，同其塵。」是謂「元同」。左思《魏都賦》云：「道洪化隆，世篤元同。」《後漢書·張衡傳》注引桓譚《新論》云：「元者，天也，道也。」此「元同」謂道同也。《太史公自序》云：「墨者儉而難遵，是以其事不徧循。」質猶儉也。違中，故不可徧從也。

孟子正義卷十一終

孟子正義卷十二

江都縣鄉貢士焦循誤集

孟子卷第六

滕文公章句下凡十章。

陳代曰：「不見諸侯，宜若小然。今一見之，大則以王，小則以霸。且志曰『枉尺而直尋』，宜若可爲也。」**注**陳代，孟子弟子也。代見諸侯有來聘請孟子，孟子有所不見，以爲孟子欲以是爲介，故言此介得無爲狹小乎？如一見之，僅得行道，可以輔致霸王乎？志，記也。枉尺直尋，欲使孟子屈己信道，故言宜若可爲也。**疏**「且志曰枉

尺而直尋」○正義曰：翟氏灝《考異》云：「《隸釋·議郎元賓碑》『進退不枉尺直尋』，用《孟子》而以尋爲尋。《文子上義》篇：『屈寸而申尺，小枉而大直，聖人爲之。』《尸子》引孔子曰：『訕寸而信尺，小枉而大直，吾爲之也。』文子，東周初人，而尸佼爲商鞅師，《穀梁傳》嘗引其言，亦略前於孟子。陳代所云志，或者即此等書。」○**注**「得無爲狹小乎」○正義曰：漢金廣延《母紀產碑》云「耕殖陝少」，陝少即狹小也。《禮記·表記》云「仁有數，義有長短小大」，**注**云：「性仁義者，其數長大，取仁義者，其數短小。」孔氏正義云：「小謂所施狹近也。」孟子曰：「昔齊景公田，招虞人以旌，不至，將殺之。」**注**虞人，守苑囿之吏也。招之當以皮冠而以旌，故不至也。**疏**「昔齊」至「殺之」○正義曰：昭公二十年《左傳》云：「十一月，齊侯田于沛，招虞人以弓，不進。公使執之，辭曰：『昔我先君之田也，旃以招大夫，弓以招士，皮冠以招虞人。臣不見皮冠，故不敢進。』乃舍之。」仲尼曰：「守道不如守官，君子韙之。」閻氏若璩《釋地三續》云：「虞人，守苑囿之吏也。《周禮》山虞每大山中士四人，澤虞每大澤大藪中士四人，迹人掌田獵者，亦中士四人，餘皆下士及府史等，自不敢上擬乎大夫，招

以旌，豈敢進？此守官也而即守道也。左氏生六國初，孟子之前，不知於何聞之。所傳尹公佗學射庾公差，齊侯田于沛二事，與《孟子》輒異。」「志士不忘在溝壑，勇士不忘喪其元。」孔子奚取焉？取非其招不往也。如不待其招而往何哉？

注志士，守義者也。君子固窮，故常念死無棺槨，沒溝壑而不恨也。

勇士，義勇者也。元，首也。以義則喪首不顧也。孔子奚取？取「守死善道」，非禮招已則不往。言虞人不得其招尚不往，如何君子而不待其招，直事妄見諸侯者，何為也？

疏注「志士」至「善道」○正義

曰：《韓詩外傳》云：「子路與巫馬期薪於韞丘之下，陳之富人處師氏者，脂車百乘，觴於韞丘之上。子路與巫馬期曰：『使子無忘子之所知，亦無進子之所能，得此富終身，無復見夫子，子為之乎？』」巫馬期喟然仰天而嘆，闔然投鎌於地曰：「吾嘗聞之夫子：勇士不忘喪其元，志士仁人不忘在溝壑。子不知予與，試予與？意者其志與？」此以「志士」、「仁人」並稱。《論語·衛靈公》篇云：「志士仁人無求生以害仁，有殺身以成仁。」《集解》引孔曰：「無求生以害仁，死而後成仁，則志士仁人不愛其身也。」孔子謂「殺身成

仁」，孟子謂「舍生取義」，惟取義乃成仁，故志士為仁人，即亦守義者也。巫馬期不顧處師氏之富，固死無棺槨，棄尸溝壑而不恨者也。死不愛其身，則生可喪其元，生不愛其元，則死何難於在溝壑。志與勇皆以義揆之，故趙氏均以「義」言。《論語·陽貨》篇云：「君子義以為上。君子有勇而無義為亂，小人有勇而無義為盜。」故云「義勇者」也。勇而非義，雖喪元不顧，第要離、聶政之流，非君子所貴矣。「元，首也」，《爾雅·釋詁》文。僖公三十三年《左傳》：「先軫曰：『匹夫逞志於君而無討，敢不自討乎？』」免胄人狄師，死焉。狄人歸其元，面如生。」哀公十一年《傳》：「公使大史固歸國子之元。」皆喪其元之事也。「守死善道」，《論語·泰伯》篇文。○注「直事妄見諸侯者」○正義曰：《韓非子·喻老》篇云：「事，為也。」「直事」者，不俟其招，徑直為此見諸侯之事。無端而往，是為「妄」也。且夫枉尺而直尋者，以利言也。如以利，則枉尋直尺而利，亦可為與？

注尺小尋大，不可枉大就小而以要利也。

疏「則枉」至「為與」○正義曰：《風俗通·十反》篇云：「孟

軻稱不枉尺以直尋，況於枉尋以直尺。」蓋不待招而見，實不能一見即霸王，是枉尋直尺而已。趙氏之義與應劭正同。

昔者趙簡子使王良與嬖奚乘，終日而不獲一禽。

嬖奚反命曰：「天下之賤工也。」**注**趙簡

子，晉卿也；王良，善御者也；嬖奚，簡子幸臣。以

不能得一禽，故反命於簡子，謂王良天下鄙賤之工

師也。**疏**注「趙簡子晉卿也」○正義曰：《史記·趙世家》

云：「晉獻公賜趙夙耿。夙生共孟。共孟生趙衰。趙衰生

盾。趙盾卒，謚爲宣孟。子朔嗣，屠岸賈殺趙朔。平公十二

年，趙武爲正卿。趙武生景叔。趙景叔卒，生趙鞅，是爲簡

子。」○注「王良善御者也」○正義曰：哀公二年《左傳》云：

「郵無恤御簡子」，注云：「郵無恤，王良也。」孔氏正義云：

「下云『子良授綬』是也。服虔曰：『王良也。』孟子說王良善

御之事。占者車駕四馬，御之爲難，故爲六藝之一。王良之

善御最有名，於書傳多稱之。《楚辭》云：『當世豈無騏驎

兮，誠無王良之善御；見執轡者非其人兮，故駒跳而遠

去。』《國語·晉語》云：「趙簡子使尹鐸爲晉陽，郵無正進曰：『

云云。又云『初，伯樂與尹鐸有怨，以其賞如伯樂氏』。注

云：「無正，晉大夫郵良伯樂。」又云：「伯樂，無正字。」《淮

南子·覽冥訓》云：「昔者王良、造父之御也，上車攝轡，馬

爲整齊而斂諧，投足調勻，勞逸若一，心怡氣和，體便輕畢，

安勞樂進，馳驚若滅。」高誘注云：「王良，晉大夫郵無恤子

良也。所謂御良也。一名孫無政，爲趙簡子御，死而托精於

天駟星，天文有王良星是也。」○注「天下鄙賤之工師也」○

正義曰：王良爲大夫，不可爲卑賤。「賤」與下「良」對，故釋

爲「鄙」，謂其技藝鄙陋。鄙野異於國中，言其俚野，非國工

也。以「師」釋「工」者，《儀禮·燕禮》「大師告於樂正」，注

云：「大師，上工也。」是工亦稱師也。或以告王良，良

曰：「請復之。」**注**聞嬖奚賤之，故請復與乘。強

而後可，**注**強嬖奚乃肯行。一朝而獲十禽。嬖

奚反命曰：「天下之良工也。」**注**以一朝得十

禽，故謂之「良工」。簡子曰：「我使掌與女乘。」

注掌，主也。使王良主與女乘。**疏**注「掌主也」○《周

禮·天官·淩人》注云：「杜子春讀掌冰爲主冰。」《小爾

雅·廣言》云：「掌，主也。謂王良。良不可，**注**王良

不肯。曰：『吾爲之範我馳驅，終日不獲一，

爲之詭遇，一朝而獲十。』**注**範，法也。王良

曰：我爲之法度之御，應禮之射，正殺之禽，不能得

一。橫而射之曰詭遇。非禮之射則能獲十。言嬖

奚小人也，不習於禮。

疏注「範法」至「於禮」○正義

曰：「範，法也」，《爾雅·釋詁》文。昭公八年「秋，蒐于紅」，《穀梁傳》云：「艾蘭以爲防，置旃以爲轅門，以葛覆質以爲檠，流旁握，御擊者不得入。車軌塵，馬候蹄，揜禽旅，御者不失其馳。然後射者能中。過防弗逐，不從奔之道也。面傷不獻，不成禽不獻。」所云車軌塵、馬候蹄者，「法度之御」也。《毛詩·小雅·車攻》篇傳云：「一曰乾豆，二曰賓客，三曰充君之庖。故自左膘而射之，達於右膺爲上殺，達右耳本次之，射左髀達於右髀爲下殺。面傷不獻，踐毛不獻，不成禽不獻。」孔氏正義云：「上殺以其貫心死疾，肉最潔美，故以爲乾豆；次殺以其遠心，死稍遲，肉已微惡，故以爲賓客；下殺以其中脅，死最遲，肉又益惡，充君之庖也。凡射獸，皆逐從左廂而射之，達於右髀。獨言射左髀爲上殺，達於右膺，當自左脅也。次達右耳本，當自左肩膺也，不言自左，舉下殺之射左髀可推而知也。面傷不獻者，謂當面射之。翦毛不獻，謂在旁而逆射之。二者皆爲逆射。」按：此上殺、次殺、中殺皆爲「應禮之射，正殺之禽」。王氏念孫《廣雅疏證》云：「《釋天》：『王者以四時畋，以奉宗廟，因簡戎事，刈草爲防，畋而射之，不題禽，不堋遇，不捷草，越防不追。』題禽，題，迎禽而射之。堋遇，謂旁射也。堋，或作詭，

《孟子·滕文公》篇「爲之詭遇，一朝而獲十」，趙岐注云：「橫而射之曰詭遇。」《比》：「九五，王用三驅，失前禽。」桓四年《左傳正義》引鄭注云：「失前禽者，謂禽在前來者，不逆而射之，旁去又不射。惟背走者，順而射之。用兵之法亦如之，降者不殺，奔者不禦，加以仁恩養威之道。」亦其義也。《說苑·修文》篇云：「不抵禽，不詭遇。」班固《東都賦》云：「弦不睨禽，轡不詭遇。」抵，睨並與題通。按：此題禽，詭遇皆爲「非禮之射」。王良僅云詭遇，蓋亦括題禽言之。如《穀梁傳》但言面傷，亦括橫射言之也。《音義》出「範我」，云：「或作范氏。范氏，古之善御者。」範古與范通。範或作范者有之，我、氏形近，其作氏者，譌也。趙氏訓範爲法，則其經文必不作「范氏」矣。《音義》見誤本而以爲古之善御者，班固《東都賦》云：「游基發射，范氏施御，弦不失禽，轡不詭遇。」《文選》李善注引《括地圖》云：「夏德盛，二龍降之，禹使范氏御之，以行程南方。」又引《孟子》此文，仍作「吾爲之範我馳驅」，連下「爲之詭遇」，又引劉熙注「橫而射之曰詭遇」，則引《括地圖》注「范氏施御」句，引《孟子》注「轡不詭遇」句，非「范氏」即《孟子》之「範我」也。李賢注《後漢書·班固傳》此文則云「范氏，趙之御人也」，此「趙」字誤，當是「古」字。引《孟子》此文亦作「範我」，又引趙注「範法也」云

云，然則李賢所引《孟子》不作「范氏」可知。又云：「弦不失禽謂由基也，彎不詭謂范氏也。」范氏指賦所云之范氏，非《孟子》之「範我」也。《宋書·樂志》《馬君》篇云：「願爲范氏驅，雖容步中畿。豈效詭遇子，馳騁趣危機。」此則本班固賦言之，皆未足以證《孟子》之爲「范氏馳驅」也。凡說經先求辭達，若作「范氏」，則云「我爲之范氏馳驅」，於辭不達，而王良何取於范氏？賦以范氏儷由基，范氏爲範我矣，由基何屬邪？即使誠有異本《孟子》作「范氏馳驅」，究以趙氏爲正而已。《白氏六帖·執御》篇引《孟子》此文及注云：「範，法也。爲以法式爲御，故不獲禽。詭，謫也。不依御，故苟得矣。」與趙氏注異。白氏引之，蓋唐以前舊注，其釋範爲法，亦同於趙。《音義》作「范氏」，非也。《詩》云：「不失其馳，舍矢如破。」我不貫與小人乘，請辭。」**注**《詩》、《小雅·車攻》之篇也。言御者不失其馳驅之法，則射者必中之。順毛而入，順毛而出，一發貫臧，應矢而死者如破矣。此君子之射也。貫，習也。我不習與小人乘。不願掌與嬖奚同乘，故請辭。**疏**注「詩小」至「射也」○正義曰：引《詩》在《小雅·車攻》篇第六章。毛傳云：「言習於射御法也。」不失其

馳驅之法，則「範我馳驅」也。「順毛而入，順毛而出」則不踐毛，不順則毛蹂躪狼藉矣。「一發貫臧」，阮氏元《校勘記》云：「足利本臧作機。《音義》出「貫臧」，作機非。臧即今五臟字，徂浪切。」「一發貫臧，應矢而死」，所謂「貫心死疾爲上殺」也。孫宣公云「臧如字」非也。鄭氏箋云：「御者之良，得舒疾之中，射者之工，矢發則中，如椎破物也。」孔氏正義云：「如椎破物，則中而駛也。」王氏引之《經傳釋詞》云：「如猶而也。」「不失其馳，舍矢如破。」如破，而破也。家大人曰：「舍矢而破」與「舍拔則獲」同意，皆言其中之速也。《楚策》云「壹發而殪」，意亦與此同。鄭箋及《孟子》趙注皆誤解如字。○**注**「貫習也」○正義曰：「貫，習」，《爾雅·釋詁》文。段氏玉裁《說文解字注》云：「貫，假借作慣字，習也。如《孟子》『我不貫與小人乘』是也。《毛詩》曰『串夷』，傳云：『串，習也。』串即母之隸變，傳即謂慣字。」御者且羞與射者比。比而得禽獸，雖若丘陵，弗爲也。如枉道而從彼何也？**注**孟子引此以喻陳代，云：御者尚知耻羞此射者，不欲與比，子如何欲使我枉正道而從彼驕慢諸侯而見之乎？**疏**注「御者尚知耻羞此射者」○正義曰：《國語·周語》云「姦禮爲羞」，注

云：「羞，耻也。」閔、監、毛三本作「羞耻」。且子過矣，枉己者未有能直人者也。」**注**謂陳代之言過謬也。人當以直矯枉耳，己自枉曲，何能正人？**疏**注

「過謬也」○正義曰：《國策·秦策》云「王之料天下過矣」，高誘注云：「過，謬也。」《淮南子·本經訓》云「壞險以爲平」，**①**矯枉以爲直」，高誘注云：「矯，正也。枉，曲也。」《說文》矢部云：「矯，揉箭箝也。」《易·說卦傳》云「坎爲矯揉」，宋衷注云：「曲者更直爲矯。」蓋物之曲者，以直物糾戾之使同直，故云「以直矯枉」也。

章指：言脩禮守正，非招不往；枉道富貴，君子不許。是以諸侯雖有善其辭命，伯夷亦不屑就也。**疏**「是以」至「就也」○正

義曰：周氏廣業《孟子章指攷正》云：「伯夷不就辭命，無攷。惟《韓非子·和氏》篇：『古有伯夷、叔齊者，武王讓以天下而弗受，二人餓死首陽之陵。』《莊子·讓王》篇：『昔周之興，伯夷、叔齊相謂曰：吾聞西方有人似有道者，盍往觀焉？』至於岐陽，武王聞之，使叔旦往見之，與之盟曰：加富二等，就官一列，血牲而埋之。二人相視而笑曰：嘻異哉！此非吾所謂道也。比人至首陽之

山，遂餓而死焉。」《孟子》所云或即指此。」

景春曰：「公孫衍、張儀豈不誠大丈夫哉？一怒而諸侯懼，安居而天下熄。」**注**景

春，孟子時人，爲從橫之術者。公孫衍，魏人也，號爲「犀首」，常佩五國相印爲從長。秦王之孫，故曰公孫。張儀，合從者也。一怒則構諸侯，使強凌弱，故言懼也；安居不用辭說，則天下兵革熄也。**疏**注

「景春」至「術者」○正義曰：《漢書·藝文志》云：「從橫家者流，蓋出於行人之官。孔子曰：『誦《詩》三百，使於四方不能專對，雖多，亦奚以爲？』」又曰：「使乎使乎！」言其當權事制宜，受命而不受辭，此其所長也。及邪人爲之，則上諛詐而棄其信。」凡十二家，以蘇秦、張儀爲首。周氏廣業《孟子出處時地考》云：「景春稱儀、衍而不及蘇秦，秦時已爲齊所殺矣。」又《孟子古注攷》云：「《漢·藝文志》兵陰陽

① 按，「淮南子」以下非疏釋注文「過謬也」，乃疏釋注文「以直矯枉」。

② 「正」，據全書他章引文當作「證」。

家有《景子》十三篇，^①疑即此人。」○注「公孫」至「爲從長」^②○正義曰：《史記·秦本紀》云：「惠文君五年，陰晉人犀首爲大良造。六年，魏納陰晉，陰晉更名寧秦。」^③裴駰《集解》云：「犀首，官名。姓公孫，名衍。」徐廣曰：「陰晉，今之華陰也。」衍爲大良造時，陰晉尚屬魏，衍爲陰晉人，是「魏人」也。又《張儀列傳》附《公孫衍傳》云：「犀首者，魏之陰晉人也。名衍，姓公孫氏。與張儀不善。張儀已卒之後，犀首入相秦，嘗佩五國之相印，爲約長。」《集解》引司馬彪云：「犀首，魏官名，若今虎牙將軍。」按：此則衍在魏爲犀首之官，在秦爲大良造之官。趙氏云號爲犀首，未詳所本。《國策·秦策》云：「王用儀言，取皮氏卒萬人，車百乘，以與魏犀首。」吳師道云：「《年表》：『陰晉人犀首爲大良造』，則非官名。而《韓策》摻留以「犀首」、「張儀首」言，何爲一人獨以官稱乎？恐犀首或姓名也。魏亦有犀武。」按：犀首即公孫衍，明見《史記》。意者先在魏爲此官，後遂以爲號，故人通稱之。《史記》言「約長」，趙氏言「從長」者，周氏柄中《辨正》云：「衍本衡人，《史記》以儀、衍同傳而贊云：『夫言從衡彊秦者，大抵皆三晉之人。』是衍亦衡人之彊秦者也。所以離秦魏之交，致義渠之襲者，特以傾張儀而然，非合從也。即其用陳軫之計，三國委事，亦並無合從事跡，其爲秦敗

楚，則見於《韓非子》、《史記》等書，黃東發謂衍或從或衡，殊非其實。趙注云「衍嘗佩五國相印爲從長」，《史記》「犀首入秦爲約長」，此言衍相秦，約五國與秦衡親，正破從爲橫之事。「約長」非「從長」也，未有相秦而合從者也。「衍生長於魏，趙氏謂「秦王之孫，故曰公孫」，亦未知所出。○注「張儀合從者也」○正義曰：《呂氏春秋·報更》篇云：「張儀，魏氏餘子也。將西游於秦，過東周，昭文君送而資之。至於秦，留有間，惠王悅而相之。張儀所德於天下者，無若昭文君。」《史記·張儀列傳》云：「張儀者，魏人也。蘇秦已說趙王而得相約從親，然恐秦之攻諸侯，敗約後負，^④念莫可使用於秦者，乃使人微感張儀。張儀遂得以見秦惠王，惠王以爲客卿。」二說不同。《索隱》云：「張儀說六國，使連衡而事秦，故云成其衡道。」然山東地形從長，蘇秦相六國，合從親而資秦也。關西地形衡長，張儀相六國，令破其從而連秦之衡，故蘇爲合從，張爲連衡也。乃趙氏以儀爲合從者，未詳

①「陰陽」，按《漢志》，《景子》在兵形勢家，參沈校。

②「爲」，原誤作「合」，今據注文改。

③「秦」，原誤作「泰」，今從沈本據《史記》改。

④「後」，原脫，今從沈校據《史記》補。

所本。孟子曰：「是焉得爲大丈夫乎？子未學禮乎？丈夫之冠也，父命之。女子之嫁也，母命之，往送之門，戒之曰：『往之女家，必敬必戒，無違夫子。』以順爲正者，妾婦之道也。」**注**孟子以禮言之。男子之道，當以義匡君，女子則當婉順從人耳。男子之冠，則命曰「就爾成德」。今此二子從君順指，行權合從，無輔弼之義，安得爲大丈夫也？**疏**「丈夫之冠也父命之」○正義

曰：江氏永《羣經補義》云：「父命之者，迎賓冠子，父主其事。至於《士冠禮》諸祝辭，皆賓祝之，非父命也。父醮則有辭矣。」周氏柄中《辨正》云：「陳亦韓曰：『《士冠禮》無父命之文，賓則有三加祝辭，又有醴辭字辭。冠後以贊見於卿大夫鄉先生，如晉趙文子冠，見欒武子、范文子、韓獻子、智武子，皆有言以勸勉之。蓋父不自命而以其命之意出於賓，亦不親教子之意也。』」○「女子」至「夫子」○正義曰：閻氏若璩《釋地》又續云：「門即父母家之門，非女子所適之壻家之門。今人祇緣俗有母送其女至壻家禮，遂以爲壻門。不知婦人迎送不出門，又內言不出於柵，古豈有是耶？然《孟

子》此一禮與《儀禮·士昏禮記》亦殊不同。《記》云：「父在阼階上西面戒女，母戒諸西階上，不降。」又云：「父送女，命之曰：戒之敬之，夙夜毋違命。母施衿結帨，曰：勉之敬之，夙夜無違宮事。庶母及門內施鞶，申之以父母之命，命之曰：敬恭聽，宗爾父母之言，夙夜無愆，視諸衿鞶。」是戒者非止母一人，與所送亦非止門一處。大抵《孟子》言禮多主大綱，不暇及詳。抑《儀禮》定於周初，而列國行之久，頗各隨其俗。如衛人之祔也離之，魯人之祔也合之。雖孔子善魯，而衛當日仍行自若。周氏柄中《辨正》云：「《士昏禮》女父不降送，母戒諸西階上，亦不降，而《孟子》言『往送之門』，《穀梁傳》亦言『送女不出祭門』，乃指廟之大門，則送不止於階矣。或說送至壻門，毛西河引《戰國策》『婦車至門，送諸母還』，謂諸母有送至壻門者。按，《穀梁傳》諸母兄弟送不出闕門，謂祭門外兩觀門也。所指諸侯嫁女之禮與《士昏禮傳》所言「庶母及門內」略同，並無送至壻門之說，《國策》恐未可據。」○注「男子」至「丈夫也」○正義曰：《毛詩·邶風》「燕婉」傳云：「婉，順也。」《說文》女部云：「婉，順也。」《春秋傳》曰：「太子痤婉。」是「順」之義爲「婉」也。「以義匡君」，義不可從則須諫正，是以義爲正也；不論義之當從當違，一概無違，是「以順爲正」，非以義爲正者也。故趙氏

以「婉」解之，別其不能「以義匡君」矣。趙氏佑《溫故錄》云：「注『男子之冠，則命曰就爾成德』，補義甚好，此出《士冠禮》『祝曰令月吉日，^①始加元服，棄爾幼志，順爾成德』之文也。」按：《儀禮·士冠禮》作「順爾成德」，此改爲就者，以孟子斥「順」爲「妾婦」，故易「順」爲「就」。《廣雅·釋詁》云：「就，歸也。」《賈子·道術》篇云：「行歸而過謂之順。」《莊子·人間世》云「就不欲人」，注云：「就者，形順。」是「就」亦「順」也。乃所順在成德，成德則能以義匡君，是以義爲順者也；惟以無違爲順而不以義，則妾婦之順也。言有古今之不同，賴聖賢發明之。文王繫《易》以利爲重，其時所謂利，以利物言，故孔子贊之云：「利者，義之和也。利物足以和義。」蓋至孔子時，所謂利，共以爲利己，於是以「放利而行」爲利，故孔子罕言利而以義爲利。《易》以坤爲順，孔子贊《易》屢以順言，其時以「輔弼正君」爲順，《荀子·臣道》篇云：「以從命而利君謂之順，從命而不利君謂之諂。」是也。至孟子時，則徒以「從君順指」爲順，故孟子斥爲「妾婦之道」。孟子之斥順，猶孔子之斥利也。妻道猶臣道，妻之順夫亦當諤諤有以調和而補救之，惟妾婦婢媵之流，徒以取容爲婉媚耳。居天下之廣居，立天下之正位，行

天下之大道。得志，與民由之；不得志，獨行其道。富貴不能淫，貧賤不能移，威武不能屈。此之謂「大丈夫」。^①注廣居謂天下也。正位謂男子純乾正陽之位也。大道，仁義之道也。得志，行正，與民共之；不得志，隱居，獨善其身，守道不回也。淫，亂其心也；移，易其行也；屈，挫其志也。三者不惑，乃可以爲大丈夫矣。^②疏注「廣居」至「道也」○正義曰：趙氏以「廣居」爲「天下」，則「居天下之廣居」即謂人生天地間也。天地之間至廣大，隨在可以自得，必以富貴而婉順求之，是天下至廣而所營至狹矣。男女共生天地之間，在女子則當婉順。既身爲男子，則在八卦爲乾，《易·家人》《彖傳》云：「女正位乎內，男正位乎外。」內則囿於一家，外則周乎天下，故「居天下之正位」也。《說卦傳》云：「是以立天之道曰陰與陽，立地之道曰柔與剛，立人之道曰仁與義。分陰分陽，迭用柔剛。」異乎妾婦之徒以柔順爲道，故爲「大道」也。蓋既生於天地間，居如此其廣也，又身爲男子，位如此其正也，則所行自宜爲天下之大道，而

①「令」，原誤作「今」，今從沈校據《儀禮》改。

奈何踴躍而效妾婦爲也？下數句即申明行天下之大道以全其居廣居、立正位之身也。趙氏注精矣。○注「得志行」至「夫矣」○正義曰：《論語·顏淵》篇云：「政者，正也。」《周禮·地官·黨正》注云：「正之言政也。」趙氏以「行正」解「得志」，「行正」即「爲政」也。天下之居既廣，而男子行仁義之道可仕而爲政，則以此仁義之道共之於民，不可仕則隱居，而以此仁義之道獨行於身：何處不可居，何處不可行道也？《呂氏春秋·古樂》篇云「有正有淫矣」，高誘注云：「淫，亂也。」又《蕩兵》篇云「而工者不能移」，高誘注云：「移，易也。」《漢書·揚雄傳》《音義》引諸詮云：「屈，古詘字。」《廣雅·釋詁》云：「詘，屈也。挫，詘，折也。」是「屈」即「挫」也。男子行仁義之道，故富貴不能亂其心，貧賤不能易其行，威武不能挫其志，自彊不息，乃全其爲男子，全其爲男子，斯得爲大丈夫也。

章指：言以道匡君，非禮不運，稱大丈夫，阿意用謀，善戰務勝，事雖有剛，心歸柔順，故云「妾婦」，以況儀、衍。

疏「非禮不運」○正義曰：周氏廣業《孟子章指攷證》云：「《戴記》有《禮運》篇。」按：《莊子·山木》篇云：「運，物之泄也。」

《釋文》引司馬注云：「運，動也。」

周霄問曰：「古之君子仕乎？」**注**周霄，

魏人也。問君子之道當仕否？**疏**注「周霄魏人也」○

正義曰：《戰國·魏策》云：「魏文子、田需、周霄相善，欲罪犀首。」鮑彪注云：「周霄，孟子時有此人，至是三十年矣。」吳師道正云：「田文前相魏，當襄王時，孟子見梁襄王，相去不遠也。」周氏廣業《孟子出處時地攷》云：「按，《史》田需、犀首皆在秦惠王時，故霄得問於孟子也。」《魏策》又云：「周肖謂宮他曰：『子爲肖謂齊王曰：肖願爲外臣，今齊資我於魏。』」鮑彪注云：「疑即霄。」吳師道正云：「《孟子》記魏人，若以爲此人，則非安釐之世矣。」孟子曰：「仕。傳曰：『孔子三月無君則皇皇如也。出疆必載質。』」**注**質，臣所執以見君者也。三月，一時也。物變而不佐君化，故皇皇如有求而不得。**疏**注「質臣所執以見君者也」○正義曰：《音義》出「載質」，云：「張音贊，云『義與贊同』。」《白虎通·瑞贊》篇云：「贊者，質也。質己之誠，致己之惓惓也。」《儀禮·士相見禮》云：「贊，冬用雉，

夏用脰。左頭奉之，曰：「某也願見，無由達。」某子以命，命某見。」注云：「贊，所執以至者。君子見於所尊敬，必執贊以將其厚意也。」《士冠禮》云：「奠摯見於君，遂以摯見鄉大夫、鄉先生。」注云：「摯，雉也。」是「見君用摯」也。贊、摯、質三字通。○注「三月」至「不得」○正義曰：《大戴記·本命》篇云：「人生而不具者五，目無見，不能食，不能行，不能言，不能化。三月而徹眵，然後能有見。」注云：「三月萬物一成。」《易·繫辭傳》云：「變通莫大乎四時。」《春秋繁露·官制象天》篇云：「三人而爲一選儀，於三月而爲一時也。天有四時，時三月，如天之時，固有四變也。」《白虎通·四時》篇云：「歲時何謂？春夏秋冬也。時者，期也。陰陽消息之期也。春夏物變盛，秋冬氣變盛。」此「三月爲一時而物變」之說也，變即化也。歷一時而物變化，君子亦當趣時爲變化。《春秋繁露·四時之制》篇云：「天之道，春暖以生，夏暑以養，秋清以殺，冬寒以藏。暖暑清寒，異氣而同功，皆天之所以成歲也。聖人副天之所行以爲政，故以慶副暖而當春，以賞副暑而當夏，以罰副清而當秋，以刑副寒而當冬。慶賞罰刑，異事而同功，皆王者之所以成德也。慶賞罰刑與春夏秋冬以類相應也。」《禮記·檀弓上》云：「既殯，瞿瞿如有求而弗得，皇皇如有望而弗至。」注云：「皆憂悼在心之貌

也。」《檀弓下》云：「始死，皇皇焉如有求而弗得。」《問喪》篇云：「其往送也，望望然，汲汲然，如有追而弗及也；其反哭也，皇皇然，如有求而弗得也。」《楚辭·離世》篇云：「征夫皇皇其孰依兮」，注云：「皇皇，惶遽貌。」《廣雅·釋訓》云：「惶惶，勦也。」惶惶即皇皇也。公明儀曰：「古之人三月無君則弔。」注公明儀，賢者也。而言古人三月無君則弔，明當仕也。「三月無君則弔，不以急乎？」注周霄怪乃弔於三月無君，何其急也？曰：「士之失位也，猶諸侯之失國家也。禮曰：『諸侯耕助以供粢盛，夫人蠶繅以爲衣服。犧牲不成，粢盛不絜，衣服不備，不敢以祭。惟士無田，則亦不祭。』牲殺器皿衣服不備，不敢以祭，則不敢以宴，亦不足弔乎？」注諸侯耕助者，躬耕勸率其民，收其藉助，以供粢盛。粢，稷；盛，稻也。夫人親執蠶繅之事，以率女功。衣服，祭服；不成，不實肥腠也。惟，辭也。言惟絀祿之士無圭田者不祭。牲，必特殺，故曰殺。皿，所以覆器者也。不祭則不宴，猶喪人也，不

亦可弔乎？

疏「禮曰」至「衣服」○正義曰：《禮記·祭

統》云：「天子親耕於南郊，以共齊盛；王后蠶於北郊，以共純服。諸侯耕於東郊，亦以共齊盛；夫人蠶於北郊，以共冕服。」注云：「齊，或爲粢。」孟子所引之《禮》蓋如是也。桓公十四年《穀梁傳》云：「天子親耕以共粢盛，王后親蠶以共祭服。」又成十七年《穀梁傳》云：「宮室不設，不可以祭；車馬器械不備，不可以祭；有司一人不備其職，不可以祭。」與《孟子》所言略同。然則「犧牲不成」以下，亦孟子述《禮》之文也。《禮記·曲禮》云：「無田祿者不設祭器。」又《王制》云：「大夫士宗廟之祭，有田則祭，無田則薦。」○注「諸侯」至「祭服」○正義曰：《國語·周語》云：「宣王即位，不藉千畝。虢文公諫曰：『不可。夫民之大事在農，上帝之粢盛於是乎出。』」又云：「及期，王裸鬯乃行，百吏庶民畢從。及藉，后稷監之，膳夫、農正陳藉禮，太史贊王，王敬從之。王耕一壠，班三之，庶人終於千畝。」注云：「藉，借也。借民力以爲之。天子藉田千畝，諸侯百畝。」蓋田名藉田，以借助於民，故名。天子先親耕而後民終之，是「躬耕勸率於民」也。天子雖躬耕，不過三推而已。其終收穫，得共粢盛，實由民之助力，故云「收其藉助」也。是耕爲躬耕，助爲民助。若《禮記·樂記》云：「耕藉，然後諸侯知所以敬。」此「耕藉」專

謂躬耕藉田，與孟子云「耕助」不同。助雖與藉義同，然藉指田名，助爲民助也。「粢，稷」，《爾雅·釋草》文。桓公十四年《公羊傳》注云：「黍稷曰粢，在器曰盛。」《說文》皿部云：「盥，黍稷器，所以祀者。」盛黍稷在器中以祀者也。《地官·春人》：「祭祀共其盥盛之米」，注云：「盥盛謂黍稷稻粱之屬，可盛以爲簠簋實。」《春官·小宗伯》：「辨六盥之名物」，注云：「盥讀爲粢，六粢謂六穀，黍稷稻粱麥苽。」然則以器內之實言之謂之盥，即粢也，稷爲穀長以統衆穀而名也；以諸穀在器言之謂之盛。黍稷稻粱等皆在器，皆爲盛也。解者以黍稷曰粢，在器曰盛爲互釋，趙氏以黍稷曰粢，則是稻粱曰盛，故云「盛，稻」也。其實黍稷在器亦名盛，稻粱爲簠簋實，亦統名粢。段氏玉裁《說文解字注》云：「《周禮》一書，或兼言盥盛，若《春人》、《肆師》、《小祝》是也；單言盥，若《大宗伯》、《小宗伯》、《大祝》是也；單言盛，若《饔人》、《廩人》是也。《小宗伯》「逆盥」，注云：「受饔人之盛以入。」然則盥、盛可互稱也。《甸師》注云：「粢，稷也。」穀者稷爲長，是以名。盥、粢古今字也。《毛詩·甫田》作齊，亦作盥，用古文，《禮記》作「粢盛」，用今文。《左傳》作「粢盛」，則用今

①「春人」上，《說文解字注》有「甸師」二字，參沈校。

字之始。《左傳》曰「絜粢豐盛」，毛傳云：「器實曰盥，在器曰盛。」鄭注《周禮》，盥或專訓稷，或訓黍稷稻粱，盛則皆訓在器。是則粢之與盛別者，盥謂穀也，盛謂在器也。許則云：「器曰盥，實之則曰盛。」似與毛、鄭異。蓋許主說字，其字從皿，故謂「其器可盛黍稷曰盥」。要之，盥可盛黍稷，而因謂其所盛黍稷曰盥。凡文字故訓，引伸每多如此，說經與說字不相妨也。《禮記·祭義》云：「古者，天子諸侯必有公桑蠶室。及大昕之朝，君皮弁素積，卜三宮之夫人、世婦之吉者，使人蠶於蠶室，奉種浴於川，桑於公桑，風戾以食之。」此「夫人蠶」之事也。又云：「世婦卒蠶，奉繭以示於君，遂獻繭於夫人。及良日，夫人纁三盆手，遂布於三宮夫人世婦之吉者，使纁，遂朱綠之，玄黃之，以爲黼黻文章。君服以祀先王先公。」注云：「三盆手者，三淹也。凡纁，每淹大總，而手振之以出緒也。」此「夫人纁」之事也。《周禮·天官·內宰》：「中春，詔后帥外內命婦，始蠶於北郊，以爲祭服。」帥即率也。是「衣服」即祭服也。○注「不成」至「辭也」○正義曰：《禮記·曲禮》云「豚曰腍肥」，注云：「腍，亦肥也。腍，充貌也。」桓公六年《左傳》云：「吾牲牷肥腍。」又云：「故奉牲以告曰『博碩肥腍』，謂民力之普存也，謂其畜之碩大蕃滋也，謂其不疾癯蠹也，謂其備腍咸有也。」「犧牲」而云「不

成」，《禮記·中庸》云：「誠者，自成也。」誠之義爲實則成之義亦爲實，故以「不實」解「不成」。《呂氏春秋·明理》篇云「五穀萎敗不成」，又《貴信》篇云「則五種不成」，高誘注並云：「成，熟也。」此不成亦即不實。但五穀之不實謂其不熟，犧牲之不實謂其不肥腍，故又申之以「肥腍」也。劉熙《釋名·釋言語》云：「成，盛也。」肥腍爲充盛也。《詩·齊風》「儀既成兮」，箋云：「成猶備也。」「不成」亦爲不備腍也。《文選·羽臘賦》云「帝將惟田，於靈之囿」，注引薛君《韓詩章句》云：「惟，辭也。」○注「牲必特殺故曰殺」○正義曰：《儀禮·特牲饋食禮》爲諸侯大夫士祭祖禰，《少牢饋食禮》爲諸侯卿大夫祭祖禰之禮，以「少牢」、「特牲」名篇。《少牢禮》：「主人朝服，即位于廟門之外，東方南面，宰，宗人西面北上，牲北首東上。司馬刲羊，司士擊豕，宗人告備，乃退。」注云：「刲，擊皆謂殺之。」《特牲禮》：「宗人視牲，告充，雍正作豕。夙興，主人立于門外東方，南面，視側殺。」注云：「側殺，殺一牲也。」此皆「特殺」之事也。○注「皿所以覆器者也」○正義曰：《說文》：「皿，飯食之器也。象形，與豆同意。讀若猛。」段氏玉裁《說文解字注》謂「汲古閣本飯作飲，誤」。《孟子》「牲殺器皿」，趙注：「皿，所以覆器者。」此謂皿爲帙之假借，似非孟意。廷琥按：皿本無覆器之訓。皿

讀若猛，古音冥、孟同爲一部，孟津亦曰盟津。揚子《太玄經》：「冥者，明之藏也。」皿、幙假借，段說是也。段又謂趙氏覆器之訓，似非孟意，豈以器之有幙，無關禮制乎？《說文》：「幙，慢也。」《周禮》有幙人，幙即幕，亦作幕。幕亦與甬通。《公食大夫禮》：「甸人陳鼎，設局甬，甬若束若編」，《少牢饋食禮》：「皆設局幕」，幕即甬，此覆鼎之幕也。以其覆鼎，故字作甬。鼎甬以茅爲之。天子諸侯有牛鼎，大夫有羊鼎，士有豕鼎魚鼎，庶人魚炙之薦無鼎，則亦無甬，此不待言。《周禮·天官·幕人》注云：「以巾覆物曰幕。」《小爾雅·廣服》云：「大巾謂之幕。」幕即巾也。以其幕物，故亦謂之幕，用布或用葛。《大射儀》：「膳尊兩甬，幕用錫若絺」，《鄉飲酒禮》：「尊給幕」，《鄉射禮》：「尊給幕」，《燕禮》：「公尊瓦大兩，幕用絺若錫」，《少牢》：「尊兩甬於房戶之間，同楹，皆有幕」，所以覆尊者也。《特性禮》：「覆兩壺卒莫幕」，所以覆壺者也。《特性禮》：「簋中以絺纁裹」，所以覆簋者也。《士昏禮》：「醢醬二豆，菹醢四豆，兼巾之」，所以覆豆者也。《公食大夫禮》：「簋有蓋幕」，《有司徹》：「簋有蓋幕」，所以覆簋者也。尊、壺、簋、豆、簠、簣皆有幕，故趙氏以「覆器」二字統之，而上下等殺由此分焉。天子祀天地則以疏布巾幕八尊，祭宗廟則以畫布巾幕八彝。《幕人》：「凡王巾皆黼」，則諸侯大夫士之巾

不黼矣。賈公彥《鄉射禮》疏：「凡用醴不見用幕，質故也。醴用酒亦無幕者，從禮于質也。或以尊厭卑，亦無幕。燕禮君尊有幕，方圓壺則無幕。昏禮尊于室，故有幕，尊于房戶外，爲腰御賤，故無幕。」陳用之云：「人君，尊也，故燕與大射之幕用葛若錫，冬夏異也；人臣，卑也，故鄉飲、士昏喪祭之幕用葛而已，冬夏同也。」是幕之有無分乎文質，即分乎尊卑貴賤。庶人分卑，魚炙之薦，質而無文，則其無幕也宜矣。《燕禮》：「公尊瓦大兩，有幕，尊于東楹之西，兩方壺尊，士旅食于門西，兩圓壺。」注：「尊方壺爲卿大夫士也。旅，衆也。士衆食謂未得正祿，所謂庶人在官者也。」方圓壺無幕，亦足爲「庶人不用幕」之一證。《曲禮》：「爲天子削瓜者副之，巾以絺，爲國君者華之，巾以綌，爲大夫累之，士瘞之，庶人斲之。」大夫降於諸侯，即不用巾。孔疏謂「此削瓜當在公庭」，則不用巾者亦以尊厭卑，又巾幕等級之可考見者也。士之祭禮用幕，《禮》有明文。《孟子》：「惟士無田」云云蒙上「禮」字，若皿是飯食之器，則本文器字已可該括，故趙氏以幙字假借解之。曰「牲殺」，殺即所以用牲也，曰「器皿」，皿即所以覆器也。殺字與牲字一貫，皿字與器字一貫。趙氏之訓未必非孟意也。○注「不祭則不宴猶喪人也」○正義曰：《禮記·檀弓下》云「喪亦不可久也」，又云「喪人

無實」，注云：「喪謂亡失位。」昭公二十五年《公羊傳》云：「喪人不佞，失守魯國之社稷」，注云：「自謂亡人。」

「出疆必載質，何也？」**注**周霄問出疆何爲復載質？曰：「士之仕也，猶農夫之耕也。」

農夫豈爲出疆舍其耒耜哉？」**注**孟子言仕之爲

急，若農夫不可不耕。曰：「晉國亦仕國也，未

嘗聞仕如此其急。仕如此其急也，君子之難

仕，何也？」**注**魏本晉也。周霄曰：我，晉人也，

亦仕，而不知其急若此。君子何爲難仕？君子謂

孟子。何爲不急仕也？**疏**注「我晉人也亦仕而不知其

急若此」○正義曰：推趙氏注，似趙氏所據之本作「晉人亦

仕國也」。「我晉人也」解「晉人」二字，「亦仕」解「亦仕國也」

四字，謂我爲晉人，亦仕於晉國也。乃相傳諸本俱作「晉國

亦仕國也」，則趙氏注「我晉人也」爲無所附矣。近解謂晉國

亦君子遊宦之國。曰：「丈夫生而願爲之有室，

女子生而願爲之有家。父母之心，人皆有

之。不待父母之命，媒妁之言，鑽穴隙相窺，

踰牆相從，則父母國人皆賤之。」**注**言人不可

觸情從欲，須禮而行。**疏**「媒妁之言」○正義曰：《音

義》出「媒妁」，云：「音酌。丁云：『謂媒氏酌二姓之可否，

故謂之媒妁也。』《周禮·地官·媒氏》注云：「媒之言謀

也。謀合異類，使和成者。今齊人名獮豸曰媒。」《說文》女

部云：「媒，謀也。謀合二姓。」酌，酌也。斟酌二姓

也。^②段氏玉裁《說文解字注》云：「斟酌，酌也；酌者，盛酒

行觴也。斟酌二姓」者，如挹彼注茲，欲其調適也。」古之

人未嘗不欲仕也，又惡不由其道。不由其道

而往者，與鑽穴隙之類也。」**注**言古之人雖欲

仕，如不由其正道，是與鑽穴隙者何異？**疏**注「是與

鑽穴隙者何異」○正義曰：趙氏與字屬下讀，「何異」解「類」

字。疑趙氏所據本作「與鑽穴隙類也」。閻、監、毛三本作

「亦與鑽穴隙者無異」。孔氏廣森《經學卮言》云：「與音歟，

絕句。」此以與字屬上句讀。王氏引之《經傳釋辭》云：「與，

語助也。無意義。」

章指：言君子務仕，思播其道。達義

①「妁」，原誤作「灼」，今從沈校據《說文》改。

②「也」，原誤作「人」，今從沈校據《說文》改。

行仁，待禮而動。苟容干祿，踰牆之女，人之所賤，故弗爲也。

疏「苟容干祿」○正義曰：

《韓詩外傳》云：「偷合苟容以持祿養身者，是謂國賊也。」

彭更問曰：「後車數十乘，從者數百人，

以傳食於諸侯，不以泰乎？」**注**泰，甚也。彭

更，孟子弟子。怪孟子徒衆多而傳食於諸侯之國，得無爲甚奢乎？

疏「後車數十乘」○正義曰：閻氏若璩

《釋地三續》云：「《詩綿蠻講義》云：「古人惟尊貴有後車，微賤則無之。」孟子後車即弟子所乘者，不然，從者徒步矣。」

○「傳食於諸侯」○正義曰：《音義》出「傳食」，云：「丁直戀切，言轉食也。」按：《爾雅·釋言》云：「駟，遽，傳也。」成公

五年《左傳》云「晉侯以傳召伯宗」，注云：「傳，驛也。」劉熙《釋名·釋宮室》云：「傳，傳也。人所止息而去，後人復來，

轉轉相傳，無常主也。」然則「傳食」謂舍止諸侯之客館而受其飲食也。○注「泰甚也」○正義曰：《詩·小雅·巧言》

「昊天泰憮」，箋云：「泰言甚也。」《荀子·王霸》篇云「縣樂奢泰，游玩之修」，注云：「泰與汰同。」「奢」「泰」連文，是泰

亦奢也。孟子曰：「非其道，則一簞食不可受於人；如其道，則舜受堯之天下不以爲泰。子以爲泰乎？」**注**簞，筭也。非以其道，一筭之食不可受也。子以舜受堯天下爲泰乎？

疏注「簞筭

也」○正義曰：《禮記·曲禮》云「凡以弓劍、苞苴、簞筭問人者」，注云：「簞筭，盛飯食者。圖曰簞，方曰筭。」《儀禮·士冠禮》云「櫛實于簞」，注云：「簞，筭也。」蓋雖有方圓之別，亦得通稱之也。曰：「否。士無事而食，不可也。」

注彭更曰：不以舜爲泰也。謂士無功事而虛

食人者，不可也。曰：「子不通功易事，以羨補

不足，則農有餘粟，女有餘布，子如通之，則

梓匠輪輿皆得食於子。」**注**孟子言凡人當通功易

事，乃可各以奉其用。梓匠，木工也；輪人，輿人，作車者。交易則得食於子之所有矣。《周禮》攻木

之工七，梓匠輪輿是其四者。羨，餘也。

疏注「周禮」

至「其四」①○正義曰：見《考工記》。○注「羨餘也」○正義曰：《毛詩·小雅·十月之交》「四方有羨」，傳云：「羨，餘也。」趙氏以「餘」釋「羨」，明《孟子》「農有餘粟，女有餘布」兩餘即上「以羨」之羨。女以所羨之布易農所羨之粟，兩相補則皆無不足，惟不相補則各有所餘，斯各有所不足矣。於此有人焉，人則孝，出則悌，守先王之道以待後之學者，而不得食於子，子何尊梓匠輪輿而輕爲仁義者哉？」**注**人則事親孝，出則敬長順也。悌，順也。守先王之道，上德之士可以化俗者。若此不得食子之祿，子何尊彼而賤此也？**疏**注「悌順也」○正義曰：《白虎通·三綱六紀》篇云：「弟，悌也。心順行篤也。」是「悌」爲「順」也。由長而幼，不失次第之序則順，若以幼陵長，則失其序而非順矣。○注「守先」至「俗者」○正義曰：上，尚也。「尚德之士」解「守先王之道」，「可以化俗」解「以待後之學者」。待無化義，《儀禮·公食大夫禮》「左人待載」，注云：「古文待爲俟。」《周禮·服不氏》「以旌居乏而待獲」，杜子春云：「待當爲持，書亦或爲持。」蓋趙氏讀待爲持，謂扶持後之學者，使不廢占先之教。惟守先道以扶持後學，所以有功。

曰：「梓匠輪輿，其志將以求食也；君子之爲道也，其志亦將以求食與？」**注**彭更以爲彼志於食，此亦但志食也？**疏**注「此亦但志食也」○正義曰：也字當作邪字。《荀子·正名》篇云：「其求物也，養生也，粥壽也？」三也字皆與歟，邪同。曰：「子何以其志爲哉？其有功於子，可食而食之矣。」

且子食志乎？食功乎？」**注**孟子言祿以食功，子何食乎？曰：「食志。」**注**彭更以爲當食志也。曰：「有人於此，毀瓦畫墁，其志將以求食也，則子食之乎？」**注**孟子言但破碎瓦，畫地則復墁滅之。此無用之爲也，然而其意反欲求食，則子食乎？**疏**注「孟子」至「爲也」○正義曰：《廣雅·釋詁》云：「破，碎，壞也。」《小爾雅·廣言》云：「毀，壞也。」《孝經釋文》引《蒼頡篇》云：「毀，破也。」《說文》石部云：

- ①「四」下，據本書及阮校所述廖、孔、韓等本注文，當有「者」字。
- ②「但」上，廖本有「人」字。

「破，碎石也。」是「毀瓦」即「破碎瓦」也。《音義》云：「塼，張武安切，云「與謾同」。」阮氏元《校勘記》云：「謾必誤字。謾者，欺也。於此文理不順。依注云「塼滅」，則當云「與塼同」。《集韻》：「塼、塼、塼三字同也。塼乃塼之俗。」翟氏灝《攷異》云：「趙氏以「毀瓦畫塼」四字爲一義，則畫塼是畫脂鏤冰，費日損功之意。宋張芸叟著雜說一卷名《畫塼集》，蓋取此。」按：《爾雅·釋宮》云：「鏤謂之朽。」《說文》木部云：「朽，所以涂也。秦謂之朽，關東謂之塼。塼，朽也。」金部云：「鏤，鐵朽也。或從木。」段氏玉裁《說文解字注》云：「此器，今江浙以鐵爲之，或以木。《戰國策》：「豫讓變姓名，入宮塗廁，欲以刺襄子。襄子如廁，心動，執問塗者，則豫讓也。刃其杵，曰：欲爲智伯報仇。」杵謂塗廁之杵，今本皆作扞，謬甚。刃其杵，謂皆用木而獨刃之。」然則塼、杵皆器名。《論語·八佾》篇云「糞土之牆，不可朽也」，王肅注云：「朽，塼也。」襄公三十一年《左傳》云「圻人以時塼館宮室」，注云：「圻人，塗者。塼，塗也。」朽、塼皆器，用以塗牆，則塗謂之朽，即謂之塼，因而塗牆之人即謂之圻人。塼即塼，一聲相轉。推趙氏之義，蓋「破碎瓦」爲一事，即謂將全瓦破碎之，非以破碎瓦畫地也；「畫地則復塼滅之」，別爲一事。《說文》云：「畫，界也。象田四界。聿，所以畫之。」又

刀部云：「則，等畫物也。」謂物有差等，畫以爲界。趙氏謂田地已有界畫，而復將所界畫之迹用泥涂而滅去之。瓦破碎，則無能造屋，所畫界圻滅則等差無所驗。是皆以有用爲無用也。若劃，爲古文畫。《說文》刀部云：「刳，劃傷也。」「斲，剝也，劃也。」劃，錐刀曰劃。依此則謂新圻塼之牆而用錐刀斲劃之，義亦通。曰：「否。」**注**彭更曰：不然也。曰：「然則子非食志也，食功也。」**注**孟子曰：如是則子果食功也。

章指：言百工食力，以祿養賢，脩仁尚義，國之所尊。移風易俗，其功可珍。雖食諸侯，不爲素餐。**疏**「移風易俗」○正義曰：語見《孝經》「廣要道」章。又《禮記·樂記》云：「移風易俗，天下皆寧。」

萬章問曰：「宋，小國也。今將行王政，齊楚惡而伐之，則如之何？」**注**問宋當如齊楚何也？**疏**「今將」至「伐之」○正義曰：《史記·宋

世家》云：「偃自立爲宋君。君偃十一年，自立爲王。東

敗齊，取五城；南敗楚，取地三百里；西敗魏軍。^①乃與齊魏爲敵國。盛血以韋囊，縣而射之，命曰射天。淫於酒、婦人。羣臣諫者輒射之。於是諸侯皆曰：「桀宋，宋其復爲紂所爲，不可不誅。」告齊伐宋。王偃立四十七年，齊湣王與魏、楚伐宋，殺王偃，遂滅宋，三分其地。」按：《史記》稱宋王爲桀紂，與萬章「行王政」之言迥別，或出於齊楚惡之之口，《史》非其實歟？周氏廣業《孟子出處時地考》云：「孟子去齊居休，旋歸於鄒，年六十餘矣。聞宋王偃將行仁政，往游焉。會齊楚惡而伐之，萬章以國小爲慮，孟子以湯武之事告之，蓋以弔伐望宋王也。觀孟子與萬章問答，^②意其初政尚有可觀者。《戰國策》所謂「射天笞地」，《世家》所書「淫於酒、婦人」，「諸侯皆謂桀宋」者，乃其晚節不終，時孟子去宋已久矣。齊楚之伐，《國策》云：「齊攻宋，使臧子索救於荆，荆王許救而卒不至，齊因拔宋五城。」是也。《策》繫於剔成之世，鮑彪注因言「孟子所稱，審皆剔成矣」，吳師道已譏其傳會。又《史·蘇秦傳》：「齊伐宋，宋急，蘇代乃遺燕昭王書，勸之伐齊。」亦正在殺子噲後。」孟子曰：「湯居亳，與葛爲鄰。葛伯放而不祀，湯使人問之曰：『何爲不

祀？』曰：『無以供犧牲也。』湯使遺之牛羊。葛伯食之，又不以祀。」**注**葛，夏諸侯，嬴姓之國。放縱無道，不祀先祖。

疏「湯居亳與葛爲鄰」○正義曰：《漢書·地理志》「陳留郡寧陵」，孟康曰：

「故葛伯國，今葛鄉是。」「山陽郡薄」，臣瓚曰：「湯所都。」

「河南郡偃師，尸鄉，殷湯所都」，臣瓚曰：「湯居亳，今濟陰縣是也。今亳有湯冢。」師古曰：「瓚說非也。皇甫謐

所云「湯都在穀熟」，事並不經。劉向云：「殷湯無葬處。」

安得湯冢乎？」閻氏若璩《尚書古文疏證》云：「亳有三：

一南亳，後漢梁國穀熟縣是，湯所都也；一北亳，梁國蒙

縣是，即景亳，湯所盟地；一西亳，河南尹偃師縣是，盤庚

之遷都也。鄭康成謂湯亳在偃師，皇甫謐即據《孟子》以

正之曰：「湯居亳，與葛爲鄰。葛即今梁國寧陵之葛鄉，

若湯居偃師，去寧陵八百餘里，豈當使民爲之耕乎？亳，

今穀熟縣是也。」其說精矣。」王氏鳴盛《尚書後案》云：

「皇甫謐以偃師爲西亳，而別以蒙爲北亳，穀熟爲南亳。

①「軍」，原誤作「君」，今從沈校據《史記》改。

②「答」，原誤作「達」，今據《孟子四考》及經解本改。

案，《續志》梁國屬縣有蒙有穀熟，劉昭注即引謚《帝王世紀》「蒙，北亳，穀熟，南亳」之文。梁國屬縣又有薄，司馬彪自注「湯所都」，此蓋彪本之臣瓚者。劉昭又引杜預《左傳注》注之云：「蒙縣西北有薄城，中有湯冢。」於是張守節《史記正義》云：「湯即位，都南亳，後徙西亳。」謚又以《孟子》「湯居亳，與葛鄰」，葛在寧陵，去偃師八百里太遠，故知湯本居南亳穀熟，後乃遷西亳偃師。與葛鄰，乃是居南亳時事，見《帝告釐沃序》疏。《盤庚》言商先王五遷，鄭、馬、王皆以湯始居商丘，後遷於亳，當五遷之二。《水經注》：「汴水東經大蒙城北。」大蒙城在今河南歸德府商丘縣北四十里，穀熟故城在今商丘縣東南四十里，湯本居此，後乃遷偃師。即其後微子封此，亦以湯之舊邑而封之，謚說似非無稽。但馬、鄭惟言湯曾居商丘，商丘本不名亳。觀《漢志》但於偃師言「湯都」，而梁國蒙縣、山陽郡薄縣不言是亳，可見謚因經言三亳，遂造北亳、南亳配偃師而名三，其實蒙、穀熟古但名商丘，不名亳也。杜預、臣瓚、司馬彪皆晉人，劉昭梁人，妄相附和，豈如班固、鄭康成之可信乎？其辨一也。既名三亳，宜遠近相等。商丘、偃師相去七八百里，蒙、穀熟，相去只數十里，分之無可分也。即如其說，只有東西二亳耳，奈何於數十里中強

分爲二，欲以充數乎？其辨二也。商丘平衍，與成皋等地大不類，何山險之有而云阪乎？其辨三也。《漢志》云：「宋地，今之沛、梁、楚、山陽、沛陰、東平，及東郡之須昌、壽張，皆宋分也。」蓋諸郡國皆微子所封，杜猶稱亳，當時人或以亳在宋地。班氏於此文下又云：「昔堯游成陽，舜漁雷澤，湯止於薄。」則此爲湯嘗游息之地，後人遂往往指稱亳在梁國沛陰、山陽之間，而其實湯都則在偃師，與宋地無涉也。蓋薄縣者，漢本屬山陽郡，後漢分其地置蒙、穀熟與薄，並改屬梁國。晉又改薄爲亳，且改屬沛陰，故臣瓚所謂「湯都在沛陰亳縣」者即其所謂「在山陽薄縣」者也，亦即司馬彪所謂「在梁國薄縣」，杜預所謂「在蒙縣北亳城」者也。而亦即皇甫謐所分屬於蒙、穀熟者也，本一說也。薄，薄也，非亳也。《立政》「三亳」，鄭解爲「遷亳之民而分爲三亳」，本一耳，焉得有三？湯都定在偃師，而所謂偃師去葛太遠，不便代耕，不足辨矣。○注「葛夏諸侯嬴姓之國」○正義曰：僖公十七年《左傳》云「葛嬴生昭公」，葛嬴爲如夫人之一，以衛姬、鄭姬、華子等例之，則葛爲國、嬴爲姓矣。《說文》女部云：「嬴，帝少皞之姓也。」春秋時秦、徐、江、黃、邾、莒皆嬴姓，葛嬴猶徐嬴，齊桓時葛尚存歟？○注「放縱無道」○正義曰：《楚辭·離

騷《云》「夏康娛以自縱」，注云：「縱，放也。」湯又使人問之曰：「何爲不祀？」曰：「無以供粢盛也。」湯使亳衆往爲之耕，老弱饋食。葛伯率其民，要其有酒食黍稻者奪之，不授者殺之。有童子以黍肉餉，殺而奪之。《書》曰「葛伯仇餉」，此之謂也。**注**童子未成人，殺之尤無狀。《書》、《尚書》逸篇也。仇，怨也。言湯所以伐殺葛伯，怨其害此餉也。**疏**注「童子」至「無狀」

○正義曰：《禮記·曲禮》云「自稱於其君曰小童」，注云：「小童，若云未成人也。」《雜記》稱「陽童某甫」，注云：「童，未成人之稱也。」《少儀》「童子曰聽事」，注云：「童子，未成人。」《詩·芄蘭》正義以十九歲以下皆是。《漢書·東方朔傳》「竇太主徒跣頓首謝曰：「妾無狀，負陛下，身當伏誅」，師古曰：「狀，形貌也。無狀猶言無顏面以見人也。一曰自言所行醜惡無善狀。」按：趙氏用「無狀」爲葛伯罪，當謂其醜惡無善狀也。○注「尚書」至「餉也」**①**○正義曰：王氏鳴盛《尚書後案》云：「考之《書序》「湯征諸侯，葛伯不祀，湯始征之，作《湯征》」，則「葛伯

仇餉」及「湯一征自葛始」云云，正《湯征》中語。上引「仇餉」既言《書》曰，則中雖間以釋《書》，而其下引「一征」則不復言《書》曰，至其下「徯我后」，則又加《書》曰，其非一篇甚明。「桓公二年《左傳》云「怨耦曰仇」，是「仇」爲「怨」也。葛伯不當怨餉者，云「仇餉」是謂其殺童子，使餉者仇怨之。不云「餉者仇葛伯」而云「葛伯仇餉」，古人屬文每如是也。下云「爲匹夫匹婦復仇」，則仇在匹夫怨葛伯也。葛仇殺餉，是葛伯以仇怨授餉者，故云「仇餉」也。江氏聲《尚書集注音疏》云：「仇餉謂葛伯殺餉者。」是仇此餉者矣。爲其殺是童子而征之，四海之內皆曰：「非富天下也，爲匹夫匹婦復讎也。」**注**四海之民皆曰：湯不貪天下富也，爲一夫報仇也。**疏**注「爲一夫報仇也」○正義曰：《周禮·天官·宰夫》「諸侯之復」，注云：「復，報也。」是「復讎」即「報仇」。《史記·晉世家》云：「仇者，讎也。」《書》作仇，孟子以讎釋之。趙氏以仇釋讎，明孟子言讎即《書》仇餉之仇也。

①「尚書」上，據本書及阮校所述廖、孔、韓等本注文，當有「書」字。

「湯始征，自葛載。」十一征而無敵於天下。東面而征，西夷怨；南面而征，北狄怨，曰：「奚爲後我？」民之望之，若大旱之望雨也。歸市者弗止，芸者不變。誅其君，弔其民，如時雨降。民大悅。《書》曰：「徯我后，後來其無罰。」**注**載，始也。言湯初征自葛始也。十一征而服天下。一說言當作「再」字。再十一者，湯再征十一國。再十一，凡征二十二國也。《書》逸篇也。民日待我君，君來，我則無罰矣。歸市不止，不以有軍來征，故市者止不行也。不使芸者變休也。**疏**注「載始」至「國也」○正義曰：載與哉通，《爾雅·釋詁》云：「哉，始也。」故《毛詩·周頌》載見辟王，傳云：「載，始也。」《梁惠王》篇云：「湯一征，自葛始。」與此文略同。一即始也。始即載也。《爾雅·釋天》云「唐虞曰載」，孫炎注云：「載取萬物終而復始。」終而復始，義爲再，故一說以載作再。載屬下讀則「湯始征自葛」爲句。晚出古文《尚書·仲虺之誥》作「初征自葛」，蓋本此一說也。《隋書·煬帝伐高麗詔》云：「黃帝五十二戰，成湯二十七征。」此

又多於二十二。古書殘缺，未知所本矣。王氏鳴盛《尚書後案》云：「其蘇、無罰互異，乃古人引經不拘處，猶上文易一爲始，易始爲載耳。」○注「不使芸者變休也」○正義曰：《爾雅·釋詁》云：「休，息也。」謂芸者本勤動，變而止息。「有攸不惟臣，東征，綏厥士女，匪厥玄黃，紹我周王見休，惟臣附于大邑周。」其君子實玄黃於匪以迎其君子，其小人簞食壺漿以迎其小人。救民於水火之中，取其殘而已矣。**注**從「有攸」以下，道周武王伐紂時也，皆《尚書》逸篇之文。攸，所也。言武王東征，安天下士女，小人各有所執往，無不惟念執臣子之節。匪厥玄黃謂諸侯執玄三纁二之帛，願見周王，望見休善，使我得附就大邑周家也。其君子、小人各有所執以迎其類也。言武王之師救殷民於水火之中，討其殘賊也。**疏**注「從有攸」至「賊也」○正義曰：江氏聲《尚書集注音疏》云：「不類《孟子》之文而大類《尚書》，雖不稱《書》曰，自是《尚書》文也。據《孟子》本文承「大邑周」之下，云「其君子實玄黃于匪」至「取其殘而已矣」。趙氏《章指》於「而已矣」下乃

云「從有攸以下，①道武王伐紂時也，皆《尚書》逸篇之文也」，是則統「其君子」以下云云皆爲逸《書》文矣。詳釋其文，則「其君子」以下乃孟子申說《書》意，非《尚書》文。「攸，所也」，《爾雅·釋言》文。《大戴記·夏小正》「綏多士女」，傳云：「綏，安也。」「綏厥士女」即「安天下士女」也。《爾雅·釋詁》云：「惟，思也。」《詩·維天之命》序《釋文》引《韓詩》云：「惟，念也。」云「小人各有所執往」，解「有攸」二字，「無不惟念執臣子之節」，「不惟」惟也，猶「不顯」顯也，「不承」承也，故以「無不」解「不」字。《詩·商頌》「有截其所」，箋云：「所，處也。」《孟子》云「無處而餽之」，此「有攸」即「有所」，「有所」即「有處」。因下言「其小人簞食壺漿」，小人即士女，故通下而言「有所執往」也，謂其執往非無處也。其有所處也，即「惟念執臣子之節」也。「有攸不惟臣」乃小人，故申言「東征，綏厥士女」，謂士女所以有所惟臣者，以武王東征來安之也。趙氏倒解之耳。《音義》出「匪厥」，云：「丁云：『義當作篚，篚以盛贄幣。此作匪，古字借用。』」阮氏元《校勘記》云：「《說文》『部：『匪，似竹篋。』引《周書》『實玄黃于匪』。非借用，乃正字也。竹部篚訓『車笭也』。《儀禮·聘禮》云『釋幣，制玄纁，束』，注云：『凡物十曰束。玄纁之率，玄居三，纁居二。』賈氏疏云：『言率皆如是。玄三

纁二者，象天三覆，地二載也。」《禹貢》：「荊州厥篚玄纁。」《說文》系部云：「絳，大赤也。」「纁，淺絳也。」蓋赤和以黃則淺。赤合黃爲纁，赤合黑爲玄，故玄黃即玄纁也。《史記·魯仲連列傳》平原君曰：「勝請爲紹介而見之於先生」，《集解》引郭璞云：「紹介，相佑助者。」趙氏以「願見」釋「紹介」字，本此。凡請見必由介紹也，《周禮·秋官·司儀》：「及將幣，交擯三辭，車逆，拜辱，賓車進，答拜，三揖三讓。每門止一相，及廟，唯上相入。」注云：「相謂主君擯者及賓之介也。謂之相者，於外傳辭耳。介紹而傳命者，君子於其所尊不敢質，敬之至也。」是時諸侯匪厥玄黃來請見，謂相者曰：「其介紹我周王，傳我願見之意，使我得見休而臣附於大邑周也。」曰「我周王」，親之也，曰「大邑周」，尊之也。二句乃述諸侯請見之辭也。以「望」釋「見」，以「善」釋「休」，以「就」釋「附」。「惟臣」即「不惟臣」，亦念也。《太誓》曰：「我武惟揚，侵于之疆。則取于殘，殺伐用張，于湯有光。」注《太誓》，古《尚書》百二十篇之時《太誓》也。我武王用武之「時惟鷹揚」也。侵于之疆，

①「章指」，沈校：當作「章句」。

侵紂之疆界。則取于殘賊者以張殺伐之功也。民有簞食壺漿之歡。比於湯伐桀爲有光寵，^①美武王德優前代也。今之《尚書·太誓》篇後得以充學，故不與古《太誓》同。諸傳記引《太誓》皆古《太誓》。

疏注「太誓」至「古太誓」○正義曰：《尚書序》正義引鄭氏《書論》依《尚書緯》云：「孔子求《書》，得黃帝玄孫帝魁之書，迄於秦穆公，凡三千二百四十篇，斷遠取近，定可以爲世法者百二十篇。以百二篇爲《尚書》，十八篇爲《中候》。」此趙氏云「古《尚書》百二十篇」所本也。《史記·儒林傳》云：「秦時焚書，伏生壁藏之。其後兵大起，流亡。漢定，伏生求其《書》，亡數十篇，獨得二十九篇。」劉向《別錄》云：「武帝末，民有得《泰誓》書於壁內者，獻之，與博士讀說之。」《漢書·藝文志》：「《尚書》古文經四十六卷，爲五十七篇。經二十九卷，大、小夏侯二家。」《楚元王傳》注臣瓚曰：「當時學者謂《尚書》惟有二十八篇。」惠氏棟《古文尚書攷》云：「二十八篇者，伏生也，二十九篇者，夏侯也，依伏生數增《太誓》一篇。」蓋伏生所藏百篇僅存二十八篇，已無《太誓》。其時列於學官二十九篇之《太誓》乃民間於壁中得之，故云「後得以充學」也。此文明云《太誓》當時後得之，《太誓》無

此文，故趙氏以爲是古《太誓》也。後得之《泰誓》今亦不存，惟《史記·周本紀》載之。近儒王氏鳴盛、江氏聲、孫氏星衍皆掇拾成篇。然《坊記》引「《太誓》曰」云云，鄭氏注云：「此武王誓衆以伐紂之辭也。今《太誓》無此章，則其篇散亡。」鄭云「今《太誓》無此章」，則亦以爲古《太誓》矣。馬融《書敘》云：「《泰誓》後得。按，其文似若淺露。《春秋》引《太誓》曰「朕夢協朕卜，襲於休祥，戎商必克」，《孟子》引《太誓》曰「我武惟揚，侵于之疆，取彼凶殘，我伐用張，于湯有光」，孫卿引《太誓》曰「獨夫受」，《禮記》引《太誓》曰「予克受，非予武，唯朕文考無罪，受克予，非朕文考有罪，惟予小子無良」，今文《太誓》皆無此語。吾見書傳多矣，所引《太誓》而不在《太誓》者甚多，弗復悉記。」趙氏云「諸傳記引《太誓》皆古《泰誓》，固馬氏說也。孔氏廣森《經學卮言》云：「《經典釋文》云：「漢宣帝本始中，河內女子得《太誓》一篇獻之，與伏生所誦合三十篇。漢世行之。」按，劉向《別錄》云「武帝末有得《泰誓》於壁內者」。陸謂本始中，非也。然其云《太誓》一篇者，得之。蓋漢世僅見三篇之一。故《語》、《孟》、《左傳》所引《太誓》皆適在其所未見兩篇中。意時博士有附

①「比」，原誤作「此」，今據廖本改。

會《書序》強分爲三者，乃適致馬融之疑耳。「時維鷹揚」，《毛詩·大雅·大明》第八章文。傳云：「如鷹之飛揚也。」《易·師》九二傳云「承天寵也」，《釋文》引鄭注云：「寵，光耀也。」是「光」即「寵」也。不行王政云爾。苟行王政，四海之內皆舉首而望之，欲以爲君。齊楚雖大，何畏焉？**注**萬章憂宋迫於齊楚，不得行政，故孟子爲陳殷湯周武之事以喻之。誠能行之，天下思以爲君，何畏齊楚焉？

章指：言脩德無小，暴慢無強。是故夏商之末，民思湯武。雖欲不王，末由也已。**疏**「脩德無小暴慢無強」○正義曰：《韓非子·內

儲說》衛嗣君曰「治無小而亂無大」，亦此意。○「民思湯武」○正義曰：《淮南子·道應訓》云：「尹佚曰：『天地之間，四海之內，善之則吾畜也，不善則吾讎也。昔夏商之臣，反讎桀紂而臣湯武。』」是其義也。

孟子謂戴不勝曰：「子欲子之王之善與？我明告子。」**注**不勝，宋臣。**疏**注「不勝宋

臣」○正義曰：《荀子·解蔽》篇云「唐執蔽於欲權而逐載子」，注云：「載讀爲戴。戴不勝，使辭居州傅王者，見《孟子》。或曰：戴子，戴驩也。」按：戴驩爲宋太宰，見《韓非子·內儲說上》。楊倞以「或曰」別之，則不勝非驩矣。趙氏佑《溫故錄》云：「戴不勝即戴盈之，一名一字也，宋之公族執政者。唯宋始終以公族爲政，《左傳》紀列最詳。至戰國晉分齊篡，而宋猶綫脈相延，不失舊物，本枝之道得也。」全氏祖望《經史問答》云：「潛丘謂孟子去齊適宋當周慎靚王之三年，正康王改元之歲，宋始稱王是也。孟子不見諸侯，故問答止於梁齊，小國則滕而已，雖曾游宋，而於康王無問答，則不足以定其見與否也。然所以游宋亦有故。蓋康王初年，亦嘗講行仁義之政，其臣如盈之，如不勝議行什一，議去關市之征，進居州以輔王，斯孟子所以往而受七十鎰之饋也。謂孟子在辟公時游宋，蓋是鮑彪，其考古最疏略。」有楚大夫於此，欲其子之齊語也，則使齊人傅諸？使楚人傅諸？**注**孟子假喻有楚大夫在此，欲變其子使學齊言，當使齊人傅之邪，使楚人自傅相之邪？曰：「使齊人傅之。」**注**不勝曰：使齊人。曰：

「一齊人傳之，衆楚人咻之，雖日撻而求其齊也，不可得矣。引而置之莊嶽之間數年，雖日撻而求其楚，亦不可得矣。」**注**言使一齊人傳相，衆楚人咻之。咻之者，謹也。如此，雖日撻之，欲使齊言，不可得矣。言寡不勝衆也。莊，嶽，齊街里名也。多人處之數年而自齊也。**疏**注

「咻之者謹也」○正義曰：《音義》出「囉也」，云：「丁云：『按，《玉篇》音囁，招呼也。今釋注意，音歡爲便。蓋字謹譌同。』」阮氏元《校勘記》云：「韓本作謹是，①孔本、盧本作囉，非。謹即今之誼譌字也。『《玉篇》音囁，招呼也』，此語甚誤。謹不得有囁音。攷《玉篇》部部「囁，荒貫切，呼也。」與喚同。」然則丁云「按，《玉篇》作囁」，轉寫譌作「音囁」。○注「莊嶽齊街里名也」○正義曰：顧氏炎武《日知錄》云：「莊是街名，嶽是里名。《左傳》襄二十八年『得慶氏之木百車於莊』，注云：『六軌之道。』」反陳于嶽」，注云：「嶽，里名。」昭十年「又敗諸莊」，哀六年「戰于莊，敗」，注並同。「閻氏若璩《釋地》引《炳燭齋隨筆》與顧同。按：宋費衮《梁谿漫志》解《孟子》「莊嶽」，即引《左氏》襄公二十八年《傳》。又云：「曹參爲齊相，屬後相

曰：「以齊嶽市爲寄，勿擾也。」嶽字合從嶽音，蓋謂嶽市乃齊闐闐之地，姦人所容，故當勿擾之耳。」子謂辭居州善士也，使之居於王所。在於王所者，長幼卑尊皆辭居州也，王誰與爲不善？**注**孟

子曰：不勝常言居州，宋之善士也，欲使居於王所。如使在王所者小大皆如居州，則王誰與爲不善也？在王所者，長幼卑尊皆非辭居州也，王誰與爲善？一辭居州，獨如宋王何？」

注如使在王左右者皆非居州之疇，王當誰與爲善乎？一辭居州獨如宋王何而能化之也？周之末世，列國皆僭號自稱王，故曰「宋王」也。**疏**「獨如宋王何」○正義曰：獨猶一也。僅一居州，獨能如宋王何乎？此趙氏義也。王氏引之《經傳釋詞》云：「獨猶將也。宣四年《左傳》曰：『棄君之命，獨誰愛之？』」《楚語》曰：「其獨何力以待之？」《孟子·滕文公》篇曰：「一辭居

①「謹」，原誤作「囉」，今據阮元《孟子音義校勘記》卷上改。

州，獨如宋王何？」

章指：言自非聖人，在所變化。故諺

曰：「白沙在涅，不染自黑；蓬生麻中，不扶自直。」言輔之者衆也。**疏**「白沙」至「衆也」

○正義曰：《大戴禮記·曾子制言上》云：「蓬生麻中，不扶自直，白沙在泥，與之俱黑。」注云：「古說云扶化之者衆。」《荀子·勸學》篇云：「蓬生麻中，不扶而直，故君子居必擇鄉，遊必就士，所以防邪僻而近中正也。」褚先生補《史記·三王世家》云：「傳曰『蓬生麻中，不扶自直，白沙在泥中，與之俱黑』者，土地教化使之然也。」《說文》水部云：「涅謂黑土在水中者也。」黑土在水中即汙泥耳。故《廣雅·釋詁三》云：「涅，泥也。」故趙氏以「涅」代「泥」。《文選》潘安仁爲賈謐作《贈陸機詩》云「在涅則渝」，注既引曾子曰：「沙在泥，與之俱黑。」又引趙岐《孟子章句》云：「白沙入泥，不染自黑。」此泥字乃涅之譌。詩作涅，注並引曾子、趙岐，明涅是泥。若均作泥，何以釋詩之涅矣？《說苑》作「白沙入泥」，李善蓋以是誤也。《音義》出涅字，云：「奴結切。」是趙氏作涅不作泥也。《說苑》又作「蓬生梟中」，梟亦麻也。扶即輔也。

孟子正義卷十二終

孫授易授詩校字

孟子正義卷十三

江都縣鄉貢士焦循撰集

公孫丑問曰：「不見諸侯，何義？」**注**丑怪孟子不肯每輒應諸侯之聘。不見之，於義謂何也？孟子曰：「古者不爲臣不見。」**注**古者不爲臣，不肯見不義而富且貴者也。**疏**注「不義而富且

貴也」○正義曰：《論語·述而》篇文。段干木踰垣而

辟之，泄柳閉門而不內。是皆已甚。迫，斯

可以見矣。**注**孟子言魏文侯、魯繆公有好義之心，而此二人距之太甚。迫窄則可以見之。**疏**「段

干木踰垣而辟之」○正義曰：《史記·老子列傳》云：「老子

之子名宗。宗爲魏將，封於段干。」裴駰《集解》云：「此云封

於段干，段干應是魏邑名也。」而《魏世家》有段干木、段干

子，《田完世家》有段干明，疑此三人是姓段干也。本蓋因邑爲姓。《風俗通·氏姓》注云：「姓段，名干木。」恐或失之矣。《魏世家》云：「文侯受子夏經藝，客段干木，過其間未嘗不軾也。秦嘗欲伐魏，或曰：『魏君賢人是禮，國人稱仁，上下和合，未可圖也。』」文侯由此得譽於諸侯。《正義》引皇甫謐《高士傳》云：「木，晉人也。守道不仕。魏文侯欲見，造其門，干木踰牆避之。文侯以客禮待之。」《呂氏春秋·下賢》篇云：「魏文侯見段干木，立倦而不敢息。」然則其始雖踰垣避，其後亦見矣。○「泄柳閉門而不內」○正義曰：閩、監、毛三本內作納。阮氏元《校勘記》云：「《音義》出『不內』。作內是也。」○注「迫窄」○正義曰：《說文》竹部云：「箝，迫也。」是部云：「迫，近也。」蓋謂君既來近我，我則可以見之。窄即箝字，又通作迫。《爾雅·釋言》云：「逼，迫也。」《小爾雅·廣詁》云：「逼，近也。」是逼迫義亦爲近。陽貨欲見孔子而惡無禮。大夫有賜於士，不得受於其家，則往拜其門。**注**陽貨，魯大夫也。孔子，士也。**疏**「大夫」至「其門」○正義曰：毛氏奇齡《四書賸言》云：「大夫有賜於士，不得受於其家，則往拜其門。此大夫禮也，乃引之以稱陽貨。向以此詢之

座客，皆四顧駭愕。不知季氏家臣原稱大夫，季氏是司徒，下有大夫二人，一曰小宰，一曰小司徒，此大國命卿之臣之明稱也。故邑宰、家臣當時通稱大夫。如邱邑大夫、鄆邑大夫、孔子父鄆邑大夫。此邑大夫也。陳子車之妻與家大夫謀，季康子欲伐邾，問之諸大夫，季氏之臣申豐、杜氏注爲「屬大夫」，公叔文子之臣，《論語》稱爲「臣大夫」。此家大夫也。然則陽貨大夫矣。」全氏祖望《經史問答》云：「嘗考《小戴記·玉藻》篇有云：『大夫親賜於士，士拜受，又拜於其室。敵者不在，拜於其室。』則是大夫有賜，無問在與不在，皆當往拜。若不得受而往拜者，是乃敵體之降禮。陽虎若以大夫之禮來，尚何事矚亡？正惟以敵者之故，不得不出此苦心曲意，而乃謂其所行者爲大夫之故事，則不惟誣孔子，亦並冤陽貨也。或曰：然則孟子非與？曰：《孟子》七篇所引《尚書》、《論語》及諸禮，文互異者十之八九。古人援引文字，不必屑屑章句，而孟子爲甚。孔子所行者是《玉藻》，非如《孟子》所云也。」周氏柄中《辨正》云：「既拜受而又拜于其室者，禮謂之『再拜』。此《記》上言『酒肉之賜弗再拜』，孔疏云：『酒肉輕，但初賜至時則拜，至明日不重往拜也。』下言『大夫親賜士，士拜受，又拜於其室』，孔疏云：『此非酒肉之賜，故再拜。』陽貨饋蒸豚，正所謂酒肉之賜弗再拜

者，故必矚亡而來，非以敵體之禮而然也。全氏讀禮不審而反以孟子爲冤誣，妄矣。」陽貨矚孔子之亡也而饋孔子蒸豚，孔子亦矚其亡也而往拜之。當是時，陽貨先，豈得不見？**注**矚，視也。陽貨視

孔子亡而饋之者，欲使孔子來答，恐其便答拜使人也。孔子矚其亡者，心不欲見陽貨也。《論語》曰「饋孔子豚」，《孟子》曰「蒸豚」。豚非大牲，故用熟饋也。是時陽貨先加禮，豈得不往拜見之哉？**疏**

注「矚視」至「見之哉」○正義曰：王氏念孫《廣雅疏證》云：

「觀，闕，視也。《玉篇》、《廣韻》並云：『觀，視也。』《集韻》、《類篇》：『觀，又音時。』引《廣雅》：『觀，視也。』《釋言》篇云：『時，伺也。』《論語·陽貨》篇「孔子時其亡也而往拜之」，義與觀同。闕與矚字同。字亦作矚。《說文》：「闕，望也。」阮氏元《校勘記》云：「《音義》：『矚或作闕。』依《說文》則闕是正字。」趙氏佑《溫故錄》云：「陽貨援大夫賜士之禮以嘗孔子，又矚亡而饋，無禮已明，不得謂貨之能先也。亦矚亡而往，乃孔子之以人治人，終於不見，不得謂之往見也。孟子蓋即從往拜一事原聖人不爲已甚之心，以申「迫斯可見」之意，言以貨之悖慢，孔子猶往拜之，使是時貨果能先

加禮如文侯、繆公之來就見孔子，豈有必不見之如踰垣、閉門之甚者哉？注似能體之，故云：「孔子矚其亡者，心不欲見陽貨也。」明以不見爲實事而先爲設辭，「豈得」二字爲反言以申之，不似俗解直以貨之饋爲先，而孔子之往拜爲見也。蓋此兩節皆正答不見之義。以見之必待於先，段、泄先猶不見，孔子不先不見也，不先而見，則小人而已矣。《方言》云：「豬，北燕、朝鮮之間謂之豨，關東西謂之豨，或謂之豨。其子或謂之豚。」是「豚非大牲」也。曾子曰：「脅肩諂笑，病于夏畦。」注「脅肩，竦體也；諂笑，強笑也。病，極也。言其意苦勞極，甚於仲夏之月治畦、灌園之勤也。」疏注「脅肩竦體也諂笑強笑也」○正義曰：《詩·大雅·抑》篇云「視爾友君子，輯柔爾顏」，箋云：「今視女諸侯及卿大夫，皆脅肩諂笑，以和安女顏色。」《文選·揚雄解嘲》注引劉熙《孟子注》云：「脅肩，竦體也。」趙氏注與之同，悚、竦字通也。閻氏若璩《釋地又續》云：「《漢書·外戚傳》上官太后親霍后之姊子，故常霍后朝，竦體敬而禮之，豈諂之謂乎？」《吳王濞傳》「脅肩僂足」、《鄒陽傳》「脅肩低首」，師古注並云：「脅，僂也。」謂僂之也。《揚雄傳》則作「僂肩」，注則云：「僂，斂也。」蓋斂其兩肩，爲

卑縮之狀，小人之事人者耳。按：趙氏以爲「竦體」者，脅、僂聲相近。《說文》羽部云：「僂，起也。」僂肩正是竦起其肩，蓋人低首爲恭敬，則兩肩必竦起。《吳王劉濞列傳》應高說膠西王曰：「常患見疑，無以自白，脅肩僂足，猶懼不見釋。」《鄒陽列傳》公孫瓚爲濟北王說梁王曰：「功義如此，尚見疑於上，脅肩低首，僂足撫衿。」兩脅肩正言竦懼，則脅正是竦。鄒陽於「脅肩」「僂足」之間加入「低首」二字，尤爲明白。《列女傳》魯義姑姊云：「如是則脅肩無所容，而累足無所履也。」此正以卑諂言，謂雖卑諂亦不吾與。師古不知僂訓爲起而徒以斂訓之，閻氏依以譏趙氏，未爲得也。《荀子·脩身》篇云：「從命而不利君謂之諂。」《莊子·漁父》云：「希意道言謂之諂。」因人之意爲笑，是爲「諂笑」，笑非由中，故是「強」也。脅肩者，故爲竦敬之狀也，諂笑者，強爲媚悅之顏也。○注「病極」至「之勤也」○正義曰：《呂氏春秋·適音》篇云「以危聽清則耳谿極」，高誘注云：「極，病也。」又《權勳》篇云「觸子苦之」，高誘注云：「苦，病也。」淮南子·精神訓》云「好憎者使入之心勞」，高誘注云：「勞，病也。」是苦、勞、極皆病也。孟子言周正，則夏爲夏之二月三月四月。趙氏以「仲夏」言，則周之五月，夏之三月也。《史記·貨殖傳》云「畦薑韭」，《楚辭·離騷》篇云「畦留夷與

揭車兮」，是畦爲菜圃之埽也。何氏焯《讀書記》云：「治畦是先築土爲行水之道，灌園則桔槔俯仰，引水注之。」《莊子·天地》篇敘漢陰丈人方爲圃畦，鑿隧而入井，抱甕而出灌。子貢告以鑿木爲機，後重前輕，挈水若抽，其名爲槔，日浸百畦。是其事也。子路曰：『未同而言，觀其色赧赧然，非由之所知也。』**注**未同，志未合也。『不可與言而與之言』謂之「失言」也。觀其色赧赧然面赤，心不正貌也。由，子路名。子路剛直，故曰「非由所知也」。**疏**注「未同」至「言也」○正義曰：《淮南子·說林訓》云「異形者不可合於一體」，高誘注云：「合，同也。」《易·同人》彖傳云：「唯君子爲能通天下之志。」上九《傳》云：「同人于郊，志未得也。」是同以志言，故「未同」爲「志未合」也。『不可與言而與之言，失言』，《論語·衛靈公》篇文。《方言》云：「赧，愧也。晉曰悔，或曰慙，秦晉之間凡愧而見上謂之赧。梁宋曰慙。」《說文》赤部云：「赧，面慙赤也。」《小爾雅·廣名》云：「不直失節謂之慙。慙，愧也。面慙曰慙，心慙曰慙，體慙曰遠。」郭璞《方言》注引作「面赤愧曰赧」。赧，慙音近，古通也。不直失節，是「心不正」也。由是觀之，則君子之所養可知已矣。」

注孟子言由是觀曾子、子路之言以觀君子之所養志，可知矣。謂君子養正氣，不以入邪也。**疏**注「以觀」至「邪也」○正義曰：孟子言「所養」，即養浩然之氣。養氣在於持志，故「可知」謂志可知。脅肩諂笑，未同而言皆不正，故云「邪」。

章指：言道異不謀，迫斯強之。段、泄已甚，矚亡得宜。正己直行，不納於邪。赧然不接，傷若夏畦也。**疏**「不納於邪」○正義曰：隱公三年《左傳》石碣語。○「赧然」至「畦也」○足利本脫此九字。

戴盈之曰：「什一去關市之征，今茲未能，請輕之，以待來年然後已，何如？」**注**戴盈之，宋大夫。問孟子，欲使君去關市征稅，復古行什一之賦，今年未能盡去，且使輕之，待來年然後復古，何如？**疏**注「今年未能盡去」○正義曰：閻氏若璩《釋地三續》云：「茲，年也。」《左傳》僖十六年：「今茲魯多大喪，明年齊有亂。」杜注曰：「今茲，此歲。」《呂氏春秋》：

「今茲美禾，來茲美麥。」《史記·蘇秦傳》：「今茲效之，明年又復求割地。」《後漢·明帝紀》：「昔歲五穀登衍，今茲蠶麥善收。」孟子曰：「今有人，日攘其鄰之雞者。或告之曰：『是非君子之道。』」曰：「請損之，月攘一雞，以待來年然後已。」如知其非義，斯速已矣，何待來年？」**注**攘，取也，取自來之物也。孟子以此爲喻，知攘之惡當即止，何可損少，月取一雞，待來年乃止乎？謂盈之之言若此類者也。

疏注「攘取」至「物也」○正義曰：《周書·呂刑》云「奪攘擄虔」，鄭氏注云：「有因而盜曰攘。」《淮南子·汜論訓》云「直躬其父攘羊」，高誘注云：「凡六畜自來而取之曰攘之。」

章指：言從善改非，坐而待旦。知而爲之，罪重於故。譬猶攘雞，多少同盜。變惡自新，速然後可也。

疏「罪重於故」○正義

曰：《論衡·答佞》篇云：「故曰刑故無小，宥過無大。」某氏《書》傳云：「不忌故犯，雖小必刑。」《說文》支部云：「故，使爲之也。」知而使之即「知而爲之」也。○「變惡自新」○正義曰：阮氏元《校勘記》云：「孔本新作心，非。」

公都子曰：「外人皆稱夫子好辯，敢問何也？」**注**公都子，孟子弟子也。外人，他人論議者也。好辯，言子好與楊、墨之徒辯爭。

疏注「公都子孟子弟子也」○正義曰：《廣韻》「公字」，注云：「漢複姓八十五氏。」《孟子》稱公都子有學業。楚公子食邑於都，後氏焉。○**注**「好辯」至「辯爭」○正義曰：《大戴記·曾子事

父母》篇云：「孝子之諫，達善而不敢爭辯。爭辯者，作亂之所由興也。」《說文》言部云：「訟，爭也。」《淮南子·俶真訓》云「分徒而訟」，高誘注云：「訟，爭是非也。」又《易·訟》卦《釋文》引鄭注云：「辯財曰爭。」是「辯」有「爭」義。孟子時聖道湮塞，百家妄起，許行農家，景春、周霄從橫家，他如告子言性，高子說《詩》，慎到、宋鈃各鳴所見。孟子均與辯論其是非，不獨楊朱、墨翟也。故云楊墨之徒。孟子曰：

「我豈好辯哉？予不得已也。」**注**曰：我不得

已耳。欲救正道，懼爲邪說所亂，故辯之也。天下之生，久矣，一治一亂。當堯之時，水逆行，氾濫於中國，蛇龍居之。民無所定，下者爲巢，上者爲營窟。**注**天下之生，生民以來也。迭

有亂治，非一世。水生蛇龍，水盛則蛇龍居民之地也。民患水避之，故無定居。埤下者於樹上爲巢，猶鳥之巢也。上者，高原之上也。鑿岸而營度之，以爲窟穴而處之。

疏注「埤下」至「處之」○正義曰：《禮

記·禮運》云：「昔者先王未有宮室，冬則居營窟，夏則居橧巢。」注云：「寒則累土，暑則聚薪柴居其上。」此上古之世。五帝時已有臺榭宮室牖戶，^①不爲巢窟。堯時洪水氾濫，民居蕩沒，故仍爲巢爲窟也。《爾雅·釋獸》云：「豕所寢，橧。」邵氏晉涵《正義》云：「《禮運》『夏則居橧巢』，是上古穴居野處，橧亦爲人所居。既有宮室，則橧爲豕所寢矣。《方言》云：『其檻及蓐曰橧。』今牧豕者積草以居之，旁爲之檻。」按：此緣夏月暑熱，故架柴爲檻。或依樹爲之，故稱「橧巢」，不必在樹上。此以水溢之，故埤下已沈水中，故必巢於樹上，如鳥之巢。《呂氏春秋·孟冬紀》云「營丘壘之小大高卑」，高誘注云：「營，度也。」高原水所未溢，而民無力爲屋，故鑿而爲窟。鄭氏以累土解營窟，則是於窟穴之上又增累以土。《淮南子·汜論訓》云「古者民澤處復穴」，注云：「復穴，重窟也。一說穴毀隄防，崖岸之中以爲窟室。」重窟即鄭所云累土。穴毀隄防即趙所云「鑿岸」。按：《說

文》官部云：「營，市居也。」凡市闐軍壘，周市相連皆曰營。此「營窟」當是相連爲窟穴。「營度」即是「爲」，不得云「爲爲窟」矣。《書》曰：「洚水警余。」洚水者，洪水也。

注《尚書》逸篇也。水逆行，洚洞無涯，故曰

「洚水」。洪，大也。

疏注「尚書」至「大也」○正義曰：謂

之逸篇，不知百篇中何篇也。江氏聲《尚書集注音疏》云：

「《堯典》曰『湯湯洪水方割』，孟子釋此『洚水』即《堯典》所謂

「洪水」也。《孟子·告子》篇云「水逆行謂之洚水」，《說文》

水部云「洚，水不遵其道」，故趙氏云：「水之逆行，洚洞無

涯。」《說文》言部云：「警，戒也。」《爾雅·釋詁》云：「余，

我也。」段氏玉裁《說文解字注》云：「洪水，洚水也。从水，

共聲。洚，水不遵道。《堯典》、《皋陶謨》皆言「洪水」，《釋

詁》曰：「洪，大也。」引申之義也。孟子以洪釋洚，許以洚釋

洪，是曰轉注。水不遵道，正謂逆行，惟其逆行，是以絕大。

洚，洪二字，義實相因。《淮南子·原道訓》云「靡濫振蕩，與

天地鴻洞」，高誘注云：「鴻，大也。洞，通也。」鴻與洪通，鴻

洞即「洚洞」。馬融《長笛賦》云「港洞坑谷」，李善注云：「港

①「室」，原誤作「官」，今據經解本改。

洞，相通也。」港，胡貢切。港洞亦即「澤洞」。使禹治之。禹掘地而注之海，驅蛇龍而放之菹。水由地中行，江、淮、河、漢是也。險阻既遠，鳥獸之害人者消，然後人得平土而居之。**注**堯使禹治洪水，通九州，故曰「掘地而注之海」也。菹，澤生草者也。今青州謂澤有草者為「菹」。水流行於地而去也，民人下高就平土，故遠險阻也。水去，故鳥獸害人者消盡也。**疏**注「菹澤」至「為菹」○正義曰：《禮記·王制》云「居民山川沮澤」，注云：「沮謂萊沛。」孔氏正義云：「何允云：『沮澤，下溼地也。草所生曰萊，水所生曰沛。』言沮地，是有水草之處也。」左思《蜀都賦》云「潛龍蟠於沮澤」，李善注云：「蔡毋遂《孟子注》曰：『澤生草曰菹。』沮與菹通。」然則《孟子》之菹即《王制》之沮，蔡毋遂作菹，黃公紹《韻會》引《孟子》作菹。菹即菹字，菹為菹之通也。○注「水流行於地而去也」①○正義曰：《說文》林部云：「𣶒，水行也。」重文流。《越絕書·篇敘外傳記》云：「行者，去也。」鄭氏注《檀弓》，高誘注《呂氏春秋》、《淮南子》，皆以去釋行，是「水由地中行」即水由地中流去也。○注「水去故鳥獸害人者消盡也」○正義曰：《說文》水部云：

「消，盡也。」堯舜既沒，聖人之道衰，暴君代作。壞宮室以為汙池，民無所安息；棄田以為園囿，使民不得衣食；邪說暴行又作，園囿汙池沛澤多而禽獸至。**注**暴，亂也。亂君更興。

殘壞民室屋，以其處為汙池；棄五穀之田，以為園囿；長逸遊而棄本業，使民不得衣食，有飢寒並至之厄。其小人則放辟邪侈，故作邪偽之說，為姦寇之行。沛，草木之所生也；澤，水也。至，衆也。田疇不墾，故禽獸衆多，謂羿、桀之時也。**疏**注「暴亂也

亂君更興」○正義曰：《淮南子·主術訓》云「其次賞賢而罰暴」，高誘注云：「暴，虐亂也。」《易·繫辭傳》云「以待暴客」，干寶注云：「卒暴之客為奸寇也。」故下「暴行」，趙氏又以姦寇釋之。《說文》人部云：「代，更也。」代作謂更代而作，非一君也。○注「故作邪偽之說」②○正義曰：《文選·西京賦》云「邪羸優而足恃」，薛綜注云：「邪，偽也。」《呂氏

①「也」，原作「之」，合於宋十行、閩、監、毛等本，今據本書及阮校所述廖、孔、韓等本注文改。

②「作」，原誤作「為」，今據本書注文改。

春秋·離謂《篇》云「辨而不當理則僞」，高誘注云：「僞，巧也。」《淮南子·本經訓》云「其心偷而不僞」，高誘注云：「僞，虛詐也。」巧詐則不正，故以「邪」爲「僞」。○注「沛草」至「水也」○正義曰：《後漢書·崔駰傳》注引劉熙《孟子注》云：「沛，水草相半。」《風俗通·山澤》篇云：「沛者，草木之蔽茂，禽獸之所蔽匿也。」僖公四年《公羊傳》云「大陷於沛澤之中」，注云：「草棘曰沛，漸洳曰澤。」蓋分言之則沛以草蔽芾名，澤以水潤澤名，故趙氏注與何休同，通言之則沛之草即生於水，此劉熙《釋名》專以「下而有水」爲澤，注《孟子》又以「水草相半」爲沛，是也。澤之水亦草所生，此《風俗通》既以「草木」屬沛，又云「水草交厝名之爲澤」，是也。○注「至衆」至「衆多」○正義曰：《周禮·夏官·大司馬》注鄭司農云：「致謂聚衆也。」至與致通，故以「至」爲「衆多」。○注「謂羿桀之時也」○正義曰：上云「暴君代作」，下云「及紂之身」，紂之前，暴君著於書傳者惟羿、桀，故舉之耳。及紂之身，天下又大亂。周公相武王，誅紂伐奄，三年。討其君，驅飛廉於海隅而戮之，滅國者五十，驅虎豹犀象而遠之。天下大悅。注奄，東方無道國。武王伐紂至於孟津，還歸，二年復

伐，前後三年也。飛廉，紂諛臣。驅之海隅而戮之，猶舜放四罪也。滅與紂共爲亂政者五十國也。奄大國，故特伐之。《尚書·多方》曰：「王來自奄。」疏注「奄東」至「自奄」○正義曰：《說文》邑部云：「郛，周公所誅。郛國在魯。」段氏玉裁《說文解字注》云：「《玉篇》作『周公所誅叛國商奄』是也。奄、郛二字，周時並行。單呼曰奄，象呼曰商奄。《書序》、《孟子》、《左傳》皆云奄，如「踐奄」、「歸自奄」、「伐奄」，昭元年「周有徐奄」，是也。《左傳》又云商奄，如昭九年「蒲姑商奄，吾東土也」，定四年「因商奄之民，命伯禽而封於少皞之墟」，是也。大部云：「奄，覆也。」《爾雅》云：「弇，蓋也。」故商奄亦呼商蓋。《墨子》曰：「周公旦非闕叔辭三公，東處於商蓋。」《韓非子》：「周公將攻商蓋，辛公甲曰：不如服衆，小以劫大，乃攻九夷而商蓋服矣。」商蓋即商奄也。奄在淮北，近魯，故許云「在魯」。鄭注《書序》云「奄在淮夷之北」，注《多方》云「奄在淮夷旁」，是也。祝鮀說因商奄之民封魯者，杜云：「或迸散在魯。」是也。今山東兗州府曲阜縣縣城東二里有奄城，云「故奄國」，即《括地志》之「奄里」，此可證「迸散在魯」之說。《幽風》「四國是皇」，毛傳云：「四國，管、蔡、商、奄也。」商謂武庚，則此

傳商、奄爲二。」按：奄在淮夷旁，爲周所伐，是「東方無道國」也。「武王伐紂，至於孟津，還歸，二年復伐」，詳見《史記·周本紀》。然則「三年討其君」指武王伐紂伐奄。與「誅紂」並言，則亦此三年時事矣。《秦本紀》云：「中潏在西戎，保西垂，生蜚廉。蜚廉生惡來。惡來有力，蜚廉善走，父子俱以材力事殷紂。周武王之伐紂，並殺惡來。是時蜚廉爲紂石北方，還無所報，爲壇霍太山，而報得石棺。死遂葬於霍太山。」然則武王未殺飛廉，但驅之海隅以戮辱之，故趙氏比諸「舜放四罪」而已。或云：戮即殺也，《史記》非其實。閻氏若璩《釋地續》云：「說者謂武王誅紂，並殺惡來，飛廉獨以善走漏網，竄伏海隅，以爲周無如我何。豈知聖人除惡務盡，於窮無復之地，仍執而戮之以彰天討。此亦是隨文詮解。而皇甫謐云：『河東崑縣十五里有飛廉冢，民常祠之。』酈道元云：『霍太山上有飛廉墓。』皆與《秦紀》文合。蓋殺者一處，葬者又一處，其詳不可得聞矣。」翟氏灝《考異》云：「《逸周書·世俘》篇云：『武王既克殷，狩禽虎二十有二，犀十有二，熊羆鼯麋等若干。遂征四方，凡憖國九十有九，馘俘若干，凡服國六百五十有二。』憖國謂不順服國也。本九十有九而減止五十，蓋又有其半也。『狩禽』文但未及象，而《呂氏·仲夏紀》言「象爲虐於東夷，周公以師逐之，至

於江南，乃爲《三象》樂以嘉其德」。適補《周書》所缺。武周滅國、驅獸二事，正經中不得明證，故邊旁之書未可以駁雜而全置也。趙氏佑《溫故錄》云：「滅國者五十」，諸家無說。惟《逸周書》：「凡所征熊盈族十有七國，俘殷獻民，遷於九里。熊、楚之先。盈即羸，飛廉同姓。可備五十之一。」孔氏廣森《經學卮言》云：「《書序》：『武王伐殷，往伐，歸獸，識其政事，作《武成》。』「歸獸」之事蓋孟子所謂「驅虎豹犀象而遠之」者，出於此篇。《書序》云：『成王東伐淮夷，遂踐奄，作《成王征》。成王既踐奄，將遷其君于薄姑，周公告召公，作《將薄姑》。成王歸自奄，在宗周，誥庶邦，作《多方》。』《多方》云：『惟五月丁亥，王來自奄。』鄭氏注云：「奄國在淮夷之旁。周公居攝之時亦叛，王與周公征之，三年滅之。」此自周公相成王時事，奄非武王所滅，故說者謂「三年討其君」專指伐奄。則「誅紂」二字當屬上「周公相武王」句，「伐奄」二字屬下「三年討其君」句。蓋「三年討其君」一句不得既爲武王伐紂之二年，又爲成王踐奄之三年也。」倪氏思寬《讀書記》云：「據《書》所言，伐奄總在成王之時，故顧亭林曰：『伐奄，成王時事。上言相武王，因誅紂而連言之耳。』而毛西河又謂《多方》本文明言「至於再至於三」，舊儒亦明注「再叛三叛」，是以周公伐奄有三。一是相武王時伐

奄，《孟子》所云是也；一是周公攝政初年又伐奄，《多士》所云是也。^①相武王時伐奄，《孟子》本文也，何得因他經書無考而轉《孟子》伐奄亦是成王時事？且據事理論之，當時助紂爲虐，惟奄爲最大之國，豈有既誅紂而可以不伐奄之理？豈有討紂而可以不討奄君之理？反覆思之，覺西河考訂之學，誠有出於亭林之上者矣。」按：趙氏以「伐奄」與「誅紂」皆武王一時事，又引《多方》者，明奄爲大國耳。趙氏以《孟子》特以奄與紂並稱而不渾入五十國之內，故申明之。且五十國則滅矣，奄雖特伐，實未滅，故至周公攝位時又嗾祿父請舉事，叛至再三，仍但遷之於蒲姑而已，終不滅也。

《書》曰：「丕顯哉，文王謨！丕承哉，武王烈！佑啓我後人，咸以正無缺。」^注《書》、《尚書》逸篇也。丕，大；顯，明；承，續；烈，光也。言文王大顯明王道，武王大續承天光烈。佑開後人，謂成、康皆行正道，無虧缺也。此周公輔相以撥亂之功也。^疏注「書尚」至「功也」○正義曰：此引《書》亦不見二十八篇中，是逸《書》也。「丕，大」，「烈，光」，《爾雅·釋詁》文。《禮記·祭法》云「顯考廟」，注云：「顯，明也。」《說文》頁部云：「顯，明飾也。」《毛詩·秦風》「不承權輿」，傳

云：「承，續也。」《幽風》載續武功，傳云：「續，繼也。」是「承」即「續」也。《爾雅·釋詁》云：「謨，謀也。」文王所圖謀論說，一如大禹、皋陶，顯明帝王之道，故云「大顯明王道」。《易·師》九二傳云「承天寵也」，光亦寵也，故云「承天光烈」。啓之義爲開，咸之義爲皆，缺之義爲虧，文王、武王後人，是爲成王、康王。邪說既消，正道復著，周公輔相撥亂反之正，故咸以正也。僖公二十八年《左傳》云「奉揚天子之丕顯休命」，昭公三年《左傳》云「昧且丕顯」，注皆云：「丕，大也。」丕顯與此丕顯同。王氏引之《經傳釋詞》云：「《玉篇》曰：『丕，詞也。』經傳所用或作丕。顯哉承哉，贊美之詞，丕則發聲也。」趙注訓「丕」爲「大」，失之。世衰道微，邪說暴行有作。臣弑其君者有之，子弑其父者有之。孔子懼，作《春秋》。《春秋》，天子之事也，是故孔子曰：「知我者，其惟《春秋》乎？罪我者，其惟《春秋》乎？」^注世衰道微，周衰之時也。孔子懼王道遂滅，故作《春秋》。因魯

①「也」下，《二初齋讀書記》尚有「一是周公從成王居洛之後又伐奄多方所云是也」二十字，始足「有三」之數。

史記設素王之法，謂天子之事也。「知我者」謂我正王綱也；「罪我者」謂時人見彈貶者。言孔子以《春秋》撥亂也。

疏

「世衰」至「春秋乎」○正義曰：毛氏奇齡

《四書賸言》云：「《管子·法法》篇云：『故《春秋》之記，臣有弑其君，子有弑其父者矣。』此二語似《孟子》『臣弑其君者有之，子弑其父者有之』所本。然此是舊時《春秋》，非夫子《春秋》也。則意封建之世多有此禍，特夫子以前簡策總不傳耳。」萬氏斯大《學春秋隨筆》云：「『暴行』即『弑父』，『弑君』是也。所謂『邪說』，即『亂臣賊子』與其僭類將不利於君，必飾君之惡，張己之功，造作語言，誣惑衆庶是也。有邪說以濟其暴，遂若其君真可弑而已可告無罪然者。相習既久，政柄下移，羣臣知有私門而不知公室。且鄰封執政相倚爲姦，凡有逆節，多蔽過於君，鮮有罪及其臣者，如魯衛出君，師曠、史墨之言可證也。」惠氏士奇《春秋說》云：「人皆知《春秋》尊宗周，莫知《春秋》尊宗國。《春秋》以魯爲列國之宗而尊之，故孟子曰：『《春秋》，天子之事也。』」董仲舒亦謂「《春秋》有王魯之文」。諸儒聞之，羣起而譁，譏謔謹昨，以爲王魯誠不可；匹夫而行天子之事，可乎哉？且宗國之尊非自《春秋》始也。古者，太史采風獻之天子，而魯不陳

詩，故魯詩列於《頌》，次《周頌》而在《商頌》之上，則宗國之尊久矣，是以孔子獨尊之。以爲至尊無弑道，故不書弑而書薨，不地亦不葬，至尊之體當然，故曰「魯王，禮也」。天子崩，諸侯薨，大夫卒。《春秋》諸侯薨皆書卒者，臨天下之辭，獨魯稱薨者，臨一國之辭，亦所以尊宗國。雖尊宗國之禮如尊宗周而爲僭焉，故曰「知我者其惟《春秋》乎，罪我者其爲《春秋》乎」。四方亂獄莫大於弑君，天王先命訝士成之。成之者斷之也。斷其孰爲首孰爲從而後行刑。如負固不服，大司馬以九伐之法，或正之或殘之。春秋九伐之法不行於邦國，而訝士亦失其官，故君子於宋督弑君，特著其法曰：「會于稷，以成宋亂。」言宋之亂天王不能成，而以成之責予魯，明宗國亦得奉天王之命而往成之。自是宗周微而宗國亦微，顧往朝齊晉及楚而聽命焉，四方亂獄，莫有往而成之者矣。故《春秋》特一書不再書者以此。莊公三十有二年「冬十月乙未，子般卒，公子慶父如齊」，明弑子般者，慶父也。文公十有八年「子卒，季孫行父如齊」，明弑子赤者非獨襄仲，而行父亦與聞焉。《春秋》書法有離而書者，事異而情亦異，有連而書者，事同而情亦同。慶父、行父前後如齊，皆以子般、子赤之卒連而書之者也。據經覈傳，前後若一，其情不更顯乎？或曰：魯桓非其人，曷爲以成之之責予

之？曰：以成之之責予魯，非予桓公也。若夫桓公不能成，乃假成之名而反取賂焉，《春秋》因直書之而不諱矣。《春秋》有書一事而兩義並見者類此。春秋之初，四方亂獄，未聞告亂於宗周，猶來告亂於宗國。隱公四年春「衛州吁弑其君，衛人來告亂」。蓋以魯爲列國之宗而來告也。隱公不能會諸侯往而成之，則宗國之微，自隱公始。桓公二年宋督之亂亦來告，可知桓公乃假成之名而取賂焉。由是宗國益微，不可復振矣。宋兩弑君，晉一弑君，凡三書「及」，所以旌死難之臣也。弑君何爲或稱名或稱國？稱國謂專國者，晉之專國者樂書，故稱國。樂書弑厲公猶趙盾弑靈公。盾直稱名，書獨隱其名而稱國，則晉之董狐失其官矣。董史失其官，曷爲孔子不正之？孔子曰：「吾猶及史之闕文也。」又曰：「其文則史，其義則丘竊取之。」然則其義安在？稱國者其義，不稱名者其文，仍其文而存其義。《左氏》雖虛張卻至之伐，仍不能揜其忠，雖盛稱樂書之美，仍不能揜其惡。《春秋》數稱樂書帥師，一救鄭，一侵蔡，一伐鄭，明專國也。及厲公死而書乃弑君之賊，其名卒不復見矣。《穀梁》謂「弑君賤者窮諸人」，①莒稱「人」者，賤之。文公十有六年：「冬，宋人弑其君杵臼。」杵臼者，宋昭公，弑昭公者乃其君祖母王姬使帥甸師攻而殺之，而謂之「賤」，可乎？宋平公

殺其子，可直斥宋公，襄夫人殺其孫，不可直斥君祖母。直斥君祖母，則名不正而言不順，辭窮，故稱「人」以賤之。以君祖母王姬之尊且貴而與賤者同辭，此《春秋》之特筆。後世君母臨朝而擅廢置其君之柄者，亦當以《春秋》爲鑒焉。文公十有四年：「九月，齊公子商人弑其君舍。」此未踰年之君也，曷爲直稱君？踰年稱君者，緣孝子之心不忍當君位也，在朝之臣固已北面稽首而君之矣，一國之人亦莫不奉以爲君，其誰曰非君也？哀公四年：「春，盜弑蔡侯申，蔡公孫辰出奔吳。」明弑蔡侯申者，公孫辰也。此連而書者，與魯慶父弑閔公、宋萬弑殤公同，而經稱「盜」，何也？蔡人以盜赴，故稱「盜」。又蔡昭公將如吳，明不在國而在塗，則其稱盜也亦宜。傳稱文之錯殺公孫翩，經書「蔡殺其大夫公孫姓、公孫霍」，明皆辰之黨而辰獨出奔，譏失盜也。《左傳》謂「蔡人逐之」，則慶父亦魯人逐之可知。不殺之而逐之，是爲「逸賊」。宋萬出奔陳，宋人力不能討也，《春秋》猶書以示譏。魯季友力能討慶父，及不討而緩追逸賊，使慶父出奔莒，君子謂季友有無君之心，當坐與聞乎弑之罪，雖酈叔牙，縊慶父，其功未足以揜其罪也。」○注「設素王之法」○正義

①「穀梁」，按引文出哀公四年《公羊傳》，參沈校。

曰：趙氏佑《溫故錄》云：「知《春秋》者無如孟子。天子，周天子也。孔氏憲章文武，學禮從周，爲下不倍，以周時之人紀周時之事，豈有出於周外，先自爲倍，而猶以責人者？趙岐《設素王之法》一語，似孔子意中別設一天子，蓋從《公羊》家黜周王魯之說出。及宋以後，又多謂孔子改制行權，直以天子自處，當時之天子聽其忽貶忽褒，甚至以天自處，天子又不足言。惟明新鄭相國高文襄拱《春秋正旨》一卷可稱焉。首論《春秋》乃明天子之義，非以天子賞罰之權自居；次論孔子必不敢改正朔，用夏時；次論託之魯史者，以其尚存周禮，非以其周公之後而假之；次論王不稱天乃偶然異文，滕、薛稱子乃時王所黜，聖人必無貶削天子升降諸侯之理；次論齊人歸三田小事，非聖人自書其功，深斥以天自處之文；次論哀十四年乃孔子卒前二年，適遇獲麟，因而書之，非感麟而作，麟亦非應經而至。其後又述嘉靖己酉鄭州生麟二，事親見之。麟固有種，麟之時有時無俱無關係，非天特生以示瑞。可謂迴出諸儒之上。素王本出《史記·殷本紀》伊尹從湯言素王及九主之事。《索隱》：「素王者，太素上皇，其道質素，故稱素王。九主者，三皇五帝及夏禹也。」杜預《左傳序》辨素王、素臣，孔疏述董仲舒《對策》云：「孔子作《春秋》，先正王而繫以萬事，是素王之文焉。」賈逵

《春秋序》云：「就是非之說，立素王之法。」蓋皆以素王爲古皇之稱。趙岐所言由此。至鄭氏《六藝論》：「孔子既西狩獲麟，自號素王異矣」即杜所謂「非通論」，而孔亦引《家語》齊太史子餘歎美孔子云「天其素王之乎」。素，空也。言無位而空王之，非孔子自號。先儒蓋因此而謬，遂謂《春秋》立素王之法。其以丘明爲素臣，又未知誰所說。嗚呼，孔子被誣久矣！賴杜預始雪之者也。若彼造《祖庭廣記》者，復有「水精之子，生衰周而爲素王」之語，益妖妄不足道。聖王不作，諸侯放恣，處士橫議，楊朱、墨翟之言盈天下。天下之言，不歸楊則歸墨。楊氏爲我，是無君也；墨氏兼愛，是無父也。無父無君，是禽獸也。**注**言孔子之後，聖王之道不興，戰國縱橫，布衣處士游說以干諸侯。若楊、墨之徒，無尊異君父之義而以橫議於世也。**疏**注「言孔子」至「世也」○正義曰：《呂氏春秋·禁塞》篇云「而無道者之恣行」，高誘注云：「恣，放也。」《說文》心部云：「恣，縱也。」《列子·黃帝》篇云「橫心之所念」，《釋文》云：「橫，放縱也。」是「放恣」即「縱橫」也。《漢書·異姓諸侯王表》云：「秦既稱帝，患周之敗，以爲起於處士橫議。」注云：「處士謂

不官朝而居家者也。橫音胡孟反。又《賈山傳》至言云：「夫布衣韋帶之士，脩身於內，成名於外。」注云：「言貧賤之人也。」布衣之士即不仕家居之士也，故云「布衣處士」。《荀子·非十二子》云：「古之所謂處士者，德盛者也，能靜者也，脩正者也，知命者也，著是者也，今之所謂處士者，無能而云能者也，無知而云知者也，利心無足而佯無欲者也，行僞險穢而彊高言謹慤者也，以不俗爲俗，離縱而跂訾者也。士君子之不能爲。」注云：「離縱謂離於俗而放縱。跂訾亦謂跂足自高而訾毀於人。」按：離縱、跂訾即「橫議」也。段氏玉裁《說文解字注》云：「議者，誼也。誼者，人所宜也。言得其宜之謂議。至於《詩》言『出入風議』，《孟子》言『處士橫議』，而天下亂矣。」按從則順，橫則逆。故政之不順者爲「橫政」，行之不順者爲「橫行」，則議之不順者爲橫議。庖義以前無三綱六紀，人與禽獸同。既設卦觀象，定人道，辨上下，於是有君臣父子之倫，此人性之善所以異於禽獸也。自楊墨之說行，至於無父無君，仍與禽獸等矣。公明儀曰：「庖有肥肉，廐有肥馬，民有飢色，野有餓莩。此率獸而食人也。」**注**公明儀，魯賢人。言人君但崇庖廚，養犬馬，不恤民，是爲率禽獸而食

人也。楊墨之道不息，孔子之道不著。是邪說誣民，充塞仁義也。仁義充塞則率獸食人，人將相食。**注**言仁義塞則邪說行，獸食人則人相食。此亂之甚也。**疏**注「言仁」至「甚也」○正義

曰：無父是不仁，無君是不義。無父無君之說滿於天下則仁義之道不明，是仁義爲邪說所擠，故爲「充塞仁義」也。但知爲我，不顧民之飢寒，故「率獸食人」，因而民亦但知爲我，互相殘害，故「將相食」。此似專指諸侯放恣，爲楊氏「爲我」之害。乃楊氏厚身而薄人，固人受其害，而墨氏厚人而薄親。夫以布衣處士舍其親以施惠於人，此尤亂賊所爲，故其禍與楊等。當時楊墨之言滿天下，天下不歸楊則歸墨，必其言足以惑天下，故孟子切指之曰「無父無君」，且深斥之曰是「禽獸」。自有孟子而後，世乃知楊墨之非道也。《小心齋劄記》云：「聖人之仁義何以爲楊墨所塞。曰：聖人隨時順應，無可驚可喜。墨氏之仁，至於摩頂放踵利天下亦爲之，是何如慈惠。聖人親親而仁民，仁民而愛物，反若多所分別。楊氏之義，至於拔一毛而利天下不爲，是何如清淨。聖人立必欲立人，達必欲達人，反若多所牽攬。故曰：惡紫奪朱，惡鄭奪雅。豈惟亂之？又能奪之。何者？朱不如紫

之艷，雅不如鄭之濃也。爲我、兼愛之能充塞仁義亦若是。」按：孔子之道乃述伏羲、神農、黃帝、堯舜、文王周公之道。「立天之道曰陰與陽，立人之道曰仁與義。」仁義即「一陰一陽也」。趙氏謂孔子之後，聖王之道不興，即此帝王相傳之道載在六經者，莫有述而明之者也。孟子明於六經，能述孔子之道，即能知伏羲以來聖人所傳述之道，故深悉楊墨之非。然則欲知言之邪正是非者，仍求諸六經可矣。吾爲此懼，閑先聖之道。距楊墨，放淫辭。邪說者不得作。**注**閑，習也。淫，放也。孟子言我懼聖人之道不著，爲邪說所乘，故習聖人之道以距之。**疏**注「閑習」至「距之」○正義曰：「閑，習」，《爾雅·釋詁》文。此字或訓防，或訓法，然非講習於六經無以知其道。既習之乃能知之，知之乃能法之，法之乃能防之。未習六經，空憑心臆而依附以爲先聖，此曰吾防衛乎道也，彼曰吾守法乎聖也，因而門戶各立，傾軋相加，不自知其身爲楊墨，而此楊墨者又互相楊墨焉，天下國家遂陰受其害而不知是皆不習故也。孟子與楊墨辨，必原本於習先聖之道，習先聖之道，即講習六經，不空憑心悟也。趙氏訓閑爲習，其義精矣。《禮記·哀公問》云「淫德不倦」，注云：「淫，放也。」《周禮·

宮正》「去其淫怠與其奇袤之民」，注云：「淫，放濫也。」楊墨不習六經，違悖先聖之道，作爲爲我、兼愛之言，因而天下人亦不習六經，由楊墨之言而又放濫之，遂成一無父無君之害，所謂「淫辭」也。孟子習六經先聖之道，知此無父無君之淫辭起於楊墨，故先距之。距與拒通。《論語·子張》篇「其不可者拒之」，石經作距。《淮南子·本經訓》「戴角出距之獸」，高誘注云：「距讀爲拒守之拒。」是也。既拒楊墨以滌其原，於是放逐其依附淫佚之辭以絕其流。宣公三年《穀梁傳》云：「放，屏也。」《說文》支部云：「放，逐也。」《小爾雅·廣言》云：「放，投棄也。」蓋不啻舜之放驩兜，屏之遠方，投畀豺虎，深絕之也。《詩·大雅·常武》「王舒保作」，箋云：「作，行也。」使天下後世深知其無父無君必亂天下，不復興起以行於世，皆習六經、明先聖之道故也。作於其心，害於其事；作於其事，害於其政。聖人復起，不易吾言矣。**注**說與上篇同。**疏**注「說與上篇同」○正義曰：上篇，《公孫丑上》篇「養氣」章也。彼云「生於其心」，此云「作於其心」，彼云「發於其政」，此云「作於其事」。彼先言政後言事，此先言事後言政，彼此不同，互相發明，非偶然也。彼謂誅淫邪遁之辭皆生於心之蔽陷離窮，

而心之蔽陷離窮則由於不習六經，不知先聖之道，憑己心之空悟而無所憑依，遂自以爲是，造作語言。其黠者以心爭心，則楊之外有墨，墨之外有楊，楊墨之外又有似楊似墨之言，其鈍者以心襲心，則楊有歸楊之人，墨有歸墨之人，似楊似墨者又有歸似楊似墨之人。皆未嘗習六經，知先聖之道。其邪說由心而生，即由心而作，故云生於其心，非習於其心也，作於其心，非述於其心也。惟習於其心，因而述於其心，故以其言措之於事而事不悖，施之於政而政不亂。乃不習不述，惟憑心之空悟，自道其道，自仁其仁，自義其義，未嘗不攀援古昔，附會聖賢，而已淪於無父無君之害。苟無習六經、知先聖之道者出而距之放之，其說行於天下，以其言措之於事而事害矣。述先聖之道以爲法，則事有所憑而非妄作，今不述先聖之道而憑諸心，則措之於事，無所法守，是爲「作於其事」矣。爲下者妄作其言，妄作其事，愚者惑之，黠者傳之，遂成一無父無君之天下，而君之政有爲所格拒而莫能行矣，故「害於其政」也。自下行其邪說於事，則害君上之政，自上用其邪說於政，則害士民之習。聖人治天下，教學爲先。師氏以三德、三行教國子，保氏養國子以道，教之六藝、六儀，大司徒以六德、六行、六藝教萬民而實興之，《王制》言「樂正崇四術，立四教，順先王《詩》《書》《禮》

《樂》以造士，春秋教以《禮》《樂》，冬夏教以《詩》《書》。」習於《詩》《書》《禮》《樂》則不致以邪說害政。孔子好古敏求，下學上達。「古」即先王之道也，「學」即《詩》《書》六藝之文也。《大戴禮》·曾子立事篇云：「君子既學之，患其不博也。既博之，患其不習也。既習之，患其無知也。」《論語》·學而篇曾子云「傳不習乎」，注云：「言凡所傳之事，得無素不講習而傳之乎？」不習而傳諸人，是「生於其心」「作於其心」之言也。楊墨無所習而言爲邪說，孟子博學而習，故知其邪說而距之。舍六德、六行、六藝、《詩》《書》《禮》《樂》而以心悟爲宗者，皆亂天下之楊墨也。孟子本習述先聖之言，故「聖人復起，不易吾言」。「吾言」指此辨楊墨之言。昔者禹抑洪水而天下平，周公兼夷狄、驅猛獸而百姓寧，孔子成《春秋》而亂臣賊子懼。**注**抑，治也。周公兼懷夷狄之人，驅害人之猛獸也。言亂臣賊子懼《春秋》之貶責也。**疏**注「抑治也」○正義曰：《廣雅·釋詁》云：「道、抑，治也。」「抑洪水」即道河、道江、道漢、道淮也。《荀子·成相》篇云：「禹有功，抑下鴻。」「抑下」連稱，是抑即下。《說文》手部云：「抑，按也。」按之亦下之也。洪水高溢地上，道之使歸地中，是爲下鴻，亦即所以

治之也。○注「周公兼懷夷狄之人」○正義曰：《荀子·非相》篇云：「故君子賢而能容罷，知而能容愚，博而能容淺，粹而能容雜，夫是之謂兼術。」《詩》曰：「徐方既同，天子之功。」此之謂也。」上言容，下引《詩》言同，中言兼術，是兼、同、容三字義同。故楊倞注以「兼術」爲「兼容之法」。君子之容物亦猶天子之同徐方。《廣雅·釋詁》云：「兼，同也。」本諸此。容之義爲包，包之義爲懷。宣公十二年《左傳》云：「兼弱攻昧，武之善經也。」下又云：「撫弱耆昧。」撫弱即是兼弱，故孔穎達《尚書正義》解「兼昧」云：「兼謂包之。」包亦懷也，故趙氏以「懷」釋「兼」。○注「言亂臣」至「責也」○正義曰：顧氏棟高《春秋大事表》有《孔子成春秋而亂臣賊子懼論》云：「謂『亂臣賊子懼』者，第書其弑逆之名於策而懼乎？吾恐元凶劭及安慶緒、史朝義之徒，雖日揭其策以示於前，而彼不知懼也。且此亦夫人能書之，何待聖人？況人已成其篡弑，懼之亦復何益？聖人之作《春秋》，蓋有防微杜漸之道。爲人君父者言之，則《書》所云『制治於未亂，保邦於未危』是也；爲人臣子者言之，則《禮》所云『齒路馬有誅』是也。聖人嘗自發其旨於《坤》卦《文言》曰：「臣弑其君，子弑其父，非一朝一夕之故，其所由來者漸矣，由辨之不早辨也。」按：顧氏說未盡善。若謂作《春秋》爲爲人

君父者言之，則孔子成《春秋》非使亂臣賊子懼，是使君父懼矣。人之性所以異於禽獸者，以其知有父子君臣也。惟邪說如師曠、史墨之言有以蔽之，則有所恃而不知懼。自孔子作《春秋》，直書其弑。邪說者曰君無道，可弑也。《春秋》則無論君有道無道，弑之罪皆在臣；邪說者曰君無道，可逐也。《春秋》則無論君有道無道，逐之罪皆在臣。以爲可弑可逐，則有所借口而無懼，無懼則漸視爲固然而世莫以爲怪；以爲不可弑不可逐，則無所借口而懼。《春秋》全爲邪說暴行而作，趙氏謂「懼《春秋》之貶責」是也。自孔子作《春秋》而天下後世無不明大義所在。宋劭、梁珪固即伏誅，即司馬師、劉裕、蕭道成、高歡、宇文泰之流，奸竊已成，而舉義師以討賊者代不乏人。明成祖亦歡、泰之類也，以「靖難」爲名，自飾以周公輔佐成王，一聞方孝儒、卓敬等篡奪之言，遂怒而磔其身，夷其族，其怒也即其懼也。伏羲之前，人不知有夫妻父子，自伏羲作八卦而人盡知之；孔子之前，人不知弑父與君之爲亂臣賊子，自孔子作《春秋》而人盡知之。謂「亂臣賊子，夫人能書之，何待孔子」，得毋曰「夫妻父子，夫人能定之，何待伏羲」？譬如五穀，神農未教之前人不能知，既有神農教之，無論智愚，無不知五穀，豈曰「五穀，夫人能辨之，何待神農」乎？伏羲定人道之後不能無淫奔，然人人知其

爲淫奔也而賤之，孔子作《春秋》之後不能無亂賊，然人人知其爲亂賊也而誅之。《易》治未亂，《春秋》治已亂。臣弑其君，子弑其父，非一朝一夕之故，所以戒天下後世辨之於早也。惟不能辨之於早，而臣已亂，子已賊，此時仍理早辨之說，譬諸病已危急，宜審其寒熱虛實以大溫大寒大補大攻挽回於俄頃，而仍徒徐徐責其不善調和保護，可乎？使《春秋》之作仍不過「履霜」「早辨」之義，則孔子贊《易》已足明之，何必又作《春秋》。戒早辨，治未亂，防其亂也，懼亂賊，治已亂，還其未亂也。余《春秋左傳補疏》中詳言之。

《詩》云：「戎狄是膺，荆舒是懲，則莫我敢承。」**注**此詩已見上篇說。無父無君，是周公所膺也。**注**是周公所欲伐擊也。我亦欲正人心，息邪說，距詖行，放淫辭，以承三聖者。豈好辨哉？予不得已也。**注**孟子言我亦欲正人心，距詖行，以奉禹、周公、孔子也。不得已而與人辯耳，豈好之哉？能言距楊、墨者，聖人之徒也。**注**孟子自謂能距楊、墨也。徒，黨也。可以繼聖人之道，謂名世者也。**疏**注「徒黨也」○正義曰：《淮

南子·假真訓》云「分徒而訟」，《呂氏春秋·報更》篇云「與天下之賢者爲徒」，高誘注並云：「徒，黨也。」周氏廣業《孟子逸文考》云：「楊子《法言》：『古者楊墨塞路，孟子辭而闢之，廓如也。』此即距楊墨之言而推衍之也。王充《論衡》亦云：『楊墨之道不亂仁義，則孟子之傳不造。』《牟子理惑論》：『楊墨塞羣儒之路，車不得定，人不得步。孟子闢之，乃知所從。』陸倕《答法雲書》：『昔者異學爭途，孟子抗周公之法，於是楊墨之黨舌舉口張。』皆此意也。楊之學無傳。《淮南子·汜論訓》云：『全性保真，不以物累形，楊子之所立也，而孟子非之。』此可見其大略也。」

章指：言憂世撥亂，勤以濟之，義以匡之。是故禹稷駢蹟，周公仰思，仲尼皇皇，墨突不及汙。聖賢若是，豈得不辯也？**疏**「禹稷駢蹟」○正義曰：《音義》云：「蒲田切，下張尼切。丁云：『《史記》作胼胝，謂手足生胝也。』此蹟乃「顛蹟」字，音致，宜依《史記》讀之爲是。周氏廣業《孟子章指考證》云：「《文子·自然》篇稱「胼胝」，《史記·李斯傳》稱「禹手足胼胝」，毛晃《禮部增韻》引趙注

作「駢躓」，《韻會》先韻駢字注云：「駢，胼，皮堅也。或作跣，通作駢。」引《孟注》爲證。支韻胼字注引《廣韻》云：「皮厚也。又跣也。或作跣，亦作躓。」其下亦引《孟注》。一似駢駢、躓胼之字初無異義。然《說文》但有駢字，無駢字，胼訓爲腫，謂癰胼也，竹尼切，躓訓爲跣，引《詩》「載躓其尾」，言顛躓也，陟利切。則其音義固判然矣。《呂氏春秋·求人》篇云：「禹顏色黧黑，竅氣不通，足不相過。」《荀子·非相》篇「禹跳湯偏」，楊倞注引《尸子》云：「禹手不爪，脛不生毛，偏枯之病，步不相過，人曰禹步。」《尚書大傳》云「禹其跳」，其跳者，踣也。所謂足不相過者，《穀梁》昭二十年《傳》有云：「兩足不能相過，齊謂之綦，楚謂之疏，衛謂之輒。」陸德明《釋文》據劉兆云：「綦，連併也。疏，聚合不解也。輒，本亦作綦，如見繫絆也。」據此，則「駢躓」正言手足不仁，非直重繭明矣。蓋駢是「擘局不分」，與《左傳》「駢脅」、《莊子》「駢指」一例。《列子·楊朱》篇「禹身體偏枯，手足駢胼」，正作駢，其確證也。躓謂「痿廢弱行」，《列子·說符》篇「其行足躓株焰」，焦贛《易林》「擔載差躓，踉蹌右足」，又「跛躓未起，失利後市」，皆此義。其以駢躓爲胼胼，乃後人傳寫之誤。然顏師古注《漢書》駢字云：「併也。」猶不失

其本。自字書不審本末，輒云相通，去之遠矣。『稷駢躓』無可考，蓋因禹及之，猶《論語》「禹稷躬稼」、《孟子》「禹稷當平世，三過其門而不入」也。○「周公仰思」○正義曰：《音義》云：「按，字書印讀如仰。又《離婁下》章云：『周公思兼三王以施四事，其有不合者，仰而思之，夜以繼日，幸而得之，坐以待旦。』是其事也。○「仲尼皇皇墨突不及汙」○正義曰：周氏廣業《孟子章指攷證》云：「『仲尼皇皇』出揚子《法言·學行》篇。《文子·自然》篇、《淮南子·脩務訓》並云：『孔子無黔突，墨子無暖席。』陸賈《新語》亦云：『墨子皇皇，席不暇暖，仲尼栖栖，突不暇黔。』則黔突本係孔子事。自班固《答賓戲》『聖哲之治，栖栖遑遑，孔席不煖，②墨突不黔』，始顛倒其語。唐韓昌黎因之，云「孔席不暇暖，而墨突不得黔」，其實非也。趙雖稍後於班，未必遽襲其誤。況本書距楊墨以承三聖，墨安得與禹稷、周孔並列？《家語》：「孔子厄於陳蔡，顏回、仲由次於壞屋之下，有埃墨墮飯中，回取食之。」是墨突即塵甑之謂。「去齊接淅」又孔子質

①

「駢」，原作「駢」，今據《古今韻會舉要》改。

②

「煖」，原誤作「暇」，據《漢書》改。

事，故趙氏以此證其皇皇耳。其改黔爲汙，蓋以協韻故也。」

匡章曰：「陳仲子豈不誠廉士哉？」居

於陵，三日不食，耳無聞，目無見也。井上有李，糟食實者過半矣。匍匐往，將食之，三咽然後耳有聞，目有見。」**注**匡章，齊人也。陳仲子，齊一介之士，窮不苟求者。是以絕糧而餒也。糟，蟲也。李實有蟲，食之過半，言仲子目不能擇也。**疏**注「匡章齊人也」○正義曰：匡章見於《戰國策》，

一在《齊策》：「秦假道韓魏以攻齊，齊威王使章子將而應之，秦兵大敗。」一在《燕策》：「齊宣王令章子將五都之兵，以因北地之衆以伐燕，齊大勝燕。」然則章子在齊歷仕兩朝，屢掌軍伐。當孟子在齊時，章年固亦長矣。趙氏但云「齊人」，不以爲弟子也。《呂氏春秋·不屈》篇云「匡章謂惠子於魏王之前」，高誘注云：「匡章，孟子弟子也。」周氏廣業《孟子出處時地考》云：「章在孟門，所禮異於滕更，稱子有同樂正，謂爲著錄也宜。《呂覽》有匡章與惠王及惠施問答，

殆從遊於梁者歟？」閻氏若璩《釋地又續》云：「《戰國策》齊宣王與羣臣皆稱爲章子，蓋於人名下繫以子字，當時多有此稱謂。田盼人稱爲盼子，田嬰人稱爲嬰子，田文人稱爲文子，以及秦魏冉亦稱爲冉子，皆此類。」《莊子·盜跖》篇云「匡子不見父」，**①**《釋文》引司馬彪注云：「匡子名章，齊人。諫其父，爲父所逐，終身不見父。」按：此事見《孟子》，是匡爲姓，章爲名。○注「陳仲子」至「餒也」○正義曰：陳仲子見於《戰國策·齊策》。趙威后問齊使云：「於陵子仲尚存乎？」是其爲人也，上不臣於王，下不治其家，中不索交諸侯，此率民而出於無用者，何爲至今不殺乎？」周氏柄中《辨正》云：「鮑彪注：『此自一人。若孟子所稱，已是七八十年矣。』愚按，陳仲子齊宣王時，趙威后，齊王建時。考《六國表》，自宣王元年至王建元年，凡七十有九年，仲子若壽考，何妨是時尚在？況云「其率民而出於無用」，明是孟子所稱。」《韓非子·外儲說左》云：「齊有居士田仲者，宋人屈穀曰：『田仲不恃仰人而食，亦無益人之國，亦堅瓠之類也。』」田仲即陳仲。不仰人而食，所謂一介之士，窮不苟求者也。《淮南子·汜論訓》云：「季襄、陳仲子立節抗行，不入洿君

①「父」，原誤作「母」，今據《莊子》改。

之朝，不食亂世之食，遂餓而死。」高誘注云：「陳仲子，齊人，孟子弟子，居於陵。」以仲子爲孟子弟子，未詳所出。趙氏所不用也。○注「蟪蛄」至「擇也」○正義曰：《爾雅·釋蟲》云：「蟪，蟪蛄。蟪，蟪蛄。」《方言》云：「蟪蛄謂之蟪。自關而東謂之蟪蛄，或謂之卷蟪，或謂之蜺蜺，梁益之間謂之蜺，或謂之蜺，或謂之蜺蜺，秦晉之間謂之蜺，或謂之天蜺。」《說文》蝻部云：「蜺，木中蟲。」《論衡·商蟲》篇云：「桂有蜺，桑有蜺，蟪食李。」即李木中蜺也。《文選》劉伶《酒德頌》注引劉熙《孟子注》云：「槽者，齊俗名之，如酒槽也。」周氏廣業《孟子古注攷》云：「槽疑蟪字之譌，《說文》作「蜺，齋蠹也」。以背行駛於足狀似酒槽，以齊俗所名，故謂之蟪蛄也。」按：《淮南子·汜論訓》「槽矛無擊」，高誘注云：「槽讀『領如蟪蛄』之蟪。」蟪固可假借，而蟪與蜺通，皆與蟪爲聲之轉。緩呼爲蟪蛄，急呼則單爲蟪。以爲「齊俗名之」，非也。又《文選》張景陽《雜詩》注引《孟子章句》云：「陳仲子豈不誠廉士哉？居於陵，三日不食，耳無聞，目無見。井上有李實，蟪食者過半矣，匍匐往，將食之。」下引劉熙曰：「陳仲子，齊一介之士也。蟪，蟲也。李實有蟲，食之過半，言仲子目無見也。」此注與趙氏略同，而《章句》則以實字連李字，在蟪字上，是時仲子匍匐而往，則必李實之墜於地者。然

《文選》注引《孟子》每有增減，未可爲據。蓋古人屬文每多倒置，趙氏注亦恒顛倒明之，故《孟子》實字原在食字下，而劉、趙倒置於上以明井上有李指李實，不指李樹也。《爾雅·釋言》云：「將，資也。」謂匍匐而往井上，資此李實食之。《說文》口部云：「咽，嗑也。」劉熙《釋名·釋形體》云：「嚙，嚙物也。」嚙即咽，食物下於咽喉，故即謂之嚙。三咽者，不及細嚼也。井上之李實非一，特取此蟪食者，是目盲不知擇也。夫蟪食之餘，匍匐就食，極形仲子之不堪，匡章非以仲子爲可尚也。孟子曰：「於齊國之士，吾必以仲子爲巨擘焉。雖然，仲子惡能廉？充仲子之操，則蚓而後可者也。夫蚓，上食槁壤，下飲黃泉。」**注**巨擘，大指也。比於齊國之士，吾必以仲子爲指中大者耳，非大器也。蚓，丘蚓之蟲也。充滿其操行，似蚓而可行者也。蚓食土飲泉，極廉矣，然無心無識。仲子不知仁義，苟守一介，亦猶蚓也。**疏**注「巨擘」至「器也」○正義曰：曹氏之升《摭餘說》云：「《春秋正義》：『手五指之名曰巨指、食指、將指、無名指、小指。』巨指即《儀禮·大射儀》所謂『左巨指鉤弦』是也。《孟子》稱巨擘，亦稱大擘，鄭注『右巨指，右手

大擘」是也。亦稱擘指，《鄉射禮》賈疏「以左擘指拓弓，右擘指鈎弦」是也。食指、將指俱見《左傳》。《鄉射禮》「凡挾矢於二指之間橫之」，鄭注：「二指謂左右之二指。此以食指、將指挾之。」賈疏以《左傳》「子公之食指動」釋第二指是也，而以《左傳》「闔閭傷於將指」釋第三指則不然。第三指《既夕禮》亦名「中指」，蓋足以大指為將指，手以中指為將指。《說文》：「拇，將指也。」《易》「咸其拇」疏：「拇是足大指。」闔閭所傷是足，故下云「取其一履」，而賈誤以解手之中指，非也。無名指僅一見於《孟子》，趙岐注：「以其餘皆有名，無名指者，非手之用指也。」按，《大射儀》「朱極三」注：「極猶放也。所以輻指利放弦也，以朱韋為之。三者，食指、將指、無名指。」則第四指亦非竟無用也。鄭惟謂小指短不用，然敖氏繼公謂「凡挾矢，有挾一矢者，有挾四矢五矢者。寡則挾以食指、將指，多則以餘指分挾之。小指亦餘指也。又作「季指」，《特牲饋食》、《少牢食禮》「挂於季指」，注「季猶小也」。而敖氏則直謂「季指，左手之小指」是也。」○注「蚯蚓」至「蚓也」○正義曰：《禮記·月令》：「孟夏，蚯蚓出。」仲冬，蚯蚓結。」《淮南子·時則訓》作「丘蟻」。單名之則為蚓為蟻，《荀子·勸學》篇云：「蟻無爪牙之利，筋骨之彊，上食埃土，下飲黃泉，用心一也。」蟻即蚓也。《大戴禮·

易本命》云「食土者無心而不息」，注云：「蚯蚓之屬，不氣息也。」郭璞《爾雅讀》云：「蚯蚓土精，無心之蟲。」故趙氏謂蚓「無心」。《荀子》以喻目不能兩視，耳不能兩聽，故言蟻之心一，《孟子》以蚓喻仲子之不知仁義，故趙氏言「無心無識」也。《大戴禮·勸學》篇作「上食晞土」，晞乃「日暴乾」之名，土乾則成塵，故《荀子》作「埃土」，埃即塵也。土枯無澤，故孟子謂之「槁壤」。隱公元年《左傳》云「不及黃泉，無相見也」，注云：「地中之泉，故曰黃泉。」黃泉至清而無濁，槁壤至潔而無汙。充其操，必食此至清至潔，如蚓乃可也。仲子所居之室，伯夷之所築與，抑亦盜跖之所築與？所食之粟，伯夷之所樹與，抑亦盜跖之所樹與？是未可知也。」注孟子問匡章，仲子豈能必使伯夷之徒築室樹粟乃居室之邪，抑亦得盜跖之徒使作也？是殆未可知也。疏「仲子」至「知也」○正義曰：蚓必至清至潔而食，使仲子如蚓，則所居所食必伯夷所築所樹乃可，若為盜跖所築所樹則不清不潔，便不可居食。然築者樹者不可知，則不能決其為至清至潔矣。不可知而漫居之食之，是不能如蚓也。下「是何傷哉」專指盜跖之所築所樹，知此「是未可知也」專屬盜跖所築所樹而

言。曰：「是何傷哉？彼身織屨，妻辟纁，以

易之也。」**注**匡章曰，惡人作之何傷哉？彼仲子

身自織屨，妻緝纁，以易食宅耳。緝續其麻曰辟，練

其麻曰纁，故曰「辟纁」。**疏**注「緝續」至「辟纁」○正義

曰：《文選》張景陽《雜詩》注引劉熙《孟子注》云：「仲子自

織屨，妻紡纁，以易食也。緝續其麻曰辟，練絲曰纁也。」與

趙氏略同。段氏玉裁《說文解字注》云：「林，葩之總名

也。」當云「治葩泉之總名」，下文云「林人所治也」可證。**①**

趙岐、劉熙注《孟子》「妻辟纁」皆云：「緝續其麻曰辟。」辟，

音劈。今俗語績麻析其絲曰劈，**②**即林也。「糸部」云：「纁，

布纁也。」劉熙《孟子注》云：「練絲曰纁。」練絲謂取所緝之

纁，練治之也。練者，練也。練者，澆也。汰諸漂漑之也。已

澆曰纁，未澆曰篠。《廣雅》曰：「篠，綃也。」綃是生絲未澆

之纁，如生絲然，故曰綃也。如成國謂已澆曰練絲。**③**「言

布纁者，以別乎絲纁也。績之而成纁，可以爲布，是曰纁。

《禮經》纁分別若干升以爲麤細，五服之纁不同也。趙岐

曰：「澆麻曰纁。」麻部：「篠，未澆治纁也。」然則澆治之乃

曰纁。**④**蓋纁有不澆者，若斬衰、齊衰、大功、小功之纁皆不

篠，澆者曰纁，統呼曰纁。」周氏廣業《孟子古注考》云：「緝即續也。《毛詩·陳風》《釋文》：「西州人謂績爲緝。」按，《說文》糸部云：「緝，績也。」績，緝也。「二字轉注。趙氏「緝績」相疊者，蓋二字亦有別，《爾雅·釋詁》云：「緝，光也。」績，繼也。」先以爪剖而分，則辟也，績其短者而連之使長，則績也，其績處以兩手摩娑之使不散，則緝也。故劉熙作「緝績其麻」。緝績即緝績也。」曰：「仲子，齊之世家也。兄戴，蓋祿萬鍾。以兄之祿爲不義之祿而不食也，以兄之室爲不義之室而不居也。避兄離母，處於於陵。」**注**孟子言，仲子，齊之世卿大夫之家。兄名戴，爲齊卿，食采於蓋，祿萬鍾。仲子以爲事非其君，行非其道，以居富貴。故不義之，竄於於陵。**疏**注「兄名」至「於蓋」○正義曰：《水經注·濟水》篇引《孟子》云：「仲子，齊國之世家。兄

① 「人」，原脫，今從沈校據《說文》、《說文解字注》補。

② 「今」，原誤作「合」，今據《說文解字注》改。

③ 「如」，原誤作「知」，今據《說文解字注》改。

④ 「則」，原誤作「曰」，今據《說文解字注》改。

戴，祿萬鍾，仲子非而不食。」古人引書每自增損，乃此去蓋字，則戴字連兄字，是爲其兄之名，用趙氏注也。孔氏廣森《經學卮言》云：「元李治《敬齋古今註》讀『兄戴蓋』爲句，云『戴蓋祇是乘軒』。愚按，蓋既爲王驩邑，不當又爲仲子兄邑。《揚子》八十一《家務之次》四曰：『見矢自升，升羽之朋，蓋戴車載。』是李氏『戴蓋』之語未爲無本矣。」○注竄於於陵。○正義曰：閻氏若璩《釋地續》云：「顧野王《輿地志》：『齊城有長白山，陳仲子夫妻所隱處。』」鄭注：「魚子溝水，南出長白山，東抑泉口山，即陳仲子夫妻之所隱。」唐張說《石泉驛詩》目下自注：「於陵仲子宅，漢於陵故城。」章懷太子賢曰：「在今淄川長山縣南。」與《通典》合。石泉非《孟子》所謂井者邪？江，^①繡江，發源長白山南，今章丘縣清河是。計於陵仲子家離其母所居幾二百里矣。」他日歸，則有饋其兄生駢者。己頻顙曰：「惡用是駢者爲哉？」^②注他日，異日也。歸省其母，見兄受人之駢而非之。己，仲子也。頻顙不悅曰：安用是駢者爲乎？駢，駢，駢鳴聲。^③疏注「頻顙不悅」○正義曰：《音義》出「己頻顙」，云：「上音紀。頻亦作嘖，同。下子六切。」《易·復》卦六三「頻復」，《釋文》云：「本又作

嘖。嘖，眉也。鄭作顰，音同。」又《巽》卦九三「頻巽」，李鼎作《集解》虞翻云：「頻，顙也。」王弼注云：「頻，頻蹙不樂而窮不得已之謂也。」《文選·魯靈光殿賦》云：「慍嘖蹙而含悴。」慍，悴即不樂，不樂即「不悅」也。《說文》云：「頻，水涯人所賓附，顰戚不前而止。」又：「顰，涉水顰戚也。从頻，卑聲。」頻爲顰省，戚爲顙省也。《文選·弔魏武帝文》云：「執姬女而嘖悴」，注云：「《孟子》曰『嘖蹙而言』，嘖蹙謂人嘖眉蹙顙，憂貌也。」此《孟子》蓋注文，傳寫譌誤，不詳何人。「嘖蹙而言」四字即解「己頻顙曰」，而下又申明頻爲頻眉，顙爲蹙顙。顙即頻。《莊子·至樂》篇云「髑髏深蹙蹙顙」，蹙即頻字之假借，「蹙顙」連文，則深頻指頻眉可知。乃《通俗文》云「蹙顙爲蹙」，虞翻因以頻爲顙，失之矣。《四書釋疑》云：「己當作已。上皆言仲子之文，未嘗間斷，至此不當又有己字，謂稱仲子也。『己頻顙』，亦不成文。從己字，說初見其所饋生駢，固已頻顙而惡之矣。他日偶食其肉，聞兄之言而哇之，則前後意有倫次。」按：此說非也。生駢之饋，乃

①「江」上，《四書釋地》有「張說詩云長自臨江上於陵入濟東我行弔遺跡感歎石泉空」二十四字，參沈校。

②「釋」，按引文出《四書辨疑》。

交際之常，人人不以爲怪，獨仲子一己以爲不是也。用一己字，正見其孤矯非人情。「克己復禮爲仁」，正克此己耳。○

注「駝駝駝鳴聲」○正義曰：《音義》出「駝駝」，云：「丁五歷切，駝也。」阮氏元《校勘記》云：「五歷切與駝駝聲不相似，蓋《孟子》書本作兒，如今人之讀小兒，與駝聲相近也。俗人

加鳥作駝，則爲《說文》「六駝」字。」他日，其母殺是駝也，與之食之。其兄自外至，曰：「是駝駝之肉也。」出而哇之。以母則不食，以妻則食之；以兄之室則弗居，以於陵則居之。是尚爲能充其類也乎？若仲子者，蚓而後充其操者也。」**注**異曰：母食以駝，不知是前所頻顧者也。

兄疾之，告曰：是駝駝之肉也。仲子出門而哇吐之。孟子非其不食於母而食妻所作屢纊易食也，不居兄室而居於陵人所築室也。是尚能充人類乎？如蚓之性然後可以充其操也。**疏**注「仲子出門而哇吐之」○正義曰：《論衡·刺孟子》篇述此文作「出而吐之」。^①以吐代哇，是哇即吐也。○注「孟子」至「操也」○

正義曰：全氏祖望《經史問答》云：「問：陳仲子之生平，孟

子極口詆之，《國策》中趙后亦詆之，厚齋王氏則又稱之，何也？曰：厚齋先生之言是也。仲子若生春秋之世，便是長沮、桀溺、荷蕢、荷篠、楚狂、晨門一流。然諸人遇孔子則孔子欲化之，仲子遇孟子，則孟子力詆之，便是聖賢分際不同。須知仲子辭三公而灌園，豈是易事？孟子是用世者，故七篇之中不甚及隱士逸民，較之孔子之惓惓沮溺一輩，稍遜之矣。平情論之，若如孟子之譏仲子以母不食、^②以兄不食，直是不孝不弟。然仲子豈真不食於母？不過不食於兄。其兄之蓋祿萬鍾，雖未知其爲何如人，然諒亦未必盡得於義，故仲子子然長往，但觀其他日之歸，則於寢門之敬亦未嘗竟絕，孟子責之過深矣。故厚齋謂其清風遠韻，視末世徇利苟得之徒如腐鼠，乃公允之論。若趙后，何足以知此？彼第生於七國之時，所謂「天子不臣，諸侯不友」之士不特目未之見，抑亦耳未之聞，而以爲「帥民出於無用」，亦豈知隱士逸民之有補於末俗，正在無用中得之也？」周氏柄中《辨正》云：「孟子以仲子爲齊之巨擘，自非徇利苟得之徒可比，何待厚齋發此公論？但其辟兄離母，不可爲訓，故孟子極

① 「子」，按《論衡》無此字。

② 「以」，原誤作「則」，今據《經史問答》改。

詆之。而全氏謂兄戴之祿未必盡得於義，他日之歸未嘗竟絕寢門之敬，以此爲仲子解說，則大不然。陳爲齊之同姓，固公族也。蓋祿萬鍾，受之先君，傳之祖父，有何不義而汲汲去之？於陵在今濟南府長山縣西南，離其母所幾二百里，他日之歸，亦僅事耳，篤寢門之敬者固如是乎？孔子之語丈人，曰：「欲潔其身而亂大倫。」彼丈人猶知有長幼之節也，特以不仕無義即爲亂倫，而仲子辟兄離母，并長幼之節而廢之，故曰「無親戚君臣上下」。孔孟之言若出一口，而全氏左袒仲子，拾王充《刺孟》之唾餘，沾沾焉動其喙，不亦妄乎？」

章指：言聖人之道，親親尚和。志士之操，耿介特立，可以激濁，不可常法。是以孟子喻以丘蚓，比諸巨擘也。疏「可以激

濁不可常法」○正義曰：《尸子·君治》篇云：「水有四德。揚清激濁，蕩去滓穢，義也。」《漢書·兩龔傳》贊云：「清節之士大率多能自治而不能治人，所以不可常法也。」僖公十六年《公羊傳》注云：「石者，陰德之專者也；鵠者，鳥中之耿介者也。宋襄欲行霸事，不納公子目夷之謀，事事耿介自用，卒以五年見執，六年終敗，如五

石六鵠之數。天之與人，昭昭著明，甚可畏也。」古人不重耿介如此。

姪廷琮廷弼校字

孟子正義卷十三終

孟子正義卷十四

孟子卷第七

江都縣鄉貢士焦循撰集

離婁章句上

①凡二十八章。

注離婁，古之明目

者，黃帝時人也。黃帝亡其玄珠，使離朱索之，離朱即離婁也。能視於百步之外，見秋毫之末。然必須規矩，乃成方員，猶《論語》「述而不作，信而好古」，故以題篇。

疏注「離婁」至「方員」○正義

曰：《莊子·天地》篇云：「黃帝遊乎赤水之北，登乎崑崙之丘而南望，還歸，遺其玄珠，使知索之而不得，使離朱索之而不得。」又《駢拇》篇云：「是故駢於明者亂五色，淫文章，青黃黼黻之煌煌非乎，而離朱是矣。」《釋文》引司馬云：「黃帝時人。百步見秋毫之末。一云「見千

里針鋒」。《孟子》作「離婁」是矣。《列子·湯問》篇云：「離朱，子羽方晝，拭眚揚眉而望之，弗見其形。」注云：「離朱，黃帝時明目人，能百步望秋毫之末。」朱、婁音近。朱之為婁猶邾人呼邾聲曰婁也。凡治器工必以目程之，故執柯伐柯，睨而視之，猶以為遠，然目必憑以規矩準繩以為方員平直。《考工記》：「匠人建國，水地以縣，置槊以縣，眡以景。為規，識日出之景與日人之景，晝參諸日中之景，夜考之極星，以正朝夕。」注云：「於四角立植而縣以水，望其高下。高下既定，乃為位而平地，於所平之地中央樹八尺之臬，以縣正之。眡之以其景，將以正四方也。日出日人之景，其端則東西正也。又為規以識之者，為其難審也。」望地之高下，眡景之出入，目為之也，乃必水地以縣，為規而後審，則目雖明，不可恃也。此目必以規也。《周髀算經》：「商高曰：『數之法出於圓方。圓出於方，方出於矩，矩出於九九八十一，故折矩以為句廣三，股脩四，徑隅五，既方其外，平其一矩，環而共盤，得成三四五，兩矩共長二十有五，是為積矩。』」周公曰：「請問用矩之道。」商高曰：「平矩以正繩，偃矩以望高，

①

「上」，原誤作小字，今據經解本改。

覆矩以測深，卧矩以知遠，環矩以爲圓，合矩以爲方。方屬地，圓屬天。天圓地方，方數爲典。」以方出圓，正繩望高、測深知遠皆目之明也；非平矩、偃矩、覆矩、卧矩，目雖明，無可恃也。此目必以矩也。所以離婁之明，必待規矩乃成方圓也。孟子習先聖之道，闢楊墨，放邪說，指其爲「生於其心」、「作於其心」。作於其心，則不習先聖之道，故此章首發明之。目雖明如離婁，耳雖聰如師曠，心雖仁如堯舜，不以規矩則目無所憑，不以六律則耳無所憑，不以先王之道則心無所憑。明人講學，至徒以心覺爲宗，盡屏聞見，以四教六藝爲桎梏，是不以規矩便可用其明，不以六律便可用其聰。於是強者持其理以與世競，不復顧尊卑上下之分以全至誠惻怛之情；弱者恃其心以爲道存，不復求《詩》《書》《禮》《樂》之術以爲脩齊治平之本，以不屈於君父爲能，以屏棄文藝爲學，真「邪說誣民」，孟子所距者也。孟子之學在習先聖之道，行先王之道，習先聖之道，行先王之道，必「誦其《詩》，讀其《書》，博學而詳說之」，所謂因也。仰觀於天，俯察於地，近取諸身，遠觀於物，伏羲所因也。神農則因於伏羲，故云「伏羲氏没，神農氏作」。黃帝、堯舜則因於神農，故云「神農氏没，黃帝堯舜氏作」。惟其因，乃有所變通。「通

其變，使民不倦」，通其所因，變其所因也；「神而化之，使民宜之」，神其所因，化其所因也；「殷因於夏禮，所損益可知也。周因於殷禮，所損益可知也」，損其所因也，益其所因也。先王之道載在六經，非好古敏求，何以因？即何以通變神化？何以損益？故非習則莫知所因，非因則莫知所述。孔子云：「述而不作，信而好古。」孟子云：「爲高必因丘陵，爲下必因川澤。」其義一也。彼但憑心覺者，真孟子所距者也。趙氏引《論語》以證《孟子》，可謂深知孟子者矣。

孟子曰：「離婁之明，公輸子之巧，不以規矩，不能成方員；**注**公輸子，魯班，魯之巧人也，或以爲魯昭公之子。雖天下至巧，亦猶須規矩也。」**疏**注「公輸」至「之子」○正義曰：《禮記·檀弓》云：

「季康子之母死，公輸若方小，斂，般請以機封。」注云：「公輸若，匠師。方小，言年尚幼。般，若之族多技巧者。見若掌斂事而年尚幼，請代之，而欲嘗其技巧。」般爲公輸若之族，則亦氏公輸，故稱「公輸子」。班與般同。《戰國策·宋策》云：「公輸般爲楚設機，將以攻宋。」高誘注云：「公輸

般，魯般之號也。」蓋般爲魯人，故又稱魯般，當時有此號也。周氏柄中《辨正》云：「事亦見《墨子·魯問》篇，說者因謂有兩輪、般。班固《答賓戲》：「班輪摧巧於斧斤」，顏師古注：「魯班與公輸氏皆有巧藝，故《樂府》云公輸與魯般。」吳斗南謂墨子之書恐非事實，未必有兩公輸般，一在春秋，一在戰國也。愚按，公輸班或以爲魯昭公之子，雖未可信，而與季康子同時，則爲春秋時人無疑。墨翟亦生春秋之末，《史記》云：「或曰並孔子時，或曰在其後。」蓋生稍後而實同時也。班爲楚攻宋，墨翟禦之，《戰國策》在宋景公時。景公即位，在魯昭公二十六年，兩人正當其世。顏注固非，而斗南疑《墨子》不足據，亦未之考耳。」師曠之聰，不以六律，不能正五音；**注**師曠，晉平公之樂太師也。其聽至聰，不用六律，不能正五音。六律，陽律太簇、姑洗、蕤賓、夷則、無射、黃鍾；五音，宮、商、角、徵、羽也。**疏**注「師曠」至「至聰」○正義曰：襄公十八年《左傳》云：「晉人聞楚師，師曠曰：『不害，吾驟歌北風，又歌南風。南風不競多死聲，楚必無功。』」又：「齊師夜遁，師曠告晉侯曰：『鳥鳴之聲樂，齊師其遁。』」《呂氏春秋·長見》篇云：「晉平公鑄爲大鍾，使工聽之，皆以爲調矣。師曠曰不調，請

更鑄之。」皆「其聽至聰」之事也。○注「六律」至「羽也」○正義曰：《周禮·春官·大師》：「掌六律六同以合陰陽之聲。陽聲，黃鍾、太簇、姑洗、蕤賓、夷則、無射，陰聲，大呂、應鍾、南呂、函鍾、小呂、夾鍾。皆文之以五聲：宮、商、角、徵、羽。」注云：「黃鍾，子之氣，十一月建焉；大呂，丑之氣，十二月建焉；太簇，寅之氣，正月建焉；應鍾，亥之氣，十月建焉；姑洗，辰之氣，三月建焉；南呂，酉之氣，八月建焉；蕤賓，午之氣，五月建焉；林鍾，未之氣，六月建焉；夷則，申之氣，七月建焉；中呂，巳之氣，四月建焉；無射，戌之氣，九月建焉；夾鍾，卯之氣，二月建焉。辰與建，交錯貿處，如表裏然，是其合也。其相生，則以陰陽六體爲之。黃鍾初九也，下生林鍾之初六，林鍾又上生太簇之九二，太簇又下生南呂之六二，南呂又上生姑洗之九三，姑洗又下生應鍾之六三，應鍾又上生蕤賓之九四，蕤賓又下生大呂之六四，大呂又上生夷則之九五，夷則又下生夾鍾之六五，夾鍾又上生無射之上九，無射又上生中呂之上六。同位者，象夫妻，異位者，象子母。所謂律取妻而呂生子也。黃鍾長九寸，其實一籥，下生者三分去一，上生者三分益一，五下六上，乃一終矣。大呂長八寸二分四十三分寸之一百四，太簇長八寸，夾鍾長七寸二分一百八十七分寸之千七十五，姑洗長七寸九

分寸之一，中呂長六寸萬九千六百八十三分寸之萬二千九百七十四，蕤賓長六寸八十一分寸之二十六，林鍾長六寸，夷則長五寸七百二十七分寸之四百五十一，南呂長五寸三分寸之一，無射長四寸六千五百六十一分寸之六千五百二十四，應鍾長四寸二十七分寸之二十。文之者，以調五聲，使之相次，如錦繡之有文章。《尚書·皋陶謨》云：「予欲聞六律五聲八音」，鄭氏注云：「舉陽從陰可知也。」蓋舉六律以該六呂也。大師自子丑爲次，六律首黃鍾，終無射。趙氏蓋依《月令》自夏時孟春數之，故始大蕤，終黃鍾也。《國語·周語》王問泠州鳩曰「七律者何」，注云：「周有七音，王問七音之律，意謂七律爲音器，用黃鍾爲宮，大蕤爲商，姑洗爲角，林鍾爲徵，南呂爲羽，應鍾爲變宮，蕤賓爲變徵。」《漢書·律曆志》引《尚書》「在治忽」三字作「七始詠」，李氏光地謂即宮、徵、商、羽、角、變宮、變徵也。然則七音自虞已有之。止云正五音者，吳氏鼎《考律緒言》云：「音有萬而統之以五者，猶五星五行五常之理，不可減不可增，故一變兩聲仍名之爲宮徵，所謂變化而不離乎五音者也。音既七，律何以不止七？律既不止七，又何故止於十二？惟七，故十二也。蓋五音者，正宮、正徵、正商、正羽、正角之律，二變者，比宮、比徵之律。既有比宮、比徵之律，則必有比商、比羽、

比角之律。是故宮商之間有律焉，蕤賓所以生大呂也；徵羽之間有律焉，大呂所以生夷則也；商角之間有律焉，夷則所以生夾鍾也；羽宮之間有律焉，夾鍾所以生無射也；角徵之間有律焉，無射所以生仲呂也。蓋以五該七，猶以六該十二也。《禮記·禮運》云：「五聲六律十二管，還相爲宮也。」注云：「五聲，宮、商、角、徵、羽也。其管陽曰律，陰曰呂，布十二辰。始於黃鍾，管長九寸，下生者三分去一，上生者三分益一，終於仲呂，更相爲宮，凡六十也。」此即韋昭《國語》注「七律」之說。不數變宮、變徵，故止六十聲，以二變參之，則爲八十四聲。二變不可爲調，故調止用六十，此六律五音之大略也。《管子·地員》篇云：「凡將起五音凡首，先主一而三之，四開以合九九，以是生黃鍾小素之首以成宮；三分而益之以一，爲百有八，爲徵；不無有三分而去其乘，適足，以是生商；有三分而復於其所，以是成羽；有三分去其乘，適足，以是成角。」《律呂正義》云：「絲之爲樂，其器雖十餘種，而弦音所應不外乎十二律呂所生五聲二變之音。夫十二律呂之管既分音於長短而不在圍徑，則絃音似亦宜分於長短而不在巨細矣。不知絃之長短同者分音於巨細，絃之巨細同者分音於長短，而絲樂之中，用絃之多寡又各不同，故必案各器之體製而定其取分之大小焉。總之

以各絃全分之音與各絃內所分之音互相應合爲準，是以不外乎十二律呂所生之七音也。《管子》、《淮南子》、司馬氏《律書》此三者，絲樂絃音之大本也。又考之《白虎通》曰：「八音法《易》八卦。絃，《離》音也。盛德象火，其音徵。」蓋謂絲之屬於卦爲《離》，其德象火，故其音尚徵也。夫審弦音，無論某絃之全分，定爲首音，因而半之，平分爲二，其聲既與首音相合而爲第八音矣。次以首音之全分，因而四之，去其一分而用其三分，其聲應於全分首音之第四音，此度乃全分首音與半分八音之間，又平分爲二分之度，是即《管子》所謂「凡將起五音凡首，先主一而三之，四開以合九九」者也。「先主一而三之」者，以全分首音一分之度爲主，而以三因之，其數大於全分之度爲三倍也。「四開以合九九」者，以三倍全分之數，四分之而取其一，以合九九八十一之度，爲宮聲之分也。「小素」云者，素，白練，乃熟絲，即小絃之謂。言此度之聲立爲宮位，其小於此絃之他絃，皆以是爲主，故曰「以是生黃鍾小素之首以成宮」也。以八十一，三分益一爲百有八，爲徵，乃此絃首音全分之度也。於是以百有八，三分去一爲七十二，是爲商，商之七十二，三分益一爲九十六，是爲羽，羽之九十六，三分去一爲六十四，是爲角。按，司馬氏《律書》徵羽之數小於宮而《管子》徵羽之數大於宮

者，用徵羽之倍數，所謂「下徵」、「下羽」者也。其首絃起於下徵，即《白虎通》「絃音尚徵」之義。然而猶有不得不起於下徵之故焉。以下徵之百有八取其四分之一爲八十一，所謂「去其乘而適足」也。若以宮之八十一取其四分之一，則爲六十分小餘七五，比宮之變徵五十六則大，比宮之角六十四則小，此所以絃音之度必起於下徵而理始明也。」又云：「樂之節奏成於聲調，而聲調之原本自旋宮。聲也者，五聲二變之七音，而調也者，所以調七音而互相爲用者也。旋宮乃秦漢以前諸聲之法，聲調爲隋唐以後度曲之名。稽之於古，六律五聲八音肇自《虞書》，而《周官》太師掌六律六同以合陰陽之聲，七音之名見於《左傳》、《國策》，至《管子》、《淮南子》始著五聲二變之數。《禮運》篇：「五聲六律十二管，旋相爲宮。」《孟子》曰：「不以六律，不能正五音。」此旋宮之義所自來也。迨及漢晉之世，《樂經》殘缺，律呂失度，雜以鄭聲，所見於經史注者類多臆見，故旋宮之理晦而不明。然周人遺書猶可考證，如《管子》徵羽之數大於宮，《國語》泠州鳩曰「宮逐羽音」，即此二者，旋宮之法可定焉。古旋宮之法合竹與絲並著之，而自隋以迄于今，獨以弦音發明五聲之分，律呂旋宮遂失其傳。夫旋宮者，十二律呂皆可爲宮，立一均之主，各統七聲，而十二律呂皆可爲五聲二變

也；聲調者，聲自爲聲，調自爲調，而又有主調、起調、轉調之異，故以轉調合旋宮言之，名爲宮調。五聲二變旋於清濁二均之一十四聲，則成九十八聲，此全音也。若夫八十四聲六十調，實皆生於弦度。以絃音七聲之位遞配以十二律呂之分，則爲八十四聲。除二變不用，止以五聲之位遞配以十二律呂之分，則爲六十調。此乃案分以命聲調，非旋宮轉調之法也。《周禮·大司樂》未載商調，唐宋以來無徵調。夫以宮立羽位主調，則商當變宮不用，以羽立羽位主調，則徵不起調。所謂無商調與無徵調，二者名異而理則同也。主調起調皆以宮位爲主，故曰宮調。然調雖以宮爲主，而宮又自爲宮，調又自爲調。如宮立一均之主，而下羽之聲又大於宮，故爲一調之首，即《國語》之「宮逐羽音」也。羽主調，宮立宮，一均七聲之位已定，則當二變者不起調，而與調首音不合者亦不得起調。蓋調以羽起調，徵在其前，變宮居其後，二音與羽相近，得聲淆雜，故不相合而變徵爲六音，亦與羽首音淆雜不合，此所以當二變之位，與五正聲中當徵位者俱不得起調也。至於止調，亦取本調相合，可以起調之聲終之。當二變與徵位者，亦不用焉。」按：《尚書·堯典》云：「詩言志，歌永言。聲依永，律和聲，八音克諧，無相奪倫。」鄭氏注云：「聲之曲折，又依長言。聲中律，乃爲和。」《國

語·周語》泠州鳩云：「律所以立均出度也。古之神瞽，考中聲而量之，以制度律均鍾。」注云：「度律，度律呂之長短，以平其鍾，和其聲。」又云：「聲以和樂，律以平聲。物得其常曰樂極。極之所集曰聲，聲應相保曰和，細大不踰曰平。音以和平爲正。」以六律正五音，即以律和聲，以律平聲也。《律呂正義》已得音之精微，近時學者研求實學，多有自得之解，略附於後。王氏坦《琴音》云：「《孟子》曰：『不以六律，不能正五音。』蓋以六律六呂三分損益，隔八相生之理正此五音也。黃鍾之長九十黍，爲分寸尺丈引曰度，以較匏竹之音，黃鍾之容千二百黍，爲龠合升斗斛曰量，以較土樂之音，黃鍾所容千二百黍之重，爲銖兩斤鈞石曰權衡，以較金石之音。因五聲之數以取聲無迹可見，故用律呂相生之理而象樂之長短多寡輕重，皆得其指歸。絲樂之取聲雖與律呂之理相通，若覈其至，要用五聲相生之理最爲簡便。絲聲之較以五聲而不用律呂，猶之衆樂較以律呂而不用五聲。」都四德乾文氏《黃鍾通韻》云：「《孟子》曰：『師曠之聰，不以六律，不能正五音。』細詳《孟子》之言，五音有音無律，六律有律無音。以六律多寡之數正五音輕重之聲，是知欲正五音非六律不可，欲正六律非管絃無憑。陽爲律，黃鍾爲陽律之本，在管爲笛內聲，在琴爲第一弦，聲氣至重至低。

六陰一陽，屬子爲第一律，上升大呂丑爲二陽第二律，大族寅爲三陽第三律，夾鍾卯爲四陽第四律，姑洗辰爲五陽第五律，仲呂巳爲六陽第六律。陽極生陰，陰爲呂。蕤賓爲陰呂之本，在管爲極上孔，在琴爲第七弦，聲氣至輕至高。六陽一陰，屬午爲第一呂，下降林鍾未爲二陰第二呂，夷則申爲三陰第三呂，南呂酉爲四陰第四呂，無射戌爲五陰第五呂，應鍾亥爲六陰第六呂。陰陽各六管，自笛內聲上升至第五孔爲陽六律，自極上孔下降至第六孔爲陰六律。琴自第一絃前進至第六弦爲陽六律，自第七絃後退至第二絃爲陰六律。六律定，然後能正五音。「宮、商、角、徵、羽五音必得律呂二聲，合爲七均，方能循環一調。所以管有七聲，琴有七弦，《左傳》謂「七音」，《漢前志》謂「七始」。自黃鍾上升至蕤賓爲七均，自蕤賓下降至黃鍾爲七均，循環消長，共爲一調。十二律對待則爲六律，錯綜則爲七均。七均合爲一調，若更插一聲，便不合管孔、琴弦。管只有七聲，①琴只有七絃，不能分爲方圓十二律。以五音循環，加變宮變徵，只可將十二律錯綜爲七均，以五音來往爲循環，方能被於管弦。律呂各家，盡知七均爲一調，而俱不以陰陽六律錯綜爲七均，惟以五音加二變爲七均，不分陰陽各爲六律，而渾用陰陽十二律，不以黃鍾爲律本，而以黃鍾爲宮，大族爲商，姑洗爲角，

林鍾爲徵，南呂爲羽，五音不敷六律，乃以應鍾爲變宮，變宮猶不敷七均，乃以蕤賓爲變徵。變宮、變徵雖敷七均，而十二律中猶虛五律，乃又以宮循環遍臨五律以敷，其數致有高低奪倫、輕重失次者，又作變律半聲之例。猶如不用枝惟用幹，不以子午月爲二至，卯酉月爲二分，惟憑甲乙循環推算，其寒暑失節，春秋失序，亦理之所必至。況惟六律能正五音，五音不能正六律。若因五音不敷循環十二律之故，以十二律作爲變宮、變徵、變律、半聲，是五音能正六律矣。竊謂欲正五音，仍依《漢志》所載，以黃鍾爲律本，以六律多寡之數正五音輕重之位。宮居中位，②以五數論，宮居三位，自重至輕爲羽、角、宮、商、徵，自輕至重爲徵、商、宮、角、羽。以黃鍾爲律本，以羽、角、宮、商、徵爲五位，以蕤賓爲呂本，以徵、商、宮、角、羽爲五位。黃鍾屬子，聲至低，蕤賓屬午，聲至高。二律單用，其餘十律同位同音，陰陽並用。二律有十二，不曰「十二律」而曰「六律」者，只用一邊之故。一邊陽律合管，一邊陰律合琴。琴是六陰律用一陽律，管是六陽律用一陰律。陰陽六律俱是各自相生。一宮爲土屬第四律，

① 「聲」，原誤作「管」，今據《黃鍾通韻》改。

② 「位」，原脫，今據《黃鍾通韻》補。

二商爲金屬第五律，三角爲木屬第三律，四徵爲火屬第六律。第六律是管之正中孔，琴之第六弦，與第一律黃鍾合律同聲，故只有六律。五羽爲水屬第二律，第二律是管之極下孔，琴之第二弦，與第七律蕤賓合律同音，故只有七均。七均只有六律，六律只有五音，故《孟子》曰：「不以六律，不能正五音。」五音如四時，十二律如十二月。四時惟依寒暑，五音亦惟依高低。自寒至暑俱是正律，並無變律。」①蔡季通《律呂新書》有《八十四聲圖》、《六十調圖》，內注正律、變律、正聲、半聲之處甚爲詳細，然止可施之於筆墨，不能被之於管弦。今之管弦七均：第一均八十一，第二均七十二，第三均六十四，第四均五十四，第五均四十八，第六均四十二，第七均三十六。至重至低之均八十一，至輕至高之均三十六，方成一調。五十四爲陰陽際會之中，理應爲宮。宮者，中也。中聲定，其餘輕重高低之聲皆依律數可定，是以五音之中以宮爲首。②圖內所載七均：宮八十一，商七十二，角六十四，變徵五十六，正徵五十四，羽四十八，變宮四十二。四十二爲至輕至高之均，與今之管弦三十六不相合，少一輕六分之均不能成調，是知變宮宮不成宮，變徵五十六，在大簇六十四、夾鍾五十四之間，與夾鍾止間得一分，多一間一分之律，管孔琴徽又不見有相間一分之律，是知變徵徵不成

徵。宮不成宮，徵不成徵，古人謂之「和繆」。正徵五十四，變徵五十六，相間甚微，雖師曠之聰，亦未必易正，故前人有「變聲非正，故不爲調」之說。凌氏廷堪《燕樂考原》云：「律者，六律六同也，其長短分寸有定者也。如黃鍾之長，不可爲無射也；應鍾之短，不可爲大呂也。聲者，五聲二變也，其高下相旋於六律六同之中無定者也。如大司樂黃鍾爲角，又可爲宮；大簇爲徵，又可爲角；姑洗爲羽，又可爲徵。《堯典》「律和聲」，《大師》「掌六律六同」，皆文之以五聲。《禮運》「五聲六律十二管，還相爲宮」，《孟子》「不以六律，不能正五音」，皆此義也。燕樂之字譜，即五聲二變也。蓋出於龜茲之樂，中外之語不同，故其名亦異。當其初入中國時，鄭譯以其言不雅馴，故假聲律緣飾之，其言曰：「應用林鍾爲宮，乃用黃鍾爲宮。」所謂林鍾者即徵聲也，黃鍾者即宮聲也，所謂宮者，則字譜之合字也。猶言應用徵聲爲合字者，乃用宮聲爲合字也。以聲配律，實始於此。黃鍾聲最濁，故以合字配之。又云「應用林鍾爲宮」，則亦疑徵聲當爲合字，宮聲不當爲合字。至宋楊守齋以琴律考之，確然知宮

①「律」，原誤作「聲」，今據《黃鍾通韻》改。

②「音」，原誤作「聲」，今據《黃鍾通韻》改。

聲非合字，乃以仲呂爲宮聲，燕樂以仲呂配上字，是以上字爲宮聲也。蓋琴律一弦爲黃鍾，三弦爲仲呂。正宮調一弦爲合字，故以合字配黃鍾，三弦爲上字，故以上字配仲呂也。何嘗以合字爲宮聲，上字爲角聲哉？宋人樂譜所注十二律呂及四清聲者，蓋即字譜高下之別名耳，不可以稱謂之古，遂疑其別有神奇也。自學者不明律有定，聲無定之理，遂泥定黃鍾一均，不可移易，不論何均，遇黃鍾之律則以爲宮聲，遇大簇之律則以爲商聲，遇姑洗之律則以爲角聲，遇林鍾之律則以爲徵聲，遇南呂之律則以爲羽聲，遇應鍾之律則以爲變宮聲，遇蕤賓之律則以爲變徵聲，而旋宮之義遂晦。於是論燕樂者以宮聲爲合字而有一凡不當應鍾蕤賓之疑，論琴樂者以七聲用七律而有隋廢旋宮止存黃鍾一均之疑，論琴律者以三弦獨下一徽而有不用姑洗而用仲呂爲角之疑，而《尚書》、《周禮》、《孟子》諸書舉不可讀矣。皆以聲配律之說啓之也。不知燕樂字譜即五聲二變也，非六律六同也。宋人以六律六同代字譜者，蓋緣飾之以美名，即鄭譯之意也。以聲配律始於鄭譯，成於沈括，皆無他奧義。後儒不遑深求其故，遂怖其言若河漢之無極，苟明律與聲不同之故，則千古不解之惑可片言而決矣。」程氏瑤田《通藝錄·論黃才伯樂典書》云：「古者一律一呂，各爲一聲。其每管設孔，備五

聲二變之數，兼旋宮換調之法，乃後世樂器律呂之用也，未可以是推求制律之本。是書言吹無孔之管則氣從下洩，無復清濁高下，五音何由而正？夫以律正音，即今之吹笙定弦，其遺矩也。只以一律正一音，不聞無孔之管不能正五音也。」堯舜之道，不以仁政，不能平治天下。**注**

當行仁恩之政，天下乃可平也。今有仁心仁聞而民不被其澤，不可法於後世者，不行先王之道也。**注**仁心，性仁也；仁聞，仁聲遠聞也。雖然，猶須行先王之道，使百姓被澤，乃可爲後法也。

疏注「仁心性仁也」○正義曰：《白虎通·性情》篇云：「陽氣者仁，陰氣者貪。故情有利欲，性有仁也。」又云：「五性者何謂？仁義禮智信也。五藏，肝仁，肺義，心禮，腎智，脾信。」性既有五而獨言仁者，仁足以貫五性也。五藏心主禮，而趙氏以「性仁」解「仁心」者，《淮南子·原道訓》云：「心者，五藏之主也。」雖或以心配土，或以心配火，而五藏實統以心。性之仁，發諸心也。人性仁，皆有惻隱之心，故《白虎通》亦云：「心之言任也，任於恩也。」任於恩即任於仁矣。○注「仁聞」至「聞也」○正義曰：《毛詩·小雅·車攻》篇「有聞無聲」，傳云：「有善聞。」又《大雅·卷阿》篇「令聞令

望」，箋云：「人聞之，則有善聲譽。」《淮南子·脩務訓》云：「聲施千里」，高誘注云：「聲，名也。」是「仁聞」謂仁之聲名播於遠方也。人以仁惠之心所發，有所施濟，其名亦可播於遠，然惠及一人，不能徧於人人，惠及一方，不能普於天下，且或恩及此而害在彼，祝在甲而詛在乙，此未習先王之道，不足為後世法也。○注「乃可為後世之法也」○正義曰：阮氏元《校勘記》云：「閩、監、毛三本同。廖本無之字，孔本《考文》古本無『世之』二字，韓本、足利本無之字、也字。」故曰：徒善不足以為政，徒法不能以自行。**注**

但有善心而不行之，不足以為政；但有善法度而不施之，法度亦不能獨自行也。**疏**注「但有善」至「行也」

○正義曰：《呂氏春秋·離俗》篇云「惕然而寤，徒夢也」，高誘注云：「徒，但也。」故「徒善」是「但有善心」，「徒法」是「但有善法度」。行仁政必有法，徒有仁心而無法，不可用為政也；有法而不以仁心施之，仍與無法等。有善心而不以法，與無善心以施行法同一不行先王之道也。先王之道既不行於無善心之人，又不行於有善心之人。孟子為作於其心，不習先王之道者發，趙氏能發明之。《易·繫辭傳》云：「制而用之謂之法，利用出入、民咸用之謂之神。」非法，無以為通

變神化之用也。《詩》云：「不愆不忘，率由舊章。」遵先王之法而過者，未之有也。**注**《詩》，

《大雅·嘉樂》之篇。愆，過也。所行不過差矣，不可忘者，以其循用舊故文章。遵用先王之法度，未聞有過也。**疏**注「詩大」至「過也」○正義曰：《詩》在《大

雅·假樂》第二章。毛傳云：「假，嘉也。」《禮記·中庸》引作「嘉樂」。此作「嘉樂」，與《中庸》同。《音義》出「嘉樂」，則趙氏作「嘉」。閩、監、毛三本作假，蓋以《詩》改之也。箋云：「愆，過也。率，循也。成王之令德不過誤，不遺失，循用舊典之文章。」趙氏注略同。惟鄭以「不愆」「不忘」平對，趙氏以孟子下申言專指出過字，故以「不愆」為「不過差」，而「不忘」別屬下，謂不可忘者，因其遵舊法而無過也。按：鄭義是也。愆，過也。忘為遺失，亦過也，孟子言過兼該愆、忘。遵用先王之法乃不愆不忘，則屏棄《詩》《書》，專恃心覺者，其愆忘可勝言哉！聖人既竭目力焉，繼之以規矩準繩，以為方員平直，不可勝用也；**注**盡己目力，續以四者，方員平直可得而審知，故用之不可勝極也。**疏**注「盡己」至「極也」○正義曰：《禮記·大

傳云「人道竭矣」，注云：「竭，盡也。」《說文》系部云：「繼，續也。」《文選·神女賦》云「不可勝贊」，注云：「勝，盡也。」盡之言窮也，窮之言極也。若果無待於規矩準繩，則以聖人之聰明睿智而既竭盡其力，可憑其目力以爲方圓平直矣。乃聖人既竭目力，仍必繼之以規矩準繩。規矩準繩，先王所制而用也，雖聖人不能不繼述之。惟其繼述規矩準繩，而目力所竭乃能不窮其用，倘舍去規矩準繩，但準目力，方圓平直必不能以臆成之，而其用窮矣。「不可勝用」猶云「用之不窮」。聖人原非全恃規矩準繩而不竭目力，然其通變神化在耳目心思而必繼述規矩準繩，而耳目心思所竭乃能通變神化，運用不窮也。既竭耳力焉，繼之以六律正五音，不可勝用也；**注**音須律而正也。**疏**注「音須律而正也」○正義曰：《易·需卦》《彖傳》云：「需，須也。」須即待也。音必待律而正，方圓平直必待規矩準繩而成，仁心必待先王不忍人之政而覆天下，可勿繼述之乎？既竭心思焉，繼之以不忍人之政，而仁覆天下矣。**注**盡心欲行恩，繼以不忍加惡於人之政，則天下被覆衣之仁也。**疏**注「盡心」至「仁也」○正義曰：《楚辭·招魂》云「皋蘭被徑兮」，注云：「被，覆也。」《易·繫辭傳》九

家注云：「衣取象乾，①居上覆物。」是被、覆、衣三字同義。經言「仁覆天下」，是聖人以仁衣庇天下，而天下皆被其澤，是天下被其所覆衣之仁也。不行先王之道，雖有仁心，而民不被其澤，今既有仁心，又能繼述先王之道，民被其澤可知矣。「不忍人之政」，仁政也，即先王之道也。以仁心行仁政而法行，非徒法矣，法行而心之仁乃行，非徒善矣。「徒法不能以自行」，荀子所謂「有治人無治法」也。「有治人」即有此既竭心思，又繼述先王之道之人也。舍治法亦無治人矣。故曰：「爲高必因丘陵，爲下必因川澤。」爲政不因先王之道，可謂智乎？**注**言因自然則用力少而成功多矣。**疏**注「言因」至「多矣」○正義曰：《禮記·禮器》云：「故作大事必順天時，爲朝夕必放於日月，爲高必因丘陵，爲下必因川澤。」注云：「謂冬至祭天於圜丘之上，夏至祭地在方澤之中。」孟子引此二句以起「爲政必因先王之道」。趙氏謂「因自然則用力少而成功多」，是以爲高爲累土，爲下爲掘深，與鄭異義。「因」即所云「繼」也。是以惟仁者宜在高位。不仁者在高位，是播

招魂》云「皋蘭被徑兮」，注云：「被，覆也。」《易·繫辭傳》九

①「象」，原誤作「乾」，今據《周易集解》引九家注改。

其惡於衆也。**注**仁者能由先王之道。不仁逆道，

則自播揚其惡於衆人也。**疏**注「仁者」至「人也」○正

義曰：昭公三十年《左傳》云：「將焉用自播揚焉？」《周

禮·春官·大師》「皆播之以八音」，注云：「播猶揚也。」謂

之「仁者」，則不獨有仁心仁聞，乃實能因先王之道，遵先王

之法，而繼之以不忍人之政也，非徒善者也。不因先王之

道，不遵先王之法，不能竭心思而繼之以不忍人之政，則爲

不仁，如下所云。上無道揆也，下無法守也。朝

不信道，工不信度。君子犯義，小人犯刑。

國之所存者，幸也。**注**言君無道術可以揆度天

意，臣無法度可以守職奉命。朝廷之士不信道德，

百工之作不信度量。君子觸義之所禁，謂學士當行

君子之道也；小人觸刑，愚人罹於密罔也。此亡國

之政，然而國存者，僥倖耳，非其道也。**疏**注「言君」

至「道也」○正義曰：《國語·吳語》云「道將不行」，注云：

「道，術也。」賈誼《新書·道術》篇云：「道者，所從接物也。

其本者謂之虛，其末者謂之術。虛者言其精微也，平素而無

設施也，術也者，所從制物也，動靜之數也。凡此皆道也。」

又云：「術者，接物之隊，其爲原無屈，其應變無極，故聖人

尊之。」《爾雅·釋言》云：「揆，度也。」一陰一陽之謂道，元

亨利貞謂之四德。顯道神德行，全在能揆度以合天德，此通

變神化，所以垂衣裳而天下治也。若無道術則不能揆度，不

能揆度則不能制而用之爲法，臣下遂無以守職奉命矣。揆

度天意，乾健之不已也；守職奉命，坤順之承天也。奉命猶

承天，故以「守職」爲「奉命」也。以揆度言爲術，以施行言爲

德，皆道也。不以道揆則不信道，故云「朝廷之上不信道德」

也。趙氏以「工」爲「百工」，以「度」爲「度量」。趙氏佑《溫故

錄》云：「工爲四民之一，特言之者，奇技淫巧之興，皆以蕩

人心，蠹風俗也。」按：《毛詩·周頌》「嗟嗟臣工」，傳云：

「工，官也。」《國語·魯語》「夜徹百工」，《尚書·堯典》「允釐

百工」，百工即謂百官，度謂法度也。《史記·天官書》「其人

守犯太微」，《集解》引韋昭云：「自下觸之曰犯。」《淮南·脩

務訓》云「犯津關」，注云：「犯，觸也。」是「犯義」即「觸義」，

「犯刑」即「觸刑」也。有道術而後知義禁。不以道術揆度則

不知義，故君子觸義之所禁而妄爲也；上既不知義，則小人

詐僞欺誣，無所不至而「愚人罹於密罔」矣。此皆不能因先

王之道，遵先王之法者也。雖有仁心而不能以道揆，則下無

「因」言「繼先王之道」，在通變神化。因者，因此也，繼者，繼此也。不揆度，則徒法不能自行矣。王氏引之《經傳釋詞》云：「所猶若也，或也。」國之所存者幸也，言國之或存者幸也。」故曰：城郭不完，兵甲不多，非國之災也；田野不辟，貨財不聚，非國之害也。上無禮，下無學，賊民興，喪無日矣。**注**言君不知禮，臣不學法度，無以相檢制。則賊民興，亡在朝夕，無復有期日。言國無禮義必亡。**疏**注「言君」

至「必亡」○正義曰：趙氏以「下無學」爲臣不學法度，近時通解以「下」指民。趙氏佑《溫故錄》云：「古之教者，五家爲比，五比爲閭，閭有塾，^①四閭爲族，五族爲黨，黨有庠，五黨爲州，州有序。大而六鄉六遂皆有序曰學，匪獨國有學也。學非特以教國子，國之貴遊子弟，國之俊秀也，舉彼耕甿雜作，至愚且賤，自六尺以上，皆比而使人其中。故大司徒領職事十有二於邦國都鄙，以登萬民，一曰稼穡，十曰學藝，終曰服事。小司徒頒比法於六鄉之大夫，以施政教，行徵令。鄉師、鄉大夫各掌其鄉之教，以正月之吉受教法於司徒，退而頒之於其鄉吏，使各以教其所治，考其德行，察其道藝，有鄉射之禮、大比之禮。州長各屬其州之民而讀法，歲

時祭祀州社亦如之，有會民而射於州序之禮。黨正各掌其黨，有屬民而飲酒於序以正齒位之禮。族師掌書其孝弟睦婣有學者。以逮閭胥，比長所掌，莫不設之學，董之官。其平日相保相受既有以察知其衆寡之數，明其禁令，又擇夫仕焉而已者爲之大師小師。民自新穀既成，餘子皆入學，距冬至四十五日出學。學有進，則由比閭而升之族黨，以次升於州學、鄉學。民不皆選司徒人太學，而已知《禮》《樂》《詩》《書》之文、孝弟忠信禮義廉耻之事。一國之中，貴賤賢否，等列有常，自其上世以來，習知賤之不可以干貴，愚之不可以敵賢，各循其分而不敢肆浸淫漸靡，雖有桀黠不帥，一里老得而饋撻之，無有黨同相濟者。官長賢，易於治，官長不賢，亦難於亂也。蓋教學之功如此。降而春秋，此意亦既微矣。然而鄭存鄉校，魯聞弦歌，原伯不說學，則以取譏於時，理之者蓋非無人，故其民猶知先王之澤。一時相攻相取，皆強力之諸侯卿大夫爲之，至於征伐煩興，暴骨如莽，而罕聞有窮巷小民起而相抗撓爲寇亂，如後世史書之事者，豈其民性之淳哉？由教化之積也。迨戰國，遂以蕩然。其君方日尋干戈，遑問學校，民皆救死不贍，疾視其上，去從椎埋。孟

①「塾」，原誤作「塾」，今據《四書溫故錄》、經解本改。

子蓋逆知六國之必亡，暴秦之不終，而間左之禍將作也，故爲歸本於「上無禮」，其於下也，不曰「無義」而曰「無學」，謂夫學也者乃所以明義也。漢荀悅有云：「人不畏死，不可懼以罪，人不樂生，不可勸以義。故在上者先豐民財以定其志，是謂養生。禮教榮辱以加君子，化其情也；桎梏鞭扑以加小人，化其形也。若教化之廢，推中人而墜於小人之域，教化之行，引中人而納于君子之塗，是謂章化。」斯言也，爲能洞於道揆法守，不可以老生之常談忽之。」《詩》云：

「天之方蹶，無然泄泄。」泄泄猶沓沓也。事君無義，進退無禮，言則非先王之道者，猶沓沓也。**注**《詩》、《大雅·板》之篇。天謂王者。蹶，

動也。言天方動，女無敢沓沓，但爲非義非禮，背棄先王之道，而不相匡正也。**疏**注「詩大」至「正也」○正

義曰：《詩》在《大雅·板》篇之第二章。毛傳云：「蹶，動也。泄泄猶沓沓也。」箋云：「天，斥王也。」段氏玉裁《說文解字注》云：「咄，多言也。从口，世聲。《詩》曰：『無然咄咄。』《孟子》、毛傳皆曰：『泄泄猶沓沓也。』曰部云：『沓，語多沓沓也。』言部又云：『誾，多言也。』引《詩》『無然誾誾』，蓋四家之別也。①「誾，謏誾也。」「謏，謏誾，語相及也。」諸

與曰部沓字音義皆同。荀卿書「愚者之言，謏誾然而沸」，**注**：「謏誾，多言也。」按：《蕩》篇箋云：「其笑語沓沓，又如湯之沸、羹之方熟。」亦以沓沓屬笑語。孟子以「言則非先王之道」爲沓沓，「言則非先王之道」即「生於其心」，而爲誾、爲淫、爲邪、爲遁之言。言不本諸《詩》、《書》，道不揆諸先聖，徒以心覺心悟，自以爲是，一倡百和，真沓沓矣。趙氏以「無然」爲「無敢」，鄭氏以「然泄泄」爲「泄泄然」，「無然泄泄」即「無泄泄然」也。故曰：責難於君謂之恭，陳善閉

邪謂之敬，吾君不能謂之賊。**注**人臣之道，當進君於善。責難爲之事，使君勉之，謂行堯舜之仁，是爲恭臣；陳善法以禁閉君之邪心，是爲敬君；言吾君不肖，不能行善，因不諫正，此爲賊其君也。**疏**

注「人臣」至「君也」○正義曰：《後漢書·鄧曄傳》云：「孟軻以彊其君之所不能爲忠，量其君之所不能爲賊。」彊其君之所不能，謂「責難於君」也。彊即勉也。彊其君之所不能，即勉其君之所能也。《禮記·中庸》云：「或安而行之，或利而行之，或勉彊而行之，及其成功，一也。」劉熙《釋名·釋言

①「別」，原作「訓」，今據《說文解字注》改。

語云：「難，憚也。人所忌憚也。」難爲之事，憚爲之事也。《說文》貝部云：「責，求也。」定公元年《穀梁傳》云：「求者，請也。」君所憚爲，臣請求之，使君勉強爲之。何以責難於君，即陳善閉邪是也。君有邪心，故憚於爲善。《呂氏春秋·君守》篇云：「外欲不入謂之閉。」乃不知所以閉之道，而倖直以觸之，矯拂以爭之，言不可得而入，邪究不可閉塞，且激而成害矣。故欲閉其邪，惟婉陳其善道。善道明則邪心自絕，此所以爲恭爲敬。《白虎通·諫諍》篇云：「人懷五常，故知諫有五：其一曰諷諫，二曰順諫，三曰闕諫，四曰指諫，五曰陷諫。諷諫者，智也。知患禍之萌深，睹其事未彰而諷告焉，此智之性也。順諫者，仁也。出辭遜順，不逆君心，此仁之性也。闕諫者，禮也。視君顏色不悅，且卻，悅則復前，以禮進退，^①此禮之性也。指者，質也。質相其事而諫，此信之性也。陷諫者，義也。惻隱發於中，直言國之害，勵志忘生，爲君不避喪身，此義之性也。故孔子曰：「諫有五，吾從諷之諫。」事君進思盡忠，退思補過。去而不訕，諫而不露。故《曲禮》曰：「爲人臣者不顯諫。」纖微未見於外，如《詩》所刺也。」孔子取諷諫，則指與陷所不取矣。

章指：言雖有巧智，猶須法度。國由

先王，禮義爲要。不仁在位，播越其惡。誣君不諫，故謂之賊。明上下相須而道化行也。疏「國由先王」○正義曰：周氏廣業《孟子章指考證》云：「國，小字宋本作因。」

孟子曰：「規矩，方員之至也；聖人，人倫之至也。」注至，極也。人事之善者，莫大取法於聖人，猶方員須規矩也。疏注「至極」至「矩也」○正義曰：「至」之爲「極」，通訓也。「人倫」即人事也。《毛詩·小雅·節南山》箋云：「至猶善也。」故又以「人倫之至」爲「人事之善」。欲爲君，盡君道；欲爲臣，盡臣道。二者皆法堯舜而已矣。注堯舜之爲，君臣道備。疏注「堯舜之爲君臣道備」○正義曰：《禮記·月令》「農事備收」，注云：「備猶盡也。」君臣是人倫，堯舜是聖人。不以舜之所以事堯事君，不敬其君者也；不以堯之所以治民治民，賊其民者也。

①「進」，原脫，今從沈校據《白虎通》補。

注言舜之事堯，敬之至也；堯之治民，愛之盡也。

孔子曰：「道二，仁與不仁而已矣。」暴其民甚，則身弑國亡；不甚，則身危國削，名之曰幽厲，雖孝子慈孫，百世不能改也。

注仁則國安，不仁則國危亡。甚謂桀、紂，不甚謂幽、厲。厲

王流於彘，幽王滅於戲，可謂身危國削矣。名之謂謚之也。謚以幽、厲以章其惡，百世傳之，孝子慈孫何能改也？

疏注「甚謂桀、紂，不甚謂幽、厲」○正義曰：

趙氏佑《溫故錄》云：「『暴其民』句，『甚』、『不甚』各爲句。以後之遭禍言，非以暴之有甚不甚。幽厲之暴，豈猶得爲不甚？」按：趙氏以甚指桀、紂，以下引《詩》言。厲王不能鑒紂，猶紂之不能鑒桀也。堯舜之道，仁其民者也。鑒于桀、紂則法堯舜，故疊引孔子之言及《詩》之言以明之。○注「名之」至「其惡」○正義曰：《逸周書·謚法解》云：「是以大行受大名，細行受細名。行出於己，名生於人。」是「名」即「謚」也。又云：「壅遏不通曰幽。動祭亂常曰幽。」殺戮無辜曰厲。是幽厲爲「章其惡」也。《詩》云：「殷鑒不遠，在夏后之世。」此之謂也。

注《詩》、《大雅·蕩》

之篇也。殷之所鑒視，近在夏后之世耳。以前代善惡爲明鏡也。欲使周亦鑒於殷之所以亡也。

疏注

「詩大雅」至「亡也」○正義曰：《詩》在《大雅·蕩》第八章。箋云：「此言殷之明鏡不遠也，近在夏后之世。謂湯誅桀也。後武王誅紂。今之王者，何以不用爲戒？」《爾雅·釋詁》云：「監，視也。」監與鑒通，亦作鑑。《考工記·輅人》云：「金錫半謂之鑒燧之齊」，注云：「鑒，鏡也。」是「鑒」爲「視」，亦爲「鏡」也。

章指：言法則堯舜，以爲規矩；鑒戒

桀、紂，避遠危殆。名謚一定，千載而不可改也。

疏「法則堯舜以爲規矩」○正義曰：《春秋繁

露·楚莊王》篇云：「《春秋》之道，奉天而法古。是故雖有巧手，弗脩規矩，不能正方員；雖有察耳，不吹六律，不能定五音；雖有知心，不覽先王，不能平天下。然則先王之遺道亦天下之規矩六律也。故聖者法天，賢者法聖。」蓋孟子之學在習先聖之道而行先王之法，故言稱堯舜，願學孔子，承前章而又申明之如此。

孟子曰：「三代之得天下也，以仁；其失

天下也，以不仁。國之所以廢興存亡者，亦然。

注三代，夏、商、周。國謂公侯之國。存亡在仁與不仁也。

疏注「三代夏商周」○正義曰：「失天下」

謂禮樂征伐不自天子出，天下不奉天子之令也。故周自東遷以後，祚雖未改，亦為失天下也。天子不仁，不保

四海；諸侯不仁，不保社稷；卿大夫不仁，不

保宗廟；士庶人不仁，不保四體。今惡死亡

而樂不仁，是由惡醉而強酒。」**注**保，安也。四

體，身之四肢。強酒則必醉也。

章指：言人所以安，莫若為仁；惡而

勿去，患必在身。自上達下，其道一焉。

孟子曰：「愛人不親，反其仁；治人不治

反其智；禮人不答，反其敬。行有不得者，皆

反求諸己。其身正而天下歸之。」**注**反其仁，

己仁猶未至邪？反其智，己智猶未足邪？反其

敬，己敬猶未恭邪？反求諸身。身已正則天下歸

就之，服其德也。**疏**「愛人」至「其敬」○正義曰：僖公二

十二年《穀梁傳》云：「故曰：禮人而不答則反其敬，愛人而

不親則反其仁，治人而不治則反其知。」《荀子·法行》篇引

曾子云：「同遊而不見愛者，吾必不仁也；交而不見敬者，

吾必不長也；臨財而不見信者，吾必不信也。三者在身，曷

怨人？怨人者窮，怨天者無識。失之己而反諸人，豈不亦

迂哉？」○**注**「則天下歸就之」○正義曰：《廣雅·釋詁》

云：「歸，就也。」《詩》云：「永言配命，自求多

福。」**注**此詩已見上篇，其義同。

章指：言行有不得於人，一求諸身，

責己之道也。改行飭躬，福則至矣。

孟子曰：「人有恒言，皆曰『天下國家』。

注恒，常也。人之常語也。天下謂天子之所主，國

謂諸侯之國，家謂卿大夫也。**疏**注「恒常也」○正義

曰：《爾雅·釋詁》文。天下之本在國，國之本在

家，家之本在身。」**注**治天下者，不得良諸侯無以

為本；治其國者，不得良卿大夫無以為本；治其家

者，不得良身無以爲本也。

章指：言天下國家，各依其本。本正則立，本傾則跲。雖曰常言，必須敬慎也。

孟子曰：「爲政不難，不得罪於巨室。」

注巨室，大家也。謂賢卿大夫之家，人所則效者。言不難者，但不使巨室罪之，則善也。

疏注「巨室」至

「善也」○正義曰：以「巨室」爲「大家」者，《尚書·梓材》云：「以厥庶民，暨厥臣，達大家。」王氏鳴盛《尚書後案》云：「大家者，封建諸侯，使與大家巨室共守之以爲社稷之鎮，《九兩》所謂『宗以族得民』，《公劉》所謂『君之宗之』。周公分康叔以殷民七族，陶氏、施氏、緡氏、錡氏、樊氏、饑氏、終葵氏，即衛之大家。降至春秋，猶有晉六卿，魯三桓，齊諸田，楚昭、屈、景之類是也。」周氏用錫《尚書證義》云：「大家若伊、巫之族。」《禮記·少儀》云「不顧於大家」，注云：「大謂富之廣也。」孔氏正義云：「大家謂富貴廣大之家，謂大夫之家也。」趙氏佑《溫故錄》云：「『不得罪巨室』非徇巨室也。巨室之資力有餘，氣習深固，易爲善亦易爲惡。彼其謹厚世傳，爲德鄉里，與或妄自尊大，武斷把持者，所在多有。古之

爲政，有行法不避貴戚大姓，爲史書稱者。果其人積負不仁，如律所謂「勢惡土豪，爲世指疾」，何足言「一國之所慕」？爲政者自宜亟創懲之，爲齊民先，而何得罪之與有？

注故深體經文，以「巨室」爲「賢卿大夫之家，人所則效者」。

惟賢，故不愧爲巨室不可以得罪，能使一國慕之，天下慕之，而有裨吾德教也。「不得罪」奈何？曰：禮而已矣。禮以類族辨物，無過也，無不及也。後世政不古若，庸才下吏，專阿勢利而虐愚柔，固齷齪不足道，其有故持成見，務爲刻深，偏樂得搢紳素封之事而文致之，不察其平居之望實，事理之是非，下以飽欲壑，上以弋能名，其亦爲巨室者有以階之厲邪？「巨室之所慕，一國慕之，一國之所慕，天下慕之。故沛然德教溢乎四海。」**注**慕，思也。賢卿大夫，一國思隨其所善惡，一國思其善政，則天下思以爲君矣。沛然大治德教，可以滿溢於四海之內。**疏**注「慕思」至「之內」○正義曰：《楚辭·懷沙》云「邈不可慕兮」，注云：「慕，思也。」政善則巨室善之而一國隨其所善也，政不善則巨室惡之而一國隨其所惡也。《廣雅·釋詁》云：「沛，大也。」「溢，滿也。」《一切經音義》引《三倉》云：「洽，徧澈也。」徧澈亦盈滿之義，故以

「大治」釋「沛然」。大治即是滿溢，滿溢即是沛然也。「德教溢乎四海」，然則巨室之所慕，慕其德教也。有此德教，即不得罪於巨室，而為政不難矣。

章指：言天下傾心，思慕鄉善。巨室不罪，咸以為表。德之流行，可以充四海也。

孟子曰：「天下有道，小德役大德，小賢役大賢；天下無道，小役大，弱役強。斯二者，天也。順天者存，逆天者亡。」**注**有道之世，小德小賢樂為大德大賢役，服於賢德也；無道之時，小國弱國畏懼而役於大國強國也。此二者，天時所遭也。當順從之，不當逆也。齊景公曰：

「既不能令，又不受命，是絕物也。」涕出而女於吳。**注**齊景公，齊侯；景，謚也。言諸侯既不能令告鄰國，使之進退，又不能事大國，往受教命，是所以自絕於物。物，事也。大國不與之通朝聘之事

也。吳，蠻夷也。時為強國，故齊侯畏而耻之，泣涕而與為婚。**疏**「涕出而女於吳」○正義曰：《說苑·權謀》

篇云：「齊景公以其子妻闔廬，送諸郊，泣曰：『余死不汝見矣。』」高夢子曰：「齊負海而縣山，縱不能全收天下，誰干我君？愛則勿行。」公曰：「余有齊國之固，不能以令諸侯，又不能聽，是生亂也。寡人聞之，不能令，則莫若從。」遂遣之。《吳越春秋·闔閭內傳》云：「闔閭謀伐齊，齊侯使女為質於吳，因為太子波聘齊女。」**注**云：「齊景公女。孟子所謂『涕出而女於吳』即此也。」翟氏灝《考異》云：「《左傳》僖公七年，孔叔言於鄭伯曰：『既不能彊，又不能弱，所以斃也。』」景公言蓋本其意。」○**注**「物事」至「事也」○正義曰：《毛詩·大雅·烝民》「有物有則」，傳云：「物，事也。」《周禮·大司徒》「以鄉三物教萬民」，《禮記·文王世子》「行一物而三善皆得者」，**注**並云：「物猶事也。」兩國相交之事莫如朝聘，故以「絕物」為「不與通朝聘之事」也。今也小國師大國而耻受命焉，是猶弟子而耻受命於先師也。**注**今小國以大國為師，學法度焉，而耻受教命，不從其進退，譬猶弟子不從師也。**疏****注**「今小國」

至「度焉」○正義曰：《禮記·學記》云：「夫然，故安其學而

親其師。」又云：「師也者，所以學爲君也。」故趙氏以「學」釋「師」，謂「師大國」即「學大國」也。《書·大傳》云：「學，效也。」《淮南子·脩務訓》以「趣明師」，高誘注云：「師，所以取法則。」「法則」即「法度」。以大國爲師即是以大國爲法度，故疊以「師」、「學法度」明之。如耻之，莫若師文王。師文王，大國五年，小國七年，必爲政於天下矣。**注**文王行仁政以移殷民之心，使皆就之。今師效文王，大國不過五年，小國七年，必得政於天下矣。文王時難，故百年乃洽；今之時易，文王由百里起，今大國乃踰千里，過之十倍有餘，故五年足以爲政，小國差之，故七年。《詩》云：「商之孫子，其麗不億，上帝既命，侯于周服。侯服于周，天命靡常，殷士膚敏，裸將于京。」**注**《詩》、《大雅·文王》之篇。麗、億，數也。言殷帝之子孫，其數雖不但億萬人，天既命之，惟服於周。殷之美士，執裸暢之禮，將事於京師，若微子者。膚，大，敏，達也。此天命之無常也。**疏**注「詩大雅」至「常也」○正義曰：《詩》在《大雅·文王》第四章及第五章。

四章毛傳云：「麗，數也。盛德不可爲衆也。」箋云：「于，於也。商之孫子，其數不徒億，多言之也。至天已命文王之後，乃爲君於周之九服之中，言衆之不如德也。」五章毛傳云：「則見天命之無常也。殷士，殷侯也。膚，美，敏，疾也。裸，灌鬯也。周人尚臭。將，行，京，大也。」箋云：「無常者，善則就之，惡則去之。殷之臣壯美而敏，來助周祭。」趙氏義略同。《方言》云：「敷，數也。」注云：「偶物爲敷。」敷與麗同。《周禮·夏官·校人》注云：「麗，耦也。」《小爾雅·廣言》云：「麗，兩也。」凡物自兩以上，皆數也。「其麗不億」謂其偶不止於億也。十萬爲億，億而偶則二十萬也，謂不止二十萬也。鄭以「侯于周服」爲「爲君於周之九服之內」，是以君釋侯，以九服釋周服。趙氏此句無釋，而注「侯服于周」云「惟服于周」，則是以「惟」釋「侯」，以「服」爲服從。乃鄭氏云「善則就之」，是以「服于周」爲「就于周」，與趙義不殊。微子封於微，趙氏舉此爲殷士，則亦以「殷士」爲殷侯。隱公五年《公羊傳》云：「美大之之辭也。」《毛詩·小雅》「以奏膚公」，傳亦云：「膚，大也。」大與美，其義亦通也。「敏」爲疾，才識捷速，正其「達」也。《音義》出暢字，丁云：「謂鬯酒也。」古鬯通作暢，《禮記·雜記》云「暢白以櫛」，《春秋繁露·執贄》篇云「天子用暢」，是也。孔子曰：「仁，

不可爲衆也。」夫國君好仁，天下無敵。**注**孔

子云，行仁者，天下之衆不能當也。諸侯有好仁者，天下無敢與之爲敵。今也欲無敵於天下而不

以仁，是猶執熱而不以濯也。《詩》云：「誰能執熱，逝不以濯？」**注**《詩》，《大雅·桑柔》之

篇。誰能持熱而不以水濯其手？喻爲國誰能違仁而無敵也。**疏**注「詩大」至「敵也」○正義曰：《詩》在《大

雅·桑柔》篇第五章。毛傳云：「濯，所以救熱也。」箋云：

「當如手持熱物之用濯。」與趙氏義同。《禮記·內則》云：

「炮，取豚若將，^①塗以謹塗，炮之，塗皆乾，擘之，濯手以摩之。」孔氏正義云：「手既擘泥不淨，其肉又熱，故濯手摩

之，去其皸莫。」^②此「執熱以濯」之事也。

章指：言遭衰逢亂，屈服強大；據國

行仁，天下莫敵。雖有億衆，無德不親。

執熱須濯，明不可違仁也。

孟子曰：「不仁者可與言哉？安其危

而利其菑，樂其所以亡者。不仁而可與言，

則何亡國敗家之有？**注**言不仁之人，以其所以

爲危者反以爲安，必以惡見亡而樂行其惡。如使其能從諫從善，可與言議，則天下何有亡國敗家也？

疏「不仁者」至「之有」○正義曰：以上四章示人反身改過之義。前言改其師大國者師文王，則轉弱爲強，化小爲大，

此言不仁者改其不可與言而爲可與言，則國可不亡，家可不敗。此孟子發明《周易》之旨也。「危」即「菑」也，「安」之即

「利」之也。故趙氏於「利其菑」不復注。有孺子歌

曰：「滄浪之水清兮，可以濯我纓；滄浪之水

濁兮，可以濯我足。」孔子曰：「小子聽之：清

斯濯纓，濁斯濯足矣。自取之也。」**注**孺子，童

子也。小子，孔子弟子也。清濁所用，尊卑若此。

自取之，喻人善惡見尊賤乃如此。**疏**「有孺子」至「我

足」○正義曰：《楚辭·漁父》云：「漁父莞爾而笑，鼓枻而

去。歌曰：「滄浪之水清兮，可以濯吾纓；滄浪之水濁兮，

①「若」，原誤作「及」，今從沈校據《禮記》改。

②「莫」，原誤作「矣」，今從沈校據《禮記正義》改。

可以濯吾足。」《水經》「沔水過武當縣東北」，注云：「縣西北四十里，漢水中有洲名滄浪洲。庾仲雍《漢記》謂之千齡洲，非也。是世俗語訛，音與字變矣。」《地說》曰：「水出荆山東南，流爲滄浪之水。」是近楚都，故漁父歌曰：「滄浪之水清兮，可以濯我纓；滄浪之水濁兮，可以濯我足。」按，《尚書·禹貢》言「導漾水，東流爲漢，又東爲滄浪之水」。不言「過」而言「爲」者，明非他水決人也。蓋漢沔水自下有滄浪，通稱耳。纏絡鄢、郢，地連紀、郢，咸楚都矣。漁父歌之，不達水地。」按：歌出孺子，孔子所聞，遠在屈原之前。屈原取此，假爲漁父之辭耳，非其本也。閻氏若璩《釋地》云：「滄浪蓋地名也。漢水流經此地，遂得名滄浪之水。善乎，宋葉夢得言：「大抵《禹貢》水之正名，可以單舉者，若漢若濟之類是，不可單舉者，則以「水」足之，若黑水、弱水之類是，非水之正名而因以爲名，則以「水」別之，若滄浪之水是。」胡氏渭《禹貢錐指》云：「水名或單舉，或配水字，各有所宜。弱、黑並配水，漾單舉，沅配水，皆屬辭之體應爾，非有他義。《山海經》凡山、水二字爲名者，其上必加之字，猶此「滄浪之水」也，亦古人屬辭之體，安見滄浪爲地名而非水名乎？」王氏鳴盛《尚書後案》云：「《水經·夏水》篇注引鄭注下即引劉澄之《永初山水記》云：『夏水，古文以爲滄浪，鮑父所

歌也。」鄭云：「今謂之夏水。」意以今之所謂夏水即古之所謂滄浪也。《水經》云：「夏水出江，流于江陵縣東南，又東過華容縣南。」即所謂「又東爲滄浪」者也。鄭氏強以千齡洲改爲滄浪洲以當《禹貢》「滄浪之水」，其說詭甚。鄭所指者乃均州漢水中一小洲，即庾仲雍所云千齡洲。千齡、滄浪，音義全別。即屈原遊江潭，遇漁父，並不在均州之境。又思念楚都而托歌滄浪，正當在古郢都，今江陵，故《地說》援此歌以爲楚都之切證。鄭乃云「漁父歌之，不達水地」，尤爲妄謬。張平子《南都賦》：「流滄浪而爲隄，廓方城而爲墉。」李善注引《左傳》屈完所謂「楚國方城以爲城，漢水以爲池」，則是滄浪旋繞楚都，正當在江陵。」盧氏文弨《鍾山札記》云：「倉浪，青色。在竹曰蒼篴，在水曰滄浪，古詞《東門行》「上用倉浪天」，天之色正青也。艷歌《何嘗行》「上慙滄浪之天」，俱見《晉書·樂志》。又《呂氏春秋·審時》篇「麥後時者，弱苗而蒼浪」，亦言其青色。蒼、倉、滄三字並通用，非謂天之色如水，以滄浪相比況也。」周氏廣業《孟子古注考》云：「《文選·塘上行》劉熙注「滄浪之水清兮」：「滄浪，水色也。」蘇子美於吳下作滄浪亭，正取此義。葉夢得

① 上「注」字，原脫，今據《尚書後案》補。

《避暑錄話》謂「滄浪，地名，非水名」，非也。」○「清斯」至「自取之也」○正義曰：周氏柄中《辨正》云：「或云：漢水本清，而滄浪又去源未遠，名之「滄浪」者，惟其清也。則可以濯纓者其本然，而濯足之辱，乃水自取之也。愚按，《水經注》，漢水自發源嶓冢，流至武當之滄浪洲，幾二千里，去源遠矣。《襄陽縣志》云：「漢水重濁，與大河相似。」童承叙亦謂「漢水至濁，與江湖水合，其流必澄，故常填淤」。然則漢水本濁，其時而清者，正以合他水而流澄，安得言清者其本然乎？」按：滄浪是夏水，本以清得名，則其清是本然，濁乃習染。下云「自侮」、「自毀」、「自伐」，俱從「濁斯濯足」相貫，是水本可濯纓，由自濁而濯足，人本可活，由自作孽而不可活。周氏之辨，非也。「自作孽，不可活」，是本清而自變為濁，由善而惡也，「不仁而可與言」，是既濁而自改為清，由惡而善也。「清斯濯纓」承上，「濁斯濯足」起下，尊而賤，賤而尊，皆自取矣。○注「孺子童子也」○正義曰：錢氏大昕《養新錄》云：「今人以「孺子」為童稚之通稱，蓋本於《孟子》。考諸經傳，則天子以下嫡長為後者乃得稱「孺子」。《金縢》、《洛誥》、《立政》之「孺子」謂周成王也。《晉語》里克、先友、杜原款稱申生為「孺子」，里克又稱奚齊為「孺子」。晉獻公之喪，秦穆公使人弔公子重耳，稱為「孺子」，而舅犯

亦稱之，是時秦欲納之為君也。孺子贛之喪，哀公欲設撥，亦以世子待之也。齊侯荼已立為君，而陳乞、鮑牧稱為「孺子」，其死也謚之曰「安孺子」，則孺子非卑幼之稱矣。樂盈為晉卿而胥午稱為「樂孺子」。《左傳》稱孟莊子為「孺子速」，武伯曰「孺子洩」，莊子之子秩雖不得立，猶稱「孺子」，是孺子貴於庶子也。齊子尾之臣稱子良曰「孺子長矣」，韓宣子稱鄭子蠆曰「孺子善哉」，皆世卿而嗣立者也。《內則》「異為孺子室於宮中，母某敢用時日，祇見孺子」，亦貴者之稱。惟《檀弓》載有「子與子游立，見孺子慕者」，「弁人有其母死而孺子泣者」，此為童子通稱，與《孟子》同。○注「小子孔子弟子也」○正義曰：《禮記·少儀》「小子走而不趨」，注云：「小子，弟子也。」《詩·小雅·思齊》篇「肆成人有德，小子有造」，箋云：「成人謂大夫士也。小子，其弟子也。」《論語·泰伯》篇「曾子有疾，召門弟子曰：吾知免夫，小子」，《集解》引周生曰：「小子，弟子也。」又《子張》篇「子夏之門人小子」，《集解》引包曰：「言子夏弟子。」此「小子」自孔子呼之，是「孔子弟子」也。夫人必自侮，然後人侮之；家必自毀，而後人毀之；國必自伐，而後人伐之。注人先自為可侮慢之行，故見侮慢

也；家先自爲可毀壞之道，故見毀也；國先自爲可誅伐之政，故見伐也。**疏**注「人先」至「伐也」○正義

曰：《呂氏春秋·遇合》篇云「是侮也」，高誘注云：「侮，慢也。」《小爾雅·廣言》云：「毀，壞也。」《荀子·議兵》篇「堯伐驩兜」，注云：「伐，亦誅也。」太甲曰：「天作孽，猶

可違；自作孽，不可活。」此之謂也。**注**已見上篇，說同也。

章指：言人之安危，皆由於己。先自

毀伐，人乃攻討，甚於天孽，敬慎而已。如

臨深淵，戰戰恐栗也。**疏**「如臨深淵戰戰恐栗」

○正義曰：「恐栗」，一本作「恐懼」。《音義》出「恐栗」，

丁云：「義當作慄，古字借用。」趙氏本作栗也。《毛詩·

小雅·小閔》篇云「戰戰兢兢，如臨深淵」，傳云：「戰戰，

恐也。」《後漢書》注引《太公金匱》云：「黃帝居民上，惴

惴如臨深淵，禹居民上，慄慄如不滿日。」《史記·樂書》

云：「戰戰恐懼。」《說苑·說叢》篇云：「戰戰慄慄，日慎

其事。」《淮南子·人間訓》引堯成曰：「戰戰慄慄，日慎

一日。」

孟子正義卷十四終

孟子正義卷十五

江都縣鄉貢士焦循撰集

孟子曰：「桀紂之失天下也，失其民也；失其民者，失其心也。」**注**失其民之心則天下畔之，簞食壺漿以迎武王之師是也。得天下有道。得其民，斯得天下矣。得其民有道。得其心，斯得民矣。得其心有道。所欲與之聚之，所惡勿施爾也。**注**欲得民心，聚其所欲而與之。爾，近也。勿施行其所惡，使民近，則民心可得矣。**疏**注「欲得」至「與之」○正義曰：「聚」之義有二：

《禮記·曲禮》注云：「聚猶共也。」《國語·晉語》云「聚居異情」，注云：「聚，共也。」「所欲與之聚之」即「所欲與之共之」也。《左傳》「顏涿聚」《說苑·正諫》篇作「燭趨」，是聚與趨

通。《易·萃卦》彖傳云「聚以正也」，《釋文》云：「荀本作取。」劉熙《釋名·釋言語》云：「取，趣也。」趣亦即趨，是聚與趨、趣、取通。趙氏言「聚其所欲而與之」，即是「趣其所欲而與之」也。王氏引之《經傳釋詞》云：「家大人曰：與猶爲也。爲字讀去聲。」「所欲與之聚之」言民之所欲則爲民聚之也。^①《楚策》曰「吾與子出兵矣」言吾爲子出兵也。《漢書·高帝紀》「漢王爲義帝發喪」，《漢紀》「爲」作「與」。戴氏震《孟子字義疏證》云：「宋以來儒者舉凡飢寒愁怨、飲食男女、常情隱曲之感，則名之曰「人欲」，故終其身見欲之難制。其所謂「存理」，空有理之名，究不過絕情欲之感耳。何以能絕？天下必無舍生養之道而得存者。凡事爲皆有於欲，無欲則無爲矣。有欲而後有爲，有爲而歸於至當不可易之謂理。無欲無爲，又焉有理？老莊、釋氏生於無欲無爲，故不言理；聖人務在有欲有爲之咸得理。是故君子亦無私而已矣，不貴無欲。君子使欲出於正不出於邪，不必無飢寒愁怨、飲食男女、常情隱曲之感。於是譏說誣辭反得刻議君子而罪之，此理欲之辨使君子無完行者，爲禍如是也。以無欲然後君子，而小人之爲小人也，依然行其貪邪。獨執此以爲

① 上「民」字，原脫，今據《經傳釋詞》補。

君子者，謂不出於理則出於欲，不出於欲則出於理。其言理也，如有物焉得於天而具於心，於是未有不以意見爲理之君子，且自信不出於欲則曰心無愧怍。夫古人所以不愧不怍者，豈此之謂乎？不悟意見多偏之不可以「理」名，而持之必堅，意見所非，則謂其人自絕於理。此理欲之辨適成忍而殘殺之具，爲禍又如足也。夫堯舜之憂「四海困窮」，文王之「視民如傷」，何一非爲民謀其人欲之事？惟順而導之，使歸於善。今既截然分理欲爲二，治己以不出於欲爲理，治人亦必以不出於欲爲理，舉凡民之飢寒愁怨、飲食男女、常情隱曲之感，咸視爲人欲之甚輕者矣。輕其所輕，乃吾重天理也，公義也。言雖美，而用之治人則禍其人。至於下以欺僞應乎上，則曰人之不善。胡弗思聖人體民之情，遂民之欲，不待告以天理公義而人易免於罪戾者之有道也？孟子於民之「放辟邪侈無不爲」以「陷於罪」，猶曰「是罔民也」，又曰「救死而恐不贍，奚暇治禮義哉」？古之言理也，就人之情欲求之，使之無疵之爲理，今之言理也，離人之情欲求之，使之忍而不顧之爲理。此理欲之辨適以窮天下之人盡轉移爲欺僞之人，爲禍何可勝言也！其所謂欲，乃帝王之所盡心於民，其所謂理，非古聖賢之所謂理。蓋離乎老釋之言以爲言，是以弊至此也。然宋以來儒者皆力破老釋，不自知

雜襲其言而一一傳合於經，遂曰六經孔孟之言。其惑人也易，而破之也難，數百年於茲矣。人心所知皆彼之言，不復知其異於六經孔孟之言矣。世又以躬行實踐之儒信焉不疑。夫楊墨、老釋皆躬行實踐，勸善懲惡，救人心，贊治化，天下尊而信之，帝王因尊而信之者也。孟子、韓子闢之於前。聞孟子、韓子之言，人始知其與聖人異而究不知其所以異。至宋以來儒者之言，人咸曰是與聖人同也，辯之是欲立異也。此如嬰兒中路失其父母，他人子之而爲其父母，既長不復能知他人之非其父母。雖告以親父母，而決爲非也而怒其告者。故曰破之也難。」○注「爾近」至「得矣」○正義曰：「爾」與「邇」通，《儀禮·燕禮》「南鄉爾卿」、《特牲饋食禮》「祝命爾敦」，爾字皆訓近，皆爲邇也。趙氏佑《溫故錄》云：「讀「爾也」自爲句。」民之歸仁也，猶水之就下，獸之走壙也。故爲淵毆魚者，獺也；爲叢毆爵者，鷯也；爲湯武毆民者，桀與紂也。今天下之君有好仁者則，諸侯皆爲之毆矣，雖欲無王，不可得矣。注民之思明君，猶水樂埤下，獸樂壙野。毆之則歸其所樂。獺，獺也。鷯，土鷯也。故云諸侯好爲仁者毆民，若此也。湯武行之

矣，如有則之者，雖欲不王，不可得也。」疏注「民之」

至「所樂」○正義曰：埤與卑通，亦作庫。《國語·周語》云

「晉侯執玉卑」，注云：「卑，下也。」《說文》土部云：「墿，塹

穴也。一曰大也。」其訓大者通於墿，《毛詩·小雅·何草不

黃》篇「率彼墿野」，傳云：「墿，空也。」昭公元年《左傳》云

「居於墿林」，賈注云：「墿，大也。」野空濶故大。大即廣也，

故字亦通於廣。趙氏以「墿野」釋之，讀墿爲墿也。《說文》

馬部云：「驅，驅馬也。从馬，區聲。驅，古文驅。」段氏玉裁

《說文解字注》云：「支者，小擊也，今之扑字。鞭箠策，所以

施於馬而驅之也，故古文从支。引申爲凡駕馭追逐之稱。

《周禮》以靈鼓擊之，「以炮土之鼓擊之」，《孟子》「爲淵擊

魚，爲叢擊爵，爲湯武擊民」，皆用古文，其實皆可作驅，與受

部之擊義別。」○注「獼獼也」○正義曰：王氏念孫《廣雅疏

證》云：「《說文》獼，獼屬也。」或從賓作獼。又云：「獼，如

小狗，水居食魚。」李善《羽獵賦》注引郭璞《三倉解詁》云：

「獼似狐，青色，居水中，食魚。」《呂氏春秋·孟春紀》「獼祭

魚」，①高誘注云：「獼，獼，水禽也。取鯉魚置水邊，四面陳

之，世謂之祭魚。」《淮南子·兵略訓》：「蓄池魚者必去獼

獼，爲其害魚也。」故《鹽鐵論·輕重》篇云「水有獼獼而池魚

勞」。《御覽》引《博物志》云：「獼，頭如馬，腰以下似蝙蝠，

毛似獼，大可五六十斤。」《名醫別錄》陶注亦云：「獼有兩種，獼獼形大，頭如馬，身似蝙蝠。」則獼乃獼之大者。而顏師古注《漢書·揚雄傳》以獼爲小獼，非也。」○注「鷦鷯也」○正義曰：《爾雅·釋鳥》云「晨風，鷦鷯」，注云：「鷦鷯屬。」邵氏晉涵《爾雅正義》云：「鷦鷯爲鷦類。有生於土窟者，故亦謂之土鷦。《詩》疏引陸璣疏云：「鷦似鷦，青黃色，燕啄。鷦風搖翅，乃因風飛急，疾擊鳩鵲食之。」○注「諸侯」至「得也」○正義曰：「好爲仁者」當作「爲好仁者」。「若此」，此指鷦鷯。趙氏讀「有好仁者則」爲句，言湯武好仁，桀紂爲之敵民使歸之，今天下之君有好仁者以湯武爲法則，今之諸侯皆爲之敵民，亦如桀紂爲湯武敵民矣。今之欲王者，猶七年之病求三年之艾也，苟爲不畜，終身不得。苟不志於仁，終身憂辱，以陷於死亡。」注今之諸侯欲行王道而不積其德，如至七年病而卻求三年時艾。當畜之乃可得。以三年時不畜藏之，至七年而欲卒求之，何可得乎？艾可以爲灸人病，乾久益善，故以爲喻。志仁者亦久行之。

①「紀」，原誤作「絕」，今從沈校據《呂氏春秋》改。

不行之則憂辱以陷死亡，桀紂是也。**疏**注「艾可」至

「益善」○正義曰：《毛詩·王風》「彼采艾兮」，傳云：「艾，所以療疾。」《名醫別錄》云：「艾葉，味苦微溫，主灸百病。」

一名冰臺，一名醫草。」阮氏元《校勘記》云：「灸，音久，亦音

究。孫氏不爲音。俗譌作灸。」《說文》火部云：「灸，灼也。

从火，久聲。」○注「以三年時不畜藏之」^①○正義曰：趙氏

解「爲」爲「何爲」奚爲「之」爲，爲猶以也，故云「以三年」。

王氏引之《經傳釋詞》云：「爲猶使也，亦假設之詞也。」《孟

子·離婁》篇「苟爲不畜」，又「苟爲無本」，《告子》篇曰「苟爲

不熟」，皆言苟使也。」《詩》云：「其何能淑？載胥

及溺。」此之謂也。」**注**《詩》《大雅·桑柔》之篇。

淑，善也。載，辭也。胥，相也。刺時君臣何能爲善

乎？但相與爲沈溺之道也。**疏**注「詩大」至「道也」○

正義曰：《詩》在《大雅·桑柔》第五章。箋云：「淑，善；胥，

相；及，與也。女若云：其於政事何能善乎？則女君臣皆

相與陷溺於禍難。」孔氏正義云：「王肅以爲：如今之政其

何能善？但君臣相與陷溺而已。」趙氏與王肅同。

章指：言水性趨下，民樂歸仁，桀紂

之毆，使就其君。三年之艾，畜而可得；

一時欲仁，猶將沈溺。所以明鑒戒也。**疏**

「猶得沈溺」○正義曰：阮氏元《校勘記》云：「沈，依《說文》當作湛。沈，假借字；沉，俗字。」

孟子曰：「自暴者不可與有言也，自棄

者不可與有爲也。言非禮義，謂之「自暴」

也；吾身不能居仁由義，謂之「自棄」也。**注**

言人尚自暴自棄，何可與有言有爲？仁，人之安

宅也；義，人之正路也。曠安宅而弗居，舍

正路而不由，哀哉！」**注**曠，空；舍，縱；哀，傷

也。弗由，居是者，是可哀傷哉！**疏**注「曠空」至「傷

哉」○正義曰：《論衡·藝增》篇云：「曠，空也。」《呂氏春

秋·無義》篇云「則無曠事矣」，高誘注云：「曠，廢也。」《文

選·西京賦》云「矢不虛舍」，薛綜注云：「舍，放也。」放即縱

也。《廣雅·釋詁》舍，縱並訓置，則舍亦縱也。《說文》口部

云：「哀，閔也。」《國策·秦策》云「天下莫不傷」，注云：

①「時」，原脫，今據注文補。又，本條疏當居上條前。

「傷，慙也。」慙即閔也。

章指：言曠仁舍義，自暴棄之道也。

疏「曠仁」至「道也」○正義曰：前言「不能居仁由義」是「自棄」，則曠弗居，舍弗由承上仁義而言，乃自謂不能而曠之舍之，與非之以爲不足居，不足由而曠之，舍之，同一「曠仁舍義」也，故兼暴、棄言之。或說下二節專指自棄者，以自暴者已「不可與之言」也。

孟子曰：「道在邇而求諸遠，事在易而求之難。人人親其親，長其長，而天下平。」

注邇，近也。道在近而求人求之遠也，事在易而苦人求之難也。謂不親其親，不事其長，故其事遠而難也。**疏**道在「至天下平」○正義曰：自首章言平治天下必因先王之道、行先王之法，反復申明，歸之於「居仁由義」。何爲仁？親親是也。何爲義？敬長是也。道即平

天下之道也，事即平天下之事也。指之以在邇、在易，要之以其親、其長。親其親則不致於無父，長其長則不致於無君。堯舜之道，孝弟而已。其爲人也孝弟，犯上作亂未之有

也。舍此而高談心性、辨別理欲，所謂「求諸遠」、「求諸難也」。或說：道可致而不可求，求便非易簡之道。蓋讀遠字、難字爲句，謂道在邇，不必他求也，若求諸，則遠矣；事在易，不必他求也，若求之，則難矣。邇，《考文》古本作爾。^①

章指：言親親敬長，近取諸己，則邇而易也。

孟子曰：「居下位而不獲於上，民不可得而治也。獲於上有道。不信於友，弗獲於上矣。信於友有道。事親弗悅，弗信於友矣。悅親有道。反身不誠，不悅於親矣。誠身有道，不明乎善，不誠其身矣。」**注**言人求上之意先從己始，本之於心。心不正而得人意者，未之有也。**疏**「居下位」至「身矣」○正義曰：《禮記·中庸》

篇與此同。鄭氏注云：「獲，得也。言臣不得於君，則不得

①「邇考」至「作爾」，據阮校當在《章指》「則邇而易也」下。

居位治民。言知善之爲善，乃能行誠。」戴氏震《孟子字義疏證》云：「誠，實也。據《中庸》言之，所實者，知、仁、勇也；實之者，仁也，義也，禮也。由血氣心知而語於智仁勇，非血氣心知之外別有智、有仁、有勇以予之也。就人倫日用而語於仁，語於禮義，舍人倫日用，無所謂仁、所謂義，所謂禮也。血氣心知者，分於陰陽五行而成性者也，故曰「天命之謂性」。人倫日用皆血氣心知所有事，故曰「率性之謂道」。全乎知仁勇者，其於人倫日用，行之而天下觀其仁、觀其禮義，善無以加焉，「自誠明」者也；學以講明人倫日用，務求盡夫仁，盡夫禮義，則其智仁勇所至，將日增益以於聖人之德之盛，「自明誠」者也。質言之曰人倫日用，精言之曰仁曰義曰禮。所謂「明善」，明此者也；所謂「誠身」，誠此者也。質言之曰血氣心知，精言之曰智曰仁曰勇。所謂「致曲」，致此者也；所謂「有誠」，有此者也。言乎其盡道，①莫大乎仁，而兼及義兼及禮，言乎其能盡道，莫大於智，而兼及仁兼及勇。是故善之端不可勝數，舉仁、義、禮三者而善備矣；德性之美不可勝數，舉智、仁、勇三者而德備矣。曰善曰德，盡其實之謂誠。」是故誠者，天之道也；思誠者，人之道也。至誠而不動者，未之有也，不

誠，未有能動者也。」**注**授人誠善之性者，天也，故曰「天道」；思行其誠以奉天者，人道也。至誠則動金石，不誠以鳥獸不可親狎，故曰「未有能動者」也。**疏**「誠者」至「動者也」○正義曰：《禮記·中庸》云：

「誠者，天之道也；誠之者，人之道也。」注云：「言誠者，天性也；誠之者，學而誠之者也。」趙氏佑《溫故錄》云：「《中庸》言「誠之者」而下詳其目，故以「慎思」爲誠之一事，乃就所學所問而次第及之，然後進以「明辨」、「篤行」。孟子渾括其辭，獨揭「思」字加本句上，則統所知所行而歸重言之，明示人以反求諸身爲誠身之要。惟思故能擇善，惟思故能固執。君子無往而不致其思，無思而不要於誠。故曰「君子有九思」，曰「思不出其位」。孟子嘗警人之弗思而教以思，則得之先立乎大。」程氏瑤田《通藝錄·論學小記》云：「誠者，實有而已矣。天實有此天也，地實有此地也，人實有此人也。人有性，性有仁義禮智之德，無非實有者也。故曰：性善也者，實有此善焉者也。故曰：誠者，物之終始，不誠無物。死乃無此人，未死則實有此人，實有此性，實有此性

①「道」，原誤作「通」，今據《孟子字義疏證》、經解本改。

之善。實有此性之善，故曰「誠者」；能實有此性之善，故曰「誠之者」。誠之者，自明誠者也。能自明誠，實有此能也；能由教人，實有此能也。故曰「自誠明謂之教」。雖不謂之性，非不實有此性也；如不實有此性，則自誠明者，天下一人而已矣。有誠者，無誠之者，雖有教無益也。惟人皆實有此性，故人人能擇善。固執以誠之，而實有此教矣。非實有此人之氣質，亦安能實有此性之善乎？若夫未死先已，未終先終，不誠矣。惟不實有，故曰無物。是不誠之者也，非不能誠之也。是故不空之謂實，不無之謂有，皆指物而言。而二氏空之無之，是已無物矣，此不必與辨者也。今乃指其所謂空與無者而曰雖空而實實，雖無而實有，此釋氏所謂「色即是空，空即是色」，其語不反覺精妙邪？從空無下轉出實有，異乎吾學從物上致力焉者也。」謹按：由悅親而信友，由信友而獲上，由獲上而治民，皆人倫日用之常也，必反身而歸之於誠；其反身而誠也，必歸之以明善。蓋伏羲之前，未有人倫，不知有善，何以有誠？乃天既授人以善性，此「誠者，天之道也」。人性既誠有此善，則自能明，故先覺者自誠而明，因以覺人，而人亦無不自誠而明。然未明，患其不明；既明矣，又患其不誠。故莫不知親之當悅也，友之當信也，上之當獲而民之當治也；亦莫不曰吾能悅親也，吾

能信友也，吾能獲乎上而治乎民也。乃民不治，上不獲，友不信，親不悅，此非不明之故，而不誠之故。不誠者，非天不以誠授我也，是我未嘗思也。是以孟子既由誠身而歸重於明善，又由明善而申言思。誠既明矣，又思其誠。誠身，乃能悅親、信友、獲上、治民，所謂「動」也；悅親而親悅，信友而友信，事上而上獲，治民而民治，「至誠而動物」也；不誠則悅親而親不悅，信友而友不信，事上而上不獲，治民而民不治，所謂「未有能動者」也。惟天實授我以善而我乃能明，亦惟我實有此善而物乃可動。誠則明，明生於天道之誠；明則誠，誠又生於人道之思誠。人能思誠，由其明也；人能明，由其誠也。「惟天下至誠為能盡其性。能盡其性則能盡人之性，能盡人之性則能盡物之性，能盡物之性則可以贊天地之化育，可以贊天地之化育則可以與天地參矣。」此「自誠明謂之性」也。「其次致曲。曲能有誠，誠則形，形則著，著則明，明則動，動則變，變則化。惟天下至誠為能化。」「自明誠謂之教」也。曲者，明而不誠也。未明之先，則自誠而明以盡其性，既明之後，則自明而誠以致其曲。致曲之功仍在於明，蓋雖明而仍未明，所以曲也。何也？明於悅親而未明誠於悅親也，明於信友而未明誠於信友也，明於事上治下未明誠於事上，誠於治下也。故誠其身，仍必明其善矣。

《孟子》此章，括《中庸》之旨而言之。○注「至誠」至「親狎」○正義曰：此本《列子·黃帝》篇爲說。「動金石」者，「有一人從石壁中出，子夏言『游金石，蹈水火，皆可』」是也，「鳥獸不可親狎」者，「海上漚鳥舞而不下」是也。張湛注云：「海童誠心充於內，坦蕩形於外，雖未能利害兩忘，猜忌兼消，然輕羣異類，亦無所多怪。」又云：「誠心無二者，則處水火而不焦溺，涉木石而不悸駭，觸鋒刃而無傷殘，履危險而無顛墜。萬物靡逆其心，人獸不亂羣。」《韓詩外傳》云：「昔者楚熊渠子夜行，見寢石以爲伏虎，彎弓而射之，沒金飲羽，下視，知其石也。因復射之，矢躍無迹。熊渠子見其誠心而金石爲之開。」《呂氏春秋·精通》篇：「鍾子期夜聞擊磬者而悲，歎嗟曰：『悲夫悲夫！心非臂也，臂非椎非石也，悲存乎心而木石應之。』故君子誠乎此而諭乎彼，感乎己而發乎人。」又《具備》篇云：「誠有誠乃合於情，精有精乃通於天。木石之性，皆可動也，又況於有血氣者乎？故凡說與治之務，莫若誠。」

章指：言事上得君，乃可臨民；信友悅親，本在於身。是以曾子三省，大雅矜矜，以誠爲貴也。

疏「曾子三省大雅矜矜」○正義

曰：周氏廣業《孟子章指考證》云：「是章歸重誠身，故趙氏特引『三省』證之。下二句乃申贊之辭。」《詩序》云：「雅者，正也。」雅詩皆正人君子所作，張揖謂「《小雅》之材七十二人，《大雅》之材三十二人」是也。因借言凡有美德者皆稱「大雅」。《史記·孟子傳》：「不能尚德若大雅。」《文選·西都賦》「大雅宏達」，李善注云：「大雅謂有大雅之才者。」《詩》有《大雅》，故以立稱。《漢書》贊云：「夫惟大雅，既明且哲，以保其身。」趙氏於「益成括」章亦言「大雅先人」。又，《文選》韋孟《諷諫詩》「矜矜元王」，李善注引孔安國《尚書傳》曰：「矜矜，戒懼。」則知趙意謂雅德君子常自恐懼脩省，必以誠身爲貴也。班固《幽通賦》：「蓋惴惴之臨深兮，乃二《雅》之所祗。」

孟子曰：「伯夷辟紂，居北海之濱。聞文王作興，曰：『盍歸乎來？』吾聞西伯善養老者。」**注**伯夷讓國，遭紂之世，辟之，隱遁北海之濱。聞文王起興王道。盍歸乎來，歸周也。**疏**「伯夷」至「老者」○正義曰：《史記·周本紀》云：「伯夷、叔齊在孤竹，聞西伯善養老，盍往歸之。太顛、閎夭、散宜生、鬻

子、辛甲大夫之徒皆往歸之。」此伯夷歸文王之事也。王氏引之《經傳釋詞》云：「來，句末語助也。《孟子》：『盍歸乎來』，《莊子》：『人間世』篇：『嘗以語我來』，又『子其有以語我來』，來字皆語助。」○注「聞文王起興王道」○正義曰：毛氏奇齡《四書賸言》云：「趙注『聞文王作興』，以興字句。《離騷》：『呂望之鼓刀兮，遭周文而得舉。』王逸注：『太公避紂，居東海之濱。聞文王作興。』則正引《孟子》文而以興字句者。」翟氏灝《考異》云：「《毛詩·酌》篇正義：『孟子說伯夷居北海之濱，太公居東海之濱，聞文王作興而歸之。』《中論·亡國》篇：『昔伊尹在田畝之中，聞成湯作興而自夏如商。太公避紂之惡，居於東海之濱，聞文王作興，亦自商如周。』毛西河之說良是。《離騷》章句外，更有《詩》疏、《中論》可證。又《子華子·北宮子仕》篇：『王者作興，將以濯滌』，用此『作興』二字。《子華子》雖似後人擬托，然猶唐以前書，亦可備一證也。」太公辟紂，居東海之濱。聞文王作興，曰：『盍歸乎來，吾聞西伯善養老者。』

注太公，呂望也。亦辟紂世，隱居東海。曰聞西伯養老，二人皆老矣，往歸文王也。

疏「太公」至「老者」

○正義曰：《史記·齊太公世家》云：「呂尚蓋嘗窮困年老

矣，以漁釣奸周西伯。西伯獵，遇太公於渭之陽，載與俱歸，立爲師。或曰：太公博聞，嘗事紂。紂無道，去之，游說諸侯，無所遇而卒，西歸周西伯。或曰：呂尚處士，隱海濱，周西伯拘羑里，散宜生、閎夭素知而招呂尚，呂尚亦曰：『吾聞西伯賢，又善養老，盍往焉？』」《史記》列三說，是當以《孟子》爲斷。陶潛《聖賢羣輔錄》引《尚書大傳》云：「太公避紂，居東海之濱，皆率其屬曰：『盍歸乎？吾聞西伯昌善養老。』此二人者，蓋天下之大老也。往而歸之，是天下之父歸之也。天下之父歸之，其子曷往？」王楙《野客叢書》云：

「淵明引此，謂出《尚書大傳》，知《孟子》引逸《書》之辭。」○注「太公」至「東海」○正義曰：閻氏若璩《釋地續》云：「齊

世家：『太公望呂尚者，東海上人。』注未悉。《後漢》琅邪國海曲縣，劉昭引《博物記》注云：「太公呂望所出。今有東呂鄉，又釣於棘津，其浦今存。」又於清河國廣川縣棘津城辨其當在琅邪海曲，此城殊非。余謂海曲故城。《通典》稱在莒縣東，則當日太公辟紂，居東海之濱，即是其家。漢崔瑗、晉盧無忌立齊太公碑以爲汲縣人者，誤。伯夷，孤竹國之世子也。《前漢》遼西郡令支縣有孤竹城，《括地志》孤竹古城在盧龍縣南十二里，余謂今永平府治。河入海從右竭石，正古之北海，在今昌黎縣西北，亦是當日避紂處，去其國都不

遠。《通志》以居北海爲濰縣者，亦誤。」二老者，天下

之大老也，而歸之，是天下之父歸之也。天

下之父歸之，其子焉往？

注此二老猶天下之

父也，其餘皆天下之子耳。子當隨父。二父往矣，

子將安如？言皆將往也。

疏注「子將安如」○正義

曰：《爾雅·釋詁》云：「如，往也。」《廣雅·釋詁》云：「歸，

往也。」韓本「將往」作「歸往」，閩、監、毛三本同。諸侯有

行文王之政者，七年之內必爲政於天下矣。」

注今之諸侯如有能行文王之政者，七年之間必足以

爲政矣。天以七紀，故七年。文王時難，故久；衰

周時易，故速也。上章言大國五年者，大國地廣人

衆，易以行善，故五年足以治也。

疏注「天以七紀」○

正義曰：昭公十年《左傳》鄭裨竈云「天以七紀」，注云：「二

十八宿面七。」按：《白虎通·嫁娶》篇云：「七，歲之陽也。」

又云「陽數七」。《說文》云：「七，陽之正也。如日月五星爲

七政。」《周髀算經》以「日月運行之圖周」爲「七衡」。《易·

復卦》彖傳云：「七日來復，天行也。」《國語·周語》云：「自

鶉及駟七列，南北之揆七同」，**①**韋昭注云：「鶉火之分，張

十三度。**②**駟，天駟。房五度。歲月之所在從張至房七列，

合七宿，謂張、翼、轸、角、亢、氐、房也。」歲在鶉火午，**③**辰

星在天駟子。鶉火，周分野。天鼃及辰水星，**④**周所出。自

午至子，其度七同。」皆以七紀數也，不獨二十八宿面七而

已。乃《尚書·洛誥》「惟周公誕保文武受命惟七年」，馬融

注云：「周公攝政七年，天下太平。」鄭氏注云：「文王得赤

雀，武王俯取白魚，受命皆七年。文武受命七年而崩，周公

不敢過其數也。」此言「行文王之政」，故以「七年」言之。周

公成文武之德，七年而天下太平。諸侯效法文王，是可爲

證。遠徵天紀，或近迂矣。

章指：言養老尊賢，國之上務。文王

勤之，二老遠至。父來子從，天之順道。

七年爲政，以勉諸侯，欲使庶幾於行善也。

①「七」，原誤作「北」，今從沈校據《國語》改。

②「三」，原誤作「六」，今從沈校據《國語》韋注改。

③「午」，原誤作「五」，今從沈校據《國語》韋注改。

④「水」，原脫，今從沈校據《國語》韋注補。

孟子曰：「求也爲季氏宰，無能改於其德而賦粟倍他日。」孔子曰：「求，非我徒也。」

小子鳴鼓而攻之，可也。」**注**求，孔子弟子冉求。

季氏，魯卿季康子。宰，家臣。小子，弟子也。孔子以冉求不能改季氏使從善，爲之多斂賦粟，故欲使弟子鳴鼓以聲其罪，而攻伐責讓之。曰「求非我徒」，疾之也。**疏**注「求孔子」至「疾之也」○正義曰：《論語·先進》篇云：「季氏富於周公，而求也爲之聚斂而附益之。」子曰：「非吾徒也。小子鳴鼓而攻之，可也。」《集解》

孔曰：「冉求爲季氏宰，爲之急賦稅也。」鄭曰：「小子，門人也。鳴鼓，聲其罪以責之也。」哀公十一年《左傳》云：「季氏欲以田賦使冉有訪諸仲尼。」曰：「丘不識也。」三發，卒曰：「子爲國老，待子而行。若之何，子之不言也？」仲尼不對。

而私於冉有曰：「君子之行也，度於禮。施取其厚，事舉其中，斂從其薄，如是則以丘亦足矣。若不度於禮而貪冒無厭，則雖以田賦，將又不足。且子季孫若欲行而法，則周公之典在；若欲苟而行，又何訪焉？」弗聽。」十二年春王正月：

「用田賦。」用田賦自是季氏，孔子直責冉有，謂冉有爲之聚斂而附益之，斥爲非吾徒，孟子言「無能改於其德而賦粟倍

他日」，「賦粟倍他日」即指季氏用田賦，緣冉有爲其宰，不能改之使從善，則季氏賦粟倍他日即爲冉有「爲之聚斂而附益之」。皇侃《論語義疏》引繆協云：「季氏不能納諫，故求也莫能匡救。致譏於求，所以深疾季也。」是也。邢昺疏以爲「冉子聚斂財物」，**①**失之矣。季孫斯以哀公三年卒，康子即位。用田賦時正康子爲政，故知「季氏」爲「季康子」也。杜

預注《左傳》「用田賦」云：「丘賦之法，因其田、財，通出馬一匹、牛三頭。今欲別其田及家財各爲一賦，故言田賦。」孔氏正義云：《司馬法》：「四丘爲甸，有馬四匹，牛十二頭，是爲革車一乘。」今用田賦，賈逵以爲「欲令一井之間出一丘之稅，并別出馬一匹、牛三頭」。如此則一丘之內有一十六井，其出馬牛乃多於常一十六倍。杜以如此則非民所能給，故改之。舊制丘賦一馬三牛，今別其田及家資各爲一賦，計一丘民之家資，令出一馬三牛，田之所收，更出一馬三牛，是倍於常也。《說文》支部云：「攻，擊也。」人部云：「伐，擊也。」是「攻」即「伐」也。莊公二十九年《左傳》云：「凡師有鐘鼓曰伐。」《釋例》云：「鳴鐘鼓以聲其過曰伐。」經言「鳴鼓而攻」，故趙氏以「攻伐」釋之，乃係假借用兵之鳴鼓而攻。其

①「邢」，原誤作「刑」，今據邢昺《論語疏》及經解本改。

實孔子言攻但爲責讓，故又以「責讓」釋之。《論衡·順鼓》篇云：「攻者，責也。責讓之也。」《周禮·春官·大祝》五曰攻，六曰說，注云：「攻，說則以辭責之。」是也。由此觀之，君不行仁政而富之，皆棄於孔子者也，況於爲之強戰？爭地以戰，殺人盈野；爭城以戰，殺人盈城。此所謂「率土地而食人肉」，罪不容於死。**注**孔子棄富不仁之君者，況於爭城爭地而殺人滿之乎？此若率土地使食人肉也。言其罪大，死刑不足以容之。**疏**注「孔子棄富不仁之君者」○正義曰：「不仁之君」解「君不行仁政」，「富不仁之君」解「而富之」，謂富此不行仁政之君也。趙氏於經文每顛倒解之。《荀子·王制》篇云「不安職則弃」，弃即棄也，如「移之郊」、「移之遂」、「屏之遠方」之意也。故善戰者服上刑，連諸侯者次之，辟草萊、任土地者次之。**注**孟子言天道重生，戰者殺人，故使善戰者服上刑。上刑，重刑也。連諸侯，合從者也，罪次善戰者。辟草任土，不務修德而富國者，罪次合從連橫之人也。**疏**注「孟子言天道重生」①○正義曰：《韓非

子·解老》篇云：「凡兵革者，所以備害也。重生者，雖入軍，無忿爭之心。」又云：「禮天地之道，故曰無死地焉。動無死地，而謂之善攝生矣。愛子者慈於子，重生者慈於身。」《春秋繁露·王道通》云：「仁之美者在於天。天，仁也。天覆育萬物，既化而生之，有養而成之。事功無已，終而復始。」又云：「陽氣生而陰氣殺，是故陽常居實位而行於盛，陰常居空位而行於末。天之好仁而近，惡戾之變而遠，大德而小刑之意也。」又《燠燠孰多》篇云：「天之道，出陽爲燠以生之，出陰爲清以成之。是故非薰也不能有育，非凜也不能有熟。自正月至於十月，而天之功畢。計其間陰與陽各居幾何？薰與凜其日孰多？距物之初生至其畢成，露與霜其下孰倍？故從中春至於秋，氣溫柔和調，及季秋九月，陰乃始多於陽，天於是時出凜下霜。出凜下霜，而天降物固已皆成矣。功已畢成之後，陰乃大出。天之成功也，少陰與而太陰不與，少陰在內而太陰在外，故霜加物而雪加於空。空者宣地而已，不逮物也。」此「天道重生」之說也。○注「上刑重刑也」○正義曰：《方言》云：「上，重也。」《尚書·呂刑》云：「上刑適輕下服，下刑適重上服。」某氏傳云：「重刑有

①「言」，原脫，今據注文補。

可以虧減，則之輕服下罪，一人有二罪，則之重而輕并數。」江氏聲《尚書集注音疏》云：「服，治也。下服，減等也；上服，加等也。本在上刑之科而情適輕，則減一等治之；本在下刑之科而情適重，則加一等治之。」按：重刑，死刑也。上言「罪不容於死」，則上刑不得適輕，「服上刑」則不減等下服也。合從，①蘇秦是也；連橫，張儀是也；辟草萊，任土地，商鞅等是也。井田之法，有萊田，有一易再易之田，有阡陌徑遂。皆開墾，是為「辟草萊」。《呂氏春秋》有《任地》篇，乃講耕耨蓄藏之術，專以富國為事，則不務修德。善戰者，兵家也；連諸侯，從橫家也；辟草任土，農家也。阮氏元《校勘記》云：「廖本作『辟草任土』，孔本、韓本作『辟草任地』。按，《音義》出『任土』，則作『任地』非也。」閻氏若璩《釋地》又續云：「連諸侯是封建之將盡也，辟草萊，任土地是井田之將盡也。」陳組綬《燃犀解》云：「連諸侯而使之戰，闢草萊，任土地而助之戰，均非身親為戰者，姑次之。」

章指：言聚斂富君，棄於孔子。冉求行之，固聞鳴鼓。以戰殺民，土食人肉，罪不容死，以為大戮。重人命之至也。②

疏

「聚斂富君」○正義曰：韓本、孔本作「富民」，非。○「以

為大戮」○正義曰：宣公十二年《左傳》云：「古者明王伐不敬，取其鯨鯢而封之，以為大戮。」○「重人命之至也」○正義曰：《漢書·蕭望之傳》云：「獄吏顯等曰：『人命至重，望之所坐，語言薄罪，必亡所憂。』」

孟子曰：「存乎人者，莫良於眸子。眸子不能掩其惡。」注眸子，目瞳子也。存人，存在人之善惡也。疏注「眸子」至「惡也」○正義曰：《荀子·

非相》篇「堯舜參牟子」，注云：「牟與眸同。」《說文》目部云：「盲，目無牟子。」睪，盧童子也。「睪，目童子不正也。」牟、童皆不从目。劉熙《釋名·釋形體》云「瞳子，瞳，重也，膚幕相裏重也；子，小稱也，主謂其精明者也。或曰眸子。眸，冒也。相裏冒也。」《荀子·大略》篇云「眸而見之也」，注云：「眸謂以眸子審視之也。」《廣雅·釋親》云：「珠子謂之

①「合從」以下，依疏例當另立條。

②「至」，原誤作「民」，今從沈本據廖本及下疏文改。

③「獄吏」，沈校：按《蕭望之傳》無此二字，且弘恭、石顯非獄吏，焦氏臆加。

眸。」蓋亦有从目者。《爾雅·釋訓》云：「存存，在也。」《說文》土部云：「在，存也。」《禮記·文王世子》云：「必在視寒煖之節」，注云：「在，察也。」趙氏以「在」釋「存」而云「存在人之善惡」，《章指》云「存而察之」，蓋以存爲在即以在爲察，謂察人之善惡也。胷中正，則眸子瞭焉；胷中不正，則眸子眊焉。注：瞭，明也。眊者，蒙蒙目不明之貌。疏：注「瞭明」至「之貌」○正義曰：《周禮·春官·眡瞭》注云：「瞭，目明者。」《說文》目部云：「眊，目少精也。」目少精即是不明。劉熙《釋名·釋天》云：「蒙，日光不明，蒙蒙然也。」《廣雅·釋訓》云：「蒙蒙，暗也。」眊，蒙一音之轉，故趙氏以眊之不明猶日之蒙蒙也。翟氏灝《攷異》云：「《論衡·本性》篇：『孟子相人以眸子焉。心清而眸子瞭，心濁而眸子眊。』又《佚文》篇同。《白氏六帖》述《孟子》曰：『人之善不善在其目。其心正則童子瞭然，其心不正則童子眊然。』《大戴記·曾子立事》篇：『目者，心之浮也；言者，事之指也。作於中則播於外矣。故曰：以其見者占其隱者。』蓋《孟子》此章所本。故既詳言眸子，下復兼聽言言之。」聽其言也，觀其眸子，人焉廋哉？注：廋，匿也。聽言察目，言正視端，人情可見，安可匿哉？

疏：注「廋匿也」○正義曰：《論語·爲政》篇云：「人焉廋哉」，《集解》引孔曰：「廋，匿也。」《方言》云：「廋，隱也。」故趙氏以「匿」釋「廋」，《章指》又以「不隱」釋之。

章指：言目爲神候，精之所在。存而察之，善惡不隱。知人之道，斯爲審矣。

疏：「目爲神候精之所在」○正義曰：《白虎通·性情》篇云：「肝，木之精也。萬物始生，故肝象木色青而有枝葉，目爲之候。」此「神候」猶云「精候」耳。周氏廣業《孟子章指考證》云：「精與睛通。目，珠子也。《魏志》管輅曰：『吾目中無守精。』《晉書》：『顧愷之每畫人，或數年不點眼精。』是也。」按：精即謂肝木之精。目既爲肝木之精之候，則精神即在此目矣。上言「神」下言「精」，正是一事。《大戴記·曾子天圓》云「陽之精氣曰神」是也，不必爲目珠之睛所假借。

孟子曰：「恭者，不侮人；儉者，不奪人。侮奪人之君，惟恐不順焉，惡得爲恭儉？」
爲恭敬者，不侮慢人；爲廉儉者，不奪取人。有好

侮奪人之君，有貪陵之性，恐人不順從其所欲，安得爲恭儉之行也？

疏注「爲恭」至「取人」○正義曰：《爾雅·釋詁》云：「恭，敬也。」《呂氏春秋·遇合》篇「是侮也」，

高誘注云：「侮，慢也。」《淮南子·原道訓》云「不以廉爲悲」，高誘注云：「廉猶儉也。」劉熙《釋名·釋言語》云：

「廉，斂也。自檢斂也。」《賈子·道術》篇云：「廣較自斂謂之儉。」《說文》又部云：「奪，手持佳失之也。」支部云：「攷，

彊取也。」《周書》曰：「攷攘矯虔。」「奪取」當作攷，經典通作奪。奪爲手持佳鳥失之，即「脫去」之脫也。奪乃攷之假借。

恭儉豈可以聲音笑貌爲哉？**注**恭儉之人，儼然無欲，自取其名。豈可以和聲諂笑之貌強爲之哉？

疏注「恭儉」至「爲之哉」○正義曰：《爾雅·釋詁》云：「儼，敬也。」《禮記·曲禮》云：「毋不敬，儼若思。」《論語·子張》篇云：「望之儼然。」「儼然」即「儼若」，謂恭敬也，無欲謂廉儉也。《論語·憲問》篇云：「公綽之不欲。」《說文》欠部云：「欲，貪欲也。」不貪欲，故爲廉也。儼然而恭，無欲而儉。「恭儉」之名以「儼然無欲」取之，故云「自取其名」。《賈子·六術》篇云：「是故五聲宮商角徵羽，唱和相應而調和。調和而成理，謂之音。」《白虎通·禮樂》篇

云：「音者，飲也。言其剛柔清濁，和而相飲也。」趙氏以「和聲」釋「聲音」，謂聲而音，言其和也。貌，《說文》作「兒」，云：「兒，頌儀也。从人白，象人面形。」君子樂然後笑，「笑貌」則笑見於面，故趙氏以「諂笑之貌」釋之。趙氏前注「諂笑」云：「強笑也。」

章指：言人君恭儉，率下移風；人臣恭儉，明其廉忠。侮奪之惡，何由干之而錯其心？**疏**「人臣恭儉明其廉忠」○正義曰：孟子言「侮奪人之君」，趙氏推及人臣。蓋孟子指當世諸侯，在兩漢則宰輔皆是也。趙氏習見當時張禹、胡廣之流，故及此耳。《史記·魯世家》：「君子曰：『季文子廉忠矣。』」

淳于髡曰：「男女授受不親，禮與？」**注**淳于髡，齊人也。問：禮，男女不相親授？**疏**注淳

于髡齊人也○正義曰：《戰國策·齊策》云：「淳于髡一日而見七人於宣王。」又：「齊欲伐魏，淳于髡止之。」《史記·孟荀列傳》云：「淳于髡，齊人也。博聞強記，學無所主。其諫說慕晏嬰之爲人也，然而承意觀色爲務。客有見髡於梁

惠王云云，惠王欲以卿相位待之，髡因謝去。於是送以安車駟，束帛加璧，黃金百鎰，終身不仕。」又云：「齊諸驕子亦頗采驕衍之術以紀文，於是齊王嘉之。自如淳于髡以下皆命曰列大夫，爲開第康莊之衢。」《滑稽傳》云：「淳于髡，齊之贅壻也。長不滿七尺，滑稽多辯。數使諸侯，未嘗屈辱。齊威王時，淳于髡說之以隱，於是乃朝諸縣令長七十二人，賞一人，誅一人。奮兵而出，諸侯振驚，皆還齊侵地。威行三十六年。」然則髡在齊仕威、宣兩朝，又仕於梁惠王者也。閻氏若璩《釋地》又續云：「孟子與淳于髡問答僅兩章，後章是去齊之後不待言，前章似相值於梁惠王朝。何則？《魏世家》明云「卑禮厚幣以招賢者，鄒衍、淳于髡、孟軻皆至梁」。孟子素不見諸侯，祇因惠王延禮，始至其國，又未嘗仕，真有孔子循道彌久、溫溫無所試之象。髡故發問夫子何不能援天下。不然，于齊則仕矣，髡將譏其援之無效與或力不能援，詎肯作是語？千載而下，殆可以情測哉！」周氏廣業《孟子出處時地考》云：「淳于髡見《史記·滑稽傳》，威王八年使之趙請救兵。至與孟子相見，年當耆老，而稱孟子爲「夫子」，自稱曰「髡」，知年相若也。」○注「問禮男女不相親授」○正義曰：《禮記·曲禮》云：「男女不雜坐，不同櫛枷，不同巾櫛，不親授。」《坊記》云：「好德如好色，諸侯不下漁

色，故君子遠色以爲民紀，故男女授受不親。」注云：「不親者，不以手相與也。」《內則》曰：「非祭非喪，不相授器。其相授，則女受以篚，其無篚則皆坐，奠之而後取之。」孟子曰：「禮也。」注禮，不親授。曰：「嫂溺，則援之以手乎？」注髡曰：見嫂溺水，則當以手牽援之不邪？疏注「則當以手牽援之」○正義曰：《禮記·中庸》篇「不援上」，注云：「援謂牽持之也。」曰：「嫂溺不援，是豺狼也。」注孟子曰：人見嫂溺不援出，是爲豺狼之心也。男女授受不親，禮也；嫂溺援之以手者，權也。」注孟子告髡曰：此，權也。權者，反經而善也。疏注「權者反經而善也」○正義曰：桓公十一年《公羊傳》云：「權者何？權者，反於經然後有善者也。權之所設，舍死亡無所設。行權有道，自貶損以行權，不害人以行權。殺人以自生，亡人以自存，君子不爲也。」疏云：「權之設，所以扶危濟溺，舍死亡無所設也。若使君父臨溺河井，豈不執其髮乎？是其義也。」《論語·子罕》篇云：「可與立，未可與權。」唐棣之華，偏其反而。」注云：「賦此詩以言權道，反而後至於大順也。」說者疑於經不

可反。夫經者，法也。制而用之謂之法。法久不變則弊生，故反其法以通之，不變則不善，故反而後有善，不變則道不順，故反而後至於大順。如反寒爲暑，反暑爲寒。日月運行，一寒一暑，四時乃爲順行。恒寒恒燠，則爲咎徵。禮減而不進則消，樂盈而不反則放。禮有報而樂有反，此反經所以爲權也。曰：「今天下溺矣，夫子之不援，何也？」

注

髡曰：今天下之道溺矣，夫子何不援之？

曰：「天下溺，援之以道；嫂溺，援之以手。」

子欲手援天下乎？」

注

孟子曰：當以道援天下

而道不得行，子欲使我以手援天下乎？」

疏「天下溺」

至「天下乎」○正義曰：此孟子論權與道合之義也。權者，變而通之之謂也。變而通之，所謂「反復其道」也。孟子時，儀、衍之流以順爲正，突梯滑稽，如脂如韋，相習成風，此髡之所謂「權」也。孟子不枉道以見諸侯，正所以挽回世道，矯正人心，此即孟子援天下之權也。髡以枉道隨俗爲權，孟子以道濟天下爲權。髡譏孟子不枉道是不以權援天下，不知孟子之不枉道正是以權援天下。權外無道，道外無權。聖賢之道即聖賢之權也。髡不知道，亦不知權矣。

章指：言權時之義，嫂溺援手，君子大

行，拯世以道。道之指也。

公孫丑曰：「君子之不教子，何也？」

注

問父子不親教，何也？」

疏「君子之不教子」○正義曰：

閻氏若璩《釋地》又續云：「古人文字簡，須讀者會其意所指。如『君子之不教子』，子謂不肖子也。猶《左傳》叔向曰『肸又無子』，子謂賢子也，不然，當日楊食我見存。觀孟子直承曰『勢不行也』，則知丑所問原非爲周公之於伯禽、孔子之於伯魚一輩子言矣。」孟子曰：「勢不行也。教者，必以正。以正不行，繼之以怒；繼之以怒，則反夷矣。『夫子教我以正，夫子未出於正也。』則是父子相夷也。父子相夷，則惡矣。」

注父親教子，其勢不行。教以正道而不能行，

則責怒之。夷，傷也。「父子相責怒」，則傷義矣。

一說曰：父子反自相非，若夷狄也。子之心責其父云：夫子教我以正道，而夫子之身未必自行正道也。執此意則爲反夷矣，故曰「惡」也。

疏注「夷傷

也」○正義曰：《易·序卦傳》云：「進必有所傷，故受之以

明夷。夷者，傷也。」教之以正道，子違而不行，即繼以怒，求之太驟也。「反夷」有二解。一屬上讀。謂父之教子，本望其善，非傷之也。今繼以怒，反是傷之矣。一屬下讀。父既繼之以怒，其子不受而心誹以報之，因父之傷己而反以傷其父。下「夫子教我以正，夫子未出於正也」，即申上「反夷」之事也。趙氏言「子之心責其父」云云，而承之云「執此意則爲反夷」，是以「反夷」屬其子，即指心責其父云云也。舉一說云「父子反自相非」，謂父子本宜有恩而反相非責。此解「反」字有不同，故以「一說」別之。「父子相責怒」解「父子相夷」，「則傷義矣」解「則惡矣」，「惡」謂「傷義」。經先言「反夷」後言「相夷」，趙氏先解「相夷」後解「反夷」，因「反夷」有「反自相非」之一說，故倒相夷在前。一說以夷爲夷狄，則反不得爲報，故爲「反自相非」也。《莊子·應帝王》云「告我君人者，以己出經」，①《釋文》引司馬注云：「出，行也。」是「未出於正」即「未行於正」。不必形之於口，即此心責，而執此意即爲反以相傷也。古者易子而教之。父子之間不責善。責善則離，離則不祥莫大焉。」**注**

易子而教，不欲自責以善。父子主恩，離則不祥莫大焉。

章指：言父子至親，相責離恩；易子而教，相成以仁。教之義也。

孟子曰：「事孰爲大？事親爲大。守孰爲大？守身爲大。不失其身而能事其親者，吾聞之矣；失其身而能事其親者，吾未之聞也。」**注**事親，養親也；守身，使不陷於不義也。失不義，則何能事父母乎？孰不爲事？事親，事之本也。孰不爲守？守身，守之本也。**注**先本後末，事、守乃立也。**疏**「孰不」至「本也」○正義曰：《禮記·哀公問》孔子云：「君子無不敬也，敬身爲大。身也者，親之枝也，敢不敬與？不能敬其身，是傷其親，傷其親，是傷其本；傷其本，枝從而亡。」又云：「君子言不過辭，動不過則，百姓不命而敬恭，如是則能敬其身。能敬其身則能成其親矣。」孟子此義蓋本於此。言不過辭，

①「經」，原誤從《經籍纂詁》卷九十三作「行」，今據《莊子》及經解本改。

行不過則，則能守身，不陷於不義矣。曾子養曾皙，必有酒肉。將徹，必請所與。問有餘，必曰有。曾皙死，曾元養曾子，必有酒肉。將徹，不請所與。問有餘，曰「亡矣」，將以復進也。此所謂「養口體」者也；若曾子，則可謂「養志」也。事親若曾子者，可也。」**注**將徹請所與，問曾皙所欲與子孫所愛者也。必曰有，恐違親意也。故曰「養志」。曾元曰無，欲以復進曾子也，不求親意，故曰「養口體」也。事親之道，當如曾子之法，乃爲至孝也。**疏**將以復進也。○正義曰：孔氏廣森《經學卮言》云：「注云『欲以復進曾子也』，此似不然。曾元但不能養志耳，何至齋飲食之費以欺其親，遂同下愚所爲？且以情揆之。既對『無餘』而復以餘進，其父能無疑乎？能無怒乎？夫曰『亡矣』者，乃實無也。曾子之『必曰有』，雖無亦曰『有』，所謂『孝子唯巧變，故父母安之』者。曾元不能，但道其質而已。此與『必曰有』對文而不云『必曰亡』，非實有言無明矣。蓋『將以復進也』亦曾元之辭，言餘則無矣，若嗜之，將復作新者以進之爾。」按：孔氏之說是也。孟子深

於《易》，悉於聖人通變神化之道，故此篇首言行先王之道而要之以「道揆」，蓋不獨平天下宜如是也，人倫日用均宜如是。既明「援天下以道」，道何在？通變神化也。如父之教子宜以正矣，有時而「勢不行」，則宜變通，使「易子而教」；子之事親宜其養矣，有時而「問有餘」，則宜變通，使「必曰有」以「養志」。父子之間且宜如是，何在而可不揆以道乎？於父之教子也，曰「夫子未出於正」，於子之事親也，曰「守身爲大」。不失其身則出於正，未出於正則失其身。父當如是以教其子，子當如是以事其父。又兩章互發明者也。

章指：言上孝養志，下孝養體。曾參事親，可謂至矣。孟子言之，欲令後人則曾子也。

孟子曰：「人不足與適也，政不足問也，惟大人爲能格君心之非。」**注**適，過也。《詩》云：「室人交徧適我。」問，非，格，正也。時皆小人居位，不足過責也，政教不足復非說，獨得大人爲輔臣，乃能正君之非法度也。**疏**「政不足問」○正義

曰：諸本作「政不足與間也」，《音義》出「足間」二字，則趙氏本無「與」字。○注「適過」至「度也」○正義曰：《毛詩·邶風·北門》作「室人交徧謫我」，^①傳云：「謫，責也。」謫與適通。《方言》云：「謫，過也。南楚以南，凡相非議人，謂之謫。」《商頌·殷武》：「勿予禍適」，箋云：「適，過也。」《列子·力命》篇云：「不相謫發」，《釋文》云：「謫謂責其過也。」《小爾雅·廣言》、《方言》皆云：「問，非也。」《方言》云：「格，正也。」僖公二十六年《穀梁傳》云：「人，微者也。」莊公十七年《穀梁傳》云：「人者，衆辭也。」下言「大人」，上言「人不足間」，則人兼微、衆二義，故云「時皆小人居位」，「小」之言微也，「皆」之言衆也。《文選》盧子諒《贈劉琨詩》，注引《韓詩章句》云：「尤，非也。」就與尤通，故趙氏以「非」釋「問」，又以「就」釋「非」。或作「非說」，誤也。上二章言父子，此章言君臣。父之教子必先自出於正，子之事父必先不失其身，君之定國必先正其心之非，而臣之輔君必先自居於正。「大人者，與天地合其德，與日月合其明，與四時合其序，與鬼神合其吉凶。」臣之身無不正，以是輔君而君心之非自格，君無不正，而國自安定。然則臣之德未至於大人，而徒見居位者皆小人而過責之，徒見政事之未善而非就之，不自覺其未正而刺刺焉言君之不正，其乖忤抵觸，不相激而成禍不止。

卒之，人相傾軋，政益乖違，猶自以爲直爲忠，而予君以非。是未讀《孟子》者也。顧非在君心而能格之，既未嘗過責其所用之人，又未嘗非就其所行之政，而曰「能格」，則是格也非以言格之，非以貌格之，即以自修其身，成大人，故能格之也。然則未能格君心之非者，亦自反己未爲大人可耳。君仁莫不仁，君義莫不義，君正莫不正。一正君而國定矣。^②注正君之身，一國定矣。欲使大人正之。^③疏「君仁」至「定矣」○正義曰：何爲正？仁義而已，^④何以爲大人？居仁由義而已。

章指：言小人爲政，不足問非，賢臣正君，使握道機。君正國定，下不邪侈，將何間也？

孟子曰：「有不虞之譽，有求全之毀。」

①「作」，據全書文例當作「云」。

②「而」，原誤作「爲」，今從沈本據文意及下文「居仁由義而已」改。

注虞，度也。言人之行有不度其將有名譽而得者，若尾生本與婦人期於梁下，不度水之卒至，遂至沒溺，而獲守信之譽，求全之毀，若陳不瞻將赴君難，聞金鼓之聲，失氣而死，可謂欲求全其節而反有怯弱之毀者也。**疏**注「虞度」至「之譽」○正義曰：《爾雅·

釋言》云：「虞，度也。」《莊子·盜跖》篇云：「尾生與女子期於梁下。女子不來，水至不去，抱梁柱而死。」《釋文》云：「尾生」，一本作「微生」。《戰國策》作「尾生高」，高誘以為魯人。」○注「求全」至「毀者也」○正義曰：《太平御覽》引《韓詩外傳》云：「崔杼殺莊公。陳不占，東觀漁者，聞君難，將往死之。漁則失哺，上車失軾。僕曰：「敵在數百里外，今食則失哺，上車失軾，雖往，其有益乎？」陳不占曰：「死君，義也，無勇，私也。」遂驅車至門。聞鐘鼓之音，戰鬪之聲，遂駭而死。君子聞之，曰：「陳不占可謂志士矣。無勇而能行義，天下鮮矣。」事亦載《新序·義勇》篇。《廣雅·釋言》云：「占，瞻也。」占與瞻古通。襄公二十五年《左傳》云：「崔杼之難，申蒯，侍漁者，退謂其宰曰：「爾以帑免。我將死。」其宰曰：「免，是反子之義也。」與之皆死。」杜預注謂侍漁為監取魚之官。侍之言寺也，寺之言司也。侍漁即司漁，

即所謂「東觀漁者」。申、陳音近。申蒯蓋即陳不占。占之為蒯，猶覬之為窺。周秦人姓氏往往記錄有異同，以聲音求之，尚可仿佛耳。

章指言：不虞獲譽，不可為戒，求全受毀，未足懲咎。君子正行，不由斯二者也。**疏**「不虞獲譽不可為戒」○正義曰：《易·萃卦》

《象傳》云：「戒不虞。」襄公三年《左傳》云：「不虞之，不戒。」戒猶備也。趙氏本此，謂此不虞之譽非可豫備致之也。

孟子曰：「人之易其言也，無責耳矣。」

注人之輕易其言，不得失言之咎責也。一說：人之輕易不肯諫正君者，以其不在言責之位者也。**疏**注

「人之」至「責也」○正義曰：《禮記·樂記》云「易慢之心人之矣」，注云：「易，輕易也。」《說文》訓責為求，求之義不足以盡，故以「咎」釋之。《說文》人部云：「咎，災也。从人，从各。各者，相違也。」輕易其言」至於相違成災咎，則已晚矣。無責之時，先當自慎矣。

章指：言言出於身，駟不及舌；不惟其責，則易之矣。

孟子曰：「人之患，在好爲人師。」**注**人之

所患，患於不知己未有可師而好爲人師者，惑也。

疏「人之患在好爲人師」○正義曰：《禮記·樂記》「論倫無患」，注云：「患，害也。」《章指》言「不慎則有患」，則此「患」字正與上章「責」字同。易其言則有災咎，好爲師則有患害，皆深切言之也。易其言，如趙括、韓非凡好建白相傾軋攻擊者，皆是也；好爲師，如楊朱、墨翟凡立宗旨以傳授聚講者，皆是也。

章指：言君子好謀而成，臨事而懼。時然後言，畏失言也。故曰：「師哉師哉，

桐子之命。」不慎則有患矣。**疏**「君子」至「言

也」○正義曰：周氏廣業《孟子章指考證》云：「四句似與本章不甚合，恐有誤。似宜在前「駟不及舌」句下。」按：

「故曰」二字承上，則非有誤。蓋趙氏以兩章相貫而言。此「好爲人師之人」即「易其言」之人，皆由於不知「臨事

而懼」「好謀而成」也。蓋未能博學詳說，習先聖之道，而執其一端，自以爲是，不顧其成，不知其害，用之於君父僚友，則輕易其言以爲蹇直；不學者依附之，又輕易其言而高談心性，傳播宗旨，人主出奴，各成門戶。始則害乎風俗人心，繼則禍於朝廷軍國。而或且曰：「此，正人。」此，君子。」則「不虞之譽」也。以上三章相貫，趙氏牽連言之，爲知言矣。○「故曰師哉師哉桐子之命」○正義曰：周氏廣業《孟子章指考證》云：「古本旁注：『桐讀爲僮。』《音義》云：『與童字同。』按，一語出揚子《法言·學行》篇，司馬光《集注》：『桐，伺也。桐子伺然未有所知之時，制命於師也。』孔、韓本哉並作乎。按：《左傳》哀五年齊景公卒，五公子爭立，萊人歌曰：『師乎師乎！何黨之乎？』此師字作衆字解，與此絕異。乎，哉雖同一語助，不可改易。

樂正子從於子敖之齊。樂正子見孟子。

注魯人樂正克，孟子弟子也。從於齊之右師子敖。子敖使而之魯，樂正子隨之來之齊也。孟子在齊，樂正子見之也。孟子曰：「子亦來見我乎？」

注孟子見其來見遲，故云「亦來」也。曰：「先生何爲出此言也？」**注**樂正子曰：先生何爲非克而出此言？

曰：「子來幾日矣？」**注**孟子問，子來

幾日乎？**疏**「子來幾日矣」○正義曰：下趙氏以「昔者」

爲「數日之間」，「數日」即「幾日」，是孟子已知樂正子來已幾日，此乃實詰之辭。曰：「昔者。」**注**克曰：昔者來

至。昔者，往也，謂數日之間也。**疏**「昔者」至「間

也」○正義曰：《楚辭·離騷》云「昔三后之純粹兮」，注云：

「昔，往也。」《公孫丑》篇「昔者辭以疾」承上「明日出弔」言，故趙氏解爲昨日，此上承「幾日」，則不止昨日，故以「數日

之間」解之。若昨日來，今日見，尚不得爲遲之又久也。

曰：「昔者，則我出此言也，不亦宜乎？」**注**孟

子曰：昔者來至而今乃來，我出此言，亦其宜也。

孟子重愛樂正子，欲亟見之，思深望重也。曰：

「舍館未定。」**注**克曰：所止舍館未定，故不即來。

館，客舍。**疏**「館客舍」○正義曰：《周禮·委人》「凡軍

旅之賓客館焉」，注云：「館，舍也。」樂正子雖從子敖之便而來，既至齊，遂不相依而自投客舍，此語亦有意也。曰：

「子聞之也，舍館定然後求見長者乎？」**注**孟子曰：子聞見長者之禮，當須舍館定乃見之乎？曰：「克有罪。」**注**樂正子謝過服罪也。

章指：言尊師重道，敬賢事長，人之

大綱。樂正子好善，故孟子譏之，責賢者備也。**疏**「責賢者備也」○正義曰：《論語·微子》篇

云「無求備於一人」，求猶責也。《淮南子·汜論訓》云：

「君子不責備於一人。」《漢書·王嘉傳》上疏哀帝云：

「惟陛下留神於擇賢，^①記善忘過，容忍臣子，勿責以

備。」《新唐書·太宗紀》贊云：「《春秋》之法，常責備於

賢者。」毛氏奇齡《聖門釋非錄》云：「王草堂曰：「樂正子

不絕驢，或驢故以禮遇之，未可遽絕，原非失身。」趙氏云

「孟子譏之，責賢者備」，此爲得之。」

孟子謂樂正子曰：「子之從於子敖來，徒鋪啜也。我不意子學古之道，而以鋪啜

①「擇」，原誤作「釋」，今據《漢書》改。

也。」**注**子敖，齊之貴人，右師王驩也。學而不行其道，徒食飲而已，謂之「鋪啜」也。樂正子本學古聖人之道，而今隨從貴人，無所匡正，故言不意子但鋪啜也。**疏**注「學而至「啜也」○正義曰：趙氏以「食飲」解「鋪啜」，於《章指》又以「沈浮」釋之，則「鋪啜」二字乃假借之辭，非實指飲食也。《楚辭·漁父》云：「舉世皆濁，何不泥其泥而揚其波？衆人皆醉，何不鋪其糟而啜其醪？」王逸注「渥泥」云「同其風也」，注「揚波」云「與沈浮也」，注「鋪糟」云「從其俗也」，注「啜醪」云「食其祿也」，然則鋪啜即與世推移、同流從俗之意。向來說此章者，率謂驩本倖佞，樂正子必不從之以求爵位。欲見其師而資斧未充，因乘子敖之便，未免依附。又謂觀「鋪啜」二字，當時必有優倖可憑藉者。顧樂正子，孟門之賢者也，自魯之齊，亦非甚遠，何至以車馬資糧之乏而從子敖？且子敖雖便，豈能無端而從之？既可相從，必爲相識。即偶從一相識貴人之便，爲之師者遂直揭其醜，以爲飲食之人，何至於此？蓋樂正子從於子敖之齊，非偶然從其便也。是時孟子仕齊，出弔於滕，驩且嘗爲輔行，驩之在魯，必謬托爲孟子之交，此樂正子所以識之也。以孟子道行於齊，驩又招之以禮，故從子敖之齊，此實錄也。

不知是時孟子雖仕齊而道實不行，仕不受祿，久非其志。在孟子方將致臣而去，則樂正何爲貿貿而來？故以「鋪啜」言之，謂此來但爲沈浮隨俗，不能行道匡正，非謂偶從子敖，遂爲飲食之人之可賤惡也。趙氏得之。趙氏佑《溫故錄》云：「或疑不過附便偕行，因以得見長者，則亦可謂之「因」，不可謂之「從」。然既爲長者來，即當直造師門，何勞別定舍館？知其說有不然也。凡言「從」者，皆彼爲政而我從之。子敖有納交孟子之心，或欲假諸徒以致其師，必將有術以動樂正。樂正子與子敖或故或新，其來見必有欲白之辭。孟子則一見斥之，又明揭其從子敖。」

章指：言學優則仕，仕以行道；否則隱逸，免置窮處。鋪啜沈浮，君子不與。是以孟子咨嗟樂正子也。**疏**「免置窮處」○正義曰：周氏廣業《孟子章指考證》云：「免置」，古本、宋本、足利、孔本、韓本並作「免置」，今從小字宋本。按，《詩·周南》肅肅免置，鄭箋云：「免置之人，賢者也。」《墨子》曰：「文王舉閔夭，泰顛於置網之中，授之政。」正與詩意合。《文選》桓溫《薦譙元彦表》「免置絕響於中林」，五臣注劉良曰：「免置，網也。《詩》曰「肅肅免置」，

喻殷紂之賢人退於山林，網禽獸而食之。」趙氏引此以見不當徒餽啜之意。」按：趙氏謂仕所以行道，道不能行則當隱處，不可沈浮隨俗，與世推移，是不以餽啜爲口腹也。

孟子曰：「不孝有三，無後爲大。」

注於

禮，有不孝者三事，謂阿意曲從，陷親不義，一不孝也；家貧親老，不爲祿仕，二不孝也；不娶無子，絕先祖祀，三不孝也。三者之中，無後爲大。舜不告而娶，爲無後也，君子以爲猶告也。」

注舜懼無

後，故不告而娶。君子知舜告焉不得而娶。娶而告父母，禮也；舜不以告，權也。故曰「猶告」，與告同也。

疏注「舜不以告權也」○正義曰：《孟子》之書全是發

明《周易》變通之義。道不行而徒沈浮餽啜，不可變通者也；爲無後不告而娶，可變通者也。趙氏以「權」明之，是也。告則不得娶至於無後，故不告與告同。謂告，禮也，道也；不告與告同，則亦禮也，道也。告而得娶而不告，與告而不得娶而必告，皆非禮非道。於此量度之，則權之即禮即道，明矣。

章指：言量其輕重，無後不可。是以大舜受堯二女。夫三不孝，蔽者所聞；至於大聖，卓然匪疑，所以垂法也。

孟子曰：「仁之實，事親是也；義之實，從兄是也。智之實，知斯二者弗去是也。」

注

事皆有實。事親、從兄，仁、義之實也。知仁義所用而不去之，則智之實也。

疏注「事皆」至「實也」○正義

曰：仁義之名至美。慕其名者高談深論，非其實也。孟子指其爲「事親從兄」，然則於此二者有未盡，雖日馳驚於仁義之名，皆虛妄矣。不知仁義之實在此二者，非智之實也，知仁義之用在斯二者而不能力行，則所知仍虛而不實矣。禮

之實，節文斯二者是也。樂之實，樂斯二者。

注禮樂之實，節文事親從兄，使不失其節，而文其禮敬之容，而中心樂之也。

疏注「禮樂」至「樂之也」○正

義曰：太過則失其節，故節之，大質則無禮敬之容，故文之。禮之爲節文，樂之爲樂，不待言者也。然節文在斯二者，樂在斯二者，乃爲禮樂之實。凡「實」字皆指事親從兄，

仁、義、智、禮、樂之名皆爲斯二者而設。樂則生矣，生則惡可已也？惡可已，則不知足之蹈之，手之舞之。」**注**樂此事親從兄出於中心，則樂生其中矣。樂生之至，安可已也？豈能自覺足蹈節、手舞曲哉？**疏**注「樂此」至「曲哉」○正義曰：《禮記·樂記》云：「故歌之爲言也，長言之也。說之，故言之，言之不足，故長言之；長言之不足，故嗟歎之；嗟歎之不足，故不知手之舞之，足之蹈之。」**注**云：「不知手之舞之，足之蹈之，歎之至也。」《詩序》亦云：「情動於中而形於言。言之不足，故嗟歎之；嗟歎之不足，故永歌之；永歌之不足，不知手之舞之，足之蹈之也。」然則「不知手之舞之，足之蹈之」，樂之事也，而必由事親、從兄二者而生乃爲實，不從事親、從兄二者而生，雖不知手之舞之，足之蹈之，仍非其實也。全氏祖望《經史問答》云：「古來聖人，言語中極言孝弟之量者，始於孔子。其論大舜，推原其大德受命之由，本於大孝；其論武周，推極於郊社禘嘗之禮樂，以爲達孝。曾子申之以孝老民興孝，上長長民興弟，爲平天下之大道。有子申之以孝弟則犯亂不作，爲仁之本。其言之廣狹各有所當，而義則一。而最發明之者爲孟子。曰「人人親其親，長其長，而天

下平」，曰「達之天下」，曰「堯舜之道，孝弟而已」，而尤暢其說於是章。綜羅五德，至於制禮作樂之實，不外乎此。河間獻王采《樂記》亦引孔子之言，以爲「宗祀明堂，所以教孝」，享三老五更於太學，冕而總干，執醬執爵，所以教弟，皆是章之疏證也。如此解「節文」，解「手舞足蹈」，方有實地。蔡文成以爲「舞」「蹈」只是手足輕健之意，則是不過布衣野人之孝弟耳，孟子意中卻不然。雖有其德，苟無其位，則一身一家之中手舞足蹈之樂亦自在，而究未可以言禮樂之全量也。」又云：「孝弟之量原未易造其極，故古今以來所稱「孝弟」不過至「知而弗去」一層，其於禮樂二層皆未到，便到得「知而弗去」一層已是大難。假如尹伯奇履霜之操、尹伯封《彼黍》之詩，天然兄弟，兄則事親，弟則從兄，皆是賢者。然吉甫非竟頑父也，不能化而順之。其餘如申生、急子、壽子、司馬牛、匡章，皆值父兄之變，甚者以身爲殉，不然者棄家蕉萃，以終其身。其志節可哀，而使聖人處之，其節文之處自有中道，諸君恐尚未盡善處。是其於禮之實尚待擬議，況樂乎？彼其繁冤悲怨足以感動天地，然不足以語樂而生，生而至於舞蹈也。是非大舜不能也。故《孟子》下章即及舜之事親而天下化，蓋以類及之也。其安常履順而極其盛，則武、周矣。周公於管、蔡之難非不值其變也，然其成文武之

德者大，破斧缺斨之恫不足以玷其《麟趾》《騶虞》之仁也，是則禮樂之極隆者也。然則無位者之孝弟，至於曾、閔，尚未足盡禮樂之實耶？曾子以哲爲之父，處其常，閔子乃處其變。然閔子竟能化其父母，便是「足蹈手舞」地位，曾子之養志，便是「惡可已」。

章指：言仁義之本，在於孝弟。孝弟之至，通於神明，況於歌舞不能自知？蓋有諸中形諸外也。

疏「仁義」至「外也」○正義曰：《論語·學而》篇云：「孝弟也者，其爲仁之本與！」「孝弟之至，通於神明」，見《孝經》「感應」章第十六。「歌舞」即謂足蹈手舞也。言「歌」者，以《樂記》「蹈舞爲歌」言也。仁義智禮樂必本孝弟乃實，孝弟必依仁義智禮樂乃至本末兼該，內外一貫。說仁義而不本孝弟，說孝弟而不極於禮樂，皆失之也。

孟子曰：「天下大悅而將歸己。視天下悅而歸己猶草芥也，惟舜爲然。」**注**舜不以天下將歸己爲樂，號泣于天。不得乎親，不可以爲

人；不順乎親，不可以爲子。舜盡事親之道而瞽瞍底豫，瞽瞍底豫而天下化。瞽瞍底豫而天下之爲父子者定，此之謂「大孝」。**注**舜以不順親意爲非人子。底，致也。豫，樂也。瞽瞍，頑父也。盡其孝道而頑父致樂，使天下化之，爲父子之道者定也。

疏注「舜以不順親意爲非人子」○正義曰：趙氏以「不順乎親」所以「不得乎親」，故「不順親意」兼括「不得」、「不順」兩語，而並「不可以爲人」、「不可以爲子」兩語爲「爲非人子」。毛氏奇齡《四書臆言補》云：「不得乎親」是不相能，如虐子教子類，順則悅之矣，即下文「底豫」，所謂底致豫悅是也。悅親之由，全在舜能盡其道，與《中庸》「順乎親有道」正同。」○注「底致」至「定也」○正義曰：「底，致也」，《爾雅·釋言》文。「豫，樂也」，《爾雅·釋詁》文。致樂者，由不樂而至於樂也。以父之頑如瞽瞍，而舜盡事親之道，卒能至於豫樂，則是天下無難事之親。凡其親不能致樂者，皆人子於事親之道未盡也。夫以瞽瞍之頑而致樂，則天下之事親者皆由是而化，亦由是而定。「定」者，人子不得疑於父母之難事而不盡其道也。閻氏若璩《釋地又續》云：「余嘗以《五帝紀》『舜之踐帝位，載天子旗往朝瞽瞍，夔夔惟

謹，如子道」，此方是「瞽瞍亦允若」，「瞽瞍底豫」時候，較舜之身為庶人僅云「不格姦」者，殊有淺深次第之不同。只觀「帝使其子九男二女」節有「為不順於父母」語，「天下大悅而將歸己」節有「不得乎親」語，此皆試舜於畎畝之中事也。況前此雖云「克諧以孝」，舜猶不告而娶，以為告則不得娶，是子不能得之於父也，堯亦知告焉則不得娶，是君並不能得於臣也。其頑至此，則既娶之後，猶復欲殺之而分其室，萬章斷非傳聞，史遷斷非無據可知。而諸儒或疑之，或傳會之，概未嘗設身乎處地與為按文切理者也。大抵親但不至于姦惡，其格淺，親能諭之於道，其格深。以舜之聖，年踰六十始臻斯境，豈易言哉？」按：《尚書·堯典》云：「克諧以孝，烝烝乂，不格姦。」江氏聲《集注音疏》述其師惠松崖先生云：「楊孟文《石門頌》曰「烝烝艾」是本諸《尚書》，則古《尚書》作「艾」也。艾，養，格，至也。言舜能和於弟，孝於親，厚以奉養，使不致於姦惡。偽孔本艾作乂，訓為治，正義云：「上歷言三惡，此美舜能養之。」蓋孔穎達必見漢注有訓艾為養者，故為此言。由此知艾當訓養。」此說是也。「克諧以孝」，則舜之和其兄弟以怡父母，於此句見之。然徒以和孝之虛情，焉能變化其頑嚚之本質？故必厚以養之。姦，私也。瞽瞍蓋亦市井之人，營營於耳目口體之欲，故違於德

義耳，既厚以養之，則已得滿所欲，豈尚與人爭利而無賴乎？所以不至於私。聖人變通神化之用，必從實處行之，可知。舜之耕稼陶漁而號泣如窮人者，均坐此耳。迨至踐帝位，以天下養而又能變變齊慄，既養其身又悅其心，所以致樂也。今之孝者，能養而不能敬，固不可以為大孝，舍厚養而但空言克諧，亦未必其即諧也。菽水承歡，可以事賢父，未可以例瞽瞍，況以曾子養志於曾皙，且須酒肉，則所以事親之道可於是參之矣。

章指：言以天下之富貴為不若得意於親，故能懷協頑嚚，底豫而欣，天下化之，父子加親。故稱盛德者必百世祀，無與比崇也。

疏「故稱」至「崇也」○正義曰：昭公八年《左傳》史趙云：「自幕至於瞽瞍無違命，舜重之以明德，貞德於遂，遂世守之。及胡公不淫，故周賜之姓，使祀虞帝。臣聞盛德必百世祀，虞之世數未也。」繼守將在齊，其兆既存矣。《史記·陳杞世家》贊云：「舜之德

①「數」，原誤作「又」，今據《左傳》及經解本改。

可謂至矣！禪位於夏而後世血食者歷三代。^①及楚滅陳而田常得政於齊，卒爲建國，百世不絕，苗裔茲茲，有土者不乏焉。」

姪琮廷弼校字

孟子正義卷十五終

① 「歷」，原誤作「居」，今據《史記》改。

孟子正義卷十六

江都縣鄉貢士焦循撰集

孟子卷第八

離婁章句下凡三十三章。^①

孟子曰：「舜生於諸馮，遷於負夏，卒於鳴條，東夷之人也；**注**生，始，卒，終。記終始也。諸馮、負夏、鳴條，皆地名，負海也，在東方夷服之地，故曰東夷之人也。」**疏**注「生始」至「始也」○正義

曰：《荀子·禮論》篇云：「生，人之始也，死，人之終也。」《爾雅·釋詁》云：「卒，終也。」《禮記·曲禮》云：「大夫曰卒。」孔氏正義云：「大夫是有德之位，仕能至此，亦是畢了

平生，故曰卒也。」《檀弓》云：「君子曰終，小人曰死。」注云：「事卒爲終，消盡爲漸。」孔氏正義云：「言但身終，功名尚在。」舜、文王爲天子諸侯，不當稱卒，其稱卒爲「君子曰終」之義，故以「始終」言之也。○注「諸馮負夏」至「人也」○正義曰：諸馮，不可攷。《史記·五帝本紀》云：「舜，冀州之人也。舜耕歷山，漁雷澤，作什器於壽丘，就時於負夏。」《集解》引鄭康成云：「負夏，衛地。」《索隱》云：「就時猶逐時，若言乘時射利也。」《尚書大傳》云：「販於頓丘，就時負夏。」孟子曰：「遷於負夏。」是也。《翟氏灝》《攷異》云：「司馬遷、伏生之意，似讀《孟子》遷字如《益稷》篇「懋遷」之遷。《書序》云：「伊尹相湯伐桀，升自陋，遂與桀戰於鳴條之野，作《湯誓》。夏師敗績，湯遂從之，遂伐三腰，俘厥寶玉，誼伯、仲伯作《典寶》。」《後漢書·郡國志》：「濟陰郡定陶縣有三腰亭」，三腰即三腰，由鳴條遂伐三腰，則鳴條當亦不遠，其所在則未詳也。鄭康成以爲「南夷地名」，蓋《檀弓》謂「舜葬於蒼梧之野」，而《孟子》言「卒於鳴條」。又《呂氏春秋·簡選》篇言殷湯「登自鳴條，乃入巢門」。《淮南子·主術訓》：「湯困桀鳴條，擒之焦門。」《修務訓》：「湯整兵鳴條，困夏南

① 「凡三十三章」，原作中字，今據經解本改爲小字。

巢，譙以其過，放之歷山。」南巢即焦門，在今江南巢縣，均與鳴條皆貫，故鄭意鳴條之在南也。」趙氏佑《溫故錄》云：「趙注不詳地所在之實而言名，又言『負海』，豈以爲經『負』字釋乎？必無之理也。負海也者，明其地之負海也。夷考負夏，衛地，見《檀弓》注。鳴條，見《書序》。《史記》則曰：

『舜，冀州之人也。』古冀州直北位，非東，亦未嘗近海。惟青、徐、揚三州，《禹貢》並言海，而徐、揚之海在東南，惟青居大東，海在其北，故郡稱北海。海在北，如負之者然。趙氏蓋略聞諸馮之地之負海而未得其實，故渾而言之。今青州府有諸城縣，大海環其東北，說者以爲即《春秋》書『城諸』者，其地有所謂馮山、馮村，蓋相傳自古，竊疑近是。凡言人地，以所生爲斷，遷、卒皆在後，孟子亦據舜生而言東也。由此以推，則知歷山、雷澤、河濱與夫負夏、壽丘、頓丘之皆東土，班班可攷。若河東之虞，蓋本舜祖虞幕之封，故《書》稱虞舜，《史》言冀州，猶後人稱祖籍，標郡望耳。然自漢以來皆專主河東，於是諸馮湮，注意隱矣。」按：孔本作「負負海也」，上「負」字衍。文王生於岐周，卒於畢郢，西夷之人也。**注**岐周、畢郢，地名也。岐山下周之舊邑，近吠夷。吠夷在西，故曰西夷之人也。《書》

曰：「太子發上祭于畢，下至于盟津。」畢，文王墓，近於鄭、鎬也。**疏**注「岐周」至「鎬也」○正義曰：《漢

書·地理志》：「右扶風美陽，《禹貢》岐山在西北。中水鄉，周大王所邑。」又云：「大王徙郢，文王作鄭。」顏師古注云：

「郢，今岐山縣是。鄭，今長安西北界靈臺鄉豐水上是。」文王生時尚未徙豐，岐在豐西而近於吠夷。閻氏若璩《釋地續》云：「吠夷即文王之所事者。《采薇》序：「文王時，西有

昆夷之患。」是也。引《書》，在《太誓》篇，云：「惟四月，太子發上祭於畢，下至於孟津之上。」此即後出之《太誓》，合今文

二十八篇爲二十九篇者也。趙氏時此篇尚存，故直引爲《書》曰云云。今見於《毛詩·周頌·思文》正義所引。偶孔

傳所傳之《太誓》三篇，無此文也。孔氏廣森《經學卮言》云：「郢與程通，《周書·史記解》曰：「昔有畢程氏，損祿增

爵，羣臣貌匱，此而戾民，畢程氏以亡。」畢程本商時國，爲周所滅，文王遂居之。《大匡解》曰：「惟周王宅程三年，遭天

之大荒。」是也。土地名字，後人多改从「卩」旁，其實仍當讀程，以別於郢楚之郢。文王既伐于崇，作邑于豐，然其卒也

還葬畢程，故成王葬周公於畢，以爲從文王墓。孟子不言卒於豐而言卒於畢郢，就據其葬地言之耳。」劉氏台拱《經傳小

記·釋畢郢云：「自來注《孟子》者不詳郢地所在。《漢書·地理志》右扶風安陵，闕駟以爲本周之程邑。《括地志》云：「安陵故城在雍州咸陽縣東二十一里，周之程邑也。」此邑中之地爲程也。其西有畢陌，一名畢原，皇甫謐所謂「安陵西畢陌」。《元和郡縣志》云：「畢原即咸陽縣所理也。原南北數十里，東西二三百里，亦謂之畢陌。」此邑外之地爲畢也。畢者，程地之大名；程者，畢中之小號也。杜佑云「王季都畢」，通國內言之。《春秋》昭九年《傳》周景王之言曰：「我自夏以后稷，魏、駘、芮、岐、畢，吾西土也。」注言「在夏世以后稷功，受此五國爲西土之長」。是則岐也畢也，皆古之建國也。周者，大王所邑，而岐之小別也，故繫岐而言之曰岐周。程者，王季所邑，而畢之小別也，故繫畢而言之曰畢程。《呂覽·具備》篇云：「武王嘗窮於畢程矣。」畢程即畢郢。《周書·史記解》云「昔有畢程氏」，則畢郢之名之所起遠矣。又按，畢地有二，其一文王墓地也。太史公曰「畢在鎬東南杜中」，《皇覽》云「周文王、武王、周公冢在京兆長安縣鎬聚東杜中」，而《括地志》以爲「在雍州萬年縣西南二十八里畢原上」，則唐亦謂之畢原。是故有咸陽縣之畢原，所謂「文王卒於畢郢」也。有萬年縣之畢原，所謂「文王葬於畢」也。一在渭北，一在渭南，異所同名，往往相亂。杜佑言

「畢，初王季都之，後畢公封焉」，此言在渭北者當矣，而以爲文王所葬則失之。《帝王世紀》云：「文武葬於畢，畢在杜南。」《晉書·地道記》亦云：「畢在杜南。」與畢陌別，此則文武所葬不在畢陌明矣。是以裴駟辨之云：「《皇覽》曰：秦武王冢在扶風安陵縣西北畢陌中，大家是也。人以爲周文王冢，非也。周文王冢在杜中。」張守節亦云：「《括地志》云：秦惠文王陵在雍州咸陽縣西北一十四里，秦悼武王陵在雍州咸陽縣西十里，俗名周武王陵，非也。」羣書剖析，具有明文。惟顏師古注《漢書·劉向傳》「文王、周公葬於畢」，用畢陌爲釋，而杜亦云然。自茲以降，莫不謬指秦陵誣稱周墓，傳之方志，載之祀典，誤所從來，非一世矣。趙岐注言「畢，文王墓，近於鄠、鎬之地」，此言在渭南者當矣，而以訓畢郢則失之。文王始亦宅程，《周書》稱「文王在程，作《程寤》、《程典》」。其後作邑於鄠，而先君宗廟、故居宮室猶於是乎存，因是往來舊都而末年仍卒乎此。以情事推之，昭然可見。「卒於畢郢」，不言爲葬，而趙以墓地當之。畢地既誤，何郢之可言？闕而不究，其不以此乎？」陸賈《新語·術事》篇云：「文王生於東夷，大禹出於西羌，世殊而地絕，法合而度同。」此本《孟子》。而以文王生東夷者，對西羌言之，則岐周之地爲東也。《鹽鐵論·國病》篇賢良曰：「禹出西

羌，文王生北夷。」地之相去也千有餘里，世之相後也千有餘歲，得志行乎中國，若合符節。先聖後聖，其揆一也。」**注**土地相去千有餘里，千里以外也。舜至文王，千二百歲。得志行政於中國，蓋謂王也。如合符節，節，玉節也。《周禮》有六節。揆，度也。言聖人之度量同也。**疏**注「土地相」

至「外也」○正義曰：《禮記·王制》云：「自東河至於東海，千里而遙；自東河至於西河，千里而近；自西河至於流沙，千里而遙。」文王所生之岐周在西河之西而未至流沙，舜所生之諸馮在東河之東而未至東海。約在二千里之內，一千里之外，故云千有餘里也。舜生於帝堯四十年內外，壽百有十歲，歷夏十七帝並湮之四十三年，共四百四十二年。文王生於商祖甲時，約五百二十三年。自舜之生至文王之生，約計一千一百年之內。趙氏言舜至文王千二百歲者，蓋自舜生之年數至文王之卒，當商紂時也。《周禮·地官·掌節》：「掌守邦節而辨其用，以輔王命。守邦國者用玉節，守都鄙者用角節。凡邦國之使節，山國用虎節，土國用人節，澤國用龍節，皆金也，以英蕩輔之。」**①**門關用符節，貨賄用璽節，道路用旌節。《秋官·小行人》：「達天下之六節：

山國用虎節，土國用人節，澤國用龍節，皆以金爲之，道路用旌節，門關用符節，都鄙用管節，皆以竹爲之。」然則「符節」乃六節中之一，而「玉節」亦《掌節》八節中之一。乃孟子言符節而趙氏以玉節釋節字，又引《周禮》之六節，何也？《說文》「卩」部云：「卩，瑞信也。守邦國者用玉卩，守都鄙者用角卩，使山邦者用虎卩，土邦者用人卩，澤邦者用龍卩，門關者用符卩，貨賄用璽卩，道路用旌卩。」竹部云：「符，信也。漢制以竹長六寸，分而相合。」蓋符與節爲瑞信之通名。《說文》玉部云：「瑞，以玉爲信也。」《春官·典瑞》：「掌玉瑞玉器之藏。」鄭注《序官》云：「瑞，節瑞也。典瑞，若今符璽郎。」又注其職云：「瑞，符信也。」節爲瑞信之名，則是玉節乃節之本，故掌守邦節。鄭氏注云：「邦節者，珍圭、牙璋、穀圭、琬圭、炎圭也。」此皆玉也，而八節亦首以玉而角金竹附之，故趙氏直以「節」爲「玉節」。又以節之名通於角金竹所爲，故申之云《周禮》有六節也。玩《說文》，則節爲玉節之名，符爲竹節之名。鄭氏注《掌節》云：「以金爲節，鑄象焉，今漢有銅虎符。符節者，如今宮中諸官詔符也。」注《小行人》云：「管節，如今之竹使符也。」然則漢時金竹皆名爲

①「蕩」，原誤作「蕩」，今據《周禮》改。

符。《天官·小宰》：「以官府之八成經邦治，四曰聽稱責以傳別。」注云：「故書作『傳辨』，鄭大夫讀爲符別。」則符之名不必專於門關之所用。周氏柄中《辨正》云：「《史記》言黃帝合符釜山，蓋符與節皆信也，故或言節或言符，或並言符節，實一而已。《孟子》所言豈專指八節中之符節哉？」《荀子·儒效》篇云：「張法而度之，則曉然若合符，是大儒者也。」注云：「如合符節，言不差錯也。曉與暗同，符節相合之物也。《周禮》門關用符節，蓋以全竹爲之，剖之爲兩，各執其一，合之以爲驗也。」楊氏以符節爲門關所用，與趙氏義異。乃《荀子》謂「張法而度之」，即《孟子》所謂揆矣。揆者，通變神化之用也。陳組綬《燃犀解》云：「符節言其驗也，揆言其度也，蓋指聖人之所以度量天下者。言事有古今，量度主焉，按圖索駿，膠柱鼓瑟，安有是處？夫孰之不一者爲之一，而至合者在至不合乎？不曰『得位』而曰『得志』，位者，所以抒其志也。」

章指：言聖人殊世而合其道。地雖不比，由通一軌。故可以爲百王法也。

子產聽鄭國之政，以其乘輿濟人於溱、洧。

洧。注：子產，鄭卿。爲政，聽訟也。溱、洧，水名。見人有冬涉者，仁心不忍，以其乘車度之也。疏注

「子產」至「度之也」○正義曰：子產，子國之子公孫僑也。

陳氏厚耀《春秋世族譜》云：「襄公八年，代子皮爲政，昭公二十年卒。鄭卿多無謚。《晉語》：『鄭簡公使公孫成子來聘』，韋注云：『成子，子產之謚也。』其子子思亦謚桓。」豈

以賢者之故邪？《淮南子·汜論訓》云「聽天下之政」，高誘注云：「政，治也。」《周禮·地官·鄉師》「各掌其所治鄉之教而聽其治」，注云：「聽謂平察之。」《尚書大傳》云「諸侯不聽」，鄭氏注云：「聽，議獄也。」趙氏以聽爲平察，故以政指訟獄也。閻氏若璩《釋地》云：「溱、洧，二水名。《說文》引《詩》：『溱與洧』作『潛』，曰：『潛水出鄭國，洧水出潁川陽城山東南入潁。』《史記》注引《括地志》以爲「古新鄭城南，洧與溱合」，《水經》亦云。余讀酈道元注，於溱水相鄰者，若丹水、汝水、潁水、潁水、渠水、沙水皆不載有橋梁，獨洧水一則曰：「又東逕陰坂北，水有梁焉。」再則曰：「又屈而南流，其水上有梁，謂之桐門橋。」則洧水之宜置有梁，孟子言殊非無

① 下「子」字，經解本作「思」。

因。竊以諸葛武侯相蜀，好治官府次舍橋梁道路，所至井竈藩溷，皆應繩墨。子產治鄭，何獨不然？此亦不過偶於橋有未修，以車濟人，而孟遂即其事以深論之。《禮記·仲尼燕居》云：「子產猶衆人之母也，能食之，不能教也。」注云：「子產嘗以其乘車濟冬涉者，而車梁不成，是慈仁亦違禮。」《家語·正論解》：「子游問於孔子曰：『夫子之極言子產之惠也，可得聞乎？』」孔子曰：「謂在愛民而已矣。」子游曰：「愛民謂之德教，何翅惠哉？」孔子曰：「夫子產者，猶衆人之母也，能食之而不能教也。」子游曰：「其事可言乎？」孔子曰：「子產以所乘之車濟冬涉，是愛而無教也。」車即輿，鄭氏言乘車，此同之。乘車是所乘之車。《音義》音剩，則讀爲「千乘」「萬乘」之乘，非也。《爾雅·釋言》云：「濟，渡也。」度與渡同。《說苑·政理》篇云：「景差相鄭，鄭人有冬涉水者，出而脛寒，後景差過之，下陪乘而載之，覆以上衽。」此所記與《孟子》異。孟子曰：「惠而不知爲政。歲十一月徒杠成，十二月輿梁成，民未病涉也。」注以爲子產有惠民之心而不知爲政。當以時修橋梁，民何由病苦涉水乎？周十一月，夏九月，可以成步度之功；周十二月，夏十月，可以成輿梁

也。疏「惠而不知爲政」○正義曰：此申明有仁心而民不被澤之義。○注「周十」至「梁也」○正義曰：《國語·周語》單子云：「夫辰角見而雨畢，天根見而水涸，故先王之教曰：『雨畢而除道，水涸而成梁。』」故《夏令》曰：「九月除道，十月成梁。」注云：「天根，氐、亢之間也。涸，竭也。謂寒露雨畢之後五日，天根朝見，水潦盡竭也。」《月令》：「仲秋，水始涸。」天根見，乃盡竭。九月雨畢，十月水涸。《夏令》，夏后氏之令，周所因也。除道所以便行旅，成梁所以便民，使不涉也。《禮記·月令》注引《王居明堂禮》云：「季秋除道致梁，以利農也。」孔氏正義曰：「農既收則當運輦，故法地治道，水上爲梁，便利民之轉運。」準此，則季秋致梁即十一月徒杠成，十月成梁即十二月輿梁成。翟氏灝《攷異》云：「《爾雅·釋宮》注引《孟子》『歲十月徒杠成』，疏曰：『《孟子》十一月，此作十月，脫誤，或所見本異。』今注疏本趙注云：『周十月，夏九月，可以成步度之功；周十一月，夏十月，可以成輿梁也。』與《爾雅》注所引却合。然周正建子，夏正建寅，人人之所熟悉，安可以如是言之？舊本趙氏注，上自爲周十一月，下自爲周十二月，此舊書所以可貴。」阮氏元《校勘記》云：「周十月夏九月」，閩、監、毛三本同。廖本、孔本、韓本作「周十一月」，推求文義，趙氏本作「周十月夏八

月、「周十一月夏九月」，而經文本作「歲十月徒杠成，十一月與梁成」，後人亂之。而閩、監、毛本尚存舊迹，廖、孔、韓本則似是而實非也。《周禮》之例，凡夏正皆曰歲，凡曰歲終，曰正歲，曰歲十有二月，皆謂夏時也。凡言正月之占，不曰歲，謂周正也。說詳《戴震文集》。《孟子》言「歲十月，十一月」，謂夏正，兩言「七八月之間」，則謂周正。正與《周禮》同例。趙注未解其例，今本則經注又皆舛誤矣。《夏令》曰「十月成梁」，《孟子》與《國語》合。按：趙氏注明作「夏九月」，「夏十月」，則其時之本自是十一月徒杠成，十二月與梁成，《仲尼燕居》正義引《孟子》亦作「歲十一月徒杠成，十二月與梁成」，則據閩、監、毛三本之「十月」「十一月」而改趙氏爲「夏八月」「夏九月」，恐亦無確證。備錄如右，識者參之。段氏玉裁《說文解字注》云：「樅，水上橫木，所以渡者。橋，水梁也。梁，水橋也。《釋宮》云：「石杠謂之倚。」《孟子》「歲十月徒杠成」，趙岐釋爲「步渡」，郭釋云「步渡約」，然則石杠者謂兩頭聚石，以木橫架之可行，非石橋也。凡直者曰杠，橫者亦曰杠。杠與樅雙聲，《孝武紀》曰「樅酒酤」，韋昭曰：「以木渡水曰樅，謂禁民酤釀，獨官開置，如道路設木爲樅，獨取利也。」水梁者，水中之梁也，梁者，宮室所以開舉南北者也。然其字本從水，則橋梁其本義，而棟梁其假借

也。凡獨木曰杠，駢木者曰橋，大而爲陂陀者曰樅。梁之字，用木跨水，則今之橋也。《孟子》「與梁成」，《夏令》「十月成梁」，《大雅》「造舟爲梁」，皆今之橋制見於經傳者，言梁不言橋也。若《爾雅》「隄謂之梁」，毛傳「石絕水曰梁」，謂所以偃塞取魚者，亦取亘於水中之義謂之梁。凡《毛詩》自「造舟爲梁」外，多言魚梁。《君子平其政，行辟人可也，焉得人人而濟之？故爲政者每人而悅之，日亦不足矣。」注：「君子爲國家平治政事刑法，使無違失。其道辟除人，使卑辟尊，可爲也。安得人人濟渡於水乎？每人而輒欲自加恩以悅其意，則日力不足以足之也。」疏：「注「君子」至「足之也」○正義曰：『淮南子·時則訓』「平詞訟」，高誘注云：「平，治也。」《禮記·王制》云「齊其政」，注云：「政謂刑禁。」《論語·爲政》篇云「道之以政」，《集解》引孔曰：「政，法教也。」趙氏解「平其政」爲「治政事刑法」，以政即刑禁法教也。橋梁不修，民苦冬涉，則政有違失矣。「其道辟除人」者，「道」字釋「行」字。《說文》是部云：「道，所行道也。」鄭氏注《禮記·射義》、《儀禮·喪服傳》皆云：「道猶行也。」是也。《音義》出「辟人」，云：「丁、張並音闕，亦如字，注「辟除」同。」又出「卑辟」，

云：「音避。」《周禮·秋官·條狼氏》：「掌鞭以趨辟，王出入則八人夾道。」注云：「趨辟，趨而辟行人。」《秋官·野廬氏》：「凡有節者及有爵者至，則爲之辟。」注云：「辟，辟行人。」《小爾雅·廣言》云：「辟，除也。」是「辟人」即「辟除人」，謂屏人使避之。段氏玉裁《說文解字注》云：「僻，辟也。辟者，法也。引申爲辟人之辟。辟人而人避之亦曰辟。若《周禮·閹人》：「凡外內命婦出入，則爲之辟。」《孟子》：「行辟人可也。」《曲禮》：「若主人拜，則客還辟，辟拜。」《郊特牲》：「有由辟焉。」包咸《論語》注：「躩，盤辟兒也。」《投壺》：「主人盤旋曰辟，賓盤旋曰辟。」《大射儀》：「賓辟」，注曰：「辟，逡遁不敢當盛。」他書辟人，辟邪，辟寒，辟塵之類，語意大略相似。自屏之者言，則《閹人》、《離婁》篇、《郊特牲》是也；自退者言，則《曲禮》、《投壺》、《論語》注所云是也。辟之言邊也，屏於一邊也，僻之本義如是。然則「辟除人」與「卑辟尊」字同義亦同。《音義》雖兼存兩音，音兩而義一也。俗以「辟除」之辟作闕，「辟尊」之辟作避，非古義矣。以「每人而悅之」爲「欲自加恩以悅其意」者，《莊子·人間世》：「無門無毒」，《釋文》：「毒，崔本作每，云貪也。」《漢書·賈誼傳》：《服賦》云「夸者死權，品庶每生」，孟康云：「每，貪也。」《說文》貝部云：「貪，欲物也。」趙氏以每爲貪，以貪爲

欲，「每人而悅」是貪於悅人，故云「欲自加恩以悅其意」也。趙氏佑《溫故錄》云：「此節正辨子產以乘輿濟人之無其事也。」君子即謂子產。子產有君子之道者也。其爲政使都鄙有章，上下有服，田有封洫，廬井有伍，大夫之忠儉者從而與之，泰侈者因而斃之，蓋能平其政，非務悅人明矣。濟涉細事，本不足爲執政輕重，而當執政經臨，輿衛森嚴，津吏祇候，即有往來喧競，自當靜俟軒車，必無辱觀聽而煩左右者。大夫之乘非小人所得假，其人既衆，豈一輿所能用，此必無之理，曾子產而有之？而世徒妄傳失實，是則子產不知爲政也，是子產將不得爲君子也。」

章指：言重民之道，平政爲首。人君由天，天不家撫。是故子產渡人，孟子不取也。**疏**「人君由天」○正義曰：《音義》云：「丁云：

「由，義當作猶。猶，如也。古字通用。」

孟子告齊宣王曰：「君之視臣如手足，則臣視君如腹心；君之視臣如犬馬，則臣視君如國人；君之視臣如土芥，則臣視君如寇

讎。」**注**芥，草芥也。臣緣君恩以爲差等，其心所執

若是也。**疏**注「芥草芥也」○正義曰：《方言》云：「芥，草

也。自關而西或曰草，或曰芥。」哀公元年《左傳》逢滑曰：

「臣聞國之興也，視民如傷，是其福也；其亡也，以民爲土芥，是其禍也。楚雖無德，亦不艾殺其民，吳日敝於兵，暴骨

如莽。」**注**云：「芥，草也。」又云：「草之生於廣野，莽莽然，

故曰草莽。」然則土芥謂視之如土如草，不甚愛惜也。孟子

本諸逢滑。○**注**「臣緣」至「是也」○正義曰：趙氏以「視」爲

心相視，非形相視，故曰「心之所執若是」。王曰：「禮，

爲舊君有服，何如斯可爲服矣？」**注**宣王問，

禮，舊臣爲舊君服喪服。問君恩何如則可爲服？

疏注「禮舊臣爲舊君服喪服」○正義曰：《儀禮·喪服》：

「爲舊君、君之母妻，傳云：『爲舊君者，孰謂也？』仕焉而已

者也。何以服齊衰三月也？言與民同也。君之母妻，則小

君也。」大夫在外，其妻長子爲舊國君，傳云：「何以服齊衰

三月也？妻言與民同也。長子言未去也。」舊君，傳云：

「大夫爲舊君，何以服齊衰三月也？大夫去君，歸其宗廟，

故服齊衰三月也。言與民同也。何大夫之謂乎？言其以

道去君而猶未絕也。」然則有致仕之舊君，有去國之舊君。

致仕則君恩本未絕，故不特爲君服，且爲君之母妻服，若已去國則不服，惟妻子仍居本國者服。雖待放於郊，尚未去國，乃爲舊君服。曰：「諫行言聽，膏澤下於民；

有故而去，則君使人導之出疆，又先於其所

往，去三年不反，然後收其田里。此之謂三

有禮焉。如此則爲之服矣。」**注**爲臣之時，諫行

言從，德澤加民。若有他故，不得不行，譬如華元奔

晉，隨會奔秦，是也。古之賢君遭此，則使人導之出

竟，又先至其所到之國，言其賢良。三年不反，乃收

其田萊及里居也。此三者有禮，則爲之服矣。**疏**注

「若有」至「秦是也」○正義曰：成公十五年《左傳》云：「秋

八月，葬宋共公，於是華元爲右師，蕩澤爲司馬。蕩澤弱公

室，殺公子肥，華元曰：『我爲右師。君臣之訓，師所司也。

今宮室卑而不能正，吾罪大矣。不能治官，敢賴寵乎？』乃

出奔晉。」文公六年《左傳》云：「八月乙亥，晉襄公卒，靈公

少，晉人以難故，欲立長君。趙孟曰：『立公子雍。』使先蔑、

士會如秦逆公子雍。」七年《左傳》云：「穆嬴日抱太子以啼

於朝，出朝則抱以適趙氏。宣子與諸大夫皆患穆嬴，且畏

偁，乃背先蔑而立靈公，以禦秦師。戊子，敗秦師于令狐，至

于刳首。己丑，先蔑奔秦，士會從之。」十三年《左傳》云：「趙宣子曰：『隨會在秦，賈季在狄，難日至矣，若之何？』」郤成子曰：「賈季亂，且罪大，①不如隨會能賤而有耻，柔而不犯，其知足使也，②且無罪。」此「華元奔晉、隨會奔秦」之事也。○注「古之」至「服矣」○正義曰：昭公元年《穀梁傳》云：「疆之爲言猶竟也。」竟與境通，是「出疆」即「出境」也。《廣雅·釋詁》云：「往，至也。」《爾雅·釋詁》云：「到，至也。」是「往」即「到」也。《史記·酈生列傳》云：「沛公麾下騎士，適酈生里中子也。酈生謂之曰：『吾聞沛公慢而易人，多大略，此真吾所願從游，莫爲我先，若見沛公，謂曰：臣里中有酈生，年六十餘，長八尺，人皆謂之狂生，生自謂我非狂生。』」臣里中「云云，即「爲之先」也。《莊子·秋水》篇云：「莊子釣於濮水，楚王使大夫二人往先焉，曰：『願以竟內累矣。』」《釋文》云：「先焉，先謂宣其言也。」此「又先於其所往」之先與之同，故趙氏云「言其賢良」。蓋先則有所宣之言，如二大夫之於莊子，騎士之於酈生也。阮氏元《校勘記》云：「乃收其田里田業也里居也」，閩、監、毛三本同。廖本、韓本作「乃收其田業及里居也」，孔本、《攷文》古本作「乃收其田業及里居也」，足利本作「乃收其田里田業及里居」。《音義》亦出「田業」，業當作采，大夫采地字古書多或

作菜，菜誤爲業，作業則更誤矣。「三者有禮」，使人導之出疆，一也；又先於其所往，二也；去三年不反，然後收其田里，三也。今也爲臣，諫則不行，言則不聽，膏澤不下於民；有故而去，則君搏執之，又極之於其所往；去之日遂收其田里。此之謂寇讎。寇讎，何服之有？**注**搏執其族親也。極者，惡而困之也。遇臣若寇讎，何服之有乎。**疏**

注「搏執」至「有乎」○正義曰：《音義》云：「搏，音博。」《說文》手部云：「搏，索持也。」《部》云：「索，人家搜也。」《顏氏家訓》引《通俗文》云：「入室求曰搜。」入其家室，搜索而持執之，故知爲「搏執其族親」。族親指其父母妻子兄弟而言，故人其家而索之族親，正釋搏字，其義精矣。《禮記·月令》：「孟秋之月，命有司脩法制，繕囹圄，具桎梏，禁止姦，慎罪邪，務搏執。」鄭氏不注。高誘注《呂氏春秋》云：「慎戒有姦罪者，搏執之也。」亦未詳溯。按：此姦邪蓋指邪說左道之類。罪此邪人，必審慎得其實，既審得其實，則必搜索

①「且」，原誤作「其」，今據《左傳》及經解本改。
②「足」，原脫，今據《左傳》及經解本補。

其家，執而禁之。聖人於惑民致亂之姦邪，不姑息以遺患如此。《孟子》之「搏執」非《月令》之「搏執」，亦明矣。《說文》穴部云：「窮，極也。」《論語·堯曰》篇云「四海困窮」，《集注》引包曰：「困，極也。」極是困窮，「極之於其所往」即困之於其所往也。緣其所以困之之故，則云「惡而困之」也。《尚書·洪範》云「鯀則殛死」，《釋文》云：「殛，本作極。」極鯀於羽山，亦是困之於羽山。《鄭志》答趙商云：「鯀非誅死，鯀放居東裔，至死不得反於朝。」蓋置鯀於東海永不復用，又收管之不許他往，所以困之窮之，使之終死於是，所謂「極」也。此「極之於其所往」蓋既不得如士會之復歸，又不能若賈季之送帑，且如商任之會，禁錮樂盈，使諸侯不得受，則所以困之窮之者至矣。是時臣之心惟恐遭其荼毒，故擬之曰「寇讎」，非真如興曲沃之甲，轉身爲亂賊也。《禮記·檀弓》云：「穆公問於子思曰：『爲舊君反服，古與？』」子思曰：「古之君子進人以禮，退人以禮，故有舊君反服之禮也，今之君子進人若將加諸膝，退人若將隊諸淵，毋爲戎首，不亦善乎？又何反服之禮之有？」《注》云：「言放逐之臣不服舊君也。」爲兵主來攻伐曰「戎首」。《孟子》此章正申明子思之義。

章指：言君臣之道，以義爲表，以恩爲

裏。表裏相應，猶若影響。舊君之服，蓋有所興。諷諭宣王，勸以仁也。

孟子曰：「無罪而殺士，則大夫可以去；無罪而戮民，則士可以徙。」**注**惡傷其類，視其下等，懼次及也。語曰：「鳶鵲蒙害，仁鳥曾逝。」此之謂也。**疏**注「惡傷」至「謂也」○正義曰：士大夫爲類而六等，上士一位，下於大夫，士農工商爲四民，是「士」與「民」爲類。士居四民之首，則民下於士，故爲「下等」也。引「語」者，《漢書·梅福傳》云：「成帝委任大將軍王鳳，鳳專執擅朝，而京兆尹王章素忠直，譏刺鳳，爲鳳所誅。福上書曰：『夫載鵲遭害，則仁鳥增逝；愚者蒙戮，則知士深退。』」顏師古注云：「載，鴟也。音緣。」《禮記·中庸》引《詩》「鳶飛戾天」，《釋文》云：「本又作載。」阮氏元《校勘記》云：「仁鳥增逝」，閩、監、毛三本同。廖本、孔本、韓本增作曾。作曾是。曾，高也。」

章指：言君子見幾而作。故趙殺鳴犢，孔子臨河而不濟也。**疏**「君子」至「濟也」○

正義曰：《易·繫辭傳》云：「幾者，動之微，吉之先見者也。君子見幾而作，不俟終日。」《史記·孔子世家》云：

「孔子將西見趙簡子，至於河，聞竇鳴犢、舜華死，臨河而歎曰：『美哉水，洋洋乎！某之不濟此，命也夫！』子貢趨而進曰：『敢問何謂也？』孔子曰：『竇鳴犢、舜華，國之賢大夫也。某聞之也：刳胎殺夭，則騏驎不至郊；竭澤涸漁，則蛟龍不合陰陽；覆巢毀卵，則鳳凰不翔。何則？君子諱傷其類也。』」

孟子曰：「君仁，莫不仁；君義，莫不義。」**注**君者，一國所瞻仰以爲法，故必從之。**疏**

「君仁」至「不義」○正義曰：前言人臣格君心之非，明人臣當自脩其身，此言人君自格其心，明人君當自脩其身。

章指：言君以仁義率衆，孰不順焉？

上爲下效也。**疏**「上爲下效也」○正義曰：《白虎

通·三教》篇云：「教者，效也。上爲之，下效之。」

孟子曰：「非禮之禮，非義之義，大人弗

爲。」**注**若禮而非禮，陳質娶婦而長，拜之也；若義而非義，藉交報仇是也。此皆大人所不爲也。**疏**注

「若禮」至「之也」○正義曰：若，猶似也。似禮非禮，似義非義，皆似是而非者也。周氏廣業《孟子古注攷》云：「陳質疑是莫贇之義。」董子《繁露·五行相勝》篇云：「營蕩爲齊司寇，太公問治國之要，曰：『在仁義而已。仁者愛人，義者尊老。愛人者有子不食其力，尊老者妻長而夫拜之。』太公曰：『寡人欲以仁義治齊，今子以仁義亂齊。寡人立而誅之，以定齊國。』此拜妻之證也。阮氏元《校勘記》云：「《音義》本陳質亦作賈。按，孫志祖云：『長讀長幼之長，長字句絕。』按：古事相傳，名姓往往各異，如虞慶之爲高陽魁，盍胥之爲古乘。此營蕩之爲陳質，亦其類耳。○注「藉交報仇是也」○正義曰：周氏廣業《孟子古注攷》云：「《史記·貨殖傳》云：『閭巷少年，借交報仇，篡逐幽隱，實皆爲財用耳。』《游俠傳》云：『郭解少時陰賊，以軀借交報仇。』《漢書》：『朱雲少時，通輕俠，借交報仇。』師古注：『借，助也。音子夜切。』孫宣公《音義》：『藉，慈夜切。義與借同。』則藉交即借交也。」

章指：言禮義，人之所以折中。履其

正者，乃可爲中。是以大人不行疑禮。

疏

「禮義人之所以折中」^①○正義曰：《禮記·仲尼燕居》云：「夫禮，所以制中也。」《表記》云：「義者，天下之制也。」《文選·羽獵賦》云「不制中以泉臺」，注引韋昭云：「制或爲折。」

孟子曰：「中也養不中，才也養不才。」

故人樂有賢父兄也。

注中者，履中和之氣所生，

謂之賢才者，謂人之有俊才者。有此賢者，當以養育教誨不能，進之以善，故樂父兄之賢以養己也。

疏注「中者」至「謂之賢」○正義曰：《白虎通·五行》篇

云：「中，和也。中和居六德之首。」《周禮·鄉大夫》：「興賢者能者」，注云：「賢者，有德行者。」「履中和之氣所生」則有德行，有德行故「謂之賢」。《說文》貝部云：「賢，多才也。」《老子》云「不尚賢」，王弼注云：「賢猶能也。」然則中、才皆得謂之賢，故下承言「賢父兄」，兼中與才而言也。趙氏以「中」爲「賢」，下亦云「賢者養育教誨不能」，不能即不才，則賢者亦兼指才而言矣。○注「才者謂人之有俊才者」^②○正義曰：《淮南子·汜論訓》云「天下雄俊豪英」，注云：「才過

千人爲俊。《禮記·王制》云：「司徒論選士之秀者而升之學，曰俊士。」《月令》云「命太尉贊傑俊」，注云：「傑俊，能者也。」《天官·太宰》「四曰使能」，注云：「能，多才藝者。」《國語·晉語》云「夫教者，因體能質而利之者也」，注云：「能，才也。」○注「有此賢者」至「己也」○正義曰：《禮記·文王世子》云「立太傅少傅以養之」，注云：「養猶教也。言養者，積浸成長之。」《說文》云部云：「育，養子使作善也。」《虞書》曰：「教育子。」馬融注《堯典》「教胥子」云：「胥，長也。教長天下之子弟。」《爾雅·釋詁》云：「育，長也。」馬亦讀胥爲育。孟子言「得天下英才而教育之」，「教育」即《堯典》之「教育」，教育連文，育即是教。此「中也養不中，才也養不才」，即是中也教不中，才也教不才也；注云「樂父兄之賢以養己」，即是樂父兄之賢以教己也。故趙氏以「育」釋「養」，又以「教誨」釋「養育」；下言訓導，訓導亦教誨也。《禮記·內則》云「獻其賢者於宗子」，注云：「賢猶善也。」以賢教不賢是以善教不善，則不善者進之以善，賢既得兼才、能而言，

① 「以」，原脫，今據《章指》補。

② 「謂」上，原有「是」字，合於宋十行、閩、監、毛等本，今據本書及阮校所述廖、孔、韓等本注文改。

則以賢教不賢亦是能以教不能，則不能者亦進之以能。上云「有此賢者」，下云「教誨不能，進之以善」，互發明之也。如中也棄不中，才也棄不才，則賢不肖之相去，其間不能以寸。」**注**如使賢者棄愚，不養其所當養，則賢亦近愚矣。如此，賢不肖相覺，何能分寸？明不可不相訓導也。**疏**注「不養」至「愚矣」○正義曰：諸本作

「不養其所以當養」，廖本無「以」字，是也。子弟之不中不才，父兄所當教也。棄而不教，是未知當教也。以子弟為父兄所當教而且不知，是亦「近于愚」矣。○注「如此賢」至「分寸」○正義曰：阮氏元《校勘記》云：「孔本覺作較，非。按，《音義》出「相覺」，丁云：「義當作校。」蓋覺即校之假借字，古書往往用覺字。」盧氏文弼《鍾山札記》云：「覺有與校音義並同者，《詩·定之方中》正義引《鄭志》云：「今就校人職相覺甚異」，趙岐注《孟子》中也養不中」章「如此，賢不肖相覺，何能分寸」，又「富歲子弟多賴」章「聖人亦人也，其相覺者以心知耳」，《續漢書·律曆志》中「至元和二年，《太初》失天愈遠，日月宿度相覺浸多」，《晉書·傅玄傳》「古以步百為畝，今以二百四十步為畝，所覺過倍」，《宋書·天文志》「斗二十一，井二十五，南北相覺四十八度」，凡此皆以覺為校也。後人有不得其義而致疑者，更或輒改

他字，故為詳證之。《說苑·辨物》篇云：「十分為一寸。」趙氏連言分寸，明此寸謂十分之寸也。

章指：言父兄已賢，子弟既頑，教而不改，乃歸自然。

孟子曰：「人有不為也，而後可以有為。」**注**人不為苟得，乃能有讓千乘之志。**疏**「人

有」至「有為」○正義曰：有不為，是介然自守，行己有耻。趙氏以「不為苟得」解之，是也。義可為乃為之，義所不可為則不為。人能知擇，故有不為者有為者。讓千乘，仍是不為苟得，趙氏以讓千乘為有為，故云「義乃可申」。《荀子·不苟》篇云：「君子行不貴苟難，說不貴苟察，名不貴苟傳，唯其當之為貴。負石而赴河，是行之難為者也，而申徒狄能之。然而君子不貴者，非禮義之中也。山淵平，天地比，人乎耳出乎口，鉤有須、卵有毛，是說之難持者也，而惠施、鄧析能之。然而君子不貴者，非禮義之中也。盜跖吟口，名聲若日月，與舜禹俱傳而不息。然而君子不貴者，非禮義之中也。」趙氏以「不為」為「不為非義」，蓋本於此。

章指：言貴廉賤耻，乃有不為。不為

非義，義乃可申。

孟子曰：「言人之不善，當如後患何？」

注人之有惡，惡人言之。言之，當如後有患難及己乎！**疏**「言人」至「患何」○正義曰：孟子距楊墨，比之爲禽獸，正所以息其無父無君之患也。若言人之不善而轉貽將來之患，則患不在人之不善而轉在吾之言矣。是當審而慎之。

禽獸，正所以息其無父無君之患也。若言人之不善而轉貽將來之患，則患不在人之不善而轉在吾之言矣。是當審而慎之。

章指：言好言人惡，殆非君子。故

曰：「不忮不求，何用不臧？」

孟子曰：「仲尼，不爲己甚者。」**注**仲尼彈邪以正，正斯可矣。故不欲爲己甚泰過也。**疏**「仲

尼不爲己甚者」○正義曰：郝敬《孟子說解》云：「孟子不見諸侯，而齊、梁好士，未嘗不往；仕不受祿，而宋、薛之餽，未嘗不受。道不苟合，而不爲小丈夫之悻怒，故去齊三宿，廉不苟取，而不爲陳仲子之矯情，故交際不辭。匡章得罪於父，不以人言而不加禮貌；夷之受學於墨，不以異端而各其

教誨。其告君也，園囿亦可，臺池鳥獸亦可，好貨好色亦可，故曰：「人不足責，政不足問，惟格君心之非而已。」是故以臧倉之謗不遇於魯，而未怨其沮己；以王驩之佞倖出弔於滕，而未嘗不與之朝暮。雖不悅於公行子之家，而從容片辭，嫌疑立解。宛然孔子待陽貨、公伯寮氣象，豈非願學之深，有得於溫良恭儉讓之遺範者歟？是故以伯夷爲隘，柳下惠爲不恭，以仲尼爲不爲己甚，其所向慕可知。而世儒猶謂其鋒鋞太露，何歟？」

章指：言《論》曰：「疾之已甚，亂也。」

故孟子譏踰牆、距門者也。

孟子曰：「大人者，言不必信，行不必果，惟義所在。」**注**果，能也。大人杖義，義有不得不信其言，子爲父隱也；有不能得果行其所欲行者，若親在不得以其身許友也。義或重於信，故曰惟義所在。**疏**「大人杖義」○正義曰：諸本作「仗」，孔本作「杖」，當爲杖。《說文》木部云：「杖，持也。」《漢書·高帝紀》云「杖義而西」，注云：「杖亦倚任之義。」○注「義有」

至「隱也」○正義曰：《論語·子路》篇云：「父爲子隱，子爲父隱，直在其中矣。」《呂氏春秋·當務》篇云：「楚有直躬者，其父竊羊而謁之上。上執而將誅，直躬者請代，將誅，告吏曰：『父竊羊而謁之，不亦信乎？』父誅而代之，不亦孝乎？」荆王乃不誅。孔子曰：「異哉，直躬之爲信也！」一父而載取名焉，故直躬之信，不若無信。」○注「有不」至「友也」○正義曰：趙氏以「能」釋「果」，見《梁惠王》篇。《禮記·中庸》云「果能此道矣」，注云：「果猶決也。」果能二字連文，是果即能。果義爲決，能義亦爲決。《周禮·春官·大卜》「五曰果」，注云：「果謂以勇決爲之。」此云「有不能得果行其所欲行者」，疊能、得、果三字，不果行即不得行，不得行即不能行也。《禮記·曲禮》云：「父母存，不許友以死。」注云：「爲忘親也。死爲報仇讎。」孔氏正義云：「親亡則得許友報仇。故《周禮》有主友之讎，視從父兄弟。」《白虎通》云：「親友之道不得行者，亦不許友以死耳。」《論語·子路》篇云：「言必信，行必果，硜硜然小人哉！」《集解》引鄭曰：「行必果，所欲行必敢爲之。」《陽貨》篇云：「好信不好學，其蔽也賊。」《集解》引孔曰：「父子不知相爲隱之輩也。」又云：「惡果敢而窒者。」

章指：言大人之行，行其重者。不信不

果，所求合義也。

孟子曰：「大人者，不失其赤子之心者也。」^注大人謂君。國君視民當如赤子，不失其民心之謂也。一說曰：赤子，嬰兒也。少小之心專一未變化，人能不失其赤子時心，則爲真正大人也。

疏注「大人」至「大人也」○正義曰：前一說是也。嬰兒無知，大人通變，其相異遠矣。趙氏雖存兩說，《章指》則以前一說爲定。程氏瑤田《通藝錄·論學小記》云：「孟子曰：『大人者，不失其赤子之心者也。』則誠意莫如赤子。而赤子非能格物以致其知者也，此可以見人性之善。而吾人之學必先於格物以致其知者，何也？蓋以意誠誠矣，意之誠誠如赤子之无妄矣，而卒不得謂之爲明明德者也。明明德者，無所不知之誠，赤子之誠，一無所知之誠也。故赤子之誠雖與聖人之誠通一無二，而赤子之爲赤子則不必其皆爲聖人。然則使赤子中有生而能爲聖人者，亦必不能不格物致

①「注」，原誤作「德」，今從沈校據《周禮》鄭注及全書文例改。

知而徒恃其一無所知之誠以造乎其極也。此吾夫子所以終其身於格物致知而至於七十乃自信其從心所欲不踰矩也。此古昔聖人所以緣人情以制禮，而禮儀三百威儀三千所以必待其人而後行者，待此格物以致其知之人，乃能於獨見獨聞之時，慎之又慎，以造其意而誠之，而於是乎能行此禮也。此之謂明明德，而大異乎赤子一無所知之誠矣。」按：程氏主後一說而亦疑赤子之心不可以擬大人，故爲之分別而申言之。《康誥》言「如保赤子」，上承「惟民其畢棄咎」，下接「惟民其康乂」。孟子因墨者夷之引此而解之云：「赤子匍匐將入井，非赤子之罪也。」蓋以愚民無知比赤子無知。《禮記·大學》引此，釋之云：「心誠求之，雖不中，不遠矣。」鄭氏注云：「養子者推心爲之，而中於赤子之嗜欲也。」皆以保之養之言。《說苑·貴德》篇云：「聖人之於天下百姓也，其猶赤子乎？饑者則食之，寒者則衣之，將之養之，育之長之，唯恐其不至於大也。」此正所謂不失赤子之心也。《荀子·臣道》篇云：「若馭僕馬，若養赤子，若食餒人，故因其懼也而改其過，因其憂也而辨其故，因其喜也而入其道，因其怒也而除其怨，曲得所謂焉。」此且以比暴君，未聞赤子之心可以比大人也。孟子方言「不爲己甚」，「惟義所在」，所以發明聖人通變之旨，豈取一「專一未變化」之赤子而擬之

哉？《老子》云：「衆人熙熙，如登春臺。我獨泊然其未兆，如嬰兒之未孩。」又云：「知其雄，守其雌，爲天下谿。爲天下谿，常德不離，復歸於嬰兒。」此亦自比愚人之無知，譏聖人之樸散，爲老氏清淨之宗，與孟子正相反者。此趙氏又一說之義也。人之爲赤子猶天地有洪荒，伏羲以前無三綱六紀，飲食男女之事與禽獸同。自伏羲定人道，而乃有君臣父子夫婦之倫，人道不定，天下大亂，可推而知也。《莊子·繕性》篇乃云：「古之人在混茫之中，與一世而得淡漠焉。是時也，陰陽和靜，鬼神不擾，四時得節，萬物不傷，羣生不夭。人雖有知，無所用之。」豈知晦芒憔悴之初，八卦未畫，四時何由而節？漁佃之利未興，弧矢之威未作，人與鳥獸相雜，其靈於鳥獸者凡幾？不知粒食，其疾病疢毒於鳥獸羸虵之肉者又凡幾？而謂之不傷不夭，不亦妄乎？赤子之無知，故匍匐可以入井，必多方保護之，教誨之，自桑弧蓬矢，方名六甲，就外傳，入小學，以至博學無方，乃能知類通達，①強立而不反。若失而不教，則終於愚而無知。吾見若而人者，人詐之而莫悟，衆擠之而弗酬，衆共以爲愚，可謂「不失其赤子之心」矣，卒之文字不能通，農商不成就，衣食不能自力，

①「達」，原誤作「遠」，今據《禮記·學記》及經解本改。

父母不能養，妻子不能保，自轉尸於溝壑。彼老氏之徒乃以爲真樸未散，不亦僨乎？夫老莊之徒非不學者也，學而不能知聖人之道，故爲是諛辭耳。於是受其說者以爲不必博文，不必好古，不必審問而明辨，第靜其心，存其心，守其心，則不失乎赤子之心而即爲大人。於是傭人匠賈皆可自命爲聖賢，相習成風，其禍於天下，與吃菜事魔者等矣。夫孟子所謂「大人」，即《易》之「利見大人」也。前云「惟大人爲能格君心之非」，故申言其所以爲大人者如是。一則云「非禮之禮，非義之義，大人弗爲」，再則云「大人者，言不必信，行不必果，惟義所在」，此又云「不失其赤子之心」，後又云「正己而物正」，高出乎事君人、安社稷，達可行於天下之人之上，而豈擬以無知之赤子哉？大人以先覺覺後覺，以先知覺後知，不以己之聖而忘人之愚，不以己之明而忘人之闇，如義農、黃帝、堯舜、文王、周公、孔子是也。惟不失其赤子之心，所以正己而物正。孟子蓋深於《易》，而此其發明之者也。

章指：言人之所愛，莫過赤子。視民則然，民懷之矣。大人之行，不過是也。

孟子曰：「養生者不足以當大事，惟送

死可以當大事。」**注**孝子事親致養，未足以爲大事。送終如禮，則爲能奉大事也。**疏**「養生」至「大

事」○正義曰：由「養志」而申言之也。《周禮·倉人》「凡國之大事」，注云：「大事謂喪戎。」《禮記·雜記》云「於士既事成踊」，注云：「事謂大小斂之屬。」《少儀》云「喪俟事，不植弔」，**①**注云：「事，朝夕哭時。」**②**《說文》史部云：「事，職也。」謂人子之職，惟此爲大。

章指：言養生竭力，人情所勉；哀死送終，行之高者。事不違禮，可謂難矣，故謂之「大事」。

孟子曰：「君子深造之以道，欲其自得之也。」**注**造，致也。言君子問學之法，欲深致極竟之以知道意，欲使己得其原本，如性自有之也。**疏**注「造致」至「有之也」○正義曰：鄭氏注《禮記》、《周禮》、

① 「植」，原誤作「植」，今據《禮記》及經解本改。

② 「哭」，原重，今據《禮記》鄭注及經解本刪。

《儀禮》皆云：「造，至也。」至即致也。《爾雅·釋詁》云：「極，至也。」《國語·吳語》云：「飲食不致味」，注云：「致，極也。」《楚辭·謬諫》云：「又何路之能極」，注云：「極，竟也。」趙氏以「致」釋「造」，又以「極」釋「致」，以「竟」釋「極」。下「資之深」解為「得其根」，則深為「深淺」之深，異於略觀大意，不求深解以終其學。趙氏以「問學之法」表明之，即下章「博學、詳說」之事也。戴氏震《孟子字義疏證》云：「《論語》曰：『多聞闕疑，慎言其餘，多見闕殆，慎行其餘。』又曰：『多聞，擇其善者而從之，多見而識之，知之次也。』又曰：『我非生而知之者，好古敏以求之者也。』然聞見不可不廣，而務在能明於心，一事豁然使無餘蘊，更一事亦如是，久之心知之明進於聖智。《易》曰：『精義入神，以致用也。』又曰：『智周乎萬物而道濟天下，故不過。』孟子曰：『君子深造之以道，欲其自得之也。自得之則居之安，居之安則資之深，資之深則取之左右逢其源。』凡此皆精於道之謂也。」按：《易·繫辭傳》云：「夫易，所以極深而研幾也。唯深也，故能通天下之志；唯幾也，故能成天下之務。」「深造」即「極深」也，「以道」即「研幾」也。「自得」，則「通天下之志」、「成天下之務」也。「一陰一陽之謂道」，道者，反復變通者也。博學而不深造則不能精，深造而不以道，則不能變。精

且變乃能自得，自得乃能不疾而速，不行而至，為至神也。非博學無以為深造之本，非深造無以為以道之路，非以道無以為自得之要，非自得無以為致用之權。讀書好古而能自得之，乃不空疏，不拘滯。而示之以「深造以道」，又申之以「博學、詳說」，兩章牽連互發。趙氏以「問學之法」標之，可謂知言矣。自得之則居之安，居之安則資之深，資之深則取之左右逢其原。故君子欲其自得之也。^①「注」居之安，若己所自有也。資，取也。取之深，則得其根也。左右取之，^②在所逢遇，皆知其原本也。故使君子欲自得之也。^③疏「注」居之「至

①「左」，原誤作「右」，今據經文及經解本改。

②「之也」○正義曰：此節發明「自得」之義。《小爾雅·廣言》云：「資，取也。」《禮記·孔子問居》云：「必達於禮樂之原」，注云：「原，本也。」《爾雅·釋詁》云：「逢，遇也。」雖生知之聖，必讀書好古。既由博學而深造之以道，則能通古聖之道而洞達其本原。而古聖之道與性相融，此自得之，所謂如性自有之也。如性自有之，故居之安。凡「之」字皆指所學而言。未能自得，則道不與性融，不能通其變而協其宜。道與

性隔，性與道睽，故居之不安。既自得而居之安，則取於古聖之道即取乎吾之性，非淺襲於口耳之間，非強擬於形似之迹，故「資之深」也。至於資之深，左取而左宜之，右取而右宜之，無不逢其原也。左右者，兩端也。「取之左右逢其原」，即「執其兩端，用其中於民」也。「學而不思則罔」，罔者，不能自得之也；「思而不學則殆」，殆者，空悟而本無所居，則不安也。深造憑於心之虛，以道憑於學之實。得之，得此道也，自得之則學洽於思，居之，居此道也，居之安則思縝於學。舍學而言恃心，舍心而守學，兩失之矣。

章指：言學必根原，如性自得。物來

能名，事來不惑。君子好之，朝益暮習，道所以臻也。

疏「學必」至「臻也」①○正義曰：「根原」

即根本也。孔本作「根源」，非是。「物來能名」，詳見《公孫丑下》篇。《漢書·雋不疑傳》贊云：「雋不疑學以從政，臨事不惑，遂立名迹，終始可述。」《管子·弟子職》云：「朝益暮習，小心翼翼。一此不解，是謂學則。」

孟子曰：「博學而詳說之，將以反說約

也。」注「博，廣，詳，悉也。廣學悉其微言而說之

者，將以約說其要。意不盡知，則不能要言之也。

疏「博廣」至「言之也」○正義曰：鄭氏注《周禮》、《儀禮》，多以廣釋博。《荀子·修身》篇云「多聞曰博」，是也。

《說文》心部云：「悉，詳盡也。」言部云：「說，說釋也。」《詩·衛風·氓》篇云「猶可說也」，箋云：「說，解也。」《淮南子·主術訓》「所守甚約」，高誘注云：「約，要也，少也。」廣學則無不學，《大戴記·曾子立身》云：「博學而孱守之，微言而篤行之。」趙氏本此，以「微言」即「詳說」。微有二義：

一幽隱，一纖細。言幽隱則輕淺者不易解，言纖細則高簡者不屑解。「悉其微言而說之」，則盡其幽隱纖細之言，而解釋之要即根原也。不博學而徒憑空悟者，非聖賢之學，無論也；博學而不能解說，文士之浮華也。但知其一端，則詖而非要；但知其大略，則淺而非要。故必無所不解而後能知其要。博、詳與約相反，惟博且詳，反能解得其約。舍博且詳而言約，何以能解？《申鑒·時事》篇云：「道雖要也，非博無以通矣。博其方，約其說。」趙氏云「不能盡知，則不能要言之」，得之矣。戴氏震《孟子字義疏證》云：「約謂得其

要言也，得之矣。戴氏震《孟子字義疏證》云：「約謂得其

①「學」上，原衍「注」字，今據全書文例刪。

至當。」阮氏元《曾子注釋》云：「孔門論學，首在於博。孔子曰：『君子博學於文，約之以禮。』達巷黨人以博學深美孔子，孔子又曰：『博學之，審問之。』顏子曰：『夫子循循然善誘人，博我以文，約我以禮。』子夏曰：『博學而篤志。』孟子曰：『博學而詳說之。』故先王遺文有一未學，非博也。」按：孔孟所以重博學者，即堯舜變通神化之本也。人情變動，不可以意測，必博學於古乃能不拘一端。彼徒執一理以為可以勝天下，吾見其亂矣。

章指：言廣尋道意，詳說其事，要約至義，還反於樸。說之美者也。

孟子曰：「以善服人者，未有能服人者也；以善養人，然後能服天下。天下不心服而王者，未之有也。」**注**以善服人之道治世，謂以威力服人者也，故人不心服；以善養人，養之以仁恩，然後心服矣，文王治岐是也。天下不心服，何由而王也？**疏**注「以善」至「心服矣」○正義曰：趙氏解「善服人」為「善於服人」，「善養人」為「善於養人」，故以服為威

力，養為仁恩也。兩善字皆虛活。近時通解善即指仁義，以仁義求勝於人，即有相形相忌之意，何能服人？

章指：言五伯服人，三王服心。其服一也，功則不同。上論堯舜，其是違乎？

疏「五伯服人」○正義曰：《音義》出「五伯」，云：「如字。丁云：『伯者，長也。言為諸侯之長。』亦音霸。」諸本俱作「霸」，非趙氏舊矣。

孟子曰：「言無實不祥。不祥之實，蔽賢者當之。」**注**凡言皆有實。孝子之實，養親是也；善之實，仁義是也。祥，善，當，直也。不善之實，何等也？蔽賢之人，直于不善之實也。**疏**注「凡言」至「實也」○正義曰：《說文》言部云：「直言曰言。」《論衡·書說》篇云：「出口為言。言謂言語，言語中有所謂不祥者，恒言也。」《爾雅·釋詁》云：「祥，善也。」《說文》示部云：「祥，福也。」《禮記·中庸》云：「國家將興，必有祿祥。禍福將至，善必先知之。」祥、善、福三字義相近。《章指》以「蒙顯戮」為「不祥」，則以「善」釋「祥」，固以「福」為

「善」也。《呂氏春秋·孟夏紀》云：「必當其位」，注云：「當，直也。」趙氏以「實不祥」三字連屬，謂人每言不祥，不過空泛言之，無有指實其所以不祥之處。試為按之，不祥之實，惟蔽賢者與相直也。蔽賢為不善之實，猶養親為孝之實、仁義為善之實也。

章指：言進賢受上賞，蔽賢蒙顯戮，故謂之「不祥」也。

○正義曰：《漢書·武帝紀》元朔元年詔云：「且進賢受上賞，蔽賢蒙顯戮，古之道也。」亦見《說苑·談叢》篇。①《鶡冠子·道端》篇云：「進賢受上賞，則下不相蔽。」《晏子春秋·諫下》篇云：「國有三不祥：有賢而不知，一不祥；知而不用，二不祥；用而不任，三不祥也。」亦見《說苑·君道》篇。

徐子曰：「仲尼亟稱於水曰：『水哉，水哉！』何取於水也？」**注**徐子，徐辟也。問仲尼何取於水而稱之也？孟子曰：「原泉混混，不舍晝夜，盈科而後進，放乎四海。有本者如

是。是之取爾。**注**言水不舍晝夜而進。盈，滿；科，坎，放，至也。至於四海者，有原本也。以況於事，有本者皆如是。是之取也。**疏**「原泉混混」○正義

曰：阮氏元《校勘記》云：「原泉混混」，閩、監、毛三本同。宋九經本、岳本、咸淳衢州本、廖本、孔本、韓本源作原。原，正字；源，俗字。上文「取之左右逢其原」不從水，可以證從水之誤矣。」段氏玉裁《說文解字注》云：「混，豐流也。盛滿之流也。《孟子》曰『原泉混混』，古音讀如袞，俗字作『滾』。《山海經》曰『其源渾渾泡泡』，郭云：『水漬涌也。』袞、泡二音。渾渾者，假借渾為混也。」王氏念孫《廣雅疏證》云：「司馬相如《上林賦》云『汨乎混流』。重言之則曰混混。《荀子·富國》篇云『財貨渾渾如泉源』，渾與混同。《淮南子·原道訓》云：『混混汨汨。』」○注「盈滿科坎」○正義曰：《說文》皿部云：「盈，滿器也。」王氏念孫《廣雅疏證》云：「科，空也。《史記·張儀傳》『虎賁之士，跼跼科頭』，**集解**云：『科頭謂不著兜鍪入敵也。』亦空之義也。

①「談叢」，原誤作「叢說」，今從沈校據《說苑》改。

②「跼」，原誤作「跼」，今從沈校據《史記》改。

《說文》：「窠，空也。」《孟子·離婁》篇「盈科而後進」，趙岐注云：「科，坎也。」義並相近。」又云：「《釋水》：「飲、窆、科、自，坑也。」《說文》：「阮，虛也。」阮與坑同。坑之言康也，《爾雅》：「康，虛也。」康、坑、飲、科、渠，皆空之轉聲也。《孟子·離婁》篇「原泉盈科而後進」，《盡心》篇「流水之爲物也，不盈科不行」，趙岐注並云：「科，坎也。」《太玄·從》：「次五，從水之科滿」，科亦坎也。范望注以科爲法，失之。」○注「放至」至「取也」○正義曰：《禮記·祭義》云「推而放諸東海而準」，注云：「放猶至也。」「至於四海」即「注諸海」，「入於海」之海。閻氏若璩《釋地》又續云：「胡肫明執《爾雅》「四海」解以解凡云「四海」者，曰：「九夷八狄七戎六蠻謂之四海。古書所稱四海皆以地言，不以水言，故《爾雅》此條繫《釋地》不繫水。」余曾以《書經》質《孟子》「放乎四海」，禹「以四海爲壑」，此得謂不以水言邪？大抵四海之義有二：有宜從《爾雅》解者，「四海遏密八音」是也，有宜從鄭康成《周禮》注「四海猶四方也」解者，如上云「天下慕之」下云「溢乎四海」，上云「中天下而立」下云「定四海之民」，蓋四海即天下字面也。」按：閻氏所云四海之義有二，當一指水一指地。而指地之中又有此二義：一爲《爾雅》所云，一爲鄭氏《周禮》注所云也。況者，比也，譬也。以水之有原本者比事

之有原本者。苟爲無本，七八月之間雨集，溝澮皆盈；其涸也，可立而待也。**注**苟，誠也。誠令無本，若周七八月夏五六月天之大雨，潦水卒集，大溝小澮皆滿。然其涸乾可立待者，以其無本故也。**疏**注「苟誠」至「故也」○正義曰：《論語·里仁》篇云

「苟志於仁矣」，《集解》引孔曰：「苟，誠也。」《禮記·月令》：「季夏之月，水潦盛昌，大雨時行。仲秋之月，水始涸。」是雨集在周八月夏六月也。乃孟秋之月亦備水潦，蓋夏至之後五六月間多大雨者，常也，或秋霖不時而至，亦所當備。孟子奉周朔，舉其常耳。澮大于溝，此言「大溝小澮」，當有誤。程氏瑤田《通藝錄·溝洫疆理小記》云：「《遂人職》云：「凡治野，夫間有遂，遂上有徑。十夫有溝，溝上有畛。百夫有洫，洫上有涂。千夫有澮，澮上有道。萬夫有川，川上有路，以達於畿。」鄭氏注：「以南畝圖之，則遂縱溝橫，洫縱澮橫，九澮而川周其外焉。」按，畝，長畝也。一夫之田，析之百畝以爲百畝。南畝者，自北視之，其畝橫陳於南也。南畝故畝橫，畝流於遂，故遂縱，遂在兩夫之間，故謂之夫間。夫間，東西之間也。其南北之間則溝橫連十夫，故曰十夫有溝，不可謂二十夫之間，故變間言夫也。溝經十夫，

流入于洫，洫之長如溝，縱承十溝，十溝之水皆入焉，故曰百夫有洫也。洫之水入澮，澮長十倍於洫而橫承十洫之分布千夫中者，故曰千夫有澮也。澮十之，橫貫萬夫之中，十澮之水並入於川，故曰萬夫有川，澮橫川自縱也。鄭氏謂「九澮而川周其外」，恐不然矣。川上有路以達於畿，安得有縱路復有橫路邪？其橫者則二萬夫間之道也。澮但言九，亦考之不察矣。「匠人爲溝洫，耜廣五寸，二耜爲耦，一耦之伐，廣尺深尺謂之畎，田首倍之。廣二尺深二尺，謂之遂。九夫爲井，井間廣四尺深四尺，謂之溝。方十里爲成，成間廣八尺深八尺，謂之洫。方百里爲同，同間廣二尋深二仞，謂之澮，專達於川，各載其名。凡天下之地勢，兩山之間必有川焉，大川之上必有涂焉。」按，畎在一夫百畝中，物其土宜而爲之南畝，畎橫順其畝之首尾，以行水入於遂，故遂在田首。井田夫三爲屋，三夫田首同枕一遂。遂在屋間，非夫間也。謂之屋者，三夫相連綿如屋然，但疆之以別夫而已。不若《遂人》夫爲一遂以受畎水，此所以別夫間而言田首也，而鄭氏猶以「遂者夫間小溝」釋之。遂非不在夫間，而記變其文者，蓋自有義，不宜襲用《遂人》之文矣。遂流井外，溝橫承之，井中無溝，溝當兩井之間，故以井間命之。其長連十井，不嫌井間之稱。澮十井之縱者，其縱亦遂之在屋間而

受畎水者也。溝十之，含百井爲一成，十溝之水，咸入於洫，洫縱當兩成之間，故曰成間有洫也。洫之長連十成，亦不嫌成間之稱。澮十成之橫者，其橫亦溝之在井間而受遂水者也。洫十之，含萬井爲一同，十洫之水咸入於澮，澮橫當兩同之間，故曰同間有澮也。澮達於川，川在山間，命之曰兩山之間，以例澮在同間，洫在成間，溝在井間，其事相同，厥名斯稱矣。況夫間爲兩夫之間，人所共知，遙相疏證，辨惑析疑，舊聞舛互，咎安辭哉？是故萬井之田一澮，界兩同之間。萬夫之田十澮，納百洫之水，故一同之澮獨著「專達於川」之文，而萬夫有川，但準溝水十遂之目。形體之端緒不同，標錄自爾殊致矣。賈公彥云：「井田之法，畎縱遂橫，溝縱洫橫，澮縱川橫。」余謂縱橫無定法，視其畝之東南而爲之。如賈說，是東畝法耳。《左傳》晉使齊盡東其畝。以晉伐齊必向東，東畝則川橫而川上路乃可東西行，故曰「惟吾子戎車之利」也。此畎縱爲東畝，畎橫爲南畝之確證，遂人、匠人二法所同者。賈氏不明匠人於遂不命夫間之故而以爲夫間縱者但分其畝而無遂，又不明遂人夫間之遂亦於田首爲之而以爲田首必在百畝之南，故必易其縱橫以通其說。若然，是井田之制必無南畝矣。豈其然乎？而後世解斯記者亦由不明田首之遂不命夫間之故，而以爲與遂人夫間之

遂同其實而橫爲之，於三夫相連之中因置間字之義勿復深考，而強以屋間之遂當井間之溝，以井間之溝當成間之洫，以成間之洫當同間之澮，而以同間之澮當兩山之間之川，而於是專達於川之一澮，不得不十倍增之而又或以爲九矣。神禹之治水也，濬洫澮以入於川，是故水之行於地中也，小大之形三者而已。故制字以象形，一水爲く，即洫，二く爲𡿨，即澮，衆く爲川。及其盡力於溝洫也，則以爲非多其廣狹淺深之等不足以盡疏濬之理而奠萬世農業之安，於是由川而澮，又等而增之而洫而溝而遂，乃以承夫百畝中之洫。夫然後一旦雨集，以大受小，遞相承焉，不崇朝而盡達於川矣。其承洫者名之爲遂，何也？慮其蓄而弗暢也，故遂之。曷爲承之以溝也？一縱一橫，乃見交暢之義。溝，葺也，縱橫之說也。名之曰溝，所以象其形。象形曰溝，會意曰洫。洫字从血，以洫承溝，謂是血脈之流通也。澮，會也。會上衆水，以達於川。初分終合，所以盡水之性情，而不使有汎溢之害也。鄭氏注《小司徒》云：「溝洫爲除水害。」余亦以爲備潦，非備旱也。歲歲治之，務使水之來也，其涸可立待。若以之備旱，則宜豬之不宜溝之，宜蓄之不宜洩之。今之遞廣而遞深也，是溝之法，非豬之法，是洩之非蓄之也。故使溝洫之制存而不壞，豈惟原田之利？農無水潦之患而天下

之川，亦因之而治矣。夫川之淤塞也，有所以淤塞之者也。溝洫不治，則入川之水皆汙濁之渾流，實足以爲川害。然則溝洫不壞，即謂天下之川永無崩決之虞可也。《爾雅·釋詁》云：「涸，竭也。」《章指》以「不竭」爲「有本」，是以「竭」釋「涸」也。《呂氏春秋·慎大》篇云「商涸旱」，高誘注云：「涸，枯也。」《藝文類聚》引《洪範五行傳》云：「旱之言乾。」《廣雅·釋詁》云：「枯，乾也。」枯即枯。乾枯皆燥，水竭故燥也。故聲聞過情，君子耻之。」**注**人無本行，暴得善聲，令聞過其情，若潦水不能久也，故君子耻之。

章指：言有本不竭，無本則涸。虛聲過實，君子耻諸。是以仲尼在川上曰：「逝者如斯。」**疏**「虛聲過實」○正義曰：《禮記·大學》云「無情者不得盡其辭」，注云：「情猶實也。」故此以「過實」爲「過情」。○「是以」至「如斯」○正義曰：《論語·子罕》篇云：「子在川上，曰：『逝者如斯夫，不舍晝夜。』」

孟子曰：「人之所以異於禽獸者幾希。

庶民去之，君子存之。

注幾希，無幾也。知義與

不知義之間耳。衆民去義，君子存義也。

疏注「幾希

無幾也」○正義曰：《告子》篇「其好惡與人相近也者幾希」，

注云：「幾，豈也。豈希，言不遠也。」《盡心》篇「其所以異於

深山之野人者幾希」，注云：「希，遠也。當此之時，舜與野

人相去豈遠？」此兩注互相訓詁。幾通作幾，幾與豈通。

《爾雅·釋詁》云：「幾，汔也。」郭璞注云：「謂相摩近。」《方

言》云：「希，摩也。」《廣雅》希、剗皆訓磨。磨、摩皆通靡。

「幾者動之微」，微、靡義同無。幾、希二字疊韻，幾訓近，希

訓少，無幾即甚近甚少之謂。以希爲遠，則幾爲豈，以幾

爲近，則以希爲少，二義可互明。又「其妻妾不羞也而不相

泣者幾希矣」，注云：「言今苟求富貴，妻妾雖不羞泣者，與

此良人妻妾何異也？」何異猶曰幾何，亦豈遠之意。○注

「知義與不知義之間耳」○正義曰：飲食男女，人有此性，禽

獸亦有此性，未嘗異也。乃人之性善，禽獸之性不善者，人

能知義，禽獸不能知義也。因此心之所知而存之，則異於禽

獸；心雖能知之而舍而去之，則同於禽獸矣。庶民不能自

存，必賴君子教而存之。此孟子道性善之本旨，而趙氏能明

之。趙氏不愧通儒也。舜明於庶物，察於人倫，由

仁義行，非行仁義也。」

注倫，序；察，識也。舜

明庶物之情，識人事之序，仁義生於內，由其中而

行，非彊力行仁義也。故道性善，言必稱堯舜。

疏

注「倫序」至「堯舜」○正義曰：《說文》人部云：「倫，輩也。

一曰道也。」等輩則有類次，故趙氏以「序」釋「倫」。《儀禮·

既夕記》云「倫如朝服」，《禮記·中庸》云「毛猶有倫」，注並

云：「倫，比也。」顏師古《匡謬正俗》云：「序，比也。」倫、比、

序，義亦同也。「一曰道」，則人倫即是人道。《論語·微子》

篇云：「而亂大倫」，《集解》引包曰：「倫，道理也。」則人倫

又即人理。《楚辭·懷沙》云「孰察其撥正」王逸注：《呂氏春

秋·功名》篇云「不可不察」高誘注，皆云：「察，知也。」知即

識也，庶物即禽獸也。「明於庶物」，知禽獸之性情不可教之

使知仁義也。同此飲食男女，人有知則有倫理次序。「察於

人倫」，知人可教之使知仁義也。舜，君子也。庶民不能明

於庶物，察於人倫，故去之；舜能明於庶物，察於人倫，故存

之。性本知有仁義，因而存之，是由本知之仁義行也；若禽

獸性本不知有仁義，而彊之行仁行義，則教固必不能行，威

亦必不能制。故庶民不知仁義者，君子教之使知，則庶民亦

能知仁義，庶民知仁義而行之，亦是由仁義行，非彊之以所

本不能知而使之行仁義也。此庶民所以異於庶物也。明庶物、察人倫，始於伏羲氏。其時民全不知有人倫之序，同於禽獸，直可謂之昧，不可謂之去。人道既定，庶民雖愚，皆知有人倫矣，故其不仁義也，非昧也，是去之也。舜明之察之，通變神化，使之由仁義行，由即「民可使由之」之由。是時民皆知有仁義而莫不曰行仁，莫不曰行義，以仁濟其不仁，以義濟其不義。蓋行仁義正所以去仁義也，由仁義行則百姓日用而不知，乃正所以存仁義也。此孟子所以不稱伏羲氏而稱堯舜也。

章指：言人與禽獸，俱含天氣，就利避害，其間不希。衆人皆然，君子則否。聖人超絕，識仁義之生於己也。**疏**「人與」至

「不希」○正義曰：《白虎通·禮樂》篇云：「人無不含天地之氣，有五常之性者。」《漢書·匈奴傳》孝文後二年遣匈奴書云：「下及魚鼈，上及飛鳥，跂行喙息蠕動之類，莫不就安利避危殆。」

孟子曰：「禹惡旨酒而好善言。」**注**旨酒，美酒也。儀狄作酒，禹飲而甘之，遂疏儀狄而絕旨

酒。《書》曰「禹拜讜言」。**疏**注「旨酒」至「讜言」○正義曰：《戰國策·魏策》云：「梁王魏嬰觴諸侯於范臺，酒酣，請魯君舉觴，魯君興，避席擇言曰：『昔者帝女令儀狄作酒而美，進之禹，禹飲而甘之，遂疏儀狄，絕旨酒，曰：後世必有以酒亡其國者。』」引《書》詳見《公孫丑》篇。

湯執中，立賢無方。**注**執中正之道，惟賢速立之，不問其從何方來。舉伊尹以爲相也。**疏**注「執中」至「相也」○正義曰：《禮記·檀弓》云「左右就養無方」，《內則》云「博學無方」，注皆云：「方，常也。」《荀子·臣道》篇云：「應卒遇變，齊給如響，推類接譽，以待無方，曲成制象，是聖臣者也。」注云：「齊，疾也。應事而至謂之給。夫卒變，人所遲疑，今聖臣應之疾速如響之應聲。無方，無常也。待之無常，謂不滯於一隅也。」此以無常爲不滯於一隅，則兼方所之義言之。《論語·八佾》篇云：「父母在，不遠遊，遊必有方。」此方固指方所，而鄭氏亦訓爲「有常」。趙氏以「無方」爲「不問其從何方來」，是以方爲「方所」之方。云「惟賢速立之」，即《荀子》「應卒遇變，齊給如響」之謂，是兼以無方爲無常矣。蓋執中無權猶執一之害道，惟賢則立而無常法，乃申上執中之有權，「無方」當如鄭氏注之爲「無常」也。《史記·

殷本紀云：「伊尹欲干湯而無由，乃爲有莘氏媵臣，負鼎俎以滋味悅湯，致於王道。」趙氏引伊尹，似謂自媵臣保伍中升之，仍無常之謂也。《越絕書·外傳·枕中》篇云：「湯執其中和，舉伊尹，收天下雄雋之士。」此即本孟子此言而衍之。以執中爲「執中和」，以無方爲「收天下雄雋之士」，亦以無方所言，與趙氏同。文王視民如傷，望道而未之見。

注視民如傷者，雍容不動擾也。望道而未至，殷錄未盡，尚有賢臣，道未得至，故望而不致誅於紂也。

疏注「視民」至「擾也」○正義曰：周氏廣業《孟子章指攷證》云：「《左傳》逢滑曰：『臣聞國之興也，視民如傷，是其福也。』杜注：『如傷，恐驚動。』與趙注「雍容不動擾也」正合。」按：《呂氏春秋·分職》篇云「天寒起役恐傷民」，注云：「傷，病也。」文王視民如有疾病，凡有疾病之人不可動擾，故「如傷」爲「不動擾」，因不動擾，故「雍容」不急迫也。

○注「望道」至「紂也」○正義曰：《漢書·司馬相如傳》《子虛賦》云「先生又見客」，顏師古注云：「見猶至也。」《白虎通》歷述帝王之號，自伏羲定人道，祝融屬續三皇之道，顓頊專正天人之道，舜能推信堯道。夏者，大也，明當守持大道，殷者，中也，明當爲中和之道也；周者，至也，密也，道

德周密，無所不至也。又云：「王者受命，質家言天命已，使已誅無道。」趙氏之意謂紂無道，誅之所以致道。文王三分天下有其二以服事殷，故望道而未至。道即命也，天命已在文王而不代殷有天下也。近時通解有二：一謂文王以紂在上，望天下有治道而未之見，此仍趙氏義而稍變者也；一讀「而」爲「如」，謂文王愛民無已，未傷如傷，望道心切，見如未見也。武王不泄邇，不忘遠。**注**泄，狎，邇，近也。不泄狎近賢，不遺忘遠善。近謂朝臣，遠謂諸侯也。

疏注「泄狎」至「侯也」○正義曰：《方言》云：「媼，狎也。」《說文》女部云：「媼，嬪也。」《荀子·榮辱》篇云：「媼泄者，人之殃也。」注云：「泄與媼同。」泄本發洩之洩，通於媼，故以「狎」釋之也。「邇近」，《爾雅·釋詁》文。《說文》走部云：「遺，亡也。」心部云：「忘，不識也。」《詩·邶風·綠衣》「曷維其亡」，箋云：「亡之言忘也。」是「忘」即「遺亡」也。武王以太公望爲師，周公旦爲輔，召公、畢公之徒左右

王師，脩文王緒業。《說苑》載其問太公，《賈子新書》載其問王子旦，問粥子，《管子》載其問癸度，觀兵孟津，自稱太子發，言奉文王以伐，不敢自專，乃告司馬、司徒、司空諸節齊栗，此皆「不泄邇」之事也。是「邇」謂朝臣也。《牧誓》告「友

邦冢君，及庸、蜀、雋、微、盧、彭、濮人」，《大傳》言「牧野既事而退，柴于上帝，祈于社稷，奠于牧室，率天下諸侯執豆籩，駿奔走」，《史記》言「封諸侯，班賜宗彝，作分殷之器物，封先聖王之後，封功臣謀士」，此皆「不忘遠」之事也。是「遠」謂諸侯也。周公思兼三王以施四事。其有不合者，仰而思之，夜以繼日；幸而得之，坐以待旦。」**注**三王，三代之王也；四事，禹湯文武所行事也。不合，已行有不合也。仰而思之，參諸天也。坐以待旦，言欲急施之也。

疏「周公」至「待旦」○

正義曰：細審此章之指，云「兼三王」，明三王不相沿襲可知也；云「其有不合，仰而思之」，則所以通變神化可知也。禹承堯舜之後，天下乂安，則易生驕佚，故惡旨酒，好善言，以通其變；夏之末，必各執偏意而用人拘以資格，故湯執中，立賢無方，以通其變；商紂之初，民傷已極而天眷未更，故文王但愛民以輔救之，守臣節以帥天下諸侯，則所以通其變於湯之放桀也；武王時，紂益無道，故不泄邇，不忘遠，修己以安天下，則所以通其變於文王之服事也。凡三王之事，皆各有合。至周公相成王，成文武之德，其時又異於禹湯文王之時，則所以合不合者，非思莫得也。三王四事，先王之法

也。有不合則思，所爲以道揆也。堯舜以通變神化治天下，爲萬世法。孟子歷述禹湯文武周公以明之，皆法堯舜之變通神化者也。江氏聲《尚書集注音疏》云：「《孟子》：『周公思兼三王，以施四事』，伏生《大傳》則云『周公兼思三王之道以施於春秋冬夏』，据此，則《孟子》所言三王謂天地人三統，四事謂四時之事。是則帝王出政必參乎三才，合乎四時。」按：參三才合四時，亦損益通變之義。○注「已行有不合也」○正義曰：阮氏元《校勘記》云：「『已行有不合世』，岳本、廖本、孔本、《攷文》古本同。閩、監、毛三本世作者，韓本作『也』。韓本是也。」○注「仰而思之參諸天也」○正義曰：《易·繫辭傳》云「仰則觀象於天」，《詩·大雅·雲漢》云「瞻仰昊天」，《列子·黃帝篇》云「中道仰天而歎」，故以「仰」爲「參諸天」。按：自下望上爲仰，自後觀前亦爲仰，此仰思蓋即謂仰舉三王之事而思其合也。

章指：言周公能思三王之道以輔成王太平之隆。禮樂之備，蓋由此也。

孟子曰：「王者之迹熄而《詩》亡，《詩》亡然後《春秋》作。」**注**王者，謂聖王也。太平道

衰，王迹止熄，頌聲不作，故《詩》亡。《春秋》撥亂，作於衰世也。

疏「王者」至「秋作」○正義曰：顧氏棟高《春秋大事表·王迹拾遺序》云：「孟子曰：『王者之迹熄而《詩》亡，《詩》亡然後《春秋》作。』」東遷以後，政教號令不行於天下，然當春秋初年，聲靈猶未盡泯也。鄭伯、虢公爲王左右卿士，鄭據虎牢之險，號有桃林之塞，左提右挈，儼然三輔雄封。其時賦車萬乘，諸侯猶得假王號令以征伐與國，故鄭以王師伐邾，秦偕王師伐魏。二邾本附庸也，進爵而爲子，滕、薛、杞本列侯也，降爵而爲子伯。列國之卿猶請命於天子，諸侯之妾猶不敢僭同於夫人。虎牢已兼并於鄭，仍奪之還王朝，曲沃以支子篡宗，赫然興師而致討。衛朔逆命，子突救衛書「王人」，樊皮叛王，虢公奉命誅不服；庶幾得命德討罪，興滅繼絕之義。然鄭以懿親，而且交質矣。曲沃之伐，不惟無功，日後苟賈且爲晉所滅。甚至射王中肩，列國無爲王敵愾者。而僖王之子，命曲沃爲晉侯，貪寵賂，獎篡弑，三綱盡矣。嗣後王室益微，迨至晉滅虢而襄王復以溫、原賜晉，舉崤函之險固、河內之殷實，悉舉而畀諸他人，自是王朝不復能出一旅，與初年聲勢大異矣。以文武成康維持鞏固之天下而陵夷衰微至此，豈一朝一夕之故哉？惠、襄

以後，世有兄弟之難，子頹、子帶、子朝迭亂王室，數數勤諸侯之師，蓋齊家之道有闕，政本不脩，皇綱陵遲，君子閔焉。獨能憑藉先靈，稱述祖制，折服強暴，若襄王拒請隧，定王詰鞏伯，而王孫滿以片言却強楚於近郊之外，譬之以太阿授人而欲以朽索控踞蹠之馬，嗚乎其難哉！「楊氏椿《與顧棟高書》云：『竊嘗論《春秋》家之弊在於賤霸，謂《春秋》專治桓、文之罪。桓、文時天命未改，周室已衰，陵夷至於敬王然後王迹熄者，桓、文之力也，故孔子仁管仲而正齊桓。孟子生戰國，王者之不作已久，生民之憔悴已甚，齊宣有其地有其民而不行王政，僅僅以桓、文爲問，故孟子斥之爲不足道耳。要之，桓、文正未可輕貶者也。』」孟子曰：「王者之迹熄而《詩》亡，《詩》亡然後《春秋》作，其事則齊桓晉文。」蓋自隱五年王師伐翼伐曲沃至莊六年救衛，未嘗無征伐之事，而是非倒置，喜怒失常，故號令不行，每戰輒敗。莊十四年諸侯伐宋，齊桓請師於周，單伯會之，取成於宋而還。自是大盟會大征伐必皆請王人主之，諸侯亦遂無敢抗者。定四年劉子會召陵而後，成桓公之會侵鄭，單平公之會黃池，皆不復見於經，蓋霸者之事即王者之迹，霸者亡而王迹熄矣。」顧氏鎮《虞東學詩·迹熄詩亡說》云：「《孟子》歷敘羣聖之事而以孔子作《春秋》繼之。迹熄《詩》亡，著明所以作《春秋》之義。

蓋自鄭康成有「不能復雅」之云，而范甯序《穀梁》遂謂「列《黍離》於《國風》，齊王德於邦君」。然考趙岐注《孟子》，則曰「太平道衰，王迹止熄，頌聲不作，故《詩》亡」。是漢儒原立兩義，後世鄭學盛行，遂遺趙說。李迂仲兼而存之，古義略具。愚竊以爲所欲究者，王迹耳，王者之迹何預於《詩》？《春秋》之作何預於迹？此義不明，則不獨《黍離》降風，支離莫據，即迂仲諸說亦可存而不論。蓋王者之政莫大於巡守述職。巡守則天子采風，述職則諸侯貢俗。太史陳之以考其得失，而慶讓行焉，所謂迹也。夷、厲以來，雖經《板》《蕩》，而《甫田》《東狩》爲帑來同，撻伐震於徐方，疆理及乎南海，中興之迹爛然著明，二《雅》之篇可考焉。洎乎東遷而天子不省方，諸侯不入覲，慶讓不行而陳《詩》之典廢，所謂「迹熄而《詩》亡」也。孔子傷之，不得已而托《春秋》以彰衰鉞，所以存王迹于筆削之文，而非進《春秋》於《風》《雅》之後。《詩》者，《風》《雅》《頌》之總名，無容舉彼遺此。若疑《國風》多錄東周，《魯頌》亦當僖世，則愚謂《詩》之存亡繫於王迹之熄與不熄，不繫於本書之有與無也。」趙氏佑《溫故錄》云：「注『太平道衰，王迹止熄，頌聲不作，故《詩》亡』，不用雅亡

風降之說，獨爲正大，而向來罕述之者。」晉之《乘》、楚之《檮杌》、魯之《春秋》，一也。其事則齊桓、晉文，其文則史，孔子曰：「其義，則丘竊取之矣。」**注**此三大國史記之名異。《乘》者，興於田賦乘馬之事，因以爲名。《檮杌》者，鬻凶之類，興於記惡之戒，因以爲名。《春秋》，以二始舉四時，記萬事之名。其事，則五伯所理也。桓、文，五伯之盛者，故舉之。其文，史記之文也。孔子自謂竊取之，以爲素王也。孔子人臣，不受君命，私作之，故言竊，亦聖人之謙辭。**疏**「晉之」至「之矣」○正義曰：萬氏斯大《學春秋隨筆》云：「《春秋》書弑君、誅亂賊也，然而趙盾、崔杼之事，時史亦直載其名，安見亂賊之懼獨在《春秋》而不在諸史？曰：孟子言之矣。《春秋》之文則史也，其義則孔子取之。諸史無義而《春秋》有義也。義有變有因。不修《春秋》曰「雨星不及地尺而復」，君子脩之曰「星實如雨」。諸侯之策曰「孫林父、甯殖出其君」，《春秋》書之曰「衛侯衎出奔」。此以變爲義者也。晉史書曰「趙盾弑其君」，《春秋》亦曰「趙盾弑其君」。齊史書曰「崔杼弑其君」，《春秋》亦曰

「崔杼弑其君」。此以因為義者也。因與變相參，斯有美必著，無惡不顯，三綱以明，人道斯立，《春秋》之義遂與天地同功。彼董狐、南史、左氏傳《春秋》而獲存，晉《乘》、楚《檮杌》，孟子論《春秋》而幸及。當時則書，久則亡焉。懼在《春秋》而不在諸史，有由然也。雖然，以盾、杼之姦惡，齊晉得以名赴，《春秋》得以名書，賴史官之直筆也。使晉、宋、吳、莒之弑逆得董狐、南史其人，則書必以名，赴必以實，鮑與庚與必不書人書偃，僕、光必不稱國，良史又曷可少哉？」按：昭公十二年《公羊傳》引孔子之言云：「《春秋》之信史也，其序則齊桓、晉文，其會則主會者為之也，其詞則某有罪焉爾。」此與孟子所述略同。其云「有罪」者，則括「知我罪我」之言。何休注云：「其貶絕譏刺之辭有所失者，是丘之罪。」與趙氏注「罪我」為「時人見彈貶者」義同。公羊氏以此當「其義」，則義指貶刺撥亂可知。孟子述孔子之言，特指出「義」字。義者，宜也。舜之所察，周公之所思，皆此義。利者，義之和，變而通之以盡利，察於民之故乃能變通，即舜之「察於人倫」也。天下何思何慮？天下同歸而殊途，百致而一慮。精義入神以致用，即周公之「思兼三王」也。舜察之，故由仁義行而不行仁義，周公思之，故知其有不合而兼三王。孔子當迹熄《詩》亡之後，作《春秋》以撥亂反正，亦由察

之思之而知其義也。舜以王，周公以相，所變通在行在施，孔子不得位，所變通在言，亦變通趨時之妙也。○注「此三」至「謙辭」①○正義曰：杜預《春秋序》云：「《春秋》者，魯史記之名也。記事者以事繫日，以日繫月，以月繫時，以時繫年，所以紀遠近，別同異也。故史之所記，必表年以首事，年有四時，故錯舉以為所記之名也。」孔氏正義云：「昭二年韓起聘魯，稱見魯《春秋》。《外傳·晉語》司馬侯對晉悼公云：「羊舌肸習於《春秋》。《楚語》申叔時論傳太子之法云：「教之以《春秋》。《禮·坊記》曰：「《魯春秋》記晉喪曰：殺其君之子奚齊。」又《經解》曰：「屬辭比事，《春秋》教也。」凡此諸文所說皆在孔子之前，則知未脩之前，舊有《春秋》之目。據周世法則，每國有史記，當同名《春秋》。」按：《墨子》書稱「吾見百國《春秋》」，又云「著在周之《春秋》」、「著在燕之《春秋》」、「著在宋之《春秋》」、「著在齊之《春秋》」，則孔氏以為「同名《春秋》」，似矣。乃孟子於晉楚明舉《乘》、《檮杌》兩名，故趙氏以為「三大國史記之名異」。孔氏《春秋正義》又云：「《春秋》是其大名，晉楚私立別號魯無別

① 「辭」下，原有「爾」字，合於宋十行、閩、監、毛等本，今據本書及阮校所述廖、孔、韓等本注文改。

號，故守其本名。」是也。乘是兵車之名，《管子》書亦有《乘馬》、《臣乘馬》、《乘馬數》、《問乘馬》等篇，本以一乘四馬，廣及陰陽地里農耕國策之事。晉史之名《乘》，或亦同之。興于此，謂作于此也。文公十八年《左傳》云：「顓頊有不才子，不可教訓，不知話言，舍之則鬻，傲很明德，以亂天常。天下之民謂之檮杌。」賈逵注云：「檮杌，凶頑無儔匹之貌。」是「檮杌」為「鬻凶之類」。史記以《檮杌》名，亦鑄鼎象物，使民知神姦之例，故云「興於記惡之戒」。《說文》木部作「枹杌」，云：「斷木也。」引《春秋傳》。《國語·周語》云「商之興也，檮杌次於丕山」，注云：「檮杌，鯀也。」服虔引《神異經》云：「檮杌，狀似虎，毫長二尺，人面虎足猪牙，尾長丈八尺，能鬪不退。」《音義》云：「乘，丁音剩，云《晉名》《春秋》為《乘》者，取其善惡無不載。檮杌，惡獸名也。楚謂《春秋》為《檮杌》者，在記惡而興善也。」惡獸本服虔，假獸之惡、人之惡為戒，其義亦同。惟檮杌皆從木，則為斷木之定名。《說文》頁部云：「頑，櫛頭也。」木部云：「櫛，桤木未析也。」「桤，櫛木薪也。」「析，破木也。」按：薪有析者有不析者。其未析者名桤，即名櫛。縱破為析，橫斷為檮杌，斷而未析其頭則名頑。是檮杌即頑之名。因其頑，假斷木之名以名之，為檮杌，亦戒惡之意也。孔氏《春秋正義》云：「年有四時，

不可徧舉四字以為書號，故交錯互舉，取春、秋二字以為所記之名。春先於夏，秋先於冬，舉先可以及後，言春足以見冬，故舉二字以包四時也。四時之內，一切萬物生植孕育盡在其中，《春秋》之書，無物不包，無物不記。賈逵云：「取法陰陽之中，春為陽中，萬物以生；秋為陰中，萬物以成。」賀道養云：「春貴陽之始，秋取陰之初。」趙氏言「二始舉四時」，二始即春為陽始，秋為陰始。舉謂包舉，即舉春秋以包冬夏也。「記萬事之名」，即所謂「無物不記」也。董仲舒《對策》云：「孔子作《春秋》，先正王而繫萬事，見素王之文焉。」趙氏名「記萬事之名」，①「以為素王」，亦本此為說也。素王詳見《滕文公》篇。《呂氏春秋·知士》篇云「孟嘗君竊以諫靜郭君」，高誘注云：「竊，私也。」故以「竊取」為「私作」。何休以孔子稱有罪為「聖人德盛尚謙，故自名」。《論語·述而》篇言「竊比於我老彭」，亦自謙之辭。此云「丘竊取之」，既自名又稱竊，故云「亦聖人之謙辭」也。

章指：言《詩》可以言，頌詠太平。時無所詠，《春秋》乃興。假史記之文，孔子

① 上「名」字，據文意疑當作「云」或「曰」。

正之以匡邪也。**疏**「詩可以言頌詠太平」○正義

曰：《毛詩序》云：「發言爲詩。」又云：「《維天之命》，太平告文王也。」宣公十五年《公羊傳》云：「什一行而頌聲作矣。」注云：「頌聲者，太平歌頌之聲，帝王之高致也。」

孟子曰：「君子之澤，五世而斬；小人之澤，五世而斬。」**注**澤者，滋潤之澤。大德大凶，流

及後世，自高祖至玄孫，善惡之氣乃斷，故曰五世而斬。**疏**注「澤者」至「而斬」○正義曰：《說文》水部云：

「澤，光潤也。」《毛詩·小雅·節南山》「國既卒斬」，傳云：

「斬，斷也。」趙氏以君子爲大德，小人爲大凶，其善惡之氣流于後世，猶水之潤澤。近時通解以君子爲聖賢在位者，小人爲聖賢不在位者。予未得爲孔子徒也，予私淑諸

人也。**注**予，我也。我未得爲孔子門徒也。淑，善

也。我私善之於賢人耳。蓋恨其不得學於大聖也。

疏注「予我」至「人也」○正義曰：「予，我」、「淑，善」，皆《爾雅·釋詁》文。江氏永《羣經補義》云：「孟子言予私淑諸

人，人謂子思之徒。是孟子與子思年不相接。《孔叢子》有

孟子、子思問答語，不足信。」

章指：言五世一體，上下通流。君子

小人，斬各有時。企以高山，跌以陷汙。是以孟子恨不及乎仲尼也。**疏**「跌以陷汙」○

正義曰：《方言》云：「跌，蹷也。」《漢書·晁錯傳》云：「跌而不振」，注云：「跌，足失據也。」又《楊雄傳》《解嘲》云：「不知一跌將赤吾之族也」，注云：「跌，足失厝也。」

孫授易授詩校字

孟子正義卷十六終

孟子正義卷十七

江都縣鄉貢士焦循撰集

孟子曰：「可以取，可以無取，取傷廉；

可以與，可以無與，與傷惠；可以死，可以無死，死傷勇。」**注**三者皆謂事可出入，不至違義。

但傷此名，亦不陷於惡也。**疏**注「三者」至「惡也」○正義曰：趙氏以「出」解「無取」、「無與」、「無死」，以「入」解「取」、「與」、「死」。一事可出可入，謂取可，無取亦可，是事

之兩可者也。既可取、可與、可死，故取、與、死亦非惡。但既可以無取，可以無與，可以無死，故取、與、死則傷廉、惠、勇之名。可以取，可以無取，取則傷廉之名，此廉士所知也，亦人所共知也。若可以與，可以無與，則忠厚長者豈不必以必與爲惠乎？若可以死，可以無死，則忠臣烈士豈不以必死爲勇乎？而不知其傷惠、傷勇正與傷廉者同。傷廉不得名

爲廉也，傷惠、傷勇不得名爲惠、名爲勇也。《說苑·權謀》篇引楊子曰：「事之可以之貧可以之富者，其傷行者也，事之可以之生可以之死，其傷勇者也。」趙氏之義本此。毛氏奇齡《聖門釋非錄》云：「金仁山謂：此必戰國之世，豪俠之習勝，多輕施結客若四豪之類，刺客輕生若荆、聶之類，故孟子爲當時戒耳。」

章指：言廉勇惠，人之高行也。喪此三名，列士病諸。故設斯科以進能者也。

疏「列士病諸」○正義曰：韓本、《攷文》占本作「列」，孔本作「則列」是也。《周髀算經》云：「此列士之遇智。」《說苑·臣術》篇云：「列士者，所以參大夫也。」劉向有《列士傳》三卷，見《隋書·經籍志》。

逢蒙學射於羿，盡羿之道，思天下惟羿爲愈已，於是殺羿。**注**羿，有窮后羿；逢蒙，羿之家衆也。《春秋傳》曰：「羿將歸自田，家衆殺

①「裨」，原誤作「裨」，今據原書名改。

之。」疏注「羿有」至「殺之」○正義曰：襄公四年《左傳》魏莊子云「夏訓有之曰有窮后羿」，注云：「有窮，國名。后，君也。羿，有窮君之號。」孔氏正義云：「羿居窮石之地，故以窮爲國號，以『有』配之，猶言有周、有夏也。」古司射之官多名羿，故趙氏明此羿爲有窮后羿，非他司射者也。引《春秋傳》即襄公四年《左傳》。《傳》云：「將歸自田，家衆殺而享之，以食其子。」《楚辭·離騷》云：「羿淫遊以佚田兮，又好射夫封狐。國亂流其鮮終兮，浞又貪夫厥家。」注云：「浞，寒浞，羿相也。言羿因夏衰亂，代之爲政。娛樂田獵，不恤民事，信任寒浞，使爲國相。浞行媚於內，施賂於外，樹之詐慝而專其權勢。羿田將歸，使家臣逢蒙射而殺之。」是《左傳》所云家衆即逢蒙，《左傳》不詳言其姓名。孔氏正義云：「家衆謂羿之家衆人，反羿而從浞，爲浞殺羿也。」《史記·龜策傳》云「羿名善射，不如雄渠逢蒙」，《集解》云：「《淮南子》曰：『射者重以逢蒙門子之巧。』」劉歆《七略》有《逢蒙射法》。《荀子·王霸》篇云：「羿、逢蒙者，善服射者也。」注云：「逢蒙即逢蒙，學射於羿。」《呂氏春秋·具備》篇云：「今有羿、逢蒙，繁弱於此而無弦，則必不能中也。」高誘注云：「羿，夏之諸侯，有窮之君也。善射，百發百中。逢蒙，羿弟子也，亦能百中。」《淮南子·原道訓》云「重之羿、逢蒙

子之巧」，高誘注云：「羿，古諸侯有窮之君也。逢蒙，羿弟子。皆攻射而百發百中。」蓋蒙、門一音之轉，蒙即門。裴駟引此作「逢蒙門子」，衍一門字也。《列子·湯問》篇云：「甘蠅，古之善射者，設弓而獸伏鳥下。弟子名飛衛，學射於甘蠅而巧過其師。紀昌者又學射於飛衛。紀昌既盡衛之術，計天下之敵己者一人而已，乃謀殺飛衛。」《呂氏春秋·聽言》篇云：「逢蒙始習於甘蠅。」與《孟子》所述事近而異。孟子曰：「是亦羿有罪焉。」注罪羿不擇人也，故以下事喻之。公明儀曰：「宜若無罪焉。」曰：「薄乎云爾，惡得無罪？鄭人使子濯孺子侵衛，衛使庾公之斯追之。子濯孺子曰：『今日我疾作，不可以執弓。吾死矣夫！』」注孺子，鄭大夫；庾公，衛大夫。疾作，瘡疾。疏注「孺子」至「瘡疾」○正義曰：孺子爲鄭人所使，故知是鄭大夫，庾公爲衛人所使，故知爲衛大夫。襄公十四年《左傳》云：「衛公出奔齊，孫氏追之。初，尹公佗學射於庾公差，庾公差學射於公孫丁。二子追公，公孫丁御公。子魚曰：『射爲背師，不射爲戮。射爲禮乎？』」射兩鞬而還。尹公佗曰：「子爲師，我則遠矣。」公孫丁授公轡而射之，貫臂。」注云：「子

魚，庾公差。」孔氏正義云：「《孟子》云云，其姓名與此略同，行義與此正反，不應一人之身有此二行。孟子辨士之說，或當假爲之辭，此傳應是實也。」毛氏奇齡《四書臆言》云：「鄭人使子濯孺子侵衛事，《左傳》是孫林父追衛獻公事，非鄭侵衛而衛使追也。且是尹公佗學射於庾公差，非庾公差學射於尹公佗，其中或射或不射，即此事而不甚合。大抵春秋戰國間，其記事不同多類此。」按此知孟子未見《左傳》，則《左傳》固晚出之書也。「趙氏佑《溫故錄》云：「古說有難盡解者，孺子『今日我疾作』，注何必知是瘧疾？殆以言今則有昨，言作則有止，疾之以日作止者，瘧是也。然疾儘有偶然一作與年月一作、多日不作而作者，安必其獨瘧乎？」按：《書·金縢》：「王有疾弗瘳，史乃祝冊曰：惟爾元孫某，遭厲虐疾。」某氏傳云：「虐，暴也。」周氏用錫《尚書證義》云：「厲，作也。虐，古瘧省。《月令》『民多瘧疾』，《月令》在孟秋，注云：『瘧疾，寒熱所爲者。』今《月令》瘧疾爲『厲疫』，蓋瘧疾寒熱暴至，故名瘧。諸凡暴至之疾均可謂之虐，昭公十九年《左傳》『許悼公瘧』，此瘧亦是暴至之疾，與武王之『遭虐疾』正同。」孺子若素有恒疾，則知其期，不當使來侵鄭。突然疾作，知是暴疾，故以「虐疾」明之耳。瘧即虐也。問

其僕曰：「追我者，誰也？」其僕曰：「庾公之斯也。」曰：「吾生矣。」**注**僕，御也。孺子曰：「吾必生矣。」**疏**注「僕御也」○正義曰：《毛詩·小雅·出車》「召彼僕夫」，傳云：「僕夫，御夫也。」《文選·思立賦》云「僕夫儼其正策兮」，舊注云：「僕夫謂御車人也。」其僕曰：「庾公之斯，衛之善射者也。夫子曰吾生，何謂也？」曰：「庾公之斯學射於尹公之他，尹公之他學射於我。夫尹公之他，端人也，其取友必端矣。」**注**端人，用心不邪辟。知我是其道本所出，必不害我也。**疏**注「知我是其道本所出」○正

義曰：《莊子·庚桑楚》云「出無本」，郭象注云：「欸然自生非有本。」**①**《釋文》云：「出，生也。本，始也。」董子《對策》云：「道之大原出於天，天不變，道亦不變。是以禹繼舜，舜繼堯，三聖相受而守一道。」原即本也。凡授受相承皆有其始，故斯學於他，他學於孺子，爲其所出之本始也。庾公之斯至，曰：「夫子何爲不執弓？」曰：「今日

①「非有」，原誤作「無無」，今從沈校據《莊子》郭注改。

我疾作，不可以執弓。」曰：「小人學射於尹公之他，尹公之他學射於夫子。我不忍以夫子之道反害夫子。雖然，今日之事，君事也。我不敢廢。」抽矢叩輪，去其金，發乘矢而後反。」**注**庚公之斯至，竟如孺子之所言。而曰：我不敢廢君事。故叩輪去鏃，使不害人，乃以射孺子。禮，射四發而去。乘，四也。《詩》云：「四矢反兮。」孟子言是以明羿之罪。假使如子濯孺子之得尹公之他而教之，何由有逢蒙之禍？

疏注「禮射」至「反

兮」○正義曰：《毛詩·齊風·猗嗟》云：「四矢反兮，以禦亂兮。」傳云：「四矢，乘矢。」箋云：「反，復也。禮，射三而止，每射四矢，皆得其故處，此之謂復射。必四矢者，象其能禦四方之亂也。」發乘矢而後反，反是還歸，庚斯發四矢而還歸於衛，不追孺子，故趙氏以「去」解之。云「禮射四發而去」，謂既去矢鏃，乃以禮射四發其矢而歸去。引《詩》以證四發為禮射。至《詩》之「反」，謂反覆其正鵠之故處，與反去不同。趙氏引之，非以《詩》之反即庚公之發四矢而反也。《儀禮·大射儀》云「司馬師坐乘之」，注云：「乘，四四數

之。《聘禮》云「乘皮設」，注云：「物四曰乘。」《禮記·少儀》云「其以乘壺酒」，注云：「乘壺，四壺也。」《方言》云：「四雁曰乘。」凡四皆為乘，是「乘」為「四」也。

章指：言求交取友，必得其人。得善以全，善凶獲患。是故子濯濟難，夷羿以殘，可以鑒也。

孟子曰：「西子蒙不潔，則人皆掩鼻而過之。」**注**西子，古之好女西施也。蒙不潔，以不潔汗巾帽而蒙其頭也。面雖好，以蒙不潔，人過之者，皆掩鼻懼聞其臭。

疏注「西子古之好女西施也」○正義

曰：《管子·小稱》篇云：「毛嬙、西施，天下之美人也。盛怨氣於面，不能以為可好。」西施見《管子》，故趙氏以為「古之好女」也。周氏柄中《辨正》云：「西子即西施。張邦基《墨莊漫錄》云：『管仲在滅吳前二百餘年而其書已云西施，豈越之西施冒古之美人以為名邪？』按，傳玄謂《管子》書過

半是後人好事者所加，其稱引西施或是後人附益。^①然《莊子》「厲與西施」，司馬彪注云：「夏姬。」夫越女名西施，夏姬亦稱西施，則又似古有此美人而後世相因，借以相美，如善射者皆稱羿之類。」○注「蒙不」至「其臭」○正義曰：賈誼《新書·勸學》篇云：「夫以西施之美而蒙不潔，則過之者莫不睨而擗鼻。今以二三子材而蒙愚惑之智，予恐過之有掩鼻之客也。」《淮南子·脩務訓》云：「今夫毛嬙、西施，天下之美人，若使之銜腐鼠，蒙蜩皮，衣豹裘，帶死蛇，則布衣韋帶之人過者莫不左右睨而掩鼻。」此本《孟子》而衍之。高誘注云：「雖有美姿，人惡聞其臭，故睨睨掩其鼻。」孟子曰：「西子蒙不潔，則人皆掩鼻而過之。」是也。」趙氏言「汗巾帽蒙其頭」，亦本《淮南》為說。《周禮·夏官·方相氏》「掌蒙熊皮」，注云：「蒙，冒也。」《說文》曰部云：「冒，蒙而前也。」《考工記·輶人》「凡冒鼓」，注云：「冒，蒙鼓以革。」劉熙《釋名·釋首飾》云：「帽，冒也。」《漢書·雋不疑傳》「著黃冒」，注云：「冒，所以覆冒其首。」是蒙為冒，而冒即帽，故以「巾帽」釋「蒙」字也。雖有惡人，齋戒沐浴，則可以祀上帝。^②注惡人，醜類者也。面雖醜，而齋戒沐浴，自治潔淨，可以待上帝之祀。言人當自

治以仁義，乃為善也。^③疏注「惡人醜類者也」○正義曰：《書·洪範》六極「五曰惡」，鄭氏注云：「惡，貌不恭之罰。貌恭則容儼形美而成性以終其命，容毀故致惡也。」《莊子·德充符》云「衛有惡人焉曰哀駘它」，郭象注云：「惡，醜也。」《釋文》引李云：「哀駘，醜貌。它，其名。」《呂氏春秋·去尤》篇云：「魯有惡者，其父出而見商咄，反而告其鄰曰：「商咄不若吾子矣。」且其子至惡也，商咄至美也。」高誘注云：「惡，醜也。」昭公二十八年《左傳》云「驪蔑惡」，又云「昔賈大夫惡」，皆指貌醜。此「惡人」對上「西子」，知為「醜類者」也。

章指：言貌好行惡，西子冒臭；醜人潔服，供事上帝。明當脩飾，惟義為常也。

疏「明當脩飾」○正義曰：《鹽鐵論》「殊路」章云：「蒙以不潔，鄙人掩鼻；惡人盛飾，可以宗祀上帝。」

孟子曰：「天下之言性也，則故而已矣。」

①「引」，原誤作「加」，今據《四書典故辨正》改。
②「曰」，原誤作「曰」，今從沈本據《說文》改。

故者，以利爲本。

注言天下萬物之情性，當順其故，則利之也。改戾其性，則失其利矣。若以杞柳爲柶棬，非杞柳之性也。

疏注「言天」至「之性也」○正義曰：曲阜孔氏所刻趙氏注如此，其義明白可見。「故」即

「苟求其故」之故。推步者求其故則日至可知，言性者順其故則智不鑿。《易·文言傳》云：「利者，義之和也。」《荀子·臣道》篇云：「從命而利君謂之順。」《脩身》篇云：「以善和人者謂之順。」《詩·鄭風》「知子之順之」，箋云：「順謂與己和順。」利之義爲順，故虞翻《易》注謂巽爲利，是「利」爲「順其故」也。《賈子·道術》篇云：「心兼愛人謂之仁，反仁爲戾。」仁爲性，反其仁則乖戾，故失其利也。《湛困靜語》云：「莊周有云：『吾生於陵而安於陵故也，長於水而安於水性也。』此適有「故」與「性」二字，疑戰國時有此語。」毛氏奇齡《四書賸言補》云：「『天下之言性也，則故而已矣。』觀語氣，自指汎言性者，與「人之爲言」、「彼所謂道」語同。至「以利爲本」，然後斷以己意。因是時俗尚智計，多用穿鑿，故原有訓智者。《淮南·原道訓》「不設智故」，謂不用機智穿鑿之意，正與全文言智相合。是以孟子言天下言性不過智計耳。顧智亦何害？但當以通利不穿鑿爲主。夫所惡

於智，爲穿鑿也。如不穿鑿，則行水治曆，智亦大矣。」按：《孟子》此章自明其「道性善」之旨，與前「異於禽獸」相發明也。《易·雜卦傳》云：「革，去故也。鼎，取新也。」故謂已往之事。當時言性者多據往事爲說，如云「文武興則民好善，幽厲興則民好暴」，「以堯爲君而有象，以瞽瞍爲父而有舜」，及《荀子·性惡》篇所云「曾、鯀、孝己，獨厚於孝之實而全於孝之名，秦人不如齊魯之孝具敬父」，皆所謂故也。孟子獨於故中指出利字，利即《周易》「元亨利貞」之利。《繫辭傳》云：「變而通之以盡利。」《彖傳》云：「乾道變化，各正性命，保合太和乃利貞。」利以能變化言。於故事之中審其能變化，則知其性之善。利者義之和，《禮記·表記》云：「道者，義也。」注云：「謂斷以事宜。」《春秋繁露·仁義法》云：「義者謂宜在我者。」其性能知事宜之在我，故能變通。上古之民始不知有父，惟知有母，與禽獸同。伏羲教之嫁娶，定人道，無論賢智愚不肖皆變化而知有夫婦父子。始食鳥獸羶蟻之肉，飢則食，飽棄餘。神農教之稼穡，無論賢智愚不肖，皆變化而知有火化粒食。是爲利也。於故之中知其利，則人性之善可知矣。《繫辭傳》云「感而遂通天下之故」，又云「是以明於天之道而察於民之故」，又云「又明於憂患與故」。通者，通其故之利也；察者，察其故之利也，明者，明

其故之利也。故者，事也。傳云：「通變之謂事。」非利不足以言故，非通變不足以言事。諸言性者據故事而不通其故之利，不察其故之利，不明其故之利，所以言性惡，言性善惡混，或又分氣質之性、義理之性，皆不識「故以利爲本」者也。孟子私淑孔子，述伏羲、神農、文王、周公之道，以故之利而直指性爲善，於此括全《易》之義而以六字盡之云：「故者以利爲本」，明人之所以異於禽獸者在此利不利之間。利不利即義不義，義不義即宜不宜。能知宜不宜，則智也；不能知宜不宜，則不智也。智，人也；不智，禽獸也。幾希之間，一利而已矣，即一義而已矣，即一智而已矣。所惡於智者，爲其鑿也。

注惡人欲用智而妄穿鑿，不順物之性而改道以養之。

疏注「惡人」至「養之」○正義曰：《說

文》金部云：「鑿，穿木也。」成公十三年《公羊傳》云「公鑿行也」，注云：「鑿猶更造之意。」故趙氏以「穿」釋「鑿」，又以「改」釋之。改即更造也。趙氏以「養物」言，言當順其情性以養之，不可戾其情性以養之。按：此「智」即人性之「利」也。孔子言「性相近習相遠」，「惟上智與下愚不移」，移謂變通也。禽獸無知，直不能移其性之不善，所以與人異。則人無論賢愚皆能知，即皆能轉移，愚者可以轉而善，智者可以

轉而爲不善，此習所以相遠。智者何以轉而爲不善？爲其鑿也。惟其因智而鑿，故惡其智。蓋伏羲以前人苦於不知，則惡其愚；黃帝堯舜以後人不苦於不知，正苦於知而鑿其知，則聖人轉惡其智，故無爲而治，可使由而不可使知也。鑿有二義：其一爲空，《荀子·哀公》篇云「五鑿爲正」是也；其一爲細，《楚辭·離騷》云「精瓊靡以爲糧」，注云：「精，鑿也。凡物精之則細小。」是也。鑿其內則空，鑿其外則細，空虛細小皆非大智。下言「行所無事則智大」，此孟子自明鑿字之意，「行所無事」，「由仁義行」也，然則「行仁義」則爲鑿。夫知其爲仁義，是已智矣，乃假仁以濟其不仁，假義以濟其不義，用忠孝廉直之名以行其巧詐離奇之術，是鑿也，是智小也。知其爲仁爲義，是已智矣，乃無所依據，憑己之空見以爲仁，憑己之空見以爲義，極精微奧妙之論而不本讀書好古之實，是鑿也，是智小也。如智者若禹之行水也，則無惡於智矣。禹之行水也，行其所無事也。

注禹之用智，決江疏河，因水之性，因地之宜，引之就下，行其空虛無事之處。

疏注「禹之」至

「之處」○正義曰：趙氏謂水性就下，宜行地中，故「決江疏河」，使由地中行，「空虛」謂地中也。水行地上則失水之性，

而水不能安於無事矣。胡氏渭《禹貢錐指》云：「賈讓曰：『昔大禹治水，山陵當路者毀之，故鑿龍門，辟伊闕，析底柱，破碣石。』此鑿山之事也。孟子曰：『禹掘地而注之海。』太史公曰：『禹斷二渠以引其河，北載之高地，過洺水，至於大陸。』此穿地之事也。儒者蔽於一己之意見，凡耳目所不曾及皆以爲妄，過泥『禹之行水，行所無事』之言，謂禹絕無所穿鑿。殊不知堯之水災非尋常之水災，禹之行水非尋常之行水。審如所云，則後世築隄置埽，開渠減水之人，皆得與禹功，並垂天壤矣。鯀何以績用弗成？禹何以配天無極哉？」按：禹鑿山穿地，不能無事，正所以使水行所無事。若禹祇憑空論，無有實事，則水轉不能無事矣。聖人明庶物，察人倫，仰而思之，夜以繼日，憂勤極矣，乃所以使民行所無事也。《春秋繁露·王道通三》篇云：「陽常居實位而行於盛，陰常居空位而行於末。故陰夏人居下，不得任歲事，冬出居上，置之空處也。養長之時伏於下，遠去之，弗使得爲陽也；無事之時，起之空處，使之備次陳守閉塞也。」《陰陽終始》篇云：「陰之行固常居虛而不得居實，至於冬而止空虛，太陽乃得北就其類而與水起寒。」此謂寒水之性宜居空虛無事。趙氏之言本此。如智者亦行其所無事，則智亦大矣。**注**如用智者不妄改作，作事循

理，若禹行水於無事之處，則爲大智也。**疏**「如智」至「亦大矣」○正義曰：孟子以禹之行水明大智者之行所無事。「行所無事」即舜之無爲而治也。《禮記·中庸》云：「舜其大智也與？舜好問而好察邇言，隱惡而揚善，執其兩端，用其中於民。」舜之大智即舜之無爲，而舜之無爲本於好問察言，執兩用中。好問察言，執兩用中，則由仁義行，所以無爲而治。孟子恐人以行所無事爲老氏之清淨無爲，故以禹之行水例之。行水，必決河疏江，鑿山穿地，而乃能使水行所無事；無爲而治，必好問察言，執兩用中，而乃能使民由仁義行。《中庸》云：「天命之謂性，率性之謂道，脩道之謂教。」率乎性則行所無事，自以爲智而用其智則非率性而天下亦不能行所無事，此智之大小所由分也。天之高也，星辰之遠也，苟求其故，千歲之日至可坐而致也。**注**天雖高，星辰雖遠，誠能推求其故常之行，千歲日至之日可坐知也。星辰日月之會致，至也，知其日至在何日也。**疏**「天之至」致也○正義曰：《禮記·中庸》篇云：「今夫天，斯昭昭之多，及其無窮也，日月星辰繫焉。」《素問》云：「黃帝曰：『地之爲下否乎？』岐伯曰：『地爲人之下，太虛之中也。』」曰：「憑

乎？」曰：「大氣舉之也。」蓋地居中，天周其外。而地之去天，《楚辭·天問》雖云「圜則九重」，而其里度實不可知。其高之無窮也，所可測者日月星辰而已。星者，二十八宿也；辰者，十二次也。分天爲十二次，依於星象。天本無度，以星辰爲度；星辰本無度，以日行爲度。故測天者先測星辰，測星辰者先求日至。東方之宿角、亢、氐、房、心、尾、箕爲蒼龍，南方之宿東井、鬼、柳、七星、張、翼、轸爲朱鳥，西方之宿奎、婁、胃、昂、畢、觜、參爲白虎，北方之宿斗、牛、女、虛、危、室、壁爲玄武。蔡邕《月令章句》云：「周天三百六十五度四分度之一，分爲十二次，日月之所躔也。每次三十度三十二分之十四，日至其初爲節，至其中爲中氣。自危十度至壁八度謂之「豕韋之次」，立春、雨水居之。自壁八度至胃一度謂之「降婁之次」，驚蟄、春分居之。自胃一度至畢六度謂之「大梁之次」，清明、穀雨居之。自畢六度至井十度謂之「實沈之次」，立夏、小滿居之。自井十度至柳三度謂之「鶉首之次」，芒種、夏至居之。自柳三度至張十二度謂之「鶉尾之次」，小暑、大暑居之。自張十二度至轸六度謂之「壽星之次」，立秋、處暑居之。自轸六度至亢八度謂之「大火之次」，寒露、秋分居之。自亢八度至尾四度謂之「大火之次」，寒露、霜降居之。自尾四度至斗六度謂之「析木之次」，立冬、

小雪居之。自斗六度至須女二度謂之「星紀之次」，大雪、冬至居之。自須女二度至危十度謂之「玄枵之次」，小寒、大寒居之。此十二次即爲十二辰。天每日左旋一周，日每日右行一度。天行赤道，日行黃道。黃道斜交於赤道，其交處爲春秋分。自春分交赤道之北，至夏至而極北，距赤道最遠；轉而南行，至秋分交赤道之南，至冬至而極南，距赤道最遠。又轉而北行，至春分復交於赤道，其道斜絡於二十八宿之間，故日之出入南北，皆以星辰爲識。《堯典》「日中星鳥，日永星火，宵中星虛，日短星昴」，《月令》「孟春日在營室，仲春日在奎，季春日在胃，孟夏日在畢，仲夏日在東井，季夏日在柳，孟秋日在翼，仲秋日在角，季秋日在房，孟冬日在尾，仲冬日在斗，季冬日在婺女」，是也。日每歲環行於十二辰二十八宿之間，則此黃道之絡於星辰者，爲日躔之軌迹，即所謂「故」也。「求其故」，求日所行於星辰之度也。日所行之度即其故，而可知其所在，則兩分兩至定矣。日之行極於兩至，故以「日至」言之。張氏爾岐《蒿庵問話》云：「曆法每十九年爲一章，第一章之初，年月日時俱會於甲子朔旦冬至，是爲「曆元」。以後章首冬至必在朔旦而非甲子日時。四章七十六年爲一部，朔旦冬至在夜半子，與第一章同，而日月非甲子。二十部爲一紀，凡一千五百年，冬至朔旦乃甲

子日甲子時而非甲子歲首。三紀共四千五百六十年，至朔同日而年月日時俱會於甲子如初矣。孟子所謂「千歲之日至」，正求此一元之初，年月日時俱會甲子朔旦冬至者也。」梅氏文鼎《曆學疑問》云：「造法者必有起算之端，是謂「律元」。然律元之法有二：其一遠溯初古，爲七曜齊元之元，自漢《太初》至金重修《大明術》各所用之積年是也，其一爲截算之元，自元《授時》不用積年日法，直以至元辛巳爲元，而今西法亦以崇禎戊辰爲元是也。二者不同，然以是爲起算之端，一而已矣。夫所謂「七曜齊元」者，謂上古之時，歲月日時皆會甲子，而又日月如合璧，五星如聯珠，取以爲造法之根數也。使其果然，雖萬世遵用可矣。乃今二十一史中所載諸家律元無一同者，是其積年之久近，皆非有所受之於前，直以巧算取之而已。然謂其一無所據而出於胸臆，則又非也。當其立法之初，亦皆有所驗於近事，然後本其時之所實測，以旁證於書傳之所傳，約其合者既有數端，遂援之以立術，於是溯而上之，至於數千萬年之遠，庶幾各率可以齊同，積年之法所由立也。然既欲其上合律元，又欲其不違近測，畸零分秒之數必不能齊，勢不能不稍爲整頓以求巧合。其始也，據近測以求積年，其既也，且將因積年而改近測矣，又安得以爲定法乎？《授時術》知其然，故一以實測

爲憑而不用積年虛率，上考下求，即以至元十八年辛巳歲前天正冬至爲元，其見卓矣。《孟子》「千歲日至」，趙注只云日至可知其日，疏則直云「千歲以後之日至可坐而定」，初不言立元。」方氏觀承《五禮通攷》云：「《孟子》此章極精，並無律元之說。立元至《太初術》始有之，孟子當時豈知後世將有《太初》之術而預言之？夫律豈無元？然隨代可立，不必追上古十一月甲子朔夜半冬至耳。孟子所謂日至者，亦兼二至在內，非專指冬至也。《周禮》土圭反專重夏至，《堯典》觀象亦兼永短二至，其專以冬至爲元者，亦始自《太初》也。孔子刪《書》斷自《堯典》，司馬遷作《史》必欲追至黃帝，而穿鑿附會不少矣。」按：孟子以水之「行所無事」比例率性者之「行所無事」，仍恐其不明也，故又例之以求日至。夫天之行赤道，日之行黃道，其所躔於星辰而爲分爲至，不容小智之鑿者也。談性者可以鑿空，求日至者斷不容鑿空，故孟子舉一必不容鑿空之日至以例言性，所以明性之不容鑿空也。何也？凡治曆者極精微妙，必與實測相孚，稍一鑿空，便與天行不合。所以學問之事至於測天，斷不容以小智妄說也。天之行如此，吾測之，吾求其故也，其至可致也；人之性如此，吾察之，吾求其故也，其利可知也。引喻之義全在「求其故」。言性者雖以故爲說，實未嘗求其故，故不知以利

爲本；言天者雖以故爲說，實未嘗求其故，故千歲之日至不能坐而致。《禮記·禮器》云：「物產之致也精微」，注云：「致，致密也。」《樂記》云：「致樂以治心」，注云：「致猶深審也。」然則「可坐而致」即可坐而密，亦即可坐而深審。凡治曆必求其密，密必由於深審，所以必深審而密者，則以天行不測，以變爲常，至於千歲，則不能不通其變。蓋不能離其故而不能拘守其故，所以必求其故。求其故即實測而深審之，斯其術乃可坐而知其密也。梅氏文鼎《曆學疑問》云：「治曆者當順天以求合，不當爲合以驗天。若預爲一定之法而不隨時修改以求無弊，是爲合以驗天乎？吾嘗徵之天道矣：日有朝有禺，有中有昃，有夜有晨，此歷一日而可知者也；月有朔有生明，有弦有望，有生魄，有下弦，有晦，此歷一月而可知者也；時有春夏秋冬，晝夜有永短，中星有推移，此歷一歲而可知者也。乃若熒惑之周天則歷二年，歲星則十二年，土星則二十九年。夫至於十二年、二十九年而一周，已不若前數之易見矣。又其每周之間必有過不及之餘分，所差甚微，非歷多周，豈能灼見？乃若歲差之行，六七十年始差一度，歷二萬五千餘年而始得一周，雖有期頤上壽，所見之差不過一二度，亦安從辨之？迨其歷年既久，差數愈多，然後共見而差法立焉。此非前人之智不若後人也，

前人不能預見後來之差數而後人則能盡考前代之度分。理愈久而愈明，法愈脩而愈密，勢則然耳。問者曰：若是則聖人之智有所窮歟？曰：使聖人爲一定之法，則窮矣。惟聖人深知天載之無窮而不爲一定之法，必使隨時脩改以求合天，是則合天下萬世之聰明以爲其耳目，聖人之所以不窮也。按：自黃帝迎日推策，攷定日星，少皞立司分司至之官，顓頊制曆，由來尚矣。而《堯典》則紀嵎夷、南交、西、朔方之宅，舜又有璇璣玉衡之在，《周禮·地官》用土圭之法以測日景之長短，歷代皆用實測，未有鑿空以言者也。誠以寒暑晝夜有常，而其差則隨時而變，非即其故而時時求測之，不易合也。人性之善亦如寒暑晝夜之有常也。至其智之隨時而變，亦如天行之有歲差也，非即其故而時時察之思之，不易言也。歲而無差，則故不必求，日至不千歲，則差不著見。孟子言日至而曰「千歲」，「千歲」二字即括歲差而言。舍故則日至不可知，泥其故而不能隨時以實測求之則千歲之日至不可致。此孟子言曆之精，即孟子言性之精也。江氏永《冬至權度》云：「履端於始，序則不愆。術家詳求冬至，且求千歲以上冬至，證之史傳，或離或合，其故難言。《元史》有六術冬至，開載魯獻公戊寅至至元庚辰四十九事，紀《大衍》、《宣明》、《紀元》、《統天》，重脩《大明授時》時刻之

異同，勿菴梅氏因之作《春秋以來冬至考》，刪去獻公一事，各以其術本法詳衍，算術雖明而未有折衷。永因梅氏所考定者用實法推算，有不合者斷其為術誤史誤，俟知數者考焉。一論「平歲實」。太陽本天有平行，盡黃道一周為「平歲實」，與月五星周平朔策合率同理。別有本輪均輪最高最卑之行，以視行加減平行。二十四氣時刻多少，歲歲不同，而古今冬至不能以一率齊之，是為活汎之歲實。猶之月有實會，逐月不同，五星有實合，每周不同也。《授時》、《大統》以前，太陽高卑之理未明，雖知一歲之行有盈縮，不悟盈縮之中為平歲實，但求歲實於活汎之冬至，故一術必更一周率與歲實，然合今則戾古，合古又違今。《統天術》遂立距差躡差之法，暗藏消長以求上下兩合，《授時術》本之，有百年長一消一之說。西法本《回回》，以春分相距測定歲周，小餘五小時三刻三分四十五秒，以萬分通之，為二四二一八七五，此為平行之歲實小餘，而各節氣之定氣則以均度加減定之，此不易之法也。欲考往古冬至，當以「平歲實」為本，算當年平冬至時刻，乃以定冬至較之，知其距最卑之遠近。或與今法有不合，則知其時本輪均輪之有半徑差，有相去之遠者，則知史傳所記非實測。所謂「苟求其故，千歲之日至可坐而致」者，此為庶幾焉。倘以《授時》之歲實為歲實而以百年長

一消一為準，則非法矣。一論「最卑行」。太陽本輪最卑點為縮末盈初之端，歲有推移，與月人轉五星入律皆有盈度同理。平冬至之改為定冬至也，視此點之前後遠近以加度而減時，減度而加時焉。至元辛巳間，最卑與平冬至同度，自是以前定冬至皆在平冬至前，以後定冬至皆在平冬至後，最卑有行度故也。西法近率，最卑歲行一分一秒十微，以遠年冬至考之，此率似微眇，大約當加二秒，上求古時定冬至，以此為準焉。一論「輪徑差」。既卑既有行度矣，而太陽之體在均輪，均輪之心在本輪，本輪之心在本天，此兩輪半徑，古今又有不同，則距地遠近兩心有差。西法始定兩輪半徑，併千萬分之三十五萬八千四百一十六，而今又漸減，則古時必多於此半徑，大則加減差亦大，而以均度變時分，加減於平冬至者，視今時必稍贏焉。此差率出於恒差之外，術家亦不能定者也。上考往古，又當以此消息之。」

章指：言能脩性守故，天道可知，妄智改常，必與道乖。性命之指也。疏「修性

守故」①○正義曰：周氏廣業《孟子章指攷證》云：「脩，

①「故」，原誤作「改」，今據《章指》改。

《文選》注作循。唐人書脩循二字多混淆。」

公行子有子之喪。右師往弔，人門，有

進而與右師言者，有就右師之位而與右師言者。**注**公行子，齊大夫也。右師，齊貴臣王驩，字

子敖。公行之喪，齊卿大夫以君命會，各有位次，故下云「朝廷」也。與言者，皆諂於貴人也。**疏**「公行

子」至「言者」○正義曰：顧氏炎武《日知錄》云：「禮，父爲

長子斬衰三年，故云公行子有子之喪，而孟子與右師及齊之諸臣皆往弔。」毛氏奇齡《經問》云：「或問公行子有子之喪，

說者皆曰公行子喪親而身居子位。名曰「子喪」，謂有人子之喪也。然乎？曰：非也。公行子有子之喪，謂公行子喪

其子，非身居子喪也。凡喪必有主。然有君爲臣主者，有父爲子主者，如《小記》云「父主子喪而有杖」，又《奔喪》云「凡

喪，父在父爲主」，是子喪父主，明有定禮。當時公行氏喪子，正身爲喪主以受賓弔，一如《檀弓》所云「子夏喪其子而

曾子弔之」。禮，凡稱有某喪，皆實指死者言之，謂其人之死喪也。若以指生者，則《檀弓》「曾子有母之喪」，「子路有姊

之喪」，不成有人母人姊之喪乎？」錢氏大昕《潛研堂答問》

云：「問：公行子有子之喪，何以君命往弔？曰：《儀禮·

喪服》篇「父爲長子斬衰三年」，傳曰：「何以三年也？正體於上，又乃將所傳重也。庶子不得爲長子三年，不繼祖也。」

鄭氏注云：「此言爲父後者然後爲長子三年，重其當先祖之

正體，又以其將代已爲宗廟主也。」公行子當是爲父後者，其子蓋長子也。大夫之嫡長在國謂之國子，人學與世子齒焉

者也；在家謂之門子，《春秋傳》「大夫門子皆從鄭伯」是也。

故其喪也，父爲之服斬衰三年，君使人弔，卿大夫咸往會焉。

《周禮》卿大夫士之喪，職喪以國之喪禮洫其禁令。孟子所稱不歷位、不踰階之禮，即職喪之禁令也。趙氏佑《溫故錄》

云：「進，前也。此右師甫入門未即位時趨迎揖之者，即所謂「踰階」也。與下就右師之位，皆人之進、人之就。衆人皆

往弔，先集而右師獨後至，書法特書「右師往弔」，亦似以右師主其事，孟子蓋不得已從衆也。」○注「公行子齊大夫也」

○正義曰：《荀子·大略》篇云「公行子之之燕」，注云：「孟子曰：『公行子有子之喪，右師往弔。』」趙岐注云：「齊大夫

也。」子之，蓋其先也。《廣韻》「公」字注云：「《孟子》有公行子著書。《左傳》晉成公以卿之庶子爲公行大夫，其後氏

焉。」孟子不與右師言。右師不悅，曰：「諸君

子皆與驩言，孟子獨不與驩言，是簡驩也。」

注右師謂孟子簡其無德，故不與言，是以不悅也。

疏「是簡驩也」○正義曰：《呂氏春秋·驩恣》篇云「自驩則

簡士」，高誘注云：「簡，傲也。」《說苑·脩文》篇云：「君子

思禮以脩身，則怠惰慢易之節不至。」又云：「孔子曰：『可

也簡。』簡者，易野也。易野者，無禮文也。」簡則非禮，故孟

子以禮言之。孟子聞之，曰：「禮，朝廷不歷位

而相與言，不踰階而相揖也。我欲行禮，子

敖以我為簡，不亦異乎？」**注**孟子聞子敖之言，

曰：我欲行禮，故不歷位而言。反以我為簡易也。

云以「禮」者，心惡子敖而外順其辭也。**疏**「禮朝廷」

至「揖也」○正義曰：《禮記·曲禮》云：「臨喪不笑，揖人必

違其位。」孔氏正義云：「位謂己之位也。於位而見前人己

所宜敬者，當離己位而嚮彼遙揖。禮以變為敬，是以《燕禮》

「君降階爾卿大夫」，鄭注云：「爾，近也。」揖而後移近之，明

君臣皆須違位而揖也。」陳祥道《禮記講義》云：「此所言乃

燕居之禮，孟子所言，朝廷之禮。朝廷尚嚴，燕居尚和。言

之不同，所主之禮異也。」○注「反以我為簡易也」○正義

曰：趙氏以「易」釋「簡」也。閩、監、毛三本作「異」，非是。

章指：言循禮而動，不合時人。阿意

事貴，脅肩所尊，俗之情也。是以萬物皆

流而金石獨止。**疏**「阿意事貴」○正義曰：《漢

書·劉向傳》武帝詔曰：「周堪不能阿尊事貴。」○「是以

萬物皆流而金石獨止」○正義曰：《說苑·談叢》篇

云：「水浮萬物，玉石留止。」

孟子曰：「君子所以異於人者，以其存

心也。君子以仁存心，以禮存心。仁者，愛

人；有禮者，敬人。愛人者人恒愛之，敬人

者人恒敬之。**注**存，在也。君子之在心者，仁與

禮也。愛敬施行於人，人必反之己也。**疏**注「存在

也」○正義曰：趙氏以「在」釋「存」，蓋以在為察，在心即省

察其心。下文「自反」皆察也。有人於此，其待我以

橫逆，則君子必自反也；我必不仁也，必無

①「談」，原誤作「說」，今從沈校據《說苑》改。

禮也。此物奚宜至哉？

注橫逆者，以暴虐之

道來加我也。君子反自思省，謂己仁禮不至也。

物，事也。推此人何爲以此事來加我。

疏注「物事」

至「加我」○正義曰：《毛詩·大雅·烝民》「有物有則」，傳

云：「物，事也。」《爾雅·釋詁》云：「宜，事也。」《韓非子·

喻老》篇云：「事，爲也。」是「奚宜」即「何爲」也。至之義爲

來，故云「來加我」。其自反而仁矣，自反而有禮

矣，其橫逆由是也，君子必自反也；我必不

忠。

注君子自謂我必不忠。自反而忠矣，其橫

逆由是也，君子曰：此亦妄人也已矣。如

此，則與禽獸奚擇哉？於禽獸又何難焉？

注妄人，妄作之人，無知者。與禽獸何擇異也？無

異於禽獸，又何足難也？

疏「又何難焉」○正義曰：

《周禮·調人》「掌司萬民之難而調和之」，注云：「難，相與

爲仇讎。」○注「妄人」至「知者」○正義曰：《禮記·儒行》篇

云：「今衆人之命儒也妄」，注云：「妄之言無也。」虞翻解

《易·无妄》云：「妄，亡也。」亡即無也。不知而作，是爲「妄

作」，故妄作即猶禽獸之無知也。○注「與禽獸何擇異也」○

正義曰：《呂氏春秋·簡選》篇云「與惡劍無擇」，高誘注

云：「擇，別也。」又《離謂》篇云「其與橘言無擇」，高誘注

云：「擇猶異也。」是故「君子有終身之憂，無一朝

之患也」。乃若所憂則有之：舜，人也；我，

亦人也。舜爲法於天下，可傳於後世；我由

未免爲鄉人也，是則可憂也。

注君子之憂，憂

不如堯舜也。

疏「是故」至「憂也」○正義曰：《禮記·檀

弓》云：「子思曰：『喪三日而殯，凡附於棺者必誠必信，勿

之有悔焉耳矣。三月而葬，凡附於棺者必誠必信，勿之有悔

焉耳矣。喪三年以爲極，亡則弗忘之矣。故君子有終身之

憂而無一朝之患。」鄭氏注以「終身之憂」爲「念其親」，「無

一朝之患」爲「毀不滅性」，蓋「君子有終身之憂，無一朝之

患」，此二語當古有之，子思引以說人子之念親，孟子引之說

君子之待橫逆，故下申言之。賈誼《新書·勸學》篇云：「謂

門人學者：舜，何人也？我，何人也？夫啓耳目，載心意，

從立移徙，與我同性，而舜獨有賢聖之名，明君子之實，而我

曾無鄰里之聞，寬狃之智者，獨何與？然則舜僇俛而加志，

我僇俛而弗省耳。」此即用孟子之言而衍之，故下即言「西子

蒙不潔」，亦用孟子語也。憂之如何？如舜而已

矣。**注**憂之當如之何乎？如舜而後可，故終身憂

也。若夫君子所患則亡矣。非仁無爲也，非禮無行也。如有一朝之患，則君子不患矣。」

注君子之行，本自不致患。常行仁行禮，如有一朝橫來之患，非己愆也。故君子歸天，不以爲患也。

疏注「故君子歸天」○正義曰：《後漢書·順帝紀》云「令刺史二千石之選歸任三司」，注云：「歸猶委任也。」此云「歸天」，謂委任於天也。

章指：言君子責己，小人不改。比之禽獸，不足難矣。蹈仁行禮，不患其患，惟不若舜，可以憂也。

禹、稷當平世，三過其門而不入。孔子賢之。顏子當亂世，居於陋巷，一簞食，一瓢飲，人不堪其憂，顏子不改其樂。孔子賢之。孟子曰：「禹、稷、顏回同道。」**注**當平世三過其門者，身爲公卿，憂民急也；當亂世安陋巷者，不用

於世，窮而樂道也。孟子以爲憂民之道同，用與不用之宜若是也，故孔子俱賢之。禹思天下有溺者，由己溺之也；稷思天下有飢者，由己飢之也。是以如是其急也。禹、稷、顏子易地則皆然。**注**禹、稷急民之難若是，顏子與之易地，其心亦然。不在其位，勞佚異矣。**疏**「禹思」至「飢之

也」○正義曰：《音義》於上章「我由未免爲鄉人也」云：「丁云：『由與猶義同，後皆放此。』」然則此「由」亦「猶」也。謝少宰塘謂：「由當讀如字。蓋己既爲司空，則天下之溺由於己，己既爲后稷，則天下之飢由於己。讀爲猶尚是譬況，未合。」此深得孟子之指矣。今有同室之人鬪者，救之，雖被髮纓冠而救之，可也；鄉鄰有鬪者，被髮纓冠而往救之，則惑也，雖閉戶可也。**注**纓冠者，以冠纓貫頭也。鄉鄰，同鄉也。同室相救，是其理也，喻禹稷走赴，鄉鄰非其事，顏子所以闔戶而高枕也。**疏**注「纓冠者以冠纓貫頭也」○正義曰：《說文》糸部云：「纓，冠系也。」劉熙《釋名·釋首飾》云：「纓，頸也。自上而下繫於頸也。」急於戴冠，不及使纓

攝於頸，而與冠並加於頭，是以纓爲冠，故云「纓冠」。趙氏此注精矣。○注「以冠纓貫頭」○廷琥曰：按，劉熙《釋名·釋首飾》云：「冠，貫也。所以貫髻髮也。」《說文》云：「母，讀若冠。」是冠有貫義。○注「顏子所以闔戶而高枕也」^①○正義曰：《楚辭·九辨》云：「堯舜皆有舉任兮，故高枕而自適。」《韓非子·守道》篇云：「戰如賁，育，守如金石，則君人者高枕而守已完矣。」《戰國策·魏策》：「張儀曰：『則大王高枕而卧，國必無憂矣。』」賈誼《新書·益壤》篇，《史記·留侯世家》、楊雄《解嘲》皆云「高枕」。

章指：言上賢之士，得聖一概。顏子之心，有同禹稷。時行則行，時止則止。

失其節則惑矣。

疏「上賢之士得聖一概」○正義

曰：揚子《法言·重黎》篇序云：「仲尼以來，國君將相，卿士名臣，參差不齊，一概諸聖。」○「失其節則惑矣」○正義曰：《易·雜卦傳》云：「節，止也。」「失節」謂不知止。

公都子曰：「匡章，通國皆稱不孝焉。夫子與之遊，又從而禮貌之，敢問何也？」**注**

匡章，齊人也。一國皆稱不孝。問孟子何爲與之遊，又禮之以顏色喜悅之貌也？**疏**「又禮」至「貌

也」○正義曰：《荀子·禮論》篇云「情貌之盡也」，注云：

「情，忠誠也。貌，恭敬也。言人所施忠敬無盡於君者。」《說

苑·脩文》篇云：「書曰五事，一曰貌，貌若男子之所以恭

敬，婦人之所以姣好也。其以人君朝，尊以嚴，其以人宗

廟，敬以忠，其以人鄉曲，和以順，其以人州里族黨之中，

和以親。」《荀子》言禮貌屬君，則當爲尊嚴，《孟子》之禮貌

在匡章，則當爲和親。故以爲「顏色喜悅之貌」也。《楚辭·

九章·惜誦》篇云「情與貌其不變」，注云：「志願爲情，顏色

爲貌。」孟子曰：「世俗所謂不孝者五：惰其四

支，不顧父母之養，一不孝也；博奕，好飲

酒，不顧父母之養，二不孝也；好貨財，私妻

子，不顧父母之養，三不孝也；從耳目之欲

以爲父母戮，四不孝也；好勇鬪狠，以危父

①「闔」，原作「閉」，合於宋十行、閩、監、毛等本，今據本書

及阮校所述廖、孔、韓等本注文改。

母，五不孝也。章子有一於是乎？

注惰懈不作，極耳目之欲以陷罪，戮及父母，凡此五者，人所謂不孝之行，章子豈有一事於是五不孝中也？

疏

「好勇鬪很」○正義曰：翟氏灝《考異》云：「《說文》彳部：

「很，胡懇切，不聽從也。𢇛也。」犬部：「很，五還切，吠鬪

聲。」兩字截然不同。此「鬪很」字必當如《曲禮》「很毋求勝」

之很，而坊本多誤作「狠」。據《廣韻》「很」字下注云：「俗作

狠。」蓋以狠代很，唐固嘗有之。然音與義悉大別，縱或俗

行，不可施諸經典。《荀子·榮辱》篇云：「鬪者，忘其身者

也，忘其親者也，忘其君者也。行其少頃之怒而喪終身之

軀，然且爲之，是忘其身也。室家立殘，親戚不免於刑戮，然

且爲之，是忘其親也。」注云：「蓋當時禁鬪殺人之法，戮及

親戚。《尸子》曰：「非人君之用兵也，以爲民傷鬪，則以親

戚徇一言而不顧之也。」夫章子，子父責善而不相

遇也。責善，朋友之道也；父子責善，賊恩

之大者。**注**遇，得也。章子子父親教，相責以善，

不能相得，父逐之也。朋友切磋，乃當責善耳；父

子相責以善，賊恩之大也。**疏**注「遇得也」○正義曰：

隱公四年夏，公及宋公遇于清。《穀梁傳》云：「遇者，志相

得也。」桓公十年秋，公會衛侯于桃丘，弗遇。《穀梁傳》云：

「弗遇者，志不相得也。」○注「章子」至「大也」○正義曰：全

氏祖望《經史問答》云：「章子之事見於《國策》，姚氏引《春

秋後語》證之，所紀略同。吳禮部曰：孟子以爲子父責善而

不相遇，恐即此事。然必《國策》所云，何以言責善？況在

威王時，頗疑與孟子不相接。答曰：章子見《國策》，最早當

威王時。據《國策》，威王使章子將而拒秦，威王念其母爲父

所殺，埋於馬棧之下，謂曰：「全軍而還，必更葬將軍之母。」

章子對曰：「臣非不能更葬母。臣之母得罪臣之父，未教而

死。臣葬母，是欲死父也。故不敢。」軍行，有言章子以兵降

秦者三，威王不信。有司請之，王曰：「不欺死父，豈欺生

君？」章子大勝秦而返。《國策》所述如此，然則所云「責善」

蓋必勸其父以弗爲已甚而父不聽，遂不得近。此自是人倫

大變，章子之黜妻屏子，非過也。然而孟子以爲賊恩，則何

也？蓋章子自勝秦以前所以處此事者本不可以言遇，然其

勝秦而還，則王必葬其母矣而章子之黜妻屏子終身如故，是

在章子亦以恫母之至，不僅以一奉君命得葬了事。未嘗非

孝，而不知是則似於揚父生前之過，自君子言之，以爲非中

庸矣。故孟子亦未嘗竟許之。而究之矜其遇，諒其心，蓋章

子自是至性孤行之士，晚近所不可得，雖所行未必盡合，而

直不失爲孝子。但章子之事未必在威王之世。威王未嘗與

秦交兵，齊秦之鬪在宣王時，而伐燕之役，將兵者正是章子，

則恐其誤編於威王《策》中者。即不然，亦是威王末年。」夫

章子豈不欲有夫妻子母之屬哉？爲得罪於

父，不得近，出妻屏子，終身不養焉。**注**夫章

子豈不欲身有夫妻之配，子有子母之屬哉？但以

身得罪於父，不得近父，故出去其妻，屏遠其子，終

身不爲妻子所養也。其設心以爲不若是，是則

罪之大者。是則章子已矣。**注**章子張設其心，

執持此屏出妻子之意，以爲人得罪於父而不若是以

自責罰，是則罪益大矣。是章子之行已矣。何爲不

可與言？**疏**注「章子」至「之意」○正義曰：《說文》言部

云：「設，施陳也。」弓部云：「張，施弓弦也。」是「設」即「張」

也。張則有彊義，昭公十四年《左傳》云「臣欲張公室也」，

《國策·西周策》云「破秦以張韓魏」，注皆以張爲彊，是也。

以此意張設於心，彊而莫改，故爲「執持此意」也。○注「是

章」至「與言」○正義曰：周氏廣業《孟子古注攷》云：「宋

本、古本有之，今並闕。」

章指：言匡章得罪，出妻屏子。上不得
養，下以責己。衆曰不孝，其實則否。是
以孟子禮貌之也。

曾子居武城，有越寇。或曰：「寇至，盍

去諸？」**注**盍，何不也。曾子居武城，有越寇將來。

人曰：寇方至，何不去之？**疏**曾子居武城有越寇○

正義曰：周氏柄中《辨正》云：「《史記·仲尼弟子列傳》：

「曾參，南武城人。澹臺滅明，武城人。」後人遂疑魯有兩武

城，而謂子羽爲今費縣之武城，曾子則別一武城，在今之嘉

祥縣。愚按，嘉祥縣有南武山，上有阿城，亦名南武城，後人

因南武山之城，遂附會爲曾子所居，此大謬也。《新序》云：

「魯人攻鄆，曾子辭於鄆君。」《戰國策》甘茂亦言「曾子處

鄆」，是曾子所居即費縣之武城，非有二地，而《史記》云南武

城者，因清河有東武城，在魯之北，故加南以別之，據漢人之

稱耳。武城，《漢志》作「南成」，《後漢志》作「南城」，至晉始

爲南武城，今故城在費縣西南九十里，屬兗州府。」又云：

「漢志」：「越王句踐嘗治琅瑯，起館臺。」攷春秋時琅瑯爲今山東沂州府，魯費在沂州府費縣西南七十里，武城在縣西南九十里。哀八年：「吳伐魯，從武城。」初，武城人或有因於吳境田焉，拘鄆人之漚菅者，曰：「何故使吾水滋？」及吳師至，拘者道之以伐武城。觀此則沂州之地，久已爲吳之錯壤。越滅吳而有其地，且徙治琅瑯，則與武城密邇。閻潛丘謂「吳未滅與吳鄰，吳既滅與越鄰」是也。或云越寇季氏，非寇魯。此並無所據。《左傳》哀二十一年，越人始來。二十三年，叔青如越，越諸鞅來報聘。二十四年，公如越。二十五年，公至自越。二十六年，叔孫舒帥師會越人納衛侯。二十七年，越使后庸來聘。是年八月，公如越。越又嘗與魯泗東地方百里。以此觀之，越自滅吳後與魯脩好，未嘗加兵，而哀公嘗欲以越伐魯而去三桓。武城近費，季氏之私邑在焉。說者因謂越寇季氏非寇魯。亦臆度之言耳。趙氏佑《溫故錄》云：「《仲尼弟子列傳》：『曾參，南武城人。澹臺滅明，武城人。』同言『武城』而上獨別之以『南』，明是兩地。曾子居武城自即今費縣之武城，爲子游、子羽邑，而非即南武城爲曾子本邑者。若其本邑也，則家室在焉，丘墓在焉，即云爲師，亦黨庠里塾之常，所謂鄉先生是矣。一旦寇難之來，方將效死，徙無出鄉，相守望扶持之義，而徒以舍去鳴

高，豈繫人情？嘉祥今於曲阜爲西南，與鉅野縣皆古大野地，曾子祠墓存焉。質諸傳記，或離或合。要於魯有兩武城。武城地險多事，故見經屢，南武城沒不見經。而曾子自爲南武城人，非武城人。」曰：「無寓人於我室，毀傷其薪木。寇退，則曰脩我牆屋，我將反。」**注**寓，寄也。曾子欲去，戒其守人曰：無寄人於我室，恐其傷我薪草樹木也。寇退，則曰：治牆室之壞者，我將來反。**疏**注「寓寄」至「來反」○正義曰：《方言》云：「寓，寄也。齊、衛、宋、魯、陳、晉、汝、潁、荊州、江、淮之間，或曰寓。」孔氏廣森《經學卮言》云：「按，兩『寇退』文複。以前十一字皆曾子屬武城人語，言無毀傷我薪木，假令寇退，則急脩我牆屋，我猶反耳。此曰字，義如『曰爲改歲』之曰，語辭也。」寇退，曾子反。左右曰：「待先生如此其忠且敬也。寇至則先去以爲民望，寇退則反，殆於不可。」**注**左右相與非議曾子者，言武城邑大夫敬曾子，武城人爲曾子忠謀，勸使避寇。君臣忠敬如此，而先生寇至則先去，使百姓瞻望而效之，寇退安寧則復來還，殆不可如是。怪曾子何

以行之也。**疏**「殆於不可」○正義曰：王氏引之《經傳釋

詞》云：「於猶爲也。《禮記·郊特牲》：『埽地而祭，於其實也』，又曰『於其實而已矣』，皆謂爲其實不爲其文也。《大戴禮·曾子本孝》篇曰『如此而成於孝子也』，言如此而後成爲孝子也。《孟子》：『殆於不可』，言殆爲不可也。於與爲同義。」沈猶行曰：「是非汝所知也。昔沈猶有負芻之禍，從先生者七十人，未有與焉。」**注**沈猶行，曾子弟子也。行謂左右之人曰：先生之行，非汝所能知也。先生，曾子也。往者先生嘗從門徒七十人，舍吾沈猶氏。時有作亂者曰負芻，來攻沈猶氏。先生率弟子去之，不與其難。言師實不與臣同。**疏**注「沈猶行曾子弟子也」○正義曰：《廣韻》二十一侵：「沈，直深切。漢複姓有沈猶氏。」翟氏灝《攷異》云：「《荀子·儒效》篇：『仲尼將爲司寇，沈猶氏不敢朝飲其羊。』沈猶，蓋魯之著氏也。《漢書·楚元王傳》：『景帝封其子歲爲沈猶侯』，晉灼注曰：『沈音審。』《王子侯表》屬千乘郡高宛。地與氏，古應相因，地既讀審，氏亦未必他讀，《廣韻》所收，惟備博聞而已。」○注「時有作亂者曰負芻」○正義曰：錢氏大昕《潛研堂答問》云：「《春秋》有曹伯負芻，《史

記》有楚王負芻，負芻爲人名審矣。」子思居於衛，有齊寇。或曰：「寇至，盍去諸？」子思曰：「如伋去，君誰與守？」**注**伋，子思名也。子思欲助衛君赴難。**疏**注「伋子」至「赴難」○正義曰：《史記·孔子世家》云：「孔子生鯉，字伯魚。伯魚年五十，先孔子死。伯魚生伋，字子思，年六十二，嘗困於宋。子思作《中庸》。」孟

子曰：「曾子、子思同道。曾子，師也，父兄也；子思，臣也，微也。曾子、子思易地則皆然。」**注**孟子以爲二人同道。曾子爲武城人作師，則其父兄，故去留無毀；子思，微小也，又爲臣，委質爲臣當死難，故不去也。子思與曾子易處同然。**疏**注「故去留無毀」○廷琥按：《說文》土部云：「毀，缺也。」《廣雅·釋言》云：「毀，虧也。」去留無毀謂曾子處師位，去留皆可，於道無所虧缺也。

章指：言臣當營君，師有餘裕。二人處義，非殊者也。是故孟子紀之，謂得其同。**疏**「謂得其同」○正義曰：周氏廣業《孟子章指攷

證云：「同，小字宋本，足利本並作宜。」

儲子曰：「王使人瞞夫子，果有以異於人乎？」**注**儲子，齊人也。瞞，視也。果，能也。謂

孟子曰：王言賢者身貌必當有異，故使人視夫子能有異於衆人之容乎。

疏「王使人瞞夫子」○正義曰：阮

氏元《按勘記》云：「王使人瞞夫子」，**①**宋九經本、岳本、咸淳衢州本、孔本、韓本、《攷文》古本同。監、毛二本瞞作瞞，

閩本注作「瞞」。按，《音義》出「瞞夫」作「瞞」，蓋此正與《滕文公》篇「陽貨瞞孔子」同字，音勘，譌爲瞞而以古覓切之，非也。下章同。○**注**「儲子」至「容乎」○正義曰：儲子見《戰國策·燕策》，謂齊宣王破燕者。此亦言儲子爲相，是爲齊人也。王氏念孫《廣雅疏證》云：「覲之言問也，問，覲也。」

《方言》云：「瞞，眄也。吳、揚、江、淮之間曰瞞。」《孟子·離婁》篇「王使人瞞夫子」，**注**云：「瞞，視也。」瞞與覲同。」按：

趙氏以視釋瞞，自非瞞字。《荀子·非相》篇云：「相人，古之人無有也，學者不道也。古者有姑布子卿，今之世梁有唐舉，相人之形狀顏色而知其吉凶妖祥，世俗稱之，古之人無有也，學者不道也。故相形不如論心，論心不如擇術。形不

勝心，心不勝術。」相即視也。《周禮·大司徒》「以相民宅而知其利害」，**注**云：「相，占視也。」趙氏蓋以齊王使善相人者相孟子之形狀也。下**注**言「堯舜之貌與凡人同，所以異乃仁義之道在內」，即荀子「相形不如相心」之說也。孟子曰：「何以異於人哉？堯舜與人同耳。」**注**人生同受法於天地之形，我當何以異於人哉？且堯舜之貌與凡人同耳，其所以異，乃以仁義之道在於內也。

章指：言人以道殊，賢愚體別；頭員足方，善惡如一。儲子之言，齊王之不達也。

疏「頭員足方」○正義曰：《大戴記·曾子天員》

篇云：「單居離問於曾子曰：『天圓而地方者，誠有之乎？』曾子曰：『天之所生上首，地之所生下首。上首之謂圓，下首之謂方。』」**注**云：「人首圓足方，因繫之天地。」《漢書·刑法志》云「人宵天地之貌」，**注**引應邵云：

「宵，類也。頭員象天，足方象地。」周氏廣業《孟子章指

①「瞞」，原作「瞞」，今從沈本據阮校改。

攷證云：「應氏說本《孝經援神契》。」

齊人有一妻一妾而處室者，其良人出則必饜酒肉而後反。其妻問所與飲食者，則盡富貴也。**注**良人，夫也。盡富貴者，夫詐言其姓名也。

疏注「良人」至「名也」○正義曰：《儀禮·士昏禮》云「媵御良席在東」，注云：「婦人稱夫曰良。《孟子》曰：

「將見良人之所之。」」王氏念孫《廣雅疏證》云：「良，長也。

《齊語》云：「四里爲連，連爲之長。十連爲鄉，鄉有良人。」

是良與長同義。婦稱夫曰良人，義亦同也。」又云：「郎之言

良也。《少儀》「負良綬」，鄭注云：「良綬，君綬也。」良與郎，

聲之侈弇耳，猶古者婦稱夫曰良，而今謂之郎也。」當時富貴

之人皆有姓名，其夫必悉言之。經渾括其辭云「則盡富貴」，

故趙氏明之。其妻告其妾曰：「良人出則必饜

酒肉而後反，問其與飲食者，盡富貴也而未

嘗有顯者來。吾將瞷良人之所之也。」**注**妻疑

其詐，故欲視其所之。**疏**「吾將瞷良人之所之也」○正

義曰：臧氏琳《經義雜記》云：「《祭義》記：「燔燎羶薌，見以

蕭光。」又：「薦黍稷，羞肝肺首心，見間以俠觶。」注：「見及

見間，皆當爲覲，字之誤也。燔燎馨香，覲以蕭光，取牲祭脂

也。覲以俠觶，謂雜之兩觶醴酒也。」正義曰：「覲謂雜也。」

據意皆是覲雜之理，觀此可知。《說文》見部無「覲」字，覲部

云：「覲，很視也。齊景公之勇臣有成覲者。」今《孟子·滕

文公上》「成覲謂齊景公曰」與《離婁下》「覲良人」同字，然則

覲即覲之俗。《說文》：「覲，並視也。从二見。」覲从覲，故

鄭訓爲雜，與《說文》義合。《孟子》「將覲良人之所之」者，謂

齊人妻將雜並衆人之中而視其夫所至也。趙氏祇訓爲視，

語意未周。一按：鄭以覲爲雜者，讀覲爲間雜之間也。趙氏

本瞷自是瞷，故訓爲視。《釋名·釋姿容》云：「視，是也。

察其是非也。」此不過察其是非，不必爲間諜也。蚤起，

施從良人之所之，徧國中無與立談者。卒之

東郭墦間，之祭者乞其餘。不足，又顧而之

他。此其爲饜足之道也。**注**施者，邪施而行，

不欲使良人覺也。墦間，郭外冢間也。乞其祭者

所餘酒肉也。**疏**注「施者邪施而行」○正義曰：錢氏大

昕《潛研堂答問》云：「施，古斜字。《史記·賈生列傳》

「庚子日施兮」，《漢書》作「斜」。邪，斜音義同也。」按：施

與迤通。《淮南子·要略訓》云「接徑直施」，注云：「施，衰也。」故趙氏以「邪」釋「施」。程氏瑤田《通藝錄·溝洫疆理小記》云：「東郭墦間」，墦之言墳也。以不墳者問之，則墦間亦猶兩者之間類也。」王氏念孫《廣雅疏證》云：「《釋丘》：「墦，冢也。」《說文》：「冢，高墳也。」墦之言般也。《方言》云：「般，大也。」山有墦冢之名，義亦同也。」閻氏若璩《釋地》云：「余每讀「東郭墦間之祭者」，趙注：「墦間，郭外冢間也。」以爲此古墓祭之切證。不知何緣至東漢建寧五年，蔡邕從車駕上陵，謂同坐者曰「聞古墓祭」，魏文帝黃初三年詔曰「古不墓祭」，自作《終制》曰「禮不墓祭」，此言既興，下到今紛紛撰述，皆以墓祭爲非古。余謂《孟子》且勿論，請博徵之。《成陽靈臺碑》：「慶都僂歿，蓋葬於茲，名曰靈臺，上立黃屋，堯所奉祠。」非墓祭之見於集乎？《韓詩外傳》曾子曰：「椎牛而祭墓，不如雞豚逮親存。」非墓祭之見於子乎？《周本紀》「成王上祭於畢」，畢，文王墓地也，非墓祭之見於史乎？《周禮·冢人》「凡祭墓爲尸」，非墓祭之見於經乎？更有可言者，孟子之前，孔子卒，葬魯城北泗水上，魯世世相傳，以歲時奉祠孔子冢，豈有非禮之祭而敢轍上聖人之冢者哉？」曹氏之升《摭餘說》云：「何氏焯《讀書記》云：「宋

元刊本以「卒之東郭墦間」句，「之祭者乞其餘」句，「不足」句，「又顧而之他」句。上文「矜良人之所之」，此「卒之」字，「之祭者」字，「之他」字，緊相貫注。按，卒字句，之字屬下「東郭」，東郭之墦冢非一，不必冢間皆有祭者，則其之東郭墦間矣。再矜之，乃之祭者乞其餘矣。趙氏言乞祭者所餘酒肉，固以「之祭者乞其餘」爲句。「其妻歸，告其妾，曰：「良人者，所仰望而終身也。今若此！」與其妾訕其良人而相泣於中庭。」**注**妻妾於中庭悲傷其良人，相對泣涕而謗毀之。**疏**注「妻妾」至「毀之」○正義曰：《說文》言部云：「訕，謗也。」《一切經音義》引《蒼頡篇》云：「訕，誹毀也。」《容齋二筆》謂「《孟子》齊人有一妻一妾」云云反復數十百語，而以「今若此」三字結之。比諸《左傳》「叔孫武叔使邱馬正侯犯殺邱宰」云云，末以「使如之」三字結之。按：《孟子》敘事，前云「其良人出，則必饜酒肉而後反，其妻問所與飲食者，則盡富貴也。其妻告其妾曰：良人出，必饜酒肉而後反，問所與飲食者，盡富貴也。」複上文，不嫌煩也。下云：「蚤起，施從良人之所之，徧國中無與立談者，卒之東郭墦間，之祭者乞其餘，不足，又顧而之他，此其爲饜足

之道也。其妻歸告其妾。「蚤起」下四十四字上承「吾將
 矐良人之所之也」，下接「其妻歸告其妾」，所矐於目中者
 如此，所歸而告於妾者亦如此。用「其妻歸告其妾」六字
 括上四十四字，^①不須複述也。既告之後，乃復曰：「良人
 者，所仰望而終身者也。今若此！」此字指上四十四字。
 已歸而告，故用此字指之。「其妻歸告其妾」六字句，不連
 曰字也。其下原有訕毀之辭，不復行之於文，故於「今若
 此」三字下云「與其妾訕其良人」，乃渾括之辭，與「則盡富
 貴」同。「今若此」三字非結語也。而良人未之知
 也，施施從外來，驕其妻妾。**注**施施猶扁扁，
 喜悅之貌。以爲妻妾不知，如故驕之也。**疏**注「施
 施猶扁扁喜悅之貌」○正義曰：《音義》云：「施施，丁依
 字。《詩》曰：『將其來施施。』」按：《毛詩·王風·丘中有
 麻》傳云：「施施，難進之意。」箋云：「施施，舒行伺間，獨
 來見己之貌。」趙氏皆不用，以爲「猶扁扁」者，《詩·小
 雅·巷伯》「緝緝翩翩」，《釋文》云：「翩，字又作扁。」張華
 《鶴鵲賦》云：「翩翩然有以自樂也。」施之義爲哀，偏之義
 亦爲哀。施施猶扁扁，即猶偏偏，以轉注爲假借也。《漢
 書·敘傳》云「魏其翩翩」，顏師古注亦云：「翩翩，自喜之

貌。」由君子觀之，則人之所以求富貴利達
 者，其妻妾不羞也而不相泣者，幾希矣。**注**
 由，用也。用君子之道觀今求富貴者，皆以枉曲之
 道昏夜乞哀而求之，以驕人於白日，由此良人爲妻
 妾所羞爲、所泣傷也。幾希者，言今苟求富貴，妻
 妾雖不羞泣者，與此良人妻妾何異也？**疏**注「由
 用也」○正義曰：《毛詩·王風》「君子陽陽，右招我由
 房」，傳云：「由，用也。」此由如字，故訓用。下「由此良
 人」之由則爲猶之通借字。

章指：言小人苟得，謂不見知。君子
 觀之，與正道乖。妻妾猶羞，況於國人？
 著以爲戒，耻之甚焉。

姪廷琮廷弼校字

孟子正義卷十七終

①「歸」，原脫，今從沈本據前後文意及經文補。

孟子正義卷十八

江都縣鄉貢士焦循撰集

孟子卷第九

萬章章句上凡九章。^①**注**萬章者，萬姓，章名，孟子弟子也。萬章問舜孝猶《論語》顏淵問仁，因以題篇。**疏**注「萬章」至「子也」○正義曰：《齊乘》

云：「萬章，滕州南萬村有墓，齊人，孟子弟子。」趙氏佑《溫故錄》云：「《萬章》上卷皆以類相從，論次古帝王聖賢遺事。蓋自仲尼沒而微言絕，七十子喪而大義乖，《詩》《書》傳記之稱述或失其指歸，帝王聖賢之行事徒便於依託，放恣橫議而譌傳悠繆之談以滋。孟子獨得聖人之傳，深窺古人之心，與其徒相發明而是正之。萬子尤孟門高弟，故其辨難獨多。然則孟子誠不在禹下，而萬

章之功亦偉矣。」

萬章問曰：「舜往于田，號泣于旻天。

何爲，其號泣也？」**注**問舜往至于田，何爲號泣也？謂耕於歷山之時。**疏**注「舜往至于田」○正義

曰：《禮記·玉藻》云「大夫有所往」，注云：「往，之也。」《呂

氏春秋·貴生》篇云「必察其所以之」，高誘注云：「之，至

也。」是「往」即「至」也。王氏鳴盛《尚書後案》云：「往于

田」三句見《孟子》，不言是《書》辭。」江氏聲《尚書集注音疏》

云：「文似《尚書》，而不稱《書》曰」。《說文》日部引《虞書》

云：「仁覆閔下，則稱旻天。」據許君《五經異義》引古《尚書》

說「仁覆閔下，則稱旻天」，則日部所引《虞書》，乃古《尚書》

說也。」孟子曰：「怨慕也。」**注**言舜自怨遭父母見

惡之厄而思慕也。萬章曰：「父母愛之，喜而

不忘，父母惡之，勞而不怨。然則舜怨

乎？」**注**言孝法當不怨如是，舜何故怨？**疏**「父

①「凡九章」，原作大字，今據經解本改爲小字。

母「至」不怨。○正義曰：《禮記·祭義》云：「曾子曰：父母愛之，喜而弗忘；父母惡之，懼而無怨。」注云：「無怨，無怨於父母之心。」亦見《大戴記·曾子大孝》篇。《尸子·勸學》篇引曾子云：「父母愛之，喜而不忘；父母惡之，懼而無咎。」曰：「長息問於公明高曰：『舜往于田，則吾既得聞命矣；號泣于旻天，于父母，則吾不知也。』」公明高曰：「是非爾所知也。」**注**長息，公明高弟子；公明高，曾子弟子。旻天，秋也，憂陰氣也。故訴于旻天。高非息之問不得其義，故曰非爾所知。**疏**注「旻天」至「旻天」○正義曰：《爾雅·釋天》云：「秋爲旻天。」劉熙《釋名·釋天》云：「秋曰旻天。旻，閔也。物就枯落，可閔傷也。」《禮記·鄉飲酒義》云：「秋之爲言愁也。」《春秋繁露·官制象天》云：「秋者，少陰之選也。」《說文·心部》云：「憂，愁也。」愁，憂也。憂愁即閔傷，故云「憂」。「陰氣」，閔、監、毛三本作「幽陰」。《爾雅·釋言》云：「號，諄也。」宣公十二年《左傳》「號申叔展」，《國語·晉語》「公號慶鄭」，《顏氏家訓·風操》篇云「禮以哭有言者爲號」，此云「號泣」，則是且言且泣，故云「訴」也。夫公明高以孝子之心爲不若是恕。**注**恕，無愁

之貌。孟子以萬章之問難自距之，故爲言高、息之相對如此。夫公明高以爲，孝子不得意於父母，自當怨悲，豈可恕恕然無憂哉？因爲萬章具陳其意。**疏**注「恕無愁之貌」○正義曰：臧氏琳《經義雜記》云：「《說文·心部》無「恕」字，有「忿」字，云：「忽也。从心，介聲。《孟子》曰：『孝子之心不若是忿。』」據此，知古本《孟子》作「忿」，今作「恕」爲俗字。忽忘於心即是「無愁」，與趙氏義合，知本作「忿」也。」段氏玉裁《說文解字注》云：「忿，恕古今字。」我竭力耕田，共爲子職而已矣。父母之不我愛，於我何哉？**注**我共人子之事，而父母不我愛，於我之身獨有何罪哉？自求責於己而悲感焉。**疏**「我竭」至「何哉」○正義曰：此即代述訴天之言也。我雖竭力耕田，不過共子職而已。此外宜盡者甚多，則得罪於父母處亦甚多，不知父母之不我愛是於何罪也。「何哉」正言罪之多也。一說此申言上「恕」字，若恕然無愁，則以我既竭力耕田共子職矣，尚有何罪而父母不我愛哉？孝子必不若是也。此說與經文不達，宜從趙氏。帝使其子九男二女，百官牛羊倉廩備，以事舜於畎畝

之中。**注**帝，堯也。堯使九子事舜以爲師，以二女妻舜，百官致牛羊，倉廩致粟米之餼，備具饋禮，以奉事舜於畎畝之中。由是遂賜舜以倉廩牛羊，使得自有之。《堯典》曰「釐降二女」，不見九男。孟子時《尚書》凡百二十篇，逸《書》有《舜典》之敘，亡失其文。孟子諸所言舜事，皆《堯典》及逸《書》所載。獨丹朱以胤嗣之子臣下以距堯求禪，其餘八庶無事，故不見於《堯典》。猶晉獻公之子九人，五人以事見於《春秋》，其餘四子亦不復見。**疏**注「帝堯」至「有之」

○正義曰：堯舜皆稱帝，此使事舜者堯，知「帝」即「堯」也。二女事舜是妻舜，九男云事舜自是事以爲師。《周禮·秋官·掌客》：「掌四方賓客之牢禮餼獻飲食之等數。」其饋禮，「羣四牢，米百有二十筥」。《掌訝》：「若將有國賓客至，則戒官修委積。」注云：「官謂牛人、羊人、舍人、委人之屬。」賈氏疏云：「以委積有牛羊豕米禾芻薪之等，舍人掌給米稟，委人掌芻薪之委。」是牛羊米粟皆有官掌之，故云「百官致牛羊，倉廩致粟米之餼」，倉廩亦百官所致也。以《周禮》推之，堯時當亦然也。後云「牛羊父母，倉廩父母」，則是爲舜所自有，故趙分別言之。言此牛羊、倉廩爲百官所致者，

乃初以賓禮饋舜之餼羣也。其舜得自有之者，則堯所賜也。○注「堯典」至「復見」○正義曰：《虞書·堯典》云：「岳曰：『瞽子，父頑，母嚚，象傲，克諧以孝，烝烝乂，不格姦。』」帝曰：「我其試哉！」女于時，觀厥型于二女。釐降二女于媯汭，嬪于虞。」江氏聲《尚書集注音疏》云：「二女，長曰娥皇，次曰女英。夫婦之際，人道之大倫，故堯欲以此觀舜。《論衡·正說》篇云：『妻以二女，觀其夫婦之法。』是也。」王氏鳴盛《尚書後辨》云：「慎徽五典」與「帝曰欽哉」緊相承接，本係一篇，直至「陟方乃死」，皆《堯典》也。此伏生本，而孔安國所得真古文與之合。安國於《堯典》之外又有《舜典》，如《論語》「天之歷數」，《孟子》「祇載見瞽瞍」，皆《舜典》文。但逸《書》不列學官，藏在秘府，人不得見。按：趙氏言「逸《書》有《舜典》之敘，亡失其文」，是趙氏未見古文《舜典》，蓋疑九男事在所亡失之《舜典》中。《史記·五帝本紀》云：「堯乃以二女妻舜以觀其內，使九男與處以觀其外。舜居媯汭，內行彌謹，堯二女不敢以貴驕事舜親戚，甚有婦道，堯九男皆益篤。」毛氏奇齡《舜典補亡》云：「《尚書》有《堯》《舜》二典出伏生壁中，謂之今文。漢司馬談作《本紀》時采其文，依次抄入《紀》中。相傳亡《舜典》一篇，不知何時而亡。細檢其辭，則《舜典》尚存半篇在《堯典》後，徒以編今文

者脫去《書》序，誤與《堯典》連篇，謂但有《堯典》而無《舜典》。而其在古文，則實亡《舜典》前截，未嘗全亡。而不曉《舜典》後截在《堯典》中，以致蕭齊建武間，吳人姚方興得《舜典》二十八字於大桁頭，妄攙之「釐降二女」之後「慎徽五典」之前，以爲《舜典》不亡。而不知「慎徽五典」以後至「放勳殂落」尚是《堯典》，惟「月正元日」以後始是《舜典》。春秋戰國間諸書引經凡稱《堯典》者，祇在「慎徽五典」以後「放勳殂落」以前，《史記·五帝本紀》則正載二《典》之全者，雖引掇皆不用原文，然踪跡可見。是自「曰若稽古帝堯」起至「放勳乃殂落」止是《堯紀》，即是《堯典》；自「月正元日」起至「舜生三十徵庸」止是《舜紀》，即是《舜典》；而「月正元日」以前則尚有《舜典》半截在《帝舜紀》中，因即取《帝舜紀》文在「月正元日」以前者補《舜典》之亡。雖其辭與本經不同，然大概可睹也。」毛氏此說，則《史記》言「九男」，即刺取《舜典》之文，正可申明趙氏注義。惠氏棟《古文尚書考》云：

「《孟子》趙岐注云云，則可證其未嘗見古文《舜典》矣。蓋古文《舜典》別自有一篇，與今文之《尚書》析《堯典》而爲二者不同，故《孟子》引二十有八載，放勳乃殂落」爲《堯典》不爲《舜典》，《史記》載「慎徽五典」至「四罪而天下咸服」於《堯本紀》不於《舜本紀》。孟子時典謨完具，篇次未亂，固的然可

信，馬遷亦親從安國問古文，其言亦未爲謬也。余嘗意「舜往于田」祇載見瞽瞍「與不及貢，以政接於有庫」等語，安知非《舜典》之文？又「父母使舜完廩」一段，文辭古崛，不類《孟子》本文。《史記·舜本紀》亦載其事，其爲《舜典》之文無疑。」惠氏略與毛氏同。段氏玉裁《尚書撰異》云：「趙氏言『皆《堯典》及逸《書》所載』，此《堯典》乃《舜典》之誤，「及」字衍，傳寫之失也。此章及「不告而娶章」及「原原本來」數語，及「祇載見瞽瞍」數語，皆當是《舜典》中語。蓋舜登庸以後事全見於《堯典》，登庸以前及家庭事乃在《舜典》也。此注上文云「逸《書》有《舜典》之敘，亡失其文」，則此正當作「孟子所言諸舜事皆《舜典》逸《書》所載」，謂亡失文中語也。「舜」既譌「堯」，淺人乃又妄沾「及」字。」呂氏春秋·去私篇云：「堯有子十人，不與其子而授舜。」高誘注云：「孟子曰『堯使九男二女事舜』，此曰『十子』，殆丹朱爲冑子，不在數中。」趙氏於丹朱外稱八庶，不依《呂覽》，以丹朱在九子中。《史記索隱》引皇甫謐云：「堯娶散宜氏之女曰女皇，生丹朱，又有庶子九人，皆不肖也。」此依《呂覽》爲說也。孔氏廣森《經學卮言》云：「丹朱之外尚有九庶，高誘亦以意推說耳。若據《莊子》『堯殺長子考監明』，則丹朱本以次長宜嗣。或當事舜之時長子已亡，惟有九男，丹朱仍得在數中，

又未可定。」謂「丹朱獨見《堯典》者，《堯典》云：「帝曰：『疇咨若時登庸。』」放齊曰：「胤子朱啓明。」馬融注云：「義、和爲卿官，堯之末年皆以老死，庶績多闕，故求賢順四時之職，欲用以代義、和。」周氏用錫《尚書證義》云：「《釋言》：『若，順也。』《釋詁》：『登，成也。』《周禮·司勳》：『民功曰庸。』「若時登庸」，順天時以成民功也。」《史記》本紀於「命義、和」之下即承云「堯曰：誰可順此事？」放齊曰：「嗣子丹朱開明。」此事指上義、和而言，馬氏正本此爲注。然則並非求禪，未知趙氏所本。趙氏佑《溫故錄》云：「天下定於與子，本萬古之常經。自堯始變之，亦以得人如舜而然耳。然且至歷年多，施澤於民久而後定。若當洪水未作，天下方平，堯止應率其常。苟欲息肩，亦惟禪子，朱即不肖，擇在朝賢相以輔之可矣。萬不獲已，擇九男中之賢與之可矣。必無預設成心，急圖改計，求不知誰何之人，草次而爲之，是亂天下也。豈堯之所以爲堯哉？彼以疇咨爲求禪，不可不辨也。」引晉獻公之事者，僖公二十四年《左傳》介之推云：「獻公之子九人，惟君在矣。」君謂重耳。五人以事見於《春秋》者，重耳之外，若申生、夷吾、奚齊、卓子是也。天下之士多就之者。帝將胥天下而遷之焉，爲不順於

父母，如窮人無所歸。**注**天下之善士多就舜而悅之。胥，須也。堯須天下悉治，將遷位而禪之。順，愛也。爲不愛於父母，其爲憂愁，若困窮之人無所歸往也。**疏**注「天下」至「悅之」○正義曰：《史記·五帝本紀》云：「一年而所居成聚，二年成邑，三年成都。」《呂氏春秋·慎人》篇云：「舜耕於歷山，陶於河濱，釣於雷澤，天下悅之，秀士從之。」善士即「秀士」也。又云：「其遇時也，登爲天子，賢士歸之，萬民譽之，丈夫女子振振殷殷，無不戴說。」○注「胥須」至「禪之」○正義曰：《漢書·敘傳上》《集注》引應劭云：「胥，須也。」《史記·廉頗藺相如傳》《索隱》云：「胥，須古人通用。」《管子·大匡》云「姑少胥，其自及也」，注云：「胥，待也。」待即須也。「堯待天下悉平」，謂既歷試諸艱，齊七政，類上帝，揖五瑞，作教刑四罪，而天下咸服，然後令舜攝行天子之政也。按：《爾雅·釋詁》云：「胥，相也。」《方言》云：「胥，輔也。」吳越曰胥。「胥天下」即輔相天下，《易》所謂「裁成輔相，以左右民」也。《史記》本紀云：「堯知子丹朱之不肖，不足授天下，於是乃權授舜。授舜則天下得其利而丹朱病，授丹朱則天下病而丹朱得其利。堯曰：『終不以天下之病而利一人。』而卒授舜以天下。」以

利天下而授舜，即是輔相天下也。《說文》疋部云：「遷，登也。」登即升也，進也。謂進而升諸君位也。○注「順愛」至「往也」○正義曰：趙氏以「不順於父母」即上云「父母之不我愛」，故以「順」爲「愛」也。《論語·堯曰》篇云：「四海困窮。」《廣雅·釋詁》云：「困，窮也。」歸，往也。「天下之

士悅之，人之所欲也。」**注**欲，貪也。**疏**注「欲貪也」

○正義曰：《說文》欠部云：「欲，貪欲也。」《呂氏春秋·大樂》篇云「天使人有欲」，《論威》篇云「人情欲生而惡死」，高誘皆以貪釋欲。而不足以解憂；好色，人之所欲，妻帝之二女而不足以解憂；富，人之所欲，富有天下而不足以解憂；貴，人之所欲，貴爲天子而不足以解憂。人悅之、好色、富貴，無足以解憂者，惟順於父母可以解憂。**注**言爲人所悅，將見禪爲天子，皆不足以解憂。獨見愛於父母爲可以解己之憂。

「人少則慕父母，知好色則慕少艾，有妻子則慕妻子，仕則慕君。不得於君則熱中。」**注**慕，思慕也。人少，年少也。艾，美好也。不得於

君，失意於君也。熱中，心熱恐懼也。是乃人之情。

疏注「艾，美好也」○正義曰：翟氏灝《考異》云：「程氏《考

古篇》曰：「經傳無以艾爲好之文。衡有士子陳其所見云：

少當讀爲「少長則習騎射」之少。艾當爲乂，艾即衰減之義。

「慕少艾」云者，知好色則慕差減于孺子時也。」按，《典禮》

「五十曰艾」，疏謂「髮蒼白色如艾也」。蓋古但訓艾爲白，而

白義含有一焉：以髮蒼白言謂之老，以面白哲言則謂之美，

同取於艾之色也。《戰國策》魏牟謂趙王曰「王不以予工乃

與幼艾」，高誘注云：「艾，美也。」屈子《九歌》「憇長劍兮擁

幼艾」，王逸注亦以艾爲美好。《晉語》狐突語申生曰「國君

好艾大夫殆」，韋昭注以艾爲嬖臣，乃指男色之美好者。漢

張衡《東京賦》「齊騰驤以沛艾」，薛綜注以沛艾爲作姿容貌。

程氏謂傳載中無以艾爲好者，豈誠說乎？《說文》祇據《魯

頌》、《曲禮》訓爲「長老」，遺《孟子》、《國語》、《國策》等所用

一義，不當因以改讀《孟子》。翟氏說是也。然艾古通乂，亦

通刈，《說文》云：「乂，艾艸也。或从刀。」是乂、刈、艾字同。

《書·皋陶謨》云「俊乂在官」，馬、鄭注並云：「才德過千人

爲俊，百人爲乂。」以美好爲乂，猶以美才爲俊，即猶以美士

爲彦。乂爲艾艸，故義亦爲絕。宣公十五年《左傳》云「鄭舒

有三雋才」，注云：「雋，絕異也。」雋即俊，美好之爲艾，又如稱美色者爲絕色。彼以艾無美好之義者，鄙矣。然亦非取於艾色之白也。○注「熱中心熱恐懼也」○正義曰：「禮記·文王世子」云「禮樂交錯於中」，注云：「中，心也。」故熱中爲心熱。《素問·陰陽應象大論》云：「人有五藏，化五氣，以生喜怒悲憂恐。北方生寒，在變動爲慄，在志爲恐。」《宣明五氣篇》云：「五精所并，精氣并於腎則恐。」王冰注云：「心虛則腎并之，爲恐。」然則恐懼生於寒不生於熱，生於心虛不生於心熱。趙氏以「不得於君」是不爲君所寵用，將被謫斥，故恐懼耳。近時通解以熱中爲躁急，是也。《腹中論》云：「帝曰：『夫子數言熱中消中不可服高梁芳草石藥，石藥發瘕，芳草發狂。夫熱中消中者，皆富貴人也。今禁高梁，是不合其心，禁芳草石藥，是病不愈，願聞其說。』」岐伯曰：「夫芳草之氣美，石藥之氣悍，二者其氣急疾堅勁，故非緩心和人，不可以服此二者。」又云：「熱氣慄悍，藥氣亦然。」此謂熱中之病，心不和緩。心不和緩，是爲焦急。孟子借病之熱中以形容失意于君者也。大孝終身慕父母。五十而慕者，予於大舜見之矣。」**注**大孝之人終身慕父母，若老萊子七十而慕，衣五采之衣，

爲嬰兒匍匐於父母前也。我於大舜見五十而尚慕父母。《書》曰：「舜生三十徵庸，三十在位。」在位時尚慕，故言五十也。**疏**注「若老萊」至「前也」○正義

曰：舊疏引《高士傳》云：「老萊子，楚人。少以孝行養親，極甘脆，**①**年七十父母猶存，萊子服荊蘭之衣，爲嬰兒戲親前，言不稱老，爲親取食上堂，足跌而偃，因爲嬰兒啼，誠至發中。楚室方亂，乃隱耕於蒙山之陽，著書號《萊子》，莫知所終。」今皇甫謐《高士傳》無此文。馬氏驥《經史》引《列女傳》云：「老萊子孝養二親，行年七十，作嬰兒自娛，著五采編爛衣。嘗取漿上堂，跌仆，因卧地爲小兒啼，或弄雞鳥於親側。」今劉向《列女傳》亦無此文。○注「書曰」至「五十也」○正義曰：阮氏元《校勘記》云：「廖本、孔本、韓本、足利本作『三十在位』，閩、監、毛三本三作『五』，《考文》古本作『二』。」段玉裁曰：作五者非也，作三者亦未是，作二者是也。古文《尚書》舜生三十登庸，三十在位，五十載，馬融、王肅、姚方興本之爲舜年百十二歲之說，今文《尚書》舜生三十徵庸，二十在位，五十載，《大戴禮·五帝德》、《史記·五

①「脆」，原誤作「跪」，今從沈本據偽孫奭疏及經解本改。

帝本紀》、皇甫氏《帝王世紀》皆本之爲舜年百歲之說。王充、趙岐，皆從今文者也。《論衡·氣壽》篇曰：「舜生三十徵用，二十在位，五十載陟方乃死，適百歲矣。」趙注此章「五十而慕」云：「《書》曰舜生三十徵庸，二十在位。在位時尚慕，故言五十也。」合三十二十，正是五十，乃爲「五十而慕」之證。今本作三十在位，何可通邪？今本《論衡》亦改二十在位作三十在位，使下文「適百歲」之語不可接，皆由不知今文、古文之異也。鄭康成注古文，而用今文正古文。正義曰：「鄭玄讀此經云，舜生三十，謂生三十年也，登庸二十，謂歷試二十年，在位五十載陟方乃死，謂攝位至死爲五十年，舜年一百歲也。」此正鄭說三當作二，以今正古，故正義冠之以「鄭玄讀此經云」六字。不則直曰「鄭某云」、「鄭云」而已，未嘗有「鄭玄讀此經云」之例。「讀此經」者，明此經之本不如是也。此所以馬、王、姚作三十在位而鄭作二十也。」

章指：言夫孝，百行之本，無物以先之。雖富有天下而不能取悅於其父母，莫有可也。孝道明著，則六合歸仁矣。**疏**「夫

孝」至「先之」○正義曰：周氏廣業《孟子章指考證》云：

「孔、韓本作夫，古本作大。」《白虎通》：「孝道之美，百行

之本也。」《漢書》平當上言稱《孝經》曰：「人之行莫大於孝。」鄭康成《論語》注：「孝爲百行之本。人之爲行，莫先於孝。」《漢書·杜欽傳》欽對策白虎殿云：「孝，人行之所先也。」

萬章問曰：「《詩》云：『娶妻如之何？

必告父母。』信斯言也，宜莫如舜。舜之不告而娶，何也？」**注**《詩》、《齊國風·南山》之篇。言娶妻之禮，必告父母。舜合信此詩之言，何爲違禮，不告而娶也？**疏**注「詩齊」至「娶也」○正義曰：引《詩》

在《南山》篇第三章。傳云：「必告父母廟。」箋云：「取妻之禮，議於生者，卜於死者，此之謂告。」蓋詩爲文姜嫁魯桓公而發，時魯惠公及仲子俱歿，桓娶文姜無父母可告，故傳以爲「告廟」，而箋則兼言生死以補之。舜之告則議於生者矣。近時通解「信斯言也，宜莫如舜」謂「誠如詩之所言，則告而娶宜莫如舜」。《詩》在舜後，趙氏謂「舜合信此詩之言」，非其義也。孟子曰：「告則不得娶。男女居室，人之大倫也。如告，則廢人之大倫以對父

母，是以不告也。」**注**舜父頑母嚚，常欲害舜，告則不聽其娶，是廢人之大倫以怨懟於父母也。**疏**注

「舜父」至「母也」○正義曰：「父頑母嚚」，《尚書·堯典》文。

《史記·五帝本紀》云：「瞽瞍愛後妻子，常欲殺舜。」後焚廩，擄井，亦其事也。《爾雅·釋言》云：「懟，怨也。」萬章

曰：「舜之不告而娶則吾既得聞命矣，帝之妻舜而不告，何也？」**注**禮，娶須五禮，父母亢答以辭，是相告也。帝謂堯也。何不告舜父母也？

疏注「禮娶」至「告也」○正義曰：五禮者，蓋納采、問名、納

吉、納徵、請期，然後親迎也。《儀禮·士昏禮》記納采之辭云：「昏辭曰：『吾子有惠，貺室某也。』某有先人之禮，使某也請納采。」對曰：「某之子蠢愚，又弗能教。吾子命之，某不敢辭。」致命曰：「敢納采。」記問名之辭云：「問名曰：

『某既受命，將加諸卜，敢請女爲誰氏？』對曰：『吾子有命，且以備數而擇之，某不敢辭。』記納吉之辭云：「納吉曰：

『吾子有貺命，某加諸卜，占曰吉，使某也敢告。』對曰：『某之子不教，唯恐弗堪。子有吉，我與在，某不敢辭。』記納徵之辭云：「納徵曰：『吾子有嘉命，貺室某也。某有先人之禮，儷皮束帛，使某也請納徵。』致命曰：『某敢納徵。』對

曰：『吾子順先典，貺某重禮。某不敢辭，敢不承命？』記請期之辭云：「請期曰：『吾子有賜命，某既申受命矣。惟是三族之不虞，使某也請吉日。』對曰：『某既前受命矣，唯命是聽。』曰：『某命某聽命於吾子。』對曰：『某固惟命是聽。』使者曰：『某使某受命，吾子不許，某敢不告期？』曰『某日』。對曰：『某敢不須敬？』凡此皆父母亢答之辭也。《史記·酈生陸賈傳》云「與天子抗衡」，《索隱》引崔浩云：「抗，對也。」抗與亢通，亢答即對答。《漢書·高帝紀》：沛公還軍亢父，注引鄭氏云：「亢音人相抗答。」是也。曰：

「帝亦知告焉則不得妻也。」**注**帝堯知舜大孝。

父母止之，舜不敢違，則不得妻之。故亦不告。**疏**

注「帝堯」至「不告」○正義曰：趙氏佑《溫故錄》云：「此言瞽瞍不可以違帝而可以禁其子，帝力可以制瞽而不可強舜爲違父也。」析義精審。

萬章曰：「父母使舜完廩，捐階，瞽瞍焚廩。使浚井，出，從而擄之。」**注**完，治也。廩，

倉；階，梯也。使舜登廩屋，而捐去其階，焚燒其廩也。一說捐階，舜即旋從階下，瞽瞍不知其已下，故焚廩也。使舜浚井，舜人而即出，瞽瞍不知其已出，

從而蓋其井，以為死矣。**疏**注「完治」至「死矣」○正義

曰：《說文》六部云：「完，全也。古文以為寬字。」《禮記·祭統》云「不明其義，君人不全」，注云：「全猶具也。」蓋原有此廩屋，有破毀處，使舜登而補葺完全之，亦是「治」也。《說文》云：「向，穀所振入宗廟粢盛，倉黃向而取之，故謂之向。从人回，象屋形中有戶牖。」倉，穀藏也。倉黃取而藏之，故謂之倉。《呂氏春秋·季春紀》「發倉窮」，高誘注云：「方者曰倉。」荀子·榮辱篇云「有困廩」，注云：「方曰廩。」是倉、廩通稱也。劉熙《釋名·釋宮室》云：「階，梯也。如梯之有等差也。」《禮記·喪大記》云「虞人設階」，注云：「階，所乘以升屋者。」《說文》木部云：「梯，木階也。」蓋階與梯畧有別。此完廩所用以升屋者則是木階，故以「梯」釋之，以別乎東階西階之階也。《說文》手部云：「捐，棄也。」棄即去也，故云「捐去其階」。「一說旋階」者，訓捐為旋也。《爾雅·釋器》云：「環謂之捐。」《小爾雅·廣言》云：「旋，還也。」環，還字通，捐為環，是即為旋也。「捐階」與「出」對言，出是人而即出，故以捐階是「旋從階下」也。《史記·五帝本紀》云：「堯乃賜舜絺衣與琴，為築倉廩，予牛羊。瞽瞍尚復欲殺之，使舜上塗廩，瞽瞍從下縱火焚廩。舜乃以兩笠自扞而下，去，得不死。後瞽瞍又使舜穿井，舜穿井為匿空旁出。」

舜既深入，瞽瞍與象共下土實井，舜從匿空出，去。《索隱》引《列女傳》云「二女教舜鳥工上廩」是也。《正義》引《通史》云：「瞽叟使舜滌廩，舜告堯二女。女曰：「時其焚汝，鵠汝衣裳鳥工往。」舜既登廩，得免去。舜穿井，又告二女。二女曰：「去汝裳衣龍工往。」入井，瞽叟與象下土實井，舜從他井出，去也。」按：今《列女傳》但言「舜往飛出」，不言鳥工。蓋飛出即所謂旋也。《通史》梁武帝撰，見《隋書·經籍志》。或云使完廩者，父母也，焚廩者，瞽瞍也。只一瞽瞍，此舜所以得免。「出從而捨之」，此句尤明。蓋雖惑於後妻，而父子之恩原不泯斷，到死生之際自有以斡旋之，即謂之慈父可也。《史記集解》引劉熙云：「舜以權謀自免，亦大聖有神人之助也。」象曰：「謨蓋都君咸我績。」**注**象，舜異母弟。謨，謀，蓋，覆也。都，於也。君，舜也。舜有牛羊倉廩之奉，故謂之君。咸，皆，績，功也。象言謀覆於君而殺之者，皆我之功。欲與父母分舜之有，取其善者，故引其功也。**疏**注「象舜」至「功也」○

正義曰：《史記·五帝本紀》云：「舜父瞽叟盲，而舜母死，瞽叟更娶妻而生象。」是象為舜異母弟也。《爾雅·釋詁》云：「謨，謀也。」《釋言》云：「弁，蓋也。」孫炎注云：「蓋亦覆

之意。」襄公十七年《左傳》云「不如蓋之」，服虔注云：「蓋，覆蓋之。」是「蓋」爲揜，即爲「覆」也。《爾雅·釋詁》云：「都，於也。」近時通解謂舜所居三年成都，故謂「都君」。趙氏謂「有倉廩牛羊之奉，故謂之君」。奉即《漢帝紀》「列侯幸得餐錢奉邑」之奉。《廣雅·釋詁》云：「奉，祿也。」既食祿奉，則是尊官。《儀禮·喪服傳》「君至尊也」，注云：「天子諸侯及卿大夫有地者皆曰君。」雖成都，未嘗君之，故解「都」爲「於」。是時未知所處何等，故但以奉知爲君也。「咸，皆也」，「績，功也」，均《爾雅·釋詁》文。阮氏元《釋蓋》云：「《爾雅·釋言》：『蓋，割裂也。』害、曷、盍、末、未，古音皆相近，每加偏旁互相假借，若以爲正字則失之。《書·呂刑》曰「鰥寡無蓋」，蓋即害字之借，言堯時鰥寡無害也。僞傳云：「使鰥寡得所，無有掩蓋。」失之矣。《爾雅釋文》：「蓋，舍人本作害。《孟子》『謀蓋都君』，此兼井、廩言之，蓋亦當訓爲害也。若專以謀蓋爲蓋井而不兼焚廩，則「咸我績」咸字無所著矣。」牛羊父母，倉廩父母；**注**欲以牛羊倉廩與其父母。干戈朕，琴朕，張朕，二嫂使治朕棲。**注**干，楯；戈，戟也。琴，舜所彈五弦琴也。張，彫弓也。天子曰彫弓。堯禪舜天下，故賜之彫

弓也。棲，牀也。二嫂，娥皇、女英。使治牀，欲以爲妻也。**疏**注「干楯」至「妻也」○正義曰：「干，楯」、「戈，戟」，詳見《梁惠王下》。邵氏晉涵《爾雅正義》云：「《通典》引揚雄《清英》云：「舜彈五弦之琴而天下化，堯加二弦以合君臣之思。」是舜彈五弦之琴也。《音義》云：「張，都禮切。丁音彫，云：『義與弇同。』趙氏讀「張」爲「彫」，故以爲「彫弓」。《毛詩·大雅·行葦》「敦弓既堅」，傳云：「敦弓，畫弓也。天子敦弓。」《釋文》云：「敦音彫。」孔氏正義云：「敦與彫，古今之異。彫是畫飾之義，故曰：「敦弓，畫弓也。《冬官》「弓人爲弓」唯言用漆，不言畫，則漆上又畫之。彼不言畫，文不具耳。此述天子擇士，宜是天子之弓，故言「天子敦弓」。其諸侯公卿宜與射者，自當各有其弓，不必畫矣。定四年《公羊傳》何休注云：「天子彫弓，諸侯彤弓，大夫嬰弓，士盧弓。」事不經見，未必然也。」按：氏、周皆訓至。《說文》車部云：「輦，抵也。」鄭氏《士喪禮》注云：「輦，輦也。輦，輦字同。輦之爲抵，猶彫之爲張矣。乃此時堯不當有禪舜之意，以張爲天子之弓，於義未協。趙氏佑《溫故錄》云：「張或別一弓之名，舜所常用，亦如五弦之琴爲舜自作者耳。」按：《廣韻》引《埤蒼》云：「張，舜弓名。」趙氏佑《溫故錄》之

說爲得之矣。《廣雅·釋器》云：「棲謂之牀。」《釋詁》云：「棲，竝也。」王氏念孫《廣雅疏證》云：「棲者，人物所棲也。即度閣之意也。」《藝文類聚》引《尸子》云：「堯聞其賢，徵之草茅之中，與之語禮樂而不逆，與之語政，至簡而易行，與之語道，廣大而不窮，於是妻之以媼，媼之以娥。」《列女傳·母儀傳》云：「有虞二妃者，帝堯之二女也。長娥皇，次女英。」《漢書·古今人表》女英作女嬃。《大戴禮記·帝繫》篇云：「舜娶於帝堯之子，謂之女媼。」媼，英一聲之轉也。《荀子·修身》篇云：「少而理曰治。」《呂氏春秋·振亂》篇云：「欲民之治也」，高誘注云：「治，整也。」使二嫂整理安息之處，猶云侍寢也。象往人舜宮，舜在牀琴。象曰：「鬱陶思君爾。」忸怩。**注**象見舜生在牀鼓琴，愕然反辭曰：我鬱陶思君，故來。爾，辭也。忸怩而慙，是其情也。**疏**注「象見」至「情也」○正義曰：《說文》土部云：「在，存也。」存亡猶死生也，故以「生」釋「在」。《史記·五帝本紀》云：「象乃止舜宮居，鼓其琴。舜往見之，象愕不懌曰：『我思舜正鬱陶。』」舜曰：「然，爾其庶矣。」此與《孟子》略不同。按：《孟子》之文，舜已出井而象乃揜蓋。是舜先已在宮，象揜畢而後來，未見舜，先已聞琴，故愕然反。愕

與還同，《說文》是部云：「還，相遇驚也。」《漢書·張良傳》云：「良愕然，欲歐之」，注云：「愕，驚貌也。」《淮南子·汜論訓》云：「紂居於宣室而不反其過」，高誘注云：「反，悔也。」《列子·仲尼》篇云：「回能仁而不能反」，注云：「反，變也。」謂悔其不當來而變易其初心也。《史記》以瞽瞍與象實土後舜乃從匿空旁出，故以爲象先居舜宮，鼓其琴，舜後入宮見之。若此，則象先不知舜未死，既居舜宮，必已彰其跋扈之迹，則鬱陶思舜之言何能自揜？《史記》非也。惟舜先從井出，潛自入宮，知象將來，故鼓琴以示之。既示其未死，且感以和，此象所以愕然而悔也。《說苑·建本》篇云：「曾子芸瓜而誤斬其根，曾皙怒，援大杖擊之。曾子仆地，有頃，蘇，蹙然而起，退屏鼓琴而歌，欲令曾皙聽其歌聲，令知其平也。孔子聞之，告門人曰：『參來勿內也。』汝聞瞽瞍有子名曰舜。舜之事父也，索而使之，未嘗不在。側求而殺之，未嘗可得。小箠則待，大箠則走，以逃暴怒也。」然則舜之牀琴，非漫然矣。王氏念孫《廣雅疏證》云：「《方言》：『鬱悠，思也。晉、宋、衛、魯之間謂之鬱悠。』鬱猶鬱鬱也，悠猶悠悠也。《楚辭·九辨》云：『馮鬱鬱其何極。』《鄭風·子衿》篇云：『悠悠我思』，合言之則曰鬱悠。《方言》注云：『鬱悠猶鬱陶也。』凡經傳言「鬱陶」者皆當讀如「皋陶」之陶。鬱陶、鬱悠

古同聲。舊讀陶如「陶冶」之陶，失之矣。閻氏若璩《尚書古文疏證》云：「《爾雅·釋詁》篇：「鬱陶，繇，喜也。」郭璞注引《孟子》「鬱陶思君」。《禮記》曰：「人喜則斯陶。」邢昺疏引《孟子》趙注云：「象見舜正在牀鼓琴，愕然反辭曰：我鬱陶思君，故來。爾，辭也。忸怩而慚，是其情也。」又引下《檀弓》鄭注云：「陶，鬱陶也。」據此則象曰「鬱陶思君爾」乃喜而思見之辭，故舜亦從而喜曰：「惟茲臣庶，女其于予治。」孟子固已明言「象喜亦喜」，蓋統括上二段情事，其先言「象憂亦憂」，特以引起下文，非真有象憂之事也。」因悉數諸書以鬱陶爲憂思之誤。念孫按，象曰「鬱陶思君爾」，則鬱陶乃思之意，非喜之意，言我鬱陶思君，是以來見，非喜而思見之辭也。孟子言「象喜亦喜」者，象見舜而僞喜，自述其鬱陶思舜之意，故舜亦誠信而喜之，非謂鬱陶爲喜也。凡人相見而喜，必自道其相思之切，豈得即道其相思之切爲喜乎？趙注云：「我鬱陶思君，故來。」是趙意亦不以鬱陶爲喜。《史記·五帝紀》述象之言，亦云「我思舜正鬱陶」，《楚辭·九辯》云「豈不鬱陶而思君兮」，則鬱陶爲思，其義甚明，與《爾雅》之訓爲喜者不同。郭璞以《孟子》證《爾雅》，誤也。閻氏必欲解鬱陶爲喜，「喜而思君爾」，甚爲不辭。既不達於經義，且以《史記》及各傳注爲非，偵矣。又按，《爾雅》：「悠

傷，憂思也。」悠、憂、思三字同義，故鬱悠既訓爲思又訓爲憂。《管子·內業》篇云「憂鬱生疾」，是鬱爲憂也。《說文》：「悠，憂也。」《小雅·十月之交》篇「悠悠我里」，毛傳云：「悠悠，憂也。」是悠爲憂也。悠與陶古聲同。《小雅·鼓鐘》篇「憂心且妯」，《衆經音義》引《韓詩》作「憂心且陶」，是陶爲憂也。故《廣雅·釋言》云：「陶，憂也。」合而言之則曰鬱陶。《九辯》「鬱陶而思君」，王逸注云：「憤念蓄積盈脅臆也。」魏文帝《燕歌行》云「憂來思君不敢忘」，又云「鬱陶思君未敢言」，皆以鬱陶爲憂。凡一字兩訓而反覆旁通者，若亂之爲治、故之爲今、擾之爲安、臭之爲香，不可悉數。《爾雅》云：「鬱陶，繇，喜也。」又云：「繇，憂也。」則繇字即有憂、喜二義，鬱陶亦猶是也。是故喜意未暢謂之鬱陶，《檀弓》正義引何氏《隱義》云：「鬱陶，懷喜未暢意。」是也。憂思憤盈亦謂之鬱陶，《孟子》、《楚辭》、《史記》所云是也。暑氣蘊隆亦謂之鬱陶，摯虞《思游賦》云：「戚溽暑之鬱陶兮，余安能乎留斯？」夏侯湛《大暑賦》云：「何太陽之赫曦，乃鬱陶以興熱。」是也。事雖不同而同爲鬱積之義，故命名亦同。閻氏謂「憂喜不同名，《廣雅》誤訓陶爲憂」，亦非也。「爾」爲「辭」者，《禮記·檀弓》「爾毋從從爾」，注云：「爾，語助。」是也。《方言》云：「忸怩，慙慙也。楚郢江淮之間謂之

忸怩，或謂之啓咨。」戴氏震《方言疏證》云：「《晉語》：『君忸怩顏』，韋昭注云：『忸怩，慙貌。』趙岐注《孟子》云：『忸怩而慙。』《廣雅》：『忸怩，啓咨也。』忸怩、啓咨並雙聲。」《廣雅疏證》云：①「忸與𪔐同。𪔐字从心，𪔐聲。忸怩、啓咨皆局縮不伸之貌也。《釋言》云：『𪔐，縮也。』縮與慙義相近，縮謂之𪔐，又謂之𪔐，猶慙謂之忸怩，又謂之啓咨也。」舜曰：「惟茲臣庶，汝其于予治。」**注**茲，此也。象素憎舜，不至其宮也。故舜見來而喜曰：惟念此臣衆，汝故助我治事。**疏**注「茲此」至「治事」○正義曰：

《爾雅·釋詁》云：「茲，此也。」「惟，思也。」「庶，衆也。」《詩·周頌·維天之命》序《釋文》引《韓詩》云：「惟，念也。」「汝其于予治」解爲「汝故助我治事」者，《白虎通·五行》篇云：「姑者，故也。」《毛詩·周南·卷耳》「我姑酌彼金盃」，傳云：「姑，且也。」「汝其于予治」謂汝姑且于予治也。于與於通。《爾雅·釋詁》云：「於，代也。」代于治即是助我治也。王氏引之《經傳釋詞》云：「于，爲也。爲，助也。趙注『女故助我治事』是也。」閻氏若璩《釋地又續》云：「《孟子》或問《著於淳熙丁酉後，其辭曰：『林氏謂司馬公以爲是時堯將以天下禪舜，瞽象雖愚，亦豈不利其子與兄之爲天子而

欲殺之乎？借使殺之，堯必誅已，宜亦有所不敢矣。蘇氏以爲舜之側微，已能使瞽象之不格姦矣，豈至此而猶欲害之哉？以此皆疑《孟子》之誤。程子以爲此非孟子之言，乃萬章傳聞之誤，而孟子有不暇辨耳。是數說者，恐其皆未安也。蓋天下之事有不可以常情測度者，使瞽象而猶知利害之所在，則亦未爲甚頑且傲，而舜之所處亦未足爲天下之至難矣。不格姦者，但能使之不陷於刑戮。且聖賢於世俗傳聞之事，有非實者，必辯而明之，以曉天下後世，豈有知其不然而不暇辯者哉？」余謂世誣舜以瞽瞍朝己，孟子則辯其必無。誣舜以放象，則辯其未嘗有。凡於傳誣之迹，未有不辯而明之以曉天下後世者。豈有知其不然而故設言其理？若金氏謂「祇在發明聖人處變之心，苟得其心，則事迹有無都不必辯」，殆幾於戲矣。人固習而不察耳。」不識舜不知象之將殺己與？」**注**萬章言我不知舜不知象之將殺之與？何爲好言順辭以答象也？曰：「奚而不知也？象憂亦憂，象喜亦喜。」**注**奚，何也。孟子曰：舜何爲不知象惡己也？仁人

①「廣」上，據本書文例當有「王氏念孫」四字。

愛其弟，憂喜隨之。象方言思君，故以順辭答之。

曰：「然則舜僞喜者與？」**注**僞，詐也。萬

章言如是則為舜行至誠，而詐喜以悅人矣。**疏**注

「僞詐也」○正義曰：《淮南子·本經訓》云「其心偷而不僞」，高誘注云：「僞，虛詐也。」曰：「否。昔者有饋

生魚於鄭子產，子產使校人畜之池。校人烹

之，反命曰：「始舍之，圉圉焉，少則洋洋焉，

攸然而逝。」子產曰：「得其所哉！得其所

哉！」**注**孟子言否，云舜不詐喜也，因為說子產以

喻之。子產，鄭子國之子公孫僑，大賢人也。校人，

主池沼小吏也。圉圉，魚在水羸劣之貌；洋洋，舒

緩搖尾之貌。攸然，迅走水趣深處也。^①故曰「得其所哉」。重言之，嘉得魚之志也。**疏**注「孟子言否云舜

不詐喜也」○正義曰：段氏玉裁《說文解字注》云：「否，不

也。不者，事之不然也；否者，說事之不然也。故音義皆

同。《孟子》：「萬章曰然則舜僞喜者與，孟子曰否，」**注**：「孟

子言舜不詐喜也。」又「咸丘蒙問舜南面而立，瞽瞍亦北面而

朝之，孟子曰否」，**注**：「言不然也。」又「萬章曰堯以天下與

舜有諸，孟子曰否」，**注**：「堯不與之。」又「萬章問曰人有言，

伊尹以割烹要湯，孟子曰否然也」，萬章又問「孔子於衛主癯

疽，孟子曰否然也」，萬章又問「百里奚自鬻於秦養牲者，孟

子曰否然」，**注**皆曰：「否，不也。不如是也。」**注**以不如是釋

否然，今本文皆誤作「否不然」，語贅而注不可通矣。否字

引申之義訓為不通，如《易》之「泰否」，《堯典》之「否德」，^②

《小雅》之「否難知也」，《論語》之「予所否者」，皆殊其音，讀

符鄙切。○**注**「校人主池沼小吏也」○正義曰：校人見《周

禮·夏官》，掌馬政。鄭康成以為「主馬者必仍校視之」，賈

氏疏以為「讀從《曲禮》與《少儀》「效馬效羊」，取效見義」。

此於畜魚之校人無涉。《漢書·司馬相如傳·上林賦》云

「天子校獵」，顏師古**注**云：「校獵者，以木相貫穿，總為闌

校，遮止禽獸而獵取之。說者或以為《周官》校人掌田獵之

馬，因云校獵，亦失其義。養馬稱校人者，謂以為闌校以養

馬耳，故呼為閑也。」按：師古解校人是也。《廣雅·釋木》

云：「校，檟柴也。」哀公四年《公羊傳》云：「亡國之社蓋掩

①「趣」，原作「趨」，今據廖本及疏文改。

②「典」，原脫，今據《說文解字注》補。

其上而棧其下。」是柴即棧，亦校即棧也。《管子·內業》篇云：「傳馬棧者最難，先傳曲木，曲木又求曲木，曲木已傳，直木無所施矣；先傳直木，直木又求直木，直木已傳，曲木亦無所施矣。」《淮南子·道應訓》云「柴箕子之門」，注云：「箕子亡之朝鮮，舊居空，故柴護之。」蓋編木圍其四面，用之於亡國之社，則為柴其下；用之以護箕子之居，則為柴箕子之門；用於車上為車箱，則為棧車，亦為柴車；用以畜馬，則為馬棧，亦即為校為閑；用以畜魚，則為積柴為棧，即亦為校。《爾雅·釋器》云：「棧謂之滂。」《毛詩正義》引孫炎云：「積柴養魚曰滂。」《說文》木部云：「棧，以柴木離也。」郭璞《江賦》云：「棧澌為滂。」編木為棧以養馬，因而主馬者稱校人；編木為滂以養魚，因而主魚者稱校人。此校人所以為主池沼小吏也。《春秋左傳》：「吳囚邾子於樓臺，棧之以棘。」謂以棘柴其下也。《說文》木部云：「校，木囚也。」以編木囚繫人，與以編木繫馬畜魚同。《禮記·禮運》云：「鳳凰麒麟，皆在郊薈，龜龍在宮沼。」此郊薈蓋即校薈，即所謂以木相貫穿為圍校以遮禽獸也。○注「圍圍」至「志也」○正義曰：《爾雅·釋言》云：「圍，禁也。」圍與圍通，宣公四年《左傳》云「圍伯嬴」，注云：「圍，囚也。」《說文》口部云：「圍，圍圍，所以拘羣人。」圍圍即圍圍也。下「洋洋」為「舒緩

搖尾」，此時尚未改幽閉囚禁之狀，故為圍圍。《國語·晉語》優施歌曰：「暇豫之吾吾不如鳥鳥。人皆集於苑，己獨集於枯。」注云：「吾吾，不敢自親之貌。苑，茂木貌。」施謂鳥鳥集於茂木則暇豫，里克不暇豫而集於枯，則吾吾不如鳥鳥。吾吾為集枯之狀，不能暇豫，故先云暇豫之欲其不吾吾也。此吾吾即圍圍，不敢自親之貌即在水羸劣之貌也。《毛詩·大雅》「牧野洋洋」，傳云：「洋洋，廣也。」《陳風》「泌之洋洋」，傳云：「洋洋，廣大也。」廣大則不局促，不局促故舒緩。哀十七年《左傳》云「如魚窺尾，衡流而方羊」，孔氏正義云：「鄭眾以為魚肥則尾赤。方羊，遊戲。」洋洋猶言方羊，魚遊尾動，故以搖尾狀其舒緩遊戲之情也。攸與悠同，《爾雅·釋詁》云：「悠，遠也。」舍人注云：「行之遠也。」遠與深義同。逝如《論語》「逝者如斯夫」之逝。《陽貨》篇「日月逝矣」，皇侃疏云：「逝，速也。」走水趣深處「解，攸然」，「迅」字解「逝」字。閭、監、毛三本「水趣」二字倒，嘉誤作「喜」。校人出，曰：「孰謂子產智？」子既烹而食之，曰「得其所哉，得其所哉。」故君子可欺以其方，難罔以非其道。彼以愛兄之道來，故誠信而喜之，奚偽焉？**注**方，類也。君子可以

事類欺，故子產不知校人之食其魚。象以其愛兄之言來向舜，是亦其類也。故誠信之而喜，何爲僞喜也？

疏注「方類」至「類欺」○正義曰：《淮南子·精神訓》云「以萬物爲一方」，高誘注云：「方，類也。」方之義爲比，類之義亦爲比。凡事之荒誕非理者則無所比類。校人之言有倫有脊，實有此囿囿洋洋攸然而逝之情而比類之也，故不虞其欺耳。

章指：言仁聖所存者大。舍小從大，達權之義也。不告而娶，守正道也。

萬章問曰：「象日以殺舜爲事，立爲天子則放之，何也？」**注**怪舜放之何故。**疏**注「怪舜放之何故」○正義曰：翟氏灝《考異》云：「韓非有云：『瞽瞍爲舜父而舜放之，象爲舜弟而舜殺之。放父殺弟，不可爲仁。』則云象欲殺舜，猶其繆之小焉者矣。萬章知無放瞽瞍殺象之事而不能無疑於放象之說，孟子力辨其并無之，則其餘邪說悉不待辨而息已。」孟子曰：「封之也。或曰放焉。」**注**舜封象於有庳，或有人以爲放之。

萬章曰：「舜流共工于幽州，放驩兜于崇山，殺三苗于三危，殛鯀于羽山。四罪而天下咸服，誅不仁也。象至不仁，封之有庳，有庳之人奚罪焉？仁人固如是乎？在人則誅之，在弟則封之。」**注**舜誅四佞，以其惡也。象惡亦甚而封之，仁人用心當如是乎？罪在他人當誅之，在弟則封之。**疏**「舜流」至「咸服」○正義曰：此《虞書·堯典》文也。段氏玉裁《說文解字注》云：「竅，塞也。讀若《虞書》『竅三苗』之竅。二竅本皆作『竅』，妄人所改也。」「竅三苗于三危」，與言流、言放、言極一例，謂放之令自匿。故《孟子》作「殺三苗」即《左傳》「繫蔡叔」之繫。繫爲正字，竅、殺爲同音假借，殛鯀爲極之假借。《左傳》曰：「流四凶族，投諸四裔。」劉向曰：「舜有四放之罰。」屈原曰「永遏在羽山，夫何三年不施」，王注：「言堯長放鯀於羽山，絕在不毛之地，三年不舍其罪也。」《周禮》「廢以馭其罪」，注：「廢猶放也。舜殛鯀于羽山是也。」此條《釋文》宋本「極紀力反」可證。《洪範》「鯀則殛死」，《釋文》：「本又作極。」《多方》「我乃其大罰殛之」，《釋文》：「本又作極。」《左傳》昭七年「昔堯殛鯀於羽山」，《釋文》：「本又作極。」

《魯頌》「致天之屆，于牧之野」，箋云：「屆，極也。」引《書》「鯀則極死」。又云「天所以罰極紂于商郊牧野」，正義云：「屆，極」，「虞，度」，《釋言》文。《釋言》又云：「極，誅也。」武王致天所罰，誅紂於牧野。定本、《集注》皆云「極紂於牧野」。極是殺，非也。《小雅》「後子極焉」，毛曰：「極，至也。」鄭曰：「極，誅也。」正義曰：「極，至」，《釋詁》文。「極，誅」，《釋言》文。《合》魯頌，《小雅》兩箋兩正義觀之，則《釋言》之為「極誅」甚明。①今《爾雅》作「極誅也」，蓋誤以《洪範》、《多方》極字鄭作「極」例之。則知《周禮》注引「極」於羽山，鄭所見《尚書》自是「極」，不作「極」也。假極為極，亦如《孟子》假殺為竄。鯀因極而死於東裔。韋昭注《晉語》云：「極，放而殺也。」此當作「放而死也」。高注《呂覽》云「先極後死」，此當作「先極後死」。若《呂覽》副之以吳刀，《山海經》「殺鯀於羽郊」，則言之不從，不可信矣。然則馬注《尚書》，趙注《孟子》，韋注《國語》，皆云「極，誅也」，何也？曰：此皆用《釋言》「極誅也」之文，②謂正文極當作「極」也。江氏聲《尚書集注音疏》云：「《史記》云：『請流共工于幽陵以變北狄，放讎噎于崇山以變南蠻，遷三苗于三危以變西戎，殛鯀于羽山以變東夷。』寂，塞也。謂塞之使不得通中國。《周禮》·大司馬《職》云『犯令陵政則杜之』，鄭注云：『杜

之者，杜塞使不得與鄰國交通。」亦此義也。極誅，誅謂責遣之，非殺之也。按：萬章以舜放象為問，故舉四罪之放以例之。○「封之有庳」○正義曰：顧氏炎武《日知錄》云：「《水經注》王隱曰：『應陽縣本泉陵之北部，東五里有鼻墟，象所封也。山下有象廟。』後漢·東平王蒼傳注：『有鼻，國名，在今永州營道縣北。』袁譚傳注：『今猶謂之鼻亭。』舜都蒲阪而封象於道州鼻亭，在三苗以南荒服之地，誠為可疑。如孟子所論，親之欲其貴，愛之欲其富，又且欲其源源而來，何以不在中原近畿之地而置之三千餘里之外邪？蓋上古諸侯之封萬國，其時中原之地必無間土可以封故也。」閻氏若璩《釋地續》云：「有庳之在今永州府零陵縣，已成千古定所。經文：『欲常常而見之，故源源而來。』不及待一年之貢期，五年之朝期以伸吾親愛情，豈有兄居蒲阪，③弟居零陵，陸阻太行，水絕洞庭，較諸驩兜放處尤遠千里之理？且果零陵之國比歲一至，則往返幾將萬里，其勞已甚，數歲而數至，勢必日奔走於道路風霜之中而不少寧息，親愛弟者

① 「極」，原誤作「殛」，今據上下文義改。

② 「言」，原誤作「文」，今據文義改。

③ 「豈」，原誤作「者」，今據《四書釋地》改。

固如是乎？蓋有庫之封必近在帝都，而今不可考。或曰：然則今零陵曷爲傳有是名也？《括地志》云：「鼻亭神在營道縣北六十里，故老傳言舜葬九疑，象來至此，後人立祠，名爲鼻亭神。」此爲得之。《翟氏灝《考異》云：「《漢書·鄒陽傳》作『封之於有鼻』，服虔注曰：「鼻，音界予之界。師古注曰：「音鼻。」又《武五子傳》：「舜封象於有鼻」，師古注曰：「有鼻在零陵，今鼻亭是也。」《後漢·東平王蒼傳》：「昔象封有鼻。」《三國志·樂陵王茂傳》亦曰：「昔象之爲虐，至甚而大，舜猶侯之有鼻。」庫與鼻皆從界與之界，音皆讀爲庇，故其字得通借。」○注「舜誅四佞」○正義曰：《書》言「四罪」，趙氏謂之「四佞」者，明其罪在佞也。《論衡·答佞》篇云：「富貴皆人所欲也。雖有君子之行，猶有飢渴之情。君子則以禮防情，以義制欲，故得循道，循道則無禍。小人縱貪利之欲，踰禮犯義，故進得苟佞，苟佞則有罪。夫賢人，君子也；佞人，小人也。佞人問曰：行合九德則賢，不合則佞。世人操行者可盡謂佞乎？」曰：諸非皆惡，惡中之逆者謂之無道，惡中之巧者謂之佞人。聖人形憲，佞在惡中，聖王賞勸，賢在善中。純潔之賢，善中殊高，賢中之聖也，善中大佞，惡中之雄也。」○注「仁人用心當如是乎」○正義曰：當與嘗通。《萬章上》篇「是時孔子當阨」，《說苑》引作

「是孔子嘗阨」。《荀子·君子》篇「先祖當賢」，注云：「當或爲嘗。」是也。《禮記·少儀》「馬不常秣」，《釋文》云：「常，本亦作嘗。」是當、嘗、常三字通。《國語·周語》「固有之乎」，注云：「固猶嘗也。」《禮記·曲禮》「求毋固」，注云：「固，常也。」固之義爲常、嘗，即亦爲當，故趙氏以「當」釋之。王引之《經傳釋詞》云：「固猶乃也。」曰：「仁人之於弟也，不藏怒焉，不宿怨焉，親愛之而已矣。親之，欲其貴也；愛之，欲其富也。封之有庫，富貴之也。身爲天子，弟爲匹夫，可謂親愛之乎？」**注**孟子言仁人於弟，不問善惡，親愛之而已。封之，欲使富貴耳。身爲天子，弟雖不仁，豈可使爲匹夫也？

「敢問或曰放者，何謂也？」**注**萬章問放之意。曰：「象不得有爲於其國。天子使吏治其國而納其貢稅焉，故謂之放。豈得暴彼民哉？」**注**象不得施教於其國。天子使吏代其治而納貢賦與之，比諸見放也。有庫雖不得賢君，象亦不侵其民也。**疏**「象不」至「民哉」○正義曰：趙氏佑

《溫故錄》云：「象不得有爲，非舜禁之使不得也，乃或之見爲如是耳。蓋天子使吏治其國，即大國三卿皆命於天子，使其大夫爲三監，監於方伯之國，國三人事，古封建之本如是，後世始擅命自爲。然漢制諸侯王猶爲置傅相，蓋循古意。舜固以之休逸象，優其賦人以奉養象。或者不察，遂妄意舜之禁象，使不得有爲，故謂之「放」。就令如此，象亦豈有暴民之事哉？是皆孟子推「或言」之意，又正答「有庠之人何罪」一語意也，故下復有「雖然」一轉。此時象久被舜烝乂之教，亦自不至於暴民，然舜之爲是，正不慮象之暴民，第欲其常常來見。唯使治國有人，賦入無缺，故象得輕身，時來歡聚，與他人必及朝貢之期者不同。又時以政事相接，使象得觀己所行以益進於善。「此之謂也」與上「故謂之」相比照，論舜之待象當如此不當如彼也。蓋孟子所以發明仁人親愛之心，委婉詳盡如此。」雖然，欲常常而見之，故源源而來。「不及貢，以政接于有庠」，**注**雖不使象得豫政事，舜以兄弟之恩，欲常常見之無已，故源源而來，如流水之與源通。不及貢者，不待朝貢諸侯常禮乃來也。其間歲歲自至京師，謂若天子以政事接見有庠之君者，實親親之恩也。

疏注「欲常常見

之無已」○正義曰：《詩·大雅·文王》箋云：「長猶常也。」《說文》云：「長，久遠也。」長而又長，故爲無已。○注「故源源而來如流水之與源通」○正義曰：《說文》言部云：「源，徐語也。从言，原聲。」《孟子》曰：「故諫諍而來。」段氏玉裁《說文解字注》云：「趙注『如流水之與源通』，據此諫本作「源」，源古作「原」，蓋許引《孟》「原原而來」證從原會意之指。」○注「不及」至「恩也」○正義曰：《虞書·堯典》云：「五載一巡守，羣后四朝。」鄭康成注云：「四朝，四季朝京師也。巡守之年諸侯見於方岳之下，其間四年四方諸侯分來朝於京師也。」王氏鳴盛《尚書後案》云：「鄭意謂每天子巡守之明年，東方諸侯春季來朝京師，其又明年，南方諸侯夏季來朝，又明年，西方諸侯秋季來朝，又明年，北方諸侯冬季來朝，又明年，則天子復巡守矣。」《孝經》鄭注云：「諸侯五年一朝天子，天子亦五年一巡守。」熊氏以爲虞夏制法，諸侯之朝分爲四部，四年乃徧。總是五年一朝，天子乃巡守。《孝經》注先儒疑非鄭注。然此條則是熊氏推衍，亦得鄭意。」按：此所謂常禮也。常禮五年一朝，此不待朝貢常禮，故歲歲自至京師也。「謂若天子以政事接見有庠之君」者，《詩·鄭風·緇衣》序云：「父子並爲周司徒，善於其職。」孔氏正義云：「武公既爲鄭國之君，又復人作司徒。」《衛風·

淇澳》序云：「淇澳，美武公之德也。以禮自防，故能人相于周。」孔氏正義云：「武公將兵佐周平戎，甚有功，平王命爲公。」卒章傳云：「卿士者，卿爲典事，公其兼官。」在《尚書》如蘇公爲司寇，齊侯呂伋爲天子虎賁氏，皆以諸侯兼理京師之政事。推之於虞，當亦有然。有庫之君不依朝貢常期而歲歲自至，故若兼治京師政事，而天子以政事接見之也。經文直云「以政接於有庫」，則是實有政事，原非空至。觀上云「汝其于子治」，則象以諸侯兼治王朝政事可知。封象於有庫而兼掌朝政，所以不得有爲於其國也。人見其不得有爲於國，故謂之「放」，不知所以不得有爲於其國者，正有爲於天子之朝也，其非放也明矣。趙氏增「若」字，則以本非有政事矣。此之謂也。」**注**此「常常」以下，皆《尚書》逸篇之辭。孟子以告萬章，言此乃象之謂也。**疏**注「此常」至「謂也」○正義曰：趙氏蓋亦以此文在《舜典》中也。江氏聲《尚書集注音疏》云：「據云「此之謂也」，則「有庫」以上自是古書成文，當是《尚書》文矣。其「欲常常」句承「雖然」之下，「雖然」云者，承上轉下之詞，則「欲常常」二句乃孟子之言，非古書成文矣。斷自「不及貢」始以爲《尚書》逸文，庶幾近之。」

章指：言懇誠於內者則外發於事，仁人之心也。象爲無道極矣，友于之性，忘其悖逆，況其仁賢乎？**疏**「友于之性」○正義曰：

《後漢書·袁紹傳》云：「友于之性，生於自然。」

咸丘蒙問曰：「語云：『盛德之士，君不得而臣，父不得而子。』舜南面而立，堯帥諸侯北面而朝之，瞽瞍亦北面而朝之。舜見瞽瞍，其容有蹙。孔子曰：於斯時也，天下殆哉，岌岌乎！」不識此語誠然乎哉？」**注**咸丘蒙，孟子弟子。語者，諺語也。言盛德之士，君不敢臣，父不敢子。堯與瞽瞍皆臣事舜，其容有蹙，蹙不自安也。孔子以爲君父爲臣，岌岌乎，不安貌也。故曰「殆哉」。不知此語實然乎？**疏**注「咸丘蒙孟子弟子」○正義曰：《廣韻》「丘」字注云：「漢複姓四十四氏，《孟子》有咸丘蒙隱居。」閻氏若璩《釋地續》云：「古人以所居之地得姓氏，不必定常於其地。如咸丘魯地而蒙則齊人，是。咸丘二字，見《爾雅》『左高曰咸丘』，見《春秋》桓公七年

「焚咸丘」，杜注：「咸丘，魯地，高平國鉅野縣南有咸亭。」咸丘複氏自以此。○注「其容」至「實然乎」○正義曰：趙氏連云「蹙蹙」，蓋讀蹙爲「曾西蹙然」之蹙，即「蹙蹙」也。《楚辭·離騷》云「高余冠之岌岌兮」，注云：「岌岌，高也。」高則危而不安。《漢書·韋賢傳》云「岌岌其國」，注引應劭云：「岌岌，欲毀壞也。」翟氏灝《考異》云：「舜見瞽瞍其容有蹙」五句，《墨子·非儒篇》：「孔丘與其門弟子間坐，曰：夫舜見瞽瞍蹙然，此時天下岌乎！」《韓非子·忠孝篇》引記曰：「舜見瞽瞍，其容造焉。」孔子曰：「當是時也，危哉，天下岌岌！有道者，父固不得而子，君固不得而臣也。」《文選·諷諫詩》注引《孟子》曰：「天下大哉岌岌乎！」按，《韓非》所引之記即咸丘蒙所引之語，蓋當時早有以此等說筆之於書者矣。蹙、造二字古通，《韓詩外傳》：「史魚死，不於正堂治喪，衛君問知其故，造然召蘧伯玉貴之，而退彌子瑕。」《淮南子·道應訓》：①孔子觀宥卮，造然革容曰：「善哉持盈者乎。」並以造代蹙。「殆哉岌乎」乃時人恒語。《莊子·天地篇》述許由之言亦云「殆哉，岌乎天下」，《音義》曰：「岌，本又作岌。」《管子·小問篇》：「桓公言欲勝民，管仲曰：危哉，君之國岌乎！」孟子曰：「否，**注**言不然

也。此非君子之言，齊東野人之語也。**注**東野，東作田野之人所言耳。咸丘蒙，齊人也，故聞齊野人之言。《書》曰「平秩東作」，謂治農事也。**疏**注

「東野」至「事也」○正義曰：趙氏以東爲東作治農事，故引《書·堯典》以證之，非東爲「東方」之東也。閻氏若璩《釋地續》云：「趙氏注此章，於「東」字妙有體會。不然，何不云齊之西或北野人乎？至今濟南府齊東縣，則置於元憲宗三年，以鎮而名，於《孟子》無涉。」堯老而舜攝也。《堯典》曰：「二十有八載，放勳乃徂落。百姓如喪考妣，三年，四海遏密八音。」**注**孟子言舜攝行事耳，未爲天子也。放勳，堯名；徂落，死也。如喪考妣，思之如父母也。遏，止也；密，無聲也。八音不作，哀思甚也。**疏**「堯典曰」○正義曰：毛氏奇齡《四書賸言》云：「《孟子》堯典曰二十有八載」至「四海遏密八音」，今所行《尚書》在《舜典》中。按，伏生《尚書》原只《堯典》一篇，無「粵若稽古帝舜」二十八字，以舊別有《舜典》而

①「子」，原脫，今據經解本及全書文例補。

其時已亡，故東晉梅賾獻《尚書》孔傳亦無《舜典》。至齊建武年，吳興姚方興於大航頭得孔氏傳古文，始分《堯典》爲二，以《慎徽五典》至末謂之《舜典》而加二十八字於其中，此僞書也。故漢光武時張純奏「宜遵唐堯之典，二月巡狩」，至章帝時陳寵奏「言唐堯著典，眚災肆赦」，皆是《舜典》文而皆冠以《堯典》之名。即《前漢·王莽傳》所引十有二州，皆稱《堯典》。後西晉武帝初，幽州秀才張髦上疏，引「肆類上帝」諸文，亦稱《堯典》。自僞書一出而羣然改從，則是古書一篇而今誤分之，非古書二篇而今誤合之也。」今《尚書》作「帝乃殂落，百姓如喪考妣三載。」臧氏琳《經義雜記》云：「《孟子·萬章上》：『《堯典》曰：二十有八載，放勳乃殂落，百姓如喪考妣，三年，四海遏密八音。』《春秋繁露·燮燠孰多》篇：『《尚書》曰：二十有八載，放勳乃殂落，百姓如喪考妣，四海之內闕密八音三年。』《說文》殂部：『殂，往死也。』《虞書》曰：放勳乃殂落。」此可證《尚書》本作「放勳」。《釋文》引馬融注以放勳爲堯名。《孟子·滕文公上》「放勳日勞之來之」，注：「放勳，堯號也。」此古義也。」王氏鳴盛《尚書後案》云：「《史記》：『堯立七十年得舜，二十年而老，令舜攝行天子之政，薦之於天。堯辟位，凡二十八年而崩。』徐廣曰：『堯在位凡九十八年。』按，上文堯欲巽位，自言「朕在位

七十載」，合二十八載凡九十八年，《史記》與經合。」段氏玉裁《說文解字注》云：「殂，往死也。从歹，且聲。《虞書》曰：『助乃殂。』二徐本皆如是，宋本《說文》及洪邁所引皆可證。至《集韻》、《類篇》乃增「放」字，至李仁甫乃增之曰「放助乃殂落」，或用改大徐本。《堯典》曰二十有八載，放勳乃殂落」見《孟子》、《春秋繁露》、皇甫謐《帝王世紀》所引皆如是。此作「助乃殂」，據力部勳者小篆，助者古文勳，則許所稱真壁中文也而無「放」、「落」二字。蓋孟子、董子所稱者皆今文《尚書》也，許所稱者古文《尚書》也。孟子何以稱今文《尚書》？伏生本與孔安國本皆出周時。放勳何以但稱助？或言放勳或言助，一也。蓋當時臣民所稱不一也。殂落何以但言殂？云殂則已足矣，不必言殂落也。《釋詁》：「崩、薨、無祿、卒、殂落、殯，死也。」《白虎通》曰：「《書》言殂落，死者各自見義。堯見慘痛之，舜見終，各一也。」此其所據皆今文《尚書》，且《爾雅》無妨「殂」、「落」二字各爲一句也。師古注《王莽傳》，引《虞書》「放勳乃殂」，則唐初《尚書》尚有無落字者。」閻氏若璩《釋地》又續云：「百姓義二：有指百官言者，《書》百姓與黎民對，《禮·大傳》百姓與庶民對是也，有指小民言者，不必夏代，亦始自唐虞之時，「百姓不親，五品不遜」是也。四《書》中百姓凡二十五見，惟「百姓如喪考

妣三年」指百官，蓋有爵土者爲天子服斬衰三年，禮也。《孟子》已明注曰「舜帥諸侯以爲堯三年喪」，喪並平聲。持服曰喪，「如喪考妣三年」即《檀弓》「方喪三年」耳。」江氏聲《尚書集注音疏》云：「《孟子》所引，上言「二十有八載」，下云「三年」，則《堯典》之文可「載」、「年」皆有。僞孔氏因《爾雅》《唐虞曰載》之文改年爲載，且三年是喪考妣之期，當屬上爲句，不可改載而下屬也。此經下文別言「四海」，乃謂民間，則百姓自是羣臣矣。」○注「放勳堯名」○正義曰：名號通稱，詳見《滕文公》篇。○注「如喪」至「甚也」○正義曰：趙氏言「思之如父母」，猶云親其君如父母也。蓋謂「百姓」即下「四海之民」，惟「如喪考妣」，所以「過密八音」也，故云「八音不作，哀思甚也」。兩思字相貫爲一事也。「過，止也」，《爾雅·釋詁》文。《說文》言部云：「謚，靜語也。一曰無聲也。」《詩·周頌》「夙夜基命宥密」，《禮記·孔子閒居》引此《詩》，注云：「密，靜也。」《賈子新書·禮容》篇引《詩》作「宥謚」。趙氏讀「密」爲「謚」，故云「無聲」也。孔子曰：

「天無二日，民無二王。」舜既爲天子矣，又帥天下諸侯以爲堯三年喪，是二天子矣。」**注**曰：一王一，言不得並也。

疏「孔子曰」至「二王」○正義

曰：《禮記·曾子問》篇云：「孔子曰：天無二日，土無二王，普綈郊社，尊無二上。」《坊記》云：「子云：天無二日，土無二王，家無二主，尊無二上。」《喪服四制》云：「天無二日，土無二王，國無二君，家無二尊。」《大戴禮記·本命》篇云：「天無二日，國無二君，家無二尊。」

咸丘蒙曰：「舜之不臣堯，則吾既得聞命矣。」**注**不以堯爲臣也。《詩》云：「普天之下，莫非王土，率土之濱，莫非王臣。」而舜既爲天子矣，敢問瞽瞍之非臣如何？」**注**

《詩》、《小雅·北山》之篇。普，徧；率，循也。徧天下，循土之濱，無有非王者之臣，而曰「瞽瞍非臣」，如何也？」**疏**注「詩小雅」至「之臣」○正義曰：《詩》在《小雅·北山》第二章。毛傳云：「溥，大，率，循，濱，涯也。」《說文》曰部云：「普，日無色也。」水部云：「溥，大也。」《孟子》作「普」，是假借字。《詩》作「溥」，正字也。《儀禮·士虞禮記》云「普淖」，注云：「普，大也。」《詩·大雅·召旻》「溥斯害矣」，箋云：「溥，徧也。」周徧即大也。「率，循也」，《爾雅·釋詁》文。孔氏《詩正義》云：「《說文》云：「浦，水濱。」《廣雅》云：「浦，涯。」然則潚、濱、涯、浦皆水畔之地，同物而

異名也。詩意言民之所居，民居不盡近水而以濱爲言者，古先聖人謂中國爲九州，以水中可居曰洲，言民居之外皆在水也。」鄒子曰：「中國名赤縣，赤縣內自有九州，禹之序九州是也。其有瀛海環之。」是地之四畔皆至水也。濱是四畔近水之處，言「率土之濱」，舉其四方所至之內，見其廣也。

曰：「是詩也，非是之謂也。勞於王事而不得養父母也。曰：此莫非王事，我獨賢勞也。」**注**孟子言此詩非舜臣父之謂也。詩言皆王臣

也，何爲獨使我以賢才而勞苦，不得養父母乎？是以怨也。**疏**「此莫」至「勞也」○正義曰：王氏念孫《廣雅

疏證》云：「賢，勞也。《小雅·北山》篇『我從事獨賢』，《孟子·萬章》篇引此詩而釋之曰：『此莫非王事，我獨賢勞也。』賢亦勞也。賢勞猶言劬勞，故毛傳云：『賢，勞也。』《鹽鐵論·地廣》篇亦云：『《詩》云莫非王事而我獨勞，刺不均也。』鄭箋、趙注並以賢爲賢才，失其義也。」段氏玉裁《說文解字注》云：「賢，多財也。賢本多財之稱，引伸之凡多皆曰賢。人稱賢能，因習其引伸之義而廢其本義矣。《小雅》『大夫不均，我從事獨賢』，傳曰：『賢，勞也。』謂事多而勞也。故孟子說之曰『我獨賢勞』。戴先生曰：『《投壺》『某賢於某

若干純」，賢，多也。」按：《呂氏春秋·慎人》篇云：「舜自爲詩曰：『普天之下，莫非王土；率土之濱，莫非王臣。』所以見盡有之也。」蓋當時相傳此詩爲舜作，故咸丘蒙引見爲問。孟子直據《北山》之詩解之，則詩非舜作明矣。六經之學至戰國疏陋已極，孟子不獨論舜，兼以明《詩》。故說詩者不以文害辭，不以辭害志。以意逆志，是爲得之。如以辭而已矣，《雲漢》之詩曰：

「周餘黎民，靡有孑遺。」信斯言也，是周無遺民也。**注**文，詩之文章，所引以興事也；辭，詩人

所歌詠之辭；志，詩人志所欲之事；意，學者之心意也。孟子言說詩者當本之志，不可以文害其辭，文不顯乃反顯也，不可以辭害其志。辭曰「周餘黎民，靡有孑遺」，志在憂旱，災民無孑然遺脫不遭旱災者，非無民也。人情不遠，以己之意逆詩人之志，是爲得其實矣。王者有所不臣。不可謂「皆爲王臣」，謂舜臣其父也。**疏**「故說詩」至「得之」○正義曰：《說

文》文部云：「文，錯畫也。」序云：「倉頡之初作書，蓋依類象形，故謂之文。」宣公十五年《左傳》云：「故文反正爲乏」。

《國語·晉語》云：「夫文蟲皿爲蠱。」是文卽字也。段氏玉裁《說文解字注》云：「習，意內而言外也。从司言。有是意於內，因有是言於外，謂之習。意者，文字之義也；言者，文字之聲也；習者，文字形聲之合也。習與辛部之辭，其意迥別。辭者，說也。从齒辛。齒辛猶理辜，謂文辭足以排難解紛也。然則辭謂篇章也。習者，意內而言外，从司言。此謂摹繪物狀及發聲助語之文字也。積文字而爲篇章，積習而爲辭。孟子曰「不以文害辭」，不以習害辭也。孔子曰「言以足志」，習之謂也；「文以足言」，辭之謂也。《大行人》「故書計習命」，鄭司農云：「習當爲辭。」此二篆之不可混也。顧氏鎮《虞東學詩·以意逆志說》云：「《書》曰：『詩言志，歌永言。』而孟子之詔咸丘蒙曰：『以意逆志，是爲得之。』後儒因謂吟哦上下便使人有得，又謂少間推來推去，自然推出道理。此論讀書窮理之義則可耳，《詩》則當知其事實而後志可見，志見而後得失可判也。說者又引子貢之「知來」，子夏之「起予」，以爲聖門之可與言《詩》者如是，而後世必求其人，鑒其事，此孟子所謂「固哉高叟」者，而非聖賢相與言《詩》之法也。不知學者引申觸類，六通四闢，無所不可，而考其本旨，義各有歸。如「切磋」本言學問之事，則凡言學問者無不可推，而謂《詩》論貧富可乎？「素絢」本有先後之

序，則凡有先後者無不可推，而論《詩》論「禮後」可乎？斷章取義，當用之論理論事，不可用以釋《詩》也。然則所謂「逆志」者何？他日謂萬章曰：「頌其《詩》，讀其《書》，不知其人，可乎？是以論其世也。」正惟有世可論，有人可求，故吾之意有所措，而彼之志有可通。今不問其世爲何世，人爲何人，而徒吟哦上下，去來推之，則其所逆乃在文辭而非志也。此正孟子所謂「害志」者，而烏乎逆之？而又烏乎得之？孟子之論《北山》也，惟知爲行役者之刺王，故逆之而得其嘆賢勞之志；其論《凱風》也，惟知七子之母未嘗去其室，故逆之而得其過小不怨之志。不然，則「普天」「率土」特悉主悉臣之恒談耳，「凱風自南，吹彼棘心」亦「蓼蓼者莪，匪莪伊蒿」之同類耳。何由於去古茫茫之後，核事考情而得其所指哉？夫不論其世，欲知其人，不得也；不知其人，欲逆其志，亦不得也。孟子若預憂後世將秕糠一切而自以其察言也，特著其說以防之，故必論世知人而後逆志之說可用之。○注「文詩」至「之辭」○正義曰：《說文》多部云：「彰，幟也。有部云：『幟，有彰彰也。』然則「文章」之文本作「彰」，省而作「文」，與「文字」之文義別。趙氏以文章釋文，是讀文爲彰也。《淮南子·本經訓》云「發動而成於文」，高誘注云：「文，文章也。」《禮記·仲尼燕居》云「文爲在禮」，

注云：「文章所爲。」皆以文爲彰，與趙氏同。「辭」則孟子已明指「周餘黎民，靡有孑遺」爲辭，即「普天之下」四句爲辭，此是「詩人所歌詠之辭」已成篇章者也。○注「文不顯乃反顯也」○正義曰：趙氏以文爲文章，是「所引以興事」，即篇章上之文采。如「我獨賢勞」，辭之志也，「莫非王臣」，則辭之文也。說《詩》當以辭之志爲本而顯之，若不以意逆志，則志宜顯而反不顯，「文不顯而反顯」矣。文字於說《詩》非所取，故解爲「詩之文章」，詩之文章即辭之文采也。○注「辭曰『至父也』」○正義曰：《雲漢》詩在《大雅》。序言宣王「遇災而懼」，每章首言旱既太甚，知詩人之志在憂旱災也。毛傳云：「孑然遺失也。」箋云：「黎，衆也。周之衆民多有死亡者矣，幸其餘無有孑遺者，言又餓病也。」孔氏正義云：「孑然，孤獨之貌。言靡有孑遺，謂無有孑然得遺漏。」按：遺，失。失即佚，遺佚即遺漏。無有遺漏，是皆不免於死亡。下云「昊天上帝，則不我遺。胡不相畏，先祖于摧」，箋云：「天將遂早餓殺我與？」先祖何不助我恐懼，使天雨也？「然則『靡有孑遺』乃虛設之辭，謂旱災如此，先祖若不助我恐懼，使天雨，則昊天上帝既不欲使我民有遺留，周餘黎民必將飢饉餓病，無有孑遺也。不逆『胡不相畏』之志，則周真無遺民，不逆『我從事獨賢』之志，則溥天之下真莫非王臣。」

趙氏言「民無孑然遺脫不遭旱災者」，與毛、鄭義異。《白虎通》有《王者不臣》篇，言王者所不臣者三，謂「二王之後、妻之父母、夷狄」也，是「王者有所不臣」也。妻之父母且不臣，而轉臣父乎？孝子之至，莫大乎尊親；尊親之至，莫大乎以天下養。爲天子父，尊之至也；以天下養，養之至也。注尊之至，瞽瞍爲天子父，養之至，舜以天下之富奉養其親。至，極也。《詩》曰：『永言孝思，孝思惟則。』此之謂也。注《詩》，《大雅·下武》之篇。周武王所以長言孝道，欲以爲天下法則，此舜之謂也。疏注「詩大」至「謂也」○正義曰：《詩》在《大雅·下武》篇第三章。毛傳云：「則其先人也。」箋云：「長我孝心之所思。所思者，其維則三后之所行。子孫以順祖考爲孝。」義與趙氏異。趙氏以「孝思」爲「孝道」者，《說文》人部云：「侖，思也。」段氏玉裁《說文解字注》云：「侖，下云：『侖，理也。』《大雅》毛傳云：『論，思也。』論者侖之假借。思與理義同也。」《呂氏春秋·察傳》篇云「必驗之以理」，高誘注云：「理，道理也。」《淮南子·本經訓》云「喜怒剛柔，不離其理」，高誘注云：「理，道也。」是思亦道也。大王、王季、文王皆明哲可法，故

毛以則爲「則其先人」，舜之父頑，未可法則，故趙氏不從毛義而云「爲天下則法」也。①箋解「永言配命」以爲武王言，趙氏以此「永言」爲「周武王所以長言孝道」，則與鄭同。《書》曰：「祇載見瞽瞍，夔夔齊栗，瞽瞍亦允。」若是爲父不得而子也。」**注**《書》，《尚書》逸篇。祇，敬；載，事也。夔夔齊栗，敬慎戰懼貌。舜既爲天子，敬事嚴父，戰栗以見瞽瞍。瞍亦信知舜之大孝。若是爲父不得而子也。以是解咸丘蒙之疑。**疏**注「書尚」至「之疑」○正義曰：此引《書》不見二十八篇之中，故爲逸篇，蓋亦《舜典》文也。「祇，敬也」，《爾雅·釋詁》文。《周書·謚法解》云：「載，事也。」《國語·楚語》云「爲齋敬也」，《禮記·內則》云「進退周旋慎齊」，是齊爲「敬慎」也。《論語·八佾》篇云「使民戰栗」，《毛詩·秦風·黃鳥》「惴惴其慄」，傳云：「慄慄，懼也。」栗通慄，是爲「戰懼」也。趙氏以「夔夔」爲「齊栗」之貌，故云「敬慎戰懼貌」也。閻氏若璩《釋地》又續《云》：「炳燭齋隨筆」曰：「夔，一足之物也。凡人之立，常時則兩足舒布，有所畏則兩足緊並，有若一足之物，故曰夔夔也。《史記》使天下之士重足而立，亦此意。」按，《酷吏·義縱傳》：「南陽吏民，重足一迹。」

語尤顯白。《爾雅·釋詁》云：「允，信也。」趙氏以「瞽瞍亦信知舜之大孝」釋「瞽瞍亦允」，是讀允字句，若字屬下，爲孟子說《書》之辭。近讀允若爲句，從晚出古文《大禹謨》也。江氏聲《尚書集注音疏》云：「孟子既引此經，遂言曰『是爲父不得而子也』。趙氏讀允字絕句，若字屬下入孟子語中，似不合孟子語意，故聲裁節之而別爲之解。允，誠也。若，善也。舜敬事瞽瞍，見之必敬慎戰栗，瞽瞍化之，亦誠實而善。所謂「烝烝乂，不格姦」也。」

章指：言孝莫大於嚴父而尊之矣，行莫過於蒸蒸執子之政也。此聖人之軌道，無有加焉。**疏**「孝莫大於嚴父」○正義曰：見《孝經》「聖治」章第九。「執子之敬」，一本作「執子之政」。

孫授易授詩校字

孟子正義卷十八終

①「則法」，據注文當作「法則」。

孟子正義卷十九

江都縣鄉貢士焦循撰集

萬章曰：「堯以天下與舜，有諸？」**注**欲知堯實以天下與舜否。孟子曰：「否，**注**堯不與之。天子不能以天下與人。」**注**當與天意合之。

非天命者，天子不能違天命也。「堯曰咨爾舜，天之

歷數在爾躬」，是也。**疏**注「堯曰」至「是也」。○正義

曰：文見《論語·堯曰》篇。「然則舜有天下也，孰

與之？」**注**萬章言誰與之也？曰：「天與之。」**注**孟子言天與之。「天與之者，諄諄然命之乎？」**注**萬章言天有聲音命與之乎？**疏**注「萬章」

至「之乎」○正義曰：《說文》言部云：「諄，告曉之孰也。从

言，章聲。讀若庵。」段氏玉裁《說文解字注》云：「《大雅》：

「誨爾諄諄。」《左傳》：「年未盈五十而諄諄如八九十者。」

《孟子》：「諄諄然命之乎？」《大雅》「諄諄」，鄭注《中庸》引

作「忱忱」，云：「忱忱，懇誠貌也。」其中懇誠，其外乃曉告之

孰，義相足也。」按：告曉之孰則有聲音，故云「天有聲音」

也。《爾雅·釋詁》云：「命，告也。」命之即是告曉之，諄諄

然命之，則懇誠而孰告之也。曰：「否，天不言，以

行與事示之而已矣。」**注**孟子曰：天不言語，但

以其人之所行善惡，又以其事，從而示天下也。

曰：「以行與事示之者，如之何？」**注**萬章欲

知示之之意。曰：「天子能薦人於天，不能使

天與之天下；諸侯能薦人於天子，不能使天

子與之諸侯；大夫能薦人於諸侯，不能使諸

侯與之大夫。昔者堯薦舜於天而天受之，暴

之於民而民受之，故曰：天不言，以行與事

示之而已矣。」**注**孟子言下能薦人於上，不能令上

必用之。舜，天人所受，故得天下也。

曰：「敢問薦之於天而天受之，暴之於

民而民受之，如何？」**注**萬章言天人受之，其事

云何？曰：「使之主祭而百神享之，是天受之；使之主事而事治，百姓安之，是民受之也。天與之，人與之，故曰：天子不能以天下與人。」**注**百神享之，祭祀得福也，百姓安之，民皆謳歌其德也。舜相堯二十有八載，非人之所能爲也，天也。**注**二十八年之久，非人爲也，天與之也。堯崩，三年之喪畢，舜避堯之子於南河之南。天下諸侯朝覲者不之堯之子而之舜，訟獄者不之堯之子而之舜，謳歌者不謳歌堯之子而謳歌舜，故曰天也。夫然後之中國，踐天子位焉。而居堯之宮，逼堯之子，是篡也，非天與也。**注**南河之南，遠地，南夷也。故言「然後之中國」。堯子，胤子丹朱。訟獄，獄不決其罪，故訟之；謳歌，謳歌舜德也。**疏**「三年之喪畢」○正義曰：趙氏佑《溫故錄》云：「程氏《逸箋》言《後漢·李固傳》：『昔堯殂之後，舜仰慕三年，坐則見堯於牆，食則見堯於羹。』此舜居堯喪之實事。」○「而居堯之宮」○正義曰：

王氏引之《經傳釋詞》云：「而猶如也。《易·明夷》《象傳》『君子以莅衆，用晦而明』，虞注云：『而，如也。』《詩·君子偕老》曰『胡然而天也，胡然而帝也』，毛傳云：『尊之如天，審諦如帝。』《都人士》曰『垂帶而厲』，箋曰：『而厲，如繫厲也。』《孟子·萬章》篇『而居堯之宮，逼堯之子』，而字並與如字同義，故二字可以互用。《詩·都人士》曰：『彼都人士，垂帶而厲。彼君子女，卷髮如蠶。』《大戴記·衛將軍文子》篇曰：『漏而不滿實如虛，過之如不及。』《孟子·離婁》篇曰：『文王視民如傷，望道而未之見。』○**注**「南河」至「中國」○正義曰：《史記集解》引劉熙云：「南河，九河之最在南者。」又云：「天子之位不可曠年，於是遂反格於文祖而當帝位。帝王所都爲中，故曰中國。」張守節《史記正義》云：「《括地志》：『故堯城在濮州鄆城縣東北十五里。』^①又有偃朱故城，在縣西北十五里。」濮北臨濮，大川也。河在堯都之南，故曰「南河」。《禹貢》「至于南河」是也。其偃朱城所居即舜讓避丹朱於南河之南處也。」按：《禹貢》「浮于江、沔、潛、漢，逾于洛，至于南河」，指豫州北之河。濮在豫河之東南，固可謂之南河之南。九河在兗州，濮亦適當其南，故劉

①「州」，原誤作「潯」，今從沈本據《史記正義》及經解本改。

熙以爲「九河之最南者」。所解「南河」不同，而其指濮則一也。曹、濮之間，春秋時尚戎狄雜處，則以爲南夷似亦可。乃趙氏稱「遠地南夷」，則不同熙說矣。蓋遠在豫河之南，戎狄之地也。濮去冀州固非遠地矣。閻氏若璩《釋地續》云：「古帝王之都皆在冀州。堯治平陽，舜治蒲坂，禹治安邑。安邑在今夏縣西北十五里，三都相去各二百餘里，在大河之北。其河之南則豫州地，非帝畿矣。舜避堯之子於此，得毋亦如左氏所云「越竟乃免」乎？禹避於陽城，益避於箕山之陰，皆此意。」《文選》陸機《答賈長淵詩》云「獄訟違魏，謳歌適晉」，注引《孟子·萬章》作「天下朝覲獄訟者」，又云：「舜曰天也，夫然後歸中國，踐天子之位焉。」《史記·五帝本紀》云：「獄訟者不之丹朱而之舜，謳歌者不謳歌丹朱而謳歌舜。舜曰天也。」與《文選》注所引同。劉熙言「於是遂反」，則熙所據之本正作「歸中國」，故以反釋歸。然則趙本作「之中國」，與劉異。《周禮·地官·大司徒》云：「凡民之不服教而有獄訟者」，注云：「爭罪曰獄，爭財曰訟。」賈氏疏云：「《秋官·大司寇》：『以兩造禁民訟，以兩劑禁民獄。』獄訟相對，故獄爲爭罪，訟爲爭財，若獄訟不相對，則爭財亦爲獄。其義具在《秋官》。」按：《秋官·大司寇》言「諸侯之獄訟」、「卿大夫之獄訟」、「庶民之獄訟」，《小司徒》「聽萬民之

獄訟」、「命夫命婦不躬坐獄訟」、「以五聲聽獄訟」、「以三刺斷庶民獄訟之中」，《士師》「察獄訟之辭」，《鄉士》、《遂士》「聽其獄訟」、「辨其獄訟」，《禮記·月令》「孟秋決獄訟」，《淮南子·汜論訓》云「有獄訟者搖輶」，皆稱「獄訟」。《文選》注所引正與之同。趙氏本作訟獄，故解云「獄不決其罪故訟之」，是以「訟獄」爲「訟此獄」。劉熙《釋名·釋官室》云：「獄，確也。言實確人情僞也。」獄不決其罪則不能確人情僞，故爭訟之也。蓋主獄訟自有其官，惟主獄者不能決，乃上就舜而訟之，如後世叩閭擊登聞鼓，此趙氏之義也。《泰誓》曰：「天視自我民視，天聽自我民聽。」此之謂也。」**注**《泰誓》，《尚書》篇名。自，從也。言天之視聽從人所欲也。**疏**注「泰誓」至「欲也」○正義曰：《泰誓》，詳見前。此二語，今文《尚書》無之。阮氏元《校勘記》云：「宋九經本、咸淳衢州本泰作大，廖本、孔本、韓本作太，注同。泰，太皆俗，古祇作大。」

章指：言德合於天，則天爵歸之；行歸於仁，則天下與之。天命不常，此之謂也。

萬章問曰：「人有言至於禹而德衰，不傳於賢而傳於子。有諸？」**注**問禹之德衰，不傳於賢而自傳於子，有之否乎？**疏**「人有言」至「於

子」○正義曰：翟氏灝《考異》云：「《新序·節士》篇禹問伯成子高曰：『昔者堯治天下，吾子立爲諸侯。堯授舜，吾子猶存焉。及吾在位，子辭諸侯而耕，何故？』子高曰：『昔堯之治天下，舉天下而傳之他人，至無欲也，擇賢而與之，至公也。舜亦猶然。今君之所懷者私也，百姓知之，貪爭之端自此始矣。德自此衰，刑自此繁矣。吾不忍見，以是野處也。』《韓非子·外儲說》潘壽對燕王曰：『禹愛益而任天下於益，已而以啓人爲吏，及老而以啓爲不足任天下，故傳天下於益，而勢重盡在啓也。已而啓以友黨攻益而奪之天下。是禹名傳天下於益，而實令啓自取之也。此禹之不及堯舜明矣。』萬章所謂人言，蓋此等言也。故孟子姑援別典之說，明益方避啓而未嘗貪其位，啓順人心即位而未嘗奪於益，以絕其尤甚之謬妄，而禹德盛衰不暇更置辨也。」孟子曰：「否，不然也。」**注**否，不也。不如人所言。**疏**「否不也」不如人所言○正義曰：阮氏元《校勘記》云：「岳本、廖本、孔本、韓本、《考文》古本、足利本並有注『否不也」

如人所言』八字，注疏本無之。有者是也。因此可正今本經文之誤。經文本作『孟子曰否然也』三字一句，無不字，故注之云『否，不也。不如人所言』。《孟子》之否然，即今人之不然也。他否字皆不注，獨此注者，恐人之誤斷其句於『否』字句絕，則『然也』不可通矣。天與賢則與賢，天與子則與子。**注**言隨天也。昔者舜薦禹於天，十有七年。舜崩，三年之喪畢，禹避舜之子於陽城。天下之民從之，若堯崩之後不從堯之子而從舜也。禹薦益於天，七年。禹崩，三年之喪畢，益避禹之子於箕山之陰。朝覲訟獄者不之益而之啓，曰：『吾君之子也。』謳歌者不謳歌益而謳歌啓，曰：『吾君之子也。』

「丹朱之不肖，舜之子亦不肖。舜之相堯，禹之相舜也，歷年多，施澤於民久。啓賢，能敬承繼禹之道。益之相禹也，歷年少，施澤於民未久。」**注**舜薦禹，禹薦益，同也。以啓

之賢，故天下歸之，益又未久故也。陽城，箕山之陰，皆嵩山下深谷之中以藏處也。

疏「丹朱」至「亦不肖」○正義曰：閻氏若璩《釋地續》云：「《漢·曆志》引《帝系》曰：『陶唐氏讓天下於虞，使子朱處於丹淵爲諸侯。』丹淵雖有范汪《荊州記》、魏王泰《括地志》各言所在，恐未可據信，蓋世遠也。因思堯在位七十年，放齊曰『胤子朱啓明』，止曰朱，未有國也。及後三載，薦舜於天，朱始出封丹，故有丹朱之號。其避堯之子，則以朱奔父喪在平陽耳。丹朱姓，在周爲傅氏，見《國語》。《燃犀解》引徐自淇云：「二子不肖但不似父之神聖耳，使果大不肖，則且起而與舜禹爭天下，安能成父之志？昔人稱丹朱自托於傲以成禪讓，真無愧爲堯之子。」○注「陽城」至「處也」○正義曰：《史記·夏本紀》云：「舜薦禹於天爲嗣，十七年而帝舜崩。三年喪畢，禹辭避舜之子商均於陽城。」《集解》引劉熙云：「今潁川陽城是也。」《本紀》又云：「帝禹東巡狩，至於會稽而崩，以天下授益。三年之喪畢，益讓帝禹之子啓而辟居箕山之陽。」

《集解》云：「《孟子》陽字作陰。劉熙曰：『崇高之北。』閻氏若璩《釋地》云：『陽城，山名。漢潁州有陽城縣，以山得名，洧水所出。唐武后改曰告成，後又曰陽邑。五代周省人

登封，故此山在今登封縣北三十八里，去嵩山幾隔三十里，安得即云「嵩山下之深谷」與？箕山爲嵩高之北，而張守節云：「箕山一名許由山，在洛州陽城縣南十三里。」《括地志》遂云：「陽城縣在箕山北十三里。」守節又云：「陽城縣在嵩山南二十三里。」《括地志》遂云：「嵩山一名外方山，在洛州陽城縣西北二十三里。」足互相證明，斷斷其非一山也。酈道元注先敘太室山，次五渡水，並屬崇高縣，又敘禹避商均於此，及周公測日景處，次箕山及上有許由冢，並屬陽城縣。雖同見潁水條內，而山固區以別矣。趙氏所以誤者，注書在藏於複壁時，想無多書冊可討尋，又無交遊以質問。虛理或可意會，實跡豈容臆度？地理多譌，正坐此爾。周氏柄中《辨正》云：「箕山之陰，《史記》作『箕山之陽』。山北曰陰，陽城在箕山之北，故張守節云『陰即陽城也』。《史記》作陽，則爲箕山之南，與《孟子》不合，故張守節疑《史記》箕字是嵩字之譌。蓋陽城在嵩山南二十三里，則爲嵩山之陽也。趙注：『陽城，箕山之陰，皆嵩山下深谷中可藏處。』閻百詩非之，其說良然。但謂箕山爲嵩高之北，此本劉熙語。愚謂北字疑譌。《括地志》：『陽城縣在箕山北十三里，嵩山在陽城縣西北二十三里。』則陽城在嵩山之南，箕山又在陽城之南，非北也。」舜、禹、益相去久遠，其子之賢不

肖，皆天也，非人之所能爲也。莫之爲而爲者，天也；莫之致而至者，命也。**注**莫，無也。

人無所欲爲而橫爲之者，天使爲也；人無欲致此事而此事自至者，是其命祿也。**疏**注「莫無」至「祿也」○

正義曰：《毛詩·大雅·抑》篇「莫捫朕舌」，傳云：「莫，無也。」《荀子·致士》篇云：「凡流言、流說、流事、流謀、流譽、流愬，不官而衡至者，君子慎之。」**注**云：「流者，無根源之謂。不官，謂無主首也。」衡讀爲橫，橫至，橫逆而至也。此言「橫爲之」，猶《荀子》言「衡至」。從爲順，橫爲逆。從所欲爲而爲，順也；無所欲爲而爲，故爲橫也。「是其命祿也」，閩、監、毛三本作「是其命而已矣故曰命也」。

「匹夫而有天下者，德必若舜禹而又有天子薦之者，故仲尼不有天下；繼世以有天下。」**注**仲尼無天子之薦，故不得有天下；繼世之君雖無仲尼之德，襲父之位，非匹夫，故得有天下也。**疏**「繼世以有天下」○正義曰：趙氏屬上，近時通解屬下。天之所廢，必若桀紂者也，故益、伊尹、周公不有天下。**注**益值啓之賢，伊尹值太甲能改

過，周公值成王有德，不遭桀、紂，故以匹夫而不有天下。伊尹相湯以王於天下。湯崩，大丁未立，外丙二年，仲壬四年。大甲顛覆湯之典刑，伊尹放之於桐。三年，大甲悔過，自怨自艾，於桐處仁遷義，三年，以聽伊尹之訓己也，復歸于亳。**注**大丁，湯之太子，未立而薨。外丙立二年，仲壬立四年，皆大丁之弟也。大甲，大丁子也。伊尹以其顛覆典刑，放之於桐邑。處，居也；遷，徙也。居仁徙義，自怨其惡行。艾，治也。治而改過，以聽伊尹之教訓己，故復得歸之於亳，反天子位也。**疏**注「大丁」至「子也」○正義曰：《史記·殷本紀》云：「湯崩，太子太丁未立而卒，於是廼立太丁之弟外丙，是爲帝外丙。帝外丙即位三年崩，立外丙之弟中壬，是爲帝中壬。帝中壬即位四年崩，伊尹廼立太丁之子太甲。太甲，成湯適長孫也，是爲帝太甲。」趙氏所本也。《書序》云：「成湯既沒，太甲元年，伊尹作《伊訓》、《肆命》、《徂后》。」江氏聲《尚書集注音疏》云：「成湯之歿久矣，于此言『成湯既歿』者，蓋三篇皆稱述成湯，故推本之耳。《孟子·

萬章篇云：「湯崩，太丁未立，外丙二年，仲壬四年，太甲顛覆湯之典型。」則成湯之歿距太甲元年，中隔兩君，歷有年所，非湯歿之後即爲太甲元年也。」○注「伊尹」至「位也」○正義曰：《史記·殷本紀》云：「帝太甲既立三年，不明，暴虐，不遵湯法，亂德，於是伊尹放之於桐宮。三年，伊尹攝行政當國以朝諸侯。帝太甲居桐宮三年，悔過自責反善，於是伊尹迺迎帝太甲而授之政。」《書序》云：「太甲既立，不明，伊尹放諸桐，三年，復歸於亳，思庸，伊尹作《太甲》三篇。」周氏柄中《辨正》云：「當以《書序》爲正。蓋居桐在諒陰時。自《史記》以放桐在既立三年後，於是霍光將廢昌邑，田延年遂以伊尹廢太甲以安社稷爲辭。」王氏鳴盛《尚書後案》云：「鄭康成所傳真古文原有《伊訓》，其書雖亡，猶見於《漢書·律曆志》所引，曰：「惟太甲元年十有二月乙丑朔，伊尹祀於先王，誕資有牧方明。」蓋劉向、歆父子領校秘書，親見古文，歆撰《三統曆》載《伊訓》，故班固采入《律曆志》，的確可信。孟子言湯崩，太丁未立先卒，外丙立二年崩，仲壬立四年崩，乃立太甲。趙岐注甚明，《史記·殷本紀》及《律曆志》說並同。真《伊訓》所云太甲元年，乃仲壬崩之明年。《書序》「成湯既歿，太甲元年」，既者，追溯之辭，不可泥。商人以丑月爲正月，則十二月是子月，據劉歆以《三統曆》推是

年爲太甲元年十二月乙丑朔旦冬至，至朔同日，曆家以爲曆元。伊尹祀於先王者，以冬至配上帝故也。《律曆志》既引此文而解之云：「言雖有成湯、太丁、外丙之服，以冬至越蒞祀先王於方明，以配上帝。」是朔旦冬至之歲也。且無論太甲繼仲壬不繼湯，即爲繼湯，湯必以去年崩。至踰年正月太甲改稱元年，至此十二月朔乃行郊祀之禮。十二月是元年末，非元年初也。乃僞作者并朔字去之，改爲即位陳訓，遂掩却「至朔同日」之事，以改祀先王爲莫殯告即位，并謂此時湯崩方踰月。果如此，則崩年即改稱元年矣。崩年改元，亂世之事，曾謂伊尹爲之乎？」又云：「如僞《書》則是自湯崩太甲立，不率教即被放，後改悔，復迎歸復位，其事皆在二十六月之內，悖謬極矣。放君大變之事，伊尹豈輕有是舉？不明則訓之，冀其改悔，不改則又誡之，至再至三猶不改，然後不得已而放之。計始立至被放，必不在一二年之內。即放後亦必令其動心忍性，徐徐熟察，實見其能改，方始迎歸。必不乍放乍迎，如置碁然也。《史記·殷本紀》首三年字指初即位後，下三年字指被放後，蓋前後共六年，最爲明白。《書序》云：「太甲既立，不明，伊尹放諸桐，三年，復歸於亳。」既之爲言，可該久遠，不必在一二年內。古文簡略，省首三年字耳，與《史記》不乖刺也。《孟子》「太甲顛覆湯之

典型，伊尹放之於桐。三年，太甲悔過，自怨自艾，於桐處仁遷義，三年，以聽伊尹之訓己也，復歸於亳。」據文似在桐有六年之久。《孟子》行文取便，要其爲六年則同。奈何作僞者竟謂太甲即位未久即被放廢，放後未幾，又即復位。伊尹之無人臣禮，一至於此，傷教害義，不可不辨。」閻氏若璩《釋地又續》云：「鄭康成《書序》注：『桐，地名也。有王離宮焉。』初不指爲湯葬地。余以《後漢書》『梁國虞縣有桐亭，太甲所放處』，應即在於此。虞今歸德虞城縣，距湯都南亳僅七十里，方可伊尹既攝國政，復時時往訓太甲三年。不然，如人言湯亳爲偃師，去虞城八百餘里，尹豈有縮地之法，分身以應乎？湯都仍屬穀熟鎮爲是。」周氏柄中《辨正》云：

「湯都實在偃師，《史記正義》引晉《太康地記》云：『尸鄉南有亳坂，東有城，太甲所放處也。尸鄉在洛州偃師縣西南五里。』據此，則太甲放處密邇湯都。閻氏指桐亭爲放處而移湯都於穀熟以就之，非也。」《尚書後案》云：「趙岐注桐爲邑，亦不云葬地。緣孔傳欲傳會太甲居近先王，致生此說。後儒見有『居憂』字，並謂桐官乃諒陰三年之制，非關放廢。顯悖《孟子》，尤爲怪矣。」《毛詩·召南·殷其雷》「莫敢遑處」，《小雅·四牡》「不遑啓處」，①傳皆云：「處，居也。」「遑，徙也」，「又，治也」，並《爾雅·釋詁》文。艾又字通。

周公之不有天下，猶益之於夏，伊尹之於殷也。孔子曰：「唐、虞禪，夏后、殷、周繼，其義一也。」**注**周公與益、伊尹雖有聖賢之德，不遭者時，然孔子言禪、繼其義一也。**疏**「孔子」至「一也」○正義曰：義者，宜也。孟子私淑孔子，全得其通變神化之學，故於此明之。

章指：言篤志於仁則四海宅心，守正不足則聖位莫繼：丹朱、商均是也。是以聖人孜孜於仁德也。

萬章問曰：「人有言伊尹以割烹要湯，有諸？」**注**人言伊尹負鼎俎而干湯，有之否？**疏**

注「人言」至「之否」○正義曰：翟氏灝《考異》云：「《墨子·尚賢》篇：『昔伊尹爲莘氏女師僕，親爲庖人，湯得而舉之。』《莊子·庚桑楚》：『湯以胞人籠伊尹，秦穆公以五羊之皮籠百里奚。』《史記·殷紀》：『阿衡欲干湯而無由，乃爲有莘氏

①「牡」，原誤作「壯」，今從沈校據《毛詩》改。

媵臣，負鼎俎，以滋味悅湯。」呂不韋書有《本味》一篇，言有仇氏得嬰兒於空桑之中，令嫗人養之，是爲伊尹。湯請有仇爲婚，有仇以伊尹爲媵送女。尹說湯以至味，極論水火調劑之事，周舉天下魚肉之美，菜果之美，和之美，飯之美，水之美者，而云非爲天子不得具。「割烹要湯」之說，無如此篇之詳盡者。其文若果之美者，箕山之東有盧橘，應劭《史記》注引之。飯之美者，玄山之禾，南海之秬，許慎《說文》引之。所稱書目俱不曰《呂覽》，曰《伊尹》。考班固《藝文志》有《伊尹》二十七篇，列於小說家。蓋呂氏聚斂羣書爲書，所謂《本味》篇乃剽自《伊尹》說中，故漢人之及見原書者猶標著其原目如此。夫小說之怪誕猥鄙，何足挂屑？而其時枉己辱身之徒援以自衛，津津樂道，至輾轉傳聞於孟子之門，又烏可不辨論哉？馬遷自命良史，《殷紀》中雜陳二說，且次《孟子》正說於後。又作《孟子傳》而云牛鼎之意。近世學者不復料前古有小說，而但奉遷《史》爲信書，則雖經孟子明辨，猶其惑未盡祛也。愚故追索其根株，以實抉之曰：是說也，但本《伊尹》說也，《伊尹》說乃怪誕猥鄙之小說也。」孟子曰：「否，不然。」**注**否，不是也。**疏**「否不然」○正義曰：阮氏元《按勘記》云：「不字衍文，說見上注。」否不

是也，當同前後章作「否不也不如是也」，奪三字。」伊尹耕於有莘之野而樂堯舜之道焉。非其義也，非其道也，祿之以天下，弗顧也；繫馬千駟，弗視也。非其義也，非其道也，一介不以與人，一介不以取諸人。**注**有莘，國名。伊尹初隱之時，耕於有莘之國，樂仁義之道。非仁義之道者，雖以天下之祿加之，不一顧而覲也。千駟，四千匹也。雖多，不一眄視也。一介草不以與人，亦不以取於人也。**疏**注「有莘國名」○正義曰：《大戴記·帝繫》篇：「鯀娶於有莘氏之女，謂之女志氏。」《漢書·古今人表》：「女志，鯀妃，有嫫氏女。」此唐虞以前之有莘未知所在。《列女傳》：「湯妃有嫫者，有嫫氏之女也。」又：「大嫫者，武王之母，禹後有嫫嫫氏之女。」於大嫫別之曰禹後嫫氏，而湯妃則曰有嫫氏。《史記·殷本紀》云：「阿衡欲干湯而無由，乃爲有莘氏媵臣。」《正義》引《括地志》云：「古莘國在汴州陳留縣東五里，故莘城是也。」《呂氏春秋·本味》篇：「有仇氏採得嬰兒於空桑，後居伊水，命曰伊尹。」《元和郡縣志》：「汴州陳留縣故莘城，在縣東北三十五里，古莘國

地。湯伐桀，桀與韋顧之君拒湯於莘之墟，此即湯妃所生之國，伊尹耕於是野者也。」閻氏若璩《釋地》云：「汴州陳留縣，古莘國地，計其去湯都南毫不過四百里，所以湯使可三往聘。若大姒所產之莘國，則在今西安府郃陽縣南二十里，道遙遠矣。」○注「雖以至人也」○正義曰：「祿之以天下，謂為天子也，故曰『以天下之祿加之』。」《說文》頁部云：「顧，還視也。」《書·多方》云：「開厥顧天」，鄭氏注云：「顧，由視念也。」「還視」謂回首而視，心念之不能舍也。《說文》見部云：「覲，欲也。」欲與念義同，故以「覲」釋「顧」也。《詩·鄭風·清人》「駟介旁旁」，箋云：「駟，四馬也。」千駟，是為四千匹。《禮記·曲禮》云：「毋淫視」，注云：「淫視，睇眄也。」以「眄」釋「視」，謂欣慕此千駟而淫視之也。《方言》云：「芥，草也。自關而西或曰草，或曰芥。」趙氏讀「介」為「芥」，故以草釋之也。湯使人以幣聘之，囂囂然曰：「我何以湯之聘幣為哉？我豈若處畎畝之中，由是以樂堯舜之道哉？」**注**湯聞其賢，以玄纁之幣帛往聘之。囂囂然，自得之志，無欲之貌也。曰：豈若居畎畝之中而無憂哉？樂我堯舜仁義之道。**疏**注「囂囂」至「貌也」○正義曰：《爾雅·

釋言》云：「囂，閑也。」注云：「囂然閑暇貌。」《淮南子·本經訓》云：「閑靜而不躁」，高誘注云：「閑靜言無欲也。」湯三使往聘之，既而幡然改曰：「與我處畎畝之中，由是以樂堯舜之道，吾豈若使是君為堯舜之君哉？吾豈若使是民為堯舜之民哉？吾豈若於吾身親見之哉？」**注**幡，反也。三聘既至，而後幡然改本之計，欲就湯聘以行其道，使君為堯舜之君，使民為堯舜之民。**疏**注「幡反也」○正義曰：《音義》云：「幡，張云：『與翻同。』」《荀子·彊國》篇云：「反然舉惡桀紂而貴湯武」，注云：「反音翻。翻然，改變貌。」幡然即翻然，翻然即反然也。天之生此民也，使先知覺後知，使先覺覺後覺也。予，天民之先覺者也。予將以斯道覺斯民也，非予覺之而誰也？」**注**覺，悟也。天欲使先知之人悟後知之人。我，先悟覺者也。我欲以此仁義之道覺悟未知之民，非我悟之，將誰教乎？**疏**注「覺悟也」○正義曰：《說文》見部云：「覺，寤也。」寤，悟字通。思天下之

民匹夫匹婦有不被堯舜之澤者，若己推而內之溝中。其自任以天下之重如此，故就湯而說之以伐夏救民。**注**伊尹思念不以仁義之道化民者，如己推排內之溝壑中也。自任其重如此，故就湯，說之，伐夏桀，救民之厄也。

「吾未聞枉己而正人者也，況辱己以正天下者乎？」**注**枉己者尚不能以正人，況於辱己

之身而有正天下者乎。聖人之行不同也，或遠或近，或去或不去，歸絜其身而已矣。**注**不同

謂所由不同。大要當同歸，但殊塗耳。或遠者，處身遠也；或近者，仕者近君也。或去者，不屑就也；或不去者，云「焉能挽我」也。歸於絜身不污己而已。**疏**「聖人」至「而已矣」○正義曰：程氏瑤田《通藝

錄·論學小記》云：「孔子之栖栖皇皇，為天下也，然而為己而已。道至於贊化育，參天地，始完得盡己之性也。沮、溺、丈人、晨門、荷蕢、儀封人諸人，考其言論，察其舉止，豈石隱者流哉？其為己也，亦豈絕不為人謀乎？故曰：「聖人之行不同也，或遠或近，或去或不去，歸潔其身而已矣。」潔身

者，豈獨善其身而不兼善天下之謂哉？窮則獨善，沮、溺、丈人之行也；達則兼善，大聖人之志也。是志也，蓋隱居之所求而行義以達之者也，故曰：「君子之仕也，行其義也。道之不行，已知之矣。」明乎此而君子為己之學與為仁由己不由人之義，不昭然若揭乎？「吾聞其以堯舜之道要湯，未聞以割烹也。」**注**我聞伊尹以仁義干湯，致

湯為王，不聞以割烹牛羊為道。《伊訓》曰：「天

誅造攻自牧宮，朕載自亳。」**注**《伊訓》，《尚書》

逸篇名。牧宮，桀宮。朕，我也。謂湯也。載，始

也。亳，殷都也。言意欲誅伐桀，造作可攻討之罪

者，從牧宮桀起。自取之也。湯曰：我始與伊尹謀

之於亳，遂順天而誅也。**疏**注「伊訓」至「誅也」○正義

曰：伏生今文二十九篇無《伊訓》，孔安國古文五十八篇有

《伊訓》，次《咸有一德》，《典寶》之後，為今文所無，故為「逸

篇」。惠氏棟《古文尚書考》云：「鄭康成注《書序·典寶》引

《伊訓》云「載孚于亳」，又云「征是三股」，則此篇漢末猶存。

崔實《政論》曰：「皋陶陳謨而唐虞以興，伊箕作訓而殷周用

隆。」則《伊訓》之篇，子真曾見之矣。」江氏聲《尚書集注音

疏》云：「牧宮桀宮者，言「天誅之所自」，則自是桀宮。下又

別言「自亳」，亳是殷都則牧宮是桀宮矣。「朕，我」，《釋詁》

文。云「謂湯也」，則未然也。《詩·周頌》序云：「載見諸

侯，始見乎武王廟也。」故云「載，始也」。《書序》云：「湯始

居亳，從先王居。」故云「亳，殷都也」。此篇是伊尹訓太甲之

文，「朕載自亳」之語，無以見是述湯言。古人朕字上下通

稱，安見伊尹不稱朕乎？聲謂伊尹自謂也。」按：趙氏以

「作」釋「造」，謂桀自「造作可攻討之罪」，故天誅之。「自」之

訓「由」，由通猶，猶即猷。《爾雅·釋詁》云：「猷，謀也。」故

趙氏以「謀之於亳」釋「自亳」，兩自字義別也。晚出古文《伊

訓》作「造攻自鳴條」，某氏傳訓造爲始。趙氏不訓造爲始

者，湯始征自葛載，其後又伐韋伐顧伐昆吾而後乃伐桀，牧

宮既爲桀宮，不得爲始攻自桀也。若鳴條，尤不可言始矣。

所與謀者，順天救民之事，非割烹也。湯謀之於亳，非伊尹

以割烹要之，此孟子引《書》之意，謂伊尹攻桀自亳，與孟子

引《書》不合矣。

章指：言賢達之理世務也，推正以濟

時物。守己直行，不枉道而取容，期於益

治而已矣。疏「不枉道而取容」○正義曰：《史記·

白起王翦傳》贊：「偷合取容。」①《朱建傳》云：「行不苟

合，義不取容。」

萬章問曰：「或謂孔子於衛主癰疽，於

齊主侍人瘠環，有諸乎？」注「有人以孔子爲然。

癰疽，癰疽之醫也。瘠，姓，環，名。侍人也。衛

君、齊君之所近狎人。」疏注「有人」至「狎人」○正義

曰：孟子對云「不然」，故注言「或以孔子爲然」也。《戰國

策·衛策》云：「衛靈公近癰疽」，高誘注云：「《孟子》有其人，

蓋醫之幸者。」翟氏灝《考異》云：「《說苑·至公》篇述此章

文，「孔子」上無「或謂」二字，癰疽作「雍雎」，「侍」作「瘠」

作脊。《史記·孔子世家》：「雍渠爲驂乘」，《韓非子》作「雍

鉏」。輾轉相推，雍鉏、雍雎爲一人，而癰疽亦即雍渠，均以

聲同通借字耳。」閻氏若璩《釋地又續》云：「《周禮·瘍

醫》：「掌腫瘍、潰瘍之祝藥。」腫瘍，氣聚而不散者，潰瘍，

血溢而將破者。雖癰淺於疽，而二瘍皆有之。《戰國策》：

「衛靈公時，癰疽彌子瑕專君之勢以蔽左右。」蓋亦下士之職

云。錢氏大昕《潛研堂答問》云：「《孔子世家》：「衛靈公與

①「合」下，原誤重一「合」字，今據《史記》及經解本刪。

夫人同事，宦者雍渠驂乘，出，使孔子爲次乘。」又《報任安書》云：「衛靈公與雍渠同載，孔子適陳。」雍渠即《孟子》所稱癰疽，趙氏以爲癰疽之醫者，似是臆說。」孟子曰：

「否，不然也。好事者爲之也。」**注**否，不也。不如是也。好事毀人德行者爲之辭也。**疏**「否不然也」

○正義曰：阮氏元《校勘記》云：「不字，衍文。」於衛主顏

讎由。彌子之妻與子路之妻，兄弟也。彌子謂子路曰：「孔子主我，衛卿可得也。」子路以告。孔子曰：「有命。」孔子進以禮，退以義，得之不得曰「有命」。而主癰疽與侍人瘠環，是無義無命也。**注**顏讎由，衛賢大夫，孔子以爲主。彌子，彌子瑕也，因子路欲爲孔子主。孔子知彌子幸於靈公不以正道，故不納之而歸於命。孔子進以禮，退以義，必曰「有天命也」，若主此二人，是爲無義無命也。**疏**「孔子進」至「有命」○正義

曰：張氏爾岐《蒿菴問話》云：「人道之當然而不可違者，義也；天道之本然而不可爭者，命也。貧富貴賤，得失死生之有所制而不可強也，君子與小人也。命不可知，君子當以

義知命矣。凡義所不可，即以爲命所不有也。故進而不得於命者，退而猶不失吾義也。小人嘗以智力知命矣，力不能爭則智邀之，知力無可施而後謂之命也。君子以義安命，故其心常泰；小人以智力爭命，故其心多怨。衆人之於命，亦有安之矣。大約皆知其無可奈何而後安之者也；聖人之於命，安之矣，實不以命爲準也而以義爲準。故雖力有可爭，勢有可圖，而退然處之，曰義之所不可也。義所不可，斯曰命矣。故孔子之於公伯寮未嘗無景伯之可恃也，於衛卿未嘗無彌子瑕之可緣也，孟子之於臧倉未嘗無樂正子之可力爲辯而重爲請也，亦曰：義所不在耳。義所不在，斯命所不有矣。故聖賢之於命，一於義者也，安義斯安命矣；衆人之於命，不必一於義也，而命皆有以制之，制之至無可奈何而後安之。故聖賢之與衆人，安命同也，而安之者不同也。」○**注**「顏讎由」至「孔子主」○正義曰：全氏祖望《經史問答》云：「《漢書·古今人表》以顏濁鄒爲顏涿聚。濁鄒，子路妻兄，見《史記·孔子世家》。《索隱》疑其與《孟子》不合，其實無所爲不合也。《孔叢子》言讎由善事親，其後有非罪之執，子路哀金以贖之。或疑其私於所昵，而孔子白其不然。則於妻兄有證，是讎由即濁鄒也。孔子在衛主伯玉，亦主讎由，則讎由之賢亞於伯玉，因東道之誼而列於門牆，固其宜

也。至涿聚，則齊人也。《呂覽》言其少爲梁父大盜而卒受業於孔子，得爲名士。亦見《莊子》。然則於衛之讎由無豫矣。涿聚死事於齊，見《左傳》犂丘之役。然則顏涿聚者，顏庚也，非濁鄒也。張守節附會於字音，更不足信。閻氏若璩《釋地》又續云：「顏讎由，子路妻兄，則亦彌子瑕妻兄。彌子瑕見主其妻兄之家，遂謂主我衛卿可得，語亦非無因云。」翟氏灝《考異》云：「彌子欲借重於孔子，孔子拒之，此文甚明。《呂氏·慎大覽》乃云：『孔子道彌子瑕見釐夫人因也。』《淮南·泰族訓》亦云：『孔子欲行王道，七十說而無所偶，故因衛夫人、彌子瑕而欲通其道。』當時謗孔子者且不僅造爲癰疽、瘡環言矣。」按：癰疽與彌子瑕同幸於衛君，二人專君之勢以蔽於左右。《韓非子·說難》云：「昔者彌子瑕有寵於衛君。衛國之法，竊駕君車者罪別。彌子瑕母病，人間往夜告彌子，彌子矯駕君車以出。君聞而賢之，曰：『孝哉！爲母之故，忘其刑罪。』異日，與君遊於果園，食桃而甘，不盡，以其半啗君。君曰：『愛我哉！忘其口味，以啗寡人。』然則彌子之寵甚於癰疽。彌子有子路之親且自求結交於孔子，孔子且以義命拒之，則主癰疽必無之事矣。蓋因參乘之事而傳會之耳。」

「孔子不悅於魯衛，遭宋桓司馬將要而

殺之，微服而過宋。是時孔子當阨，主司城

貞子，爲陳侯周臣。**注**孔子以道不合，不見悅魯

衛之君而去。適諸侯，遭宋桓魋之故，乃變更微服

而過宋。司城貞子，宋卿也。雖非大賢，亦無諂惡

之罪，故謚爲貞子。陳侯周，陳懷公子也。爲楚所

滅，故無謚，但曰「陳侯周」。是時孔子遭阨難，不暇

擇大賢臣而主貞子，爲陳侯周臣。於衛齊無阨難，

何爲主癰疽、瘡環也？**疏**注「孔子」至「過宋」○正義

曰：不爲苟合取容，故不悅。趙氏以「道不合」明之，是也。

《史記·孔子世家》云：「定公十四年，孔子年五十六，由大

司寇行攝相事。齊人聞而懼，於是選齊國中女子好者八十

人，皆衣文衣而舞《康》樂。文馬三十駟，遺魯君。季桓子微

服往觀再三，將受，乃語魯君爲周道游，往觀終日，怠於政

事。孔子遂行，宿乎屯，歌曰：『彼婦之口，可以出走。彼婦

之謁，可以死敗。蓋優哉游哉，維以卒歲。』桓子喟然嘆曰：

「夫子罪我以羣婢故也夫！」孔子遂適衛，主于子路妻兄顏

濁鄒家。」此「不悅於魯」之事也。又云：「衛靈公致粟六萬。

居十月，去衛，將適陳，過匡，月餘反乎衛，主蘧伯玉家。居

衛月餘，靈公與夫人同車，宦者雍渠參乘，出，使孔子爲次

乘，招搖市過之，於是醜之，去衛適曹。是歲魯定公卒，孔子去曹適宋。」此「不悅於衛」之事也。又云：「與弟子習禮大樹下，宋司馬桓魋欲殺孔子，拔其樹，孔子去。弟子曰：『可以速矣。』」孔子曰：「天生德於予，桓魋其如予何？」此「微服過宋」之事也。○注「司城」至「臣也」○正義曰：趙氏此注甚詳明。上言「宋桓司馬」已標國名，司城貞子蒙上「宋」字爲宋臣，爲孔子在宋時所主也。過宋則不在宋而適陳，故下明標「陳侯周」，言孔子適陳，爲陳侯周之臣也。惟《史記》以司城貞子爲孔子適陳所主，是貞子爲陳卿，非宋卿。孔氏廣森《經學卮言》云：「趙氏云『司城貞子，宋卿也』，下又云『是時孔子遭厄難，不暇擇大賢臣而主貞子，爲陳侯周臣也』，則司城仍似陳卿。蓋順經意，明是陳人，特膠於司城當爲宋官，故依違兩說之。愚謂陳之司寇可效楚官名司敗，安見其司空不可效宋官，亦名司城邪？若以《左傳》『子展入陳，司空致地』之文爲疑，則服注以三司爲「陳官」者，固不若劉炫謂爲「鄭官」之說善也。且司城亦不定是貞子之官，《檀弓》有司寇惠子、司徒敬子，鄭注云：「司徒，官氏也。」惠子雖官司寇，至其子虎，則亦以「司寇」爲氏，見於《世本》。宋華、向之族奔陳者非一，而司城師之後仲佗，即宋人之在陳者，安知非有以先世宋官爲其族氏者乎？宋大夫皆遵殷之

制，以字爲謚，通《左傳》、①《世本》，未有稱子而配謚者。今據稱「貞子」，即決非宋卿。愚故獨信《史記世家》曰「孔子遂至陳，主於司城貞子家」，爲讀《孟子》不誤也。近儒有謂夫子在陳，不得謂之「爲臣」者，此尊聖而過耳。羈旅之臣，是亦臣也。還以孟子之言證之。「孔子三月無君，則皇皇如也。」若所至之國皆不爲臣，不且終歲無君乎？但《世家》載「至陳歲餘，吳王夫差伐陳，取三邑而去。楚圍蔡，蔡遷於吳」，此魯哀公二年之事。而又云：「居陳三歲，陳常被寇，於是孔子去陳。過蒲，會公叔氏以蒲畔，蒲人止孔子曰：苟毋適衛，吾出子。與之盟，出孔子東門，孔子遂適衛。衛靈公聞孔子來，喜，郊迎。」校其年歲，靈公歿已久矣。考先聖生平，嘗再至陳。《十二諸侯年表》「陳湣公六年」下云「孔子來」，是初如陳也，主司城貞子者，再如陳也。過蒲要盟則初至陳而去陳時事，太史公誤著之於此耳。先聖年譜率多附會失實，唯當以《世家》近古，爲最可據，然頗復錯亂。觀其敘歸與之歎，主蘧伯玉之事，及蔡之請遷於吳，皆前後兩見，非稍爲整比，條理棼然。謹按，《世家》先聖自三十五歲以前皆居魯，嘗爲乘田，爲委吏。昭公二十五年，三家攻昭

①「左」，原誤作「在」，今據《經學卮言》改。

公，魯亂，始適齊。聞《韶》，學之三月，是其時事。故昭公二十七年，吳公子札聘於上國，而《檀弓》記先聖在齊，嘗觀季札葬子於贏博之間，此可證者也。顧《世家》既誤以孟僖子不能相禮之歲就爲其死歲，故併南宮敬叔之隨子適周，亦舉而置諸適齊之前。考《左傳》孟僖子實卒於昭二十四年，將死，乃命敬叔來學，比敬叔服闋，魯已無君矣。知所謂「言於魯君與之一車兩馬」者，必定公，非昭公也。子在周時，《家語》有劉文公論聖人之語。定公四年，文公即卒，元二兩年，未沒昭公之喪，訪樂甚宏，又非攸宜，前後推掇，則適周其在定之三年歟？《世家》云：「定公九年，以孔子爲中都宰，一年，四方皆則之。由中都爲司空，由司空爲大司寇。」定公十年，會於夾谷，攝相事。十三年，墮三都。十四年，與聞國政。三月，季桓子受齊女樂，孔子遂行。此並與《左傳》合。且定十四年，《春秋經》不書冬，《公羊》師說亦以爲齊人歸女樂之歲也。《世家》云：「孔子遂適衛，主於子路妻兄顏濁鄒家。居頃之，去衛，將適陳，過匡，匡人止孔子。去即過蒲，月餘，反乎衛。」按，此「過蒲」之下即當以後文「會公叔氏以蒲畔」云云至「作爲《陬操》以哀之」六百六十四字移置其間。蓋過匡至陳，去陳過蒲，自蒲如衛，去衛如晉，臨河而返，乃復至衛，主蘧伯玉家。尋以醜南子之行，會靈公禮貌衰，又

復去衛。《世家》「他日靈公問兵陳，孔子曰：俎豆之事則嘗聞之，軍旅之事未之學也。明日，與孔子語，見蜚鴻，仰視之，色不在孔子，孔子遂行」四十七字，則又當移於「於是醜之」之下，「去衛過曹，是歲魯定公卒」之上。檢子國注《論語》問陳章即云：「孔子去衛過曹，如曹，曹不容，又之宋。」與《世家》云去衛過曹，去曹適宋，桓魋欲殺孔子，去適鄭，遂至陳者正合。其所以在陳絕糧者，或如子國所言，吳伐陳，陳亂乏食之故，抑或就以微服避難，倉卒喪其所資，皆未可知。要與異日在蔡被圍之事不可混合爲一也。既至陳，主司城貞子家，於是有對肅慎矢之語，有桓魋廟災之語，最後有歸與歸與之語，實哀公之三年而陳侯周之十年也。《世家》又云：「明年，孔子自陳遷於蔡三歲，楚使人聘孔子，陳蔡大夫圍孔子於野，楚昭王興師迎孔子，然後得免。其秋，楚昭王卒，於是孔子自楚返乎衛。」由是推之，定十四年以前，仕魯時也，哀元年以迄六年，居陳蔡時也。自六年返衛，以迄《左傳》所載魯人以幣召夫子之歲，則恒在於衛，孟子所謂於衛孝公公養之仕者也。子之去魯，所謂大夫以道去君者，非有君命召則終不可復歸。夫豈出入自如而好爲旅人哉？其見衛靈公，主顏雝由，畏于匡，畏于蒲，歷曹、鄭、杞、宋，遭宋桓司馬之難，則皆在定末哀初一二年間也。

是爲先聖出處大端，敬微審而備識之。」云「陳侯周陳懷公子」者，《史記·陳世家》云：「惠公卒，子懷公柳立，卒吳，陳乃立懷公之子越，是爲湣公。湣公六年，孔子適陳。二十四年，楚惠王復國，以兵北伐，殺陳湣公，遂滅陳而有之。是歲，孔子卒。」然則陳侯周有謚矣，又名越，與《孟子》異。阮，古厄字。《詩·谷風》箋云：「厄難，勤苦之事也。」是厄即難也。吾聞觀近臣以其所爲主，觀遠臣以其所主。若孔子主癰疽與侍人瘠環，何以爲孔子？」**注**近臣當爲遠方來賢者爲主，遠臣自遠而至，當主於在朝之臣賢者。若孔子主於卑幸之臣，是爲凡人耳，何謂孔子得見稱爲聖人？

章指：言君子大居正，以禮進退。屈伸達節，不違貞信。故孟子辯之，正其大義也。**疏**「君子大居正」○正義曰：隱公三年《公羊傳》文。

萬章問曰：「或曰：百里奚自鬻於秦養牲者五羊之皮，食牛，以要秦繆公。信乎？」

注人言百里奚自賣五羖羊皮，爲人養牛，以是而要秦繆公之相，實然否？**疏**注「人言」至「然否」①○正義

曰：毛氏奇齡《四書臆言》云：「《孟子》百里奚事趙岐注謂「奚自賣五羖羊皮，爲人養牛」。賣已物以養人牛，貧而不吝，可以爲要譽之具。此依文度事，其解不過如此。實則百里五羊，有必不可解者。奚舊稱五羖大夫，其人全以此得名，是必有一五羊實事流傳人間。乃言人人殊。如《虞夏之歌》曰「百里奚新娶我兮五羊皮」，是聘物也；又曰「西人秦，五羊皮」，則攜作客貲者也。《史記》「百里奚亡秦走宛，楚鄙人執之，繆公以五羊之皮贖之歸秦」，是又贖奚物也。其不可憑如此。若謂得五羊之皮爲之食牛，從來無此說，且此亦何足要譽？趙氏去古未遠，或有師承。」趙氏佑《溫故錄》云：「百里奚有五羖大夫之稱，孟子亦言其舉於市，則養牛之言非無據。但謂以要秦繆公，非耳。注「人言百里奚自賣五羖羊皮爲人養牛」，當讀賣字爲句，「賣」下「五」上脫一「得」字。遂似奚自有羊賣之，反爲人牧，理所必無，毛西河不審而妄爭。」周氏柄中《辨正》云：「朱竹垞《五羖辨》言趙

①「至」，原無，今據疏例補。

注「人言百里奚自賣五羖羊皮，爲人養牛」，蓋言衣此食牛也。《庾廖之歌》云「百里奚初娶我時五羊皮」，又曰「西人秦，五羖皮」，然則奚蓋服五羊之皮人秦者。紉五羊爲裘，毛之最豐而賤者所服也。范處義《詩補傳》釋《羔羊》之詩云：

「素絲必以五言，蓋合五羊之皮爲一裘，循其合處，以素絲爲英飾也。百里奚衣五羊之皮，爲秦養牲，蓋仿古制。古之羔裘，其製甚精，養牲者被五羊之皮，蓋賤者之服，而《召南》在位之君子亦服之，非節儉而何？」其說竟與余合。《史記》百里奚亡秦走宛，楚鄙人執之，繆公聞百里奚賢，欲重贖之，請以五羖羊皮贖之，楚遂許與之。蓋百里奚在秦，五羖其素所被服。繆公慮楚不信，故以奚所衣之服與之。不然，五羖微物，楚人豈貪之乎？按，《庾廖歌》乃漢詞賦家所爲，本不足據。其以《史記》贖奚事爲證，亦非是。《史記》言欲重贖之，恐楚人不與者，此即齊欲請管仲於魯而桓公謂「知吾將用之，必不與我矣」之意。故其謂楚人曰「吾媵臣」，微之也，請贖以五羖羊皮，示其無足重輕也，所以杜楚人之疑而使之不忌也。若謂以此取信於楚，則奚之素所被服，楚人烏得知之？《史記·商鞅傳》又載趙良之言曰：「五羖大夫，荆之鄙人也。自鬻於秦客，被褐食牛，期年，繆公知之，舉之牛口之下而加之以百姓之上。」史遷所傳已自相矛盾，則并贖奚之

事，亦屬傳疑，不足信也。至所引范處義釋《詩》之說，則尤爲不根。夫五紵、五緇、五總，絲數，非縫數也。戴侗《六書故》曰：「紵、緇、總俱以五言，皆絲之量數。」更證之《西京雜記》云：「五絲爲緇，倍緇爲升，倍升爲緇。」是緇爲絲數，益無可疑。范氏謂合五羊爲一裘，則羔羊，兒羊也，豈有兒羊而五皮而可以成裘者哉？嘗考《韓詩外傳》云：「百里奚，齊之乞者也。逐於齊，自賣五羊皮，爲一軛車人秦。」《戰國策》：「百里奚，虞之乞人。傳買以五羊之皮。」《說苑》：「百里奚自賣，取五羊皮伯氏養牛。」又《臣術》篇云：「賈人買百里奚以五羖羊皮，使將鹽車之秦。」又《善說》篇云：「百里奚自賣五羊之皮，爲秦人虜，繆公得之。」諸說並以五羊皮爲自鬻之直。竹垞所云，則昔人未有作此解者。惟莊子·庚桑楚篇云：「湯以庖人籠伊尹，秦繆公以五羊之皮籠百里奚。」陸德明《音義》既引《史記》贖奚事，又曰：「或云：百里奚好五色皮裘。」此頗合於竹垞之解而又不能引據，徒割截趙注以就其說。《閻氏若璩》釋地又續云：「百里奚此事，當孟子時已無所據。夫曰「虞人也」，址貫見矣，「不諫之秦」行踪見矣，「年已七十」，齒已見矣，又曰「舉於市」，仕宦見矣。獨秦之號爲「五羖大夫」，傳至孝公時猶嘖嘖於趙良之口，則當以《秦本紀》補之。蓋其由虞之秦，不知又何故亡

秦走宛。宛今南陽府南陽縣，秦繆公時地屬楚，楚鄙人執之，繆公聞百里奚賢，欲重贖之，恐楚人不與，乃使人謂楚曰：「吾媵臣百里奚在焉，請以五羖羊皮贖之。」楚人遂許與之。繆公釋其囚，授之國政，故有五羖大夫之號。其云「吾媵臣」，亦繫託詞以誑楚。^①《左氏》媵秦穆姬者，乃虞大夫井伯非百里奚也。《漢表》以次之於各等矣。或問：謂之舉於市者，何故？余曰：《論語》「市脯」，注云：「市，買也。」《說文》云：「買，市也。」孟子蓋謂百里奚從買得來耳。細讀《孟子》合《左傳》，奚之去虞，當於僖二年宮之奇諫不聽之日，不待僖五年宮之奇復諫，以其族行之日，故曰「先去」。安得有如《史記》奚為晉虜，以媵於秦之妄說？「孟子曰：『否，不然。好事者為之也。』」^注好事毀敗人之德行者為之設此言。^疏「否不然」○正義曰：阮氏元《校勘記》云：「不字，衍文。」百里奚，虞人也。晉人以垂棘之璧與屈產之乘假道於虞以伐虢，宮之奇諫，^注垂棘，美玉所出地名，屈，產地，良馬所生。乘，四馬也。皆晉國之所寶。宮之奇，虞之賢臣。諫之不欲令虞公受璧馬，假晉道。^疏「晉人」

至「奇諫」○正義曰：事見僖公二年「虞師晉師滅下陽」《左傳》及五年冬「晉人執虞公」《左傳》。閻氏若璩《釋地》云：「杜注『虞國，在河東大陽縣』，余謂山西之平陸縣也；『虢，西虢國，宏農陝縣東南有虢城』，余謂河南之陝州也。名雖二省而界相連。裴駰引賈逵注云：『虞在晉南，虢在虞南。』一言之下而形勢瞭然。爾時為晉獻公十九年，正都於絳，絳在太平縣之南。絳州之北，土人至今呼故晉城，遺址宛然。」○注「垂棘」至「所生」○正義曰：僖公二年《公羊傳》「白璧」，注云：「屈產，出名馬之地。乘，備馴也。垂棘，出美玉之地。玉以尚白為美。」徐氏疏云：「謂屈產為地名，不似服氏謂產為產生也。」閻氏若璩《釋地》云：「《通典》：『慈州文城郡，理古昌縣，春秋時晉之屈邑，獻公子夷吾所居。漢河東北屈縣。』《左傳》云晉有屈產之乘，此有駿馬。」與劉昭注《後漢志》同。余謂今山西吉州是。樂史、傅會為石樓縣，但石樓乃漢西河土軍縣，非北屈地，自非垂棘。又見成五年，杜但注云晉地。「百里奚不諫。知虞公之不可諫而去之秦，年已七十矣，曾不知以食牛干秦

①「託」，原誤作「記」，今據《四書釋地》及經解本改。

繆公之爲汙也，可謂智乎？不可諫而不諫，可謂不智乎？知虞公之將亡而先去之，不可謂不智也。時舉於秦，知繆公之可與有行也而相之，可謂不智乎？相秦而顯其君於天下，可傳於後世，不賢而能之乎？**注**百里

奚知虞公之不可諫而去之秦，年七十，而不知食牛干人君之爲汙，是爲不智也？欲言其不智，下有三智，知食牛干秦爲不然也。卒相秦，顯其君，不賢之人豈能如是？言其實賢也。自鬻以成其君，鄉黨自好者不爲，而謂賢者爲之乎？**注**人自鬻於汙辱而以傳相成立其君，鄉黨邑里自喜好名者，尚不肯爲也，況賢人肯辱身而爲之乎？**疏**「百里奚」

至「爲之乎」○正義曰：趙氏以「百里奚不諫」冠此兩節之首，蓋謂奚所以不諫者，知虞公之不可諫也。下「不可諫而不諫，可謂不智乎」即申此二句之義。知即智矣，於其間反人「不智」一層，此孟子屬文之法，故用而字轉接，若曰：百里奚不諫乃是知其不可諫也，知其不可諫而即不諫，是其智也，而去之秦年已七十，曾不知以食牛干秦穆爲汙，可謂智

乎？錯綜言之也。又因其一智推而爲三智：知虞公之不可諫而不諫，一智也；知虞公之將亡而先去之，二智也；知繆公之可與有行而相之，三智也。三智從三知字而出，「智」屬「知」，「賢」屬「能」。但知而不能，不可爲賢，故又實能相其君以顯於天下，是非獨智，而且賢矣。前以「知」斷其不知之非，後以「能」斷其不爲之是也。一說晉時強大，可與晉敵者莫如秦，奚故去虞人秦，三置晉君，正是爲虞報仇，所以不諫而去之秦者以此。翟氏灝《考異》云：「戰國時處士橫議，蔑人倫，廢禮義，以爲親可怨，弟可放，夫婦可苟合也；竊威福之柄，萌篡逆之心，以爲君臣無定分，禪繼無定命也；枉己辱身，營營富貴利達之途，以爲苟賤可甘，近倖可援也。爰是造爲事端，託諸舜、禹、伊、孔，謂聖人且有然者，欲假以濟其私而掩其醜。孟子懼焉，故特設爲門弟子疑難問答，著諸簡編，以徹抉其樊籬。」「好辨」章所謂「正人心，息邪說，距波行，放淫辭」者，正於此篇詳盡見之。《風俗通》言孟子退與萬章之徒作書，而舉「好辨」章文爲旨，萬章之徒，非就此篇實據之歟？故此篇雖若泛論往事，而實爲《孟子》一書之領要。觀孟子論百里奚已無所據，惟以事理反覆推之，則列國之信史，若輩惡其害己，並早滅於秦火前矣。觀馬遷爲《史》，凡孟子所既辨斥，仍多取爲實錄，則時之邪說惑人深，

幾於杯水車薪之不可熄矣。使非此篇之傳，雖舜、禹、伊、孔且無以見白於今日，其他是非之顛倒者，可勝言乎？」

章指：言君子時行則行，時舍則舍，故能顯君明道，不爲苟合而違正也。**疏**「不

爲苟合」○正義曰：《史記·封禪書》云：「阿諛苟合之徒。」

姪廷琮廷弼校字

孟子正義卷十九終

孟子正義卷二十

江都縣鄉貢士焦循撰集

孟子卷第十^①

萬章章句下凡九章。^②

孟子曰：「伯夷目不視惡色，耳不聽惡聲。非其君不事，非其民不使。治則進，亂則退。橫政之所出，橫民之所止，不忍居也。思與鄉人處，如以朝衣朝冠坐於塗炭也。當紂之時，居北海之濱以待天下之清也。故聞伯夷之風者，頑夫廉，懦夫有立志。」**注**孟子反覆差伯夷、伊尹、柳下惠之德以爲足以配於聖人，故

數章陳之，猶詩人有所誦述，至於數四，蓋其留意者也。義見上篇矣。此復言不視惡色，謂行不正而有美色者，若夏姬之比也；耳不聽惡聲，謂鄭聲也。後世聞其風者，頑貪之夫更思廉絜，懦弱之人更思有立義之志也。**疏**「伯夷」至「立志」○正義曰：趙氏佑

《溫故錄》云：「伯夷、叔齊，《論語》每言之，必兼二人，而孟子則獨舉伯夷。《史記》之言伯夷，以讓國，以耻周也，而孟子則言其辟紂，且屢言之。此章與前「伯夷隘」章極言其惡，非君不事，不立惡人之朝，猶是辟紂意。於耻周有可通，於讓國則絕無與也。若以史傳爲不實，則非讓國，何爲子貢援以問衛事？《論語》言「餓於首陽」，言「逸民」，明是耻粟採薇事，史即可爲經注也。孟子何獨有異？竊以伯夷當紂之時，親稔其暴，至於脯醢無罪諸侯，爲從古所未有；廉來之助惡，皆非可以力爭。而自以遠國疎臣，欲諫正之不得，徒苟奉職貢而以爲耻，固久有欲辟之心矣而不忍言，因生事之既終，有遺命之可托，遂以不顧而逃。叔齊與兄同志者

①「第」，原脫，今據全書體例補。

②「凡九章」，原作大字，今據經解本改。

也，亦以有託而逃。叔齊特從兄也，孟子故不及之，爲其舉兄可以見弟也。其事從讓國起，而其心實從辟惡起。史傳據事書之，孟子原心論之也。然而曰待天下之清，則夷惟辟紂之惡，未嘗不待紂之改。辟之已耳，其於君臣之大義，未嘗有他志也。故以諫武王，武誅紂，遂以耻周粟，而孔子特表之曰「不念舊惡」。是則伯夷之所以爲伯夷者，其行事甚委曲，其用心甚平直，第求無污於己，而非必有苛於人，故得爲聖之清。」○注「若夏姬之比也」○正義曰：《列女傳·孽嬖》篇云：「陳女夏姬者，大夫夏徵舒之母也。其狀美好無匹，內挾伎術，蓋老而復壯者。三爲王后，七爲夫人，公侯爭之，莫不迷惑失意。頌曰：『夏姬好美，滅國破陳。走二大夫，殺子之身。殆誤楚莊，敗亂巫臣，子反悔懼，申公族分。』」○注「頑貪之夫更思廉絜」○正義曰：毛氏奇齡《四書廣言》云：「《孟子》『頑夫廉』，頑字古皆是貪字。《漢·王吉傳》：『孟子云：聞伯夷之風者，貪夫廉，懦夫有立志。』《晉書·羊祜傳》亦曰：『貪夫反廉，懦夫立志。雖夷、惠之操，無以尚也。』《南史》稱「任昉能使貪夫不取，懦夫有立志」。臧氏琳《經義雜記》云：「《韓詩外傳》云：『伯夷目不視惡色，耳不聽惡聲。非其君不事，非其民不使。橫政之所出，橫民之所止，弗忍居也。』思與鄉人居，若朝衣朝冠坐於

塗炭也。故聞伯夷之風者，貪夫廉，懦夫有立志。」又《漢書·王貢兩龔鮑傳》序引《孟子》云：「聞伯夷之風者，貪夫廉，懦夫有立志。奮乎百世之上，行乎百世之下，莫不興起。非賢人而能若是乎？」又《後漢書·王龔傳》云：「聞伯夷之風者，貪夫廉，懦夫有立志。」《丁鴻傳》論曰：「孟子曰：聞伯夷之風者，貪夫廉，懦夫有立志。」《列女傳》：「曹世叔妻云：昔夷齊去國，天下服其廉。」高、李注引《孟子》曰：「聞伯夷之風者，貪夫廉，懦夫有立志。」又《藝文類聚·隱逸下》引魏王粲《弔夷齊文》曰：「厲清風於貪士，立果志於懦夫。」當亦用《孟子》。《孟子·萬章》《盡心》皆作「頑夫廉」，趙氏於《萬章》下注云「頑貪之夫更思廉潔」，於《盡心》下注云「頑，貪」，是趙本作「頑」矣。據下文「懦夫有立志」，「鄙夫寬，薄夫敦」，皆以相反者言之，則作「貪」爲是。趙氏以頑訓貪，未詳其所出。而兩漢及唐人皆引作「貪」，知必非無本矣。《孟子》漢有劉熙注，梁有蔡母遂注，作「貪」者或見於二家之本與？「王氏念孫《廣雅疏證》云：「頑，鈍也。如淳注《漢書·陳平傳》云：『頑頓謂無廉隅也。』頓與鈍同。」《孟

① 「絜」，原作「潔」，據本書注文改。

② 「類聚」，原誤作「志」，今據《經義雜記》及《藝文類聚》改。

子·萬章篇云：「頑夫廉。」按：王氏說是也。頑之義爲鈍，廉之義爲稜，稜則有隅角，鈍則無鋒鏑，二者正相對。《呂氏春秋·慎大》篇云「暴戾頑食」，是頑亦貪也。諸書引作「貪」，亦頑訓貪之證。《國語·晉語》「少儒於諸侯」，注云：「儒，弱也。」《說文》心部「懦，驚弱者也」。故以「懦」爲「弱」。伊尹曰：「何事非君？何使非民？治亦進，亂亦進。」曰：天之生斯民也，使先知覺後知，使先覺覺後覺。予，天民之先覺者也，予將以此道覺此民也。」思天下之民匹夫匹婦有不與被堯舜之澤者，如己推而內之溝中。其自任以天下之重也。**注**說與上同。柳下惠不羞汙君，不辭小官。進不隱賢，必以其道；遺佚而不怨，阨窮而不憫。與鄉人處，由由然不忍去也。「爾爲爾，我爲我。雖袒裼裸裎於我側，爾焉能浼我哉？」故聞柳下惠之風者，鄙夫寬，薄夫敦。**注**鄙狹者更寬優，薄淺者更深厚。**疏**注「鄙狹」至「深厚」○正義曰：

《周禮·地官·遂人》：「掌邦之野，以土地之圖經田野。五家爲鄰，五鄰爲里，五里爲鄩，五鄩爲鄙，五鄙爲縣。」劉熙《釋名·釋州國》云：「鄙，否也。小邑不能遠通也。」《呂氏春秋·尊師》篇云「子張，魯之鄙家也」，《愛類》篇云：「墨子見荆王曰：『臣，北方之鄙人也』」，高誘注皆云：「鄙，小也。」又《君守》篇云「魯鄙人遺宋元王閉」，高誘注云：「鄙人，小人也。」小即狹也，對下「寬」言之，故不訓小而訓「狹」也。《賈子·道術》篇云：「優賢不逮謂之寬。」《詩·大雅·瞻印》「維其優矣」，箋云：「優，寬也。」是「寬」即「優」也。《淮南子·齊俗訓》云「煩挐澆淺」，高誘注云：「淺，薄也。」是「薄」即「淺」也。《毛詩·邶風·北門》「王事敦我」，傳云：「敦，厚也。」薄既是淺，則厚即是深，故云「深厚」。孔子之去齊，接淅而行。去魯，曰：「遲遲吾行也，去父母國之道也。」可以速而速，可以久而久；可以處而處，可以仕而仕：孔子也。**注**淅，漬米也。不及炊，避惡亟也。魯，父母之國，遲遲不忍去也，是其道也。孔子聖人，故能量時宜，動中權也。**疏**注「淅漬米也」至「亟也」○正義曰：《說文》水部云：「澆，浚乾漬米也。」《孟子》曰：「孔子去齊，澆淅而

行。」「浙，汰米也。」段氏玉裁《說文解字注》云：「《毛詩》傳曰：『釋，浙米也。』《爾雅》：『潏潏，浙也。』《孟子》注：『浙，漬米也。』凡釋米、浙米、漬米、汰米、澇米、淘米、洮米、澆米，異稱而同事。浙箕謂之箕，自其方漚未淘言之曰漬米，不及淘抒而起之曰澆。《萬章》篇今澆作接，當是字之誤。」王氏念孫《廣雅疏證》云：「浚澆，潏也。《說文》：『潏，舊酒也。』一曰浚也。」鄭興注《周官·甸師》云：「舊讀爲縮，束茅立之祭前，沃酒其上，酒滲下去，若神飲之，故謂之縮。縮，浚也。」《說文》：「澆，浚乾漬米也。」引《孟子》「孔子去齊，澆浙而行」。今本澆作接，所見本異也。澆之言竟，謂澆乾之也。今俗語猶謂澆乾漬米爲「澆乾」矣。《西溪叢語》云：①「《異聞集》引李吉甫《南銘》曰『孟子去齊而澆浙』，唐本作澆字。」

孟子曰：「伯夷，聖之清者也；伊尹，聖之任者也；柳下惠，聖之和者也；孔子，聖之時者也。孔子之謂『集大成』。集大成也者，金聲而玉振之也。金聲也者，始條理也；玉振之也者，終條理也。」**注**伯夷清，伊尹任，柳下惠和，皆得聖人之道也。孔子時行則行，時止則止。孔子，集先聖之大道以成己之聖德者也，故能金聲

而玉振之。振，揚也。故如金音之有殺，振揚玉音，終始如一也。始條理者，金從革，可治之使條理；終條理者，玉終其聲而不細也。合三德而不撓也。

疏注「振揚」至「不撓也」○正義曰：《說文》手部云：「振，舉救也。一曰奮也。」揚，飛舉也。《呂氏春秋·必已》篇云

「盡揚播入於河」，高誘注云：「揚，動也。」《淮南子·本經訓》云「共工振滔洪水」，高誘注云：「振，動也。」是「振」與「揚」同義也。程大昌《演蕃露》云：「《管子》曰：『玉有九德。叩之其音清專徹遠，純而不殺亂也。』此諸家之言孔子玉振者。曰：其謂終條理者，爲其叩之，其聲首尾如一，不比金之始洪終殺，是爲終條理。」按：「始條理」，《音義》云：

「本亦作『治條理』，下同。」玩趙氏言「金從革可治之使條理」，則趙氏本正作「治條理」也。下文「始條理者智之事也」，注云：「智者知理物。」理物即治物，以理字解治字，正作「治條理者智之事也」。玉終其聲之聲指金聲，金聲有殺，以玉振揚之，所謂「治之使條理」也。殺則細，振以終之，則其聲不細矣。「金音」，音字解聲字。近時通解謂：金，鐘鐘

①「溪」，原誤作「漢」，今據原書名改。

也，聲以宣之於先，玉，特磬也，振以收之於後。條理是節奏次第。金以始此條理，玉以終此條理，所爲集大成也。王氏念孫《廣雅疏證》云：「《中庸》『振河海而不洩』，鄭注云：『振猶收也。』《孟子·萬章》篇云：『金聲而玉振之也。』《周官·職幣》：『掌式法以斂官府都鄙與凡用邦財者之幣，振掌事者之餘財。』斂，振皆收也。故鄭注云：『振猶拊也，檢也。』《廣雅》卷三云：『拊，收也。』《孟子·梁惠王》篇注云：『檢，斂也。』賈疏云：『以財與之謂之拊，知其足剩謂之檢。』皆失之。《秦風·小戎》篇『小戎儻收』，毛傳云：『收，軫也。』正義曰：『軫，所以收斂所載，故名收焉。』軫與振亦聲近義同。始條理者，智之事也；終條理者，聖之事也。注智者知理物，聖人終始同。疏始條理至「事也」○正義曰：戴氏震《孟子字義疏證》云：「理者，察之而幾微，必區以別之名也。是故謂之分理。在物之質曰肌理，曰腠理，曰文理。得其分，則有條而不紊，謂之條理。孟子稱『孔子之謂集大成』曰：『始條理者，智之事也；終條理者，聖之事也。』聖、智至孔子而極其盛，不過舉條理以言之而已矣。《易》曰『易簡而天下之理得』，自乾坤言，故不曰仁智而曰易簡。『以易知』，知一於仁愛平恕也；『以簡能』，

能一於行所無事也。『易則易知，易知則有親，有親則可久，可久則賢人之德。』若是者，仁也。『簡則易從，易從則有功，有功則可大，可大則賢人之業。』若是者，智也。天下事情條分縷晰，以仁且智當之，豈或爽失幾微哉？《中庸》曰：「文理密察，足以有別也。」《樂記》曰：「樂者，通倫理者也。」鄭康成注云：「理，分也。許叔重《說文解字序》曰：『知分理之可相別異也。』古人所謂理，未有如後儒之所謂理者矣。」智，譬則巧也；聖，譬則力也。由射於百步之外也；其至，爾力也；其中，非爾力也。注以智，譬由人之有技巧也，可學而益之；以聖，譬由力之有多少，自有極限，不可強增。聖人受天性，可庶幾而不可及也。夫射遠而至，爾努力也；其中的者，爾之巧也。思改其手，用巧意，乃能中也。疏注「以智」至「中也」○正義曰：《說文》工部云：「巧，技也。」故以「技」釋「巧」也。《章指》云：「言聖人猶力，力有常也，賢者由巧，巧可增也。」與此注相發明。趙氏以巧比三子，以力比孔子。三子可學，孔子不可及也。然則兩「爾」字宜皆指三子。「其至」，如清、任、和爲三子之力所可至，「其中」，如孔子聖之時爲三子之力所不可至。至、中俱承上力字。

至爲三子之力，中爲孔子之力。乃注云「其中的者，爾之巧也」，意殊矛盾，不可詳知。又云「改其手，用巧意，乃能中」，似謂孔子之時，三子力不能及，故改而用巧爲清、任、和，則中字轉屬三子之清、任、和矣；又似謂孔子以時爲中的，三子各以清、任、和爲中的，三子自知不能爲孔子之中的，因思改而用巧爲三子之中的，故各用清、任、和也。是孔子以力中的，三子不以力而以巧中的也，以力則但能至，不能中也。趙氏本義未知何如，姑擬之以質知者。近時通解：智巧即靈明不測妙乎神也，聖力即造詣獨到因乎應也。聖知兼備，而唯智乃神，巧力並用，而惟巧乃中。此孔子所以獨爲聖之時。或云：巧力之喻是孟子自擬作聖之功。由射於百步之外，望道之比也。孔子之聖非力可擬，力則人，巧則天也。

章指：言聖人由力，力有常也；賢者由巧，巧可增也。仲尼天高，故不可階；他人丘陵，丘陵由可踰。所謂小同而大異者也。

北宮錡問曰：「周室班爵祿也，如之

何？」**注**北宮錡，衛人。班，列也。問：周家班列爵祿，等差謂何？**疏**注「班列也」○正義曰：《方言》

云：「班，徹，列也。北燕曰班，東齊曰徹。」戴氏震《方言疏

證》云：「趙岐《孟子注》《孟子》班爵祿」云：「班，列也。」

《春秋》昭公二年《左傳》「送從逆班」，杜預注云：「班，列

也。」任昉《奏彈曹景宗》曰「榮高列侯」，李善注引《方言》：

「列，班也。」所引即此文。《詩·大雅》「王命召伯，徹申伯土

田」，毛傳：「徹，治也。」鄭箋云：「治者，正其井牧，定其賦

稅。」亦於班列之義爲近。《廣雅》：「列，班，布也。」孟子

曰：「其詳不可得聞也，諸侯惡其害己也而

皆去其籍。然而軻也嘗聞其略也。」**注**詳，悉

也。不可得備知也。諸侯欲恣行，憎惡其法度妨害

己之所爲，故滅去典籍。今《周禮》司祿之官無其

職，是則諸侯皆去之，故使不復存也。軻，孟子名；

略，簾也。言嘗聞其大綱如此。今考之《禮記·王

制》則合也。**疏**注「詳悉」至「存也」○正義曰：「詳，悉」，

見《離婁下》。《荀子·非相》篇云「詳則舉小」，注云：「詳，

周備也。」故又以「備」釋「詳」也。《周禮·地官》：「司祿，中

士四人，下士八人，府二人，史四人，徒四十人。」注云：「主班祿。」賈氏疏云：「在此者，其職既闕，未知所掌云何，但班祿者用粟與之，司祿職次倉人，明是班多少之官，故鄭云主班祿。」○注「今考之禮記王制則合也」○正義曰：《禮記正義》云：「鄭《目錄》云：『名曰《王制》者，以其記先王班爵授祿、祭祀養老之法度，此於《別錄》屬制度。《王制》之作，蓋在秦漢之際。』鄭答臨頌云：『孟子當赧王之際，《王制》之作復在其後。』盧植云：『漢孝文皇帝令博士諸生作此《王制》之書。』《周禮·春官·內史》『王制祿則贊爲之，以方出之。』鄭司農、鄭康成皆引《王制》以注之。趙氏佑《溫故錄》云：『自當以《孟子》爲正，不必與《周禮》規規求合也。與《孟子》合者惟《王制》，猶不免有不合者，由其又在孟子後雜采遺文所致，即孟子亦第言『聞其略』也。鄭康成於《王制》與《周禮》不合處輒謂之夏殷制，皆求其說而不得，從而爲之辭而已。即如百里、七十里、五十里，孟子明言『周室』，得謂之夏殷然歟？于是又以開方法兩圓之。然子二百里、男百里，又何法？又豈所謂同一位者歟？唯其不必求合而必求合也。然則奚其不合？蓋注以《周禮》司祿官無其職爲諸侯去籍證。《周禮》本不完之書，司祿之亡猶他官之闕，未必去籍獨去此，即去，亦其中一端。就《孟子》、《王制》所言

之與《周禮》不合初非獨此班爵祿事矣，是不足以定也。若謂盡去其合而獨存其不合，則是《周禮》一書已自有不能盡合之失，更不足以定也。彼其放恣橫議之習已久，秦至敢於燔燒三代之書。諸侯皆秦也，何嫌於竄易一朝之制？去者既全去之，其姑存者爭以意增損之，上下相蒙，若爲故然，蓋所必至，不待劉歆之徒也。恐劉歆亦定負此枉於千古也。然則宜其不合之多矣。文景時去古尤近，諸儒纂輯《王制》，何不就其所據書名人代，明白標舉？而一概渾同，使後學至莫別其由然，斯則前儒之過歟？「翟氏灝《考異》云：『《周禮》司祿之官今無其職，趙氏據此爲戰國諸侯去籍之證。孟子於典籍既亡之後側聞其略，自不能類若畫一。且有嫌於時君之爭并無厭也，故於所聞異詞中，寧信其數之少而不肯失之多。若《王制》，乃漢文帝敕令博士諸生採集傳記，斟酌損益以成其篇，『制祿爵』節明屬採自《孟子》。時《周禮》未顯於世，諸博士猶不及見之，故惟以《孟子》一書爲本，其所以微有異同，正博士之所斟酌損益，何可轉據之議《孟子》乎？』天子一位，公一位，侯一位，伯一位，子男同一位，凡五等也。」注公謂上公九命及二王後也。自天子以下，列尊卑之位凡五等。疏「天子」

至「等也」○正義曰：《禮記·王制》云：「王者之制祿爵：公、侯、伯、子、男，凡五等。」彼言「王者之制」，故不數天子，與此異。《白虎通·爵》篇云：「天子者，爵稱也。爵所以稱天子者何？王者父天母地，為天之子也。所以名之為公侯者何？公者，通也，公正無私之意也。侯者，候也，候逆順也。伯者，白也。子者，孳也，孳孳無已也。男者，任也。」顧氏炎武《日知錄》云：「為民而立之君，故班爵之意，天子與公侯伯子男一也，而非絕世之貴；代耕而賦之祿，故班祿之意，君卿大夫士與庶人在官一也，而非無事之食。是故知「天子一位」之意，則不敢肆於民上以自尊，知「祿以代耕」之義，則不敢厚取於民以自奉。不明乎此，而侮奪人之君常多於三代以下矣。」○注「公謂」至「後也」○正義曰：《周禮·春官·典命》：「掌諸侯之五儀，諸臣之五等之命：上公九命為伯，其國家、宮室、車旗、衣服、禮儀，皆以九為節；侯伯七命，其國家、宮室、車旗、衣服、禮儀，皆以七為節；子男五命，其國家、宮室、車旗、衣服、禮儀，皆以五為節。」又云「王之三公八命」，注云：「上公謂王之三公有德者，加命為二伯。二王之後亦為上公。」賈氏疏云：「三公八命，出封皆加一等，謂若周公、太公有德，封於齊魯，身雖在王朝，使其子就國，亦是出封加命為上公九命者。」《白虎通·爵》篇

云：《春秋傳》曰：「天子三公，稱公，王者之後亦稱公，其餘大國稱侯，小國稱伯子男也。」君一位，卿一位，大夫一位，上士一位，中士一位，下士一位，凡六等。**注**諸侯法天子，臣名亦有此六等，從君下至於士也。**疏**「君一」至「六等」○正義曰：《王制》云：「諸侯之上大夫卿，下大夫，上士，中士，下士，凡五等。」諸侯即君也。《王制》五等不連諸侯，《孟子》六等連君。不連君猶不連天子也。《白虎通·爵》篇云：「卿之為言章也，章善明理也。大夫之為言大扶，扶進人者也。故傳曰「進賢達能，謂之卿大夫」，《王制》云「上大夫卿」也。士者，事也，任事之稱也。故傳曰：「通古今，辯然不，謂之士。」諸侯所以無公爵者，下天子也。故《王制》曰：「上大夫，下大夫，上士，中士，下士，凡五等。」此謂諸侯臣也。大夫但有上下，士有上中下何？明卑者多也。爵皆一字，大夫獨兩字何？《春秋傳》曰：「大夫無遂事。」以為大夫職在之適四方，受君之法，施之於民，故獨兩字言之。或曰：大夫，爵之下者也。稱大夫，明從大夫以上受下施，皆大自著也。天子之士獨稱元士何？士賤，不得體君之尊，故加元以別於諸侯之士也。《禮經》曰「士見於大夫」，諸侯之士也。《王制》曰：「王者八十

一元士。二沈氏彤《周官田祿考》云：「周天子具六官，官之爵六等：曰公，曰孤卿，曰中大夫，下大夫，曰上士，曰中士，曰下士，庶人在官者屬焉。凡天子之官之爵，其有常數可周知而見本經及注者：公三人，孤三人，卿五官官一人，又地官鄉大夫每鄉卿一人，六鄉則六人，凡十一人。中大夫：天官四人，地官五人，又州長每州一人，三十州則三十人，遂大夫每遂一人，六遂則六人，春官五人，夏官十四人，秋官四人，凡六十八人。下大夫：天官十二人，地官十五人，又黨正每黨一人，百五十黨則百五十人，縣正每縣一人，三十縣則三十人，春官二十四人，夏官三十人，秋官八人，凡二百六十九人。上士：天官四十六人，地官四十八人，又族師每族一人，七百五十族則七百五十人，鄙師每鄙一人，百五十鄙則百五十人，春官五十三人，夏官六十七人，又僕夫十人，秋官二十人，又象胥每翟一人，六翟則六人，凡一百五十人。中士：天官百一十八人，地官百四十八人，又閭胥每閭一人，三千閭則三千人，鄼長每鄼一人，七百五十鄼則七百五十人，春官百五十八人，夏官百五十八人，秋官百五十二人，又象胥每翟二人，六翟則十二人，凡四千四百九十六人。下士：天官百七十九人，又寺人五人，地官二百七十二人，又比長五家一人，萬五千比則萬五千人，里宰每里一人，三千

里則三千人，司門每門二人，王城十二門則二十四人，司關每關二人，王畿十二關則二十四人，場人每場二人，九穀九場則十八人，春官二百七十五人，夏官二百四十三人，又馭夫二人，趣馬百九十二人，庾人每閑二人，天子十二閑則二十四人，秋官百九十三人，又條狼氏八人，象胥每翟八人，六翟則四十八人，凡萬九千五百有七人。其不見經注而數皆可推者：上士爲郊之縣正，十一縣則十一人。中士爲郊之鄙師，野之縣正，郊五十五鄙，野九百五十三縣，人各如縣鄙之數，凡千有八人。下士爲郊之鄼長，野之鄙師，郊二百七十四鄼，野四千七百六十五鄙，人各如鄙鄼之數，凡五千有三十九人。通計三萬一千五百六十五人。若內諸侯之官之爵，由經注及他傳記所見推之，則在公四等，自卿而下；在孤卿三等，自大夫而下；在大夫二等，自上士而下。其數，公之卿二人，下大夫五人，上下士各若干人。孤卿之大夫二人，上士五人，下士若干人。大夫之上士二人，下士五人。其縣鄙之士，皆上士爲縣正，下士爲鄙師。公七縣三十三鄙，孤卿二縣八鄙，大夫二鄙，上下士各皆如縣鄙之數。通計爵數之可知者，在公四十七人，在孤卿十七人，在大夫九人。若外諸侯之官之爵，則在上公六等，自孤而下，在侯伯五等，在子男四等，皆自卿而下。其數，公之孤一人，卿三

人，下大夫五人，上士二十七人，中下士各若干人。侯伯之卿大夫士如之。子男之卿大夫亦如之，士則上二十七人，下若干人，無中。此皆見於經注及他傳記。其無所見而可推知者，上公爲大國，三鄉三遂。卿，鄉大夫三人；下大夫，州長十五人，遂大夫三人，凡十八人；上士，黨正七十五人，縣正十五人，凡九十人；中士，族師三百七十五人，鄙師七十五人，凡四百五十人；下士，閭胥千五百人，鄭長三百七十五人，凡八百七十五人。其野，二百二十六縣，千一百三十鄙，中士爲縣正，下士爲鄙師，皆各如縣鄙之數。侯伯爲次國，二鄉二遂。卿，鄉大夫二人，下大夫，州長十人，遂大夫二人，凡十二人；上士，黨正五十人，縣正十人，凡六十人；中士，族師二百五十人，鄙師五十人，凡三百人；下士，閭胥千人，鄭長二百五十人，凡千二百五十人。其野，侯百四十四縣，七百一十九鄙，伯七十二縣，三百六十一鄙，皆中士爲縣正，下士爲鄙師，各如其縣鄙之數。子男爲小國，一鄉一遂。卿，鄉大夫一人；下大夫，州長五人，遂大夫一人，凡六人；上士，黨正二十五人，縣正五人，凡三十人；下士，族師百二十五人，鄙師二十五人，凡百五十人。其野，子三十一縣，百五十五鄙，上士爲縣正，下士爲鄙師，皆各如縣鄙之數。男一鄙，下士爲鄙師，如其數。通計爵數之可知者，

在上公三千八百二十八人，在侯二千五百二十二人在伯二千有九十二人，在子四百有八人，在男二百二十三人。《周官》之爵，曰公，曰孤，曰卿，曰中大夫，曰下大夫，曰上士，曰中士，曰下士，凡八等，而合孤卿爲一等，中下大夫爲一等，何也？曰：《典命》「王之三公八命，其卿六命」，不別言三孤命數，則并孤於卿矣。云「其大夫四命」，則大夫不以中下殊矣。爵與命之等常相因，故二者皆合爲一等也。且《考工記》稱「九卿」，鄭康成以「六卿三孤」注之，則孤亦名卿而爲一等。《孟子》、《王制》序大夫皆止一等，是又不分二等之明證也。經何以無上大夫？曰：上大夫即孤、卿也。《大戴記·盛德》篇云：「三少，皆上大夫也。三少謂三孤。」《王制》云「諸侯之上大夫卿」，天子亦然。凡內外諸侯之官，其爵等人數，何以定之？曰：《大宰》云：「乃施典於邦國而建其牧，立其監，設其參，傳其伍，陳其殷，置其輔。」注云：「監謂公侯伯子男各監一國。參謂卿三人。伍謂大夫五人。殷謂衆士，《王制》諸侯上士二十七人。輔，府史，庶人在官者。」此外諸侯官爵等人數之大略也。何以知上公之一孤也？曰：《典命》「公之孤四命」，注以爲「九命上公，得置孤卿一人」也。何以知子男之無中士也？曰：襄十一年《公羊傳》云「古者上士下士」，明中士非《周官》初制也。若子男

而有中士，則田祿不皆以四爲差，而國亦不足於用矣。《公羊》所云乃通指諸侯，今獨歸之子男，何也？曰：惟子男不當有中士耳。謂公侯伯而亦無中士，傳之誤也。」

「天子之制，地方千里，公侯皆方百里，伯七十里，子男五十里，凡四等。不能五十里不達於天子，附於諸侯曰附庸。」**注**凡此四等，土地之等差也。天子封畿千里，諸侯方百里，象雷震也。小者不能特達於天子，因大國以名通，曰附庸也。**疏**「天子」至「附庸」○正義曰：《王制》云：「天子之田方千里，公侯田方百里，伯七十里，子男五十里。不能五十里者不合於天子，附於諸侯曰附庸。」注云：「不合謂不朝會也。小城曰附庸。附庸者，以國事附於大國，未能以其名通也。此地，殷所因夏爵三等之制也。殷有鬼侯、^①梅伯。春秋變周之文，從殷之質，合伯子男以爲一，則殷爵三等者，公、侯、伯也。異畿內謂之子。周武王初定天下，更立五等之爵，增以子男，而猶因殷之地，以九州之界尚狹也。周公攝政致太平，斥大九州之界，制禮成武王之意，封王者之後爲公，及有功之諸侯，大者地方五百里，其次侯四百里，其次伯三百里，其次子二百里，其次男百里，所因殷之諸侯，

亦以功黜陟之。其不合者，皆益之地爲百里焉。是以周世有爵尊而國小，爵卑而國大者。」閻氏若璩《釋地又續》云：

「《孟子》一則公侯皆方百里，再則大國地方百里。證以周公太公，其封齊魯不過方百里耳。而孟子時魯地且五倍之，以爲有王者作，魯必在所削，安得有成王封周公於曲阜，地方七百里之說哉？爲此說者乃《明堂位》，篇中多誣，不可勝舉。余嘗上稽《周易》《雷聞百里》，公侯國制，厥象取此，下徵《魯頌》《革車千乘》，惟百里國數適相應。子產曰：「昔天子之地一圻，列國一同。」同方百里也。今晉地多數圻矣，^②皆侵小故。管仲曰：「昔賜我先君履，南至於穆陵，北至於無棣。」穆陵，山名，今在沂水縣，無棣，溝名，今爲海豐、慶雲兩縣。南北相距七百里，亦應是後來侵小所至。」周氏柄中《辨正》云：「《封國之制》，《孟子》言「公侯百里，伯七十里，子男五十里」，與《王制》同；《周官·大司徒》則謂「公五百里，侯四百里，伯三百里，子二百里，男百里」，與《孟子》異。鄭康成謂《孟子》所言周初制，周公斥大九州之地，始皆益之。此說最謬。後儒陸農師、易山齋、金仁山輩，並言周之

①「有」，原誤作「者」，今據《禮記》鄭注改。

②「圻」，原誤作「圻」，今據《四書釋地》及經解本改。

幅員不廣於虞夏，安得加封若此？且武王封之，周公大之，其勢必有所并，有所并必有所徙，一公之封而子男之國爲之徙者二十餘，封數大國，天下盡擾，此必不然之事。唐仲友謂：「古之封國，有軍有賦。自軍言之則方百里而具三軍，方七十里而具二軍，方五十里而具一軍，自賦言之則公之國方二百一十里而具千乘，伯之國方一百四十里而具六百乘，男之國方百里而具三百乘。子下同於男，侯上同於公。自是而外，則山川土田附庸皆在封疆之內，然皆非出車制賦之壤。《孟子》言百里、七十里、五十里者，獨舉軍制而言也；《周官》於諸公言五百里，諸侯言四百里，伯言三百里，子言二百里者，包山川土田附庸於封疆內也。於諸男言百里者，獨舉其出軍賦之封疆也。凡此皆省文而互見，詳而考之，未有不合者。」按，唐氏此說極爲支離。即以《周禮》觀之，自諸公至諸男，封疆之數遞爲降殺，各以百里爲等差。今忽分二解，於公侯伯子則以爲兼虛封，於諸男則以爲舉實封，此在《周禮》先不可通，而以牽合《孟子》之說，其誰信之？陳氏《禮書》謂：「《孟子》三等之地，正封也；《周官》五百里四百里云云者，則所統之附庸。」葉少蘊又謂兼山林川澤而言。汪武曹駁之云：「方五百里者，爲方百里者二十五也。豈公之正封止得方百里者一，而附庸反得方百里者

二十四乎？方四百里者，爲方百里者十六也。豈侯之正封止得方百里者一，而附庸反得方百里者十五乎？即合山林川澤言之，亦不應如此之多。」則其說又難通矣。惠氏據《尚書大傳》謂：「諸侯受封必有采地。封五百里與四百里者，其采百里；封三百里者，其采七十里；封二百里與百里者，其采五十里。采則全入於其君，而封爲天子之土，故天子得而食之。《王制》言采，《周官》言封，二者必合而相備。」按，《大傳》言「百里諸侯之國以五十里爲采，七十里諸侯以二十里爲采，五十里諸侯以十里爲采」，此說合於《孟子》而異於《周禮》。惠氏假借傳會以調和其說，巧則巧矣，而非其實也。李剛主謂：「百里專言土田山川附庸，則量功而錫，不在百里內。《孟子》曰天子巡狩有慶，慶以地，是初封百里而其後慶地何算？故《周禮》約其數曰：公不過五百里，侯不過四百里，伯子男不過三百里二百里。」此說亦本之唐仲友。按，《周禮》明言「凡建邦國，以土圭土其地而制其域」，則五百里四百里乃其疆域，於建國之初已定之，豈有豫約慶地之數而爲之制其域者？果如其說，本文何以不云「公之地無過五百里，侯之地無過四百里」邪？任鈞臺又疑《大司徒》文誤，當是「方百里五，方百里四」，此亦不然。《職方氏》明言千里之地「以方五百里封公則四公，以方四百里封侯則

六侯」。若止方百里五則千里當封二十公，方百里四則千里當封二十五侯。《職方》之制合於《大司徒》，其非誤文可知矣。然則《孟子》與《周禮》決不可合，自當以《孟子》爲正。或反據《周禮》以疑《孟》，不亦謬哉？」○注「諸侯方百里象雷震也」○正義曰：《白虎通·爵》篇云：「人皆千乘，象雷震百里所潤同。」盧氏文弼校云：「《御覽》載《援神契》曰：『二王之後稱公，大國稱侯，皆千乘，象雷震百里所潤雲雨同。』」梁云：「《周禮·小司徒》注：『十終爲同，同方百里。』」疏云：「謂之爲同者，取象雷震百里所潤同。」《易·震》正義：「雷之發聲，聞乎百里。古帝王制國，公侯地方百里，故以象焉。」○注「小者」至「庸也」○正義曰：《白虎通·爵》篇云：「人皆五十里差次功德，小者不滿爲附庸。附庸者，附大國以名通也。」隱公元年《公羊傳》疏引《春秋說》云：「庸者，通也。」此趙氏所本也。孔氏廣森《經學卮言》云：「不達於天子者，《春秋》所謂未能以其名通也。《繁露》曰：『附庸，字者方三十里，名者方二十里，人氏者方十五里。』」《書大傳》曰：「古者諸侯始受封則有采地。百里諸侯以三十里，七十里諸侯以二十里，五十里諸侯以十五里。其後子孫雖有罪黜，其采地不黜，使其子孫賢者守之，世世以祠其始受封之人，此之謂『興滅國，繼絕世』。昔齊人滅紀，紀季

以鄆爲齊附庸。鄆者，紀之采也。然則附庸多亡國之後，先世有功德者，故追錄之，使世食其采，以臣屬於大國。三十里者，其先公侯也；二十里者，其先伯也；十五里者，其先子男也。」董仲舒說正與《書傳》相合。」天子之卿受地視侯，大夫受地視伯，元士受地視子男。注視，比也。天子之卿大夫士所受采地之制也。疏

「天子」至「子男」○正義曰：周氏柄中《辨正》云：「《王制》：『天子三公之田視公侯，天子之卿視伯，天子之大夫視子男，天子之元士視附庸。』與《孟子》不合。當以《孟子》爲正。蓋古者三公不必備，常以六卿兼之。卿兼公孤，亦止食卿之祿，公孤之爵不爲位，故無祿，則受地當自卿始。此《孟子》是而《王制》非也。內臣之命降於外諸侯而祿必視乎外，故以六命之卿視九命之公侯，四命之大夫視七命之伯，三命之元士視五命之子男，皆卑其命而崇其祿者。元士之命不下於附庸而受地視附庸，則非卑其命而崇其祿之義，與卿大夫不一例矣。此又《孟子》是而《王制》非者也。吳氏《禮記纂言》反謂『孟子當諸侯去籍之時，但以意言其大略，不若

《王制》所記爲得之，顛倒甚矣。」沈氏彤《周官祿田考》云：①「上公之地方五百里，侯方四百里，伯方三百里，子方二百里，男方一百里，見《大司徒》之經，而《孟子》云：「公侯皆方百里，伯七十里，子男五十里。」大都之地方八十里，加爲百里，小都方四十里，加爲五十里，家邑方二十里，加爲二十五里，本《載師》及《小司徒》之經注，而《孟子》云：「天子之卿受地視侯，大夫受地視伯，元士受地視子男。」其說並殊於《周官》，何也？曰：孟子因籍去而僅聞其略，此所云並周所沿夏商之制耳。考諸《周官》，畿內外皆無七十里之國。《王制》有七十里之國，注疏以爲夏商之制，而湯國七十里即見《孟子》書。由是以觀，而其他之沿於夏商亦明矣。《王制》謂「天子之三公之田視公侯，卿視伯，大夫視子男，元士視附庸」，與孟子之說又殊，何也？曰：《王制》蓋別有所據，然要非周所定制也。其曰「田」者，即《孟子》之「地」。篇末云「方百里者爲田九十億畝」，則未去三之一而已稱田矣。或以爲皆實田，誤也。周公於畿內外之國既各別差其里數，而尚存夏殷之制，何也？曰：周制初定，豈得盡行？苟前代諸國無故而增減其地，勢必煩擾不安，故且因之。周公別差諸國之里數，畿內視夏商則減，畿外則大增，何也？曰：畿外諸國，夏商以來漸相吞併，廓地已大，

周公因更定其制以安其無辜者，而又以待封大功德之臣，俾錯處其間以藩衛王室，故大增；若畿內諸國，本無權力，又象賢而世守者少，周公因稍更焉以就井田，以四上下之差，②故減也。然則《孟子》於畿外諸國謂齊魯俱封百里，而以今魯方百里者五爲當損，何也？曰：此孟子即所傳聞以論當時之地域，意在風止其戰伐耳。若論封疆之實，則必如《晏子春秋·內篇》謂太公受地五百里，《史記·漢興以來諸侯年表》謂伯禽、康叔各四百里者，乃與《周官》之制合也。③後人好以《孟子》駁《周官》，否則強傳會之，皆未及深考者也。」胡氏匡衷《儀禮釋官》云：「諸侯孤卿大夫之采地無明文可證，唯《雜記》疏引熊氏云「公大都采地方百里，侯伯大都方五十里，子男大都方二十五里」，中都無文，「小都一成都方十里」。今按，公之采地當三等，侯伯子男采地當一等。公之孤方百里，卿方五十里，大夫方十里。侯伯之卿大夫亦如之。子男之卿方二十五里，大夫方十里。據《周禮》大國有孤，如天子三公。天子之公采地與卿異，則大國之孤

①「祿田」，原誤倒，今據原書名改。

②「四」，陳立《公羊義疏》引沈書作「爲」。

③「官」，原誤作「公」，今據《周官祿田考》及經解本改。

亦當與卿異。侯伯子男無孤，惟有卿大夫，故采地當但分二等，不必有中都也。侯伯之卿采地與公之卿俱方五十里者，以其命數同也。子男之卿異於公侯伯者，以子男國小地狹，故卿降而爲方二十五里。大夫仍方十里不降者，據孟子言班祿之制，大小國大夫之祿不殊而卿以上各異，則知侯國之大夫采地皆一成也。」

「大國地方百里，君十卿祿，卿祿四大夫，大夫倍上士，上士倍中士，中士倍下士，下士與庶人在官者同祿，祿足以代其耕也；

注公侯之國爲大國。卿祿居於君祿十分之一也，大夫祿居於卿祿四分之一也，上士之祿居大夫祿二分之一也，中士下士轉相倍。庶人在官者，未命爲士者也。其祿比上農夫。士不得耕，以祿代耕也。**疏**

注「庶人」至「士者也」○正義曰：胡氏匡衷《儀禮釋官》云：

「《燕禮》云：『尊士旅食于門西兩圓壺』，注云：『旅，衆也。』

士衆食，謂未得正祿者，所謂庶人在官者也。」按，士旅食謂未得爵命之士，疏以爲府史胥徒，非也。《王制》云：「大樂正論造士之秀者以告於王而升諸司馬，曰進士。司馬辨論官材，論進士之賢者以告於王而定其論。論定然後官之，任

官然後爵之，位定然後祿之。」蓋上士中士下士，此正爵也；

下士食九人以上，此正祿也。學校之士升於司馬，隸於司士，論定後官；而未得正爵正祿者則羣食於公，謂之旅食。

《檀弓》所謂「仕而未有祿者」，《司士職》所謂「以久奠食」，即此。但未得正爵，故謂之庶人在官者。趙岐注《孟子》亦

云：「庶人在官，未命爲士者。」非謂府史胥徒也。若府史胥

徒，官長所除，不命於國君，當爲燕之所不及，安得與諸臣相獻酬乎？」又云：「古者有未得爵命之士謂之士，旅食其祿，

與庶人在官者等，亦謂之「庶人在官者」。《周禮·序官》「若地官鄰長」，賈公彥云：「鄰長是不命之士爲之。」是也。孟

子云「上士一位，中士一位，下士一位」，此正爵也，謂之命士；若學校之士，升於司馬，隸於司士而未有命者，則先試

之以官，俟其任官，然後以正爵命之。所試之官則如鄰長之類。諸侯之官降天子一等，凡天子下士之官，諸侯當使不命

之士爲之，但無正爵，則亦未得九人以上之正祿，故比諸府史以下。庶人在官者，兼不命之士，方爲賤備。大夫以上有

采地者，其祿取於采地，無則以公田所人之稅祿之；士無采

①「胡氏」至「燕禮云」，原無，今從沈校據全書文例及《儀禮釋官》補。

地，其祿一受於公，故《周禮》有司祿主班祿。《禮運》云：

「大夫有采以處其子孫。」《國語》云：「大夫食邑，士食田。」

韋注云：「受公田也。」此足證諸侯之士無地矣。次國地

方七十里，君十卿祿，卿祿三大夫，大夫倍上

士，上士倍中士，中士倍下士，下士與庶人在

官者同祿，祿足以代其耕也；**注**伯爲次國。大

夫祿居卿祿三分之一也。小國地方五十里，君

十卿祿，卿祿二大夫，大夫倍上士，上士倍中

士，中士倍下士，下士與庶人在官者同祿，祿

足以代其耕也。**注**子男爲小國。大夫祿居卿祿

二分之一也。**疏**「大國」至「耕也」○正義曰：《王制》

云：「諸侯之下士視上農夫，祿足以代其耕也。中士倍下

士，上士倍中士，下大夫倍上士，卿四大夫祿，君十卿祿。次

國之卿三大夫祿，小國之卿倍大夫祿，君十卿祿。諸侯之下

士，祿食九人，中士食十八人，上士食三十六人，下大夫食七

十二人，卿食二百八十八人，君食二千八百八十人。次國之

卿食二百一十六人，君食二千一百六十人。小國之卿食百

四十四人，君食千四百四十人。」周氏柄中《辨正》云：「安溪

李文貞公曰：「諸侯之卿不命於天子者，其祿秩與大夫等。

命於天子者，不論大小國，其祿皆當四大夫也。但大國三卿

皆命於天子，故視大夫四倍；次國三卿，二卿命於天子，其

一與大夫同祿，則以三卿與三大夫總較，惟三倍耳；小國三

卿，一卿命於天子，其二與大夫同祿，則以三卿與三大夫相

較，惟二倍耳。故曰次國之上卿，位當大國之中卿，中當其

下，下當其上大夫，小國之上卿，位當大國之下卿，中當其

上大夫，下當其下大夫。當大夫者，皆非命卿也。秩既相

當，祿亦相等明矣。」考《王制》言「大國之卿四大夫祿，食二

百八十八人，次國之卿三大夫祿，食二百一十六人，小國

之卿倍大夫祿，食百四十四人。」孔疏：「卿祿重，故隨國之

大小爲節。」則謂「命於天子者，其祿皆當四大夫」非也。《王

制》又云：「次國之卿，命於其君者如小國之卿。」孔疏：「次

國三卿，二卿命於天子者，祿各食二百一十六人，而卿命于

其君者爲賤，祿不可等天子命者，故視小國卿食一百四十四

人。」則謂「不命於天子者與大夫同祿」亦非。況諸侯有大夫

五人，但以三大夫與三卿相較，尤不合。」

「耕者之所穫，一夫百畝。百畝之糞，上

農夫食九人，上次食八人，中食七人，中次食

六人，下食五人。庶人在官者，其祿以是爲差。」**注**穫，得也。一夫一婦佃田百畝。百畝之田，加之以糞，是爲上農夫。其所得穀足以食九口。庶人在官者食祿之等差，由農夫有上中下之次，亦有此五等，若今之斗食、佐史、除吏也。**疏**「耕者」至「爲

差」○正義曰：《王制》云：「制農田百畝，百畝之分，上農夫食九人，其次食八人，其次食七人，其次六人，下農夫食五人。庶人在官者，其祿以是爲差也。」**注**云：「農夫皆受田於公。田肥墾者有五等，收入不同也。庶人在官，謂府史之屬，官長所除，不命於天子國君者。分或爲糞。」翟氏灝《考異》云：「《孟子》自君卿順序，《王制》自農夫倒序，文有繆省，義未有鉅錡也。惟一云「下士與庶人在官者同祿」，一云「下士視下農夫」，小異。蓋庶人在官，有府史胥徒四等，其祿以農之五等爲差，則爲府者當視上農，而史暨胥徒以次視中下矣。下士與爲府者同。故雖兩說之而義仍一。《周禮·小司徒》：「上地家七人，中地家六人，下地家五人。」《禮記講義》云：「《周禮》農夫之差，三等而已，《孟子》則五等者，先王之於民，養之欲其富，保之欲其庶，故家七人者必授以九人之上地，家六人者必授以七人之中地，而下地則以

地稱人而已。」《管子·揆度》篇：「上農挾五，中農挾四，下農挾三。」《呂覽·士容論》：「上田夫食九人，下田夫食五人，可以益，不可以損，一人治之，十人食之，六畜皆在其中矣。」周氏柄中《辨正》云：「周家授田之制，如《大司徒》、《遂人》之說，則田肥者少授之，田瘠者多授之，如《小司徒》之說，則口衆者授之肥田，口少者授之瘠田；如《孟子》、《王制》之說，則一夫定以百畝爲率，而良農食多，惰農食少。愚按，三說本同，當以《孟子》、《王制》爲主而參觀《周禮》之說。蓋田有不易、一易、再易之殊，《左氏異義》：「自衍沃之地九夫爲井而外，又有二而當一，以至九而當一者。此大司徒、遂人授田所以有多寡之差也。」《孟子》、《王制》言「一夫百畝」，則《周禮》「不易之地」，《左傳》「衍沃之地」，舉其最上者以定賦也。至《小司徒》之法，亦具於《遂人》中。《遂人》云：「以歲時稽其人民而授之田野。」蓋人有生耗即田有予取，故稽而授之。或以《小司徒》之說爲疑者，未考《遂人》「歲時稽授」之法也。」○**注**「獲得」至「吏也」○正義曰：《史記·春申君傳》《集解》引《韓嬰章句》云：「獲，得也。」《毛詩·齊風》「無田甫田」，《釋文》云：「無田，音佃。」孔氏正義云：「上田謂墾耕，下田謂土地。猶《多方》云：「宅爾宅，田爾田。」今人謂佃食，古之遺語也。」按：《說文》人部：「佃，

中也。「支部」：「畝，平田也。」《多方》正作「畝」，此注云「佃」，乃畝之假借，而通作田也。《周禮·地官·遂人》：「上地夫一廛，田百畝」，注云：「鄭司農云：戶計一夫一婦而賦之田。」趙氏本此為說也。按：夫之名從人起，亦從田起。六尺為步，步百為畝，畝百為夫，此夫指地而言，緣一夫授田百畝，故百畝之地即以「一夫」名之。此上言「耕者所獲」，下言「上農夫食九人」，則以人言也。同受此百畝之田，而所得穀或足以食九口，或足以食八口，或足以食七口，以至僅能食六口五口，所以多寡不一者，以糞種培植之有殊也。《地官·草人》：「掌土化之法，以物地相其宜而為之種。」^①凡糞種，駢剛用牛，赤緹用羊，墳壤用麋，渴澤用鹿，鹹澇用貍，勃壤用狐，埴墟用豕，疆藥用蕢，輕農用犬。^②《秋官·薙氏》：「掌殺草，若欲其化也，則以水火變之。」注云：「謂以火燒其所芟萌之草，已而水之，則其土亦和美矣。」《月令》：「季夏燒薙行水，利以殺草，如以熱湯。」是其一時著之，此皆糞饒之事也。《漢書·百官公卿表》云：「縣令長皆秦官，掌治其縣。萬戶以上為令，秩千石至六百石；減萬戶為長，秩五百石至三百石。皆有丞尉，秩四百石至二百石，是為長吏；百石以下，有斗食佐史之秩，是為少吏。大率十里一亭，亭有長。十亭一鄉，鄉有三老，有秩、嗇夫、游徼。三老

掌教化，嗇夫職聽訟收賦稅，游徼徼循禁賊盜。」顏師古引《漢官名秩簿》云：「斗食月奉十一斛，佐史月奉八斛。一說：斗食者，歲奉不滿百石，計日而食一斗二升，故云斗食也。」《後漢·百官志》：「斗食奉月十一斛，佐史奉月八斛。」與《名秩簿》同。劉昭引《漢書音義》云：「斗食，祿日以斗為計。」此師古所引或一說也。趙氏舉其時奉祿有斗食、佐史兩目，用以除吏、吏即有秩、三老、嗇夫、游徼、亭長五者也。

章指：言聖人制祿，上下差敘。貴有常尊，賤有等威。諸侯僭越，滅籍從私。

孟子略記，言其大綱，以答北宮子之問。

疏「貴有常尊賤有等威」○正義曰：宣公十二年《左傳》隨會之言也。○「諸侯僭越滅籍從私」○正義曰：《漢書·藝文志》云：「及周之衰，諸侯將踰法度，惡其害己，皆滅去其籍，自孔子時而不具。」

萬章問曰：「敢問友。」^①注問朋友之道也。

①「其」，原誤作「與」，今從沈校據《周禮》改。

②「變」，原誤作「槩」，今從沈校據《周禮》改。

孟子曰：「不挾長，不挾貴，不挾兄弟而友。友也者，友其德也，不可以有挾也。」

注長，年

長；貴，貴勢；兄弟，兄弟有富貴者。不挾是乃爲友，謂相友以德也。

疏注「兄弟兄弟有富貴者」○正義

曰：趙氏以「挾貴」爲挾在己身之富貴，「挾兄弟」爲挾兄弟之富貴，「兄弟」即包上「貴」字而言。江氏永《羣經補義》云：「古人以昏嫻爲兄弟，如張子之於二程，程允夫之於朱子，皆有中表之親。既爲友則有師道，不可謂我與彼爲嫻親，有疑不肯下問也。」「挾兄弟而問」，與挾故而問相似。俗解謂不挾兄弟多人而友，兄弟多人有何可挾乎？須辨別之。」趙氏佑《溫故錄》云：「兄弟，等夷之稱。必其人之與己等夷而後友之，則不肯與勝己處，不能不耻下問矣。兄弟有富貴者，則仍挾貴意耳。」孟獻子，百乘之家也，有友五人焉：樂正裘、牧仲，其三人則予忘之矣。獻子之與此五人者友也，無獻子之家者也；此五人者亦有獻子之家，則不與之友矣。

注獻子，魯卿，孟氏也。有百

乘之賦。樂正裘、牧仲其五人者，皆賢人無位者

也。此五人者自有獻子之家，富貴而復有德，不肯與獻子友也。獻子以其富貴下此五人，五人屈禮而就之也。

疏注「獻子」至「而就之也」○正義曰：陳氏

厚耀《春秋世族譜》云：「孟孫、叔孫、季孫俱出桓公，謂之三桓。公子慶父生公孫敖，公孫敖生文伯，《魯語》稱孟文子。文子生孟獻子仲孫蔑，文十五見，襄十九卒。《國語·晉語》趙簡子曰「魯孟獻子有鬬臣五人」，注云：「鬬臣，扞難之士。」未知即此五人否。《漢書·古今人表》孟獻子、樂正裘、牧中並居第四等，是以其德同也。」《禮記·坊記》云：「家富不過百乘。」胡氏匡衷《儀禮釋官》云：「《左傳》『唯卿備百邑』，《鄭志》以爲『邑方二里』，據《小司徒》『四井爲邑』言之，其說自確。百邑即方二十里之縣，小國之卿采地也。此免餘主辭邑，故據卿祿之少者言之。自卿以上乃有百邑，則大夫不得備百邑，故惟一成方十里也。《周禮·司勳》：『掌賞地之政令，凡賞無常，輕重視功。』又云：『惟加田無國正。』諸凡云『百乘』者，當據采地之外有加賜者言之。如《左傳》魯賜季友汶陽之田及費，晉賞桓子狄臣千室，亦賞士伯以瓜衍之縣是也。杜預解『百邑』以爲一乘之邑，百邑即百乘，說無所據。」趙氏以無

獻子之家爲賢人無位，有獻子之家爲富貴而復有德。舊疏云：「此五人如亦有獻子之家富貴則不與獻子爲友，無他，以其兩貴不能以相下故也。獻子與之爲友，則以貴下賤故也。」近時通解：「無獻子之家」謂視之若無，不歆羨之也，「有獻子之家」謂有之爲重也。五人知有獻子之家則知有貴，知有貴則獻子不與之友。知有獻子之貴，則獻子不與友，獻子之不挾貴可知。非惟百乘之家爲然也，雖小國之君亦有之。費惠公曰：「吾於子思則師之矣，吾於顏般則友之矣，王順、長息則事我者也。」**注**小國之君，若費惠公者也。王順、長息德不能見師友，故曰「事我者」也。

疏注「小國之君若費惠公者也」○正義曰：顧氏炎武《日知錄》云：「春秋時有兩費：其一見《左傳》成公十三年，晉侯使呂相絕秦曰「殄滅我費滑」，注：「滑國都於費，今河南緱氏縣。」襄公十八年「楚蔿子馮、公子格率銳師侵費滑」，蓋本一地，秦滅之而後屬晉耳。其一僖公元年「公賜季友汶陽之田及費」，《齊乘》：「費城在費縣西北二十里，魯季氏邑。」在子思時，滑國之費，其亡久矣，疑即季氏之後而僭稱公者。《魯連子》稱陸子謂齊湣王曰：「魯費

之衆臣，甲舍於襄賁。」而楚人對頃襄王有「鄒、費、邾、邳」，殆所謂泗上十二諸侯者邪？仁山金氏曰：「費本魯季氏之私邑，而《孟子》稱「小國之君」，《曾子》書亦有費君、費子之稱，蓋季氏專魯，而自春秋以後，計必自據其邑，如附庸之國矣。」大夫之爲諸侯，不待三晉而始然，其來亦漸矣。」閻氏若璩《釋地續》云：「余更博考之：《呂氏春秋》言「以滕、費則勞，以鄒、魯則逸」。劉向《說苑》言「魯人攻鄒，曾子辭於鄒君，鄒君曰：寡人之於先生也」。《魯世家》言「悼公時，三桓勝，魯如小侯，卑於三桓之家」。《六國表》並同。則爲季氏之疆僭，以私邑爲國號，殆無復疑。」毛氏奇齡《經問》云：「或問《孟子》有費惠公，且曰「小國之君」。按，戰國並無費國，有謂費在春秋係魯都，或是魯君。則魯此時爲魯繆公，並無惠公，且魯有惠公，未有子孫與祖宗可同謚者。有謂費本季氏嚴邑，或即季氏子孫世居費者，遂於此僭稱公歟？曰：俱不然。魯國無恙，固無有降而稱費國之理，即季氏子孫世爲魯卿，亦斷無有出居於費者。大夫有采邑，但收其賦稅而不居其地，故孟孫之邾、叔孫之郕、季孫之費皆他人居之。《春秋》公斂處父居郕，侯犯居郕，南蒯公、山弗狃、陽虎皆居費是也。季氏宗卿，焉得居費？若謂魯惠、費惠不當同

謚，則衛有兩莊公，燕有三桓公，祖宗謚法何曾禁同？而以此立說，則又誤矣。大抵春秋戰國間凡都邑之長，皆與有地之君相比，原有邑宰、都君之稱，以長於其地也。此所稱國，猶顯史、郭、極各爲君臣，因亦得以公名之。此不特楚僭稱王始有申公、葉公之稱，即以齊言之，在春秋有棠公，在戰國有薛公，其稱邑以公，皆是也。況魯在戰國，方五百里，則費或稍寬，其得以都君而僭國君，容有然耳。」惠氏士奇《春秋說》云：「虞、虢、焦、滑、霍、揚、韓、魏，皆姬姓也。滑國都於費，謂之費滑。《水經注》：「緱氏縣故滑費，春秋滑國都。」莊公十六年同盟於幽，滑伯與焉。滑一名費，猶宋一名商。《孟子》所謂費惠公者，滑伯之後也。自秦人滅滑而滑或屬周，或屬晉，或屬鄭。屬周者曰馮滑，見定公六年《傳》；屬晉者曰虛滑，見成公十七年《傳》；屬鄭者曰費滑，見襄公八年《傳》。蓋滑介於周、鄭之間，仍爲附庸於晉、鄭，故至戰國而郊、邲、鄆、費猶號小國之君。說者不如春秋有費滑，遂謂戰國無費，而以魯之費當之，誤矣。」按：《漢書·古今人表》費惠公、顏敢、王慎、長息，同列第四等。敢、般形近而譌，順、慎字通。非惟小國之君爲然也，雖大國之君亦有之。

晉平公之於亥唐也，人云則入，坐云則坐，食云則食。雖蔬食菜羹，未嘗不飽，蓋不敢不飽也。然終於此而已矣。**注**大國之君，如晉平公者也。亥唐，晉賢人也，隱居陋巷者。平公嘗往造之，亥唐言人，平公乃入，言坐乃坐，言食乃食也。蔬食，糲食也。不敢不飽，敬賢也。終於此，平公但以此禮下之而已。

疏注「大國」至「而已」○正義曰：《太平御覽》引皇甫士安《高士傳》云：「亥唐者，晉人也。晉平公時，朝多賢臣，祁奚、趙武、師曠、叔向皆爲卿大夫，名顯諸侯。唐獨不官，隱於窮巷。平公聞其賢，致禮與相見而請事焉。平公待於門，唐曰人公乃入，唐曰坐公乃坐，唐曰食公乃食。唐之食公也，雖蔬食菜羹，公不敢不飽。」《史記·晉世家》云：「悼公卒，子平公彪立。」《抱朴子·欽士》篇云：「晉文接亥唐，脚痺而坐，不敢正。」此「文」爲「平」之譌。其《逸民》篇云：「晉平非不能吏亥唐也，然尊而肆之，貴而重之，誠以百行殊尚，默默難齊，樂尊賢之美稱，耻賊善之醜迹。」「亥唐」一作「期唐」，亥之爲期猶箕之爲荻也。惠氏棟《左傳補注》云：「史趙以亥字推算其年者，蓋以亥爲絳縣人之名，即《孟子》之亥

唐。《韓非子》言「晉平公於唐亥」云云，或《孟子》傳寫倒其名氏也。《詩·大雅·召旻》「彼疏斯稗」，箋云：「疏，羸也。謂糲米也。」疏與疏通。趙氏佑《溫故錄》云：「晉平承悼公復伯之烈而不能繼興。悼之末年，已不免弛，平益替焉。溴梁盟而大夫張，平丘盟而諸侯散，自是天下變亟，六卿禍成，方且違叔向，築虓祁，其不知求賢輔國亦甚矣。區區禮一亥唐，不過取快佚遊，苟圖虛譽，非有「示我周行」之誠。唐復無可表見，即使不終於此而與共職位，豈遂能破相疑之勢，樹疏逖之勳哉？孟子持以爲友道證，未暇深論晉本末也。」弗與共天位也，弗與治天職也，弗與食天祿也。士之尊賢者也，非王公之尊賢也。**注**位、職、祿，皆天之所以授賢者，而平公不與亥唐共之而但卑身下之，是乃匹夫尊賢之禮耳。王公尊賢，當與共天職也。舜尚見帝，帝館甥於貳室，亦饗舜，迭爲賓主。是天子而友匹夫也。**注**尚，上也。舜在畎畝之時，堯友禮之。舜上見堯，堯舍之於貳室。貳室，副宮也。堯亦就饗舜之所設，更迭爲賓主。禮謂

妻父曰「外舅」，謂我「舅」者吾謂之「甥」。堯以女妻舜，故謂舜「甥」。卒與之天位。是天子之友匹夫也。**疏**注「尚上」至「夫也」○正義曰：尚與上通。《論

衡·須頌》篇引《尚書》或說云：「尚者，上也。」《儀禮·覲禮》云「尚左」，注云：「古文尚作上。」是也。《說文》貝部云：「貳，副益也。」《爾雅·釋宮》云：「宮謂之室。」是「貳室」即「副宮」也。趙氏以堯館舜於貳室則舜饗堯之所設，堯亦就往舜宮饗舜之所設，**①**是爲「更迭爲賓主」也。《詩·小雅·彤弓》「一朝饗之」，箋云：「大飲賓曰饗。」《周禮·秋官·大行人》「饗禮九獻」，注云：「饗，設盛禮以飲賓也。」是以酒食待賓客爲饗。趙氏以「饗舜」爲「堯就饗舜之所設」，則謂舜設盛禮饗堯而堯就饗其所饗。此饗當解作受。哀公十五年《左傳》云「其使終饗之」，注云：「饗，受也。」是也。《小爾雅·廣詁》云：「迭，更也。」故以「更」釋「迭」。一說「亦饗舜」是以祿養舜，即上「共天祿」意。以君臣之禮更爲賓主之禮，謂略上下而交際往來，非堯爲主則舜爲賓，舜爲主則堯爲賓也。《爾雅·釋

① 「饗」，原誤作「響」，今據經解本改。

親《云》「妻之父爲外舅」，又云「謂我舅者吾謂之甥也」，郭氏注云：「謂我舅者吾謂之甥，然則亦宜呼壻爲甥。」《孟子》曰「帝館甥於貳室」是也。」用下敬上，謂之貴；用上敬下，謂之尊賢。貴貴尊賢，其義一也。」**注**下敬上，臣恭於君也；上敬下，君禮於臣也。皆禮所尚，故云「其義一」也。

章指：言匹夫友賢，下之以德；王公友賢，授之以爵。大聖之行，千載爲法者也。**疏**「大聖之行千載爲法」○正義曰：襄公三十一年《左傳》云：「文王之行，至今爲法。」

姪廷琮廷弼校字

孟子正義卷二十終

孟子正義卷二十一

江都縣鄉貢士焦循撰集

萬章曰：「敢問交際何心也？」**注**際，接也。問交接道當執何心爲可者？**疏**注「際接也」○

正義曰：《爾雅·釋詁》云：「際，捷也。」捷與接通。《說文》手部云：「接，交也。」是際亦交也。執，持也，操也。謂諸侯以禮儀幣帛與士相交接，其道當操持何心。孟子曰：

「恭也。」**注**當執恭敬爲心。曰：「卻之卻之爲不恭，何哉？」**注**萬章問卻不受尊者禮謂之不恭，何然也？**疏**注「卻不受尊者禮謂之不恭」○正義

曰：《音義》出「却之」，云：「正體卻字，下皆同。或作卻，誤。」此謂當从「却」作卻不當從邑作卻也。《文選·東京賦》云「卻走馬以糞車」，薛綜注云：「卻，退也。」《呂氏春秋·知接》篇云「無由接固卻其忠言」，高誘注云：「卻，不用。」退其

所交接之禮物而不用，即「不受」也。疊言「卻之卻之」者，卻之至再，堅不受也。萬章以不受亦是廉以律己，何以爲不恭？一說「卻之」是萬章問，「卻之爲不恭」是孟子答，「何哉」又是萬章問。曰：「尊者賜之，曰：『其所取之者義乎？不義乎？』而後受之。以是爲不恭，故弗卻也。」**注**孟子曰：今尊者賜己，己問其所取此物，寧以義乎，得無不義？乃後受之。以是爲不恭，故不當問尊者不義而卻之也。**疏**注「今尊」至「卻之也」○正義曰：「己問」解「曰」字，趙氏以曰是問之之詞。問此所賜之物義不義，彼必以義對，故受之也；若不義，則卻之矣。尊者賜而問其義不義，是輕慢之也。輕慢故不恭，故不問其義不義而不卻也。曰：「請無以辭卻之，以心卻之，曰：『其取諸民之不義也。』」而以他辭無受，不可乎？**注**萬章曰：請無正以不義之辭卻也，心知其不義，以他辭讓無受之，不可邪？曰：「其交也以道，其接也以禮，斯孔子受之矣。」**注**孟子言其來求交己以道理，其接待己有禮者，若斯，孔子受之矣。言可受也。**疏**「其交」至

「之矣」○正義曰：「以道」謂所賜有名，如餽贈聞戒，「以禮」謂儀及其物。云「受之矣」，不問其義也。

萬章曰：「今有禦人於國門之外者，其交也以道，其餽也以禮，斯可受禦與？」**注**禦人，以兵禦人而奪之貨。如是而以禮道來交接己，斯可受乎？**疏**注「禦人」至「之貨」○正義曰：《尚書·

牧誓》「弗禦克奔」，鄭注云：「禦，彊禦，謂彊暴也。克，殺也。不得暴殺紂師之奔走者。」然則「禦人於國門之外」即暴人於國門之外也。王氏鳴盛《尚書後案》云：「《詩·大雅·蕩》云：『曾是彊禦』，毛傳：『彊禦，彊梁禦善也。』《崧高》：『不畏彊禦』，疏亦云：『彊梁禦善之人。』趙岐注「禦人以兵」，古者扞人以兵曰禦，以兵傷人亦曰禦也。」「受禦」謂受此所禦得之貨。曰：「不可。」《康誥》曰：「殺越人于貨，閔不畏死，凡民罔不讞。」是不待教而誅者也。殷受夏，周受殷，所不辭也。於今爲烈，如之何其受之？」**注**孟子曰：不可受也。《康誥》、《尚書》篇名。周公戒成王封康叔。越、于，皆於也。殺於人，取於貨，閔然不知畏死者。讞，殺

也。凡民無不得殺之者也。若此之惡，不待君之教命，遭人則討之。三代相傳以此法，不須辭問也。於今爲烈烈明法，如之何受其餽也？**疏**注「康誥尚」

至「康叔」○正義曰：《書序》云：「成王既伐管叔、蔡叔，以殷餘民封康叔，作《康誥》。」趙氏以爲「周公戒成王封康叔」者，《康誥》云：「王若曰：孟侯，朕其弟，小子封。」鄭注云：「依《略說》，太子十八爲孟侯，而呼成王。」王氏鳴盛《尚書後案》云：「成王即位年十三，至是六年，十八矣。十八爲孟侯。此伏生《書傳略說》義也。彼文云：『天子太子十八曰孟侯。孟侯者，四方諸侯來朝，迎於郊。』見《周禮·秋官·大行人》疏。伏生《書傳》，秦火以前先師遺義，故鄭用之。《文王世子》篇：『仲尼曰：昔周公攝政，踐阼而治，抗世子法於伯禽，所以善成王也。』又云：『成王幼，不能踐阼，故抗世子法於伯禽，使與成王居，欲令成王知父子君臣長幼之義。』是周公居攝，以世子禮教成王，呼成王爲孟侯，不足異也。趙岐注《孟子》以《康誥》爲周公戒成王及康叔封而作，是亦以孟侯爲成王可知。」江氏聲《尚書集注音疏》云：「鄭康成注伏生《大傳》云：『孟，迎也。孟侯，呼成王也。』」○注「越于」至「之者也」○正義曰：《尚書·康誥》云：「凡民自

得罪，寇攘姦宄，殺越人于貨，斃不畏死，罔弗諫。」趙氏以「越」、「于」皆「於」者，《爾雅·釋詁》云：「粵、于，於也。」《史記·宋世家》《集解》引馬融云：「越，於也。」越、粵通也。江氏聲《尚書集注音疏》云：「越，于也。于猶取也。凡民所由得罪，以寇攘姦宄，殺人取貨也。殺于人，取其貨，冒冒然不畏死刑，凡民無不怨之，此言不待教而誅者也。」《七月》詩云「一之日于貉」，毛傳云：「于貉，謂取狐狸皮也。」故于猶取也。《孟子·萬章》篇引「殺越人」，趙氏以爲「殺于人」，據其解越爲于，則越乃假借字，當以粵爲正。孟子說此經云「是不待教而誅者也」。上文「義刑義殺，勿庸以即」，言當先教後罰，❶此言「殺人取貨」，則彊暴之人不可教訓者，明不在先教之列。《說文》支部云：「斃，冒也。」《周書》曰：「斃不畏死。」段氏玉裁《說文解字注》云：「今本《爾雅》：「昏，斃，強也。」《盤庚》「不昏作勞」，鄭注：「昏讀爲斃，勉也。」似鄭所據《爾雅》與今本不同。《康誥》「斃不畏死」，《孟子》作「閔」。《立政》「其在受德斃」，心部作「忒」。王氏鳴盛《後案》云：「冒昧爲惡，自強爲惡，義亦同。」按：趙氏以「不知畏死」解「閔然」，則謂其冒昧無知。顧殺人取貨，罪犯不赦，豈有不知者？惟知之而故犯之，乃爲自彊。閔爲斃之假借，知其不當爲而強爲之也。王氏念孫《廣雅疏證》云：

「斃，惡也。《說文》：「斃，怨也。」《康誥》「罔不斃」，傳云：「人無不惡之者。」《孟子·萬章》篇引《書》作「斃」。《荀子·議兵》篇云「百姓莫不敦惡」，《法言·重黎》篇「楚傲羣策而自屈其力」，李軌注云：「傲，惡也。」斃、傲、敦並與斃同。凡人凶惡亦謂之斃，《康誥》云「元惡大斃」，《逸周書·鈐法解》云「近斃自惡」，是也。《方言》：「諄，憎所疾也。宋魯凡相疾苦謂之諄憎，若秦晉言可惡矣。」諄與斃聲亦相近。」按：趙氏訓「斃」爲「殺」，以爲「凡民無不得殺之」，與訓怨訓惡不同。斃字《說文》所無。《莊子·逍遙遊》云「越人斷髮文身」，《釋文》云：「司馬本作敦，云：「敦，斷也。」」又《說劍》篇云「試使士敦劍」，《釋文》引司馬注云：「敦，斷也。」《說文》斤部云：「斷，截也。」《釋名·釋言語》云：「絕，截也。如割截也。」然則敦有割截斬斷之義。趙氏讀斃爲敦，故以爲殺也。《禮記·樂記》云「故樂者天地之命」，注云：「命，教也。」是「教」亦「命」也。《說文》疋部云：「遭，遇也。」言部云：「誅，討也。」趙氏以「不待教而誅」爲《孟子》解說「凡民罔不斃」之義，既凡民無不得殺之，則「不待教」即是「不待君之教命」，遭遇此殺人取貨之人，人即得而誅討之。不待教

❶「罰」，原誤作「殺」，今從沈校據《尚書集注音疏》改。

命而誅，故「不須辭問」。《國語·魯語》云：「魯大夫辭而復之」，注云：「辭，請也。」不須請問，極言其當討也。《國語·晉語》云：「君有烈名」，注云：「烈，明也。」《管子·心術》篇云：「殺戮禁誅謂之法。」《鹽鐵論·刑德》篇云：「法者，所以督姦也。」於今爲烈，趙氏以爲「烈烈明法」，謂此不待教而誅之法，三代傳之，至今猶明顯也。遭遇此等之人方且誅討之，奈何受其餽？以「烈烈」解「烈」字，又以「明」字解「烈烈」，猶《毛詩》傳以「洸洸潰潰」解「洸潰」，《樂記》以「肅肅雍雍」解「肅雍」也。曰：「今之諸侯取之於民也猶禦也。苟善其禮際矣，斯君子受之，敢問何說也？」**注**萬章曰：「今諸侯賦稅於民，不由其道。履畝彊求，猶禦人也。苟善其禮以接君子，君子且受，受之何說也？君子謂孟子。」**疏**注「萬章」至「人也」○正義曰：《春秋》宣公十五年「初稅畝」，《穀梁傳》云：「古者什一，藉而不稅。初稅畝者，非公之去公田，而履畝十取一也。」楊氏疏引徐邈以爲「除去公田之外，又稅私田之什一」。私田本不當稅，今履而稅之，是爲「彊求」。孟子時諸侯橫斂，有不止於稅畝者矣。趙氏第舉此一端以爲例耳。曰：「子以爲有王者作，將比今之諸侯而誅

之乎？其教之不改而後誅之乎？夫謂非其有而取之者盜也，充類至，義之盡也。孔子之仕於魯也，魯人獵較，孔子亦獵較。獵較猶可，而況受其賜乎？」**注**孟子謂萬章曰：子以爲後如有聖人興作，將比地盡誅今之諸侯乎？將教之其不改者乃誅之乎？言必教之，誅其不改者也。殷之衰亦猶周之末，武王不盡誅殷之諸侯，滅國五十而已。知後王者亦不盡誅也。謂非其有而竊取之者爲「盜」。充，滿；至，甚也。滿其類大過至者，但義盡耳，未爲盜也。諸侯本當稅民之類者。今大盡耳，亦不可比於禦。孔子隨魯人之獵較。獵較者，田獵相較奪禽獸，得之以祭。時俗所尚，以爲吉祥。孔子不違而從之，所以小同於世也。獵較尚猶可爲，況受其賜而不可也？」**疏**注「將比地盡誅今之諸侯乎」○正義曰：《音義》出「將比」，云「丁毗失切」，云：「比地而誅，猶言比屋而誅也。」亦毗志切。《禮記·樂記》云「比於慢矣」，注云：「比猶同也。」《後漢書·鄭康成傳》注云：「比牒猶連牒也。」比而誅之即同而誅之，「比

地而誅之「即連地而誅之也」。○注「謂非」至「比於禦」○正義曰：《呂氏春秋·重己》篇云「味衆珍則胃充」，高誘注云：「充，滿也。」《楚辭·離騷》云「蘇糞壤以充幃兮」，注云：「充猶滿也。」《呂氏春秋·求人》篇云「至勞也」，高誘注云：「至，大也。」《詩·小雅·巧言》《昊天泰憮》，箋云：「泰言甚也。」泰與大同，是「至」即「甚」也。故趙氏以「甚」釋「至」，又以「大過」釋「至」。《禮記·緇衣》云「行無類也」，注云：「類謂比式。」《方言》云：「類，法也。」什一而稅，此法式也；「充類」，謂已盈滿其法式，乃於法式之外又多取之，則是充類而又大甚，是為「充類至」。「充類至」則是為「義之盡」。義者，宜也。盡亦至也。「諸侯本當稅民之類者」，「當」字解「義」字。取稅於民，本為義類，但於所當取之法式為太甚，故為「義之盡」。趙氏以「大」釋「盡」，明盡與「至」其義一也。與盜為非類，故不可比於禦。《湛困靜語》云「充類至」一句，「義之盡也」一句是也。近時通解，夫謂非其有而取之即為盜者，乃充不取之類，至於義之至極而後為然也。○注「獵較者」至「世也」○正義曰：張氏爾岐《蒿菴問話》云：「古人田獵既畢，擇取三等中殺者，每等得十，以充君庖。其餘則與士衆習射於射宮，射而中，田不得禽則得禽，田得禽而射不中，則不得禽。蓋田時各奮武勇，及既獲，

則公之，辭讓而後取也。若夫獵較者，不復習射，唯以所獲之多少為所取之多少，當其獵時，自互相攫奪。此亦古法變壞之一端，然皆用以祭其祖先，殊無大過。」周氏柄中《辨正》云：「王罕皆謂「較奪禽獸以祭」正與下正祭器相應，趙義為長。愚謂不特此也。《周禮》獲禽者取左耳，及弊田，植虞旗，致禽而珥焉。言致禽於旗下，取耳以較所獲之多少。則獵而較獲，正禮之所有，不得為弊俗，故趙說為長。楊文采曰：「《還》與《盧令》，齊俗也。猶但以便捷輕利相稱譽。魯俗重禮教，君戾泮宮，而無小無大，從公于邁，猶有先王之遺風焉。何至公行攘奪，曾齊俗之不若乎？其意蓋在貴四方之異物，所得之多且異者則於獻禽時誇耀於衆，謂人莫己若耳。非獨較多寡，亦較珍異也。」楊氏此說亦自近理，然孟子引此正以較奪禽獸與取非其有一例，故舉以相形。若作比較解，則與取民猶禦豪無干涉，下文不當云「獵較猶可」，況受其賜」矣。嘗推求獵較之故，大抵出於魯之三家，非田獵之百姓相較奪也。襄三十年《傳》：「鄭豐卷將祭，請田，子產弗許，曰：「惟君用鮮，衆給而已。」是因祭而獵，惟諸侯得行之，而大夫不與焉。魯自三家僭竊，禮則擬於君，祀則豐於昵，務以多品異物為觀美，於是有田獵較奪之事。若謂魯人之習俗如是，則孔子為政能使市不飾賈，塗不拾遺，而獨不

能變此陋習乎？且庶民有何祭器，庶民之祭，豈得用四方之食而煩孔子之簿正邪？知此則無疑於趙氏較奪之說矣。孔氏廣森《經學卮言》云：「言魯人獵較，孔子爲政亦聽之而不禁耳，非亦從而身爲之也。」焦氏袁熹《此本軒四書說》云：「此魯人皆士大夫奉祭祀者也。習俗已然，本非禮所得用，而孔子不違，以小同於俗，不汲汲於更張也。」

曰：「然則孔子之仕也，非事道與？」**注**

萬章問：孔子之仕，非欲事行其道與？**疏**注「非欲

事行其道與」○正義曰：《韓非子·喻老》篇云：「事，爲也。」《禮記·樂記》云「事蚤濟也」，注云：「事猶爲也。」《檀弓》云「不仁而不可爲也」，注云：「爲，猶行也。」《呂氏春秋·愛類》篇云「無不行也」，高誘注云：「行，爲也。」行、事、爲三字義同，故以「行」釋「事」，「事道」即行道也。曰：

「事道也。」**注**孟子曰：孔子所仕者，欲事行其道。

「事道，奚獵較也？」**注**萬章曰：孔子欲事道，如

何可獵較也？曰：「孔子先簿正祭器，不以四

方之食供簿正。」**注**孟子曰：孔子仕於衰世，不可

卒暴改戾，故以漸正之。先爲簿書以正其宗廟祭祀

之器，即其舊禮，取備於國中，不以四方珍食供其所簿正之器度。珍食難常有，乏絕則爲不敬，故獵較以祭也。**疏**注「孔子」至「祭也」○正義曰：趙氏以孔子仕

衰世，不可遽然矯戾改變其俗，先此宗廟祭祀之器且有不正者，不獨獵較也。若一時既正其祭器，又禁其獵較，則卒暴難行，故正之以漸，先簿正其祭器，不即禁其獵較也。《音義》出「簿正」，云：「丁步古切，本多作薄。」錢氏大昕《養新錄》云：「經典無簿字，惟《孟子》有『先簿正祭器』一語。孫奭《音義》云『本或作薄』，則北宋本猶不盡作『簿』也。唐《美原神泉詩碑》篆書主簿字从艸，是唐人尚識字。」按：簿書之簿即帷薄之薄，劉熙《釋名·釋書契》云：「笏，忽也。君有教命及所啓白，則書其上，備忽忘也。或曰簿，言可以簿疏物也。」畢氏沅《釋名疏證》云：「簿，俗字也。據漢《夏承碑》『爲主簿督郵』，《韓勅碑》『主簿魯薛陶』，《武榮碑》『郡曹史主簿』，古簿字皆从艸明矣。然諸史書並从竹，如籍、藉之類，亦互相通。古用笏，漢魏以來謂之簿，即手板也。《蜀志》稱『秦宓以簿擊煩』，即此是已。」書之於簿謂之簿，故先爲簿而書之，以正其宗廟祭祀之器也。獵較皆取國中所備，若不獵於國中而取珍食於四方，四方遠在魯國之外者

也，則恐難常有而不免有時乏絕，轉爲不敬，孔子所以不禁其獵較也。近時通解則以「簿正祭器，不以四方之食供簿正」即是陰止其獵較之術。張氏爾岐《蒿菴問話》云：「夫子欲革其俗，故先簿正祭器，使上下尊卑祭有常器，器有常品。用三鼎五鼎者乃有獸腊，庶人只用特牲，則所獲免糜之屬皆不得用，而人將漸知顧禮，覺其較奪之非。」此則「四方」指魯國中之四方，若是則孔子簿正祭器正是禁止其獵較，不得云「亦獵較」矣。惟正祭器是一事，禁獵較又是一事，二者相度則祭器不可不正，故先正之。不以四方難得之食供簿正，恐其乏絕不敬，則獵較尚不爲無說，故姑容之。此聖人權衡之當而先正漸正之宜也。所以對「奚獵較」之義，謂因此所以亦獵較也。曰：「奚不去也？」**注**萬章曰：孔子不得行道，何爲不去？曰：「爲之兆也。兆足以行矣而不行，而後去，是以未嘗有所終三年淹也。」**注**兆，始也。孔子每仕，常爲之正本造始，欲以次治之。而不見用，占其事始而退。足以行之矣而君不行也，然後則孔子去矣。終者，竟也。孔子未嘗得竟事一國也，三年淹留而不去者也。**疏**注

「兆始」至「治之」○正義曰：哀公元年《左傳》云：「有田一

成，有衆一旅，能布其德而兆其謀。」注云：「兆，始也。」兆其謀，承上始有「一成」「一旅」而言，是兆之「義」爲始也。《廣雅·釋詁》造、本皆訓始，故以「始」釋「兆」，又以「正本造始」申言之。始亦先也，先簿正祭器，「爲之正本造始」也。以漸止其獵較，是「欲以次治之」也。○注「而不」至「而退」○正義曰：此二句解「而不行而後去」。「不見用」是「不行」也。《儀禮·士冠禮》《鄉飲酒禮》注皆云：「退，去也。」是「去」即「退」也。謂雖不見用，亦示以可行之兆而去，如吉雖未形於事而龜筮先見其兆。《周禮·春官·占人》注云：「占蓍龜之卦兆吉凶。」經言「兆」，故趙氏以「占」言之。○注「足以」至「去矣」○正義曰：此順解「足以行矣而不行而後去」也。「而後去」，不遽去也。雖不行，必爲之兆而後去，故不遽也。孔子亦獵較，已是道不行，而必先簿正祭器以爲之兆，而後乃退去。「爲之兆」原在「不行」之後，經先言「爲之兆」，故趙氏屈曲申明之，此趙氏解經之妙也。萬章問云「道不行，奚爲不去」，曰：「不行而不去者，爲之兆也；所以爲之兆者，以示兆足以行。兆足以行而君不行，所以爲之兆而後去也。不行在爲之兆之前已然，非爲之兆而君不行也。經文奧折，趙氏得之。」○注「終者」至「去者也」○正義曰：《詩·大雅·瞻卬》「譖始竟背」，箋云：「竟猶終也。」《說文》

音部云：「樂曲盡爲竟。」《爾雅·釋詁》云：「淹，久也。」宣公十二年《左傳》云：「三子無淹久」，注云：「淹，留也。」故以「三年淹」爲「留而不去」。淹留至於終竟三年，則得竟事一國，未嘗終竟三年之留，是「未嘗得竟事一國」也。謂爲之兆而後乃去，雖不遽去，而亦未嘗久留終於三年。孔子

有見行可之仕，有際可之仕，有公養之仕。

於季桓子，見行可之仕也；於衛靈公，際可之仕也；於衛孝公，公養之仕也。」**注**行可，冀

可行道也。魯卿季桓子秉國之政，孔子仕之，冀可得因之行道也。際，接也。衛靈公接遇孔子以禮，

故見之也。衛孝公以國君養賢者之禮養孔子，故宿留以答之矣。**疏**注「行可」至「道也」○正義曰：《史記·

孔子世家》云：「定公十四年，孔子年五十六，由大司寇行攝相事，誅魯大夫亂政者少正卯。與聞國政三月，粥羔豚者弗飾賈，男女行者別於塗，塗不拾遺，四方之客至乎邑者不求有司，皆予之以歸。」是所爲「行可之仕」也。桓子以定公五年秉國政，嘗穿井得土缶，中若羊，以問孔子。孔子爲司寇，溝昭公墓而合之。《家語》：「謂季桓子曰：『貶君以彰己罪，非禮也。今合之，所以掩夫子之不臣。』」然則是時季桓

子實能聽用孔子之言。定公十年《公羊傳》云：「孔子行乎季孫，三月不違。」注云：「孔子仕魯，政事行乎季孫，三月之中不見違過。是違之也。不言政行乎定公者，政在季氏之家。」十二年《公羊傳》云：「孔子行乎季孫，三月不違。曰家不藏甲，邑無百雉之城，於是帥師墮郕，帥師墮費。」《孔子世家》云：「齊人聞而懼曰：『孔子爲政必霸，霸則吾地近焉。我之爲先并矣。』於是送齊國中女子好者八十人，皆衣文衣而舞《康》樂，文馬三十駟，遺魯君。陳女樂文馬於魯城南高門外，季桓子微服往觀再三，將受乃語魯君爲周道遊，往觀終日，怠於政事。桓子卒受齊女樂，三日不聽政，郊又不致餼俎於大夫。孔子遂行，宿乎屯，而師已送曰：『夫子則非罪。』孔子曰：『吾歌可夫。』歌曰：『彼婦之口，可以出走。彼婦之謁，可以死敗。蓋優哉游哉，維以卒歲。』師已反，桓子曰：『孔子亦何言？』師已以實告。桓子喟然嘆曰：『夫子罪我以羣婢故也。』」然則孔子之仕魯，以季桓子不違，去魯，以季桓子之受女樂。故云「於季桓子見行可之仕」也。

○注「際接」至「見之也」○正義曰：周氏柄中《辨正》云：「《史記》：『孔子在衛，衛靈公致粟六萬。』此固公養之實據。然以其接遇有禮，不徒能養，故曰際可之仕，則非公養之仕矣。」○注「衛孝公」至「答之矣」○正義曰：毛氏奇齡《四書

賡言云：「《春秋》、《史記》並無孝公，惟夫子於衛靈死後，在哀七年當出公輒時亦曾至衛。但出公並不謚孝。然舍此又別無他公往來。疏謂仍是靈公。《史記·春秋年表》：「衛靈三十八年，孔子來，祿之如魯。」又《孔子世家》：「衛靈問孔子居魯得祿幾何，對曰奉粟六萬。衛人亦致粟六萬。」此正公養之實據。然明明有孝公字，豈可不信《孟子》而反信《史記》？惟趙岐注：「衛孝公以國君養賢之禮養孔子，故孔子為宿留以答之。」其曰「養賢之禮」，曰「宿留」，似古原有成文而郊卿引之者。漢去古未遠，必有師承，未可以今世所見疑古人也。」翟氏灝《考異》云：「衛輒使石曼姑率師距蒯瞶於戚，《公羊傳》云：「固可以距之也。」輒以王父命辭父命，是父之行乎子也。以家事辭王事，是上之行乎下也。故《檀弓》正義謂「衛輒拒父」而《公羊》以為「孝子」，後儒之論且然，則當時臣下之謚以掩非，想自有之矣。若其一人兩謚，更無足怪。蒯瞶謚莊公，《漢書·人表》謂之簡公，則亦嘗有兩謚。」趙氏佑《溫故錄》云：「《謚法解》無出，衛孝公之即出公輒無疑。出公者，特當其出奔在外之稱，及後返國稱後元年，二十一年卒，而謚為孝，史不備耳。經每有可以正史者。」周氏柄中《辨正》云：「蓋出公繼立時孔子又嘗過衛，大約其致粟仍襲靈公之舊，而禮遇不深，故第為公養之仕耳。」

宿留，詳見《公孫丑》篇。

章指：言聖人憂民，樂行其道。苟善辭命，不忍逆距，不合則去，亦不淹久。蓋仲尼行止之節也。

孟子曰：「仕非為貧也而有時乎為貧，娶妻非為養也而有時乎為養。」**注**仕本為行道

濟民也，而有以居貧親老而仕者，娶妻本為繼嗣也，而有以親執釜竈，不擇妻而娶者。**疏**注「仕本」至

「娶者」○正義曰：《韓詩外傳》云：「曾子仕於莒，得粟三秉。方是之時，曾子重其祿而輕其身。親沒之後，齊迎以相，楚迎以令尹，晉迎以上卿。方是之時，曾子重其身而輕其祿。懷其實而迷其國者，不可與語仁，窘其身而約其親者，不可與語孝。任重道遠者不擇地而息，家貧親老者不擇官而仕。」《列女傳·賢明》篇：「周南之妻云：家貧親老，不擇官而仕，親操井臼，不擇妻而娶。」為貧者，辭尊居卑，辭富居貧。**注**為貧之仕，當讓高顯之位，無求重祿。辭尊居卑，辭富居貧，惡乎宜乎？抱

關擊柝。**注**辭尊富者安所宜乎？宜居抱關擊柝

監門之職也。柝，門關之木也。擊，椎之也。或曰：柝，行夜所擊木也。《傳》曰：「魯擊柝聞於邾。」

疏注「監門之職也」○正義曰：《周禮·地官·司門》「祭祀

之牛牲繫焉，監門養之」，注云：「監門，門徒。」《荀子·榮辱》篇云：「或監門御旅，抱關擊柝，而不自以為寡」，楊氏注云：「監門，主門也。抱關，門卒也。擊柝，擊木所以警夜

者。」《史記·信陵君列傳》云：「魏有隱士曰侯嬴，年七十，

家貧，為大梁夷門監者。」既云「終不以監門困故而受公子

財」，又云「嬴乃夷門抱關者也」，故趙氏以監門為「抱關擊

柝」者。○注「柝門」至「於邾」○正義曰：《說文》門部云：

「關，以木橫持門戶也。」趙氏解柝有二：一為門關之木，謂

即此橫持門戶者也；一為行夜所擊木，《周禮·天官·宮

正》「夕擊柝以比之」，鄭司農云：「柝，戒守者所擊也。」《秋

官·挈壺氏》「縣壺以序聚柝」，**①**《野廬氏》「若有賓客，則令

守涂地之人聚柝之」，《修閭氏》「掌比國中宿互柝者」，鄭司

農云：「擊柝，兩木相敲行夜時也。」**②**引《傳》云魯擊柝聞

於邾，哀公七年《左傳》文。「行夜」即巡夜。阮氏元《校勘

記》云：「行字如《月令》『出行田原』之行，《經典釋文》皆下

孟反。《秋官·司寤氏》「掌夜時以星分夜，以詔夜士夜禁」，

注云：「夜士，主行夜徼候者。」賈氏疏云：「行夜徼候者，若

《宮伯》「掌受八次八舍」，注云：「於徼候便也。」則行夜往來

周旋謂徼候者也。」按：趙氏以「抱關擊柝」為「監門之職」，

則柝即是關，若以柝為行夜所擊，則是抱關為一職，擊柝又

為一職。柝、櫟字通也。為門關之木，則擊為椎之使固；為

行夜之木，則擊為敲之使有聲。義亦別矣。孔子嘗為

委吏矣，曰：「會計當而已矣。」嘗為乘田矣，

曰：「牛羊茁壯長而已矣。」位卑而言高，罪

也；立乎人之本朝而道不行，耻也。」**注**孔子

嘗以貧而祿仕。委吏，主委積倉庾之吏也。不失會

計，當直其多少而已。乘田，苑囿之吏也，主六畜之

芻牧者也。牛羊茁壯肥好長大而已。茁，生長貌

也。《詩》云：「彼茁者葭。」位卑不得高言豫朝事，

①「秋」，按挈壺氏屬夏官，下野廬氏、修閭氏始屬秋官，參

沈校。

②「修閭氏」至「時也」，沈校：按此為鄭玄注《天官·官

正》文。鄭司農此注作「櫟謂行夜擊柝」。

故但稱職而已。立本朝，大道當行。不行，爲己之耻。是以君子祿仕者不處大位。

疏注「委吏」至「少而

已」○正義曰：《周禮·地官》：「遺人，中士二人，下士四人，掌邦之委積」，注云：「委積者，廩人、倉人計九穀之數足國用，以其餘共之，所謂餘法用也。少曰委，多曰積。」又「委人，中士二人，下士四人」，「軍旅共其委積薪芻」，注云：「主斂甸稍芻薪之賦以共委積。」「倉人，中士四人，下士八人」，「掌粟人之藏，辨九穀之物，以待邦用。若穀不足則止餘法用，有餘則藏之。」注云：「止猶殺也。殺餘法用謂道路之委積。」然則委積爲遺人、委人、倉人所共掌，故以委吏爲主委積倉庾之吏也。《說文》：「人部云：『會，合也。』言部云：『計，會也，算也。』」《天官·小宰》：「聽出入以要會」，注云：「謂計最之簿書。月計曰要，歲計曰會。」《宰夫》：「乘其財用之出入」，注云：「乘猶計也。」賈氏疏云：「計者，算法乘除之名出於此也。」《大宰》：「歲終則令百官府各正其治，受其會，三歲則大計羣吏之治而誅賞之」，注云：「會，大計也。」然則零星算之爲計，總合算之爲會。《說文》：「田部云：『當，田相值也。』」《呂氏春秋·孟夏紀》云：「必當其位」，高誘注云：「當，直也。」直，值同。直其多少無差，故不失也。孫氏星衍《平

津館文稿·委吏解》云：「《史記·孔子世家》云：『孔子嘗爲季氏史，料量平。』《史記》所言正足證《孟子》。《周禮》：遺人掌邦及鄉里、門閭、郊里、野鄙、縣都之委積，地官司徒之屬，是其事也。司會則逆羣吏之治而聽其會計，冢宰之屬。孔子正爲遺人之官。稱季氏史者，時季氏秉國政，得專司徒之事，孔子爲其屬，故季氏史亦魯臣，非仕於私家也。會計是司會之事。所云『當』者，讀如『奏當』之當，謂料量委積，上之司會，適當國家會計之數，不爲季氏求贏餘也。故《史記》則云料量平，《說文》料字解量也。料量猶言概量，以概平斗斛，無浮入也。此正對求也爲季氏聚斂附益言之，不獨辭尊居卑，亦辭富居貧之一端。若止以供職爲當，則人人能之，且國家亦不容有不供職之吏也。」○注「乘田」至「者葭」○正義曰：《周禮·地官》：「囿人，中士四人，下士八人。」注云：「囿，今之苑。」趙氏「苑囿之吏」似指此。周氏柄中《辨正》云：「毛大可曰：『苑囿，囿人所掌，祇游觀鳥獸之事，並無牛羊，亦並不芻牧。考《周禮·牛人》有職人，主芻豢者。職通作犢，犢也，所以繫牛。凡牧人掌牧六牲，牛人掌養國之公牛，必授職人芻豢之。《史記》謂之司職吏，其又名乘田者，以公牛芻豢皆甸田中事也。』」愚按，古乘與甸通，毛說良是。」引《詩》者，《毛詩·召南·騶虞》篇文。傳云：「茁，出

也。《說文》艸部云：「苗，艸初生出地貌。」《詩》曰：「彼茁者葭。」《爾雅·釋詁》云：「壯，大也。」苗爲草木生出之名，借以形容牛羊，故以「肥好」解之，然後引《詩》以明其本義。《音義》云：「長，張丈切。」《呂氏春秋·論大》篇，《任數》篇，高誘注皆云：「長，大也。」故以「大」釋「長」。長是生長，苗是生長之貌。「茁壯」言其貌之「肥好」而以「長」字承之，猶言其生長則茁壯肥好也。

章指：言國有道則能者取卿相，國無道則聖人居乘田。量時安卑，不受言責，獨善其身之道也。

萬章曰：「士之不託諸侯，何也？」**注**託，寄也。謂若寄公，食祿於所託之國也。**疏**注「託寄」

至「國也」○正義曰：《方言》云：「託，寄也。」凡寄爲託。《儀禮·喪服傳》齊衰三月章「寄公爲所寓」，傳曰：「寄公者何也？失地之君也。」《毛詩·邶風·式微》序云：「《式微》黎侯寓于衛，其臣勸以歸也。」箋云：「寓，寄也。黎侯爲狄人所逐，棄其國而寄於衛。」孔氏正義云：「此被狄所逐而云寄者，若《春秋》出奔之君所在亦曰寄，故《左傳》曰：『齊以

邾寄衛侯。』是也。《喪服傳》「失地之君」謂削地盡者，與此別。」孟子曰：「不敢也。諸侯失國而後託於諸侯，禮也；士之託於諸侯，非禮也。」**注**謂士位輕，本非諸侯敵體，故不敢比失國諸侯，得爲寄公也。**疏**注「士位輕」○正義曰：周氏廣業《孟子出處時地考》云：「古之上士、中士、下士者，皆有職之人也；其未仕而讀書譚道者，通謂之儒。《周禮》「儒以道得民」，《魯論》「女爲君子儒」，是也。問亦稱士，如《管子》「士農工商爲四民」，《曾子》「士不可以不宏毅」之類。《春秋》而後，有游士、處士，則皆無位而客游人國者矣。《孟子》所言士亦有二：

萬章之「不託諸侯」，彭更之「無事而食」及王子墊所問，此無位者也；答北宮錡及「士以旂，大夫以旌」，「前以士，後以大夫」，則並指有位者也。」萬章曰：「君餽之粟，則受之乎？」**注**士窮而無祿，君餽之粟，則可受之乎？曰：「受之。」**注**孟子曰：受之也。「受之何義也？」**注**萬章曰：受粟何意也？曰：「君之於

①「凡」，據全書文例，疑當作「故」。

氓也，固周之。」**注**氓，民也。孟子曰：君之於民，固當周其窮乏，況於士乎？

疏注「氓民也」○正義

曰：詳見《公孫丑》篇。不言「君之於民」而言「氓」者，氓是自他國至此國之民，與寄之義合。曰：「周之則受，

賜之則不受，何也？」**注**萬章言士窮，君周之則

受，賜之則不受，何也？周者，謂周急，稟貧民之常

科也；賜者，謂禮賜橫加也。**疏**注「周者」至「科也」○

正義曰：周與賙通，《周禮·地官·鄉師》：「以歲時巡國及野而賙萬民之艱阨，以王命施惠。」**注**云：「艱阨，飢乏也。

鄭司農云：「賙讀爲周急之周。」賈氏疏云：「讀從《論語》

「周急不繼富」之周。」又《司稼》「掌均萬民之食而賙其急」，

注云：「賙，稟其艱阨。」《說文》禾部云：「稟，賜穀也。」《廣

雅·釋詁》云：「稟，予也。」「稟貧民之常科」謂因民貧乏，以

穀給予之，此常法也。《禮記·月令》「季春之月，天子布德

行惠，開府庫，出幣帛，周天下」，**注**云：「周謂給不足也。」

《呂氏春秋·季春紀》高誘注則云：「周，賜也。」蓋周與賜義

亦通，而並舉則各別也。○**注**「賜者謂禮賜橫加也」○正義

曰：「橫加」謂不當賜而賜也。曰：「不敢也。」**注**孟

子曰士不敢受賜。曰：「敢問：其不敢，何也？」**注**萬章問何爲不敢？曰：「抱關擊柝者

皆有常職以食於上。無常職而賜於上者，以

爲不恭也。」**注**孟子曰：有職事者可食於上，

士不仕，自以不任職事而空受賜爲不恭，故不受也。

疏注「有職」至「受也」○正義曰：《周禮·天官·大宰》「祿

位以馭其士」，**注**云：「祿，若今月奉也。自卿大夫以至庶

人，在官皆有祿。」《呂氏春秋·懷寵》篇云「皆益其祿」，高誘

注云：「祿，食也。」《禮記·王制》云「王者之制祿爵」，**注**

云：「祿，所受食。」故以「祿」解「食於上」之食也。既不仕即

不當食其祿。不仕而受其賜，即是受其祿也。不仕而受其

祿，即是以士而託於諸侯。不恭即非禮也。

曰：「君餽之則受之，不識可常繼乎？」

注萬章曰：君禮餽賢臣，賢臣受之。不知可繼續而

常來致之乎？將當輒更以君命將之也。**疏**「曰君」

至「繼乎」○正義曰：前章言餽也以禮則孔子受之，是君餽

之則受之，不待復問矣，故直以「可常繼」爲問耳。前云「爲

貧而仕，惡乎宜乎，抱關擊柝」，謂仕有常職以受祿也。蓋賜

爲餽與祿之通稱。前云「尊者賜之」，賜即餽也，賜之可受者也；此云「君餽之粟則受之」，又云「無常職而賜於上，以爲不恭」，賜非餽也，賜之不可受者也。蓋仕有常職則可受其祿，不仕無常職則可受其餽，不可受其祿。君餽之以惠及氓則爲周，以禮下賢則爲交際，皆可受者也。合上二章，其義備矣。曰：「繆公之於子思也，亟問，亟餽鼎肉。子思不悅。於卒也，摽使者出諸大門之外，北面稽首再拜而不受，曰：『今而後知君之犬馬畜伋。』」蓋自是臺無餽也。

注孟子曰：

魯繆公時，尊禮子思，數問，數餽鼎肉。子思以君命煩，故不悅也。於卒者，末後復來時也。摽，麾也。麾使者出大門之外，再拜叩頭不受，曰：「今而後知君犬馬畜伋。」伋，子思名也。責君之不優以不煩，而但數與之食物，若養犬馬。臺，賤官主使令者。《傳》曰：「僕臣臺。」從是之後，臺不持餽來，繆公慍也。慍，恨也。

疏「鼎肉」○正義曰：《禮記·少儀》云

「其以鼎肉則執以將命」，注云：「鼎肉謂牲體已解，可升於鼎。」○注「於卒者末後復來時也」○正義曰：《爾雅·釋詁》

云：「卒，終也。」《儀禮·燕禮》云「卒受者以虛觴降奠於筐」，注云：「卒猶後也。」故以「末後」解之。據「自是臺無餽」，則此爲末後也；據「亟餽」，則此爲復來也。○注「摽麾」至「不受」○正義曰：《音義》云：「摽，音杓，又音拋。」莊十三年《公羊傳》云：「已盟，曹子摽劍而去之。」注云：「摽，辟也。時曹子端劍守桓公，已盟，乃摽劍置地，與桓公相去離。」《釋文》云：「摽劍，普交反，辟也。辟劍置地。劉兆云：『辟，捐也。』」此音與《孟子》同。《毛詩·邶風·柏舟》「寤辟有摽」，傳云：「辟，拊心也。摽，拊心貌。」《釋文》云：「摽，符小反。」與《公羊傳》音異。而摽，辟同爲拊心，則摽正即是辟，與《公羊》注同矣。《毛詩·召南》「摽有梅」，傳云：「摽，落也。」此摽乃芟字之假借，因思曹沫摽劍，此摽亦芟，謂墜落其劍於地也。哀公十三年《左傳》云：「長木之斃，無不摽也。」此摽亦芟也。木之長者既枯斃，久之，枝格必墜落。杜氏注摽爲擊，失其義矣。《說文》手部：「擘，搗也。」搗，裂也。一曰手指搗也。「摩，旌旗所以指摩也。」麾即俗摩字，摩通搗，搗訓擘，擘即「寤辟有摽」之辟。摽訓麾，猶訓辟也。《禮記·禮運》云「捭豚」，《釋文》云：「捭又作擘。」孔氏正義云：「捭拆豚肉，拆即分裂之義。」《說文》手部又云：「拊，搗也。」搗，摩也。「則拊心是以手撫摩其心」，云擘云

標，則當是以兩手分摩，蓋怨憤挹鬱之極，用手開解之。辟亦闕也，闕亦開也。蓋自上分而落於下爲標，自近分而屏於遠亦爲標，其義可引申而見。「標使者出諸大門之外」，自近分而屏於遠也，是可推而通矣。閻氏若璩《釋地》又續云：

「《周禮》『吉拜』是拜而後稽顙，『凶拜』是稽顙而後拜，則凡先稽首後再拜，凶拜之類也。先再拜後稽首，吉拜之類也。吉拜，拜之常，故主于受，凶拜，拜之異，故主不受。」《說文》手部云：「擗，首至手也。古文从二手。揚雄說从兩手下。」首部云：「頤，頤首也。」頁部云：「頓，下首也。」段氏玉裁《釋拜》云：「拜者，何也？頭至手也。頭至手，故經謂之拜手。凡經或言拜手，或單言拜，一也。《周禮》·大祝謂之空首，鄭曰：『空首，拜頭至手，所謂拜手也。』何休注《公羊》宣六年《傳》：『頭至手曰拜手。』某氏注《尚書》·召誥曰：『拜手，首至手。』皆其證也。何以謂之頭至手也？《說文解字》曰：『跪者，所以拜也。』既跪而拱手，而頭俯至于手，與心平，是之謂頭至手，《荀卿子》曰『平衡曰拜』是也。頭不至于地，是以《周禮》謂之空首。曰空首者，對稽首、頓首之頭著地言也。拜本專爲空首之稱，引申之則稽首、頓首、肅拜皆曰拜。」《稽》，《說文》作𡇗。稽首者何也？拜頭至地也。既拜手，而拱手下至於地，而頭亦下至于地，《荀卿子》曰「下衡

曰稽首」是也。《白虎通·姓名》篇、鄭注《周禮》·大祝、何注《公羊》宣六年、某氏注《尚書》·召誥，皆曰「拜頭至地曰稽首」。拜重手，故字從手，𡇗重首，故字從首也。頓首者，何也？頭叩地也。叩者何，敏也。敏者何？擊也。既拜手而拱手下至於地，而頭不徒下至地，且敏觸之，是之謂頓首。稽首者，言乎首舒遲至於地也，頓首者，言乎首急遽至於地也。是稽、頓之別也。《周禮》言頓首不言稽顙，《禮經》十七篇、《禮記》、羣經言稽顙不言頓首，稽顙與頓首有二歟？曰無二也。何以知其無二也？鄭注《周禮》「頓首」曰：「頭叩地也。」注《士喪禮》曰：「稽顙，頭觸地也。」又《檀弓》注云：「稽顙者，觸地無容。」叩地、觸地之非有二可知矣。至地者以首不以顙，敏地者必以顙，故謂之稽顙，亦謂之顙。《公羊》昭二十五年「再拜顙」，何曰：「顙猶今叩頭矣。」亦謂之頓顙。《吳語》諸稽郢行成於吳，曰「頓顙於邊」。何言乎稽顙？稽之言至也，其至地與稽首同，其以顙與稽首異也。《荀卿子》曰「平衡曰拜，下衡曰稽首，至地曰稽顙」，是即鄭君之「頭至手曰空首」，頭至地曰稽首，頭叩地曰頓首也。《周禮》·大祝「九拜，一曰稽首，二曰頓首，三

①「首」，原誤作「手」，今據《經韻樓集》改。

曰空首」，此三者蓋拜之經歟？「四曰振動，五曰吉拜，六曰凶拜，七曰奇拜，八曰褒拜，九曰肅拜」，此六者其舉前三者，權其吉凶輕重之宜而用之歟？他經曰拜手曰拜無曰空首者，故知空首即拜手也。拜者，拜手之省文也。《禮經》十七篇，《禮記》曰稽顙無言頓首者，故知《周禮》之頓首即稽顙也。凡言「拜手稽首」，言「拜稽首」，言「再拜稽首」，皆先空首而後稽首也。言拜而後稽顙者，先空首而後頓首也。言「稽顙而後拜」者，先頓首而後空首也，言「稽顙不拜」者，頓首而不空首也。拜者，常禮；稽首者，敬之至也，稽顙者，哀之至也。「凡祭必稽首。諸侯於天子稽首，大夫於國君稽首，於鄰國之君稽首，于君夫人、鄰國君夫人稽首。禮有非祭非君而稽首者，《特性饋食禮》：「宿尸，尸許諾，主人再拜稽首。」《少牢饋食禮》：「宿尸，祝擯主人再拜稽首，尸拜許諾，主人又再拜稽首。」此皆未入廟之尸也而再拜稽首者，鄭重之至，以定其爲尸也。《士昏禮》：「賓升北面薦雁，再拜稽首。」妻之父，非君也，以逆女之事至重，稽首主爲授女，故主人不答拜。《聘禮》：「郊勞，賓用束錦饋勞者，勞者再拜稽首受。」注云：「尊國賓也。」又「受饗饋，饋大夫，大夫北面當楣再拜稽首受幣」，注云：「尊君客也。」下文皆云「賓再拜稽首送幣」，又下文「大夫餼賓，賓再拜稽首受」。是亦猶

上文尊國賓尊君客之再拜稽首也。①凡行禮必拜手。凡敵者拜手，卿大夫互相於，一也。凡諸侯相於拜手。凡臣於君、君於臣皆拜手。凡喪必稽顙以拜賓，即頓首也。「何以謂之振動也？鄭曰：『戰栗變動之拜也。』」有不必拜手而拜手者，有不必稽首而稽首者，有不必頓首而頓首者，如文三年晉侯享公，公降拜，襄四年穆叔如晉，歌《鹿鳴》之三，三拜，如《雒誥》成王拜手稽首於周公，襄九年魯襄公稽首於晉君，如昭二十五年季孫意如稽顙於叔孫昭子，昭八年陳無宇稽顙於樂施，《公羊》昭二十五年昭公、子家羈再拜顙於齊侯，是皆謂之振動。振動者，言非常也，因事制宜之謂也。吉拜者何也？謂拜之常也。當拜而拜，當稽首而稽首，是吉拜也。吉拜對凶之辭也，凡稽首未有用於凶者也。凶拜者何也？拜而後稽顙，稽顙而後拜，皆凶拜也。凡頓首未有用於凶者也。奇拜者何也？謂一拜也。奇者，不耦也。凡《禮經》言拜不言再者，皆謂一拜也。經有明言一拜者，②《士相見禮》曰君答一拜，《聘禮》曰公一拜送几，又賓不降一拜。稽首頓首，則經未嘗有言再者。褒拜者，何也？

①「賓尊」，原誤倒，今據《經韻樓集》乙正。

②「有」，原誤作「者」，今據《經韻樓集》改。

謂再拜已上也。褒者大也。有所多大之辭也。凡《禮經·聘禮》《少牢饋食禮》《特牲饋食禮》言三拜，及僖十五年《左傳》言三拜稽首，襄四年言三拜，定四年言九頓首，以及婦人之俠拜，皆是也。肅拜者，何謂也？舉首下手之拜也，婦人之拜也。《少儀》曰：「婦人雖有君賜，肅拜。」是則肅拜爲婦人之常，猶拜手爲男子之常也。婦人以肅拜當男子之空首，以手拜當男子之稽首，以稽顙當男子之頓首。」○注「臺賤」至「恨也」○正義曰：臺即儻也。《方言》云：「儻、服、農夫之醜稱也。南楚凡罵庸賤謂之田儻，或謂之服。」臺爲賤稱，故官之賤者名臺。引《傳》者，昭公七年《左傳》「芋尹無宇曰：『人有十等，下所以事上，上所以共神也。』」故王臣公，公臣大夫，大夫臣士，士臣阜，阜臣輿，輿臣隸，隸臣僚，僚臣僕，僕臣臺。」服虔云：「臺，給臺下微名也。」臺次輿、隸、僚、僕之下，是賤官主使令者，故引此以證也。《論語·學而》篇云「人不知而不愠」，鄭氏注云：「愠，怨也。」《說文》心部云：「恨，怨也。」「怨，恚也。」《毛詩·大雅·綿》「肆不殄厥愠」，傳云：「愠，恚也。」是愠、恨、怨、恚四字義同。趙氏以「臺無餽」爲繆公心不平子思之言而不使之餽，故以爲愠，又以恨明之。阮氏元《校勘記》云：「『愠恨也』，玩此三字，似經文有奪，抑注文作『繆公愠恨也』五字，今本衍二字耳。」

悅賢不能舉，又不能養也，可謂悅賢乎？」**注**孟子譏繆公之雖欲有悅賢之意，而不能舉用，使行其道，又不能優養終竟之，豈可謂能悅賢也？**疏**注

「又不能優養終竟之」○正義曰：趙氏以繆公愠恨子思之言，不使臺餽食，爲不能「優養終竟之」。近時通說，繆公因子思不悅，自愧，故臺無餽。此「不能養」指上「亟問亟餽」事，非指「臺無餽」也。

曰：「敢問國君欲養君子，如何斯可謂養矣？」**注**萬章問國君養賢之法也。**疏**「敢問」至

「養矣」○正義曰：此因孟子言不能養而問也。曰：「以

君命將之，再拜稽首而受。其後廩人繼粟，庖人繼肉，不以君命將之。子思以爲，鼎肉使己僕僕爾亟拜也，非養君子之道也。」**注**將

者，行也。孟子曰：始以君命行，禮拜受之。其後倉廩之吏繼其粟，將盡復送，廚宰之人日送其肉。不復以君命者，欲使賢者不答以敬，所以優之也。子思所以非繆公者，以爲鼎肉使己數拜故也。僕僕，煩猥貌。謂其不得養君子之道也。**疏**注「將者」

至「道也」○正義曰：《毛詩》傳以行釋將，不一而足，趙氏所本也。《爾雅·釋言》云：「將，送也。」孫炎注云：「行之送也。」是將有行送二義。「以君命將之」即亦是以君命送之，故繼粟，繼肉皆以「送」字明之。廩人繼粟，廩人送之，不以君命送之也；庖人繼肉，庖人送之，不以君命送之也。《周禮·地官·廩人》：「掌九穀之數以待國之匪頒、賙賜、稍食。」《天官·庖人》：「共賓客之禽獻。」胡氏匡衷《侯國官制考》云：「《周禮》廩人下大夫二人，據少牢大夫有廩人，則諸侯當亦有之。《國語》云：『敵國賓至，廩人獻餼。』是諸侯有廩人也。《禮記·祭統》云：『夫祭有畀輝胞翟闔者，惠下之道也。唯有德之君為能行此。胞者，肉吏之賤者也。』《詩·簡兮》疏云：『胞即《周禮》庖人。』《漢書·百官公卿表》有庖人，師古曰：『庖人，主掌宰割者。』胞與庖同。天子庖人中士，諸侯當下士為之。凡諸侯之官，降天子一等。」趙氏兼言「倉廩之吏者」，粟藏于倉，倉人主之。廩人之粟亦取之自倉，故兼言倉廩之吏也。桓公四年《公羊傳》云「三曰充君之庖」，注云：「庖，廚也。」《淮南子·說林訓》云「治祭者庖」，注云：「庖，宰也。」是「庖人」為「廚宰之人」也。《說文》二部云：「亟，敏疾也。」段氏玉裁《說文解字注》云：「今人亟分入聲去聲。人之訓急也，去之訓數也。古無是分別，數亦急」

也，非有二義。」趙氏以「亟拜」為「數拜」，又云「欲使賢者不答以敬，所以優之也」。《毛詩·大雅·瞻印》「維其優矣」，箋云：「優，寬也。」《國語·魯語》云「獨恭不優」，注云：「優，裕也。」優裕是不急數，使之亟拜，非所以優裕之矣。《說文》莢部云「莢，漬莢也。」段氏玉裁《說文解字注》云：「漬，莢疊韻字。漬，煩漬也。莢如《孟子》書之僕僕。」「煩猥」猶煩漬也。《廣雅·釋詁》云：「煩，勞也。」《釋言》云：「猥，頓也。」堯之於舜也，使其子九男事之，二女女焉，百官牛羊倉廩備，以養舜於畎畝之中，後舉而加諸上位。故曰「王公之尊賢者」也。《注》堯之於舜如是，是王公尊賢之道也。九男以下，已說於上篇。上位，尊帝位也。《疏》「堯之」至「者也」○正義曰：此因養以及舉也。雖能養，仍必舉之，乃為尊賢。「百官」即廩人庖人之屬。「牛羊倉廩備」，則繼肉繼粟，不煩漬矣。「加之上位」謂慎徽五典，納于百揆，賓于四門，納于大錄，極而至于登庸攝政也。

章指：言知賢之道，舉之為上，養之

①「莢」，原誤作「幸」，今從沈校據《說文》改。

爲次。不舉不養，賢惡肯歸？是以孟子上陳堯舜之大法，下刺繆公之不宏。**疏**「下刺繆公之不宏」○正義曰：廷琥按：孔本宏作閔。

萬章曰：「敢問不見諸侯，何義也？」**注**問諸侯聘請而夫子不見之，於義何取？孟子曰：

「在國曰市井之臣，在野曰草莽之臣，皆謂庶人。庶人不傳質爲臣，不敢見於諸侯，禮也。」**注**在國謂都邑。民會於市，故曰「市井之臣」。

在野，野居之人。莽，亦草也。庶，衆也。衆庶之人未得爲臣。傳，執也。見君之質，執雉之屬也。未爲臣則不敢見之，禮也。**疏**注「在國」至「之屬也」○正

義曰：《儀禮·士相見禮》云：「宅者，在邦則曰市井之臣，在野則曰草茅之臣，庶人則曰刺草之臣。」注云：「宅者謂致仕者，去官而居宅，或在國中，或在野。」此宅者指已仕而罷官之人，與《孟子》言「庶人」未仕之人有別。按：宅者謂士之家居而未仕者也，可以《孟子》之言證《禮》所云，若去官致仕，終不可爲庶人矣。閻氏若璩《釋地續》云：「《後漢·

劉寵傳》：「拜會稽太守，山民愿朴，乃有白首不入市井者。父老自稱山谷鄙生，未嘗識郡朝。」郡朝，太守之廳事也。此可證市井貼在國都言。張守節曰：「古人未有市及井，若朝聚井汲水，便將貨物於井邊貨賣，故言市井。」《淮南子·本經訓》云「野莽白素」，《泰族訓》云「食莽飲水」，注皆云：

「莽，草也。」「草莽」猶「草茅」也。「庶，衆也」，《爾雅·釋詁》文。《釋名·釋書契》云：「傳，轉也。轉移所在，執以爲信也。」是傳有執義。《音義》云：「質，丁讀如贊。」《士相見》之禮「冬用雉，夏用脰」，執贊請見，^①必由將命者傳之，故謂之

「傳贊」。《禮》云：「見於君，執摯至下，容彌蹙。庶人見於君，不爲容，進退走。」賈氏疏云：「此不言民而言庶人，則是庶人在官，即府史胥徒是也。」然則自卿大夫士以至庶人在官，皆得執摯見君而爲臣。孟子所謂庶人，未在官者也。庶人之摯用鷩，趙氏概舉見君之摯，故云「執雉之屬」，括執羔、執鴈、執鷩而言之也。萬章曰：「庶人召之役則往役。君欲見之，召之則不往見之。何也？」

注庶人召使給役事則往供事。君召之見，不肯往

①「贊」，原作「雉」，今據經解本改。

見。何也？曰：「往役，義也；往見，不義也。」

且君之欲見之也，何爲也哉？」**注**孟子曰：庶

人法當給役，故往役，義也；庶人非臣也，不當見君，故往見，不義也。且君何爲欲見之而召之也？

疏注「庶人法當給役」○正義曰：《禮記·王制》云：「用民

之力，歲不過三日。」注云：「治宮室、城郭、道渠。」《周禮·

地官·鄉大夫》：「以歲時登其夫家之衆寡，辨其可任者，

國中自七尺以及六十，野自六尺以及六十有五，皆征之。」賈

氏疏云：「謂築作、挽引、道渠之役。若田獵，五十則免，是

以《祭義》云「五十不爲甸徒」。若征伐，六十乃免，是以《王

制》云「六十不與服戎」。此皆「法當給役」之事也。言分則

爲庶人，言德則爲士。往役爲庶人之分，往見則失士之節，

故有義不義之分也。君以庶人待之，即召之役，義所當往；

君而欲見之，則是待之以士，乃不師之友之而召之，此士所

以不往也。

曰：「爲其多聞也，爲其賢也。」**注**萬章

曰：君以是欲見之也。曰：「爲其多聞也，則天

子不召師，而況諸侯乎？爲其賢也，則吾未

聞欲見賢而召之也。**注**孟子曰：安有召師召賢

之禮而可往見也？繆公亟見於子思，曰：「古

千乘之國以友士，何如？」子思不悅，曰：

「古之人有言曰事之云乎，豈曰友之云乎？」

子思之不悅也。豈不曰：「以位，則子君也，

我臣也，何敢與君友也？」以德，則子事我者

也，奚可以與我友？千乘之君求與之友而

不可得也，而況可召與？」**注**魯繆公欲友子思，

子思不悅而稱曰：古人曰見賢人當事之，豈云友之

邪？孟子云：子思所以不悅者，豈不謂臣不可友

君，弟子不可友師也？若子思之意，亦不可友，況

乎可召之？**疏**「古之人」至「云乎」○正義曰：閻氏若璩

《釋地三續》云：「事之云乎，豈曰友之云乎」，此外惟《公

羊》莊公二十四年《傳》：「然則曷用，棗栗云乎，股脩云乎」，何

休注曰：「云乎，辭也。」按，云乎是辭，則但云「古之人有言

曰事之，豈曰友之」，語意自了。」齊景公田，招虞人以

旌，不至，將殺之。志士不忘在溝壑，勇士不

忘喪其元。孔子奚取焉？取非其招不往也。」**注**已說於上篇。

曰：「敢問招虞人何以？」**注**萬章問招虞人當何用也？曰：「以皮冠。庶人以旃，士以

旂，大夫以旌。」**注**孟子曰招禮若是。皮冠，弁也；旃，通帛也，因章曰旃；旂，旌有鈴者；旌，注旄竿首者。**疏**注「皮冠弁也」○正義曰：周氏柄中《辨正》

云：「《周禮·司服》：『凡甸冠弁服』，鄭注：『冠弁，委貌，此田獵之冠也。』薛氏《禮圖》以冠弁即皮弁，又以皮弁即皮冠，此說非是。襄十四年《傳》：『衛獻公射鴻於囿，孫、甯二子從之。不釋皮冠而與之言，二子怒。』孔疏謂「敬大臣宜去皮冠」。若皮冠即弁，則衛獻之不釋皮冠，正自應爾，孫、甯二子何爲而怒乎？然則冠弁者，**①**禮服之冠，皮冠蓋加于禮冠之上，田獵則以禦塵，亦以禦雨雪。楚靈狩於州來，去皮冠而與子革語，必非科頭也。可見去皮冠而仍有禮冠矣。以其爲田獵所有事，故招虞人以之，而禮冠中不數也。或云天子田獵服委貌，諸侯服皮冠，亦是臆說。」○注「旃通」至「首者」○正義曰：《周禮·春官·司常》云：「交龍爲旃，通帛爲旌，析羽爲旂。」《爾雅·釋天》云：「注旄首曰旌，有鈴

曰旂，因章曰旂。」鄭氏注《司常》云：「通帛謂大赤，從周正色，無飾。」郭氏注《爾雅》云：「以帛練爲旒，因其文章，不復畫之。」趙氏解旂旒既云「通帛」，又云「因章」，兼《周禮》、《爾雅》言之也。郭氏注「旂」云：「縣鈴於竿頭，畫蛟龍於旒。」是兼《司常》、《交龍》言之。鄭氏注「旌」云：「全羽析羽皆五采，繫之於旌旌之上，所謂注旄於竿首也。」是合《爾雅》「注旄首」言之。趙氏言「注旄于首爲旌」，於《爾雅》增「干」字，言「旌有鈴爲旂」，於《爾雅》增「旌」字。蓋旌則注旄於干，旂則繫鈴於干，以旌明旂，謂旂繫鈴於干猶旌注旄於干，非謂旂析旄又繫鈴也。周氏柄中《辨正》云：「毛大可曰：『此爲《孟子》解，當據《司常》、《大閱》文。凡大閱治徒役，必有諸侯卿大夫士及州里庶人。顧士未有位，惟諸侯得召之，而侯車載旂，故即以旂招士。孤卿可招庶人，而孤卿載旂，故即以旂招庶人。』愚按，旂車載旂，旂車者，五路中之木路，田獵乘之，《巾車》云「木路以田」是也。王正田獵則建大麾，小田獵則建旌，故即以旌招大夫，此正所謂以所招之人之物，與旂招士，旂招庶人一例也。陳氏《禮書》曰：「孤卿建旂，庶人，孤卿之所治者也，故招以旂。諸侯建旂，士，君之所禮也，故

①「冠」，原誤作「皮」，今據《四書典故辨正》改。

招以旂。旂車載旂，大夫，從旂燕之樂者也，故招以旂。」以此解《孟子》，何不可焉？」閻氏若璩《釋地三續》云：「余既篤信《左傳》，亦間以《孟子》較之，則以《孟子》爲據。如昭二十年齊侯田於沛是也。《傳》言「招虞人以弓」，不合《孟子》者一；「旂以招大夫，弓以招士」，不合《孟子》者二；不引「志士不忘在溝壑」二語而撰「守道不如守官」爲仲尼曰，爲柳子厚之所駁，不合《孟子》者三。此三者既不可信，則言昔我先君田，各招大夫士以其物，又豈可信哉？皮冠者，諸侯田獵之冠，故即以皮冠招掌田獵之人。虞人既至，先示以期日，即告以田於某所，庶幾虞人芟除其草萊，爲可陣之地，招之須及早。若庶人士大夫，皆「從公于狩」之人。《周禮·大司馬》至期立熊虎之旗，于期所以集衆，故曰以旗致民。又曰：「質明弊旗，誅後至者。」此豈待招而後至者哉？孟子緣答虞人以皮冠，遂連類而及庶人士大夫平日之招，以明各有等威。據《左傳》而謂四招者皆田制，拘矣。」廷琥按：趙注「旂竿首者」，^①孔本竿作「干」。以大夫之招招虞人，虞人死不敢往；以士之招招庶人，庶人豈敢往哉？況乎以不賢人之招招賢人乎？

注以貴者之招招賤人，賤人尚不敢往，況以不賢人

之招招賢人乎？不賢之招，不以禮也。欲見賢人而不以其道，猶欲其人而閉之門也。夫義，路也；禮，門也。惟君子能由是路，出人是門也。**注**欲人之入而閉其門，可得而入乎？閉門猶閉禮也。《詩》云：「周道如砥，其直如矢。」君子所履，小人所視。」**注**《詩》，《小雅·大東》之篇。底，平；矢，直；視，比也。周道平直，君子履直道。小人比而則之。以喻虞人能效君子守死善道也。**疏**注「詩小」至「道也」○正義曰：《詩》在《小雅·大東》第一章。底，《詩》作砥。孔氏正義云：「砥謂礪之石。《禹貢》曰「礪砥砮丹」，以砥石能磨物使平。矢則幹必直。砥言周道則其直亦周道也，如矢言其直則如砥言其平，互相通也。」翟氏灝《考異》云：「《說文》厂部：「底，柔石也。」重文作砥，並職雉切。广部：「底，山居也，下也。都禮切。」底實砥之本字，故《禹貢》「底柱析城」，《漢書》「底礪其節」、「底礪名號」，皆以底爲砥。今坊刻經文多上加點，與底下字無

①「注」，經解本作「氏」。

別，讀者遂誤音如邸。並《詩》之砥字或亦誤爲邸音。」按：底，底並從氏聲，義異而音則通。《禮記·王制》云：「天子三公之田視公侯」，《雜記》云：「妻視叔父母姑姊妹」，注並云：「視猶比也。」《廣雅·釋詁》云：「視，效也。」效即法，法即則，故既以「比」釋「視」，又以「則」、「效」解之。「守死善道」，《論語·述而》篇文。趙氏以引《詩》「君子所履」證君子之由是路，「小人所視」證虞人之非其招不往。按：《毛詩》本意，「周道」謂周家貢賦賞罰之道，「如砥」言其均平，「如矢」言其不偏。「君子所履」謂君子效法而履行之，「小人所視」謂小人視其平直而供奉之。所履所視皆謂周道，非謂小人比效君子。然則孟子引《詩》以「周道如砥，其直如矢」證義之爲路，禮之爲門，禮義即道也。不獨君子履此道，小人亦視此道。小人視此道，故以大夫之招招虞人，虞人死不敢往也；君子履此道，故君子由是路，出人是門也。抑君子履之，故召之則不往見之也，小人視之，故庶人不傳贊爲臣，不敢見諸侯也。萬章曰：「孔子君命召，不俟駕而行。然則孔子非與？」**注**俟，待也。孔子不待駕而應君命也。孔子爲之，非與？曰：「孔子當仕，有官職，而以其官召之也。」**注**孟子曰：孔子所以

不待駕者，孔子當仕位，有官職之事，君以其官名召之，豈得不顛倒？《詩》云：「顛之倒之，自公召之。」不謂賢人無位而君欲召見也。**疏**注「孔子」至「見也」○正義曰：仕於朝則有爵次之位，《周禮·天官·大宰》「祿位以馭其士」是也。《禮記·樂記》云「樂之官也」，注云：「官猶事也。」《淮南子·俶真訓》云「大夫安其職」，高誘注云：「職，事也。」官、職義皆爲事，故云「位有官職之事」。事以位別，名以事起，司某事則以某官爲名，故「君以官名召之」也。引《詩》者，《齊風·東方未明》之篇。箋云：「羣臣促遽，顛倒衣裳。」趙氏引此，謂孔子不俟駕而朝，猶齊臣顛倒衣裳而朝，其促遽以應召一也。無位則無官職之事，故不可召見之。趙氏佑《溫故錄》云：「此言亦孟子權以答問，而於孔子事君之正，固未盡發。何也？孟子之不見諸侯，皆君非其君，孟子又仕而不受祿，可以不應其召。若孔子仕魯，乃本國之君，即不當仕有官職，本有可召之義。所惡乎往見者，爲其無因而妄干耳。是以庶人不傳贊爲臣，所以循其爲庶人，若君欲見之而召之，方勤丘園之責，豈效汶上之辭？吾知孔子必不爲已甚也，即孟子亦不爲已甚也。」

章指：言君子之志，志於行道，不得

其禮，亦不苟往。於禮之可，伊尹三聘而後就湯；道之未洽，沮、溺耦耕，接輿佯狂。豈可見乎？

疏「接輿佯狂」○正義曰：《楚

辭·九章·涉江》云「接輿髡首兮桑扈羸行」，注云：「接輿，楚狂接輿也。髡，剔也。首，頭也。自刑身體，避世佯狂也。」《史記·范雎傳》云：「箕子、接輿，漆身為厲，被髮為狂。」東方朔《非有先生論》云：「接輿避世，箕子被髮佯狂。」《論語·微子》篇云「楚狂接輿歌而過孔子」，《集解》引孔曰：「接輿，楚人也。佯狂而來歌。」

孟子謂萬章曰：「一鄉之善士斯友一鄉之善士，一國之善士斯友一國之善士，天下之善士斯友天下之善士。」

注鄉，一鄉之善者，

國中之善者；天下，四海之內也。各以大小來相友，自為疇匹也。

疏注「鄉」至「匹也」○正義曰：趙

氏以一國之善士為國中之善者，而以「國中」解「國」字，閩、監、毛三本則作「國一國之善者」，此誤「國中」為「一國」也。推之「鄉一鄉之善者」亦是「鄉鄉中之善者」，以「鄉中」解

「鄉」字，猶以「國中」解「國」字也。鄉為鄉中、國為國中，故

「天下」為「四海之內」。蓋取善無窮，在一鄉則友一鄉，在一國則友一國，在天下則友天下。趙氏謂「各以大小來相友，

自為疇匹」，謂一鄉之善士與一鄉之善士友，一國之善士與

一國之善士友，天下之善士與天下之善士友。以友天下

之善士為未足，又尚論古之人。頌其《詩》，

讀其《書》，不知其人可乎？是以論其世也。

是尚友也。」

注好善者以天下之善士為未足極其善道。尚，上也。乃復上論古之人。頌其《詩》，

《詩》歌頌之，故曰頌。讀其《書》，猶恐未知古人高

下，故論其世以別之也。在三皇之世為上，在五帝

之世為次，在三王之世為下。是為好上友之人也。

疏注「好善」至「人也」○正義曰：「以友天下之善士為未

足」，因而上友古人，此互明友一鄉未足則進而友一國，友一

國未足則進而友天下，友天下猶未足，則進而友古人也。惟

一鄉斯友一鄉，惟一國斯友一國，惟天下斯友天下，何也？

同在一鄉，乃知此一鄉之善士也；同在一國，乃知此一國之

善士也；同在今世之天下，乃知今世天下之善士也。若生

今世而上友古人，則不同世何以知其人之善？故必頌其《詩》、讀其《書》而論其世。惟頌其《詩》、讀其《書》而論其世，乃可以今世而知古人之善也。上下兩節互明如此。《周禮·春官·大師》注云：「頌之言誦也。」「頌其詩」即「誦其詩」。段氏玉裁《說文解字注》云：「諷，誦也。誦，諷也。讀，籀書也。《大司樂》：『以樂語教國子，興道諷誦言語』，注：『倍文曰諷，以聲節之曰誦。』倍同背，謂不開讀也；誦則非直背文，又為吟咏以聲節之。《周禮》經注析言之，諷、誦是二，許統言之，諷、誦是一也。竹部：『籀，讀書也。』《庸風》傳曰：『讀，抽也。』《方言》曰：『抽，讀也。』蓋籀、抽古通用。《史記》：『紬史記石室金匱之書』，字亦作紬，①抽繹其義蘊至於無窮，是之謂讀。故卜筮之辭曰籀，謂抽繹《易》義而為之也。尉律學僮十七已上始試，諷籀書九千字乃得為吏。諷謂背其文，籀謂能繹其義。太史公作《史記》，曰「余讀高祖侯功臣」，曰「太史公讀列封」，②至便侯，曰「太史公讀秦楚之際」，③曰「余讀《諜記》」，曰「太史公讀《春秋曆譜諜》」，④曰「太史公讀《秦記》」，皆謂紬繹其事以作表也。漢儒注經斷其章句為讀，如《周禮》注「鄭司農讀火絕之」，《儀禮》注「舊讀昆弟在下」，「舊讀合大夫之妾為君之庶子女子子嫁者未嫁者」，是也。擬其音曰讀，凡言「讀如」、「讀若」

皆是也。易其字以釋其義曰讀，凡言「讀為」、「讀曰」、「當為」，皆是也。人所誦習曰讀，如《禮記》注云「周田觀文王之德，博士讀為厥亂勸寧王之德」，是也。諷誦亦為讀，如《禮》言「讀賔」、「讀書」，《左傳》「公讀其書」，皆是也。諷誦亦可云讀而讀之義不止于諷誦。諷誦止得其文詞，讀乃得其義蘊。《孟子》云「誦其詩，讀其書」，則互文見義也。趙氏佑《溫故錄》云：「三皇之世為上，五帝之世為次，三王之世為下」三語當有成文，其即上古、中古、下古之謂邪？然經言《詩》《書》，固不必遠追書契以前。」按：古人各生一時，則其言各有所當。惟論其世，乃不執泥其言，亦不鄙棄其言，斯為能上友古人。孟子學孔子之時，得堯舜通變神化之用，故示人以論古之法也。趙氏先解「頌其《詩》」而以論世屬之「讀其《書》」，似頌《詩》不必論世。《大戴記》衛將軍文子問於子貢

①「紬」，據上下文意及《史記索隱》引如淳語，疑當作「抽」。

②「封」，原誤作「侯」，今從沈校據《說文解字注》及《史記》改。

③「曰」，原無，今從沈校據《說文解字注》補。

④「曆」，原脫，今從沈校據《說文解字注》及《史記》補。

曰：「吾聞夫子之施教也，先以《詩》《世》。」孔氏廣森《補注》云：「《詩》世者，誦其《詩》，論其世也。《周禮》曰：『誦《詩》，世奠繫。』」然則《詩》《書》俱宜論世。趙氏蓋亦以論世兼承「頌其《詩》」「讀其《書》」，而先解頌字，繫「頌《詩》」下耳。

章指：言好高慕遠，君子之道。雖各有倫，樂其崇茂。是以仲尼曰：「毋友不如己者。」高山仰止，景行行止。

齊宣王問卿。孟子曰：「王何卿之問也？」**注**王問何卿也？王曰：「卿不同乎？」曰：「不同。有貴戚之卿，有異姓之卿。」**注**孟子曰：卿不同。貴戚之卿，謂內外親族也；異姓之卿，謂有德，命為三卿也。**疏**注「貴戚」至「卿也」○正義曰：貴戚之卿以親而任，故云「內外親族」也；異姓之卿以賢而任，故云「有德，命為三卿」也。王曰：「請問貴戚之卿。」**注**問貴戚之卿如何？曰：「君有大過則諫，反覆之而不聽，則易位。」**注**孟子曰：

貴戚之卿，反覆諫君，君不聽，則易君之位，更立親戚之賢者。**疏**「君有大過則諫」○正義曰：貴戚必待大過方諫，餘則有異姓卿在也。○**注**「更立親戚之賢者」○正義曰：孔本作「立親戚之貴者」，非。王勃然變乎色。**注**王聞此言，愠怒而驚懼，故勃然變色。曰：「王勿異也。王問臣，臣不敢不以正對。」**注**孟子曰：王勿怪也。王問臣，臣不敢不以其正義對。王色定，然後請問異姓之卿。**注**王意解，顏色定，復問異姓之卿如之何也。曰：「君有過則諫，反覆之而不聽，則去。」**注**孟子言異姓之卿，諫君不從，去而待放，遂不聽之，則去而之他國也。**疏**注「諫君」至「國也」○正義曰：周氏廣業《孟子古注考》云：「《公羊》宣元年『晉放其大夫胥甲父于衛』，《傳》云：『放之者何？』猶云無去是云爾。古者大夫已去，三年待放。君放之，非也；大夫待放，正也。」《白虎通·諫諍》篇：「援神契」曰：三諫待放，復三年，盡惓惓也。言放者，臣為君諱，若言有罪放之也。所諫事已行者，遂去不留。凡待放，冀君用其言耳。事已行，菑咎將至，無為留之也。臣待放於郊，

君不絕其祿者，示不欲其去也。」鄭康成《詩·檜風·羔裘》箋：「三諫不從，待放而去。」與此趙注俱用此事。」按：《儀禮·喪服》「舊君」，注云：「以道去君，謂三諫不從，待放於郊未絕者。」賈氏疏云：「此以道去君，據三諫不從，在境待放，得環則還，得玦則去。」《禮記·曲禮》云：「為人臣之禮，不顯諫，三諫而不聽則逃之。」注云：「逃，去也。君臣有義則合，無義則離。」又云：「大夫士去國，踰竟為壇位。」孔氏正義云：「此大夫士三諫而不從，出在境上。大夫則待放三年，聽於君命，若與環則還，與玦便去。」《隱義》云：「去國當待放也，若士不待放。」又云：「所以待放必三年者，三年一閏，天道一變，因天道變，望君自改也。」然在竟未去，聽君環玦，不謂「待歸」而謂「待放」者，既已在竟，不敢必還，言惟待君見放乃去也。此云「遂不聽之」者，謂賜玦也，故「去而之他國」。《荀子·大略》篇云：「召人以環，絕人以玦，反絕以環。」注云：「古者臣有罪，待放于境，三年不敢去。與之環則還，與之玦則絕，皆所以見意也。」

章指：言國須賢臣，必擇忠良，親近

貴戚，或遭殃禍。伊發有莘，為殷興道。

故云「成湯立賢無方」也。

疏「或遭殃禍」○正

義曰：周氏廣業《孟子章句疏證》云：①「《正義》作「禍殃」，與韻協。」○「伊發有莘為殷興道」○正義曰：《音義》云：「丁云：『言伊尹有莘之媵臣，發起于草萊，為殷湯興其王道也。』」周氏廣業《孟子章句疏證》云：②「《越絕書》：『殷湯臣伊尹，伐夏放桀而王道興蹤。』《史記》「伊尹為有莘氏媵臣，以滋味說湯，致于王道。」按，趙氏之意謂以貴戚為卿，致于易位，是為禍殃，不若任賢以異姓為卿，三諫而去，無易位之禍也。引伊尹者，言異姓出自草萊，有益於國，良于親近貴戚也。」

姪廷琮廷弼校字

孟子正義卷二十一終

①

「句疏」，據全書他章引文，當作「指考」。

②

「疏」，據全書他章引文，當作「考」。

孟子正義卷二十一

江都縣鄉貢士焦循撰集

孟子卷第十一

告子章句上凡二十章。**注**告子者，告，姓也；

子，男子之通稱也。名不害，兼治儒墨之道者。

嘗學於孟子，而不能純徹性命之理。《論語》曰

「子罕言命」，謂性命之難言也。以告子能執弟

子之問，故以題篇。**疏**注「告子」至「題篇」○正義

曰：趙氏以告子名不害，蓋以爲即浩生不害也。閻氏若

璩《釋地》又續云：「浩生，複氏；不害，其名。與見《公

孫丑》之告子及以《告子》題篇者自各一人。趙氏偶於

《告子》篇誤注曰名不害，且臆度其嘗學於孟子執弟子問

者。」毛氏奇齡亦以趙氏爲錯。胡氏煦《篝燈約旨》云：

「告子，孟子之弟子也。後來荀楊如性惡、禮偽、善惡混之說，皆各執一見，終身不易。而告子則往復辨論，不憚煩瑣，又且由淺入深，屢易其辭，安知最後無復有言？不既曉然於性善之旨乎？今人謂《告子》諸章皆告子之言，其言固屢易其說矣，安有自謂知性，曾無定論，猶向他人屢易其說者也？屢易其說，則請益之辭也。今觀其立言之敘：其始杞柳之喻，疑性善爲矯揉，此即性僞之說也。得戕賊之喻，知非矯揉矣，則性中有善可知矣。然又疑性中兼有善惡，而爲湍水之喻，此即善惡混之說也。得搏激之說，知性本無惡矣。則又疑「生之謂性」，此即佛氏之見也。得犬牛之喻，知性本善矣。則又疑「仁內而義外」。及得耆炙之喻，然後知性中之善，如是其確而切、美且備也。今知讀書窮理，以文章取功名止耳，求寢食不忘，諄諄性學如告子者，幾無人矣。告子之未可量也，顧乃以孟子爲闢告子，何邪？」**程氏灝《考異》**云：「《管子·戒》篇：『仁從中出，義由外作。』《墨子·經下》篇：『仁義之爲內外也，愛利不相爲內外，所愛利亦不相爲內外。其爲仁內也義外也，舉愛與所利也。』告子「仁內義外」之言遠本管子而近受自墨子。《墨子·公孟》篇：「二三子曰：告子言義而行甚惡，請棄之。墨子

曰：不可。告子言談甚辨，言仁義而不吾毀。」又告子受教於墨之實驗。趙氏云「告子兼治儒墨」，非僅泛度爲言。」

告子曰：「性猶杞柳也，義猶查棬也。

以人性爲仁義，猶以杞柳爲查棬。」**注**告子以

爲人性爲才幹，義爲成器，猶以杞柳之木爲查棬也。

杞柳，查柳也，一曰：杞，木名也。《詩》云：「北山

有杞。」**疏**查，查素也。**疏**注「告子」至「素也」○正義

曰：杞柳，植物，有枝幹，故趙氏以「人性爲才幹」；查棬是

器，故趙氏以「義爲成器」。杞柳本非查棬，其爲查棬也，有

人力以之也，以喻人性本非仁義，其爲仁義也，有人力以之

也。非人力則杞柳不可以爲查棬，非人力則人性不可以爲

仁義。《爾雅·釋木》云：「榑，查柳。」郭氏注云：「未詳。

或曰：柳當爲柳，查柳以柳，皮可煮作飲。」陶隱居《本草別

錄》云：「榑樹削取裏皮，去上甲，煎服之，夏日作飲，去熱。」

此榑樹即查柳，查即榑也。寇宗奭《本草衍義》云：「榑木，

今人呼爲榑柳。葉謂柳非柳，謂槐非槐。本最大者高五六

十尺，合二三人抱。湖南北甚多，然亦不材也，不堪爲器，用

嫩枝取以緣栲栳與箕唇。緣栲栳箕唇即爲查棬之類，故趙氏以杞柳爲查柳也。《毛詩·鄭風》「無折我樹杞」，傳云：

「杞，木名也。」陸璣《毛詩草木疏》云：「杞，柳屬也。生水

旁，樹如柳，葉粗而白色，木理微赤，故今人以爲車轂。」是杞

柳亦是木名，毛傳以「樹杞」之杞爲木名，正指杞柳。趙氏言

「一曰木名」，引《詩》以證之者。詩在《小雅·南山有臺》第

三章。傳不釋何物，即指樹杞也，而《釋文》引《草木疏》則

云：「其樹如樗，一名狗骨。」陳氏大章《詩名物集覽》云：

「狗骨即今絲棉樹。」按：絲棉樹與查柳固殊，此趙氏所以分

別之與？查素者，《爾雅·釋木》「榑落」，郭氏注亦云：「可

以爲查器素。」《詩正義》引某氏云：「可作查圈。」圈即棬。

邢氏疏云：「素謂樸也。」段氏玉裁《說文解字注》云：「樸，

木素也。素猶質也。以木爲質，未彫飾，如瓦器之坯然。

《士喪禮》、《周禮·臯人》皆云「獻素獻成」，注云：「形法定

爲素，飾治畢爲成。」是也。」蓋查醴之類，飾以彫漆，華以金

玉。未飾未彫之先，以杞柳等木爲之質，故爲素也。《禮

記·玉藻》云「母歿而柩圈不能飲焉」，注云：「圈，屈木所

爲，謂厄匱之屬。」已可用爲飲，則非未成之樸矣。《方言》

①「北」，沈校：《毛詩·小雅·南山有臺》作「南」。

云：「栝其通語也。」《大戴記·曾子事父母》篇：盧辯注云：「杯，盤盞盆蓋之總名也。」蓋栝爲總名，其未彫未飾時名其質爲棖，因而栝器之不彫不飾者即通名爲棖也。翟氏灝《考異》云：「趙氏訓栝棖爲栝素，孫氏音栝爲杯，蓋素與椽，杯與坏，惟以木作土爲別，字體、音義則並同也。」《說文繫傳》曰：「杆即《孟子》所謂栝棖也。」以杯作栝，殊失趙氏訓素本意。」又云：「《荀子·性惡》篇：『工人斲木而成器，器生於工人之僞，非故生於木之性也。』聖人積思慮，習僞故，以生禮義而起法度。然則禮義法度者是生於聖人之僞，非故生於人之性也。」又曰：「槩栝之生於栝木也，繩墨之起於不直也。立君上，明禮義，爲性惡也。」皆與告子此說正同。孟子曰：「子能順杞柳之性而以爲栝棖乎？將戕賊杞柳而後以爲栝棖也？」**注**戕猶殘也。《春秋傳》曰：「戕舟發梁。」子能順完杞柳，不傷其性而成栝棖乎？將斧斤殘賊之，乃可以爲栝棖乎？言必殘賊也。**疏**注「戕猶」至「賊也」○正義曰：宣十八年「邾人戕繒子于繒」，《穀梁傳》云：「戕猶殘也。」趙氏引《春秋傳》者，襄二十八年《左傳》云「陳無宇濟水而戕舟發梁」是也。彼注亦云：「戕，殘落也。」《易·豐》卦

傳云「自藏也」，《釋文》引鄭氏注作戕，云：「戕，傷也。」故又以「傷」明之。傷殘則不能完全，故以「順」爲「完」。《說文》一部云：「完，全也。」《呂氏春秋·本生》篇「以全天爲故者也」，高誘注云：「全猶順也。」是「完」即「順」也。賊，害也。義與傷同。如將戕賊杞柳而以爲栝棖，則亦將戕賊人以爲仁義與？**注**孟子言以人身爲仁義，豈可復殘傷其形體乃成仁義邪？明不可比栝棖也。率天下之人而禍仁義者，必子之言夫！**注**以告子轉性以爲仁義若轉木以成器，必殘賊之。故言率人以禍仁義者，必子之言。夫，歎辭也。**疏**注「以告」至「之言」○正義曰：《金匱·婦人雜病》篇云：「轉胞不得溺，以胞系了戾，故致此病。」嵇康《與山巨源絕交書》云「令胞中略轉」，略轉猶了戾。《方言》云：「軫，戾也。」郭璞注云：「相了戾也。」《廣雅》以轉戾釋軫，軫是轉即軫，義皆爲戾。了與戾一聲，軫與轉一聲。「轉木」謂矯戾其木，「轉性」謂矯戾其性矣。《呂氏春秋·孟春紀》「無變天之道」，高誘注云：「變猶戾也。」故《章指》云「殘木爲器，變而後成」，變亦謂矯戾，與轉同義，非變通轉運之謂。蓋人性所以有仁義者，正以其能變通，異乎物之性也。以己之心通

乎人之心，則仁也；知其不宜，變而之乎宜，則義也。仁義由於能變通。人能變通，故性善；物不能變通，故性不善，豈可以草木之性比人之性？杞柳之性必戕賊之以爲栝樛，人之性但順之即爲仁義。故不曰「戕賊性以爲仁義」而曰「戕賊人以爲仁義」也。比人性於草木之性，草木之性不善，將人之性亦不善矣。此所以禍仁義而孟子所以辨也。杞柳之性可戕賊之以爲栝樛，不可順之爲仁義，何也？無所知也。人有所知，異於草木，且人有所知而能變通，異乎禽獸，故順其能變通者而變通之，即能仁義也。杞柳爲栝樛，在形體不在性，性不可變也；人爲仁義，在性不在形體，性能變也。以人力轉戾杞柳爲栝樛，杞柳不知也，以教化順人性爲仁義，仍其人自知之，自悟之，非他人力所能轉戾也。劉熙《釋名·釋言語》云：「順，循也。循其理也。」《爾雅·釋詁》云：「率，循也。」故《周書·大匡》云「州諸侯咸率」，孔晁注云：「率，奉順也。」《孟子》所謂「順性」即《中庸》所云「率性」。胡氏煦《篝燈約旨》云：「性相近云者，第如云不遠云爾。後說上智下愚，不說賢不肖，原指天資明昧而言。蓋賢不肖皆有爲立事之後所分別之品行，而智愚則據性之所發而言也。人初生便解飲乳，便解視聽，此良知也。然壯年知識便與孩提較進矣，老年知識便與壯年較進矣。同焉此人，

一讀書，一不讀書，其知識明昧又大相懸絕矣；同焉受業，一用心，一不用心，其知識多寡又大相懸絕矣。則明之與昧，因習而殊，亦較然矣。聖人言此，所以指明學者達天，徑路端在學習，有以變化之耳；又以見習染之汙，溺而不知返者，非其本性然也。」○注「夫歎辭也」○正義曰：句末用夫字，與《論語》「有是夫」、「善夫」等句同，故知爲歎辭。

章指：言養性長義，順夫自然；殘木爲器，變而後成。告子道偏，見有不純，內仁外義，違人之端。孟子拂之，不假以言也。**疏**「順夫自然」○正義曰：孔本作「順天」。

告子曰：「性猶湍水也，決諸東方則東流，決諸西方則西流。人性之無分於善不善也，猶水之無分於東西也。」**注**湍者，圜也。謂湍湍激水也。告子以喻人性若是水也，善惡隨物而化，無本善不善之性也。**疏**注「湍者」至「性也」○正義

曰：《說文》水部云：「湍，急瀨也。」急則有所分，告子以喻人性之無分善不善，則不取其急，故趙氏以「圜」訓之。《廣

雅《圖》、圖皆訓圖。圖通作箒。《說文》竹部云：「箒以判竹，圖以盛穀也。」劉熙《釋名·釋宮室》云：「圖以草作之，團團然也。」《淮南子·精神訓》高誘注云：「箒讀顚頤之顚。」《漢書·賈捐之傳》云：「顚顚獨居一海之中」，顏師古注云：「顚與專同。專專，圖貌也。」趙氏讀「湍」爲「圖」，「湍湍」猶「顚顚」也。惟水流回旋，故無分東西，此以無上下者而言，趙氏體告子之意以爲訓，精矣。《毛詩·周南》「葛藟荒之」，傳云：「縈，旋也。」《音義》云：「縈，字書作縈，①余傾切，波勢回貌。」按：縈即縈也。「隨物而化」謂習於善則善，習於惡則惡也。乃人性有上智下愚之不移，則不得謂隨物而化也。

孟子曰：「水信無分於東西，無分於上下乎？人性之善也，猶水之就下也。人無有不善，水無有不下。今夫水，搏而躍之，可使過顚；激而行之，可使在山。是豈水之性哉？其勢則然也。人之可使爲不善，其性亦猶是也。」**注**孟子曰：水誠無分於東西，故決之而往也；水豈無分於上下乎？水性但欲下耳。人性生而有善，猶水欲下也。所以知人皆有善性，似

水無有不下者也。躍，跳；顚，額也。人以手跳水，可使過顚；激之，可令上山。皆迫於勢耳，非水之性也。人之可使爲不善，非順其性也，亦妄爲利欲之勢所誘迫耳，猶是水也。言其本性非不善也。**疏**

注「躍跳」至「善也」○正義曰：《說文》足部云：「跳，蹶也。一曰躍也。」是「躍」爲「跳」也。《方言》云：「中夏謂之顚，東齊謂之顚。」是「顚」即「顚」也。趙氏言「人以手跳水」，「手」字釋「搏」字。《音義》云：「搏，張補各切，云：『以手擊水。』」丁作「搏」，音團。《通俗文》云：「搏黍爲手團。」蓋掬其掌以超騰其水，義亦可通。以杞柳爲柶棬比以人性爲仁義，是以人之善由戕賊而成也，不順也。孟子則明示以順其性爲善。以水無分於東西比人性無分於善不善，是以人之善不善皆由決而成也，皆順也。孟子則明示以不順其性乃爲不善。兩章互相發明。搏而躍之使過顚，激而行之使在山，猶戕賊杞柳爲柶棬也，不順也。順其性則善，不順其性則可使爲不善，而人性之善明矣。且水之東西無分優劣，而人之善不善則判若天淵。決東決西本不足以比人性之善不善。決東則

①「縈」，原誤作「縈」，今據文義及《廣韻》改。

東流，東必下，決西則西流，西必下，此但可喻人性之善，故云「人無有不善，水無有不下」。告子始以不順其性為善，既知順其性為善矣，又並以順其性為不善，云杞柳云湍水，皆擬不於倫也。

章指：言人之欲善，猶水好下，迫勢激躍，失其素真。是以守正性者為君子，隨曲拂者為小人也。疏「失其」至「人也」○正義

曰：《莊子·刻意》篇云：「能體純素，謂之真人。」《淮南子·精神訓》云：「所謂真人者，性合於道也。」趙氏言「素真」，郭象所謂「不假於物而自然者也」。「真」之義同於「正」，故上言「素真」，下言「正性」。《詩·皇矣》篇「四方以無拂」，箋云：「拂猶僂也。言無復僂戾文王者。」曲，邪也。邪則不正，僂戾則非自然。搏躍過額，非水之自然，故為「曲拂」也。

告子曰：「生之謂性。」注凡物生同類者皆

同性。疏「生之謂性」○正義曰：《荀子·正名》篇云：

「生之所以然者，謂之性。」《春秋繁露·深察名號》篇云：「如其生之自然之資，謂之性。」《白虎通·性情》篇云：「性

者，生也。」《論衡·初稟》篇云：「性，生而然者也。」《說文》心部云：「性，人之陽氣，性善者也。从心，生聲。」性從生，故「生之謂性」也。○注「凡物」至「同性」○正義曰：「物生同類者」謂人與人同類，物與物同類，物之中則犬與犬同類，牛與牛同類。人與物不同類，則人與物之性不同。趙氏蓋探孟子之指而言之，非告子意也。

孟子曰：「生之謂性也，猶白之謂白與？」注猶見白物皆謂之同白，無異性也？曰：

「然。」注告子曰：然。「白羽之白也，猶白雪之白，白雪之白猶白玉之白與？」注孟子以為羽性輕，雪性消，玉性堅。雖俱白，其性不同。問告子，子以三白之性同邪？疏注「孟子」至「同邪」○正義曰：《文選·雪賦》注引劉熙注云：「孟子以為白羽之性輕，白雪之性消，白玉之性堅。雖俱白，其性不同。問告子，告子以為三白之性同。」與趙氏此注同。告子但言「生之謂性」，未見其非，若如趙氏說，凡同類者性同，則不同類者性不同，是性之不同亦如三白之不同也。故孟子先詰之，得其瑕而後辨。曰：「然。」注告子曰：然。誠以為同

也。「然則犬之性猶牛之性，牛之性猶人之性與？」**注**孟子言犬之性豈與牛同所欲，牛之性豈與人同所欲乎？**疏**注「孟子」至「欲乎」○正義曰：孟子

此章明辨人物之性不同。人之性善，物之性不善。蓋渾人物而言則性有善有不善，專以人言則無不善，故首章不曰「戕賊性以爲仁義」，必明之曰「戕賊人以爲仁義」，次章不曰「性無有不善」而曰「人無有不善」。惟告子亦云「人性之無分於善不善」，性上明標以人，故孟子必辨之曰：「人性之善也，猶水之就下也。」性上亦必明標以「人」，人性之異乎物已無待言，此章則明辨之也。《禮記·樂記》云：「人生而靜，天之性也；感於物而動，性之欲也。物至知知，然後好惡形焉。」人欲即人情，與世相通，全是此情。「己所不欲，勿施於人」，己欲立而立人，己欲達而達人，正以所欲所不欲爲仁恕之本。「人生而靜」，首出人字，明其異乎禽獸。靜者，未感於物也。性已賦之，是天賦之也。感於物而有好惡，此欲也，即出於性。欲即好惡也。「物至知知」二句，申上感物而爲欲也。「知知」者，人能知而又知。禽獸知聲不能知音，一知不能又知。故非不知色，不知好妍而惡醜也；非不知食，不知好精而惡疏也。非不知臭，不知好香而惡腐

也；非不知聲，不知好清而惡濁也。惟人知知，故人之欲異於禽獸之欲，即人之性異於禽獸之性。趙氏以「欲明「性」」，深能知性者矣。葉紹翁《四朝聞見錄》云：「劉黻，字季文，號靜春，其自爲論云：『惟人受天地之中以生，故謂之性，豈物之所得而擬哉？凡混人物而爲一者，必非識性者也。孟子道性善，亦第謂人而已。假如或兼人物而言，則犬之性猶牛之性，牛之性猶人之性，當如告子之言。』」李氏光地《榕村藏稿·自記》云：「孟子所謂性善者，人性也。故既言人性異於犬牛，又言犬馬與我不同類，又言違禽獸不遠，可見所謂性善者，惟指人性爲說。人性所以善，以其陰陽之交，五行之秀氣，孔子所謂「天地之性人爲貴」也。夫以其稟陰陽五行之全而謂之善，則孟子論性已兼氣質矣。謂孟子專以天命言性，遺却氣質，與孔子言「相近」者異，豈其然乎？」戴氏震《孟子字義疏證》云：「性者，分於陰陽五行以爲血氣、心知，品物區以別焉。舉凡既生以後所有之事，所具之能，所全之德，咸以是爲其本，故《易》曰「成之者性也」。氣化生人生物以後，各以類滋生久矣，然類之區別，千占如是也，循其故而已矣。在氣化曰陰陽，曰五行，而陰陽五行之成化也雜糅萬變，是以及其流形，不特品物不同，雖一類之中又復不同。凡分形氣於父母，即爲分於陰陽五行，人物以類滋

生，皆氣化之自然。《中庸》曰：「天命之謂性。」以生而限於天，故曰「天命」。《大戴禮記》曰：「分於道之謂命，形於一之謂性。」分於道者，分於陰陽五行也，一言乎分，則其限之於始，有偏全、厚薄、清濁、昏明之不齊，各隨所分而形於一，各成其性也。然性雖不同，大致以類爲之區別，故《論語》曰「性相近也」，此就人與人近言之也。孟子曰：「凡同類者舉相似也，何獨至於人而疑之？聖人與我同類者。」言同類之相似，則異類之不相似明矣。故詰告子「生之謂性」曰：「然則犬之性猶牛之性，牛之性猶人之性與？」明乎其不可混同言之也。凡有生，即不隔於天地之氣化。陰陽五行之運而不已，天地之氣化也。人物之生生本乎是，由其分而有之不齊，是以成性各殊。是以本之以生，見乎知覺運動也亦殊。氣之自然潛運，飛潛動植皆同，此生生之機肖乎天地者也。而其本受之氣與所資以養之氣則不同。所資以養之氣雖由外而入，大致以本受之氣召之。五行有生克，遇其克之者則傷，甚則死，此可知性之各殊矣。氣運而形不動者，卉木是也；凡有血氣者，皆形能動者也。由其成性各殊，故形質各殊，則其形質之動而爲百體之用者，利用不利用亦殊。知覺云者，如寐而寤曰覺，心之所通曰知。百體皆能覺，而心之知覺爲大。凡相忘於習則不覺，見異焉乃覺。魚相忘於水，

其非生於水者不能相忘於水也，則覺不覺亦有殊致矣。聞蟲鳥以爲候，聞雞鳴以爲辰，彼之感而覺，覺而聲應之，又覺之殊致有然矣，無非性使然也。若夫鳥之反哺，雖鳩之有別，蜂蟻之知君臣，豺之祭獸，獺之祭魚，合於人之所謂仁義者矣，而各由性成，人則能擴充其知至於神明，仁義禮智無不全也。仁義禮智非他，心之明之所止也，知之極其量也。知覺運動者，人物之生，知覺運動之所以異者，人物之殊其性。孟子言「人無有不善」，以人之心知異於禽獸，能不感乎所行之爲善。且其所謂善也初非無等差之善，即孔子所云「相近」，孟子所謂「苟得其養，無物不長，苟失其養，無物不消」，所謂「求則得之，舍則失之。或相倍徙而無算者，不能盡其才者也」，即孔子所云「習」至於「相遠」。「不能盡其才」，言不擴充其心知而長惡遂非也。彼悖乎禮義者亦自知其失也，是人無有不善，以長惡遂非，故性雖善，不乏小人。孟子所謂「牝之反覆」、「違禽獸不遠」即孔子所云「下愚之不移」。孟子曰：「如使口之於味也，其性與人殊，若犬馬之與我不同類也，則天下何者皆從易牙之於味也。」又言「動心忍性」，是孟子矢口言之，無非血氣心知之性。孟子言性，曷嘗岐而二哉？問：凡血氣之屬皆有精爽，而人之精爽可進於神明。《論語》稱「上智與下愚不移」，此不待習而相遠者，雖

習不足以移之，豈下愚之精爽與物等與？曰：生而下愚，其人難與言禮義，由自絕於學，是以不移。然苟畏威懷惠，一旦觸於所畏所懷之人，啓其心而憬然覺悟，往往有之。苟悔而從善，則非下愚矣，加之以學，則日進於智矣。以不移定爲下愚，又往往在知善而不爲，知不善而爲之者，故曰不移，不曰不可移。雖古今不乏下愚，而其精爽幾與物等者亦究異於物，無不可移也。」程氏瑤田《通藝錄·論學小記》云：「有天地然後有天地之性，有人然後有人之性，有物然後有物之性。有天地人物，則必有其質，有其形，有其氣矣。有質有形有氣斯有是性，是性從其質其形其氣而有者也。是故天地位矣則必有元亨利貞之德，是天地之性善也；人生矣則必有仁義禮智之德，是人之性善也。若夫物則不能全其仁義禮智之德，故物之性不能如人性之善也。使以性爲超乎質、形、氣之上，則未有天地之先有此性，是性生天地，天地又具此性以生人物。如是則不但人之性善，即物之性亦安得不善？惟指其質、形、氣而言，故物之性斷乎不能如人性之善。雖虎狼有父子，蜂蟻有君臣，而終不能謂其性之善也。何也？其質形氣，物也，非人也。物與物雖異，均之不能全乎仁義禮智之德也。人之質形氣，莫不有仁義禮智之德，故人之性斷乎其無不善也。然則人之所以異於物

者，異於其質、形、氣而已矣。自不知性者見夫質、形、氣之下愚不移，遂以性爲不能無惡，而不知質、形、氣之成於人者無不善之性也。後世惑於釋氏之說，遂欲超乎質、形、氣以言性，而不知惟質、形、氣之成於人者始無不善之性也。然則人之生也，有五官百骸之形以成人，有清濁、厚薄之氣質不能不與物異者以成人品之高下，即有仁義禮智之德具於質、形、氣之中以成性，性一而已，有善而已矣。如必分言之，則具於質、形、氣者爲有善有惡之性，超乎質、形、氣者爲至善之性。夫人之生也，烏得有一性哉？氣質之性，古未有是名，必區而別之曰此氣質之性也，蓋無解於氣質之有善惡，恐其有累於性善之旨，因別之曰有氣質之性，有理義之性也。雖然，安得謂氣質中有一性，氣質外復有一性哉？且無氣質則無人，無人則無心。性具於心，無心安得有性之善？故溯人性於未生之前，此天地之性，乃天道也。天道亦有於其形其氣，有天之形與氣然後有天道。主於其氣之流行不息者而言之，故曰「一陰一陽之謂道」也。道在於天，生生不窮，因物付物，乃謂之命，故曰「維天之命，於穆不已」也。若夫天人賦稟之際，賦乃謂之命，稟乃謂之性，所賦所稟，並據氣質而言。性具氣質中，故曰「天命之謂性」，豈塊然賦之以氣質而必先諄然命之以性乎？若以賦稟之前

而言性，則是人物同之，犬之性猶牛之性，牛之性猶人之性，何獨至於人而始善也？故以賦稟之前而言性，釋氏之言性也，所謂「如何是父母未生前本來面目」也。是故性善斷以氣質言，主實有者而言之。人之氣有清濁，故有智愚，然人之智固不同於犬牛之智，人之愚亦不同於犬牛之愚。犬牛之愚無仁義禮智之端，人之愚未嘗無仁義禮智之端。是故智者知正其衣冠矣，愚者亦未嘗不欲正其衣冠也；其有不然者，則野人之習於鄉俗者也。然野人亦自有智愚。其智者亦知當正其衣冠，而習而安焉，此習於惡則惡之事也；其愚者，見君子之正其衣冠也，亦有所不安於其心，及欲往見君子，必將正其衣冠焉，此習於善則善之事也。」

章指：言物雖有性，性各殊異；惟人之性，與善俱生。赤子入井，以發其誠。告子一之，知其羸矣。孟子精之，是在其中。

告子曰：「食色，性也。仁，內也，非外也；義，外也，非內也。」**注**人之甘食悅色者，人之性也。仁由內出，義在外也，不從己身出也。**疏**

「食色」至「內也」○正義曰：飲食男女，人之大欲存焉。欲在是，性即在是。人之性如是，物之性亦如是。惟物但知飲食男女而不能得其宜，此禽獸之性所以不善也；人知飲食男女，聖人教之則知有耕鑿之宜，嫁娶之宜，此人之性所以無不善也。人性之善所以異於禽獸者，全在於義。義外非內，是人性中本無義矣；性本無義，將人物之性同。告子始以仁義同比樞樞，則仁亦在性外，此分仁義言之。《管子·戒》篇云：「仁從中出，義從外作。」朱長春云：「仁內義外昉於此。」告子亦有本之言。孟子曰：「何以謂仁內義外也？」**注**孟子怪告子是言也。**疏**「何以」至「外也」○正義曰：《易·文言傳》云：「義以方外。」告子所云「義外」或同此意，故詰之。曰：「彼長而我長之，非有長於我也，猶彼白而我白之，從其白於外也，故謂之外也。」**注**告子言見彼人年長大，故我長敬之。長大者，非在於我也，猶白色見於外也。**疏**注「告子」至「外也」○正義曰：《呂氏春秋·論大》篇云「萬夫之長」，高誘注云：「長，大也。」《禮記·祭義》云：「立敬自長始。」「彼長」之長指彼人之年長，故以「大」釋之。「我長」之長指我因其長而敬之，故以「敬」明之。長大之年在彼不

在我，故云「非有長於我」。彼在我之外，是長大之年在彼，即是外也。「非有長於我」即是從其長於外。「從其白於外」即是非有白於我，互文相例也。近解非有長於我，謂非我先預有長之心。曰：「異。於白馬之白也，無以異於白人之白也，不識長馬之長也，無以異於長人之長與？且謂長者義乎？長之者義乎？」**注**孟子曰：長異於白。白馬白人，同謂之白可也；不知敬老馬無異於敬老人邪？且謂老者為有義乎？將謂敬老者為有義乎？敬老者，己也，何以為外也？**疏**注「長異」至「外也」○正義曰：孔氏廣

森《經學卮言》云：「趙氏讀『異於白』為句。此答告子『猶彼白而我白之』語意，言長之說異於白之說，不相猶也。古人文字，不必拘拘定以白馬與白人相偶。若必謂『白』字當屬『馬』上，或絕『異』字為一句，下乃言人之『於白馬之白』，無以異於白人之白」，文義亦通。先斷之曰「異」，而後申其所以異之處，正同他章每先曰否，而次詳其所以否之實也。」按：孔氏說是也。「異」字斷句，即趙氏長異於白之謂也。「於白馬之白也，無以異於白人之白也」，所謂「白馬白人，同以為白可也」。白無異於白，長則有異於長，此長之所以異於白

也。《儀禮·鄉飲酒禮》云「衆賓之長升」，注云：「長，其老者。」《國語·晉語》云「齊侯長矣」，韋昭注云：「長，老也。」是「長」即「老」也。告子以「長」為義而不知以「長之」為義，故先以白馬、白人，不異別出長馬、長人不同，言長人之長必用我心長之，分明權在長者而不在長者。長之既在我心，則權度悉由中出，安得以義為外乎？長之權全在我，安得云非有長於我也？曰：「吾弟則愛之，秦人之弟則不愛也，是以我為悅者也，故謂之內；長楚人之長，亦長吾之長，是以長為悅者也，故謂之外也。」**注**告子曰：愛從己，則己心悅，故謂之內；所悅喜老者在在外，故曰外。**疏**「吾弟」至「外也」

○正義曰：此告子再申「義外」之說也。孟子詰之以長者義、長之者義，告子固不得云長者義也，故又以弟與長分別言之。義雖屬長之者，乃長之者因長者而生，故仍以為外耳。弟同而愛與不愛異，是愛之權在我，長同則長之無不同，是長之權在彼。理本不足，難以豁然。曰：「耆秦人之炙無以異於耆吾炙，夫物則亦有然者也。然則耆炙亦有外與？」**注**孟子曰：耆炙同

等，情出於中。敬楚人之老與敬己之老亦同，已情往敬之。雖非己炙，同美，故曰「物則有然者」也。如耆炙之意，豈在外邪？言楚秦，喻遠也。

疏注「耆

炙」至「遠也」○正義曰：耆猶愛也。告子以愛不同明長同，孟子則以嗜之同明長同。愛不同，權固由我；耆炙同，情亦出中。嗜同則情出於中，豈長同而情在於外乎？愛之長之，皆是以我為悅。秦人之弟非吾弟，以其親不同，故不同愛；楚人之長非吾長，以其長同，故同長；秦人之炙非吾炙，以其美同，故同嗜。「物亦有然」，謂炙之同美猶長之同長也。知吾所以嗜之者由心辨其美，則知吾所以長之者由心識其長。若謂義之同長為外，則食之同美亦可謂之外乎？告子既知甘食為性，故孟子以嗜炙明之。孟子、告子居齊，故以秦楚為遠。《音義》云：「耆，本亦作嗜。」

章指：言事雖在外，行其事者皆發於中。明仁義由內，所以曉告子之惑也。

孟季子問公都子曰：「何以謂義內也？」**注**季子亦以為義外也。**疏**「孟季子」○正義

曰：翟氏灝《考異》云：「趙注未有『孟』字，而疏直以季任當之，知當時所據經文實亦未有『孟』字。蓋此與任人『食色』之間同在一時，觀兩章文勢畫一，可見也。竊嘗疑季子為孟子弟，有所疑問，何不親詣孟子？孟子亦何不詔之面命而必輾轉於公都子？又疑宋政和五年詔以樂正子享孟子廟，孟仲子封新泰伯，與公孫丑、萬章等十七人皆從祀，雖季孫、子叔之在疑似間者未嘗缺失，而何獨無孟季子？今乃知《孟子》書中本不云『孟季子』也。」趙氏佑《溫故錄》云：「孟仲子為孟子從昆弟而學於孟子，則孟季子當亦其倫，何至執告子之言，重相駁難，全背孟子？殆別一人，故注無文與？」曰：「行吾敬，故謂之內也。」**注**公都子曰：以敬在心而行之，故言內。曰：「鄉人長於伯兄一歲，則誰敬？」**注**季子曰：敬誰也？曰：「敬兄。」**注**公都子曰：當敬兄也。「酌則誰先？」**注**季子曰：酌酒則先酌誰？曰：「先酌鄉人。」**注**公都子曰：當先鄉人。「所敬在此，所長在彼，果在外，非由內也。」**注**季子曰：所敬者，兄也；所酌者，鄉人也。如此，義果在外不由內也。

果猶竟也。**疏**注「果猶竟也」○正義曰：《國語·晉語》

「果喪其田」，韋昭注云：「果猶竟也。」《呂氏春秋·忠廉》篇云「果伏劍而死」，高誘注云：「果，終也。」終與竟義同。「果在外非由內」謂終竟是義外非內也。

公都子不能答，以告孟子。**注**公都子無

以答季子之問。孟子曰：「敬叔父乎？敬弟

乎？彼將曰：敬叔父。曰：弟爲尸則誰

敬？彼將曰：敬弟。子曰：惡在其敬叔父

也？彼將曰：在位故也。子亦曰：在位故

也。庸敬在兄，斯須之敬在鄉人。」**注**孟子使

公都子答季子如此。言弟以在尸位，故敬之；鄉人

在賓位，故先酌之耳。庸，常也。常敬在兄，斯須之

敬在鄉人也。**疏**注「言弟」至「人也」○正義曰：孟子教

公都子折破季子「先酌鄉人」之說，倣其說以難之也。弟不

在尸位，則叔父之敬無時可易；鄉人不在賓位，則伯兄之敬

無時可易。庸敬、斯須之敬，因事轉移，隨時通變，吾心確有

權衡，此真義內也。「庸，常」，《爾雅·釋詁》文。趙氏佑《溫

故錄》云：「古禮之繇可議，莫如祭必用尸。孫爲王父尸，所

使爲尸者於祭者爲子行也而北面事之，則父且敬子，何況兄弟？此不言「子」獨言「弟」，特取與「敬兄」對文。蓋舉《儀

禮》「嗣舉奠之禮」，祭自君夫人、賓三獻既行，則有上嗣舉奠以

獻尸，而後行酬。《既醉》之「朋友」謂衆賓，「君子有孝子」謂

主祭者長嗣也。則尸用衆子或從子，是其弟矣。」顧氏炎武

《日知錄》云：「先王治天下之具，五典五禮五服五刑，其出

乎身加乎民者，莫不本之於心以爲之裁制。親親之殺，尊賢

之等，禮所生也；酌鄉人、敬尸二事皆禮之用也，而莫非義

之所宜。自此道不明，而二氏空虛之教至於搥提仁義，絕滅

禮樂，從此起矣。自宋以下，一二賢智之徒病漢人訓詁之學

得其粗迹，務矯之以歸於內，而達道達德、九經三重之事置

之不論，此真所謂告子未嘗知義者也。董子曰：「宜在我

而後可以稱義，故言義者合我與宜以爲一言。以此操之，義

之言我也。」此與孟子之言相發。」季子聞之，曰：「敬

叔父則敬，敬弟則敬，果在外，非由內也。」**注**

隨敬所在而敬之，果在外。**疏**注「隨敬」至「在外」○正

義曰：季子謂敬因人轉移而中無所主，則前言所辨終竟不

易也。公都子曰：「冬日則飲湯，夏日則飲水，

溫者，中心也。雖隨敬之所在，亦中心敬之。猶飲食從人所欲，豈可復謂之外也？

疏注「湯水」至「外

也」○正義曰：湯水之異猶叔父與弟之異。冬則欲其溫，夏則欲其寒，是飲食從人所欲，非人隨飲食為轉移也。故飲湯飲水，外也；酌其時宜而飲者，中心也。敬叔父敬弟，外也；酌其所在而敬者，中心也。孟子言位，公都子言時，義之變通，時與位而已矣。孟子學孔子之時而闡發乎通變神化之道，全以隨在轉移為用，所謂「集義」也；而告子造「義外」之說不隨人為轉移，故以「勿求於氣」、「勿求於心」為「不動心」，與孟子之道適相反。「義外」之說破，則通變神化之用明矣。毛氏奇齡《四書臆言》云：「嗜食在內與敬長在外正別，此何足辨？亦何足以服告子？」「冬日則飲湯，夏日則飲水」與「嗜秦人之炙」二句相反，使難者曰「冬則飲湯，夏則飲水，果在外，非由內也」，何以解之？嘗以二者問先仲氏。先仲氏曰：「敬長無人我，以長在人耳。今嗜炙亦無人我，此非人也，物也。且其無人我而必長人者，以長在外耳，今嗜炙主愛而亦無人我而惟外是愛，此非長在外，即愛亦在外也。上言長馬之長異乎長人之長，則人物有別矣。此緊承「長楚人之長」二句，愛在外與嗜炙在內大別，此借仁

內以駁義外也。一曰：以在位而易其敬，猶之以在時而易其飲也。夫嗜食甘飲者，愛也。愛亦在外矣。嗜炙是同嗜，此是異飲，嗜炙以仁內駁義外，此以義外駁仁內，不同。」

章指：言凡人隨形，不本其原；賢者達情，知所以然。季子信之，猶若告子；公都受命，然後乃理。

公都子曰：「告子曰：『性無善無不善也。』」

注公都子道告子以為人性在化，無本善不善也。**疏**注「人性在化」○正義曰：化，變化也。或曰：

「性可以為善，可以為不善。是故文武興則民好善，幽厲興則民好暴。」**注**公都子曰：或人以為可教以善不善，亦由告子之意也。故文武聖化之起，民皆喜為善；幽厲虐政之起，民皆好暴亂。或曰：「有性善，有性不善。是故以堯為君而有象，以瞽瞍為父而有舜；以紂為兄之子且以為君，而有微子啓、王子比干。」**注**公都子

曰：或以爲人各有性，善惡不可化移。堯爲君，象爲臣，不能使之爲善；瞽瞍爲父，不能化舜爲惡。紂爲君，又與微子、比干有兄弟之親，亦不能使此二子爲不仁。是亦各有性也。

疏或曰性可「至」比

干。○正義曰：孔氏廣森《經學卮言》云：「王充《論衡·本性》篇云：『周人世碩以爲人性有善有惡。舉人之善性養而致之，則善長；惡性養而致之，則惡長。故世子作《養書》一篇。宓子賤、漆雕開、公孫尼子之徒亦論性情，與世子相出入。』按，公都子此問即其說也。《漢·藝文志》《世子》「十一篇，名碩，陳人，七十子之弟子。《韓非子》八儒有漆雕氏之儒，世子或其徒與？蓋或人二說皆原於聖門而各得其一偏。可以爲善可以爲不善，所謂『性相近，習相遠』也；有性善有性不善，所謂『上智與下愚不移』者也。《古論語傳》曰：『辟如堯舜，禹、稷、契與之爲善則行，鯀、驩兜欲與爲惡則誅，可與爲善，不可與爲惡，是謂上智；桀、紂、龍逢、比干欲與爲善則誅，于莘、崇侯與之爲惡則行，可與爲惡，不可與爲善，是謂下愚。』詳見《漢書·古今人表》，與或人舜象之喻略同。」○注「紂爲君」至「不仁」○正義曰：顧氏炎武《日知錄》云：「以紂爲弟且以爲君，而有微子啓。以紂爲兄

之子且以爲君，而有王子比干。並言之，則於文有所不便，故舉此以該彼，此古人文章之善。」翟氏灝《考異》云：「《陸象山集·與周元忠書》曰：『以紂爲兄之子，此是公都子引當時人言。《史記》微子是紂庶兄，皆帝乙之子也；比干則但云紂之親戚，太史公亦莫知爲誰子也。今據公都所引文義，則是以微子、比干爲帝乙之弟而紂於二人爲兄之子也。此是《孟子》所載，與《史記》不同處。』按，《史記》以微子爲紂庶兄，溯其所原，乃屬《呂氏春秋》。呂氏言宜難深信。殷王兄終弟及者十四，其後之轉及兄子惟沃甲一人，則凡前王子未嗣立者，其孫曾中之嫡系詎不得當元子稱邪？箕子稱微子曰王子，《孟子》書兩稱王子比干，二人稱謂同，或其行輩亦同，故趙氏謂「紂與微、比皆有兄弟之親」，若言於紂父皆兄弟也。此《孟子》所載，與《史記》不同處。象山言最爲超卓。孟門所聞必當實於《史記》，讀《孟子》者似不必因《史記》生疑也。」今日性善，然則彼皆非與？」**注**公都子曰：告子之徒其論如此，今孟子曰人性盡善，然則彼之所言皆非邪？

疏「今日」至「非與」○正義

曰：戴氏震《孟子字義疏證》云：「問：告子言『生之謂性』，言『性無善無不善』，言『食色性也，仁內義外』，朱子以爲同

於釋氏；其「杞柳」「湍水」之喻，又以爲同於荀揚。然則荀揚亦與釋氏同與？曰：否。荀揚所謂性者，古今同謂之性，即後儒稱爲氣質之性者也。但不當遺理義而以爲惡耳。在孟子時，則公都子引或曰「性可以爲善，可以爲不善」，或曰「有性善，有性不善」，言不同而所指之性同。荀子見於聖人生而神明者，不可概之人人，其下皆學而後善，順其自然則流於惡，故以惡加之。論似偏，與「有性不善」合，然謂禮義爲聖心，是聖人之性獨善，實兼公都子兩引或曰之說。揚子見於長善則爲善人，長惡則爲惡人，故曰「人之性也善惡混」，又曰「學則正，否則邪」，與荀子論斷似參差而匪異。韓子言「性之品有上中下三，上焉者善焉而已矣，中焉者可導而上下也，下焉者惡焉而已矣」，此即公都子兩引或曰之說會通爲一。朱子云：「氣質之性固有美惡不同矣，然以其初而言，皆不甚相遠，但習於善則善，習於惡則惡，於是始相遠耳。」人之氣質，相近之中又有美惡，一定，而非習之所能移也。直會通公都子兩引或曰之說解《論語》矣。程子云：「有自幼而善，有自幼而惡，是氣稟有然也。善固性也，然惡亦不可不謂之性也。」此與「有性善，有性不善」合，而於「性可以爲善，可以爲不善」亦未嘗不兼，特彼仍其性之名，此別之曰氣稟耳。程子又云：「人生而靜」以上不容說，纔說性

時便已不是性也。」朱子釋之云：「人生而靜」以上是人物未生時，止可謂之理，未可名爲性。所謂「在天曰命」也。纔說性時便是人生以後，此理已墮形氣中，不全是性之本體矣。所謂「在人曰性」也。」據《樂記》「人生而靜」與「感於物而動」對言之，謂方其未感，非謂人物未生也。《中庸》「天命之謂性」謂氣稟之不齊各限於生初，非以理爲在天在人異其名也。況如其說，是孟子乃追遡人物未生、未可名性之時而曰性善，若就名性之時，已是人生以後，已墮在形氣中，安得斷之曰善？由是言之，將天下古今惟上聖之性不失其性之本體，自上聖而下，語人之性皆失其性之本體。人之爲人，舍氣稟氣質將以何者謂之人哉？是孟子言人無有不善者，程子、朱子言人無有不惡，其視理儼如有物。以善歸理，雖顯遵孟子性善之云，究之孟子就人言之者，程、朱乃離人而空論夫理，故謂孟子「論性不論氣不備」。若不視理如有物，而其見於氣質不善，卒難通於孟子之直斷曰善。立說似同於孟子而實異，似異於荀子而實同也。孟子不曰「性無有不善」而曰「人無有不善」。性者，飛潛動植之通名；^①性善者，論人之性也。如飛潛動植，舉凡品物之性，皆就其氣類

① 「動」，原誤作「種」，今據《孟子字義疏證》改。

別之。人物分於陰陽五行以成性，舍氣類更無性之名。醫家用藥在精辨其氣類之殊，不別其性則能殺人。使曰此氣類之殊者已不是性，良醫信之乎？凡植禾稼卉木，畜鳥獸蟲魚，皆務知其性。知其性者，知其氣類之殊乃能使之碩大蕃滋也。何獨至於人而指夫分於陰陽五行以成性者曰此已不是性也，豈其然哉？自古及今，統人與百物之性以爲言，氣類各殊是也。專言乎血氣之倫，不獨氣類各殊，而知覺亦殊。人以有禮義，異於禽獸，實人之知覺大遠乎物則然，此孟子所謂性善。而荀子視禮義爲常人心知所不及，故別而歸之聖人。程子、朱子見於生知安行者罕觀，謂氣質不得概之曰善，荀揚之言固如是也。特以如是則悖於孟子，故截氣質爲一性，言君子不謂之性；截理義爲一性別而歸之天，以附合孟子。其歸之天不歸之聖人者，以理爲人與我，是理者，我之所無也；以理爲天與我，庶幾湊泊附著，可融爲一。是借天爲說，聞者不復疑於本無，遂信天與之得爲本有耳。彼荀子見學之不可以已，非本無何待於學；而程子、朱子亦見學之不可以已，其本有者何以又待於學？故謂「爲氣質所汙壞」，以便於言本有者之轉而如本無也。於是性之名移而加之理，^①而氣化生人生物適以病性。性譬水之清，因地而汙濁，不過從老莊、釋氏所謂真宰真空者之受形以後昏昧

於欲而改變其說。特彼以真宰真空爲我，形體爲非我，此仍以氣質爲我，難言性爲非我，則惟歸之天與我而後可謂之我有，亦惟歸之天與我而後可爲完全自足之物，斷之爲善。惟使之截然別於我而後雖天與我完全自足，可以咎我之壞之而待學以復之，以水之清喻性，以受汙而濁喻性墮於形氣中汙壞，以澄之而清喻學。水靜則能清，老莊、釋氏之主於無欲，主於寂靜是也。因改變其說爲主敬，爲存理，依然釋氏教人認本來面目，教人常惺惺之法。若夫占聖賢之由博學、審問、慎思、明辨、篤行以擴而充之者，豈徒澄清已哉？程子、朱子於老莊、釋氏既入其室，操其矛矣，然改變其言以爲六經、孔孟如是，按諸荀子差近之，而非六經、孔孟也。」謹按：《禮記·樂記》云：「好惡無節於內，知誘於外，不能反躬，天理滅矣。」注云：「理猶性也。」以性爲理，自鄭氏已言之，非起於宋儒也。理之言分也。《大戴記·本命》篇云：「分於道之謂命。」性由於命即分於道，性之猶理，亦猶其分也。惟其分，故有不同，亦惟其分，故性即指氣質而言。性不妨歸諸理，而理則非真宰真空耳。

孟子曰：「乃若其情，則可以爲善矣，乃

①「加」，原脫，今從沈校據《孟子字義疏證》補。

所謂善也；若夫爲不善，非才之罪也。**注**若，

順也。性與情相爲表裏，性善勝情，情則從之。《孝

經》曰：「此哀戚之情。」情從性也，能順此情使之善

者，真所謂善也；若隨人而強作善者，非善者之善

也。若爲不善者，非所受天才之罪，物動之故也。

疏「乃若」至「罪也」○正義曰：程氏瑤田《通藝錄·論學小

記》云：「孟子以情驗性，總就下愚不移者指出其情以曉人。

如言惻隱、羞惡、辭讓，是非之情爲仁義禮智之端，謂「人皆

有之」者，下愚不移者亦有也。故乍見孺子入井皆有怵惕惻

隱之心，正謂下愚不移者皆是也。故曰：「乃若其情，則

可以爲善。」「乃若」者，轉語也，即從下文「若夫」字生根。

「其情」者，下愚不移者之情，即下文「爲不善者」之情也。曰

「可以爲善」者，可不可未可知之辭，然而未嘗不可以爲善

也。若夫爲不善，乃其後之變態，非其情動之初，本然之才

便如此也。性善之義，至孟子言之，乃真透根之論。即今日

人人可自驗，人人可自信其性之無不善也。孔子曰：「性相

近也，習相遠也。」此專論習也。習與性對言，性自性，習自

習。習相遠，愈見性之相近也。習之相遠也，遠於智愚之相

質而成人之形，其心即具人之性。人與物異，故性無不善也；而不能無智愚之殊者，以氣質不能不分高下厚薄，因而知覺不能不分差等。其上焉者，智也，等而漸下，則不智而愚矣。愚非無其智也，鬱其智而不達則愚。智愚雖分，性未始不相近。「相近」云者，弗無其善之云也。然知覺既有智愚之殊，而薰習復有邪正之異，於是智者習於善則愈遠於愚，即愚者習於善亦可遠於本然之愚；若智者習於惡則可遠於其本然之智，而愚者習於惡則愈遠於智。智有等差，習而移之，下達者可至於下愚。移而智者，性達而性之善見，移而愚者，性不達而性之善不見。夫豈性有不善哉？不見其善而已矣。然則相遠者，因習而移其智愚，非移其相近之性也。智愚每因於習之所移，見人不可不謹所習，而不得以此罪性也。惟夫生而上智之人，知覺獨異，雖與不善者相習，不能移而轉之乎愚。其本非上智而移而至於上智者亦若是則已矣。而生而下愚之人，知覺極庸，雖與善者相習亦不能移而轉之乎智。其本非下愚，而移而至於下愚者亦若是則已矣。其不移者，非其性之善本有加於人，本有損於人也；其移焉者，非其性之善忽有加於人，忽有損於人也。夫性未有不相近者也。何以知其然也？仁義禮智之性，其端見於惻隱、羞惡、辭讓，是非之情者，雖下愚之人未嘗不皆有

也。由是言之，孟子「性善」之說，以情驗性之指，正孔子「性相近」之義疏矣。情，其善之自然而發者也；才，其能求本然之善而無不得者也。性善，故情善而才亦善也。誠意之功在毋自欺，而毋自欺之事曰慎獨。意非私意之謂，乃真好真惡之情發於性者。此真好真惡之情，人皆有之，孟子所謂「乃若其情，可以爲善」者也。」戴氏震《孟子字義疏證》云：

「問：公都子問性，列三說之與孟子言性善異者，乃舍性而論情，偏舉善之端爲證。彼荀子之言性惡也，曰：『今人之性，生而有利焉，順是，故爭奪生而辭讓亡焉；生而有疾惡焉，順是，故殘賊生而忠信亡焉；生而有耳目之欲，有好聲色焉，順是，故淫亂生而禮義文理亡焉。然則從人之性，順人之情，必出於爭奪，合於犯分亂理而歸於暴，故必將有師法之化，禮義之導，然後出於辭讓，合於文理而歸於治。用此觀之，然則人之性惡明矣。』是荀子證「性惡」，所舉者亦情也。安見孟子之得而荀子之失與？曰：人生而後有情，有欲有知，三者血氣心知之自然也。給於欲者，聲色臭味也，而因有愛畏；發乎情者，喜怒哀樂也，而因有慘舒；辨於知者，美醜是非也，而因有好惡。聲色臭味之欲資以養其生，喜怒哀樂之情感而接於物，美醜是非之知極而通於天地鬼神。聲色臭味之愛畏以分，五行生克爲之也；喜怒哀樂

之慘舒以分，時遇順逆爲之也；美醜是非之好惡以分，志慮從違爲之也。是皆成性然也。有是身，故有聲色臭味之欲；有是身，而君臣父子夫婦昆弟朋友之倫具，故有喜怒哀樂之情。惟有欲有情而又有知，然後欲得遂也，情得達也。天下之事，使欲之得遂，情之得達，斯已矣。惟人之知，小之能盡美醜之極致，大之能盡是非之極致。然後遂己之欲者，廣之能遂人之欲；達己之情者，廣之能達人之情。道德之盛，使人之欲無不遂，人之情無不達，斯已矣。欲之失爲私，私則貪邪隨之矣；情之失爲偏，偏則乖戾隨之矣；知之失爲蔽，蔽則差謬隨之矣。不私，則其欲皆仁也，皆禮義也；不偏，則其情必和易而平恕也；不蔽，則其知乃所謂聰明聖知也。孟子舉惻隱、羞惡、辭讓、是非之心，謂之「心」，不謂之「情」。首云「乃若其情」，非性情之情也。孟子不又云乎：「人見其禽獸也，而以爲未嘗有才焉，是豈人之情也哉？」情猶素也，實也。孟子於性，本以爲善，而此云「則可以爲善矣」。可之爲言，因性之等差而斷其善，則未見不可也。下云「乃所謂善也」對上「今日性善」之文。繼之云「若夫爲不善，非才之罪也」。爲猶成也。卒之成爲不善者，陷溺其心，放其良心，至於梏亡之盡，違禽獸不遠者也。言才則性見，言性則才見，才於性無所增損故也。人之性善，故

才亦美，其往往不美，①未有非陷溺其心使然，故曰「非天之降才爾殊也」。才可以始美而終於不美，由才失其才也，不可謂性始善而終於不善。性以本始言，才以體質言也。體質戕壞，究非體質之罪，又安可究其本始哉？」謹按：孟子「性善」之說全本於孔子之贊《易》。伏羲畫卦觀象以通神明之德，以類萬物之情，俾天下萬世無論上智下愚，人人知有君臣父子夫婦，此「性善」之指也。孔子贊之，則云：「利貞者，性情也。六爻發揮，旁通情也。」禽獸之情不能旁通，即不能利貞，故不可以為善。情不可以為善，此性所以不善。人之情則能旁通，即能利貞，故可以為善。情可以為善，此性所以善。禽獸之情何以不可為善？以其無神明之德也。人之情何以可以為善？以其有神明之德也。神明之德在性，則情可旁通；情可旁通，則情可以為善。於情之可以為善，知其性之神明，性之神明，性之善也。孟子於此明揭「性善」之指在其情則可以為善，此融會乎伏羲、神農、黃帝、堯、舜、文王、周公、孔子之言而得其要者也。《說文》心部云：「性，人之陽氣，性善者也。」情，人之陰氣，有欲者。情陰而有欲，故貪淫爭奪，端由此起，荀子謂「從人之性，順人之情，必出於爭奪，合於犯分亂理而歸於暴」，是也，情欲之為不善，「有師法之化，禮義之道，即能出於辭讓，合於文

理而歸於治」，此孟子所謂「可以為善」也。荀子據以為「性惡」，荀子但知《禮》而不通《易》者也，孟子據以為「性善」，孟子深通於《易》而知乎《禮》之原也。孔子以旁通言情，以利貞言性。情利者，變而通之也。以己之情通乎人之情，以己之欲通乎人之欲。己欲立而立人，己欲達而達人。己所不欲，勿施於人。因己之好貨而使居者有積倉，行者有裹糧，因己之好色而使內無怨女，外無曠夫。如是則情通，情通則情之陰已受治於性之陽，是性之神明有以運旋乎情欲而使之善，此情之可以為善也。故以情之可以為善而決其性之神明也。乃性之神明能運旋其情欲，使之可以為善者，才也。孔子贊《易》云：「立天之道曰陰與陽，立地之道曰柔與剛，立人之道曰仁與義。」是為三才。有此才乃能迭用柔剛，旁通情以立一陰一陽之道。才以用言。旁通者情，所以能旁通而窮理盡性以至於命者，才也。通其情可以為善者，才也，不通情而為不善者，無才也。云「非才之罪」猶云「無才之罪」也。蓋人同具此神明，有能運旋乎情，使之可以為善，有不能運旋乎情，使之可以為善。此視乎才與不才，才不才，則智愚之別也。智則才，愚則不才。下愚不移，不才

① 「往往」，原不重，今從沈校據《孟子字義疏證》補。

之至，不能以性之神明運旋情欲也。惟其才不能自達，聖人乃立教以達之。其先民不知夫婦之宜別、上下尊卑之宜有等，此才不能自達也。伏羲教之，無論智愚皆知夫婦之別，皆知上下尊卑之等，所謂通其神明之德也。使性中本無神明，豈教之所能通？民之不知有父但知有母，與禽獸同。聖人教民，民皆知人道之宜定而各爲夫婦，各爲父子，以此教禽獸，仍不知也。人之性可因教而明，人之情可因教而通，禽獸之性雖教之不明，禽獸之情雖教之不通。孔子曰：「五十學《易》，可以無大過矣。」可以無大過，即是可以爲善。性之善全在情可以爲善，情可以爲善謂其能由不善改而爲善。孟子以人能改過爲善，決其爲性善。伏羲之前，人同禽獸，其貪淫爭奪，思之可見，而伏羲能使之均歸於倫常之中。瞽瞍之頑，象之傲，亦近乎下愚矣，而舜能使之底豫。信乎，無不可以爲善之情也！「可以爲善」原不謂順其情即善，「乃若」，宜如程氏瑤田之說，趙氏以「順」釋「若」，非其義矣。○注「若順」至「性也」○正義曰：「若，順」，《爾雅·釋言》文。情發於外，性藏於內，故相表裏。性之善不爲情欲所亂，性能運情，情乃從性，則情可爲善。引《孝經》者，《喪親》章第十八，云：「孝子之喪親也，哭不偯，禮無容，言不文，服美不安，聞樂不樂，食旨不甘，此哀戚之情也。」趙

氏謂孝子仁於其親，由於天性，而情即從其性之仁爲哀戚，是「性善勝情，情則從之」之證也。趙氏以「若其情」爲「順其情」，故反言不順其情是「隨人而強作善者」，則情非從性矣。惻隱之心，人皆有之；羞惡之心，人皆有之；恭敬之心，人皆有之；是非之心，人皆有之。惻隱之心，仁也；羞惡之心，義也；恭敬之心，禮也；是非之心，智也。仁義禮智非由外鑠我也，我固有之也，弗思耳矣。故曰：「求則得之，舍則失之。」或相倍蓰而無算者，不能盡其才者也。注仁義禮智，人皆有其端懷之於內，非從外消鑠我也。求存之，則可得而用之；舍縱之，則亡失之矣。故人之善惡或相倍蓰，或至於無算者，不得相與計多少，言其絕遠也。所以惡乃至是者，不能自盡其才性也。故使有惡人，非天獨與此人惡性；其有下愚不移者，譬如被疾不成之人，所謂童昏也。疏注「仁義」至「我也」○正義曰：前以情之可以爲善明性善，此又以心之有惻隱、羞惡、恭敬，是非明性善也。惟性有神明之德，所以心有是

非，心有是非，則有惻隱、羞惡、恭敬矣。戴氏震《孟子字義疏證》云：「問：孟子言性舉仁義禮智四端，與孔子之舉智愚有異乎？」曰：人之相去，遠近明昧，其大較也，學則就其昧焉者牖之明而已。人雖有智有愚，大致相近，而智愚之甚遠者蓋鮮。智愚者，遠近差等殊科而非相反，善惡則相反之名，非遠近之名。知人之成性其不齊在智愚，亦可知任其愚而不學不思乃流為惡。愚非惡也，人無有不善明矣。舉智而不及仁禮義者，智於天地、人物、事為咸足以知其不易之則，仁有不至，禮義有不盡，可謂不易之則哉？發明孔子之道者，孟子也，無異也。」《說文》金部云：「鑠，銷金也。」《國語·周語》云「衆口鑠金」，《史記索隱》引賈逵云：「鑠，消也。」「消鑠我」猶云戕賊人。以仁義禮智為由外鑠我，當時蓋有此言，如莊子言「純樸不殘孰為仁」，故孟子直斥其非而以為我固有之也。孔氏廣森《經學卮言》云：「《爾雅·釋詁》云：『鑠，美也。』仁義禮智得之則美，失之則醜。然美在其中，非由外飾成我美者也。所以不願人之文繡也。」○注「譬如」至「昏也」○正義曰：《國語·晉語》「胥臣曰：『昏不可使謀』」，韋昭注云：「『昏，無知，昏，闇亂也。』」此與蓬條、戚施、焦僂、侏儒、矇瞍、鬻瘡、聾聵同為八疾。^①又云：「質將善而賢良贊之，則濟可竣也。若有違質，教將不入，其何善

之為？」此言僅昏之人不可教之以善，故趙氏引以證下愚不移也。《周禮·秋官·司刺》「三赦曰：『憊愚』」，注云：「憊愚，生而癡騃童昏者。」《禮記·禮器》云：「體不備，君子謂之不成人。」生而癡騃童昏既列於八疾，則與體不備同，故為「被疾不成之人」。趙氏以下愚為此癡騃童昏之人，則是不移由有疾所以不移也，無此疾者固無不可移者矣。允與「性善」之指合。「譬如」者，趙氏自謙未定。《詩》曰：「天生蒸民，有物有則。民之秉夷，好是懿德。」孔子曰：「為此詩者，其知道乎！故有物必有則，民之秉夷也，故好是懿德。」^②注《詩》《大雅·蒸民》之篇。言天生衆民，有物則有所法則。人法天也，民之秉夷，夷，常也。常好美德。孔子謂之知道。故曰人皆有善也。^③疏注「詩大」至「善也」○正義曰：《詩》在《大雅·蒸民》篇第一章。蒸，《詩》作烝，夷，《詩》作彝。傳云：「烝，衆，物，事，則，法，彝，常，懿，美也。」箋云：「秉，執也。天之生衆民，其性有物象，謂五行仁義禮智信也，其情有所法，謂喜怒哀樂好惡也。然而民

① 「聾聵」，原脫，今從沈校據《國語》補。

所執持有常道，莫不好有美德之人。」趙氏義與毛同。不釋

「秉」義，當亦同箋訓執持也。趙氏既以「法」釋「則」，又以「有物有則」爲「人法天」，是以有物指天，有則指人之法天，蓋亦如箋「物象」之說。性爲天所命，性之有仁義禮智信，即象天之木金火土水，故以性屬天。以六情從五性，是以人之情法天之性，即前「性善勝情，情則從之」之義也。程氏瑤田《通藝錄·論學小記》云：「天分以與人而限之於天者謂之命，人受天之所命而成之於己者謂之性。此限於天而成於己者，及其見於事爲，又有無過無不及之分以爲之則。是則也，以德之極地言之，謂之中庸；以聖人本諸人之四德之性，緣於人情而制以與人遵守者言之，謂之威儀之禮。蓋即其限於天成於己者之所不待學而可知，不待習而可能者也；亦即其限於天成於己者之所學焉而愈知，習焉而愈能者也，是之謂性善。」孔子釋《詩》增必字，也字，故字，而性善之義見矣。

章指：言天之生人，皆有善性；引而趨之，善惡異衢。高下相懸，賢愚舛殊，尋其本者，乃能一諸！
疏「善惡異衢」○正義曰：

《荀子·勸學》篇云「行衢道者不至」，^①楊倞注云：「衢

道，兩道也。今秦俗猶以兩爲衢，古之遺言與？」

孟子曰：「富歲，子弟多賴；凶歲，子弟多暴。非天之降才爾殊也，其所以陷溺其心者然也。」**注**富歲，豐年也；凶歲，飢饉也。子弟，凡人之子弟也。賴，善；暴，惡也。非天降下才性與之異，以飢寒之阨陷溺其心。使爲惡者也。**疏**注

「富歲豐年也」○正義曰：《論語·顏淵》篇「富哉言乎」，《集解》引孔安國云：「富，盛也。」《呂氏春秋·當染》篇「弟子彌豐」，高誘注云：「豐，盛也。」是富即豐也。故「富歲」爲「豐年」。○注「賴善」○正義曰：《呂氏春秋·離俗》篇「苟可得已，則必不之賴」，高誘注云：「賴，利也。一曰善也。」段氏玉裁《說文解字注》云：「贏，賈有餘利也。賴，贏也。」《高帝紀》「始大人常以臣無賴」，應劭曰：「賴者，恃也。」晉灼曰：「許慎曰：賴，利也。無利人於家也。或曰：江淮之間謂小兒多詐狡獪爲亡賴。」按，今人云無賴者，謂其無衣食致然耳。《方言》云：「賴，讎也。南楚之外曰賴。賴，取也。」王

①「道」，原誤作「路」，今從沈校據《荀子》改。

氏念孫《廣雅疏證》云：「《衛策》云：『爲魏則善，爲秦則不賴矣。』《小雅·采芣》篇『亦是戾矣』，毛傳云：『戾，至也。』正義云：『明王之德能如此，亦是至美矣。』鄭注《棗誓》云：『至猶善也。』是戾與善同義。又鄭注《大學》云：『戾之言利也。』利與善義亦相近，故利謂之戾，亦謂之賴，善謂之賴，亦謂之戾。戾，賴語之轉耳。」阮氏元云：「富歲子弟多賴，賴即嬾。按，《說文》女部云：『嬾，懈也。從女，賴聲。一曰賢也。』貝部云：『賴，贏也。從貝，刺聲。』《禮記·月令》云：『不可以贏』，注云：『贏猶解也。』解即懈。贏，賴、解同義。然則『富歲子弟多賴』謂其粒米狼戾，民多懈怠。《月令》『不可以贏』即是不可以嬾，而『子弟多賴』即是子弟多懈也。賴與暴俱是陷溺其心。若謂豐年多善，凶年多惡，未聞溫飽之家皆由禮者矣。」阮氏說是也。○注「非天」至「惡者也」○正義曰：戴氏震《孟子字義疏證》云：「才者，人與百物各如其性以爲形質而知能遂區以別焉，孟子所謂『天之降才』是也。氣化生人生物，據其限於所分而言謂之命，據其爲人物之本始而言謂之性，據其體質而言謂之才。由成性各殊，故才質亦殊。才質者，性之所呈也。舍才質，安觀所謂性哉？以人物譬之器，①才則其器之質也。分於陰陽五行而成性各殊，則才質因之而殊。猶金錫之在冶，冶金以爲

器，則其器金也；冶錫以爲器，則其器錫也。品物之不同如是矣。從而察之，金錫之精良與否，其器之爲質，一如乎所冶之金錫。一類之中又復不同如是矣。爲金爲錫，及其金錫之精良與否，性之喻也；其分於五金之中，而器之所以爲器即於是乎限，命之喻也；就器而別之，孰金孰錫，孰精良與孰否，才之喻也。故才之美惡於性無所增，亦無所損。夫金錫之爲器，一成而不變者也。人又進乎是。自聖人而下，其等差凡幾？或疑人之才非盡精良矣，而不然也。猶金之五品，而黃金爲貴，雖其不美者，②莫與之比貴也，況乎人皆可以爲賢爲聖也。後儒以不善歸氣稟。孟子所謂性，所謂才，皆言乎氣稟而已矣。其稟受之全，則性也；其體質之全，則才也。稟受之全無可據以爲言，如桃杏之性全於核中之白，形色臭味無一弗具而無可見，及萌芽甲坼，根幹枝葉，桃與杏各殊，由是爲華爲實，形色臭味無不區以別者。雖性則然，皆據才見之耳。成是性，斯爲是才。別而言之，曰命，曰性，曰才，合而言之，是謂天性。故孟子曰：「形色，天性也。惟聖人然後可以踐形。」人物成性不同，故形色各殊。

①「人」，原脫，今從沈校據《孟子字義疏證》補。

②「者」，原誤作「也」，今從沈校據《孟子字義疏證》補。

人之形，官器利用大遠乎物，然而於人之道不能無失，是不踐此形也；猶言之而形不逮，是不踐此言也。踐形之與盡性，盡其才，其義一也。」趙氏以「與之異」釋「爾殊」，蓋以「爾」字爲助詞，「與之異」但釋「殊」字也。王氏引之《經傳釋詞》云：「爾猶如此也。『非天之降才爾殊也』，言非天之降才如此其異也。凡後人言『不爾』、『乃爾』、『果爾』、『聊復爾耳』者，並與此同義。」今夫粦麥，播種而耨之，其地同，樹之時又同，淳然而生，至於日至之時，皆熟矣。雖有不同，則地有肥磽，雨露之養，人事之不齊也。

注 粦麥，大麥也。《詩》云：「貽

我來粦。」言人性之同，如此粦麥，其不同者，人事雨澤有不足，地之有肥磽耳。磽，薄也。

疏 播種而

耨之。○正義曰：《說文》木部云：「耨，摩田器也。從木，憂聲。《論語》曰：『耨而不輟。』」段氏玉裁《說文解字注》云：

「《五經文字》曰：『經典及《釋文》皆作耨。鄭曰：耨，覆種也。與許合。許以物言，鄭以人用物言。』《齊語》：『深耕而疾耨之，以待時雨』，韋曰：『耨，摩平也。』《齊民要術》曰：『耕荒畢，以鐵齒鋤耨再徧杷之。漫擲黍稷，勞亦再徧。』即鄭所謂『覆種也』。許云摩田，當兼此二者。賈又曰：『春耕尋手

勞，秋耕待白背。』勞，古曰耨，今曰勞。勞，郎到切，《集韻》作榜。謹按：榜，今俗所謂抄也。土初耕，尚粗成塊，以鐵齒杷之則細，屢杷則愈細，所謂抄也。先杷其土令細，是摩平也；既布種又杷之，是覆種也。摩平、覆種二事，而皆用此耨。覆種亦是摩田，而摩田不皆覆種也。此「播種而耨」，當是覆種。《論語》「耨而不輟」，方在耦耕之後，蓋始摩平其粗塊，不必即覆種矣。《音義》引丁云：「音憂，壅苗根也。」時方播種，尚未生苗。種已生苗，詎容摩平？丁說非是。○「至於日至之時皆熟矣」○正義曰：孔氏廣森《經學卮言》云：「日至之時謂仲夏日至。《管子·輕重乙》曰：『九月種麥，日至而穫。』《輕重己》曰：『以春日始至始，數九十二日，謂之夏至而麥熟。』」趙氏佑《溫故錄》云：「孟子兩言日至：『千歲之日至』，冬日至也；『至於日至之時』，夏日至也。割麥無過夏至，《月令》『孟夏之月，麥秋至』，乃大概言之。然有先四月熟者，有後四月熟者，要及夏至則無不熟，故言『皆熟』。乃舉最遲者以盡其餘，而下別言不同。此時有不熟，則無可復待，有盡去爲晚禾地矣。」○注「粦麥」至「來粦」○正義曰：程氏瑶田《通藝錄·九穀考》云：「來，小麥也。粦，大麥也。王禎《農書》載《雜陰陽書》曰：『大麥生於杏，二百日秀，秀後五十日成。小麥生於桃，二百一十日秀，秀

後六十日成。』生於杏、生於桃，並指秀時也。《農桑輯要》載崔寔曰：「凡種大小麥，得白露節可種薄田，秋分種中田，後十日種美田。」二書言大小麥，皆宿麥也。《漢書·武帝紀》注師古曰：「秋冬種之，經歲乃成，故云宿麥。」《呂氏春秋》：「孟夏之昔，殺三槩而種大麥。」高誘注：「大麥，旋麥也。」按，旋之言疾也，與宿麥對言，是謂大麥爲春麥。《玉篇》：「𥽿，春麥也。」蓋同之矣。余居北方，見種春麥者多矣，然皆小麥也。崔寔曰：「正月可種春麥，盡二月止。」亦不分大小麥。《廣志》：「旋麥，三月種，八月熟，出西方。」似亦言小麥而非高氏注之旋麥。《玉篇》：「𥽿，大麥也。」今考崔寔言種大小麥並以白露節爲始，惟𥽿麥早晚無常。是大小麥之外復有𥽿麥。說者以𥽿爲大麥類，然則𥽿爲大麥之別種，非謂大麥盡名𥽿也。王氏念孫《廣雅疏證》云：「《釋草》：『大麥，𥽿也。』《周頌·思文》云『貽我來牟』，傳云：『牟，麥也。』箋云：『武王渡孟津後五日，火流爲烏，五至以穀俱來，此謂貽我來牟。』又《臣工》『於皇來牟』，箋云：『於美乎赤烏，以牟麥俱來。』是不以來爲麥也。《漢書·劉向傳》引《詩》作『釐𥽿』，而釋之云：『釐𥽿，麥也。始自天降。』則來、牟俱是麥，於文義爲允也。《說文》云：『來，周所受瑞麥。來𥽿，一來二縫，象芒刺之形。天所來也，故爲行來之麥。』

來。』引《詩》云：「貽我來𥽿。」又云：「齊人謂麥爲稂。」稂與來通。又云：「𥽿，來𥽿，麥也。」則亦以來𥽿爲麥，與劉向同，但不言大小耳。李善注《典引》，引《韓詩》薛君《章句》云：「𥽿，大麥也。」𥽿與𥽿同。來𥽿對文，𥽿爲大則來爲小矣。古者大爲牟，《御覽》引《淮南子》注云：「牟，大也。」大麥故稱牟也。○注「𥽿薄也」○正義曰：《說文》石部云：「𥽿，堅也。」「𥽿，𥽿也。」「𥽿，𥽿也。」「毛詩·王風》『丘中有麻』，傳云：『丘中境塿之處。』境塿即𥽿𥽿也。《一切經音義》引《孟子注》云：「𥽿𥽿，薄瘠地也。」又引《通俗文》云：「物堅硬謂之𥽿𥽿。」蓋地土肥則和柔，堅硬則五穀不生，故薄也。故凡同類者舉相似也，何獨至於人而疑之？聖人，與我同類者。注聖人亦人也，其相覺者，以心知耳。蓋體類與人同，故舉相似也。故龍子曰：「不知足而爲屨，我知其不爲黃也。」屨之相似，天下之足同也。注龍子，古賢者也。雖不知足大小，作屨者猶不更作黃。黃，草器也。以屨相似，天下之足略同故也。疏注「黃草器也」○正義曰：《禮記·曲禮》云：「天子之六工，曰土工、金工、石工、木工、獸工、草工，典制六材。」注云：「惟草工職

亡。」蓋謂作萑葦之器。黃爲草器，蓋即草工所職，凡葦竹所編者是也。《論語·憲問》篇有「荷黃」，《太平御覽》引鄭氏注云：「黃，草器也。」《說文》艸部云：「黃，艸器也。與，古文黃，象形。《論語》曰：『有荷與而過孔氏之門。』」又《子罕》篇云「譬如爲山，未成一簣」，《集解》引包曰：「簣，上籠也。」黃與黃通。草器蓋即盛土之籠，於與之象形可知其狀矣。《晉書音義》云：「黃，本作『蒯』。黃本與蒯通，《檀弓》『杜黃』，《左傳》作『屠蒯』是也。今俗呼竹籃之小者爲『蒯子』，猶古之遺稱也。口之於味，有同耆也。易牙，先得我口之所耆者也。如使口之於味也，其性與人殊若犬馬之與我不同類也，則天下何耆皆從易牙之於味也？至於味，天下期於易牙，是天下之口相似也。」**注**人口之所耆者相似，故皆以易牙爲知味，言口之同也。**疏**「口之」至「似也」○正義曰：傳十七年《左傳》云：「雍巫有寵於衛共姬，因寺人貂以薦羞於公。」注云：「雍巫，雍人名巫，即易牙。」孔氏正義云：「此人爲雍，宜名巫而字易牙也。」《戰國策·魏策》云：「齊桓公夜半不寐，易牙乃煎熬燔炙，和調五味而進之，桓公食之而飽，至旦不覺，曰：『後世

必有以味亡其國者。』此易牙知味之事也。孟子此章特於口味指出性字，可知性即在飲食男女。曰「其性與人殊」，可知人性不同於犬馬。同一飲食而人能嗜味，鳥獸不知嗜味，推之，同一男女，人能好色，鳥獸不知好色。惟人心最靈，乃知嗜味好色；知嗜味好色，即知孝弟忠信禮義廉恥。理義之悅心猶芻豢之悅口，悅心是性善，悅口亦是性善。惟耳亦然。至於聲，天下期於師曠，是天下之耳相似也。」**注**耳亦猶口也。天下皆以師曠爲知聲之微妙也。惟目亦然。至於子都，天下莫不知其姣也。不知子都之姣者，無目者也。**注**目亦猶耳也。子都，古之姣好者也。《詩》云：「不見子都，乃見狂且。」儻無目者，乃不知子都好耳。言目之同也。**疏**注「子都」至「狂且」○正義曰：引《詩》在《鄭風·山有扶蘇》。毛傳云：「子都，世之美好者也。」孔氏正義云：「都謂美好而閑習於禮法。」然則孔氏不以子都爲人名。乃孟子深於《詩》，其稱子都正本於《詩》，而與易牙、師曠並舉，則子都實有其人矣。趙氏引《詩》以證是也。閻氏若璩《釋地續》云：「子都，古之美人也。亦未詳爲男爲女。杜氏注《左》有之，於隱十一年《傳》云：『子都，鄭

大夫公孫閱。」故《鄭風》當昭公時，遂以為國中美男之通稱，曰「不見子都」。《荀子·非相》篇云：「古者桀紂，長巨姣美，天下之傑也。」姣與美連文，是姣即美。又《成相》篇云「君子由之佼以好」，佼亦姣也。《衛風·碩人》箋云：「長麗佼好。」《齊風·還》篇「子之昌兮」，毛傳云：「昌，佼好貌。」《釋文》皆云：「佼，本作姣。」是「姣」即「好」也。《呂氏春秋·達鬱》篇云「侍者曰公姣且麗」，高誘注云：「姣、麗，皆好貌也。」《韓詩外傳》云：「以為姣好邪，則太公年七十二，顰然而齒墮矣。」《鹽鐵論·殊路》篇云：「毛嬙，天下之姣人也。」故曰：口之於味也，有同耆焉；耳之於聲也，有同聽焉；目之於色也，有同美焉。至於心，獨無所同然乎？

注言人之心性皆同也。

疏「至於心獨無所同然乎」○正義曰：毛氏奇齡《贍言補》云：「至於心獨無所同然，承上「同耆」、「同聽」言，謂同如是耳。與前「惟耳亦然」諸然字相應。」心之所同然者，何也？謂理也，義也。聖人先得我心之所同然耳。故理義之悅我心，猶芻豢之悅我口。」

注心所同耆者，義理也。理者，得道之理。聖人先

得理義之要耳。理義之悅心，猶芻豢之悅口，誰不同也？草食曰芻，穀食曰豢。

疏「心之」至「我口」○

正義曰：戴氏震《孟子字義疏證》云：「當孟子時，天下不知理義之為性，害道之言紛出以亂先王之法，是以孟子起而明之。人物之生，類至殊也。類也者，性之大別也。孟子曰：

「凡同類者舉相似也，何獨至於人而疑之？聖人，與我同類者。」詰告子「生之謂性」，則曰：「大之性猶牛之性，牛之性猶人之性與？」蓋孟子道性善，非言性於同也；人之性相近，胥善也。明理義之為性，所以正不知理義之為性者也。是故理義，性也。由孟子而後，求其說而不得，則舉性之名而曰理也，是又不可。耳之於聲也，天下之聲，耳若其符節也；目之於色也，天下之色，目若其符節也；鼻之於臭也，天下之臭，鼻若其符節也；口之於味也，天下之味，口若其符節也。耳目鼻口之官，接於物，而心通其則。心之於理義也，天下之理義，心若其符節也。是皆不可謂之外也，性也。耳能辨天下之聲，目能辨天下之色，鼻能辨天下之臭，口能辨天下之味，心能通天下之理義。①人之才質得於天，若是

①「通」，原作「動」，今據《原善》改。

其全也。孟子曰：「非天之降才爾殊也。」曰：「乃若其情，則可以爲善矣，乃所謂善也。若夫爲不善，非才之罪也。」惟據才質而言，始確然可以斷人之性善。人之於聖人也，其才非如物之與人異。物不足以知天地之中正，是故無節於內，各遂其自然，斯已矣；人有天德之知，能踐乎中正，其自然則協天地之順，其必然則協天地之常。莫非自然也，物之自然不足語於此。孟子道性善，察乎人之才質所自然有節於內之謂善也。告子謂「性無善無不善」，不辨人之大遠乎物，概之以自然也。告子所謂無善無不善也者，靜而自然，其神沖虛，以是爲至道，及其動而之善之不善，咸目爲失於至道，故其言曰「生之謂性」。及孟子詰之，非豁然於孟子之言而後語塞也，亦窮於人與物之靈蠢殊絕，犬牛類又相絕，遂不得漫以爲同耳。主才質而遺理義，荀子、告子是也。荀子以血氣心知之性必教之理義，逆而變之，故謂「性惡」而進其勸學修身之說。告子以上焉者無欲而靜，全其無善無不善，是爲至矣；下焉者理義以梏之，使不爲不善。荀子二理義於性之事能，儒者之未聞道也；告子貴性而外理義，異說之害道者也。凡遠乎《易》、《論語》、《孟子》之書者，性之說大致有三：以耳目百體之欲爲說，謂理義從而治之者也；以理心之有覺爲說，謂其神獨先，沖虛自然，理欲皆後也；以理

爲說，謂有欲有覺，人之私也。三者之於性也，非其所去，貴其所取。彼自貴其神，以爲先形而立者，是不見於精氣爲物，秀發乎神也。以有形體則有欲，而外形體，一死生，去情欲以安其神，寔是非、絕思慮以苟語自然。不知歸於必然，是爲自然之極致。動靜胥得，神自安也。自孟子時，以欲爲說，以覺爲說，紛如矣。孟子正其遺理義而已矣。心得其常，耳目百體得其順，純懿中正，如是謂之理義。故理義非他，心之所同然也。何以同然？心之明之所止，於事情區以別焉無幾微爽失，則理義以名。專以性屬之理而謂壞於形氣，是不見於理之所由名也。」^①問：孟子云：「心之所同然者謂理也，義也。聖人，先得我心之所同然耳。」是理又以心言，何也？曰：心之所同然始謂之理，謂之義，則未至於同然，存乎其人之意見，非理也，非義也。凡人以爲然，天下萬世皆曰是不可易也，此之謂同然。舉理以見心能區分，舉義以見心能裁斷。分之各有其不易之則，名曰理；如斯而宜，名曰義。是故明理者，明其區分也；精義者，精其裁斷也。不明，往往界於疑似而生惑；不精，往往雜於偏私而害道。求理義而智不足者也，故不可謂之理義。自非聖人，

① 此條引文實出戴震《原善》。

鮮能無蔽。有蔽之深，有蔽之淺者。人莫患乎蔽而自智，任其意見，執之爲理義。吾懼求理義者以意見當之，孰知民受其禍之無所終極也哉！「六經、孔孟之言以及傳記羣籍，理字不多見。今雖至愚之人，忤戾恣睢其處斷一事，責詰一人，莫不輒曰理者，自宋以來始相習成俗，則以理爲如有物焉，^①得於天而具於心，因以心之意見當之也。於是負其氣，挾其勢位，加以口給者理伸，力弱氣慴，口不能道辭者理屈。嗚呼！其孰謂以此制事，以此制人之非理哉？即其人廉深自持，心無私慝，而至於處斷一事，責詰一人，憑在己之意見，是其所是而非其所非，方自信嚴氣正性，嫉惡如讎，而不知事情之難得，是非之易失於偏，往往人受其禍，已且終身不寤，或事後乃明，悔已無及。天下智者少而愚者多。以其心知明於衆人，則共推之爲智，其去聖人甚遠也。以衆人與其所共推爲智者較其得理，則衆人之蔽必多，以衆所共推爲智者與聖人較其得理，則聖人然後無蔽。凡事至而心應之，其斷於心，輒曰理如是，古聖賢未嘗以爲理也。不惟古聖賢未嘗以爲理，昔之人異於今人之一啓口而曰理，其亦不以爲理也。昔人知在己之意見不可以理名，而今人輕言之。夫以理爲如有物焉，得於天而具於心，未有不以意見當之者也。今使人任其意見則謬，使人自求其情則得。

子貢問曰：「有一言而可以終身行之者乎？」子曰：「其恕乎？己所不欲，勿施於人。」《大學》言治國平天下，不過曰「所惡於上，毋以使下，所惡於下，毋以事上」，以位之卑尊言也。「所惡於前，毋以先後，所惡於後，毋以從前」，以長於我與我長言也。「所惡於右，毋以交於左，所惡於左，毋以交於右」，以等於我言也。曰「所不欲」，^②曰「所惡」，不過人之常情，不言理而理盡於此。惟以情絜情，故其於事也，非心出一意見以處之，苟舍情求理，其所謂理，無非意見也。未有任其意見而不禍斯民者。」問：以意見爲理，自宋以來莫敢致斥者，謂理在人心故也。今日理在事情，於心之所同然，洵無可疑矣。孟子舉以見人性之善，其說可得聞與？曰：孟子言「口之於味也有同嗜焉，耳之於聲也有同聽焉，目之於色也有同美焉。至於心，獨無所同然乎」，明理義之悅心，猶味之悅口，聲之悅耳，色之悅目之爲性。味也，聲也，色也在物，接於我之血氣；理義在事，而接於我之心知。血氣心知有自具之能：口能辨味，耳能辨聲，目能辨

①「則以」，原誤作「然則」，今從沈校據《孟子字義疏證》改。

②「不」，原脫，今從沈校據《孟子字義疏證》補。

色，心能辨理義。味與聲色，在物不在我，接於我之血氣，能辨之而悅之，其悅者必其尤美者也；理義在事情之條分縷析，接於我之心知，能辨之而悅之，其悅者必其至是者也。子產言「人生始化曰魄，既生魄，陽曰魂」，曾子言「陽之精氣曰神，陰之精氣曰靈。神靈者，品物之本也」。蓋耳之能聽，目之能視，鼻之能臭，口之知味，魄之爲也，所謂靈也，陰主受者也；心之精爽，有思輒通，^①魂之爲也，所謂神也，陽主施者也。主施者斷，主受者聽，故孟子曰：「耳目之官不思，心之官則思。」是思者，心之能也。精爽有蔽隔而不能通之時，及其無蔽隔，無弗通，乃以「神明」稱之。凡血氣之屬皆有精爽。其心之精爽，鉅細不同，如火光之照物。光小者，其照也近，所照者不謬也，所不照則疑謬承之。不謬之謂得理。其光大者，其照也遠，得理多而失理少。且不特遠近也，光之及又有明闇，故於物有察有不察，察者盡其實，不察斯疑謬承之。疑謬之謂失理。失理者限於質之味，所謂愚也，惟學可以增益其不足而進於智，益之不已，至於其極，如日月有明，容光必照，則聖人矣。此《中庸》「雖愚必明」，《孟子》「擴而充之之謂聖人」。神明之盛也，其於事靡不得理，斯仁義禮智全矣。故理義非他，所照所察者之不謬也。何以不謬？心之神明也。人之異於禽獸者，雖同有精爽而

人能進於神明也。理義豈別若一物，求之所照所察之外？而人之精爽能進於神明，豈求諸氣稟之外哉？「問：後儒以人之有嗜欲出於氣稟，而理者，別於氣稟者也。今謂心之精爽，學以擴充之，進於神明，則於事靡不得理，是求理於氣稟之外者非矣。孟子專舉理義以明性善，何也？」曰：古人言性但以氣稟言，未嘗明言理義爲性，蓋不待言而可知也。至孟子時，異說紛起，以理義爲聖人治天下之具，^②設此一法以強之從，害道之言皆由外理義而生。人徒知耳之於聲，目之於色，鼻之於臭，口之於味之爲性，而不知心之於理義亦猶耳目鼻口之於聲色臭味也。故曰「至於心獨無所同然乎」，蓋就其所知以證明其所不知，舉聲色臭味之欲歸之耳目鼻口，^③舉理義之好歸之心，皆內也，非外也。比而合之以解天下之感，俾曉然無疑於理義之爲性。害道之言，庶幾可以息矣。孟子明人心之通於理義，與耳目鼻口之通於聲色臭味咸根於性，非由後起。後儒見孟子言性則曰理義，則曰仁義禮智，不得其說，遂於氣稟之外增一理義之性歸之孟

① 「輒」，原誤作「輒」，今據《孟子字義疏證》改。

② 「之」，原脫，今從沈校據《孟子字義疏證》補。

③ 「鼻口」，原誤倒，今據《孟子字義疏證》改。

子矣。」問：聲色臭味之欲亦宜根於心，今專以理義之好爲根於心，於「好是懿德」固然矣，抑聲色臭味之欲徒根於耳目鼻口與？心，君乎百體者也。百體之能皆心之能也，豈耳悅聲，目悅色，鼻悅臭，口悅味，非心悅之乎？曰：否。心能使耳目鼻口，不能代耳目鼻口之能。彼其能者各自具也，故不能相爲。人物受形於天地，故恒與之相通。盈天地之間，有聲也，有色也，有臭也，有味也。舉聲色臭味，則盈天地之間者無或遺矣。外內相通，其開竅也，是爲耳目鼻口。五行有生尅，生則相得，尅則相逆，血氣之得其養，失其養繫焉。資於外足以養其內，此皆陰陽五行之所爲，外之盈天地之間，內之備於吾身，外內相得無間而養道備。「民之質矣，日用飲食」，自古及今以爲道之經也。血氣各資以養，而開竅於耳目鼻口以通之。既於是通，故各成其能而分職司之。孔子曰：「少之時，血氣未定，戒之在色；及其壯也，血氣方剛，戒之在鬪；及其老也，血氣既衰，戒之在得。」血氣之所爲不一，舉凡身之嗜欲根於氣血明矣，非根於心也。孟子曰：「理義之悅我心猶芻豢之悅我口。」非喻言也。凡人行一事，有當於理義，其心氣必暢然自得；悖於理義，心氣必沮喪自失。以此見心之於理義，一同乎血氣之於嗜欲，皆性使然耳。耳目鼻口之官，臣道也；心之官，君道也。臣效其

能而君正其可否。理義非他，可否之而當，是謂理義。然又非心出一意以可否之也。若心出一意以可否之，何異強制之乎？是故就事物言，非事物之外別有理義也。「有物必有則」，以其則正其物，如是而已矣。就人心言，非別有理以予之而具於心也，心之神明於事物咸足以知其不易之則。譬有光皆能照，而中理者，乃其光盛，其照不謬也。人之血氣心知本乎陰陽五行者，性也。如血氣資飲食以養，其化也，即爲我之血氣，非復所飲食之物矣；心知之資於問學，其自得之也亦然。以血氣言，昔者弱而今者強，是血氣之得其養也；以心知言，昔者狹小而今也廣大，昔者闇昧而今也明察，是心知之得其養也。故曰「雖愚必明」。人之血氣心知，其天定者往往不齊；得養不得養，遂至於大異。苟知問學猶飲食，則貴其化，不貴其不化。記問之學，入而不化者也，自得之，則居之安，資之深，取之左右逢其原，我之心知極而至乎聖人之神明矣。神明者，猶然心也，非心自心而所得者藏於中之謂也。心自心而所得者藏於中，以之言學，尚爲物而不化之學，況以之言性乎？「問：宋以來之言理也，其說爲「不出於理則出於欲，不出於欲則出於理」，故辨乎理、欲之界，以爲君子小人於此焉分。今以情之不爽失爲理，是理者存乎欲者也。然則無欲亦非與？」曰：孟子言

「養心莫善於寡欲」，明乎欲不可無也，寡之而已。人之生也，莫病乎無以遂其生。欲遂其生，亦遂人之生，仁也。欲遂其生，至於戕人之生而不顧者，不仁也。不仁，實始於欲遂其生之心。使其無此欲，必無不仁矣。然使其無此欲，則於天下之人生道窮促亦將漠然視之。已不必遂其生而遂人之生，無是情也。然則謂「不出於正則出於邪，不出於邪則出於正」，可也；謂「不出於理則出於欲，不出於欲則出於理」，不可也。欲其物，理其則也。不出於邪而出於正，猶往往有意見之偏，未能得理。而宋以來之言理欲也，徒以爲正邪之辨而已矣。不出於邪而出於正，則謂以理應事矣。理與事分爲二而與意見合爲一，是以害事。夫事至而應者，心也。心有所蔽，則於事情未之能得，又安能得理乎？自老氏貴於「抱一」，貴於「無欲」，莊周書則曰：「聖人之靜也，非曰：『靜也善，故靜也。』萬物無足以撓心者，故靜也。水靜猶明，而況精神。聖人之心靜乎？夫虛靜恬澹，寂寞無爲者，天地之平，而道德之至。」此老莊之說，非《中庸》「雖愚必明」之道也。有生而愚者，雖無欲，亦愚也。凡出於欲，無非以生以養之事。欲之失爲私，不爲蔽。自以爲得理而所執之實謬，乃蔽而不明。天下古今之人，其大患，私與蔽二端而已。私生於欲之失，蔽生於知之失。欲生於血氣，知生

於心。因私而咎欲，因欲而咎血氣，因蔽而咎知，因知而咎心，老氏所以言「常使民無知無欲」。彼自外其形骸，貴其真宰。後之釋氏，其論說似異而實同。宋儒出入於老釋，故雜乎老釋之言以爲言。《記》曰：「飲食男女，人之大欲存焉。」聖人治天下，體民之情，遂民之欲而王道備。人知老莊、釋氏異於聖人，聞其無欲之說，猶未之信也；於宋儒，則信以爲同於聖人。理欲之分，人人能言之，故今之治人者，視占聖賢體民之情，遂民之欲，多出於鄙細隱曲，不措諸意，不足爲怪；而及其責以理也，不難舉曠世之高節，著於義而罪之。尊者以理責卑，長者以理責幼，貴者以理責賤，雖失，謂之順；卑者幼者賤者以理爭之，雖得，謂之逆。於是下之人不能以天下之同情、天下所同欲達之於上。上以理責其下，而在下之罪人人不勝指數。人死於法，猶有憐之者；死於理，其誰憐之？嗚呼，雜乎老釋之言以爲言，其禍甚於申、韓如是也！六經、孔孟之書豈嘗以理爲如有物焉，外乎人性之發爲情欲者而強制之也哉？孟子告齊、梁之君，曰「與民同樂」，曰「省刑罰，薄稅斂」，曰「必使仰足以事父母，俯足以畜妻子」，曰「居者有積倉，行者有裹囊」，曰「內無怨女，外無曠夫」，仁政如是，王道如是而已矣。」問：《樂記》言滅天理，窮人欲，其言有似於以理欲爲邪正之別，何也？曰：

性，譬則水也；欲，譬則水之流也。節而不過，則為依乎天理，為相生養之道，譬則水由地中行也；窮人欲而至於有悖逆詐僞之心，有淫佚作亂之事，譬則洪水橫流，汎濫於中國也。聖人教之反躬，以己之加於人，設人如是加於己而思躬受之之情，譬則禹之行水，行其所無事，非惡汎濫而塞其流也。惡汎濫而塞其流，其立說之工者，且直絕其原，是遏欲無欲之喻也。「口之於味也，目之於色也，耳之於聲也，鼻之於臭也，四體之於安佚也」，此後儒視為人欲之私者，而孟子曰「性也」，繼之曰「有命焉」。命者限制之名，如命之東則不得而西，言性之欲之不可無節也。節而不過，則依乎天理，非以天理為正，人欲為邪也。天理者，節其欲而不窮人欲也。是故欲不可窮，非不可有。有而節之，使無過情，無不及情，可謂之非天理乎？「試以人之形體與人之德性比而論之。形體始乎幼小，終於長大；德性始乎蒙昧，終乎聖智。其形體之長大也，資於飲食之養，乃長日加益，非「復其初」，德性資於學問，進而聖智，非「復其初」，明矣。人、物以類區分，而人所稟受，其氣清明，異於禽獸之不可開通。然人與人較，其材質等差凡幾？占聖賢知人之材質有等差，是以重問學，貴擴充；老莊、釋氏謂有生皆同，故主於去情欲以勿害之，不必問學以擴充之。在老莊、釋氏既守己自足

矣，因毀訾仁義以伸其說。荀子謂常人之性，學然後知禮義，其說亦足以伸。陸子靜、王文成諸人同於老莊、釋氏而改其毀訾仁義者，以為自然全乎仁義，巧於伸其說者也。程子、朱子尊理而以為天與我，猶《荀子》尊禮義以為聖人與我也。謂理為形氣所汙壞，是聖人而下，形氣皆大不美，即荀子性惡之說也。而所謂理，別為湊泊附著之一物，猶老莊、釋氏所謂真宰、真空之湊泊附著於形體也。理既完全自足，難於言學以明理，故不得不分理氣為二本而咎形氣。蓋其說雜糅傳合而成，令學者眩惑其中，雖六經、孔孟之言具在，咸習非勝是，不復求通。嗚呼！吾何敢默而息乎？」○注「理者得道之理」○正義曰：《易·說卦傳》云：「和順於道德而理於義，窮理盡性以至於命。」孔子言道德性命，指出理字，此孟子所本也。道者，行也。凡路之可通行者為道，則凡事之可通行者為道。得乎道為德，對失道而言也。道有理也，理有義也。理者，分也；義者，宜也。其不可通行者，非道矣；可行矣，乃道之達於四方者，各有分焉，即各有宜焉。趨燕者行乎南，趨齊者行乎西，行焉而弗宜矣。弗宜即為失道。趨燕者雖行乎北而或達乎趙，趨齊者雖行乎東而或止乎魯，行焉而仍弗宜矣。弗宜則非義，即非理。故道之分有理，理之得有義。「理於義」者，分而得於義也。惟

分，故有宜有不宜。理分於道，即命分於道，故窮理盡性以致於命。孟子以「理義」明性，即孔子以「理於義」明道也。趙氏以「得道之理」明之，「得道之理」即「和順於道德而理於義」也。後儒言理或不得乎孔孟之旨，故戴氏詳爲闡說，是也。說者或並理而斥言之，則亦茫乎未聞道矣。○注「草食曰芻穀食曰豢」○正義曰：《禮記·月令》「仲秋案芻豢」，注云：「養牛羊曰芻，犬豕曰豢。」《說文》艸部云：「芻，刈草也。」飼牛羊以草，故即稱牛羊爲芻。《樂記》云「夫豢豕爲酒」，注云：「以穀食犬豕曰豢。」是犬豕穀食者也，故即稱犬豕爲豢。《大戴記·曾子天圓》篇云：「宗廟曰芻豢，山川曰犧牲。」阮氏元《校勘記》云：「宋本食作牲。」

章指：言人稟性，俱有好憎。耳目口心，所悅者同。或爲君子，或爲小人，猶粃麥不齊，雨露使然也。孟子言是，所以勗而進之。

疏「人稟性俱有好憎」○正義曰：好憎即好惡，孟子以「悅心」「悅口」言性，悅即是好。趙氏兼言好惡，好惡，情也。仍申明情可爲善之義也。凌氏廷堪《好惡說》云：「人之性受於天，目能視則爲色，耳能聽則爲聲，口能食則爲味，而好惡實基於此。《大學》言「好惡」，

《中庸》申之以「喜怒哀樂」，蓋好極則生喜，又極則爲樂；惡極則生怒，又極則爲哀。過則佚於情，反則失其性矣。性者，好惡二端而已。《大學》云：「好人之所惡，惡人之所好，是謂拂人之性。」然則人性初不外乎好惡也。受亦好也，故正心之忿懣、恐懼、好樂、憂患，齊家之親愛、賤惡、畏敬、哀矜、敖惰，皆不離乎人情也。《大學》性字祇此一見，即好惡也。《左傳》昭公二十五年太叔對趙簡子曰：「天地之經而民實則之。則天之明，因地之性，生其六氣，用其五行。氣爲五味，發爲五色，章爲五聲。淫則昏亂，民失其性。」此言性，即食味、別聲、被色者也。又云：「是故審行信令，禍福賞罰以制死生。生，好物也；死，惡物也。好物，樂也；惡物，哀也。哀樂不失，乃能協於天地之性，是以長久。」蓋喜怒哀樂，皆由好惡而生，好惡正，則協於天地之性矣。」

孫授易授詩校字

孟子正義卷二十二終

孟子正義卷二十三

江都縣鄉貢士焦循譯集

孟子曰：「牛山之木嘗美矣。以其郊於大國也，斧斤伐之，可以爲美乎？是其日夜

之所息，雨露之所潤，非無萌蘖之生焉；牛羊又從而牧之，是以若彼濯濯也。人見其濯濯也，以爲未嘗有材焉，此豈山之性也哉？

注牛山，齊之東南山也。邑外謂之郊。息，長也。

濯濯，無草木之貌。牛山木嘗盛美。以在國郊，斧斤牛羊，使之不得有草木耳。非山之性無草木也。

疏注「牛山」至「之貌」○正義曰：閻氏若璩《釋地續》云：

「牛山，齊之東南山」，是趙氏在複壁中所注，方向少錯，無論。今日驗在臨淄縣南一十里，亦在唐臨淄縣南二十里，

《括地志》所謂「管仲冢與桓公冢連在牛山上」是。酈道元注：「牛山，一名南郊山，天齊淵出焉。齊以此得名。」梁劉昭不知引何人《孟子注》云：「南小山曰牛山。」晉左思《齊都賦》云：「牛嶺鎮其南。」《列子·力命》篇：「齊景公游於牛山，北臨其國城而流涕。」夫臨曰北，正以山實在南。「邑外謂之郊」，《爾雅·釋地》文。息之義與生同。生亦長也。王氏念孫《廣雅疏證》云：「鵠，長也。息與鵠通。《剝·豕傳》云「君子尚消息盈虛」，消息即消長也。」《毛詩》言「濯濯」者二，《大雅·靈臺》篇「麋鹿濯濯」，傳云：「濯濯，娛遊也。」《崧高》篇「鉤膺濯濯」，傳云：「濯濯，光明也。」濯是洗滌溉滌之名，物經滌濯則垢汙悉去，故光明爲濯濯。山有草木則陰翳不齊，草木盡去，不異洗濯者然，故趙氏以「濯濯」爲「無草木之貌」也。雖存乎人者，豈無仁義之心哉？其所以放其良心者，亦猶斧斤之於木也。旦旦而伐之，可以爲美乎？其日夜之所息，平旦之氣，其好惡與人相近也者幾希；**注**存，在也。言雖在人之性，亦猶山之有草木。人豈無仁義之心邪？其日夜之思欲息長仁義，平旦之志氣，其好惡，凡人皆有與賢人相近之心。幾，豈也。豈希，

言不遠也。

疏注「存在」至「遠也」○正義曰：《爾雅·釋

言》云：「存存，在也。」是「存」即「在」也。「良」之義爲善，「良心」即善心，善心即「仁義之心」。放者，存之反也。《呂氏春秋·順民》篇云「以與吳王爭一旦之死」，高誘注云：「旦，朝也。」「旦旦」猶云朝朝，亦即日日也。旦旦，言非一日也。日日放其良心，猶日日伐其山木。山木由此不美，人心亦由此不良。良亦美也。「其日夜之所息」，趙氏解爲「其日夜之思欲息長仁義」。息之義爲生長，所息指生長此心之仁義。仁義不能無端生長，故趙氏以「思欲」明之。蓋雖放其良心，其始陷溺未深，尚知自悔，雖爲不仁而思欲尚轉而及仁，雖爲不義而思欲尚轉而及義。此思欲之所轉，即仁義之心所生長。「相近」即「性相近」之相近。放失之後，其平坦之氣，好惡尚與人相近，則「性善」可知矣。趙氏以「人」爲「賢人」，謂能存仁義之心，未放失其良者也。其實「與人相近」，正謂與禽獸相遠。謂之爲人性原相近，但日放一日，則日遠於人一日，日遠於人一日，即日近於禽獸一日，而其日夜所息，則仍與人近而不遠。此孟子以放失仁義之人明其性之善也。旦旦伐之，而所習仍相近，則良心不易亡如此。此極言良心不遽亡，非謂良心易去也。故趙氏以「幾希」爲「不遠」也。或以息爲歇息，非是；以幾希爲甚微，亦

失之。趙氏佑《溫故錄》云：「豈希言不遠，與前注「幾希，無

幾也」異。蓋亦隨文見義與？」則其旦晝之所爲，有

悖亡之矣。悖之反覆，則其夜氣不足以存。

夜氣不足以存，則其違禽獸不遠矣。人見其

禽獸也，而以爲未嘗有才焉者，是豈人之情

也哉？**注**旦晝，晝日也。其所爲萬事有悖亂之，

使亡失其日夜之所息也。悖之反覆，利害干其心，

其夜氣不能復存也。人見惡人禽獸之行，以爲未嘗

有善才性，此非人之情也。**疏注**「旦晝」至「情也」○正

義曰：《說文》日部云：①「旦，明也。」晝日之出入，與夜爲

界。宣公八年《穀梁傳》「祭之旦日之享賓也」，注云：「旦日

猶明日也。」《漢書·高帝紀》「旦日合戰」，注云：「旦日，明

日也。」趙氏言「晝日也」，是以「日」釋「晝」也。「旦晝」猶云

明日，謂今日夜所息平坦之氣才能不遠於人，及明日出見紛

華所悅，而所息者乃悖亡矣。《音義》云：「丁云：「悖，古沃

切，謂悔吝利害也。」言利害之亂其性，猶桎梏之刑其身。

①「日」，按《說文》旦字屬旦部，參沈校。

此桮從木。《書·棗誓》：「今惟淫舍牯牛馬」，鄭氏注云：「桮，桮桮之桮。」是「桮桮」之桮通作「桮」，故「桮亡」作「桮亡」也。趙氏云：「其所爲萬事，有桮亂之」，則是以「亂」釋「桮」。《毛詩·小雅·何人斯》云：「祇攪我心」，傳云：「攪，亂也。」《詩·大雅·抑》篇：「有覺德行」，《禮記·緇衣》引作「有桮德行」，是桮與覺古通。《後漢書·馬融傳·廣成頌》云：「桮羽羣」，注云：「桮，諸家並古酷反。」案，字書桮從手，即古文攪字，謂攪擾也。桮、桮、桮同。趙氏讀桮爲攪，故訓爲亂；丁氏以爲桮桮，非其義也。何氏焯《讀書記》云：「『有桮』之有當讀去聲。」讀去聲則爲又，謂才有所生息，又桮亂而亡失之也。反覆即反復。息而桮，桮而又息，息而又桮。其始，息多於桮，久則桮多於息。息則仁義之心存，桮則利害之見勝。桮之不已，則心但知有利害，不復能思欲息長仁義，是利害之邪干犯仁義之良，故夜氣不足以存也。至桮之反覆，夜氣不足以存，乃違禽獸不遠。然則人之不遠於禽獸，亦非一日所遽至也。《坤·文言傳》云：「非一朝一夕之故，其所由來者漸矣，由辨之不早辨也。」《繫辭傳》云：「小人不耻不仁，不畏不義。不見利不勸，不威不懲。小懲而大誡，此小人之福也。」又云：「善不積，不足以成名；惡不積，不足以滅身。小人以小善爲无益而弗爲也，以小惡爲

无傷而弗去也，故惡積而不可掩，罪大而不可解。」且旦伐之，桮之反覆，即「漸積」之謂也。當其日夜所息，好惡尚與人近，是時早辨，尚不至於桮亡，此聖人設教，所以耻之以仁，畏之以義，勸以利而懲以威也。故苟得其養，無物不長；苟失其養，無物不消。孔子曰：「操則存，舍則亡。出入無時，莫知其鄉。」惟心之謂與？**注**誠得其養，若雨露於草木，法度於仁義，何有不長也？誠失其養，若斧斤牛羊之消草木，利欲之消仁義，何有不盡也？孔子曰：「持之則在，縱之則亡。莫知其鄉。鄉猶里，以喻居也。獨心爲若是也。」**疏**注「誠得」至「是也」○正義曰：《楚辭·離騷》云：「苟余情其信姱以練要兮」，注云：「苟，誠也。」故以「誠」釋「苟」。人之自治必以問學，聖人治人則以禮樂，皆以「法度於仁義」也。息仁義必以思欲，養仁義必以法度。趙氏深能發《孟子》之旨。或謂靜以任其自然，非其義也。《說文》水部云：「消，盡也。」故以「盡」釋「消」。手部云：「操，把持也。」《禮記·曲禮》「操右契」，注云：「操，持也。」故以「持」釋「操」。「舍」即放，放即「縱」。《論語·雍也》篇：「以與爾鄰里鄉黨乎」，《集解》引鄭曰：「五家爲鄰，五鄰爲里。萬

二千五百家爲鄉，五百家爲黨也。」《論語·里仁》篇「里仁爲美，擇不處仁」，《集解》引鄭曰：「里者，民之所居也。居於仁者之里，是爲善也。」鄉大於里，而皆爲民之所居，故云：「鄉猶里，以喻居也。」「惟」，猶「獨」也。近讀鄉爲向。《釋名·釋州國》云：「萬二千五百家爲鄉。鄉，向也。衆所向也。」鄉里之鄉本取義於向，則其義通矣。毛氏奇齡《聖門釋非錄》云：「『出入無時，莫知其鄉』，直接『惟心之謂』句，分明指心言，蓋存亡即出入也。惟心是一可存可亡，可出可入之物，故操舍惟命，若無出入，則無事操存矣。《大易》『憧憧往來』，往來者，出入也。《大學》心有所，心不在，有所不在，亦出入也。是心原可出入而操舍者，則因其出之人之也。」

章指：言秉心持正，使邪不干，猶止斧斤，不伐牛山。山則木茂，人則稱仁也。

孟子曰：「無或乎王之不智也！」**注**王，齊王也。或，怪也。時人有怪王不智而孟子不輔之，故言此也。**疏**注「王齊王也或怪也」○正義曰：孟子仕齊久。下云「吾見亦罕，吾退而寒之者至」，則是孟子仕齊

乃有是語，故知王爲齊王也。《呂氏春秋·審爲》篇云「世必惑之」，高誘注云：「惑，怪也。」或與惑同。雖有天下易生之物也，一日暴之，十日寒之，未有能生者也。吾見亦罕矣，吾退而寒之者至矣，吾如有萌焉何哉？**注**種易生之草木五穀，一日暴溫之，十日陰寒以殺之，物何能生？我亦希見於王，既見而退，寒之者至，謂左右佞諂順意者多。譬諸萬物，何由得有萌牙生也？**疏**注「種易」至「生也」○

正義曰：《小爾雅·廣言》云：「暴，曬也。」《說文》曰部云：「曬，暴也。」日光所曬，故溫。草木五穀雖有經冬而生者，然其種必得溫和之氣乃能萌動。今農人清明後浸稻種，既發牙矣，設遇風霜則必枯萎，是陰寒以殺之也。《爾雅·釋詁》云：「希，罕也。」《毛詩·鄭風·大叔于田》「叔發罕忌」，傳云：「罕，希也。」故「罕見」即「希見」也。《說文》艸部云：「萌，草芽也。」芽，萌芽也。二牙與芽通，故幼小稱童牙。「萌牙」即萌蘖也。今夫奕之爲數，小數也。不專心致志，則不得也。**注**奕，博也，或曰圍碁。《論語》曰：「不有博奕者乎？」數，技也。雖小技，不專

心則不得也。**疏**注「奕博」至「奕者乎」○正義曰：《方

言》云：「博謂之蔽，或謂之箇。秦晉之間謂之博，吳楚之間或謂之蔽，或謂之箭裏，或謂之博毒，或謂之殳專，或謂之匿璇，或謂之碁。所以投博謂之枰，或謂之廣平。所以行碁謂之局，或謂之曲道。圍碁謂之弈，自關而東，齊魯之間皆謂之奕。」戴氏震《疏證》云：「博，博古通用。《說文》云：「博，局戲也。六箸十二碁也。古者烏冑作博。」「箇，博碁也。」「局，博所以行碁。」「奕，圍棋也。」《荀子·大略》篇云「六貳之博」，楊倞注云：「即六博也。今之博局亦二六相對也。」《楚辭·招魂》篇「菝蔽象碁，有六博些」，王逸注云：「菝，玉也。蔽，博箸以玉飾之也。投六箸，行六碁，故謂六博也。」《史記·范雎蔡澤列傳》：「君獨不觀夫博者乎？或欲大投，或欲分功。」《春秋》襄二十五年《左傳》：「今甯子視君，不如奕棋。」《廣雅》：「博箸謂之箭」「殳專，博也」「廣平，枰也」「曲道，桐也」「圍棋，奕也」，皆本此。「王氏念孫《廣雅疏證》云：「桐通作局。《韓非子·外儲說》云：「秦昭王以松栢之心爲博箭。」《西京雜記》云：「許博昌善陸博法，用六箸，以竹爲之，長六分，或用二箸。」《列子·說符》篇《釋文》引《六博經》云：「博法，二人相對坐向局，局分爲十二道，兩頭當中名爲水。用碁十二枚，法六白六黑，又用魚二

枚，置於水中。其擲采以瓊爲之。二人互擲采行碁，碁行到處即豎之，名爲驍碁，即人水食魚，亦名羣魚。每牽一魚，^①獲二籌，翻一魚，獲三籌。若已羣兩魚而不勝者，名曰被翻雙魚。彼家獲六籌，爲大勝也。」廣平爲博局之枰，取義於平也。《說文》云：「枰，平也。」韋昭《博奕論》云：「所志不出一枰之上。」《小爾雅·廣服》：「碁局謂之奕」，宋氏翔鳳《訓纂》云：「《說文》：「弈，圍碁也。」《廣雅·釋言》：「圍碁，弈也。」奕通作亦。《大戴禮·小辨》篇：「夫亦，固十碁之變，由不可既也。」亦即弈字。《文選·博奕論》注引邯鄲淳《藝經》曰：「碁局縱橫，各十七道，合二百八十九道，白黑碁子各一百五十枚。」後漢書·張衡傳：「奕秋以碁局取譽」，注云：「奕，圍局也。碁即所執之子。」按，博奕皆用碁，弈爲圍碁，博爲局戲。《說文》：「博，局戲也。六箸十二碁也。」法與圍碁異。」按：謂博與奕異是也。博蓋即今之雙陸，弈爲圍碁，今仍此名矣。以其局同用板平承於下，則皆謂之枰，以其同行於枰，皆謂之碁。《史記·日者列傳》：「旋式正碁。」劉徽《九章算術》：「句股幕，用諸色碁別之。」凡用以布列者之通名。而博之碁，上高而銳，如箭亦如箸，今雙

①「牽一」，原誤倒，今據《廣雅疏證》乙正。

陸基俗謂之鎚，尚可考見其狀，故有箭、箸之名。今雙陸枰上，亦有水門。其法古今有不同。如奕古用二百八十九道，今則用三百六十一道，亦其例也。班固《奕旨》云：「夫博懸於投，不專在行。優者有不遇，劣者有僥倖。雖有雌雄，不足以爲平也。至於弈則不然。高下相推，人有等級。若孔氏之門，回、賜相服，循名責實，謀以計策，若唐虞之朝，考功黜陟，器用有常，施設無祈，因敵爲資，應時屈伸。」此分別博、奕甚明。蓋奕但行基，博以擲采而後行基，後人不行基而專擲采，遂稱擲采爲博，博與奕益遠矣。趙氏以《論語》博、奕連言，故以「博」釋「奕」，其實奕爲圍基之專名，與博同類而異事也。引《論語》在《陽貨》篇第十七。○注「數技」至「得也」○正義曰：《呂氏春秋·察賢》篇「任其數而已矣」，《淮南子·原道訓》「貴其周於數」，高誘注並云：「數，術也。」《禮記·鄉飲酒義》「占之學術道者」，注云：「術，猶藝也。」《坊記》「尚技而賤事」，注云：「技，猶藝也。」技、術皆訓藝。數之爲技，猶數之爲術，即數之爲藝。《禮記·少儀》「游於藝」，注云：「藝，六藝也。一曰五禮，二曰六樂，三曰五射，四曰五御，五曰六書，六曰九數。」九數爲六藝之一，故數可稱藝。其實數之名，《漢書·律曆志》云「一百千萬是也」，九數之用，其爲方田、粟米、差分、少廣、商功、均輪、方

程、贏不足、旁要，今有重差、夕桀、句股，其用大矣。而一枰之間，方罫之內，勝負視乎多寡，所以商度而計較者，亦數之類也，故云「小數」。「致」之言細密也，用志不細不密，則負矣。故專一其心，以細密其志也。致是細密，細密即是精。趙氏《章句》不解「致志」而《章指》云「不精不能」，「不精」即解「不致志」，「不能」即解「不得」也。趙氏注中所略，每於章指補之。奕秋，通國之善奕者也。使奕秋誨二人奕。其一人專心致志，惟奕秋之爲聽；一人雖聽之，一心以爲有鴻鵠將至，思援弓繳而射之。雖與之俱學，弗若之矣。爲是其智弗若與？曰：非然也。○注「有人名秋，通一國皆謂之善奕，曰「奕秋」。使教二人弈。其一人惟秋所善而聽之，其一人念欲射鴻鵠，故不如也。爲是謂其智不如也，曰：非也，以不致志也。故齊王之不智亦若是。」疏「思援弓繳而射之」○正義曰：《說文》「手部云：「援，引也。」《淮南子·說山訓》云「好弋者先具繳與矰」，注云：「繳，大綸。」《說文》「糸部」云：「繫，生絲縷也。」《文選·文賦》李善注引《說文》云：「謂縷系矰矢而以雉射也。」

矢部云：「矰，雉射矢也。」佳部云：「雉者，繫射飛鳥也。」

《詩·鄭風·女曰雞鳴》箋、《齊風·盧令》箋皆云：「弋，繳射也。」孔氏正義曰：「以繩繫矢而射鳥謂之繳射。」《說文》糸部又云：「緡，釣魚繫也。」然則繫爲生絲縷之名，可用以繫弓弋鳥，亦可用以繫竿釣魚。○「曰非然也」○正義曰：

王氏引之《經傳釋詞》云：「有一人之言而自爲問答者，則加曰字以別之。《孟子》爲其智弗若與，曰非然也」是也。」

「爲」與「謂」同義，言謂是其智弗若也。趙注云「爲是謂其智弗如也」，分爲與謂爲二，失之。○注「有人」至「弈秋」○正義曰：古之以技傳者，每稱之爲名，如醫和、卜徒父是也。

此名弈秋，弈是技名，故知秋爲其名，因通國皆謂之善弈，故以弈加名稱之也。《文選·齊故安陸昭王碑文》云：「弈思之微，秋儲無以競巧。」注云：「《孟子》曰：『弈秋，通國之善弈者也。』儲謂儲蓄精思也。」儲字承上思字，儲蓄精思，正是專心致志，李善注是也。王應麟以儲亦「善弈之人」，非是。《藝文類聚》引《尸子》云：①「鴻鵠在上，杆弓鞞弩以待之。若發若否，問二五曰弗知。非二五難計也，欲鴻之心亂也。」此文殘闕，當即《孟子》此文之意。「俱學」者，俱習也。「智」即性之神明也。「弗若」者，習相遠也。「非然」者，非性本相遠也。此章以智明性，與前章以仁義明

性互見之。

章指：言弈爲小數，不精不能。一人善之，十人惡之，雖竭其道，何由智哉？《詩》云：「濟濟多士，文王以寧。」此之謂也。疏「詩云」至「謂也」○正義曰：周氏廣業《孟子章

指考證》云：「濟濟二句，《左傳》成二年楚子重引之，云：『文王猶用衆，況吾儕乎？』荀卿、梅福、王褒皆以爲文王賴多士以寧。獨《管子》云：『濟濟者，誠莊事斷也；多士者，多長者也。』周文王誠莊事斷，故國治，其羣臣明理以佐主，故主明。主明而國治，竟內被其澤利，殷民舉首而望文王，願爲文王臣。」以濟濟指文王言。賈誼《新書》又云：「輔翼文王，則身必已安也。」以寧指多士言。二解並異。按：此詩爲《大雅·文王》篇第三章。傳云：「濟濟，多威儀也。」孔氏正義云：「《釋訓》云：『濟濟，容止也。』孫炎云：『濟濟，多士之容止也。』《少儀》云：『朝廷之儀，濟濟翔翔。』與此同。」濟濟與多士連文，自指多士。趙氏引以與「一人善之」相對。多士則寧，一

①「藝文類聚」以下非關弈秋，當另立一條。

人則不智也。

孟子曰：「魚，我所欲也；熊掌，亦我所欲也。二者不可得兼，舍魚而取熊掌者也。生，亦我所欲也；義，亦我所欲也。二者不可得兼，舍生而取義者也。」**注**熊掌，熊蹯也。以喻義。魚以喻生也。**疏**注「熊掌熊蹯也」○正義曰：

《周禮·秋官·穴氏》：「掌攻蟄獸，各以其物火之，以時獻其珍異皮革。」**注**云：「蟄獸，熊羆之屬。」賈氏疏云：「謂熊羆之皮及熊蹯之等。」文公元年《左傳》云：「以宮甲圍成王，王請食熊蹯而死。」**注**云：「熊掌難熟，冀久將有外救。」宣公二年《左傳》云：「宰夫胾熊蹯不熟，宣公六年《公羊傳》：「熊蹯不熟，**注**云：「蹯，掌也。」生亦我所欲，所欲有甚於生者，故不為苟得也；死亦我所欲，所惡有甚於死者，故患有所不辟也。如使人之所欲莫甚於生，則凡可以得生者，何不用也？使人之所惡莫甚於死者，則凡可以辟患者，何不為也？」**注**有甚於生者，謂義也。義者，不可苟

得。有甚於死者，謂無義也。不苟辟患也。莫甚於生則苟利而求生矣，莫甚於死則可辟患不擇善，何不為耳？」**疏**注「莫甚」至「為耳」○正義曰：趙氏謂人之

所欲莫甚於生，是不知好義之人也。不知好義，乃苟求得生。人之所惡莫甚於死者，是不知惡不義之人也。不知惡不義，乃苟於辟患，是指喪失其良心者而言，於下「由是」云云不貫。近時通解，則以此為反言，以決人性之必善，必有良心，以為下「人皆有之」張本。欲生惡死，人物所同之性。乃人性則所欲有甚於生，所惡有甚於死，此其性善也，此其良心也。何以見其欲有甚於生？於其不為苟得見之；何以見其惡有甚於死？於其患有所不辟見之。惟其有此良心，乃能如是，使本無良心，則惟欲生而已，惟惡死而已。所欲無有甚於生，則何以不為苟得？所惡無有甚於死，則何以患有所不辟？反復以明人必有此良心。或謂此言生死之權度。所欲有甚於生則不苟得此生，所惡有甚於死則不苟於辟患，此舍生而取義之事也。使無義可取，則此時所欲莫甚於生，則又以得生為是；此時所惡莫甚於死，則又以辟患為是。生而不義，則不苟生；生而義，則亦不苟死。「不為苟得」，「患有所不辟」，為貪生亡義者言也。「可以得

生，何不用；可以辟患，何不爲？」爲輕生不知義者言也。義不在生，亦不在死。當死而死，當生而生，聖人之權也。由是則生，而有不用也；由是則可以辟患，而有不爲也。是故所欲有甚於生者，所惡有甚於死者。非獨賢者有是心也，人皆有之，賢者能勿喪耳。**注**有不用，不用苟生也；有不爲，不爲苟惡而辟患也。有甚於生，義甚於生也；有甚於死，惡甚於死也。凡人皆有是心，賢者能勿喪亡之也。**疏**「由是」至「喪耳」○正義曰：趙氏以「由是」以下爲一節，蓋以兩「由是」與「是故」二字相呼吸。○**注**「不爲苟惡」○正義曰：「苟惡」謂不肯苟且爲惡也。一簞食，一豆羹，得之則生，弗得則死。噤爾而與之，行道之人弗受；蹴爾而與之，乞人不屑也。**注**人之餓者得此一器食可以生，不得則死。噤爾猶呼爾，咄啐之貌也。行道之人，道中凡人。以其賤己，故不肯受也。蹴，蹋也。以足踐蹋與之，乞人不絜之，亦由其小，故輕而不受也。**疏**注「噤爾」至「貌也」

○正義曰：《音義》云：「噤，呼故切。咄，丁都忽切，叱也。啐，七內切，呼也。」呼與噤通。文公元年《左傳》「江汜怒曰呼役夫」，**注**云：「呼，發聲也。役夫，賤者稱。」怒而稱以賤者而先發聲爲呼，則呼是怒聲。《文選·送於陟陽侯詩》注引《倉頡篇》云：「咄，啐也。」曹植《贈白馬王彪詩》注引《說文》云：「咄，叱也。」《說文》口部：「叱，訶也。」「吒，叱怒也。」言部云：「訶，大言而怒也。」噤之訓爲號，趙氏以與「噤爾」之義不合，故用《左傳》呼字讀之，又解以「咄啐」，明其爲怒也。或以噤爲招呼，乃行道之人，招之使食，未見其必不肯受。下云「道中凡人以其賤己」，正用呼役夫之意也。「道中」即路中。○**注**「蹴蹋」至「絜之」○正義曰：《說文》足部云：「蹴，躡也。」「蹋，踐也。」「躡，蹈也。」「蹈，踐也。」蹴、躡、蹋、踐、蹈五字相轉注。以足踐履之，則汗而不絜。《毛詩·邶風·谷風》「不我屑以」，傳云：「屑，潔也。」潔與絜同。「不屑」是不以爲潔也。萬鍾則不辯禮義而受之，萬鍾於我何加焉？爲宮室之美，妻妾之奉，所識窮乏者得我與？**注**言一簞食則貴禮，至於萬鍾則不復辯別有禮義與不。鍾，量器也。萬鍾於己身何加益哉？己身不能獨食萬鍾也。豈不爲廣

美宮室，供奉妻妾，施與所知之人窮乏者。」

疏注「言

一」至「乏者」○正義曰：「噉爾」「蹴爾」，無禮者也；「不受」「不絮」，貴禮也。萬鍾或以禮或不以禮，以禮則義可受，不以禮則義不可受，此宜辨別者也。不辨，則有非禮而受者矣。《音義》云：「辯，丁本作變，云：『於義當爲辯。』辯，別也。」阮氏元《校勘記》云：「《周易·坤》釋文：『由辯，荀作變。』是辯、變古字通用。」按：今本作變。《五經文字》云：「辯，理也。」「辨，別也。」經典或通用之。昭公三年《左傳》云：「釜十則鍾。」《考工記·栗氏》「量之以爲黼」。黼即釜，是鍾爲量器也。釜爲六斗四升，鍾爲十釜，是六斛四斗也。《淮南子·修務訓》「螟螣然日加數寸」，注云：「加猶益也。」人日食幾何？故於己身何有增益？昭公六年《左傳》「奉之以仁」，注云：「奉，養也。」《廣雅·釋言》云：「供，養也。」故以「供」釋「奉」。《說文》人部云：「供，設也。一曰供給。」謂蓄妻妾，則給以養之。「奉」即祿食也。《詩·大雅·瞻印》篇「君子是識」，箋云：「識，知也。」「得」字趙氏無釋而云「施與」。《音義》出「得我與」，云：「張云：『平聲，亦如字。』」以施釋與，則趙氏讀與如字，「得我與」謂得獲我之所施與也。讀與爲平聲，則「得我」不可爲「得獲」之得。哀公二十四年《左傳》云「公如越，得大子適郢」，注云：「適郢，越

王太子得相親悅也。」得與德通，《禮記·樂記》云：「德者，得也。」《國策·齊策》云「必德王」，《秦策》云「必不德王」。此「得我」即「德我」，所知之人窮乏，而我施與之，則彼必以我爲恩德而親悅我也。近時通解如是。鄉爲身死而不受，今爲宮室之美爲之；鄉爲身死而不受，今爲妻妾之奉爲之；鄉爲身死而不受，今爲所識窮乏者得我而爲之。是亦不可以已乎？此之謂失其本心。」**注**鄉者不得簞食而食則身死，尚不受也，今爲此三者爲之，是亦不可以止乎？所謂「失其本心」也。

章指：言舍生取義，義之大者也。簞食萬鍾，用有輕重，縱彼納此，蓋違其本。凡人皆然，君子則否，所以殊也。

孟子曰：「仁，人心也；義，人路也。舍其路而弗由，放其心而不知求，哀哉！」**注**不行仁義者，不由路，不求心者也。可哀憫哉！**疏注**

「可哀憫哉」○正義曰：《說文》口部云：「哀，閔也。」人有雞犬放則知求之，有放心而不知求。學問之道無他，求其放心而已矣。」**注**人知求雞狗，莫知求其心者，惑也。學問所以求之。**疏**注「學問所以求之」○正義曰：前言「放其良心」、「失其本心」、「操則存，舍則亡」、「賢者能勿喪」，蓋所以放之、失之、舍之、喪之者，由於不能操之，所以不能求之也。何以操之？惟在學問而已。

學問即《中庸》所云「博學之，審問之」，《論語》所謂「博學而篤志，切問而近思」，孔子所云「好古敏求」，孟子所云「誦《詩》讀《書》」。聖人教人學以聚之，問以辨之者，無有他意，不過以此求其放心而已。顧氏炎武《日知錄》云：「『學問之道無他，求其放心而已矣』，然則但求放心，可不必於學問乎？與孔子之言『吾嘗終日不食，終夜不寢以思，無益，不如學也』者，何其不同邪？他日又曰：『君子以仁存心，以禮存心』。是所存者，非空虚之心也。夫仁與禮，未有不學問而能明者也。孟子之意蓋曰：能求放心，然後可以學問。『使奕秋誨二人奕。其一人專心致志，惟奕秋之爲聽。一人雖聽之，一心以爲有鴻鵠將至，思援弓繳而射之。雖與之俱學，弗若之矣。』此放心而不知求者也。然但知求放心而未嘗窮中野之方，悉

雁行之勢，亦必不能從事於奕。」趙氏佑《溫故錄》云：「注『學問所以求之』，一語精義。然求放心非學問不爲功，須兼到乃盡耳。求放心即是求仁義而全乎人也。」

章指：言由路求心，爲得其本；追逐雞狗，務其末也。學以求之，詳矣。**疏**「由路」

至「詳矣」○正義曰：求心在於知義，知義在於學問。趙氏深得孟子之旨，通儒也。

孟子曰：「今有無名之指屈而不信，非疾病害事也。如有能信之者，則不遠秦楚之路，爲指之不若人也。」**注**無名之指，手之第四指也，蓋以其餘指皆有名。無名指者，非手之用指也。雖不疾病妨害於事，猶欲信之，不遠秦楚，爲指不若人故也。**疏**注「無名」至「故也」○正義曰：無名指，詳見

《滕文公》篇下。《楚辭·招魂》云「敬而無妨些」，王逸注云：「妨，害也。」故「害事」爲「妨害於事」。但不信則非疾病，或雖不疾病而以不信妨事，尚須慮之；而又爲無名之指，非手之所常用，則不信亦不妨害事，可不慮也。**指不**

若人則知惡之，心不若人則不知惡，此之謂「不知類」也。**注**心不若人，可惡之大者也，而反惡指，故曰不知其類也。類，事也。**疏**注「類事也」○正義曰：《呂氏春秋·達鬱》篇云「得其細，失其大，不知類耳」，高誘注云：「類，事也。」《禮記·學記》云「九年知類通達」，注云：「知類，知事義之比也。」

章指：言舍大惡小，不知其要，憂指忘心，不嚮於道。是以君子惡之也。

孟子曰：「拱把之桐梓，人苟欲生之，皆知所以養之者；至於身，而不知所以養之者。豈愛身不若桐梓哉？弗思甚也。」**注**拱，合兩手也；把，以一手把之也。桐、梓，皆木名也。人皆知灌溉而養之，至於養身之道，當以仁義而不知用。豈於身不若桐梓哉？不思之甚也。**疏**注「拱合」至「名也」○正義曰：《尚書序》云：「伊陟相大戊，亳有祥桑穀共生於朝。」《史記集解》引鄭氏注云：「兩手搯之曰拱。」王氏鳴盛《尚書後案》云：「共與拱通。僖三十二

年《傳》：「爾墓之木拱」，杜預曰：「合手曰拱。」《呂覽·季夏紀·制樂》篇載此事，高誘注亦云：「滿兩手曰拱。」是也。《說文》手部云：「把，握也。」《莊子·人間世》云「宋有荆氏者，宜楸柏桑其拱把而上者」，《釋文》云：「拱，恭勇反。把，百雅反。司馬云：『兩手曰拱，一手曰把。』」《毛詩·邶風·定之方中》云「樹之榛栗，椅桐梓漆」，箋云：「樹此六木於宮。」謂桐、梓與榛、栗、椅、漆為六，是桐、梓皆木名。《爾雅·釋木》云「榮桐木」，注云：「即梧桐。」又云「椅梓」，注云：「即楸。」是也。《齊民要術》有種桐梓法。

章指：言莫知養身，而養樹木，失事違務，不得所急。所以戒未達者也。**疏**而養樹木○正義曰：孔本樹上有「其」字。阮氏元《校勘記》云：「孔本、韓本衍其字。」

孟子曰：「人之於身也，兼所愛；兼所愛，則兼所養也。無尺寸之膚不愛焉，則無尺寸之膚不養也。」**注**人之所愛則養之。於身也，一尺一寸之膚，養相及也。**疏**注「人之」至「相及也」○正義曰：趙氏之意，以「身」對「心」而言，心身皆人之

體，愛心亦兼愛身，則養心亦兼養身，故先言「人之所愛則養之」，渾括身心而言，次言「於身也，一尺一寸之膚養相及」，明養身由養心而兼及之也。膚爲肌肉，屬身言。所以考其善不善者，豈有他哉？於己取之而已矣。

注 考知其善否，皆在己之所養也。

疏 注「考知」至「養

也」○正義曰：考與攷同。《周禮·夏官·大司馬》：「以待攷而誅賞」，注云：「考謂考校其功。」《詩·大雅·文王有聲》篇「考卜維王」，箋云：「考猶稽也。」養身爲養心之所兼，則大小顯然可見。善則爲大人，不善則爲小人。欲知其爲大人小人，則不必攷校稽察於他事，即其所養在何體，則知之矣。體有貴賤，有大小。無以小害大，無以賤害貴。養其小者爲小人，養其大者爲大人。

注 養小則害大，養賤則害貴。小，口腹也；大，心志也。頭頸，貴者也；指拇，賤者也。不可舍貴養賤者也。務口腹者爲小人，治心志者爲大人。

疏 注

「養小」至「大人」○正義曰：趙氏佑《溫故錄》云：「大貴小賤，無可易也。注以大謂心志，小謂口腹，是已；忽增出貴謂頭頸，賤謂指拇，則支矣。按，「頭頸貴者」以下十八字，於

上下文義不貫，恐非趙氏原文。」今有場師，舍其梧檟，養其槭棘，則爲賤場師焉；**注** 場師，治場圃者。場以治穀，圃，園也。梧，桐；檟，梓。皆木名。槭棘，小棘，所謂酸棗也。言此以喻人舍大養小，故曰賤場師也。

疏 注「場師」至「師也」○正義曰：《周禮·

地官·載師》：「以場圃任園地」，注云：「圃，樹果蔬之屬。季秋於中爲場。」《場人》：「每場下士二人」，「掌國之場圃而樹之果蔬珍果之物，以時斂而藏之」，注云：「場，築地爲墀，季秋除圃中爲之。」《詩》云：「九月築場圃，十月納禾稼。」場爲納禾稼而築，故云「場以治穀」。場爲圃中之地，園圃乃樹草木，今言「養其槭棘」，故連「圃」言之。《爾雅·釋言》云：

「師，人也。」蓋場師即場人也。場人稱師，猶工師、醫師、漁師之屬。《爾雅·釋木》：「檟梧」與「桐榮木」別，「檟山檟」與「椅梓」別，蓋梧雖與桐異而爲一類，故梧亦稱梧桐；梓雖與檟異，《考工記》注云：「梓，檟屬。」以其屬統言之，則梧亦桐也，檟亦梓也。段氏玉裁《說文解字注》云：「檟，楸也。《釋木》：「槐小葉曰檟」，郭云：「槐當爲楸，楸細葉者爲檟。」又「大而鼓楸，小而鼓檟。」郭云：「老乃皮粗鼓爲楸，小而皮粗鼓爲檟。」又「檟，山檟」，郭云：「今之山楸。」檟者檟之或

字。阮氏元《校勘記》云：「槭棘，古書皆作「槭棗」。《爾雅》「遵羊棗」，注引《孟子》「養其槭棗」，古本《爾雅》皆同。唐宋人《本草》注亦作「槭棗」。《毛傳》云：「棘者，棗也。」統言之也。故羊棗雖小而得稱棗。「槭棘小棘」，此是「槭棗小棗」之誤，不可不正。「小棘」之語尤爲不通。《說文解字注》云：「釋木」曰：「槭，酸棗。」《孟子》曰：「舍其梧楨，養其槭棗。」趙曰：「槭棗，小棗，所謂酸棗也。」《孟子》本作「酸棗」，宋刻《爾雅》及《玉篇》、《唐本草》又《本草圖經》皆可證。今本改作「槭棘」，非是。槭之言副貳也，爲棗之副貳，故曰「槭棗」。《本草經》曰：「酸棗，味酸平，主心腹寒熱，邪結氣聚，四肢酸疼，溫痺煩心不得眠。諸家皆云：似棗而味酸。」按：《齊民要術·種棗》第三十三云：「《孟子》嘗曰「槭棗」。《藝文類聚》引《孟子》作「養其槭棗」。則「槭棘」宜作「槭棗」是也。錢氏大昕《養新錄》云：「《爾雅》「槭，酸棗」。不聞槭棘爲小棗。梧、楨二物，則槭、棘必非一物。槭爲酸棗，棘即荆棘之棘也。」養其一指而失其肩背而不知也，則爲狼疾人也。」

注謂醫養人疾，治其一指而不知其肩背之有疾，以至於害之，此爲狼藉亂不知治疾之人也。

疏注「謂醫」至「人也」○正義曰：尋常

養身，即但養一指，不致失其肩背，惟疾病隱於肩背而見於一指，醫但見其指有疾而不能知疾之在肩背，徒治其指，而轉有傷害於肩背。《老子》云「輕則失本」，王弼注云：「失本謂喪身也。」《易》「東北喪朋」，《釋文》引馬注云：「喪，失也。」《國語·晉語》「而先紂喪」，韋注云：「喪，敗也。」《國策·秦策》云「紛彊欲敗之」，高誘注云：「敗，害也。」是失、喪、敗、害四字轉注，「失」即「害」也。趙氏讀「狼疾」爲「狼藉」而以「亂」釋之。《漢書·劉屈氂傳》云「事籍籍如此」，注云：「籍籍猶紛紛也。」《呂氏春秋·慎大》篇高誘注云：「紛紛，淆亂也。」《楚辭·憂苦》篇「心紛紛而不受」，王逸注云：「紛紛，憤亂也。」「狼藉」猶「紛紛」。害而不知，此醫之昏憤晉亂者矣。《滕文公上》篇「狼戾」，趙氏以爲「猶狼藉」，又云：「饒多狼籍，捐棄於地。」凡饒多則紛紛，故爲亂。而饒多亦爲豐盛，故《史記·陸賈傳》「名聲籍甚」，《漢書》注引孟康云：「言狼籍之甚。」《史記集解》引《漢書音義》云：「言狼籍甚盛。」盛與亂之訓不同，而皆本於饒多則一也。注中「醫養人疾」「不知治疾」兩「疾」字與經文「疾」字無涉。經文「疾」字，趙氏以「籍」字讀之也。飲食之人，則人賤之矣，爲其養小以失大也。飲食之人無有失

也，則口腹豈適爲尺寸之膚哉？」**注**飲食之人，人所以賤之者，爲其養口腹而失道德耳。如使不失道德，存仁義以往，不嫌於養口腹也，故曰：口腹豈但爲肥長尺寸之膚邪？亦爲懷道德者也。**疏**

注「如使」至「德者也」○正義曰：《爾雅·釋詁》云：「適，往也。」《國策·秦策》云「疑臣者不適三人」，高誘注云：「適音翅，翅與音同。不啻猶云不但也。」然則「適」如字，則爲之往之義；讀如翅，則爲音但之詞。趙氏既云「存仁義以往」，是以往釋適字；又云「口腹豈但爲肥長尺寸之膚邪」，直以但字代適字。然則趙氏兼存兩義也。飲食之人不以嗟來爲耻，故其往食也，人賤之。「存仁義而往」，如大烹以養聖賢，則「不家食吉，利有攸往」矣。謂其往因行仁義，非因貪口腹，故不爲尺寸之膚，爲仁義而飲食，則亦豈但爲口腹？兩讀皆可通，此所以兼存與？王氏引之《經傳釋詞》云：「家大人曰：《說文》『適，從疋音聲』。適、音聲相近，故古字或以適爲音。」

章指：言養其行，治其正，俱用智力。善惡相厲。是以君子居處思義，飲食思禮

也。**疏**「是以君子」至「禮也」○正義曰：《國語·楚

語》藍尹亹謂子西曰：「君子臨政思義，飲食思禮，同晏思樂，在樂思善。」昭公三十二年《左傳》云：「君子動則思禮，行則思義，不爲利回，不爲義疚。」

公都子問曰：「鈞是人也，或爲大人，或爲小人，何也？」**注**鈞，同也。言有大有小，何也？**疏**「鈞同也」○正義曰：僖公五年《左傳》「均服振振」，賈注、服注皆云：「均，同也。」《說文》金部云：「鈞，三十斤也。」土部云：「均，平徧也。」同爲平徧之義，鈞爲均之通借字，故訓同也。孟子曰：「從其大體爲大人，從其小體爲小人。」**注**大體，心思禮義；小體，縱恣情慾。曰：「鈞是人也，或從其大體，或從其小體，何也？」**注**公都子言人何獨有從小體也？曰：「耳目之官不思而蔽於物。物交物，則引之而已矣。心之官則思。思則得之，不思則不得也。比天之所與我者，先立

①「二」，按引文出三十一年，參沈校。

乎其大者，則其小者弗能奪也。此爲大人而已矣。」**注**孟子曰：人有耳目之官，不思，故爲物所蔽。官，精神所在也。謂人有五官六府。物，事也。利慾之事來交，引其精神。心官不思善，故失其道而陷爲小人也。比方天所與人情性，先立乎其大者，謂生而有善性也。小者，情慾也。善勝惡，則惡不能奪。**疏**注「人有」至「不能奪」○正義曰：《荀子·正名》篇云：「緣天官，形體色理以目異，聲音清濁調竽奇聲以耳異，甘苦、鹹淡、辛酸奇味以口異，香臭、芬鬱、腥臊、酒酸、^①奇臭以鼻異，疾養滄熱滑鉅輕重以形體異，說故喜怒哀樂愛惡欲以心異。心有微知，微知則緣耳而知聲可也，緣目而知形可也。然而微知必將待天官之當簿其類然後可也。五官簿之而不知，心微之而無說，則人莫不然，謂之不知，此所緣而以同異也。」又《天論》篇云：「耳目鼻口形，能各有接而不相能也，夫是之謂天官，心居中虛，以治五官，夫是之謂天君。」《呂氏春秋·貴生》篇云：「耳雖欲聲，目雖欲色，鼻雖欲芬香，口雖欲滋味，害於生則止。在四官者，不欲利於生者則弗爲。由此觀之，耳目鼻口不得擅行，必有所制。譬之若官職不得擅爲，必有所制。」高誘注云：「四官，

耳目鼻口也。制，制於心也，制於君也。」呂氏以耳目鼻口爲四官，心爲君，官制於君。《說文》六部云：②「官，吏事君也。」此心不在官之列也。《荀子·天論》以耳目鼻口形爲天官，以心爲天君，此義與呂氏同。其《正名》篇之天官即此天官，五官即此耳目鼻口形，不連心言，故「五官簿之不知」與「心微之無說」對言，是不列五官也。楊倞以耳目鼻口心爲五官，失荀子意矣。孟子稱耳目爲官，亦稱心爲官，蓋心雖能統耳目而各有所司，心不能代耳司聽，代目司視，猶耳目能聽能視而不能思。耳目不能思，須受治於心之思，心不能司聽司視，而非心之思則視聽不能不蔽於物。《廣雅·釋詁》云：「官，君也。」以其能治耳目之所司則爲君，以其各有所司則君亦是官。《禮記·聘義》云「精神見於山川」，注云：「精神，亦謂精氣也。」《大戴記·曾子天員》云：「陽之精氣爲神。」精氣在心爲思，在耳爲聽，在目爲視，以其各有所主爲官，以其各有所施爲事，《洪範》「敬用五事」是也。「物」之義爲事。耳目之視聽，事也；外來之利慾，亦事也。「物交物」謂以外來之利慾交於耳目之視聽。斯時若不以心

①「酒」，原誤作「酒」，今從沈校據《荀子》改。

②「官」，按引文出目部，參沈校。

之思治之，則視聽之事蔽於利慾之事。視聽之事所以蔽於利慾之事者，緣利慾之事交接於視聽之事，因而引誘此視聽也。《甲乙經》云：「鼻者，肺之官；目者，肝之官；口者，脾之官；舌者，心之官；耳者，腎之官。肺合大腸，為傳道之府；心合小腸，為受盛之府；肝合膽，為清淨之府；脾合胃，為五穀之府；腎合膀胱，為津液之府。少陰屬腎，上連肺，故將兩藏三焦為中瀆之府。水道出焉，屬膀胱，是孤之府。此六府之所合也。」心屬五藏，耳目屬五官，而耳目與五藏相表裏，心與六府相表裏。孟子以心與耳目同為官，故趙氏舉「五官」，連「六府」以明之。《周禮·春官·大師》注鄭司農云：「比者，比方於物也。」故以「比」為「比方」。阮氏元《校勘記》云：「此天之所以與我者」，廖本、閩、監、毛三本同。岳本、孔本、韓本此作比。按，朱子《文集》云：「舊官本皆作比字，注中此乃亦作比方。」又集注云：「舊本多作比，而趙注亦以比方釋之；今本既多作此，而注亦作此乃，未詳孰是。」趙注既云「比方」，安可因近本之譌而疑之？上文官有二，故比方之而先立乎其長者，文意甚明。《漢書·賈誼傳》「比物此志也」，如淳曰：「比謂比方也。」今多譌為「此物」。《公羊傳》注「父老比三老孝弟官屬」，今本比亦譌此。「此乃天所與人情性」，廖本、閩、監、毛三本同。岳本、孔本、韓本

「此乃」作「比方」。按，比方是。「倪氏思寬《二初齋讀書記》云：「此天之所以與我者」，此字舊本作比。依舊本，比方之中，即含下大小分列之義，孟子此節詳辨耳目之官、心之官，原取比方之意，舊本自不可易。」王氏引之《經傳釋詞》云：「《說文》曰：『皆，俱詞也。從比從白。』徐鍇曰：『比，皆也。』《孟子》：『比天之所以與我者，先立乎其大者，則其小者弗能奪也。』家大人曰：言耳目心思皆天之所與我者，而心為大。趙注以比為比方，謂比方天所與人性情，失之。或改比為此，改趙注比方為此乃，尤非。」謹按：孟子之意自以大者指心，小者指耳目。「小者不能奪」，是「思則得」也。趙氏以大者指性善，小者指情慾，情慾即耳目之蔽於物。緣性善，故心能思。立其大者，則心之思有以治耳目之聽視；不立其大者，則耳目之聽視有以奪心之思。趙氏以性情言之，蓋小固屬耳目，大亦不離耳目。以心治耳目則能全其善性，即為養其大體；以耳目奪心則蔽於情慾，即為養其小體。趙氏恐人舍耳目之聽視而空守其心思，故不以心與耳目分大小，而以善性、情慾分大小。此趙氏深知孟子之旨，有以發明之也。「善勝惡」即解「立」字，非謂天以善性與人即是立，不待操存，自能使小者不奪也。戴氏震《孟子字義疏證》云：「人之才，得天地之全能，通天地之全德，其見於

思乎？思誠，則立乎其大矣；耳目之官不思，物之未交，沖虛自然，斯已矣。心之官異是，人皆有天德之知根於心，自誠明也；思中正而達天德則不蔽，不蔽則莫能引之以入於邪，自明誠也。耳之能聽也，目之能視也，鼻之能臭也，口之知味也，物至而迎而受之者也；心之精爽，馴而至於神明也，所以主乎耳目百體者也。聲之得於耳也，色之得於目也，臭之得於鼻也，味之得於口也，耳目百體之欲不得則失其養，所謂養其小者也；理義之得於心也，耳目百體之欲之所受裁也不得則失其養，所謂養其大者也。「人之所以異於禽獸也者幾希」。雖犬之性、牛之性，當其氣無乖亂，莫不沖虛自然也，動則蔽而罔罔以行。人不求其心不蔽，於是惡外物之惑己而強禦之，可謂之「所以異」乎？是以老聃、莊周之言尚無欲，君子尚無蔽。尚無欲者，主靜以爲至；君子達天德，秉中正，欲勿失之盈以奪之。苟焉以求靜，而欲之剪抑竄絕，君子不取也。」程氏瑤田《通藝錄·論學小記》云：「孟子謂「心之官則思，先立乎其大者」，謂心能主乎耳目，非離乎耳目之官而專致力於思。然則所謂「先立乎其大者」，舍視聽言動，無下手處也。不知循物，寂守其心，此異學之所以岐也。吾學則不然，吾於物之不當爲者而斷乎其不爲，此吾志之定於其先而立乎其大者。而至於耳目交物之時，

而果能造不爲之意，此之謂「無惡於志」，此之謂「慎獨」。」
章指：言天與人性，先立其大。心官思之，邪不乖越。故謂之大人也。

孟子曰：「有天爵者，有人爵者。仁義忠信，樂善不倦，此天爵也；公卿大夫，此人爵也。」**注**天爵以德，人爵以祿。古之人脩其天爵而人爵從之，今之人脩其天爵以要人爵。既得人爵，而棄其天爵。則惑之甚者也。**注**人爵從之，人爵自至也。以要人爵，要，求也。得人爵，棄天爵，惑之甚也。**疏**注「要求也」○正義曰：《呂氏春秋·勸學》篇「以要不可必」，又《直諫》篇「將以要利矣」，高誘注並云：「要，求也。」終亦必亡而已矣。**注**棄善忘德，終必亡之。

章指：言古脩天爵，自樂之也；今求人爵，以誘時也。得人棄天，道之忌也；惑以招亡，小人事也。

孟子曰：「欲貴者，人之同心也。人人有貴於己者，弗思耳。人之所貴者，非良貴也。趙孟之所貴，趙孟能賤之。」**注**人皆同欲

貴之心。人人自有貴者在己身，不思之耳。在己者謂仁義廣譽也。凡人之所貴富貴，故曰非良貴也。趙孟，晉卿之貴者。能貴人，能賤人。人之所自有者，他人不能賤之也。**疏**注「凡人」至「賤之也」○正義

曰：「良」之訓爲善，毛、韓之傳《詩》，鄭氏之注《禮記》《周禮》《箋》《詩》，何氏注《公羊傳》，韋氏注《國語》，高氏注《呂氏春秋》，許氏《說文解字》，張氏《廣雅》，司馬氏注《莊子》，某氏傳《尚書》，孟康、如淳注《漢書》，孔晁注《周書》無不然，故「良心」即指仁義之心，謂善心也。此「良貴」，趙氏明指「仁義廣譽」，則亦當訓爲善，謂貴之善者也。人所貴者富貴，富貴之貴不如仁義之貴良也。《易·文言傳》云：「元者，善之長也。」元有善義，亦有首義，故《爾雅·釋詁》云：「元、良，首也。」良訓善，因亦爲元首。此善於彼，則此居彼上，故《左傳》所云「良醫」即《周禮》所云「上醫」，若曰此醫之善者，亦即醫之首也。《山海經·西山經》「瑾瑜之玉爲良」，注云：「良言最善也。」最善，善之最，即善之長，善之長即善之甚，

故趙氏解「良知」、「良能」爲「甚知」、「甚能」，皆由善之義引申者也。「人人所自有」，此是解「人人有貴於己者」，言仁義不待外求，富貴則趙孟能貴能賤。此仁義之貴比較富貴之貴所以爲良，非良字有「自有」之訓也。「良貴」猶云最貴，「非良貴」猶云非最貴也。自儒者誤以「良」爲「自有」之訓，遂造爲「致良知」之說。六書訓詁之學不明，其害如此。周氏柄中《辨正》云：「孫奕《示兒編》：『晉有三趙孟，趙朔之子曰武，謚文子，稱趙孟。趙武之子曰成，趙成之子曰鞅，又名封父，謚簡子，亦稱趙孟。趙鞅之子曰無恤，謚襄子，亦稱趙孟。』按，吳斗南云：『趙盾字孟，故其子孫皆稱趙孟。』」《詩》云：「既醉以酒，既飽以德。」言飽乎仁義也，所以不願人之膏粱之味也；令聞廣譽施於身，所以不願人之文繡也。」**注**《詩》《大雅·既醉》之篇。言飽德者，飽仁義於身，身之貴者也，不願人之膏粱矣。膏粱，細粱如膏者也；文繡，繡衣服也。**疏**注「詩大」至「服也」○正義曰：引《詩》在《大雅·既醉》篇第一章。《素問·生氣通天論》云：「高粱之變」，王冰注云：「高，膏也。粱，梁也。」又《腹中論》云：「夫子致言熱中消中，不可服高梁。夫熱中消中者，皆富貴人

也。今禁高粱，是不合其心。」注云：「高，膏，梁，米也。」《國語·晉語》：「樂伯請公族大夫，公曰夫膏梁之性難正也，」韋昭注云：「膏，肉之肥者，梁，食之精者。言食肥美者率多驕放。」此與《素問·義合》。富貴之人，不徒食精米，必兼以肥，故《左傳》曹劌云「肉食者鄙」，肉即膏，食即梁也。《禮記·喪大記》云「不辟梁肉」，肉即指膏也。《說文》肉部云：「膏，肥也。」米部云：「梁，米名也。」明分爲二。趙氏言「細梁如膏」，則專指梁米而言。周氏柄中《辨正》云：「趙注：『膏梁，細梁如膏者。』此猶《山海經》之『膏菽』、『膏稻』、『膏黍』、『膏稷』，郭注謂『味滑如膏者』也。按『膏梁』對下『文繡』，文是衣，繡是裳，則膏、梁亦當是二物。」謹按：《禮記·月令》仲秋「文繡有恒」，注云：「文謂畫也。祭服之制，畫衣而繡裳。」孔氏正義云：「《尚書·咎繇謨》云『予欲觀古人之象，日月、星辰、山龍、華蟲，作會』，是衣畫也；『宗彝、藻火、粉米、黼黻、絺繡』，是裳繡也。畫色輕，故在衣以法天；繡色重，故在裳以法地也。」此周氏所本也。乃趙氏云「文繡，繡衣服也」，亦不分爲二。劉熙《釋名·釋言語》云：「文者，會集衆采以成錦繡，會集衆文以成詞誼，如文繡然也。」又《釋采帛》云：「繡，修也。文修修然也。」是文、繡不分也。《說文》糸部云：「繪，會五采繡也。《虞書》曰：『山龍華蟲』

作繪。」段氏玉裁《說文解字注》云：「繪，會疊韻。今人分《皋陶謨》『繪繡』爲二事，古者二事不分，統謂之設色之工而已。續訓畫，①繪訓繡。」「絺，繡文如聚細米也。繡，謂畫也。今《皋陶謨》作『粉米』，許見壁中古文作『粉絺』。黼部云：「黼，畫粉也。」此云：「絺，繡文如聚細米也。」皆古文《尚書》說也。」孫氏星衍《五服五章今文論》云：「《大傳》曰：『山龍，青也。華蟲，黃也。作繪，黑也。宗彝，白也。藻火，赤也。』《說文》：『黼，沃黑色。』『嬪，女黑色。』義皆爲黑。會繡此四色於玄衣，合爲五色，故於黑色獨云『作繪』也。《大傳》又云：『天子衣服，其文華蟲，作繪，宗彝，藻火，山龍，諸侯作繪，宗彝，藻火，山龍，子男宗彝，藻火，山龍，大夫藻火，山龍，士山龍。』自天子至士皆服山龍。《周禮·節服氏》：「掌祭祀朝覲，袞冕六人，維王之大常。」是下士亦服袞龍之證，周時沿古制也。士山龍亦在玄衣，故《禮器》云「士玄衣纁裳」也。《爾雅》云：「袞，黻也。」《廣雅》云：「山龍，彰也。」《說文》黼字解云：「以山龍華蟲爲袞衣。」袞爲畫龍之衣，山龍爲五等共有之章服，故《爾雅》、《廣雅》單舉之

①「訓」，原誤作「謂」，今從沈校據《說文解字注》改。下一「訓」字同。

以該華蟲等五章服色。天子備五色，得服華蟲，《大戴禮·五帝德》稱「帝嚳服黃黼黻衣」，言天子有華蟲，獨得服黃。《說文》：「黼、黼、黻三字皆從黼，黼即刺繡。黼爲白與黑相次文，黻爲黑與青相次文，黼爲畫粉，繅爲繡文如聚米，又繡爲五采備也，是黼、黼、繅、黻皆繡文。」《說文》云：「繪，會五采繡也。」言玄衣黑衣，會山龍青、華蟲黃、宗彝白、藻火赤而成五采。云「彝，從系，系，綦也」者，言繡文如彝器之博綦文而艾白色。云「藻，玉飾，如水藻文」者，言繡文如冠玉之文。謂之藻火，即色赤而文似藻。《史記·夏本紀》以「文繡」二字釋「山龍」至「絺繡」經文。「文」亦畫也。《大戴禮》稱「黃帝黼黻衣大帶黼裳」，《孟子》稱「舜被衿衣」，趙氏注：「衿，畫也。被畫衣黼黻絺繡也。」《史記·五帝本紀》云：「賜舜絺衣與琴。」以衿衣爲絺衣者，刺繡於絺。《說文》以衿爲玄服，可證。玄衣加繪繡，故亦謂之玄衿。《五帝本紀》稱「堯黃收純衣」，純衣即黃黼黻衣。言其玄質則曰純，言其畫采有華蟲則曰黃。刺繡之事，以紉葛之精細者爲質布，畫山龍等五章於上而繡之。所謂畫衣，蓋畫而繡之。經云「以五采彰施於五色」，五色，畫也；五采，繡也。故《月令》云：「命婦官染采。」以黼黻之文刺於山龍等五章空隙之處，復分畫其界絨，俾五色不能相亂，故謂之爲黼，視其文如聚米也。《荀

子·正論》篇論天子則「服五采，雜間色，重文繡」。云五采，如今文說山龍等五色也；間色，如黼黻各有二色相間也，重文繡謂衣裳俱用之重襲也。經文「山龍、華蟲、作繪、宗彝、藻火」在上者，因刺繡必先布畫五章，而後刺粉米黼黻之文。衣則以黼黻加山龍以下五等，裳則黃質而有赤色，稱爲纁裳，僅用粉米黼黻而已。《王制》正義引鄭注《易·下繫》云：「南方色赤，黃而兼赤，故爲纁也。」合之《考工記》及《說文》，黼爲白黑相次，黻爲黑青相次，纁裳不必有五章而五色已備。詩人謂之繡裳，繡是備五采之名也。」江氏聲《尚書集注音疏》云：「《說文》：黼，畫粉也。衛宏說。」系部：「繅，繡文如聚細米也。」蓋繡必先畫，以粉畫爲聚米之形，乃後依其畫粉而刺之，故謂之黼。但黼纁實爲一章，若用畫粉爲解，似分黼纁爲二，故不別解黼義而合爲黼纁也。然則繡皆先用粉畫之，獨於繅言黼者，舉一以見例也。」

章指：言所貴在身，人不知求；膏梁文繡，己之所優。趙孟所貴，何能比之？是以君子貧而樂也。

孟子曰：「仁之勝不仁也，猶水勝火。

今之爲仁者，猶以一杯水救一車薪之火也。

不熄則謂之水不勝火，此又與於不仁之甚者

也，亦終必亡而已矣。」**注**水勝火，取水足以制

火。一杯水何能勝一車薪之火也？以此謂水不勝

火，爲仁者亦若是，則與作不仁之甚者也。亡猶無

也。亦終必無仁矣。**疏**注「爲仁」至「仁矣」○正義曰：

「亦若是」者，因杯水之仁不能救輿薪之不仁，則謂之不仁勝仁也。《儀禮·士昏禮記》云「我與在」，注云：「與猶兼也。」

《廣雅·釋詁》云：「兼，同也。」此又與於不仁之甚者也，

即「此又同於不仁之甚者也」，「則與作不仁之甚者也」，即則同作不仁之甚者也。此讀爲預。近解作助，則讀如字。《國

策·秦策》云「不如與魏以勁之」，高誘注云：「與猶助也。」

惟其信不仁而屈仁，則足以助不仁。惟其助不仁，則雖有杯水之仁亦同於不仁之甚，而此所有杯水之仁且終亦歸於不

仁，則不特同之而已。《說文》亡部云：「無，亡也。」亡、無二

字相通。惟其喪亡，所以無也。趙氏讀「亡」爲無，以爲「終必無仁」，蓋既自以爲仁不勝不仁，則爲仁之心沮而爲不仁

之意萌，久而並此杯水之仁而亦喪之，則終於無仁而已矣。

然則當不能勝之時，須自知仁之本微，發憤而充之擴之，則不勝進而爲勝，何至於亡乎？

章指：言爲仁不至，不反諸己，謂水勝

火，熄而後已。不仁之甚，終必亡矣。爲道

不卒，無益於賢也。**疏**「無益於賢也」○正義曰：

《荀子·正論》篇云：「今宋子不能解人之惡侮而務說人以勿辱也，豈不過甚矣哉？」金舌弊口，猶將無益也。不

知其無益則不知，知其無益也，直以欺人則不仁。不仁不

知，辱莫大焉。將以爲有益於人，則與無益於人也。趙氏

以孟子言「與於不仁之甚」猶荀子言「與無益於人」，故用

此語以明「與」字之義。宋子言見侮之不辱，將以爲有益於人，不知同於無益於人，此言仁不勝不仁者自以爲有

仁，不知同於不仁之甚也。趙氏每以注中未詳者於《章

指》補明，若此尤甚與矣。

孟子曰：「五穀者，種之美者也，苟爲不

熟，不如荑稗。夫仁，亦在乎熟之而已矣。」

注熟，成也。五穀雖美，種之不成，不如荑稗之草，

其實可食。爲仁不成猶是也。**疏**注「熟成」至「是也」

○正義曰：《呂氏春秋·明理》篇「五穀萎敗不成」，又《貴信》篇「則五種不成」，高誘注並云：「成，熟也。」是「熟」即「成」也。《齊民要術·種穀》篇引《孟子》「不如稊稗」，古從夷從弟之字多通。《爾雅·釋草》云「稊莢」，注云：「稊似稗，布地生穢草。」邵氏晉涵《正義》云：「稊一名莢，《孟子》云「不如莢稗」，莢即稊也。《莊子·知北遊》云「道在稊稗」，李顥以爲二草名。」^①稊有米而細，故別於秕。《秋水》篇云「似稊米之在太倉」，司馬彪云：「稊米，小米也。」《一切經音義》引《爾雅注》云：「莢似稗，布地穢草也。」今之稊子是也。^②按，稊似稗耳，非即稗也。稊與稗俱堪水旱，種無不熟，北方農家種之以備凶年。「程氏瑤田《通藝錄·九穀考》云：「《說文》：「稗，禾別也。」稗似禾而別於禾之穀。余見京東州縣農家種之，莖勁采不下垂，略似粟，但穀色近黑耳。宋靖康之亂，沒爲奴婢者使供作務，人月支稊子五斗，舂得米斗八升。」^③由是言之，稊斗才得米三升六合耳。而農人種之者，所以備凶年。汜勝之云「稊堪水旱，種無不熟」是也。又《說文》：「稊，黍屬。」稊音卑，今穀名中無卑音者，余以意斷之曰「禾別曰稊」、「黍別曰稊」而未敢信也。丙申歲，居京師，庭中芒種後生一本數十莖，貼地橫出，至生節處

乃屈而上聳，節如鶴膝，莖淡紫色，葉色深綠，每一莖又節節抽莖成數穗，穗疏散，至大暑後而穀熟，光澤如黍，余以爲此必稊也。見農人問之，則曰「稊也」。余曰：「農家所種稊似粟，與此殊不類。」則對曰：「此野稊也，亦曰水稊。」余乃檢《玉篇》、《廣韻》中稊皆有稊音，稊爲黍別無疑也。稊、稊並宜卑溼地，又視禾黍爲卑賤，故字皆從卑。梁太清三年，鄱陽王範屯濡須，糧乏，采菰稊菱藕以自給。其所謂稊即野稊也。曹植《七啓》云「芳菰精稊」，亦指野稊。謂之精者，修辭家之美稱，與《召旻》詩毛氏傳所云「彼宜食蔬，今反食精稊」者異義。謹按：「不如稊稊」猶孔子言「博奕猶賢」。孔子非教人學博奕，孟子非教人種稊稊也。解者謂是理消物長之喻，「不如莢稊」是天理之槁枯，不勝人欲之長旺。非孟子義也。

章指：言功毀幾成，人在慎終。五穀不熟，莢稊是勝。是以爲仁必其成也。

①「顥」，原作「氏」，今從沈校據《爾雅正義》改。

②「之」，原誤作「子」，今據《爾雅正義》及經解本改。

③「斗」，原脫，今從沈校據《通藝錄》補。

孟子曰：「羿之教人射，必志於彀。學

者亦必志於彀。」**注**羿，古之工射者。彀，張也。

張弩向的者，用思專時也。學者志道，猶射者之張也。

疏「必志於彀」○正義曰：阮氏元《校勘記》云：「『必志於彀』，孔本、韓本、《考文》占本、足利本同。閩、監、毛三本志作至，下同。浦鏜云：「志誤至。」「翟氏灝《考異》云：

「注疏本志俱作至。宋刻《九經》下一志字作至，《南軒孟子說》上一志字作至。按，《章句》曰：「張弩向的，用思專時也。學者志道，猶射者之張也。」則原本宜皆「志」字。南軒

注「羿教人使志於彀」，則其上一正文亦不應作至。」○注「羿古」至「張也」○正義曰：《說文》弓部云：「弓，帝嚳射官，夏

少康滅之。《論語》曰：「弓善射。」段氏玉裁《說文解字注》

云：「邑部窮下云：『夏后時諸侯，夷羿國也。』」羽部羿下云：「亦古諸侯也。」皆即此。弓，帝嚳射官，為諸侯，自鉏遷

於窮石，所謂「有窮后羿」也。弓與羿古蓋同字。而堯時射

師羿十日者，高誘云：「此堯時羿，非有窮后羿。」按：《說

文》弓部又云：「彀，張弩也。」弩，弓有臂者。」《周禮》四弩：爽弩、庾弩、唐弩、大弩。《毛詩·小雅·賓之初筵》篇「發彼有的」，傳云：「的，質也。」《禮記·射義》引此《詩》，注

云：「的，謂所射之識也。」弓弩既張則心用於中的，故志專向於的。趙氏謂用思專於張弩之時，非謂用志於張弩也。《商

書·盤庚》上云「若射之有志」，鄭氏注云：「夫射者張弓屬矢，而志在所射必中，然後發之。」此經云「必志於彀」，與《書》義同。趙氏注亦與鄭同也。阮氏元《校勘記》云：「張弩向的，

所謂「若虞機張，往省括于度則釋」也。」大匠誨人，必以

規矩。學者亦必以規矩。」**注**大匠，攻木之工。

規，所以為圓也；矩，所以為方也。誨，教也。教人必以規矩。學者以仁義為法式，亦猶大匠以規矩者也。

疏注「規所以為圓也」○正義曰：孔本無也字。○注「誨教也」○正義曰：《說文》言部云：「誨，曉教也。」

章指：言事各有本，道有所隆。彀張、

規矩，以喻為仁。學不為仁，猶是二教，失其法而行之也。

姪廷琮延弼校字

孟子正義卷二十三終

孟子正義卷二十四

江都縣鄉貢士焦循誤集

孟子卷第十二

告子章句下凡十六章。

任人有問屋廬子曰：「禮與食孰重？」

注任國之人問孟子弟子屋廬連。問二者何爲重？**疏**注「任國」至「爲重」○正義曰：閻氏若璩《釋地》云：「任，

國名，太皞之後，風姓。漢爲任城縣，後漢爲任城國，今濟寧州東任城廢縣是。去古鄒城僅百二十里，宜屋廬子明日即可往問。《禮》稱宰我無宿問，連不誠有予之風哉？」翟氏灝《考異》云：「《廣韻》廬字下注云：『《孟子》有屋廬著

書。」①鄭樵《通志·氏族略》云：「晉賢人屋廬子著書，言彭、聃之法。」按，屋廬子未聞著書，即在當時有之，孟子之徒豈應言彭、聃之法？或爲別一人與？」曰：「禮重。」**注**答曰：禮重。「色與禮孰重？」曰：「禮重。」**注**重如上也。曰：「以禮食則飢而死，不以禮食則得食，必以禮乎？」親迎則不得妻，不親迎則得妻，必親迎乎？」**注**任人難屋廬子，云：「若是，則必待禮乎？」**疏**「以禮食」○正義曰：閻氏若璩《釋地三續》云：「所謂禮食者，《坊記》云：『故食禮，主人親饋則客祭，主人不親饋則客不祭。故君子苟無禮，雖美不食焉。』」按：襄公三年《左傳》云：「晉侯以魏絳爲能以刑佐民矣，反役，與之禮食，使佐新軍。」《國語·晉語》亦有此文，韋昭注云：「禮食，公食大夫之禮。」孔氏《左傳正義》云：「與之禮食者，若公食大夫禮，以大夫爲賓，公親爲之特設禮食。」《儀禮·公食大夫禮》：「宰夫自東房授醯醬，公設之。公立于序內，西鄉。」注云：「不立阼階上，示親饌。」又：「大

①「廬」，原誤作「廬」，今據《四書考異》及《廣韻》改。

羹滯不和，實于鐙。宰右執鐙，左執蓋，由門入，升自阼階，盡階不升堂，授公。公設之于醬西。」又：「宰夫授公飯粱，公設之于滯西。」此即親饋之禮也。又「賓升席坐，取韭蒞以辯擣于醯，上豆之間祭」云云。又：「賓坐席末取粱即稻，祭于醬滯間。」此即主人親饋則客祭之禮也。○「親迎」○正義曰：周氏柄中《辨正》云：「親迎之禮，自諸侯至士庶皆行之。天子之親迎則禮無明文。《左氏》謂「天子不親迎」，《公羊》謂「天子亦親迎」，後儒或從《左氏》或從《公羊》，愚獨取唐陸淳「尊無二上不當親迎」之說以爲定論。或言無禮文可徵，不知禮固有即此可以通彼者。《士昏禮》「父醮子而命之迎，若宗子父母皆沒則不親迎，以無命之者也。由此推之，則天子之不親迎可知矣。或問：然則諸侯即位而娶，無命之者，亦不親迎乎？」曰：是不然。諸侯雖無父命，有王命。古者諸侯之娶，告於天子，天子命之，故《雜記》云：「夫人之不命於天子，自魯昭始也。」夫有天子之命，則親迎焉，宜也，若天子，則真無命之者也。」屋廬子不能對。明日，之鄒，以告孟子。孟子曰：「於，答是也，何有？」**注**於，音烏，歎辭也。何有爲不可答也？

疏注「於音」至「答也」○正義曰：《說文》云：「烏，孝鳥也。」

孔子曰：「烏，吁呼也。」取其助氣，故以爲烏呼。於象古文烏省。於即於字。然則烏，於本一字，後人以於通于，故趙氏音烏。「音烏」猶「讀爲烏」也。以爲「歎辭」，即烏呼之辭也。《論語·里仁》篇「能以禮讓爲國乎，何有」，何氏注云：「何有，言不難也。《雍也》篇「於從政乎，何有」，皇氏疏引衛瓘云：「何有者，有餘力也。」若以《雍也》篇「於從政乎，何有」，則「於」如字，不讀烏。若曰：「於答此任人之說，何難之有？」趙氏言「何有爲不可答也」，則謂任人設難爲不可答，正與何氏解「何有」爲「不難」者相反。《後漢書·曹世叔妻傳》引《論語》曰「能以禮讓爲國，於從政乎何有」，注云：「何有，言若無有。」此似與趙氏之意相近。蓋趙氏謂揣本齊末，「知其大小輕重乃可言」，可言即可答，此歎其不可答，謂未能揣本齊末，知其大小輕重也。以「何有」爲「不可答」，故斷「於」字爲句而以爲歎辭也。不揣其本而齊其末，方寸之木可使高於岑樓。金重於羽者，豈謂一鈞金與一輿羽之謂哉？取食之重者與禮之輕者而比之，奚翅食重？取色之重者與禮之輕者而比之，奚翅色重？**注**孟子言夫物，當揣量其本以齊等其末，知其大小輕重乃可

言也。不節其數，累積方寸之木，可使高於岑樓。岑樓，山之銳嶺者。寧可謂寸木高於山邪？金重於羽，謂多少同而金重耳，一帶鉤之金豈重一車羽邪？如取食色之重者比禮之輕者，何翅食色重哉？翅，辭也。若言何其不重也？

疏注「夫物」至

「山邪」○正義曰：《方言》云：「度高爲揣。」昭公三十二年《左傳》云「揣高卑」，杜預用《方言》解之。度與量義同，「揣量」即揣度也。《說文》立部云：「搏，等也。從立，專聲。」《春秋傳》曰：「搏本肇末。」段氏玉裁《說文解字注》云：「等者，齊簡也，故凡齊皆曰等。」《齊語》「搏本肇末」，韋昭注云：「搏，等也。肇，正也。謂先等其本以正其末。」孟子曰「不揣其本而齊其末」，揣蓋搏之假借字。趙注「揣量」，似失之。木部揣下云：「一曰度也。」《孟子》正當從木作揣。韻書謂稱量曰「故數」，丁兼、丁括反，即搏語之轉也。王氏念孫《廣雅疏證》云：「《方言》：『岑，高也。』《爾雅》：『山小而高，岑。』《孟子·告子》篇：『可使高於岑樓』，趙岐注云：『岑樓，山之銳嶺者。』《釋名》：『岑，嶰也。嶰嶰然也。』岑、嶰聲相近，故《呂氏春秋·審忌》篇「齊攻魯求岑鼎」，《韓非子·說林》篇作「讒鼎」。讒與岑皆言其高也。《說文》：

「厰，崑也。」又云：「崑，山巖也。讀若吟。」僖三十三年《穀梁傳》云：「必於穀之巖崑之下」，《楚辭·招隱士》「崑崙嵒嵒兮」，上音欽，下音吟。又云：「狀貌崑崑兮峨峨」，張衡《思玄賦》云「冠崑崑其映蓋兮」。合言之則曰岑崑，《說文》「山之岑崑也」。《漢書·司馬相如傳》「岑崑參差」，《史記》作「岑巖」，《揚雄傳》「玉石崑崑」，蕭該《音義》引《字詁》云：「崑，古文岑字。」張衡《南都賦》「幽谷崑崑」，上音岑，下音吟。嵒康《琴賦》「崔嵬岑崑」。並字異而義同。《釋丘》：「培、塿，冢也。」《方言》云：「冢，秦晉之間謂之墳，或謂之培，或謂之塿，或謂之塚，或謂之塿，或謂之壠，自關而東謂之丘，小者謂之塿，大者謂之丘。」培亦高貌也。《風俗通義》云：「部者，阜之類也。今齊魯之間，田中少高印者名之爲部。」義並與培同。塿亦高貌也，趙注「岑樓，山之銳嶺者」，義與塿同。《方言》注云：「培塿，亦堆高之貌。」因名之也。培、塿、塿，聲之轉也。冢謂之塿，亦謂之培塿，塿謂之甌，亦謂之甌甌。北陵謂之西隄，小山謂之部婁，義並相近也。趙氏謂「不節其數，累積方寸之木」，「節其數」謂但以一木爲節，「累積」，譬如

① 「段氏」至「注云」，原無，今從沈校據《說文解字注》及全書文例補。

岑樓高一丈，則累積此木百餘，即高過於一丈矣。方寸之木本不能高於岑樓，今累積之，故可使高也；猶食色本不能重於禮，今變通之，故可使之重也。周氏柄中《辨正》云：「寸木高於岑樓，猶《韓非子》所謂立尺材於高山之上。」按：近時通解如是，與趙氏義異。○注「一帶鉤之金」○正義曰：孔氏廣森《經學卮言》云：「《晏子春秋》曰：『大帶重半鈞，烏屨倍重。』鄭君說，東萊稱以大半兩爲鈞。然則帶鉤金半鈞，才重三分兩之一。」○注「翅辭也」至「重也」○正義曰：阮氏元《校勘記》云：「翅辭也者，翅是語辭，即不啻也。《說文》口部云：『啻，語時不啻也。』奚翅、不啻，猶《史》《漢》之言『夥頤』。或析翅字訓但，誤矣。注云『若言何其重也』，正謂食色之重者。後人添不字，遂不可解矣。」段氏玉裁《說文解字注》云：「疵，病不翅也。翅同啻，口部啻下云：『語時不啻也。』《倉頡篇》曰：『不啻，多也。』《世說新語》云：『王文度弟阿，至惡乃不翅。』晉宋間人尚作此語。古書或言不啻，或言奚啻，啻皆或作翅。《國語》云『奚翅其聞之也』，韋注云：『奚，何也。何啻，言所聞非一也。』《孟子》『奚翅色重』，趙注：『翅，辭也。若言何其重也。』今刻本作『何其不重也』，誤。」往應之曰：「珍兄之臂而奪之食則

得食，不珍則不得食，則將珍之乎？踰東家牆而搜其處子則得妻，不搜則不得妻，則將搜之乎？」**注**教屋廬子往應任人如是。珍，戾也，搜，牽也。處子，處女也。則是禮重食色輕者也。**疏**注「珍戾」至「輕者也」○正義曰：王氏念孫《廣雅疏證》云：「珍，整也。珍，《玉篇》音火典切，「引戾也。《方言》：「軫，戾也，郭璞注云：『相了戾也。江東音善。』《說文》：「軫，轉也。《考工記》：「弓人『老牛之角軫而昔』，鄭衆注云：「軫，讀如軫轉之軫。《釋文》：「軫，劉徒展反，許慎尚展反，角絞縛之意也。《孟子》：「告子《篇》『軫兄之臂而奪之食』，趙岐注云：「軫，戾也。《音義》：「軫，張音軫，又徒展反。《淮南子》：「原道訓『扶搖軫抱，羊角而上』，高誘注云：「軫抱，了戾也。軫讀與《左傳》感而能軫者同。《釋訓》云：「軫，轉戾也。《並聲近而義同。《說文》：「戾，曲也。《盤，弼戾也。《盤與戾通。《音義》云：「搜，音婁。《文選》琴賦《注》引劉熙注云：「搜，牽也。《趙氏與劉同。《說文》牛部云：「羣，引前也。《毛詩》：「魏風·山有樞」弗曳弗

婁」，①傳云：「婁，亦曳也。」《釋文》引馬云：「牽也。」《楚辭·怨思》篇「曳慧星之皓旰兮」，注云：「曳，引也。」摟之爲牽，即婁之爲曳也。《爾雅·釋詁》云：「摟，聚也。」郭璞注云：「摟猶今言拘摟，聚也。」《說文》手部云：「摟，曳聚也。」許之言「曳聚」猶郭言「拘摟聚」。曳聚者，牽引使聚合也。摟必兼曳、聚二義，而《爾雅》言聚以見曳，《毛傳》言曳以見聚，《說文》備其義耳。《文選·射雉賦》云「來若處子」，徐爰注云：「處子，處女也。」莊周云：「藐姑射之山有神人居，綽約若處子。」善曰：《司馬兵法》曰：「始如處女。」莊周見《逍遙遊》，彼《釋文》云：「處子，在室女也。」《易·咸》九三傳云「咸其股，亦不處也」，虞翻注云：「巽爲處女。」凡士與女未用，皆稱處矣。

章指：言臨事量宜，權其輕重。以禮爲先，食色爲後，若有偏殊，從其大者。屋廬子未達，故譬摟、紵也。

曹交問曰：「人皆可以爲堯舜，有諸？」

孟子曰：「然。」**注**曹交，曹君之弟。交，名也。答

曰然者，言人皆有仁義之心，堯舜行仁義而已。**疏**

注「曹交」至「名也」○正義曰：王應麟《困學紀聞》云：「《左傳》哀公八年宋滅曹，至孟子時曹亡久矣，曹交蓋以國爲氏者。」惠氏士奇《春秋說》云：「曹滅於哀之八年，復見於哀之十四年。」宋向魴入於曹以叛，杜注「曹宋邑」，非也。曹伯爵而當甸服，故曰「曹爲伯甸」。其國雖小，豈徒一邑哉？蓋宋雖滅曹，仍爲附庸於宋，故至戰國而尚有曹君。趙岐注《孟子》曰：「曹交，曹君之弟。」然則曹與滑皆滅而仍存者也，故《春秋》言人不言滅者，以此。「閭氏若璩」《釋地》續云：「楚簡王十四年越滅郢，後八十四年楚滅越。郢實爲楚所有，乃頃襄王十八年有鄒、費、郟、邲四國，則郟係重封者。薛任姓，雖未知爲誰所滅，而齊湣王三年以封田嬰，故《紀年》稱「薛子嬰來朝」。其子文，《戰國策》、《史記》並稱「薛公後」，中立爲諸侯，無所屬，非滅薛之後復有薛乎？又中山本鮮虞國，一滅於魏文侯十七年癸酉，再滅於趙惠文三年乙丑，相距百一十三年，中雖未詳知何年復國及何以復國，要中山之後有中山，載世家、列傳者班班也。安知曹滅於宋在

①「魏」，按，《山有樞》在《唐風》，參沈校。

春秋哀八年，下到孟子居鄒時已一百七十餘年，不更有國於曹者？交爲其介弟，觀其言願因鄒君假館舍，備門徒，儼然滕更挾貴之風，孟子則麾而去之，故趙岐以爲曹君之弟，非無謂也。」按：二說一以爲曹雖滅而仍爲附庸，一以爲曹滅後有國於曹者，皆以爲實有曹君，交實爲曹君之弟，與趙氏注相引申，而辨王氏「曹亡久矣」之說。毛氏奇齡《經問》云：「盛唐問：《孟子》曹交，趙岐注「曹君之弟」，按，《春秋》哀八年「宋人人曹」，《左傳》竟云「滅曹，執曹伯以歸」，如此則孟子時已無曹矣。其曰「曹君之弟」何居？得非經祇書「人」，原未嘗滅乎？曰：經有書滅而並未滅者，定六年「鄭帥師滅許」是也；有書入而即是滅者，此「宋人人曹」是也。《史記·曹世家》載「曹伯陽十五年宋滅曹，執曹伯陽及公孫彊以歸而殺之，曹遂絕其祀」，則曹此時信亡矣。趙岐之注不知何所本，當是誤耳。然則孟子之曹交何如？曰：此張南士曾辨之，當是曹姓而交名者。何以言之？其曰：交得見於鄒君可以假館。鄒者魯縣，鄒即邾，《春秋》注「邾本曹姓，爲顓頊之後」，則曹交者，與鄒君同姓，故得見鄒君而假館焉。或即鄒君之弟。戰國禮衰，不分宗，不別氏，弟得以其戚戚君，故兄弟同姓，未可知也。」江氏永《羣經補義》云：「春秋之末，曹已爲宋所滅。曹交非曹君之弟，或是曹國之

後以國爲姓，或是鄒君之族人。鄒本邾國，邾本姓曹，故曰「交得見於鄒君，可以假館」。蓋欲於其同宗之爲君者假館也，便有挾貴之意。」此二說，則仍王氏之說而又爲曹、鄒同姓之說。按：以曹君之弟假館於鄒君，不必定爲同宗；至以交爲鄒君之弟，則交明云「得見鄒君」，此豈親弟口吻？則趙氏之說未可非也。趙氏佑《溫故錄》云：「曹之復，事在春秋後，趙氏蓋當有所案據。惟是曹交已知問堯舜，憂食粟，請受業，不可謂非有志，而孟子告之甚直且詳。即其言鄒君言假館，亦情事所有，未足遂爲深怪，而孟子復詔以「歸而求之，有餘師」。蓋學在身體力行，不在口說。古人從師非必朝夕一堂始爲受業也，非棄之也。故注無譏辭。自倡疏好逞臆於注外，遂以曹交挾貴而問，孟子辭之。然謂不屑教誨，則既明明教誨之矣，而何與滕更之不答同哉？」「交聞文王十尺，湯九尺。今交九尺四寸以長，食粟而已，如何則可？」**注**交聞文王與湯皆長而聖。今交亦長，獨但食粟而已，當如何？**疏**「交聞」至「則可」○正義曰：《春秋繁露·三代改制質文》篇云：「天將授舜，主天法商而王，祖錫姓爲姚氏，至舜形體大上而員首，而明有二童子。天將授禹，主地法夏而王，祖錫姓爲

姒氏，至禹生，發於背，形體長，長足所疾。天將授湯，主天法質而王，祖錫姓爲子氏，至湯體長專小足。天將授文王，主地法文而王，祖錫姓姬氏，至文王形體博長，有四乳而大足。然則湯九尺，所云長專也；文王十尺，所云博長也。皆天授，故曹交舉而言之。《史記正義》引《帝王世紀》云：「文王龍顏虎眉，身長十尺，有四乳。」曰：「奚有於是？亦爲之而已矣。有人於此，力不能勝一匹雞，則爲無力人矣；今日舉百鈞，則爲有力人矣；然則舉烏獲之任，是亦爲烏獲而已矣。夫人豈以不勝爲患哉？弗爲耳。」**注**孟子曰：何有於是言乎？仁義之道，亦當爲之乃爲賢耳。人言我力不能勝一小雞，則謂之無力之人；言我能舉百鈞，百鈞，三千斤也，則謂之有力之人矣。烏獲，古之有力人也，能移舉千鈞。人能舉其所任，是爲烏獲才也。夫一匹雞不舉，豈患不能勝哉？但不爲之耳。**疏**注「何有於是言乎」○正義曰：

《小爾雅·廣言》云：「奚，何也。」是「奚有」即「何有」，趙氏解「答是也，何有」爲不可答，則是以何有爲無有，此「何有

於是」亦是無有於是，蓋謂其不必如是說也。按：「何有」亦宜解作不難，「是」字指文王、湯之能爲堯舜，謂不難於湯文之爲堯舜也。○注「人言我力不能勝一小雞」○正義曰：《音義》出「匹雞」，云：「匹，張如字。丁作疋，云：『注云：『疋雞，小雞也。』匹不訓小，而訓詁及諸書疋訓耦，訓小無文。』今按，《方言》：『疋，小也。』音節，蓋與疋字相似，後人傳寫誤耳。」王氏念孫《廣雅疏證》云：「《說文》：『疋，少也。』物多則大，少則小，故《方言》云：『疋，小也。』《廣韻》『鷄，小也』，《方言》注作『懷鷄』。《孟子·告子》篇「力不能勝一匹雞」，趙岐注云：『言我力不能勝一小雞。』孫奭《音義》謂「疋與疋字相似，後人傳寫誤耳」。按，孫說是也。《玉篇》：『鷄，小雞也。』鷄與疋通，小雞謂之鷄，猶小蟬謂之鷄。《爾雅》「鷄，茅蜩」，注云：「江東呼爲茅鷄，似蟬而小。」《說文》：「鷄，束髮少小也。」張衡《西京賦》云：「朱鬣鷄髻。」少、鷄、鷄、鷄，並音姊列反，其義同也。《方言》謂小雞爲鷄子，鷄、鷄一聲之轉。《廣韻》：「鷄，姊列切。鳴鷄也。」鷄鷄猶啾啾，亦一聲之轉也。」按：《禮記·曲禮》云「庶人之摯匹」，注云：「說者以匹爲鷄。」《釋文》云：「匹依注作鷄，音木。」《玉篇》、《集韻》有鳴字。以此通之，《孟子》似匹雞即鷄雞。乃鄭云「說者謂匹爲鷄」者，《白虎通·瑞寶》篇引《曲

禮而解之云：「匹謂鷩也。」鄭所云「說者」指此。《周禮·春官·大宗伯》以禽作六贊，庶人執鷩。」用以相準，故《白虎通》以匹爲鷩。匹之訓爲偶爲雙，不知何物而擬之云。此所云「匹者謂鷩」，謂兩鷩也，非匹有鷩訓。鄭云「說者以匹爲鷩」，即與「匹謂鷩」同義。訓詁之體，凡「謂之」云者，皆非定稱。《釋文》音匹爲木，孔氏正義直云：「匹，鷩也。」皆非是。至造爲鷩字，尤非矣。張氏讀匹雞如字，亦義爲偶爲雙。力不能勝一雙雞，則是兩雞。《說文》佳部云：「雞，雞子也。」《禮記·月令》：「仲夏之月，天子以雞嘗黍。」《淮南·時則訓》注云：「雞，新雞也。」然則雞爲雞之名。讀匹爲雞，則匹雞即是小雞；讀匹如字，則匹雞是即雙雞。《曲禮》單云「匹」，故擬之爲鷩，此已連稱「匹雞」，不得又援《禮》注以匹爲鷩也。學者以匹爲鷩，轉忘乎雞爲雞矣。○注「鳥獲」至「爲之耳」○正義曰：《史記·秦本紀》云：「武王有力好戲，力士任鄙、烏獲、孟說皆至大官。」是鳥獲爲古之有力人。《韓非子·觀行》篇云：「鳥獲輕千鈞而重其身，非其身重於千鈞也，勢不便也。」是鳥獲能舉千鈞也。《國語·魯語》云「不能任重」，韋昭注云：「任，勝也。」《論衡·效力》篇云：「世稱力者，常褒烏獲。然則董仲舒、揚子雲，文之鳥獲也。秦武王與孟說舉鼎不任，絕脈而死。少文之

人與董仲舒等誦胸中之思，必將不任，有絕脈之變。」又云：「夫一石之重，一人挈之；十石以上，二人不能舉也。世多挈一石之任，寡有舉十石之力。」此所云任，皆勝也。鳥獲能移舉千鈞，此鳥獲之任也；人亦能移舉千鈞，則是舉鳥獲之任；能舉鳥獲之任，即爲鳥獲。此「亦爲」之爲與上「爲無力人」、「爲有力人」二爲字同。上兩爲字，趙氏俱以「謂」解之，是人稱謂之；此「爲鳥獲」亦是人見其能舉鳥獲之任即稱謂之爲鳥獲而已。鳥獲之力不能強學，故必視能舉其任而乃可謂之鳥獲；若一匹雞，則斷無不能舉之人。今日不能勝，此豈足患？由不肯爲耳。「弗爲耳」之「爲」解作行爲，與上三爲字不同。趙氏之意，以孟子勝一匹雞比人之爲堯舜，謂人之爲堯舜非如爲鳥獲必能舉鳥獲之任，人之爲堯舜第如舉一匹雞，人人不患其不勝，特患其不爲。白解者以爲鳥獲比爲堯舜，則移舉千鈞，詎容漫致？閻氏若璩《釋地三續》引陳幾亭之言，謂「人皆可以爲堯舜」，不聞「人皆可以爲鳥獲」，以此譏孟子言辭小失，由未知孟子之指，亦未審趙氏之注也。「不勝」原即「不能勝」，故「以不勝爲患」即是以不能勝匹雞爲患，以不能舉鳥獲之任爲患，則「挾山超海，語人曰我不能」也；以不能勝匹雞爲患，則「爲長者折枝，語人曰我不能」也。爲堯舜非舉鳥獲之任也，乃舉一匹雞之力也。何

也？堯舜之道不過孝弟，人之於孝弟未有不能勝者也。故儒生能說百萬章句，連句結章，篇至百十，作《春秋》，刪五經，秘書微文無所不定，此烏獲之任也，非人人所能爲也；孝弟之道，人人能爲，一匹難之勝也。此趙氏之義也。又按：《鹽鐵論·能言》篇大夫曰：「夫坐言不行，則牧童兼烏獲之力。」竊謂此即本《孟子》。牧童即力不能勝匹難之人，若不行而徒言，則自言能舉百鈞即可謂之烏獲矣。然則必能舉烏獲之任，乃可爲烏獲。力不能勝一匹難之人而徒空言自詡其舉百鈞，豈得真爲烏獲乎？此於《孟子》「今日」二字體會而出。烏獲不可以空言冒，堯舜不可以形體求。不能舉堯舜之任，但形體似堯舜，不可爲堯舜；猶不能舉烏獲之任，但口稱能舉百鈞，不可爲烏獲。此又一義也。姚氏文田《求是齋自訂稿》云：「或疑不勝匹難，如何可以至烏獲？因遂譏孟子爲妄說。不知不勝匹難與舉百鈞皆必無之事，皆代其人摹寫之辭，並非正論。有人於此，於衆方角力之時而彼獨逡巡退縮曰：吾之力，雖一匹難不能勝也。力雖薄，亦何至不勝匹難？然由其頹靡之習，則必終爲無力之人矣。今或不然。於衆皆畏憚之事而彼獨毅然不顧曰：吾之舉，不至於百鈞不止也。力雖果，亦豈能遂舉百鈞？然竭其邁往之材，久之，固亦得爲有力之人矣。天下之稱有力者

莫如烏獲，其所任皆舉之而莫能勝也。然試思，彼亦人耳，安在烏獲之遂絕於天下也者？設使若人者馴而致之，而一旦遂至於烏獲，則亦一烏獲而已矣。人於堯舜何獨不然？吾故曰：奚有於是？亦爲之而已矣。然而人且曰「吾弗勝」者，何也？凡事必歷乎其途，然後可以知其難易。今之人直未一身歷焉而遽以不能勝自謝也，此何異於不勝匹難之說也？惡知夫堯舜之可爲更非若烏獲之不可強而至哉？本文意甚縝密，學者粗心讀之，未免以辭害意。」徐行後長者謂之弟，疾行先長者謂之不弟。夫徐行者，豈人所不能哉？所不爲也。**注**長者，老者也。弟，順也。人誰不能徐行者？患不肯爲也。**疏**注「長者」至「爲也」○正義曰：《國語·晉語》云「齊侯長矣」，注云：「長，老也。」《廣雅·釋詁》同。是「長者」即「老者」也。《荀子·修身》篇云：「端慤順弟。」《漢書·蕭望之傳》云「前單于慕化鄉善稱弟」，蘇林云：「弟，順也。」顏師古云：「弟爲悌。」阮氏元《校勘記》云：「『孝悌而已矣』，閩、監、毛二本同。宋九經本、岳本、咸淳衢州本、孔本、韓本悌作弟。按，悌者俗字。『徐行，舉一匹難也』，疾行，不能勝一匹難也。故云「人誰不能徐行者」。堯舜之

道，孝弟而已矣。子服堯之服，誦堯之言，行堯之行，是堯而已矣；子服桀之服，誦桀之言，行桀之行，是桀而已矣。」**注**孝弟而已，人所能也。堯服，衣服不踰禮也；堯言，仁義之言；堯行，孝弟之行。桀服，譎詭非常之服；桀言，不行仁義之言；桀行，淫虐之行也。爲堯似堯，爲桀似桀。

曰：「交得見於鄉君，可以假館，願留而受業於門。」**注**交欲學於孟子，願因鄉君假館舍，備門徒也。曰：「夫道，若大路然，豈難知哉？人病不求耳。子歸而求之，有餘師。」**注**孟子言堯舜之道，較然若大路，豈有難知？人苦不肯求耳。子歸曹而求行其道，有餘師，師不少也。不必留此學也。**疏**注「孟子」至「學也」○正義曰：《史記·平津侯

主父傳》云「較然著明」，又《伯夷傳》云「此其尤大彰明較著者也」，《漢書·谷永傳》云「白氣較然起乎東方」，《張安世傳》云「賢不肖較然」，「較然」皆言其明白易見也。《呂氏春秋·權勳》篇云「觸子苦之」，《貴卒》篇云「皆甚苦之」，高誘注並云：「苦，病也。」是「病」即「苦」也。《呂氏春秋·辨土》

篇云「無使不足，亦無使有餘」，高誘注云：「餘猶多也。」多即不少也。《論語·子張》篇云：「夫子焉不學？而亦何嘗師之有？」《述而》篇云：「三人行，必有我師焉。」皆「有餘師」之謂也。

章指：言天下大道，人並由之，病於不爲，不患不能。是以曹交請學，孟子辭焉。蓋「《詩》三百，一言以蔽之」。**疏**蓋詩「至」蔽之○正義曰：周氏廣業《孟子章指考證》云：「言在思無邪而已。蓋歇後語，東漢已有之。韓退之《論語筆解》云：「蔽猶斷也。李翱云：「《詩》三百斷在一言，終於頌而已。」或趙氏亦取「一言斷」之義，以爲道在於爲而已。」

公孫丑問曰：「高子曰：『《小弁》，小人之詩也。』孟子曰：『何以言之？』曰：『怨。』**注**高子，齊人也。《小弁》，《小雅》之篇，伯奇之詩也。怨者，怨親之過。故謂之小人。**疏**注「高子」至「小人」○正義曰：《公孫丑》篇「高子以告」，注云：「高子，亦齊人，

孟子弟子。《盡心》篇「孟子謂高子」，注云：「高子，齊人。嘗學於孟子，鄉道而未明，去而學於他術。」^①此注則但稱「齊人」。《毛詩序》云：「《絲衣》，繹賓尸也。高子曰：『靈星之尸也。』」孔氏正義云：「高子者，不知何人。孟軻弟子有公孫丑者稱高子之言以問孟子，則高子與孟子同時。趙岐以爲齊人。此言高子，蓋彼是也。」翟氏灝《考異》云：「《韓詩外傳》又稱高子與孟子論衛女之詩。此人似長於孟子，以『叟』稱之。與『尹士』、『追蠡』二章之高子蓋有別。」趙氏佑《溫故錄》云：「前已有『高子以告』，注：『高子，齊人，孟子弟子。』此又論《詩》，後論聲樂，《毛詩序》亦有高子曰之文，疑即《釋文》所述吳人徐整言子夏授高行子，是亦一傳《詩》者。蓋本學於子夏而後又從孟子，則其齒宿矣，故得間稱叟。而曰固，曰茅塞，是後注所謂『鄉道未明』者。然《毛詩》以《小弁》爲平王事，故得言親之過大，以所關在天下國家之大，故較之《凱風》失在一身者則爲小矣。足明孟子所主《詩》說與毛同。高子亦未嘗不同，特其見理未精，得孟子析言之而後明，遂爲《毛詩》授受所從出。注則以爲伯奇之詩，是見《琴操》尹吉甫愛後妻子而棄其適子伯奇者，或以爲《韓詩》說。蓋趙注言《詩》往往從韓。如引《標有梅》之標作苐，解「以御于家邦」之御爲享，與毛異趣。以《鷓鴣》詩爲刺邠

君，並違《尚書》。孫氏《音義》間有證明，而此獨闕。第觀注云「父虐之」，其辭甚輕，則亦與母不安其室者均爲人子所遭之不幸，不足深較大小，適足以見所傳之不確。此《毛詩》所以單行至今而三家多放失也。」按：《琴操》云：「《履霜操》者，尹吉甫之子伯奇所作也。吉甫，周上卿也，有子伯奇。伯奇母死，吉甫更娶後妻，生子曰伯邦，乃譖伯奇於吉甫曰：『伯奇見妾有美色，然有欲心。』吉甫曰：『伯奇爲人慈仁，豈有此也？』妻曰：『試置妾空房中，君登樓而察之。』後妻知伯奇仁孝，乃取毒蜂綴衣領，伯奇前持之。於是吉甫大怒，放伯奇於野。伯奇編衣荷而衣之，采棹花而食之，清朝履霜，自傷無罪見逐，乃援琴而鼓之。」《太平御覽》引《韓詩》云：「《黍離》伯封作也。」曹植《令禽惡鳥論》云：「昔尹吉甫信後妻之讒而殺孝子伯奇，其弟伯封求而不得，作《黍離》之詩。」此伯奇之事，而不言其爲《小弁》之詩。《漢書·中山靖王勝傳》云：「斯伯奇之所流離，比干所以橫分也。」《詩》云：「我心憂傷，怒焉如擣。假寐永歎，唯憂用老。心之憂矣，疢如疾首。」臣之謂也。」此上言伯奇，下引《小弁》之詩，乃中間以比干，則未必以《小弁》爲伯奇所作。惟《論衡·書

①「他」，原誤作「地」，今據《盡心》篇趙注改。

虛篇云：「伯奇放流，首髮早白。」《詩》云：「惟憂用老。」則或者當時有伯奇作《小弁》之說也。《毛詩序》云：「《小弁》刺幽王也。太子之傳作焉。」孔氏正義云：「以此述太子之言，太子不可作詩以刺父，自傳意述而刺之。」其首章「民莫不穀，我獨于罹」，傳云：「幽王取申女，生太子宜臼，又說褒姒，生子伯服，立以爲后，而放宜臼，將殺之。」末章「我躬不閱，遑恤我後」，傳云：「念父孝也。」引《孟子》此文。曰：「固哉，高叟之爲詩也！」有人於此，越人關弓而射之，則已談笑而道之。無他，疏之也。其兄關弓而射之，則已垂涕泣而道之。無他，戚之也。《小弁》之怨，親親也；親親，仁也。固矣夫，高叟之爲詩也！」**注**固，陋也。高子年長。孟子曰：「陋哉，高父之爲詩也！」疏越人，故談笑。戚，親也。親其兄，故號泣而道之，怪怨之意也。伯奇仁人而父虐之，故作《小弁》之詩曰「何辜于天」，親親而悲怨之辭也。重言「固陋」，傷高叟不達詩人之意甚也。**疏**注「固陋」至「甚也」○正義曰：《論語·述而》篇「儉則固」，《集解》引孔

氏云：「固，陋也。」《荀子·修身》篇云「少見曰陋」，所見寡少，不能通達，故又云「不達詩人之意」，「不達」正是「固」。《禮記·曲禮》云「君子謂之固」，注云：「固謂不達於禮也。」堅守一說而不能通，是爲固也。《廣雅·釋親》云：「叟，父也。」故以「高叟」爲「高父」。《音義》出「爲詩」，云：「丁云：『爲猶解說也。』」按：《論語·陽貨》篇云「女爲《周南》、《召南》矣乎」，皇氏疏云：「爲猶學也。」爲本訓治，學之即是治之，治之則必解說之矣。《音義》出「關弓」，云：「丁、張並音彎。」《文選·三都賦》劉逵注引《孟子》此文作彎。王氏念孫《廣雅疏證》云：「孤之言好也，《說文》：『好，滿弓有所鄉也。』字亦作扞。《呂氏春秋·壅塞》篇「扞弓而射之」，高誘注云：「扞，引也。」古聲並與孤同。彎亦孤也，語之轉耳。《說文》：「彎，持弓關矢也。」昭二十一年《左傳》「豹則關矣」，杜預注云：「關，引弓也。」《史記·陳涉世家》「士不敢貫弓而報怨」，《漢書》作彎。彎、關、貫並通。「道，言也。」《大戴記·曾子制言》中云：「君子雖言不受必忠曰道。」「道之」謂戒其不可射也。然疏則言之和，故談笑；親則言之迫，故號泣。號泣則欲其言之必受也。《廣雅·釋詁》云：「親，戚，近也。」《說文》戚爲斧鉞之名，與戚通，故爲親也。「何辜于天，我罪伊何」，《小弁》首章之文。毛氏傳云：「舜之怨慕

曰：號泣于旻天于父母。」孔氏正義云：「毛意嫌子不當怨父以訴天，故引舜事以明之。言大舜尚怨，故太子亦可然也。」趙氏特引此句，以明《小弁》之怨同於舜之號泣。而特不以爲宜曰之詩而言「伯奇仁人而父虐之」，蓋以宜曰非仁人，不得比於舜之怨，故取他說也。曹氏之升《撫餘說》云：

「此章只是論《詩》，不是論平王。詩原非平王作也。平王既立，遣師戍申，是但知有母，不知有父。但知申侯立己爲有德，而不知申侯弑父爲可誅。忘親逆理如此，則謂宜曰爲小人，并其詩而斥爲「小人之詩」，何不可者？故孟子曰「何以言之」而不虞其以怨爲小人也。蓋宜曰之不仁，全是不怨而愈疏。宜曰不怨而其傳道之以怨，明示以親親之道而疎動其固有之仁，奈何反以其怨爲小人哉？」劉氏始興《詩益》云：「《孟子》『親之過大』，據此一語，可斷其爲幽王太子宜曰之詩。蓋太子者，國之根本。國本動搖，則社稷隨之而亡，故曰親之過大。若在尋常放子，則己之被譏見逐，禍止一身，其父之過與《凱風》七子之母不安其室等耳，何得云親之過大哉？又詩二章曰「踰踰周道，鞠爲茂草，我心憂傷，惄焉如擣」。此有傷周室衰亂之意。若尋常放子，其於國家事何有焉？」

曰：「《凱風》何以不怨？」**注**《詩》，《邶

風·凱風》之篇也。公孫丑曰：《凱風》亦孝子之詩，何以獨不怨？**疏**注「詩邶」至「不怨」○正義曰：《毛

詩序》云：「《凱風》，美孝子也。衛之淫風流行，雖有七子之母，猶不能安其室，故美孝子能盡其孝道以慰其母心而成其志爾。」箋云：「不安其室，欲去嫁也。成其志者，成其孝子自責之意。」是《凱風》亦孝子之詩也。曰：「《凱風》，

親之過小者也；《小弁》，親之過大者也。親之過大而不怨，是愈疏也；親之過小而怨，是不可磯也。愈疏，不孝也；不可磯，亦不孝也。孔子曰：「舜，其至孝矣！五十而慕。」**注**孟子曰：《凱風》言「莫慰母心」，母心不悅也，知親之過小也；《小弁》曰「行有死人，尚或殫之」而曾不閔己，知親之過大也。愈，益也。過己大矣而孝子不怨，思其親之意何爲如是，是益疏之道也，故曰「不孝」。磯，激也。過小耳而孝子感激，輒怨其親，是亦不孝也。孔子以舜年五十而思慕其親不怠，稱曰孝之至矣。孝之不可以已也，知高叟譏《小弁》爲不得矣。**疏**注「凱風」至「不孝也」○正義曰：

趙氏說《小弁》既不用《詩序》而以為父虐伯奇。虐謂放之於野。以此為過大，故以《凱風》之母但心不悅，母心不悅視虐放於野為小，故引《詩》語以明大小之義，蓋亦不用《凱風》詩序「不安其室」之事也。毛氏奇齡《四書賸言》云：「先仲氏曰：齊、魯、韓三家以《凱風》為母責子詩，予向取其說以說《國風》。既讀《孟子》，則尤與「不可磯」，并幽王逐子，尹吉甫殺子義合。彼皆戕害其子，故過大；此但責子過情，故過小。若不安室，則過不小矣。」此即趙氏義也。閻氏若璩釋地又續云：「宋晁說之以道《詩序》之論曰：『《孟子》：《凱風》，親之過小者也。』而序《詩》者曰：一衛之淫風流行，雖有七子之母，猶不能安其室。」是七子之母者於先君無妻道，於七子無母道，過孰大焉？孟子之言妄與？孟子之言不妄則序《詩》非也。」黃太冲亟取其說，載《孟子師說》。余按，《序》又曰：「故美七子能盡其孝道，以慰其母心而成其志爾。」成志，成母守節之志，非如鄭箋指孝子自責言。因檢孔疏，亦言「母遂不嫁」，為之快絕。復憶東漢姜肱性篤孝，事繼母恪勤，母既年少，又嚴厲，肱感《凱風》之孝，兄弟同被而寢，不入房室，以慰母心焉。歎作《詩》者能安母於千載之上，感《詩》者亦能安母於千載之下，《詩》之有益人倫如此。當日採風者親觀其事，序《詩》者申美其事，遂不為聖人所

刪，序曷可非也？蓋七子之母徒有欲嫁之志云爾，若果嫁矣，則真於先君無妻道，於七子無母道，是之謂惡，豈僅僅過而已哉？周氏柄中《辨正》云：「從一而終者，婦人之大節，而孟子以《凱風》為親之過小，豈小其失節哉？嘗即「不可磯」之義求之，蓋曰一念雖差，過而未遂，斯為小矣。人子當此，惟有負罪引慝，積誠婉諭，可以挽回，若遂呼天怨懟，則己心未盡，奚以悟親之心？或反至激怒而成之。故曰：「不可磯亦不孝也。」謹按：周氏解大小二字是也。蓋小大猶云微著，母不安室，與父亂德政，其過同。但母志未著，則微而可以感消，父亂已成，則著而不容膜視。趙氏以激釋磯，蓋即讀「磯」為「激」，「不可磯」即「不可激」也。《楚辭·招魂》云「激楚之結」，王逸注云：「激，感也。」趙氏讀「磯」為「激」而釋之為「感」，故云「孝子感激，輒怨其親」，謂母以不悅激發其子，子因其激而遂怨，是不可耐此激發也。阮氏元《校勘記》云：「「不可磯」，按，段玉裁曰：「注中訓「磯，激也」，但於雙聲求之。磯與杙，概字古音同，謂摩也。故《毛詩音義》云：「磯，居依反，又古愛反。」古假借字耳。近人以石激水解之，殊誤。《說文》固無磯字。」按：《說文》木部云：「概，所以杙斗斛也。」杙，平也。《易》「月幾望」，荀爽作「月既望」。《周禮·犬人》「幾珥」，注云：「幾讀為玦。」從

既、從氣與從幾原可相通。《廣雅·釋詁》云：「桯，摩也。」摩之即所以平之，然則「不可磯」即不可桯，亦即不可平。因母不安其室，心不能平，因而怨懟，與「不可激之義亦相近。或磯即「事父母幾諫」之幾，顯露其親之過，是不可幾也。《廣雅·釋水》云：「磯，磧也。」磧石在水中。《晉書音義》云：「磯，大石激水也。」此因磯之讀激而附合於磯之爲磧，故有此解，趙氏則無之也。《爾雅·釋詁》云：「俞，益也。」俞即古愈字。《詩·小雅·小明》篇「政事愈蹙」，箋云：「愈猶益也。」益疏謂疏之甚也。蓋溫柔敦厚，《詩》教也。凡臣之於君，子之於親，朋友相規，兄弟相戒，均宜纏綿愷惻，相感以情而不可相持以理，宜相化以誠而不可相矜以氣。是以《詩》可以興觀羣怨，邇之事父，遠之事君，如《凱風》之孝子以至誠之情自責以感動其母，此《詩》教之常也。高子既授子夏之《詩》，習知其義，而《小弁》之詩，情辭憤激，迥非《凱風》可比，實與《詩》教相背，故以爲小人之詩。不知豔妻已煽，讒口已成，周室將亡，殊非小故，爲臣子者竟惟以低聲緩步，談笑處之，則視君父不啻路人，不亦疏已甚乎！高子但守其常，不通其變，故孟子以「固執易之。然臣子事君父之道，究以《凱風》爲正。事猶未著，失亦無多，不難平心婉議。誠有未便，惟宜載睨睨之音，樂棘心之養，消之於未形。

乃直指其非，自沽其直以激其君父之怒，害及其身，禍於家國，是則不可磯之爲不孝也。故孟子雖譏高子爲固而仍以不可磯切言之，則高子者蓋不失爲經師者也。舜之五十而慕，正與《凱風》七子同。母不安室，七子自責以慰安之，而母即不嫁，父頑母歸，舜自責以又養之，而瞽瞍即底豫。然則天下無不可事之君父，故諫有五，而知患禍未萌，深睹其事未彰而諷告焉，是爲諷諫，孔子獨從之。孟子引舜之「五十而慕」以證《凱風》之「不怨」，非引以證《小弁》之「怨」也。

章指：言生之膝下，一體而分。喘息

呼吸，氣通於親。當親而疏，怨慕號天，是以《小弁》之怨，未足爲愆也。疏「生之」至「於

親」○正義曰：《儀禮·喪服傳》「世父母叔父母」，傳云：「世父叔父何以期也？與尊者一體也。父子一體也，夫妻一體也，昆弟一體也。故父子，首足也；夫妻，胖合也；昆弟，四體也。」《白虎通·諫諍》篇云：「子諫父，父不從，不得去者，父子一體而分，無相離之法。」《呂氏春秋·精通》篇云：「周有申喜者，亡其母。聞乞人歌於門下而悲之，動於顏色，謂門者內乞人之歌者。自覺而問焉，曰：『何故？』而乞與之語，蓋其母也。故父母

之於子也，子之於父母也，一體而兩分，同氣而異息，若草莽之有華實也，若樹木之有根心也，雖異處而相通，隱志相及，痛疾相救，憂思相感，生則相歡，死則相哀，此之謂骨肉之親。」

宋慳將之楚。孟子遇於石丘，曰：「先

生將何之？」**注**宋慳，宋人，名慳。學士年長者，故謂之「先生」。石丘，地名也。道遇，問欲何之？

疏注「宋慳」至「名也」○正義曰：《莊子·天下》篇云：「墨

子真天下之好，宋鉏、尹文子聞其風而悅之，作爲華山之冠以自表。見侮不辱，救民之鬪，禁攻寢兵，救世之戰；以此周行天下，上說下教，雖天下不取，強聒而不舍者也。」《荀子·非十二子》篇云：「不知壹天下、建國家之權稱，上功用，大儉約而僂差等，曾不足以容辨異，縣君臣，然而其持之有故，其言之成理，足以欺惑愚衆，是墨翟、宋鉏也。」楊倞注云：「宋鉏，宋人，與孟子、尹文子、彭蒙、慎到同時。」《孟子》作「宋慳」。慳與鉏同。「音口莖反。又《天論》篇云：「宋子有見於少，無見於多。」注云：「宋子名鉏，宋人也。與孟子同時。下篇云：「宋子以人之情爲欲寡，而皆以己之情爲欲

多，爲過也。」據此說，則是少而不見多也。鉏音形，又胡冷反。《漢書·藝文志》有《宋子》十八篇，班固曰：「荀卿道宋子，其言黃老意。」又《藝文志》名家者流有《尹文子》一篇，顏師古引劉向云：「與宋鉏俱遊稷下。」《禮記·曲禮》云：「從於先生」，注云：「先生，老人教學者。」《國策·衛策》云：「乃見梧下先生」，注云：「先生，長者有德者稱。」《齊策》云：「孟嘗君譙坐謂三先生」，注云：「先生，長老先己以生者也。」慳蓋年長於孟子，故孟子以「先生」稱之而自稱名。閻氏若璩《釋地續》云：「齊宣王喜文學游說之士，自如騶衍、淳于髡、田駢、接子、慎到、環淵之徒七十六人，皆賜列第爲上大夫，不治而議論，是以齊稷下學士復盛。孟子固嘗與宋慳有雅故，於齊別去，久之忽邂逅石丘，呼以先生，請其所之，殆非未同而言者比也。」石丘，趙氏但云「地名」，或以爲宋地，蓋以慳爲宋人也。張氏宗泰《孟子諸國年表說》云：「當孟子時，齊秦所共爭者惟魏。若楚雖近秦，時方強盛，秦尚未敢與爭。惟梁襄王元年癸卯，有楚與五國共擊秦不勝之事，而獨與秦戰則在懷王十七年。先是十六年秦欲伐齊，而楚與齊從親，惠王患之，乃使張儀南見楚王，王爲儀絕齊而不得秦所許，故分楚商於之地。懷王大怒，發兵西攻秦，秦亦發兵擊之。十七年春，與秦戰丹陽，大敗，虜大將軍屈丐等，遂

取漢中。王復怒，悉國兵襲秦，戰於藍田，又大敗。韓魏聞之，襲楚至鄧，楚乃引兵歸。此事恰當孟子時。孟子是年因燕人畔去齊，疑孟子或有事於宋，而自宋至薛，因與宋慳遇於石丘。」曰：「吾聞秦楚構兵，我將見楚王說而罷之，楚王不悅，我將見秦王說而罷之。二王，我將有所遇焉。」**注**慳自謂往說二王，必有所遇，得從其志。**疏**「構兵」○正義曰：《國策·秦策》

云：「秦楚之兵，構而不離。」又《齊策》「秦楚構難」，高誘注云：「構，連也。」《呂氏春秋·審為》篇云「民相連而從之」，高誘注云：「連，結也。」又《勿躬》篇云「車不結軌」，高誘注云：「結，交也。」構與構通。交、結、連、構四字義同，「構兵」即交兵也。《說文》韞部云：「韞，交積材也。」木部云：「構，蓋也。杜林以為椽桷字。」椽桷亦以交於楣棟得名，由韞之交取義也。曰：「軻也請無問其詳，願聞其指。說之將何如？」**注**孟子敬宋慳，自稱其名曰軻。不敢詳問，願聞其指。欲如何說之？**疏**「願聞其指」○正義曰：指與旨同。《禮記·王制》云「有旨無簡不聽」，**注**云：「有旨，有其意。」《漢書·河間獻王德傳》云「文約指

明」，**注**云：「指謂意之所趨，若人以手指物也。」曰：「我將言其不利也。」**注**慳曰：我將為二王言興兵之不利也。曰：「先生之志則大矣，先生之號則不可。先生以利說秦楚之王，秦楚之王悅於利以罷三軍之師，是三軍之士樂罷而悅於利也。為人臣者懷利以事其君，為人子者懷利以事其父，為人弟者懷利以事其兄，是君臣父子兄弟終去仁義，懷利以相接。然而不亡者，未之有也。」**注**孟子曰：先生志誠大矣，所稱名號不可用也。二王悅利罷三軍，三軍士樂之而悅利，則舉國尚利以相接待而忘仁義，則其國亡矣。**疏** **注**「則舉國」至「仁義」○正義曰：《大戴記·保傳》篇云「接給而善對」，**注**云：「接給謂應所問而給也。」又《文王官人》篇云「取接給而廣中者」，**注**云：「接給謂應所問而對。」《周禮·天官·太府》「以待王之膳服」，《外府》「以待邦之用」，**注**並云：「待猶給也。」「接待」即接給也。劉熙《釋名·釋喪制》云：「終，盡也。」《呂氏春秋·音律》篇「數將幾終」，高誘**注**亦云：「終，盡也。」「終去仁義」是盡去仁義，故云「舉

國尚利忘仁義」。舉國皆忘，是盡去也。亡與忘通，《禮記·少儀》云「有亡而無疾」，注云：「亡，去也。」故以「去仁義」爲「忘仁義」也。先生以仁義說秦楚之王，秦楚之王悅於仁義而罷三軍之師，是三軍之士樂罷而悅於仁義也。爲人臣者懷仁義以事其君，爲人子者懷仁義以事其父，爲人弟者懷仁義以事其兄，是君臣父子兄弟去利，懷仁義以相接也。然而不王者，未之有也。何必曰利？」**注**以仁義之道不忍興兵，三軍之士悅，國人化之，咸以仁義相接，可以致王。何必以利爲名也？

章指：言上之所欲，下以爲俗。俗化於善，久而致平；俗化於惡，失而致傾。是以君子創業，慎其所以爲名也。**疏**「俗化」

至「名也」○正義曰：《文子·精誠》篇云：「見其俗而知其化。」《荀子·正名》篇云：「王者之制名，名定而實辨，道行而志通，則慎率民而一焉。」昭公三十一年《左傳》云：「君子曰：名之不可不慎也如此。」

孟子居鄒，季任爲任處守，以幣交，受之而不報；處於平陸，儲子爲相，以幣交，受之而不報。**注**任，薛之同姓小國也。季任，任君季弟也。任君朝會於鄰國，季任爲之居守其國也，致幣帛之禮以交孟子，受之而未報也。平陸，齊下邑也。儲子，齊相也。亦致禮以交孟子，受而未答也。

疏注「任薛」至「國也」○正義曰：《漢書·藝文志》：「東平國任城，故任國，太昊後，風姓。」隱公十一年「滕侯薛侯來朝」，《左傳》云：「寡人若朝於薛，不敢與諸任齒。」孔氏正義引《世本·氏姓》篇云：「任姓：謝、章、薛、舒、呂、祝、終、泉、畢、過。言此十國皆任姓也。」又引《譜》云：「薛，任姓，黃帝之苗裔奚仲，封爲薛侯，今魯國薛縣是也。」任，風姓；薛，任姓。非同姓之國，趙氏蓋誤以任爲任姓與？錢氏大昕《養新錄》云：「國君之弟以國氏，字當在國下。《春秋》桓十七年蔡季自陳歸於蔡，蔡侯弟也。莊二年紀季以鄆人於齊，紀侯弟也。依《春秋》例，季任當爲「任季」，傳寫顛倒耳。閻氏若璩《釋地續》云：「平陸爲今汶上縣，去齊都臨淄。」

①「藝文」，按引文出《地理志》，參沈校。

凡六百里，而儲子既相，必朝夕左右爲王辦政事，非奉王命，似亦未易出郊外，何以孟子望其身親至六百里外之下邑方爲禮稱其幣？既思《范睢列傳》云：「秦相穰侯東行縣邑，東騎至湖關。」湖今閬鄉縣，去秦都咸陽亦幾六百里，是當日國相皆得周行其境之內，非令所禁，故曰「儲子得之平陸」。

他日，由鄒之任見季子，由平陸之齊不見儲子。屋廬子喜曰：「連得聞矣。」問曰：「夫子之任見季子，之齊不見儲子，爲其爲相與？」

注連，屋廬子名也。見孟子答此二人有異，故喜曰：連今日乃得一見夫子與之間隙也。俱答二人，獨見季子不見儲子者，以季子當君國子民之處，儲子爲相，故輕之邪？

疏注「俱答二人」○正義曰：趙氏

以「之任」「之齊」即是答其幣交之禮。但答季子則見之，答儲子則不見，所異在見不見而答則同是也。若謂不見儲子即是不答，詎有遠以幣交，既受其禮，而至其地不答者乎？

曰：「非也。」《書》曰：「享多儀。儀不及物曰不享，惟不役志于享。」爲其不成享也。」**注**孟子曰：非也，非以儲子爲相，故不見。《尚書·洛

誥》篇曰「享多儀」，言享見之禮多儀法也。物，事也。儀不及事，謂有闕也。故曰不成享禮。儲子本禮不足，故我不見也。

疏注「尚書」至「享禮」○正義

曰：《書序》云：「召公既相宅，周公往營成周，使來告卜，作《洛誥》。」此文云：「公曰：已，汝惟沖子，惟終。汝其敬識百辟享，亦識其有不享。享多儀。儀不及物，惟曰不享。惟不役志于享，凡民惟曰不享。」鄭氏注云：「朝聘之禮至大。其禮之儀不及物，謂所貢篚者多而威儀簡也。威儀既簡，亦是不享也。」江氏聲《尚書集注音疏》云：「享，獻也。言當識別諸侯之享與不享。《孟子·告子》篇引此經，趙岐訓物爲事，不若鄭注義長。據《孟子》所引，無惟字。惟不役志于享，故謂之不享，凡民亦惟謂是不享也。」趙氏以孟子自以「不成享」解經文，故以「不及事」爲「有闕」。有闕即是「不成享」。《淮南子·精神訓》云「可以爲天下儀」，高誘注云：「儀，法也。」趙氏以「法」訓「儀」，謂享獻之禮宜多儀法，今儀法有闕，即是不成享獻。「儀不及物」謂享獻所當具之儀法、儀法所當行之事，今不足也。趙氏以「不足」解「不及」。《素問·天玄紀大論》云「各有太過不及也」，王冰注云：「不及，不足也。」鄭氏以儀爲威儀，物即指所享之物，謂享獻宜多威

儀。今儀不及物，是儀少而物多。意雖與趙亦略同，然儲子以幣交，幣即物也，得之平陸而不自往，是威儀不及幣物也。鄭氏之義尤與孟子引經之旨爲切矣。周氏用錫《尚書證義》云：「多如《漢書·袁盎傳》『皆多盜』之多。」享多儀，享以儀爲多也。」屋廬子悅。或問之，屋廬子曰：「季子不得之鄒，儲子得之平陸。」**注**屋廬子已曉其意，聞義而服，故悅也。人問之曰何爲若是，屋廬子曰：季子守國，不得越境至鄒。不身造孟子，可也。儲子爲相，得循行國中。但遙交禮，爲其不尊賢，故答而不見。**疏**注「聞義而服」○正義曰：阮氏元《校勘記》云：「閩本作『聞義服』，監本服上剗增而字，毛本、孔本、韓本、《考文》古本同監本。按，當作『聞義則服』，用《弟子職》語。」

章指：言君子交接，動不違禮。享見之儀，亢答不差。是以孟子或見或否，各以其宜也。**疏**「亢答不差」○正義曰：周氏廣業《孟子章指考證》云：「古本亢作允，似誤。亢謂不見儲子，答謂見季子。」按：周說非也。趙氏明言「答而不見」，則

不見非不答也。《漢書·高帝紀》云：「沛公還軍亢父」，注引鄭氏云：「亢音人相抗答。」亢猶當也，當即應也。「亢答」猶云應答耳。

淳于髡曰：「先名實者，爲人也；後名實者，自爲也。夫子在三卿之中，名實未加於上下而去之。仁者固如此乎？」**注**淳于，姓，髡，名。齊之辨士。名者，有道德之名也；實者，治國惠民之功實也。齊，大國，有三卿。謂孟子嘗處此三卿之中矣，未聞名實下濟於民，上匡其君，而速去之。仁者之道固當然邪？**疏**注「齊大」至「中矣」○

正義曰：《禮記·王制》云：「大國三卿，皆命於天子。」孔氏正義云：「大國謂公與侯也。崔氏云：『三卿者，依周制而言，謂立司徒兼冢宰之事，立司馬兼宗伯之事，立司空兼司寇之事。故《春秋左傳》云季孫爲司徒，叔孫爲司馬，孟孫爲司空。此是三卿也。』以此推之，知諸侯不立冢宰、宗伯、司寇之官也。」全氏祖望《經史問答》云：「孟子之世，七國官制尤草草，《國策》中惟魏曾有司徒之官一見，亦不足信。大抵三卿者指上卿、亞卿、下卿而言，但未嘗有司徒等名。樂毅

初入燕乃亞卿，是其證也。或曰：一卿是相，一卿是將，其一爲客卿，而上下本無定員。亦通。」周氏柄中《辨正》云：「《國策》：『魏王使司徒執范痤』，鮑注云：『本周卿，此主徒類者。』然芒卯爲魏司徒，居中用事，此魏有司徒之證。楚襄王立昭常爲大司馬，使守東地，此楚有司馬之證。《史記·趙世家》：『惠文王四年，公子成爲相，李兌爲司寇，此趙有司寇之證。』又楚有司馬名翦，周有司寇名布，皆見《國策》。豈可謂七國時無此官？但三官並設者甚少，則以上卿亞卿下卿爲三卿，其說自不可易。」孟子曰：「居下位，不以賢事不肖者，伯夷也；五就湯，五就桀者，伊尹也；不惡汙君，不辭小官者，柳下惠也。三子者不同道，其趨一也。」**注**伊尹爲湯見貢於桀，桀不用而歸湯，湯復貢之，如此者五，思濟民，冀得施行其道也。此三人雖異道，所履者一也。**疏**注

「伊尹」至「一也」○正義曰：翟氏灝《考異》云：「胡應麟《少室山房筆叢》曰：『孟子稱伊尹五就桀，蓋屢言之以明聖人去就不常，非定以爲五也。』胡氏謂無五就之事，而占凡類屢之辭云三者多，云五未別見也。《鬼谷子·忤合》篇：『伊尹五就湯，五就桀，然後合於湯。』鬼谷與孟子並時，其言合符，

則孟子所得於傳聞者，當實云五。《禮記·曲禮》云：「帷簿之外不趨」，**注**云：「步而張足曰趨。」劉熙《釋名·釋姿容》云：「疾行曰趨。趨，赴也。赴所期也。」《禮記·表記》云：「處其位而不履其事」，**注**云：「履猶行也。」《國語·晉語》云：「下貳代履」，韋昭**注**云：「履，步也。」趨與履義相近，故以「其趨」爲所履也。「一者，何也？」**注**髡問一者何也？曰：「仁也。君子亦仁而已矣，何必同？」**注**孟子言君子進退行止未必同也，趨於履仁而已。髡譏其速去，故引三子以喻意也。

曰：「魯繆公之時，公儀子爲政，子柳、子思爲臣，魯之削也滋甚。若是乎，賢者之無益於國也？」**注**髡曰：魯繆公時，公儀休爲執政之卿。子柳，泄柳也；子思，孔伋也。二人爲師傅之臣，不能救魯之見削奪，亡其土地者多。若是，賢者無所益於國家，何用賢爲？**疏**注「公儀休爲執政之卿」○正義曰：《史記·循吏列傳》云：「公儀休者，魯博士也。以高弟爲魯相，奉法循理，無所變更，百官自正。食祿者不得與下民爭利，受大者不得取小。」《鹽鐵論·相刺》

章：「大夫曰：昔魯穆公之時，公儀爲相，子柳、子原爲之卿，然北削於齊，以泗爲境，南畏楚人，西賓秦國。」此即因《孟子》而演焉者也。盧氏文弼《羣書拾補》云：「子原，《說苑·雜言》篇作子庚，乃泄柳字。」《呂氏春秋·觀表》篇云「魏國從此削矣」，高誘注云：「削，弱也。」此之削弱由於彼之奪取，故云「削奪」，又申之云「亡其土地」。《說文》水部云：「滋，益也。」《公孫丑上》「則弟子之惑滋甚」，趙氏以益甚釋之。此訓爲「多」，土地之亡日見其多，斯所存乃見其削弱也。曰：「虞不用百里奚而亡，秦繆公用之而霸。不用賢則亡，削何可得與？」**注**孟子云：百里奚所去國亡，所在國霸。無賢國亡，何但得削？豈可不用賢也？曰：「昔者王豹處於淇而河西善謳，綿駒處於高唐而齊右善歌，華周、杞梁之妻善哭其夫而變國俗。有諸內必形諸外。爲其事而無其功者，髡未嘗覩之也。是故無賢者也，有則髡必識之。」**注**王豹，衛之善謳者。淇，水名。《衛詩·竹竿》之篇曰：「泉源在左，淇水在右。」《碩人》之篇曰：「河水洋

洋，北流活活。」衛地濱於淇水，在北流河之西，故曰「處淇水而河西善謳」，所謂鄭衛之聲也。綿駒，善歌者也。高唐，齊西邑，綿駒處之，故曰「齊右善歌」。華周，華旋也；杞梁，杞殖也。二人，齊大夫，死於戎事者。其妻哭之哀，城爲之崩。國俗化之，則效其哭。髡曰：如是歌哭者尚能變俗，有中則見外。爲之而無功者，髡不聞也；有功，乃爲賢者，不見其功，故謂之「無賢者」也。如有之，則髡必識知之。**疏**注「王豹」至「善歌」○正義曰：《周禮·春官·小

師》：「掌教鼓鼗祝敔埙簫管弦歌。」《毛詩·魏風·園有桃》「我歌且謠」，傳云：「曲合樂曰歌。」《楚辭·大招》云「謳和揚阿」，王逸注云：「徒歌曰謳。」然則謳、歌同一長言，而歌依於樂，謳不依於樂，此所以分也。《說文》欠部云：「歌，詠也。」言部云：「謳，齊歌也。」齊歌之說有二：《漢書·高帝紀》「皆歌謳思東歸」，注云：「謳，齊歌也。謂齊聲而歌。或曰：齊地之歌。」段氏玉裁《說文解字注》云：「假令齊聲而歌，則當曰衆歌，不曰齊歌。李善注《吳都賦》引曹植《妾薄相行》曰：『齊謳楚舞紛紛。』《太平御覽》引《古樂志》曰：『齊歌曰謳，吳歌曰歎，楚歌曰謠，淫歌曰哇。』若《楚辭》『吳

飲蔡謳，《孟子》「河西善謳」，則不限於齊也。」謹按：區有衆義，《說文》：「區，从品在匚中。品，衆也。」《爾雅·釋器》云「玉十謂之區」，《考工記·栗氏》「四豆爲區」，皆取積衆之名。劉熙《釋名·釋形體》云：「謳，區也。是衆名之大總若區域也。」聚衆聲而爲謳，故云「謳和揚阿」，謂齊聲相和也。《漢書·地理志》：「河內郡共，北山，淇水所出，東至黎陽入河。」《魏郡鄴，故大河在東北入海。》《史記·河渠書》云：「道河自積石，歷龍門，南到華陰，東下底柱，及孟津雒汭，至于大邳。於是禹以爲河所從來者高，水湍悍，難以行平地，數爲敗，乃斷二渠以引其河，北載之高地，過降水，至於大陸，播爲九河，同爲逆河，入於渤海。」載之高地，即鄴東也。《溝洫志》：「王橫曰：『禹之行河水，本隨西山下東北去。《周譜》定王五年河徙，則今所行非禹所穿也。又秦攻魏，決河灌其都，決處遂大，不可復補，宜却從完平處更開空，使緣西山足乘高地而東北入海。』賈讓云：『今行上策，徙冀州之民當水衝者，決黎陽遮害亭，放河使北入海。』」橫言「緣西山足乘高地」即太史公言「載之高地」，讓言「西薄大山」即橫所謂「隨西山下」。此即鄴東大河故道，由黎陽北行，故淇水至黎陽入河。若黎陽之河既竭，不北行人海，則淇水已合於清河矣。惟河水至黎陽北流，故《衛風·碩人》

云：「河水洋洋，北流活活。」《左傳》稱「齊先君所履，西至於河」，是齊在河東，衛在河西，故衛稱河西也。河水北流，淇水全在衛地，故云「衛地濱於淇水，在北流河之西」。蓋趙氏當東漢時，鄴河久竭，河徙東行，衛地不在河西而淇水不濱衛地，故兩引《詩》以明古河與淇之所在，此趙氏地學之精也。胡氏謂《禹貢》指云：「《詩·衛風》：『河水洋洋，北流活活。』河至大伾山西南，折而北逕朝歌之東，故謂之『北流』。」《史記·衛世家》：「封康叔爲衛君，居河淇間故商墟。」商墟即古朝歌城，淇水逕其西，河水逕其東，是爲河淇之間。故淳于髡曰「王豹處於淇而河西善謳」是也。《漢書·地理志》平原郡有高唐，地在齊國之西，西在右，故其地爲「齊右」也。《韓詩外傳》云：「淳于髡曰：昔者揖封生高商，齊人好歌。」高商蓋即高唐，揖封蓋即縣駒。臧氏琳《經義雜記》云：「《文選》陸士衡《樂府·吳趨行》：『楚妃且勿歎，齊娥且莫謳。』唐劉良注：『齊娥，齊后也。善爲謳歌，人皆採以爲曲。』李善注：『齊娥，齊后也。』《孟子》淳于髡曰：昔縣駒處高唐而齊后善謳。」今《孟子》作「齊右善歌」，趙注：「高唐，齊西邑，縣駒處之，故曰齊右善歌。」則趙注本不作后字，而李、劉注《文選》皆以齊娥爲齊后，李注又引《孟子》證之，蓋有別本作后字者。」按：作后字非也。河西齊右，言其相

化者衆，若善歌僅一齊后，非髡之憎也。○注「華周」至「其哭」○正義曰：襄公二十三年《左傳》云：「齊襲莒，杞殖、華還載甲，夜入且于之隧，宿於莒郊。明日，先遇莒子於蒲侯氏。莒子重賂之，使無死。華周對曰：『貪貨棄命，亦君所惡也。昏而受命，日中而棄之，何以事君？』莒子親鼓之，從而伐之，獲杞梁。齊侯歸，遇杞梁之妻於郊，使弔之。辭曰：『殖之有罪，何用命焉？若免於罪，猶有先人之敝廬在，下妾不得與郊弔。』齊侯弔諸其室。」《禮記·檀弓》亦載此事，言「杞梁妻迎其柩於路而哭之哀。」是華周即華旋，杞梁即杞殖。旋與還同。乃皆言杞梁死，杞梁之妻哭。按：《左傳》載華周之言，則周志在死決矣。古人之文，每用互見。蓋周之言，梁亦同之；梁之死，周亦同之。梁妻以有對君之言而傳，不必周之妻不哭也。《列女傳·貞順》篇云：「杞梁之妻無子，內外皆無五屬之親，既無所歸，乃枕其夫之屍於城下而哭。內誠動人，道路過者莫不爲之揮涕，十日而城爲之崩。」此亦專言杞梁。乃《說苑·善說》篇孟嘗君曰：「昔華舟、杞梁戰而死，其妻悲之，向城而哭，隅爲之崩，城爲之隤。」又《立節》篇云：「杞梁、華舟至莒城下，莒人以炭置地，二人立有間，不能入。隰侯重爲右，曰：『吾聞占之士犯患涉難者，其去遂於物也。來，吾踰子。』隰侯重伏楯伏炭，

二子乘而入，顧而哭之。華舟後息，杞梁曰：『汝無勇乎？何哭之久也？』華舟曰：『吾豈無勇哉？是其勇與我同也而先吾死，是以哀之。』莒人曰：『子毋死，與子同莒國。』杞梁、華周曰：『去國歸敵，非忠臣也；去長受賜，非正行也。且雞鳴而期，日中而忘之，非信也。深人多殺者，臣之事也。莒國之利，非吾所知也。』遂進鬪，殺二十七人而死。其妻聞之而哭，城爲之隤而隅爲之崩。」此與《孟子》合，且足以發明《左傳》。舟、周占字通。趙氏言城爲之崩，本《列女傳》、《說苑》所記也。《論衡·感虛》篇云：「傳書言杞梁氏之妻嚮城而哭，城爲之崩。此言杞梁從軍不還，其妻痛之，嚮城而哭，至誠悲痛，精氣動城，故城爲之崩也。夫言嚮城而哭者，實也；城爲之崩者，虛也。或時城適自崩，杞梁妻適哭於下，世好虛不原其實，故崩城之名至今不滅。」然則城崩之說由來久矣。《詩·大雅·皇矣》「不識不知」，「識」亦「知」也。曰：「孔子爲魯司寇，不用。從而祭，燔肉不至，不稅冕而行。不知者以爲爲肉也，其知者以爲爲無禮也。乃孔子則欲以微罪行，不欲爲苟去。君子之所爲，衆人固不識也。」**注**孟子言孔子爲魯賢臣，不用，不能用其道也。從魯

君而祭於宗廟，當賜大夫以胙。燔肉不至，膊炙者爲燔，《詩》云：「燔炙芬芬。」反歸其舍，未及稅解祭之冕而行，出適他國。不知者以爲不得燔肉而慍也，知者以爲爲君無禮。乃欲以微罪行，燔肉不至，我黨從祭之禮不備，有微罪乎，乃聖人之妙旨。不欲爲，誠欲急去也。衆人固不能知君子之所爲，謂髡不能知賢者之志。

疏「孔子爲魯司寇」○正義曰：閻

氏若璩《釋地續》云：「司寇，魯官名，在司徒司馬司空三桓世爲之三卿之下。侯國本無『大』稱，《史記·世家》作大司寇，非也。然司寇，魯有以初命之大夫爲者，孔子是。《韓詩外傳》猶載孔子爲魯司寇命辭曰：『宋公之子，弗甫何孫魯孔丘，命爾爲司寇。』無大字。有以再命之卿爲之者，臧孫紇是。襄二十一年季孫謂武仲曰：『子爲司寇。』及後二年，出奔邾也，書於經以爲卿。故若孔子雖與聞國政，實止大夫而非卿，故經沒而不見。不然，齊來歸鄆、讎、龜陰田，聖人未嘗以己功而諱之，豈有孔子出奔，載諸策書，修《春秋》時竟削之哉？」毛氏奇齡《經問》云：「陳佑問：司空、司寇，皆卿名也。魯之三卿，則三家並爲之，何有於夫子？此豈三家之外夫子別爲一卿乎？抑亦即此三卿而夫子代爲其一

乎？且三卿之名止司徒、司馬、司空也，若增司寇一名，即六卿矣，侯國焉得有六卿也？且司寇，卿名也。近淮南閻氏謂孔子初命爲大夫而非卿，不知何據？又謂侯國無大小卿，魯國焉得有大司寇，則是夫子爲司寇或有之，曰大則未也。曰：魯國三卿，季氏爲司徒，叔孫爲司馬，孟孫爲司空，此是《左傳》文，無可疑者。特夫子由司空爲司寇，則或代孟孫爲之，或別設一官，皆不可考。惟《禮》注崔氏說禮云：「三卿，周制。立司徒兼冢宰之事，立司馬兼宗伯之事，立司空兼司寇之事。」則似冢宰、宗伯、司寇皆司徒、司馬、司空兼官，不必別設。孟孫既爲司寇，則不當又有司空。夫子既爲司空，不當又進爲司寇。而予謂不然者，據《春秋傳》臧孫紇爲司寇，夏父弗忌爲宗伯，皆非孟孫、叔孫兼官。且隱十一年羽父請殺桓以求太宰，是時羽父已掌兵柄，見爲司馬而尚求太宰，且不求司徒而求太宰，則太宰非兼官，且非司徒之兼官，抑可知矣。嘗讀《書大傳》，謂天子三公，皆六卿爲之，而分爲三等：一冢宰司徒，二宗伯司馬，三司寇司空。而三等之中又取每等之下者以爲名，故曰司徒公、司馬公、司空公，而其餘不然。世但知三公爲三官，而不知六卿皆公也。由此推之，則侯國三卿必仿其制，雖六卿皆備，而祇以三官爲名。抑或設冢宰時闕司徒，設司寇時闕司馬，皆未可知。

是六卿雖具而仍不礙爲三卿。天子之公與諸侯之卿，其制一也。若謂孔子祇初命大夫而非卿，則六官者，卿名也。六官在朝名官卿，在鄉名鄉卿，在軍即名軍卿。卿可名大夫，大夫不得名卿也。或者大國三卿，皆命於天子；次國三卿，二卿命於天子，一卿命於其君。魯本次國而夫子又異姓之卿，不必爲天子所命而命於魯君，則容有之。然魯君所命，歷有明據。《韓詩外傳》云：「孔子爲魯司寇，其命辭曰：宋公之子，弗甫何孫魯孔丘，命爾爲司寇。」此是命卿之辭，非命大夫之辭也。至謂侯國無大小卿，魯但有司寇，不當有大司寇，則又不然。《王制》侯國三卿俱有下大夫五人，其所云下大夫者即小卿也，所謂五人則《公羊》謂司徒二人，司空一人，司馬止一人，統爲五人。其以此爲舍中軍之解或不可信，然其爲小卿，則說同也。故崔氏《禮》注謂司徒以下有小宰、小司徒二人，司空以下有小司空、小司寇二人，惟司馬下祇小司馬一人，爲五人。是有小即有大，小者大夫，則大者卿矣。夫子爲司空或是小卿，故其進爲司寇則加大以別之。此正由大夫而進爲卿之明證。若謂夫子自稱從大夫後，則季氏何嘗非魯大夫乎？「周氏柄中《辨正》云：『《春秋》之例，大夫名見於經者，皆卿也。魯臧宣叔爲司寇，而經書「臧孫許及魯侯盟」，又書「臧孫許帥師」，其卒也，書「臧孫許

卒」，則儼然卿矣。臧武仲爲司寇，而經書「臧孫紇出奔」，又儼然卿矣。卿則非小司寇，謂之大焉可矣。至於相，則當國執政之稱，執政必上卿而孔子以司寇當國，故謂之「攝」。如齊有命卿國、高而管仲以下卿執政，鄭有上卿子皮而子產以介卿聽政，是也。成十五年《公羊傳》云「臧宣叔者，相也」。宣叔爲司寇謂之爲相，此孔子攝行相事之證。或以爲攝夾谷之相者，非也。」○注「從魯」至「去也」○正義曰：《周禮·春官·大宗伯》「以脰膾之禮親兄弟之國」，注云：「脰膾，社稷宗廟之肉以賜同姓之國，同福祿也。」《說文》肉部云：「胙，祭福肉也。」僖公九年《左傳》云：「王使宰孔賜齊侯胙曰：天子有事於文武，使孔賜伯舅胙。」此「賜胙」之事也。燔與膾同，《說文》作「燔」，云：「宗廟火孰肉。」《春秋傳》曰：「天子有事，燔焉以饋同姓諸侯。」《詩·小雅·楚茨》正義云：「燔者，火燒之名，炙者，遠火之稱。以難熟者近火，易熟者遠之，故肝炙而肉燔。」《生民》傳曰「傳火曰燔」，《瓠葉》傳曰「加火曰燔」，對遙炙者爲近火，故云「傳火」、「加火」。①燔其實亦炙，非炮燒之也。」傳火即膊炙，劉熙《釋名·釋飲食》云：「膊，迫也。薄脔肉迫著物使燥也。」迫著

①「火」，原作「之」，今從沈校據《毛詩注疏》阮校改。

即近意。膊炙謂近而炙之，即傳火也。《考工記·廬人》：「重欲傳人」，注云：「傳，近也。」傳、膊聲同義同也。引《詩》在《大雅·鳧鷖》第五章，毛傳皆以祭宗廟之明日，設禮以燕尸，故引以明宗廟之祭有燔肉。鄭氏以燔炙為褻味，乃祀門戶小神之用，趙氏所不取也。《史記·孔子世家》云：「齊陳女樂，季桓子微服往觀，怠於政事。子路曰：『夫子可以行矣。』」孔子曰：「魯今且郊，如致饔乎大夫，則吾猶可以止。」桓子卒受齊女樂，三日不聽政，郊又不致饔俎於大夫，孔子遂行。宿乎屯，而師已送曰：「夫子則非罪。」江氏永《鄉黨圖考》云：「《孔子世家》誅少正卯，三月大治，歸女樂，去魯適衛，皆敘於定公十四年，非也。考《十二諸侯表》及《魯世家》皆於定十二年書女樂去魯事，《年表》及《衛世家》皆於靈公三十八年書孔子來，祿之如魯。衛靈三十八年當魯定公十三年，蓋女樂事在十二、十三冬春之間，去魯實在十三年春。魯郊嘗在春，故經不書。」趙氏不用《史記》而言從魯君祭於宗廟，蓋以《春秋》書郊在定公十五年夏五月辛亥，時孔子已去魯也。趙氏佑《溫故錄》云：「郊本魯之僭，不當在常事得禮不書之例。魯蓋有時舉有時不舉，故經有書有不書。饔者，祭肉之名，不必獨以郊。」是也。賜大夫胾，禮也；不得燔肉，是君失賜胾之禮。知者與不知者所見略同，特一以

肉一以禮，而皆歸過於君。乃孔子以不欲歸罪於君而自以微罪行，何也？燔肉不至於大夫，固君之疏，亦從祭者之不備也。我，亦從祭者，使君失賜胾之禮，凡從祭者均不能無過，則我黨皆有微罪，我亦不免於微罪，故以此罪行，為聖人之妙旨也。趙氏此解從《史記》「夫子則非罪」一言悟入，蓋孔子當時臨行必自稱此罪，故師已曰「夫子則非罪」也。知與不知皆莫測夫子妙旨，故云「衆人不識」。閻氏若璩《釋地續》云：「去魯曰『遲遲吾行也』，正道路低回欲絕語。何故前此助祭反舍，未及稅所著之冕輒行，以適他國，不幾悻悻乎？與『接淅』曷異乎？蓋孔子為魯司寇，既不用其道，宜去一；燔俎又不至，宜去二。其去之之故，天下自知之。但孔子不欲其失純在君相，已亦帶有罪焉。其所為有罪，即在『不稅冕而行』一句。蓋冕原祭服，《禮》『大夫冕而祭於公』是。今也戴於道路間，尚非罪乎？故當時不知者以孔子為為肉，縱在知者亦以孔子為為無禮。乃孔子之意則欲以己不稅冕之罪行，不欲為苟去。『苟去』猶言徒去。空空而去，無己一點不是處，是為徒去。樂毅《報燕王》尚云「忠臣去國，不潔其名」，況孔子乎？又《禮》『大夫士去國，不說

①「相」，原誤作「桓」，今據《四書釋地》及經解本改。

人以無罪」，注云：「己雖遭放逐，不自以無罪解說於人，過則稱己也。」《史記·世家》師己送曰：「夫子則非罪。」觀此，似孔子當日自認一罪名而行，師己則送而解之。千載而下，猶可以情測云。」或云：以臠肉不至遂行，無乃太甚？此之謂「以微罪行」。魯人爲肉、爲無禮之議，正愜孔子微罪之心。

章指：言見幾而作，不俟終日。孔子將行，冕不及稅；庸人不識，課以功實。淳于雖辨，終亦屈服，正者勝也。

孫授易授詩校字

孟子正義卷二十四終

孟子正義卷二十五

江都縣鄉貢士焦循撰集

孟子曰：「五霸者，三王之罪人也；**注五**霸者，大國秉直道以率諸侯，齊桓、晉文、秦繆、宋襄、楚莊是也；二王，夏禹、商湯、周文王是也。**疏**

注「五霸」至「楚莊是也」○正義曰：《白虎通·號篇》云：

「五霸者，何謂也？昆吾氏、大彭氏、豕韋氏、齊桓公、晉文公也。昔三王之道衰而五霸存其政，率諸侯朝天子，正天下之化，^①興復中國，攘除夷狄，故謂之霸也。昔昆吾氏，霸於夏者也，大彭氏、豕韋氏，霸於殷者也，齊桓、晉文，霸於周者也。或曰：五霸謂齊桓公、晉文公、秦穆公、楚莊王、吳王闔閭也。霸者，伯也。行方伯之職，會諸侯，朝天子，不失人臣之義，故聖人與之，非明王之法不張。霸猶迫也，把也。迫脅諸侯，把持其政。《論語》曰：「管仲相桓公霸諸侯。」

《春秋》曰：「公朝于王所。」於是知晉文之霸也。《尚書》曰：「邦之榮懷，亦尚一人之慶。」知秦穆之霸也。楚勝鄭而不告，從而攻之，又令還師而佚晉寇，圍宋，宋因而與之平，引師而去。知楚莊之霸也。蔡侯無罪而拘於楚，吳有憂中國心，興師伐楚，諸侯莫敢不至。知吳之霸也。或曰：五霸謂齊桓公、晉文公、秦穆公、宋襄公、楚莊王也。宋襄伐齊，不擒二毛，不鼓不成列，《春秋傳》曰：「雖文王之戰，不過。」知其霸也。毛氏奇齡《四書膳言》云：「《孟子》稱五霸，趙岐注齊桓、晉文、秦穆、宋襄、楚莊，此是漢儒之言。按，《荀子·王霸》篇齊桓、晉文、楚莊、吳闔閭、越勾踐謂之五霸。此戰國時所定，與後漢不同。故明盧東元謂「秦穆公用之而霸，此據《春秋傳》秦用孟明，遂霸西戎語，未霸中國」，此言良然。若丁公著以夏昆吾，商大彭、豕韋，合齊桓、晉文為五霸，則於「桓公為盛」，就當時盟會，較量優劣為未合矣。」閻氏若璩《釋地三續》云：「崑山顧亭林炎武謂五伯有二：有三代之五伯，杜元凱注《左傳》成二年者是，有春秋之五伯，趙臺卿注《孟子》「五霸」章是。孟子止就東周後言之而以桓為盛，如嚴安所謂周之衰三百餘歲而五伯更起者

①「正」，原脫，今從沈校據《白虎通》補。

也。然亭林欲去宋襄而進句踐，亦未允。襄雖未成霸，然當時以其有志承桓，故並數爲五，有是稱謂云爾。豈惟趙氏？即董仲舒亦云然矣。仲舒云：「仲尼之門，五尺之童皆羞稱五伯。」夫惟宋襄輩在仲尼之前，故言「羞稱」。不然，句踐也霸且不出仲尼後哉？」按：趙氏以齊桓、晉文、秦穆、宋襄、楚莊爲五伯，本《春秋》說。○注「三王」至「是也」○正義曰：《白虎通·號》篇云：「三王者，何謂也？夏、殷、周也。《詩》云：『命此文王，于周于京。』此改號爲周，易邑爲京也。《風俗通·皇霸》篇云：『《禮號謚記》說：『夏禹、殷湯、周武王，是三王也。』《尚書》說：『文王作罰，刑茲無赦。』《詩》說：『有命自天，命此文王。文王受命，有此武功。』儀刑文王，萬國作孚。』《春秋》說：『王者孰謂？謂文王也。』按，《易》稱「湯武革命」。《尚書》：「武王戎車三百兩，虎賁八百人，擒紂於牧之野。惟十有三祀，王訪於箕子。」《詩》云：「亮彼武王，襲伐大商，勝殷遏劉，耆定爾功。」由是言之，武王審矣。《論語》：「文王率殷之叛國，以服事殷。」時尚臣屬，何緣便得列三王哉？」謹按：三王或列周武王或列周文王，故應氏並列二說而辨其宜列武王也。《白虎通》不言禹湯而專詳文王，正以禹湯稱王不待詳說。惟三王列文王不列武王，故引《詩》明文王即政立號也。趙氏列文王不

列武王，蓋即本《尚書》說、《詩》說、《春秋》說，與《白虎通》同。閻、監、毛三本趙注作「周文武」，非是。今之諸侯，五霸之罪人也；今之大夫，今之諸侯之罪人也。**注**謂當孟子之時諸侯及大夫也。諸侯臣總謂之大夫。罪人之事，下別言之。天子適諸侯曰巡狩，諸侯朝於天子曰述職。春省耕而補不足，秋省斂而助不給。人其疆，土地辟，田野治，養老尊賢，俊傑在位，則有慶，慶以地；人其疆，土地荒蕪，遺老失賢，掎克在位，則有讓。一不朝則貶其爵，再不朝則削其地，三不朝則六師移之。是故天子討而不伐，諸侯伐而不討。五霸者，搜諸侯以伐諸侯者也，故曰：五霸者，三王之罪人也。**注**巡狩，述職皆以助人民。慶，賞也。養老尊賢，能者在位，賞之以地，益其地也。掎克不良之人在位則責讓之。不朝至三，討之以六師。移之，就之也。討者，上討下也；伐者，敵國相征伐也。五霸強，搜羣諸

侯以伐諸侯，不以王命也，於三王之法乃罪人也。

疏注「慶賞」至「地也」○正義曰：《爾雅·釋言》云：「慶，賀也。」《說文》貝部云：「賀，以禮相奉慶也。」「賞，賜有功也。」

《詩·小雅·楚楚者茨》孝孫有慶，箋云：「慶，賜也。」淮南子·時則訓云「行慶賞」，高誘注云：「賞，賜予。」賞、慶皆訓賜，則「慶」即「賞」。《儀禮·士喪禮》注云：「賀，加也。」加亦益也，故趙氏以「賞」釋「慶」，又以「益」釋「賞」也。《禮記·王制》云：「有功德於民者，加地進律。」加地即賀以地，賀以地即慶以地也。閻氏若璩《釋地又續》云：「《王制》：『方千里者封方百里之國三十云云，名山大澤不以封，其餘以爲附庸間田。』諸侯之有功者取於間田以祿之，其有削地者歸之間田。則孟子所謂『慶以地』即於此一州之內也。故當其屢有所慶，天子不見其不足，或屢有所削，天子亦不見其有餘。蓋原在王畿千里外而天子初無所與焉。」○注「培克」至「讓之」○正義曰：《毛詩·大雅·蕩》篇「曾是培克」，傳云：「培克，自伐而好勝人也。」孔氏正義云：「自伐解培，好勝解克。定本培作倍，倍即培也。倍者，不自量度，謂己兼倍於人而自矜伐。《論語》云『願無伐善』是也。克者，勝也。己實不能，耻於受屈，意在陵物，必勝而已。如

此者謂之克也。」箋云：「女曾任用是惡人，使之處位執職事。」惡人即「不良之人」。《音義》云：「培，丁薄侯切，深也，聚斂也。」蓋謂深克腴民之人，與毛傳不同。段氏玉裁《說文解字注》云：「培，^①把也。《史》《漢》皆言『培視得鼎』，師古曰：『培，手把土也。』」^②《大雅》「曾是培克」，定本培作倍。《孟子》書亦作「培克」，趙注但云「不良也」。毛意謂培爲倍之假借字，培有聚意，與桴音義近，有深取意，則不同桴。《毛詩釋文》云：「培克，聚斂也。」此謂同桴也。《方言》曰：「培，深也。」郭注云：「培，深能。」以深釋培，以能釋尅，此亦必古說，但皆非毛義。《方言》培訓深，與許說合。《國語·周語》云「刑不祭，伐不祀，征不享，讓不貢」，注云：「讓，譴責也。」○注「移之」至「命也」○正義曰：《呂氏春秋·義賞》篇云「賞重則民移之」，高誘注云：「移猶歸也。」《廣雅·釋詁》云：「就，歸也。」《荀子·大略》篇云「移而從所仕」，楊倞注云：「移，就也。」是「移之」即「就之」也。六師本在王畿，移而就此，是爲移之，即爲就之。李太青云：「不朝者三，則非方伯連帥能制其命，亦非折簡可致，故

①「培」，原誤作「把」，今據《說文解字注》改。

②「把」，原誤作「把」，今據《說文解字注》改。

須以天子六師移之。見先王武備之豫，紀律之臧，兵出於國都而此無徵發之勞，威行於侯服而彼無震驚之患，如以物加移之而已。作移易者，恐非。」《說文》言部云：「誅，討也。」「討，治也。」段氏玉裁《說文解字注》云：「發其紛糾而治之曰討，《秦風》傳云：『蒙，討羽也。』箋云：『蒙，龍也。』討，雜也。畫雜羽之文於伐，故曰龍伐。」據鄭所言，則討者亂也。治討曰討，猶治亂曰亂也。《論語》「世叔討論之」，馬曰：「討，治也。」《學記》「古之學者，比物醜類」，醜或作討。凡言討論、探討，皆謂理其不齊者而齊之也。」侯國亂，天子治之，故討為「上討下」之辭。上討下即上治下，《禮記·王制》云「畔者君討」是也。隱公四年「衛人殺州吁于濮」，《公羊傳》云：「其稱人何？討賊之辭也。」《白虎通·誅伐》篇云：「討猶除也。欲言臣當掃除弑君之賊也。」何氏本之。《曲禮》「馳道不除」，注云：「除，治也。」除賊亦治賊也。莊公二十九年《左傳》云「凡師有鐘鼓曰伐」，杜預《春秋釋例》云：「鳴鐘鼓以聲其過曰伐。」蓋諸侯奉王命以聲諸侯之罪，既伐之，當必告於王以治之，五霸不奉王命而羣搜諸侯以伐諸侯，所以為三王之罪人。搜之為羣，詳見前。五霸不上稟天子之命而以其命牽引諸侯，蓋伐之即專治之矣。

「五霸，桓公為盛。葵丘之會諸侯，束牲

載書而不歃血。初命曰：「誅不孝，無易樹子，無以妾為妻。」再命曰：「尊賢育才，以彰有德。」三命曰：「敬老慈幼，無忘賓旅。」四命曰：「士無世官，官事無攝。取士必得。無專殺大夫。」五命曰：「無曲防，無遏糴，無有封而不告。」曰：「凡我同盟之人，既盟之後，言歸于好。」今之諸侯皆犯此五禁，故曰：今之諸侯，五霸之罪人也。**注**齊桓公，五霸之盛者也。與諸侯會于葵丘，束縛其牲，但加載書，不復歃血，言畏桓公，不敢負也。不得專誅不孝，樹，立也，已立世子，不得擅易也。不得立愛妾為嫡也。尊賢養才，所以彰明有德之人。敬老愛小，恤矜孤寡，賓客羈旅勿忘忽也。仕為大臣，不得世官，賢臣乃得世祿也；官事無攝，「無曠庶僚」也；取士必得賢，立之無方也；無專殺大夫，不得以私怒行誅戮也。無敢違王法而以己曲意設防禁也，無遏止穀糴，不通鄰國也，無以私恩擅有所封賞而

不告盟主也。言歸于好，無構怨也。桓公施此五命，而今諸侯皆犯之，故曰「罪人」也。

疏「葵丘之會

諸侯」○正義曰：閻氏若璩《釋地續》云：「春秋有二葵丘：

一齊地，近在臨淄縣西，連稱、管至父所成者；一宋地，司馬

彪云：「陳留郡外黃縣東，有葵丘聚，齊桓公會此城中。」遠

在齊之西南，故宰孔稱「齊侯西為此會」也。」全氏祖望《經史

問答》云：「葵丘有三：其一在齊，其一在陳留之外黃，其一

在晉，見於《水經注》。然宰孔論桓公之盟以為西略，則似非

陳留之外黃也。答云：杜預以為外黃。亦有以為汾陰之葵

丘者，而杜非之，以為若是汾陰，則晉乃地主，夏會秋盟豈有

不預之理？杜言亦近是。然愚則竊以為宰孔明言西略，而

以為陳留，是仍東略也，則宜在汾陰。蓋當時之不服桓公者

楚，而晉實次之，周惠王之言可驗也。故桓公特為會於晉地

以致之，亦霸者之用心也。」翟氏灝《考異》云：「《春秋》僖公

九年九月戊辰，諸侯盟於葵丘。《左傳》：「齊侯盟諸侯於葵

丘，曰：凡我同盟之人，既盟之後，言歸於好。」《穀梁傳》：

「葵丘之盟，陳牲而不殺，讀書加於牲上，壹明天子之禁，

曰：毋壅泉，毋訖糴，毋易樹子，毋以妾為妻，毋使婦人與國

事。」①《管子·大匡》篇：「桓公問管仲何行？對曰：公內

修政而勸民，可以信於諸侯矣。公許諾，乃弛關市之征，為

賦祿之制。既已，管仲請曰：問病臣，願賞而無罰，五年諸

侯可令傳。公曰諾。既行之，又請曰：諸侯之君有行事善

者，以重幣賀之；諸侯之臣有諫其君而善者，以璽問之，以

信其言。公既行之，問管仲曰：將何行？對曰：君教諸侯

為民聚食，諸侯之兵不足者君助之發，如此則始可加之政

矣。公既行之，又問管仲曰：何行？對曰：君會其君臣父

子。公曰：會之道奈何？曰：諸侯毋專立妾以為妻，毋專

殺大臣，無國勞，無專予祿，士庶人毋專弃妻，毋曲隄，毋貯

粟，毋禁材。行此卒歲，則始可以罰矣。君乃布之於諸侯，

諸侯許諾，受而行之。管仲曰：可以加政矣。曰：從今以

往一年，適子不聞孝，不聞愛其弟，不聞敬老國良，三者無一

焉，可誅也；諸侯之臣及國事，三年不聞善，可罰也；君有

過，大夫不諫，士庶人有善，而大夫不進，可罰也。桓公受而

行之，近侯莫不請事，兵車之會六，乘車之會三，饗國四十有

二年。」又《霸形》篇：「與楚王遇於召陵之上而令之曰：毋

貯粟，毋曲隄，毋擅廢適子，毋置妾以為妻。」按，《春秋》三傳

①「婦」，原誤作「國」，今從沈校據《四書考異》及《穀梁傳》改。

無如《孟子》之詳。《管子·大匡》雖其文極參錯，而事語實相當。其云適子不聞孝者誅，即誅不孝也；云君有善者以幣賀之，臣有善者以璽問之，即尊賢育才，以彰有德也；云愛其弟、敬老國良，即敬老慈幼也；云弛關市之征及問病臣，即無忘賓旅也；云為賦祿之制，即士無世官，官事無攝也；云士庶人有善不進者罰，即取士必得也；云無國勞，毋專予祿，即無有封而不告也；餘如無易樹子，無以妾為妻，無專殺大夫，無曲防，無遏糴，更較然著同文矣。其曰既行之又請云云，又問云云，亦與《孟子》初命至五命相值。謹按：《孟子》五命，乃葵丘之會所命次第如此，與《管子》不同。○注「束縛」至「負也」○正義曰：毛氏奇齡《經問》云：

「問：《孟子》『葵丘之會諸侯，束牲載書而不歃血』，載書謂載其盟書於牲上也。趙岐注有曰：『但加載書，不復歃血。』則既載而又加，不其複與？曰：載非加也。載書者，盟載書也。《周禮·司盟》『掌盟載之法』，謂盟有載事，因而為書，其法則殺牲取血，坎其牲而加書於上以埋之。故《左傳》襄十六年伊戾誣太子痤與客盟，①謂「坎用牲加書」是也。《穀梁傳》云：『葵丘之會，陳牲而不殺，讀書加於牲上，壹盟天子之禁。』此加字並不訓載字。然猶恐相混不分別，故趙氏云「但加載書」，則瞭然矣。蓋載書有用牲者，有不用牲

者。襄九年「鄭與晉盟，晉士莊子為載書，荀偃曰：『改載書』」。此用牲者也。若襄十年「鄭子孔當國，為載書，以位序聽政辟」，則但作書以示諸侯受職聽訟之法，此時未嘗用牲也。又襄二十二年「臧武仲據防出奔，季孫召外史掌惡者而問載書之首章」，則逐臣示戒，當用牲乎？然則用牲曰載，不用牲亦曰載。牲且無有，加於何所？故曰載者，事也，非加也。此明著者也。閻氏若璩《釋地又續》云：「襄九年『晉士莊子為載書』，杜注：『載書，盟書也。』《周禮·司盟》『掌盟載之法』，注云：『載盟辭也。盟者書其辭於策，殺牲取血，坎其牲，加書於上而埋之，謂之載書。』可見載書二字是實字，非如今人解以載為加。趙氏注「束縛其牲，但加載書，不復歃血」，得之矣。毛氏、閻氏二說略同，蓋以趙氏「但加載書」解為但加盟書也。按：趙氏解經之例，每以疊字為訓。《說文》車部云：「載，乘也。」《淮南子·汜論訓》云「彊弱相乘」，高誘注云：「乘，加也。」是載之訓為加。趙氏疊「加載」二字，即以加釋載，猶疊「束縛」二字，即以縛釋束。「但加載書」謂但加載此書，非謂但加此載書也。若載不訓加，第是盟書，則經稱「束牲盟書」為不辭，趙氏加字為無涉

①「十六」，按事在二十六年，參沈校。

於經文矣。《秋官·司盟》「掌盟載之法」，注云：「載盟辭也。」四字爲句，謂經言盟載，是載此盟辭也，非是以盟辭解載字。下云「盟者書其辭於策」，此解盟字。則盟字即《孟子》此文之「書」字。下云「殺牲取血，坎其牲，加書於上而埋之，謂之載書」，此解載字。書辭於策爲「盟」，即爲「書」；加載於牲上爲「載書」，即爲「盟載」。鄭注甚明。賈氏疏云：「載者，正謂以牲載此盟書於上，故謂之載也。」趙氏此注與《穀梁傳》同，與鄭氏注亦同。毛氏、閻氏未識趙氏疊字爲訓之例，亦未識鄭氏注《司盟》之義，而謂趙氏不以載爲加，失之甚矣。莊公二十七年《穀梁傳》云：「衣裳之會十有一，未嘗有歃血之盟也，信厚也。」注云：「十三年會北杏，十四年會鄆，十五年又會鄆，十六年會幽，二十七年又會幽，僖元年會榿，二年會貫，三年會陽穀，五年會首戴，七年會甯母，九年會葵丘。」僖公九年《傳》云「葵丘之盟，陳牲而不殺」，注云：「所謂無歃血之盟。鄭君曰：『盟牲，諸侯用牛，大夫用豕。』」楊氏疏云：「衣裳之會皆不歃血，而此會獨言之者，以此會桓德極盛，故詳其實事，餘盟亦不歃血耳。八年洮會云「洮血與鄭伯」者，彼兵車之會故也。徐邈云：「陳牲者，不殺埋之，陳示諸侯而已。加於牲上者，亦謂活牲，非死牲。」此「不歃血」之事也。○注「不得專誅」至「易也」○正義曰：

孔本作「得專誅不孝」，毛氏汲古閣本作「不得專誅不孝」。依毛本則與經文「誅不孝」似相戾，宜孔本是也。乃既云「得專誅不孝」，又云「已立世子，不得擅易」，如當時晉殺其世子申生，固以歸胙於公而寘毒也，以歸胙寘毒殺，即以不孝誅矣。夫已立之世子將廢立之，必以不孝爲之罪，然則「誅不孝」、「無易樹子」二事，殊相牴牾。蓋趙氏以「誅不孝無易樹子」七字作一句，謂子之不孝者當誅，但已立爲世子，不得以其不孝而專誅而擅易之，須公論而後誅之。《方言》云：「樹，植立也。燕之外郊，朝鮮、洌水之間，凡言置立者謂之樹植。」僖公三年《公羊傳》云「無易樹子」，注云：「樹，立也。」趙氏與之同。「不得擅易」，然則世子誠不孝，亦當白之天下公論誅之。「無易樹子」是無「擅易」樹子，則誅不孝亦是公誅不孝，公誅不孝即是「不得專誅不孝」也。桓公命諸侯不可云「毋專誅不孝」，亦不可云「毋易不孝之樹子」，故爲互辭。趙氏探其指，一云「不得專誅」，一云「不得擅易」，實能斡旋經文而彌縫其闕隙也。且實能禁當時假不孝之名以擅易樹子也。○注「尊賢」至「之人」○正義曰：《爾雅·釋詁》云：「育，養也。」彰與章同。《書·堯典》云「平章百姓」，鄭氏注云：「章，明也。」○注「敬老」至「忽也」○正義曰：《賈子·道術》篇云：「親愛利子謂之慈。」《周禮·地官·大

司徒「以保息六養萬民，一曰慈幼」，注云：「慈幼，謂愛幼少也。」其「二曰養老，三曰振窮」，注云：「窮者有四：曰矜，曰寡，曰孤，曰獨。」此命言敬老慈幼，故趙氏連類言「恤矜孤寡」也。《說文》心部云：「忽，忘也。」○注「仕爲」至「僚也」○正義曰：《大戴禮·千乘》篇云：「凡事尚賢進能，使知事爵不世，能官之不愆。」孔氏廣森《補注》云：「古者有世祿無世位，故《春秋》譏尹氏也。大夫不世。苟有能者，必官之，無失人。」《書·皋陶謨》云：「無曠庶官。」僚亦官也。王肅注云：「不可不得其人也。」曠之言空，不得其人則空虛其職。《論語·八佾》篇「管氏官事不攝」，包氏注云：「禮，國君事大，官各有人，大夫并兼事。」大而兼攝之則必空曠其事，故引《書》文以明之也。○注「無敢」至「禁也」○正義曰：《管子》兩言「無曲隄」，然則防即隄也。謂曲設隄防以障遏水泉，使鄰國受水旱之害。趙氏言「曲意設防禁」，則虛指王法而言，謂王法所不禁而曲意以禁之，是爲違王法。《周禮·秋官·序官》「使帥其屬而掌邦禁」，注云：「禁，所以防姦者也。」故以「防」爲「禁」也。然隄爲防之正訓，僖公三年《公羊傳》云：「桓公曰：『無障谷，無貯粟，無易樹子，無以妾爲妻。』障谷即曲防也。何氏注云：『無障斷川谷，專水利也。』蓋所以障之者，防也。僖公九年《穀梁傳》則云

「毋壅泉」，注云：「專水利以障谷。」此以《公羊傳》之障谷解壅泉。所以壅之者，防也。閻氏若璩《釋地續》云：「漢賈讓奏言：『蓋隄防之作，近起戰國，雍防百川，各以自利。齊與趙魏以河爲竟，趙魏瀕山，齊地卑下，作隄去河二十五里，河水東抵齊隄，則西泛趙魏。趙魏亦爲隄去河二十五里，則是河水西抵趙魏隄，亦東泛齊矣。』夫曰近起戰國，豈非葵丘既會，申明天子之禁，諸侯猶有所憚而不敢爲，至七雄地大勢專，人人得自爲繇而不難以鄰國爲壑也。」○注「無以私」至「主也」○正義曰：僖公二年「城楚丘」，《左傳》云：「諸侯城楚丘而封衛焉。」《公羊傳》云：「曷爲不言桓公城之？」不與諸侯專封也。諸侯之義不得專封。此言「不得專封」，謂不待天子之命而桓公自封之。此五命之告若指告天子，則桓公封衛轉是自犯其禁矣。故趙氏以爲不告盟主。此五霸之盛，亦即五霸所以爲三王之罪人也。其後十四年城緣陵以遷杞，宣公十一年楚莊王封陳，皆自以爲盟主得專封也。衛、杞、陳皆亡滅而復封，存亡繼絕，即示私恩。其成公十八年「伐宋彭城」，《公羊傳》云：「魚石走之楚，楚爲之伐宋，取彭城，以封魚石。楚已取之矣，曷爲繫之宋？不與諸侯專封也。」昭公四年《公羊傳》云：「慶封走之吳，吳封之於防。然則曷爲不言伐防？不與諸侯專封也。」襄公二十八年《左

傳云：「慶封奔吳，吳句餘予之朱方。」昭公四年《左傳》云「使屈申圍朱方」，注云：「朱方，吳邑，齊慶封所封也。」然則「防」即朱方。徐氏《公羊傳》疏云：「慶封往前已封於防爲小國，楚取宋邑封魚石，吳以己邑封慶封，與齊桓封衛，楚莊封陳異，而同爲以私恩擅封，故《公羊傳》於楚丘、緣陵、彭城、防皆以「專封」言之也。」閻氏若璩《釋地續》云：「郝京山解「無曲防」三句，以《周禮·大宗伯》「以凶禮哀邦國之憂」分配之。曰：「以喪禮哀死亡，即有封必告也。封必告，死葬相助也。」又曰：「封與窆同。窆，悲驗切，葬下棺也。《禮記》縣棺而封是。凡諸侯告薨則同盟皆弔，五月而葬則同盟皆會。此獨言葬者，葬則有賵有贈有綏。《春秋》天王葬且不會，如武氏子來求賵之類，友邦可知矣。」「無不告」者，告則會也。封建，大事，豈贅之末簡？「無不」者，甚多之辭。命與恤災同，其爲死葬甚明也。」余謂《左傳》「諸侯城楚丘而封衛焉」，《國語》「翟人攻邢，桓公築夷儀以封之」，何嘗無封國？第少耳。「無不者，甚多之辭」，妙。蓋三者皆屬交鄰國之事，無尊王在內，解自勝。「長君之惡，其罪小；逢君之惡，其罪大。今之大夫皆逢君之惡，故曰：今之大夫，今之諸侯之罪人也。」

注 君有惡命，臣長大而宣之，其罪在不能距逆君命，故曰小也。逢，迎也。君之惡心未發，臣以諂媚逢迎而導君爲非，故曰罪大。今諸侯之大夫皆逢君之惡，故曰「罪人」也。**疏** 注「君有」至「小也」○正義曰：「君有惡命」即上云「犯此五禁」者也。《音義》云：「長，張丈切。丁又如字。」兩讀皆有大義。《呂氏春秋·本味》篇云「長澤之卵」，高誘注云：「長澤，大澤。」此長如字也。《論大》篇云「萬夫之長」，高誘注云：「長，大也。」此長張丈切也。長通張，《詩·大雅·韓奕》「孔修且張」，傳云：「張，大也。」《禮記·樂記》云「長言之也」，注云「長言之，引其聲也」。《國語·周語》云：「宣，所以施教也。」謂張施其命而徧布之。故以「大」釋「長」，又以「宣」申明之。「距逆」此惡命，則不敢施行於外。趙氏蓋讀長如字而爲張大之義也。○注「逢迎」至「罪大」○正義曰：《方言》云：「逢，逆，迎也。自關而東曰逆，自關而西或曰迎或曰逢。」趙氏所本也。《荀子·修身》篇云：「以不善先人者謂之調。」《莊子·漁父》篇云：「希意道言謂之調。」《鬼谷子·權》篇云：「諂，先意承欲者也。」調，古諂字。君心之惡未發而臣先其意導之，所謂

「以不善先人」也，^①所謂「希意道言」也。襄公三年《左傳》云：「稱其讐，不爲諂」，注云：「諂，媚也。」君先有意而臣張布之，是順從也；君未有意而臣先導之，是迎合也。故以「迎」訓「逢」，又以「諂媚」申明之，又以「導」字申明之。

章指：言王道寢衰，轉爲罪人。孟子傷之，是以博思古法，匡時君也。

魯欲使慎子爲將軍。孟子曰：「不教民而用之，謂之『殃民』。殃民者，不容於堯舜之世。一戰勝齊，遂有南陽，然且不可。」^注慎子，善用兵者。不教民以仁義而用之戰鬪，是使民有殃禍也。堯舜之世皆行仁義，故好戰殃民者不能自容也。就使慎子能爲魯一戰取齊南陽之地，且猶不可。山南曰陽。岱山之南，謂之南陽也。^疏注「慎子善用兵者」○正義曰：《荀子·解蔽》篇云：「慎子蔽於法而不知賢。」《天論》篇云：「慎子有見於後，無見於先。」《非十二子》篇云：「尚法而無法，下修而好作。上則取聽於上，下則取從於俗。終日言成文典，及糾察之，則偶然無所

歸宿，不可以經國定分。然而其持之有故，其言之成理，足以欺惑愚蒙，是慎到、田駢也。」《莊子·天下》篇云：「不顧於慮，不謀於知。於物無擇，與之俱往。古之道術有在於是者，彭蒙、田駢、慎到聞其風而悅之。」又云：「慎到棄知去己，而緣不得已，泠汰於物，以爲道理。」《史記·孟子列傳》云：「白騶衍與齊之稷下先生，如淳于髡、慎到、環淵、接子、田駢、騶奭之徒，各著書言治亂之事，以干世主。慎到，趙人。學黃老道德之術，因發明序其指意，故慎到著《十二論》。」徐廣云：「今《慎子》。」張守節《正義》云：「《慎子》十卷在法家，則戰國時處士。」《漢書·藝文志》：「法家者流有《慎子》四十二篇，名到。先申韓，申韓稱之。」到與孟子同時，此慎子宜即是到。乃《史》但言其學黃老，爲法家者流，不當使爲將軍，故趙氏不以爲到，而以其使爲將軍，則以爲「善用兵者」耳。○注「是使民有殃禍也」○正義曰：《說苑·君道》篇云：「殃者，禍之先者也。」○注「就使」至「南陽也」○正義曰：「山南曰陽」，僖公二十八年《穀梁傳》文。閻氏若璩《釋地》云：「《左傳》『晉於是始啓南陽』，杜注：『在晉山南河北，故曰南陽。』余謂即今太行山之南，河內、濟源、

①「謂」，原誤作「爲」，今據文義改。

修武、溫縣地。《孟子》「遂有南陽」，趙注：「山南曰陽，岱山之南謂之南陽也。」余謂史稱泰山之陽則魯，其陰則齊。南陽屬齊，必齊之地深插入魯界中者。魯故欲一戰有之。二南陽所指各不同。」全氏祖望《經史問答》云：「問「遂有南陽」。按，晉之南陽易曉，而齊之南陽僅一見於《公羊傳》所云「高子將南陽之甲以城魯」，一見於《國策》所云「楚攻南陽」。閻百詩以爲泰山之陽本是魯地，特久爲齊奪者，似得之。而先生以爲南陽即汶陽，其說果何所據？」答云：此以《漢·地志》及《水經》合之《左傳》，便自了然。蓋山南曰陽，是南陽所以得名也；水北曰陽，是汶陽所以得名也。春秋之世，齊魯所爭莫如南陽。隱桓之世，以許田易泰山之祔，是南陽尚屬魯。及莊公之末，則已似失之，故高子將南陽之甲以城魯。然僖公猶以汶陽之田賜季友，則尚未盡失。而《魯頌》之祝之以「居嘗與許」，嘗亦南陽之境，蓋大半入齊矣。自成公以後則盡失之。蓋汶水出泰山郡之萊蕪縣，西南過贏縣，桓三年公會齊侯於贏者也。又西南過牟縣，牟，故魯之附庸也。又東南流逕泰山，又東南流逕龜陰之田，即《左氏》定十年齊所歸也。又東南流逕明堂，又西南流逕徠山，又南流逕陽關，即《左氏》襄十七年逆臧孫之地。又南逕博縣，即《左氏》哀十一年會吳伐博者也。又南逕龍鄉，即

《左氏》成二年齊侯圍龍者也。又南逕梁父縣之菟裘城，《左氏》隱十一年所營也。又西南過剛縣，漢之剛乃春秋之闡，其西南則汶陽之田。又西南則棘，《左氏》成三年所圍也。又西南爲遂，《左氏》莊十三年齊所滅也。又西南爲下謹，《左氏》桓三年齊侯送姜氏之地。又西南爲郕，則叔孫氏邑。又西南爲平陸。按，《左氏》鄆、讎、龜陰、陽關，皆齊魯接壤地，通而言之，皆汶陽之田，而皆在泰山之西南，汶水之北，則汶陽非即南陽乎？故慎子欲爭南陽，亦志在復故土，孟子則責其不教民而用之耳。」慎子勃然不悅，曰：「此則滑釐所不識也。」**注**滑釐，慎子名。不悅，故曰：「我所不知此言何謂也？」**疏**注「滑釐慎子名」○正義曰：趙氏以慎子自稱「滑釐不識」，則滑釐是慎子之名。慎子名滑釐，故不以爲到也。按：釐與來通，《詩·周頌·思文》「貽我來牟」，《漢書·劉向傳》作「貽我釐弊」是也。《爾雅·釋詁》云：「到，至也。」《禮記·樂記》云「物至知」，注云：「至，來也。」到與來爲義同。然則慎子名滑釐，其字爲到與？與墨子之徒禽滑釐同名。或以慎子即禽滑釐，或以慎子師事禽滑釐，稱其師滑釐不識，皆非是。曰：「吾明告子。天子之地方千里，不千里

不足以待諸侯；諸侯之地方百里，不百里不足以守宗廟之典籍。周公之封於魯爲方百里也，地非不足，而儉於百里；太公之封於齊也亦爲方百里也，地非不足也，而儉於百里。今魯方百里者五。子以爲有王者作，則魯在所損乎？在所益乎？徒取諸彼以與此，然且仁者不爲，況於殺人以求之乎？

注

孟子見慎子不悅，故曰「明告子」。天子諸侯地制如是。諸侯當來朝聘，故言「守宗廟典籍」，謂先祖常籍，法度之文也。周公、太公地尚不能滿百里，儉而不足也。後世兼侵小國，今魯乃五百里矣。有王者作，若文王、武王者，子以爲魯在所損之中邪，在所益之中也？言其必見損也。但取彼與此爲無傷害，仁者尚不肯爲，況戰鬪殺人以求廣土地乎？

疏

注「諸侯」至「文也」○正義曰：上言「不足以待諸侯」謂朝覲聘問，備其燕享賜予之禮，故此「宗廟典籍」趙氏即舉「諸侯朝聘」言也。其實天子諸侯所用多矣，不止是也。《爾雅·釋詁》云：「典，常也。」故以「典籍」爲「常籍」。《說文》竹部

云：「籍，簿書也。」《周禮·秋官·小行人》：「掌邦國賓客之禮籍。」注云：「禮籍，名位尊卑之書。」孫炎注《爾雅》云：「典，禮之常也。」《國語·周語》云：「省其典圖形法」，注云：「典，禮也。」《儀禮·士昏禮》云：「吾子順先典」，注云：「典，法也。」然則「典籍」即禮籍，禮籍爲名位尊卑之書，即是「法度之文」。典籍受之天子，傳自先祖，藏諸宗廟。「宗廟之典籍」即先祖之典籍也。以先祖爲「宗廟」，猶後世稱先君爲「某廟」也。《說文》丌部云：「莊都說：典，大冊也。」則典籍猶言冊籍。○注「周公」至「損也」○正義曰：《說文》人部云：「儉，約也。」《淮南子·主術訓》：「所守甚約」，高誘注云：「約，少也。」趙氏以「儉」爲少，故以爲「不能滿」。毛氏奇齡《四書賸言》云：「《孟子》：『天子之地方千里，諸侯皆方百里』，其地字《王制》改作田字，田即地也。但地有山林、川澤、城郭、宮室、陂池、涂巷種種，而田則無有，故田較之地則每里減三分之一，是地有千里者，田未必有千里矣。既云班祿，祿出於田，當紀實數，焉得以三分減一之地而強名千里？漢後儒者所以不能無紛紛也。不知孟子所云「地」字亦只是「田」字。『魯欲使慎子爲將軍』章『周公之封於魯也爲方百里也，地非不足也，而儉於百里』，又曰「不百里，不足以守宗廟之典籍」，則較量千百，惟恐不足，當必是實數可

知。而按其上文，仍是地字，固知地即田耳。」顧氏棟高《春秋大事表》云：「伯禽初封曲阜，《漢書·地理志》云：『成王以少皞之墟曲阜封周公伯禽爲魯侯。』今爲山東兗州府曲阜縣。後益封奄。隱二年入極，十年敗宋師于菅，辛未取郕，辛巳取防，僖十七年滅項，三十三年伐郕取訾婁，文十年伐郕取須句，宣四年伐莒取向，宣九年取根牟，十年伐郕取繹，成六年取鄆，襄十三年取郕，二十二年郕庶其以漆、間丘來奔，昭元年伐莒取鄆，四年取鄆，五年莒牟夷以牟婁及防茲來奔，十年伐莒取郕，三十一年郕黑肱以濫來奔，哀二年伐郕取濇東田及沂西田，三年城啓陽，哀十七年越使后庸來言郕田，二月盟於平陽。平陽在兗州府鄆縣西南，本郕邑，爲魯所取。魯在春秋，實兼九國之地。極、項、鄆、郕、根牟，魯所取也。向、須句、鄆、鄆，則郕、莒滅之而魯從而有之者也。余讀隱五年『公矢魚于棠』《傳》曰：『非禮也，且言遠地也。』哀十四年『西狩獲麟』，歐陽子曰：『西狩言遠也。』余往來京師，親至兗州魚臺縣，訪隱公觀魚處，詢之土人，云『距曲阜不二百里』。又北至汶上，爲齊魯接界，俱計日可到，其西南則宋、鄭、衛及郕、莒、杞、鄆諸國地，犬牙相錯。時吞滅弱小，以自附益。昉益之鄭，防取之宋，須句取之郕，向、鄆取之莒，而郕則空其國都，致郕衆退保嶧山，與莒爭鄆無休

日。逮晉文分曹地，則有東昌府濮州西南。而越既滅吳，與魯泗東方百里，地界稍稍擴矣。」君子之事君也，務引其君以當道，志於仁而已。」**注**言君子事君之法，牽引其君以當正道者，仁也。志仁而已，欲使慎子輔君以仁。**疏**注「牽引其君」○正義曰：《說文》牛部云：「牽，引前也。」是「引」即「牽」也。

章指：言招攜懷遠，貴以德禮；及其用兵，廟勝爲上，戰勝爲下。明賤戰也。

疏「招攜」至「戰也」○正義曰：僖公七年《左傳》云：「招攜以禮，懷遠以德。德禮不易，無人不懷。」注云：「攜，離也。」周氏廣業《孟子章指考證》作「義勝爲上」，云：「古本義作廟，孔、韓同。」按：《管子·霸形》篇：「霸王之形，德義勝之，智謀勝之，兵戰勝之。」《孫子》云：「夫未戰而廟勝者，得算之多者也。」二字俱有所本，從義爲長。《漢書》趙充國奏「留田便宜」曰：「帝王之兵，以全取勝，是以貴謀而賤戰。」

孟子曰：「今之事君者皆曰：『我能爲君

辟土地，充府庫。」今之所謂良臣，古之所謂民賊也。

注辟土地，侵鄰國也；充府庫，重賦斂也。今之所謂良臣者，於古之法爲民賊。傷民，故謂之賊也。

疏注「傷民故謂之賊也」○正義曰：《荀子·脩身》篇云：「害良曰賊。」《楚辭·沈江》云「覽私微之所傷」，注云：「傷，害也。」傷民即害良也。君不鄉道，不

志於仁，而求富之，是富桀也。

注爲惡君聚斂

以富之，爲富桀也。謂若夏桀也。「我能爲君約

與國，戰必克。」今之所謂良臣，古之所謂民賊也。

注連諸侯以戰，求必勝也。君不鄉道，不

志於仁，而求爲之強戰，是輔桀也。

注說與上

同。由今之道，無變今之俗，雖與之天下，不

能一朝居也。

注今之道非善道。今之世俗漸惡

久矣，若不變更，雖得天下之政而治之，不能自安一

朝之間居其位也。

疏注「今之」至「位也」○正義曰：道

爲「道德」之道，上云「君不鄉道」是也。道之訓亦爲行，今之道猶云今之行。《國語·周語》云「由是第之」，韋昭注云：

「由，從也。」一人行之，人人從之，則爲俗。《廣雅·釋詁》

云：「漸，漬也。」謂漬染而成惡俗也。《太玄·玄衝》云「更

變而共笑」，是變爲更改，謂更改其害良而志於仁也。《禮

記·樂記》云「居吾語汝」，注云：「居猶安坐也。」不能一朝

居「即是不能一朝安，謂其危亡之速也。陳氏說書云：「與

之天下，不能一朝居，何也？其國雖富強而民心先已失。

孟子之言，至於秦而驗矣。」

章指：言善爲國者，以藏於民，賊民

以往，其餘何觀？變俗移風，非樂不化；

以亂濟民，不知其善也。

疏「變俗移風非樂不

化」○正義曰：《孝經》《廣要道》章第十一云：①「移風易

俗，莫善於樂。」

白圭曰：「吾欲二十而取一，何如？」**注**

白圭，周人也。節以貨殖，欲省賦利民，使二十而稅

一。**疏**注「白圭」至「稅一」○正義曰：《史記·貨殖列傳》

云：「白圭，周人也。當魏文侯時，李克務盡地力而白圭樂

①「章」，原無，今據全書文例補。

觀時變，故人棄我取，人取我與。能薄飲食，忍嗜欲，節衣服，與用事僮僕同苦樂，趨時若猛獸擊鳥之發。故曰：「吾治生產猶伊尹呂尚之謀，孫吳用兵，商鞅行法是也。」蓋天下言治生祖白圭。」趙氏以《孟子》白圭即此人也。閻氏若璩《釋地續》云：「《史記·貨殖傳》，此一白圭也，圭其名，《孟子》白圭，此一白圭也，其名丹，圭則字爾。先後殊不同時，趙氏傳會爲一人，吾嘗斷之曰此兩人也。《韓非》書「白圭相魏」，鄒陽書「白圭戰亡六城，爲魏取中山」，又「白圭顯於中山，中山人惡之魏文侯，文侯投以夜光之璧」。魏拔中山在文侯十七年癸酉，下逮孟子乙酉至梁，凡七十三年。縱存，尚能爲國築隄防，治水害乎？」毛氏奇齡說與閻氏同。全氏祖望《經史問答》云：「宋人鮑彪已嘗言之。但魏人當昭王時，是孟子之後輩，見《國策》。不知潛丘何以不引及？鮑彪謂當是孟子所稱者。」周氏廣業《孟子時地出處考》云：「閻百詩、毛初晴並言有兩白圭，今考《韓非子》有云：「白圭之行隄也，塞其穴，故無水難。」《呂氏春秋》載白圭與惠施析辯二條，《新序》有孟嘗君問白圭之文，則其爲別一人，似無可疑。乃《史》又稱白圭自言「吾治生產，猶商鞅行法」，則正與孟子同時。《戰國策》昭王時白圭始見，而拔中山者言樂羊不言白圭，《史》及鄒陽之說又恐誤以武侯爲文侯。」孟

子曰：「子之道，貉道也。萬室之國一人陶，則可乎？」**注**貉，夷貉之人，在荒服者也。貉之稅，二十而取一。萬家之國使一人陶瓦器，則可乎？以此喻白圭所言也。**疏**注「貉夷」至「服者也」○

正義曰：《說文》豸部云：「貉，北方貉豸種也。」《周禮·夏官·職方氏》辨其邦國都鄙、四夷、八蠻、七閩、九貉、五戎、六狄之人民，鄭司農云：「北方曰貉、狄。」《書·禹貢》云：「五百里荒服，三百里蠻，二百里流。」胡氏渭《禹貢錐指》云：「單言蠻則爲四裔之通稱。蠻在荒服，知貉即在荒服也。」○注「使一人陶瓦器則可乎」○正義曰：《考工記》云「搏埴之工二陶旒」，注云：「搏之言拍也。埴，黏土也。」《呂氏春秋·慎人》篇云「陶於河濱」，高誘注云：「陶，作瓦器。」曰：「不可，器不足用也。」**注**白圭曰：一人陶則瓦器不足以供萬室之用也。曰：「夫貉，五穀不生，惟黍生之。無城郭宮室宗廟祭祀之禮，無諸侯幣帛饗殮，無百官有司，故二十取一而足也。」**注**貉在北方，其氣寒，不生五穀。黍早熟，故獨生之也。無中國之禮，如此之用，故可二十

取一而足也。

疏注「貉在」至「之也」○正義曰：程氏瑤

田《通藝錄·九穀考》云：「黍之不黏者，其熟最疾。播在黏者之後，穫在黏者之前。孟子曰：『夫貉，五穀不生，惟黍生之。』以貉地生物之氣，時日最短，故必中土熟之最疾者，播乃有秋。然則孟子之所謂黍，蓋黍之不黏者乃謂稷也。」^①
《後漢書·烏桓列傳》：「其土地宜稷。」《三國志·烏丸傳》注引王沈《魏書》：「烏丸地宜青稷。」《唐書·北狄傳》：「奚稼多稷。」奚即烏桓也。烏桓地東連鮮卑，其西為匈奴，又西為烏孫。匈奴、烏孫當中土之正北，地極寒。《漢書·匈奴傳》云：「居於北邊，逐水草遷徙，無城郭常居耕田之業。」雖於屠貳師之年云「年稼不熟」，顏師古以為「亦種黍稷」，^②實則以畜牧為事，故自君王以下咸食畜肉耳。又按《匈奴傳》孝文帝時以匈奴處北，殺氣早降，詔遺單于林蘗金帛綿絮。武帝時，單于遺書，欲取糴米五千斛。亦可見其不事農業，即黍稷亦未必能生矣。烏桓諸國在匈奴東，地氣稍暖，故能生稷。吾疑其地殆即孟子所謂貉與？且貉亦非盡不生五穀者也。貉之地甚廣也。《周官·職方氏》所掌有九貉，《鄭志》答趙商問云「在東方」。《漢書·高帝紀》有北貉，而《戰國策》蘇秦說秦惠王曰：「大王之地，北有胡、貉、代馬之用。」又可見貉地亘秦之北皆是矣。謂可致其物以為用，其

非以貉為界又可知。《後漢書》「句驪」亦名「貉耳」，是貉之一國，亦必非不生五穀之貉也。又載諸國在鮮卑東者皆言其宜五穀。然則五穀不生之貉，居貉耳、鮮卑之西北，所謂「烏桓宜稷」，「奚稼多稷」之地無疑矣。《說文》：「黍，禾屬而黏者也。以大暑而種，故謂之黍。孔子曰：『黍可為酒，禾入水也。』」《糜，稷也。」「稷，糜也。」按，《說文》以禾況黍，謂黍為禾屬而黏者，非謂禾為黍屬而不黏者也。是故禾屬之黏者黍，則不屬而不黏者糜。對文異，散文則通稱。經傳中見黑糜、白糜、黃糜、赤糜，不見黑黍、白黍、黃黍、赤黍，以是知散文通稱黍也。飯用米之不黏者，黏者釀酒及為餌糝醅粥之屬，故簠簋實糜為之以供祭祀，故又異其名曰稷。黍之不黏者獨有異名，祭尚黍也。今居中國，去人倫，無君子，如之何其可也？陶以寡且不可以為國，況無君子乎？欲輕之於堯舜之道者，大貉小貉也；欲重之於堯舜之道者，大桀小桀也。」**注**今之居中國，當行禮義，而欲效夷

① 「乃」，原誤作「所」，今從沈校據《九穀考》改。

② 「古」下，原衍「曰」字，今從沈校據《九穀考》刪。

貉無人倫之敘，無君子之道，豈可哉？陶器者少，尚不可以爲國，況無君子之道乎？堯舜以來什一而稅，足以行禮，故以此爲道。今欲輕之，二十稅一者，夷貉爲大貉，子爲小貉也，欲重之，過什一，則夏桀爲大桀，子爲小桀也。

疏注「無君子之道」○正義

曰：趙氏以「去人倫」、「無君子」爲一事。去人倫則舉國不知禮義，皆小人而無君子矣。故言「無君子之道」，謂「無君子」者，「無君子之道」也。近時通解以「君子」即指百官有司。○注「堯舜」至「桀也」○正義曰：宣公十五年《公羊傳》云：「古者什一而籍。古者曷爲什一而籍？什一者，天下之中正也。多乎什一，大桀小桀；寡乎什一，大貉小貉。」注云：「蠻貉無社稷宗廟，百官制度之費，稅薄。」何氏本《孟子》注《公羊傳》，趙氏即本《公羊傳》注《孟子》。徐氏疏云：「夏桀無道，重賦於人。今過什一，與之相似。若十取四五，則爲桀之大貪；若取二三，則爲桀之小貪。若十四五乃取其一，則爲大貉行，若十二三乃取一，則爲小貉行。」徐氏解「大」「小」不取趙氏。《尚書大傳》說《多方》云：「古者十稅一。多於十稅一，謂之之大桀小桀；少於十稅一，謂之大貉小貉。王者十一而稅，而頌聲作矣。故《書》曰：『越惟

有胥賦，小大多政。』」貉與貉字通。伏氏以小桀大桀、小貉大貉明《多方》「小大」二字。政者，正也。《尚書》今作正。江氏聲《尚書集注音疏》云：「胥謂繇役。繇役亦賦也，故曰胥賦。」蓋胥賦即稅，正即謂什一中正，謂胥賦之輕重一本於中正。小之不致爲小桀小貉，大之不致爲大桀大貉。徐氏解《公羊傳》，義與此同。

章指：言先王典禮，萬世可遵。什一

供貢，下富上尊。裔土簡惰，二十而稅，貉道有然，不足爲貴。圭欲法之，孟子斥之以王制也。

疏「什一供貢下富上尊」○正義曰：二

句見《漢書敘傳》述《食貨志》。

白圭曰：「丹之治水也愈於禹。」**注**丹，

名，圭，字也。當諸侯時，有小水，白圭爲治除之，因自謂過禹也。

疏注「丹名」至「除之」○正義曰：①《說

文》丹部云：「丹，巴越之赤石也。」《說苑·修文》篇云：「圭

①「義」，原誤作「正」，今據經解本改。

者，玉也。《考工記·匠人》注云：「圭之言珪，潔也。」潔者，潔白也。玉之白者爲圭，石之赤者爲丹，赤熾盛而以潔白消之，此名字所以取與？《韓非子·喻老》篇云：「千丈之隄以螻蟻之穴潰，故曰白圭之行隄也，塞其穴，是以白圭無水難。」此白圭治除小水之證也。孟子曰：「子過矣。」

禹之治水，水之道也，是故禹以四海爲壑。今吾子以鄰國爲壑。水逆行謂之洚水。洚水者，洪水也，仁人之所惡也。吾子過矣。」

注子之所言，過矣。禹除中國之害，以四海爲溝壑，以受其害水，故後世賴之。今子除水，近注之鄰國，觸於洚水之名，仁人惡爲之。自以爲愈於禹，子亦過甚矣。**疏**注「禹除」至「甚矣」○正義曰：「水之道」猶云「水之路」，謂水所行之路而禹順導之耳。《說文》谷部云：「穀，溝也。讀若郝。壑，或從土。」是「壑」即「溝」也。「害水」猶云「災水」。觸即「觸類」之觸。不使水歸四海，而歸鄰國，則非水之道，非水之道，則水不順行而逆行矣。逆之爲洚，猶逆之爲逢。見其逆行，觸類而長之，即是禹時之洪水。禹治洪水，使不爲後世害，圭放洪水，使爲鄰國害。圭且爲

仁人所惡矣，悖乎禹，豈愈於禹與？

章指：言君子除害，普爲人也；白圭壑鄰，亦以狹矣。是故賢者志其大者遠者也。**疏**「是故賢者志其大者遠者也」○正義曰：本襄

公三十一年《左傳》子皮語。

孟子曰：「君子不亮，惡乎執？」**注**亮，信也。《易》曰：「君子履信思順。」若爲君子之道，舍信，將安執之？**疏**注「亮信」至「執之」○正義曰：「亮，

信也。」《爾雅·釋詁》文。與諒同。《說文》言部云：「諒，信也。」諒即亮也。引《易》者，《繫辭上傳》云：「《易》曰：『自天祐之，吉无不利。』」子曰：祐者，助也。天之所助者，順也；人之所助者，信也。履信，思乎順，又以尚賢也，是以自天祐之，吉无不利也。」引此以見君子之道不外乎信，故爲君子之道舍此烏執乎？趙氏以「安」訓「惡」，《音義》云「惡音烏」是也。何異孫《十一經問對》云：「問此惡字作平聲，還作去聲？」對曰：亮與諒同。孔子曰：「豈若匹夫匹婦之爲諒哉？」又曰：「君子貞而不諒。」諒者，信而不通之謂。君子所以不亮者，非惡乎信，惡乎執也。故孟子又曰：「所惡

執一者，爲其賊道也。」

章指：言《論語》曰：「自古皆有死，民無信不立。」重信之至也。

疏「論語」至「至也」

○正義曰：所引在《論語·顏淵》第十二。《集解》引孔氏曰：「死者，古今常道也，人皆有之。治邦不可失信也。」乃《論語》又云「好信不好學，其蔽也賊」。蓋好信不好學，則執一而不知變通，遂至於賊道。君子貞而不諒，正恐其執一而蔽於賊也。友諒兼友多聞。多聞，由於好學，則不至於賊。又云：「言必信，行必果，硯硯然，小人哉！」《孟子》此章正發明孔子「不諒」之愷也。

魯欲使樂正子爲政。

注樂正子克也。魯

君欲使之執政於國。

疏注「樂正子克也」○正義曰：

《文選·褚淵碑文》云「孟軻致欣於樂正」，注引劉熙曰：「樂正，姓也；子，通稱也，名尅。」孟子曰：「吾聞之，喜而不寐。」**注**喜其人道德得行，爲之喜而不寐。公孫丑曰：「樂正子強乎？」曰：「否。」「有知慮乎？」曰：「否。」「多聞識乎？」曰：「否。」**注**

丑問樂正子有此三問之所能乎？孟子皆曰否，不能有此也。**疏**注「丑問」至「能乎」○正義曰：強猶果，有知慮猶達，多聞識猶藝。孔子稱此三者「於從政乎何有」。從政宜才，執政宜德。此章亦與《論語》互相發。「然則奚爲喜而不寐？」**注**丑問無此三者，何爲喜而不寐？曰：「其爲人也好善。」**注**孟子言樂正子之爲人也能好善，故爲之喜。「好善足乎？」**注**丑問人但好善，足以治國乎？曰：「好善優於天下，而況魯國乎？夫苟好善，則四海之內皆將輕千里而來告之以善；夫苟不好善，則人將曰訑訑，『予既已知之矣』。訑訑之聲音顏色，距人於千里之外。」**注**孟子曰：好善，樂聞善言，是采用之也。以此治天下，可以優之，虞舜是也。何況於魯，不能治乎？人誠好善，四海之士皆輕行千里以善來告之，誠不好善，則其人將曰訑訑賤他人之言。訑訑者，自足其智、不嗜善言之貌。訑訑之人發聲音、見顏色，人皆知其不欲受善言也。

道術之士聞之，止於千里之外而不來也。

疏注「好

善」至「治乎」○正義曰：「優」即足也。乃足則僅足而已，優則饒裕有餘矣。《禮記·中庸》篇云：「舜好問而好察邇言，隱惡而揚善，執其兩端，用其中於民。」《孟子》亦云：「舍己從人，樂取於人以爲善。」是舜「樂聞善言」而「采用之」也。舜以此治天下而有餘，克以此治魯國，豈不足乎？《章指》言「好善從人，聖人一概」，與此相發明。○注「誠不好善」至「來也」○正義曰：《音義》出「訑訑」，云：「張吐禾切，云：『蓋言辭不正，欺罔於人，自誇大之貌。』」丁云：「此字音他，又達可切。」《說文》云「欺也」。字作訑者，音怡。訑訑，自足其智，不著善言之貌。今諸本皆作訑，即不合注意，當借讀爲訑，音怡。《阮氏元《校勘記》云：「訑訑」，字作訑者，今諸本皆作訑。按，《說文》作訑，《方言》作訑，皆訓欺。《孟子》是此字，注「自足其智，不著善言」，義之引伸。丁、張音義皆確。自訑譌訑，乃別爲音，而孫氏又爲曲說，不可從。」謹按：《說文》言部云：「訑，沅州謂欺曰訑。從言，它聲。」《一切經音義》引《纂文》云：「沅州人以相欺爲訑人。音湯和反。」訑，避也。訑即訑，訑即訑，訑爲訑之俗，訑爲訑之通也。《戰國策·燕策》「燕王謂蘇代曰：『寡人甚不喜訑者言也。』」蘇代對曰：「周地賤媒，爲其兩譽也。之男家曰女美，

之女家曰男美。」又云：「事非權不立，非勢不成。夫使人坐受成事者，惟訑者耳。」觀代之言，訑爲欺謾不實，明矣。男女未必誠美而媒者謾以爲美，此訑也，欺也，己本無所知而以爲予既已知之，亦訑也，欺也。訑訑既爲自足其智，不著善言之貌，則曰訑訑者不得爲不好善者之言。上云「夫苟好善，則四海之內」云云，此云「夫苟不好善，則人將曰訑訑」。《將曰》之將與「將輕」之將同。人見此不好善之人而狀其貌曰訑訑，又述其言曰「予既已知之矣」。既猶盡也。予盡知之，謂人之言不足以益之，是賤人之言也。趙氏云「其人」，謂與相親近之人。惟與相親近，故見其聲音笑貌如此。「賤他人之言」解「予既已知之」也。「訑訑」是見顏色，「予既已知之」是發聲音，人狀其貌，述其言如是，是人皆知其不欲受善言也。人皆知其不欲受善言，是不獨道術之士，而道術之士聞人言如此，豈肯至乎？是其訑訑之聲音顏色有以拒止之也。士止於千里之外，則讒諂面諛之人至矣。與讒諂面諛之人居，國欲治，可得乎？**注**懷善言之士止於千里之外，不肯就之，則邪惡順意之人至矣。與邪惡居，欲使國治，豈可得乎？**疏注**「則邪惡順意之人至矣」○正義曰：《莊子·

漁父篇云：「希意道言謂之諂，不擇是非而言謂之諛，好言人惡謂之讒。」《呂氏春秋·貴因》篇云：「讒慝勝良」，高誘注云：「讒，邪也。」此趙氏以「邪」釋「讒」也。《荀子·修身》篇云：「以不善先人者謂之諂，不善即惡也。」此趙氏以「惡」釋「諂」也。《說苑·臣術》篇云：「從命病君謂之諛」，此趙氏以「順意」釋「面諛」也。《說文》言部云：「諛，譎也。」「譎，諛也。諛，譎或從色。」段氏玉裁《說文解字注》云：「諛者所以爲諂，諂者未有不諛。」按：諛但順意而已，長君之惡也，諂則道之爲不善，逢君之惡也，讒則因道之爲不善而除去不便己意之人。讒因於諂，諂因於諛，諛因於訑訑不好善也。

章指：言好善從人，聖人一概，禹聞讒言，答之而拜。訑訑吐之，善人亦逝。善去惡來，道若合符。《詩》曰：「雨雪瀼瀼，見晛聿消。」此之謂也。疏「詩曰」至「謂也」

○正義曰：引《詩》、《小雅·角弓》之篇。序云：「刺幽王也。不親九族而好讒佞。」《漢書》劉向上封事云：「讒邪進則衆賢退，羣枉盛則正士消。」《詩》云：「雨雪瀼瀼，見晛消。」趙氏本諸此也。

陳子曰：「古之君子何如則仕？」注陳臻問古之君子得何禮可以仕也？孟子曰：「所就三，所去三。迎之致敬以有禮，言將行其言也，則就之；禮貌未衰，言弗行也，則去之。其次，雖未行其言也，迎之致敬以有禮，則就之；禮貌衰，則去之。其下，朝不食，夕不食，飢餓不能出門戶，君聞之，曰：『吾大者不能行其道，又不能從其言也，使飢餓於我土地，吾耻之。』周之，亦可受也，免死而已矣。」注所去就，謂下事也。禮者，接之以禮也；貌者，顏色和順，有樂賢之容。禮衰，不敬也；貌衰，不悅也。其下者，困而不能與之祿，則當去；矜其困而周之，苟免死而已。此三就三去之道。窮餓而去無疑也，故不言去。免死而留，爲死故也。權時之宜，嫌其疑也，故載之也。疏「周之」至「已矣」○正義曰：《音義》云：「周與賙同，救贍也。」翟氏灝《考異》云：「《柳柳州集·上李中丞啓》曰：『《孟子》書言諸侯之士曰：

使之窮於吾地則賙之，賙之亦可受也。」用賙字。「按：大之既不能行道，又不能從其言，所以不去者，飢餓不能去也。受其所周，即是就。云可受，亦就之可者也，但免死而已。既不死，可以出門戶，則仍去，故云「權時之宜」。顧氏炎武《日知錄》云：「免死而已矣」，則亦不久而去矣。故曰所去二。」

章指：言仕雖正道，亦有量宜。聽言爲上，禮貌次之；困而免死，斯爲下矣。備此三科，亦無疑也。

孟子曰：「舜發於畎畝之中，傳說舉於版築之間，膠鬲舉於魚鹽之中。管夷吾舉於士，孫叔敖舉於海，百里奚舉於市。故天將降大任於是人也，必先苦其心志，勞其筋骨，餓其體膚，空乏其身，行拂亂其所爲。所以動心忍性，曾益其所不能。」**注**舜耕歷山，三十徵庸；傳說築傅巖，武丁舉以爲相，膠鬲，殷之賢臣，遭紂之亂，隱遁爲商，文王於鬻販魚鹽之中得其

人，舉之以爲臣也。士，獄官也。管仲自魯囚執於士官，桓公舉以爲相國；孫叔敖隱處，耕於海濱，楚莊王舉之以爲令尹；百里奚亡虞適秦，隱於都市，繆公舉之於市而以爲相也。言天將降下大事以任聖賢，必先勤勞其身，餓其體而瘠其膚，使其身乏資絕糧，所行不從，拂戾而亂之者，所以動驚其心，堅忍其性，使不違仁，困而知勤，曾益其素所不能行。

疏注「舜耕」至「徵庸」○正義曰：見《書·堯典》及《史記·五帝本紀》。○注「傳說」至「爲相」○正義曰：《書序》云：

「高宗夢得說，使百工營求諸野，得諸傅巖，作《說命》三篇。」馬融注云：「高宗始命爲傅氏。」鄭氏注云：「得諸傅巖，高宗因以傅命說爲氏。」《史記·殷本紀》云：「武丁夜夢得聖人，名曰說。以夢所見，視羣臣百吏，皆非也。於是乃使百工營求之野，得說於傅險中。是時說爲胥靡築於傅險，見於武丁，武丁曰是也。得而與之語，果聖人。舉以爲相，殷國大治，故遂以傅險姓之，號曰傳說。」徐廣曰：「《尸子》云：傅巖在北海之洲。」張守節《正義》云：「《地理志》云：傅險即傳說版築之處。所隱之處，窟名聖人窟，在今陝州河北七里，即虞國虢國之界。」按：《墨子·尚賢》篇云：「昔者傳

說居北海之州，圜土之上，衣褐帶索，庸築於傅巖之城。武丁得而舉之，立爲三公。墨子、尸子皆周時人，其言傅巖在北海，當有所據。閻氏若璩《釋地》云：「傅氏之巖在虞號之間，今平陸縣東三十五里是。俗名聖人窟，爲說所備隱止息處，非於此築也。巖東北十餘里，即《左傳》之顛軫阪，有東西絕澗，左右幽空，窮深地壑，中則築以成道，指南北之路，謂之爲軫橋也。說身負版築，爲人所執役，正於此地，至今澗猶呼沙澗水，去傅巖一十五里。《墨子》、《尸子》並以傅巖在北海洲者，大非。」閻氏本張守節之說，其云顛軫阪云云，則《水經注》文也。然後世之地附會古人之迹甚多，《墨子》以爲築城，稱其「庸築」，則但傭工爲人版築。《史記》言「胥靡」，晉灼《漢書注》云：「胥，相也；靡，隨也。古者相隨坐輕刑之名。」《漢書·賈誼傳·服賦》云：「傳說胥靡，迺相武丁。」張晏曰：「胥靡，刑名也。傳說被刑，築於傅巖，武丁以爲己相。」然則說之版築由於被刑矣。王氏鳴盛《尚書後案》云：「《荀子·非相》篇云「傳說之狀，身如植鰭」，楊倞注云：「植，立也。如魚之立。」然則說形本自有異，故可以形求也。」○注「膠鬲」至「臣也」○正義曰：膠鬲事詳見《公孫丑上》篇。魚鹽則別無可證。趙氏佑《溫故錄》云：「古者諸侯歲貢士於天子，文王之舉膠鬲，乃進之於紂，與伊尹五就

桀爲湯進之桀，不復進用至五者同，故得與微、箕並稱紂輔相。而注言文王舉之以爲臣，背矣。紂猶知用膠鬲而仍與不用同，此紂之終於亡也。然久而後失之，則鬲之功亦不細。故雖不得如傳說諸人發名成業之盛，而同謂之「天降大任」。迨後殷命再黜，鬲之去從顯晦迄無可見，亦足慨矣。」○注「士獄」至「相國」○正義曰：《書·堯典》云「汝作士」，《史記集解》引馬氏注云：「士，獄官之長。」《周禮·地官·大司徒》云「其附於刑者歸於士」，注云：「士謂主斷刑之官。」莊公九年《左傳》云：「鮑叔帥師來言曰：『子糾，親也，請君討之；管、召，讎也，請受而甘心焉。』」乃殺子糾於生竇，召忽死之。管仲請囚，鮑叔受之，及堂阜而稅之。歸而以告曰：「管夷吾治於高篋，使相可也。」公從之。」此「舉於士」之事也。○注「孫叔」至「令尹」○正義曰：閻氏若璩《釋地》云：「趙氏注：『孫叔放隱處，耕於海濱，楚莊王舉之以爲令尹。』此亦是隨文解之，事實無所徵。莊王時楚南境東境去海尚遠，而《史記》稱「孫叔放，楚之處士」，《荀子》、《呂氏春秋》並以爲「期思之鄙人」，期思故城在今固始縣西北七十里。固始本寢丘，即莊王感優孟之言以封其子者，傳十世不絕。其得爲令尹也，《史記》、《說苑》、《列女傳》謂進自虞丘子，《呂氏春秋》謂沈尹筮力，《新序》謂楚有善相人者招聘

之，皆無起家海濱說。蓋孟子所據之書籍，今不可考矣。又考孫叔敖即宣十一年令尹蔦艾獵，乃蔦賈之子。賈字伯贏，宣四年官司馬，爲子越椒所惡，囚而殺之。意者子遂式微，竄處海濱，不七八年，莊知其賢，擢爲令尹與？但蔦賈乃逋呂臣之子，呂臣繼子玉官令尹，出自公族，自應爲楚郢人，何得遠在期思之鄙？意者叔敖子實不才，徒世守封土，莫顯於朝，後人遂以其子孫之占籍上繫諸先人與？「毛氏奇齡《經問》云：「張燧問：孫叔敖舉於海，淮安閻氏謂孫叔敖即宣十一年楚令尹蔦艾獵，此可信與？」曰：孫叔敖自是處士，凡《荀子》、《呂覽》、《史記》以及劉向之《說苑》、《新序》、《列女傳》皆明載其人。趙岐舊注原是有據。以愚考之，則實楚之夢國人，及楚莊滅蓼而後薦而舉用之。《史記·孫叔敖傳》謂叔敖楚之處士，虞丘相薦於王而代爲楚相，未審爲何所人也。惟《荀子》、《呂覽》皆有孫叔敖爲期思之鄙人語。考期思本夢國地，即春秋之寢丘也。漢名寢縣，東漢名固始。楚子於宣八年滅蓼，而宣十二年即有孫叔敖之名見於《策書》。則以蓼名期思，必蓼滅而後期思之鄙人始得用虞丘之薦而舉爲令尹，此固按之《春秋》，互證之他書，而顯有然者。況《史記·滑稽傳》又云：「叔敖死，其子窮困負薪，莊王聽優孟之言，封其子於寢丘。」其封寢丘者，亦正以寢丘

即期思，本叔敖故居，因封之。則是所居所封皆夢國，其爲蓼人無疑也。若云楚公族，則公族世爵未有身爲令尹而其子負薪者，又未有止封以地而不即予以爵者。此其誤始於服虔、杜預之注《左傳》，而孔氏正義不能辨正。《左傳》宣十一年有令尹蔦艾獵城沂事，其明年晉楚戰於郟，又有令尹孫叔敖不欲戰而楚王命之戰事，以爲兩年相距不甚遠，而止此令尹，必屬一人。而不知隔歲易官，在列國多有之。況《左氏》行文必名字兼稱，既曰「令尹孫叔敖不欲」，又曰「若事得捷則孫叔敖爲無謀矣」，則一稱敖名，一稱叔字，是必氏孫字叔而敖其名，與蔦賈之子明屬兩人。其所大誤者，則以戰郟時隨武子稱有蔦敖，而杜氏以爲即兼稱也。武子以爲楚雖與戰，其平時討鄭人鄭，軍政秩然，且以爲蔦敖爲宰，擇楚國之令典云云，此言平時也，其時蔦敖不在軍也。杜氏既疑令尹屬一人，而蔦敖一名，則又氏本蔦獵而名近孫叔，是必一人而兼稱者，遂公然以叔敖當之。殊不知一軍之中，叔敖既帥師，又使叔敖典軍制，勢必不能。此蔦敖是宰。楚制有令尹、大宰二官，令尹極尊，太宰極卑，《策》書太宰伯州犂是也。孫叔令尹，豈得與蔦敖太宰合作一人？侍人賈舉非死者賈舉，名雖連稱，人實有兩也。襄十五年爲子馮爲司馬，此蔦艾獵之子也。《世本》亦不識叔敖出處，然不敢謂叔敖、

艾獵是一人。但薦艾獵者，叔敖之兄，故其注薦子馮則曰「叔敖從子」。今杜氏謂艾獵與叔敖一人，則薦子馮爲艾獵子，即叔敖子矣。乃其注是傳亦曰「叔敖從子」，則何說焉？閻氏謂薦賈官司馬時爲子越椒所殺，故其子叔敖竄處海濱，則又不然矣。宣四年薦賈爲工正，與鬬椒共譖殺令尹鬬般，而椒爲令尹，賈爲司馬。既而椒復惡賈，囚賈而殺之，因之攻王，王遂滅鬬氏。是賈以怨殺，並非國法，且王滅鬬氏，隨取殺賈者而盡滅之，有何讎患而竄處遠地至於式微？然則其曰舉於海何居？曰：此正所謂期思之鄙人者也。蓼本楚外國，而期思又當淮西之地，淮水經期思之北而東注於海。《禹貢》「淮」與「海」並稱，《地志》「淮康」與「海康」並稱，居淮之濱即居海之濱，以淮通於海也。是以從來稱淮地多稱海疆，如《魯詩》「來淮夷」則曰「遂荒大東，至於海邦」，《江漢》「伐淮夷」則曰「于疆于理，至于南海」。蓋海不必在波濤間矣。況《國語》於吳曰「奄有東海」，於越曰「濱於東海之陂」，而蓼介楚外，原屬吳越，《春秋》楚子滅蓼時有云「及滑汭盟吳越而還」，則正以期思以東皆在吳越屬國中也。吳越名海，則期思亦海矣。要之，《孟子》當不謬耳。周氏柄中《辨正》云：「叔敖避仇遠竄，此情事所或有，閻說近之。僖二十四年《傳》凡、蔣、邢、毛、胙、祭，杜注：「蔣在弋陽期

思縣。《水經注》：「期思縣，故蔣國，周公之後，楚滅之。」然則非蓼國也。文五年《傳》「楚滅蓼」，杜注：「蓼，今安豐蓼縣。」然則非期思也。判然二地，毛說非是。」按：毛氏《四書改錯》云：「孫叔，蔣之期思人。其地與蓼近。」又云：「蔣、蓼，楚外國。」期思之爲蔣地，毛氏固已自知，自改正矣。盧氏文弼《鍾山札記》云：「毛檢討作《經問》及《四書索解》，力辨叔敖非楚公族，並非薦氏，乃蓼國期思之處士。余按，宣十一年「楚令尹薦艾獵城沂」，杜注云：「孫叔敖也。」十二年邲之戰，隨武子云「薦敖爲宰，擇楚國之令典，軍行右轅」云云，又云：「令尹孫叔敖弗欲戰，南轅反旆。」又云：「王告令尹改乘轅而北之。」軍事以車爲重，而令尹實主之，則士會所稱薦敖非即叔敖乎？則其爲一人，爲薦氏，實無可疑。高誘注《呂氏春秋·情欲》篇、《知分》篇，皆云：「叔敖，遠賈之子。」遠即薦也。服虔注《左傳》云：「艾獵，薦賈之子孫叔敖也。」杜氏從之。總之，《左氏》「薦敖」一言，可爲薦氏之確證。與其信諸子也，不如信傳。」孫氏星衍《孫叔敖名字考》云：「薦敖，字孫叔。古人名與字配，孫當讀爲遜，與敖相輔也。《左傳》宣十二年曾隨武子曰：「薦敖爲宰，擇楚國之令典。」下云「嬖人伍參欲戰，令尹孫叔敖弗欲」，加字於名上，猶稱孔父嘉之例。下文參曰「孫叔爲無謀矣」，下文又云「孫

叔曰進之，可證孫叔爲敖之字。孔穎達引《世本》，艾獵爲叔敖之兄。高誘注《呂氏春秋》云：「孫叔敖，楚大夫，爲賈之子」是也。萬賈蓋有二子：一萬艾獵，一萬敖，字孫叔。敖既稱叔，宜尚有兄矣。服虔、杜預以萬敖爲艾獵爲一人，與《世本》異。敖字孫叔，既兩見《傳》文，何得又名艾獵？以此知《世本》之說最古，可從矣。漢碑以爲名饒，饒與敖音相近，當據古書有作孫叔饒者而言。碑云字叔敖則誤。」謹按：古人事迹非可臆斷。右諸說各有所是，故備錄之。乃孟子言「舉於海」，則與「期思之鄙人」近，毛氏之說未可非也。○注「百里」至「相也」○正義曰：「奚事詳見《萬章上》篇。周氏柄中《辨正》云：『毛大可云：『食牛養牲在田宅而不在市，以市宜販畜，不宜牧畜也。』舉市與《史記》贖奚正相合。按，字書，市訓買，贖亦訓買，故市貨稱贖貨。『舉於市』猶言舉於贖買間也。』按，毛氏信《秦本紀》贖奚之說，不信《商君傳》舉之牛口之下之說，故以市爲贖買。大抵養牲販賣，初非二事。《說苑》：『秦穆公使賈人載鹽，賈人以五羊皮買奚，使將鹽車往。穆公視鹽，見牛肥，曰：『任重道遠而牛肥，何也？』奚對曰：『食之以時，使之不暴。有險，先之以身。』穆公知其賢，以爲上卿。』然則百里奚爲人養牲，即爲人販賣。以養牲言則曰舉之牛口之下，以販賣言則曰舉於

市，非有二也。」謹按：毛氏訓市爲買，與閻氏說同，是也。周氏以爲販牲於市，固爲臆說，《說苑》言賈人以五羊皮買奚，因以說秦穆公，此正好事者所造自鬻於秦以干秦穆公事也，孟子所斥之矣。閻氏說已見前。○注「言天」至「能行」○正義曰：《爾雅·釋言》云：「降，下也。」《釋詁》云：「勞，勤也。」《文選·東京賦》：「輿徒不勞」，薛綜注云：「勞，苦也。」趙氏以苦即是勞，以「勤」釋「勞」，即釋「苦」。內而心志，外而筋骨，皆統之以身，故以「勤勞其身」解「苦其心志」二句也。餓則羸瘠，餓其身體則瘠形於肌膚矣。《呂氏春秋·季春紀》云「振乏絕」，高誘注云：「行而無資曰乏。」《周禮·地官·遺人》疏引《書傳》云：「行而無資謂之乏，居而無食謂之困。」《後漢書·賈逵傳》云「屢空則從孤竹之子於首陽山矣」，注云：「空，乏也。」空即是乏。空乏是無資，故以「絕糧」解之。空乏猶乏絕也。《淮南子·主術訓》云「豈能拂道理之數」，高注云：「拂，戾也。」《漢書·杜欽傳》云「言之則拂心逆指」，注云：「拂謂違戾也。」拂戾則逆，逆即不順，從之言順也，故以「戾」釋「拂」而解之以「所行不從」也。「所爲」即「所行」，所行拂戾，於是「亂其所爲」矣。《易·說卦傳》云：「震，動也。」《彖傳》云：「震驚百里，驚遠而懼邇也。」故以「驚」釋「動」。《文選·高唐賦》「使人心

動」，注亦云：「動，驚也。」《廣雅·釋言》云：「忍，耐也。」《說文》心部云：「忍，能也。」能與耐同。《廣雅·釋詁》云：「能，任也。」孟子道性善，仁義禮智生於心，即本於性，「任其性」即「仁以爲己任」也。故云「堅忍其性，使不違仁」。若不能任其性，則將戕賊其性，滅亡其性，而違仁矣。堅者，彊也。《毛詩·鄭風·將仲子兮》「無折我樹檀」，傳云：「檀，彊韌之木。」孔氏正義云：「檀材可以爲車，故云彊韌之木。」「彊韌」即「彊忍」，謂其材性能勝任，不易損壞也。以性之仁自任，不使爲外物所誘，喪其仁以失其性，是爲「忍性」。《荀子·儒效》篇云：「志忍私，然後能公；行忍性情，然後能修。」《非十二子》篇云：「忍性情，綦谿利跂。」《荀子》以性爲惡，故楊倞注云：「忍謂違矯其性也。」孟荀同言「忍性」而義不可混。違其性而後能修，是荀之旨也，楊氏得之；任其性而後能仁，是孟之旨也，趙氏得之。性殊善惡，則忍判從違。蓋忍原有兩義，段氏玉裁《說文解字注》云：「忍之義，堅行止，敢於殺人謂之忍，敢於不殺人亦謂之忍。」荀子忍性，敢於違其性也；孟子忍性，敢於任其性也。或以荀之忍性爲孟之忍性，以性爲嗜欲血氣而持之禁之，非孟子之義，亦失趙氏「堅忍」之義。趙氏以「堅忍其性」解「忍性」而申以「使不違仁」，趙氏洵通儒也。《音義》云：「張云：『曾與增同。』」

丁云：「依注曾讀當作增，依字訓義亦通。」按：趙氏謂「素所不能行」者即仁也，因己之勞苦空乏推之於人，則有以動其不忍之心而任其安天下之性，故向有所不能者皆增益而能矣。人恒過，然後能改。困於心，衡於慮而後作；徵於色，發於聲，而後喻。**注**人常以有繆思過行，不得福，然後乃更其所爲，以不能爲能也。困瘁於心。衡，橫也。橫塞其慮於智臆之中，而後作爲奇計異策，憤激之說也。徵驗見於顏色，若屈原憔悴，漁父見而怪之；發於聲而後喻，若甯戚商歌，桓公異之。**疏**注「人常」至「能也」○正義曰：《爾雅·釋詁》云：「恒，常也。」《禮記·樂記》云「過制則亂，過作則暴」，注云：「過猶誤也。」《仲尼燕居》云「不能《詩》，於禮繆」，注云：「繆，誤也。」是「繆」即「過」也。思誤則行誤，因致愆咎，故「不得福」。「更」即「改」也。始以繆而不得福，一更改即能得福，是以不能爲能也。《呂氏春秋·不廣》篇云：「以其所能托其所不能，若舟之與車。」高誘注云：「舟不能陸，車不能浮，然更相載。」○注「困瘁」至「說也」○正義曰：《廣雅·釋言》云：「困，瘁也。」瘁與瘁古字通。《荀子·大略》篇云：「患至而後慮者謂之困。」《毛詩·陳

風《衡門之下》，傳云：「衡門，橫木爲門。」《考工記·弓人》注云：「衡，古文橫，假借字也。」《大戴記·曾子大孝》篇云：「夫孝，置之則塞於天地，衡之而衡於四海。」注云：「衡猶橫也。」是「橫」與「塞」義相近。《禮記·樂記》云「號以立橫」，注云：「橫，充也。」充亦塞也。故讀「衡」爲「橫」而又以「塞」釋之。《史記·齊太公世家》云：「周西伯昌之脫羑里，歸與呂尚陰謀修德以傾商政，其事多兵權與奇計。」《陳丞相世家》云：「封平以戶牖鄉，用其奇計策，卒滅楚。」趙氏謂「作爲奇計異策」指此類與？云「憤激之說」，似指蘇秦去秦而歸事，夜發書伏誦，引錐自刺其股，可謂「困心橫慮」矣。昔年，揣摩成用，說當世之君。當時天下之大，萬民之衆，王侯之威，謀臣之權，皆欲決於蘇秦之策，則所謂「奇謀異策」也。《太史公自序》云：「屈原放逐，著《離騷》，韓非囚秦，《說難》、《孤憤》。《詩》三百篇，大抵聖賢發憤之所爲作也。此人皆意有所鬱結，不得通其道也，故述往事，思來者。」是則趙氏所云「憤激之說」邪？然儀、秦事孟子羞稱。近時通解「作」爲「興起」，謂心之謀慮阻塞不通，然後乃奮興而爲善也，此過之窮蹙於己者，「徵色」謂爲人所忿嫉，「發聲」謂爲人所誚讓，然後乃徹悟通曉也，此則過之暴著於人者。○注「徵驗」至「怪之」○正義曰：《書·洪範》云「念用庶徵」，

鄭氏注云：「徵，驗也。」《楚辭·漁父》第七云：「屈原既放，遊於江潭，行吟澤畔。顏色憔悴，形容枯槁，漁父見而問之。」王逸注云：「怪屈原也。」○注「發於」至「異之」○正義曰：《呂氏春秋·舉難》篇云：「甯戚欲干齊桓公，窮困無以自進，於是爲商旅，將任車以至齊，暮宿於郭門之外。桓公郊迎客，夜開門，辟任車，爇火甚盛，從者甚衆。甯戚飯牛居車下，望桓公而悲，擊牛角疾歌。桓公聞之，撫其僕之手曰：『異哉！之歌者，非常人也。』命後車載之。」高誘注以爲歌《碩鼠》。《列女傳·辯通》篇云：「甯戚欲見桓公，道無從，乃爲人僕，將車宿齊東門之外。桓公因出，甯戚擊牛角而商歌甚悲，桓公異之。」趙氏所本也。「商歌」蓋謂其音悲楚，即此《碩鼠》三章，疾歌而爲商音也。《藝文類聚》引《琴操》，則別有「商歌」，云「南山矸，白石爛」云云，則後人所僞造。人則無法家拂士，出則無敵國外患者，國恒亡。然後知生於憂患而死於安樂也。」注

①「道」，原誤作「通」，今從沈校據《史記》改。

荒怠，國常以此亡也。故知能生於憂患，死於安樂也。死，亡也。安樂怠惰使人亡其知能也。**疏**注

「輔拂之士」○正義曰：《音義》云：「拂音弼。」《荀子·臣道》篇云：「有能抗君之命，竊君之重，反君之事，以安國之危，除君之辱，功伐足以成國之大利，謂之拂。」《說苑·臣術》篇引此文，拂作弼。《賈子·保傳》篇云：「潔廉而切直，匡過而諫邪者，謂之拂。拂者，拂天子之過者也。」《大戴記·保傳》篇載此文，上二拂字作弼。《說文》弼部云：「弼，輔也。」重文作𠂔。手部云：「拂，過擊也。」然則弼爲本字，以𠂔从弗聲，同拂，故假借拂也。○注「故知」至「能也」○正義曰：《音義》出「知生」字，云：「丁依注音智，注同。陸如字，云：『言憂患者以生全，安樂者得死亡也。』」趙氏讀「知」爲智，故以「知能」明之，即「德慧術智恒存乎疾疾」之義。乃知能可言生不可言死，故以「死」爲「亡」，謂「死於安樂」即是「安樂怠惰，亡其知能」。然揆經文之意，「然後」二字終不可達，以「死」爲「亡」究爲曲說。陸氏讀如字是。《春秋繁露·竹林》篇云：「深本頃公之所以大辱，身幾亡國，爲天下笑，其端乃從懼魯勝衛起。伐魯，魯不敢出，擊衛，大敗之。因得氣而無敵國以興患也。故曰：『得志有喜，不可不戒。』」此

其效也。自是後頃公恐懼，不聽聲樂，不飲酒食肉，內愛百姓，問疾弔喪，外敬諸侯，從會與盟，卒終其身，家國安康。是福之本生於憂，而禍起於喜也。」此正發明《孟子》此文之義。

章指：言聖賢困窮，天堅其志，次賢感激，乃奮其慮。凡人佚樂，以喪知能。賢愚之敘也。

孟子曰：「教亦多術矣。予不屑之教誨也者，是亦教誨之而已矣。」**注**教人之道多術。予，我也。屑，絜也。我不絜其人之行，故不教誨之。其人感此，退自修學而爲仁義，是亦我教誨之一道也。**疏**注「予我也屑絜也」○正義曰：「予，我也」，《爾雅·釋詁》文。「屑，潔」，詳見《公孫丑上》篇。《方言》云：「屑，潔也。」

章指：言學而見賤，耻之大者，激而厲之，能者以改。教誨之方，或折或引，同歸殊塗，成之而已。**疏**「或折或引」○正義曰：

《戰國策·西周策》云「則周必折而入於韓」，注云：「折，屈也。」「引」謂引而信之也。「或折或引」即「或屈或信」。折一本作抑。

姪廷琮廷弼校字

孟子正義卷二十五終

孟子正義卷二十六

孟子卷第十三

江都縣鄉貢士焦循撰集

盡心章句上凡四十七章。**注**盡心者，人之有心，

為精氣主，思慮可否，然後行之。猶人法天。天之執持維綱以正二十八舍者，北辰也。《論語》曰：「北辰居其所而衆星共之。」心者，人之北辰也。苟存其心，養其性，所以事天也。故以「盡心」題篇。**疏**注「人之」至「法天」○正義曰：《荀子·

解蔽》篇云：「心者，形之君而神明之主也。出令而無所受令。」《春秋繁露·循天之道》篇云：「凡氣從心，心，氣之君也。」《淮南子·原道訓》云：「夫心者，五藏之主也。所以制使四支，流行血氣，馳騁於是非之境而出入於百

事之門戶者也。」《精神訓》云：「是故血氣者，人之華也；而五藏者，人之精也。夫血氣能專於五藏而不外越，則胃腹充而嗜欲省矣；胃腹充而嗜欲省，則耳目清、聽視遠矣。耳目清、聽視遠謂之明。五藏能屬於心而無乖，則教志勝而行不僻矣；教志勝而行之不僻，則精神盛而氣不散矣。」此「心為精氣主」之說也。「馳騁於是非之境而行之不僻」即「思慮可否，然後行之」之謂也。猶與由通。所以然者，由人之性善，故其心能變通，以天為法則也。^①《莊子·天運》篇云：「天其運乎？地其處乎？日月其爭於所乎？孰主張是？孰維綱是？孰居無事推而行是？意者其有機緘而不得已邪？意者其運轉而不能自止邪？」《楚辭·天問》篇云「斡維焉繫」，王逸注云：「維，綱也。」《文選·長笛賦》注引《字林》云：「維，持也。」《詩·周頌》「執競武王」，箋云：「執，持也。」《儀禮·鄉射禮》云「下綱不及地武」，注云：「綱，持舌繩也。」執、持、維、綱四字同義。趙氏取《莊子》此文而以「執持」釋「維綱」。《莊子》以天之運轉，孰維綱而使之推行，趙氏以天之運，其所以維綱者北辰，而引《論

①「也」下，據疏例當有「○注天之至天也○」六字。

語》以證之。《周禮·春官·馮相氏》「掌二十有八星之位」。《秋官·哲族氏》「掌二十有八星之號」，注云：「星謂從角至軫」。《爾雅·釋天》云：「壽星，角、氏也。天根，氐也。天駟，房也。大辰，房、心、尾也。析木之津，箕、斗之間，漢津也。星紀，斗、牽牛也。玄枵，虛也。顓頊之虛，虛也，北陸，虛也。營室謂之定。娵觜之口，營室，東壁也。降婁，奎、婁也。大梁，昴也，西陸，昴也。濁謂之畢。昧謂之柳。柳，鶉火也。」此二十八舍之星。角、亢、氐、房、心、尾、箕，為東方蒼龍之宿；斗、牛、女、虛、危、營室、東壁，為北方玄武之宿；奎、婁、胃、昂、畢、觜、參，為西方白虎之宿；東井、輿鬼、柳、七星、張、翼、轸，為南方朱鳥之宿。《爾雅》於北缺危，於西缺胃、觜、參，於南止有柳，蓋舉其宜釋者，餘從略也。而承之云「北極謂之北辰」，孫炎注云：「北極，天之中，以正四時。」趙氏本於此，故謂「正二十八舍者，北辰也」。二十八舍，東西南北分主四時，正四時即正二十八舍矣。

邵氏晉涵《爾雅正義》云：「《爾雅》約舉二十二舍十二次，而繼以北辰者，以其為衆星所拱也。」屈原賦《天問》：「斡維焉繫？天極焉加？」戴氏震注云：「天極，《論語》所謂北辰，②《周髀》所謂正北極，步算家所謂不

動處，亦曰赤道極，是為左旋之樞。賈逵、張衡、蔡邕、王蕃、陸績皆以紐星為不動處。梁祖暉測紐星離不動處一度奇，元郭守敬測離三度奇矣。」趙氏以心比北辰，以四體五官等比二十八舍。二十八舍聽令於北辰，則正而不忒；四體五官聽令於心，則善而不惡。法天即所以事天也。引《論語》，在《為政》第二。

孟子曰：「盡其心者，知其性也。知其性，則知天矣。」**注**性有仁義禮智之端，心以制之，

惟心為正。人能盡極其心以思行善，則可謂知其性矣。知其性，則知天道之貴善者也。**疏**注「性有」至

「善者也」○正義曰：《禮記·表記》云「義者，天下之制也」，注云：「制謂裁制。」人之心能裁度，得事之宜，所以性善，故仁義禮智之端原於性而見於心。「心以制之」即所謂「思慮可否，然後行之」也。「惟心為正」謂心能裁度以正四體五官也，即天之北辰「執持維綱以正二十八舍」也。《呂氏春秋·

①「房」，原無，今從沈校據《爾雅》補。

②「辰」，原誤作「極」，今據《屈原賦戴氏注》及《論語》改。

明理篇云「五帝三王之於樂盡之矣」，高誘注云：「盡，極也。」《禮記·大學》篇云「是故君子無所不用其極」，注云：「極猶盡也。」故「盡其心」即「極其心」。性之善在心之能「思行善」，故「極其心以思行善，則可謂知其性矣」。「知其性」謂知其性之善也。「天道貴善」，特鍾其靈於人，使之能思行善。惟不知己性之善，遂不能盡極其心，是「能盡極其心以思行善者」，知其性之善也；知其性之善，則知天道之好善矣。趙氏之義如此。戴氏震《原善》云：「孟子曰：『盡其心者，知其性也。知其性，則知天矣。』耳目百體之所欲，血氣資之以養，所謂性之欲也，原於天地之化者也。是故在天為天道，在人，咸根於性而見於日用事為，為人道。仁義之心原於天地之德者也，是故在人為性之德。斯二者，一也。由天道而語於無憾，是謂天德；由性之欲而語於無失，是謂性之德。性之欲，其自然之符也；性之德，其歸於必然也。歸於必然，適全其自然，此其為自然之極致。《詩》曰：『天生蒸民，有物有則。民之秉彝，好是懿德。』凡動作威儀之則，自然之極致也，民所秉也。自然者，散之普為日用事為；必然者，秉之以協於中，達於天下。知其自然，斯通乎天地之化；知其必然，斯通乎天地之德。故曰：『知其性，則知天矣。』天道德摩不豁然於心，故曰『盡其心』。存其心，

養其性，所以事天也；**注**能存其心，養育其正性，可謂仁人。天道好生，仁人亦好生。天道無親，惟仁是與。行與天合，故曰「所以事天」。夭壽不貳，修身以俟之，所以立命也。**注**貳，二也。仁人之行，一度而已。雖見前人或夭或壽，終無二心，改易其道。夭若顏淵，壽若邵公，皆歸之命。修正其身以待天命，此所以立命之本也。**疏**注「貳」至「本也」○正義曰：《禮記·王制》云「喪事不貳」，注云：「貳之言二也。」《國語·周語》云「百姓攜貳」，韋昭注云：「貳，二心也。」昭公二十八年《左傳》云「心能制義曰度」。「一度而已」，不改易也。《史記·仲尼弟子列傳》云：「回年二十九，髮盡白，蚤死。孔子哭之慟。」此「夭若顏淵」之說也。《論衡·氣壽》篇云：「周公居攝七年，復政退老，出入百歲矣。邵公，周公之兄也。至康王之時尚為大保，出入百有餘歲矣。」又云：「《傳》稱邵公百八十。」此「壽若邵公」之說也。程氏瑤田《論學小記》云：「心者，身之主也。萬物皆備於吾之身，物則即具於吾之心。而以爲吾之性如是，而心可不盡乎？曷爲而可謂之盡其心也？由盡己之性而充極之，至於盡人之性，盡物之性，而心盡矣。是非先有以知其性不能

也。曷知乎爾？格物以致其知，斯能窮盡物則以知其心所具之性，而因以盡其心。然則盡其心者，知其性也。夫是性也，天之分與我者也。性不異乎天，而天豈異乎性？知性、

知天非二事，亦無二時也。知其性則知天矣。夫然而心可不存乎？不存則放。夫然而性可不養乎？不養則戕。父

母生我以身而不毀傷其身者，能事親者也；天分我以心與性而能不放之不戕之，非所以事天乎？故苟能存其心而養

其性，則必其明物察倫以致其知者，既詳且盡，而見之於行，必能居仁由義以盡其道。而其功之盛，必將有以馴致夫參

天地、贊化育之能。任則至重也，道則至遠也，死而後已者

也。夫然後天之所以與我以為性而具於心者，是我所受之

命，而夭壽不貳，修身以俟之矣，豈非所以立命乎！」按：

程氏說是也。「盡其心」即伏羲之「通德類情」，黃帝堯舜之

「通變神化」。惟知人性之善，故盡其心以教之。知性即是

知天，知天而盡其心以教之，即所以事天。所以盡其心者，

不過「存其心，養其性」也。盡其性以盡人之性，盡物之性。

贊天地之化育，所以成天之能，猶人臣贊君之治以成君之

功。聖人事天猶人臣事君也。天之命有夭壽窮達智愚賢不

肖，而聖人盡其心以存之養之。存之養之即所以脩身，使天

下皆歸於善。天之命雖有不齊，至是而皆齊之，故為立命知

性，知天窮理也。盡其心以存之養之脩之，盡性也。立命至於命也。《孟子》此章，發明易道也。

章指：言盡心竭性，所以承天。夭壽

禍福，秉心不違，立命之道，惟是為珍。

孟子曰：「莫非命也，順受其正。」**注**莫，

無也。人之終，無非命也。命有三名：行善得善曰

受命，行善得惡曰遭命，行惡得惡曰隨命。惟順受

命為受其正也。**疏**注「莫無也」至「正也」○正義曰：

《詩·周頌·時邁》莫不震疊，《韓詩》云：「莫，無也。」莫、

無聲相近，趙氏以「無」釋「莫」是也。「非」「命」二字相連，即

下「非正命」。《韓詩外傳》云：「孔子曰：人有三死而非命

也者，自取之也。」非命二字與此同。莫非命，禁戒之辭，謂

不可非命而死也。順受其正，乃為知命。不知命，或死於嚴

牆之下，或桎梏而死，是即死於非命；死於非命，即不能順

受其正，即是不知命。如是則通章一氣貫注。趙氏謂人之

終無非命，蓋以命有三名，人之終不出乎受命、遭命、隨命。

三命中惟「行善得善」乃為順受正。揆諸孟子之旨，固不如

是。三命之說，《音義》云：「丁云：『三命事出《孝經》援神

契》。按：《禮記·祭法》注云：「司命主督察三命。」孔氏正義引《孝經援神契》云：「命有三科，有受命以任慶，有遭命以適暴，有隨命以督行。受命謂年壽也，遭命謂行善而遇凶也，隨命謂隨其善惡報之。」《白虎通·壽命》篇云：「命有三科以記驗：有壽命以保度，有遭命以遇暴，有隨命以應行。壽命者，上命也。若言文王受命惟中身，享國五十年。隨命者，隨行為命，若言怠棄三正，天用勦絕其命矣。又欲使民務仁立義，無滔天，滔天則司命舉過，言則用以弊之。遭命者，逢世殘賊，若上逢亂君，下必災變暴至，天絕人命，沙鹿崩於受邑是也。冉伯牛危言正行而遭惡疾，孔子曰：『命矣夫，斯人也而有斯疾也！』」《論衡·命義》篇云：「傳曰：『說命有三，一曰正命，二曰隨命，三曰遭命。正命謂本稟已自得吉也。性然骨善，故不假操行以求福而吉自至，故曰正命。隨命者，戮力操行而吉福至，縱情施欲而凶禍到，故曰隨命。遭命者，行善得惡，非所冀望，逢遭於外而得凶禍，故曰遭命。』」《白虎通》、《論衡》小有異同，趙氏與《白虎通》合。乃下節注云：「知命者欲趨於正，故不立巖牆之下，恐厭覆也。盡修身之道以壽終者，得正命也。」此以壽終為正命而本之以修身，則仍行善得善之義。蓋分隨命中之善報，合諸受命之年壽，而以惡報獨為隨命。《論衡》全本《孝

經緯》以年壽得諸自然，不由善報，與趙氏為異也。是故知命者不立乎巖牆之下。盡其道而死者，正命也；**注**知命者欲趨於正，故不立巖牆之下，恐壓覆也。盡脩身之道以壽終者，為得正命也。桎梏死者，非正命也。**注**畏壓溺死，禮所不弔。故曰「非正命」也。**疏**注「畏壓」至「命也」○正義曰：《禮記·檀弓》云：「死而不弔者三，畏、厭、溺。」注云：「謂輕身忘孝也。」注畏云：「人或時以非罪攻己，不能有以說之死之者。孔子畏於匡。」注厭云：「行止危險之下。」注溺云：「不乘橋船。」厭即壓覆也。《呂氏春秋·孟夏紀·勸學》篇云：「曾點使曾參過期而不至，人皆見曾點曰：『無乃畏邪？』曾點曰：『彼雖畏，我存，夫安敢畏？』孔子畏於匡，顏淵後，孔子曰：『吾以汝為死矣。』顏淵曰：『子在，回何敢死？』」兩事相比，「回何敢死」正是「回何敢畏」。高誘注畏為死，謂由畏而死，即《檀弓》「死而不弔」之畏矣。以畏而死，則子必不死，故知子在以畏而死則不可死，故顏子不敢死，即曾子安敢畏。立巖牆之下恐其壓，壓而死猶畏而死，俱為非命。《孟子》此文與「子在回何敢死」相發明。子在者，聖人知命，不死於非命也；回何敢死者，大賢知命，不死於非命也。孟

子言不立巖牆之下，不桎梏而死，示人知命之學，不可死於非命也。故「莫非命」之莫讀如《易》「莫夜有戎」、「莫擊之」之莫。莫即無，無即毋。《說文》女部云：「毋，止之也。」「非命」二字相連，「莫」字不與「非」字連也。《論語》言「五十而知天命」、「不知命無以為君子也」，又云「死生有命」，又云「道之將行也與？命也。道之將廢也與？命也」。孟子既云「殀壽不貳，脩身以俟之，所以立命」，此章又詳言之。又云：「口之於味也，目之於色也，耳之於聲也，鼻之於臭也，四體之於安佚也，性也，有命焉；君子不謂性也；仁之於父子也，義之於君臣也，禮之於賓主也，知之於賢者也，聖人之於天道也，命也，有性焉，君子不謂命也。」皆發明孔子「知命」之說也。死生窮達皆本於天。命當死而營謀以得生，命當窮而營謀以得達，非知命也；命可以不死而自致於死，命可以不窮而自致於窮，亦非知命也。故子畏於匡，回不敢死。死於畏、死於桎梏、死於巖牆之下，皆非命也，皆非順受其正也。知命者不立巖牆之下，然則立巖牆之下與死於畏、死於桎梏，皆為不知命。味色聲臭安佚聽之於命，不可營求，是知命也；仁義禮智天道必得志乃可施諸天下，所謂「道之將行，命也」，不得位則不施諸天下，所謂「道之將廢，命也」。君子以行道安天下為心，天下之命立於君子。百姓

之飢寒困於命，君子立命則盡其心，使之不飢不寒；百姓之愚不肖困於命，君子立命則盡其心，使之不愚不肖。口體耳目之命，「已溺已飢」者操之也；仁義禮智之命，「勞來匡直」者主之也。皆盡其心也。故己之命聽諸天，所謂「脩身以俟之」；而天下之命任諸己，所謂「盡心」，所謂「立命」也。於己則俟命，於天下則立命。於正命則順受，於非命則不受。聖賢知命之學如是。俗以任運之自然為知命，將視天下之飢寒愚不肖而不必盡其心，且自死於畏、自死於桎梏、自死於巖牆之下而莫知避也。阮氏元《校勘記》云：「畏壓溺死」，閩、監、毛三本同。廖本、孔本、韓本、《攷文》古本無死字。按，無者非。」

章指：言人必趨命，貴受其正。巖牆之疑，君子遠之。

孟子曰：「求則得之，舍則失之」，是求有益於得也，求在我者也；**注**謂修仁行義，事在於我，我求則得，我舍則失。故求有益於得也。「求之有道，得之有命」，是求無益於得也，求

在外者也。」**注**謂賢者脩其天爵而人爵從之，故曰「求之有道」也；脩天爵者，或得或否，故言「得之有命」也。祿爵須知己。知己者在外，非身所專，是以云「求無益於得也，求在外也」。**疏**注「祿爵須知己」○正義曰：《史記·管晏列傳》云：「吾聞君子詘於不知己而信於知己者，故須知己而後祿爵可得也。」翟氏灝《攷異》云：「兩『是求』字皆作一讀。其上二語皆古語常言。《荀子·不苟》篇云：『操之則得之，舍之則失之。』《文子·符言》篇云：『求之有道，得之有命。』」

章指：言爲仁由己，富貴在天。故孔

子曰：「如不可求，從吾所好。」

孟子曰：「萬物皆備於我矣。反身而誠，樂莫大焉；**注**物，事也。我，身也，普謂人爲成人已往。皆備知天下萬物，常有所行矣。誠者，實也。反自思其身所施行能皆實而無虛，則樂莫大焉。」**疏**注「物事」至「大焉」○正義曰：《周禮·地官·大司徒》：「以鄉三物」，《禮記·月令》：「兼用六物」，注皆云：「物

猶事也。」《爾雅·釋詁》云：「身，我也。」《說文》戈部云：「我，施身自謂也。」《禮記·祭義》云「成人之道也」，注云：「成人，既冠者。」成人已往，男子年二十已上也。是時知識已開，故「備知天下萬事」。我本自稱之名，此我既指人之身，即指天下人之身，故云「普謂人」。人有一身即人有一我。未冠或童昏不知，既冠則萬事皆知矣。既知則有所行，故云「常有所行矣」。《淮南子·說林訓》云「其鄉之誠也」，高注云：「誠，實也。」《禮記·禮運》云「此順之實也」，注云：「實猶誠也。」**强恕而行，求仁莫近焉。****注**當自强勉以忠恕之道，求仁之術，此最爲近。**疏**注「當自」至「爲近」○正義曰：《淮南子·脩務訓》：「功可彊成」，高誘注云：「彊，勉也。」「反身而誠」即忠恕之道也，宜勉行之。戴氏震《孟子字義疏證》云：「《中庸》曰：『忠恕違道不遠。』」孟子曰：「强恕而行，求仁莫近焉。」蓋人能出於己者必忠，施於人者以恕，行事如此，雖有差失，亦少矣。凡未至乎聖人，未可語於仁，未能無憾於禮義，如其才質所及，心知所明，謂之忠恕可也；聖人仁且智，其見之行事無非仁，無非禮義，忠恕不足以名之。然而非有他也，忠恕至斯而極也。故曾子曰：「夫子之道，忠恕而已矣！」《段氏玉裁《說文解

字注云：「恕，仁也。從心，如聲。孔子曰：『能近取譬，可謂仁之方也矣。』」孟子曰：「強恕而行，求仁莫近焉。」是則爲仁不外於恕。析言之則有別，渾言之則不別也。」謹按：此章申明「知性」之義也。知其性而乃盡其心，然則何以知其性？以我推之也。我亦人也，我能覺於善則人之性亦能覺於善，人之情即同乎我之情，人之欲即同乎我之欲，故曰：「萬物皆備於我矣。」「己欲立而立人，己欲達而達人」、「己所不欲，勿施於人」，即「反身而誠」也，即「強恕而行」也。聖人通神明之德，類萬物之情，亦近取諸身而已矣。

章指：言每必以誠，恕己而行。樂在其中，仁之至也。

孟子曰：「行之而不著焉，習矣而不察焉，終身由之而不知其道者，衆也。」**注**人皆有仁義之心，日自行之於其所愛，而不能著明其道以施於大事；仁妻愛子，亦以習矣，而不能察知可推以爲善也。由，用也。終身用之以爲自然，不究其道可成君子，此衆庶之人也。**疏**注「人皆」至「人也」○

正義曰：《小爾雅·廣詁》云：「著，明也。」《楚辭·懷沙》篇云「孰察其撥正」，《呂氏春秋·功名》篇云「不可不察」，王逸、高誘注並云：「察，知也。」其實察與著義同，《禮記·中庸》「言其上下察也」，注云：「察猶著也。」《毛詩·王風·君子陽陽》「右招我由房」，傳云：「由，用也。」著、察、知三字義同。趙氏以「不知其道」爲「不究其道」者，究之義爲窮，爲極，蓋以「察」深於「著」，而「知」則察之極也。《說苑·脩文》篇云：「安故重遷謂之衆庶。」《文選·幽通賦》云「斯衆兆之所惑」，曹大家注云：「衆，庶也。」「衆庶」謂凡夫也。趙氏謂凡夫但能以仁義施於所愛之妻子而不能擴充推之於大事，所以不能爲君子，但爲衆庶也。按：《孟子》此章亦所以發明《易》道也。「行」、「習」即「由之」也。「著」、「察」即「知之」也。聖人知人性之善而盡其心以教之，豈不欲天下之人皆知道乎？所以「可使由之，不可使知之」者，則以行而能著、習而能察者，君子也；行而不著，習而不察者，衆庶也。則以能知道者，君子也；終身由之而不知其道者，衆庶也。衆庶但可使由，不可使知，故必盡其心，「通其變，使之不倦，神而化之，使民宜之」也。自首章以下，章雖分而義實相承，玩之可見。《易·上繫傳》云：「一陰一陽之謂道。繼之者，善也；成之者，性也。仁者見之謂之仁，知者見之謂之知。百

姓日用而不知，故君子之道鮮矣。「日用而不知」即所謂「終身由之而不知其道」也，「百姓」即「衆庶」也，「道」即「君子之道」，「一陰一陽」者也。惟其性善，所以能由，惟其能由，所以盡其心。以先覺覺之，其不可知者，通變神化而使由之，盡其心，顯諸仁也，不能使知之，藏諸用也。聖人定人道，雖凡夫無不各以夫妻父子爲日用之常，日由於道之中而不知其爲道也，此聖人知天立命之學也。聖人知民不可使知，則但使之行、習而不必責以著、察。說者乃必以著、察、知道責之天下之凡夫，失孟子之意矣。

章指：言人有仁端，達之爲道。凡夫用之，不知其爲實也。

孟子曰：「人不可以無耻。」**注**人不可以無所羞耻也。《論語》曰：「行己有耻。」**疏**注「人不」至

「有耻」○正義曰：《國語·周語》云「姦禮爲羞」，注云：

「羞，耻也。」《說文》心部云：「耻，辱也。」《禮記·緇衣》云

「惟口啓羞」、「或承之羞」，注並云：「羞猶辱也。」故下注以

「辱」釋「耻」，此以「羞」釋「耻」也。引《論語》在《子路》篇第

十三。《集解》引孔氏云：「有耻，有所不爲也。」無耻之

耻，無耻矣。」**注**人能耻己之無所耻，是爲改行從善之人，終身無復有耻辱之累也。**疏**注「人能」至「累

也」○正義曰：「無耻」二字承上「無耻」，則「無耻」即謂無所

羞耻也。無所羞耻而「之」於「耻」，是改無耻爲耻。惠氏棟

《後漢書補注》云：「《光武紀》注「秀之字曰茂」，洪邁曰：

「漢高祖諱邦，荀悅曰：之字曰國。惠帝諱盈，之字曰滿。

謂臣下所避以相代也。蓋「之」字之義訓變，《左傳》周史以

《周易》見陳侯者，陳侯使筮之，遇《觀》之《否》。謂《觀》六四

變爲《否》也。」棟謂：之猶適也，適則變矣。《繫辭傳》云「惟

變所適」，京房論卦有通變是也。避諱改文與卦變同，故云

「之」。按：此「無耻之耻」謂由無耻改變而適於耻。趙氏以

「改行」解之，正以之爲「之字」、「之卦」之之也。

章指：言耻、身無分。獨無所耻，斯必遠辱，不爲憂矣。

孟子曰：「耻之於人，大矣！」爲機變之

巧者，無所用耻焉。**注**耻者，爲不正之道，正人

之所耻爲也。今造機變穿陷之巧以攻戰者，非古之

正道也，取爲一切可勝敵也，宜無以錯於廉耻之心。

疏注「耻者」至「之心」○正義曰：《易·彖傳》每以「正大」連言，大之義爲長，正之義亦爲長。趙氏以「大」之義近於「正」，「耻」之於人大矣，猶云「耻」之於人正矣，故云「正人之所耻爲」。《章指》云：「不慕大人，何能有耻？」固以「正人」爲「大人」矣。正人之所耻必是不正，故云「爲不正之道，正人之所耻爲」也。《墨子·公輸》篇云「公輸盤九設攻城之機變」，故以「機變之巧」指「攻戰」言。九設攻城之機變，篇中止言爲雲梯一事，尚有其八。《備城門》篇云：「禽滑釐曰：今之世常所以攻者，臨、鉤、衝、梯、堙、水、穴、突、空洞、蟻附、轆轤、軒車，凡十二。」又云：「問穴土之守邪，若彭有水濁非常者此穴土也。急塹城內，穴直之，穿井城，五步一井，傳城足高地丈五尺，地得泉三尺而止，令陶者爲罍，容四十斗以上，固順之以薄鞞革，置井中，使聽耳者伏罍聽之，審知穴之所在，鑿內迎之。」又有《備穴》篇，穴即穿陷也。此皆攻城之機變，趙氏略舉「穿陷」以概其餘耳。《書·桀誓》云：「斂乃穿。」然則王者攻戰之正道不用穿陷，故此「機變穿陷之巧」非占之正道也。《漢書·翟方進傳》云「奏請一切增賦」，張晏云：「一切，權時也。」《路溫舒傳》云：「是以獄

吏專爲深刻，殘賊而亡極，媮爲一切，不顧國患。」如淳云：

「媮，苟且也。一切，權時也。」《後漢書·王霸傳》云：「蘇茂客兵遠來，糧食不足，故數挑戰以徼一切之勝。」李賢注云：

「一切猶權時也。」此云「一切可勝敵」，謂權時取勝敵而已，不計正不正也。正人既以不正，爲耻，此非古之正道而苟且爲之，是不以不正爲耻，非正人矣，故云「宜無錯於廉耻之心」。

《音義》云：「錯，音措。」《說文》手部云：「措，置也。」近時通解，「機變」謂機械變詐。按：《淮南子·原道訓》云

「故機械之心藏於胸中」，高誘注云：「機械，巧詐也。」是不必指攻戰言之。

不耻不若人，何若人有？**注**不

耻不如古之聖人，何有如賢人之名也？**疏**注「不耻」

至「名也」○正義曰：阮氏元《校勘記》云：「注意謂取法乎上乃得乎中也。閩、監、毛三本「聖人」、「賢人」並作「聖賢」。」

章指：言不慕大人，何能有耻？是

以隰朋愧不及黃帝，佐齊桓以有勳；顏淵

慕虞舜，仲尼嘆「庶幾」之云。**疏**「隰朋」至「之

云」○正義曰：周氏廣業《孟子章指攷證》云：「《左傳》昭十三年叔向曰：『齊桓，衛姬之子也。有鮑叔牙、隰朋以

爲佐。』《列子·力命》篇：「管夷吾有病，小白問惡乎屬國而可？對曰：隰朋可。其爲人也，上忘而下不叛，愧其不若黃帝而哀不已若者。」又見《莊子·徐無鬼》篇，文與《列子》同。《文選》張華《勵志詩》：「隰朋仰慕，予亦何人」，李善注引作《莊子》是也。又《呂氏春秋·貴公》篇云：「隰朋之爲人也，上志而下求，醜不若黃帝而哀不已若者。」高誘注：「醜其德不若黃帝。」又《管子·小匡》篇「於諸侯使隰朋爲行」，尹知章注：「行，行人也。」賈誼《新書》所謂「中主者齊桓公」是也。得管仲、隰朋，則九合諸侯。《說苑》：「管仲治內，隰朋治外。」數書皆出周秦西漢，故趙氏據以爲說。《易·繫辭傳》：「顏氏之子其殆庶幾乎」，虞翻注云：「幾者，神妙也。顏子知微，故殆庶幾。」孔子曰「回也其庶幾乎」，孔穎達亦云：「顏子『庶於幾』。王充《論衡》：『顏淵曰：『舜何人也？予何人也？』五帝三王皆聖，顏淵獨慕舜者，知己步驟有同也。」亦可爲慕舜之證。」

孟子曰：「古之賢王好善而忘勢，**注**樂善自卑，若高宗得傳說而稟命。」**疏**注「樂善」至「稟命」○

正義曰：傳說詳見《告子下》篇。云「稟命」者，蓋謂《傳說》三篇也。但此三篇伏氏、孔氏皆無，惟《禮記·文王世子》《學記》《緇衣》等篇引《兌命》曰：鄭氏注云：「兌，當作說，謂殷高宗之臣傳說也，作書以命高宗。」《國語·楚語》云：「白公子張曰：昔殷武丁能聳其德，至於神明，以入於河，自河徂亳，於是乎三年，默以思道。卿士患之曰：王言以出令也，若不言，是無所稟令也。武丁於是作書曰：『以余正四方，余恐德之不類，茲故不言。』如是而又使以象夢求四方之賢聖，得傳說以來，升爲三公，而使朝夕規諫。」「稟命」即「稟令」，趙氏本此也。古之賢士何獨不然？樂其道而忘人之勢。**注**何獨不然，何獨不有所樂有所忘也。樂道守志，若許由洗耳，可謂忘人之勢矣。**疏**注「若許由洗耳」○正義曰：《史記·伯夷列傳》云：「說者云：堯讓天下於許由，許由不受，恥之，逃隱。」《正義》引皇甫謐《高士傳》云：「許由，字武仲。堯聞，致天下而讓焉。乃退而遁於中嶽，潁水之陽，箕山之下隱。堯又召爲九州長，由不欲聞之，洗耳於潁水濱。時有巢父犢欲飲之，見由洗耳，問其故，對曰：『堯欲召我爲九州長，惡聞其聲，是故洗耳。』巢父曰：『子若處高岸深谷，人道不通，誰能見

子？子故浮游，欲求其名譽，汙吾懷口。」牽犢上流飲之。」故王公不致敬盡禮，則不得亟見之。見且由不得亟，而況得而臣之乎？」

注亟，數也。若伯夷非其君不事，伊尹樂堯舜之道，不致敬盡禮，可數見之乎？作者七人，隱各有方，豈可得而臣之？

疏注「亟數也」○正義曰：《音義》云：「亟，去吏切。數，音朔。」《說文》二部云：「亟，敏疾也。」《爾雅·釋詁》云：「數，疾也。疾，速也。」段氏玉裁《說文解字注》云：「今人亟分入聲去聲，人之訓『急也』，去之訓『數也』，古無是分別。數亦急也，非有二義。」○注「作者七人隱各有方」○正義曰：《論語·憲問》篇云「作者七人矣」，《集解》引包氏曰：「作，爲也。爲之者凡七人，謂長沮、桀溺、丈人、晨門、荷蕢、儀封人、楚狂接輿也。」《義疏》引鄭氏注云：「伯夷、叔齊、虞仲，辟世者；荷蓀、長沮、桀溺，辟地者；柳下惠、少連，辟色者；荷蕢、楚狂接輿，辟言者。七當爲十之誤。」此云「隱各有方」，謂辟世辟地辟色辟言之不同，而晨門、儀封人隱於吏，丈人、沮溺隱於耕，接輿隱於狂，是亦各有方矣。

章指：言王公尊賢，以貴下賤之義也；樂道忘勢，不以富貴動心之分也。各

崇所尚，則義不虧矣。**疏**「以貴下賤」○正義曰：《易·屯》初九傳文。

孟子謂宋句踐曰：「子好遊乎？吾語

子遊。人知之，亦囂囂；人不知，亦囂囂。」

注宋，姓也；句踐，名也。好以道德遊，欲行其道者。囂囂，自得無欲之貌。**疏**注「宋姓」至「之貌」○正義曰：宋句踐姓名未見他書。趙氏佑《溫故錄》云：「注『好以道德遊，欲行其道者』，按，道德非遊具，蓋觀孟子進而數之，其亦有異於縱橫捭闔者流與？」囂囂，見《萬章上》篇。按：「囂囂」見於經籍者義多不一，大抵皆由假借也。《詩·大雅·板》篇「聽我囂囂」，傳云：「囂囂猶警警也。」箋云：「女反聽我言，警警然不肯受。」此囂囂爲警警之假借。《小雅·十月之交》「譏口囂囂」，《釋文》引《韓詩》作「警警」。警即警警。《楚辭·九思·怨上》篇云「令尹兮警警」，王逸注云：「警警，不聽話言而妄語也。」是也。《法言·君子》篇云：「或曰人有齊死生，同貧富，等貴賤，何如？」曰：「信死生齊，貧富同，貴賤等，則吾以聖人爲囂囂。」吳秘注云：「若信是言，則吾以聖人六經之旨爲囂囂之虛語耳。」又云：「或

曰：世無仙則焉得斯語？曰：語乎者，非囂囂也與？」吳秘注云：「囂囂然方士之虛語耳。」此以囂囂爲虛，故《廣雅·釋訓》云：「囂囂，虛也。」《文選·養生論》云「終朝未餐則囂然思食」，注云：「囂然，飢意也。」此囂乃枵之假借。《爾雅·釋天》云：「玄枵，虛也。」孫炎注云：「枵之言耗，耗虛之意也。」是也。《莊子·駢拇》篇云：「自三代以下者，天下何其囂囂也？」郭象注云：「橫其囂囂，棄情逐迹，如將不及，不亦多憂乎？」《釋文》云：「囂囂，許橋反，又五羔反。崔云：『憂世之貌。』」《漢書·王莽傳贊》云「囂然喪其樂生之心」，顏師古注云：「囂然，衆口愁貌也。」《說文》口部云：「噉，衆口愁。」《詩》曰：「哀鳴噉噉。」然則此囂囂乃亦噉噉之假借也。《說文》昭部云：「囂，聲也。氣出頭上。」《周禮·秋官·司諫》「禁其囂囂者」，注云：「囂，謹也。成公十六年《左傳》云「在陳而囂」，杜預注云：「囂，喧譁也。」《詩·小雅·車攻》篇云「之子于苗，選徒囂囂」，傳云：「囂囂，聲也。」然則惟此囂囂爲囂之本義。《爾雅·釋言》以閑釋囂，此囂爲閑之假借，囂囂即閑閑也。《楚辭·湘君》篇「告余以不問」，王逸注云：「問，暇也。」《招魂》篇「待君之間些」，注云：「間，靜也。」暇則「自得」，靜則「無欲」。《章指》云「內定常滿」，《禮記·大學》云「定而後能靜」，《周書·謚法解》云

「大慮靜民曰定」，定亦清靜也。「自得無欲」則廣博而盛，《莊子·齊物論》云「大知閑閑」，《釋文》引簡文云：「廣博之貌。」《廣雅·釋訓》云：「閑閑，盛也。」是也。段氏玉裁《說文解字注》云：「《孟子》『人知之亦囂囂』，人不知亦囂囂」，言人自得無欲，如氣上出悠閒也。此以囂字氣出頭上爲閒，乃趙氏自讀囂囂爲間間，非取囂字本義爲自得無欲也。曰：「何如斯可以囂囂矣？」**注**句踐問何執守可囂囂也？曰：「尊德樂義，則可以囂囂矣。」**注**尊，貴也。孟子曰：能貴德而履之，樂義而行之，則可以囂囂無欲矣。**疏**注「尊貴也」○正義曰：《大戴記·本命》篇云：「貴貴尊尊，義之大者也。」尊、貴義近，故以「貴」釋「尊」。《易·上繫傳》云「天尊地卑」，虞翻注云：「天貴故尊。」故士窮不失義，達不離道。窮不失義，故士得己焉；達不離道，故民不失望焉。**注**窮不失義，不爲不義而苟得，故得己之本性也；達不離道，思利民之道，故民不失望也。古之人，得志，澤加於民；不得志，修身見於世。窮則獨善其身，達則兼善天下。**注**古之人得

志君國，則德澤加於民人。不得志，謂賢者不遭遇也。見，立也。獨治其身以立於世間，不失其操也，是故獨善其身。達謂得行其道，故能兼善天下也。

疏注「見立」至「操也」○正義曰：《呂氏春秋·適威》篇云

「湯武通於此論，故功名立」，高誘注云：「立猶見也。」《淮南子·主術訓》云「德無所立」，高誘注云：「立，見也。」趙氏注《孟子》，訓詁多與高氏同。蓋見之義爲顯，不得志不可云顯，故解爲立也。按：《說文》云：「見，視也。」視即示，修身以示於世，亦所以教也。伯夷、柳下惠爲百世師，非示於世乎？

章指：言內定常滿，鬱鬱無憂。可出可處，故云以「遊」。脩身立世，賤不失道；達善天下，乃用其寶。句踐好遊，未得其要，孟子言之，然後乃喻。^①

孟子曰：「待文王而後興者，凡民也。若夫豪傑之士，雖無文王，猶興。」**注**凡民，無自知者也，故須文王之大化，乃能自興起以趨善道。

若夫豪傑，才知千萬於凡人者，雖不遭文王，猶能自起，以善守身正行，不陷溺也。**疏**注「凡民」至「溺也」

○正義曰：宋本、孔本作「無異知者也」，閩、監、毛三本作「自知」。按：「自知」是也。不能自知，故必待文王之化而興起也。王氏念孫《廣雅疏證》云：「伋，輕也。伋之言汎也。《方言》：「伋，儻輕也。楚凡相輕薄謂之相伋或謂之儻也。」《孟子》「待文王而後興者，凡民也」，凡亦與汎通。」按：

《說文》云：「凡，最括也。」《呂氏春秋·任地》篇云「凡草生藏」，高誘注云：「凡草，庶草也。」以此準之，則「凡民」猶云「庶民」。趙氏前以「庶」解「衆」，又以「凡夫」解之，此不解釋凡字，蓋以爲庶民也。「最括」亦衆數之稱，故凡又訓皆。鄭氏注《儀禮》以爲「非一」，注《周禮》以爲「無常數」。凡通於汎，汎亦有衆義。因汎之本訓爲浮，浮則輕，故伋儻猶汎漂也。還以汎汎之輕浮通凡之義，亦爲輕浮，則緣其爲衆庶而輕微之，又引申之義耳。惟「凡民」是衆民無常數之稱，而才過千人爲豪，萬人爲傑，則有常數，故趙氏云「豪傑才知千萬於凡人」。豪傑千萬於凡人，是凡即此千人萬人之總稱矣。

① 「後」，原誤作「得」，今從沈校據廖本改。

趙氏訓釋字義每於互見之，可謂精矣。《呂氏春秋·孟秋紀》高誘注云：「才過萬人曰桀。」《鵲冠子·能天篇》云：「德千人者謂之豪。」故云千萬於凡民。《爾雅·釋言》云：「興，起也。」興於善為興，興於不善亦為興。《呂氏春秋·義賞篇》云：「姦偽雜亂貪戾之道興。」是也。故趙氏以「起」釋「興」。一則云「趨善道」，再則云「以善守身正行，不陷溺」，蓋有所作而行為興，有所守而不行亦為興也。

章指：言小人待化，乃不辟邪；君子特立，不為俗移。故稱「豪傑自興」也。疏

「乃不辟邪」○正義曰：周氏廣業《孟子章指考證》云：

「孔、韓本作『邪辟』。《左傳》子產曰：『辟邪之人而皆及執政。』」

孟子曰：「附之以韓魏之家，如其自視欽然，則過人遠矣。」注附，益也。韓魏，晉六卿之富者也。言人既自有家，復益韓魏百乘之家，其富貴已美矣。而其人欽然不以足，自知仁義之道不足也，此則過人甚遠矣。疏注「附益」至「遠矣」○正義

曰：《漢書·諸侯王表》云「設附益之法」，張晏注引《律》鄭

氏說云：「封諸侯過限曰附益。」故趙氏以「益」釋「附」也。以益釋附，益為增益，故云「人自有家，復益以韓魏百乘之家」也。百乘之家，益之自外，仁義之道，根之於心。但視外所附，則見其富貴，自視其中之所有，故欽然知不足也。自知由於「自視」，自視仁義之心，不移於富貴，益於外不能益於中也。段氏玉裁《說文解字注》云：「欽，欲得也。從欠，色聲。聲若貪。《孟子》：『附之以韓魏之家，如其自視欽然。』張鎰曰：『欽，音坎，內顧不足而有所欲也。』玉裁按，《孟子》假欽為坎，謂視盈若虛也。《大玄》『雷推欽寧』，即坎寤也。今本《大玄》欽字譌不可識。」《晏子春秋·問下》云「蹇然不滿」，孫氏星衍《音義》云：「《玉篇》『蹇，丑甚切』。此當為欽然之假音。」

章指：言人情富盛，莫不驕矜。若能欽然，謂不如人，非但免過，卓絕乎凡也。

疏「人情富盛莫不驕矜」○正義曰：《老子》云：「富貴而驕，自遺其咎。」定公十三年《左傳》史鮪云：「富而不驕者鮮。」《晏子春秋·雜下》云：「富而不驕者，未嘗聞之。」

孟子曰：「以佚道使民，雖勞不怨；**注**謂

教民趨農，役有常時，不使失業。當時雖勞，後獲其利，則佚矣，若「亟其乘屋」之類也，故曰「不怨」。**疏**

注：「若亟其乘屋之類」○正義曰：詳見《滕文公上》篇。趙氏彼注云：「言農民之事無休息。」故引爲勞之證。以生道

殺民，雖死不怨殺者。」**注**謂殺大辟之罪者，以坐

殺人故也。殺此罪人者，其意欲生民也。故雖伏罪而死，不怨殺者。**疏**注「謂殺」至「故也」○正義曰：《禮

記·文王世子》云：「其死罪，則曰某之罪在大辟。」《書·呂

刑》云：「大辟疑赦，其罰千鍰，閱實其罪。」徐氏文靖《管城碩記》云：「犯法者事有可疑則赦之，而又不徑赦之也，罰之以示懲。若乃簡閱其情，實無可疑者，其罪之。實與疑對，

罪與赦對。實則不疑，罪則不赦也。大辟之法亦然。疑則赦之使贖，實則罪之不赦也。豈謂贖之以金，雖大辟亦許其贖免哉？是大辟之罪，閱實則殺之也。」《周禮·秋官·司

刑》掌五刑之法，殺罪五百，注云：「殺，死刑也。」《書傳》曰：「降畔寇賊，刼略奪攘，擄虐者其刑死。」然則大辟之罪

不止坐殺人，趙氏略舉之耳。《荀子·正論》篇云：「殺人者不死，傷人者不刑，是謂惠暴而寬賊也。」又云：「殺人者死，

傷人者刑，百王之所同也。」

章指：言勞人欲以佚之，殺人欲以生之，則民無怨讟也。**疏**「則民無怨讟也」○正義

曰：《方言》云：「讟，謗也。」宣公十一年《左傳》云：「君無怨讟。」昭公元年《左傳》云：「民無謗讟。」《說文》言部云：「讟，痛怨也。」

孟子曰：「霸者之民，驩虞如也；王者之

民，皞皞如也。殺之而不怨，利之而不庸，民日遷善而不知爲之者。」**注**霸者行善恤民，恩澤

暴見易知，故民驩虞樂之也；王者道大法天，浩浩而德難見也。殺非不教，故殺之人不怨也。庸，功也。利之使趨時而農，六畜繁息，無凍餒之老，而民不知猶是王者之功。脩其庠序之教，使日遷善，亦不能覺知誰爲之者。言化大也。**疏**注「霸者」至「之

也」○正義曰：《音義》云：「驩虞，丁云：「義當作歡娛，古字通用耳。」翟氏灝《攷異》云：「《文選》張景陽《詠史詩》：「朝野多歡娛」，注引《孟子》：「霸者之民，驩虞如也」，云娛與虞古

字通用。又蘇子卿詩「歡娛在今夕」，注云：「《孟子》：『霸者之民，歡娛如也。』」按，《漢書·魏相傳》：「君安虞而民和睦」，《匡衡傳》：「未有游虞弋射之宴」，虞悉通娛。」按：《說文》女部云：「娛，樂也。」虞爲假借字，故《白虎通·號篇》云：「虞者，樂也。」《說文》欠部云：「歡，喜樂也。」馬部云：「驩，馬名。」驩亦假借字。《荀子·大略篇》云：「夫婦不得不驩」，《一切經音義》引《三蒼》云：「驩，古歡字。」驩虞即歡娛，故趙氏云「樂之」也。○注「王者」至「見也」○正義曰：《音義》云：「張云：『皞與昊同。』」《說文》胡老切，義與浩同，古字通用。趙氏讀皞皞爲浩浩，《說文》日部云：「皞，皓盱也。」齊部云：「昊，春爲昊天，元氣昊昊。」皓盱即浩浩瀚瀚，《淮南子·俶真訓》高誘注云：「浩浩瀚瀚，廣大貌也。」《詩·王風·黍離》傳云：「元氣廣大，則稱昊天。」浩、昊、皓、皞古字皆通。蓋水之廣大爲浩浩，天之廣大則爲皞皞，故趙氏以「道大法天」解之，則仍以「皞皞」爲元氣廣大，以「浩浩」明之耳。天氣廣大，故難見；王者道大法天，其廣大故亦難見。所以廣大難見，則下申言之。○注「庸功也」○正義曰：《周禮·夏官·司勳》云：「民功曰庸。」夫君子所過者化，所存者神，上下與天地同流，豈曰

小補之哉？」**注**君子通於聖人。聖人如天，過此世能化之，存在此國，其化如神，故言與天地同流也。天地化物，歲成其功，豈曰使成人知其小補益也？**疏**注「君子」至「益也」○正義曰：君子爲聖賢之通稱，故云「通於聖人」。《法言·道術篇》云：「樂道者謂之君子。」《禮記·哀公問》云：「君子者，人之成名也。」《易·上繫傳》云：「是故君子所居而安者」，虞翻注云：「君子謂文王。」是也。隱公六年《公羊傳》云：「首時過則書」，何休注云：「過，歷也。」「過此世」謂生於此世也，「存在此國」，以「在」釋「存」也。過以世，言別生死也，存以國，言判彼此也。如堯舜生唐虞，則唐虞之民皆化，孔子在魯國，則魯國三月大治。「成人」詳見前，閔、監、毛三本無成字。《音義》云：「陸云：『言君子所過人者在於政化，存其身者在於神明。』」此與趙氏義異。按：《易·序卦傳》云：「不養則不可動，故受之以大過；有其信者必行之，故受之以小過。」過之義爲動爲行，「所過者化」猶云所行者化也，所動者化也。行動著於外，存者運於中。所行動者，民即變化，由於所存者神也。民日遷善爲化，不知爲之者，則神也。《易·下繫傳》云：「黃帝堯舜氏作，通其變，使民不倦；神而化之，使民宜

之。」所過者化，所存者神，神而化之也。能通其變爲權，霸者亦知乘時運用以得人心，而遠乎聖人之道者，未能神而化也。「大而化之之謂聖，聖而不可知之之謂神」。神化者，通其變而民不知也。殺之，威刑也；利之，善政也。惟聖人有所裁成輔相於威刑善政之中，即有所盈虛消息於威刑善政之外，此全繫乎一心之運用。所謂「脩己以敬」，所謂「篤恭而天下平」，所謂「爲政以德」，所謂「無爲而治，恭己正南面」，所謂「執其兩端，用其中於民」，所謂「惟天爲大，惟堯則之，蕩蕩乎民無能名焉」，皆以言乎「所存者神」也。威刑善政，則所行所動也；民日遷善，化也。「不怨」「不庸」，由所存者神而不知爲之也。所過有定而所存無定。夫行而無定者，水流也，故云「與天地同流」。天地變化，人不可知，聖人成天地之能，人亦不可知。不可知，故不可使知之；民日遷善，則可使由之也。《說文》衣部云：「補，完衣也。」「完，全也。」衣有不全，補全之則必有所增益，故「補」之義爲「益」。《荀子·臣道》篇云「事暴君者有補，削無撓拂」，楊倞注云：「補謂彌縫其闕。」僖公二十六年《左傳》展喜對齊侯曰：「桓公是以糾合諸侯而謀其不協，彌縫其闕而匡救其災。」然則「小補」謂霸者之民所由驩虞也。有闕則望補者切，有災則思救者殷，而彌縫之匡救之，恩澤暴見，民所以樂

也。王者裁成輔相，則不待其闕而先默運之，不使有闕，不待其災而豫防禦之，不使有災。此所以「神」，所以「不知」。且補闕者，益於此或損乎彼，支於左或詘於右，一利輿而一害即由此起，故爲「小補」；王者之治，德施於普，變化於微，天下受其福而無能名，誠如天之元氣，皞皞而無已也。《荀子·議兵》篇云：「仁人之兵，所存者神，所過者化。」楊倞注云：「所存止之處，畏之如神；所過往之國，無不從化。」此別一義，與《孟子》語同而指異。

章指：言王政皞皞，與天地同道，霸者德小，民人速覩。是以賢者志其大者也。

孟子曰：「仁言不如仁聲之入人深也，

注仁言，政教法度之言也；仁聲，樂聲雅頌也。仁

言之政雖明，不如雅頌感人心之深也。**疏**注「仁言政

教法度之言也」○正義曰：《詩·小雅·彤弓》「受言藏之」，

箋云：「言者謂王策命也。」《禮記·曲禮》「士載言」，注云：

「言謂會同盟要之辭。」是國家命令謂之言，故以「仁言」爲

「政教法度之言」。《章指》云：「明法審令，民趨君命。」以「令」「命」申釋「言」字。法即法度，謂以法度載之於言以示民，使民趨於善，是爲仁也。○注「仁聲」至「深也」○正義曰：《說文》耳部云：「聲，音也。」《禮記·月令》「去聲色」，注云：「聲謂樂也。」《呂氏春秋》高誘注此語云：「聲，五聲也。宮商角徵羽爲五聲。」故以「聲」爲「樂聲」。《樂記》云：「樂也者，聖人之所樂也，而可以善民心。其感人深，其移風易俗，故先王著其教焉。」又云：「先王耻其亂，故制雅頌之聲以道之，使其聲足樂而不流，使其文足論而不息，使其曲直繁瘠，廉肉節奏，足以感動人之善心而已矣。」雅頌之聲能深感人心，是「仁聲」也。善政不如善教之得民也。

注善政使民不違上，善教使民尚仁義。心易得也。

疏注「善政」至「得也」○正義曰：趙氏以「仁言」爲「政教法度之言」，然則此又於「仁言」中分別其政不如教也。下申言所以不如。善政，民畏之；善教，民愛之。善政得民財，善教得民心。○**注**畏之，不遁怠，故賦役舉而財聚於一家也；愛之，樂風化而上下親，故歡心可得也。

章指：言明法審令，民趨君命，崇寬

務化，民愛君德。故曰：移風易俗，莫善於樂。

孟子曰：「人之所不學而能者，其良能也；所不慮而知者，其良知也。」**注**不學而能，性所自能。良，甚也。是人之所能甚也。知亦猶是能也。

疏注「不學」至「能也」○正義曰：「良甚」之義詳見《告子上》篇，「良能」猶言「甚能」，「良知」猶言「甚知」。甚能，甚知即最能、最知，最能、最知即知之最、能之最也。孩提之童無不知愛其親者，及其長也，無不知敬其兄也。

注孩提，二三歲之間，在襁褓知孩笑可提抱者也。少知愛親，長知敬兄，此所謂「良能」「良知」也。

疏注「孩提」至「抱者也」○正義曰：《說文》口部云：「咳，小兒笑也。孩，古文咳。」是孩爲笑也。《說文》手部云：「提，挈也。」挈，縣持也。《淮南子·俶真訓》云「提挈天地」，高誘注云：「一手曰提。」劉熙《釋名·釋姿容》云：「提，地也。臂垂所持近地也。」《禮記·曲禮》「長者與之提攜」，注云：「提攜將行。」趙氏以二三歲之童未可牽行

而提挈，故以「抱」解之。《說文》抱作褓，在衣部，云：「褓，裏也。」《論語·陽貨》篇「然後免於父母之懷」，《集解》引馬氏注云：「子生未三歲，為父母所懷抱也。」是一二歲之兒宜抱也。《國策·秦策》云：「是抱空質也」，高誘注云：「抱，持也。」然則持可通稱為抱，則「抱」亦可通稱為「提」。《音義》云：「襁褓，《說文》：『負兒衣也。』《博物志》曰：『織縷為之，廣八寸，長一尺二寸，以負小兒於背上。』《聲類》曰：『襁者，小兒被子也。』」按：《論語·子路》篇云「襁負其子而至矣」，《集解》引包氏云：「負者以器曰襁。」《說文》系部別有縵字，云：「棼類也。」「縵，小兒衣也。」段氏玉裁《說文解字注》云：「《呂覽·明理》篇『道多縵縵』，高注：『縵，小兒被也。縵，褸格上繩也。』又《直諫》篇『縵縵』，注云：『縵，褸格繩。縵，小兒褸也。』褸即縵，格即絡，織縷為絡以負之於背，其繩謂之縵。高說最分明。《博物志》云：『織縷為之，廣八寸，長二尺。』乃謂其絡，未及其繩也。凡繩韌者謂之縵。」又衣部云：「褸，縵也。《詩》曰：『載衣之褸。』」段氏玉裁注云：「《小雅·斯干》曰『載衣之楊』，傳曰：『楊，縵也。』此謂楊即褸之假借也。」又以衣部縵字為後人所增，若許氏本有此字，當與褸字相屬。謹按：今《毛詩》傳作褸，箋云：「褸，夜衣也。」《釋文》云：「《韓詩》作褸，齊人名小兒被為褸。」孔氏正

義云：「《書傳》說成王之幼，云『在襁褓』，褓，縛兒被也。故箋以為『夜衣』。」《史記·魯世家》云「成王少在強葆之中」，《索隱》云：「強葆即襁褓。古字少，假借用之。」正義云：「強，闊八寸，長八尺，用約小兒於背而負行。葆，小兒被也。」《漢書·宣帝紀》「曾孫雖在襁褓」，李奇云：「襁，絡也。以繒布為之，絡負小兒。褓，小兒大藉也。」孟康曰：「縵，小兒被也。」顏師古《匡謬正俗》云：「藏縵謂繩貫錢，故總謂之縵耳。孔子云：『四方之人縵負其子而至。』謂以繩絡而負之，故謂縵褓耳。」然則褓為小兒被名，縵為繩名。褓不必負，《趙世家》云「衣以文葆」是也。縵不必褓，①《論語》「縵負其子」是也。縵可用繩，亦可用繒布；褓可藉於下，亦可覆於上。藉則李奇云「大藉」是也，覆則《禮記·月令》「正義云『保即縵保。保謂小被，所以衣覆小兒』」是也。《文選》嵇康《幽憤詩》注引韋昭云：「縵若今時小兒腹衣。」腹衣蓋今俗「兜子」是也，亦被之類而稍別焉者也。被為夜間所藉覆，故亦云「夜衣」。《說文》以縵為「小兒衣」，以褓為「負兒衣」，與縵字為「棼類」者別。古者衣被通稱織縷，廣八寸長二尺亦被形，其旁有繩以便負，故云負兒衣，與縵字專為「棼類」

①「縵」，原作「縵」，今據文義改。下句「縵可」字同。

者不同。段氏謂襁字非許氏原有，恐未然矣。段氏謂《博物志》但言織縷，未及其繩，余謂段氏直以繩爲縷而未及其縷絡。縷從糸，專爲繩名；襁從衣，則合織縷與繩而爲負兒衣之名也。親親，仁也；敬長，義也。無他，達之天下也。」**注**人仁義之心，少而皆有之。欲爲善者無他，達，通也，但通此親親、敬長之心，推之天下人而已。

疏注「人仁」至「人而已」○正義曰：《呂氏春秋·

重己》篇云「理塞則氣不達」，高誘注云：「達，通也。」孟子前言衆庶終身由之而不知其道，民日遷善而不知爲之，此則言所知也。所不知者道，所無不知者愛親、敬長，聖人因其有此知，故以仁義之道達之天下。所以以仁義之道達之天下者，以「親親仁也，敬長義也」。孩提之童無不知愛其親，則仁可達矣；及其長也，無不知敬其兄，則義可達矣。有此親親敬長之心者，性善也。通此親親敬長之心，推之天下人者，聖人之盡心也。自聖人盡其心，爲天下立命，其智者益知之，其衆庶雖不能知之而亦可由之矣。此一章仍申明「知性知天」之旨也。孫氏星衍《原性篇》云：「何以言「性待教而爲善」？《易》言天道陰陽，地道柔剛，人道仁義。后以裁成輔相左右民。《禮記》言盡人物之性，與天地參。《書》言

剛克柔克正直。剛屬性，柔屬情，平康之者教也。《禮記》謂天命謂性，率性謂道，脩道謂教。教者何？性有善而教之以止於至善，故《禮記》之言「明德」也，曰「新民」，曰「止至善」。止者，如文王止於仁敬孝慈信，即性中之五常，必教而能之，學而知之也。孟子以孩提之童愛其親、敬其長是也。然童而愛其親非能愛親，慈母乳之而愛移，敬其長非能敬長，嚴師扑之而敬移。然則良知良能不足恃，必教學成而後真知愛親敬長也。故董仲舒之言「性待教爲善」是也。」謹按：孟子言良能爲不學而能，良知爲不慮而知。其言孩提之童無不「知」愛其親，則不言無不「能」愛其親也，其言及其長也無不「知」敬其兄，則不言無不「能」敬其兄也。蓋不慮而知，性之善也，人人所然也；不學而能，惟生知安行者有之，不可概之人人。知愛其親，性之仁也，而不可謂能仁也；知敬其兄，性之義也，而不可謂能義也。曰親親，則能愛其親矣，仁矣，故曰親親仁也；曰敬長，則能敬其兄矣，義矣，故曰敬長義也。何以由知而能也？何以由無不知而無不能也？無他，有達之者也。聖人通神明之德，類萬物之情，而達之天下也。

章指：言本性良能，仁義是也。達之

天下，恕乎已也。

孟子曰：「舜之居深山之中，與木石居，與鹿豕遊，其所以異於深山之野人者幾希。

注舜耕歷山之時，居木石之間。鹿豕近人，若與人遊也。希，遠也。當此之時，舜與野人相去豈遠哉？及其聞一善言，見一善行，若決江河，沛然莫之能禦也。」**注**舜雖外與野人同其居處，聞一善言則從之，見一善行則識之，沛然不疑，辟若江河之流，無能禦止其所欲行。**疏**注「沛然」至「欲行」○正義曰：《孟子》三言「沛然」：《梁惠王上》篇「沛然下雨」，此言大雨潤物，故趙氏以「潤」釋之。《離婁上》篇「沛然德教溢乎四海」，此言德教滿溢，故趙氏以「大」釋之。此言「沛然莫之能禦」，謂舜舍己從人，取人爲善，有所聞見即取而行之，故趙氏以「行」釋之。《楚辭·湘君》篇「沛吾乘兮桂舟」，王逸注云：「沛，行貌。」《文選·吳都賦》「常沛沛以悠悠」，劉逵注云：「沛沛，行貌。」《廣雅·釋訓》云：「沛沛，流也。」《一切經音義》引《三蒼》云：「沛，水波流也。」流之義亦同於

行。此「沛然」上承「若決江河」，是爲水流，即爲水行。以水之行狀舜之行而云「沛然不疑」者，不疑，能決也。承上「若決」之決，江河決則莫能禦止其行，舜決亦莫能禦止其行。趙氏解經精密如此。

章指：言聖人潛隱，辟若神龍。亦能飛天，亦能小同。舜之謂也。**疏**「聖人」至「小

同」○正義曰：周氏廣業《孟子章指攷證》云：「揚子《法言》：『或曰：龍必欲飛天乎？』曰：時飛則飛，時潛則潛。班固《賓戲》：『泥蟠而天飛者，應龍之神也。』又《關尹子》云：『若龍，若蛟，若龜，若魚，若蛤，龍皆能爲之。』所謂小同也。」

孟子曰：「無爲其所不爲，無欲其所不欲，如此而已矣。」**注**無使人爲己所不欲爲者，無使人欲己之所不欲者。每以身況之如此，則人道足也。**疏**注「無使」至「足也」○正義曰：《詩·王風·揚之水》「彼其之子」，箋云：「其或作記，或作已，讀聲相似。」《鄭風·羔裘》「彼其之子」，《韓詩外傳》作「彼己之子」。《曹風·候人》「彼其之子」，《國語·晉語》作「彼己之子」。是其

與己字通，故趙氏以「其所不欲」爲「己所不欲」也。《荀子·儒效》篇云：「貴名不可以比周爭也，不可以夸誕有也，不可以執重有也，必將誠此然後就也。故君子務積德於身而處之以遵道。」積德於身即是「誠此」，故楊氏注云：「此，身也。」趙氏云「每以身況之如此」，亦以「身」字釋「此」字。如此即是如身，如身即是如己，故云「無使人爲己所不欲爲者，無使人欲己之所不欲者」也。

章指：言「己所不欲，勿施於人」，仲尼之道也。

孟子曰：「人之有德慧術知者，恒存乎疾疾。」**注**人所以有德行智慧道術才智者，在於有疾疾之人。疾疾之人又力學，故能成德。**疏**注「人

所」至「成德」○正義曰：《周禮·地官·師氏》「以三德教國子」，注云：「德行，內外之稱。在心爲德，施之爲行。」《論衡·書說》篇云「實行爲德」。德行並舉義有別，單舉德亦是行，故以「行」釋「德」也。《方言》云：「知或謂之慧。」《禮記·樂記》「不接心術」，注云：「術猶道也。」《賈子·道術》篇云：「道者，所從接物也。其末者謂之術。」又云：「術也

者，所從制物也，動靜之數也。」《墨子·經上》篇云：「知，材也。」《老子》云「絕聖棄知」，王弼注云：「聖智，才之善也。」《淮南子·主術訓》云「任人之才，難以至治」，高誘注云：「才，智也。」蓋「德慧」縕於內，「術智」見於外，故以「智」釋「慧」，又以「才」釋「智」。慧爲心之明，才則用之當矣。慧、術、知皆本於德，故以「成德」包之。《詩·小雅·小弁》「心之憂矣，疢如疾首」，箋云：「疢猶病也。」《釋文》云：「疢本作疹。」下言「孤臣孽子」，此云「疾疾」，蓋即本於《小弁》之稱「疾疾」也。獨孤臣孽子，其操心也危，其慮患也深，故達。**注**此即人之疾疾也。自以孤微，懼於危殆之患而深慮之，勉爲仁義，故至於達也。**疏**

注「自」至「達也」○正義曰：襄公二十七年《公羊傳》云「是則臣僕庶孽之事也」，何休注云：「庶孽，衆賤子，猶樹之有孽生。」此以「衆」釋「庶」，以「賤」釋「孽」。《華嚴經音義》引王肅《尚書注》云：「微，賤也。」趙氏言「自以孤微」，孤謂「孤臣」，微謂「孽子」也。《說文》夕部云：「殆，危也。」危部云：「危，在高而懼也。」《淮南子·說林訓》云「而殆於蚬蛆」，高誘注云：「殆猶畏也。」《國策·西周策》云「竊爲君危之」，高誘注云：「危，不安也。」有所畏懼，故心不能安。趙

氏以「殆」釋「危」，又以「懼」釋之，其義備矣。在高而懼者，畏其傾敗也。《呂氏春秋·壹行》篇云「强大行之危」，高誘注云：「危，傾隕也。」《驕恣》篇云「不知化者舉自危」，高誘注云：「危，敗也。」《廣雅·釋詁》云：「殆，壞也。」傾隕敗壞，所以可患，因而慮之，且「深慮之」，求所以避此患而免此危者，惟有「勉爲仁義」而已矣。《書·堯典》云：「明四目，達四聰。」通達則明顯，故《章指》以「顯」釋「達」，謂以忠孝之名顯於天下後世也。

章指：言孤孳自危，故能顯達；膏粱難正，多用沈溺。是故在上不驕，以戒諸侯也。

孟子曰：「有事君人者，事是君則爲容悅者也；**注**事君，求君之意，爲苟容以悅君而已。」

疏注「事君」至「君而已」○正義曰：《呂氏春秋·似順》篇云「夫順令而取容者，衆能之」，高誘注云：「容，悅也。」容、悅二字同義相疊爲雙聲。《毛詩·曹風》「蜉蝣掘閱」，傳云：「掘閱，容閱也。」《邶風·谷風》「我躬不閱」，傳云：

「閱，容也。」容閱即容悅。《後漢書·陳蕃傳》上疏云：「臣聞有事社稷者，社稷是爲；有事人君者，容悅是爲。」亦「容悅」二字連綴。趙氏分言之，以「悅君」明「苟容」，亦以「悅」釋「容」。有安社稷臣者，以安社稷爲悅者也；

注忠臣志在安社稷而後悅也。有天民者，達可行於天下而後行之者也；**注**天民，知道者也。可行而行，可止而止。**疏**注「天民」至「而止」○正義

曰：孟子引伊尹自稱「我，天民之先覺者也」，則天民指伊尹、太公一流矣。《莊子·庚桑楚》云：「人之所舍，謂之天民；天之所助，謂之天子。」郭象注云：「出則天子，處則天民，此二者皆以泰然而自得之，非爲而得之也。」《列子·楊朱》篇稱舜禹周公爲天民，稱孔子爲天民之遯遽者，稱桀爲天民之逸蕩者，紂爲天民之放縱者。當時稱「天民」者別有異說，故孟子明之。有大人者，正己而物正者也。**注**大人，大丈夫，不爲利害動移者也。正己物正，象天不言而萬物化成也。**疏**注「大人」至「成也」

①「言」上，原衍「可」字，今據廖本及疏文所引刪。

○正義曰：大人之稱有二，《論語·季氏》篇云「畏大人」，《儀禮·士相見》疏引鄭氏云：「大人爲天子諸侯爲政教者。」何晏《論語注》云：「即『聖人與天地合其德』者也。」昭公十八年《左傳》：「葬曹平公。往者見周原伯魯焉，與之語，不說學。歸以語閔子馬。閔子馬曰：『夫必多有是說，而後及其大人。大人患失而惑，又曰：『可以無學，無學不害。』」此大人指原伯魯，故注云：「大人，在位者。」《管子·幼官》篇云：「民之所利立之，所害除之，則民人從，立爲六千里之侯，則大人從。」尹知章注云：「大人謂天子三公四輔。」此鄭氏之義也。《易》稱「利見大人」，「大人虎變」，虞翻謂「乾稱大人」，此何氏之義也。《孟子·離婁下》篇兩云「大人」。其一，「言不必信，行不必果，惟義所在」，趙氏云「大人杖義」，是以德言也；其一，「不失其赤子之心」，趙氏云「大人謂君」，是以位言也。此注以「大丈夫」解之，大丈夫得志與民由之，不得志獨行其道，亦不以位言。乃下云「象天不言而萬物化成」，此則非不得志者。《史記索隱》引向秀注《易·乾》卦云：「聖人在位，謂之大人。」此解《易》之言大人是也，而孟子之言「大人」蓋即謂此。孟子深於《易》，此「大人」即舉《易》之「大人」而解之也。「正己物正」，「篤恭而天下平」也。惟黃帝堯舜通變神化乃足以當之，故又進於天民一等也。

章指：言容悅凡臣，社稷股肱，天民行道，大人正身。凡此四科，優劣之差。

疏

「凡此四科」○正義曰：《說文》禾部云：「科，程也。從禾，從斗。斗者，量也。」程，品也。十髮爲程，十程爲分，十分爲寸。有優劣之差，則有品次，故謂之科。周氏廣業《孟子章指攷證》云：「《公羊傳疏》『《春秋》設三科，科者，段也。』」

孟子曰：「君子有三樂，而王天下不與存焉。父母俱存，兄弟無故，一樂也；仰不愧於天，俯不忤於人，二樂也；得天下英才而教育之，三樂也。」注天下之樂，不得與此三樂之中。兄弟無故，無他故。不愧天又不忤人，心正無邪也。育，養也。教養英才，成之以道。皆樂也。

疏注「兄弟無故無他故」○正義曰：《儀禮·士昏禮記》云

「某以非他故，不足以辱命」，注云：「非他故，彌親之辭。」

《覲禮》云「天子曰：非他，伯父實來，予一人嘉之」，注云：

「言非他者，親之辭。」《詩·小雅·頍弁》云「豈伊異人，兄弟

匪他」，箋云：「此言王當所與宴者，豈有異人疏遠者乎？皆兄弟，與王無他，言至親。」趙氏以「無他故」解「無故」，謂兄弟相親好也。○注「育養」至「以道」○正義曰：《說文》：「部云：『育，養子使作善也。』《虞書》曰：『教育子。』」是育爲養也。閻氏若璩《釋地三續》云：「天下英才，極言之，非廣言之。猶施伯謂管子曰『天下才』，司馬懿謂諸葛武侯曰『天下奇才也』云爾。」君子有三樂，而王天下不與存焉。」**注**孟子重言是，美之也。

章指：言保親之養，兄弟無他，誠不愧天，育養英才。賢人能之，樂過萬乘；孟子重焉，一章再云也。**疏**「一章再云也」○正

義曰：周氏廣業云：「董子《繁露》孔子曰：『書之重，辭之復，不可不察也，其中必有美者焉。』此即「一章再云」之義也。《左傳》范獻子曰「天子實云」，^①襄二十三年《傳》「季孫再三云」。」

孟子曰：「廣土衆民，君子欲之，所樂不存焉；中天下而立，定四海之民，君子樂

之，所性不存焉。」**注**廣土衆民，大國諸侯也。

所樂不存，樂行禮也。中天下而立謂王者。所性不存，謂性仁義也。**疏**注「樂行禮也」○正義曰：《禮

記·樂記》云：「揖讓而治天下者，禮樂之謂也。暴民不作，諸侯賓服，兵革不試，五刑不用，百姓無患，天子不怒，如此則樂達矣；合父子之親，明長幼之序，以敬四海之內，天子如此，則禮行矣。」又云：「王者功成作樂，治定制禮。」《中庸》云：「非天子不議，禮不制度，不考文。」是行禮者天子之事。君子不以大國諸侯爲樂，而樂於中天下而立，中天下而立是王者，故知所樂爲「行禮」也。《禮運》云：「禮行於郊而百神受職焉，禮行於社，而百貨可極焉，禮行於祖廟而孝慈服焉，禮行於五祀而正法則焉。」亦王者行禮之謂也。君子所性，雖大行不加焉，雖窮居不損焉，分定故也。**注**大行，行政於天下。窮居不失性也。分定，故不變。**疏**注「大行」至「不變」○正義曰：「大行」即所謂「武王、周公繼之，然後大行」也。《易·序卦傳》云：「緩必有所失，故受之以

①「天」，原誤作「夫」，今據《左傳》昭公三十二年改。

損。」故以「不失」解「不損」。《音義》云：「分，扶問切。」《禮記·禮運》云：「故禮達而分定。」《荀子·王制》篇云：「分均則不偏。」分者，蓋所受分於道之命也。既分得人之性，自有人所當爲之職分，自有人所不易之分，主是爲分也，故謂之「分定」。君子所性，仁義禮智根於心，其生色也睍然見於面，盎於背，施於四體，四體不言而喻。」**注**四者根生於心，色見於面。睍然，潤澤之貌也。盎，視其背而可知其背盎盎然盛。流於四體，四體有匡國之綱。口不言，人以曉喻而知之也。**疏**注「四者」至「知之也」○正義

曰：毛氏奇齡《四書臆言補》云：「《孟子》『仁義禮智根於心』，亦謂根之於心，猶言『本諸身』，非謂作心之根也。『根於心』猶下云『盎於背』。若云仁義禮智作背之盎，則亦無是理。」按：趙氏言「根生於心」，是以「生於心」解「根於心」。《廣雅·釋詁》云：「根，始也。」《荀子·禮論》篇云：「生者人之始也。」趙氏注《離婁下》篇「舜生於諸馮」亦云：「生，始也。」生與根同有始義，故以「生」釋「根」。段氏玉裁《說文解字注》云：「色，顏氣也。顏者，兩眉之間也。心達於氣，氣達於眉間，是之謂色。顏氣與心若合

符節，故其字從人卩。《記》曰：「孝子之有深愛者必有和氣，有和氣者必有愉色，有愉色者必有婉容。」又曰「戎容，盛氣顛實揚休，玉色」。孟子曰：「仁義禮智根於心，其生色也睍然見於面。」生色而後見於面，所謂「陽氣浸淫，幾滿大宅」，許曰「面，顏前也」是也。《魯頌》「載色載笑」，傳曰：「色，色溫潤也。」《大雅》「令儀令色」，箋云：「善威儀善顏色也。」《內則》云「柔色以溫之」，《玉藻》云「色容莊」、「色容顛顛」、「色容厲肅」，《論語》曰「色難」、「色思溫」、「色勃如也」、「正顏色」。引申之，爲凡有形可見之稱。《音義》云：「睍，音粹。」《華嚴經音義》引《孟子》注云：「睍，面色潤也。」未知何人注，與趙氏略同。睍字，《孟子》外，《法言》、《大玄經》有之。《法言·君子》篇云：「牛玄睍白，睍而角，其升諸廟乎？是以君子全德。」注云：「色純曰睍。宋咸曰：『宗廟之牛貴純毛，如黑赤白三色各純粹而角握中禮，則可升諸廟矣。所以君子亦貴純全其德。』」然則睍即粹。《淮南·時則訓》云「視肥臞全粹」，高誘注云：「粹，毛色之純也。」《法言》之睍即《時則》之粹矣。其《君子》篇又云：「或問君子似玉，曰純淪溫潤。」吳秘注云：「淪猶澤也。」「純淪溫潤」四字連言。趙氏蓋本此以「睍」爲「純」，又以「純淪」即「溫潤」，故以

「睟然」爲「潤澤之貌」。《大玄經》以睟準《乾》，故《玄衝》云：「睟，君道也。」即取《文言傳》「純粹精」之義。《論語·八佾》篇云「從之純如也」，鄭氏注云：「純如，感人之貌。」何氏注云：「純如，和諧也。」《荀子·禮論》篇云「故說豫婉澤，發於顏色者也」，楊倞注云：「說讀爲悅。豫，樂也。婉，媚也。澤，顏色潤澤也。」豫樂猶和諧，婉澤即潤澤。凡憂戚則憔悴，豫樂則光澤，是和諧與潤澤義亦可通矣。《玉篇》目部云：「睟，思季切，視也。又潤澤貌，孟子曰：『其色睟然。』」周氏廣業《孟子逸文攷》云：「此『睟然』當連上讀。」按：趙氏云「色見於面」，固以「睟然」屬「色」。讀「其生色也睟然」句可也。《音義》云：「盞，張鳥曩切，又鳥浪切。陸云：『盞於背，如負之於背。』」按：《爾雅·釋器》云：「盞謂之缶。」《說文》皿部云：「盞，盆也。」此陸氏所以言「如負之於背」。然如盆缶之器負之於背，何以見仁義禮智之盛？《莊子·德充符》言甕竈大癩說齊桓公，陸其謂是乎？竈即盞字。《周禮·天官·酒正》「辨五齊之名，三曰盞齊」，注云：「盞猶翁也。成而翁翁然蔥白色。」劉熙《釋名·釋飲食》云：「盞齊，盞，滄也。滄滄然濁色也。」《說文》水部云：「決，滄也。」襄公二十九年《左傳》：「吳季札來聘，爲之歌《齊》，曰：『美哉，決決

乎大風也哉！』」注云：「決決，宏大之聲。」《史記·吳世家》載此，裴駰《集解》引服虔云：「決決，舒緩深遠，有大和之意。」《索隱》云：「決決猶汪洋洋洋，美盛貌也。」《呂氏春秋·古樂》篇云「其音英」，高誘注云：「英，和盛貌。」《詩·小雅·白華》篇「英英白雲」，《釋文》云：「《韓詩》作『決決』。」盞通於決，即通於英。《爾雅·釋草》云：「榮而不實者謂之英。」《呂氏春秋·務大》篇云「其名無不榮者」，高誘注云：「榮，顯也。」然則「盞於背」即英於背，英於背即榮於背，榮於背即顯於背。趙氏言「盞盞然盛」，正是決決然盛，「視其背而可知」則顯之謂也。此但言其仁義禮智之生於心者，在前則見於面，在後則顯於背。陸氏不明聲音假借之學而以爲「如負」，望文生意，失之甚矣。《韓詩外傳》云：「姑布子卿相，孔子曰：『從前視之，盞盞乎似有王者，從後視之，高肩弱脊，此惟不及四聖者也。』」此盞盞謂前不謂後，則盞豈負於背之名乎？《論語·爲政》篇「施於有政」，《集解》包氏云：「施，行也。」《書》古《太誓》「流之爲鵠」，馬氏注云：「流，行也。」《禮記·中庸》篇「君子和而不流」，注云：「流猶移也。」《史記·萬石張叔傳》云「飢人之所施易」，如淳云：「施讀曰移。」是施與流義同，故「施於四體」即「流於四體」。《易·

文言傳云：「君子黃中通理，正位居體，美在其中，而暢於四支，發於事業，美之至也。」虞翻云：「體謂四支，四支謂股肱。」美在中即「仁義禮智根於心」。先暢四支而乃發於事業。事業者，匡國之謂也。故四體爲匡國之綱。《詩·大雅·假樂》篇云：「抑抑威儀，德音秩秩，無怨無惡，率由羣匹。受福無疆，四方之綱。」又《抑》篇云：「敬慎威儀，維民之則。」威儀者，足容重、手容恭，趨以《采齊》、行以《肆夏》，進則揖之，退則揚之，無非見於四體。即此爲四方之綱，維民之則，亦所爲「匡國之綱」。《曹風·鳴鳩》篇云：①「其儀不忒，正是四國。」正是四國即「匡國」也。疊言「四體」者，謂即此四體，人見之已喻其仁義禮智之所施，不俟教令清明而天下皆樂仰之。趙氏恐人仞「不言」謂四體不能言，特標明云「口不言」，蓋不必俟仁義禮智之形於口而人已喻也。形於口則訏謨定命，遠猶辰告之謂，其喻益可知矣。孟子立言之妙，趙氏能闡明之。《廣雅·釋言》云：「喻，曉也。」阮氏元《校勘記》云：「二人自曉喻而知也」，閩、監、毛三本同。宋本、岳本、孔本、韓本、《攷文》古本自作以。按，以即已字，《禮記·檀弓》注云「以與已字本同」是也。「不言已喻」正言其形於言也。自字非是。」

章指：言臨莅天下，君國子民，君子之樂，尚不與存。仁義內充，身體履方，四支不言，蟠辟用張。心邪意溺，進退無容。於是之際，知其不同也。疏「仁義」至

「無容」○正義曰：此申言「施於四體」之義也。《淮南子·本經訓》「戴圓履方」，方謂地。趙氏此云「履方」，蓋以方爲《禮記·經解》「由禮，謂之有方之士」之方，方亦正也。《荀子·脩身》篇云：「禮者，所以正身也。」此「身體履方」之謂也。《音義》云：「蟠，音盤。辟，音闕。《禮記·投壺》篇云：『主人般還曰辟，賓般還曰辟。』《釋文》云：『般，步干反。還，音旋。辟，音避。』孔氏正義云：『主人見賓之拜，乃般曲折還謂賓曰：今辟而不敢受。』般、盤、蟠古字通。然則辟當音避，不音闕也。《漢書·儒林傳》云「魯徐生善爲頌」，蘇林云：「《漢舊儀》有二郎爲頌貌威儀事，②有徐氏，徐氏後有張氏，不知經，但能盤辟爲禮容。天下郡國有容史，皆

①「鳴」，原誤作「尸」，今據《詩經》及經解本改。
②「郎」，原誤作「即」，今據《漢書》注改。

詣魯學之。」顏師古云：「頌讀與容同。」《何武傳》云：「召見，槃辟雅拜」，服虔云：「行禮容拜也。蟠辟則進退有容。」趙氏以「施於四體」為威儀致密無所失，前云「匡國之綱」，此直以「蟠辟」明之，義互見矣。又反言「心邪意溺則無容」，明仁義內充、施布於四體為有容也。《呂氏春秋·先己》篇云「琴瑟不張」，高誘注云：「張，施也。」趙氏又以「用張」互釋「施」字也。《論語·鄉黨》篇云「足躩如也」，《集解》包氏云：「盤辟貌也。」《先進》篇云「師也辟」，《子張》篇云「堂堂乎張也」，又云「吾友張也為難能也」，包氏云：「言子張容儀之難及。」《廣雅·釋訓》云：「堂堂，容也。」此聖賢施於四體之事。

孫授易授詩校字

孟子正義卷二十六終

孟子正義卷二十七

江都縣鄉貢士焦循撰集

孟子曰：「伯夷辟紂，居北海之濱，聞文王作興，曰：『盍歸乎來？吾聞西伯善養老者。』」大公辟紂，居東海之濱，聞文王作興，曰：「盍歸乎來？吾聞西伯善養老者。」**注**已說於上篇。天下有善養老，則仁人以爲己歸矣。**注**天下有若文王者，仁人將復歸之矣。五畝之宅，樹牆下以桑，匹婦蠶之，則老者足以衣帛矣；五母雞，^①二母彘，無失其時，老者足以無失肉矣；百畝之田，匹夫耕之，八口之家足以無飢矣。**注**五雞二彘，八口之家畜之，足以爲畜產之本也。**疏**「足以無飢矣」○正義曰：阮氏元

《按勘記》云：「宋九經本、宋本、岳本、咸淳衢州本、孔本、韓本、《攷文》古本、足利本同。閩、監、毛三本足誤可。」所謂「西伯善養老者，制其田里，教之樹畜，導其妻子，使養其老。五十非帛不煖，七十非肉不飽。不煖不飽，謂之凍餒。」文王之民無凍餒之老者，此之謂也。」**注**所謂無凍餒者，教導之使可以養老者耳，非家賜而人益之也。**疏**「不煖不飽謂之凍餒」○正義曰：趙氏佑《溫故錄》云：「無帛肉之不煖飽與無衣食之不煖飽稍差。纔不煖不飽，尚未即凍餒，而已謂之凍餒矣。謂之者，文王謂之也。」

章指：言王政普大，教其常業，各養其老，使不凍餒。二老聞之，歸身自託。衆鳥不羅，翔鳳來集，亦斯類也。**疏**「衆鳥不羅翔鳳來集」○正義曰：周氏廣業《孟子章指攷證》云：「《漢書》路溫舒上言曰：『臣聞鳥鳶之卵不毀，而後鳳皇集。』即此意。《楚辭》宋玉《九辨》：『衆鳥皆有所登棲。」

①「母」，原誤作「畝」，今據經解本改。

今，鳳獨遑遑而無所集。」

孟子曰：「易其田疇，薄其稅斂，民可使富也；食之以時，用之以禮，財不可勝用也。」

注易，治也。疇，一井也。教民治其田疇，薄其稅斂，不踰什一，則民富矣；食取其征賦以時，用之以常禮，不踰禮以費財也，故畜積有餘，財不可勝用也。**疏**注「易治也」○正義曰：《音義》云：「易，以鼓切。」

《毛詩·小雅·甫田》篇「不易長畝」，傳云：「易，治也。」《呂氏春秋·辯土》篇云「農夫知其田之易也」，高誘注云：「易，治也。易讀如『易綱』之易。」○注「疇一井也」○正義曰：《一切經音義》引《國語》賈氏注云：「一井爲疇。九夫爲一井。」趙氏所本也。《說苑·辨物》篇云：「疇也者，何也？所以爲麻也。」《史記·天官書》：「視封疆田疇之正治」，如淳引蔡邕云：「麻田曰疇。」韋昭注《國語·周語》《齊語》皆云：「麻地曰疇。」《說文》田部則云：「疇，耕治之田也。」按：《易》否九四，「疇離祉」，九家注云：「疇者，類也。」《荀子·勸學》篇言「草木疇生」，《書·洪範》言「洪範九疇」，《國語·齊語》云「人與人相疇，家與家相疇」，皆以「儔類」言。

一井八家所共，相與爲疇，故名爲疇。《呂氏春秋·慎大》篇云「農不去疇」，即農不去井也。麻田之說，趙氏所不取。

民非水火不生活。昏暮叩人之門戶求水火，無弗與者，至足矣。聖人治天下，使有菽粟如水火。菽粟如水火，而民焉有不仁者乎？**注**水火能生人。有不愛者，至饒足故也。菽粟饒多若是，民皆輕施於人，何有不仁者也？**疏**注

「至饒」至「若是」○正義曰：足爲「手足」之足而或訓爲止，此云「至足」與《論語》「百姓足」之足同。劉熙《釋名·釋形體》云：「足，續也。言續脛也。」足有繼續之義，故得爲饒。《小爾雅·廣詁》云：「饒，多也。」賈子《新書·憂民》篇云：「國無九年之蓄，謂之不足。」然則有九年之蓄謂之足矣，有九年之蓄則饒多矣，故以「饒」釋之，又以「多」申之。

章指：言教民之道，富而節用。蓄積有餘，焉有不仁？故曰「倉廩實，知禮節」也。**疏**「倉廩實知禮節」○正義曰：語出《管子·牧民》篇。

孟子曰：「孔子登東山而小魯，登泰山而小天下。故觀於海者難爲水，遊於聖人之門者難爲言。」**注**所覽大者意大，觀小者志小也。

疏「孔子登東山而小魯」○正義曰：《弘明集》宗炳《明佛論》云：「登蒙山而小魯，^①登泰山而小天下。」周氏廣業《孟子逸文攷》云：「《論》又有云：『昔仲尼佈五經於魯以化天下，及其眇邈太蒙之顛，而天下與魯俱小。』此並用《孟》文也。今作「孔子登東山」，攷魯無東山之名。《論語》：「顛臾爲東蒙主」注，孔云：「使主祭蒙山也。」皇侃、邢昺二疏並云「蒙山在東，故云東蒙主」。《魯頌》：「奄有龜、蒙」，毛傳：「龜山、蒙山也。」正義亦云《論語》疏云：「顛臾主蒙山。」《水經注》：「琅邪郡臨沂縣有洛水，出太山南武陽縣之冠石山，一名武水，東流過蒙山下，有蒙祠。又東南逕顛臾城，即孔子稱顛臾爲東蒙主也。」《史記》：「蒙羽其父」，《索隱》云：「蒙山在泰山蒙陰縣西南。」然則《孟子》之東山當作蒙山，宗少文必非無據也。即令云「東山」，其爲蒙山固無可疑。」按：閻氏若璩《釋地》云：「或曰：費縣西北蒙山，正居魯四境之東，一名東山。孟子云「孔子登東山而小魯」指此。疑近是。」然則蒙山一名東山，宗炳蓋以蒙山代東山。古人引經，

原有此例。依宗《論》以東山爲蒙山可也，以爲《孟子》本作「蒙山」則失之矣。觀水有術，必觀其瀾。**注**瀾，水中大波也。**疏**注「瀾水中大波」○正義曰：《爾雅·釋水》云：「河水清且瀾漪，大波爲瀾。」《說文》水部云：「漣，瀾或從連。」瀾、漣一字也。劉熙《釋名·釋水》云：「風行水波成文曰瀾。瀾，連也。波體轉流相及連也。」日月有明，容光必照焉。**注**容光，小郤也。言大明照幽微。

疏注「容光」至「幽微」○正義曰：《音義》云：「郤，丁去逆切，義與隙同。《說文》目部云：「隙，壁隙也。」《禮記·三年問》《釋文》云：「隙本作郤。」段氏玉裁《說文解字注》云：「《左傳》曰：「牆之隙壞，誰之咎也？」際，自分而合言之，隙，自合而分言之。引申之，凡坼裂皆曰隙，假音以郤爲之。」按：隙之假借爲邑部郤，其郤部郤乃「郤之郤之爲不恭」之郤，或寫從卩，非也。《音義》作郤，《廣韻》十九鐸云：

「郤，俗從委。」張有《復古編》云：「郤，別作郤，非。」隙爲坼裂之名，故《一切經音義》引《國語》賈氏注云：「隙，疊也。」疊則隙之小者，惟遮隔其光則已。苟有絲髮之隙可以容納，

①「蒙」，原誤作「東」，今據《孟子四考》及《弘明集》改。

則光必入而照焉。「容光」非小隙之名，至於小隙，極言其容之微者以見其照之大也，故以「小卻」明「容光」。流水之爲物也，不盈科不行；君子之志於道也，不成章不達。**注**盈，滿也；科，坎也。流水滿坎乃行，以喻君子學必成章乃仕進也。**疏**注「盈滿」至「進也」○正義曰：「盈科」，詳見《離婁上》篇。《禮記·儒行》篇云「上通而不困」，注云：「上通謂仕道達於君也。」達與通義同，故《文選》顏延年《拜陵廟詩》云「晚達生戒輕」，李善注云：「達，宦達也。」故以「達」爲「仕進」。廷琥云：「坎，孔本作飲。」

章指：言閎大明者無不照，包聖道者成其仁。是故賢者志大，宜爲君子。

孟子曰：「雞鳴而起，孳孳爲善者，舜之徒也；雞鳴而起，孳孳爲利者，蹠之徒也。欲知舜與蹠之分，無他，利與善之間也。」**注**蹠，盜蹠也。蹠、舜之分，以此別之。**疏**注「蹠盜蹠也」○正義曰：《音義》云：「張云：『蹠與跖同，之石切。』」《莊

子》有《盜跖》篇，云：「孔子與柳下季爲友。柳下季之弟名曰盜跖。盜跖從卒九千人，橫行天下，侵暴諸侯，穴室樞戶，驅人牛馬，取人婦女。貪得忘親，不顧父母兄弟，不祭先祖。所過之邑，大國守城，小國入保，萬民苦之。」《釋文》云：「按，《左傳》展禽是魯僖公時人，至孔子生八十餘年，若至子路之死百五六十歲，不得爲友。是寄言也。」李奇注《漢書》云：「跖，秦之大盜也。」

章指：言好善從舜，好利從蹠。明明求之，常若不足。君子小人，各一趣也。

孟子曰：「楊子取爲我，拔一毛而利天下，不爲也；**注**楊子，楊朱也；爲我，爲己也。拔己一毛以利天下之民，不肯爲也。」**疏**注「楊子」至「爲也」○正義曰：《列子》有《楊朱》篇，張湛注云：「或云字子居，戰國時人，後於墨子。」楊子與禽滑釐辨論，其說在《愛己》，不拔一毛以利天下，與墨子相反。是篇載楊朱之言云：「伯成子高不以一豪利物，舍國而隱耕；大禹不以一身自利，一體偏枯。古之人損一豪利天下，不與也；悉天下奉一身，不取也。人人不損一豪，人人不利天下，天下治矣。禽子問楊

朱曰：「去子體之一毛以濟一世，汝爲之乎？」楊子曰：「世固非一毛之所濟。」禽子曰：「假濟，爲之乎？」楊子弗應。禽子出語孟孫陽，孟孫陽曰：「子不達夫子之心。吾請言之。有侵若肌膚獲萬金者，若爲之乎？」曰：「爲之。」孟孫陽曰：「有斷若一節得一國，子爲之乎？」禽子默然有間。孟孫陽曰：「一毛微於肌膚，肌膚微於一節，省矣。然則積一毛以成肌膚，積肌膚以成一節，一毛固一體萬分中之一物，奈何輕之乎？」禽子曰：「吾不能所以答子。然則以子之言問老聃、關尹，則子言當矣；以吾言問大禹、墨翟，則吾言當矣。」《呂氏春秋·不二》篇云「陽生貴己」，高注云：「輕天下而貴己。孟子曰：『楊子拔體一毛以利天下，弗爲也。』貴己即爲己。墨子兼愛，摩頂放踵利天下，爲之。」**注**墨子，墨翟也。兼愛他人，摩突其頂，下至於踵，以利天下，己樂爲之也。**疏**注「墨子」至「之也」○正義曰：《史記·孟子荀卿列傳》後附云：「墨翟，宋之大夫，善守禦，爲節用。或曰並孔子時，或曰在其後。」武氏億《授堂文鈔·跋墨子》云：「《漢書·藝文志》：『《墨子》七十一篇』，注云：『墨翟爲宋大夫，在孔子後。』而不著其地。惟《呂氏春秋·慎大覽》高誘注：『墨子，名翟，魯人也。』魯

即魯陽，春秋時屬楚，古人於地名兩字或單舉一字，是其例也。蓋墨子居於魯陽，疑當爲文子之臣。觀《魯問》一篇言「吾願主君之上者尊天事鬼，下者愛利百姓」，翟之尊文子爲主君，意其屬於文子也。《外傳·楚語》：「惠王以梁與魯陽文子」，注：「文子，平王之孫，司馬子期子魯陽公也。」惠王十年爲魯哀公十六年，孔子方卒，則翟實當楚惠王時，上接孔子未卒，故太史公一云並孔子時。自班《志》專謂在孔子後，後人益爲推衍，至如畢氏據本書稱中山諸國亡於燕、代、胡、貊之國，以中山之滅在趙惠文王四年，當周赧王二十年，則翟實六國時人，至周末猶存。竊以翟既與楚惠王接時，後必不能歷一百九十餘年尚未即化，此固不然也。中山諸國之亡，蓋墨子之徒續記而竄入其師之說以貽此謬，何可依也？《音義》云：「突，丁徒忽切，穿突也。」襄公二十五年《左傳》：「宵突陳城」，注云：「突，穿也。」此丁公著所本。乃城可言穿，頂不可言穿。《莊子·說劍》篇云「吾王所見劍士皆蓬頭突鬢」，《荀子·非相》篇「孫叔敖突禿」，楊倞注云：「突謂短髮可凌突人者，故莊子說趙劍士蓬頭突鬢。」突禿聲轉，突即禿，楊氏解爲「短髮」是也。趙氏以突明摩，謂摩迫其頂，髮爲之禿。丁氏以突爲穿，失趙義矣。《文選》江淹

《上建平王書》注引《孟子》「墨子兼愛」，^①摩頂致於踵利天下，爲之」，劉熙曰：「致，至也。」又任昉《奏彈曹景宗》注引《孟子》「墨子兼愛，摩頂致於踵」，趙岐曰：「致，至也。」周氏廣業《孟子古注攷》云：「據此，則趙、劉所有之本，注並同矣。《困學紀聞》言《選》注引趙岐作「致於踵」，今本作「放踵」，注無「致至也」三字。孫宣公《音義》「放踵」下，據丁氏云方往切，至也。是唐宋本已皆作放。今攷《文選》劉峻《廣絕交論》「皆願摩頂至踵」，注引《孟子》「摩頂放踵」，趙岐曰：「放，至也。」同在一書，所引互異，可見趙氏注本唐世已有其一，非至宋始作「放踵」也。又《文選·洞簫賦》注引毛氏《詩傳》「顏叔子納鄰之釐婦，使執燭，放乎平旦」事，下引趙岐《孟子章句》曰「放，至也。方往切」。今惟「放乎琅邪」注有「放至也」三字，無「方往切」，「摩頂放踵」注直云「摩突其頂，下至於踵」。爲致爲放，莫可究詳矣。」翟氏灝《攷異》云：「《風俗通·十反》篇「墨翟摩頂以放踵，楊朱一毛而不爲」，放字與今《孟子》同。江《書》、任《彈》兩注所引「致於踵」者，疑當時劉注本獨如是。任《彈》下趙岐二字當亦爲劉熙，傳寫者遷譌然爾。」謹按：《墨子》有《兼愛》三篇，無「摩頂放踵」語。《莊子·天下》篇云：「墨子稱道曰：『禹親自操橈耜，^②而九雜天下之川腓而腓，脰無毛，沐甚風，櫛疾

雨，置萬國。禹，大聖也，而形勞天下如此。使後世之墨者多以裘褐爲衣，跋蹻爲服，日夜不休，以自苦爲極。曰不能如此，^③非禹之道也，不足爲墨。」墨翟、禽滑釐之意則是，其行則非也。將使後世之墨者必自苦以腓無脰，脰無毛，相進而已矣，亂之上也，治之下也。」孟子推其汜愛兼利、生勤死薄之道而擬之爲「摩頂放踵」，即「自苦以腓無脰，脰無毛」之意耳。子莫執中，^④注子莫，魯之賢人也。其性中和專一者也。^⑤疏注「子莫」至「一者也」○正義曰：子莫未詳。或謂《莊子》有云「儒、墨、楊、秉四」，秉別無所聞，恐即當時子莫執中一家之說。《音義》云：「陸云：『言子等無執中。』」此異於趙氏，非也。孔子稱堯咨舜執中，孟子稱湯執中，此句下云「執中爲近之」，何遽戒人莫執中也？陸氏穿鑿，不足以易趙也。執中爲近之。執中無權，猶執一也。^⑥注執中和，近聖人之道，然不權聖人之重權。執中而不知權，猶執一介之人，不得時變也。

① 「愛」，原誤作「受」，今據《文選》注攷。

② 「橈」，原誤作「槩」，今據《莊子》改。

③ 「曰」上，原衍「以」字，今從沈校據《莊子》刪。

疏注「執中」至「變也」○正義曰：《白虎通·五行》篇云：

「中央者，中和也。」《說文》部云：「中，和也。」寒往則暑來，暑往則寒來，是為時。執中者但取不寒不暑也，聖人之道以時為中，趨時則能變通，知變通則權也。文公十二年《公羊傳》云：「惟一介斷斷焉無他技」，^①注云：「一介猶一概。」此云「執一介」即「執一概」也。不知權宜，一概如此，所以猶執一也。戴氏震《孟子字義疏證》云：「權，所以別輕重也。凡此重彼輕，千古不易者，常也。常則顯然共見其千古不易之重輕。而重者於是乎輕，輕者於是乎重，變也。變則非智之盡，能辨察事情而準，不可以知之。孟子之闢楊墨也，曰：

「楊墨之道不息，孔子之道不著。是邪說誣民，充塞仁義也。仁義充塞則率獸食人，人將相食。」今人讀其書，孰知所謂「率獸食人，人將相食」者安在哉？孟子又曰：「楊子取為我，拔一毛而利天下，不為也；墨子兼愛，摩頂放踵利天下，為之。子莫執中，執中為近之。執中無權，猶執一也。所惡執一者，為其賊道也，舉一而廢百也。」今人讀其書，孰知「無權」之故，「舉一而廢百」之為害至鉅哉？孟子道性善，於告子言「以人性為仁義」，則曰「率天下之人而禍仁義」。今人讀其書，又孰知性之不可不明，「戕賊人以為仁義」之禍何如哉？老聃、莊周無欲之說及後之釋氏所謂空寂能脫然不以

形體之養與有形之生死累其心，而獨私其所謂長生久視，所謂不生不滅者，於人物一視而同用其慈，蓋合楊墨之說以為說。由其自私，雖拔一毛可以利天下，不為；由其外形骸，溥慈愛，雖摩頂放踵以利天下，為之。宋儒易老莊、釋氏之所私者而貴理，易彼之外形體者而咎氣質，其所謂理，依然如有物焉宅於心，於是辨乎理欲之分，謂「不出於理即出於欲，不出於欲則出於理」。雖視人之飢寒號呼、男女哀怨以至垂死冀生，無非人欲；空指一絕情欲之感者為天理之本然，存之於心。及其應事，幸而偶中，非曲體事情，求如此以安之也，不幸而事情未明，執其意見，方自信天理非人欲。而小之一人受其禍，大之天下國家受其禍，徒以不出於欲，遂莫之或寤也。凡以為理宅於心，不出於欲則出於理者，未有不以意見為理而禍天下者也。人之患，有私有蔽。私出於情欲，蔽出於心知。無私，仁也；不蔽，智也。非絕情欲以為仁，去心知以為智也。是故聖賢之道無私而非無欲，老、莊、釋氏無欲而非無私。彼以無欲成其自私者也，此以無私通天下之情，遂天下之欲者也。凡異說皆主於無欲，不

^①「焉」，原誤從《經籍纂詁》卷六十九作「兮」，今從沈校據《公羊傳》改。「他」，原脫，今從沈校據《公羊傳》補。

求無蔽，重行不先重知。人見其篤行也，無欲也，故莫不尊信之。聖賢之學，由博學、審問、慎思、明辨而後篤行，則行者，行其人倫日用之不蔽者也，非如彼之舍人倫日用、以無欲爲能篤行也。人倫日用，聖人以通天下之情，①遂天下之欲，權之而分理不爽，是謂理。古今不乏嚴氣正性、疾惡如讎之人，是其所是，非其所非，執顯然共見之重輕，實不知有時權之而重者於是乎輕，輕者於是乎重。其是非輕重一誤，天下受其禍而不可救。豈人欲蔽之也哉？自信之理非理也。然則孟子言「執中無權」，至後儒又增一「執理無權」者矣。所惡執一者，爲其賊道也，舉一而廢百也。」**注**所以惡執一者，爲其不知權，以一知而廢百道也。**疏**注「所以」至「道也」○正義曰：《易·繫傳》云：

「天下何思何慮，天下同歸而殊途，一致而百慮。」途既殊則慮不可不百，慮百則不執一也。執一則不百慮，不百慮，故廢百矣。楊子爲我，執一於爲我也，墨子兼愛，執一於兼愛也。孟子所以距楊墨，距其執一也，故舉一執中之子莫。然則凡執一者皆能賊道，不必楊墨也。楊子惟知爲我而不復慮及兼愛，墨子惟知兼愛而不復慮及爲我，子莫但知執中而不復慮及有當爲我、當兼愛之事。楊則冬夏皆葛也，墨則冬

夏皆裘也，子莫則參乎裘、葛之中而冬夏皆袷也。不知趨時者裘、葛、袷皆藏之於篋，各依時而用之，即聖人一貫之道也。聖人之道，善與人同，執兩端以用其中，故執中而非執一。曾子居武城，寇至則去，寇退則反，薪木亦戒其毀傷，顏子居陋巷不改其樂，而不同於楊子之爲我者，不執一也。禹治水，勞身焦思，至於偏枯胼胝，藏竅不通，而不同於墨子之兼愛者，不執一也。故曰「禹稷、顏回同道」，又曰「禹稷、顏子易地則皆然」。惟易地皆然，則不執一。同道者，一致也，易地皆然者，百慮也。執一則爲楊墨，不執一則爲禹稷顏曾。孟子學堯舜孔子之道，知道在變通神化，故楊墨之執一，不知變通，則距之。距之者，距其悖乎堯舜孔子之道也。不然，楊朱屏氣虛名，齊生死，固高曠絕俗之士。至墨翟以救世爲心，其言曰：「國家昏亂則語之尚賢尚同，國家貧則語之節用節葬，國家喜音沉湎則語之非樂非命，國家淫僻則語之尊天事鬼，國家務奪侵陵則語之兼愛非攻。」讀其書，豈不謂之仁人君子？非孟子深明乎變通神化之道，確有以見其異乎堯舜孔子之權，安能反復申明以距之哉？學者尚有申墨子之說者，不知道者也。

①「以」，原脫，今從沈校據《孟子字義疏證》補。

章指：言楊墨放蕩，子莫執一。聖人量時，不取此術。孔子行止，惟義所在。

孟子曰：「飢者甘食，渴者甘飲。是未得飲食之正也，飢渴害之也。」**注**飢渴害其本所以知味之性，令人強甘之。

疏注「令人強甘之」○正義

曰：飢渴者急欲得飲食，以不甘為甘，故為「強甘」。豈惟

口腹有飢渴之害？人心亦皆有害。**注**為利

欲所害亦猶飢渴得之。人能無以飢渴之害為心

害，則不及人不為憂矣。**注**人能守正不為邪利

所害，雖謂富貴之事不及逮人，猶為君子，不為善人

所憂患也。**疏**注「人能」至「患也」○正義曰：《說文》又部

云：「及，逮也。」《淮南子·脩務訓》云「堯舜之聖不能及」，

高誘注云：「及猶如也。」「不及人」即不如人。趙氏謂人之

貧賤者所為之事不能及富貴之人，為利所動，不能守正，必

為強奪詐取之事以傷害善人，則善人憂患之；使不為利欲

所害，雖不及富貴之人，亦不肯為禍於善人，故善人不為所

憂患。強奪詐取猶飲食之不甘者也。以飢渴而甘其所不

甘，則因富貴不如人亦將為其所不可為，此何必貧賤富貴之懸殊者也？同一貧賤，而彼稍遜，則已妬而傷之；同一富貴，而彼稍加一等，已百計排毀而傾軋之：皆心害也。受其害者必善人也，害善人者必小人，非君子也。故云「猶為君子，不為善人所憂患」。近時通解，「不為憂」謂己不憂不及人。

章指：言飢不妄食，忍情抑欲；賤不失道，不為苟求。能無心害，夫將何憂？

孟子曰：「柳下惠不以三公易其介。」**注**

介，大也。柳下惠執宏大之志，不耻汗君，不以三公

榮位易其大量也。

疏注「介大」至「量也」○正義曰：

「介，大也」，《爾雅·釋詁》文。《毛詩·大雅·生民》「攸介攸止」，^①《小明》「介爾景福」，介傳皆訓大。趙氏以惠「不羞

汗君，不辭小官」為「大量」是也。承上「不及人」而言之，士

師之賤不及三公之榮，若少存豔羨之心，則辭小官而不居

矣，是其心之淺隘也。《音義》云：「陸云：『介謂特立之

①「止」，原誤作「上」，今據《詩經》改。

行。」「《文選》注引劉熙注云：「介，操也。」陸氏蓋本此。

章指：言柳下惠不恭，用志大也。無

可無否，以賤爲貴也。疏：「無可無否」○正義

曰：《法言·淵騫》篇云：「不夷不惠，可否之間。」

孟子曰：「有爲者辟若掘井。掘井九仞

而不及泉，猶爲棄井也。」注有爲，爲仁義也。

仞，八尺也。雖深而不及泉，喻有爲者中道而盡棄前行也。疏注「仞八尺也」○正義曰：《音義》云：「仞，丁

音刃，云：「義與仞同，借用耳。」先儒以七尺爲仞，注云八

尺曰仞。程氏瑤田《通藝錄·七尺曰仞說》云：「仞之數，《小爾雅》云「四尺」，《漢書·食貨志》注引應劭云「五尺六

寸」，此其謬易見也。《說文》云：「仞，人伸臂一尋八尺。」王

肅《聖證論》、趙岐《孟子》注、曹操李筌《孫子》注、郭璞《山海

經》注、顏師古《司馬相如傳》注、房玄齡《管子》注、鮑彪《楚

國語》注，並曰「八尺」；而鄭康成《周官》《儀禮》注、包咸《論

語》注、高誘注《呂氏春秋》、王逸注《大招·招魂》、李謐《明

堂制度論》郭璞注、司馬相如賦見司馬彪說，則皆以爲「七

尺」。《莊子》《步仞之丘》，陸德明《釋文》亦曰「七尺」。《淮

南子·原道訓》注「八尺曰仞」，而《覽冥訓》注則云「七尺曰

仞」，其注「百仞」亦曰「七百尺也」。是書有高誘、許慎二人

之說，證以《說文》，則八尺者當爲許氏所記雜高誘注中者，

證以《呂氏春秋》注，則七尺者誘之說也。近世方密之、顧亭

林皆篤信八尺之說，瑤田以爲仞七尺者是也。揚雄《方言》

云：「度廣以尋。」杜預《左傳》「仞溝洫」注云：「度深曰

仞。」二書皆言人伸兩手以度物之名，而尋爲八尺，仞必七

尺，何也？同一伸手度物，而廣深用之，其勢自不得不異。

人長八尺，伸兩手亦廣八尺，用以度廣，其勢全伸而不屈，故

尋爲八尺；而用之以度深，則必上下其左右手而側其身焉，

身側則胸與所度之物不能相摩，於是兩手不能全伸而成弧

之形，弧而求其弦以爲仞，必不能八尺，故七尺曰仞，亦其勢

然也。《玉篇》云：「度深曰測。」《說文》解測字曰：「深所至

也。」測之爲言側也，余之說仞字，以爲伸手度深必側其身

焉，義與此合矣。」段氏玉裁《說文解字法》云：「程氏甚精，

仞說可定矣。《攷工記》：「廣二尋，深二仞，謂之澮。」倘其

度同八尺，何不皆曰二尋，如上文「廣二尺，深二尺」之例

也？」謹按：仞爲七尺，程氏、段氏之言定矣。《管子·地

員》篇云：「夫管仲之匡天下也，其施七尺。濱田悉徙，命

之曰五施，五七三十五尺而至於泉。赤廬歷疆肥，命之曰四

施，四七二十八尺而至於泉。黃唐，命之曰三施，三七二十一尺而至於泉。斥埴，命之曰再施，二七十四尺而至於泉。黑埴，命之曰一施，七尺而至於泉。埴延者六施，六七四十二尺而至於泉。陝之芳七施，七七四十九尺而至於泉。祀陝八施，七八五十六尺而至於泉。杜陵九施，七九六十三尺而至於泉。延陵十施，七十尺而至於泉。環陵十一施，七十尺而至於泉。蔓山十二施，八十四尺而至於泉。付山十三施，九十一尺而至於泉。付山白徒十四施，九十八尺而至於泉。中陵十五施，百五尺而至於泉。青山十六施，百一十二尺而至於泉。青龍之所居，庚泥不可得泉。赤壤勞山十七施，百一十九尺而至於泉。其下清商，不可得泉。陞山白壤十八施，百二十六尺而至於泉。其下駢石，不可得泉。徙山十九施，百三十三尺而至於泉。其下有灰壤，不可得泉。高陵之山二十施，百四十尺而至於泉。山之上命之曰縣泉，鑿之二尺乃至於泉。①山之上命曰復呂，鑿之三尺而至於泉。山之上命曰泉英，鑿之五尺而至於泉。山之材，鑿之二十七十四尺而至於泉。山之側，鑿之三七二十一尺而至於泉。然則鑿地之度以七尺為準，仞與施，其數同也。自二尺至八仞言之，原不必九仞而已可得泉，但水土深淺不齊，必極之以二十施，則九仞僅有其半，故趙氏以「中道」言之。

「九仞而不及泉」，明及泉者有不待九仞也。「猶爲棄井」，明九仞功方得半也。不攷《管子》，未知其指。

章指：言爲仁由己，必在究之。九仞而輟，無益成功。《論》之「一簣」，義與此同。疏「論之一簣」○正義曰：《音義》云：「論謂《論語》也。」

孟子曰：「堯舜，性之也；湯武，身之也；五霸，假之也。」**注**性之，性好仁，自然也；身之，體之行仁，視之若身也；假之，假仁以正諸侯也。疏「性之」至「侯也」○正義曰：《荀子·正名》篇云：「性之和所生，精合感應，不事而自然，謂之性。」《春秋繁露·察名號》篇云：「如其生生自然之資，謂之性。」《周髀算經》云：「此天地陰陽之性，自然也。」故以性爲「自然好仁」也。《廣雅·釋親》云：「體，身也。」《大戴禮·曾子大孝》篇云：「身者，親之遺體也。」《淮南子·繆稱訓》云「身君

①「尺」，原脫，今從沈校據《管子》補。

子之言，信也」，高誘注云：「身君子之言，體行君子之言也。」以體行解身字，與趙氏此注同，是「身之」即「體之」也。「行仁」謂以德澤及人。「視之若身」謂不異身受之也。《說文》人部云：「假，非真也。」《儀禮·少牢饋食禮》：「假爾大筮有常」，注云：「假，借也。」行仁視之若身，則實行之矣；五霸假借行仁之名以正諸侯，非其實能行仁也。《大戴記·曾子立事》云：「太上樂樂善，其次安之，其下亦能自彊。」盧辯注云：「自彊謂其身不爲。太上謂五帝，其次謂三王，其下謂五霸。」孟子曰：「堯舜性之，湯武身之，五霸假之。」久假而不歸，惡知其非有也？」**注**五霸若能久假仁義，譬如假物，久而不歸，安知其不真有也？**疏**注「五霸」至「有也」○正義曰：五霸假借仁義之名，旋復不仁不義，不能久也。假而能久，仁亦及人，究殊乎不能假而甘爲不仁者也。

章指：言仁在性體，其次假借。用而不已，實何以易？在其勉之也。**疏**「用而不已實何以易」○正義曰：《呂氏春秋·順說》篇云「以之所歸」，高誘注云：「歸，終也。」僖公二十四年《左傳》：「婦怨無終」，注云：「終猶已也。」此云「用而不已」，即是「假

而不歸」，以「已」釋「歸」也。「實」即指「湯武身之」，謂與身之何以易？《曹風·下泉》所以思明王賢伯矣。《考文》古本無已字，落之也。

公孫丑曰：「伊尹曰：『予不狎于不順。』放大甲於桐，民大悅；大甲賢，又反之，民大悅。賢者之爲人臣也，其君不賢，則固可放與？」**注**公孫丑怪伊尹賢者而放其君，何也？**疏**

「伊尹曰予不狎于不順」○正義曰：江氏聲《尚書集注音疏》云：「自是《尚書》文，而不稱《書》曰。」孟子曰：「有伊尹之志則可，無伊尹之志則篡也。」**注**人臣秉忠志。志若伊尹，欲寧殷國，則可放惡而不即立君，宿留冀改而復之，如無伊尹之忠，見間乘利，篡心乃生，何可放也？

章指：言憂國忘家，意在出身，志在寧君。放惡攝政，伊周有焉；凡人志異，則生篡心也。

公孫丑曰：「《詩》曰：『不素餐兮。』君子之不耕而食，何也？」**注**《詩》，《魏國·伐檀》之篇也。無功而食，謂之素餐。世之君子有不耕而食，何也？**疏**注「詩魏」至「素餐」○正義曰：《詩序》云：

「《伐檀》，刺貪也。在位貪鄙，無功而受祿，君子不得進仕爾。」《毛傳》云：「素，空也。」空之言虛也。無功受祿，是虛

得此餐也。孟子曰：「君子居是國也，其君用之則安富尊榮，其子弟從之則孝悌忠信。不素餐兮，孰大於是？」**注**君子能使人化其道德，移其習俗，君安國富而保其尊榮，子弟孝悌而樂忠信。不素餐之功，誰大於是？何為不可以食祿？

章指：言君子正己，以立於世。世美其道，君臣是貴。所過者化，^①何「素餐」之謂？

王子墊問曰：「士何事？」**注**齊王子，名墊也。問士當何事為事也？**疏**注「齊王」至「事也」○正

義曰：孟子仕齊久，此稱「王子」，故知為齊王之子也。顧氏炎武《日知錄》云：「士農工商，謂之四民，其說始於《管子》。《穀梁》成公元年《傳》亦云：『三代之時，民之秀者，乃收之鄉序，升之司徒，而謂之士。』固千百之中不得一焉。《大宰》『以九職任萬民，五曰百工，化飭八材』。計亦無多人爾。武

王作《酒誥》之書曰：「妹土，嗣爾股肱，純其藝黍稷，奔走事厥考厥長。」此謂農也。「肇牽車牛，遠服賈，用孝養厥父母。」此謂商也。又曰「庶士有正，越庶伯君子，其爾聽朕教」，則謂之士者，大抵皆有職之人矣。惡有所謂「羣萃而州處，四民各自為鄉」之法哉？春秋以後，游士日多，《齊語》言「桓公為游士八十人，奉以車馬衣裘，多其資幣，使周游四方，以號召天下之賢士」。而戰國之君遂以士為輕重，文者為儒，武者為俠。嗚乎！游士興而先王之法壞矣。彭更之言，王子墊之問，其猶近古之意與？**孟子**曰：「尚志。」**注**尚，上也。士當貴上於用志也。**疏**注「尚上」

至「志也」○正義曰：《儀禮·覲禮》云「尚左」，注云：「古文尚作上。」《釋文·序錄》引《書贊》云：「孔子撰書，尊而命

①「過」，原誤作「遇」，今據廖本改。

之曰《尚書》，尚者，上也。」尊之猶貴之，故以「上」釋「尚」，又以「貴」釋「上」。程氏瑤田《通藝錄·論學小記》云：「隱居以求其志，求其所達之道也。當其求時猶未及行，故謂之志。行義以達其道，行其所求之志也。及其行時不止於求，故謂之道。志與道通一無二，故曰：『士何事？』曰：尚志。」曰：「何謂尚志？」曰：「仁義而已矣。殺一無罪，非仁也；非其有而取之，非義也。居惡在？仁是也；路惡在？義是也。居仁由義，大人之事備矣。」注孟子言志之所尚，仁義而已矣。不殺無罪，不取非有者為仁義。欲知其所當居者，仁為上，所由者，義為貴。大人之事備也。疏「大人之事備也」^①○正義曰：程氏瑤田《論學小記》云：「萬物皆備於我」，我者，己也。「尚志」者，「居仁由義」之謂也。不殺無罪曰居仁，不取非其有曰由義。尚志之時，雖曰士也，然豈待為大人而後謂之大人哉？蓋大人之事，天生己時已備之矣。」

章指：言人當尚志，志於善也；善之所由，仁與義也。欲使王子無過差也。

孟子曰：「仲子，不義與之齊國而弗受，人皆信之。是舍『簞食豆羹』之義也。」注仲子，陳仲子，處於陵者。人以爲廉，謂以不義而與之齊國，必不受之。孟子以爲仲子之義若上章所道簞食豆羹無禮則不受，萬鍾則不辨禮義而受之也。疏

注「仲子」至「受之也」○正義曰：仲子不義其兄之祿而處於陵，此實事也；不義而與之齊國而不受，無此事，人虛擬之也。不義與之齊國而不受猶萬鍾之不受也，處於陵猶簞食豆羹之不受也。亡親戚君臣上下，是不知禮義之大者。若能不義與之齊國而不受，則宜知親戚君臣上下矣；仲子既不知有親戚君臣上下，又何能不義與之齊國而不受也？此趙氏義也。周氏柄中《辨正》云：「《史記·鄒陽上梁王書》，稱於陵子仲辭三公，爲人灌園。皇甫謐《高士傳》載其事。愚謂果有此事，自是廉之實蹟，匡章何以不稱於孟子之前，孟子又何以設言與之齊國而弗受而反不及其辭楚相邪？嘗攷《韓詩外傳》：『楚莊王使使賁金百斤聘北郭先生，先

①「也」，原作「矣」，合於宋十行、閩、監、毛等本，今據本書及阮校所述廖、孔、韓等本注文改。

生曰：「臣有箕帚之使，願人計之。」即謂婦人曰：「楚欲以我爲相。今日相，即結駟列騎，食方丈於前。如何？」婦人曰：「夫子以織屨爲食，食粥覓履，無怵惕之憂者，何哉？與物無治也。今如結駟列騎，所安不過容膝，食方丈於前，所甘不過一肉。以容膝之安，一肉之味而徇楚國之憂，其可乎？」於是遂不應聘，與婦去之。」此北郭先生之事，而《高士傳》以爲陳仲子。夫鄒陽所云辭三公者，特言其不願爲三公耳，固不必實有一卻聘之事。而士安附會其說，遂以北郭事移而屬之仲子，豈可信乎？且於陵齊地，顧野王《輿地志》：「齊城有長白山，陳仲子夫妻所隱處。」《高士傳》稱「陳仲子適楚，居於陵，楚王聞其賢而聘之。」以齊地爲楚地，傳會改易，灼然可知。而左袒仲子者猶以辭三公爲美談，夫亦未之考耳。」人莫大焉亡親戚君臣上下。以其小者信其大者，奚可哉？」**注**人當以禮義爲正。陳仲子避兄離母，不知仁義親戚上下之敘，何可以其小廉，信以爲大哉？**疏**注「人當」至「大哉」○正義曰：經言「亡親戚君臣上下」，趙氏言「不知仁義親戚上下之敘」，不言「君臣」者，以上下即君臣也。避兄離母，是不知親戚；不義蓋祿，是不知君臣；親戚屬仁，君臣屬義，故不知仁義。

《書》「悼敘九族」，是親戚有敘也。《周禮·春官·小宰》「以官府之六敘正羣吏」，注云：「謂先尊後卑。」是上下有敘也。賈子《新書·六術》篇云：「人之戚屬，以六爲法。人有六親，六親始曰父，父有二子，二子爲昆弟，昆弟又有子，子從父而昆弟，故爲從父昆弟；從父昆弟又有子，子從祖而昆弟，故爲從祖昆弟；從祖昆弟又有子，子從曾祖而昆弟，故爲從曾祖昆弟；曾祖昆弟又有子，子爲族兄弟。備此六者之謂六親。親之始於一人，世世別離，分爲六親。親戚非六，則失本末之度。六親有次，不可相踰。相踰則宗族擾亂，不能相親。」然則「親戚」專指同姓。《呂氏春秋·論人》篇云：「論人者又必有六戚四隱。何謂六戚？父母兄弟妻子。」高誘注云：「六戚，六親也。」有父則有母，有子則有妻，與賈子之說，互相備也。莊公三十二年《公羊傳》云「君親無將」，注云：「親，父母也。」父母，六親所由始也，故專得其稱。《禮記·祭義》「立愛自親始，立敬自長始」，注云：「親，長、父、兄也。」此親專屬父。《儀禮·喪服記》「親則月算如邦人」，注云：「謂在五屬之內。」《周禮·秋官·掌戮》「凡殺其親者，焚之」，注云：「總服以內也。」《天官·大宰》「一曰親親」，注云：「親親，若堯親九族也。」《書·堯典》「以親九族」，馬氏、鄭氏注皆云：「上自高祖，下至玄孫爲九族。」凡

稱親皆謂父族。《喪服小記》：「婦祔於祖姑，祖姑有三人則祔於親者」，注云：「親者，謂舅所生。」此以舅之生母爲親，仍六親中之母也。《毛詩·大雅·行葦》：「戚戚兄弟」，傳云：「戚戚，內相親也。」箋云：「王與族人燕，兄弟之親，無遠無近，俱揖而進之。」孔氏正義云：「戚戚猶親親。」《禮記·大傳》云：「四世而總，服之窮也。五世祖免，殺同姓也。六世親屬竭矣。其庶姓別於上而戚單於下。」正義云：「戚，親也。」是戚亦與親同，指同族而言。《爾雅·釋親》先釋宗族，六親之正也，次因母而及母黨，因妻而及妻黨，因子而及昏嫺，是連類而推及之。《秋官·大司寇》：「一曰議親之辟」，鄭司農云：「若今時宗室有罪先請是也。」而賈氏疏兼以外親有服者言之，非其義也。乃《曲禮》：「兄弟親戚，稱其慈也」，孔氏正義謂「親言族內，戚言族外」。《國語·鄭語》云：「是非王之支子母弟甥舅也，則皆荆蠻戎翟之人也，非親則頑。」韋昭注云：「親謂支子甥舅。」昭公二十五年《左傳》云：「爲父子兄弟，姑姊甥舅，昏媾婣亞，以象天明。」杜預注云：「六親和睦。」蓋自漢以來，有《尚書》歐陽、夏侯說云：「九族乃異姓有親屬者，父族四，母族三，妻黨二。夫同姓稱宗族，母妻稱黨。」自混黨於族，遂亦稱黨爲親。漢儒說經尚無以親戚指異姓，而韋昭、杜預生於漢末，其時外戚之

盛踰於宗族，預又爲司馬懿之女壻，其以婣亞爲親宜矣。然《左傳》言「父子，兄弟，姑姊，甥舅，昏媾，婣亞」，數雖有六，原無親名，故孔氏正義辨之云：「《老子》云：『六親不和，焉有孝慈？』六親謂父子兄弟夫婦。」則以杜氏所云六親爲不然也。《鄭語》「非親」二字承上文「支子母弟甥舅」，故韋昭注云：「其實親字祇屬『支子母弟』，如《小雅·頍弁》序云：『暴戾無親，不能宴樂同姓，親睦九族。』而末章連言『兄弟甥舅』，不得謂甥舅亦同姓九族也。趙氏以親戚指母與兄是矣。仲子辟兄離母而親其妻，是親戚之敘失矣。翟氏灝《攷異》云：『王氏《翼注》云：『此作一句讀，言人之罪莫有大於無親戚君臣上下者。』《荀卿·不苟》篇云：『盜名不如盜貨，田仲不如盜也。』又《非十二子》篇云：『仲綦刻利跂苟，以分異人爲高，不足以合大衆，明大分。』《韓非子·外儲說》載宋屈穀謂：『田仲不恃仰人而食，亦無益於人之國，蓋堅瓠之類也。』《戰國策》趙威后問齊使，則言其『率民而出於無用，何爲至今不殺乎？』仲子謙廉矯義，不惟人不信之，且多厭惡之矣。倘特因孟子之大聲一呼，而仲遂敗其僞與？」王氏引之《經傳釋詞》云：「焉猶於也。」人莫大焉無親戚君臣上

① 「大」，按引文出《小司寇》。

下」，言莫大於無親戚君臣上下也。」

章指：言事有輕重，行有大小。以大包小，可也；以小信大，未之聞也。

桃應問曰：「舜爲天子，皋陶爲士。瞽瞍殺人，則如之何？」**注**桃應，孟子弟子。皋陶爲士官，主執罪人。瞽瞍惡暴而殺人，則皋陶如何？**疏**注「皋陶爲士官主執罪人」○正義曰：《書·堯

典》云：「帝曰：『皋陶，蠻夷猾夏，寇賊姦宄。汝作士，五刑有服，五服三就，五流有宅，五宅三居。惟明克允。』」馬氏注云：「士，獄官之長。」鄭氏注云：「士，察也。主察獄訟之事。」《禮記·月令》：「孟秋，命理瞻傷。」注云：「理，治獄官也。有虞氏曰士，夏曰大理，周曰大司寇。」士爲刑官之長，故主執有罪之人。孟子曰：「執之而已矣。」**注**孟子曰：皋陶執之耳。**疏**注「皋陶執之耳」○正義曰：皋陶既主執罪人，故執殺人者。「然則舜不禁與？」**注**桃應以爲舜爲天子，使有司執其父，不禁止之邪？曰：「夫舜惡得而禁之？夫有所受之也。」

注夫，辭也。孟子曰：「夫舜惡得禁之？夫天下乃受之於堯，當爲天理民。王法不曲，豈得禁之也？」

疏注「夫辭」至「禁之也」○正義曰：《周禮·秋官·司烜》「掌以夫遂取明火於日」，鄭司農注云：「夫，發聲。」是夫爲語辭也。趙氏以舜之天下受之於堯，故不得禁皋陶執殺人罪人。惠氏士奇《春秋說》云：「夫有所受之也」，惡乎受之？曰：受之舜。殺人者死，天之道也。皋陶既受之舜矣，而舜復禁之，是自壞其法也。自壞其法不可以治一家，況天下乎？且受之舜猶受之天，受之天者，非諄諄然命之也，謂其法當乎天理，合乎人心而已。「然則舜如之何？」

注應問舜爲之將如何。曰：「舜視棄天下猶棄敝屣也。竊負而逃，遵海濱而處，終身訢然樂而忘天下。」**注**孟子曰：舜視棄天下如捐棄敝蹤。蹤，草履可蹤者也。敝喻不惜。舜必負父而遠逃，終身訢然忽忘天下之爲貴也。**疏**注「舜視」至「不惜」○正義曰：《說文》：「棄，捐也。」手部云：

①「革」，原誤作「卮」，今從沈校據《說文》改。

「捐，棄也。」捐、棄二字轉注，故以「捐」釋「棄」也。《文選·北山移文》注引劉熙注云：「蹠，草履可履。」趙氏云「草履可蹠」，「可蹠」猶「可履」也。《說文》履部云：「履，履也。」履，足所依也。故可稱草履，亦可稱草履。《毛詩·大雅·生民》「履帝武敏歆」，傳云：「履，踐也。」以其可踐，故名履。《呂氏春秋·長見》篇云「視釋天下若釋履」，高誘注云：「釋，棄也。」《觀表》篇云「視舍天下若舍履」，高誘注云：「履，弊履也。」《莊子·讓王》篇云「原憲華冠縱履杖藜而應門」，又云「曾子曳縱而歌《商頌》，聲滿天地」，《釋文》云：「縱，《三蒼解詁》作躡，云：「躡也。」《聲類》或作履。《通俗文》云「履不著跟曰履」，李云：「縱履謂履無跟也。」王云：「體之能躡舉而曳之也。」然則躡、履、蹠三字同。《說文》足部云：「躡，舞履也。」革部云：「鞮，鞮屬。」「鞮，革履也。」《周禮·春官·鞮鞻氏》注云：「鞮讀如履。鞮履，四夷舞者所屣也。今時倡蹋鼓沓行者自有屣。」《史記·貨殖傳》云「躡利屣」，徐廣云：「舞屣也。」段氏玉裁《說文解字注》云：「躡，一作跣。跣，吐協反。《地理志》「跣躡」，臣瓚曰：「躡跟爲跣。」按，舞不納履，故凡不著跟，曳之而行曰躡履，如《雋不疑傳》、《長門賦》皆是也。《西京賦》說舞曰「振朱屣於盤樽」，薛曰：「朱屣，赤絲履也。」謹按：《說文》躡、鞮雖分

兩字，而鞮爲「鞮屬」，鞮爲「舞者所屣」，躡爲「舞履」，則躡與鞮原爲一物，故《呂氏春秋》同載僕謂吳起之言，一云躡，一云履。履即是鞮，爲舞者無跟之履。蓋舞履名鞮以其無跟，履之敝壞者不可以納，但爲躡舉而曳之，如原憲之「縱履」，曾子之「曳縱」，不必爲舞履，以其無跟而亦稱縱。此高誘所以訓履爲「敝履也」，而皆非草履之名。乃劉、趙並以草履釋之者，劉熙《釋名·釋衣服》云：「齊人謂草履曰屣。」於是杜預注《傳》公四年《左傳》「屣履」云：「屣，草履。」因《鞮鞻氏》注言「舞者所屣」，屣既爲草履之稱，鞮既是蹠，故以屣爲草履耳。閻氏若璩《釋地》又續云：「縱其實止解履也，與《史記》虞卿「躡蹠」之蹠別。徐廣曰：「蹠，草履也。」又屣亦草履。按：屣爲齊人稱草履之名，而屣實無此稱。《釋名》又云：「屣，草履也。」「屣，蹠也。出行著之，蹠蹠輕便，因爲名也。」然則草履名屣，舞履名屣，閻氏謂其有別是也。趙氏云「敝喻不惜」者，《釋名》於「齊人謂草履曰屣」之下又云：「不借，言賤易有宜各自蓄之，不假借人也。齊人云搏腊，搏腊猶把作麤貌也。荊州人舁麤絲麻草皆同名也。」《古今注》云：「不借者，草履也。」《說文》糸部云：「緦，①一曰不借

①「緦」，原誤作「緦」，今據下文及《說文》改。

縲。《儀禮·喪服傳》：「繩屨者，繩非也。」注云：「繩非，今時不借也。」《齊民要術·雜說》第三十引崔寔《四民月令》云：「十月可拆麻緝績布縲作白履不借。」注云：「草履之賤者曰不借。」然則不借即不借，不借即屣。趙氏既以「蹠」爲「草履」，故以其稱敝者爲「喻不借」也。○注「舜必」至「貴也」○正義曰：閻氏若璩《釋地》云：「濱，水涯也。占者海之濱便爲政令所不及，故舜竊父處於此，伯夷太公辟紂居於此，因悟「執之而已矣」即《尚書》「盡執拘以歸於周」之執，非指法言。」《音義》云：「訢，音忻。」《爾雅·釋詁》云：「欣，樂也。」《史記·趙世家》荀欣，《漢書·古今人表》作荀訢。《說文》欠部云：「欣，笑喜也。」言部云：「訢，喜也。」段氏玉裁《說文解字注》云：「《萬石君傳》『僮僕訢訢如也』，晉灼引訢曰：『訢，古欣字。』蓋灼所據《說文》訢在欠部欣字下，似與今本不同。」

章指：言奉法承天，政不可枉；大孝榮父，遺棄天下。虞舜之道，趨將如此；孟子之言，揆聖意也。

孟子自范之齊，望見齊王之子，喟然嘆

曰：「居移氣，養移體。大哉，居乎！夫非盡人之子與？」注范，齊邑，王庶子所封食也。孟子之范，見王子之儀聲氣高涼，不與人同。還至齊，謂諸弟子喟然嘆曰：居尊則氣高，居卑則氣下。居之移人氣志使之高涼，若供養之移人形身使充盛也。「大哉居乎」者，言當慎所居。人必居仁也。凡人與王子豈非皆是人之子也？王子居尊勢，故儀聲如是也。疏注「范齊」至「食也」○正義曰：閻氏若璩

《釋地》云：「今東昌府濮州范縣，本春秋晉大夫士會邑，《國語》是以受隨范」是。又半屬魯，①《後漢志》東郡范縣有秦亭，即莊三十一年「築臺於秦」，《地道志》「在縣西北」是也。孟子時則屬齊。趙注云：「范齊邑，王庶子所封食也。」蓋齊王之子生長深宮，賜第於康衢貴仕於朝內，豈容遠在七八百里之下邑，而爲孟子所見？其在范者，殆猶靖郭君、孟嘗君之於薛乎？」○注「孟子」至「是也」○正義曰：以經言「自范之齊」，則是在范望見王子，至齊乃言，故云「之范，見王子之儀」，還至齊，謂諸弟子」。《說文》人部云：「儀，度也。」賈子

①「半」，原誤作「卒」，今從沈校據《四書釋地》改。

《新書·容經》云：「容貌可觀，聲氣可樂。」又云：「夫有威而可畏謂之威，有儀而可象謂之文。」此儀即謂容儀、威儀。經言「望見」，遙而望之，故見其儀。「儀」字從「望」字推之。《梁惠王上》篇「望之不似人君」，注云「望之無儼然之威儀」是也。劉熙《釋名·釋天》云：「氣，愾也。愾然有聲而無形也。」下云「居移氣」，故云「聲氣」，亦即本《容經》「聲氣可樂」之語也。阮氏元《校勘記》云：「高涼」，按，涼字與亮同，古字通用。」按：亮者，明也。乃聲之高明由於志之高明，志之高明由於居之尊貴，故既言「聲氣」又云「氣志」。趙氏以「養移體」爲比喻之辭，故云「若供養之移人形身使充盛」也。《說文》食部云：「養，供養也。」蓋下專言「居」，故以「養」爲喻也。夫居尊爲居，居仁亦爲居，以居仁與居尊較則居仁爲大矣，故云「大哉居乎」。「當慎所居」，猶云「術不可不慎」。同是居，宜擇而居其大者，必以居仁爲大也。即以居勢言之，則居尊者高，居下者卑，居下者之氣不如居尊者之高，而居勢者之小又不如居仁者之大矣。同是子，而王子異於凡人，亦同是人，而君子異於小人，可相觀而喻矣。孟子之言含蓄不盡，趙氏注與《章指》互發明之。「凡人」即凡民，謂衆庶。詳見前。

章指：言人性皆同，居使之異。君子

居仁，小人處利。譬猶王子，殊於衆品也。

孟子曰：「王子宫室車馬衣服多與人同，而王子若彼者，其居使之然也。況居天下之廣居者乎？」**注**言王子宫室乘服皆人之所

用之耳，然而王子若彼高涼者，居勢位故也。況居廣居？謂行仁義。仁義在身，不言而喻也。**疏**注

「仁義在身不言而喻」○正義曰：詳見前。謂仁義根於心其施於四體者，威儀容度，益有可觀。魯君之宋，呼於

埳澤之門。守者曰：「此非吾君也，何其聲之似我君也？」此無他，居相似也。**注**埳澤，

宋城門名也。人君之聲相似者，以其俱居尊勢，故音氣同也。以城門不自肯夜開，故君自發聲。**疏**注

「埳澤」至「發聲」○正義曰：《音義》云：「呼，丁火故切。」閻

氏若璩《釋地》云：「埳澤即襄十七年築者謳曰之澤門，杜氏注『宋東城南門』是也。或曰：得無《禹貢》盟諸澤名其門

乎？按，盟諸澤在故宋國微子所封之東北，此自爲南門耳。」又云：「三衢毛氏曰：呼，喚也。凡歎息招呼則平聲，

《小爾雅》「嗚呼吁嗟」，醫書「一呼一吸爲一息」之類也；叫號而呼則去聲，《詩》「式號式呼」，《左傳》「倉葛呼」之類也。果爾，魯君於垤澤之門，自應如趙注云「以城門不自肯夜開，故君自發聲」之呼爲平聲，不應音去聲爲叫號之呼明矣。近講又云有作魯君自呼之聲者，陋甚。試看「呼於門」，於字是呵護傳呼來於垤澤之門，尤非人之聲音關乎貴賤，呵護傳呼乃賤者之役聲，可習之而能，若魯君與宋君聲爲居高養優所移，豈他人能似？仍屬倉卒自呼，故爲監門者所疑。」按：字義古不以音分，呼喚、號呼雖有不同，而皆爲聲。趙氏以「發聲」解之者，文公元年《左傳》云「江半怒曰呼」，①注云：「呼，發聲也。」《禮記·月令》云「雷乃發聲」，《樂記》云「其聲發以散」，注云：「發猶揚也。」《國語·周語》云：「士氣震發。」《鬼谷子·摩篇》云「怒者動也」，《國語·周語》云「怨而不怒」，韋昭注云：「怒，作氣也。」蓋「發聲」者，奮作其氣而揚厲其聲之謂也。魯君夜至宋城，監門者不肯開納，故魯君怒而發聲，呼於門外。魯君之呼，即猶江半之呼，其聲震動，故守者聞之。「發聲」二字解怒之呼，與杜氏同，杜氏當亦有所受也。因其不肯，所以發怒，注義甚明，正見威之可畏，與王子儀之可象，同一居尊勢所移。若謂慮其夜不開城門，因而君預自請開。顧魯君之來，守者豈不知，所以不肯開者，

正以乘夜而來，詎非襲我？豈魯君自呼以表其非他人而門即啓乎？鄧渾守上東城門，帝至，見面於門且不受詔，豈異國之君自請於門，遂可信而納之乎？且召評《說文》在言部作「評」，號嘽在口部作「嘽」。此呼字，《說文》口部云：「外息也。」呼、評、嘽三字不同。外息謂出其氣，出其氣正是震發其氣。凡人氣息和則呼吸相均，忿而爲怒則呼長而吸小，故象其發怒之聲而以爲呼也。此呼正呼吸之呼，與召評、號嘽自別，無煩以平去分也。趙氏注「嘽爾而與之」讀嘽爲呼而訓爲「咄啐」。此以嘽爲呼之假借，咄啐爲呼，正與此相發明矣。

章指：言輿服器用，人用不殊；尊貴居之，志氣以舒。是以居仁由義，盎然內優；胷中正者，眸子不眳也。疏「眸子不眳」

○正義曰：《音義》云：「眳，丁云：『案，《開元文字》音茂，目不明也。』張亡角反。《玉篇》目部云：「眳，莫遘、亡角二切，目不明貌。」《荀子·非十二子》云「世俗之溝猶眳儒」，楊倞注云：「眳，闇也。闇亦不明也，眳與眳一

①「半」，原誤作「芊」，今據《左傳》改。下一「半」字同。

音之轉。趙氏以晉與優韻，則讀若茂。

孟子曰：「食而弗愛，豕交之也；愛而不敬，獸畜之也。恭敬者，幣之未將者也。恭敬而無實，君子不可虛拘。」**注**人之交接，但食之而不愛，若養豕也；愛而不敬，若人畜禽獸，但愛而不能敬也。且恭敬者如有幣帛，當以行禮，而未以命將行之也。恭敬貴實。如其無實，何可虛拘致君子之心也？

疏注「且恭」至「心也」○正義曰：《爾雅·釋言》云：「將，送也。」孫炎注：「云行之送也。」《周禮·春官·大史》「及將幣之日」，注云：「將，送也。」賈氏疏云：「幣謂璧帛之等。」《禮記·少儀》云「開始見君子者，辭曰某固願聞名於將命者」，注云：「將猶奉也。」孔氏正義云：「將命謂傳辭出入，通主客之言語者也。」將之義為送，為奉，而將幣、將命皆是行禮，故「將」為「行」。趙氏之義蓋謂以幣行禮，必以命行之乃為實；若但以幣將，未以命將，則為無實，不可以虛致君子。《說文》手部云：「拘，止也。」《毛詩·大雅·抑》篇「淑慎爾止」，《魯頌·泮水》篇「魯侯戾止」，傳並云：「止，至也。」至即致，故以「致」釋「拘」。近時

通解謂幣帛未將時已有此恭敬之心，乃是其實；若幣行時方恭敬，即是虛文。君子不可以虛文拘留之。

章指：言取人之道，必以恭敬。恭敬貴實，虛則不應。實者謂愛敬也。

孟子曰：「形色，天性也。」**注**形謂君子體貌嚴尊也。《尚書·洪範》：「一曰貌。」色謂婦人妖麗之容。《詩》曰：「顏如舜華。」此皆天假施於人也。**疏**注「形謂」至「人也」○正義曰：《禮記·樂記》：「在地成形」，注云：「形，體貌也。」《書·無逸》：「嚴恭寅畏」，鄭氏注云：「恭在貌。」《禮記·大傳》：「收族故宗廟嚴」，注云：「嚴猶尊也。」《洪範》：《商書》篇名。云「二五事，一曰貌，貌曰恭，恭作肅」，「恭肅」即「尊嚴」也。《說文》色部云：「色，顏氣也。」《一切經音義》引《三蒼》云：「妖，妍也。」妖麗謂女子容色妍美。引《詩》：《鄭風·有女同車》篇。毛傳云：「舜，木槿也。」《太平御覽》引《傳子》云：「舜華，麗木也。謂之日洽，或謂之洽容，或謂之愛老沖。」舜為麗木，故以比顏色之美好。趙氏謂「體貌尊嚴」與顏色「妖麗」皆天之所生，故為「天性」。阮氏元《校勘記》云：「十行本舜字模糊，閩、

監、毛三本如此。廖本、孔本、韓本、《攷文》古本作葬。按，《音義》出葬字，依《說文》則舜古字，葬俗字也。」惟聖人然後可以踐形。」**注**踐，履居之也。《易》曰：「黃中通理。」聖人內外文明，然後能以正道履居此美形。不言「居色」主名，尊陽抑陰之義也。**疏**注「踐

履」至「義也」○正義曰：《說文》足部云：「踐，履也。」形而言踐履，故以「居之」明之。《禮記·明堂位》言「周公踐天子之位」，即居天子之位也。引《易》者，《坤》六五《文言傳》文，云：「君子黃中通理，正位居體，美在其中而暢於四支。」蓋以「踐形」為「居體」也。《春秋繁露》有《陽尊陰卑》篇，云：「三王之正，隨陽而更起。以此見之，貴陽而賤陰也。故數日者據晝而不據夜，數歲者，據陽而不據陰。是故《春秋》之於昏禮也，達宋公而不達紀侯之母。丈夫雖賤皆為陽，婦人雖貴皆為陰。」趙氏以男子生有美形，宜以正道居之；女子生有美色，亦宜以正道居之。乃上並稱「形色」，下單言「踐形」，不言「踐色」，是尊陽抑陰，猶數晝不數夜，達宋公不達紀侯之母也。「主名」者，「聖人」為男子踐形者之稱。然則居色者之主名，其「聖女」與？《禮記·大傳》云：「異姓主名治際會，名著而男女有別。」注云：「異姓謂來嫁者也。立

於母與婦之名耳。」趙氏以居色者為婦女，故假借此二字也。按：此章乃孟子言人性之善異乎禽獸也。形色即是天性。禽獸之形色不同乎人，故禽獸之性不同乎人。惟其為人之形、人之色，所以為人之性。聖人盡人之性，正所以踐人之形，苟拂乎人性之善，則以人之形而人於禽獸矣，不踐形矣。《孟子》此章言性至精至明。戴氏震《孟子字義疏證》云：「人、物成性不同，故形色各殊。人之形，官器利用大遠於物，而於人之道不能無失，是不踐此形也；猶言之而行不逮，是不踐此言也。」又《原善》云：「孟子曰：『形色，天性也。惟聖人然後可以踐形。血氣心知之得於天，形色其表也。由天道以有人物，五行陰陽，生殺異用，情變殊致。是以人物生生，本五行陰陽，微為形色。其偏全厚薄，勝負雜糅，能否精拙，清濁昏明，煩煩員員，氣衍類滋，廣博襲僻，閎鉅瑣微，形以是形，色以是色，咸分於道。以順則煦以治，以逆則毒。性至不同，各呈乎才。人之才得天地之全能，通天地之全德。從生而官器利用以馭，橫生去其畏不暴其使。智足知飛走蠕動之性，以馴以豢，知卉木之性，良農以蒔刈，良醫任以處方。聖人神明其德，是故治天下之民。民莫不育於仁，莫不條貫於禮與義。」

章指：言體德正容，大人所履；有表

無裏，謂之柚樺。是以聖人乃堪踐形也。

疏「有表無裏謂之柚樺」○正義曰：《音義》云：「柚樺，

丁云：「上以究切，似橙而醋。下音臻，從木莘。」字亦作

榛。榛，似栗而小。」引此一物者，皆謂內不稱外。周氏

廣業《孟子章指攷證》云：「案，樺字，宋本及《韻會》榛字

注引此文並同。攷《說文》：「桼，果實如栗。」「榛，木

也。」其字從桼從木。①《廣雅》作「辛栗」，脫木字。陸璣

《詩疏》、《本草圖經》作莘，謂是栗之一種，則改從莘。今

此作樺，木與草兩岐，恐亦譌體。古本作梓，尤非。「柚皮

厚味甘，實酢不中啖；榛肉作胡桃味，而實肥者少，故江

南諺云：「十榛九空。」趙氏以喻有表無裏，殆以此邪？

齊宣王欲短喪。公孫丑曰：「爲朞之

喪，猶愈於已乎？」**注**齊宣王以三年之喪爲太長

久，欲減而短之，因公孫丑使自以其意問孟子。既

不能三年喪，以朞年，差愈於止而不行喪者。孟子

曰：「是猶或紓其兄之臂，子謂之姑徐徐云

爾。亦教之孝悌而已矣。」**注**紓，戾也。孟子言

有人戾其兄之臂爲不順也，而子謂之曰：且徐徐云

爾。是豈以徐之爲差者乎？不若教之以孝悌，勿

復戾其兄之臂也。今欲行其朞喪，亦猶曰徐徐之類

也。**疏**注「且徐徐云爾」○正義曰：《毛詩·周南·卷耳》

「我姑酌彼金罍」，傳云：「姑，且也。」趙氏佑《溫故錄》云：

「齊宣王欲短喪，意在變今非變古。蓋當時久不行三年之

喪，直已而已矣。齊王殆聞孟子之教，知已之不可，而又以

三年爲過，故欲酌易而從朞。不知天下無得半之理。既知

其非，不求其是，而小變之以爲安，終身無望於是矣。故孟

子於戴盈之請輕稅則喻之攘雞，而公孫丑問短喪則喻之紓

兄。」王子有其母死者，其傳爲之請數月之喪。

公孫丑曰：「若此者，何如也？」**注**丑曰：王之

庶夫人死，迫於適夫人，不得行其喪親之數。其傳

爲請之於君，欲使得行數月喪，如之何？**疏**注「王之

庶」至「之何」○正義曰：閻氏若璩《釋地又續》云：「以經解

經，莫合於《喪服記》「公子爲其母」章以解「王子爲其母」。^②

① 「桼」，據文意疑當作「辛」。

② 「爲」，據文意疑當隨《孟》文作「有」。

此厭於父在，本無服，權爲制練冠麻、麻衣縗緣，既葬而除之服。鄭康成曰：「不奪其恩也。」無厭於嫡母之說。厭嫡母，誤自趙岐，沿於孔疏。明初，《大明令》載「庶子爲其所生母齊衰期」，注曰：「謂嫡母在室者。」後《孝慈錄》成，益定制，讀自製序文，真有冠履倒置之歎。錢氏大昕《潛研堂答問》云：「問：『王子有其母死者，其傳爲之請數月之喪。』」陳氏暘謂「王子所生之母死，厭於嫡母而不敢終喪」。古人之於嫡庶若是其嚴乎？曰：陳氏之說本於趙邠卿，謂「王之庶夫人死，迫於嫡夫人，不得行喪親之數」。其實不然也。禮，家無二尊，故有厭降之義。父卒爲母齊衰三年，而父在則期，厭於父也。禮，尊君而卑臣，亦有厭降之義。天子諸侯絕旁期，大夫降，故士之庶子父在爲其母期，大夫之庶子父在爲其母大功，公子父在爲其母無服，厭於尊也。《儀禮·喪服記》：「公子爲其母練冠麻、麻衣縗緣，既葬除之。」傳曰：「何以不在五服之中也？君之所不服，子亦不敢服也。」大功「章」公之庶昆弟爲其母，傳謂「先君餘尊之所厭，不得過大功」。蓋公之庶子雖父已先卒，猶厭於父之餘尊，不得伸母之服，不言厭於嫡母也。《公羊傳》「母以子貴」，故《春秋》於成風、敬嬴、定姒、齊歸之薨葬，曰「夫人」，曰「小君」，成其爲君母也。惟嫡母在則不得伸其母，然則天子諸

侯爲其生母，謂厭於嫡母，可也；公子爲其母，謂厭於嫡母，不可也。曰：「是欲終之而不可得也。雖加一日，愈於已。謂夫『莫之禁而不爲』者也。」注孟子曰：如是王子，欲終服其子禮而不能者也。加益一日，則愈於止，況數月乎？所謂不當者，謂無禁，自欲短之，故譏之。疏注「王子」至「譏之」○正義曰：《喪服傳》云：「疏衰裳齊，牡麻經，冠布纓，削杖，布帶，疏屨，期者，父在爲母。」此子之禮也。今公子厭於父，爲其母練冠麻、麻衣縗緣，既葬除之，注云：「諸侯之妾貴者視卿，賤者視大夫，皆三月而葬。」然則僅喪三月，視期少九月，是不能「終子禮」也。其傳請數月之喪，蓋即此三月既葬而除之喪。數月者，三月也。公子厭於父，君之所不服，子亦不敢服，則君於庶夫人無一日之喪者也。則公子亦宜不敢有一日之喪。然制禮者權情度義，不奪其母子之恩，故爲制此三月之服。乃雖有此制，必請之於君，俾恩由君出，此傳所以爲之請也。請之，蓋舊例如此，若本無數月之喪之制，安容妄請乎？若依君所不服子不敢服之例，則當已，而得有此推恩三月之禮？是加於已，故云「雖加一日，愈於已」。若無此制，孟子豈如是言乎？夫以當已之喪而尚加三月以

伸母子之恩，而三年之喪降而爲期，何以伸孝子之志？同一愈，於此爲有所禁而加，彼爲無所禁而短。或得或失，不待智者知之矣。

章指：言禮斷三年，孝者欲益，富貴怠厭，思減其日。君子正言，不可阿情。

丑欲替之，故譬以「紵兄徐徐」也。

疏「禮斷

三年」○正義曰：《禮記·三年問》云：「三年之喪，二十五月而畢。哀痛未盡，思慕未忘，然而服以是斷者，豈不送死有已，復生有節也哉？」

孟子曰：「君子之所以教者五：注教民之

道有五品。有如時雨化之者，注教之漸漬而沾

洽也。有成德者，有達財者，有答問者，有私

淑艾者。

注私，獨；淑，善；艾，治也。君子獨善

其身，人法其仁，此亦與教法之道無差也。

疏注「私

獨」至「差也」○正義曰：《呂氏春秋·孝行》篇「身者非其私

有也」，高誘注云：「私猶獨也。」《書·堯典》「烝烝乂」，《史

記·五帝本紀》作「烝烝治」，是乂即治也。《洪範》「恭作肅，

從作乂」，《詩·小雅·小旻》篇云「或肅或艾」，是艾即乂也。

君子獨善其身，原未施教於人，但人以其仁爲法，即不異親受其教。趙氏以「獨善」解「私淑」，則「私淑」指「獨善其身」

之人，艾字指人之「法其仁」以自治。按：《離婁下》篇云：

「予未得爲孔子徒也，予私淑諸人也。」趙氏以爲「我私善之

於賢人」，則「私淑」屬法其仁之人，與此注義異。然「私淑

艾」三字殊不易達。《國策·秦策》「賞不私親近」，注云：

「私猶曲也。」《楚辭·離騷》「皇天無阿私兮」，王逸注云：

「竊愛爲私。」曲、竊皆不直之義也。《說文》又部云：「叔，拾

也。從又，未聲。汝南人名收芎爲叔。」又，手也。「叔从又，

故爲拾取之正訓。」《毛詩·豳風·七月》「九月叔苴」，傳云：

「叔，拾也。」是也。淑與叔通，《詩·陳風》「彼美叔姬」，《釋

文》云：「本亦作淑。」《詩·周南·葛覃》「是刈是漉」，《釋

文》云：「刈，本又作艾。」《韓詩》云：「刈，取也。」《禮記·祭

統》「草艾則墨」，注云：「草艾謂艾取草也。」是艾之義爲取，

與叔之義爲拾同。蓋「私淑諸人」即私拾諸人也。淑、艾二

字義相疊，「私淑艾」者即私拾取也。親爲門徒，面相授受，

直也；未得爲孔子之徒，而拾取於相傳之人，故爲私。「私

淑」猶云「竊取」也。彼言私淑諸人，不必又疊艾字，其義自足；此疊艾字以足其句，其實「私淑艾」猶「私淑」也。德恐

其惑而不定，故成之。財即才也。才恐其滯而不通，故達之。義易明，故趙氏不注。《音義》云：「陸云：『達財，周恤之。』」一本作才，①說云：「以有善才，就開其性理也。」開其善才，此正義也，轉附諸後而取陸之說。陸直以財爲貨財，全不知古人六書通借之學，鄙不足議，況淑之爲叔拾乎！此五者，君子之所以教也。」**注**申言之，孟子貴重此教之道。

章指：言教人之術，莫善五者。養育英才，君子所珍。聖所不倦，其惟誨人乎？

公孫丑曰：「道則高矣美矣，宜若登天然，似不可及也。何不使彼爲可幾及而日孳也？」**注**丑以爲聖人之道大高遠，將若登天，人不能及也。何不少近人情，令彼凡人可庶幾，使日孳孳自勉也？**疏**注「可庶幾使日孳孳自勉也」○正義

曰：《說文》子部云：「孳，汲汲生也。」②又支部云：「孜孜，汲汲也。《周書》曰：『孜孜無怠。』」孜、孳二字古多通用。

前「孳孳爲善者」，《音義》引張云：「與孜同，古字通用，下文同。」下文即指此章也。「自勉」與「無怠」義亦相近。僞孔《尚書》傳云：「孳孳，勸勉不息。」戴氏震《孟子字義疏證》云：「問：顏子喟然歎曰：『仰之彌高，鑽之彌堅。』瞻之在前，忽焉在後。」③公孫丑曰：「道則高矣美矣，宜若登天然，似不可及也。何不使彼爲可幾及而日孳孳也？」今謂人倫日用舉凡出於身者謂之道，但就此求之，得其不易之則可矣，何以茫然無據又若是哉？曰：若孟子言「夫道若大路然，豈難知哉」，謂人人由之。如爲君而行君之事，爲臣而行臣之事，爲父爲子而行父之事行子之事，皆所謂道也。君不止於仁，則君道失；臣不止於敬，則臣道失；父不止於慈，則父道失；子不止於孝，則子道失。然則盡君道、臣道、父道、子道，非智仁勇不能也。質言之，曰達道曰達德，精言之，則全乎智仁勇者，其盡君道、臣道、父道、子道，舉其事而亦不過謂之道。故《中庸》曰：「大哉，聖人之道！洋洋乎發育萬物，峻極於天。優優大哉！禮儀三百，威儀三千，待

①「作才」，原脫，今從沈校據《孟子音義》補。

②「孳汲汲」，原誤作「孳孳汲汲」，今據《說文》改。

③「焉」，原誤作「然」，今從沈校據《孟子字義疏證》改。

其人而後行。」極言乎道之大如是，豈出人倫日用之外哉？以至道歸之至德之人，豈下學所易窺測哉？今以學於聖人者，視聖人之語言行事猶學弈於弈秋者，莫能測弈秋之巧也，莫能遽幾及之也。顏子之言又曰：「夫子循循然善誘人，博我以文，約我以禮。」《中庸》詳舉其目，曰博學、審問、慎思、明辨、篤行，而終之曰：「果能此道矣，雖愚必明，雖柔必強。」蓋循此道以至乎聖人之道，實循此道以日增其智，日增其仁，日增其勇也，將使智仁勇齊乎聖人。其日增也有難有易，譬之學一技一能，其始日異而月不同，久之，人不見其進矣；又久之，已亦覺不復能進矣，人雖以國工許之，而自知未至也。顏子所以言「欲罷不能，既竭吾才，如有所立，卓爾，雖欲從之，末由也已」。此顏子之所至也。」李氏光地《榕村藏稿》云：「丑非欲孟子貶其高美，欲孟子使已幾及其高美耳；又非以其立教之高而謂如天不可幾及，正謂其立教之循循有序而苦於高美者，速至之無期如天之不可幾及耳。故孟子告之云云。」孟子曰：「大匠不為拙工改廢繩墨，羿不為拙射變其彀率。君子引而不發，躍如也。中道而立，能者從之。」**注**大匠不為新學拙工故，為之改鑿廢繩墨之正也；羿不為

新學拙射者，變其彀率之法也。彀，弩張，嚮表率之正體，望之，極思用巧之時。不可變也。君子謂於射則引弓彀弩而不發，以待彀偶也；於道則中道德之中，不以學者不能，故卑下其道，將以須於能者往取之也。**疏**注彀弩「至取之也」○正義曰：《告子上》篇「必志於彀」，注云：「彀，張也。張弩向的者，用思專時也。」此云「弩張向表率之正體」，以「張弩向的」準之，則「表率之正體」即指的而言。正體謂正鵠之體，表即標也。《周禮·夏官·射人》注云：「《考工·梓人》職曰：『張五采之侯，則遠國屬。』五采之侯即五正之侯。正之言正也，射者內志正則能中焉。畫五正之侯，中朱，次白，次蒼，次黃，玄居外。三正損玄黃，二正去白蒼而畫以朱綠。畫此五采以為標識，即以為「表率」，故趙氏以「表」釋「率」而以為「正體」也。《小雅·賓之初筵》「發彼有的」，毛傳以「質」釋的，《禮記·射義》注以「所射之識」釋的。「所射之識」猶云「標」也。「望之極思用巧之時」即所謂「用思專時」也。按：《禮記·緇衣》引太甲曰：「若虞機張，往省括於厥度，則釋。」注云：「機，弩牙也。度謂所擬射也。虞人之射禽，弩已張於機間，視括與所射參相得，乃後釋弦發矢。」「機張」即《孟子》所謂「彀」

也。《淮南子·覽冥訓》云：「以治日月之行律」，高誘注云：「律，度也。」律與率同。「行度」可云「行率」，則《孟子》所云「率」正即「省括於度」之度也。繩墨兩事，穀率亦是兩事。穀謂張弩，率謂省括於度。趙氏言「極思用巧」即是省，而「率」則不必專指正之體耳。《音義》云：「丁云：『率，循也。』謂穀張其弩，又當循其射道，令必中於表。」陸云：「率，法也。躍如，心願中也。能者從之，當勤求也。」則讀爲律。「丁訓率爲循，非其義，陸讀爲律訓法，近是矣。」《說文》弓部云：「引，開弓也。」《淮南子·說林訓》「引弓而射」，高誘注云：「引，張弓也。」引爲張弓，故趙氏即以「穀弩」釋「引弓」。引弓不發即猶張弩不發，故云「引弓穀弩而不發」。《音義》云：「丁云：『躍如猶如卓爾。』」陸云：「躍如，心願中。」陸是也。心願中，故「不發以待穀之偶」。《爾雅·釋詁》云：「偶，合也。」謂所張之穀合乎所擬之率，則釋之乃必中也。待其合而後發，故不遽發者，必願中也。躍如猶云躍躍，《爾雅·釋詁》「躍躍，迅也」。《釋詁》云：「迅，疾也。」言手雖不發，心則躍躍疾去也。《論語·子罕》篇「卓爾，雖欲從之，末由也已」，鄭氏注云：「卓爾，絕望之辭。」《詩·周頌》「天作高山」，箋云：「卓爾與天合其德」。丁氏之說擬不於倫。趙氏以「君子於射」喻「君子於道」，引而不發以待其偶，中道而

立以待其從。雖以「穀弩」釋「引弓」，與上「變穀率」意不同也。

章指：言曲高和寡，道大難追。然而履正者不枉，執德者不回，故曰「人能宏道」。丑欲下之，非也。**疏**「曲高和寡」○正義曰：《新序》宋玉對楚威王曰：「其曲彌高者，其和彌寡。」

孟子曰：「天下有道，以道殉身；天下無道，以身殉道。未聞以道殉乎人者也。」**注**殉，從也。天下有道，得行王政，道從身施功實也；天下無道，道不得行，以身從道，守道而隱。不聞以正道從俗人者也。**疏**注「殉從也」○正義曰：《文選·幽通賦》「豈余身之足殉兮」，**注**引項岱云：「殉，從也。」《史記·屈原賈生傳》「貪夫殉財」，《索隱》引臣瓚云：「亡身從物謂之殉。」《莊子·駢拇》云「小人則以身殉利」，《釋文》引崔注云：「殺身從之曰殉。」

①「幽通」，原誤倒，今據《文選》乙。

章指：言窮達卷舒，屈伸異變。變流從顧，守者所慎。故曰「金石獨止」，不殉人也。**疏**「金石獨止」○正義曰：《說苑·談叢》篇云：「水浮萬物，玉石留止。」

公都子曰：「滕更之在門也，若在所禮，而不答，何也？」**注**滕更，滕君之弟，來學於孟子者也。言國君之弟而樂在門人中，宜答見禮，而夫子不答，何也？孟子曰：「挾貴而問，挾賢而問，挾長而問，挾有勳勞而問，挾故而問，皆所不答也。滕更有二焉。」**注**挾，接也。接己之貴勢，接己之有賢才，接己長老，接己嘗有功勞之恩，接己與師有故舊之好，凡恃此五者，而以學問望師之待以異意而教之，皆所不當答。滕更有二焉，接貴、接賢，故不答矣。**疏**注「挾接也」○正義曰：《說文》手部云：「挾，俾持也。」《楚辭·天問》「何馮弓挾矢」，王逸注云：「挾，持也。」《廣雅·釋詁》云：「接，持也。」是挾與接義同也。《儀禮·鄉射禮》「兼挾乘矢」，《大射儀》「挾乘

矢」，注並云：「方持弦矢曰挾。古文挾皆作接。」是挾與接字通也。挾為俾持，接為方持，義有不同，而為持則同，故云：「挾，接也。」昭公十九年《左傳》「以持其世而已」，《釋文》云：「持，本作恃。」《莊子·徐無鬼》「恃源而往者也」，《釋文》云：「恃，本亦作持。」持恃同聲義通，挾之為持，即為恃，故趙氏既以「接」釋「挾」，又云「恃此五者」。挾貴、挾賢、挾長、挾有勳勞、挾故而問，即持貴、持賢、持長、持有勳勞、持故而問，亦即恃貴、恃賢、恃長、恃有勳勞、恃故而問。

章指：言學尚虛己，師誨貴平。是以滕更恃二，孟子弗應。

孟子曰：「於不可已而已者，無所不己；於所厚者薄，無所不薄也。其進銳者，其退速。」**注**已，棄也。於義所不當棄而棄之則不可。所以不可而棄之，使無罪者咸恐懼也。於義當厚而反薄之，何不薄也？不憂見薄者亦皆不自安

①「談」，原誤作「說」，今從沈校據《說苑》改。

矣。不審察人而過進不肖越其倫，悔而退之必速矣。當「翔而後集」，慎如之何？

疏注「已棄」至「懼

也」^①○正義曰：《論語·公冶長》篇「三已之」，對上「三仕」，則已爲罷黜。昭公二十九年《左傳》「水官棄矣」，杜預注云：「棄，廢也。」是已即棄也。趙氏以無罪而黜則凡仕者皆自危，故云「使無罪者咸恐懼」也。○注「於義當厚」至「安矣」○正義曰：「何不薄」猶云何人不爲所薄。素與親厚者本不憂其薄，今見其自薄於所當厚，則人人不安，而親厚不可恃也。○注「不審」至「之何」○正義曰：《莊子·天下》篇云「銳則挫矣」，郭象注云：「進躁無崖爲銳。」進之太過，故以「過進」解「其進銳」也。「越其倫」即「卑踰尊，疏踰戚」，故引「翔而後集」，與《梁惠王下》篇「故國」章《章指》同。《論衡·狀留》篇云：「呂望之徒，白首乃顯，百里奚之知，明於黃髮。深爲國謀，因爲王輔，皆夫沉重難進之人也。輕躁早成，禍害暴疾，故曰：其進銳者退速。」《後漢書·李固傳》「陽嘉二年固對策」云：「先帝寵遇閭氏，位號太疾，故其受禍曾不旋時。老子曰：『其進銳，其退速也。』」李賢注云：「案，《孟子》有此文。」謝承書亦云《孟子》，而《續漢書》復云《老子》。按：李固自是引《孟子》，宜以謝承書爲是，范蔚宗本

司馬彪之誤爲《老子》耳，《老子》無此文也。趙氏注義與王充、李固同。然則漢時解《孟子》此文皆以刑賞用人言，趙氏蓋有所自也。

章指：言賞僭及淫，刑濫傷善。「不僭不濫」，詩人所紀。是以季文三思，何後之有？

疏「賞僭」至「所紀」○正義曰：襄公二十六年蔡聲子謂楚子木曰：「善爲國者，賞不僭而刑不濫。賞僭則懼及淫人，刑濫則懼及善人。若不幸而過，寧僭無濫。與其失善，寧其利淫。無善人則國從之。」《商頌》有之曰：「不僭不濫。」《說苑·善說》篇云：「管誅羊舌虎，叔向爲之奴，祁奚見范宣子曰：『善爲國者』」云云，文與此同。《荀子·君臣》篇作「賞僭則利及淫人，刑濫則害及君子」。

孟子曰：「君子之於物也，愛之而弗仁，**注**物謂凡物可以養人者也。當愛育之而不加

①「懼」，原誤作「慎」，今據注文及下一條疏始自「於義當厚」改。

人仁，若犧牲不得不殺也。

疏注「物謂」至「殺也」○正

義曰：《周禮·天官·宰夫》「凡失財用物辟名者」，^①注云：「物，畜獸也。」《說文》牛部云：「物，萬物也。牛爲大物，故從牛，勿聲。」下言「犧牲」，則「物可以養人」，謂六畜牛羊之類也。《禮記·樂記》云：「仁以愛之。」《荀子·大略》篇云：「仁，愛也，故親。」《韓詩外傳》云：「愛由情出謂之仁。」《說苑·談叢》云：「愛施者，仁之端也。」是愛與仁義亦通，故《廣雅·釋詁》云：「愛，仁也。」此云「愛之而弗仁」，是仁與愛別。蓋有愛物之愛，有愛人之愛，愛人之愛則謂之仁。《春秋繁露·仁義法》云：「愛在人謂之仁。」愛在人乃謂之仁，然則愛在物不謂之仁矣。愛物者第養育之，不同於愛人之爲仁，故云「當愛育之，不如人仁」。《禮記·祭義》云：「古者天子諸侯必有養獸之官，犧牲祭牲必於是取之。」《天官·庖人》「辨六畜之名物」，注云：「六畜，六牲也。始養之曰畜，將用之曰牲。」是犧牲先養育之而後殺也。於

民也，仁之而弗親。

注臨民以非己族類，故不得

與親同也。

疏注「臨民」至「同也」○正義曰：《說文》人部

云：「仁，親也。」親即是仁，而仁不盡於親。仁之在族類者爲親，其普施於民者通謂之仁而已。仁之言人也，稱仁以別

於物，親之言親也，稱親以別於疏。親親而仁民，仁

民而愛物。^②**注**先親其親戚然後仁民，仁民然後愛

物，用恩之次也。

疏「親親」至「愛物」○正義曰：程氏瑤

田《通藝錄·論學小記》云：「人有恒言，輒曰：『一公無私』，此非過公之言，不及公之言也。此一視同仁，愛無差等之教也。其端生於意必固我，而其弊必極於父攘子證，其心則陷於欲博大公之名，天下之人皆枉己以行其私矣。而此一人也獨能一公而無私，果且無私乎？聖人之所難，若人之所易，果且易人之所難乎？果且得謂之公乎？公也者，親親而仁民，仁民而愛物。有自然之施爲，自然之等級，自然之界限。行乎不得不行，止乎不得不止。時而子私其父，時而弟私其兄，自人視之，若無不行其私者。事事生分別也，人人生分別也，無他，愛之必不能無差等，而仁之必不能一視也。此之謂公也，非一公無私之謂也。《儀禮·喪服傳》之言昆弟也，曰：『昆弟之義無分，然而有分者，則辟

①「者」，原誤作「也」，今從沈校據《周禮》改。

②「談」，原誤作「說」，今從沈校據《說苑》改。

③「義」，原誤作「道」，今從沈校據《儀禮》改。

子之私也。子不私其父則不成爲子。」^①孔子之言直躬也，曰：「父爲子隱，子爲父隱，直在其中。」皆言以私行其公，是天理人情之至，自然之施爲等級界限，無意、必、固、我於其中者也。如其不私，則所謂公者必不出於其心之誠然，不誠則私焉而已矣。或問第五倫曰：「公有私乎？」曰：「吾兄子嘗病，一夜十往，退而安寢，吾子有疾，雖不省視而竟夜不眠。豈可謂無私乎？」嗚乎！是乃所謂公也，是父子相隱者之爲吾黨直躬也。不博大公之名，安有營私之舉？天不容僞，故愚人千慮必有得焉，誠而已矣。」

章指：言君子布德，各有所施。事得其宜，故謂之義也。

孟子曰：「知者無不知也，當務之爲急，仁者無不愛也，急親賢之爲務。」^注知者，知所務善也；仁者，務愛賢也。^疏注「知者」至「賢也」

○正義曰：《說文》力部云：「務，趣也。」知所務，知所當趣向也。「務愛賢」，以「愛」釋「親」，宜急趣於愛賢也。堯舜

之知而不徧物，急先務也；堯舜之仁不徧愛

人，急親賢也。^注物，事也。堯舜不徧知百工之事，不徧愛衆人，先愛賢，使治民，不二三自往親加恩惠。^疏注「物事」至「恩惠」○正義曰：「物」之爲「事」，

詳見前。百工，百官也。急親賢爲務，則知所當務，即知急親賢也。知急親賢，因即以親賢爲務，所以不必「徧知百官之事」，不必「自往加惠」於民。閩、監、毛三本「二三自往」作「一一自往」。按：「二三」猶云「再三」，《儀禮·鄉射禮》「主人西南面三拜衆賓」，注云：「三拜示徧也。」《少牢饋食禮》「主人西面三拜饗者」，注云：「三拜，旅之示徧也。」「二三自往」即徧義也。不能三年之喪而緦少功之察，放飯流歠而問無齒決，是之謂「不知務」。^注尚不能行三年之喪而復察緦麻小功之禮。放飯，大飯也；流歠，長歠也；齒決，斷肉置其餘也。於尊者前賜飯，大飯、長歠，不敬之大者；齒決，小過耳。言「世之先務，舍大譏小」，若此之類也。^疏注「放飯」至「過耳」○正義曰：《禮記·曲禮》：「毋放飯，毋流歠。」又

①「爲」，原誤作「其」，今據《儀禮》改。

云：「濡肉齒決，乾肉不齒決。」注云：「去手餘飯於器中，人所穢。大歎嫌欲疾。」決猶斷也。乾肉堅，宜用手。」孔氏正義云：「放飯者，手就器中取飯，飯若黏著手，不得拂放本器中者。去手餘飯於器中，人所穢也。當棄餘於筐，無筐，棄餘於會，會謂簋蓋也。毋流歎者，謂開口大歎，汁入口如水流，則欲多而速，是傷廉也。」濡肉齒決者，濡，溼也。溼軟不可用手擘，故用齒斷決而食之。乾肉，脯屬也，堅脆不可齒決斷之，故須用手擘而食之。」按：趙氏以「流歎」為「長歎」，與鄭同；而以「放飯」為「大飯」，與鄭異。大飯猶長歎也。《呂氏春秋·審分》篇「無使放悖」，高誘注云：「放，縱也。」又《適威》篇「故流於彘」，注云：「流，放也。」是「放飯」猶「流歎」也。《文選·上林賦》「流離輕禽」，注引張揖云：「流離，放散也。」蓋歎，歎之也；則飯，飯之也。流歎謂流離而歎之，放飯謂放縱而飯之。以《孟子》證《曲禮》，則飯讀「飯黍」、「飯殮」、「飯疏食」之飯。段氏玉裁《說文解字注》云：「飯，食也。食也者，謂食之也。此飯之本義也。引申之所食為飯。今人於本義讀上聲，於引申之義讀去聲，古無是分別也。」然則鄭云「去手餘飯」，則以飯為所食之飯，即指饋餽之粒，與歎為不類；而訓放為去，去手之餘飯，何以見其必為反本器？設去之反於筐，反於會，亦可云「放飯」也。

放不得專為反本器之稱，則不如趙氏之義為的矣。「問無齒決」者，蓋食濡肉而以手決之，責問其何以不齒決也。

章指：言振裘持領，正羅維綱；君子百行，先務其崇。是以堯舜親賢，大化以隆道為要也。疏「振裘持領正羅維綱」○正義曰：周氏廣業《孟子章指考證》云：「《意林》載桓譚《新論》云：『舉網以綱，千目皆張，振裘持領，萬毛自整。』」趙氏正用其語。

姪廷琮廷弼校字

孟子正義卷二十七終

孟子正義卷二十八

江都縣鄉貢士焦循撰集

孟子卷第十四

盡心章句下凡三十八章。

孟子曰：「不仁哉，梁惠王也！仁者以其所愛及其所不愛，不仁者以其所不愛及其所愛。」**注**梁，魏都也。以，用也。仁者用恩於所愛之臣民。王政不偏，普施德教，所不親愛者并蒙其恩澤也。用不仁之政加於所不親愛則有災傷，加所愛之臣民，亦并被其害。惠王好戰殺人，故孟子曰「不仁哉」。

疏注「梁魏都也以用也」○正義曰：《漢書·

地理志》：「陳留郡浚儀，故大梁，魏惠王自安邑徙此。」應劭曰：「魏惠王自安邑徙此，號曰梁。」按：大梁爲魏都，自惠王三十一年始，自是惠王遂稱梁王焉。《說文》已部云：「已，用也。」已即以字。①公孫丑問曰：「何謂也？」**注**丑問「及所愛」之狀，何謂也？「梁惠王以土地之故，糜爛其民而戰之。大敗，將復之，恐不能勝，故驅其所愛子弟以殉之。是之謂以其所不愛及其所愛也。」**注**孟子言惠王貪利鄰國之土地而戰，其民死亡於野，骨肉糜爛而不收。兵大敗而欲復戰，恐士卒少不能用勝，故復驅其所愛近臣及子弟而以殉之。殉，從也。所愛從其所不愛而往趨死亡，故曰「及其所愛」也。東敗於齊，長子死焉。

疏「糜爛其民」○正義曰：王氏念孫《廣雅疏證》云：「《說文》：『糜，爛也。』《孟子·盡心》篇：『糜爛其民而戰之。』《越語》：『靡王躬身』，韋昭注云：『靡，損也。』糜、靡並通。《楚辭·招魂》：『糜散而不可止些』，王逸注

①「已」，原作「已」，今據上文統一作「已」。

云「糜，碎也。」《九歎》「名靡散而不彰」，注云：「靡散猶消滅也。」並與糜數同。段氏玉裁《說文解字注》云：「石部云：『碎，糠也。』米部曰：『糠，碎也。』」二篆爲轉注。糠，各書假糜爲之，《孟子》假糜爲之。碎者，破也。糠者，破之甚也。王逸注《離騷》「瓊糜」云：「糜，屑也。」糜即糠字。《廣雅》糜字二見：曰「糜，饘也」，與《說文》同；曰「糜，糲也」，即《說文》之「糠，碎也」。凡言粉碎之義當作糠。又云：「糜，爛也。古多假糜爲之。糜訓慘，糜訓爛，義各有當矣。《孟子》「糜爛其民而戰之」，《文選·答客難》「至別糜耳」，皆用假借字耳。」按：《淮南子·說山訓》「爛灰生蠅」，高誘注云：「爛，腐也。」劉熙《釋名·釋飲食》云：「糜，煮米使糜爛也。」糜即粥，比飯爲爛，故糜即爛，義與糜通也。

章指：言發政施仁，一國被恩；好戰輕民，災及所親。著此魏王，以戒人君也。

孟子曰：「《春秋》無義戰。彼善於此，則有之矣。征者，上伐下也。敵國不相征也。」**注**《春秋》所載戰伐之事，無應王義者也，彼此相覺有善惡耳。孔子舉豪毛之善，貶纖介之惡，故

皆錄之於《春秋》也。上伐下謂之征。諸侯敵國，不得相征。五霸之世，諸侯相征，於三王之法不得其正者也。**疏**「春秋」至「有之矣」○正義曰：《春秋》繁露·

竹林篇云：「《春秋》之法，凶年不脩舊，意在無苦民爾。苦民尚惡之，況傷民乎？傷民尚痛之，況殺民乎？凶年脩舊則譏，造邑則諱。是害民之小者，惡之小也；害民之大者，惡之大也。今戰伐之於民，其爲害幾何？考意而觀指，則《春秋》之所惡者，不任德而任力，驅民而殘賊之，其所好者設而勿用仁義以服之也。《詩》云：『弛其文德，洽此四國。』此《春秋》之所善也。夫德不足以親近而文不足以來遠，而斷斷以戰伐爲之者，此固《春秋》之所甚疾已，皆非義也。」又云：「《春秋》愛人而戰者殺人，君子奚說善殺其所愛哉？故《春秋》之於偏戰也，比之詐戰則謂之義，比之不戰則謂之不義。不義之中有義，義之中有不義，辭不能及，皆在於指。非精心達思者，其孰能知之？」此即發明《孟子》「無義戰」之義也。萬氏斯大《學春秋隨筆》云：「禮樂征伐自天子出，皆御世之權。其足以取威制勝，使人懾服而屈從之，尤莫如征伐。故欲知《春秋》大勢者，當於諸國之侵伐觀之。據《公羊傳》例，將尊師衆稱某師師，將尊師少稱將，將卑師衆稱師，

將卑師少稱人。君將不言帥師，書其重者。以是按之經傳，終《春秋》惟魯君將稱公，諱之或稱師稱及，大夫將稱氏名，微者不言將。列國之師，自隱至文，君將恒稱爵，略之或稱師稱人，大夫將悉稱師稱人，無有書氏名者。大夫將書氏名，自文三年晉陽處父伐楚救江始。竊疑《公羊》例未合。王氏沿曰：「處父書氏名者，政在諸侯則大夫皆稱人，政在大夫，故稱氏名以罪之也。處父盟魯侯，改蒐於童，易軍班，今救江而伐楚，專之甚者也。故始之也。」陳君舉亦曰：「大夫帥師於是始，大夫始強也。」趙子常因二說而通之曰：「《公羊》之例，當時史法也。夫子脩《春秋》，征伐自諸侯出，則君將稱君，大夫將稱人，治在諸侯也；征伐在大夫，則大夫將稱大夫，治在大夫也。惟內大夫悉從其恒稱以見實也。」於乎，可謂盡發不傳之秘矣！蓋史官有一定之法，夫子有筆削之權，史法以徵事實，筆削則顯世變。執事以讀《春秋》，二百四十二年天下大勢，瞭然於心目間矣。內大夫何以悉稱氏名？《春秋》魯史也。「《春秋》無義戰，敵國不相征。」凡書侵伐，皆罪也。滅人遷取，罪之尤者也。「惠氏士奇《春秋說》云：「古者王巡守，大司馬起師合軍以從，於是救無辜，伐有辜，所以威天下而行其禁令焉。環人掌四方之故，揚軍旅，降圍邑，而九伐之法，賊賢害民則伐之，負固不

服則侵之。是故伐也，侵也，圍也，救也，皆王者之師。不虐五穀，不伐樹木，不焚室屋，不取六畜。兵之來也，除民之讐，順天之道而已。《公羊》曰：「精者曰伐，憊者曰侵。」《左氏》曰：「有鐘鼓曰伐，無者曰侵，輕者襲。」鐘鼓言其器也，精憊言其情也。獨《穀梁》曰：「苞人民，斃牛馬曰侵，斬樹木，壞宮室曰伐，不義孰甚焉？」此《春秋》之侵伐，豈王者之師哉？要而論之，大曰伐，小曰侵，侵之輕且密者曰襲，遲曰圍，急曰救。故伐者伐其君，侵者侵其地，襲則掠之，圍則合之，救則分之：行師之道備矣。周室既卑，征伐不出乎天子，皆出自諸侯及其大夫，故《春秋》無義戰，莫如莊六年王人救衛爲尤甚。先是，宋公不王，諸侯以王命討之，故公會齊侯於防而謀伐宋，其不會王命者，蔡人、衛人、邾人而已。及鄭伯不朝，蔡人、衛人、陳人從王伐鄭，則諸侯猶知有王命也。陳、蔡鄰於楚，楚之屬國，是時楚方平漢陽，未暇謀中夏，故陳、蔡猶得從王，君子以爲近正。及桓十六年衛侯朔出奔齊，《公羊》以爲得罪於天子，故稱名以絕之，則似未得其實。蓋宣公殺急子、壽子，皆朔構而殺之，故國人怨朔而悲二子，遂出朔而立公子黔牟，似請命於天王而立之。說者以爲出朔而立黔牟者，衛之左右二公子也，未聞有天王之命。如其然，則五國共伐衛而納朔，王人何爲獨救黔牟？

明黔牟乃王命立之，五國逆王命而伐衛。吾聞狄伐邢而齊人救邢，義也；諸侯伐衛而王人救衛，則王人夷於齊人而中國皆戎翟矣。君子傷諸夏之無君，故一出一入皆稱名，一伐一救皆稱人。人諸侯者舉之，人子突者微之，此天子之使也，曷爲微之？以天王之使而不能救黔牟，爲尊者諱耻，故微之。然則何以知王命立黔牟？以《左傳》知之。《傳》曰：「衛侯入，放公子黔牟於周。」不殺之而放之，且放之於周，則王命立黔牟明矣。立之者，周也，故放之於周，若曰「以黔牟付王人」云爾。黔牟立於桓十六年，放於莊六年，前後八年在位，《春秋》曷爲闕而不書？且衛之叔武及公孫剽，皆嘗在位而不終者也，《春秋》皆書於冊，曷爲獨闕黔牟？諱之也。諱有三：一曰爲天王諱，二曰爲魯諱，三曰爲中國諱。曷爲爲中國諱？王人救衛，未聞中國有一人從王者，君子耻之，故《春秋》不得不褒二霸之功。齊之霸始於莊終於僖，晉之霸始於僖終於定，故曰「其事則齊桓晉文」。推戴維持，皆齊桓、晉文之力，《春秋》實以二霸爲始終焉。隱、桓之時，互相侵伐者惟東諸侯而已，西則晉爲大，南則楚爲雄。桓二年蔡、鄭會於鄧，始懼楚，楚熊通自立爲武王。桓六年合諸侯於沈鹿，黃、隨不會，使人讓黃而伐隨，始開百濮之地，由是南諸侯皆服於楚。其子熊貲，是爲文王，當魯

莊之十年，始敗蔡師於莘。蔡本東諸侯，至是始屬楚，而楚遂有虎視中原之志。十五年齊始霸，十六年同盟於幽，始與鄭成，而荆伐鄭，蓋楚與中原爭鄭自此始。楚成王時，令尹子文當國，楚益盛。僖元年荆始改號爲楚。自元年至四年，楚人再伐鄭，一侵鄭。鄭伯欲成，孔叔不可曰：「齊方勤我，棄德不祥。」則齊桓實能以德綏之也。自荆敗蔡師於莘，惟十三年蔡人與於北杏之會，自是會盟征伐，蔡皆不與焉。蓋役屬於楚，負楚之固而不服於齊，故僖四年齊桓會七國之師侵蔡，所謂負固不服則侵之也。說者謂潛師掠境曰侵，失之矣。會而侵，則非潛師矣；侵而潰，則非掠境也。欲伐乃侵，先潰蔡，既侵遂伐，卒帖荆。自此至十五年，楚人一滅弦，一圍許，一伐黃，一伐徐，一敗徐，其氣未息，烏在其能帖荆哉？帖荆者，以其不復能爭鄭也。且齊桓之於楚，以文服，不以力服。①召陵之役雖以兵車而不傷一卒，不折一矢，無異衣裳之會，故《春秋》善之。莊三十年齊人伐山戎，是時戎翟並興，中國不絕若綫，齊方救邢戍衛，奔命不遑，山戎病燕，猶邢、衛也。邢、衛近而燕遠，豈以其遠而棄之？桓公內無因國，外無從諸侯，越千里之險，北伐山戎，危之

①「不」，原脫，今從沈校據《春秋說》補。

乎？抑貶之乎？曰：否，善之也。善之則曷爲稱人？稱人者，以桓公能急人之急，病人之病，故輕千里而不愛一身。齊侯來獻戎捷，禮與？曰：禮也。《左氏》曷爲謂之非禮？《左氏》言當獻於王，不當獻於魯。獻於王不書，獻於魯則書曰來獻，尊宗國也。穀梁子曰「軍得曰捷」，戎捷者，戎菽也。《周書·王會》有「山戎菽」，《管子》亦云：「北伐山戎，出冬蔥與戎菽，布之天下。」桓公以此遺魯而尊之曰獻，猶《曲禮》獻粟、獻米云爾。齊桓歿而楚氛益熾，敗宋伐陳而魯、衛亦靡然從之。僖二十七年遂合陳、蔡、鄭、許以圍宋，而晉文勃興，釋宋圍而敗楚師於城濮，由是楚氛息矣。君子謂晉文之功大於齊桓。然齊桓以德，諸侯愛之；晉文以力，諸侯畏之。自是楚不敢復爭鄭者十有五年。秦晉構兵始於殽之戰，其後兵連不息，報復無常，而秦遂合於楚，卒爲晉患，故《春秋》於殽之戰，狄秦而微晉，交譏之。與晉爭中原者，楚也。秦、晉，甥舅之國。城濮之戰，秦有功焉。合秦以敵楚，文公之善謀也。且晉不敗秦，何害於霸？而汲汲焉背殽而要秦於險，君子是以貶晉襄公。《春秋》諸儒以《秦誓》編於《書》，故盛稱穆公之德；而《春秋》獨於秦穆無善辭，學者疑之。秦用孟明，所謂乞乞勇夫也。既喪師於殽，匹馬隻輪無反，仍不悔過，甫及三年，復以憤兵而敗於彭衙。秦穆誠能

詢茲黃髮，焉用此乞乞勇夫而大辱國哉？故君子有取於《秦誓》，所謂不以人廢言；而《春秋》以其言行不相顧，故無善辭。文三年秦伯伐晉稱人，四年晉侯伐秦稱爵，安見其尊秦也？令狐之役曲在晉，兩稱人。及十年秦伐晉，康公自將，《春秋》不書爵，不稱人，直以秦爲狄矣。蓋自殽之戰，秦穆之毒晉尤深，思天下可以敵晉者惟楚，於是遣楚囚鬬克歸楚求成，共謀伐晉，始作《秦誓》，旋遣楚囚，誠所謂「今之謀人，姑將以爲親」者，其心忌克，惟圖報復而已。秦楚合而晉霸少衰矣。及晉厲公立，合諸侯伐秦，且先使呂相絕秦。是時，秦桓與晉厲既爲令狐之盟，而又召狄與楚，欲道以伐晉，故聲其舉以討之。於是諸侯朝王，仍自京師從劉康公、成肅公伐秦。君子謂是師也，名之正，辭之順，《春秋》書之特詳，明與厲公以復霸也。故吾謂厲公非無道之主，以此。其後悼公三駕伐鄭而楚不能復救鄭，鄭遂屬晉。襄十四年晉悼伐秦，殽林之役，遷延而退，爲諸侯笑，遠不如晉厲麻隧之師，諸侯皆睦於晉，《春秋》諸儒褒悼而貶厲，非公論也。」○注「孔子」至「秋也」○正義曰：《春秋》繁露·王道篇云：「《春秋》紀纖芥之失，反之王道。」《說苑·至公》篇云：「夫子行說七十諸侯，無定處，意欲使天下之民各得其所，而道不行，退而脩《春秋》，采豪毛之善，貶纖介之惡，人事挾，王

道備，精和聖制，上通於天而麟至。」

章指：言《春秋》撥亂，時多爭戰。事實違禮，以文反正。征伐誅討，不自王命，故曰「無義戰」也。

疏「春秋」至「反正」○正義曰：哀公十四年《公羊傳》云：「君子曷爲爲《春秋》？撥亂世，反諸正，莫近諸《春秋》。」《史記·太史公自序》引此，又云：「夫不通禮義之旨，至於君不君，臣不臣，父不父，子不子。此四行者，天下之大過也。以天下之大過予之，則受而弗敢辭，故《春秋》者，禮義之大宗也。夫禮禁未然之前，法施已然之後。法之所爲用者易見，而禮之所爲禁者難知。壺遂曰：『孔子之時，上無明君，下不得任用，故作《春秋》，垂空文以斷禮義，當一王之法。』」

孟子曰：「盡信《書》則不如無《書》。吾於《武成》，取二三策而已矣。仁人無敵於天下，以至仁伐至不仁，而何其血之流杵也？」

注《書》、《尚書》。經有所美，言事或過，若《康誥》曰「冒聞於上帝」，《甫刑》曰「帝清問下民」，《梓材》曰

「欲至于萬年」，又曰「子子孫孫永保民」。人不能聞天，天不能問民，萬年永保，皆不可得爲書，豈可案文而皆信之哉？《武成》，逸《書》之篇名。言武王誅紂，戰鬪殺人，血流舂杵。孟子言武王以至仁伐至不仁，殷人簞食壺漿而迎其師，何乃至於血流漂杵乎？故吾取《武成》兩三簡策可用者耳，其過辭則不取也。**疏**注「書尚」至「信之哉」○正義曰：書者，文字之名。《說文解字序》云：「著於竹帛者謂之書。書者，如也。」《周禮·地官·大司徒》：「六藝：禮、樂、射、御、書、數。」此書即《保氏》六書。於是凡典籍統謂之書，《論衡·正說》篇云「五經總名爲書」是也。《禮記·經解》以《詩》教、《書》教、《樂》教、《易》教、《禮》教、《春秋》教並稱，此「書」專指《尚書》。趙氏以上言《書》，下言《武成》，故知「書，《尚書》也」。《尚書》在孟子時有百篇，舉《武成》以爲例，所言「盡信《書》則不如無《書》」非專指《武成》而言，故趙氏廣而推之《康誥》、《甫刑》、《梓材》諸篇也。《康誥》云「惟時怙冒聞於上帝」，王氏鳴盛《尚書後案》云：「冒聞於上帝爲句，古讀也。趙氏注《孟子》吾於《武成》節引此。《君奭》篇亦有此句，則知古有此語矣。」冒有上進意，故云「冒聞」也。《春

官·大宗伯》「以禋祀祀昊天上帝」，鄭司農云：「上帝，玄天也。」聞於上帝即是聞於天，故云「人不能聞天」。《甫刑》即《呂刑》。呂之稱甫，猶唐之稱晉也。《呂刑》云「皇帝清問下民」，鄭氏注云：「皇帝清問」以下，乃說堯事。」惠氏棟《九經古義》云：「王伯厚曰：『皇帝始見於《呂刑》，趙岐注《孟》引《甫刑》曰：帝清問下民。』棟按，孔傳云：『君帝，帝堯也。』是孔氏本作「君帝」。謹按：孔傳以君帝釋皇帝，而亦以爲堯，不以爲天也。趙氏所見《呂刑》無皇字固矣。蓋趙氏讀「帝清」二字相連，帝爲王天下之名，而古亦稱天爲帝。《文選·吳都賦》「迴曜靈於太清」，劉逵注云：「太清謂天也。」《嘯賦》亦云「飄遊雲於太清」，蓋趙氏以「帝清」猶「太清」，單稱帝不必是天，稱帝清則必非天子，故以帝清問下民爲「天問民」也。閩、監、毛二本依《呂刑》增作「皇帝清問下民」，阮氏元《校勘記》云：「宋本、廖本、孔本、韓本、《考文》古本、足利本無皇字。按，無者是。《困學紀聞》所引正同。」按：閩、監、毛二本增皇字，因又增云「天子不能問於民」，而諸本亦無子字。且天子問民，何不能也？《梓材》云：「欲至於萬年，惟王子子孫永保民。」○注「武成」至「取也」○正義曰：《書序》云：「武王伐殷，往伐歸獸，識其政事，作《武成》。」鄭氏注云：「著武道至此而成。《武成》，逸《書》，

建武之際亡。」王氏鳴盛《尚書後案》云：「孔壁所得真古文本有《武成》，因其不列學官，藏在秘府，故謂之「逸《書》」。建武是光武帝紀年，《武成》至此時又亡。其逸文殘缺者僅存八十二字，見《漢書·律曆志》。又《後辨》云：「梅鷟謂：『趙岐《孟子》盡信《書》一章注云云，平正無碍，甚得孟子口氣。而晚出《武成》則言前徒倒戈，攻於後以北，血流漂杵，是紂衆自殺之血，非武王殺之之血，其言可謂巧矣。然孟子非不通文義之人，何至讀《書》誤認紂衆自殺以爲武王虐殺哉？』鷟說善矣而未盡也。紂衆倒戈，自相攻殺，事見《荀子·儒效》篇、《成相》篇、《史記·殷本紀》、《淮南子·泰族訓》、劉向《列女傳·嬖嬖傳》、常璩《華陽國志·巴志》篇，非盡出妄造。《孟子》在魏晉間不甚重，不過諸子中之一耳，縱錯會經文，亦何損？而武王之爲仁人，爲王者師甚著，豈不可力爲回護，去其虐殺，以全吾經？此則作僞者之微意耳。但孟子親見百篇《尚書》，必不誤認。王充《論衡·語增》篇云：「察《武成》之篇，牧野之戰，血流浮杵。《武成》亡於建武之際，仲任猶及見之。詳其意，彼真本《武成》必不以倒戈事與流杵事爲一。蓋此語自是兩敵相爭，描摹至此，若徒黨自相翦屠，何必加以此語？故晚出《武成》雖敢與孟子違，而猶陰爲孟子地。孔傳云：『血流漂杵，甚之言』，非

含不可盡信之意乎？賈誼《過秦論》云：「秦追亡逐北，流血漂鹵」，《戰國策》言「武安君與韓魏戰伊闕，流血漂鹵」，此等爲殺人多之恒辭，故孟子特爲武王辨。」按：《論衡·藝增》篇云：「夫《武成》之篇言武王伐紂，血流浮杵。助戰者多，故至血流如此，皆欲紂之亡也。土崩瓦解，安肯戰乎？」《武成》言血流浮杵，亦太過焉。死者血流安能浮杵？」按：武王伐紂於牧之野，河北地高，壤靡不乾燥，兵頓血流，輒燥人土，安得杵浮？且周殷士卒皆賁盛糧，或作乾糧，無杵臼之事，安得杵而浮之？言「血流杵」，欲言誅紂惟兵頓土傷，故至浮杵，是杵爲杵臼之杵，故趙氏言「血流舂杵」。《說文》木部云：「杵，舂杵也。」

章指：言文之有美過實，聖人不改，錄其意也。非獨《書》云，《詩》亦有言「嵩高極天」，「則百斯男」，亦已過矣。疏「嵩高

極天則百斯男」○正義曰：莊公四年《公羊傳》云：「九世猶可以復讎乎？雖百世可也。」何休注云：「百世，大言之耳。猶《詩》云：『嵩高維嶽，峻極于天。君子萬年。』」

《毛詩·大雅·思齊》篇「太姒嗣徽音則百斯男」，傳云：

「太姒十子，衆妾則宜百子也。」然則文王宜有百子，故

《周南·螽斯》亦美后妃不妬忌而子孫衆多，此與「百世」不同。李樗《詩經講義》云：「《詩》中言多則曰『則百斯男』，言少則曰『靡有孑遺』，言廣則曰『日辟國百里』，言狹則曰『一葦杭之』，皆甚辭也。」是又因趙氏《章指》推言之耳。

孟子曰：「有人曰『我善爲陳，我善爲戰』，大罪也。國君好仁，天下無敵焉。南面而征北夷怨，東面而征西夷怨，曰：『奚爲後我？』」注此人欲勸諸侯以攻戰也，故謂之有罪。好仁無敵。四夷怨望遲，願見征，何爲後我？已說於上篇。疏「北夷」○正義曰：阮氏元《校勘記》云：「宋本、孔本、韓本同。閩、監、毛三本夷作狄，石經此『字漫漶』。案偽疏引作『北夷』，作夷是也。」武王之伐殷也，革車三百兩，虎賁三千人。王曰：「無畏，寧爾也，非敵百姓也。」若崩，厥角、稽首。「征」之

①「阮氏」至「記云」，原無，今據阮校及全書文例補。

爲言「正」也。各欲正己也，焉用戰？」**注**革

車，兵車也；虎賁，武士爲小臣者也。《書》云：「虎賁贅衣，趣馬小尹。」三百兩，三百乘也。武王令殷人曰：無驚畏，我來安止爾也。百姓歸周，若崩，厥角，頷角犀厥地；稽首，拜命，亦以首至地也。各欲令武王來征己之國，安用善戰陳者？**疏**注「革車」至

「乘也」○正義曰：《禮記·明堂位》「革車千乘」，注云：「革車，兵車也。」《周禮·春官·巾車》云「革路以即戎」是也。

《夏官》有「虎賁氏，下大夫二人，中士十有二人，虎士八百人」，注云：「虎士，徒之選有勇力者。」趙氏謂「武士」爲「小臣」，引《書·立政》證之。蓋《立政》言「亦越文王，武王」，則此虎賁爲文武時官，於武王伐殷時較切，《周禮》則爲天子後所制矣。周氏用錫《尚書證義》云：「《顧命》『狄設綴衣』，正義云：『綴衣是黼衣之類。』以《周禮》考之即幕人也。幕人掌帷幄，虎賁司宿衛皆左右親近者也。」以勇力爲左右近臣，故云「武士爲小臣者」也。「贅衣」《立政》作「綴衣」，綴，贅古字通也。《毛詩·召南·鵲巢》「百兩御之」，傳云：「百兩，百乘也。」孔氏正義云：「謂之兩者，《風俗通》以爲車有兩輪，馬有四匹，故車稱兩，馬稱匹。」《書序》云：「武王戎車三

百兩，虎賁，三百人，與受戰於牧野。」江氏聲《尚書集注音疏》云：「虎賁，言猛怒如虎之奔赴也。三百人當爲三千人，《孟子》曰：『武王之伐殷也，革車三百兩，虎賁三千人。』《司馬法》曰：『革車一乘，士十人，徒二十人。』《樂記》曰：『虎賁之士說劍。』然則虎賁，士也，一乘十人，三百兩則三千人矣。」翟氏灝《考異》云：「《書·牧誓》序：『武王戎車三百兩，虎賁三百人。』《風俗通義·皇霸篇》引《書》『武王戎車三百兩，虎賁八百人』。《墨子·明鬼篇》『武王以擇車百兩，虎賁之卒四百人』。《周書·克殷解》：『周車三百五十乘，陳於牧野，既以虎賁戎車馳商師，商師大敗。』孔晁注云：『戎車三百五十乘，則有虎賁三千五百人。』按，每車一兩，當有虎賁十人，孟子言自無誤，諸書未可信也。《戰國策》蘇秦說魏曰：『武王卒三千人，革車三百乘，斬紂於牧。』又說趙曰：『武王之卒不過三千人，車不過三百乘，而爲天子。』《呂氏春秋·仲秋紀》：『武王虎賁三千人，簡車三百乘，以要甲子之戰。』言皆與《孟子》合。周氏柄中《辨正》云：「有兩《司馬法》，一云『一車甲士三人，步卒七十二人』，一云『成出一乘，甲士十人，步卒二十人』。孔仲達成元年《丘甲正義》云：『一士二徒者，鄉遂之兵；一士二十四徒者，都鄙之兵。』古者天子用兵先用六鄉，六鄉不足取六遂，六遂不足取都鄙

及諸侯。若諸侯出兵，先盡三鄉三遂，鄉遂不足然後總徵境內。」由此推之，武王所用正是鄉遂之兵。《呂氏春秋》云：「武王革車三百，甲卒三千，征敵破衆。」《韓非子》云：「武王將素甲三千，領與紂戰。」虎賁安知不指戰士言？或謂據《周禮》虎賁非甲士，必以虎賁配一車，則《書序》是，《孟子》非矣。愚謂《周禮》虎賁不離王之先後，又豈以一人配一車而戰者邪？○注「武王」至「地也」○正義曰：武王之言必由傳命宣喻之，故云「令」也。《廣雅·釋詁》云：「畏，懼也。畏，恐也。」《易·震》彖傳云：「震驚百里，驚遠而懼邇也。」驚即恐懼也，故以「無畏」爲「無驚」也。《毛詩·周南·葛覃》「歸寧父母」，傳云：「寧，安也。」《爾雅·釋詁》云：「安，止也。」故以「寧爾」爲「安止爾」也。《漢書·諸侯王表》「漢諸侯王厥角稽首」，應劭曰：「厥者，頓也；角者，額角也。稽首，首至地也。」丘遲《與陳伯之書》云：「朝鮮昌海，厥角受化。」李善注引《孟子》此文趙岐注云：「厥角，叩頭，以額角犀厥地也。」於此注增「以」也二字，義尤明暢。《文選·羽獵賦》「厥浮塵」，應劭亦云：「厥，頓也。」是厥、厥占字通，故李善直以「厥角」注「厥角」，然則「厥角」猶「頓首」，故云「厥地」也。《釋名·釋形體》云：「角者，生於額角也。」《國語·鄭語》云「惡角犀豐盈」，韋昭注云：「角犀謂額角有

伏犀。」趙氏以「額」釋「角」，又以「犀」申言之。「額」「犀」二字皆釋「角」字也。「厥角」是以角厥地，「若崩」者，狀其厥之多而迅也。《白虎通》云：「崩之言惛然僵伏。」《說文》山部云：「崩，山壞也。」山壞則自高僵伏於地。《毛詩·小雅·無羊》云「不騫不崩」，傳云：「崩，羣疾也。」蓋一羣之羊全病，僵伏不起，詩人以山之壞狀之。此殷民歸周，以額角犀厥地，其狀若僵伏，而加「若崩」二字，極狀其人之衆多，如山之下墜，如羊之羣疾而僵伏。方聞「寧爾」之令，猝然厥地，其聲其狀，可於「若崩」二字見之。厥本又作屈，屈其額角犀於地，猝然下伏也。既伏地，又稽首拜命，故云「亦以首至地」也。《音義》云：「丁云：『額即額字。犀，音西。義與棲遲同，息也，久也。』」字從尸下辛。或作犀牛字，誤也。」阮氏元《校勘記》云：「宋本、孔本、韓本犀作犀。段玉裁云：『丁說殊誤，字當作犀，從牛。』《國語》云角犀豐盈，《國策》曰眉目準額犀角，權衡偃月，今人謂之天庭，古謂之犀角，相書云伏犀貫頂。」即其理也。」按：《說文》尸部：「犀，犀遲也。從尸，辛聲。」《爾雅·釋詁》云：「棲遲，息也。」此丁氏所本。然棲遲義爲遊息，於此不切。丁氏蓋不知犀即犀而以犀地爲其地，故改犀爲犀而以爲止息其地也。不知上云「若崩」，下云「稽首」，則一時衆聲之轟然而首之上下不已，何止息之

有？丁氏之誤，誠誤也。段氏玉裁《說文解字注》云：「厥，發石也。引申之，凡有擲發皆曰厥。《山海經》曰：「相柳之所抵厥」，郭云：「抵，觸，厥，掘也。《孟子》：「若峴厥角稽首。」晉灼注《漢書》曰：「厥猶豎也。叩頭則額角豎。」按，厥角者謂額角如有所發。角部𧢲字下云「角有所觸發」是也。」錢氏大昕《潛研堂答問》云：「應劭云「厥者，頓也」。晉灼云「厥猶豎也」。一義小有不同，應說近之。」○注「各欲」至「之國」○正義曰：廷琥云：「毛本無各字。」

章指：言民思明君，若旱望雨。以仁

伐暴，誰不欣喜？是以殷民厥角，周師歌舞，焉用善戰？故云罪也。疏「周師歌舞」○

正義曰：周氏廣業《孟子章指考證》云：「《樂稽耀嘉》曰：「武王興師誅商，萬國咸喜，軍渡孟津，前歌後舞。克商之後，民乃大安，家給人足，酌酒鬱搖。」見《藝文類聚》。又《蜀志》先主謂龐德曰：「武王伐紂，前歌後舞，非仁者邪？」」

孟子曰：「梓匠、輪輿能與人規矩，不能使人巧。」注梓匠、輪輿之功，能以規矩與人。人

之巧在心。拙者雖得規矩，不以成器也。

章指：言規矩之法，喻若典禮。人不

志仁，雖誦憲籍，不能以善。善人脩道，公輸守繩，政成器美，惟度是應，得其理也。

疏「雖誦」至「守繩」○正義曰：周氏廣業《孟子章指攷證》云：「《文子·道德》篇云：「守其法籍，行其憲令。」《荀子》：「公輸不能加於繩。」王褒《聖主得賢臣頌》云：

「離婁督繩，公輸削墨。」

孟子曰：「舜之飯糗茹草也，若將終身焉；及其為天子也，被袵衣，鼓琴，二女果，若固有之。」注糗飯，乾糲也。袵，畫也。果，侍也。舜耕陶之時飯糗茹草，若將終身如是。及為天子，被畫衣，黼黻絺繡也，鼓琴以協音律也，以堯二女自侍，亦不佚豫，如固自當有之也。疏「飯糗」○正

義曰：段氏玉裁《說文解字注》云：「米部云：「糗，糲米麥也。」《周禮》「羞邊之實，糗餌粉飴」，鄭司農云：「糗，糲大豆與米也。粉，豆屑也。」《玄謂：糗者，搗粉糲大豆為餌養之

黏著以坩之耳。」按，先鄭云「熬大豆及米」，後鄭但云「熬大豆」，注《內則》又云「橋熬穀」，不同者，黍梁米麥皆可爲糗，故或言大豆以包米，或言穀以包米豆，而許云「熬米麥」，又非不可熬大豆也。熬者，乾煎也，乾煎者，鬻也。鬻米豆春爲粉，以坩餌資之上，故曰糗餌粉資。鄭云擣粉之，許但云熬不云擣粉者，鄭釋經，故釋粉字之義，許解字，則糗但爲熬米麥，必待臯之而後成粉也。《菜菔》「峙乃糗糧」，某氏云：「糗糧之糧。」《孟子》曰「舜之飯糗茹草」，趙云：「糗飯，乾糗也。」《左傳》「爲稻醴梁糗」。《廣韻》曰：「糗，乾飯屑也。」此皆謂熬穀米粉者也。糗，乾飯也。《釋名》曰：「干飯，飯而暴乾之也。」《周禮·廩人》注曰：「行道曰糧，謂糗也，止居曰食，謂米也。」干飯，今多爲之者。」謹按：《說文》鬻部云：「鬻，熬也。」鬻尺沼切。《一切經音義》云：「炒，古文鬻，烹、熬、熬四形，崔寔《四民月令》作炒。然則熬米麥即是炒米麥。今農家米麥豆皆炒食，米即謂之炒米，豆即謂之炒豆。炒米可以沸水漬之當飯，大麥小麥炒之，又必磨之爲屑，用沸水和食，謂之焦麪，所謂「糗」也。「糗」乃今之飯乾，與此不同，而皆可爲行糧。惟農食樸儉，省蒸煮之費，往往炒米麥爲飯，是則舜之「飯糗」耳。○「茹草」○正義曰：王氏念孫《廣雅疏證》云：《方言》：「茹，食也。吳越之間，

凡貪飲食者謂之茹。」郭璞注云：「今俗呼能蠹食者爲茹。」按，《大雅·烝民》篇云「柔則茹之，剛則吐之」，是食謂之茹也。《禮運》云「飲其血，茹其毛」，《孟子·盡心》篇云「飯糗茹草」，是食蠹食者謂之茹也。蠹與疏義相近，食蠹食者謂之茹，故食菜亦謂之茹。食菜謂之茹，故所食之菜亦謂之茹。《莊子·人間世》篇「不茹葷」，《漢書·董仲舒傳》云「食於舍而茹葵」，是食菜謂之茹也。《食貨志》云「菜茹有畦」，《七發》云「秋黃之蘇，白露之茹」，是所食之菜亦謂之茹也。「茹草」二字趙氏皆無訓。草者，《史記·陳丞相世家》云「更以惡草具進楚使」，《漢書音義》云：「草，粗也。」《索隱》云：「《戰國策》云「食馮援以草具」，如淳云：「藁草蠹惡之具也。」《范睢列傳》云「使舍食草具」，《索隱》云：「謂亦舍之而食以下客之具。草具謂蠹食草菜之饌具也。」然則「茹草」猶云茹蠹矣。○「被袵衣鼓琴」○正義曰：任氏大椿《深衣釋例》云：「《孟子》「被袵衣，鼓琴」，趙岐注：「袵，畫也。黼黻絺繡也。」夫鼓琴，宴居時也。舜於養老朝燕僅服白布深衣，而燕居則服黼黻絺繡，非所以明質。故袵衣當非畫衣也。《史記》「堯乃賜舜絺衣與琴」，與舜被袵衣鼓琴事適相會。然則袵衣或即絺衣與？賜予止用絺葛布衣，可知當時之質。」孔氏廣森《經學卮言》云：「袵非畫也。義如「袵絺

綌之衫。《史記》本紀「堯賜舜綌衣與琴」是也。」孔氏、任氏

引《史記》說之，是也。綌綌爲衫，故孟子謂之「綌衣」。得被綌衣者，以堯賜綌也；得鼓琴者，以堯賜琴也；二女所以侍者，「帝堯降二女」也。以耕夫一旦膺天子之知，賜賞若此，

明其榮顯也。若徒綌綌而鼓琴，則不過習爲山人耳。趙氏以綌衣黼黻綌綌，本《尚書·皋陶謨》。乃鄭氏讀綌爲黼，

此以「綌綌」爲「綌綌綌」之綌，與鄭氏異。以綌訓畫，則以繪與繡互見，非綌有畫義也。段氏玉裁《說文解字注》云：「衣部：「綌，禪衣也。一曰盛服。振，綌或從辰。」參本訓「稠

髮」。凡參聲字多爲濃重，《上林賦》「磐石振崖」，孟康曰：「振，綌致也。以石致川之廉也。」是振與參，積字義同。《孟

子》「被綌衣」，綌衣亦當謂盛服，趙云「畫衣」者，不得其說，姑依《皋陶謨》「作繪」言之耳。」錢氏大昕《養新錄》云：「錢

塘梁侍講同書嘗告予云「古書綌訓單，又訓同，皆無盛服之意」。《三國志·魏文帝紀》注有云：「舜承堯禪，被珍裘，妻

二女若固有之。」此必用《孟子》之文，綌衣當是珍裘也。」

○「二女果」○正義曰：臧氏琳《經義雜記》云：「《說文》女部：「嫀，姬也。一曰女侍曰嫀。讀若騶，一曰若委。從女，

果聲。孟軻曰：舜爲天子，二女嫀。」據此，知《孟子》本作「二女嫀」，今作果者，是嫀之省。趙氏訓爲侍，與《說

文》合。」

章指：言阨窮不憫，貴而思降。凡人所難，虞舜所隆。聖德所以殊也。

孟子曰：「吾今而後知殺人親之重也。

殺人之父，人亦殺其父；殺人之兄，人亦殺其兄。然則非自殺之也，一間耳。」**注**父仇不

同天，兄仇不同國。以惡加人，人必加之，知其重也。一間者，我往彼來，間一人耳，與自殺其親何異

哉？**疏**注「父仇不同天兄仇不同國」○正義曰：《大戴

記·曾子制言上》云：「父母之讎，不與同生；兄弟之讎，不與聚國。」《禮記·檀弓》云：「子夏問於孔子曰：「居父母之

仇，如之何？」夫子曰：「寢苦枕干，不仕，弗與共天下也。遇諸市朝，不反兵而鬪。」曰：「請問居昆弟之仇，如之何？」

曰：「仕弗與共國。銜君命而使，雖遇之，不鬪。」阮氏元《曾子注釋》云：「居仇之說，《檀弓》、《曲禮》、《周官·地

官·調人》及此曾子所言，互有異同。然《周禮》、孔子、曾子之言，三者同義，惟《曲禮》錯出，不可從。《周禮·調人》

云：「凡過而殺傷人，以民成之。凡和難，父之仇辟諸海外，兄弟之仇辟諸千里之外。」此專言過殺，非本意殺，故《調人》得以免之遠避平成之。與孔、曾所言有意辱殺之讎不同。又《調人》曰「凡殺人有反殺者，使邦國交仇之」者，此言謀殺一人，恐此人子弟報仇，因復殺其子弟也。又《調人》曰「凡殺人而義者，不同國，令勿仇，仇之則死」者，此謂殺其謀殺君父之人為義，其殺人君父之人之父兄子弟不得再以此人為仇，仇之則罪當死也。故《周禮》與孔、曾合，以為不合者誤解之耳。若《曲禮》言「兄弟之仇不反兵，交遊之仇不同國」，及《公羊》「復百世之仇」，則太過，不合聖賢之道矣。趙氏言此者，「不同天」「不同國」，可知其必報，故云「以惡加人，人必加之」，其情重大，非可平成之者也。《列子·天瑞》篇《釋文》云：「問，隔也。」「問一人」猶云「隔一人」也。翟氏灝《考異》云：「《墨子·兼愛》篇：『我先從事乎惡人之親，人能報我以愛利吾親乎？必先從事乎愛利人之親，然後人報我以愛利吾親也。』此言略與孟子言似。然孟子特戒人惡害人父兄已耳，不必定愛利之也。故儒墨之言，大要在有無差等之別。」

章指：言恕以行仁，遠禍之端；暴以

殘民，招咎之患。是以君子好生惡殺，反諸身也。

孟子曰：「古之為關也，將以禦暴；今之為關也，將以為暴。」**注**古之為關將以禦暴亂，譏閉非常也，今之為關反以征稅出人之人，將以為暴虐之道也。**疏**注「譏閉非常也」○正義曰：《周禮·地官·司關》：「國凶札則無關門之征，猶幾。」注云：「謂無租稅，猶苛察，不得令姦人出入。」幾即譏也。《易·復》《象傳》云：「先王以至日閉關，商旅不行。」

章指：言脩理關梁，譏而不征。如以稅斂，非其式程。懼將為暴，故載之也。

疏「脩理關梁」○正義曰：《禮記·月令》：「季冬之月，謹關梁。」《玉藻》云：「年不順成，關梁不租。」注云：「此周禮也。殷則關但譏而不征，雖不賦，猶為之禁，不得非時取也。」

孟子曰：「身不行道，不行於妻子；使人

不以道，不能行於妻子。」**注**身不自履行道德而欲使人行道德，雖妻子不肯行之，言無所則效也。使人不順其道理，不能使妻子順之，而況他人乎？

章指：言率人之道，躬行爲首。《論

語》曰：「其身不正，雖令不從。」**疏**《論語》至

「不從」○正義曰：引《論語》在《子路》第十三。

孟子曰：「周于利者，凶年不能殺；周于德者，邪世不能亂。」**注**周達於利，營苟得之利而趨生，雖凶年不能殺之；周達於德，身欲行之，雖遭邪世，不能亂其志也。**疏**注「周達」○正義曰：「周」有「達」義者，劉熙《釋名·釋船》云：「舟言周流也。」《易·繫辭傳》云：「舟楫之利，以濟不通。」舟取義於周，是周有達義也。趙氏謂達於取利則凡苟得之利皆營求之，故雖凶荒之年，有心計足以趨生，故不死；不達於德則不能行，達而行之則志定，不爲邪世所亂。近時通解周爲偏帀，謂積蓄無少匱也。積於利，故不困於凶年；積於德，故不染於邪世。

章指：言務利蹈姦，務德蹈仁。舍生

取義，其道不均也。

孟子曰：「好名之人能讓千乘之國。苟非其人，簞食豆羹見於色。」**注**好不朽之名者輕讓千乘，子臧、季札之儔是也。誠非好名者，爭簞食豆羹變色，訟之致禍，鄭子公染指飴羹之類是也。**疏**

注「好不」至「儔是也」○正義曰：襄公二十四年《左傳》云：

「范宣子曰：『古人有言死有不朽，何謂也？』叔孫穆叔曰：

『太上有立德，其次有立功，其次有立言。雖久不廢，此之謂不朽。』陸賈《新語·輔政》篇云：「功垂於無窮，名傳於不

朽。」故以「好名」爲「好不朽之名」。諸本作「伯夷季札之儔」，

宋本作「子臧季札之儔」，周氏廣業《孟子古注攷》云：「伯夷，

聖之清者，豈好名之人？晉孫盛《泰伯三讓論》云：「三以天

下讓，言非常讓，若臧、札之倫者也。」潘岳《西征賦》云：「臧、

札飄其高厲，委曹、吳而成節。」蓋季札自言願附子臧，故後人

每並稱之。」今依宋本。《史記·吳世家》云：「壽夢有子四人，

長曰諸樊，次曰餘祭，次曰餘昧，次曰季札。季札賢而壽夢欲

立之，季札讓不可，於是乃立長子諸樊，攝行事當國。王諸樊

元年，諸樊已除喪，讓位季札。季札謝曰：「曹宣公之卒也，

諸侯與曹人不義曹君，將立子臧。子臧去之以成曹君。君子曰：能守節矣。君義嗣，誰敢干君？有國，非吾節也。札雖不材，願附於子臧之義。吳人固立季札，季札棄其室而耕，乃舍之。此「子臧、季札輕讓千乘」之事也。宣公四年《左傳》云：「楚人獻龜於鄭靈公。公子宋與子家將見，子公之食指動，以示子家曰：『他日我如此，必嘗異味。』」及人，宰夫將解龜，相視而笑。公問之，子家以告。及食大夫龜，召子公而弗與也。子公怒，染指於鼎，嘗之而出。公怒，欲殺子公。子公與子家謀先。子家曰：「畜老牛猶憚殺之，而況君乎？」反譖子家，子家懼而從之。夏，弑靈公。」是因飲食「致禍」也。阮氏元《校勘記》云：「『染指龜羹之類』，閩、監、毛三本同。宋本、孔本、韓本，《攷文》古本龜作飢。《音義》出『飢羹』，云：『《左傳》作龜。』此則注文本用飢字。改爲龜，非也。」錢氏大昕《養新錄》云：「孔子疾沒世而名不稱，孟子亦惡人之不好名，名謂不朽之名也。不好名，亦尊於好利，雖簞食豆羹且不能讓，況千乘乎？」按：明人陳子龍已云：「三代以下惟恐不好名。『非其人』者，謂非好名之人也，如此解爲當。」

章指：言廉貪相殊，名亦卓異。故聞

伯夷之風，懦夫有立志也。

孟子曰：「不信仁賢，則國空虛；無禮義，則上下亂；無政事，則財用不足。」**注**不親信仁賢，仁賢去之，國無賢人則空虛也；無禮義以正尊卑，則上下之敘泯亂；無善政以教人農時，貢賦則不入，故財用不足。**疏**注「不親信仁賢」○正義

曰：不信則疑之，不親則疏之。疑由於疏，疏亦由於疑。故以「親信」連言之。○注「則上下之敘泯亂」○正義曰：《書·呂刑》云：「民興胥漸，泯泯焚焚。」《周書·祭公解》云「汝無泯泯焚焚」，孔晁注云：「泯，芬亂也。」泯亦訓滅，《毛詩·大雅·桑柔》篇「靡國不泯」，傳云：「泯，滅也。」是也。「泯亂」亦滅亂也。《爾雅·釋詁》云：「滅，絕也。」《釋水》云：「正絕流曰亂。」是亂有絕義，與滅同。泯爲滅，亦爲亂矣。○注「無善」至「不入」○正義曰：賦出於農。不「教人農時」則田野荒蕪，水旱無備，故「貢賦不入」也。

章指：言親賢、正禮，明其五教，爲政之源。聖人以三者爲急也。

孟子曰：「不仁而得國者，有之矣；不仁

而得天下，未之有也。」**注**「不仁得國者，若象封有庠，叔鮮、叔度封於管、蔡，以親親之恩而得國也。雖有誅亡，其世有土。丹朱、商均，天子元子，以其不仁，天下不與，故不得有天下也。」

章指：言王者當天，然後處之；桀紂幽厲，雖得猶失。不以善終，不能世祀，不爲得也。

疏「王者當天」○正義曰：賈誼《新書·數寧》篇云：「臣聞之，自禹已下五百歲而湯起，自湯已下五百餘年而武王起。自武王已下，過五百歲矣，聖王不起，何慍矣？」及秦始皇帝，似是而卒非也，終於無狀。及今天下集於陛下，臣觀寬大知通，竊曰是以摻亂業，握危勢，若今之賢也，明通以足天紀，又當天。」按：趙氏於「不仁得天下」，前舉丹朱、商均，此舉桀、紂、幽、厲，皆非得天下之人，似乎所引未切矣。觀此云「雖得猶失，不以善終」云云，雖承桀、紂、幽、厲，實指后羿、新莽一流。蓋是時曹操儼然無人臣之節，趙氏屬意荊州，此數語實指操而言。於「不仁得國」取象及管、蔡，皆宗室同姓之得國者。蓋當時如袁紹、公孫瓚，皆不仁得國者也，故有所忌諱，不言異姓也。玩其取賈子「當天」二字，固以此似

是而非者終於無狀，而謬托丹朱、商均、桀、紂、幽、厲，實以秦皇斥操耳。而亦有所忌諱，不明言之也。知人論世，表而出之。

孟子曰：「民爲貴，社稷次之，君爲輕。是故得乎丘民而爲天子，**注**君輕於社稷，社稷輕於民。丘，十六井也。天下丘民皆樂其政則爲天子，殷湯、周文是也。」**疏**「丘十六井也」○正義曰：

《周禮·地官·小司徒》：「九夫爲井，四井爲邑，四邑爲丘。」一邑四井，四邑故爲十六井。然則「丘民」猶言邑民、鄉民、國民也。王氏念孫《廣雅疏證》云：「丘，衆也。《孟子·盡心》篇：『得乎丘民而爲天子。』《莊子·則陽》篇云：『丘里者，合十姓百名以爲風俗也。』《釋名》云：『四邑爲丘。丘，聚也。』皆衆之義也。」得乎天子爲諸侯，**注**得天子之心，封以爲諸侯。得乎諸侯爲大夫。**注**得諸侯之心，諸侯封以爲大夫。諸侯危社稷，則變置；

注諸侯爲危社稷之行，則變更立賢諸侯也。**疏**「諸侯」至「侯也」○正義曰：《孝經》「諸侯」章云：「在上不

驕，高而不危；制節謹度，滿而不溢。高而不危，所以長守貴也；滿而不溢，所以長守富也。富貴不離其身，然後能保其社稷。」反是，則爲危社稷之行矣。《說文》支部云：「變，更也。」呂氏春秋·當務篇云「而不可置妾之子」，高誘注云：「置，立也。」則「變置」即「更立」也。犧牲既成，粢

盛既絜，祭祀以時，然而旱乾水溢，則變置社稷。」**注**犧牲已成肥腍，稻粱已成絜精，祭祀社稷常以春秋之時，然而其國有旱乾水溢之災，則毀社稷而更置也。**疏**注「犧牲」至「置也」○正義曰：犧牲貴肥

腍，故以「肥腍」爲「成」。《國語·周語》「拔除其心精也」，韋昭注云：「精，潔也。」又《楚語》「玉帛爲二精」，注云：「明潔爲精。」故以「絜」釋「精」。**①**《禮記·月令》：「季冬之月，命太史次諸侯之列，賦之犧牲，以共皇天上帝社稷寢廟之祀。」此社稷用犧牲也。《郊特牲》云：「唯社丘乘共粢盛，所以報本反始也。」此社稷用粢盛也。《白虎通·社稷篇》云：「祭社稷用三牲何？重功故也。《尚書》曰：『乃社于新邑，牛一，羊一，豕一。』《王制》曰『天子社稷皆太牢，諸侯社稷皆少牢』，**②**何？宗廟太牢，所以廣孝道也。社稷爲報功，諸侯一國，所報者少故也。」又云：「歲再祭之，何？春求秋報之

義也。故《月令》：「仲春之月，擇元日，命民社。」「仲秋之

月，擇元日，命民社。」盧氏文昭校云：「今《月令》無「仲秋之月，擇元日，命民社」之文，而《御覽》五百三十二引《禮記·月令》仲春、仲秋皆有之，並注云：「賽秋成也。元日，秋分前後戊日。」陳祥道《禮書》云：「先王之祭社稷，春有祈，秋有報，孟冬大割祠。春祈而歌《載芟》，秋報而歌《良耜》，此祭之常者也。」上「變置」爲「更立賢諸侯」，此「變置社稷」亦是更立社稷。以諸侯例之，自是更立社稷之主。故舊疏云：「自顓頊以來，用句龍爲社，柱爲稷，及湯之旱，以棄易柱。」毛氏奇齡《四書廣言》云：「自顓頊至周，水旱不一，而易祀者止一柱，似亦未可爲據者。」全氏祖望《經史問答》云：「當以疏說爲是。蓋古人之加罰於社稷者有三等。年不順成，八蜡不通，乃暫停其祭，是罰之輕者；又甚，則遷其壇壝之地，罰稍重矣；又甚則更其配食之神，罰最重。然亦未嘗輕舉此禮，蓋變置至神示，所關重大，故白湯而後罕有行者。嘗謂國家之有水旱，原恃乎我之所以格天者而未嘗

① 「絜釋精」，據文意當作「精釋絜」。

② 「少牢」下，沈校謂當依《白虎通》補「宗廟俱太牢社稷獨少牢」十字。

以人聽於神。陰陽不和，五行失序，於是有恒雨恒暘之咎，不應於社稷之神是咎。且亦安知社稷之神不將大有所懲創於國君而震動之，使有以知命之不常，天之難諶？而吾乃茫然於其警戒之所在，反以人跋扈之氣責報於天，文過於己，是取滅亡之道也。乃若聖王則有之。聖王之於天地，其德相參，其道相配，而其自反者已極盡而無憾，故湯之易稷是也。夫天人，一氣也。在我非尸位，則在神為溺職，雖黜之，非過矣。但是可為賢主道，而不可為慢神之主道也。魯穆公暴巫焚尪，縣子尚以為不可，況其進於此者？疏說變置是也，而未可輕言之也。《北夢瑣言》載潭州馬希聲以早閉南嶽廟事，可為慢神之戒。李陽冰令縉雲，大旱，告於城隍之神，五日不雨焚其廟，此乃行古禮也。及期，雨合霑足，陽冰乃與耆老吏民自西谷遷廟於山巔以答神休。此蓋因前此焚廟之濤嫌其得罪於神而更新之，不為罰而為報，是亦變通古禮而得之者。《左氏》昭公十有七年：「鄭大旱，使屠擊等有事於桑山，斬其木，不雨，子產曰：『有事於山，執山林也，而斬其木，其罪大矣。』奪之官邑。」夫斬木是古禮，亦變置之意也。子產以為非者，即未可輕言之意也。《雲漢》之詩曰「靡神不舉」，正與八蜡不通之說並行不悖，未有毅然以蔑絕明神自任者。周氏柄中《辨正》云：「趙氏謂『毀其社稷

而更置之」，不言如何更置。陳無已謂「遷社稷壇壝於他處，如句容有盜，改置社稷而盜止，下邳多盜，遷社稷於南山之上，盜亦衰息。」萬充宗則謂「水旱之方，就此方之社稷，變其常祭，以示減殺。如《郊特牲》所云年不順成，八蜡不通，《穀梁》所謂大侵之歲，鬼神有禱無祀之意」。如陳說，則古者立社必在庫門內，夏左殷右，周復左，此一朝定制，未聞有遷之他處者；如萬說，則與「變置」之字義又不合。此「變置」與上節「變置」同義，則當為更立之意，不但殺其祭禮而已也。任鈞臺曰：「變置必是毀其壇壝以致責罰之意，明春復立耳。」此說得之。」

章指：言得民為君，得君為臣，民為貴也；先黜諸侯，後毀社稷，君為輕也。重民敬祀，治之所先，故列其次而言之。

孟子曰：「聖人，百世之師也，伯夷、柳下惠是也。」
注伯夷之清、柳下惠之和，聖人之一

①「七」，按引文在十六年，參沈校。

概也。**疏**注「聖人之一概也」○正義曰：《毛詩·衛風·

載馳》傳云：「是乃衆幼穉且狂，進取一概之義。」孔氏正義云：「一概者，一端，不曉變通。」然則「聖人之一概」猶云「聖人之一端」也。故聞伯夷之風者，頑夫廉，懦夫有立志；聞柳下惠之風者，薄夫敦，鄙夫寬。奮乎百世之上，百世之下聞者莫不興起也。非聖人，而能若是乎？而況於親炙之者乎？**注**頑，貪；懦，弱；鄙，狹也。百世，言其遠也。興起，志意興起也。非聖人之行，何能感人若是？論聞尚然，況於親見勳炙者也？**疏**「奮乎」至「起也」○正義曰：毛氏奇齡《四書賸言》云：「《孟子》奮乎百世之上百世之下」一氣不斷，古文排句，辭例如此，言興乎前以及乎後也。若以「百世之下」連下讀，則失辭例矣。」《漢·王吉傳》云：「《孟子》云：奮乎百世之上，行乎百世之下，莫不興起。」按：《論衡·知實》篇引云：「百世之下，聞之者莫不興起，非聖而若是乎？而況親炙之乎？」「百世之下」固屬下讀，與「親炙」相對。親炙則百世之上，與夷、惠同時之人矣。毛說非也。○**注**「論聞」至「炙者也」○正義曰：

《說文》耳部云：「聞，知聞也。」《廣雅·釋言》云：「諭，曉也。」曉聞猶知聞也。《毛詩·大雅·雲漢》「憂心如熏」，傳云：「熏，灼也。」孔氏正義云：「熏，灼俱焚炙之義。」阮氏元《校勘記》云：「毛本作熏，孔本作薰，韓本作勳。按，《音義》出「勳炙」，云「字與熏同」，則作薰、熏並非古本。」

章指：言伯夷、柳下，變貪厲薄。千載聞之，猶有感激。謂之聖人，美其德也。

孟子曰：「仁也者，人也。合而言之，道也。」**注**能行仁恩者，人也。人與仁合而言之，可以謂之有道也。**疏**「仁也」至「道也」○正義曰：段氏玉裁

《說文解字注》云：「仁，親也。從人二。」《中庸》曰：「仁者，人也。」**注**：「人也，讀如相人偶之人，以人意相存問之言。」《大射儀》「揖以耦」，**注**：「言以者，耦之事成於此意相人耦也。」《聘禮》「每曲揖」，**注**：「以相人耦爲敬也。」《公食

①「也」，原作「乎」，合於岳、宋十行、閩、監、毛等本，今據疏之出文及阮校所述廖、孔、韓等本改。
②「指」，原誤作「皆」，今據廖本及他章改。

大夫禮「賓人三揖」，注：「相人耦。」《詩·匪風》箋云：「人偶能烹魚者，人偶能輔周道治民者。」正義曰：「人偶者，謂以人意尊偶之也。」《論語注》：「人偶，同位人偶之辭。」《禮注》云：「人偶，相與為禮儀。」皆同也。」按，人耦猶言爾我，親密之詞。獨則無耦，耦則相親，故其字從人二。孟子曰「仁也者人也」，謂能行仁恩者，人也。又曰「人心也」，謂仁乃是人之所以為心也。與《中庸》語意皆不同。」

章指：言仁恩須人，「人能宏道」也。

孟子曰：「孔子之去魯，曰：『遲遲，吾行也。』去父母國之道也。去齊，接淅而行。去他國之道也。」**注**遲遲，接淅，正義見《萬章下》首章。**疏**「去他國之道也」○正義曰：《萬章下》篇無此句。

章指：言孔子周流不遇，則之他國遠逝。惟魯斯戀，篤父母國之義也。

孟子曰：「君子之厄於陳蔡之間，無上

下之交也。」**注**君子，孔子也。《論語》曰：「君子之道三，我無能焉。」孔子乃尚謙，不敢當君子之道，故可謂孔子為君子也。孔子所以厄於陳蔡之間者，其國君臣皆惡，上下無所交接，故厄也。**疏**注「孔子」

至「厄也」○正義曰：《音義》云：「厄，或作厄，同。」《一切經音義》引《蒼頡篇》云：「厄，困也。」《呂氏春秋·知士》篇云：「靜郭君之交」，高誘注云：「交，接也。」《廣雅·釋詁》云：「接，持也。」《淮南子·修務訓》云「援豐條」，高誘注云：「援，持也。」趙氏以「上」指君，「下」指臣，上無賢君，下無賢臣，皆不與孔子合，故無援以至於困厄，故既以「接」釋「交」，《章指》又以「援」釋「交」也。《史記·孔子世家》云：「孔子在陳蔡之間，楚使人聘孔子，孔子將往拜禮。陳蔡大夫謀相與發徒役圍孔子於野，不得行，絕糧。」此孔子厄於陳、蔡之事也。《說文》食部云：「飢，飢也。從食，乞聲。」「厄於陳蔡之間」，謂絕糧。厄當讀飢，謂飢於陳、蔡之間也。《荀子·宥坐》篇云：「孔子南適楚，厄於陳、蔡之間，七日不火食，藁糞不堪，弟子皆有飢色。」下數句正申解厄字。「上下無交」即指大夫相謀。

章指：言君子固窮，窮不變道。上下

無交，無賢援也。

貉稽曰：「稽大不理於口。」**注**貉，姓；稽，名。仕者也，爲衆口所訕。理，賴也。謂孟子曰：

「稽大不賴人之口，如之何？」**疏**注「貉姓」至「賴也」○

正義曰：《音義》云：「丁云：『貉，鶴一音。』既是人姓，當音鶴。」《纂文》曰：「俗人姓也。」張亡百切。《說文》云：「北方人多種也。」按：下自稱稽，則稽自是名，貉當是姓矣。《御覽》引《風俗通·姓氏篇》序云：「姓有九，或氏於號，或氏於謚，或氏於爵，或氏於國，或氏於官，或氏於字，或氏於居，或氏於事，或氏於職。」此貉非號謚官爵，故以爲俗人姓也。張以爲貉人名稽，則不以爲姓，與趙氏異。以爲衆所訕，知是「仕者」。《說文》人部云：「俚，聊也。」《國策·秦策》云：「百姓不聊生」，注云：「聊，賴也。」《廣雅·釋言》云：「俚，聊也。俚，賴也。」理，俚聲同字通。《國語·晉語》：「君得其賴」，韋昭注云：「賴，利也。」「不理於口」猶云不利於人口也。隱公四年《公羊傳》云：「吾爲子口隱矣。」言出於口，故以人言爲人口。孟子曰：「無傷也。士，憎茲多口。」**注**審己之德，口無傷也。離於凡人而爲士者，

益多口。**疏**注「離於」至「多口」○正義曰：趙氏以「憎」爲

「增」之假借，故以「益」釋之。《爾雅·釋言》云：「增，益也。」是也。《荀子·大略》篇云：「君子聽律習容而後士」，賈子《新書·道術》篇云：「守道者謂之士」，是士「離於凡人」。觀《章指》「凡人」即「凡品」，士即指孔子、文王也。憎，《方言》訓憚，《說文》訓惡，《廣雅》訓苦。《潛夫論·交際》篇云：「孔子恂恂，似不能言者。又稱『聞聞言惟謹』也。士貴有辭，亦憎多口。」此爲憎惡，與趙氏義不同。翟氏灝《攷異》云：「理兼條分脩治之義，《離騷》『令蹇脩以爲理』，五臣注云：『令之以通辭理。』稽曰不理，蓋自病其言之無文，故《纂文》有俗人之稱，《潛夫論》有『士貴有辭』之說也。孟子云憎多口，即《論語》『禦人口給，屢憎於人』之意，謂徒理於口，亦爲士君子所憎惡。惟能以文王、孔子之道理其身心，即有憎其口之不理者，特羣小輩耳，於己之聲聞無隕越也。引《詩》斷章取兩愠字，申達憎義。」趙氏佑《溫故錄》云：「憎如字讀自明。上理字乃分辨之意，不必依舊訓賴。求理於口，徒茲多口，有道之士所不取也。此讀茲爲滋，謂士憎惡以辨謗，故益滋多口也。」《詩》云「憂心悄悄，愠于羣小」，孔子也；「肆不殄厥愠，亦不殞厥問」，文王

也。」**注**《詩》、《邶風·柏舟》之篇。曰「憂心悄悄」，憂在心也；「愠于羣小」，怨小人聚而非議賢者也。孔子論此詩。孔子亦有武叔之口，故曰孔子之所苦也。《大雅·緜》之篇曰「肆不殄厥愠」，殄，絕；愠，怒也。「亦不殄厥問」，殄，失也。言文王不殄絕吠夷之愠怒，亦不能殄失文王之善聲問也。**疏**注「詩」

至「苦也」○正義曰：序云：「《柏舟》，言仁而不遇也。衛頃公之時，仁人不遇，小人在側。」毛氏傳云：「愠，怒也。悄悄，憂貌。」箋云：「羣小，衆小人在君側者。」孔氏正義云：

「言仁人憂心悄悄然而怨此羣小人在於君側者也。」詩非爲孔子作，孟子引以況孔子，謂孔子當日爲羣小非議，有如此詩。「論」與「倫」通，《禮記·中庸》「毛猶有倫」，注云：「倫，

比也。」「孔子倫此詩」謂孔子比擬此詩，則如叔孫武叔之毀，見《論語·子張》篇。是羣小之口，亦「孔子之所苦」也。○

注「大雅」至「問也」○正義曰：《毛詩·大雅·緜》傳云：

「肆，故今也。愠，恚；隕，墜也。」箋云：「小聘曰問。文王見太王立冢土，有用大衆之義，故不絕去其恚惡惡人之心，亦不廢其聘問鄰國之禮。」恚猶怒也。箋以絕釋殄，廢、墜與失義亦相近，惟鄭氏以問爲聘問，趙氏讀問爲令聞之聞，以

爲「善聲聞」，則不合。趙氏說《詩》每殊於鄭。毛氏但訓隕爲墜，鄭箋原不必同毛，趙氏未詳所受耳。下云「混夷駟矣」，混夷即吠夷，故云「不殄絕吠夷之愠怒」。箋以不殄愠，愠在文王，趙以愠在吠夷。孟子引此以證「多口」，則吠夷之愠，吠夷之多口也，而文王不必殄絕之，亦不因其愠而失令聞，在孟子義宜如是也。因念「愠于羣小」亦當是爲羣小所愠，即羣小之多口也。顧氏鎮《虞東學詩》云：「惟是憂心之悄悄，常懼禍至之無日，而羣小之申申者方愠怒之不殄，詩意宜如是也。」

章指：言正己信心，不患衆口。衆口誼譁，大聖所有，況於凡品之所能禦？故答貉稽曰「無傷」也。

孟子曰：「賢者以其昭昭使人昭昭，今以其昏昏使人昭昭。」**注**賢者治國，法度昭昭，明於道德，是躬化之道可也。今之治國，法度昏昏，亂潰之政也。身不能治而欲使他人昭明，不可得也。

疏注「賢者」至「得也」○正義曰：《楚辭·雲中君》「爛昭昭

今未央」，王逸注云：「昭昭，明也。」故云「明於道德」。《廣雅·釋訓》云：「惛惛，亂也。」《毛詩·大雅·召旻》篇「無不潰止」，傳云：「潰，亂也。」故以「昏昏」爲「潰亂之政」。《呂氏春秋·有度》篇云「不昏乎其所已知」，高誘注云：「昏，闇也。」又《誣徒》篇云「昏於小利」，高誘注云：「昏，迷也。」故《章指》以「闇」「迷」釋「昏昏」。

章指：言以明招闇，闇者以開；以闇責明，闇者愈迷。賢者可遵，譏今之非也。

孟子謂高子曰：「山徑之蹊間介然，用之而成路；爲間不用，則茅塞之矣。今茅塞子之心矣。」**注**高子，齊人也。嘗學於孟子，鄉道而未明，去而學於他術。孟子謂之曰：山徑，山之領。有微蹊介然，人遂用之不止，則蹊成爲路。爲間，有間也。謂廢而不用，則茅草生而塞之，不復爲路。以喻高子學於仁義之道，當遂行之而反中止，比若山路，故曰「茅塞子之心」也。**疏**注「山徑」至「心也」○正義曰：王氏念孫《廣雅疏證》云：「《釋丘》：『嶺、陁，

阪也。陁之言徑也，《孟子·盡心》篇「山徑之蹊間介然」，趙岐注云：「山徑，山之領。」《法言·吾子》篇云：「山陁之蹊，不可勝由矣。」馬融《長笛賦》云：「膺陷陁腹陁阻。」並字異而義同。嶺之言領也，嶺通作領，《列子·湯問》篇云：「終北國中，有山名曰壺領。」程氏瑤田《通藝錄·溝洫疆理小記》云：「《孟子》「山徑之蹊間」，蹊字之義，一見於《月令》「孟冬塞蹊徑」，鄭氏注：「蹊徑，鳥獸之道也。」《呂氏春秋》「淮南子」並作「蹊徑」。一見於鄭氏注《周易》「徑路，爲山間鹿兔之蹊」。又《左傳》「犂牛以蹊人之田」，《漢書·貨殖傳》「鷹隼未擊，矰弋不施於蹊隧」。然則蹊者，獸蹄之所經，無垠堦，非有一定之跡可睹指者也。今乃介然用之而成路，是路之成成於蹊間也。」孔氏廣森《經學卮言》云：「趙注以「介然」屬上句，愚讀《長笛賦》「間介無蹊」，似古讀有以「間介」絕句者。「間介」蓋隔絕之意。徑，路也。蹊，足跡也。言雖有足跡隔絕之處，然人苟由之，皆可以成路云爾。」趙氏佑《溫故錄》云：「介亦分別意，如字讀。舊惟以「介然」屬上句，非耳。「山徑之蹊間」謂小道叢雜處，「介然用之」謂人力闢除之。」謹按：《荀子·脩身》篇云「善在身，介然必以自好也」，楊倞注云：「介然，堅固貌。」《易》曰：「介如石焉。」《漢書·律曆志上》云「介然有常」，注云：「介然，特異之

意。《說文》八部云：「介，畫也。」蹊無一定之跡，則不可以成路。蓋山嶺廣闊，原可散亂而行，縱橫旁午，不相沿踐，今介然專行一路，特而不散，自畫而不亂，此蹊間所以能成路。蹊間之成路，全在特行而不旁踰，此「介然」二字定屬下「用之」，即《荀子》、《律曆志》之「介然」。專行一路，所以有常而堅固也。《方言》云：「用，行也。」「介然用之」即是介然行之，「爲間不用」即是爲間不行。下云「當遂行之」，趙氏以「行」釋「用」也。趙氏注《滕文公上》篇「夷子憮然爲間」云：「爲間，有頃之間也。」此云：「爲間，有間也。」按：有間之義數端，各不同。《呂氏春秋·去私篇》「居有間」，高誘注云：「間，頃也。」此言須臾之時，所謂有頃之間也，以時言也。昭公七年《左傳》「晉侯有間」，杜預注云：「間，差也。」此有間謂病愈，《方言》云：「南楚病愈者，或謂之間。」是也。《淮南子·俶真訓》云「則醜美有間矣」，高誘注云：「間，遠也。」謂醜與美相隔之遠也。《國語·晉語》「使無有間隙」，韋昭注云：「間隙，瑕釁也。」昭公十三年《左傳》云「諸侯有間者」，注云：「間，隙也。」大抵間爲隔別之義，所隔者少則爲頃，所隔者多則爲遠。無病與有病別，則間爲愈，相怨與相好別，則間爲隙。故《史記·黥布傳》以行他道爲「間道」，此「爲間不用」謂別行他路，遂與此路隔別而不行。趙氏謂高子「去

而學於他道」，正此「爲間」之喻也。若有頃之間，何遽遂爲茅塞？蓋廢此不行，以別有行處，爲他歧之惑也。

章指：言聖人之道，學而時習。仁義在身，常常被服。舍而不脩，猶茅是塞。明爲善之不可倦也。

疏「常常被服」○正義曰：

阮氏元《校勘記》云：「宋本、孔本、韓本、足利本作當常。」

高子曰：「禹之聲尚文王之聲。」孟子

曰：「何以言之？」**注**高子以爲禹之尚貴聲樂，過

於文王。孟子難之曰：何以言之？**疏**注「禹之尚貴

聲樂過於文王」○正義曰：以「貴」釋「尚」，以「樂」釋「聲」，

俱詳見前。倪氏思寬《二初齋讀書記》云：「禹之聲尚文王

之聲，此聲字即「覺氏爲聲」之聲也。《攷工記》前言「覺氏

爲聲」，後言「覺氏爲鍾」，可知聲即是鍾。蓋聲以鍾爲主，故

即以鍾爲聲，鄭注「聲鍾鎛于之屬」是也。姚氏文田《求是齋

自訂稿》云：「此解尚字與《禮記》「殷人尚聲」義同。」曰：

「以追蠡。」**注**高子曰：禹時鍾在者，追蠡也。追，

鍾鈕也。鈕擘齧處深矣。蠡蠡，欲絕之貌也。文王之鍾不然。以禹爲尚樂也。

疏注「追鍾」至「貌也」○

正義曰：《說文》金部云：「鈕，印鼻也。」此以「追」爲「鍾鈕」，卽爲鍾鼻矣。《淮南子·要略訓》：「擘畫人事之終始者也。」高誘注云：「擘，分也。」《文選·西京賦》：「擘肌分理」，注引《周禮》鄭注云：「擘，破裂也。」《周禮》鄭注，謂《攷工記·旒人》：「擘捰，捰暴不入市」，注云：「捰，破裂也。」捰，擘古字通也。《淮南子·人間訓》：「劍之折，必有齧」，高誘注云：「齧，缺也。」趙氏以「擘齧」二字解「蠡」字，謂破裂缺齧也。緣其破缺之深，故欲絕。《說文》蝨部云：「蠡，蟲齧木中也。」段氏玉裁《說文解字注》云：「蠡之言勞也，如刀之勞物。」《楚辭》：「覽芷圃之蠡蠡」，又借爲「禾黍離離」字。《孟子》：「以追蠡」，趙注曰：「追，鍾鈕也。鈕擘齧處深矣。蠡，欲絕之貌。」此又以蠡同離同劓。《方言》曰：「劓，解也。」又曰：「蠡，分也。」皆其義也。不知假借之指，乃云鍾鈕如蟲齧而欲絕，是株守許書之辭而未能通許書之意矣。「蠡蠡」既通於禾黍之「離離」，《楚辭·思古》云：「曾哀悽歎心離離兮」，注云：「離離，剥裂貌。」此「蠡蠡欲絕之貌」正本諸離離之剥裂也。抑黍實下垂，其蒂之系微細欲絕，亦有如鐘

之下垂，其鈕欲絕，所以稱離離矣。程氏瑤田《通藝錄·攷工創物小記》云：「鐘縣謂之旋。所以縣鐘者設於甬上。參分其甬長，二在上，一在下，其設旋處也。」《孟子》謂之「追蠡」，言追出於甬上者乃蠡也。蠡與螺通。螺小者謂之蛇蝸，郭璞《江賦》所謂「鸚螺蛇蝸」是也。曰旋曰蠡，其義不殊，蓋爲金柄於甬上以貫於縣之者之鑿中，形如螺然，如此則宛轉流動，不爲聲病，此古鐘所以側縣也。旋轉不已，日久則剝敝滋甚，故孟子以「城門之軌」譬之。姚氏文田《求是齋自訂稿》云：「以追爲鐘鈕，既無他證，語又迂曲。一說追與掄同，擊也。《說文》：「旆」字注：「建大木，置石其上，發以機以追敵。」亦謂擊敵也。則此說似爲近是。追者，言所擊之處，蠡則其如木之齧也。三代之樂不殊而禹之鐘獨形其殘缺，苟非當日之數數用之，而何以有是也？」曰：「是奚足哉？城門之軌，兩馬之力與？」**注**孟子曰：「是何足以爲禹尚樂乎？先代之樂器，後王皆用之。禹在文王之前千有餘歲，用鐘日久，故追欲絕耳。譬若城門之軌，其限切深者，用之多耳，豈兩馬之力使之然與？」兩馬者，《春秋外傳》曰：「國馬足以行關，公馬足以稱賦。」**疏**注「是何」至「稱賦」○

正義曰：《禮記·明堂位》云：「拊搏、玉磬、拊擊、大琴、大瑟、中琴、七瑟，四代之樂器也。」又云：「垂之和鐘，叔之離磬，女媧之笙簧。」又云：「凡四代之服、器、官，魯兼用之。」是先代之樂器，後王皆用之也。禹之鐘既爲後王所用，則追之蠹不得獨由禹所用矣。姚氏文田《求是齋自訂稿》云：

「高子以禹尚樂，故其器用至殘缺，今其鐘在者猶可證，乃謂禹自常用也。故孟子以後王皆用曉之。」《攷工記》：「匠人營國，國中九經九緯，經涂九軌。」注云：「軌謂轍廣。乘車六尺六寸，旁加七寸，凡八尺，是謂轍廣。」高誘注《呂氏春秋·勿躬》篇、《淮南子·冥覽訓》，皆云：「車兩輪間曰軌。」《禮記·中庸》云：「今天下車同軌。」隱公元年《左傳》云：

「同軌畢至。」周之車軌，制以八尺，其車之制同，則兩輪行地之迹自無不同，故在地之迹亦名爲軌。《史記·司馬相如傳》「結軌還轅」，《索隱》引張揖云：「軌，車迹也。」《東京賦》「憲先靈而齊軌」，薛綜注云：「軌，迹也。」軌同迹同，故前後相沿，在城門限切必深而成缺齧，故趙氏以「齧」釋「軌」，明此軌屬城門受車輪之缺也。毛氏奇齡《四書賸言》云：「與兄孫講『禹之聲』章，追何以蠹？曰：用之者多也。城門之軌何以非兩馬之力？曰：用之者久也。然則經涂九軌，而每門三涂，祇各一軌，則凡一用而門必三之。此正用之多，

而謂「久」，可乎？車之涉軌也，門與涂同時，無久暫也。匠人既造門，亦即造涂，未嘗前年有門，今年始有涂，何謂久也？試亦於「是奚足哉」一語復誦之乎？兒子遠宗恍然曰：得之矣。《孟子》文多微辭，於此則微辭中又急挂其口，使之自解，只是奚足哉「四字盡之。蓋此語專關禹之追蠹，不關攷擊，並不及文樂，猶之門軌之齧，不關馬力，並不及涂軌。蓋一比較則多寡生，而祇論此追，亦祇論此軌，則久暫之意自見言外，故曰「是」是追蠹也，追蠹爲攷擊所致，得毋門軌之齧是馬力與？即此一語而年世久遠，非一朝用力所能到，意隱隱可驗。所謂急破其惑，不煩證明。乘車多四馬，謂兩服兩驂也。去四言兩，已不可曉。況詰問之意正欲張馬力之多而反從減，此是何意？及觀趙岐注，謂兩馬是公馬、國馬，引《春秋外傳》爲證。然國馬、公馬亦多無解者。古關隘郵驛皆有都鄙所賦馬供往來之用，謂之「國馬」，以此爲民間所出馬也。至公家乘車及鄉遂賦兵、羣載任器，則馬皆官給，謂之「公馬」，以爲總之公牧者也。故周禮「牧人」所掌皆稱國馬，而馭夫、趣馬又分公馬而駕治之。雖無大分別，要之行城之馬則祇此兩等。然則兩馬謂兩等馬耳。」謹按：《春秋外傳》者，《國語·楚語》「鬬且與其弟論令尹子常之言也。韋昭本作「國馬足以行軍」，云「國馬，民馬也。十

六井爲丘，有戎馬一匹，牛三頭，足以行軍。公馬，公之戎馬。稱，舉也。賦，兵也。趙氏所見本蓋與章異。姚氏文田《求是齋自訂稿》云：「趙氏以『兩馬』爲國馬、公馬，不如豐氏『一車所駕』之說爲長。但當云城中車可散行，城門則車皆由之，兩馬之力乃以車多反言，則文義自明。如泥『兩馬』二字，即國中之軌亦豈兩馬所能成？故不可以辭害意也。」

《左氏》哀公二十七年《傳》：「陳成子屬孤子，三日期，設乘車兩馬」，注：「乘車兩馬，大夫服。」《史記·孔子世家》：「魯君與之一乘車，兩馬」，又《左》哀公十七年《傳》：「乘衷甸，兩牡」，注「衷甸一轅，卿車」。疏：「兵車一轅而二馬夾之，其外更有二驂，是爲四馬。今止乘兩牡，謂之衷乘者，衷，中也。蓋以四馬爲上乘，兩馬爲中乘，大事駕四，小事駕二，爲等差故也。《異義》：古《毛詩》說，天子之大夫皆駕四，故《詩》云「四牡駢駢，周道倭遲」是也。其諸侯大夫，士唯駕二，^①無四。二十七年陳成子以乘車兩馬賜顏涿聚之子。《士喪禮》云：「賻以兩馬。是惟得駕兩，無上乘也。」皆可爲一車所駕之證。」曹氏之升《摭餘說》云：「古駕車之法，夏駕二馬謂之麗，殷駕三馬謂之駟，周自天子至大夫皆駕四馬謂之駟。孟子若曰：不知禹聲，盍觀禹迹？彼城門之軌，道止一達，車從中央，禹以來，閱千八百年於茲，殷之駟於此門

也，周之駟亦於此門也，而謂門限切深猶是夏先王兩馬之力與？」謹按：夏駕二馬，見《毛詩·衛風·干旄》，正義引王肅云：「夏后氏駕兩謂之麗，殷益以一駟謂之駟，周人又益一駟謂之駟。」此說於先王之樂器後王皆用之說尤切，錄之以備參攷。「限切」者，阮氏元《校勘記》云：「段玉裁云：『門限亦名門切。』丁氏云『限迹切深』，由不解切字也。」

章指：言前聖後聖，所尚者同。三王一體，何得相踰？欲以追蠡，未達一隅。孟子言之，將啓其蒙。

齊饑。陳臻曰：「國人皆以夫子將復爲發棠，殆不可復。」^①注：棠，齊邑也。孟子嘗勸王發棠邑之倉以振貧窮，時人賴之。今齊人復饑，陳臻言一國之人皆以爲夫子復若發棠時勸王也，殆不可復言之也。疏：注「棠齊邑也」○正義曰：襄公六年「齊侯滅萊」，《左傳》云：「王湫帥師及正與子棠人軍齊師，齊師大

①「士」，原脫，今從沈校據《左傳正義》改。

敗之。丁未入萊，萊共公浮柔奔棠。晏弱圍棠，十一月丙辰而滅之。」注云：「棠，萊邑也。北海即墨縣有棠鄉。」十八年「齊侯駕，將走郵棠」，注云：「郵棠，齊邑。」二十五年《左傳》「齊棠公之妻」，注云：「棠公，齊棠邑大夫。」閻氏若璩《釋地》云：「齊滅萊邑，故為齊有。後孟子為發棠，即此是也。今即墨縣甘棠鄉。」顧氏棟高《春秋大事表》云：「郵棠，故萊邑也。山東登州即墨縣有棠鄉，為萊之棠邑。東昌府堂邑縣為齊棠邑，棠公為棠邑大夫。孟子勸齊王發棠，即此。後謫棠為堂。」周氏柄中《辨正》云：「顧亭林《山東攷古錄》云：『當時即墨為齊之大都，倉廩在焉，故云發棠。』則棠為萊邑，非今之堂邑縣也。《大事表》疑誤。」孟子曰：「是為馮婦也。晉人有馮婦者，善搏虎，卒為善士。則之野，有衆逐虎，虎負嵎，莫之敢撓。望見，馮婦趨而迎之。馮婦攘臂下車，衆皆悅之，其為士者笑之。」**注**馮，姓，婦，名也。勇而有力，能搏虎。卒，後也。善士者，以善搏虎有勇名也，故進之以為士。之於野外，復見逐虎者。撓，迫也。虎依隈而怒，無敢迫近者也。馮婦耻不如

前，見虎，走而迎之，攘臂下車，**①**欲復搏之。衆人悅其勇猛，其士之黨笑其不知止也。故孟子謂陳臻，今欲復使我如發棠時言之於君，是則我為馮婦也，必為知者所笑也。**疏**注「馮姓」至「虎者」○正義曰：「儀禮·燕禮」卒受者」，注云：「卒猶後也。」卒之義為終，終亦後也。「卒為善」，足見前此恃力無賴為不善也。不善改而為善，何以有士稱？故趙氏申明之。《毛詩正義》云：「士者，男子成名之大號。」故「有勇名而進以為士」，如稱「勇士」是也。本稱勇士，改而為善，乃為善士也。申此者，趙氏以「士」字連「善」字，恐章句不明也。劉昌詩《蘆浦筆記》云：

「余味此段之言，恐合以『卒為善』為一句，『士則之』為一句，『野有衆逐虎』為一句。蓋有搏虎之勇而卒能為善，故士以為則；及其不知止，則士以為笑也。」周密《志雅堂雜抄》云：「一本以善字、之字點句，前云『士則之』，後云『其為士者笑之』，文義相屬，於《章旨》亦合。」閻氏若璩《釋地》又續云：「古人文字敘事未有無根者。惟馮婦之野，然後衆得望見馮婦。若如宋周密斷『士則之』為句，野字遂屬下，野但有

①「臂」，原誤作「背」，今據經文及經解本改。

衆耳，何由有馮婦來？此爲無根。或曰：固已，恐從未見「則之野」此句法。余曰：《周書》「則至于豐」。○注「櫻迫」至「止也」○正義曰：《淮南子·俶真訓》云「櫻人心也」，高誘注云：「櫻，迫也。」《說文》走部云：「迫，近也。」故趙氏以「迫」釋「櫻」，又以「近」釋「迫」。《音義》云：「丁於盈切。《埤蒼》云：「櫻，桎也。」桎之猶云繫之，蓋讀櫻爲纓，繫之以纓即謂之纓也。《莊子·大宗師》「其名爲櫻寧」，《釋文》引崔氏注云：「櫻，有所繫著也。」此亦以櫻爲纓也。《莊子·在宥》云「汝慎無櫻人心」，司馬彪注云：「櫻，引也。」引亦繫繫之義。然是時衆方與虎相持，何得遽言桎繫？迫之義長矣。《音義》云：「陬，子于切，又子侯切，隅也。」隅即隅，《說文》旨部云：「隅，陬也。」《詩·小雅·正月》「瞻彼阪田」，箋云：「崎嶇境埆之處。」故馬融《廣成頌》云：「負隅依險。」段氏玉裁《說文解字注》云：「負，恃也。《左傳》曰：『昔秦人負恃其衆，貪於土地，逐我諸戎。』」《孟子》曰：「虎負隅，莫之敢櫻。」虎有所恃而張，故云「依陬而怒」也。謹按：注中「見虎」二字解「望見」二字，明「望見」二字斷句，「馮婦趨而迎之」六字斷句，是時婦猶在車中，令趨車迎之也。將近矣，馮婦又攘臂下車。趙氏以「耻不如前」明所以趨迎，所以下車之故，而以「馮婦」二字貫於「見虎

走迎」之上，則「望見」爲馮婦望見明矣。先言「望見」後言「馮婦」者，屬文之法也。自「則之野」貫下，此「望見」者自即是之野者望見。不可云「望見有衆逐虎，虎負隅，莫之敢櫻」，故倒言之也。是時知止，則可以不趨迎、不下車。連用馮婦者，若曰：誰迫之使趨迎？馮婦也。誰迫之使下車？馮婦也。皆形容其不知止之狀也。《說文》走部云：「趨，走也。」故以「走」釋「趨」，謂行之疾也。《說文》手部云：「攘，推也。」推，排也。推排其兩手於前作搏勢也。孟子屬文奇奧，趙氏每能曲折達之。卒爲善士，何至又爲士之黨笑之，則因其之野望見如是，趨迎如是，下車如是也。「則」字非虛用也。

章指：言可爲則從，不可則凶。言善

見用，得其時也；非時逆指，猶若馮婦。

暴虎無已，必有害也。疏「暴虎無已」○正義

曰：《爾雅·釋訓》云：「暴虎，徒搏也。」《毛詩·鄭風·

大叔于田》「檀楊暴虎，獻于公所」，傳云：「暴虎，空手以搏之。」僖公元年《穀梁傳》：「公子友謂莒鞏曰：『吾二

人不相說，士卒何罪？』屏左右而相搏，公子友處下，左右曰：『孟勞。』孟勞者，魯之寶刀也。」先搏時無刀，是搏

即無兵空手相擊，故江熙云：「佻身獨鬪，潛刃相害。」僖公二十八年《左傳》：「晉侯夢與楚子搏」，注云：「搏，手搏。」惟手無兵空搏，故楚子伏而鹽其腦。蓋相搏而顛，楚子以身壓，晉文以口噉，皆不用兵也。搏從手，空手即是搏，非搏有徒不徒之別也。故趙氏以「暴虎」釋經之「搏虎」。暴，搏，一音之轉。《廣雅·釋詁》云：「擗，擊也。」擗同撲，撲亦搏也。

孟子曰：「口之於味也，目之於色也，耳之於聲也，鼻之於臭也，四肢之於安佚也，性也。有命焉，君子不謂性也。」**注**口之甘美味，目之好美色，耳之樂音聲，鼻之喜芬香。臭，香也。《易》曰：「其臭如蘭。」四體謂之四肢。四肢解倦則思安佚不勞苦。此皆人性之所欲也。得居此樂者有命祿，人不能皆如其願也。凡人則觸情從欲而求可樂，君子之道則以仁義爲先，禮節爲制，不以性欲而苟求之也，故君子不謂性也。**疏**注「臭香」至「如蘭」

○正義曰：《禮記·月令》：「春月其味酸，其臭羶，夏月

其味苦，其臭焦，中央其味甘，其臭香，秋月其味辛，其臭腥，冬月其味鹹，其臭朽。」孔氏正義云：「通於鼻者謂之臭，在口者謂之味。臭則氣也。」味有五，臭亦有五，《孟子》於口目耳鼻渾言味色聲臭，而於四體言安佚以互見之。則味必嗜甘，色必好美，聲必喜音，臭非謂臭，專屬諸香也。引《易》者，《繫辭上傳》文也。「其臭如蘭」，則臭有不如蘭者矣。虞翻注《易》云：「臭，氣也。」不專以爲香也。《荀子·王霸》篇云：「夫人之情，目欲羶色，耳欲羶聲，口欲羶味，鼻欲羶臭，心欲羶佚。」此與《孟子》義同。楊倞注云：「臭，氣也。凡氣香亦謂之臭。《禮記》曰：『佩容臭。』羶，極也。佚，安樂也。」此注先訓氣，後言香，爲得其意矣。又《正名》篇云：「香臭、芬鬱、腥臊、酒酸、奇臭以鼻異。」注云：「芬，花草之香氣也。鬱，腐臭也。《禮記》：『烏鵲色而沙鳴鬱。』酸，暑沍之酸氣也。奇臭，衆臭之異者。氣之應鼻者爲臭，故香亦謂之臭。《禮記》曰：『皆佩容臭。』此獨冠以「香臭」者，明其下皆臭也。《禮記·內則》：『皆佩容臭，』注云：「容臭，香物也。」庾氏云：「以臭物可以脩飾形容，故謂之容臭。」此亦以臭不專於芬香，惟芬香可飾形容，故別之云容也。《周禮·天官·官人》：「除其不蠲，去其惡臭。」《禮記·大學》篇云：「如惡惡臭，如好好色。」臭之惡者爲惡臭，

猶臭之香者爲香臭。僖公四年《左傳》云：「一薰一蕕，十年尚猶有臭。」注云：「薰，香草；蕕，臭草。十年有臭，言善易消，惡難除。」孔氏正義云：「臭是氣之總名，原非善惡之稱。但既謂善氣爲香，故專以惡氣爲臭。十年香氣盡矣，惡氣尚存。」此臭字乃朽字之假借。《月令》：「其臭朽。」《說文》：「部朽爲朽之重文，「朽，腐也」。《列子·周穆王》篇云：「聞歌以爲哭，視白以爲黑，饗香以爲朽，嘗甘以爲苦。」朽與香對，則薰香猶臭者，乃薰香猶朽也。《廣雅·釋器》云：「朽，臭也。」謂臭爲朽之假借，朽爲臭之正也。惡臭作朽，腐穢之氣也。鼻所嗅之總名作臭，非臭之名或專於香，或專於惡也。仁之於父子也，義之於君臣也，禮之於賓主也，知之於賢者也，聖人之於天道也，命也。有性焉，君子不謂命也。」**注**仁者得以恩愛施於父子，義者得以義理施於君臣，好禮者得以禮敬施於賓主，知者得以明知知賢達善，聖人得以天道王於天下，皆命祿。遭遇乃得居而行之，不遇者不得施行。然亦才性有之，故可用也。凡人則歸之命祿，任天而已，不復治性，以君子之道，則脩仁行義，脩禮學知，庶幾聖人，亶亶不倦，不但坐而聽命，

故曰：「君子不謂命」也。**疏**「仁之」至「命也」○正義

曰：戴氏震《孟子字義疏證》云：「人之血氣心知，原於天地之化育者也。有血氣，則所資以養其血氣者，聲色臭味是也。有心知則知有父子，有昆弟，有夫婦而不止於一家之親也。於是又知有君臣，有朋友，五者之倫相親相治，則隨感而應爲喜怒哀樂。合聲色臭味之欲，喜怒哀樂之情，而人道備。欲根於血氣，故曰性也，而有所限而不可踰，則命之謂也。仁義禮智之懿不能盡人如一者，^①限於生初，所謂命也，而皆可以擴而充之，則人之性也。「謂」者，猶云「藉口」於性耳。君子不藉口於性以逞其欲，不藉口於命之限之而不盡其材。後儒未詳審文義，失孟子立言之指。「不謂性」非「不謂之性」，「不謂命」非「不謂之命」。由此言之，孟子之所謂性，即口之於味，目之於色，耳之於聲，鼻之於臭，四體之於安佚之爲性，所謂人無有不善，即能知其限而不踰之爲善，即血氣心知能底於無失之爲善，所謂仁義禮智即以其血氣心知，所謂原於天地之化者之能協於天地之德也。此荀、楊之所未達，而老莊、告子、釋氏昧焉而妄爲穿鑿者

①「人」，原誤作「一」，今從沈校據《孟子字義疏證》改。

也。」程氏瑤田《通藝錄·論學小記》云：「性、命二字必合言之而治性之學始備。五官百骸，五常百行，無物無則。性命相通，合一於則，性乃治矣。孟子曰：『口之於味也，目之於色也，耳之於聲也，鼻之於臭也，四肢之於安佚也，性也。有命焉，君子不謂性也。』謂我之口而嗜乎味，我之目而美乎色，我之耳而悅乎聲，我之鼻而知乎臭，我之四肢而樂乎安佚，其必欲遂者，與生俱生之性也，其不能必遂者，命之限於天者也。五者，吾體之小者也。遂己所成之性恒易，而順天所限之命恒難。性易遂，則必過乎其則，命難順，則不能使不過乎其則。治性之道以不過乎則爲斷，節之以命而不畏其難順，斯不過乎其則矣。『仁之於父子也，義之於君臣也，禮之於賓主也，智之於賢者也，聖人之於天道也，命也。有性焉，君子不謂命也。』謂以吾心之仁而施於父子，以吾心之義而施於君臣，以吾心之禮而施於賓主，以吾心之智而施於賢者，以吾心所具聖人之德與天道相貫通，其必欲遂者，與生俱生之性也，其不能必遂者，命之限於天者也。五者，吾體之大者也。遂己所成之性恒難，而順天所限之命恒易。性難遂，則必不及乎則，命易順，則任其不及乎則。治性之道以必及乎則爲斷，勉之以性而不畏其難遂，斯必及乎其則矣。」阮氏元《校勘記》云：「『知之於賢者也』，閩、監、毛三本

知作智。按，《音義》出「知之」，云：「音智，注同。」則作智非也。『有性焉』，各本同。孔本焉作也。」○注「聖人」至「命也」○正義曰：「天道」即元亨利貞之天道。「乾道變化，各正性命，保合太和」，此天道也。「通神明之德」，使天下各遂其口鼻耳目之欲，各安其仁義禮知之常，此聖人之於天道也。乃伏羲、神農、黃帝、堯舜、禹湯、文武得位而天道行，所謂「道之將行也與？命也」；孔子不得位而天道不行，所謂「道之將廢也與？命也」。趙氏謂「遭遇乃得行之，不遇者不得施行」是也。道行則民遂其生，育其德，道不行則民不遂其生，不育其德。故口鼻耳目之欲不遂，屬之命，而仁義禮智之德不育，亦屬之命。然顓愚之民不能自通其神明之德，又不遇勞來匡直者有以輔翼之，固限於命矣。若君子處此，其口鼻耳目之欲則任之於命而不事外求，其仁義禮智之德則率乎吾性之所有而自脩之，不委諸教化之無人而甘同於顓愚之民，所謂「雖無文王，猶興」也。且由是推之。父頑母嚚，命也，而舜則大孝蒸蒸，瞽瞍底豫，此「仁之於父子，君子不謂命」也；罪人斯得，命也，而周公則勤勞王家，沖人感悟，此「義之於君臣，君子不謂命」也；道大莫容，命也，而孔子則栖栖皇皇，不肯同沮、溺之辟世，荷蓀之潔身，而明道於萬世，此「聖人於天道，君子不謂命」也。《大戴記·千乘》篇

云：「以爲無命則民不偷。」以爲無命「即是不謂命」。

章指：言尊德樂道，不任佚性，治性勤禮，不專委命。君子所能，小人所病。究言其事，以勸戒也。

疏「不任佚性」○正義曰：阮氏元《校勘記》云：「孔本、韓本、《攷文》古本任作追。」○「治性勤禮」○正義曰：周氏廣業《孟子章指攷證》云：「《文選》注引作『治身勤禮』。」

浩生不害問曰：「樂正子，何人也？」

注浩生，姓，不害，名。齊人也。見孟子聞樂正子爲政於魯而喜，故問樂正子何等人也？孟子曰：

「善人也，信人也。」

注樂正子爲人有善有信也。

「何謂善？何謂信？」

注不害問善、信之行謂何？曰：「可欲之謂善，有諸己之謂信。充實之謂美，充實而有光輝之謂大，大而化之之謂聖，聖而不可知之之謂神。樂正子二之中，四之下也。」

注己之所欲，乃使人欲之，是爲善人，「己所不欲，勿施於人」也。有之於己，乃謂人有

之，是爲信人，「不意不信」也。充實善信，使之不

虛，是爲美人，美德之人也。充實善信而宣揚之，使有光輝，是爲大人。大行其道，使天下化之，是爲聖人。有聖知之明，其道不可得知，是爲神人。人有

是六等，樂正子善、信，在二者之中，四者之下也。

疏「可欲之謂善」○正義曰：趙氏以「己所不欲，勿施於人」

爲「可欲」。按：此忠恕一貫之學，不僅於善也。《呂氏春

秋·長攻》篇：「所以善代者乃萬故」，高誘注云：「善，好也。

所好於代者非一事。」《中論·天壽》篇引《孟子》：「生我所欲

也，義亦我所欲也」，欲作好。好善亦爲善，善可欲，即可好，

其人善則可好，猶其人不善則可惡。其人可惡，即爲惡人，

其人可好，自爲善人也。○「有諸己之謂信」○正義曰：《說

文》人部云：「信，誠也。」誠猶實也。有即「亡而爲有」之有。

可好未必其不虛也，實有之矣，是爲信也。趙氏引「不意不

信」，語見《論語·憲問》篇，謂不可億度人之不信。引之者，

蓋謂宜己有此信，不可億人之不信也。○「充實之謂美」○

①「勤」，原誤作「行」，今據《章指》改。

正義曰：《詩·召南·小星》篇「實命不同」，①《釋文》引《韓詩》云：「實，有也。」即此有諸己者擴而充之，使全備滿盈，是為「充實」。《詩·邶風·簡兮》云「彼美人兮」，箋云：「彼美人謂碩人也。」首章「碩人俟俟」，傳云：「碩人，大德也。俟俟，容貌大也。」充滿其所有以茂好於外，故容貌碩大而為美。美指其容也。○「充實而有光輝之謂大」○正義曰：《說文》火部云：「光，明也。」「輝，光也。」輝與燿同。《毛詩·大雅·皇矣》篇「載錫之光」，傳云：「光，大也。」有光輝故大。充則暢於四體，光則照於四方，故趙氏云「宣揚之」。○「大而化之之謂聖」○正義曰：《說文》耳部云：「聖，通也。」此謂德業照於四方而能變通之也。○「聖而不可知之謂神」○正義曰：「通其變，使民不倦」，大而化之也，「神而化之，使民宜之」，「聖而不可知之」也。《易·繫辭傳》云「陰陽不測之謂神」，「不測」即「不可知」。《周書·謚法解》云「民無能名曰神」，不可知故無能名。孟子論樂正子，推極於聖、神。至於神，則堯舜之治天下也。孟子所以「言必稱堯舜」。

章指：言神、聖以下，優劣異差。樂正好善，應下二科。是以孟子為之喜也。

孟子正義卷二十八終

①「星」，原誤作「差」，今從沈校據《詩經》改。

孟子正義卷二十九

江都縣鄉貢士焦循撰集

孟子曰：「逃墨必歸於楊，逃楊必歸於儒。歸，斯受之而已矣。」**注**墨翟之道兼愛，無

親疏之別，最爲違禮；楊朱之道爲己愛身，雖違禮，尚得「不敢毀傷」之義。逃者，去也。去邪歸正，故曰歸。去墨歸楊，去楊歸儒，則當受而安之也。**疏**

「逃墨」至「而已矣」○正義曰：趙氏佑《溫故錄》云：「舊謂墨無親疏之別，最爲違禮，楊尚得不敢毀傷之義。竊謂不然。此亦互見之耳。逃墨之人始既歸楊，及逃楊，勢不可復歸墨而歸儒；假令逃楊之人始而歸墨，及逃墨，亦義不可復歸楊而歸儒可知也。亦有逃楊不必歸墨而即歸儒，逃墨不必歸楊而即歸儒者，非以兩「必」字拘定一例；^①如是逃，如是歸，且以斷兩家之優劣也。楊之言似近儒之爲己愛身，而

實止知有己不知有人，視天下皆漠不關情，至成刻薄寡恩之惡；墨之言亦近儒之仁民愛物，而徒一概尚同，不知辨異，視此身皆一無顧惜，至成從井救人之愚。其爲不情則一。天下之不近人情者，鮮不爲大奸慝，故孟子並斷之「無君父」，極之於「禽獸」，非有罪名出入。」○**注**「逃者」至「曰歸」○正義曰：《禮記·曲禮》「三諫而不聽則逃之」，**注**云：

「逃，去也。」《詩·曹風·蜉蝣》篇「於我歸處」，箋云：「歸，依歸。」《廣雅·釋詁》云：「歸，就也。」「歸正」猶云「就正」矣。伏生《書大傳》云「和伯之樂名曰《歸來》」，鄭氏**注**云：

「歸來言反其本也。」《爾雅·釋言》云：「還，返也。」《廣雅·釋詁》云：「還，歸也。」《釋言》云：「還，返也。」下云「追而還之」，又以「還」釋「歸」。

今之與楊墨辯者如追放豚，既入其茆，又從而招之。**注**茆，蘭也；招，

胃也。今之與楊墨辯爭道者，譬如追放逸之豕豚。

追而還之入蘭則可，又復從而胃之，大甚。以言去楊墨歸儒則可，又復從而罪之，亦云大甚。**疏**注「茆

蘭也」○正義曰：《音義》云：「茆，丁音立。欄也，圈也。蘭

①「拘」，原誤作「例」，今據《四書溫故錄》改。

與欄字同。」戴氏震《方言疏證》云：「《方言》曰：「苙，園也。」注云：「謂蘭園也。」《孟子》「既入其苙」，趙岐注云：「苙，蘭也。」蘭、蘭古通用。《漢書·王莽傳》「與牛馬同蘭」，顏師古注云：「蘭謂遮蘭之，若牛馬蘭圈也。」阮氏元《校勘記》云：「蘭者假借字，欄者俗字，闌者正字也。」○注「招買也」○正義曰：《音義》云：「買，洵究切。謂羈其足也。」按：《一切經音義》引《三蒼》云：「羈作羈又作買。」《說文》網部云：「羈，綰也。」系部云：「綰，綰也。」《周禮·秋官·冥氏》「掌設弧張」，注云：「弧張，置罩之屬，所以肩綰禽獸。」《羈氏》「掌攻猛鳥，各以其物爲媒而擒之」，注云：「置其所食之物於綰中，鳥來下則擒其脚。」綰即羈，亦即買也。綰之爲羈，猶《爾雅·釋器》「捐之爲環」。《聲類》云「買，以繩係取鳥獸也」，《音義》言「羈其足」，皆本此。然趙氏以「買」釋「招」，未詳所本。趙氏佑《溫故錄》云：「《音義》不爲招字作音，《字書》引此經注與《詩》「招招舟子」並列音昭之下，明其義有別，音無別，不知今讀何以相仍如翹字？此惟《國語》齊武子好盡言以招人過」，注「招，舉也」。當讀翹耳。亦猶「招招舟子」本當如字，而今乃與《徵招》、《角招》之招同讀詔。然愚又謂招之爲買爲羈，僅見此注，絕少他證。①孟子之闢楊墨，方深望「能言距」之人而不可得，蓋未必有追咎太甚之

事。此節乃孟子自明我今之所以與楊墨辯者，有如追放豚然，惟恐其不歸也。其來歸者既樂受之，使人其苙，未歸者又從而招之，言望人之棄邪反正，無已時也。苙既處之有常，招又望之無已，如是則不咎其往之意，具見招字非但無取別音，並不煩別義耳。」○注「今之至大甚」○正義曰：襄二十九年《左傳》云「辯而不德」，服氏注云：「辯，答鬪辯也。」《呂氏春秋·淫辭》篇云「無與孔穿辯」，高誘注云：「辯，相易奪也。」鬪，奪皆謂爭也。《墨子·經上》云：「辯，爭彼也。」故趙氏以「爭」釋「辯」。《書·棗誓》「馬牛其風」，鄭氏注云：「風，走逸。」《釋名·釋天》云：「風，放也。」《詩·小雅·北山》篇「或出入風議」，傳亦云：「風猶放也。」放、風一音之轉，「放逸」即「風逸」也。《方言》云：「豬，其子謂之豚。」《爾雅·釋獸》云：「豕子，豬。」是豕即豚也。

章指：言驅邪反正，正斯可矣。來者不綏，追其前罪，君子甚之，以爲過也。疏

「來者不綏」○正義曰：《論語·子張》篇云「綏之斯來」，孔氏云：「綏，安也。言孔子爲政，安之則遠者來至。」此

①「他」，原誤作「作」，今據《四書溫故錄》改。

言「來者不綏」，謂來歸者不受而安之。

孟子曰：「有布縷之征、粟米之征、力役之征。」

注征，賦也。國有軍旅之事則橫興此三賦也。布，軍卒以爲衣也；縷，鉄鎧甲之縷也。粟米，軍糧也。力役，民負荷斯養之役也。

疏「有布」至「之

征」○正義曰：惠氏士奇《禮說》云：「屋粟、邦布，見《管子·輕重》篇。屋粟者，地稅，夫一爲廩，夫三爲屋。荀子所謂「田野之稅」，孟子所謂「粟米之征」。管子謂「籍於室屋」，妄矣。蓋計畝以步，計井以屋，故小司徒得據而攷焉而斂之旅師者是也。邦布者，口泉，衆寡有數，長短有度，荀子所謂「刀布之斂」，孟子所謂「布縷之征」。管子謂「籍於萬民六畜」，妄矣。蓋家辨其物，歲入其書，故鄉遂大夫得稽而征焉而人之外府者是也。凡田不耕者出屋粟，有田而不耕，使出三夫之地稅。凡民無職者出夫布，無田乃無職，使出一夫之口泉。出之民曰夫布，人之國曰邦布，其實一也。」謹案：《周禮·地官·載師》「凡宅不毛者出里布」，鄭司農云：「里布者，布參印書，廣二寸，長二尺，以爲幣，貿易物。」《詩》云「抱布貿絲」，抱此布也。或曰：布，泉也。《春秋傳》曰：

「買之百兩一布。」又《廛人職》：「掌斂市之次布、儻布、質布、罰布、廛布。」孟子曰：「廛無夫里之布。」不知言布參印書者何見，舊時說也。「玄謂宅不毛者罰以一里二十五家之泉。」征賦之稱布，司農有此二義，一爲泉布之布，則布即錢也；一爲布參印書以爲幣，而引《詩》爲證。《毛詩·衛風·氓》「抱布貿絲」，傳云：「布，幣也。」箋云：「幣者，所以買賣物也。」孔氏正義云：「知此布非泉而言幣者，以言抱之，則宜爲幣。此布幣謂絲麻布帛之布。幣者，布帛之名，故《鹿鳴》云「實幣帛筐篚」是也。」又云：「司農之言，事無所出，故鄭易之。」賈氏《載師》疏云：「此說非，故先鄭自破之。」是征賦之布爲泉布，非布帛。孟子不云「泉布之征」而云「布縷之征」，布與縷連稱，則布爲布帛，此趙氏所以不用夫布、里布等說，而以爲軍行之橫征也。且屋粟、里布，國之常賦，不容缺緩，即用二用三，何致民有殍而父子離？則趙氏義爲長。○注「布軍」至「役也」○正義曰：《詩·秦風·無衣》云「豈曰無衣，與子同袍」，次章云「與子同澤」，三章云「與子同裳」，是軍卒當給以衣也。《說文》系部云：「縷，綫也。」鉄，縫也。《書·棗誓》「善敕乃甲冑」，鄭氏注云：「敕謂穿徹之。」王氏鳴盛《尚書後案》云：「甲冑皆以革爲之。《攷工記·函人》「犀甲七屬，兕甲六屬，合甲五屬」，鄭氏注

云：「屬謂上旅下旅札續之數。」是甲聯合數革以爲之也。又《韞人》云：「督其線，欲其臧也。」杜子春云：「線謂縫革之縷。」是甲冑之革皆必以線縷縫綴，鄭云「穿徹」，即縫綴也。」武氏億《釋甲》云：「以繩謂之縷，繩有飾謂之朱綬。」《逸周書》「年不登，甲不纓縢」，孔晁注曰：「縷繩甲不以組。」《書》「敕乃甲冑」，正義引鄭云：「敕謂穿徹之。謂甲繩有斷續，當使敕理穿治之。」《說文》云：「綬，綫也。」《魯頌·閟宮》篇「貝冑朱綬」，傳：「朱綬，以朱綬綴之。」疏謂「以朱綬連綴甲也」。又按，朱綬即冑之綬。《太平御覽》：「《詩》云「貝冑朱綬」，謂以貝齒飾冑，朱縷綴之也。」《少儀》疏謂「以朱繩綴甲」，故鄭云「亦鎧飾也」。是鄭所云「鎧飾」而以亦字言之，明其蒙冑爲義。疏但指連綴甲，於義猶未備也。」按：王氏、武氏所詳，是縷爲鉄甲之縷也。葉時《禮經會元》云：「六軍人自爲備，居有積倉，行有裹糧，非公家所給也。是以太宰之職，九賦斂財皆有以待其用，獨不及軍旅，九式均財，皆有以爲之法，而亦不及軍旅。豈非農皆爲兵，兵皆自賦，初無煩於廩給，故亦不煩於均節與？」謹按：《梁惠王下》篇引《晏子》，已云「今也不然，師行而糧食，飢者弗食，勞者弗息」。則春秋時行軍轉食已有粟米之征。布縷、粟米既非常賦，則力役亦非徒役之正額。既轉米粟，必有負荷之人，所

謂「勞者弗息」也。《音義》云：「斯義同斯，賤役也。」宣十二年《公羊傳》「斯役扈養，死者數百人」，何休注云：「艾草爲防者曰斯，汲水漿者爲役，養馬者曰扈，炊烹者曰養。」《史記·張耳陳餘傳》云「有斯養卒」，《集解》引韋昭云：「析薪爲斯，炊烹爲養。」斯之訓爲析，緣其任析薪，故名斯，斯其俗字也。蘇林云：「斯，取薪者也。養，養人者也。」飲食所以養人，故炊烹者名養。君子用其一，緩其二。用其二而民有殍，用其三而父子離。」注「君子爲政，雖遭軍旅，量其民力，不並此三役，更發異時。急一緩二，民不苦之；若並用二則路有餓殍，若並用三則分崩不振，父子離析，忘禮義矣。」疏「注「則分」至「義矣」○正義曰：《論語·季氏》篇「邦分崩離析而不能守也」，《集解》引孔氏云：「民有異心曰分，欲去曰崩，不可會聚曰離析。」孟子言「父子離析」，趙氏兼及「分崩」，因有異心，各思逃竄則父不顧子，子不顧父，故忘孝慈之禮義矣。

章指：言原心量力，政之善者；繇役並興，以致離殍。養民輕斂，君子道也。

孟子曰：「諸侯之寶，三：土地、人民、政事。寶珠玉者，殃必及身。」**注**諸侯正其封疆，

不侵鄰國，鄰國不犯，寶土地也；使民以時，民不離散，寶人民也；脩其德教，布其惠政，寶政事也。若寶珠玉，求索和氏之璧、隋侯之珠，與強國爭之，強國加害，殃及身也。

疏「諸侯之寶三」○正義曰：《禮

記·檀弓》云「仁親以爲寶」，注云：「寶謂善道可守者。」寶與保通，謂保守此土地、人民、政事也。○注「求索」至「身也」○正義曰：《荀子·大略》篇云：「和之璧，井里之厥也。」

玉人琢之，爲天子寶。」《韓非子·和氏》篇云：「楚人和氏得

玉璞楚山中，奉而獻之厲王。厲王使玉人相之，玉人曰：

「石也。」王以和爲誑而刖其左足。及厲王薨，武王即位，和

又奉其璞而獻之。武王使玉人相之，又曰：「石也。」王又以

和爲誑而刖其右足。武王薨，文王即位，和乃抱其璞而哭於

楚山之下，三日三夜，淚盡而繼之以血。王聞之，使人問其

故。和曰：「吾非悲刖也，悲夫寶玉而題之以石，貞士而名

之以誑，此吾所以悲也。」王乃使玉人理其璞而得寶焉，遂命

曰和氏之璧。」《史記·藺相如傳》云：「趙惠文王時得楚和

氏璧，秦昭王聞之，使人遺趙王書，願以十五城請易璧。」秦

亦不以城予趙，趙亦終不予秦璧，其後秦伐趙，拔石城，明年復攻趙，殺二萬人。此所謂「與強國爭之，強國加害」也。

《莊子·讓王》篇云：「隨侯之珠，彈千仞之雀。」《漢書·鄒

陽傳》獄中上書云：「故無因而至前，雖出隨珠和璧，祇怨結

而不見德。」《文選》作「隨侯之珠，夜光之璧」。《淮南子·覽

冥訓》云：「譬如隨侯之珠，和氏之璧，得之者富，失之者

貧。」高注云：「隋侯，漢東之國，姬姓諸侯也。隋侯見大蛇

傷斷，以藥傅之。後蛇於江中銜大珠以報之，因曰隋侯之

珠，蓋明月珠也。」《史記·李斯列傳》有「隨和之寶」，正義引

《說苑》云：「昔隨侯行遇大蛇中斷，疑其靈，使人以藥封之，

蛇乃能去，因號其處爲斷蛇丘。歲餘，蛇銜明珠，絕白而有

光，因號隨珠。」隨侯之珠無求索爭國事，趙氏蓋連及之。

《新序·雜事》篇云：「秦欲伐楚，使使者觀楚之寶器。楚王

聞之，召令尹子西而問焉。曰：「秦欲觀楚之寶器，吾和氏

之璧、隨侯之珠，可以示諸？」求索或指此與？

章指：言寶此三者，以爲國珍，寶於爭玩，以殃其身。諸侯如茲，永無患也。

盆成括仕於齊。孟子曰：「死矣，盆成

括！」**注**盆成，姓，括，名也。嘗欲學於孟子，問道未達而去。後仕於齊，孟子聞而嗟歎曰：「死矣，盆成括。知其必死。」**疏**注「盆成」至「必死」○正義曰：《說

苑·建本》篇有盆成子，是「盆成」二字爲姓。周氏廣業《孟子出處時地攷》云：「死矣盆成括」正與孔子「由其死矣」語同，何故斥之？又《晏子·外篇》載景公命盆成适以母柩合葬於路寢事，晏子稱之曰：「适者，父之孝子，兄之順弟。」又嘗爲孔子門人，是齊有兩盆成括也。然孔庭從祀無盆成括。「盆成括見殺。門人問曰：「夫子何以知其將見殺？」**注**門人問孟子何以知之？曰：

「其爲人也小有才，未聞君子之大道也，則足以殺其軀而已矣。」**注**孟子答門人，言括之爲人小有才慧而未知君子仁義謙順之道，適足以害其身也。**疏**注「小有」至「身也」○正義曰：《淮南子·主術訓》

云：「任人之才難以至治」，高誘注云：「才，智也。」《方言》云：「智，或謂之慧。」是「小有才」謂「有小慧」也。《論語·衛靈公》篇「羣居終日，好行小慧，難矣哉」，《集解》鄭注云：「小慧謂小小之才智。」《說文》心部云：「慧，僂也。」慧則精

明，精明則照察人之隱，慧則捷利，捷利則超越人之先：皆危機也。君子明足以察奸而仁義行之，智足以成事而謙順處之，是爲大道也。夫道大則能包容，小人以有孚而化，道大則無驕亢，異端以相感而通。于食有福，何害之有？

章指：言小知自私，藏怨之府，大雅先人，福之所聚。勞謙終吉，君子道也。

疏「小知自私」○正義曰：《史記·賈生傳·服賦》中語。

○「大雅先人」○正義曰：《文選·西都賦》云：「又有承明、金馬，著作之庭，大雅宏達，於茲爲羣。」李善注云：

「大雅謂有大雅之才者。《詩》，有《大雅》，故以立稱焉。」

又《上林賦》「揜羣雅」，注引張揖云：「《詩》小雅之材七十四人，大雅之材三十一人。」《後漢書·文苑傳》孔融數稱衡曰：「正平大雅，固當爾邪？」劉劭《人物志·九徵》篇云：「具體而微，謂之德行。德行也者，大雅之稱也。」

一至謂之偏材，偏材，小雅之質也。「先人」與「自私」相對，謂以人爲先，已退讓處後也。《鶡冠子·近迭》篇

云：「龐子問鶡冠子曰：「聖人之道何先？」鶡冠子曰：

「先人。」義雖異而指略同。又按：崔篆《慰志賦》云：

「庶明哲之末風兮，懼大雅之所譏。」李賢注引《詩·大

雅「既明且哲，以保其身」。大雅或指此，然與上「小知」不類，且「先人」無謂也。

孟子之滕，館於上宮。**注**館，舍也。上宮，

樓也。孟子舍止賓客所館之樓上也。**疏**注「館舍」至

「上也」○正義曰：《儀禮·聘禮》「及館」，《周禮·秋官·司儀》「致館」，注並云：「館，舍也。」《呂氏春秋·必已》篇云「舍故人之家」，高誘注云：「舍，止也。」故以「舍」釋「館」，又以「止」釋「舍」。又《知士》篇「靜郭君善剗貌辯，於是舍之上舍」，注云：「上舍，甲第也。」此「上宮」當如「上舍」，謂上等之館舍也。趙氏以爲「樓」者，《說文》本部云：「樓，重屋也。」宮在屋之上，故名「上宮」。女部云：「婁，空也。」广部云：「廡，屋麗廡也。」囧部云：「囧，窗牖麗廡闔明也。」《禮記·月令》「可以居高明」，注云：「高明謂樓觀也。」劉熙《釋名·釋宮室》云：「樓，牖戶之間諸射孔樓樓然也。」然則樓之名取於婁，麗廡以闔明釋之，即玲瓏之轉聲。蓋其制窄狹而高，四面開窗牖，以「上」爲稱而下言「牖上」，故以爲樓也。有業屨於牖上，館人求之弗得。或問之曰：「若是乎，從者之度也？」**注**屨，屨屨也，業，織

之有次業而未成也。置之窗牖之上，客到之後，求之不得。有來問孟子者，曰：是客從者之度。度，匿也。孟子與門徒相隨，從車數十，故曰侍從者所竊匿也。**疏**注「屨屨」至「成也」○正義曰：《說文》履部

云：「屨，履也。」尸部云：「屨，履屬。」趙氏以「縱」爲屨而以「草屨」釋之，此直以「屨」釋「屨」。屨爲草屨，故云「織之有次業而未成」，謂織草爲屨，已有次第而尚未成。《爾雅·釋詁》云：「業，敘也。」《國語·晉語》云「則民從事有業」，韋昭注云：「業猶次也。」次與敘義同。云有「次業」者，以「次」釋「業」也。《說文》欠部云：「次，不前，不精也。」故以爲「未成」。《廣雅·釋詁》云：「業，始也。」與創、造、作等字相轉注。然則「業屨」猶云「造屨」、「創屨」。屨始作爲業，猶牆始築爲基，衣始裁爲初，皆造而未終之稱也。○注「度匿」至「匿也」○正義曰：《音義》云：「度，或作度，同，音搜。」今諸本作度，惟廖本作度。《論語·爲政》篇「人焉廋哉」，《集解》孔氏云：「度，匿也。」《淮南子·說山訓》「不匿瑕穢」，高誘注云：「匿，藏也。」不直言其竊，而詭云藏匿以爲戲也。趙氏以「匿」釋「度」，又以「竊」釋「匿」，謂或婉言匿，其實疑其竊也。故孟子直以竊對之。《說文》穴部云：「盜從中出曰

竊。『隱公八年《公羊》傳「稱人則從不疑也」，注云：「從者，隨從也。」《儀禮·鄉飲酒禮》「賓及衆賓皆從之」，注云：「從猶隨也。」《華嚴經音義》引《蒼頡》云：「侍，從也。」故「從者」爲「門徒相隨」，又云「侍從者」也。曰：「子以是爲竊屨來與？」**注**孟子謂館人曰：子以是衆人來隨事我，本爲欲竊屨故來邪？曰：「殆非也。」**注**館人曰：殆非爲是來事夫子也。自知問之過。**疏**注「自知問之過」○正義曰：經云「館人求之弗得，或問之」，注云「有來問孟子者」，而於孟子之答則云「孟子謂館人」，此注云「館人曰」，又云「自知問之過」，然則前來問者即館人也。蓋館中非一人，來問之館人不必即求屨之館人，抑館中人公共求之，而問者止館人中之一人，故別之云「或問之」也。『夫子之設科也，往者不追，來者不拒。苟以是心至，斯受之而已矣。』**注**孟子曰：夫我設教授之科，教人以道德也。其去者亦不追呼，來者亦不逆拒。誠以是學道之心來至，我則斯受之，亦不知其取之與否。君子不保異心也。見館人言殆非爲是來，亦云不能保知，謙以答之。**疏**注「孟子」至

「答之」○正義曰：臧氏琳《經義雜記》云：「以經省曰字，趙注特下『孟子曰』以補之。《章指》云「非己所絕」，己字正釋經予字。」阮氏元《校勘記》云：「夫子之設科也」，閩、監、毛三本同。宋本、岳本、廖本、孔本、韓本子作予。案，注云「夫我設教授之科」，偽疏亦云：「夫我之設科以教人」，則作予是也。予，子蓋字形相涉而譌。趙氏佑《溫故錄》云：「此作孟子語而云『夫我』，趙氏從無改字，明是漢人經文不作『夫子』，子乃予字而夫音扶。作孟子言，適足見聖賢之大，作或人語，仍是意含隱諷矣。」《論語·述而》篇「人潔己以進，與其潔也，不保其往也」，《集解》鄭氏云：「往猶去也。」《說文·言部》云：「評，召也。」「追呼」謂追逐而召之，呼爲評之假借也。《管子·七臣七主》篇云「馳車充國者，追寇之馬也」，房玄齡注云：「追猶召也。」《論語·子張》篇「其不可者拒之」，漢石經、皇侃義疏本作距。此「不拒」，孔本、韓本及閩、監、毛三本作拒，宋本、岳本、咸淳衢州本、廖本作距。距，拒古通也。《國策·齊策》「故專兵一志以逆秦」，**①**韋昭注云：「逆，拒也。」《詩·大雅·皇矣》「敢距大邦」，孔氏正義

①「國策」，原誤作「國語」，今據《戰國策》、《國語》改。下注文出高誘，非韋昭。

云：「敢拒逆我大國。」亦以「逆」釋「拒」。逆與順對，不順其來學之情而受，故拒之即逆之也。《廣雅·釋詁》云：「竊，取也。」云「亦不知其取之與否」即竊之與否也。有學道之心，又有竊履之心，是有「異心」。見其有學道之心而受之，不能保其無竊履之心，則或即為從者之度，不可保也即亦不可知也，故云「不能保知」。《荀子·法行》篇云：「南郭惠子問於子貢曰：『夫子之門，何其雜也！』子貢曰：『君子正身以俟，欲來者不距，去者不止。且夫良醫之門多病人，藥枯之側多枉木，是以雜也。』」孟子錄此章，一以見設教者之大，一以見寄托者之多，所以銷門戶之見而黜借廕之魄。趙氏生漢末，見當時跋扈之家，非不受學於大賢君子之門而黨籍中未嘗無依附虛聲之士，故有慨乎言之？

章指：言教誨之道，受之如海。百川移流，不得有拒。雖獨竊履，非己所絕。順答小人，小人自咎。所謂「造次必於是」也。

疏「受之如海百川移流」○正義曰：揚子《法言·學行》篇云：「百川學海而至於海，丘陵學山而不至於山，是故惡夫畫也。」○「造次必於是」○正義曰：《論語·里仁》篇中語。《釋文》引鄭氏云：「造次，倉卒也。」

孟子曰：「人皆有所不忍，達之於其所忍，仁也；**注**人皆有所愛，不忍加惡，推之以通於所不愛，皆令被德。此，仁人也。」**疏**「人皆至仁也」○正義曰：近時通解，「所不忍」即下「無害人之心」。人皆有所不為，達之於其所為，義也。**注**人皆有不喜為，謂貧賤也；通之於其所喜為，謂富貴也。抑情止欲，使若所不喜為此者，義人也。**疏**「人皆至義也」○正義曰：近時通解，「所不為」即下「無穿踰之心」。○**注**「此者義人也」○正義曰：者字疑義。人能充無欲害人之心，而仁不可勝用也；**注**人皆有不害人之心，能充大之以為仁，仁不可勝用也。**疏**「能充大之」○正義曰：《呂氏春秋·必己》篇「禍充天地」，高誘注云：「充猶大也。」人能充無穿踰之心，而義不可勝用也。**注**穿牆踰屋，姦利之心也。人既無此心，能充大之以為義，義不可勝用也。**疏**「穿踰」○正義曰：閩、監、毛三本此作「穿窬」，下「穿踰之類」作「穿窬」。宋本、孔本、韓本皆作踰。《說文》穴部云：「窬，穿木戶也。」

足部云：「逾，越進也。」逾即踰，箭、踰二字本異。《禮記·儒行》「華門圭箭」，注云：「圭箭，門旁箭也。穿牆爲之，如圭矣。」圭箭即《左傳》之「圭竇」，故徐氏音豆，即讀箭爲竇也。其實竇、箭義皆爲空而字不同，箭自音史耳。趙氏云「穿牆踰屋」，則自爲「踰越」之踰。《論語·陽貨》篇云「其猶穿箭之盜也與」，《集解》引孔氏云：「穿，穿壁也。箭，箭牆也。」《釋文》云：「踰，本又作箭。」然則《釋文》、《論語》本作「穿踰」，是《論語》之「穿箭」與《孟子》之「穿踰」一也。或借箭爲踰，故有作「穿箭」者，其實皆「穿踰」也。人能充無受「爾汝」之實，無所往而不爲義也。

注爾汝

之實，德行可輕賤，人所「爾汝」者也。既不見輕賤，不爲人所爾汝，能充大而以自行，所至皆可以爲義也。

疏注「爾汝」至「義也」○正義曰：「爾汝」爲尊於卑、

上於下之通稱。卑下者自安而受之，所謂實也；無德行者爲有德行者所輕賤，亦自安而受之，亦所謂實也。蓋假借「爾汝」爲輕賤，「受爾汝之實」即受輕賤之實，故云「德行可輕賤，人所爾汝者也」，非謂德行可輕賤專在稱謂之「爾汝」也。既實有當受之實，自不能不受。經言「無受」者，自勉於德行，不爲人所輕賤也，故云：「既不爲輕賤，①不爲人所爾

汝。」德行已高，自不爲人所輕賤，猶分位已尊，自不爲人所爾汝。非謂有可受之實而強項不受之也，謂耻有此不得不受之實而勉以去之也。但德行無窮，非僅免人輕賤而已，故又須充大之，使不獨不爲人輕賤。凡身所至，無非義之所至，斯爲自強不息之道也。《毛詩·秦風·無衣》篇「與子偕行」，傳云：「行，往也。」《禮記·樂記》云「樂至則無怨，禮至則無爭」，注云：「至猶達也，行也。」趙氏以「自行」釋「往」字，以「所至」申上「達」字，「自行」、「所至」皆可以爲義，即是「無所往而不達於義」也。《荀子·解蔽》篇云：「偷則自取也，自行也自止也。」「自行」謂任心所欲行，無有禁止。士未可以言而言，是以言詬之也；可以言而不言，是以不言詬之也。是皆穿踰之類也。」

注詬，取也。人之爲士者，見尊貴者未可與言而強

與之言，欲以言取之也，是「失言」也；見可與言者而不與之言，不知賢人可與之言而反欲以不言取之，是「失人」也。是皆趨利人邪無知之人，故曰「穿

①「爲」，據注文當作「見」。

不知此即穿踰之類，宜充而達之者也。充無穿踰之心而不以言鈛，不以不言鈛，則庶幾能勉進於義而不爲人所輕賤矣。前節意已結，此又申明充無穿踰之心如是也。

章指：言善恕行義，充大其美。無受爾汝，何施不可？取人不知，失其臧否，比之穿踰，善亦遠矣。

孟子曰：「言近而指遠者，善言也；守約而施博者，善道也。君子之言也，不下帶而道存焉；**注**言近指遠，近言正心，遠可以事天也；守約施博，約守仁義，大可以施德於天下也。二者可謂善言、善道也。正心守仁皆在胸臆，吐口而言之，四體不與焉，故曰「不下帶」。**疏**「善道也」○正義

曰：《說文》是部云：「道，所行道也。」《禮記·大學》篇「是故君子有大道」，注云：「道，行所由。」是道即行，「善道」謂「善行」也。戴氏震《孟子字義疏證》云：「約謂脩其身。六經孔孟之言，語行之約，務是脩身而已，語知之約，致其心之明而已。未有空指一而使人知之求之者。致其心之明，自

能權度事情，無幾微差失，又焉用求一知一哉？」○注「言近」至「存焉」①○正義曰：「不下帶而道存」，孟子自發明「言近指遠」之義也；「脩其身而天下平」，孟子自發明「守約施博」之義也。趙氏以脩身明指身言，此不下帶暗指心言，故以「近言」爲「正心」。凡人束帶於要限間，心在帶之上。《說文》勺部云：「匈，膺也。」肉部云：「臑，胛肉也。」匈即胛，臑即臆。劉熙《釋名·釋衣服》云：「膺，心衣，鉤肩之間，施一襠以奄心也。」②「胃臆」當心，亦居帶上，仁守於心而吐於口，故「四體不與」也。守雖明言脩身而未言所以脩身之事，趙氏以「仁義」明之，謂所以脩身者爲守此仁義也。仁者，元也；義者，利也。元亨利貞爲四德，故云「施德於天下」，「施德」即施仁義也。既以「正心」明「言近」，以「守仁」明「脩身」，又並云「正心守仁皆在胃臆」者，謂正心即守此仁義，脩身即是正心，言如是，守即如是，雖分言之，實互言之也。事天之本，不外身心，平天下之功，不外仁義。孟子之旨，趙氏得之矣。《春秋繁露·人副天數》篇云：「天地之象，以要爲帶。帶而上者盡爲陽，帶而下者盡爲陰，各其分。

①「存焉」，當從注文作「不下帶」。

②「以」，原誤作「一」，今從沈校據《釋名》改。

陽，天氣也；陰，地氣也。」董子之說以天任陽不任陰，天之太陰不用於物而用於空，此亦「不下帶而道存」之義。君

子之守，脩其身而天下平。

注身正物正，天下平矣。

疏注「身正」，至「平矣」○正義曰：「身正」，成己也；「物正」，成物也。成己，仁也；成物，知也。以知行仁，事皆合於義，孔子所謂「脩己以敬」、「脩己以安百姓」也。

人病舍其田而芸人之田，所求於人者重，而所以自任者輕。

注芸，治也。田以喻身。舍身不治而欲責人治，是求人太重，自任太輕。

疏注「芸治也」○正義曰：《說文》末部云：「艱，除苗間穢也。」重文「艱，艱或从芸」。芸爲艱之假借，亦芸之省文也。除穢即所以治之，故以「治」釋「芸」。

《禮記·曲禮》：「馳道不除」，注云：「除，治也。」是也。○注「是求」至「太輕」○正義曰：廷琥云：「孔本無是字，汲古閣本輕下有也字。」

章指：言言道之善，以心爲原。當求

諸己，而責於人，君子尤之。況以妄芸，言

失務也。

孟子曰：「堯舜，性者也；湯武，反之也。」

注堯舜之體性自善者也，殷湯周武反之於身，身安

乃以施人，謂加善於民。

疏注「堯舜」至「於民」○正義曰：「體性」猶《荀子·解蔽》篇云「體道」，楊倞注云：「體謂不離道也。」《管子·君臣上》篇「則君體法而立矣」，房玄齡

注云：「體猶依也。」依與不離義同，「依性」即《中庸》所云

「率性」。人性本善，堯舜生知，率性而行，自己爲善者也，

湯武以善自反其身，己身已安於善，然後加善於人。堯舜率

性，固無所爲而爲，湯武反身而後及人，亦非爲以善加人而

始爲善。此非尚論堯舜，湯武也，爲托於堯舜、湯武者示之

也。動容周旋中禮者，盛德之至也。

注人動作容儀周旋中禮者，盛德之至也。

疏注「人動」至「至也」○正義曰：《爾雅·釋詁》云：「動，作也。」《禮記·少儀》

「祭祀之容」，注云：「容即儀也。」冠「人」字，明此泛言人，

不指上堯舜、湯武。堯舜、湯武或性或反，皆無所爲而爲，

人之繼堯舜、湯武而性或反，皆如堯舜、湯武也。德盛於

中，發揚於外，言非虛飾以悅人。哭死而哀，非爲生

者也；**注**死者有德，哭者哀也。

疏注「死者」至「哀

也」○正義曰：三年之喪，期功之服，哀出至情，自無僞飾。

惟因其人有德，雖非親屬而亦哀之，出於真意，非以此結交其子弟父兄。經德不回，非以干祿也；言語必

信，非以正行也。**注**經，行也。體德之人，行其

節操自不回邪，非以求祿位也；庸言必信，非必欲以正行爲名也，性不忍欺人也。**疏**注「經行」至「人也」

○正義曰：僖公二十五年《左傳》：「趙衰以壺飧從徑」，注云：「徑猶行也。」《釋文》云：「讀徑爲經。」《文選·魏都賦》

「延閣允宇以經營」，劉逵注云：「直行爲經。」《素問·欬論》王冰注引《靈樞經》云：「脈之所行爲經。」是「經」爲「行」也。

「體德」，不離德也。在心爲德，行而著之則爲節操。《毛詩·小雅·鼓鐘》篇「其德不回」，傳云：「回，邪也。」《國

語·周語》「求福不回」，《晉語》「公室之不回」，注皆訓回爲邪。回邪不正之人，國所廢黜不用，而此則自行其德，非由

求固祿位，故爲清操介節以結上知也，言不信則招尤謗而來惡名，今以不忍欺人而庸言必信，非謂欲弋致方正之名

也。君子行法以俟命而已矣。**注**君子順性蹈德，行其法度，夭壽在天，待命而已矣。**疏**注「君子」

至「已矣」○正義曰：「順性」即「率性」，謂堯舜也。《說文》

足部云：「蹈，踐也。」踐德謂「湯武反身」也。《毛詩·小雅·楚茨》篇「禮儀卒度」，傳云：「度，法度也。」《說文》又部云：「度，法制也。」人生有不容踰、不容缺之常度，則而行之，是爲「行法」。「周旋中禮」、「哭死而哀」、「經德不回」、「言語必信」是也。其有所爲而爲，不出「干祿」、「正行」二端。乃君子於此二端，則俟之於命也。「順性蹈德，行其法度」，盛德所致，自然「周旋中禮」也，「哭死而哀」也，「經德不回」也，「言語必信」也。「爲生者」，爲人也。若爲人則此四者非干祿即正行。干祿固虛僞之小人，孟子特指出「正行」二字。其人嚴氣正性，自命爲君子，與干祿者之形相反，而與干祿者之虛僞則同。孟子指之爲「正行」，趙氏申之云「正行爲名」。後世此類非不托於孔孟而高言堯舜，孟子則已於千古之上有以鑑之。自盆成以下，辨別士品。小慧之殺身，言銛之人邪，舍田之自輕，而此章分真僞於豪芒，則學道之人不能保其竊屨，尤爲切切者矣。

章指：言君子之行，動合禮中。不

惑禍福，脩身俟終。堯舜之盛，湯武之隆，不是過也。**疏**「堯舜之盛湯武之隆」○正義

曰：《史記·太史公自序》云：「伏羲至純厚，作八卦。」

堯舜之盛，《尚書》載之，禮樂作焉。湯武之隆，《詩》人歌之。」

孟子曰：「說大人則藐之，勿視其巍巍然。」

注大人謂當時之尊貴者也。孟子言說此大人之法，心當有以輕藐之，勿敢視之巍巍富貴若此而不畏之，則心舒意展，言語得盡。

疏注「大人」至「得盡」○正義曰：此「大人」指當時諸侯而言，故云「尊貴者」。

《音義》云：「藐，丁音藐。藐然，輕易之貌。又音眇。」按：

《廣雅·釋詁》云：「邈，遠也。」《文選·思立賦》：「允塵邈而難虧」舊注，《幽通賦》：「黃神邈而靡質兮」應劭注，皆訓邈為遠。

《莊子·逍遙遊》：「藐姑射之山」，《釋文》引簡文注即以藐為遠。

蓋「說大人則藐之」當釋藐為遠，謂當時之遊說諸侯者以順為正，是狎近之也。所以狎近之者，視其富貴而畏之也。不知說大人宜遠之。遠之者即下「皆古之制」。我守

古先王之法而說以仁義，不曲徇其所好，是遠之也。以為

「心當輕藐」，恐失孟子之旨。阮氏元《校勘記》云：「勿視其巍巍然」，閩、監、毛三本同。廖本、孔本、韓本巍作魏。

《音義》出「魏巍」，丁云：「當作巍。」是經文本作魏，作巍非

也。」按：《說文》嵬部云：「巍，高也。」《論語·泰伯》篇「巍巍乎惟天為大」，是巍巍為大，故何晏注云：「巍巍乎，高大之稱也。」《史記·晉世家》：「魏大名也」，《集解》引服虔云：

「魏喻巍巍，高大也。」《淮南·本經訓》云：「魏闕之高」，高誘

注云：「門闕高崇嵬嵬然。」又《儆真訓》高誘注云：「巍巍高

大，故曰魏闕。」魏魏即巍巍，古或省山作魏。《莊子·知北

遊》篇：「魏魏乎其終而復始也」，又《天下》篇：「魏然而已矣」，

亦作魏省山。《易·繫辭傳》云：「崇高莫大乎富貴」，故趙氏

以「富貴」釋之。經云：「勿視其巍巍然」者，猶俗云「不必以其

富貴置在目中」也。趙氏云：「勿敢視之巍巍富貴若此而不畏

之」，「勿敢視」與「勿視」義相反。「勿敢視」者，心畏其富

貴，目不敢視也；「勿視」者，不以其富貴為重而視之也。勿

敢視是畏，勿視是不畏。趙氏謂其富貴可畏若此而不畏之。

蓋在他人則勿敢視者，在我則勿視；在他人則畏之，在我則

不畏之。曲折以互明其義也。堂高數仞，楹題數

尺，我得志弗為也；**注**仞，八尺也。楹題，屋雷

也。堂高數仞，振屋數尺，奢汰之室，使我得志，不

居此堂也。大屋無尺寸之限，故言數仞也。**疏**注

「仞八」至「仞也」○正義曰：仞，詳見前。《爾雅·釋宮》

云：「桷謂之椳，桷直而遂謂之閭，不受檐謂之交。檐謂之槁。」《方言》云：「屋相謂之槁」，郭璞注云：「即屋檐也。亦呼爲連縣。」劉熙《釋名·釋宮室》云：「桷，确也。其形細而疏确也。或謂之椳。椳，傳也。相傳次而布列也。或謂之槁，在樑旁下列衰衰然垂也。相，旅也。連旅旅也。或謂之槁，槁，縣也。縣連椳頭使齊平也。檐，接也。接屋前後也。雷，流也。水從上流下也。」按：屋自中棟至檐，用椳相比，近棟者名交，謂交於楣上也。接交而長，直下達於檐者名閭，以其下垂，故名椳矣。椳之抵檐處爲椳題，其下覆以瓦，雨自此下溜，故爲雷，亦爲槁，槁取於滴也。今尚以瓦頭爲滴水，自瓦言之爲雷，自椳言之爲椳題，近在一所，故趙氏以「屋雷」釋「椳題」也。雷屬瓦，故亦作甃。《廣雅·釋宮》云：「甃謂之甃。」是也。程氏瑤田《通藝錄》云：「襄二十八年《左傳》：『慶舍援廟桷而動於甃』，則甃爲覆桷之瓦，可知言其多力，引一桷而屋宇爲之動也。若以甃爲屋極，則太公之廟必非容膝之廬，所援之桷必爲當檐之題，題之去極甚遠，安得援而動於極也？」程氏說是也。援桷甃動，亦屋雷與椳題相近在一所之證也。趙氏既以「屋雷」明「椳題」矣，又云：「堂高數仞，振屋數尺，奢太之室。」阮氏元《校勘記》云：「『椳題數尺』，①閭、監、毛三本同。廖本、孔本、韓本

《攷文》古本「椳題」作「振屋」。謹按：振字乃旅字之譌。《說文》木部云：「楣，秦名屋槁聯也。齊謂之檐，楚謂之相。」檀，屋相前也。《儀禮·特牲饋食禮記》：「饔饔在西壁」，注引舊說云：「南北直屋相。」屋旅，即「屋相」，「屋相」即「屋檐」，正椳頭之所在。趙氏蓋云「屋旅數尺」，譌旅爲振，又倒「屋旅」爲「旅屋」，遂不知其說，而竟改注文爲「椳題」矣。今仍「存振」屋二字而證明之，以著趙氏之義，識者察之。經傳稱「堂高」者，皆指堂階而言。《禮記·禮器》云：「天子之堂九尺，諸侯七尺。」《考工記》云：「殷人重屋，堂崇三尺，周人明堂，度九尺之筵，堂崇一筵。」注云：「周堂高九尺，殷三尺，則夏一尺。」皆有尺寸之限矣。故趙氏以此「堂高」爲「大屋」之高。周氏柄中《辨正》云：「堂屋高卑之度，經無明文。惟《攷工記》云：『王宮門阿之制，五雉，宮隅之制，七雉。』鄭注：『雉，長三丈，高一丈。度廣以廣，度高以高。』則門阿高五丈，宮隅高七丈。《尚書大傳》云：『天子之堂廣九雉，三分其廣以二爲內，五分內以一爲高，則三丈六尺。公侯七雉，三分廣以二爲內，五分內以一爲高，則二丈八尺。伯子男五雉，三分廣以二爲內，五分內以一

①「數」，原誤作「三」，今據阮校改。

爲高，則二丈。」然則「堂高數仞」並非踰制，而「數仞」之指堂階無疑矣。」謹按：孟子亦渾言其堂之高耳。當時縱僭乎帝制，堂階之高不必更踰九尺，而屋之高或進二丈八尺者爲二丈六尺可也，所以總括之以「數仞」耳。趙氏以爲「大屋」是也。《韓詩外傳》云：「曾子曰：『吾嘗南遊於楚，得尊官焉，堂高九尺，棟題三圍。』」曾子大賢，即爲尊官，何致僭天子九尺之階？若三圍，《莊子·人間世》釋文《李》云：「經尺曰圍。」然則三圍者，三尺也。廷琥云：「趙注『堂高數仞』，孔本作『高堂數仞』。」食前方丈，侍妾數百人，我得志，弗爲也；**注**極五味之饌食，列於前方一丈，侍妾衆多至數百人也。**疏**注「極五」至「一丈」○正義曰：《說文》食部

云：「簋，具食也。饌，或從巽。」升部云：「具，共置也。」列前有方丈之多，則極五味無不備置，故以「饌」釋「食」，謂食言具食也。《論語·爲政》篇「有酒食，先生饌」，《集解》引馬曰：「饌，飲食也。」《廣雅·釋詁》云：「饌，食也。」是具食亦單謂之食。《儀禮·士冠禮》「具饌于西塾」，注云：「饌，陳也。」《周禮·秋官·掌客》「皆陳」，注云：「陳，列也。」趙氏既以「饌」釋「食」，又以「列」釋「饌」，是「食前」即具食於前，亦即是「列於前」。《晏子春秋·問下》云：「昔吾先君桓公善飲酒窮樂，食

味方丈。」般樂飲酒，驅騁田獵，後車千乘，我得志，弗爲也。**注**般，大也。大作樂而飲酒，驅騁田獵，從車千乘，般於遊田也。**疏**注「般大也」○正義曰：

「般大」，詳見《公孫丑上》篇。《書·無逸》：「文王不敢盤于遊田。」《文選·西京賦》「般于游畋，其樂只且」，薛綜注云：「盤，樂也。」此云「盤于遊田」，般與盤通。《書》「盤庚」，《漢書·古今人表》作「般庚」，《君奭》「時則有若甘盤」，《史記·燕世家》作「甘般」是也。此與「般樂」之「般」訓大者不同。在彼者，皆我所不爲也；在我者，皆古之制也。吾何畏彼哉？**注**在彼貴者驕佚之事，我所耻爲也；在我所行，皆古聖人所制之法，謂恭儉也。我心何爲當畏彼人乎哉？

章指：言富貴而驕，自遺咎也；茅茨采椽，聖堯表也。以賤說貴，懼有蕩心；心謂彼陋，以寧我神。故以「所不爲」爲之寶玩也。**疏**「茅茨」至「蕩心」○正義曰：《韓非子》：

「堯之有天下也，茅茨不剪，采椽不斷。」亦見《淮南子·主術訓》。《史記·自敘》云：「墨者亦尚堯舜道，言其德

行，曰堂高三尺，土階三等，茅茨不翦，采椽不刮。」莊公四年《左傳》：「楚武王曰：『余心蕩。』」

孟子曰：「養心莫善於寡欲。其爲人也

寡欲，雖有不存焉者，寡矣；**注**養，治也。寡，

少也。欲，利欲也。雖有少欲而亡者，謂遭橫暴，若單豹卧深山而遇飢虎之類也，然亦寡矣。**疏**注「養

治」至「寡矣」○正義曰：《周禮·天官·疾醫》「以五味、五

穀、五藥養其病」，注云：「養猶治也。」《說文》：「部云：『寡，

少也。』存與亡對，故以「不存」爲「亡」。單豹事，《莊子·達

生》篇云：「田開之見周威公曰：『善養生者若牧羊然，視其

後者而鞭之。魯有單豹者，巖居而水飲，而與民共利，行年

七十而猶有嬰兒之色。不幸遇餓虎，餓虎殺而食之。有張

毅者，高門縣薄，無不走也，行年四十而有內熱之疾以死。

豹養其內而虎食其外，毅養其外而病攻其內。此二子者，皆

不鞭其後者也。」《呂氏春秋·必己》篇云：「單豹好術，離

俗棄塵，不食穀實，不衣芮溫，身處山林巖岨，以全其生，不

盡其年而虎食之。」高誘注云：「不食穀實，行氣道引也。

芮，絮也。《幽通記》曰：「單豹治裏而外凋」，此之謂也。」亦見

《淮南子·人間訓》。其爲人也多欲，雖有存焉者，寡矣。**注**謂貪而不亡，蒙先人德業，若晉樂驪

之類也，然亦少矣，不存者衆也。**疏**注「謂貪」至「衆

也」○正義曰：《詩·大雅·桑柔》篇「民之貪亂」，箋云：

「貪猶欲也。」《呂氏春秋·慎大》篇云「暴戾貪頑」，高誘注

云：「求無厭足爲貪。」是「貪」爲「多欲」也。引晉樂驪者，襄

公十四年《左傳》：「秦伯問於士鞅曰：『晉大夫其誰先

亡？』對曰：『其樂氏乎！』秦伯曰：『以其汰乎？』對曰：

「然。樂驪汰虐已甚，猶可以免。其在盈乎？」秦伯曰：「何

故？」對曰：「武子之德在民，如周人之思召公焉愛其甘棠，

況其子乎？樂驪死，盈之善未能及人，武子所施沒矣，而驪

之怨實章，將於是乎在。」是其事也。驪雖不亡而盈亦必

亡，先德之恃，焉可久乎？

章指：言清淨寡欲，德之高者；畜聚

積實，穢行之下。廉者招福，濁者速禍。

雖有不然，蓋非常道。是以正路不可不由

也。**疏**「清淨寡欲」○正義曰：《史記·自敘》云：「李

耳無爲自化，清淨自正。」《禮記·孔子問居》云「清明在

躬」，注云：「清謂清靜。」《說文》水部云：「澗，無垢穢也。」澗即淨字。

曾皙嗜羊棗，而曾子不忍食羊棗。公孫

丑問曰：「膾炙與羊棗孰美？」**注**羊棗，棗名

也。曾子以父嗜羊棗，父沒之後惟念其親，不復食羊棗，故身不忍食也。公孫丑怪之，故問羊棗孰與

膾炙美也？**疏**注「羊棗棗名也」○正義曰：《爾雅·釋

木》云：「遵，羊棗。」郭璞注云：「實小而圓，紫黑色，今俗呼

之爲羊矢棗。《孟子》曰：「曾皙嗜羊棗。」邵氏晉涵《爾雅

正義》云：「羊棗一名遵。《說文》：「棗，羊棗也。」是以爲棗

之總名也。」趙氏以「棗名」釋之，以棗類衆多，此其中一名

耳。何氏焯《讀書記》云：「羊棗非棗也，乃柿之小者，初生

色黃，熟則黑，似羊矢。其樹再接則成柿。余乙卯客授臨沂

始觀之。沂近魯地，可據也。今俗呼牛奶柿，一名楔棗，而

臨沂人亦呼羊棗曰楔棗。此尤可證柿之小者通得棗名，不

必以《爾雅》「遵，羊棗」之說爲疑。周氏柄中《辨正》云：「陳

禹謨《名物攷》云：「嘗道鄒，登嶧山，或以羊棗噉余。其狀

絕類柿，大僅如芡實，蓋名爲棗而去棗遠矣。」此皆得之親

見，益信何氏之說不誣。段氏玉裁《說文解字注》云：「羊棗

即木部之棗，《爾雅》諸棗中之一，與常棗絕殊，不當專取以

爲訓。棗樹隨地有之，盡人所識，赤心而外刺，非羊棗也。

木部云：「樽，樽棗也。似柿而小，一曰楔。」按，樽即《釋木》

之「遵，羊棗」也。凡物必得諸目驗而折衷古籍，乃爲可信。

昔在西苑萬善殿庭中曾見其樹，**①**葉似柿而不似棗，其實似

柿而小如指頭。內監告余，用此樹接之便成柿。《古今注》

云：「楔棗，實似柿而小，味亦甘美。」師古曰：「樽棗，今之

楔棗也。」楔與遵音相近，楔即遵字也。《內則》「芝栢」，賀氏

曰：「芝，木榘。栢，軟棗。」《釋文》云：「栢，本又作櫛。」櫛

者楔之誤。○注「曾子」至「美也」○正義曰：《爾雅·釋詁》

云：「惟，思也。」身，我也。」趙氏謂曾子思念其父既歿，不

復再食此羊棗，故己身不忍食之。《禮記·少儀》云：「牛羊

魚之腥，蠹而切之爲膾；麋鹿爲菹，野豕爲軒，皆蠹而不

切，麋爲辟雞，兔爲宛脾，皆蠹而切之，切蔥若薤，實之醢以

柔之。」注云：「蠹之言牒也，先薑葉切之，復報切之，則成

膾。《內則》云：「膾，春用蔥，秋用芥。肉腥細者爲膾，大者

爲軒。」其餘文與《少儀》略同。注云：「言大切、細切異名

①「西」上，原空缺一字，今據《說文解字注》刪去。

也。膾者必先軒之，所謂轟而切之也。此軒、辟雞、宛脾，皆菹類也。釀菜而柔之以醢，殺腥肉及其氣。今益州有鹿殘者，近由此爲之矣。軒或爲胖，宛或爲鬱。《說文》肉部云：

「腍，薄切肉也。」膾，細切肉也。腍即轟而切之，《周禮·天官·醢人》注引《少儀》「作腍而切之」，然則腍者切之成薄片，如今片肉也。又將所片細切成條謂之「報切」。段氏玉裁《說文解字注》云：「凡細切者必疾速下刀。《少儀》注云：『報讀爲赴疾之赴。』按：報與躁音近，報之爲疾，即躁之爲疾，報而切之，即今肉臊子也。《南史·恩倖傳》云：

「宮中謠云：『趙鬼食鴨鷄，諸鬼盡著調。』鷄與調韻，正讀如躁。鷄猶瀟，瀟亦爲疾。蓋漢言報，六朝言鷄，今則爲躁也。劉熙《釋名·釋飲食》云：「膾，會也。細切肉令散，分其赤白異切之，已乃會合和之也。」赤蓋肉之精者，白蓋肉之肥者。先分切而後合之，所以爲會。《醢人》「五齊七菹」，注云：「齊當爲齋。五齋，昌本、脾析、蜃、豚拍、深蒲也。七菹，韭、菁、茆、葵、芹、箔、筍菹。凡醢醬所和，細切爲齋，全物若腍爲菹。」齋、菹之稱菜肉通，此因《少儀》、《內則》麋鹿稱菹，脾析爲牛百葉，豚拍爲豚脅，亦爲齋，是齋、菹通稱於肉。以細切爲齋，則齋即膾之通稱。蓋肉之腍而切者爲軒，又報切之則爲膾，在菜，但腍切而不報，或全物不切是爲

菹，細切者爲齋。以其皆爲腍切，則肉亦名菹，以其皆爲細切，則肉亦名齋。但菹之名可通於肉，而膾之名則不聞通於菜，是膾專爲肉之細切者名也。菹、齋皆用蔥薤醢醬和之，今人以生蝦、生蜆嫩用酒酢椒薤拌食之，此古肉食爲菹之遺，用全物而不切者也。《說文》艸部云：「菹，酢菜也。」韭部云：「齋，墜也。」墜，齋也。《通俗文》云：「淹韭曰齋，淹薤曰墜。」蓋菹、齋之暫食者可用酢，其久藏者兼以鹽。或用全，或用切，或用細切。其細切者，今尚名齋矣。而肉之腍切、細切者，皆未有生用醢酢芥薤和食之制。蓋膾之古法今不可詳矣。《內則》諸膳，有牛炙、牛膾、羊炙、豕炙、魚膾，即《儀禮·公食大夫禮》「二十豆中物」。孔氏正義云：「牛炙，炙牛肉也。《毛詩·小雅·楚茨》云「或燔或炙」，傳云：「炙，炙肉也。」箋云：「炙，肝炙也。」孔氏正義云：「燔者，火燒之名；炙者，遠火之稱。以難熟者近火，易熟者遠之。故肝炙而肉燔也。《生民》傳曰「傳火曰燔」，《瓠葉》傳曰「加火曰燔」，對遙炙者爲近火，故云傳火加之。燔其實亦炙，非炮燒之也，故《量人》注云「燔從於獻酒之肉」，《特性》曰「燔，炙肉」，是燔亦炙也。且燔亦炙，爲饗而貫之以炙於火，如今炙肉矣。」《瓠葉》云「有兔斯首，炮之燔之」，次章云「炮之炙之」，傳云：「毛曰炮，加火曰燔，炕火曰炙。」箋云：「柔者炙

之，乾者燔之。」孔氏正義云：「凡治兔之所宜，若鮮明而新殺者，合毛炮之；若割截而柔者，則燂貫而炙之，若今炙肉也；乾者謂脯腊，則加之火上，若今之燒乾脯也。」《禮記·禮運》云：「以炮以燔，以烹以炙」，注云：「炮，裹燒之也。燔，加於火上。炙，貫之火上。」《內則》獨詳於炮，云：「炮取豚若牂，刳之剝之，實棗於其腹中，編萑以苴之，塗之以謹塗，炮之，塗皆乾，擘之，濯手以摩之，去其皸。」注云：「炮者，以塗燒之爲名也。謹當爲瑾。瑾塗，塗有穠草也。」此蓋連毛以瑾塗塗裹之，置火中燒，其毛隨塗脫去，又用手摩去皮肉上之皸，更入鼎鑊煮之。以其用塗包裹燒之，故名炮。炮者，包也。是爲「毛曰炮」也。去皸之後，入鑊煮之，則炮而烹矣。若不入鼎鑊，近火炙之則爲燔，遠火炙之則爲炙。《攷工記·廬人》「重欲傳人」，注云：「傳，近也。」傳火即近火也。是爲「炮之燔之」也。段氏玉裁《說文解字注》云：「《瓠葉》傳云「炕火曰炙」，正義云：「炕，舉也。」謂以物貫之而舉於火上以炙之。」按：炕，俗字，古當作抗。《方言》曰：「抗，縣也。」是也。縣而炙之，則遠火也。是爲「炮之炙之」也。軟棗爲人君燕食所加之庶羞，視《公食大夫禮》「二十豆之用膾炙，禮之隆殺有差，即物之甘嘉或別，故以「孰美」爲問耳。孟子曰：「膾炙哉！」**注**言膾炙固美也，何

比於羊棗？公孫丑曰：「然則曾子何爲食膾炙而不食羊棗？」曰：「膾炙所同也，羊棗所獨也。諱名不諱姓。姓所同也，名所獨也。」**注**孟子言膾炙雖美，人所同嗜。曾子父嗜羊棗耳，故曾子不忍食也。譬如諱君父之名，不諱其姓，姓與族同之，名所獨也。故諱之也。**疏**注「譬如」至「故諱之也」○正義曰：《周禮·春官·小史》「若有事則詔王之忌諱」，注云：「先王死日爲忌，名爲諱。」《禮記·王制》云「大史典禮，執簡記，奉諱惡」，注云：「諱，先王名。惡，忌日，若子卯。」大史所奉之諱惡即小史所詔之忌諱，蓋雖小史掌之而必由大史進之也。《曲禮》云：「卒哭乃諱。禮不諱嫌名，二名不偏諱。逮事父母則諱王父母，不逮事父母則不諱王父母。君所無私諱，大夫之所有公諱。《詩》《書》不諱，臨文不諱，廟中不諱。」《檀弓》云「既卒哭，宰夫執木鐸以命於宮曰：舍故而諱新」，注云：「故謂高祖之父當遷者也。」桓公六年《左傳》申繻云「周人以諱事神」，注云：「自父至高祖皆不敢斥言。」孔氏正義云：「自殷以往，未有諱法。諱始於周。」然則周制以諱事神，天子諸侯諱高祖以下，鄭氏謂適士以上諱祖，推之則大夫三廟，當諱曾祖。庶人不逮事父母

者，雖不諱祖，亦仍諱父。是自天子至於庶人，未有不諱父者，君之名則未有敢斥言者。此「諱君父之名」之事也。隱公八年《左傳》：「無駭卒，羽父請謚與族。公問族於衆仲。衆仲對曰：『天子建德，因生以賜姓，胙之土而命之氏。諸侯以字爲謚，因以爲族。官有世功則有官族。邑亦如之。』公命以字爲展氏。」注云：「立有德以爲諸侯。因其所由生以賜姓，謂若舜由媯汭，故陳爲媯姓。報之以土而命氏曰陳。諸侯位卑，不得賜姓，故其臣因氏其王父字。或使即先人之謚稱以爲族。『則有官族，邑亦如之』，謂取其舊官舊邑之稱以爲族，皆稟之時君。諸侯之子爲公子，公子之子爲公孫，公孫之子以王父字爲氏。無駭，公子展之孫，故爲展氏。」由此言之，則姓可賜即可改，族由氏立，則姓不與族同矣。《禮記·大傳》云：「其庶姓別於上而戚單於下，昏姻可以通乎？繫之以姓而弗別，綴之以食而弗殊，雖百世而昏姻不通者，周道然也。」注云：「玄孫之子，姓別於高祖，五世而無服，姓世所由生。姓，正姓也。始祖爲正姓，高祖爲庶姓。」孔氏正義云：「正姓者，對氏族爲正姓也。若炎帝姓姜，黃帝姓姬。周姓姬，本於黃帝，齊姓姜，本於炎帝；宋姓子，本於契。是始祖爲正姓也。云高祖爲庶姓者，若魯之三桓慶父、叔牙、季友之後，及鄭之七穆子游、子國之後爲游

氏、國氏之等。」然則庶姓者，氏也。同姓爲一族，其以氏爲族者，謂九族之族。蓋一族分爲九族，可各爲氏，而九族總爲一族，其姓仍同也。《白虎通·姓名》篇云：「人所以有姓者何？所以崇恩愛，厚親親，遠禽獸，別昏姻也。故紀世別類，使生相愛，死相哀。同姓不得相娶者，皆爲重人倫也。姓者，生也。人稟天氣所以生者也。所以有氏者何？所以貴功德，賤伎力。或氏其官，或氏其事，聞其氏即可知其德，所以勉人爲善也。或氏王父字者何？所以別諸侯之後，爲興滅國，繼絕世也。」此分別姓、氏甚詳。段氏玉裁《說文解字注》云：「按，人各有所由生之姓，其後氏別既久，而姓幾湮。有德者出，則天子立之，令姓其正姓，若大宗然。如《周語》：『帝胙四岳國，賜姓曰姜，氏曰有呂；陳胡公不淫，故周賜之姓，命氏曰陳；颺叔安裔子董父事帝舜，帝賜之姓曰董，氏曰豳。』蓋此三者，本皆姜、媯、董之子孫，故予之以其姓，又或特賜之姓，前無所承者。如《史記》、《白虎通》禹祖昌意以意苴生，賜姓姁氏；殷契以玄鳥子生，賜姓子氏；斯皆因生以賜姓也。必兼《春秋》傳之說，而姓之義乃完。」舜既姚姓，則媯爲舜後之氏可知。姓氏之禮，姓統於上，氏別於下。鄭《駁五經異義》云：「天子賜姓命氏，諸侯命族。族者，氏之別名。姓者，所以統繫百世不別也；氏者，所以

別子孫之所出，故《世本》之篇言姓則在上，^①言氏則在下也。」此由姓而氏之說也。既別爲氏，則謂之氏姓，故《風俗通》、《潛夫論》皆以「氏姓」名篇，諸書多言「氏姓」。氏姓之見於經者，《春秋》隱九年「天王使南季來聘」，《穀梁傳》曰：「南，氏姓也。季，字也。」「南」爲逗，「氏姓也」三字爲句。此「氏姓」之明文也。《史記·陳杞世家》：「舜爲庶人時，堯妻之二女，居於媯汭，其後因爲氏姓，姓媯氏。」《五帝本紀》曰：「自黃帝至舜禹皆同姓，」帝禹爲夏后而別氏姓，姓姁氏」。契爲商姓子氏，棄爲周姓姬氏，此皆「氏姓」之明文也。凡言賜姓者，先儒以爲有德者則復賜之祖姓，使紹其後。故后稷賜姓曰姬，四岳堯賜姓曰姜，董父舜賜姓曰董，秦大費賜姓曰贏，皆予以祖姓也。其有賜姓本非其祖姓者，如鄭氏《駁異義》云：「炎帝姓姜，大皞之所賜也。黃帝姓姬，炎帝之所賜也。是炎帝、黃帝之先固自有姓，而炎帝、黃帝之姜、姬實爲氏姓之初始。夏之姓姁，商之姓子，亦同。然則單云姓者，未嘗不爲氏姓，單言氏者，其後以爲姓。古則然矣。至於周，則以三代以上之姓及氏姓爲昏姻不通之姓，而近本諸氏於官，氏於事，氏於王父字者，爲氏不爲姓。古今之不同也。」謹按：伏羲以上，人道未定，有男女而無夫婦，人知有母而不知父，無父子則無族矣；伏羲畫八卦，定人道，使

男女有別，男女有別則夫婦有義，夫婦有義則父子有親。鄭氏注《昏義》云：「子受氣性純則孝。」受氣純則一本相生而有族，於是有賜姓之制。蓋遵昏姻之禮以長育子孫，則賜之姓以旌別之，所謂「因生賜姓」者，蓋由此也。故云「遠禽獸，別昏姻」也。其始未必人人皆賜姓，而得姓者爲貴。久之，相慕相習，則賜姓者非一時，此所以神農之姓賜於大皞，黃帝之姓賜於炎帝也。至《國語·晉語》司空季子曰：「黃帝之子二十五人，其同姓者，二人而已。」惟青陽與夷鼓皆爲己姓，其同生而異姓者，四母之子別爲十二姓，凡黃帝之子二十五宗，其得姓者十四人爲十二姓，此所謂「姓」，即氏也。同是子而或得姓或不得姓，即春秋時之公子或賜氏或不賜氏也。季子以懷贏之故，附會其說，姓氏之分，未足爲據。蓋至黃帝時，天下已無不有姓之人，而族類繁滋，其先因其無族而賜姓以別其爲族，至是因其族多而賜姓以別其族中之族，故一姓而有諸氏焉。久之忘其正姓，遂以氏爲姓，而氏又分氏。《書·禹貢》「錫土姓」，鄭氏注云：「天子建其國，諸侯胙之土，賜之姓，命之氏。」然則此賜姓即是命氏，是古時通謂之姓，周乃分正姓爲姓，庶姓爲氏耳。禹賜姁姓，

①「世」，原誤作「氏」，今據《說文解字注》改。

契賜子姓，稷賜姬姓，皆與舜之姓媯同，所謂「氏姓」也。蓋自黃帝以後，凡賜姓皆是賜氏。所謂「因生以賜姓」在無族無姓以前，是因其生氣不純而以姓表其同；在族既繁滋之後，是因其生氣滋盛而以姓表其異。其同，德也；其異，亦德也。故皆為「天子建德，因生以賜姓」也。若論正姓，惟伏羲初定人道時所賜乃為真姓本族，自黃帝以後，庶姓之中更為庶姓，惟本其所知者以為姓，即以為族，而已矣。

章指：言情禮相扶，以禮制情；人所同然，禮則不禁。曾參至孝，思親異心，羊棗之感，終身不嘗。孟子嘉焉，故上章稱曰「豈有非義而曾子言之者」也。**疏**「思親異心」○正義曰：《荀子·大略》篇云：「曾子食魚有餘，曰：『泔之。』門人曰：『泔之傷人，不若奧之。』曾子泣涕曰：『有異心乎哉？』」傷其聞之晚也。」

萬章問曰：「孔子在陳曰：『盍歸乎來？』吾黨之士狂簡，進取，不忘其初。」孔子在陳，

何思魯之狂士？**注**孔子居陳，不遇賢人，上下無所交。蓋歎息思歸，欲見其鄉黨之士也。簡，大也。狂者，進取大道而不得其正者也。不忘其初，孔子思故舊也。《周禮》「五黨為州，五州為鄉」，故曰「吾黨之士」也。萬章怪孔子何為思魯之狂士也。**疏**注「簡大」至「士也」○正義曰：此文見《論語·公冶長》篇，但彼云「斐然成章，不知所以裁之」，與此不同。彼《集解》引孔氏云：「簡，大也。孔子在陳，思歸欲去，故曰吾黨之小子。狂簡者，進趨於大道，穿鑿以成文章，不知所以裁制。」蓋孔氏讀斐為匪，匪然即非然。包氏注「不知而作」為「穿鑿」。此孔氏以「斐然成章」為「穿鑿成文章」，謂以非然者成為文章也。趙氏本此，以「不得其正」解之。《儀禮·覲禮》云「伯父帥乃初事」，注云：「初猶故也。」《楚辭·招魂》「樂先故些」，注云：「故，舊也。」是「不忘其初」即不忘「故舊」也。「五黨為州，五州為鄉」，《周禮·地官·大司徒》文。引此者，所以別乎「阿私曰黨」之黨。蓋趙氏生桓、靈時，目見當時南北部黨人之議，朝廷捕而禁之，謂之「黨錮」，恐學者誤以聖人所稱「吾黨之士」即此三君八俊、希風標榜之徒，故既以「鄉」釋「黨」，又引《周禮》以明之。謂孔子所稱「吾黨

之士」即是吾鄉之士也，非此朋黨、部黨之謂也。舊疏不知趙氏之旨，妄肆譏評，而說者或謂《孟子》之文本作「五黨之士」，故引五黨釋之，尤失之遠矣。孟子曰：「孔子『不得中道而與之，必也狂狷乎？狂者進取，狷者有所不爲也』。孔子豈不欲中道哉？不可必得，故思其次也。」**注**中道，中正之大道也。狂者能進取，狷者能不爲不善。時無中道之人，以狂狷次善者，故思之也。**疏**「孔子」至「次也」○正義曰：此亦見《論語·子路》篇，狷作狷。《音義》云：「狷，丁音絹，與狷同。」按：《說文》犬部：「狷，疾跳也。一曰急也。」《國語·晉語》「小心狷介」，韋昭注云：「狷者守分，有所不爲也。」狷之爲狷猶捐之爲環。又心部云：「懷，急也。讀若絹。」段氏玉裁《說文解字注》云：「《論語》狷，《孟子》作猷，其實當作懷。」

「敢問何如斯可謂狂矣？」**注**萬章曰：人行何如斯則可謂之狂也？曰：「如琴張、曾皙、牧皮者，孔子之所謂狂矣。」**注**孟子言人行如此三人者，孔子謂之狂也。琴張，子張也。子張之爲

人，踴躍譎詭。《論語》曰「師也辟」，故不能純善而稱狂也。又善鼓琴，號曰琴張。曾皙，曾參父。牧皮，行與二人同。皆事孔子學者也。**疏**注「琴張」至

「學者也」○正義曰：「琴張」之名，一見於昭公二十年《左傳》，云：「琴張聞宗魯死，將往弔之。仲尼曰：『齊豹之盜而孟縶之賊，女何弔焉？』」**注**云：「琴張，孔子弟子，字子開，名牢。」孔氏正義云：「《家語》云：『孔子弟子琴張，與宗魯友。』《七十子》篇云：『琴牢，衛人，字子開，一字張。』則以字配姓爲琴張，即「牢曰子云」是也。賈逵、鄭衆皆以爲子張即顓孫師。服虔云：「案，《七十子傳》云子張少孔子四十餘歲。」孔子是時四十，知未有子張。鄭、賈之說不知所出。」一見於《莊子·大宗師》篇，云：「子桑戶、孟子反、子琴張三人相與友，曰：『孰能相與於無相與，相爲於無相爲？孰能登天游霧，撓挑無極，相忘以生，無所終窮？』」三人相視而笑，莫逆於心，遂相與友。莫然有間，而子桑戶死，未葬，孔子聞之，使子貢往侍事焉。或編曲，或鼓琴，相和而歌曰：「嗟來桑戶乎！嗟來桑戶乎！而已反其真，而我猶爲人猗！」子貢趨而進曰：「敢問臨尸而歌，禮乎？」二人相視而笑曰：「是惡知禮意？」《左傳》、《莊子》皆周人之書，趙氏豈不知

之？而以琴張爲子張。觀《左傳正義》所引鄭、賈之說，則當時固以琴張爲子張而趙氏本之也。服虔始疑而《家語》始以琴牢一字張，杜預注《左傳》，所本者此也。然《家語》晚出之書，未足爲據。《論語·子罕》篇「牢曰子云吾不試故藝」，鄭氏注云：「牢，弟子子牢也。」不言即琴張。《史記·仲尼弟子傳》亦無琴牢其人。陳氏鱣《論語古訓》云：「王肅《家語敘》云：『《語》云牢曰子云吾不試故藝，談者不知爲誰，多妄爲之說。《孔子家語》弟子有琴張，一名牢，字子開，亦字張，衛人也。』肅云「談者」即指鄭氏。夫《論語》記弟子不應稱名，《漢白水碑》琴張、琴牢判爲二人，肅臆說不可信。」按：鄭衆、賈逵既以《左傳》之琴張爲子張，則當時說《莊子》亦必以琴張爲子張，孟子反與琴張或編曲或鼓琴，則編曲者反而鼓琴者張也。故謂子張善鼓琴，又正當時以《莊子》之琴張爲顓孫師之證，而趙氏本之也。蓋子張之爲人，短之者甚多。《荀子·非十二子》篇云：「弟佗其冠，神禪其辭，禹行而舜趨，是子張氏之賤儒也。」《呂氏春秋·尊師》篇云：「子張，魯之鄙家也，學於孔子。」鄭氏解《論語》「堂堂乎張」，云：「子張容儀盛而仁道薄。」至馬融注「師也辟」則云：「子張才過人，失在邪僻文過。」直以「辟」爲「邪僻」，此趙氏本之，謂其「不能純善」也。《漢書·古今人表》以子張與曾皙

相次，列於第三，而以琴牢列於第四，似亦以子張即琴張，而琴牢別爲「牢曰子云」之牢，別無琴張之名。趙氏生王肅前，未見有《家語》，自不知琴張即琴牢，以子張釋之，非無本也。王氏念孫《廣雅疏證》云：「《釋訓》：「跣蹕，無常也。」跣或作蹕。《楚辭·七諫》「馬蘭蹕蹕而日加」，王逸注云：「蹕蹕，暴長貌也。」暴長即無常之意。無常謂之蹕蹕，非常亦謂之蹕蹕。趙氏注《孟子》云：「子張之爲人，蹕蹕譎譎。」是也。《文選·東京賦》「瑰異譎譎」，薛綜注云：「譎譎，變化也。」《漢書·劉輔傳》云「必有卓詭切至」，顏師古注云：「詭，異於衆也。」異於衆，亦謂其非常矣。《莊子》寓言，恐非其實。「何以謂之狂也？」**注**萬章問何以謂此人爲狂？曰：「其志嚻嚻然，曰『古之人，古之人』。夷考其行，而不掩焉者也。」**注**嚻嚻，志大言大者也。重言古之人，欲慕之也。夷，平也。考察其行，不能掩覆其言，是其狂也。**疏**注「嚻嚻志大言大者也」○正義曰：《音義》云：「嚻嚻，火包切。」《說文》口部云：「嚻，誇語也。」志大言大，是誇語矣。既欲之而又慕之，故重言古之人。《說文》心部云：「慕，習也。」習者，重也。在心欲之不已，則形於口者亦不已。《毛詩·小雅·

出車「獫狁于夷」，《節南山》「式夷式已」，《大雅·桑柔》「亂生不平」，《召旻》「實靖夷我邦」，傳皆訓夷爲平。《爾雅·釋詁》云：「平，成也。」《易·復》象傳「中以自攷也」，《釋文》引鄭氏注云：「攷，成也。」向秀云：「攷，察也。」《禮記·禮器》「觀物弗之察矣」，注云：「察猶分辨也。」平與辨義通則「夷攷」即是攷察。《說文》大部云：「奄，覆也。」掩與奄通。狂者又不可得，欲得不屑不絜之士而與之，是絜也是又其次也。**注**屑，絜也。不絜，污穢也。既不能得狂者，欲得有介之人能耻賤污行不絜者，則可與言矣。是絜人次於狂者也。**疏**注「屑絜」至「狂者也」○正義曰：《毛詩·邶風·谷風》篇「不我屑以」，傳云：「屑，潔也。」占脩潔之字皆作絜。《楚辭·招魂》云「朕幼清以廉潔兮」，王逸注云：「不污曰潔。」不污穢爲絜，是「污穢」爲「不絜」矣。《漢書·楊胡朱梅云傳》贊云「昔仲尼稱不得中行則思狂狷」，顏師古注云：「狷，介也。」故此注以「狷」爲「有介之人」。有所不爲則有所介畫，不妄爲，故不以不絜爲絜也。不絜是污穢之行，能耻之賤之，是不絜此不絜之行也。與之是進而教之，故爲可與言。「是絜也是又其次也」八字一句，故易「絜也」爲「絜人」以明之。孔子

曰：「過我門而不入我室，我不憾焉者，其惟鄉原乎！鄉原，德之賊也。」**注**憾，恨也。人過孔子之門不入，則孔子恨之，獨鄉原不入者無恨心耳，以其賊德故也。**疏**注「憾恨也」至「故也」○正義曰：《小爾雅·廣言》云：「憾，恨也。」《楚辭·哀時命》云：「志憾恨而不逞兮。」是也。《荀子·脩身》篇云：「害良曰賊。」有害於德，故云「德之賊」。語見《論語·陽貨》篇。

曰：「何如斯可謂之鄉原矣？」**注**萬章問鄉原之惡云何？曰：「何以是嚶嚶也？言不顧行，行不顧言，則曰『古之人』。古之人行何爲踽踽涼涼？生斯世也，爲斯世也善，斯可矣。闐然媚於世也者，是鄉原也。」**注**孟子言鄉原之人，言何以是嚶嚶若有大志也？其言行不顧，則亦稱「古之人」。古之人行何爲踽踽涼涼，有威儀如無所施之貌也。鄉原者外欲慕古之人而其心曰：古之人何爲空自踽踽涼涼，而生於今之世，無所用之乎？以爲生斯世，但當取爲人所善善人，則可矣。其實但爲合衆之行。媚，愛也。故闐

然大見愛於世也。若是者謂之鄉原。**疏**注「孟子」至

「鄉原」○正義曰：「孟子言」三字解曰字，「何以是嚶嚶」以下皆論鄉原。嚶嚶，鄉原之嚶嚶也。「言何以是嚶嚶若有大志」謂鄉原之言何以嚶嚶若有大志也，非如狂者之真有大志也。「言不顧行，行不顧言」，鄉原之言行不顧也。狂者曰古之人古之人，鄉原則亦曰古之人。但狂者之稱古人是欲之慕之，鄉原之稱古之人則大言以譏斥之，謂古之人行何爲蹢蹢涼涼，無所用於世？此鄉原之大言，非如狂者之大言也。趙氏以上「古之人」爲句，「古之人行何爲蹢蹢涼涼」爲句，「生斯世也」句，「爲斯世也善」句，與「斯可矣」一連貫下相呼應，故云「但當取爲人所善善人」也。《毛詩·唐風·杕杜》篇「獨行踽踽」，傳云：「踽踽，無所親也。」《說文》足部云：「蹢，疏行也。」疏與親反，無所親，故疏。又水部云：「涼，薄也。從水，京聲。」薄與疏義亦相近，不與人相親，則不以周旋盤辟施之於人，故云「有威儀如無所施之貌」也。《音義》以「古之人行」爲句，「何爲」之爲，張云：「于僞反。」謂古人之行何所爲而如是？生斯世也，但取爲人所善之善人。此爲字讀如字矣。闕爲宦豎之稱。《爾雅·釋天》云：「太歲在戊曰闕茂」，李巡注云：「闕，蔽也。」趙氏讀闕爲奄。《毛詩·大雅·皇矣》篇「奄有四方」，傳云：「奄，大也。」故釋爲

「大」。又《思齊》篇「思媚周姜」，傳云：「媚，愛也。」

萬子曰：「一鄉皆稱原人焉，無所往而不爲原人，孔子以爲德之賊，何哉？」**注**萬子即萬章也。孟子錄之，以其不解於聖人之意，故謂之萬子。子，男子之通稱也。美之者，欲以責之也。萬章言人皆以爲原善，所至亦謂之善人，若是，孔子以爲賊德，何爲也？**疏**注「萬子」至「爲也」○正義曰：

臧氏琳《經義雜記》云：「趙注「萬子即萬章也」云云，是趙鄒卿注本作「萬子」。趙氏謂「其不解於聖人之意」，「美之者，欲以責之」，此說頗曲。夫公孫丑、萬章、告子之徒，平日反覆辨難，往往數千百言，孟子皆據理告之，未嘗責其不解，何至此忽欲責其不解而反假以美之乎？蓋鄉原之行，孟子雖已告之，其所以稱原者，孟子尚未言也。孟子未言則萬章不知，萬章不問則孟子終不言，後世之人亦終不知賊德、亂德者幾何不接踵於世，而堯舜之道不可得人矣。是非有萬章此問不可，故特稱子以美之。」趙氏佑《溫故錄》云：「萬章於此獨稱子，明有注文。然「萬子曰」乃記體，不得謂孟子稱之爲子。「不解」之解讀當爲懈，言其問之審也。蓋《孟子》七篇，萬章傳述之功居多，其於究論古帝王聖賢言行，惟萬章

獨勤以詳。孟子之功，莫大於尊仲尼、稱堯舜、闢楊墨，而此章又終之辨鄉原以立萬世之防，實萬章相與發明之。此章則其問答終畢之事，故特著「子」稱焉，以結七篇之局。」《論語·泰伯》篇云「侗而不愚」，《釋文》引鄭注云：「愚，善也。」趙氏讀原爲愚，故以「原人」爲「善人」。曰：「非之無舉也，刺之無刺也。同乎流俗，合乎汙世。居之似忠信，行之似廉潔，衆皆悅之，自以爲是，而不可與人堯舜之道。故曰『德之賊』也。」**注**孟子言鄉原之人能匿蔽其惡，非之無可舉者，刺之無可刺者。志同於流俗之人，行合於汙亂之世。爲人謀，居其身若似忠信，行其身若似廉潔爲行矣，衆皆悅美之，其人自以所行爲是，而無仁義之實，故不可與人堯舜之道也。無德而人以爲有德，故曰「德之賊」也。**疏**注「鄉原」至「賊也」○正義曰：無可非、無可刺，則真善矣，故趙氏以「能匿蔽其惡」解之。流俗之人不可同志，則同之而不敢異，汙亂之世不可合行，則合之而不敢離。蓋自托於達士之和光，而曲爲浮沉俯仰之術，似忠信則非忠信，似廉潔則非廉潔。《論語·學

而篇曾子曰：「爲人謀而不忠乎？與朋友交而不信乎？」廉潔亦屬與人交接之事，故趙氏括之以「爲人謀」。惟其志行既同流合汙，而其與此流俗汙世之人共事，又能盡心力以爲之謀而不自私其財利，此人所以皆悅之也。彼見人皆悅之，遂亦自信爲涉世之善法，故「自以爲是」，而要之非仁義之實也。所謂「非之無可舉，刺之無可刺」，亦此流俗汙世之人耳。若孔子則已刺之爲「賊」，孟子則已非之爲「不可入堯舜之道」。孔子曰：「惡似而非者：惡莠，恐其亂苗也；惡佞，恐其亂義也；惡利口，恐其亂信也；惡鄭聲，恐其亂樂也；惡紫，恐其亂朱也；惡鄉原，恐其亂德也。」**注**似真而非真者，孔子之所惡也。莠，莖葉似苗。佞人詐飾，似有義者。利口辯辭，似若有信。鄭聲淫人之聽，似若美樂。紫色似朱。朱，赤也。鄉原惑衆，似有德者。此六似者，皆孔子之所惡也。**疏**注「莠莖葉似苗」○正義曰：《毛詩·齊風·甫田》「維莠騷騷」，傳不言何物。《小雅·大田》「不稂不莠」，傳云：「稂，童梁也。莠，似苗也。」按：莠之爲物有二。《御覽》引韋昭《問答》云：「《甫田》『維莠』，今何草？答曰：今之狗尾也。」《夏小正》：「四月，秀

幽。《國策》魏西門豹云「幽莠之幼也似禾」。《廣雅·釋草》云：「莠，莠也。」幽、莠，莠一聲之轉。《說文》艸部以「莠」次「莠」，莠即《爾雅·釋草》之「孟狼尾」。《史記·司馬相如傳》《上林賦》「其卑溼則生藏莠」，《集解》引《漢書音義》云：「莠，狼尾草也。」莠爲狼尾，莠爲狗尾，所以相次也。則狗尾之名莠，乃莠之通借字也。此「不稂不莠」，傳既以稂爲童梁，《說文》艸部云：「莠，禾粟之采生而不成者，謂之童莠。」重文「稂」。采即穗字，爲禾成秀之名。蓋禾病則秀而不實，實者下垂，不實者直立而獨露於外。童之猶言獨也。稂是生而不成者，於是《說文》即以莠字次之，云「莠，禾粟下揚生莠也」。揚者，簸揚之謂。粟之不堅好者，簸揚之必在下，今農人尚呼之爲「下揚」。《農桑輯要》云：「穀種浮秕，去則無莠。」徐鍇亦謂：「莠出於粟秕。」今狗尾草徧野皆一種自生，不關粟秕所種，則下揚所生之莠別爲似禾之物，與莠之爲狗尾者異也。蓋即禾之秀而不實者，故即以「莠」名之。稂、莠一類，稂成於病，莠生自種，爲有別耳。下揚中有米而不完全，俗謂之「半掩」，故能生也。程氏瑶田以「下揚」爲飛揚，段氏玉裁以「下揚」爲下垂，難乎達矣。○注「佞人」至「惡也」○正義曰：《論語·陽貨》篇云「惡紫之奪朱也，惡鄭聲之亂雅樂也，惡利口之覆邦家者」，《集解》孔氏云：「朱，

正色。紫，間色之好者。惡其邪好而奪正色也。」包氏云：「鄭聲，淫聲之哀者，惡其奪雅樂也。」孔氏云：「利口之人，多言少實，苟能說媚時君，傾覆其國家也。」此謂惡似而非，與彼義略別。《爾雅·釋詁》云：「壬，佞也。」《書·皋陶謨》云：「何畏乎巧言令色孔壬？」孔壬即莊公十七年《公羊傳》所云「甚佞」。孔壬指巧言令色，巧言令色即共工之「靜言庸違，象恭滔天」。靜言、象恭，似乎有義矣，而不知實庸違、滔天，爲甚佞也。《韓非子·八經》篇云：「言之爲物也，以多信不然之物，十人云疑，百人然乎，千人不可解也。訥者言之疑，辯者言之信。姦之食上也，取資乎衆，籍信乎辯。」^①此「辯辭」所以「若有信」也。《禮記·樂記》云：「魏文侯問於子夏曰：『吾端冕而聽古樂，則惟恐卧，聽鄭衛之音，則不知倦。』子貢對曰：『今君之所問者，樂也；所好者，音也。夫樂者，與音相近而不同。夫古者，天地順而四時當，民有德而五穀昌，疾疢不作而無妖祥，然後聖人作爲父子君臣以爲紀綱，紀綱既正，天下大定，然後正六律，和五聲，弦歌詩頌，此之謂「德音」，德音之謂「樂」。今君之所好，其溺音乎？鄭音好濫淫志，宋音燕女溺志，衛音趨數煩志，齊音敖

①「籍」，原誤作「籍」，今從沈校據《韓非子》改。

辟喬志。此四者，皆淫於色而害於德，是以祭祀弗用也。」此「鄭聲」所以「亂樂」。《論語·衛靈公》篇云：「放鄭聲，遠佞人。鄭聲淫，佞人殆。」孔氏云：「鄭聲，佞人亦俱能感人心，與雅樂賢人同，而使人淫亂危殆，故當放遠之也。」《說文》木部云：「朱，赤心木。」木之赤心者名朱，朱即赤，故《楚辭·招魂》、《大招》「朱顏」，王逸注皆云：「朱，赤也。」《攷工記》「畫績之事，東方青，南方赤，西方白，北方黑」，故為正色。劉熙《釋名·釋采帛》云：「紫，疵也。非正色也，五色之疵瑕以惑人者也。」《法言·吾子》篇云：「或問蒼蠅紅紫曰明視，問鄭衛之似曰聰聽。中正則雅，多哇則鄭。」《漢書·王莽傳贊》云「紫色電聲」，應劭云：「紫，間色。電，邪聲也。」按：電與哇同。君子反經而已矣。經正，則庶民興；庶民興，斯無邪慝矣。」**注**經，常也；反，歸也。君子治國家，歸其常經，謂以仁義禮智道化之，則衆民興起而家給人足矣。「倉廩實而知禮節」，安有為邪惡之行也？**疏**注「經常」至「行也」○正義曰：《白虎通·五經》篇云：「經，常也。」《說文》走部云：「返，還也。」《廣雅·釋詁》云：「反，歸也。」反與返同，歸即還也。《呂氏春秋·順民》篇云「湯克夏而正天下」，高誘注云：

「正，治也。」《荀子·非相》篇云：「起於上，所以道於下，正令是也。」趙氏以正為政教，故以「道化」釋之。五常是仁義禮智信，「經正」是「以仁義禮智道化之」，謂經正之也。《說文》昇部云：「興，起也。」《毛詩·小雅·天保》篇「以莫不興」，傳云：「興，盛也。使萬物皆盛，草木暢茂，禽獸碩大。」《周禮·地官·旅師》「掌聚野之勸粟、屋粟、間粟而用之，以質劑致民，平頒其興積」，注云：「興積，所興之積，謂三者之粟也。縣官徵聚物曰興。」賈氏疏云：「興皆是積聚之義。」興為積聚，又為茂盛，故以「庶民興」為「家給人足」。「倉廩實而知禮節」，《管子》文，詳見前。《秋官·大行人》「殷規以除邦國之慝」，**①**注云：「慝，惡也。」故以「邪慝」為「邪惡」也。莊公十一年《公羊傳》云：「權者，反於經然後有善者也。」《論語·子罕》篇云：「可與立，未可與權。」唐棣之華，偏其反而。」何晏注云：「賦此詩以言權道，反而後至於大順。」趙氏之義，則孟子言「反經」與《公羊傳》異。

章指：言士行有科，人有等級。中道為上，狂、獯不合。似是而非，色厲內荏，

①「規」，原誤作「類」，今從沈校據《周禮》改。

鄉原之惡，聖人所甚。反經身行，民化於己。「子率而正，孰敢不正」也。**疏**「子率而

正孰敢不正」○正義曰：《史記·平津侯主父列傳贊》

云：「夫三公者，百寮之率，萬民之表也。未有樹直表而

得曲影者也。孔子不云乎：「子率而正，孰敢不正？」

趙氏本此，蓋隱以公孫弘脫粟布被爲鄉原也。

孟子曰：「由堯舜至於湯，五百有餘歲。

若禹、皋陶，則見而知之；若湯，則聞而知之。**注**言五百歲聖人一出，天道之常也。亦有遲

速，不能正五百歲，故言「有餘歲」也。見而知之，謂

輔佐也，通於大賢次聖者亦得與在其間。親見聖人

之道而佐行之，言易也。聞而知之者，聖人相去卓

遠，數百歲之間變故衆多，踰聞前聖所行，追而遵之

以致其道，言難也。**疏**「由堯」至「知之」○正義曰：孟子

言必稱堯舜，以堯舜治天下之法爲萬世所不能易，故末自堯

舜而下，言湯、文、孔子所聞而知之，禹、皋陶、伊尹、萊朱、太

公望、散宜生所見而知之，無非堯舜之道。堯舜之道，通變

神化之道也。上言鄉原「自以爲是而不足與人堯舜之道」，

末言「君子反經而已矣」，然則「反經」者，堯舜之道也。又

云：「經正則庶民興」，言經正則經有不正者矣。反經而經

正，則不反經經有不正者矣。孟子所云「反經」即《公羊傳》

所云「反經」，反經爲權，權即通變神化。何爲經？經者，常

也。常者，不變之謂也。狂者常於高明，君子則反之以柔

克，獯者常於沈潛，君子則反之以剛克。如是則其常而不

能變者皆以反而歸於正，此庶民所以皆興起於善而無邪慝

也。惟鄉原非之無舉，刺之無刺，其闖然媚世，本無一定之

常，爲剛克柔克所不能化。又自以爲是，非勞來匡直所能

移，故不可與人堯舜之道，實爲聖世奸民而古今大慝也。此

孔子所以惡之而思狂獯之士。狂者反經，則由狂而中正，獯

者反經，則由獯而中正。故君子反經而經正也。鄉原而外，

皆可與人堯舜之道者也。此堯舜之道爲萬世君子之法，故

湯、文王、孔子聞而知之，即知此反經經正之道也；禹、皋

陶、伊尹、萊朱、太公望、散宜生見而知之，即知此反經經正

之道也。反經爲權，實即堯舜通變神化之道。公羊氏不能

闡而明之，孟子則詳言之矣。○注「卓遠」○正義曰：《楚

辭·逢尤》篇「世既卓兮遠眇眇」，注云：「卓，遠也。」由湯

至於文王，五百有餘歲。若伊尹、萊朱，則見而知之；若文王，則聞而知之。**注**伊尹，摯

也，萊朱，亦湯賢臣也，一曰仲虺是也。《春秋傳》

曰「仲虺居辟，爲湯左相」，是則伊尹爲右相，故二人等德也。**疏**注「伊尹」至「德也」○正義曰：《書·君奭》

云：「我聞在昔成湯既受命，時則有若伊尹，格于皇天，在

太甲，時則有若保衡。」《毛詩正義》引鄭氏注云：「伊尹，名

摯，湯以爲阿衡，以尹天下，故曰伊尹。」《孫子·用間》篇

云：「昔殷之興也，伊摯在夏。」魏武帝注云：「伊尹也。」《春

秋繁露·三代改制質文》篇云：「湯受命，變夏作殷，作官於

下洛之陽，名相官曰尹。」尹既是相，則仲虺同時爲左相，知

伊尹爲右相矣。引《春秋傳》者，定公元年《左傳》辟辛曰：

「辟之皇祖奚仲，居辟以爲夏車正。奚仲遷於邳，仲虺居辟，

以爲湯左相。」《書序》云：「湯歸自夏，至於大坰，仲虺作

誥。」《史記·殷本紀》作「中鬻」，《索隱》云：「仲虺二音，鬻

作鬻，音如字。《尚書》又作虺。」鬻，萊一音之轉。由文

王至於孔子，五百有餘歲。若太公望、散宜

生，則見而知之；若孔子，則聞而知之。**注**太

公望，呂尚也，號曰師尚父。散宜生，文王四臣之一也。呂尚有勇謀而爲將，散宜生有文德而爲相，故以相配而言之也。**疏**注「太公」至「之也」○正義曰：《毛

詩·大雅·大明》篇：「維師尚父，時維鷹揚，涼彼武王。」傳云：「師，大師也。尚父，可尚可父。鷹揚，如鷹之飛揚也。」

箋云：「尚父，呂望也。尊稱焉。佐武王者，爲之上將。」孔

氏正義云：「《史記·齊世家》云：『太公望呂尚者，東海上

人。西伯出獵得之，曰吾太公望子久矣，故號之曰太公望。

載與俱歸，立爲太師。』劉向《別錄》曰：「師之尚之父之，故

曰師尚父。父亦男子之美稱。』《太誓》注云：「師尚父，文王

於磻谿所得聖人呂尚，立以爲太師，號曰尚父，尊之。」如《世

家》之文，則尚本是名，號之曰望。而《雒師謀》云「呂尚釣

匡」，注云：「尚，名也。」又曰「望公七年，尚立變名」，注云：

「變名爲望。」蓋因所呼之號遂以爲名，以其道可尊尚，又取

本名爲號也。《孫子兵法》曰「周之興也，呂牙在殷」，則牙又

是其名字也。《書·君奭》云：「惟文王尚克脩和我有夏，亦

惟有若號叔，有若閔天，有若散宜生，有若泰顛，有若南宮

括。又曰：無能往來，茲迪彝教，文王蔑德降于國人，亦惟

純佑秉德，迪知天威，乃惟時昭文王，迪見冒聞于上帝，惟時

受有殷命哉。」鄭氏注云：「《詩傳說》有「疏附、奔走、先後、禦侮之人」，而曰「文王有四臣以受命」，此之謂。」《毛詩正義》曰：「引此四行以證五臣，明非一臣有一行也。」王氏鳴盛《尚書後案》云：「《大雅·緜》詩毛傳云：「率下親上曰疏附，相道前後曰先後，諭德宣譽曰奔走，武臣折衝曰禦侮。」絕無所謂文王有四臣以受命之說。蓋鄭先受《韓詩》於張恭祖，後又通《魯詩》，最後乃得《毛詩》，此所引《詩傳說》，或《韓詩》、《魯詩》說也。」趙氏所謂「四臣之一」，與鄭氏說同。散宜生既在四臣之中，而降蔑德，秉文德，昭明德，故云「有文德而為相」也。按：「見而知之」謂親見當時所以治天下如此。在堯舜時舉一禹、皋陶，則稷、契、益等二十二人括之矣；在湯時舉一伊尹、萊朱，則當時賢臣如女鳩、女房、義伯、仲伯、咎單等括之矣，在文王時舉一太公望、散宜生，則號叔、泰顛、閔夭、召公、畢公、榮公等括之矣。非謂見知者僅此一二人也。蓋通變神化之道作於黃帝、堯、舜，而湯、文王聞而知之，知而行之。其始百姓固日用而不知，而賢聖之臣為之輔佐者，親見此脩己以敬、無為而治之效，固無不知之也。錢氏大昕《潛研堂答問》云：「《大戴·帝繫》篇：「堯娶於散宜氏之子，謂之女皇。」散宜蓋古諸侯之國，散宜生殆其苗裔也。」由孔子而來至於今，百有餘歲。去

聖人之世，若此其未遠也；近聖人之居，若此其甚也。然而無有乎爾，則亦無有乎爾。」
注 至今者，至今之世，當孟子時也。聖人之間必有大賢名世者。百有餘年，適可以出，未為遠而無有也。鄒、魯相近，《傳》曰「魯擊柝，聞於邾」，近之甚也。言已足以識孔子之道，能奉而行之。既不遭值聖人，若伊尹、呂望之為輔佐，猶可應備名世，如傳說之中出於殷高宗也。然而世謂之無有，此乃天不欲使我行道也，故重言之，知天意之審也。言「則亦」者，非實無有也。則亦當使為無有也乎？爾者，歎而不怨之辭也。
疏 「然而無有乎爾則亦無有乎爾」○正義曰：趙氏以「無有」為無有「名世之人」。上云「然而無有」，謂當時之人以為無有；下云「則亦無有」，因人言無有，「則亦當使之無有」。《音義》云：「陸本作「然而無乎爾則亦有乎爾」，云：「孟子意自以當之。鄒魯相鄰，故曰近聖人之居。無乎爾有乎爾，疑之也。此意以況絕筆於獲麟也。」趙氏佑《溫故錄》云：「魏氏作《孟子論》，謂世未遠，居甚近，蓋將自負於顏、曾、思見知之列，而以聞知望天下後世

之人。或者曰：顏、曾、思爲孔子見知之人明矣，孟子何不直言而概以無有？曰：顏、曾、思之見知，不待言也。蓋古今道法之所以不墜者，固賴近有見知，遠有聞知，而當見知已往，聞知未來，尤必有人焉以延其絕續之交，然後見以紹見，聞以啓聞，近不絕而遠可續。觀《書》陳伊尹保衡，而後則有太戊、盤庚、武丁之爲君，伊陟、臣扈、巫咸、巫賢、甘盤之爲臣，皆以傳湯與伊萊之道，故文王得以聞而知。子貢稱文武之道未墜於地，賢者識其大，不賢者識其小，皆以存文與散，望之道，故夫子得以聞而知。推之禹、皋至湯，雖《書》缺有間，然而歌稱祖訓，征述政典，《史記》伊尹之於湯，言素王九主之事，其非無人焉相授受、相維持於堯舜之衰可知也。其人類不及聖，而足以爲聖之資，否則各以五百餘歲爲斷，亦云遙闊之甚矣，湯、文、孔子雖甚聖，其不歎文獻無徵者幾希矣。獨至春秋戰國之際，而異學邪說爭鳴交煽，班生所謂「仲尼沒而微言絕，七十子喪而大義乖」也，其孰是與於知之者？孟子未得爲孔子徒，亦既不親見聖，而猶以其近而未遠爲幸，因益以未遠而無有爲懼。夫未遠而已無有知之者，復何望於遠而知之哉？孟子力肩斯道，實自居於見聞絕續之交之一人，而備述所知，以上紹前之知，下遭後之知，其所紹直自禹以下，有不止於顏、曾、思者，而其所遭於後，爲益無窮期矣。」謹按：此義與趙氏之指小異而相近，然謂

顏、曾、思爲見知，非也。堯舜、湯文以此道措諸天下而巍巍皞皞，一時輔佐之人共見之，是爲見而知之。湯、文王之知雖起於聞，而實徵於見，禹、伊尹、周公雖見知，而非不可聞知。惟孔子但聞知而不能措之天下，使當時賢者得見而知，七十子學於孔子，亦皆聞而知之，非見而知之者也。孟子去孔子之生未遠，鄒、魯又相近，言庶幾私淑其人，得聞而知之也。然而堯舜、湯文不復見於世，則此聞而知者無有措於天下。蓋自孔子時已無有見而知之者矣，況生百年後，則亦無有見而知之者矣。「爾」者，辭之終也。「乎爾」者，決絕之中尚有餘望也。此孟子思王者之不作而不欲徒托諸空言，其辭遜，其指婉。或乃以孟子道統自居。夫道，無所爲統也。爲道統之說者，失孟子之教矣。

章指：言天地剖判，開元建始，三皇以來，人倫攸敘。弘析道德，班垂文采，莫貴乎聖人。聖人不出，名世承間。雖有此限，蓋有遇有不遇焉。是以仲尼至「獲麟」而止筆，孟子以「無有乎爾」終其篇章，斯亦一契之趣也。疏「天地剖判」○正義曰：《史記·孟子荀卿列傳》云「騶衍稱引天地剖判以來」，《韓非子·解老》篇云「唯夫與天地之剖判也俱生」。《廣雅·釋天》云：「太初，氣之始也。」

生於酉仲，清濁未分也。太始，形之始也。生於戌仲，清者爲精，濁者爲形也。太素，質之始也。生於亥仲，已有朴素而未散也。三氣相接，至於子仲，剖判分離，輕清者上爲天，重濁者下爲地，中和爲萬物。」○「聖人不出名世承間」○正義曰：見《漢書·楚元王傳贊》。○「蓋有」至「止筆」○正義曰：《荀子·宥坐》篇孔子曰：「夫賢不肖者，材也；爲不肖者，人也；遇不遇者，時也。」《論衡·逢遇》篇云：「伊尹、箕子，才俱也。伊尹爲相，箕子爲奴。伊尹遇成湯，箕子遇商紂也。或以賢聖之臣遭欲爲治之君而終有不遇，孔子、孟軻是也。孔子絕糧陳蔡，孟軻困於齊梁，非時君主不用善也，才下知淺，不能用大才也。」《漢書·儒林傳序》云：「因《魯春秋》舉十二公行事，繩之以文武之道，成一王法，至『獲麟』而止。」班固《答賓戲》云：「孔終篇於『西狩』。」

姪琮廷弼校字

孟子正義卷三十

江都縣鄉貢士焦循撰集

孟子篇敘疏

正義曰：《音義》云：「此趙氏述《孟子》七篇所以相次敘之意也。」周氏廣業《孟子章指攷證》云：「《篇敘》亦趙邠卿所作，其意蓋本《序卦》，欲使知篇次相承，不容紊錯也。雖配儷五七，未必盡符作述微旨。存之亦足見聖哲立言，事理畢該，隨所推尋，無非妙緒矣。如《魯論》，羣弟所記，宜無倫敘，而說者謂降聖以下，皆由學成，故首《學而》，成學乃可爲政化民，故次《爲政》。以類相求，實皆好學深思之效也。」趙氏

《孟子篇敘》者，言《孟子》七篇所以相次

敘之意也。

疏正義曰：明名《篇敘》者，爲七篇次序之

義，非如《詩序》、《書序》之序也。孟子以爲聖王之

盛，惟有堯舜，堯舜之道，仁義爲上，故以梁惠王問利國，對以仁義，爲首篇也。疏正義

曰：《易·說卦傳》云：「是以立天之道曰陰與陽，立地之

道曰柔與剛，立人之道曰仁與義。」仁即元，義即利，仁義之

爲道即元亨利貞之爲德，此堯舜所以通變神化者也。孟子

言必稱堯舜，堯舜之道即仁義矣。仁義根心，然後可

以大行其政，故次之以公孫丑問管晏之政，

答以曾西之所羞也。疏正義曰：根心，謂先王以不

忍人之心行不忍人之政。政莫美於反古之道，滕

文公樂反古，故次以文公爲世子，始有從善

思禮之心也。疏正義曰：思禮謂三年之喪。奉禮

之謂明，明莫甚於離婁，故次之以離婁之明

也。疏正義曰：《說文》井部云：「奉，承也。」承先王之禮

而行之，所謂述也。《禮記·樂記》云：「故知禮樂之情者能

作，識禮樂之文者能述。作者之謂聖，述者之謂明。」明者

當明其行，行莫大於孝，故次以萬章問舜往

于田號泣也。疏正義曰：舜明於庶物，察於人倫，是

明其行也。孝道之本在於情性，故次以告子論情性也。

疏正義曰：人性善，所以能孝弟。情性在內而主於心，故次以盡心也。

疏正義曰：「乃若其情，則可以為善矣」，是情合於性。「盡其心者，知其性也」，是性本於心。盡己之心，與天道通，道之極者也。是以終於盡心也。

疏正義曰：盡心則知性知天，故與天道通也。周氏廣業《孟子出處時地攷》云：「建篇之首《梁惠王》也，趙氏之說題矣。《題辭》謂「退自齊梁而著作，其篇目各自有名」，則未盡然。古人得志，澤加於民，不得志，脩身見於世。立言不朽，雖聖人不能易，豈必窮愁始著書哉？特壯年志在行道，未遑專意耳。故其成在遊梁之後，其著作斷非始此。大率起《齊宣王》至《滕文公》為三冊，記仕宦出處，《離婁》以下為四冊，記師弟問答雜事。迨歸自梁而孟子已老，於行文既絕少，又暮年所述，故僅與魯事，分附諸牘末。其後門人論次遺文，分篇列目，以「仁義」兩言為全書綱領，因割其六章冠首，而以《梁惠王》題篇，於梁齊之下，繼以鄒、滕、魯。蓋孟子生平所注意者祇此五國而已。乃其在梁也，始以去利行仁義期之，終料其嗜殺而去。於齊宣王，始以易牛之仁冀其王，終以伐燕之暴決於

歸。鄒於仁政一言行否未可知，而父母之邦，君子重之，且與齊宣皆屬舊君，不容略也。滕文尊禮，孟子遇矣，而國小多故，莫必其成功。魯則周公之後，孔子之鄉，平公乘五百里之地，既知用樂正子，兼有見賢之意，似可與圖功矣，而卒不遇。孟子一生行藏，首篇盡之矣。其曰「天欲平治天下，舍我其誰」，壯而欲行，厚望之辭也，功之成否、身之遇否皆歸之天，老不得志，絕望之辭也。首次二篇以天終，末篇以天始。《梁惠王》以王道始，《盡心》以聖學終。《公孫丑》由王道推本聖學，其為章二十有三，記齊事者十有五，餘八章皆言仁義，又王道也。而齊之仕止詳見起訖，明是篇為在齊之日，公孫識之矣。《滕文公》亦兼舉聖學王道，而滕係弱小，故其言井田、學校雖較詳於《齊》《梁》，但可新其國耳，王非所能也。聖王不興於上，聖道將絕於下，於是力闢楊墨以承之，許行、夷之以至陳仲子，皆邪說詖行之害仁義者也，故以「不得已好辯」終焉。《離婁》、《萬章》、《告子》、《盡心》，發端言堯舜心性，與《滕文公》同，其後皆雜說訓言，而《萬章》一篇又知人論世之林。此則七篇大致，可得而略言者。趙氏以為「包羅天地，揆敘萬類，仁義道德，性命禍福，粲然靡所不載」，信矣。「謹按：周氏所云似較趙氏為長。然探趙氏《篇敘》之指，蓋恐後人紊亂其篇次，增損其字數，故假其

義以示其信耳。如後稱字數，以五七不敢盈之義，則知三萬四千六百有奇非傳寫之謬，三萬五千二百有奇實增多之義，詎真以孟子取五七不盈之義爲此字數哉？篇所以七

者，天以七紀，璿璣運度，七政分離，聖以布曜，故法之也。

疏正義曰：「天以七紀」，昭公十年《左傳》文也。《尚書·堯典》云：「在璇璣玉衡，以齊七政。」馬氏

注云：「璿，美玉也。璣，渾天儀可轉旋，故曰璣。七政者，北斗七星，各有所主：第一曰主日，法天，第二曰主月，法地，

第三曰命火，謂熒惑；第四曰煞土，謂填星；第五曰伐水，謂辰星；第六曰危木，謂歲星；第七曰罰金，謂太白。日月五星

各異，故名曰七政。」又云：「日月星皆以璿璣玉衡度知其盈縮。」《尚書大傳》云：「在璇璣玉衡，以齊七政。」璇璣者，何

也？傳曰：「璇者，還也。機者，幾也，微也。其變幾微，而所動者大，謂之旋機。是故旋機謂之北極。」鄭氏注云：「七政

謂春秋冬夏天文地理人道，所以爲七政也。人道盡而萬事順成。」馬、鄭之說不同。趙氏此文作「璿璣」不作「璇機」，則用

馬氏義也。渾天者，地在其中，天周其外，晝則日在地上，夜則日入地下。漢宣帝時司農中丞耿壽昌鑄銅爲之，象衡橫其

中，璿轉於外，以知天度，故云璿璣運度也。范甯《穀梁傳序》

云「七曜爲之盈縮」，楊氏疏云：「謂之七曜者，日月五星皆照天下，故謂之七曜。」日歲一周天，月月一周天，木星十二歲一周天，火星二歲一周天，土星二十八歲一周天，金水二星附日而行，亦一歲一周天。是「七政分離」，各行其度，而聖人造璿璣，使七政畢陳於目，故云「聖以布曜」。布曜者，即布此七政之曜。言《孟子》一書，分而爲七，如天之有七政，而舜以璿璣布之也。劉陶作《七曜論》以復《孟子》，疑即以七篇爲七曜。趙氏蓋本此。章所以二百六十有九者，三時之日數也。不敢比《易》，當期之數，故取其三時。三時者，成歲之要時，故法之也。

疏正義曰：《題辭》稱二百六十一章，此言九，當有誤也。《易·繫辭傳》云：「乾之策二百一十有六，坤之策百四十有四，凡三百有六十，當期之日。」此云「不敢比《易》，當期之數」，而期四時十二月，三時則九个月，當有一百七十日，於數亦不能合。孔本作「常期」，《音義》云：「『當期』，音替。」則本作當字，今正之。

三萬四千六百八十五字者，可以行五常之道，施七政之紀，故法五七之數而不敢盈也。

疏正

義曰：五七當三萬五千字，今不足，故云不敢盈。據今本，共三萬五千二百二十六字，多趙氏五百四十一字。以趙氏《章

句，《章指》核之，其字句較今所傳不應減少，此明云「五七之數不敢盈」，則為三萬四千有奇而不足五千，斷非趙氏此數為傳寫有誤。若過三萬五千，則不當云「五七之數不敢盈」也。尋繹其故，趙氏本所不同者當在「孟子曰」等文。蓋問答則有「孟子曰」、「孟子對曰」，或單用「曰」字。其自為法度之言，則不必加「孟子曰」。如《荀子·儒效》篇與秦昭王問答，《議兵》篇與陳轅、李斯等問答，則用「孫卿子曰」，餘皆不加「荀子曰」。惟自言本不加「孟子曰」，此趙氏所以定七篇為孟子自作。《史記》《太史公曰》，《索隱》云：「楊惲、東方朔所加。」則「孟子曰」三字容為後人所加，如「齊人有一妻一妾」章，「逢蒙學射於羿」章，章首皆無「孟子曰」，可例其餘。「曾子居武城」章，章首亦無「孟子曰」，而「孟子曰」三字在章末有之。又《公孫丑上》篇「伯夷」章章首有「孟子曰」，章末「伯夷隘」云云，又有「孟子曰」，亦後人增加未畫一之證。凡孟子自言一百數十章，則多「孟子曰」一百數十。又趙氏於單言「曰」字或無「曰」字，必明標「孟子曰」、「孟子言」及「丑曰」、「克曰」、「相曰」、「髡曰」、「涇曰」云云，其「孟子謂戴不勝曰」，趙氏亦標云「孟子假喻」，疑章首「孟子」亦後人所加，^①趙氏本但云「謂戴不勝曰」，經無「孟子」字，趙氏乃以「孟子」標之也。「孟子曰子能順杞柳之性」、「孟子曰水性無分於東西」，趙注皆明標「孟

子曰」，蓋趙氏本亦但有「曰」字，無「孟子」字，故標之也。以此推之，雖未能盡得其增加之跡，而趙氏之本轉減少於今本五百四十一字者，約略可於此見之也。文章多少，擬其大數，不必適等，猶《詩》三百五篇而《論》曰「《詩》三百也」。^疏正義曰：《論》謂《論語》也。謂以二百六十一法三時二百七十，以三萬四千六百八十五字法五七三萬五千，皆為不必適等。章有大小，分章賦篇，篇趣五千，以卒其文，無所取法，猶《論》四百八十六章，章次大小，各當其事，亦無所法也。

^疏正義曰：大謂字數多，小謂字數少。分章以布於篇，每篇五千字，文即字也。「卒其文」者，七篇每篇以五千文為卒也。《論語釋文》云：「《學而》凡十六章，《為政》二十四章，《八佾》二十六章，《里仁》二十六章，《公冶長》二十九章，《雍也》三十章，《述而》舊三十九章，今三十八章，《泰伯》二十一章，《子罕》三十一章，皇三十章，《鄉黨》一章，《先進》二十三章，《顏淵》二十四章，《子路》三十章，《憲問》四十四章，《衛靈公》

①「亦」，據文意疑當作「非」。

四十九章，《季氏》十四章，《陽貨》二十四章，《微子》十四章，《子張》二十五章，《堯曰》三章。共五百六十八章，此依何晏《集解》。趙氏所云未詳所本，疑有譌字。蓋所以佐明六藝之文義，崇宣先聖之指務，王制拂邪之隱栝，立德立言之程式也。

疏正義曰：文、六書訓詁之

文也，義謂義理也。《漢書·劉歆傳》：「歆治《左氏》，引傳文辨經，轉相發明，由是章句、義理備焉。」桓譚《時政疏》云：「今可令通義理。」是也。崇猶尚也。宣，通也，發也。《淮南子·脩務訓》云「名可務立」，高誘注云：「務，事也。」馬總《意林》云：「趙臺卿作《章句》，章句曰指事。」指務即「指事」也。《大戴禮記·衛將軍文子》篇云：「外寬而內直自設於隱栝之中，直己而不直於人，蓋蓬伯玉之行也。」《鬼谷子·飛箝》篇云：「其有隱栝，乃可徵，乃可求，乃可用。」陶宏景注云：「隱栝以輔曲直。」《荀子·性惡》篇云：「故隱栝之生，為枸木也，繩墨之起，謂不直也。直木不待隱栝而直者，其性直也，枸木必將待隱栝烝矯然後直者，以其性不直也。」楊注云：「枸讀如鉤，曲也。隱栝，正曲木之木也。」《大略》篇云：「乘輿之輪，太山之木也，示諸隱栝，三月五月，為轡萊，敝而不反其常。君子之隱栝，不可不謹也慎之。」注云：「示讀為

寘。隱栝，矯揉木之器也。」《非相》篇云「府然若渠匭隱栝之於己也」。注云：「渠匭所以制水，隱栝所以制木。」《尚書大傳·略說》云：「子貢曰：『隱栝之旁多曲木，良醫之門多疾人。』《韓非子·顯學》篇云：『自直之箭，自圓之木，百世無有一，然而世皆乘車射禽者何也？』隱栝之道用也。」《難勢》篇云：「夫去隱栝之法，去度量之數，使奚仲為車，不能成一輪。」《韓詩外傳》云：「礪仁雖下，聖人不廢者，匡民隱栝，有在是中者也。」《鹽鐵論·申韓》篇御史曰：「故設明法，除嚴刑，坊非矯邪，若隱栝輔繫之正佩刺也。」《大論》篇大夫曰：「是猶不用隱栝斧斤，欲撓曲直枉也。」《書·盤庚下》篇，尚皆隱哉！某氏傳云：「相隱栝以為善政。」何休《公羊傳序》云：「遂隱栝使就繩墨焉。」《說文》木部云：「隱，栝也。」「栝，隱也。」字從木，故為矯制枸木之器。隱栝，其通借字也。《公羊疏》云：「隱謂隱審，栝謂檢栝。」《後漢書·鄧訓傳》云「訓考量隱栝」，李賢注引《荀子》而釋之云：「隱審量栝之。」失其義矣。《淮南子·本經訓》「曲拂還回」，高誘注云：「拂，戾也。」《漢書·王莽傳》云：「拂世矯俗。」此云「拂邪」者，謂矯戾其邪，使之歸於正，猶隱栝矯戾其曲木而歸於直。《荀子》有《王制》篇云：「王者之制，衣服有制，宮室有度，人徒有數，喪祭械用皆有等宜。聲則凡非雅聲者舉廢，色則凡非舊

文者舉息，械用則凡非舊器者舉毀，夫是之謂復古，是王者之制也。制度所以去民之邪，謂王者欲爲拂邪之制，則以《孟子》此書爲槩括也。《說文》木部云：「程，品也。十髮爲程，十程爲分，十分爲寸。」《史記·太史公自序》云「張蒼爲章程」，如淳云：「程者，權衡丈尺，斛斗之平法也。」《老子》云「爲天下式」，王弼注云：「式，模則也。」程式，謂尺寸模範，可用爲準則，故云「立德立言之程式」也。《文選·郭有道碑文》云「隱括足以矯時」，李善注引劉熙《孟子注》云：「隱，度也。括，猶量也。」又崔子玉《座右銘》「隱心而後動」，注引劉熙《孟子注》云：「隱，度也。」《孟子》本文無「隱括」二字，惟趙氏此《篇敘》有之。劉氏所注，未知所屬。洋洋浩浩，具存乎斯文矣。疏正義曰：《禮記·中庸》篇云：「洋洋乎發育萬物，峻極於天。」《漢書·韋賢傳》云「洋洋仲尼」，顏師古注云：「洋洋，美盛也。」《淮南子·俶真訓》云「浩浩瀚瀚」，高誘注云：「浩浩，廣大貌。」《論語·子罕》篇云：「文王既沒，文不在茲乎？天之將喪斯文也，後死者不得與於斯文也，天之未喪斯文也，匡人其如予何？」趙氏以孟子似續孔子，如孔子似續文王。孟子之後能知孟子者，趙氏始焉。

○按：孟子有不可詳者三。其一爲孟子先世。趙氏但云「鄒人。或曰魯公族孟孫之後」。《列女傳》、《韓詩外傳》

雖詳說孟母之事而不言何氏。《孟氏譜》言「父曰激公宜，母仇氏。一云：孟子父名彥璞」，未知所據。○其二爲孟子始生年月。陳士元《雜記》載《孟氏譜》曰：「孟子以周定王三十七年四月二日生，即今之二月二日。赧王二十六年正月十五日卒，即今之十一月十五日。壽八十四歲。」此譜不知定於何時，陳氏疑定爲安之譌。安王在位二十六年，是年乙巳，至赧王二十六年壬申，凡八十八年。《譜》謂「孟子壽八十四」，自壬申逆推之，當生於烈王己酉。周氏廣業《孟子出處時地攷》駁之，以爲《譜》不足據，而擬爲生於安王十七年丙申，卒於赧王十三年乙未。其爲孟子作《年譜》者，紛紛更訂，或云年七十四，或云年九十七，大抵皆出於臆，全無實證可憑。○其三爲孟子出遊。趙氏以爲先齊後梁，說者又以爲先梁後齊，或以梁惠王有後元，或以爲孟子先事齊宣，後事齊湣。攷之《國策》、《史記》諸書，參差錯雜，殊難畫一。今撰《正義》惟主趙氏，而衆說異同亦略存錄以備參攷而已，實未易折衷也。至居鄒、葬魯、之勝、過辭、遊宋、往任，其先後歲月，或據七篇虛辭以測實跡，彼此各一是非，多不足采。

○孟子弟子，趙氏注十五人：樂正子、公孫丑、陳臻、公都子、充虞、季孫、子叔、高子、徐辟、咸丘蒙、陳代、彭更、萬章、屋廬子、桃應，學於孟子四人：孟仲子、告子、滕更、盆

成括。宋政和五年從祀孟廟，去盆成括，詳《宋史·禮志》。國朝孟廟從祀，仍明制十八人，視宋政和無滕更，有盆成括。乾隆二十一年，禮部覆准，去舊時侯伯封號，改題先賢先儒，以符禮制。內樂正克、公孫丑、萬章、公都子四人皆稱「先賢某子」，陳臻、屋廬連、陳代、高子、孟仲子、充虞、徐辟、彭更、咸丘蒙、桃應、季孫、子叔、浩生不害、盆成括十四人，皆稱「先儒某氏某」。周氏廣業《孟子出處時地攷》云：「張九韶《羣言拾唾》，孟子十七弟子，去季孫、子叔、滕更、盆成括，益以孟季子、周霄。朱彝尊《經義攷》亦去季孫、子叔，而謂告子與浩生不害是二人，因去告子而列浩生不害，餘並依趙氏。宮夢仁《讀書紀數略》則易滕更、浩生不害、盆成括爲孟季子、曹交、周霄。三書數同而又互異。竊謂曹、周二，人殊無取焉。高誘注《呂覽》云：「匡章，孟子弟子。」《藝文類聚》亦然。《呂覽》有匡章與惠王又惠施問答，列從遊於梁者耶？而趙注却止言齊人。夷子逃墨歸儒，憮然受命，當在不距之科，而趙亦無明文。他若高注《淮南》有陳仲子，《史記索隱》有公明高，《廣韻》有離婁，其誤固不待辨。《通志》離氏注引《風俗通》云：「離婁，孟子門人。」則傳譌自漢矣。

○《孟子疏》舊題「孫奭撰」，錢氏大昕《養新錄》云：「《孟子正義》，朱文公謂邵武士人所作，卷首載孫奭《序》一

篇，全錄《音義序》，僅增三四語耳。晁公武《讀書志》有孫奭《音義》而無《正義》，蓋其時偽書未出，至陳振孫《書錄解題》始並載之。馬端臨《經籍攷》並兩書爲一條，云「《孟子音義》《正義》共十六卷」。引晁氏曰：「皇朝孫奭等採唐張鑑、丁公著所撰，參附益其闕。古今注《孟子》者，趙氏之外，有陸善經。奭撰《正義》以趙注爲本，其不同者，時時兼取善經，如謂子莫執中爲子等無執中之類。」今按，子等無執中之說初不載於《正義》，惟《音義》有之。馬氏既不能辨《正義》之僞托，乃改竄晁語以實之，不知晁《志》本無《正義》也。」趙氏佑《溫故錄》云：「《十三經注疏》，孔穎達、賈公彥最爲不可及，邢昺次之，以《孟子疏》爲最下。其書不知何人作而妄嫁名於孫奭，近世儒者咸謂之僞孫奭疏。予讀孫奭《孟子音義序》，體裁有類孔氏而簡潔過之，全非作疏人手筆。其題曰《音義序》而已，未嘗稱「疏」也。曰「惟是音釋，宜在討論」，曰「集成《音義》二卷」，未嘗言作疏也。故曰「雖仰測至言，莫窮其奧妙」，而廣傳博識，更俟乎發揮」。則知孫氏正本止就經文及注爲之音釋，且僅二卷，本未有疏。其所釋非第字之本音本義而已，亦時就章句有所證明，存示異同，與陸德明《釋文》仿佛，無取更有疏也。趙氏之爲《孟子題辭》，末曰「章別其指，分爲上下，凡十四卷」，即今各卷題，各章首「正義曰」下所載此章

云云以爲提綱者也。語多奧衍，時復用韻，與全疏絕不類。蓋皆趙氏原文即在各章注末，《音義》亦相綴屬。而今概棄本來，勦爲疏首，反割分《音義》之爲《章指》者於疏尾，則爲自作疏而自音之，從古豈嘗有此？疏中背經背注極多，非復孔、賈之遺，甚至不顧注文，竟自憑臆立說，與其《音義》又時相矛盾，豈有一人之作而忽彼忽此者？孫氏用心詳慎，《音義》可採者十五六，而疏不能十二。至其體例之踳駁，徵引之陋略乖舛，文義之冗蔓俚鄙，隨舉比比。朱文公指爲邵武士人作，不解名物制度，其實豈止名物之失哉？則未知孫氏之不及自爲而假手其人與？抑孫之名盛而遂有僞托之者與？」

○按：爲《孟子》作疏，其難有十：孟子道性善，稱堯舜，實發明義、文、周、孔之學，其言通於《易》，而與《論語》、《中庸》、《大學》相表裏，未可以空悟之言臆之，其難一也；孟子引《書》辭多在未焚以前，未辨今古文而徒執僞孔以相解說，往往鑿枘不入，其難二也；井田、封建，殊於《周禮》，求其畫一，左支右詘，其難三也；齊梁之事，印諸《國策》、《太史公書》，往往齟齬，其難四也；水道必通《禹貢》之學，推步必貫《周髀》之精，六律五音，其學亦造於微，未容空疏者約略言之，其難五也；「棄蹴」、「招豚」、「折枝」、「蹙頞」，一事之微，非博考子史百家，未容虛測，其難六也；古字多，轉注假借多，

賴即嬾，姑嘖即咀，嚀爾即呼，私淑即叔，凡此之類，不明六書，則訓故不合，其難七也；趙氏書名《章句》，一章一句，俱詳爲分析，陸九淵謂「古注惟趙岐解《孟子》，文義多略」，真謬說也，其注或倒或順，雅有條理，即或不得本文之義，而趙氏之意，焉可誣也？其難八也；趙氏時所據古書今或不存，而所引舊事，如陳不瞻聞金鼓而死，陳質娶婦而長拜之，苟有可稽，不容失引，其難九也；《孟子》本文見於古書所引者既有異同，而趙氏注各本非一，執誤文譌字，其趣遂舛，其難十也。本朝文治昌明，通儒徧出。性道義理之旨既已闡明，六書九數之微尤爲獨造，推步上超乎一行，水道遠邁於平當，通樂律者判弦管之殊，詳禮制者貫古今之變，訓詁則統括有書，版本則參稽罔漏，或專一經以極其原流，或舉一物以窮其窠奧。前所列之十難，諸君子已得其八九。故處邵武士人時，爲疏實艱；而當今日，集腋成裘，會鯖爲饌，爲事半而爲功倍也。趙氏《章句》既詳爲分析，則爲之疏者不必徒事敷衍文義，順述口吻，效《毛詩正義》之例，以成學究講章之習。趙氏訓詁每疊於句中，故語似蔓衍而辭多佶聱。推發趙氏之意，指明其句中訓詁，自爾文從字順，條鬯明顯矣。於趙氏之說或有所疑，不惜駁破以相規正。至諸家或申趙義，或與趙殊，或專翼《孟》，或雜他經，兼存備錄，以待參攷。凡六十餘家，

皆稱「某氏」以表異之，著其所撰書名以詳述之。彙敘於右：

崑山顧氏炎武，字亭林。蕭山毛氏奇齡，字大可。太原閻氏若璩，字百詩。宣城梅氏文鼎，字定九。安溪李氏光地，字厚菴。鄞縣萬氏斯大，字充宗。鄞縣萬氏斯同，字季野。江都孫氏蘭，字滋九。鄒平馬氏驥，字宛斯。武進臧氏琳，字玉林。德清胡氏渭，字拙明。泰州陳氏厚耀，字泗源。濟陽張氏爾岐，字稷若。錢唐馮氏景，字山公。元和惠氏士奇，字半農。婺源江氏永，字慎脩。無錫顧氏棟高，字震滄。光山胡氏煦，字滄曉。當塗徐氏文靖，字位山。震澤沈氏彤，字冠雲。常熟顧氏震，字虞東。無錫吳氏鼎，字尊彝。長洲何氏焯，字杞瞻。寶應王氏懋竑，字予中。臨川李氏紱，字巨來。元和惠氏棟，字定宇。休寧戴氏震，字東原。鄞縣全氏祖望，字紹康。嘉定王氏鳴盛，字鳳喈。華亭倪氏思寬，字存未。吳縣江氏聲，字叔湛。歙縣程氏瑤田，字易疇。曲阜孔氏廣森，字搢仲。歙縣金氏榜，字輔之。嘉定錢氏大昕，字曉徵。偃師武氏億，字虛谷。餘姚盧氏文弨，字召弓。餘姚邵氏晉涵，字二雲。興化任氏大椿，字幼植。江都汪氏中，字容甫。寶應劉氏台拱，字端臨。嘉定錢氏塘，字岳原。嘉善謝氏墉，字金圃。鎮洋畢氏沅，字秋帆。仁和趙氏佑，字鹿泉。通州王氏坦，字吉途。金壇段氏玉裁，字若膺。陽湖孫氏星衍，字

淵如。歙縣凌氏廷堪，字仲子。海寧周氏廣業，字耕厓。溧陽周氏柄中，字燭齋。績溪胡氏匡衷，字樸齋。錢塘翟氏灝，字晴川。蕭山曹氏之升，字寅谷。長白都四德氏，字文乾。平湖周氏用錫，字晉園。海寧陳氏鱣，字仲魚。甘泉鍾氏懷，字保岐。武進臧氏庸，字在東。歙縣汪氏萊，字孝嬰。高郵王氏念孫，字懷祖。儀徵阮氏元，字伯元。歸安姚氏文田，字秋農。高郵王氏引之，字伯申。甘泉張氏宗泰，字登封。

○先曾祖考諱源，先祖考諱鏡，先考諱蔥，世傳王氏大名先生之學。循傳家教，弱冠即好《孟子》書，立志爲《正義》。以學他經，輟而不爲，茲越三十許年。於丙子冬，與子廷琥纂爲《孟子長編》三十卷，越兩歲乃完。戊寅十二月初七日，立定課程，次弟爲《正義》三十卷，至己卯秋七月草稿粗畢。間有鄙見，用「謹按」字別之。廷琥有所見，亦本范氏《穀梁》之例，錄而存之。

孫授易授詩校字

孟子正義卷三十終

